


Quiarinio pueyaso rupaa pa jiyaniijia

Jesucristojiniji pueyano rupaajinia



New Testament in Arabela (PE:arl:Arabela)

Quiarinio pueyaso rupaa pa jiyaniijia Jesucristojiniji pueyano rupajinia New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022
90034700-94c6-5f48-ae9c-2383843fed68

Contents

MATEO	1
MARCO	79
LUCAS	128
JUAN	209
MIISHANO	268
ROMA	347
1 CORINTO	383
2 CORINTO	421
GÁLATA	445
ÉFESO	460
FILIPO	472
COLOSA	481
1 TESALÓNICA	488
1 TESALÓNICA	495
1 TIMOTEO	499
2 TIMOTEO	509
TITO	516
FILEMÓN	520
HEBREO	522
SANTIAGO	551
1 PEDRO	560
2 PEDRO	570
1 JUAN	576
2 JUAN	584
3 JUAN	585
JUDAS	587
NIQUISHANO	590

MATEO NAAJOTASANO JESUCRISTOJINIJI

Jesucristo supuetanaajiniji pahuatasano (Lc 3.23-38)

¹ Jesucristoori supuetana Abraham jjuhuacuajinio supueno quiquiaari, supuetana David niquiohuacuajinionio. Nioori Jesucristo supuetanaa sesaca. Naa quiquiaaritiij:

² Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. ³ Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niquiocua. Faresri Esrom que quiquiaari. Esromri Aram que quiquiaari. ⁴ Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. ⁵ Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isai que quiquiaari. ⁶ Isaiiri David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Uriás niquiocua.

⁷ Salomónri Roboam que quiquiaari. Roboamri Abías que quiquiaari. Abíasri Asa que quiquiaari. ⁸ Asaari Josafat que quiquiaari. Josafatri Joram que quiquiaari. Joramri Uzías que quiquiaari. ⁹ Uzíasri Jotam que quiquiaari. Jotamri Acáz que quiquiaari. Acázri Ezequías que quiquiaari. ¹⁰ Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. ¹¹ Josíasri Jeconías que quiquiaari, tapueyocuaca quejuhuaj. Jiyacaritiij, Israel pueyapueeri quioosaaquiaari Babilonia jiyajiniara. ¹² Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. ¹³ Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. ¹⁴ Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. ¹⁵ Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. ¹⁶ Jacoboori José que quiquiaari. Joseeri María niyaca quiquiaari. Cuno Mariári Jesu nucua quiquiaari. Jesu sesa tarajanuuri quiquiaari Cristo. Nioori pueyano rupaaajinia sequeya “Pueyaso jiyarosano Jiyaniijiarano”.

¹⁷ Naacuajitiij, Abrahamjiniiji, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritiij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiquiaari Cristo jaara rasaanquiaari.

Jesucristo rasacari pahuatasano (Lc 2.1-7)

¹⁸ Naa quiquiaaritiij Jesucristo rasacari: na nuclarano Mariári tari Joseeta camiriquiano quiquiaari. José numuetuqueyaquishacarijia María, Mariári tariucua manajaraca quiriquiaa. Pueyaso Sohuanucuaajaari na manajetequiaari. ¹⁹ Neyacarano José jaara niishiquiaari necorano tariucua manajaraca quiya, nojuajaari jiyanohua niishiriojoriquiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niquiara. ²⁰ Naa José niishiriojosacari na cartenura

juucuatej, Pueyaso seruuri nocua muetaquiaari na maquenujinia. José sequeereeri:

—Supuetana jiyaniijia David niquiohuacuajinio supueno Joseenaa, María quia camiri naajaa. Maja quia puerenu. Pueyaso Sohuanucuaajaari na manajorucuaa. ²¹ Mariari neyanu ranutaniya. Quiocua na sesojore “Jesu”. Sesa na pueya miijiosano tuujunutaniya nojori jiuujajiniijiri. Naaratej, na sesaari quiniutianiya “Jesu”.

²² Jesu rasaanuuri naa quiquiaaritij, tariucuaaanu pueyara Pueyaso sequesano caminiujjuna pohuatasano tohuateenura. Pueyasoori naa na pohuataniquiaari jiyanohua tarijiatej:

²³ “Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’”.

Nioori pueyano rupaajinia sequeya “Pueyaso pata quiyani”.

²⁴ José niucuasacari, nojuajaari naa miiquiaaritij taa Pueyaso seru sequequiaari nojuacuajani. María riquiaariiri na tiajiniaa necocuara. ²⁵ Nojoriiri maja na quiniu quiquiaari juhua seetanujuanaa camitioono, María jaara raquiaari neyanujuaatijia. Jaara na raquiaari, na sesojoreeri “Jesu”.

2

Niishjiaca tiuquiiijosacari conaajaacua

¹ Jesuuri rasaquiaari Belén tiacajinia, Judea jiyajinia. Cuno quishacari, Herodesri jiyaniijia quiquiaari Judea jiyajinia. Jesu rasaanu nuhuaji, niishjiacaari tiuquiijoquiaari Jerusalén tiacajinia. Nojoriiri Jesu niquiniuria tiuquiijoquiaari jiya pajamaji. ² Nojori tiuquiiijosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaarucuaani? Canaari niishiyani nojuajaari tari rasaarucuaa. Canaari na rija niquiquianu jiya pajamajini, canaa jiyajinia canaa quishacarijia. Canaari nocua niyareeni canaa shuquiritianura nojuaja, jiyaniijiarano na quiniuucua.

³ Jiyaniijia Herodes tojishacari naa niishjiaca sequesantej, jiyanohua tacaquiaariiri. Puetunu Jerusalén tiacajinia quiniaajanaari tacaquiaarijiuhuj. ⁴ Nocuai, Herodesri Judiocuacaacuara secjonaa sequequiaari nocua nojori nijionura, Moisés Rootasanojiniji niishitiojonaanio. Nojori tiuquiiijosacari nocua, Herodesri naa nequesoreetaquiaari nojori:

—¿Tee Cristo rasaanutaniyani, Judiocuaca jiyaniijiarantej?

⁵ Nojoriiri na riucuaquiaari:

—Belén tiacajinia rasaanutaniyano, niya Judea jiyajiniani. Naa naajiotasano quiyacuajaari Pueyaso sequesano caminiujjuna sequesano. Cuno tariucuaaanu naajiotasanojuajaari naa sequeyatej:

⁶ “Belén tiacajinia quiniaanaa, nia tiacaari maja najuhuana shiitianiyojua tiaca Judea jiyajinia. Cuno nia tiacajiniani, Jiyaniijiajanaa cutaraari supenutaniya. Nojuajaari socua cutara jiyaniijiajanaa quiniutianiya tamasaca jiyaniijiacajiniji Judea jiyajinijinio. Cunoori maninia jiitanutaniya cua pueya, Israel pueya”.

⁷ Naa pueya sequesano na tojiniu nuhuajitij, Herodesri cuno jiya pajamaji nijiono niishjiaca nequesoreetaquiaari jiyasohujaja:

—¿Taaacari rija niquishaacanuu seetanujuanaani?

⁸ Nojori riucuanu nuhuaji, Herodesri na sapojonuta nojori sequequiaari:

—Nia quiaare Belén tiacajinia. Niocua jacaria nequesoreetasee cuno mueyajiniji. Naa jaara na riuriatara, niocua cua numootecuhujaja. Janiyacua nocua quiaarejanuhuj cua shuquiritianura nojuaja.

⁹ Niishijiaca tojiniu nuhuaji naa jiyaniijia Herodes sequesano tej, nojoriiri quiojiyareecuahuaj. Jiya pajamaji na niquitiushano rijia niquitiuriiri nojori puetaano. Rijiaari pootia tiuushii tia caco, tee mueya quiriquiaacuajani. ¹⁰ Nojori niquishacari rijia, niishijiacaari jiyano hua timitiuquiaari. ¹¹ Tiaco tiuqitiaseeri. Conaaja niquitiushii na nucua Mariataari. Conaaja cuara mojoquetacoquiaariiri. Na shuqiritiatureeri. Na nuhuaji, niishijiacaari na patootasano casaa riataquequiaari, nareya na niquitiosocoriquiano conaaja. Nojoriiri na niquitioquiaari oro, shanohua jaanutaja catijiasocoriquianojuhuaj, tamaatiuucua shanohua jaanutajanio. Na sesaari tahue rupaajinia “mirra”. ¹² Na nuhuaji, Pueyasoori cuno niishijiaca sequequiaari na maquenujina, maja Herodescua nojori tacatenuhuara Herodes nojori pohuatanuhuara conajajiniji. Naacujitij, niishijiacaari tamonu nucucuhua tacatequiaariuhua na jiyajiniohuara.

Egipto jiyajiniara Jesu mashitiasaanujiniji pohuatasano

¹³ Niishijiaca jaara quiaquiaariuhua, Pueyaso seruuri Joseecua muatequiaari na maquenujina. José sequereeri:

—¡Quia sanere! ¡Conaaja quia mashitiare na nucua Egipto jiyajiniara! Quiniqui nia quishii, janiya cuara sequerohua quiajanijajaatijia. Herodesri Belén tiacajinia na pueya pajetenutaniya conaaja, na motesocoriquiano.

¹⁴ Joseeri sanequiaari. Cuno niucuaaja, conaaja mashitiaree na nucuaajaari Egipto jiyajiniara. ¹⁵ Nojori tiuquishacari Egipto jiyajinia, tii quishi-iqiaariiri, Herodes cuara cusooraajaatijia. Nojoriiri naa Egipto jiyajinia quiquiaaritij, tariucuaaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujiniacuaaja:

“Cua niyanu piiriinjia, Egipto jiyajiniji na tacatenuhuara”.

Herodes puecootesacari muerasu

¹⁶ Jiyaniijia Herodes jaara niishijiacaari cuno niishijiacaari na ruuretaquiaari saaja, Herodesri jiyano hua juaaquiaari. Na pueya jiyaroquiaari puetunu naatujoori canuuniyojuajanaa nojori puecoonura Belén tiacajinia, na shocuaqueya tiacajinia quiniaa muerasunio. Naa miiquiaariiri Jesu na monura juucua. Herodesri na pueya sequequiaari cuara puecoosaaria puetunu shusha roosanojuanaa, mariyata canapueete caapiqui marijia shocoteo quiquiaarijiani. Herodesri naa sequequiaari niishijiaca pohuatanuucua nojuaja, Jesu rijiaari tarijia niquishaaquiaari. Juhuanojuaajaari maja caapiqui marijia shocojonu quiquiaari rijia niquishaanujiniji. ¹⁷ Naacujitij, tariucuaaanu Pueyaso sequesano caminiujinia Jeremias sequesanoori tohuatequiaari. Jeremias sequesanoori naa naajiotasaaquiaar-itij:

¹⁸ “Sapuenuuri tojishiya Ramá tiacajinia. Jiyano hua taraatia. Raquelri necohuacua sariyacojiya. Majaari na paniniu na cumaniijiasaanura. Necohuari tari puecoosaarucuaa”.

¹⁹ Na nuhuaji, Herodes jaara cusoquiaari, Pueyaso seruuri Joseecua muatequiaariuhua na maquenujina, Egipto jiyajinia nojori quishacarijia. ²⁰ Na sequereeri:

—Quia sanere. Mueya quia tacaretaarohua Israel jiyajiniohuara na nucujataja. Mueya monu panijiaacari tari cusonuucuaa.

²¹ Joseeri sanequiaari. Mueya tacaretaquiaariuhua Israel jiyajiniohuara na nucujatajaari. ²² Israel jiyajinia na tiuquishacari, Joseeri numoote-saaquiaari Herodes niyanu Arquelaori jiyaniijia quiriquiaa jiyacari, na

que niti Judea jiyajinia. Nocuaji, Joseeri puerequiaari quiniqui na quiniuria. Jiyacarijuhuaj, Pueyasoori na niishitioquiaari na maquenujinia, tamocora na quianura. Naaratej, Joseeri mueya nucua pacuquiaari Galilea jiyajinara. ²³ Galilea jiyajinia nojori tiuquijiosacari, Nazaret tiacajinia quishiiri. Naacuajitij, tariucuacaanu Pueyaso sequesano caminiujiunaa sequesanoori tohuateequiaari nojori jaara naa naajiotaqueaaritij: “Jiyaniquishaanutaniyari Nazaret tiacajinijinio pueyano”.

3

Tiuquinijiona Juan pohuatasacari cariiquia jiyajinia (Mr 1.1-8; Lc 3.1-9, 15-17; Jn 1.19-28)

¹ Na nuhuaji, tamonu pueyanoori cariiquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niquiara. ² Naa pohuataquiaaritij:

—¡Nioojia nia tacatore sesa nia miiniujiniji! Pueyasoori tari nia jiyanooni paniya, na muerasu nia quiniuria seetanujuanaa.

³ Jiyanohua tarijia, Pueyasoori na pueyano Isaías pohuataniquiaari miriqui na sequenu panishano pueyara. Isaíasri naa na pohuataquiaaritij: “Pueyano rupaari tojishaaree cariiquia jiyajinia. Naa nacajoriquiaari: ‘Nia jeecanamitiri jiyaniijia nuu, maja mojoquetunu na quiniuria’ ”. Tiuquinijiona Juanjanaacuajaari nio tariucuacaanu pohuatasano tohuateequiaari, pueya na niishitiojosacari nojori jeenucuanura nojori jiuujia Jesuucua.

⁴ Cuno Juan toqueeri camello cajacajiniji shitiasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariiquia jiyajinia na riuriatasano sequeru, samiyatunio.

⁵ Pueyari Juancua quiojoquiaari na tojtianura. Queraatia pueyari nocua quiojoquiaari Jerusalén tiacajinijinio, Judea jiyajinijiniojuhuaj, puetunu Jordán moo shocuaqueyajinijiniojuanaano. ⁶ Pueya jaara pohuataquiaari Juan niquiara sesa nojori miijioso, Juanri nojori tiuquinijioquiaari Jordán moojinia, Pueyaso tojiijara nojori quiniu panishacari.

⁷ Na tiuquinijiosacari pueya, Juanri queraatia Fariseocuaa niquiuciaari nocua nijiyano, Saduceocuaanio. (Nojoriiri Moisés Rootasanojiniji niishitiojonaa quiquiaari.) Tiuquinijiona Juanri nojori sequequiaari:

—¡Niaaquiiri sesa pueya, juhua sacocua! ¿Cante nia numooteree nia mashiniuria Pueyaso saniitionuucuaaji nijajaniyani? Nio pa quishacarini, quera Pueyaso saniitiosacari jiyanohua na ruuretajaca pueya. ⁸ Niaa jaara seetanujuanaa nioojia tacatore sesa nia miiniujiniji, ¡saaja maninia nia miiri, maja sesa! ⁹ Majaari nia jyaniniu niaari Pueyaso muerasu, Abraham niquiohuacuajinio supueno nia quiniucua. Cua tojiri, Pueyaso jaara paniri, nojuajaari na naata Abraham niquiohuara shipininiu nio saijinijijihuaj. ¹⁰ Nio miriqui sequesano nia tojirijihuaj pueyanaa. Naana jaara maninia jajau muetuyaquiri, na camaruuri na nuya na catijasocoriquiano. Naajuhuaj, Pueyasoori quera saniitionutaniya nijajaniya, na tojiyashijiaca nia quiniucua.

Tiuquinijiona Juanri pueya sequequiaari socua:

¹¹ —Janiyari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriquiano cutara. Nojuajaari jiyanohua socua jiyaniijiajanaa janiyajiniji. Janiya maara jiyanohua shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. ¡Nojuajaari jiyaniijiajanaa cutara!

Nojuajaari Pueyaso Sohuanu tiuquinijionutaniya nioojiajinia, cumaacaracia quiniuria, seetanu Pueyaso muerasujuanaa nia quiniuria. Nia jeequenutaniyajaariuhua juhua manitia, sesa nia miishanojiniji. ¹² Nia tojitiare miriqui cua sequesano. Trigo jaara rapijiosaare maninia, na camaruuri na queyaroojua, jiyocuacaanuji na totinijasocoriquiano. Naa miqiaari paratu cuaara paara na cocua, na sucuanio, na jajau na racatanura tiajiniaaco. Naajuhua, cua nuhuaji niniaari tariucua pueca, na tojtianaa na rijionura na quiquojinara, saniniuuja na tojijashijaca na quejoonura manijinia na sanitionura, tee mani maquesaaquiyacuajani.

Jesu tiuquinishacari moojinia
(Mr 1.9-11; Lc 3.21-22)

¹³ Na nuhuaji, Jesuuri tiuquiquiaari Galilea jiyajiniji Tiuquinijiona Juan-cua, Jordán moojinia. Tiuquinijiona Juan sequeseeeri:
—Cua tiuquinirijia.

¹⁴ Juanri saaja na sequereeri:
—Maja jiyaniijianaa. ¡Quiaa cutaraari maninia pueyano! ¿Casaara cucua quia nimiaa cua tiuquininiuria quiajaniya moojiniani? ¡Cua tiuquiniri juhuari cutara!

¹⁵ Jesuuri saa sequereejaa:
—Quiarijia quia miiri cua panishano. Cua tiuquiniri naajaa. Maniniaari pa miiniuria puetunu Pueyaso panishanojuanaa.

Naacuajitij, Juanri na tiuquiquiaari. ¹⁶ Jesu jaara tiuquinishaaquiaari, nojuajaari ritia tacaquiaari moojiniji. ¡Jiyacaritij, jiya cajiniocuaari riateguee! Jesuuri Pueyaso Sohuanu niqiquiaari nocua roseyano juhua mococonu niqishano. Nocua tiuushiiri. ¹⁷ Jiyacaritij, jiyocuacaanuji Pueyaso rupaari tojishaaree naa sequeyano:

—Nioori cua Niyanuniyojua. ¡Na shuquiritiaa jiyanojuanija!

4

Samaruhua jiyaniijia saniniujiushacari Jesu
(Mr 1.12-13; Lc 4.1-13)

¹ Na nuhuaji, Pueyaso Sohuanuuri Jesu jiyataquiaari cariquia jiyajiniara, Sesaaca saniniujiushocoriquiano cuniqui.

² Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri. ³ Sesaacaari jiyacari nocua niquiaari na saniniujuniuria. Jesu sequeseeeri:

—Quiaa jaara seetanujuanaa Pueyaso Niyanu quiri, nio sai quia jataniri panra. Quiocua na sarohua.

⁴ Jesuuri saaja na riuuaree:

—Maja. Pueyaso Rupaajiniacuajaari naa naajiotasano quiyatej:
“Pueyanoori maja na naatanu saa miaquesanoocuaaja. Seetanujuanaa saminio quia cutaraari na tojishacari puetunu Pueyaso Rupaajanaa”.

⁵ Na nuhuaji, Sesaacaari Jesu jiyataquiaari Jerusalén tiacajinia. Na njuateguiaari jiyocuacaanuuri, Pueyaso Secojoja tia cacojiria. ⁶ Na sequereeri:
—Quiaa jaara seetanujuanaa Pueyaso Niyanu quiri, niqijiji quia jaataare jiyocua. Pueyaso Rupaajiniacuajaari naa naajiotasano quia:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiacua quia jiriataaquiniucuaaji”.

⁷ Jesuuri na riuuaree:

—¡Maja! Pueyaso Rupaajinia, naa naajiotasanoori quiyajuhuaaj:

“Maja quia saniniujiuniu quia Jiyaniijia Pueyaso”.

⁸ Na nuhuaji, Sesaacaari Jesu tacaniquiaari socua jiyanojua jiyaconaja tuhananuucua. Cuniqiji na niqitiri puetunu quia jiyaniijiacajanaari. Jiyanojua cumaacaraca quijiaca. Jiyanojua queraatia casamiriaca quijiacajuahuaj. Jiyanojua maninia niqishano. ⁹ Jesu sequereeri:

—Janiyacua quia jiyatere jiyaniijajanaara nojori nitini, quiaa jaara cua cariquimijia mojoquetare quia shuquiritianura janiya, quia jiyaniijia cua quiniuria.

¹⁰ Jesuuri na sequereeri:

—iNiiqiji quia quiaare Satanásnaa! Naa naajiotasano quiyacuajaari Pueyaso Rupaajinia:

“Saaja quia Jiyaniijia Pueyaso quia shuquiritiare cutara. Saaja nojuaja quia tojiri”.

¹¹ Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niqiaari na mianuutenura.

Jesu cotelesacari poonijionu Galilea jiyajinia

(Mr 1.14-15; Lc 4.14-15)

¹² Jesu niishishacari Tiuquinijiona Juan nujuatesaarucuaa nujuatejojua-jinia, nojuajaari Galilea jiyajinia quiaquiaariuhua. ¹³ Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno quia quiquiaari Zabulón niqiuohuacuajinio supueno pueya jiya, Neftalí niqiuohuacuajinio supueno pueya jiyano. Zabulón, Neftalínio, nojoriiri supuetana Jacobo niqiuohua quiquiaari. ¹⁴ Jesu quishacari cuno jiyajinia, naa tohuateequiaariiri taa tariucuacaanu Pueyaso sequesano caminiujunia Isaías pohuataquiaari cuno jiyajinjicujani. Nojuajaari naa pohuataquiaari Pueyaso niishitiosano nojuaja taa na nuhuaji na sequesano tohuateenutaniyani:

¹⁵ “Zabulón pueya jiya, Neftalí pueya jiyano, cunoori caminia shuriuquimia neteja nucuama quia, mariyata Jordán moo tamajiria. Cunoori mariyata Galilea jiya, tee taucuaca quiyacuajani. ¹⁶ Cuno jiyajinia quiniari ninishiqui quijiaca quiquiaari. Quiarijia saniniuuja, nojoriiri jiuujia Cuhuatana niquiriucuaa. Nojoriiri cusonu pueretujuaca quiquiaari tarijia. Quiarijia cutara nojoriiri cuhuatasaare nojori puerayaquiniucujia”.

¹⁷ Jiyacaritij, Jesuuri Pueyaso rupaa pohuatanu coteequiaari. Naa sequeriaariiri:

—Nioojia nia tacatore sesa nia miiniujiniji. Pueyasoori nia paniya na pueya nia quiniuria.

Jesu saquiriojosacari sapitiaaja ritanaa

(Mr 1.16-20; Lc 5.1-11)

¹⁸ Jesuuri Galilea caminia shuriuquico rucanejoriquiaa. Jiyacaritij, Pedro niqiriiri, tarajan Andrésnio. Pedro sesa quiquiaarijuhuaj Simón. Nojoriiri sapitiaaja ritanaa quiquiaari shiyaruta. Nojoriiri jiyacari shiyaru jaquerooriquiaa. ¹⁹ Jesuuri nojori sequereeri:

—iMiji! Cua tarajare. Cua pueyara nia quiri. Janiyacua nia jiyatere pueya quioojuara saniniunijia, juhua sapitiaaja quioona.

²⁰ Nojoriiri na shiyaru tiujiaquiaari ritia. Jesuta quiojijareeri.

²¹ Jesuuri shiitianiyojua socua rucanequiaari na tacoji. Socua caapiqui pueya riariataseeri. Nojoriiri quiquiaari Santiago, tarajan Juannio. Cuno pojori queeri quiquiaari Zebedeo. Nojoriiri na queta quiriquiaa botejinia. Na shiyaru cushipirijionuuriquiaari. Jesuuri Santiago sequereeri Juannio, na

pueyara nojori quiniuriajuhuaj. ²²Nojoriiri ritia bote tiujiaquiaari na queta, Jesuta na quiojonura.

Jesu niishitiojosacari queraatia pueya

(Lc 6.17-19)

²³Jesuuri puetunu Galilea jiyajiniajanaa rucuanajoquiaari na saquiriojosano pueyata. Pueyaso secojoja tiacajiniaqueya niishitiojoriquiaari. Pueyaso rupaa pohuatariquiaari taa Pueyaso jitianu paniya maninia na pueyani. Puetunu tamaatia cusonuunu jiitiacojuajanaa naatanijioquiaariiri. Puetunu nootunejaca pueyajanaa shaataquiaariijaariuhuj. ²⁴Naa maninia na miishanoori poojotasaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhujanaa, puetunu tamaatia cusonu jiitijacajanaano, cumatacuruhuana cusosuhujahuaj, nootunejicano. Nocua jiyatasaaquiaarijuhuaj samaruharaca quijiaa, canashyaquiji cusojonujuacano. Jesuuri nojori naatanijioquiaari puetunujuanaa. ²⁵Jiyanohua queraatia pueyari Jesu nuhuajquiaari Galilea jiyajiniji, Decápolis tiacajinijinio. Na nuhuajquiaarijuhua Jerusalén tiacajinijinio, Judea jiyajinijiniojuhuaj, mariyata Jordán moo taquijiria jiyajinijionio.

5

Jesu pohuatasacari Pueyaso rupaa tuhuananujiniji

(Lc 6.20-23)

¹Jesu niquishacari jiyanohua queraatia pueya nocua niyano, nojuajaari tuhuananuucua tacaquiaari tiji na cajiniuria. Na saquiriojosano pueyari nocua catecanoquiaari. ²Jesuuri nojori niishitiojonu coteequiaari. Naa na pueya sequereeri:

³—Shuquiriaatia quijiaa cutaraari noo pojori, canapuate niishiyani noojia sesa quiya. Nojoriiri Pueyaso pueyara quiriquiano, pueyaracaanu na jitianura nojori.

⁴Shuquiriaatia quijiaa cutaraari noo pojori canapuate taraatia quiyani sesa na miiniucua. Pueyasoori nojori cumanijanutaniya.

⁵Shuquiriaatia quijiaa cutaraari noo pojori, canapuate maja tama nerajaaja niishiriojuacani. Nojoriiri nio jiya camaruhua quiniutianiya, taa Pueyaso sequequiaaricujani.

⁶Shuquiriaatia quijiaa cutaraari noo pojori, canapuate maninia quiniucua jiaatiaa jiyanohuani, taa pa jiaatiaacuaa miaquenuucuaní. Pueyasoori maninia quijiacara nojori jiyatenutaniya.

⁷Shuquiriaatia quijiaa cutaraari noo pojori, canapuate naquiya miishanoocua taraajejani. Pueyasoori nojoriicua taraajenutaniyajaacuhuj.

⁸Shuquiriaatia quijiaa cutaraari noo pojori canapuate maninia jiuujaracani. Nojoriiri Pueyaso niquiniutianiya cutara.

⁹Shuquiriaatia quijiaa cutaraari noo pojori, canapuate pueya jiyanooototejani. Nojoricuajaari Pueyaso muerasu quiniutianiya.

¹⁰Shuquiriaatia quijiaa cutaraari noo pojori, canapuate naquiya miishanoni, Pueyaso panishano nojori miiniucua. Pueyasoori nojori jitianutaniya pueyaracaanu shuquiriaatia, na muerasu nojori quishacari.

¹¹Shuquiriaatia quijiaa nijaniya, tamasaca jaara nia macaatiri cua tojtijacaa nia quishacari, naajuhuj, nojori jaara miya naquiya nijaniya. Naajuhuj, niaari shuquiriaatia quijiaa, nojori jaara saquiriojotare niaacuara na sapojonuta, maninia nia tojiniucua janiya. ¹²Niaa jaara naa miishaaretej, jiyanohua nia timiquiore. ¡Shuquiriaatia nia quirijihuj! Pueyasoori cunora jiyanohua maninia nia miiniutianiya jiyocuaanu nia

quishacari nata. Tariucuacaanu Pueyaso sequesano caminiujiuniaacua-
jaari naa naquiya miishaaquiaarijuhuaj, nia supueyaquishaacarijyjoia.

*Pueyaso muerasuuri juhua shoni quiya mijiria, juhua ninishiqui cuhu-
atanaajuhuaaj*

(Mr 9.50; Lc 14.34-35)

¹³ Mijiria, niaari juhua shoni quiya, mijiria quiniaa mariqui socua sese-
yareeri. Shoni jaara na tiquiriiquia jatama, ¿maatucua taa tiquiriiquiara
quiriohuani? Maja na naata. Shoni jaara naa quiriritij, najuhuana quiyari,
shaaca. Jiyano shoni cuara jataaaria nuujinia, pueya rapijosocoriquiano.

¹⁴ Naajuhuaaj, niaari juhua ninishiqui cuhuatana mijiria quiniaara. Tiaca
jaara tuhananuucua quiri, majaari na naata na jamaaniu. ¹⁵ Naajuhuaaj,
pueya jaara samaritiu noshitiri, jiyocuacaanu morotashiyari, tiaco na cuhu-
atanura maninia, pueya niquniuria maninia nocuaji. Majaari samaritiu
niatasaanu conatu cariquiaco. ¹⁶ Naajuhuaaj, nijaniya cuara maninia mi-
ria pueya niquiara. Maninia nia miishacari, niaari pueya cuhuataa juhua
samaritiu. Naa maninia mijija nia quishacaritij, pueyari jiyocuacaanu
Quijia nia Que Pueyaso maninihuaqueetanutaniya.

Jesu niishitiojosanoori tariucuacaanu Moisés Rootasanojiniji

¹⁷ Majaari nia jyaniniu janiyari niqiaarini Moisés Rootasano cua
tarinitiniuria nijaniya, Pueyaso sequesano caminiujiuniaa rootasano.
Maja. Niqiaari cutaranijia puetunu cuno rootasanojuanaa cua tojiniuria,
cua tohuateenurajuhuaaj. ¹⁸ Pueyanaa, seetanujuanaa nia sequeyanijia.
Nio jiya quishacarijia, jiya cajiniocuanio, majaari quenaaja niquriyatu
naashanoniyojua Pueyaso Rupaajiniji shaajetesaanu quiniutianiya. Ma-
jaari na shaajetesaanu quiniutianiya puetunu Pueyaso naajotesanojuanaa
cuara tohuateerejaatijia. ¹⁹ Naaratej, tamonu pueyano jaara jyaniri ta-
monu rootasano tariucuacaanu Pueyaso Rupaajiniji najuhuana sequesano,
nojuajaari cocuaatia miya. Nojuaja jaara cuno tariucuacaanu rootasano
tojiaquiri, cuno pueyanoori socua rerequetesano quiniutianiya narta
Pueyaso muerasujinijinio. Naajuhuaaj, nojuaja jaara pueya niishitiojore no-
jori tojiyaquiniuria cuno rootasano, cuno pueyanoori socua rerequetesano
quiniutianiya puetunu narta Pueyaso muerasujinijijianaa. Saniniuujia,
cante tariucuacaanu Pueyaso rootasano tojiqiaanjia, na niishitiojoquiaa
tamasacajaarihuaj, cuno pueyanoori socua tojishano pueyano quiniu-
tianiya Pueyaso shuriucua jiyocuacaanu. ²⁰ Nia numooteyanijia, niaa jaara
quiyaquiri socua maninia quijiaca Fariseocuacajiniji, Moisés Rootasano
niishitiojonaajinijinio, majaari Pueyaso muerasu nia quiniu quiniutianiya.

Jesu niishitiojosano maja pa juaaniuria

(Lc 12.57-59)

²¹ Niaacuajaari tojiqiaari taa pa supuetanaa sequesaaquiaaricuaajani:
“Maja monu. Cante pueyano monani, nojuajaari nequesoreesaanutaniya”.

²² Janiyari saniniuujia nia niishitiojiyani, cante narta pueyanota juaajiani,
cunoori nequesoreesaanutaniya. Naajuhuaaj, cante narta pueyano saari-
jiojuani, cunoori nequesoreesaanutaniya jyanijianucua niquiara. Naa-
juhuaaj, cante narta pueyano sesacareeni, cunoori quera jatashiya mani
quiquiojinia, pueyacaanu saniitosocoriquiano.

²³ Naacuajitij, nia niqutionu panishacari Pueyasora nia casaa, niaa jaara
jiyacari niishiqui, quiaari quiarta pueyano juaatiriucuaa quiocuara, ritia
quia tuijare cuniqui quia niquitiosocoriquiano Pueyasora, catijaja shuriu-
cuan. ²⁴ Quiarta pueyanota quia jyanootioocoocuara coteenu. Na nuhuaji
cutara quia naata niqutionu quia casaa Pueyasora.

²⁵ Tamonu jaara quia jiyataa nequesoreenaacua, sesa quia miiniucua nojuaja, maninia quia pohuatara ritia nojuaja, taa quia miiniutianiyani na jiyanoonuria quiajaniya. Ritia nia jeecatoore nucuaco nia quiasacarijia, quiaa mariqui nequesoreena niquitiosaareeri. Nequesoreena naasucuaari quia niquitionutaniya nujuatejojua camarnu saniniuuja. Nojuajaari quia nujuatenutaniya nujuatejojuaajinia. ²⁶ Seetanujuanaa nia sequeyanijia, maajaari quia tohuatanu quiniutianiya, quiaa cuara niquitiorejaatijia puetunu na sequesano cumaneecajanaa quia cumaneecajiniji.

Jesu niishitiojosano, maja pa camishoo maajicua pa jiaataaquiniuria

²⁷ Niaacuajaari tari tojiqiaari nio tariucuacaanu rootasano: “Maja tamonu niquiocua numuetucunu”. ²⁸ Janiya cutaraari nia sequeyani, pueyano jaara na camishoo maaji niquiri nocua na jiaatianuta, cunoori juhua na numuetucuree tari noojajinia.

²⁹ Na nuhuaaji, Jesuuri nio miriqui sequesano sequequiaari pueyara, jiyanohua na niishitiojonura nojori:

—Naaratej, quia miaquetajara quia namijia jaara sesa miitiri quiajaniya, quia namijia quia jiatere. Tamocora quia jatara. Quiajanijara socua maninia cutaraari namijijiu quia quiniuria, maja quia jatasaanura mani quiquiojia puetunu quia cuaqueyatajanaa. ³⁰ Naajuhuaaj, quia miaquetajara quia numatu jaara quia miitiri sesa, quia jiyatarenaj. Tucuacaanu quia jatara. Socua maninia cutaraari quia quia jiyatanura quia numatu, maja puetunu quia cuaqueyatajanaa quia jatasaanura manijinia, pueyaracaanu quia miiniuria naquiya tii.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

Jesu niishitiojosano maja pueya cartenura necocua

(Mt 19.9; Mr 10.11-12; Lc 16.18)

³¹ Jesuuri naa niishitiojoquiaarijuhuaj:

—Pa supuetanaari naa rootasaaquiaarijuhuaj: “Pueyano jaara necocua cartere, maaji cuara niquitiosaaria naajionee, pueya niishiniuria neyacaqui na carteree”. ³² Janiyari saniniuuja nia sequeyanijia, pueyano jaara necocua cartere, sesa miya Pueyaso niqiaari. Naacuajitij, na cartesano maajiiri tamonuta quiniutianiya na nuhuaaji. Cunoori sesa Pueyaso niqiaara. Pueyano jaara niishiri necocuaari tamonu caya numuetucujutequaa, saa cunoraja cutara na naata na cartenu. Pueyanoori sesa miya juhuaj, jaara cartesano maaji camiri.

Jesu niishitiojosano maja pa sapojonura

³³ Niaari tarijia tojtiaquiaari taa pa supuetanaa rootasaaquiaarinini. Naa rootasaaquiaariiri: “Majaari nia jatanu nia sequesano, niaa jaara sequere: ‘Seetanujuanaari cua sequesano. Pueyasocuaajaari niishiya majaari cua sapojonu’”. ³⁴ Janiya cutaraari nia sequeyani, nia sequesano jaara seetanujuanaa sequesano quiri, saaja nia sequere “jaa”. Jaara seetanujuanaa quiaquiri nia sequesano, saaja nia sequere “maja”. Majaari nia sequesano nia maatenu najuhuaana naatej: “¿Janiyate sapojouani? Cua rupaari juhua jiya cajiniocua. Maja na jatanu quiniutianiya”. Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso quiquio? ³⁵ Naajuhuaaj, ¿casaara nia sequequiaa najuhuanani: “Cua sequesanoori juhua pa jiya? Majaari na shaajenu quiniutianiya”. Maja naa sequenutej. Pa jiya, cunoori Pueyaso niaja na niohuaca. Naajuhuaaj, ¿casaara nia sequequiaani: “Cua sequesanoori juhua Jerusalén tiaca? Pueyaracaanu quiniutianiyari”. Maja naa sequenutej. Jerusalén tiacaari pa Jiyaniijia

Pueyaso tiaca. ³⁶ Naajuhuaaj, ¿casaara nia sequequiaa naa najuhanani: “Quia naataari cua sequesanoocua tiuuniu, cua naca quishacarijia”? Majaari naa sequenutej pueyanaa. Niaa jaara naa sequeretej, nia niishiri, majaari nia naata quenaaja niquimi nia muesujiniinjio nia jiyatenu taar-iuria, muerumuecaranio. ³⁷ Naaratej, pueyaracaanu saaja setanujuaanaa nia sequere “jaa”, “maja”. Cante na sequesano maatejani, cunoori Sesaaca niishitiojosano nijaniya.

Jesu niishitiojosano maja pa naminiuria
(Lc 6.29-30)

³⁸ Niaacuajaari tari rootasaquiaari: “Pueyano jaara tamonu pueyano namijia cocuartare, na namijia cuaara cocuartasaariajuhuaj, pueya nequesoreenaa niquiara. Naajuhuaaj, pueyano jaara tamonu pueyano quiaja shaatare na pishacari, na quiaja cuaara shaatasaariajuhuaj”. ³⁹ Janiyari saniniuujia nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacuajitij, pueyano jaara quia maseca piri, majaari juaaniu. Quia jiyanoori. Nojuaja jaara socua quia piriohua, quia jiyanoori. Majaari na naminiu. ⁴⁰ Pueyano jaara quia toque jaarutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niqutiore nareja. Majaari jamueja quia quiniu. ⁴¹ Tamonu camarnu jaara quia sequere na naacutanura na casami quia jatanura nuu cajiniocua, majaari na tarijionu. Saniniuujia, shuquiriaatia quia naacutare na casami jatanura socua tucuacaanu na sequesanojiniji. ⁴² Tamonu pueyano jaara quia casami masenu paniya nera, quia niqutiore nareja. Naajuhuaaj, tamonu pueyano jaara quia casaa panu paniya nareja rupaquijjara, quia niqutiore. Majaari na ruuretanu. Capora quia quiri.

Jesu niishitiojosano pa paraca pa paniniuria
(Lc 6.27-28, 32-36)

⁴³ Niaacuajaari nio tariucuacaanu sequesano tojitiaquiaarijuhuaj: “Quia shuriucua quinia quia paniri. Saniniuujia, majaari quia paraca quia niquiniu”. ⁴⁴ Janiya cutaraari nia sequeyani, nia paraa nia paniri. Nia sesacaja pueya nia maniniuuaqueetare pueya niquiara. Pueyano jaara niaacuara saquiriojotare na sauponuta, nocuara nia secojore Pueyaso. Sesa nia miiniaacuara nia secojorejuhuaj. ⁴⁵ Naa maninia nia miishacar-itij, niaari setanujuaanaa jiyocuacaanu Quijia nia Que Pueyaso muerasu quiniutianiya. Nia niishiri, Pueyasoori pananu muetaniquiaa sesa pueyara na janura, maninia pueyara na janurajuhuaaj. Pueyasoori maru niti-quiaa maninia miijica pueyara, sesa miijicarajuhuaaj, maninia nojori nataacuaca moritianura. ⁴⁶ Naa jaara saaja nia panijica pueya panijia quiriquia, ¿Pueyasoteeri cunora nia shuquiritianutaniya, socua na casaa-jiniji na niquitionura nijaniya? Maja. Sesa miijica pueyani, noo pojori canapute cumaneeca masejoquiaa na sauponutani, nojoriiri maninia miiquiaa na panishano pueyajuhuaaj. ⁴⁷ Naa jaara saaja nia panishano pueya saruhuataquiaa, ¿niaateeri cunora maninia miijica quiya Pueyaso niquiara? Maja. Pueyaso niishiyashijica pueyari naa maninia miiquiaa na panishano pueyajuhuaaj. ⁴⁸ Naaratej, maninia miijica nia quiri juhua jiyocuacaanu Quijia nia Que Pueyaso. Nojuajaari setanujuaanaa maninia miijia. Rimiajata miyashijia cutara.

1 Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuhuaqueetanura niajaniya. Pueya jaara nia maniniuhuaqueetare maninia nia miiniuucua, nia Que Pueyasoori maja na niquitionu quiniutianiya niajaniya socua, maninia nia miiniuucua. 2 Naaratej, niaa jaara casamiijuiniucua pueya niquitionu paniri nareja nia casamijiniji, majaari juhua sesa jiuujaraca pueya nia miiniu. Cuno pojoriiri pueya numootequiaa na niquitionu panishacari na casaa, puetunu pueyajanaa shootianura nojori. Cuno pojoriiri naa miiquiaaqui Pueyaso secjojua tiacajinia, tiacaacacajuhua, pueya maniniuhuaqueetanura nojori. Seetanujuanaa nia sequeyanijia, cuno pojoriiri tari maseree narta pueya maniniuhuaqueetanu. Majaari nojori masenu quiniutianiya socua Pueyasojiniji naa maninia nojori miiniuucua. 3 Saniniuujia, niaa jaara nia casaajiniji casamiijuiniucua niquitionu paniri nareja, quia mueneca cuaara niishiyaquiri quia niquitiosano quia miaquetajata. 4 Naa miriqui sequeree niajanianijia cua niishitiojonura niajaniya, jiyasohuaja nia miiniuria puetunu maninia nia miiniu panishanojuanaa. Naacujitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacuaajari nia niquitionutaniya na casamijiniji, na shuquiritiasacari niajaniya.

*Jesu niishitiojosano naa pa secjonura Pueyaso
(Lc 11.2-4)*

5 N'ia secjosacari Pueyaso, majaari juhua sesa jiuujaraca pueya nia miiniu. Cuno pojoriiri Pueyaso secjonu maniniucuaquiaa na nujuanuta pueya niquiara, saaja pueya shootianura nojori. Nojoriiri naa secjonuquiaa Pueyaso secjojua tiacajiniatej, tiaca nuucujinijuhua, tee queraatia pueya quiyacuajani. Seetanujuanaa nia sequeyanijia, cuno pojoriiri tari maniniuhuaqueetasaareecuaja. Jiyano pueyatej, majaari nojori masenu quiniutianiya socua Pueyasojiniji. 6 Niajaniya saniniuujia, nia secjosacari Pueyaso, nia sohucamara nia tiuquiri. Nia tiotiu nia tiore. Na nuhuaji, cuniqui nia Que Pueyaso nia secjore jiyasohuaja tamajaaja. Nia Que Pueyaso niquishacari naa jiyasohuaja nia miishanotej, nojuaja cutaraari nia niquitionutaniya na casamijiniji, na shuquiritiasacari niajaniya.

7 N'ia secjosacari Pueyaso, majaari nia sequesano pacutejojua nia quiniu puera, juhua Pueyaso niishiyashijia. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano. 8 Majaari juhua nojori nia miiniu. Pa secjojiaquishaacarijiyojua, pa Que Pueyasocuaajari tari niishiya casaa pa paniyani. 9 Naaratej, naate nia secjore:

“Canaa Quenaa, quiaa cutaraari jiyocuaaanu Quijia. Pueya cuaara niishiiria quiaari saaja maninia quijia. 10 Quia quiri canaa Jiyaniijia, canaa quia jitianura. Quia panishano cuaara miishaaria mijiria, taa jiyocuaaanu na miishaaquiaacuaani. 11 Canaa quia niquitiore canaa miaquesocoriguiano quiarijiani. 12 Canaa quia jiyanoori sesa canaa miishanojiniji, taa canaa jiyanooquiaa tamasacuaani, sesa nojori miishacari canaa. 13 Majaari canaa quia shanacunu canaa saniniujiushaanura sesa canaa miiniuria. Saaja canaa quia cojuare cutara Sesaacacuaji. Saaja quiajaniya cutaraari seetanujuanaa Jiyaniijijanaa. Quiaa cutaraari puetunu cumaacaracajanaa. Quiaari shanohua shacantuuca quijia cutara. Quiaari naa quijia pueyaracaanutej. Tariucuaaja”.

14 Naatej, niaa jaara jiyanoori tamasaca, sesa na miishacari niajaniya, nia Que Pueyasoori nia jiyanooniutianijuhua. 15 Saniniuujia, niaa jaara

tamasaca jiyanoyaquiri, nia Que Pueyasoori maja na jiyanooni quiniutianiya niajanijajuhuaaj sesa nia miishanojiniji.

Jesu niishitiojosano taate pa naata miaqueyaquiniuni Pueyaso pa secojonura

¹⁶ Naa jaara miaqueyaquiya Pueyaso nia secojonura, majaari macuhua-jeconu pueya niqiuara, taa sesa jiuujaraca pueya miiquiaacuaani. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutaranijia, narta pueyari tari nojori maniniuhuaqueetareecuaja. Majaari Pueyasojiniji nojori masenu quiniutianiya socua. ¹⁷ Nijaniya saniniuuja, nia miaqueyaquishacari Pueyaso nia secojonura, nia jiquoco nia jeequere. Nia canuure nia muesu, taa nia miiquiaa pueyaracaanucujani. ¹⁸ Naa nia miiri Pueyaso nia secojosacari, maja pueya niishiniuria cunoqui miaajeya. Saaja pa Que Pueyaso cutara cuaara niishiiria nia miishano. Naacujitij, nojua-jaari nia niqutionutaniya na casamijiniji na shuquiritianuucua nijaniya.

Pa casami pa racatare jiyocuaaanu Pueyaso shuriucua
(Lc 12.33-34)

¹⁹ Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenutaniya. Tiyarashiniutianiyajaaruhuaaj. Nohuasenuujuacaari nocua tiuquiniutianiya na nohuasenua. ²⁰ Nia racatare cutara nia casami Pueyaso shuriucua jiyocuaaanu. Tii cutaraari shaaqui surequeya, shaaqui tiyara. Naajuhuaaj, nohuasejojaari maja na naata nocua tiuquiniu tii, jiyocuaaanuji nia casami na nohuasenua. ²¹ Naa jaara nia casami racatare mijiria, niaari nocua niishiriojonutaniya pueyaracaanu. Nia casami jaara racatasano quiri Pueyaso shuriucua saniniuuja, niaari Pueyasocua niishiriojonutaniya. Majaari nia tacaaniu quiniutianiya mijiria casaacua tari.

Pa cuaqueyajinia cuhuatanajiniji pahuatasano
(Lc 11.34-36)

²² Pa namijaari juhua poojia cuhuatana. Naacujitij, paa jaara sesa casaacua jiaatiaashijia quirini, poojiaari juhua cuhuashiqui quiya maninia. ²³ Naa jaara sesa casaacua jiaatiaajaca quiri saniniuuja, nioojiaari juhua ninishiqui quiya. Nioojia jaara sesa casaacua jiaatiaja quiri, nioojiaari socua ninishiqui quiya cariojojuaru pueyanojiniji.

Pueyaso panijia pa quiri, maja cumaneeca panijia
(Lc 16.13)

²⁴ Maja nia naata poonijionu maninia caapiqui camarnura. Naa jaara caapiqui camarnuraca quiri, niaari tamonu paniniutianiya, niaari saniniuuja tamonu niquniu paniaquiniutianiyacujua. Naacujitij, niaari shuquiriaatia poonijionutaniya nia panishano camarnura. Niaari tamonu soojotanutaniyacujua. Naajuhuaaj pueyanaa, majaari nia naata Pueyasora poonijionu maninia, cumaneecaacua nia jiaatiasacarijuhuaaj.

Pueyaso na muerasu cojuaja
(Lc 12.22-31)

²⁵ Naaratej, nia sequeyanijia, maja puera nia niishiriojonu casaa nia miaquenutaniyani, casaa nia ratunutaniyani, casaa nia cushiniutianiyani. Pueyaso jaara pa shipiniquiaari pueyano pa quiniuria, ¿majateeri na niqutionu quiniutianiya pa miaquenu panishano, pa cushiniu panishanonio, maninia pa rishiniuria? Taaquiririni. ²⁶ Jiyocuaaanu jaacuatujua nia niquiricuaa. Nojoriiri maja na natanu. Majaari na senoenu. Majaari nojori mishinijionu tiaco na miajajaura. Naajaa, pa Que Pueyasoori nojori

niquitioquiaa na panishano. Nia niishiri. Niaa cutaraari socua Pueyaso panishano cuno jiyocuacaanu jaacuatujuacajiniji. ²⁷ ¿Nia naatate socua jiyaconajara maashiniu, jiyanohua nia tacaaniutia? Maja.

²⁸ Naajuhuj, ¿casaara nia tacaquiaarini nia niishiriojosacari casaa nia cushiniutianiyani? Naana shuucuaca nia niquiriquiaacuaa. Nojoriiri maja na niishiniu poonijionu. Majaari na niishiniu na maniniushitiajara shitanujuhuj. ²⁹ Seetanujuaanaa nia sequeyanijia, pa supuetanaa jiyaniijia Salomónri jiyanohua shanohua toqueya cushijia quiquiaari. Naajaa, na toqueeri maja socua shanohua niquishano quiquiaari cuno naana shuucuacajiniji. ³⁰ Naana shuuri saaja rupaquijia shanohua niquishano. Jaara sorere, namitiashiyari catijasocoriguiano. Pueyasoori naana shuu shipiniquiaari saaja rupaquijia shanohua niquishocoriguiano, na nuhuaji catijasocoriguianonio. Nojuaja jaara naa shanohua naana shuucuaca shipiniquiaari, ¿majateeri socua maninia na miiniu quiniutianiya niaara? ¿Casaara nia tiyuquiya nia Que Pueyasocuaarini? ³¹ Naaratej pueyanaa, maja nia tacaaniu. Majaari nia sequenu: ¿casaa pa miaquenutaniyani?, ¿casaa pa ratunutaniyani?, ¿casaa pa cushiniutianiyani? ³² Pueyaso niishiyashijacaari naa sequejacatej, puera nojori tacaashacari puetunu na panishano casaacuaanaa. Niaa cutaraari jiyocuacaanu quijia Queraca. Nojuacuajaari tari niishiya puetunu na panishanojuanaa. ³³ Naaratej, coteenu nia niishiriojore Pueyaso tojijia nia quiniuria cutara. Pueyasocua nia niquitiojore puetunu nia panishanojuanaa. ³⁴ Naajuhuj, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucuaja quiarijia nia niishiriojosano nio juucara. Majaari socua tariquiria nia tacaaniu. Saaja nia Que Pueyasocua nia tiuuri, juhuaniani nia quiniuria.

7

Majaari quarta pueyanoocuaa soqueto nia quiniu (Lc 6.37-38, 41-42)

¹ Maja niarta pueyano nia soquenu najuhuanaj, Pueyaso mariqui nia jiyanoyaquirijiaarihuaj. ² Taa nia sesacaquiaa tamasacuaani, niaari naa sesacasaanutaniyajuhuj. Naatej, taa nia miiquiaa tamasacuaani, Pueyasoori mariyata naa miiniutianiya nijaniyajuhuj. ³ Nio miriqui cua sequesano nia tojiri. ¿Casaara nia niquiya rucucua nia tarajanu namijiajiniani, niaa jaara puereetuca maca jitiiaa tama nia namijiajiniajaaja cutara? ⁴ Maca nia jitiiasacari tama nia namijiajiniajaaja, ¿casaara nia sequeya niarta pueyanoni: “Cuno rucucua pa taquiri quia namijiajiniji”? ⁵ Sesa jiuujiaacanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijiajiniji. Nio miriqui cua sequesanoori nio sequeya: nioojia seque nia jeezare coteenu, na nuhuaji cutara niocua maninia nacasure niarta pueyano.

⁶ Majaari Pueyaso ruuretajaca nia niishitiojonu Pueyaso rupaa najuhuanaj. Cuno tojiyashijacaari nia tojiyaquiniutianiya, naatej taa tamonu pueyano sare tojiyaquiquiaa nijaniyacuaani. Majaari Pueyaso soojeaca nia pohuatanu Pueyaso miishano shanohua nijaniyara. Nojoriiri saaja rerequetenutaniya Pueyasojiniji nia pohuatasano, naatej taa cushiya rapijioquiaa marajinia juhuaniani na niishishoo maninia casaacuaani.

Pueyaso pa secorej (Lc 11.9-13; 6.31)

⁷ Pueyaso nia secojore. Nojuajaari nia niqutionutaniya nia masesano. Niaa jaara pajere, niaari nia pajesano riuriatanutaniya. Tohuatheyaji nia piquiri, niaacuajiiri riatasanutaniya. ⁸ Cante Pueyaso maseya na panishanoni, seetanujuanaa na masenutaniyari. Naajuhuaaj, cante pajejani, na panishano riuriatanutaniyari. Cante tohuatheyaji piquijiani, nocuajiiri riatasanutaniyajuhuaaj.

⁹ Mueya jaara na que nenecojore neecaruura, ¿na queteeri na niqutionutaniya saajia? ¡Maja! ¹⁰ Mueya jaara na que nenecojore sapitiaajara, ¿na queteeri na niqutionutaniya soconu? ¡Maja! ¹¹ Niajanियari sesa miiniu niishijia. Naajaa, niaacuajaari maninia casaa niqutionu niishijia, nia mueya jaara nia nenecojore. Nia Que Pueyaso cutaraari jiyanoehua socua maninia niqutionu niishijia, na muerasu secojosacari nojuaja.

¹² Pueyaracaanu maninia nia miiri tamasaca, taa nia paniquiaa pueya miiniuria nijaniyacuaajani. Niaa jaara maninia miiriquia nio cua sequesano, niaari tari tojitiaa maninia puetunu tariucuaaanu Moisés Rootasanojuanaa, tariucuaaanu Pueyaso sequesano caminiujuunaa rootasanonio.

Pueyasocua nuuri secanuniyojua

(Lc 13.24)

¹³ Pueyasocua neteja nuu nia pajere, shiitianiyojua nuuri tuneja. Saniniuujia, puereetuuca nuuri neteya mani quiquojiniara. Puereetuuca na tuneja. Puereetuucaari neteya, carianujuhuaaj. Naaratej, queraatia pueyari juhuajaniya cuno nucuaco quiojiya saniitosocoriquiano. ¹⁴ Saniniuujia, shiitianiyojua nuuri maninia cutara. Cuno nucuaco quiojonaari pueyaracaanu quiniutianiya Pueyasota cutara. Jiyanoehua shiitianiyojuaari cuno nuu tuneja. Secaja pueyari na riuriataa, cami na quiojonura.

Naanaari niishishano na jajaujiniji

(Lc 6.43-44)

¹⁵ Tama nia cuaqueyajaaja nia cojuare sapojonuujuacaacuaji, noo pojori-cuaji canapueete najuhuana sequejacuaajani: “Pueyaso Rupaa pohuatananijia”. Nojoriiri sapuenu juhua maninia pueya niquishano, nojori sapojonura nijaniya. Nojoriiri sapuenu juhua borregoniyojua niquishano, seetanujuanaa juhua puereeta sare nojori quishacari, sayoru. ¹⁶ Niocua nojori niishiri, sesa nojori miiniuucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuuniateeri na naata muetunu cohuajar? Maja. Naajuhuaaj, cuno sesa jiuujjaraca pueyari maja na naata maninia miiniu. ¹⁷ Maninia naanaari, maninia jajau muetujua cutara. Saniniuujia, sesa naanaari, sesa jajau muetujuaaja. ¹⁸ Maninia naanaari maja na naata sesa jajau muetunu. Naajuhuaaj, sesa naanaari maja na naata maninia jajau muetunu. ¹⁹ Naana jaara sesa jajau muetujua quiri, nushiyari, manijinia catijasocoriquiano. ²⁰ Naacuajitij, niocua cuno sapojonuujuaca pueya niishiri nojori miishanojiniji sesa.

Saaja noojiaqueya pueyari Pueyaso muerasura quiniutianiya

(Lc 13.25-27)

²¹ Cuno pojori canapueete cua sequejacani: “Cua Jiyaniijianaa, cua Jiyaniijianaa”, noojiaqueya nojorijinijinioori maja nojori tiuquitianu quiniutianiya cua Que Pueyaso quiquojinia. Saaja seetanujuanaa cua Que tojitiajaca cutaraari nocua tiuquitianutaniya. ²² Cua nequesoreesacari pueya nio jiya pueguesacari, queraatia pueyari cua sequenutaniya: “Cua Jiyaniijianaa, cua Jiyaniijianaa, canacuajaari quia rupaa pohuataquiaari pueya

niquiarani. Canaa sequesacari quia sesa, canaari samaruhua tohuatani-jioquiaari quia cumaacatani. Naajuhuaaj, canaari cusosuhua naatanijio-quaarini quia sesa canaa jiyaniquishacari”.²³ Janiyari saniniuujia naa sequesaca riucuanutaniyani: “Maja cua niishiniu niajaniya. ¡Nia quiojorohua! Niaari saaja sesa miijiac quiquiaari”.

Jesu tojtiajaca miishanoori pueyaracaanu rishiniutianiya cutara
(Mr 1.22; Lc 6.47-49)

²⁴Naacuaajitij, cante cua sequesano tojijiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. ²⁵Na nuhuaji, maruuri jiyanoohua niquiaari. Moori pajaashiquiaari. Paratuuri jiyanoohua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. ²⁶Cante cua sequesano tojijashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaajuijajinia tiaquiaari. ²⁷Maruuri jiyanoohua niquiaari. Moori pajaashiquiaari. Paratuuri jiyanoohua piyarojo-quaari cuno tiaacuara. Cuno pueyano tiaari pojotaquiaari. Na camaruuri jiyanoohua taraatia quiquiaari na tia pojotasacari.

²⁸Jesu jaara niishitiojonu puecaquiaari, pueyari jiyanoohua jiuujia-teriquiaa na niishitiojosano nojori tojishacari. ²⁹Pueyari naa jiuujiate-quiaari seetanu cumaacatajanaa Jesu niishitiojosacari juhua jiyaniijijajanaa, maja juhua Moisés Rootasanojiniji niishitiojanaa. Cuno pojoriiri nareja tariucuaacaanu rootasano caminiuujiquiaari pueyaracaanu.

8

Jesu naatanishacari sesa cusonu jitiaja
(Mr 1.40-45; Lc 5.12-16)

¹Jesu jaara tuhuananujiniji rosequiaariuhua na cojiniaata, jiyanoohua queraatia pueyari na nuhuajiriquiaa. ²Tamonu pueyano cusosuuri jiyacari Jesuucua catecanoquiaari. Jiyanoohua sesa cusonu jitiaquiaariiri. Tahue rupaaajinia, cuno cusonu sesaari quiquiaari “lepra”. Pueyano shuuri juhua miaquesano quijia na cuaqueyajinia cuno cusonu na jitiasacari. Cusosuuri Jesu cariquimiaji mojoquetaquiaari Jesu na sequenura na panishano. Naa na sequereeri:

—Jiyaniijianaa, quia jaara paniri, niishiyacuajaniija quia naata cua cusonu cushiriitiniu.

³Jesuuri nocua taraajequiaari. Nocua niaree na juaashiquiaari. Na sequereeri:

—Jaa, panianijia. Cuaara cushiriiria quia cusonu.

jijacaritij, ritia cushiriiquiri! Jeequerohuari. ⁴Na nuhuaji, Jesuuri naa na rootaquiaari:

—Cua tojiri. Maja tamasaca niquiara quia pohuatanu cua miishano quiajaniya. Saaja Pueyaso secojonaa jiyaniija quia cuaqueya quia niquti-ri, na cartenura quiajaniya, pueya tajinia quia rucuanonuhua juhua-janiya. Na nuhuaji, ritia quia niqutiore quia seru Pueyasocuara catijiaso-coriquiano. Naa quia miiritij taa Moisés niishitiojoquiaari tarijiacuajani, juhua jeequesano quia quiniuria Pueyasora. Naacuaajitij, pueyari niishiniu-tianiya quiaari tari jeequerohua quia cusonujiniji.

Jesu naatanishacari Romano capitán seru
(Lc 7.1-10)

⁵ Jesu jaara tiuquiquiaariuhua na pueyata Capernaum tiacajiniohua, Romano soldadohua jiyaniijaari Jesuucua niquiaari na secojonura Jesu. ⁶ Naa na sequequiaariiri:

—Jiyaniijanaa, cua seruuri cusosu mataa maquetujinia. Majaari na naata pooniniu quenaaja. Jiyanhua naquiya miya na noonutaari.

⁷ Jesuuri na sequequiaari:

—Janiyacujaari nocua quianutaniyani na cusonu cua shaatanura.

⁸ Soldadohua jiyaniijaari na riuquaree:

—¡Maja jiyaniijanaa! Janiyari maja pueyano maniniuni, cua tiajinia quia tiuquiniuria. Nareja quia sequere, cua seru cusonu cuaara shaateera tamajaaja. Niishiyacuajanjia, quiaari na shaatanutaniya saa quia rupaataja. ⁹ Janiyari jiyaniijiracajaniuhua. Na tojiquiaanjia. Naajuhua, cua soldadohuari cua tojtiaquiaajuhua, cua sequesacari nojori. Naacuajitij, janiya jaara tamonu sequereni: “Quia quiaare”, cunoori ritia quiaquiaa. Naajuhua, janiya jaara tamonu sequereni cuaara niiria, cunoori ritia niya cucua. Janiya jaara cua pataaco seru sequereni cuaara miiria cua panishano, na miiquiaari. Cua sequesano jaara naa tojishaaquiaacua, quia sequesano cutaraari tojishaanutaniya.

¹⁰ Jesu jaara tojiquiaari naa cuno tahue sequesantej, jiuujiatequiaariiri. Na cojiniaa sequereeri:

—¡Seetanujuanaa nia sequeyanijia, majaari quenaaja parta Israel pueyajinijinio cua niquiniu quiquiaa Pueyasocua tiuujia cutara, juhua nio tahue! ¹¹ Seetanujuanaa nia sequeyanijia, queraatia taucuaacari Pueyasocua tiuujiaa quiniutianiya juhua nio tahue. Nojoriiri tucuaaanuji nijionutaniya pananu metasamaji, pananu tiuquishocojijuhua. Nojoriiri pa supuetanaata cajituniutianiya na miaquenuunura Pueyaso shuriucua. Tii quiniutianiya shuquiriaatiari pa supuetanaata: Abrahamta, Isaactajuhua, Jacobotano. ¹² Parta Israel pueya, canapueete Abraham jiniuanucujinio supuenoni, nojoriiri saniniuujia tamocora quejoosaanutaniya ninishiqui, nojori tojtiaaquiniucua Pueyaso. Nojoriiri tii sariyocuatunutaniya naquiya na miishacari. Na quiaa miaquenuunutaniyari na noonuta. Nojoriiri juucua saquiriojosaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jiniuanucujinio nojori quishacari.

¹³ Na nuhuaji, Jesuuri cuno soldadohua camarnu sequequiaari:

—Quia tiajinia quia quiaarohuaqui. Cuaara quiriiaqui taa quia sequereecuajani.

Jiyacaritij, na seruuri ritia naataquiaariuhua.

Jesu naatanishacari Pedro reyarucua

(Mr 1.29-31; Lc 4.38-39)

¹⁴ Jesuuri quiaaree Pedro tiajinia. Tii Pedro reyarucua niquishiiri cusosu mataana na maquetujinia. Naseeca matariquiaari. ¹⁵ Jesuuri na juaashiquia quiaasee. Na naseeca cusonuuri ritia na tajiquiaari. Ritia sanequiaariiri Jesu na mianuutenura.

Jesu naatanijosacari queraatia pueya

(Mr 1.32-34; Lc 4.40-41)

¹⁶ Shusha ninishacari cuno juucaja, cuno tiacajinijinio pueyari queraatia samaruharaca pueya jaatucunuquiaari Jesuucua. Jesuuri cuno samaruhaa tohuatanijioquiaari saa na rupaataja. Puetuno cusosuhuajanaa naatanijoreejaariuhua. ¹⁷ Naa tohuateequiaariti supuetana Isaías naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusunujuanaa na jatanura”.

Tamasaca pueya quiniu panishacari Jesu pueyara juucua
(Lc 9.57-62)

¹⁸ Jesu jaara jiyanoehua queraatia pueya niquiquiaari na shocua maano, na pueya sequereeri:

—Caminia taquijiria pa niuutiaare.

¹⁹ Jiyacaritij, Moisés Rootasanojiniji niishitiojona pueyanoori Jesu sequereeri:

—Niishitiojonanaa, janiyari quiata quianu paniyani. Janiyacua quia tarajareni puetunu tiqiyocujanaa quia rucuanajosacari.

²⁰ Jesuuri na riucaaree:

—Quioojuapue cutaraari na raa jiitiaa. Shuhuari na jesuhua jiitiaajuhuaaj. Saniniuuja, pueyano cua quishacari mijiria, majaari cua maquejara cua jiitianu quenaaja, taa cuno casami jiitiaacuaa na maquetujarani.

²¹ Tamonu Jesu pueyajinijinoori Jesu sequereeri:

—Cua jiyaniijianaa, cua tarinitiare, cua que niquirijaara. Janiya jaara na shaajareni, janiyacua quia tarajare cutarani.

²² Jesuuri na riucaaree:

—Naajaa, cuata quia quiaare cutara. Quia tarinitiare nojuaja. Macunucua cuara jamoora tama narta macujuaaja. Naatej, cante Pueyaso tojitiaashijiacani, nojoriiri tariucua juhua macunucua quia Pueyasora.

Jesu suraajasacari paratu, mohuacanio
(Mr 4.35-41; Lc 8.22-25)

²³ Na nuhuaji, Jesuuri botejinia tacaquiaari. Na saquiriojosano pueyari nata quiojoquiaari. ²⁴ Paratuuri senota piyarojonu cotegequiaari nojori niuutiasacari. Jiyanoehua piyarojoriquiaari. Caminiaari jiyanoehua queyocuariquiaa paratu piyarojosacari. Mohuacaari bote jiniacuma mishiriquiaa. Jesuuri jiyacari maqueriquiaa. ²⁵ Na pueyari cunora na niucujasee. Jesu sequetureeri:

—¡Jiyaniijianaa, canaa quia naacutare! ¡Paa tari tiuquitiaareeni!

²⁶ Nojori riucaareeri:

—¿Casaara nia pueretiuyani? ¿Majateeri nia niishiniu Pueyasooocua tiuuniu? Jesuuri saneree. Paratu sequereeri, mohuacanio:

—¡Niaaj, nia suraajere!

Paratu, mohuacaari ritia suraajequiaari. ²⁷ Jesu pueyari jiuujiatequee. Tama nojoriijaarijia sequequiaari:

—¡Juhuej! ¿Taamueca pueyanotucuaanojoni? ¡Paratuuri na tojiya, mohuacajuhaaj!

Jesu tohuatanishacari samaruhua, caapiqui pueyajiniji Gadara jiyajinia
(Mr 5.1-20; Lc 8.26-39)

²⁸ Jesuuri na saquiriojosano pueyata tiuquijioquiaari caminia taquijiria Gadara jiyajinia. Jiyacaritij, caapiqui pueyanoori Jesuucua tohuareetaquiaari raacajiniji, macunucua nucuhua paaquiosaquiji. Nojoriiri samaruhuaraca quiquiaari. ¡Jiyanoehua pueya pueresano! Cuno nucauco, majaari pueya rucuanenu quijia, cuno pojori na puerenucua.

²⁹ Samaruhuaraca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa? ¿Quiaate juhuacarijia niyaree canaa quia saniitionura Jesunaa?

³⁰ Jiyacaritij, cushiyari cateca naataja miaquenuuriquiaa. Jiyanoehua queraatia cushiyari quiquiaari. ³¹ Samaruhuari cuno caapiqui pueya pocuatequiaari. Naa Jesu secjoreeri:

—¡Quiaa jaara canaa tohuatanijiore nio caapiqui pueyanojiniji, canaa quia jiyarore cuno cushiyacua canaa tiuquitianura!

³² Jesuuri cuno samaruhua sequereer:

—¡Nia quiaare!

Samaruhuari cuno caapiqui pueyajiniji tohuareetaquiaari. Cushiyacua tiuquitiaeseri. ¡Cushiyari cocuatequee! Saaja caminiajnia totesee tacojini-jiiri. Cushiyari tii shushiniuushii.

³³ Cushiya cojuanaari netecuatuquiaariuhua na shiriiquiniutia na tiacajiniara. Nojori tiuquijiosacariuhua, pueya niquiara pohuatatuquiaari cushiyajinijiiri, samaruhuaraca pueyajinijinio. ³⁴ Naaratej puetunu pueyanaari cuno tiacajiniji nijioquiaari Jesuucua. Nojori niquishacari Jesu, na sequetureeri nojori jiyajiniji na quianura tamaqui.

9

Jesu naatanishacari cumatacuruhuana cusosu

(*Mr 2.1-12; Lc 5.17-26*)

¹ Na nuhuaji, Jesuuri botejnia rosetaquiaari na saquirojosano pueyata. Caminia taquijiria niuutiaquiaariuhuari tama na tiacajiniarajaaja. ² Tii nojori tiuquijiosacari, Jesuucua patasaaquiaariiri cumatacuruhuana cusosu pueyano. Patasaaquiaariiri na matujinia. Jesu niquishacari taa na patanaa tiuquiaari jiyanoehua nocuani, cusosu sequereeri:

—¡Quia shuquiriri sanajanaa! Quiaacuajaari tari jiyanooshaaree sesa quia miishanojiniji.

³ Noojiaqueya Moisés Rootasanojiniji niishitiojonaari Jesu sequesano tojitariquiaa. Nojoriiri tama noojiajiniajaaja niishiriojonuuquiaari: “¡Nio pueyanoori tama na cuaqueyajaaja jiyateya juhua Pueyaso na quiniuria naa na sequesacari! ¡Cunoori jiyanoehua sacuraatia!” ⁴ Jesuuri cuno pueya niishiriojosano niishiquiaari. Nojori sequereeri:

—¿Casaara sesa nia niishiriojijiani? ⁵ Seetanujuanaa, pueyano maja na naata jiyanooni pueya miishano sesa. Naajuhua, majaari na naata tamajaaja pueya na naataniniu. ⁶ Naajaa, janiyari nia niishitiniutianiyani janiyari mijiria jiyarosaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya niquiara:

—¡Quia sanere! Quia matu quia pataarohua quia tijajinia.

⁷ Cusosuuri sanequiaari. Na tijajinia quiaarohuari. ⁸ Na niquitiushacari Jesu miishano, puetunu pueyanaari shiriiquituuquiaari. Nojoriiri Pueyaso maniniuhuaqueetaquiaari pueya na niquitounuucua na cumaaca, naa Jesu miiniuriatej.

Jesu sequesacari Mateo na pueyano na quiniuria

(*Mr 2.13-17; Lc 5.27-32*)

⁹ Jesu quiasacari cuno tiacajiniji, tamonu pueyano niquiquiaari cajiyanoori cumaneeca masejojuajinia Romano jiyaniijara. Na sesa quiquiaari Mateo. Nojuacuajaari janiya; nio naajionani. Jesuuri cua sequequiaari:

—Cua nuhajaajare cua pueyano quia quiniuria.

Janiyari ritia sanequiaarini. Janiyari nata quiaareeni.

¹⁰ Na nuhuaji, janiyari Jesu masuuquiaarini cua tijajinia na miaquenura, na pueyajuhaaj. Naacuajitij Jesuuri cua tijajinia

tiuquitiaquiaari miaquenura. Queraatia cuarta cumaneeca masejonaari canaa cojiriquiaajuhuaaj, queraatia noo pojorijiuhaaj, Fariseocuaca jiyaniqutiushano sesoriquia pueyatatej. Puetunu canaajanaari Jesuta miaquenuuriquiaani. ¹¹ Fariseocuaca jaara Jesu niquiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequesotaree:

—¿Casaara nia niishitiojona miaqueya cuno sacuraatia cumaneeca masejonaatani, sesoriquia pueyatania?

¹² Jesuuri naa nojori sequesano tojirii. Nojori sequeree miriquiiri:

—Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhuaaj, sesa miijiaa pueyari cua paniya nojori cua jiyanooniuria sesa nojori miijosanojiniji. ¹³ Naa cuaara niishitiojosuhuaara socua, maninia nia niishiniuria casaa tariucuacaanu Pueyaso sequesano niishitiojiyani naa na sequesacaritij:

“Niaacuajaari nia seya catijiaquiaa cucuara. Maninia juhuari nia tarajaanura tamasaacua. Cuno cutaraari cua shuquiritiasano”.

Naara niquiarinijia nia sequesano sesa miijiaa cua jiyanooniuria sesa nojori miishanojiniji. Maja cutaraari mijiria cua ninu quiquiaari maninia pueyacia.

Pueya nequesotasano casaara Jesu pueya tarinitiaaquiQUIIAA quenaaja miaquenuni

(Mr 2.18-22; Lc 5.33-39)

¹⁴ Tiuquinijona Juan pueyari Jesuucua niqiaari naa na nequesotanura:

—¿Casaara quia pueya tarinitiaaquiQUIIAA quenaaja miaquenuni, nojori secojonura Pueyasoni? Canaacuajaari miaquenu cartequiaani Pueyaso canaa secojonura taa Fariseocuaca miiquiaacuaani.

¹⁵ Jesuuri nojori riuquere miriqui:

—Pueyano camishacari, ¿na masuusano pueyatucua taraatia quiiri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutianiya, janiya jaara nojori tajiniji rishaareni.

¹⁶ Socua cua tojitiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaaanu toque mocua cuhuocojinia, jeequesoojua na quishacari. Quiarinio toquerau jaara ruposaaare toque mocua cuhuocojinia, na jeequesacari, posequenutaniyari. Cunota, toque mocua cuhuocoori socua sutenutaniya. ¹⁷ Naajuhuaaj, majaari pa naata uva caaca racatanu shoque tariucuacojinia. Uva quiariniaacu jaara racatasaare juucua shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhuanaj. Shoque tariucuacoori maja na naata tooni, uva caaca jaara jerema. Naaratej, uva caaca nia shuujiore shoque quiariquojinia, maja najuhuaana nia niitianura uva caaca. Naajuhuaaj, majaari na naata cua niishitiojosano cojitishaanu tariucuacaanu niishitiojosanota. Cua niishitiojosano nia tojitiare cutara.

Caapiqui maajipohua naatanijosacari

(Mr 5.21-43; Lc 8.40-56)

¹⁸ Jesu pocusaacarijia, nocua niqiaariiri Pueyaso secojojua tia camarnu. Jesu cariquimijia mojoquetaquiariiri. Na sequereeri:

—¡Quiyatuuri shusha cusoquee! Naajaa, miji, cuata quia quiaare. Niishiyani quiaa jaara niare nocua quia juaashiquia, samiitianutanihuari.

¹⁹ Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhua. ²⁰⁻²¹ Canaa quiasacari, tamonu maaji cuso-suuri Jesuucua catecanoquiaari jiyasohuaja na paramaji. Cuno maajiiri pueyaracaanu naatequiaari. Doce marijaari tari na shoconujuquiaari pueyaracaanu na naatesacari. Tama niishiriojoriquiaajaarijia: “Janiya jaara Jesu toque quiareni, cua nanacaari curetanutaniya”. Cunora, maajiiri Jesu toque casaca quiasee jiyasohuaja. ²² Jesuuri na nijiniara tacatequee. Cuno maaji niqiriiri. Na sequereeri:

—Shuquiriaatia quia quiri, sanaana. Cucua quia tiuushacari, quia nanacaari tari curetaquee.

Jiyacaritij, cuno maaji jiniacumaari ritia sacuantaquee.

²³ Jesuta canaa tiuquishacari Pueyaso secojojua tia camarnu tiajinia, canaari pueya niquishiini macura naajua jonenuiuyano taraatia, sapiyoniuyanoni. ²⁴ Jesuuri cuno pojori sequeree:

—¡Niiquiji nia tohuareetare! Nio maaji samiriuuri maja macu. Nareja maqueyano.

Pueyari Jesu saroojotaree saaja, naa na sequesacaritij. ²⁵ Jesuuri cuno pojori tohuatanijoree saaja. Na nuhuaji, sohuacamara tiuquimaaari macuucua. Na juaashiquiaajini na quiaseeri. ¡Maaji samiriuuri sanemaa! ²⁶ Naa Jesu miishanojinijiri pohuatasaaquiaari puetunu cuno jiyajiniajanaa.

Jesu jeecasacari caapiqui cariyojuaru namijiaa

²⁷ Canaa jaara tohuareetaquiaari cuno tiajinijini, caapiqui cariyojuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri seetanujuanaa Pueyaso Jiyarosano. Naaratej, Jesu sequeturiquiaari:

—¡Supuetana David niqiuhuacuajinio supueno pueyanana, canaacua quia taraajere quenaaja!

²⁸ Canaa tiuquishacariuhua canaa quijia tiajinia, cariyojuarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeecanura?

Jesu riucatureeri:

—Jaa, jiyaniijianaa. ¡Quia naatacuaaquiniatejaj!

²⁹ Jesuuri na juaashiquia niaree nojori namijiaacua. Jesuuri cariyojuaru-juri sequeree:

—Cucua nia tiuuniucua, cuara quiri taa nia sequereecujani,

³⁰ Cuno pojori namijiaari maniniuajiacara quiquiaariuhua. Jesuuri jiyanojua nojori rootaree:

—¡Majaari tamasaca niquiara nia pohuatanu cua miishano!

³¹ Na tohuareetasacari, cuno cariyojuarujuriiri ritia pohuatanu coteequiaari Jesu miishanojiniji. Naacuajitij, Jesujiniji niishishaaquiaariiri puetunu cuno jiyajiniajanaa.

Jesu pocuatesacari tiquia pueyano

³² Cariyojuarujuri tohuareetanu nuhuaji, tamasaca pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhua. ³³ Jesuuri samaru tohuataniriji cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jiyanojua jiuujiatequiaari. Sequetureeri:

—¡Naa miishanoori maja na niquishaanu quiquiaari Israel jiyajinia!

³⁴ Fariseocuaari saaja Jesu macaatiquiaari pueya niquiara. Naa sequetureeri:

—Cuno Jesuni, nojuajaari samaruhua jiyaniijia cumaacaraca. Naacuajitij, na naata samaruhua tohuatanijionu.

Jesu taraajesacari pueyacua

³⁵ Jesuuri puetunu tiacajinijanaa rucuanajoquiaari Pueyaso rupaa na pohuatanura, puereetuca tiacajinia, shiitianiyojua tiacajinianio. Maninia rupaa pohuataquiaariiri Pueyaso secojojua tiacajiniaqueya, pueya niishinuria taa Pueyaso jiyanooni paniya nojorini. Naajuhuj, nojuajaari queraatia tamaatia cusonu naatanijioquiaari puetunujuanaa, nootunejacaanio.

³⁶ Jesu shootiasacari pueya, nojoriicua taraajequiaari jiyanohuari. Pueyari taraatia niquishano quiquiaari, juhua tashuquioono pueya. Nojoriiri taraatia quijiaca quiquiaari juhua cojuasoo borregohua. Shaaqui na camaru. ³⁷ Cunora, Jesuuri canaa na saquiriojosano pueya sequequiaari:

—iNia niqiri! Jiyanohua queraatia pueya. Cuno pojoriiri juhua puereetuca sucuhua. Saniniuuja, secajaari na senoonaa. ³⁸ Nocuaji nia sequeyanijia, na Camaru nia secojore, nojuaja cuara jiyarooru queraatia poonijionaa na senooriquiano nera.

10

Jesu saquiriojosacari doce pueya na jiyaramiquishocoriquiano (Mr 3.13-19; Lc 6.12-16)

¹ Jesuuri canaa na doce saquiriojosano pueya sequequiaari na rootasano canaa tojiniuria, canaa na jiyaramiquiyaquishacarijia. Jesuuri canaa niqutioquiaari na cumaaca, samaruhua canaa tohuatanijionura, cusosuhua canaa naatanijionura, puetunu noonujuanaa canaa shaatanurajuhuj.

² Nioori canaa sesaca, na jiyaramiquishocoriquiano pueya sesacani: co-teenuuri quiquiaari Simón. Pedroori na sesa quiquiaarijuhuaj. Pedro tarajanu Andrésri quiquiaarijuhuaj. Quiriquiaajaariuhua Santiago, tarajanu Juannio. Cuno pojoriiri Zebedeo niquiohua quiquiaari. ³ Felipeeri quiriquiaajuhuj, Bartolomé, Tomásnio. Quiriquiaajaariuhua janiya Mateoni. Janiyari tarijia quiquiaarini cumaneeca masejojua Romano jiyaniijara. Quiriquiaajaariuhua socua tamonu Santiago. Cuno Santiagoori Alfeo niyanu quiquiaari. Quiriquiaajaariuhua Lebeo. Na sesa tarajanuuri quiquiaari Tadeo. ⁴ Quiriquiaajaariuhua Simón. Nojuajaari Cananeo pueya maanujinijinio quiquiaari. Judas Iscarioteeri quiriquiaajuhuj. Nojuajaari Jesu quiateriquiano quiquiaari mosocoriquiano.

Jesu rootasano na pueya na jiyaramiquiyaquishacarijia (Mr 6.7-13; Lc 9.1-6)

⁵ Jesuuri nio na doce pueya jiyaramiquiquiaari Pueyaso rupaa canaa pohuatanura. Coteenu, canaa roofaquiaariiri, canaa na jiyaramiquiyaquishacarijia. Naa canaa sequequiaariiri:

—Majaari taucuaacua nia quiojonu. Naajuhuj, majaari nia tiuquiniu Samaria pueya tiacajinia. ⁶ Saaja parta Israel pueyacua nia quiaare cutara. Nojoriiri juhua borregohua tashuquioono quiya. ⁷ Nojori niqiuara nia pohuatare puetunu tiacajinijanaa. Nojori nia sequere: “Pueyasoori quiarjia nia jiiitanu paniya, niaa jaara na rupaa tojitiajacara quiri”. ⁸ Cusosuhua nia naatanijiore. Macunucua nia samiitanijiore. Canapute lepra cusonu jiiitaani, cuno cusonu nia shaajare pueya cuaqueyajiniji. Samaruhua nia tohuatanijiore pueyajiniji. Niaacuajaari nio cumaaca maseree nareja. Naaratej, nareja nia naatanijiorejuhuaj. Majaari cua cumaaca nia jamuenu.

⁹ Majaari cumaneeca nia panu. ¹⁰ Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia quiaare. Majaari nia panu nia miojotu. Nia naacutasano pueya cuara niqutioora saniniuuja nia panishano.

11 'Nia rucuanesacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tijinia nia jiyoyetare, niaa cuara cuniquiji quiaarejaatijia. 12 Niaa jaara tamonu tijinia tiuquishiiquia, pueya nia sequere naatej: "Pueyaso cuara nioojia cajitiria". 13 Cuno tijinia quiniaa jaara maninia pueya quiri, juhuajaniya quiniutianiyari taa nia sequereecuajani. Nojori jaara Pueyaso tojiyashijiaca quiri saniniuujia, nojori jiuujiacaari cajitiyaquishaanutaniya. 14 Tamonu tia camaru jaara nia tiuquinitianu paniaquiri na tijinia, Pueyaso Rupaa ruuretajaca nojori quiniucua, nojori niqiuara nia nihoacaacuaji nia rapijotare jiya jooqua. Naacujitij, cuno pueyari niishiniutianiya Pueyasoori nojori jiyanoquiniutianiya, nojori maseyaquiniucua na rupaa pohuatanaa. Naa nia mirrijuhuaj cuno tiaca pueya niqiuara, cuno pojori jaara Pueyaso rupaa tojinu paniaquiri nia pohuatasacari. 15 Seetanujuanaa nia sequenyajia, jiya puequesacari, cua nequesoresacari pueya, cuno pueyari jiyanohua saniitiosaanutaniya socua Sodoma tiaca pueyajiniji, Gomorra tiaca pueyajinijinio.

Pueyaso rupaa pohuatanaari naquiya miishaanutaniya

16 'Socua tojitiare. Janiyari nia jiyaroya Pueyaso tojitiashijiaca niqiuara nia pohuatanura cua rupaani. Niaari nojori tijinia puereeta quiniutianiya, naatej, taa borregohua quiya sayoru tajiniacuani. Nojoriiri sesa miiniutianiya nijaniya. Nocuaji jiyanohua niishijiaca nia quiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia quiri juhua noseja, pueyanu porocua. 17 Tama nia cuaqueyajaaja nia cojuare tamasaca pueyacuaji. Cuno pojoriiri nia jiyatanutaniya tiaca jiyaniijianucua nia saniitiosaanura, nojori tojinu paniaquishacari cua rupaa. Niaari Pueyaso secojojua tiacajinia piquishaanutaniya. 18 Cua rupaa nia pohuatanucua, niaari quioosaanutaniya tiaca jiyaniijianucuaacuara, nojori nequesoreenura nijaniya. Niaari jiyaca jiyaniijianucua niqitiosaanutaniyajuhuj. Naajaa, naacujitij, niaari nojori niqiuara pohuatanutaniya janiyajiniji, taucuaca jiyaniijianucua niqiuaranio. 19 Niaa jaara jiyaniijianucua tajoji nujuatesaare nequesoresocoriquiano, majaari nia niishiriojonu taa nia riucuanutaniyani. Nia riucuanu panishacari, niaari jiyacari niishitiosaanutaniyacujaja maninia nia riucuanura. 20 Naacujitij, nia riucuasanoori maja tama nijaniyajinijiaaja quiniutianiya. Pueyaso Sohanu cutaraari nia pohuatenutaniya jiyaniijianucua niqiuara.

21 'Pueyari tama tarajanujuaaja niqutionutaniya mosocoriquiano, tarajanu tiuushacari cucua. Pueyanoori neyanu niqutionutaniya mosocoriquiano, cucua neyanu tiuuniucua. Mueraasapueeri tama na queya tacartanutaniyacuajua na motenura, na queya tiuushacari cucua. 22 Puetunu pueyajanaari nia niqiniu paniaquiniutianiya, cucua nia tiuushacari. Naajaa, cante seetanujuanaa cucua tiuuja quiya pueyaracaanuni, nojuaja cutaraari jatanishaanutaniya pueyaracaanu shacantuuca quijia na quiniuria. 23 Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia sequenyajia, juhuanojuaja nia tucuatagaquishacari nia pohuatanu Pueyaso rupaa puetunu Israel pueya tiacajiniajanaa, janiyari jiyocuaaanuji tacatenutanihuani.

24 'Nio nia niishirijuhuj. Pueyanoori maja socua tojishano na niishi-tojonajiniji. Naajuhuj, seruuri maja socua tojishano na camarnujiniji.

²⁵ Pueyano jaara maninia tojiriquia na niishitiojona, maniniacuajaari nojuaja jaara na nuhuaji juhua na niishitiojonara quirijiuhuj. Maniniacuajaari, seru jaara juhua na camarnura quirijiuhuj. Naaratej, nia Jiyaniija jaara jiyaniquishiyacuaa “Sesaacata”, ¿taariquitijia socua na muerasu sesacasaanutaniyatej?

*Cante socua pa pueresanoni
(Lc 12.2-7)*

²⁶ Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya seetasanojuanaari niishishaanutaniyajuhuj. ²⁷ Jiyasohuaja cua niishitiojosano nijaniyani, cuno nia pohuatate puetunu pueya niquiarajanaa. Cua sasacojosano nia numaa pajamani, cuno nia nacatate puetunu pueya niquiarajanaa. ²⁸ Majaari nia puerenu pa puecojuaca. Nojoriiri maja na naata pa sohanu monu. Saaja nia puerere cutara nooj, cante cumaacacacuajani mani quiquiojinia nia sohanu na quejoonura, nia cuaqueyano.

²⁹ Pa naata saaja niquiriyatu cumaneeniyojuata caapiqui shiyujuaniyocua masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacuajitij, majaari quenaaja niquiriyatujua shiyojua cusonu Pueyaso paniyaquishacari. ³⁰ Naajuhuj, Pueyasoori puetunu nia naca cjasu niishiyajanaa. Puetunujuanaari na serojosano quiya. ³¹ Naacuajitij, maja nia puerenu. Niaari jiyanohua socua Pueyaso panishano queraatia shuhujiniji.

*Maja cumaati Jesucristojiniji pa caririquiniu
(Lc 12.8-9)*

³² Naa jaara tamasaca pueya niquiara sequere niaari cucua tiuujiaca cutara, janiyacua jiyocuacaanu quijia cua Que niquiara sequerejanihuahuj, niaari cua muerasu. ³³ Cante saniniuujia cucuaji seetaja tamasaca niquiarani, janiyari cua Que niquiara na tamacanutaniyajaacuhuj.

*Jesuucua tiuuja pueyari narta pueya juaashano
(Lc 12.51-53; 14.26-27)*

³⁴ Majaari nia jiyaniniu janiya mijiria niquiaarini pueya quiniuria juhujaniya. Maja. Mijiria cua niniuucua, pueyari juayonuujutanutaniya.

³⁵ Niquiaari cutaranijia pueya tiuuniuria cucua. Naacuajitij, pueya tiushacari cucua, cucua tiuyashijiaca pueyari nojori niquiniu paniyaquiniutianiya. Naacuajitij, pueyanoori na que paracaaniutianiya, cucua tiuuja na que quiniuucua. Maajiiri na nucua paracaaniutaniyajuhuj, na nucua tiuuniucua cucua. Pueyano niquiocuaari na reyarucua paracaaniutianiya-juhuj, cucua tiuuja na reyarucua quiniuucua. ³⁶ Naacuajitij, tama pueya panishano pueyajaajaari na paracara quiniutianiya, cucua nojori tiuuniucua.

³⁷ Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua janiyajinijini, jiyano pueyanoori maja maninia cua pueyano na quiniuriajuhuaj.

³⁸ Cante tama na cuaqueyajaaja panitiaaquijia na tojinuria janiyani, cunoori maja maninia quiria. ³⁹ Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari shaajasaanutaniya, pueyaracaanu taraatia na miitasaanura. Saniniuujia, cante tama na cuaqueyajaaja panitiaa naquiya na miishaanura cua tojjia na quiniuucuanu, nojuaja cutaraari rishijara jatanishaanutaniya. Seetanujanaa cuata shuquiriaatia quiniutianiya pueyaracaanuuri.

Pueyasoori maninia miijiaca niqutionutaniya na jiiťiasanojiniji
(Mr 9.41)

⁴⁰ Cante na tiaco nia tiuquinitiaja cua rupaaĵiniji nia pohuatasano na toĵiniuriani, cuno pueyanoori cua toĵiyajuhuaĵ. Cuno, cante cua toĵijiani, noĵuaĵaari cua Jiyarona toĵijiaĵuhuaĵ. ⁴¹ Naajuhuaĵ, cante Pueyaso rupaa pohuatana tiuquinitiaja na tiaconi, Pueyaso rupaa pohuatana na quiniuucuaani, Pueyasoori cuno pueyano niqutionutaniya maninia na casaĵiniji. Noĵuaĵaari niqutiosaanutaniya mariyata taa Pueyaso rupaa pohuatana niqutiosaanutaniyacuaani, Pueyasoĵiniji na pohuatanu sami. Cante maninia miijia pueyano tiuquinitiaja na tiaconi, maninia pueyano na quiniuucua, na tiaco tiuquinitiaja pueyanoori maninia casaa niqutiosaanutaniya mariyata taa maninia miijia pueyano niqutiosaanutaniyacuaani. ⁴² Naajuhuaĵ, cante quenaaja shiniitiuniacu mohuaca raateya tamonuni, cua mueyaniyoĵua na quiniuucua, Pueyasoori seetanujuanaa na jiiťiasanojiniji na niqutionutaniya na raatenu sami.

11

Tiuquinijiona Juanri na pueya jiyaroquiaari Jesu nequesotanura
(Lc 7.18-35)

¹ Jesu jaara canaa na doce saquirioĵosano pueya rootanu tucuaťquiaari tiĵ, noĵuaĵaari tiĵi quiaquiaari cuno ĵiya tiaĵajinia quiniaa na niishitioĵonura Pueyaso rupaa.

² Tiuquinijiona Juan quishacari nuĵuateĵoĵuaĵinia, noĵuaĵaari ĵiyacari niishiĵquiaari Jesucristo miishanoĵiniji. Cunora, noĵuaĵaari na pueya jiyaroquiaari Jesuucua naa na nequesotanura:

³ —¿Quiaate seetanujuanaa Cristo, tariucuacaanu Pueyaso sequesano canaacua niriĵuanoteĵ? ¿Canaate tamonu sashiya soĵ?

⁴ Jesuuri noĵori riucuaree:

—Nia quiaarohua. Tiuquinijiona Juan nia pohuatasuhua puetunu cua miishanoĵinia nia niĵuishano, nia toĵishanoĵuhuaĵ. ⁵ Naa nia pohuatasuhua: “Cariyoĵuaruĵiriiri tari niĵuitiarohua. Shipiiniĵuniĵuaĵiaari maninia rucoorohua. Shu miaĵeĵa cusonu jiiťiaĵaĵaari tari jeeĵeroĵuhua. Numueĵjunucuaari tari toĵitiarohua maninia. Macunucuaari samiťiacorohua. Casamiĵiuniucua pueyari Pueyaso rupaa pohuataasaaree, Pueyaso muerasura noĵori quiniuria”. ⁶ Shuĵuiriataa ĵiĵia cutaraari noo pueyano, cante cucuaĵi taacanuyaĵiĵiani.

⁷ Tiuquinijiona Juan pueya jaara quioĵoĵuaariuhua Juancua, Jesuuri Tiuquinijiona Juanĵiniji naa pohuatanu coteeĵquiaari pueya niĵuiarateĵ:

—¿Casaa niĵuiniuucua nia quioĵocanu cariiĵquia ĵiyajiniani? ¿Niaateeri paratu piyaroĵosano naajua niĵuiniuucua quiaĵanu? Maja. ¿Tiuquinijiona Juanteeri nooĵia niĵiĵioteĵa? Maja. ⁸ Cua seĵeture, ¿casaa niĵuiniuucua nia quioĵocanuni? ¿Niaateeri pueyano niĵuiquianu maniniuĵui toĵe cushiyano? Maja. Cuno poĵori cante maniniuĵui toĵe cushiĵiani, noĵoriiri ĵiyaniĵianucua tiaĵinia ĵiĵiaca cutara, maja cariiĵquia ĵiyajinia. ⁹ ¿Taateerinitioĵ? ¿Casaacua nia quioĵocanuurini? ¿Pueyaso seĵenu panishano caminiĵiunia niĵuiniuucuatee? Jaa. Seetanujuanaa nia seĵeyaniĵia, Tiuquinijiona Juanri ĵianohua socua cutara pueyano tamasaĵa Pueyaso sequesano caminiĵiuniaĵiniji. ¹⁰ Cuno Juanĵinijiĵuaĵaari tariucuacaanu Pueyaso Rupaaĵinia pohuataasaĵiaari. Naa naajiotasaĵiaari miriĵiiri Pueyaso sequesano ĵaniya noĵaĵiniji:

“Ĵaniyari cua pueyano ĵiyaronutaniya quioĵuaĵini. Noĵuaĵaari quia puetanutaniya, quia nuu ĵeecariĵuano quioĵuaĵi”.

Juanri naa maninia miiquiaari cucuaji, pueya tojiniuria janiya cua tiuquishacari.

¹¹ Seetanujuanaa nia sequeyanijia. Majaari tamonu pueyano quiniu quiquiaari socua cutara pueyano Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, cunoori socua cutara pueyano Tiuquinijiona Juanjiniji.

¹² Tiuquinijiona Juan jaara coteequiaari Pueyaso rupaa pohuatanu, pueyari jiyanhua saniniujuriquiaa Pueyaso muerasu nojori quiniuria. Pueyari naa saniniujiya quiarijiajuhuaj. Cante jiyanhua saniniujiya Pueyaso muerasu na quiniuriani, naa quiniutianiyari. ¹³ Supuetana Moisés, mariyata puetunu Pueyaso sequesano caminiujiuniaajanaari tariucuaaanu pohuataquiaari taa Pueyaso jiitianutaniya pueyani. Naa poojotasaquiaari Tiuquinijiona Juan jaara tiuquiquiaariiaatijia. Quiarijiani, Tiuquinijiona Juanta, nojori pohuatasanoori tari tohuateenu coteya. ¹⁴ Naa jaara nio cua pohuatasanoocua tiuuniu paniri, nia tojiri nio: Tiuquinijiona Juancuajaari tariucuaaanu pueyara Pueyaso sequesano caminiujiunia Elíascuaja. Elíascuajaari sequesaaquiaari niriqiano. ¹⁵ Cante numaaracani, cuara tojiiria cua sequesano.

¹⁶ Naa pohuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapuefe carijiniacuma tacuarishijionu panija juucuan. Nojoriiri narta naatujooriicua naca, nojori tacuarishijionu panishacari juucua. ¹⁷ Naa nacaari: “Canaari juucua naajua jonenejiyani. Majaari nia nianujunu paniniu. Canaa jaaquequejosacari taraatia saniniuujia, majaari nia sapuenu”. ¹⁸ Naajuhuj pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuaj. Pueyari saaja na sequequiaari samaruraca pueyanota. ¹⁹ Na nuhuaji, janiyari tiuquiquiaarini. Janiya cutaraari sumatuucuaa miaquejani, mashaca ratujaajuahuaj. Pueyari cua sequequiaa: “Miaquejoru cuno, ratunu porocuanio. Sesa pueya cojjia, pa soosano Romano jiyaniijia seya cojjia sacuraatiajuhuaj”. Naa nia soosacari janiya, Tiuquinijiona Juannio, niaari puetunu Pueyaso niishitiojosanojuanaa ruuretaa. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso jiyaramiquishano cutarani.

Jesu piriyojosacari tojiyashijianucua pueya (Lc 10.13-15)

²⁰ Corazín tiacajinia, mariyata Betsaida tiacajinia, Jesuuri tii socua pueya naatanijioquiaari tamasaca tiacajiniji. Jiyajeneta casa miiquiaari tii Pueyaso cumaacataari. Pueyari saaja nocua tiyaquiquiaari. Nojoriiri maja noojia na tacatonu quiquiaari sesa nojori miiniuujini. Cunora, Jesuuri nojori piriyojoquiaari. Naa sequequiaari nio caapiqui tiacajinia quiniaa pueyari:

²¹ —;Niaari taraatia saniitosaanutaniya, nioojia nia tacatoyaquiniucua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajinianio, taa cua miiquiaari nia tiacajiniacuaani, cuno taucuaa maara Pueyasooocua tari noojia tacatocanu cutara. Nojori maara ritia cocuaque toqueya cushiyonuuquiaari nojori tacaani miishishaanura sesa nojori miishanojiniji. Naajuhuj, nojori maara juaca quejoquiaari na nacaacua, noojia nojori tacaosacari Pueyasooocua, sesa nojori miiniucua. ²² Naaratej, janiyari nia numooteyani: jiya puequesacari, niaari socua jiyanhua saniitosaanutaniya Tiro tiacajinia quiniaa pueyajiniji, Sidón tiaca pueyajinijinio. ²³ Capernaum tiacajinia quiniaanaa,

¿niaateeri jiyaniya niaari tamasaca tiaca shocotanutaniya nia jyanishacari niaari socua maninia cutara? ¡Maja! Niaari mani quiquiojinia quejoosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara quiriquiaajaj. ²⁴ Nocuaji nia sequeya cutaranijia: jiya puequesacari, niaari socua jyanohua saniitosaanutaniya Sodoma tiaca pueyajiniji.

Jesuucua tiuuniaari samaateriquiano cutara

(Lc 10.21-22)

²⁵ Jiyacaritij, Jesuuri na Que Pueyaso sequequiaari:

—Quia shuqiritiaanijia cua Quenaa. Quiaari jiya camarnu, jiyocuacaanu camarnunio. ¡Quiaari maninia! Quiaari niishiyashijiaca pueya maninia casaa niishitirii, niishijiaca pueyacuaji quia jamosanoni. Niishijiaca pueyari saaja tama nojori niishishanoocuaaja tiuujiaca. ²⁶ Naacuajitij cua Quenaa, quiaari maninia niishitirii niishiyashijiaca pueya, taa quia paniquiaaricua-jani.

²⁷ Cua tojitiare pueyanaa, cua Queeri cua niqutioquiaari puetunu casaa-janaa cua jiitiasocoriquiano. Majaari seetanujuanaa tamasaca niishiniu janiya. Saa cua Queja cutaraari cua niishiya. Naajuhuj, majaari seetanujanaa tamasaca niishiniu cua Que. Saaja janiya, Neyanuni, na niishiya cutaranijia, naajuhuj canapue cua niishitiniu paniya cua Quecujani.

²⁸ Cucua nia nijiore, puetunu niajanijajanaa, canapue teacaquioyani, canapue te puera niishiriojonuuacani. Naa jaara cucua nimia, janiyari nia samaraatanutaniya. ²⁹ Cua niishitiojosano nia tojiri. Janiyajiniji nia niishiri taamuecatucuaa janiyani. Janiyari ritia juayashijiani. Janiyari pueya shocoteyajuqijiani. Naacuajitij, nioojaari maja na tacaaniu quiniutianiya nia rupesacari janiya. ³⁰ Naa tojishacari janiya, nioojaari juhua-janiya quiniutianiya. Cua poonitijosacari niajanijia, majaari jiyajeneta na quiniu quiniutianiya niaara, cua cumaquishacari niajanijia.

12

Jesu pueya carojotasacari trigo samaatenu juuca

(Mr 2.23-28; Lc 6.1-5)

¹ Jiyacaritij, Jesuuri canaa na saquiriojosano pueyata cuhuariquia jiuuji-aaco tajiriquiaa samaatenu juuca. Canaari jiyacari miaajeriquiaani canaa quiasacari nuuaco. Canaari secaja trigo jajau carojotanu coteequiaarini. Canaari na miojonuuriquiaani. ² Fariseocuaa jaara canaa niquiquiaari naa miyanotej, Jesu sequetureeri:

—¡Quia niquiri! ¡Quia pueya trigo shuniitaa! ¡Na shuquiquiojonuuyari! ¡Naa nojori miishacaritij, poonijionuuyari! Cuno maja panishano samaatenu juuca miiniuria. ¡Pa supuetana Moisésuajaari naa pa rootaquiaaritij!

³ Jesuuri cuno pojori riuucaree:

—¿Majateeri nia serojonu quiquiaari Pueyaso Rupaajinia taa pa supuetana David miiquiaari na miaajesacarini, na pueyano? ⁴ Nojoriiri Pueyaso Secojoua tiajinia tiuquitiaquiaari. Pueyasora niqutiojosano pan satureeri. Cuno panri saaja pueyacuara secjonaa sasocoriquiano quiquiaari, maja socua tamonu pueyano sasocoriquiano. Naajaa, Davidri na saquiaari. Na miishanoori maninia quiquiaari Pueyaso niquiara. ⁵ Naajuhuj, ¿majateeri nia serojonu quiquiaari tariucuaaanu Moisés naajiosanojinia, taa pueyacuara secjonaa pueyaracaanu poonijioquiaa Pueyaso Secojoua tiajiniani? Nojoriiri naa poonijionuquiaa samaatenu juucajuhuj. Naa nojori poonijosacari Pueyaso Secojoua tiajinia samaatenu juucatej, cunoori maja sesa. ⁶ Moisésuajaari pa rootaquiaari maja pa poonijionura samaatenu

juuca. Naajaa, cuno rootasanoori seetanujuanaa maja na quiniu Pueyaso Niyanura, jaara Pueyaso Secojoua tiajinia poonijionaara quiyacquirijihuahaj. ⁷ Maja naasucuaari nia niishiniu quiquiaari casaa nio tariucuacaanu naajiotasano niishitiojiya nijaniya juucuani. Naa sequeyari: “Janiya cutaraari socua nia panitiaani niarta pueyacua nia taraajenura, maja saaja nia niq-uitiojonura nia seya cucuara catijasocoriquiano”. Naa jaara nio naajiotasano niishijia quiriquia, niaa maara sesa miyashijia pueyacuaara tonujiaquiriquiaj. ⁸ Cua tojitiare quiarijia. Janiyacuajaari Pueyaso Niyanuni. Naacujitij, mijiria cua quishacari cua naata sequenu casaate samaatenu juuca miishiyani.

Jesu jeeacasari pueyano juaashiquia cuseetucoujara joojequetano
(Mr 3.1-6; Lc 6.6-11)

⁹ Na nuhuaji, canaari Jesuta quiojoquiaari quiniquijini. Canaari Pueyaso Secojoua tiajinia tiuquishiini. ¹⁰ Pueyanoori tii quiriquiaa cuseetucoujara joojequetano na juaashiquia. Taa canaa Judiocuaca camarucua Jesuucuaara saquiriojotanu paniriquiaa juucuacujani, jiyacaritij, na sapojonuta Jesu nequesotaturee naari.

—¿Maninateeri samaatenu juuca cusosu naataniniuria? Paacujaruhua niishitiojosaaquiaarini maja pa poonijionura samaatenu juuca.

¹¹ Jesuuri cuno pojori riucaare:

—Naa jaara niquiriyatujua borregoniyoua jiitiare, cuno jaara tiyare raama samaatenu juuca, ¿majateeri nocua nia quianu, raamaji nia panura nia seruniyouta? ¡Taaquiriirinij! ¹² ¿Majateeri pueyano socua jiyanohua panishano borregojinij? Taaquiriirinij. Naaratej, maja pa tarinitianu maninia pa miiniuria pueyaracaanu, samaatenu juucajuhuj.

¹³ Na nuhuaji, sesarucouja sequereeri:

—Quia juaashiquia quia shiitiore.

Na juaashiquia shiitioreeri. Ritia jeequequeeri juhua tanecaraja. ¹⁴ Naa Fariseocuaca niquishacari Jesu miishanotej, tohuareetaqueeri. Tama nojorijiaarjia roojotooquiaari nojori motenura Jesu.

Jesujinij pohuatasano tariucuacaanu naajiotasanojinia

¹⁵ Jesu jaara niishiquiaari Fariseocuaca miiniu panishano nojuaja, quiniquiji quiaqueeri. Queraatia pueyari na nuhuajiquiaari canaata. Jesuuri puetunu cusosuhujanaa naatanijioquiaari. ¹⁶ Jesuuri na naatanijosano pueya rootaquiaari maja tamasaca niqiara nojori pohuatanura cante nojuajani. ¹⁷ Naacujitij, tariucuacaanu Pueyaso sequesano caminiujunua Isaías pohuatasanoori tohuateequiaari. Nojuajaari juhuacarjia naa pohuataquiaari Jesujinij Pueyaso sequesano miriquitij:

¹⁸ “Niocujaaari cua seru, cua saquiriojosano. Na timitiaanijia. Nojuajaari jiyanohua cua panishano. Janiyari cua Sohanu jiyaronutaniya nocuani. Nojuajaari tamasaca pueyapue pohuatanutaniya janiyajinij, nojori quiniuria cua muerasura pueyaracaanu. ¹⁹ Majaari pueyata juaajia na quiniu quiniutianiya. Majaari nacojojua na quiniu quiniutianiya. Majaari na rupaa tojishano quiniutianiya tiacaacaco.

²⁰ Majaari quenaaja shuniitiasano naajua na shutianu quiniutianiya puetunujuanaa. Naajuhuj, majaari na maquisahjanu quiniutianiya jatarinitiaja nojijano samaritiu. Nojuajaari naa sesa miijiaa jiyanooniutianiya, nojuaja jaara tiuquiriohuajaatijiaj, puetunu sesa miiniu- jianaa na puecanura, Jiyaniijajanaa na quiniuhuara pueyaracaanu.

21 Puetunu tiqiyocuacajinijinio quijiaca pueyajanaari nocua tiu-niutianiya”.

Pueya sequesacari Jesu samaru cumaacaracana
(Mr 3.20-30; Lc 11.14-23; 12.10)

22 Tiquiaari Jesuucua jaatucusaquiaari. Cariyojuaru quiriquiaajaari-uhuj. Naa quiquiaariiri samaruraca na quiniucua. Jesuuri na jecaree. Naacuajitij, tiquiaari pocujara quiquiaari, niquijiarajuhuj. 23 Cunora, puetunu pueyajanaari nocuaji jiuujiatequiaari. Sequetureeri:

—iNio jiyoteeri pa supuetana David niquiohuacuajinio supueno pueyano, tariucuaaanu sequesano pa jiyaniijara quiriquianotej!

24 Fariseocuaca jaara tojiquiaari naa pueya sequesacari Jesujinijitij, nojoriiri na juaaniutia sequequiaari saaja:

—iCuno pueyanoori samaruhua tohuatanijiya Satanás cumaacata!

Satanásri samaruhua jiyaniijia. 25 Jesuuri cuno pueya niishiriojosano niishiquiaari. Cunora, nojori sequereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Naajuhuj, tiacajinia quiniaa jaara juayonuutare jiyareta tama nojorijiaaja, cuno pueyari maja na naata quiniu jatiqiu. Naajaariuhuj, pueyano jaara juayonuujutare tapueyocuacata tama na tiajiniaajaaja, majaari nojori naata jatiqiu quiniu. 26 Jaara naa quiriritij, samaruhua jaara tohuatanijiosaare Sesaaca cumaacata, tama na cuaqueya paracayaaarijia. Naacuajitij, majaari na naata na cumaaca rishiniu. 27 Janiya jaara samaruhua tohuatanijiya Satanás cumaacatani, taa nia sequeya janiyacujani, cua sequeretoj, ¿cante nia niishitiojosano pueya cumaquia samaruhua nojori tohuataniniuriani? ¿Satanáste? Majaruhua. Nojoricuajaari samaruhua tohuataniquiaa Pueyaso cumaacata. Naacuajitij, nojori tohuatanijiosacari samaruhua Pueyaso cumaacata, niaari jiyanohua jiyajeneya nia sequesacari janiya samaruhua tohuatanijiya Sesaaca cumaacatani. 28 Seetanujuaanaa Pueyaso Sohuanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijiosacari samaruhaatej, niaacuajaari niishiya Pueyasoori tari poonijiya juhua Jiyaniijia, mijiria nia tajinia.

29 ¿Pueyanote na naata cumueeca pueyano tiajinia tiuquiniu na casami na jaariuutianura? Maja na naata na jaariuutianu, jaara coteenu na morojiaquiri. Jaara na morojore coteenu, na nuhuaji cutara na naata na casami panu. Naajuhuj, jiyari Pueyaso cumaacata jaariuutiaa Sesaaca jiiitasano pueyani.

30 Cante cua jiyano quiaquiyani, cunoori cua paraca. Cante cua naacutaquia pueya rerecojonura Pueyasoori, nojoriiri saaja pueya cocuataa Pueyasocujia.

31 Naarate nia sequeyanijia: puetunu pueya miishano sesajanaari na naata jiyanooshaanu. Sesacojua pueyanoori na naata jiyanooshaanu-juhuaj. Saniniuujia, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. 32 Cante Pueyaso Niyanu sesacajani, nojuajaari na naata jiyanooshaanujuhuj. Saniniuujia, cante Pueyaso Sohuanu sesacajani, nojuaja cutaraari jiyanoaquisaanutianiya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuacaanujuhuj.

Naanaari niishishano na jajaujiniji
(Lc 6.43-45)

³³ Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacujitij, na jajaujiniji paari niishiyani taamueca naanatenojoni. ³⁴ Niaari juhua sacocua. ¿Niaatucua taa maninia pocuajaca quirini, niaa jaara pueyaracaanu sesa miijaca quiyajaa? Paari poojiajiniji pa niishiriojosano pocuaquiaani. ³⁵ Naacujitij, maninia jiuujiaraca pueyanoori saaja maninia casaa pocuaja. Sesa jiuujiaraca pueyano saniniuujia, sacuaraatia casaa pocuaari. ³⁶ Nia sequeya cutaranijia, Pueyaso saniitonu juuca, pueyari puetunu najuhuana sesa na pocuasanojinijijianaa nequesoreesaanutaniya. ³⁷ Cante maninia casaa pocuaja quiquiaarini, cunoori sequesaaanutaniya “maninia pueyanota”. Naajuhua, cante sesa casaa pocuaja quiquiaarini, nojoriiri saniitiosaanutaniya saniniuujia. Naaratej, majaari nia niti nia taquiriocuatenu sacuaraatia casaa nia pocuanura.

Fariseocuaca niqiniu panishacari Jesu miishano Pueyaso cumaacata (Mr 8.12; Lc 11.29-32)

³⁸ Noojiaqueya Moisés Rootasanojiniji niishitiojonaari tii quiriquiaa Fariseocuacata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niqishocoriguiano.

³⁹ Jesuuri nojori riuuaree:

—Niaari sesoriquia pueya, Pueyaso tojiyashijia. Majaari nia niqiuara casaa cua miiniu quiniutianiya Pueyaso cumaacata. Niaari saaja niquiriyatu cutara miishano niqiniutianiya taa supuetana Jonás miishaaquiaaricuaani. Cuno Jonásri Pueyaso sequesano caminiuujunia quiquiaari.

⁴⁰ Nojuajaari puereetuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhua, janiyari raaco macu niojosaqui camueenujutaniya jiuujianaraca juucani, jiuujianaraca niucuanio. ⁴¹ Jonás pohuatasacari Pueyaso rupaa Nínive tiacajinia, cuno tariucuaaanu taucuaacari noojia tacatoquiaari sesa nojori miishanojiniji.

Cunora, Pueyaso nequesoreenu juuca quishacari, Nínive pueyari saneecuatunutaniya nojori tonujunura nio pa quishacari pueyacuara. Nojoriiri Pueyaso saquiriojotananiya nio pa quishacari pueyacuara, nojori ruuretanuucua tamonu Pueyaso sequesano caminiuujunia socua jiyaniijiajanaa cutara Jonásjiniji. ⁴² Naajuhua, tariucuaaanu jiyaniijia maajiiri niqiuiaari tucuaaanuji pa supuetanaa jiyaniijia Salomón tojinuucua.

Cunoori quiquiaari jiyanohua niishijia Salomón quiniuucua. Cuno maajiiri pananu shuucuaji niqiuiaari Salomón na tojiniuria, jiyanohua tucuaaanu na jiyajiniji. Naaratej, Pueyaso nequesoreenu juuca quishacari, cuno maajiiri sanenutaniya na saquiriojotanura nio pa quishacari pueyacuara. Nojoriicuara saquiriojotananiyari nojori ruuretanuucua tamonu niishijia, socua niishijia Salomónjiniji cutara.

Samaruuri na tohuatanishaquiji tacatejohua (Lc 11.24-26)

⁴³ Samaru jaara tohuatare pueyanojiniji, joojuashiquio rucuaneyiyari na samaatejara na pajesacari. ⁴⁴ Jaara riuriataaquiri na samaatejara, naa niishiriojiyari: “Tacateyarohuaraqui tariucua cua quiquiojiniohua”. Jaara tacatemohua, cuno na pueyano riuriatasuhuari juhua camaruuju tia, ne-toasano, maninia jeenucuasano. ⁴⁵ Naaratej, samaruuri socua tamasaca narta samaruhua pajeya. Socua siete narta samaruhua riuriataari socua jiyanohua sesa nojuajiniji. Puetunu nojorijianaa jaara tiuquitiare cuno

pueyanooocua tii na quiniuria, cuno pueyanoori na nuhuaji socua jiyanoocua sesa quijiara jiyacateja.

Naa quiniutianiyajaariuhua nio pa quishacari pueyara na tojtiaaquini-uucua janiya. Nojoriñi socua sesa quijiacara jiyacatenutaniuhua taa cua niyacarjia quijiaca nojori quiquiaaricuaajani.

Cante seetanujuanaa Jesu nucuani, tapueyocuacajuhuj
(Mr 3.31-35; Lc 8.19-21)

⁴⁶ Jesu pohuatasacarjia pueya niqiuara, na nucuaari tiuquiiioquiaari Jesu tapueyocuacata Jesuucua. Carijiniacuma qutiuriquiaari. Jesuta pocoojonu paniriquiaa juucuaari. ⁴⁷ Tamonu pueyanoori Jesu sequeree:

—¡Niishitiojanaa! Quia nucuacui quia tapueyocuacata carijiniacuma qiuia. Quiaata pocoojonu paniaquiniaari.

⁴⁸ Jesuuri saaja na numootena pueyano riucuaree:

—¿Cante cua nucuani? ¿Cante cua tapueyocuacani?

⁴⁹ Jiyacaritij, Jesuuri canaa na tojtianaa pueya shishirii. Tii quiniaa pueya sequereeri:

—Nio cua tojtianaani, nojori cutaraari juhua cua nucua, juhua cua tapueyocuaca cutara. ⁵⁰ Naacuaajitij, cante cua Que Pueyaso panishano mi-quiaa cutarani, nojuaja cutaraari cua tarajanu, cua rimiatu, cua nucuanio.

13

Natoojojua pueyanojiniji pohuatasano
(Mr 4.1-9; Lc 8.4-8)

¹ Cuno juucaja, Jesuuri tohuataquiaari tiajiniji. Caminia casaqueyaji cajishiiri. Canaari nata quiriquiaani. ² Jiyanoocua queraatia pueyari nocua rerequeejoquiaari. Puera pueya quiniuucua, Jesuuri botejinia tacaquiaari. Tii cajishiiri. Puetunujuanaa pueyari jaaquiajinia jateequiaari, tiji na tojtianura Jesu canaata. ³ Jesuuri queraatia casaa pueya maanu niishitiojoriquiaa miriqui. Naa pohuataquiaari puetunu canaajanaari:

—Pueyanoori natoojonura quiaquiaari na cuhuariquiajinia. ⁴ Na jacu-tasacari, secajaari nucuaco totequiaari. Shuhuari nocua rosetaquiaari. Puetunujuanaa nucuacoci na natau miojoquiaariiri. ⁵ Tajaacaari totequiaari tamaqui sai tajiniaqueya. Majaari puera jiya quiniu quiquiaari tii. Naaratej, cuno natauri ritia moritiaquiaari. ⁶ Pananu jaara tacaquiaari, cuno natauri ritia sorequiaari maja puera nujuacaraca na quishacari. ⁷ Tajaacaari totequiaarijiuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na muetunu quiquiaari. ⁸ Maninia jiyajinia totequiaariiri tajaaca saniniuujia. Tii moritiaquiaari maninia cutaraari. Maninia muetuquiaari cutaraari. Puetunu cuno jiy-oneejinijianaani, noojiaqueyari muetuquiaari cien jajau niquiriyatu jiyonaacua. Tamonu jiyoneeri muetuquiaari sesenta jajau niquiriyatu jiyonaacuaajuhuj. Socua tamonu jiyoneeri muetuquiaari treinta jajau. ⁹ Niaa jaara numaaraca quiri, nia tojtitiare cua pohuatasano.

Casaara Jesu niishitiojiya miriquini
(Mr 4.10-12; Lc 8.9-10)

¹⁰ Jesuuri naa pohuataquiaari miriqui pueya niquiaratej. Na nuhuaji, canaa, Jesu saquiriojosano pueyani, canaari nocua catecanoquiaarini. Canaari na nequesotiaquiaarini:

—Jiyaniijianaa, ¿casaara pueya quia niishitiojoriquiaa miriquini?

¹¹ Jesuuri canaa riucuaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria, taa Pueyaso poonijija pueya jiuujajiniani, na muera-sura nojori quiniuria shuquiriaatia. Tamasacara saniniuujia, majaari nio jiyasohuaja Pueyasojiniji niishishano nojori niishishocoriguiano. ¹² Cante Pueyaso rupaa tojijia cutarani, nojuajaari socua niishitiojosaanutaniya, Pueyasojiniji jiyanohua na niishiniuria. Cante Pueyaso tojiyashijiani, shitiyaniyoyua Pueyasojiniji nojori niishishanoori puetunu jaariuutiasaanutaniyajanaa nojorijiniji. ¹³ Cunora, janiyari miriqui pohuatariquiaa nojori niqiarani. Naacujitij, nojoriiri najuhuana niqiquiaa cua miishano na niishiyaquiniutia. Nojori tojishacari cua pohuatasano, na numaa shama tojitiuquiaa saajaari. Majaari quenaaja nojori niishiniu na tojishano. ¹⁴ Naa nojori quiniuucuatej, tari tohuateereeri juhuacarijia supuetana Isafas sequesano nojorijiniji. Pueyara Pueyaso sequesano caminiuujunina na quini-uucua, nojuajaari naa sequequiaari pueyatej:

“Niaari seetanujuaanaa Pueyaso rupaa tojiniutianiya najuhanaj. Majaari nia niishiniu quiniutianiya. Niaari Pueyaso miishano niquiniutianiya najuhanaj. Majaari nia niishiniu quiniutianiya nia niquis-hano. ¹⁵ Nojoriiri cumajiujiaaca quiya. Nojoriiri juhua numueejua, tojiyashijia. Nojoriiri juhua nimishitiu quiyajuhuj. Naa juhua nimishitiu quituyari nojori niqiyuquiniuucujia. Nojoriiri naa juhua numueejunucujuhuj, nojori tojitiaquiniuucujia noojiata. Naa quituyari nojori niishiyaquiniuucujia noojiata, cucua nojori tacatenuhara cua jeecanura nojori jiuujia seque”.

¹⁶ ‘Cua pueyanaa, niaari saniniuujia shuquiriaatia quiya maninia nia niishishacari cua miishano, nia tojishacari cua pohuatasanojuhuaj. ¹⁷ Seetanujuaana nia sequeyanijia, queraatia tariucuacaanu pueyari quiarijia nia niqishano niquiniuucua jiaatiaquiaari juucua. Naa nio niquiniuucua jiaatiaquiaariiri tariucuacaanu Pueyaso sequesano caminiuujuninaa, queraatia maninia pueyano. Majaari nojori niquiniu quiquiaari saaja. Nojoriiri nia tojishano tojiniuucua jiaatiaquiaari juucujuhuj. Majaari nojori tojiniu quiquiaari saaja.

*Jesu niishitiojosacari miriqui na pohuatasano natojojuajiniji
(Mr 4.13-20; Lc 8.11-15)*

¹⁸ ‘Nia pohuatareera nia niishiniuria cua pohuatasano natojojuajiniji. ¹⁹ Canapute Pueyasojiniji cua pohuatasano niishiyaquiyani, nojoriiri juhua nucuaco toteno jajau. Sesaacaari niquiaa. Pueyaso Rupaa jaariutiaa noojajinijiiri. ²⁰ Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuquiaa. ²¹ Nojoriiri juhua nujuacaaju. Majaari cumaatia na nujuatunu. Naaratej, nojori jaara naquiya miishaare Pueyaso Rupaa tojijia nio quiniuucua, nojoriiri ritia Pueyaso tojiniu tarinitiaquiaa. ²² Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera facaaquiaa nio jiya casamiicua. Naajuhuj, nojoriiri sapojosaquiaa nojori jiyanihacari nojori jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujajinina. Naacujitij, cuno pueyari juhua natau muetuhuo quiquiaa. ²³ Saniniuujia, cante maninia tojijia Pueyaso Rupaani, maninia na niishiyari. Cunoori juhua jiya maniniuujina jacutasano jajau. Naacujitij, cuno pueyari juhua maninia natau, maninia muetuna cutara. Jiyanohua

maninia pueyari quiquiaa na tojishacari Pueyaso Rupaa. Naaratej, tamonu-
uri juhua cien jajau muetujua. Tamonuuri juhua sesenta jajau muetujua.
Tamonuuri juhua treinta jajau muetujaujuhuj.

Jesu pahuatasano miriqui trigo tajinia moritaja sesa jiyasocujajini

²⁴ Jesuuri tamonu miriqui pahuatasano pahuataquiaari pueya niqiuara,
nojori na niishitiojonura taa Pueyaso tojtiaashijaca pueya quiniutianiya
Pueyaso muerasu tajiniani. Jesuuri naa pueya pahuataquiaari:

—Tamonu pueyanoori maninia jajau nataquiaari na cuhuariquiajini.
²⁵ Puetunu pueyajanaa jaara niucua maqueturiquiaa, na paracaari jiy-
acari niqiuari. Sesa jiyasocua jajau jaquerooquiaari trigo natasano
cuhariquiajiniari. Na natanu nuhuaji, tacateyarohuari. ²⁶ Trigo ja-
jauri maashiquaari. Na nuhuaji, na jajau mueratuusacari shusha, sesa
jiyasocuaari mariyata niqishaaquiaari maashiyano. ²⁷ Cuhariquia
camaru seyari quiaquiaari na camarujuanaa nojori sequenura: “Jiyaniijanaa,
¿majateeri maninia saquirojosano jajau quiquianucua quia natasano
cuhariquiajiniani? ¿Teje cuno sesa jiyasocua moritiarucuaa quia natau
tajiniacuaraarini?” ²⁸ Cuhariquia camaruari nojori riuucaree: “Pa para-
caari cunohuj, naa pa miiriucuaani”. Na seyari na nequesotaree: “¿Quiaate
paniya canaa quianura cuno jiyasocua jayotanura trigo tajiniaqueyajini?”
²⁹ Na seya sequeree saajaari: “Maja. Maja nia jayotanu jiyasocua, niaa
mariqui trigo na cojiritiareeri. ³⁰ Naajaa, nia tarinitiare cuara maashiiria,
mariyata cuara noshiirijajara trigo jajau. Na nuhuaji cutara janiyari
senoonaa jiyaronutaniyani, cuara coteenu jiyasocua namirioora, nojori
jiunioconura jiyasocua catijiasocoriquiano. Na nuhuaji cutara, cuara
trigo jajau racatatuura nataco”.

Jesu pahuatasano miriqui mostaza jajajajini

(Mr 4.30-32; Lc 13.18-19)

³¹ Jesuuri socua miriqui pahuataquiaari pueya niqiuara, na niishitio-
jonura taa Pueyaso poonijia pueya jiuujajiniani, nocua nojori tiushacari.
Naa sequereeri:

—Tamonu pueyanoori mostaza jajau nataquiaari na cuhuariquiajini.
³² Seetanujuanaa mostaza jajauri socua jiyano hua shiitianiyojua puetunu
tamonu jajajajiniijanaa. Naajaa, cuno mostaza jaara maashiri, socua
puereetucara maashijiaari narta nataacuacajini. Naacuajitij, shuhuari
na cashacucuaacua jesuya. Naajuhuj, pueyano tojishacari Pueyaso rupaa,
seetanujuanaa maninia Pueyaso muerasura jatanishiyari.

Jesu pahuatasano miriqui pan poreetajajini

(Lc 13.20-21)

³³ Jesuuri nio miriqui pahuatasano pahuatarohucuhua pueya niqiuara,
taa Pueyaso Rupaa poonijia mijiriani. Nojori sequereeri:

—Pueyaso rupaari jiyano hua cumaacaraca na poonijionura juhua pan
poreetaja. Maaji jaara pan poreetaja cojitiri jiuujianaraca shiitianiyojua to-
huatashi mishaja trigo cashojuata, puetunujuanaa na poreeteyari. Pueyaso
rupaari naa cumaacaracajuhuj, pueya na jataniniuria quiariniora.

Casaara saaja miriqui sequesano pahuatasaaquiaa pueya niquiarani

(Mr 4.33-34)

³⁴ Puetunu Jesu pahuatasanojuanaa pueya niquiarani, miriqui seque-
sanoori quiquiaari. Puetunu na pahuatasanojuanaari naa quiquiaaritij.
³⁵ Naacuajitij, maninia tohuateequiaariiri tariucuaaanu pueyara Pueyaso
sequesano caminiujiunia sequesano, jaara nio naajiotajiaari:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pohuatasano. Naacuajitij, janiyari pueya pohuatanutaniya pueyaracaanu nojori niishishoo casaani, shusha jiya shipin-ishaanujiniji’ ”.

Jesu niishitiojosacariuhua miriqui na pohuatasano sesa jiyasocujiniji

³⁶ Na nuhuaji, Jesuuri pueya maanu sequereee:

—Tariucuaaja pueyanaa. Nia quiojorohua.

Na nuhuaji, nojuajaari na quijia tajinia tacaarohua. Jiyacaritij, canaa, na saquiriojosano pueyani, canaari nocua catecanoquiaarini. Canaari Jesu sequereeni:

—Canaa quia niishitirijia miriqui quia pohuatasano cuno sesa jiyasocujiniji.

³⁷ Jesuuri canaa sequereee:

—Janiyacuaajaari cunoni, maninia jajau natojojuani. ³⁸ Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquiajinia natasanoni. Tamasacaari saniniujia Sesaaca muerasu quia. Nojoriiri juhua cuno sesa jiyasocua, cuhuariquiajinia natau tajinia maashinioni. ³⁹ Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senoosacari quiniutianiya. Jiyocuaaanuji Pueyaso seyari juhua cuhuariquia senoonaa quiniutianiya. ⁴⁰ Naatej, taa sesa jiyasocua namitiashiya catijasacoriquianocuaani, naa quiniutianiyajaariuhua nio jiya puequesacari. ⁴¹ Janiyari cua seya jiyaronutaniya jiyocuaaanujini. Nojoriiri sesa miijiaa quioonutaniya, mariyata canapueet tamasaca mitiquiaa sesani. ⁴² Nojoriiri quejoosaanutaniya mani quiquiojinia. Nojoriiri tii sapuenutaniya pueyaracaanu. Naquiya na miishacari, na quiaa miaquenutaniyari. ⁴³ Na nuhuaji, Pueyaso tojtiajacaari jiyanoohua shacantuucara quiniutianiya juhua pananu, na Que Pueyaso jittiasocari nojori pueyaracaanu. Cante numaaracani, cuara tojtiaara cua sequesano.

Jesu pohuatasano miriqui jiyanoohua panishano casaajiniji

⁴⁴ Jesuuri canaa na pueya pohuataquiaari miriqui, Pueyaso muerasu pa quiniuni, cunoori jiyanoohua panishano. Nojuajaari naa sequequiaaritij:

—Tamonu pueyanoori tamasaca cuhuariquia tajiriquiaa juucua. Casaa riuriatamaari, jiyanoohua panishano casaa. Tiijia na jamorohuari tee na quiriquiaacuajani. Jiyanoohua na shuquiritiasacari na riuriatasano casaa, puetunjuanaa tama na casamijiaaja niqutiojoreeri queraatia cumaneeca na jitianura. Na nuhuaji, puetunu na cumaneecajanaa pataareeri cuno cuhuariquia camaruucua, cuno cuhuariquia na masenura. Naacuajitij, cuno jiyanoohua na panishano casaari tama na casaara quiquiaarijiaaja. Naajuhuj, socua jiyanoohua panishano cutaraari, Pueyaso pueyanora nia quiniuria. Cunoori jiyanoohua socua panishano puetunu pa panishano casaajinijianaa.

⁴⁵ Socua nia tojiri nio pohuatasano. Casami niqutiojonaari pueyaracaanu rucunejoriquiaa shanohua cohuajaaca tiujiau na pajenura. Cunoori noturu shipinijosano sai quiquiaari. ⁴⁶ Tamonu juuca, jiyanoohua shanohua noturu saajia niqutishaaquiaariiri. Jiyanoohua na panishano. Naaratej, puetunu na jittiasanojuanaa niqutiojoquiaariiri, cumaneeca na jitianura, cuno na panishano casaa na masetajara. Na nuhuaji, puetunjuanaa na casami samitia masequiaari cuno noturu saajiaari, jiyanoohua na panishanoni. Naajuhuj, nia tarinitiare puetunu nia panishano casaajanaa, Pueyaso pueyara nia quiniuria seetanujuanaa.

Jesu pohuatasano miriqui shiyarujiniji

⁴⁷ Pueyaso Rupaari juhua puereetuuca shiyaru na camaru jartasano caminiajinia. ⁴⁸ Jaara mishaja quiquiaari sapitiaajata, pueyari na jayotaquiaari jaaquiajinia. Queraatia tamaatiuniucua sapitiaajaari tii quiriqiaa. Pueyari jaaquiajinia cajituuquiaari saaja maninia sapitiaaja nojori saquiriojonura. Canaasatujinia na niojotureeri racatasocoriquiano. Sesa sapitiaajaari saniniuujia jacutasaquiaari. ⁴⁹ Naa quiniutianiyajaari uhuaj jiya puequesacari. Naacujitij, Pueyaso seyari rosetanutaniya, sesa miijiaa na saquiriojonura maninia pueya tajiniji. ⁵⁰ Na nuhuaji, sesa pueyari quejoosanutaniya mani quiquiojinia, taa sesa sapitiaaja jacutasaquiaaricuaani. Nojoriiri tii sapuenutaniya. Na quiaa miaqenu-taniyajaariuhua naquiya na miiniutia.

Pueyaso Rupaari jiyanohua panishano: tariucuacaanu naajiotasano, quiari naataja naajiotasanonio

⁵¹ Jesu pohuatanu puecasacari, canaa na pueya nequesotaquiaariiri:

—¿Niaate maninia niishiriji puetunu cua pohuatasanojuanaacuaaja?

Canaari Jesu riucaareeni:

—Taaquiriirinij Jiyaniijianaa.

⁵² Jesuuri canaa sequeree:

—Maniacuajaqui. Tariucuacaanu Pueyaso Rupaajiniji niishitiojona jaara quiarinio cua niishitiojosano Pueyasojiniji niishirijihuaj, nojuaja cutaraari Pueyaso Rupaa niishijia seetanujuanaa. Nojuajaari juhua tia camaru, cante tariucuacaanu shanohua casamiriacacuajani, quiarinio casamiriacajuhuj, na tajiniaaco racatasano. Na panishacari, na camaruri na racatasanojiniji na panishano rijia.

Jesu quishacari Nazaret tiacajinia

(Mr 6.1-6; Lc 4.16-30)

⁵³ Jesu jaara puecaquiaari miriqui pohuatanu, tiji quiaquiaariuhuari. Canaari na nuhuajiriquiaani. ⁵⁴ Canaari na maashijia tiacajinia tiuquiquiaariuhuani. Canaa tiuquijiosacari, canaari Pueyaso secojojua tajinia tiuquiquiaarini. Jesuuri tii pueya niishitiojonu coteequiaari. Pueyari jiuujiatequiaari na niishitiojosano nojori tojishacari. Nojoriiri tama sequequiaarijiaaja:

—¿Taa nio pueyano niishiya puerajarani? ¿Tejenotejaara na cumaacani, cusuhua na naatanijionurani? ⁵⁵ Na shipininiocuaajaari suruhuatujiniji casaa shipinijiona quijia. Na nucuaquiaari María. Na tapueyocuaari Santiago, José, Simón, Judasno. ⁵⁶ Na rimiatuhuari mariyata niya pa tajinia quia. ¿Taa na niishiya pueraarini?

⁵⁷ Naaratej, pueyari na ruuretaquiaari saaja. Naa na tiacajinijinio pueya tojtiaaquishacari nojuajatej, Jesuuri nojori sequequiaari:

—Puetunu tiqiyocua pueyajanaari maninia tojtiaquiaa cutara Pueyaso sequenu panishano caminiujunia. Saaja narta pueya tama na jiyajinijinio-juariajia na tojtianu paniyaquiya, tama na tajinijiniojuajaa pueyanio.

⁵⁸ Naa nojori ruuretanuucua Jesutej, majaari puera na cumaacata na miiniu quiquiaari tii, nojori tiuyaquiniuucua nocua.

14

Herodes motesacari Tiuquinijiona Juan

(Mr 6.14-29; Lc 9.7-9)

¹ Cuno quishacari, Galilea jiya jiyaniijia Herodesri pohuatasaaquiaari Jesu miishanojiniji na cumaacata. ² Herodesri na seya sequequiaari Jesujiniji:

—¡Nojuacuajaari cua mosano Tiuquinijiona Juan! ¡Samiitirohuacuaaquil Naacuajitij, jiyano hua cumaaca jiitiaari, jiyajeneta casaa na miiniuria Pueyaso cumaacata.

³ Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na mo-rojoquiaariiri cumayocua shipinishano jiyocuata. Na nuhuaji, na nuju-atequiaari nujuatejojuajiniaari. Herodesri naa miiquiaari na juaaniutia Juantej, Juan nacasunuucua nojuaja, Herodes quiniuucua tarajanu Felipe niquiuocata. ⁴ Tiuquinijiona Juanri naa Herodes sequequiaari quiasano na quiyaquishacarjia:

—¡Quiaari Pueyaso tojiyashijia! ¡Majaari maninia quia quiniuria Herodíasta! ¡Nojuacuajaari quia tarajanu Felipe niquiuocua!

⁵ Herodesri cunora Juan monu paniri quiaa juucua. Judiocuaca puereri quiaa saajaari. Judiocuacaari niishiquiaari cutara, Juanri seetanujuanaa Pueyaso sequenu panishano caminiujiunia quiquiaari. ⁶ Tiuquinijiona Juan nujuasacarjia nujuatejojuajinia, Herodesri na rasaanu juucajinia queranacuquiaari na masuusano pueyata. Jiyacaritij, cuno maaji Herodías niyatuuri nianujuquiaari Herodes masuusano pueya niquiara. Jiyaniijia Herodesri jiyano hua na shuquiritia quiaari. ⁷ Naaratej, Herodesri necanuru sequequiaari puetunu pueya niquiarajanaa:

—Sanaunaa, cua sequere casaa quia paniyani. Janiyacua quia niquitiore quia panishanoni. ¡Seetanujuanaa quia sequeyanijia! Majaari cua rupaa cua jatanu quiniutianiya. ¿Casaa quia paniniutianiyani?

⁸ Jiyacaritij, niyacoo nucua Herodíasri neyatu rootaquiaari jiyasohuaja, casaa na masenutianiyan. Naaratej, niyacoori jiyaniijia Herodes sequese:

—Cua quenunaa, cua niquitiore Tiuquinijiona Juan naca miacojuajinia.

⁹ Jiyaniijia Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masuusano pueya niquiara. Naacuajitij, Herodesri na seya sequequiaari cuaraa niquitiosaarianoj. ¹⁰ Naaratej, na pueyano jiyaro-quiaari nujuatejojuajiniaari, Tiuquinijiona Juan na cacatanura. ¹¹ Na nuhuaji, Juan nacaari patasaquiaariuhua miacojuajinia. Niyacoo niquitiosaasuhuari. Niyacoori saniniuuja na nucuaacua na pataquiaari.

¹² Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pohu-atanuucua Tiuquinijiona Juanjiniji.

Jesu mianuutesacari cinco mil pueya
(Mr 6.30-44; Lc 9.10-17; Jn 6.1-14)

¹³ Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriarajuhuj. Nojoriiri na neteyotaquiaari nucuaco caminia shuriuquico. Cuno pueyari canaacuaji cutesee. ¹⁴ Naacuajitij, Jesu ros-esacari botejiniji, jiyano hua queraatia pueya niquishii saajaari. Nojori-icua taraajereeri. Cuno pueya patootasano cusosuhua naatanijioreeri. ¹⁵ Tariucua tenacari, canaa, Jesu saquiriojosano pueyani, canaari nocua niquiaarini. Canaari na sequereeni:

—Canaa Jiyaniijianaa, paa niya quiya pueya quiyaquishaquini. Paari nininiutianiyan. Juhucarjia pueya quia sequere nojori cuaraa quiojo-huara tiacajinia, na miaquesocoriquiano nojori masenura.

¹⁶ Jesuuri canaa sequeree saaja:

—¿Maatucua casaara quiojjiyarohuani? Niaa mariqui nojori mianuutere saniya.

¹⁷ Canaari Jesu sequereeni:

—Maja canaa jiitianu miaquesano. Niya quiya saajaari cinco pan, caapiqui sapitiaajanio.

¹⁸ Jesuuri canaa sequeree:

—Miji nia patare.

¹⁹ Jesuuri sequeree pueya cuaara cajitiuuria jiyasocuajinia. Na nuhuaji, Jesuuri cuno pan pataree, sapitiaajanio. Jiyocuaaanu maureeri na Queecuaru, miaquesanoocuaru na secojonura. Na nuhuaji, Jesuuri pan neecasequiaari queraatiara. Canaa na niquitiojoreeri puetunu pueyajanaa canaa niquitiojosocoriquiano. ²⁰ Puetunu pueyajanaari miaquenuquiaari. Maninia tooquioreeri. Nojori puecasacari miaquenu, canaari pan neeca reratequiaariuhuani, sapitiaaja raquiquiano. Doce canaasatuuri mishinijiosaquiaari na raacuata. ²¹ Jiyanhua queraatia pueyari miaquenuquiaari; cinco mil quiquiaari saa canuujua. Majaari maajipohua serojosaanu quiquiaari, naatujoorinio.

Jesu rucuanesacari mohuaca caco
(Mr 6.45-52; Jn 6.16-21)

²² Na nuhuaji, Jesuuri canaa na saquirojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhuara.

²³ Pueya jaara tari quiojoquiaariuhua, Jesuuri tuhananuucua tacaguaari tamajaaja, na Que Pueyaso na secojonura. Jaara niquiaari, Jesuuri tii quiriquiaa tamajaaja. ²⁴ Canaari saniniuujia caminia jiuujiajinia tari jaaretariquiaacuaani. Mohuacaari saaja canaacuara cajiniuucuariquiaa, paratu piyarojosacari canaacuara. ²⁵ Juhuaquenu panishacari, Jesuuri canaa rupuesee mohuaca caco na rucuanenuta. ²⁶ ¡Canaa niquishacari casaa mohuaca caco rucuaneyano, canaari jiyanhua shiriiquituriini! Canaari sariyocuatireeni.

—¡Yae! ¡Samaruruhua!

²⁷ Jesuuri ritia pocuaree. Canaa sequereeri:

—¡Nioojia nia cumaquiri! Janiyacuajanijia. Maja nia puerenu.

²⁸ Canaa tojishacari Jesu, Pedroori Jesu sequeree:

—¡Jaara seetanujuanaa quiajanija quiri Jiyaniijiana, cua sequere quiocua cua quianura mohuaca caco!

²⁹ Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. ³⁰ Na niquishacari paratu jiyanhua piyarojijano, Pedroori puerequiaari. Na pueresacari, moo cariquimia tiuquinu coteequiaariiri. Nacareeri:

—¡Jiyaniijiana cua quiare!

³¹ Jesuuri ritia Pedro juaashiquiajiniji quiaree. Na sequereeri:

—Pedronaa, majaqui puera quia tiuuniu cucua. ¿Casaara cua sequesanooquaji quia taacanuureeni?

³² ¡Nojori jaara botejinia tacataquiaariuhua, paratuuri jiyacari pueyajaquee! ³³ Canaa niquishacari naa Jesu miishano na cumaacatatej, canaari Jesuucuaru mojqetacoquiaarini. Canaari na sequereeni:

—¡Quiaaqui seetanujuanaa Pueyaso Nyanu!

Jesu naatanijiosacari cusosuhua Genesaret jiyajinia

(Mr 6.53-56)

³⁴ Canaa jaara caminia taquijiria niuutiaquiaarini, canaari Genesaret jiyajinia shiitiaseeni. ³⁵ Genesaret pueya jaara niishiquiaari Jesu tiuquirii, nojoriiri puetunu na jiyajiniajanaa pueya numootequiaari, cuara patootasaaria cusosuhua Jesuucua. Naacujitij, Jesuucua patootasaaquiaariiri puetunu cusosuhujanaa. ³⁶ Pueyari Jesu sequetuquiaari:

—Nareja quia shanacure cusosuhua quilocua, nojori cuara quia tucaque toque quiaara quenaaja, nojori naataconuhua.

Jesuuri naa miirii. Puetunu na toque quianaajanaari naatacoquiaariuhua na cusonujiniji.

15

Casaate sesa miitijia pueyanoni

(Mr 7.1-23)

¹ Na nuhuaji, Jerusalén tiacajinininio pueyari canaacua tiuquiiioquiaari Jesuta pocoojonura. Nojoriiri quiquiaari Fariseocuaca, Moisés Naajioneejiniji niishitiojanaano. Jesu sequetureeri:

² —Quia pueyari shuquitioojua miaquenuquiaa. ¿Casaara nojori tojitiaquiquiaa canaa niishitiojosano pa supuetanaajininiji? ¡Nojori cuara miiria taa pa supuetanaa miiquiaaricuaani!

³ Jesuuri nojori nequesotaree saniniuujia:

—¿Niajanियariuhua? ¿Casaara nia tojitiaquiquiaa saniniuujia Pueyaso Rupaani, nia supuetanaa jiiitishano miiniu nia miiniuriani? ⁴ Pueyasocujiaari sequequiaari: “Quia que tojjia quia quiri, quia nucua tojjianio. Majaari nojori rerequetenu”. Naacujitij, maninia pa cojuare pa queya. Pueyasoori sequequiaarijuhuaj: “Cuaara mosaaria cante na que sesacajani, na nucua sesacajanio”. ⁵ Niaari saniniuujia sequequiaacujua, maniniacujiaari pueyano jaara na queya sequere: “Cua quena, cua nucuaana, janiyari Pueyasora niquitionutaniya cua casamini. Naacujiti majaari cua naata nia naacunu cua jiiitiasano casamitia”. ⁶ Naa nia niishitiojosacari pueyatej, niaari pueya tarinitiya na queya nojori cartenura, naacusoo nojori quiniuria. Naa nia tojishacari tama nia niishitiojosanojuaja juhua nia supuetanaa nia miiniuriatej, niaari Pueyaso Rupaa jiyateya najuhanara.

⁷ ¡Sapuenu Pueyaso Rupaa tojitiajacanaa! Supuetana Isaiasquiri maninia naajiotaquiaaricuaaja niajanijininiji, na caminiuujishacari nio rupaa Pueyasojiniji:

⁸ “Nio pueyari saa na rupaataja cua maniuuhuaqueetaquiaa. Nojori jiuujiaari saniniuujia tucuaaanu quia janiyajininiji. ⁹ Nojoriiri najuhuaana rerejoquiaa na maniuuhuaqueetanura janiya. Nojori niishitiojosanojori tama nojori niishishanojuaja, maja cua rupaa”.

¹⁰ Na nuhuaji, Jesuuri puetunu pueyajanaa sequeree:

—Miji, niya cua tojitiaseecuarajaj maninia nia niishiniuria. ¹¹ Pa miisanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojua.

¹² Jiyacaritij, canaa, Jesu saquirojosano pueyani, canaari nocua catecanoquiaarini naa canaa sequenura nojuaja:

—Jiyaniujianaa, ¿quiaate niishiya Fariseocuacaari juaaquioree naa quia sequesacaritij?

¹³ Jesuuri canaa riucuaeree:

—Naajaa. Cuaara juaaquiorea. Cuno pojoriiri juhua sesa jiyasocua, Sesaaca natasano cua Que cuhuariquiajinia. Nojoriiri juhua sesa jiyasocua

jayotasaanutaniya. ¹⁴ Seetanujuanaa Pueyaso niishiyashijiaca nojori quishacari, nojoriiri juhua cariyujuaru quiya. Narta cariyujuaru jaatucuyari. Cariyujuaru jaara narta cariyujuaru jaatucure juucua, nojoriiri mariyata raama totenutaniya.

¹⁵ Pedroori Jesu sequere:

—Jiyaniijianaa, canaa quia niishitiojoreja casaa quia sequenu paniriquiaa quia pohuatasacari pa miasanojinijini.

¹⁶ Pedro riucaareeri:

—¿Niaateeri na niishiyaquiyajuhua? ¹⁷ ¿Majateeri nia niishiniu, pa mi-aquesano pa rupaataari pa seecojinia tiuquiya saaja? Na nuhuaji, pa marecuhacuama tajimiaari. ¹⁸ Saniniuujia, pa rupaata pa pocuasano sesani, cunoori poojiajiniji tohuataa cutara. Naacuaajitij, pueyanoori sesa quiya Pueyaso niquiara, sesa casaa na pocuanuucua. ¹⁹ Pueyano jiuujiajinia coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; sapojonuta saquiriojotanu paniniu; sacuaraatia coriaa-cojonu paniniu. ²⁰ Puetunu naa sesa pueya niishiriojosanojuanaa cutaraari pueyano sesojua. Saniniuujia, pueyano jaara miaquere shuquitiojua, naajaa. Cunoori maja na sesonu pueyano Pueyasora.

Taatu tiushacari Jesuucua

(Mr 7.24-30)

²¹ Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu taucuaca jiyajiniarani. Cuno jiyajinia quiquiaariiri Tiro tiaca, Sidón tiacajuhua. ²² Canaa rucanejosacari tii, cuno jiyajinijino taatuuri Jesuucua niquiaari. Nojuajaari Cananeo pueyajinijinio maaji quiquiaari. Jesu nuhuaji nacariquiaari:

—jiyaniijianaa, cucua quia taraajere! ¡Pueyaso Jiyarosanonaa, cucua quia taraajere quenaaja! Quiyatu samaru jiiitia. Jiyanojua taraatia na mi-iquiaari.

²³ Jesuuri maja na riuucuanu quiquiaari. Sanaa canujuriquiaa saajaari. Naaratej, canaari Jesu catecanoquiaarini canaa sequenura nojuaja:

—jiyaniijianaa, na panishano quia miiri cuara quiohuara! ¡Tajeta nacao pa nuhuajini!

²⁴ Jesuuri canaa riucaaree:

—Janiyari saaja Israel pueyacua jiyarosaaquiaarini. Nojoriiri juhua borregohua tashuquiono. Nojoriicaa taraajeyanijia.

²⁵ Cuno maajiiri Jesu sequesano tojirii. Naajaa, Jesu cariquimiaaji mojuquetaseeri. Na sequereeri:

—jiyaniijianaa, cua naacutare!

²⁶ Jesuuri na riucaaree:

—Majaari maninia pa jaariutianura pa niquiohua miaquesano, sare niquiohua niquitiosocoriquiano saniniuujia.

²⁷ Maajiiri saaja na sequere:

—Maniniacuaja quia sequesano Jiyaniijianaa. Naajaa, sareyaniojuacuajaari miaquesano shiriyaa miacquenuquiaa, na camaru totinijosano na miaquejajiniji.

²⁸ Jesuuri maaji sequere:

—Maniniacuaja quia sequesano maajiniaa. Quiaaqui jiyanojua cucua tiuya. Cuara quiriiaqui taa quia paniyacuajani.

Jiyacaritij, neyatuuri naataquiaariuhua.

Jesu naatanijosacari queraatia cusosuhua

²⁹ Canaari Jesuta cuniquiji quiaquiaarihuani. Canaari Galilea caminia shuriuquioco tajimiaani. Canaari tuhananuucua tacatamaani. Jesuuri tii cajishii. ³⁰ Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuriucua, nojori tiacajiniji nojori patootasano. Cusosuuhari quiquiaari shipiiniquiujiunaa pueya, cariy-ojuarujurinio, tiqianucujuhua, sesarunecatohuanio, socua queraatia tamaatia cusosuhuanio. Jesuuri nojori naatanijioquiaari puetunujua-naa. ³¹ Pueyari jiuujiatequiaari nojori niquishacari tiqianucua pocoyano, shipiiniquiujiunaa rucuaneyano maninia, cariyojuarujuri niquishacari maniniajuhua. Naajuhua, sesarunecatohuari maninia numatucuaraca quiquiaarihuua. Naa pueya niquishacari Jesu miishanotej, nojoriiri Pueyaso maniniuhuaqueetaree. Sequetureeri:

—Jiyanohua maninia Israel pueya Pueyaso!

Jesu mianuutesacari cuatro mil pueya

(Mr 8.1-10)

³² Na nuhuaji, Jesuuri canaa na saquirojosano pueya sequere:

—Miji pueyanaa. Nio pueyacua taraajeyanjia. Nojoriiri tari jiuujianaraca juuca camueenujiya niya pata. Majaari nojori jiitiatunu quenaaja casaa na miaquetusocoriquiano. Majaari cua jiyaronu paniniu miaqueyojua nojori, nojori mariqui na miaajenuta cusojoniyarohua nucuacoori.

³³ Canaari Jesu nequesotareeni:

—¿Canaatucua tee riuriatare queraatia miaquesano nio queraatia pueyarani? Niya, majaari pueya quiniu quenaaja.

³⁴ Jesuuri canaa nequesotaree:

—¿Taa pan nia jiitiaani?

Canaari na riuquareeni:

—Canaa saaja siete pan jiitiaani, secaja sapitiaajaniyojuanio.

³⁵ Jesuuri pueya sequeree na cajitiuniuria. ³⁶ Na nuhuaji, Jesuuri cuno siete pan pataree, sapitiaajanio. Jesu jaara na Que secujoquiaari co-teenu miaquesanoocua, na nuhuaji na neecasequiaariiri canaa niqutiojonura pueya. ³⁷ ¡Puetunu pueyajanaari maninia miaquenuquiaari! Tooquioreeri. ¡Canaari miaquesano cureenota mishinijioquiaari siete canaasatuni! ³⁸ Queraatia pueyari na miaquenuquiaari. ¡Saaja canuuri serojosaquiaari cuatro mil pueya! Majaari maajipohua serojosaanu quiquiaari, naatujoorinio. ³⁹ Na nuhuaji, Jesuuri pueya sequequiaari nojori quiojonuhua. Na nuhuaji, Jesuuri canaa jiyataquiaari botejinia Magdala jiyajiniara.

16

Fariseocuaca, Saduceocuaca niqiniu panishacari Jesu miishano Pueyaso cumaacata

(Mr 8.11-13; Lc 12.54-56)

¹ Fariseocuacaari Saduceocuacata Jesuucua nijioquiaari nojori saniniuji-uniuria nojuaja. Nojoriiri Jesu sequequiaari:

—Casaa quia miiri quia cumaacata canaa niquishocoriquiano, canaa niishiniuria quiaate seetanujuaanaa Pueyaso jiyarosano.

² Jesuuri nojori sequeree saaja:

—Jiya jaara naatuca quiri pananu tiquishacari, niaari sequequiaa: “Maninia juucaqui tariqui quiniutianiya”. ³ Naajuhua, pananu jaara tariquicuaji jama, niqutioocua jaara niquishaarejuhua, niaari sequequiaa: “Maruqui niniutianiya”. Niaari naa niishiquiaa taamueca juucate quiniutianiyani jiya nia niquishacari. ¡Mosanucuaana! ¿Casaara saniniujia

nia niishiyaquiya casaa Pueyaso niishitiojiya juucua niajaninyani? No-juacuajaari juucua na cumaacata na miishano miiquiaa nia niquiara nahuanaaj.

⁴ Jesuuri nojori niquiara sequereejuhujaj:

—Nio sesoriquia pueya, Pueyaso tojtiaashijiacani, nojoriiri Pueyaso cumaacata cua miishano niqiniu paniya juucua. Majaari nojori niq-uitishaanu quiniutianiya socua. Nojoriiri saaja nio niquiriyatu Pueyaso cumaacata miishocoriquiano niqiniutianiya: janiyari miishaanutaninyani taa supuetana Jonás miishaaquiaaricuaani.

Naa Jesu sequenu nuhuajitij, nojori tarinitiaqueeri. Canaari quiaqueeni.

Jesu numootesacari na pueya Fariseocuaca niishitiojosanoocuaji

(Mr 8.14-21)

⁵ Canaa niuutiasacari caminia taquijiria, canaari canaa coseyaca panu niyajetaquiaari canaa sasocoriquianoni. ⁶ Jiyacaritij, Jesuuri canaa sequere:

—Niishijia nia quiri. Tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

⁷ Cunora, canaari tama sequetoorejaanijia:

—¿Casaa na sequeyani? Pan pa paaquiniuucua naa pa sequeya jiyoteeri.

⁸ Jesu niishishacari naa canaa sequesanotej, canaa sequereeri:

—¿Majateeri juhuanajuaja cucua nia tiuuniu maninia? ¿Casaara tama nia pocoojiyajaaja panjinijini? ⁹ ¿Majateeri juhuanajuaja nia niishiniu tari cua miishanojiniji? ¿Niaateeri tari niyajarucuaa taa canaasatu mishajate curecanuni, cinco mil canuu jaara miaquenuucanu cinco panjinijitij?

¹⁰ Naa jiyoteeri niyajarucuaajuhujaj taa canaasatu mishajate cureca-nuni, cuatro mil canuu jaara miaquenuucanu siete panjinijitij. ¹¹ ¿Casaara nia jyaniriini janiya miaquesanojiniji sequeriquiaani? Maja cua sequenu panjiniji. Naa sequeriquiaanjia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

¹² Naa na sequesacaritij, canaari jiyacari niishiquiini majaari Jesu sequenu quiriquiaa pan poreetajajiniji. Canaari shusha niishiquiini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosanoocuaji, Saduceocuaca niishitiojosanoocuajinio.

Pedro sequesacari Jesuuri seetanujuaana Pueyaso Jiyarosano

(Mr 8.27-30; Lc 9.18-21)

¹³ Canaa tiuquijiosacari Cesareya Filipino tiaca jiyajinia, Jesuuri canaa nequesotaree:

—¿Taa pueya sequequiaa janiyajinijini, cantena janiyani?

¹⁴ Canaari Jesu riuwareeni:

—Noojiaqueya pueyari sequequiaa, quiaanaari Tiuquinijiona Juan. Herodes motesano naasucuaanaari samliitarohuacuaa. Tamasacaari sequequiaacuajua, quiaanaari Elías, tariucuacaanu pueyara Pueyaso sequesano caminiujunia. Tamasacaari saniniujua quia sequequiaacuajua, quiaanaari supuetana Jeremías, pueyara Pueyaso sequesano caminiujunijuhujaj, tamonu Pueyaso sequesano caminiujunia soj.

¹⁵ Jesuuri canaa nequesotarohua socua:

¿Niajaniryahuaj? ¿Taa nia sequeyanjia? ¿Cante janiyani?

¹⁶ Simón Pedroori na riuwaree:

—¡Quiaacuajaari Pueyaso Jiyarosano! Quiaari Cristo, Pueyaso Nyanu.

¹⁷ Jesuuri Simón Pedro sequerohua:

—Quiaacuaajaari Pueyaso shuquiritiasano pueyano, Jonás niyanunaa. Jiy-ocuaaanu Quijia cua Quecuajaari quia niishitirii cante janiyani. Janiya-jiniji quia niishishanoori maja pueya niishitishano quiajaniya. ¹⁸ Janiyari socua sequenu paniya quiajaniyani Pedronaa. Quia sesaari Pedro. Nioori pueyano rupaajinia sequeya “saajia”. Naatej, taa saajiacuaani jataniyaquishoo, quiaari cumaatia nujuataja quiniutianiya, seetanujua-naa cucua quia tiuushacari, quia niishishacari janiyari Pueyaso Niyanuni. Naajuhuj, puetunu pueyajanaa cante cucua tiuuriini taa cucua quia tiuyacuaani, janiyari nojori jiyatenutaniya cua muerasurani. Puetunu cua saquiriojosano pueyajanaari cumaatia nujuatunutaniya, nojori niishishacari janiyari Pueyaso Niyanuni. Naacujitij, nojoriiri juhua puereetua saajiaacua tiasano quiniutianiya. Puetunu cua muerasujuaanari juhua cua tia quiniutianiya, cua quiquio nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu quenaaja janiya, cua tiasacari cua quiquiora. ¹⁹ Naajuhuj Pedronaa, quiaari juhua cua quiquio tootiu riatataja jiitiana quiniutianiya. Naacujitij, quiaari coteenu pohuatantaniya pueya niqifara janiyajiniji, nojori tiuniuria cucua, juhua Pueyasocua nojori tiuquiniuria na muerasura nojori quiniuria. Naajuhuj, quiaa jaara rootare taate Pueyaso muerasu naata miini maniniani, Pueyasoori sequenutaniya cuaara naa quiiriatej. Naajuhuj, quiaa jaara casaa tenujure, maja naa pueya miiniuriatej, Pueyasoori naa sequenutaniyajuhuj.

²⁰ Na nuhuaji, Jesuuri canaa na pueya rootaree maja canaa pohuatantura tamasaca niqiara nojuacuaajaari Pueyaso Niyanu.

Jesu numootesacari na pueya, nojuajaari mosaanutaniya
(Mr 8.31–9.1; Lc 9.22–27)

²¹ Jiyacaritij, Jesuuri canaa pohuatantu cotequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca jiyani-ijianucuaari tii cua miiniutianiya naquiya jiyano. Pueyacuaara secोजना jiyaniijianucuaari nojori rupuenutaniya naa cua paracaashaanurajuhuj, mariyata tariucuaaanu Moisés Naajioneejiniji niishitijonaanio. Naacujitij janiyari mosaanutaniyani. Jiuujianaraca juacajinia, janiyari samitianutaniuhuanu.

²² Naa Jesu sequesacaritij, Pedroori Jesu jaatucuree tamocora na nacasunura tamajaaja. Jiyano. Jesu sequesereeri:

—¡Maja naa pocuanutej! ¡Pueyaso cuaara cojuara quiajaniya maja naa quia miishaanuratej!

²³ Jesuuri saaja Pedro nijiniaquequee. Na sequereeri:

—¡Niiquiji quia quiaare Satanásnaa! ¡Quia sanaajere! Sesaacaari naa quia pocuaterree Pedronaa. Quia sequesanoori maja Pueyasojiniji. Quia niishiriojosanoori juhua mijiria pueya niishiriojosano saaja. Naa quia sequesacaritij, quiaari cua Que sequesanoocuaaji cua tarinitiniu paniya juucua.

²⁴ Na nuhuaji, Jesuuri canaa na pueya sequequiaari:

—Pueya jaara cua tojjiaara quiniutianiya, nojori cuaara carteera tama nojori panishanojuaja. Na nuhuaji cufara, cuaara miiria cua panishano, tama na cuaqueya na panitianutajaaja cucua. ²⁵ Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyano. Taraatia quiniutianiya. Saniniuuja, cante tama na cuaqueyajaaja panitiaa cucua mijiriani, cuno pueyanoori na nuhuaji pueyaracaanu shuquiriaatia quiniutianiya cutara. ²⁶ Naajuhuj, pueyano jaara masere puetunu nio jiya casamijianaa, na casamiiri najuhua quiniutianiya nera, na camaru jaara jataaare mani quiquiojinia na shaajesacari. Nojuajaari

maja na naata Pueyaso jiyanoonitiniu tama na cuaqueyajaaja, naajaa, nojuaja jaara puetunu na casamijanaa niqutiore Pueyaso, Pueyaso samiitianiniuhara nojuaja.

²⁷ Janyacuajaari jyanohua shacantuuca quijiara quiniutianiyani, cua Que jiyatesacari janiya Jiyaniijarajanaa. Na nuhuaji, janyari mijiria niniutianihua jiyocuaaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niqutiiosaanutaniya maninia nojori miiniuucua. Pueyaso tojtiaashijiacaari saniniuujia naquiya miishaanutaniya, sesa nojori miiniuucua. ²⁸ Seetanujuanaa nia sequeyanijia, noojiaqueya niajanyajinijinio niya cuata quiyani, majaari nia shaajenu quiniutianiya juhuanujuaja, niaa cuara niquirijaatijia Pueyaso cumaaca cucua tiuquiyano, cucua tiuujiaa jiitariquiano.

17

Jesu jatasacari shacantuucara (Mr 9.2-13; Lc 9.28-36)

¹ Seis juuca nuhuaji, Jesuuri nio pojori jiyataquiaari jyaconaja tuhuanuucua. Nojoriiri quiquiaari Pedro, Santiago, Santiago tarajanu Juannio. Jiyareta tama nojoriijaarijia quiaquiaari. ² Jesuuri tii tamaatiara jataquiaari nojori niqiuara. Na jiquicoori jyanohua shacantuucara jataquee, juhua pananu. Na toqueeri mariyata jyanohua cohuajara jataquiaarijuhuaj, juhua cuhuatana. ³ Jiyacaritij, nojoriiri caapiqui supuetanaa niquirii, Moisés, Elíasnio. Jesuta pocoojoriquiaari. ⁴ Cunora, Pedroori Jesu sequere: —jijanyijianaa, canaaqui namitia niya quiyani! Quiaa jaara paniri, canaa quiocuaji suhuoronutaniyani, Moisésrajuhuaj, Elíasranio.

⁵ Pedro pocuasacarijia, shacantuuca najacari nojori mishiquiomaa. Najacajiniji, rupaari tojishaaquiaari naa sequeyano:

—¡Nioori cua Niyanniyojua, cua shuquiritiasano! ¡Saaja nojuaja nia tojtiaare!

⁶ Naa nojori tojishacari Pueyaso pocuaanotej, nojoriiri jacamatuquiaari jyanohua na puerenuta. ⁷ Jesuuri nojoriicua nimiaa. Nojori quiaseeri na juaashiquiata. Nojori sequereeri:

—Nia saneecuatuohua. Maja puerenu.

⁸ Nojori jaara niqunijionuuquiaari, majaari tari na niqutiuniu quiquiaari cuno supuetanaa. Saaja Jesuuri quiriquiaa.

⁹ Nojori rosetasacariuhua tuhuananujiniji, Jesuuri naa nojori rootaquiaari:

—¡Majaari nia pohuatanu pueya niqiuara tuhuananujiniji nia niquishano! Niocua na pohuatarohua cutara janiya jaara samiitiarohuani.

¹⁰ Na pueyari Jesu nequesotaree:

—¿Casaara tariucuaaanu Pueyaso Rupaajiniji niishitiojona sequequiaacuaraarini, supuetana Elíasnaari quiocuaji mijiria niniutianihua coteenu, pueya na jyanootootenuhuara necohuata?

¹¹ Jesuuri riucaaree:

—Elíasri seetanujuanaa coteenu niriquiano quiquiaari, puetunu pueya jiuujiaajanaa na jeenucuanura. ¹² Janiya cutaraari nia sequeyani, Elíascuajaari tari niqiuari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricujani. Nojoriiri naa cua miiniutianiya naquiyaajuahuaj.

¹³ Naa Jesu pohuatasacari Elíasjinijitij, na pueyari niishiqui nojuajaari Tiuquinjiona Juanjiniji pohuatariquiaa miriqui.

Jesu naatanishacari samaruraca caya samijia

(Mr 9.14-29; Lc 9.37-43)

¹⁴ Jesu jaara tuhuananujiniji tiuquiiioquiaari canaacua, tamonu pueyanoori nocua catecanoquiaari canaata quiniaa maanujiniji. Jesuucuaa mojoquetaseeri na sequenura neyanuucuaa. ¹⁵ Jesu sequereeri:

—¡Jiyaniijianaa, cua niyanuucua quia taraajere quenaaja! ¡Nojuajaari pueyaracaanu cusojoquiaa! Na jiitiasano cusonuuri na taquiriocatequiaa. Na cusojosacari miiquiaa naquiyari. Naacujitij, sequeyarucua manijinia tiquiaari, moojiniano. ¹⁶ Janiyari quia pueyacua na tiuquitiasee na naataniniuria juucuan. Nojoriiri maja na naata na naataniniu.

¹⁷ Jesuuri cunora sequeree:

—¡Niaaqui Pueyasooqua tiuyashijiaca, na tojiyashijiacanio! ¿Janiyateeri nia rejeretanutaniya pueyaracaanuni? ¿Taacari nia niishiniutianiya Pueyaso tamajaajarini? Miji nia jaatucuma cuno mueya.

¹⁸ Mueya tiuquishacari nocua, Jesuuri samaru juaarii. ¡Na tohuatereeri! Jiyacaritij, caya samijiaari maninia quiquihua.

¹⁹ Na nuhuaji, tamajaaja canaa quishacari Jesuta, canaari na nequesotareeni:

—¡Jiyaniijianaa, ¿casaara maja canaa naata cuno samaru tohuatenu quiriquiaani?

²⁰ Jesuuri canaa riucaaree:

—Maja puera maninia nia tiuuniu juhuanojuaja Pueyasooqua. Seetanujuanaa nia sequeyanijia, nia tiuuniu Pueyasooqua jaara quiriquia shiitianiyoja juhua mostaza jajau quenaaja, jiyacari cutaraari nia naata miiniu puetunu nia panishanojuanaa. Naacujitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”.

²¹ Saniniuujia, jiyano samarutej, na naata tohuatanishano cutara saaja Pueyaso nia secojosacari nia miaqueyaquiniutia.

Jesu pacutesacari pohuatanu nojuajaari mosaanutaniya

(Mr 9.30-32; Lc 9.43-45)

²² Tamonu juuca Jesu rucojosacari canaa na pueyata Galilea jiyajinia, Jesuuri canaa sequeree:

—Janiyari sapojonuta niquitiosaanutaniya taucuacani. ²³ Nojoriiri cua monutaniya. Jiuujianaraca juucajinia, janiyari samiitanutaniuhuan.

Naa Jesu sequesacari canaatej, canaari jiyanhua taraajequiaarini.

Cumaneeca niquitiosacari Pueyaso Secojoja tiaacuara

²⁴ Canaa jaara tiuquiiioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojoja tiaacuara. Cuno pueyanoori Pedro nequesotaree:

—¿Majate nia niishitiojona niqutionu na cumaneeca Pueyaso Secojoja tiaacuara, taa pa jiyaniijianucua sequequiaaricujani?

²⁵ Pedroori na riucaaree:

—Na niqutioquiaanocujia.

Na nuhuaji, Pedro tiuquishacariuhua na tiajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijitii, taucuacajiniji soj?

²⁶ Pedroori Jesu riucaaree:

—Taucuaca niqutiojoteshiyanocujia nojori jiya jiitiana sequesano.

Jesuuri na sequere:

—Naacuaaquinatejaj. Naacuaajitij, tama na pueyajaarijia maja na niqutionu. Pueyaso Secojojua tiacuajaari cua Que tia. Naaratej, maja cumaati Neyanu sequesaaanu na niqutionura na cumaneeca. ²⁷ Naajaa, pa niqutiore juhuari nojori sequesano, paa mariqui nojori juaatiriiri. Nocuaji quia rioosee caminiajinia. Quiocua coteenu quia jatasano sapitiaaja rupaama niquri. Quiaari tii cumanee riuritanutaniya. Quiocua cuno cumanee niquitiosuhua nojori, quiria, quiarajuhujaj.

18

Cante jiyaniijajanaa cutarani

(Mr 9.33-37; Lc 9.46-48)

¹ Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijanaa, canaa quia sequeretoj, puetunu quia pueyajiniinijouanaani, ¿cante jiyaniijajanaa cutarani?

² Jesuuri naatujua piirri. Canaa tajinia na nuuatereeri.

³ Na nuhuaji, Jesuuri canaa sequere:

—Nia niyaretare socua tojishano pueyano nia quiniu paniniu tamasaciniji. Seetanujuanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muera-sura nia quiniu quiniutianiya quenaaja. ⁴ Naacuaajitij, cante tama na cuaqueyajaaja jiyateya pueya shocoteyashijia na quiniuria juhua naatujuanu, nojuajaari socua jiyaniijajanaa quiniutianiya cutara narta Pueyaso muerasujinijinio. ⁵ Naajuhujaj, cante naatujua maseja maninia na paniniuucua janiyani, nojuajaari cua maseyajuhujaj.

Paari cocuaatia miyani sesa pa miishacari

(Mr 9.42-48; Lc 17.1-2)

⁶ Sesa cutaraari, sesa nia miitiniuria cucua tiuujia naatujua. Socua maninia cutaraari sesa miitiriquiano pueyanora, nojuaja jaara juhuacarijia caminia queronijinia jartasaare puereetujajau saajia na riquiajiniji morotasano. ⁷ ¡Mijiria quiniiaari jiyano-hua cocuaatia miiquiaa sesa na miitishacari tamasaca! Mijiria, pueyari pueyaracaanu sesa miitishaaquiaajuhuanajaj. ¡Taraatia quiniutianiya cutaraari noo pueyanora, cante sesa miitirii tamonuni!

⁸ Nio miriqui cua niishitiojosano nia tojiri: nia juaashiquia, nia niohuaca jaara sesa miitiya nijaniya, nia rashiquiarenoj, tucuacaanu jataso-coriquiano. Naa nia miiri niaa mariqui mani quiquiojinia jatasareeri puetunu nia cuaqueyatajanaa. Socua maninia cutaraari juaashiquiaaju, niohuacaaju nia tiuquitianura Pueyaso quiquiojinia jiyocuacaanu. Niaari tii quiniutianiya shuquiriaatia pueyaracaanu. ⁹ Naajuhujaj, nia namijia jaara nia miitiri sesa, nia jiatere. Tucuacaanu nia jatarenoj. Jiyano-hua socua maninia cutaraari niara, jiyocuacaanu nia tiuquiniuria namijijiu, maja nia jatasaanura mani quiquiojinia, saniitiosocoriquiano puetunu nia namijiaatajanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyano-hua canaa miiniu panishano, cuno jaara sesa mijijara jiyateriquia canaa.

Jesu pahuatasano miriqui borrego tashucuanojiniji

(Lc 15.3-7)

¹⁰ Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniuucuaaji tamonu muerasuniyojua, juhua nio mueyaja. Cua tojitiare. Pueyasocuaajaari na seya seerataquiaa nojori cojuanura muerasu. Cuno na seyari pueyaracaanu cua Que Pueyaso jiquioco shootiaquiaa. Naajuhuaaj, Pueyasocuaajaari na muerasuranooocua niishiriojoquiaa. ¹¹ Naaratej, janiyari mijiria niquiaarinii tashucuaano pueya cua pajenura, nojori cua jaariuutianura Sesaaca.

¹² ¿Taa nia sequeyani pueyanaa? Tamonu pueyano jaara cien borregohua jitiare, niquiriyatujua jaara tashucuaare tapueyocuaajiniiji, ¿maja-teeri na camaru na borregohua cureeno tiujianu rupaquijia, tashucuaano na pajenura? Taaquiriiriniij. ¹³ Jaara na riuriatare, seetanujuanaa socua jiyanoohua cuno borrego tashucuaano shuquiritiaari tamasa na borregohuaajiniiji. ¹⁴ Naajuhuaaj, jiyocuaaanu quijia nia Queeri maja na paniniu que-naaja niquiriyatujua nio muerasujinijinio tashucuanura puetunurajanaa.

*Taa pa jiyanoaya pa tarajanuni
(Lc 17.3)*

¹⁵ 'Quiarta Pueyaso pueyano jaara sesa miiri quiajaniya, nocua quia quiaare na nacasunura tamajaaja nia quishacari. Nojuaja jaara tojiri quiajaniya, maniniacuajaari. Niaari maninia rupetoojuacara quiniutianiuhuacuuhuaaj. ¹⁶ Nojuaja jaara tojiyaquiri quiajaniya saniniuujia, nocua quia quiaare socua tamonu pueyanota, caapiqui pueyata soj. Nojori niquiaara quia nacasure cuno sesa miinia. Naa jaara naa miiritij, naa quiniutianiyari taa tariucuaaanu Pueyaso Rupaajinia niishitiojosaaquiaaricuajani: "Querajaa pueya jaara mariyata pohuatatare na niquishano, na tojishanojuhuaaj, cunoori maja sapojonu". Naacuajitij, nojori saquiriojotasanoori seetanujua-naa quiniutianiya. ¹⁷ Cuno sesa quia miinia jaara nia tojinuu paniaquiya saaja, puetunu niarta Pueyaso pueya niquiarajanaa quia pohuatatare sesa na miishano. Cuno pueyano jaara tojinuu paniaquiri puetunu Pueyaso pueyajanaa, nojuaja cuaara quiriia juhua Pueyaso niishiyashijia niaara. Naacuajitij, majaari socua nia rupuenunoj.

¹⁸ 'Seetanujuanaa nia sequeyanijia, cana nia jiyanoyaquirii mijiriani, na tojinuu paniaquishacari niajaniya, cunoori jiyanoyaquishano quiniutianiya jiyocuaaanu cua Que Pueyasorajuhuaaj. Naajuhuaaj, cana nia jiyanooriii mijiria na tojishacari niajaniyani, cunoori jiyanooshano quiniutianiya jiyocuaaanu cua Que Pueyasorajuhuaaj.

¹⁹ 'Naajuhuaaj, janiyari seetanujuanaa sequeya niajaniyani. Caapiqui niajanijajinijinio jaara mariyata niishiriojore nia panishanoocuaara nia sec-
ojonura Pueyaso, cua Queeri nia tojiniutianiya. Nojuajaari jiyocuaaanu nia maninia miiniutianiya niaara, taa nia secjosacari nia sequereecua-janoj. ²⁰ Querajaa niajanijajinijinio jaara rerejore, cucua tiuujiaca nia quishacari, janiyari tii niaata quiyajaaniuhuaaj. Naacuajitij, cua Queeri nia secjosano tojiniutianiya cutara.

²¹ Jiyacaritij, Pedroori Jesu nequesotasee:

—Jyaniijianaa, tamonu pueyano jaara sesa miiniu pacutejore janiya, ¿janiyatucua pueyaracaanu na jiyanoorini? ¿Majateeri tariucuaaja, janiya jaara na jiyanoori siete sesa na miishanojinijii janiyani?

²² Jesuuri Pedro riucuaaree:

—Maja naatej Pedronaa. Maja quia tarinitianu na jiyanooniu. Pueyara-caanu sesa na miishacari quiajaniya, pueyaracaanu quia jiyanoori quiarta pueyano. Majaari quia serojonu sesa na miishano quiajaniya. Pueyara-caanu quia jiyanoori saaja.

Jesu pohuatasano jiyanoashijia serujiniiji

²³ 'Naaratej, cua tojiri pueyanaa. Nia pohuatareera nia niishiniuria taa Pueyaso paniya jiyanoootiojuaca na muerasu nia quiniuriani. Tamonu jiya jiyaniijiaari nera poonijionaa pueya sequequiaari nojori cuaara tari niq-uitiojora nojuaja na cumaneeca, nojori na niqutiojosanojiniji na casami.

²⁴ Noojiaqueya nera poonijionaa pueya jaara tari nojori pasano casamijiniji niqutiojori quiacuaa tama nojori cumaneecajinijiaaja, jiyacaritij, tamonu-urí tiuquinishaareejuhua. Nojuajaari jiyanoohua queraatia casami masejo-quiaari na jiyaniijajiniji, queraatia millón cumaneeca. ²⁵ Nojuajaari maja na jitianu quiquiaari na cumaneeca, na jiyaniijia na niqutionuhua. Na jiyaniijiaari cunora na pueya sequere: "Tamonu camarnu nia niqutiore nio cua seru, necocuataja, cua cumaneecara, necohuahuhua, puetunu na casamijianaanio. Naacuajitij, na cuentaari puequenutaniya". ²⁶ Cuno na seru tojishacari naa na jiyaniijia sequesanojetej, nocuara jacamaquiaari-iri. Na jiyaniijia sequereeri: "¡Cua tarinitiare quenaaja cua jiyaniijianaa! ¡Rupaquijiaara cua tarinitiarejaara! Janiyacuajaari quia cumaneeca niqutionutaniya puetunujuanaani!". ²⁷ Na jiyaniijiaari nocua taraajeree. ¡Na carterohua puetunujuanaani! Naa na jiyanooriiri, nocua na taraajenuucua.

²⁸ 'Cuno seru tohuatasacari jiyaniijia tiajiniji, narta seruta naacuneetooreeri. Cuno narta seruuri tarijia masequiaari shiitianiyojua casami cuno jiyanooshano serujiniji. Secaja cumaneecaari quiquiaari na cuenta. Naajaa, cuno jiyanooshano seruuri narta seru quiaree. Cumaatia na riquiajinia na miniriiri. Na sequereeri: "¡Ritia cua niqutiore cumaneeca, tarijia quia masasano janiyajiniji!" ²⁹ Narta seruuri na riquiajinia mininia cariquimiai mojoquetaree. Na sequereeri: "¡Cua tarinitiarecuaraja quenaaja! ¡Janiyacuajaari quia cumaneeca quia niqutionutaniyani!" ³⁰ Majaari na sashiniu paniniu quiquiaari. Saaja na nujuatequiaari nujuatejojuajiniaari cuaara na cumaneeca na niqutiorejaatijia. ³¹ Narta seya niquishacari naa cuno jiyanooshano seru miishanotej, nojoriiri jiyanoohua taraajequiaari. Nojoriiri jiyaniijiaacua quiojoquiaari puetunu sesa narta seru miishanojuanaa nojori pohuatanura. ³² Naaratej, jiyaniijiaari tamonu na seru jiyaroree cuno jiyanooshano seru riniucua. Na tiuquishacari, jiyaniijiaari na juarii. Na sequereeri: "¡Quiaaqui jiyanoohua sesajuhuanaja! Quia sequesacari janiya, janiyari quia jiyanooriicuaani, maja quia naata niqutionu quishacari quia cumaneeca. ³³ ¿Majateeri quia naata quiriquiaa taraajenu quiarta seruu-cua, taa cua taraajeree quioacuacuaani?" ³⁴ Jiyaniijiaari jiyanoohua juarii. Cunora, cuno sesa mijia seru jiyarotareeri nujuatejojuajinia na nujuatesaanura. Sequerejaariuhua quiaara naquiya miishaaria tii, cuaara puetunujuanaa na cumaneeca niqutiorejaatijia, casami na pasanoiniji.

³⁵ 'Nia Que Pueyasoori naa miiniutianiya nijaniyajuhua, niaa jaara seetanujuanaa jiyanoyaquiri niarta Pueyaso muerasu.

19

Jesu niishitiojosano maja pa niquiocua pa cartenura

(Mr 10.1-12; Lc 16.18)

¹ Jesu jaara naa pohuatanu puecaquiaaritij, canaa na pueyata quiaquiaari Galilea jiyajinijiiri. Canaari Judea jiya shuriucua tiuquishii Jordán moo taquijiriani. ² Jiyanoohua queraatia pueyari Jesu nuhuajiyaree. Quiniqui canaa quishacari, Jesuuri cusosuhua naatanijioree.

³ Jiyacaritij, noojiaqueya Fariseocuacajinijinoori Jesuucua nijioquiaari sesa na pocuatenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maninate pa cartenura pa niquiocua, jaara pa juatiri?

⁴ Jesuuri nojori riucuaaree:

—¿Majate nia serojonu quiquiaacuaja Pueyaso Rupaajinia? Coteenujua-naa Pueyaso shipinishacari pueyano, Pueyasoori shipiniquiaari caya, maa-jinio. ⁵ Naaratej, nojori shipininiaari sequequiaari: “Caya cuaara tiujiaara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari”. ⁶ Naaratej, caya, maaji jaara camitioore, majaari tari na quiniu caapiqui pueyano. Juhua niquiriyatu pueyanojaari quiqui. Naacujitij, majaari maninia Pueyaso rupuetootesano rupartanura.

⁷ Nojoriiri Jesu sequeree:

—Jaara naa quiriritij, ¿casaara supuetana Moisés rootaquiaaricuaaarini caya cuaara naajione niqutioora necocua, na cartenu panishacari?

⁸ Jesuuri nojori riucuaaree:

—Moiséscaajaari niishiquiaari niaari puera cumajiuujiaaca. Naaratej Moisésri nia tarinitiaquiaari nia niquiocua nia cartenura. Coteenujua-naa, Pueyaso jaara shipiniquiaari caya, maa-jinio, majaari naa na quiniu quiquiaari. ⁹ Cua tojitiare pueyanaa. Janiyari nia sequeya cutarani. Cante necocua carteree najuhuanani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyanohua sesa miya Pueyaso niqiara. Jaara naa miiritij, Pueyasora, nojuajaari sesoriquia pueyano. Nojuacuajaari juhua pueyano, cante narta pueyano niquiocua numuetucujuani. Naajuhuaaj, cante cartesano maaji camiyani, naa sesa miyajaariuhuaaj.

¹⁰ Canaa, Jesu saquiriojosano pueyani, canaa tojishacari naa Jesu sequesanotej, canaari na sequereeni:

—Jaara naa quiriritij taa quia sequeriquiaacuajani, maninia naasucuaari maja mashaja caminiuria. ¿Naatejaaratej?

¹¹ Jesuuri canaa riucuaaree:

—Maja na naata puetunu pueyajanaa nio cua niishitiojosano tojinu. Saaja noojiaqueya pueya cutaraari na tojiniutianiya, noo pojori canapuate jiyocuaanuji cumaaca niqutiosaaareeni na tojiniuria. ¹² Naajuhuaaj, noojiaqueya canuuri maja na naata caminiu, riyacajajaaaju nojori quishacari. Nojoriiri naa rasanohuanajaj. Tamasaca canuuri maja na caminiu saniniuujia, jiatejosano nojori riyacajajau quishacari. Tamasacaari maja na caminiuujuhuaaj tama nojori paniyaquishacarijiaaja, saaja Pueyasora nojori poonijionu panishacari. Cante na naata naa miiniuni, cuaara naa miiriatej.

*Naatjuooriicuaa Jesu secojosacari Pueyaso
(Mr 10.13-16; Lc 18.15-17)*

¹³ Na nuhuaji, pueyari Jesuucua nitaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujuree canaa juaaniutiani. ¹⁴ Jesuuri saniniuujia canaa sequeree:

—¡Maja nojori tenujunu! Nia tarinitiare naatjuoori cuaara cucua nijioora. Nia tojiri, canapuate seetanujanaa juhua nio naatjuoorini, nojoriiri Pueyaso muerasu quiriquiano.

¹⁵ Na nuhuaji, Jesuuri na juaashiquia niaquiaari naatjuooriicua, nojoriicua na secojonura, Pueyaso miiniuria maninia nojori. Na nuhuaji, Jesuuri quiniquiji quiaquiaariuhua.

*Jiyanohua casamiriaca mashaja pocoojosacari Jesuta
(Mr 10.17-31; Lc 18.18-30)*

¹⁶ Tamonu mashajaari Jesuucua niquiaari. Na nequesotaseeri:

—Niishitiojonanaa. Quiaari maninia pueyano. Cua sequere, ¿taa cua miiniutianiyani maninia cua quiniuria Pueyaso niqiuara, pueyaracaanu quijjara cua quiniuriani?

¹⁷ Jesuuri na riuuaree:

—¿Casaara quia sequeya janiya maninia pueyanotani? Saaja niquiriyatu-juaari maninia quijja cutara. Nojuacuajaari Pueyaso. Naajaa, quiaa jaara maninia quiniuucua jiaatiaa Pueyaso pueyano quia quiniuria, quia tojiri tariuacuacaanu Moisés Rootasano Pueyasojiniji.

¹⁸ Jesuuri riuuareeri:

—¿Teyano rootasanoteni?

Jesuuri na sequeree:

—Maja quia monu. Maja quiarta pueyano niqiuocua quia numuetucunu. Maja quia nohuasenu. Maja quia saquiriojotanu tamonuucua quia sapon-joneta. ¹⁹ Quia que, quia nucua tojjia quia quiriquia. Maja nojori quia rerequetenu. Mariyata quiarta pueyano quia paniri taa quia paniyacuaa tama quia cuaqueyajaajani.

²⁰ Mashajaari Jesu sequeree:

—Janiyacuaajaari puetunujuanaa nio tojjia quiquiaari cua naatujuajini-jini. ¿Casaa cua miiniutianiya socuani?

²¹ Jesuuri na sequeree:

—Quiaa jaara seetanujuanaa maninia quiniuucua jiaatiaa Pueyaso niqiuara, quia quiaarohua quia tiajinia. Quia niquitiojore puetunu quia casamijianaa cumaneecara. Na nuhuaji, casamijiniucua quia niquitiojore nareja quia cumaneeca. Naacujitij, quiaari queraatia casami jiitianutaniya jiyocuacaanu. Na nuhuaji, quiocua nimiohua cutara, cua tojjia quia quini-uria.

²² Na tojishacari naa Jesu sequesantej, mashajaari taraatia quiaarohua jiyanoehua casamiriaca na quiniuucua.

²³ Jiyacaritij, Jesuuri canaa sequeree:

—Seetanujuanaa nia sequenyajia, jiyanoehua jiyajenetaari pueyano tojiniuria Pueyaso, na pueyano na quiniuria, cuno pueyano jaara puera jiyanoehua casamiriaca quiri. ²⁴ Pueyanaa, ¿camellooteeri na naata cusupuetaja cuhuoco tamajiria fajiniu? Maja na naata. Cua tojitiare. ¿Socua jiyanoehua jiyajenetaari casamiriaca pueyanora, Pueyaso pueyanora na jatanishaanura!

²⁵ Canaa tojishacari naa Jesu sequesantej, canaari jiyanoehua jiuuji-ateereni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

²⁶ Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

²⁷ Pedroori Jesu sequeree:

—¿Canaarijiaatj? Canaari puetunu canaa casamijianaa tiujiaquiarini canaa rupuenura quiajaniya. ¿Casaa canaa masenutaniyarinjia?

²⁸ Jesuuri canaa riuuaree:

—Seetanujuanaa nia sequenyajia. Nio jiya maniniushitishacariuhua, janiyari cajiniutianiyani jiyaniija cajituijina puetunu cua Quejiniji shanohua cua cumaacatajanaa. Jiyacaritij cua pueyanaa, niaari mariyata cajitijosaanutaniya doce jiyaniija cajituijucujinia. Niaari pa supuetana Israe doce niqiuohuacujinio caneno pueya nequesorenaa quiniutianiya. ²⁹ Cua pueya tojiniuria janiya, noojiaqueya nojorijinjiniioori na tia tiujanufaniya, tapueyocuaca, na rimiathua, na que, na nucua, necohua,

na cuhuariquiano. Canapuate na tiujiaquiaa na tojiniuria janiyani, cuno pojoriiri Pueyasojiniji socua jiyanohua queraatia masenutaniya nojori tiujiasanojiniji. Nojoriiri pueyaracaanu shuquiriaatia quijiaca quiniutianiyajuhua, shaajeyashijiaca. ³⁰ Saniniuujia, queraatia tojishano pueyari Pueyaso shocotasano quiniutianiya na tojitiaashijiaca nojori quiniucua. Naajuhua, mijiria, queraatia pueyari juhua shocotasano pueya quiya Pueyaso niishiyashijiaca pueyara. Cuno pojori jyanishano najuhua quijiacani, nojoriiri Pueyaso shuqiritiasano pueya quiniutianiya cutara.

20

Jesu pohuatasano cuhuariquiajina poonitijosano pueyajiniji

¹ Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijosano pueyacaani. Cuno cuhuariquia camaru quiaquiaari tariquicuaji pueya na pajenura na uva cuhuariquiajina nojori poonijionura. ² Cuhuariquia camaruuri pueyata pocoojoquiaari taa cumaneeca na niqutionutaniya cuno juuca nojori poonijosanojiniji. Poonijionaa pueyari na sequeree: “Maniacuajaari taa quia sequereecuajani”. Na nuhuaji, cuno pueya jiyaroreeri uva cuhuariquiajina nojori poonijionura. ³ Pananu tacasacari, cuhuariquia camaruuri tohuataquiaariuhua na tiajiniji. Jiyacaritij, socua tamasaca pueya niquishiiri juhuajaniya quiyano tiaca jiuujiajina curotasano cajitiucuaajina. ⁴ Cuhuariquia camaruuri nojori sequeese: “Nia quiaarejuhua, cua uva cuhuariquiajina nia poonijionura. Janiyacua cumaneeca nia niqutiorohua nia poonijionu samini”. ⁵ Naacuaajitij, nojoriiri quiojoquiaari cuno cuhuariquiajina poonijionurajuhua. Na camaruuri socua tohuataquiaariuhua panacari. Socua tamasaca pueya niquishiiri juhuajaniya quiyano tiaca jiuujiajina curotasano cajitiucuaajina. Nojori sequereejariuhua nera nojori poonijionura cuno juuca. Pananu mueecosacari, socua pueya riuriataquiaariiri. Nojori jiyaroree poonijionuucuaajaariuhua. ⁶ Tariucua pananu piriushacari, na camaruuri socua tohuataquiaariuhua. Socua tamasaca pueya niquishiiri tiaca jiuujiajina curotasano cajitiucuaajina najuhua quiyano. Nojori sequereeri: “¿Casaara nia quiojyaquiyaree poonijionuucuan? ¿Casaa nia miya niyani? Niaa mariqui poonijiore”. ⁷ Nojoriiri na riuquaree: “¿Canaatucua taa poonijioreni, canaa jaara pajeshiyaquiri poonijionurani?” Cuhuariquia camaruuri nojori sequeree: “Nia quiaarequi cua cuhuariquiajina nia poonijionura. Janiyacua nia poonijionu sami cumaneeca nia niqutiorohuani”. ⁸ Pananu niqutishacari, cuhuariquia camaruuri na casami cojuana sequeree: “Cua poonitijosano pueya quia piiri miji, nojori rerejonura. Na nuhuaji, cua sequesano cumaneeca quia niqutiojore puetunu nojorijiana taa cua sequeree coteenujuanaa quiria poonijionaacuajani. Majaari rimiajata nojori niqutiojonu. Coteenu quia niqutiojore tariucua pananu piriushacari cua jiyaramiquishano. Naa quia niqutiojore puetunujuanaa. Quiocua naa tucuatere niqutiojonu noo pojoriijuhua, canapuate tariquicuaji coteeree poonijionuacuajani”.

⁹ Jiyacaritij, tariucua pananu piriushacari poonitijosano pueyari ni-jimaa. Puetunu nojorijianaari cumaneeca niqutiosaaree taa cuhuariquia camaru coteenujuanaa tariquicuaji poonijionaa pueya sequeraaricua-jani. Majaari rimiajata nojori niqutiosaanu quiquiaari cumaneeca, nojori

poonijionu sami. ¹⁰ Na nuhuaji, coteenujuanaa poonijionaa pueyari sequesaaquiaari na cumaneeca nojori masenura. Nojoriiri jiyaniquiaari nojori naasucuaari socua cumaneeca niqutiosaanutaniya rupaquijia poonitijosano pueyajiniji. Nojoriiri saaja niqutiosaaeree taa cuhuariquia camaru sequeree nojori cuno juucacuajani. ¹¹ Nojori masesacari na cumaneeca, nojoriiri cuhuariquia camaruta juaaquioree. ¹² Na sequetureeri: “Cuno pueyari saaja rupaquijia poonijioree. Quiaari nojori niqutioree taa quia niqutioree canaacuaani. Canaari pananucari cateree cutarani, pueyaraanu canaa poonijosacari”. ¹³ Cuhuariquia camaruuri tamonu nojorijinijinio sequeree saaja: “Sanajanaa, maja sesa cua miiniu quirii quiajaniya. ¿Majateeri quia niishiniu, paa jaara tariquicuaji pocojoriquiaatej, janiyari juhuacarijia quia sequereeni janiyari naa cumaneeca quia niqutitionutaniyani? Quiaari cua riuquaree: ‘Maniniacuaja’. ¹⁴ Naaratej, quia jiyataarohua quia cumaneeca quia tijainiohua. Janiyacuajaari naa niqutionu paniriquiaa tariucua pananu piriushacari cua poonitijosano pueyani, taa cua niqutioree quiajanicyaanaani. ¹⁵ ¿Majateeri cua naata miiniu tama cua panishanojuaja tama cua cumaneecatajaaja? ¿Quiaateeri socua cumaneecaacua jiaatijara quiqui, capora cua quiniucua?”

¹⁶ Na nuhuaji, Jesuuri naa sequequiaarijuhua, na pohuatasanojiniji na niishitiojonura:

—Naa quiniutianiyari taa cua sequeriquiaacuajani: canapuate nuhuajishanaani, nojoriiri coteetanaa quiniutianiya. Naajuhua, cante coteetanaani, nojoriiri nuhuajishanaa quiniutianiya saniniuujia. Queraatia masuusano pueyari quiya. Saniniuujia, secajaari saquirojosano quiya nojorijinijinio.

Jesu camishacariuhua pohuatanu taa na mosaanutaniyani

(Mr 10.32-34; Lc 18.31-34)

¹⁷ Tari Jesu quiasacari Jerusalén tiacajiniara, Jesuuri canaa na doce saquirojosano pueya piirii tamocora nuu shuriuquicora, tamajaaja canaata na pocojonura. Canaa sequereeri:

¹⁸ —Cua tojiri. Niaacuajaari niquiya paa tari Jerusalén tiacajiniara tacataani. Janiyari tii niqutiosaanutaniya pueyacuara secojonaa jiyaniijianucuaani, Moisés Naajioneejiniji niishitiojonaanio. Nojoriiri cucuara saquirojotanutaniya nojori sapojonuta cua mosaanura. ¹⁹ Nojoriiri cua niqutitionutaniya taucua. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusonura. Jiuujianaraca juucajinia janiyari macujiniji samiitianutanihuani.

Santiago, Juan nucua sequesacari Jesu, maninia na miiniuria necohua

(Mr 10.35-45)

²⁰ Jiyacaritij, Zebedeo niqiuocuaari Jesuucua catecanoquiaari necohuata. Jesuucua mojqetaseeri Jesu na sequenura nera na miiniuria na panishano. ²¹ Jesuuri na sequeree:

—¿Casaa quia paniyani?

Jesu riuquareeri:

—Quiaa jaara Jiyaniijiaari jiyatesaare, quiocua cua niquiohua cajitijiore quia shuriucua, Santiago, Juannio. Tamonu cuaara cajiria quia miaquetajara, tamonu quia muenecara, quia naacunaa nojori quiniuria, juhua jiyaniijianucujuhua.

²² Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naatateeri rejeretanu naquiya miiniu taa cua miishaanutaniyacuaani?

Nojoriiri saaja Jesu riuquaree:

—Taaquiriirini. Canaa naatacuaaquinatejaj.

²³ Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu nijaniya, cante cua miaquetajara cajiniutianiya, cua muenecarano, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajitiuniuria, teyano pojoriicuaji na jeenucuaquiaaricua-jani.

²⁴ Canaa, narta saquiriojosano pueyani, canaari Juan juariini, Santiago-no, canaa tojishacari nojori masesano juucua. ²⁵ Jesuuri saniniuujia canaa sequeree:

—Miji pueyanaa. Niya cua tojitiasee. Niaacuaajaari niishiya, mijiria jiyani-ijianucuaari na pueya poonitijioquiaa juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa. ²⁶ Nijaniya saniniuujia, majaari naa nia quiniu quiniutianiya. Naacuajitij, cante tojishano pueyano quiniu paniya nia-janiyajinijinioni, cuno cuara quiiria narta Pueyaso pueya cumaquinia.

²⁷ Cante nia jiyaniijia quiniu paniyani, cuno cuara quiiria juhua nia seru, maninia na miiniuria nijaniya, naatej, taa cua miiquiaa nijaniyacuaani.

²⁸ Janiya cutaraari Jiyaniijiani. Naajaa, majaari mijiria cua ninu quiquiaari pueya cua poonitijionura quiria, shuquiriaatia cua quiniuria tamajaaja. Niquiaari cutaranijia pueya cua naacunura, tama janiyajaja mosaanura pueya niti, queraatia pueyacuaji cua ritianura Sesaaca.

Jesu jeeacasari caapiqui cariyojuaru namijiaa

(Mr 10.46-52; Lc 18.35-43)

²⁹ Jesuta canaa quiasacari Jericó tiacajiniji, jyanohua queraatia pueyari Jesu nuhuajiriquiaa. ³⁰ Jiyacaritij, caapiqui cariyojuaruuri nuu shuucuaaji cajituriquiaa. Nojori niishishacari Jesuuri nojori tajiriquiaa, nojoriiri nacanau coteequiaari:

—[Jiyaniijianaa! ¡Canaacua quia taraajere! Quiaacuaajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

³¹ Pueyari nojori juarii nojori sanaajetanura juucua. Nojoriiri saaja jiyatequee nacanura:

—[Jiyaniijianaa, canaacua quia taraajere, Pueyaso Jiyarosanonaa!

³² Jesuuri socua nujuasee. Nojori sequereeri:

—[Miji! ¿Casaa nia paniya cua miiniuria nijaniyarani?

³³ Jesu riucatureeri:

—[Jiyaniijianaa, canaa namijiaa quia jeeicare!

³⁴ Jesuuri nojoriicua taraajeree. Nojori namijiaa quiareeri. ¡Nojoriiri niqijiacara quiquii! Na nuhuaji, Jesuucua sacuaaree canaataari.

21

Jesu tiuquishacari Jerusalén tiacajinia

(Mr 11.1-11; Lc 19.28-40; Jn 12.12-19)

¹ Canaa quiojosacari, canaari socua tiuquijiose Betfagé tiacajiniani, Olivo nacuhua tuhuananu shuriucua. Cuniqiji, majaari puera tucuaaanu quiquiaari Jerusalén tiacajiniara. Jiyacaritij, Jesuuri caapiqui canaa na pueyajinijinio sequequiaari:

² —Cuno tiacajinia nia quiaare, noj pocuaji niquishiyatej. Niaari ti riuriatanutaniya niqiojuaraca burro morotasano. Niocua na samaacartasee. Niocua miji na jaatucuyarohuanoj, necojuataja. ³ Pueya jaara nia

tenujunu paniri nocuaji, niocua na sequere: “Jiyaniijia na paniya. Ritia na tacatonutaniuhuacuaja”.

⁴ Naa tohuateequiaariiri tariucuacaanu Pueyaso sequesano caminiujunia sequesano, nojuaja jaara naa naajiotaquiaari Jerusalén tiacajinia quiniaa pueyara:

⁵ “Sión tiacajinia quiniaa pueya nia sequere: ‘Nia niquiri! Nia Jiyaniijaari burrojinia niaacua niya. Maninia pueyanoori, juayashijia. Burro nijinia cajiyano, necojuaacuano’ ”.

⁶ Jiyacaritij, cuarta Jesu pueyari quiaquaari. Nojoriiri naa miiquiaari taa Jesu sequequaari nojoricuajani. ⁷ Nocua jaatucutuquiaariuhua burroori, necojuaaja. Na nuhuaji, Jesu cajijia, canaari canaa tucuaque toqueya niojoquaari burro nijiniani, necojua nijiniano. Na nuhuaji, Jesuuri na nijinia cajirii. ⁸ Jiyanhua queraatia pueyari tii quiriqiaa. Nojoriiri na tucuaque toqueya muevoquaari nucuaco Jesuucuaji. Tamasacaari jaamasucua piyotaquaari Jesuucuaji niojotasocoriquiano nucuaco, nuu niqishaanura shanohua, juhua cutara jiyaniijaacuaji maniniushitishano. ⁹ Jesu puetanaa, mariyata na nuhuaji nijionaajuhua, nojoriiri naa coteequiaari nacojonura: “¡Pueyanaa, nioori pocuaji Tacuna! ¡Nojuacuajaari pa Jiyaniijia, pa supuetanaa jiyaniijia David niti! ¡Cuaara quiria shuquiriaatia pa Pueyaso jiyarosano! ¡Jiyanhua maniniaari pa Pueyaso! ¡Cuaara shuquiritasano quiria!”

¹⁰ Jesu tiuquishacari Jerusalén tiacajinia, puetunu tii quiniaa pueyanaari jiuujiatecoquaari. Sequetureeri:

—¿Cantejaara cunoni, tiuquiyani?

¹¹ Jesuta tiuquijijonaari nojori riuuaree:

—Nojuacuajaari Jesu, Pueyaso sequenu panishano caminiujunia, Nazaret tiacajinijinio pueyano, Galilea jiyajinijinio.

*Jesu jaacasacari seya niqutiojonaa Pueyaso Secojoja tiacariji
(Mr 11.15-19; Lc 19.45-48; Jn 2.13-22)*

¹² Na nuhuaji, Jesuuri Pueyaso Secojoja tiacari matacajinia tiuquiquiaari. Tii pueya niqishiiri seya niqutiojijyano. Jesuuri puetunu nojorijianaa tohuatanijoree. Cumaneeca tacatojojuaca juhuacutucua caponeetareeri, tee pueya niqutiojoriquiaa taucuaca cumaneeca, Pueyaso Secojoja tiajinia niqutiojosocoriquiano cumaneecaracuajani. Mococoonu niqutiojonaa cajitiucua caponeetareejaariuhua, tee mococoonu niqutiojosaariquacuajani Pueyasocuara catijasocoriquiano. ¹³ Jesuuri nojori sequeree:

—Pueyaso sequesano cuajaari naa naajiotasaquaari tarijia:

“Cua quiquioori sesojosaanutaniya Pueyaso Secojoja tia”.

¡Niaari saniniuujia na jiyatecanu nohuasenuujuaca quiquiora!

¹⁴ Secojoja tiajinia na quishacarijia, cariyojuarujuri pueya, mariyata shipiiniquiuujunia pueyari nocua nijioquaari. Jesuuri nojori naatani-joree. ¹⁵ Pueyacuara secojonaa jiyaniijianucuaari Moisés Naajioneejiniji niishitiojonaata Jesu shootariquiaa cusosuhua naatanijiyano. Jiyacaritij, naatujooriiri Secojoja tiajinia naa nacooriguiaa Jesujiniji: “¡Pa supuetanaa jiyaniijia David niqiuohuacuajinio supueno pueyano! ¡Nojuajaari pa Jiyani-ijia!” Canaa Judiocuaca jiyaniijianucua niquishacari naa Jesu miishanotej, mariyata nojori tojishacari naatujoori, nojoriiri juaaquioree. ¹⁶ Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¡Nojoriiri jiyaniya quiaari Pueyaso Jiyarosano!

Jesuuri nojori riuuaree:

—¡Taaquiriirinij! Na tojiyacuajanijia. Maniniacuaajaari nojori sequesano. ¿Majateeri nia serojonu quiquiaacuaja tariucuacaanu Pueyaso Rupaajinia naa sequesanotej:

“Quiaari naatujoori niishitirii conaajanio, seetanujuanaa nojori manini-huaqueetanura quia Jiyarosano?”

¹⁷ Naa nojori na sequenu nuhuajitij, Jesuuri nojori tiujiaquee. Jerusalén tiacajiniji quiaqueeri canaata Betania tiacajinia. Canaari tii maqueseeni.

Jesu sesacasacari higo naana, muetuhuo na quiniuucua
(Mr 11.12-14, 20-26)

¹⁸ Tariquiiuacaji, Jesuuri Jerusalén tiacajiniara tacateriquiohua canaa na saquiriojosano pueyata. Jesuuri miaajeriquiaa. ¹⁹ Higo naana niquiriiri nuu shuriucua nujuaano. Nocua canujiyareeri. Shaanoori quiriquiaa, saa na jaamasucuaaja. Cunora, Jesuuri naana sequeree:

—Majaari socua quia jajau sanishaanu quiniutianiya.

¡Naanaari ritia sorequee! ²⁰ Naa canaa niquishacaritij, canaari jiuuji-atereni. Canaari Jesu nequesotareeni:

—¿Taateni? ¿Casaara higo naana sorequee ritiani?

²¹ Jesuuri canaa riuuaree:

—Seetanujuanaa nia sequeyanijia, niaa jaara Pueyasocua tiuujiaca quiri nioojia nia niquijioteyaquiniutia nocuaji, niaa maara socua cutara miishano miiri, socua jiyajeneta cua miishanojiniji. Naacujitij, niaa maara nia sequesano niquiri niaa jaara nio tuhuananu sequere: “Quia jaataare shoniacu caminijinia”. ²² Puetunujuanaa nia masesano nia secijosacari Pueyaso, niaa jaara seetanujuanaa nocua tiuuri, niaari nia masesano masenutianiya.

Judiocuaca jiyaniijianucua nequesoreesacari Jesu, cante na jiyaronani
(Mr 11.27-33; Lc 20.1-8)

²³ Jesuuri Pueyaso Secojoua tijinia tiuquiquiaari. Tii pueya niishitio-joriquiaari. Jiyacaritij, canaa Judiocuaca jiyaniijianucuaari nocua cate-canocuaari. Nojoriiri pueyacuara secojonaa jiyaniijianucua quiquiaari, canaa Judiocuaca camarucuanio. Nojoriiri Jesu nequesotaree:

—¿Canteeri quiajaniani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

²⁴ Jesuuri nojori sequeree saniniuuja:

—Janiyari nia nequesotanutianiya saniniunijia. Niaa jaara cua riuuare, janiyacua nia sequerohua saniniunijia cante cua jiyaroquiaari naa cua miiniuriani. ²⁵ Naacujitij, cua riuuature coteenu. ¿Cante Tiuquinijiona Juan jiyaroquiaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojorijiaarijia juayonuutano coteequiaari jiyasohuaja. Tama sequetooreejaarijia:

—Paa jaara na riuuareni: “Pueyaso na jiyaroquiaari”, pa sequerucua: “¿Naatee? ¿Casaara na niishitiojosanoocua nia tiuyaquiquianucuaaraarini?”

²⁶ Saniniuuja, paa jaara sequereni: “Nojuajaari nareja pueya jiyarosano quiquiaari”, ¡puereeta quiniutianiyari pajaniyara! Paacuaajaari niishiyani puetunu pueyajanaari sequequiaa Tiuquinijiona Juanna seetanujuanaa Pueyaso sequesano caminiujiunia quiquiaari.

²⁷ Naaratej canaa Judiocuaca jiyaniijianucuaari Jesu riuuaree:

—Maja canaa niishiniu canariquitijia na jiyaroquiaaritijia.

Jesuuri nojori sequeree:

—Janiyajuhuaaj, majaari cua sequenu quiniutianiya nijaniya cante cua jiyaronani, naa cua miiniuriatej.

Jesu pohuatasano pueyano niquihuaajiniji

²⁸ Jesuuri naa nojori sequerohuacuhaj:

—¡Cua tojitiare! Tamonu pueyanoori caapiqui niyanuraca quiquiaari. Nojuajaari jiyapueranu jiyaroree: “Quiyanunaa, quiria quia poonijiosee uva cuhuariquiajinia quiarjia”. ²⁹ Neyanuuri saaja na riuquaree: “Maja cua quianu paniniu”. Na nuhuaji, niishiriojorohuari. Quiaqueeri. Poonijioseeri. ³⁰ Na queeri naa na nuhuajishana sequereehujuaaj. Neyanuuri na riuquaree: “Maniniacuaja, cua quena. Janiya quianutaniyani”. Na nuhuaji, majaari na quianu quiquiaari saaja. ³¹ ¿Taa nia sequeyani pueyanaa? ¿Teyano cuno caapiqui necohuajinijiniote na que tojjia quiquiaarini?

Nojoriiri Jesu riuquaree:

—Na jiyapueranucuaaja.

Naaratej, Jesuuri nojori sequeree:

—Seetanujuanaa nia sequeyanijia. Cumaneece masejonaa pa pueyajiniji Roma tiacajinia quijia jiyaniijiarani, mariyata paanatujurinio, cuno nia soosano pueyari nia shocotanutaniya Pueyaso muerasura nojori quiniuria. ³² Cua tojitiare casaara naa cua sequeree nijaniyani. Tiuquinijiona Juanri niquiaari na niishitiojonura juucua nijaniya, maninia nia quiniuria Pueyaso niqiaari. Majaari nia tiuuniu quiquianu nocua. Niaari saaja na tojiaquiquianu. Cumaneece masejonaa nia soosano pueya cutaraari nocua tiuquianu, paanatujurinio. Nojoriiri na tojtiajara quiquianu. Ni-aacuaajaari na niquiquianu taa cuno sesa miijia pueya maninia pueyara jatacanuni. ¡Niajanijarijataj, majaari nia tacatonu quiquianu nioojia sesa nia quiniujiniji! Niaari saaja Tiuquinijiona Juancua tiuyashijia quiquianu.

Jesu niishitiojosano cuhuariquia cojuanaa sesa miijiacajiniji

(Mr 12.1-12; Lc 20.9-19)

³³ Socua tamonu cua pohuatasano nia tojiri. Tamonu pueyanoori cuhuariquiajinia uva natoquiaari. Maninia matacoquiaari puetunu na shuriuquicojuanaari maja casaa tiuquitanura nocua. Saajia quejaquiaarijiaarihuaj uva rapijiojuaa, na caaca reratesaanura. Jiaconajara tiaquiaarijiaarihuaj, cojuana niquijia tiji nohuasejuaacuaji. Na nuhuaji, na camaruuri tamasa pueya niqutioquiaari na cuhuariquia, nera nojori cojuasocoriquiano. Na nuhuaji, na camaruuri tucuaaanu quiaquiaari pueyaracaanu camueenujuna. ³⁴ Jaara tari quiquiaari uva carojotasacari, saniya cuhuariquia camarujuaanaari na seya jiyaramiquiquiaari na cuhuariquia cojuanaa pueyacua. Nojori jiyaramiquiquiaariiri nojori masenura cuhuariquia cojuanaa carojotasanojiniji, taa nojori poccojoquiaari taricuaajani. ³⁵ Cuhuariquia cojuanaari cuhuariquia camarujuaana jiyaramiquishano seya quiooree. Niquiriyatu majacutureeri. Tamonu moturee cutaraari. Tamonu jacuturee saitiaari. ³⁶ Na nuhuaji, na camaruuri socua queraatia seya jiyaramiquiquiaarihuaj. Nojoriiri naquiya miishaaquiaarijihuaj.

³⁷ Na nuhuaji, na camarujuaanaari tama sequereeaaja: “Jiyaroreera cua niyanu. Maja cutara nojori rerequetenu quiniutaniya cua niyanu”.

³⁸ Cuhuariquia cojuanaa jaara niquiquiaari camarnjuanaa niyanu nojoricua niyano, nojoriiri tama sequetooreeaaja: “¡Cunocuaajiqui cuhuariquia camaru quiriquiano na que niti, na que jaara shaajeque! ¡Pa morej! Naacujatij, pocua nio cuhuariquia camaruhuaa quiquini”. ³⁹ Naaratej, camarnjuanaa niyanu tiuquishacari, cuhuariquia cojuanaari na quiaree. Na jaatucutureeri cuhuariquiajiniji tamama. ¡Cuniqui na motureeri!

⁴⁰ Naa Jesu pohuatanu nuhuajitij, nojuajaari cuno canaa Judiocuaca camarucua nequesotaree:

—¿Taa nia sequeyani pueyanaa? Cuhuariquia camaru jaara tiuquiriohua na cuhuariquiajinia, ¿taa na miiniutianiya cuno cuhuariquia cojuanaani?

⁴¹ Jesu tojitiaanaari na riucautaree:

—¡Cuno cuhuariquia camaruuri nojori puecoonutaniya, nojoriicua na taraajeyaquiniutia! Na nuhuaji, tamasa pueya sequenutaniya cutaraari, nojori cojuanura nera na cuhuariquia. Nojori cutaraari cuhuariquia camaru panishano niquitionutaniya nojori carojotasanoiniji.

⁴² Jesuuri nojori sequeree:

—Jaa, naa miiniutianiyari. ¿Majate nia serojonu quiquiaaricuaa nio, tariucuacaanu Pueyaso Rupaajiniani?:

“Pueyari saitia tiariquiaa. Nojoriiri tamonu saajia jiyaniquiaari saajia sesarujaujau naasucua. Cuno saajiacuajaari socua panishano saajia quiquiaari. Jiyaniijajanaari naa na jiyatequiaari. Cuno saajiata tiaree maninia cutaraari. Pueya niquishacari, jiuujiatecoreeri”.
Naa naajiotasano quiyacuajaari.

⁴³ ‘Camarucuaanaa, nocuaji nia numooteyanijia, Pueyasoori nia ruuretanutaniya maja tari nia quiniuria na muerasu jitianaa. Tamasaca pueyari nia niti jiyatesaanutaniya cutara, nojori jitianura maninia Pueyaso muerasurano. Nojoriiri maninia Pueyaso tojitiaana quiniutianiya cutara, Pueyaso muerasu canenura jyanohua nera, juhua cuhuariquiajiniji senoosano queraatia. ⁴⁴ Cuno saajiajiniji saniniuujia, pueyano jaara cuno saajiacua tiyare, nojuajaari juhua rashiquijiniutianiya. Cuno saajia jaara tiyare pueyanooocua, jacanura na miiniutianiyari.

⁴⁵ Pueyacuara secojonaa jiyaniijianucua, mariyata Fariseocuaca tojitasacari naa Jesu pohuatasantej, nojoriiri niishiquii Jesuuri nojorijiniji pohuatariquiaa miriqui. ⁴⁶ Naaratej, nojoriiri Jesu quianu panirii juucua, nojori juaaniutia. Nojoriiri saaja puereriquiaa pueya. Pueyacuajaari sequeriquiaa Jesuuri seetanujanaa Pueyaso sequenu panishano caminiujunia quiquiaari. Naaratej, jiyaniijianucuaari jiyamitia puerecoriquiaa Jesu nojori quanura.

22

Jesu pohuatasano miriqui camishacari queranacunujiniji

(Lc 14.15-24)

¹ Na nuhuaji, Jesuuri socua niishitiojoquiaari miriqui pohuatasanta. Naa pohuataquiaaritij:

² —Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miiquiaari mijiriacaani. Cuno jiyaniijiaari shuquiriaatia quiniu paniriquiaa queraatia pueyata, neyanu camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. ³ Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na ninu paniniu quiquiaari saaja. ⁴ Jiyaniijiaari socua tamasa na seya sequeree: “Cua masuusano pueya nia numotejocoo. Nia sequese: ‘Jiyaniijia nia sashia. Puetunujanaari tari jeenucasano nia queranacunura. Tari puecoosaaree na juyaca, na shiyoshitishano seyano. Tariucua rariyosanoori quiya. Ritia nia nimia. Nia miaquenuusee’”. Naa na seya na rootanu nuhuajitij, jiyaniijiaari nojori jiyaramiquiriiri. ⁵ Masuusano pueyari saaja tojitiaaquirii. Puetunujanaari tama na panishanojuaja miiriquiaa saaja. Tamonuuri na cuhuariquiajinia quiaaree. Tamonuuri na casami niquitiojosaqui quiaareecujua. ⁶ Tamasacaari saniniuujia jiyaniijia seya quiooree. Jyanohua naquiya nojori miiriiri. Na nuhuaji, nojori

puecootureeri. ⁷ Jiyaniijia niishishacari, jiyanoehua juaariiri. Nocuaji na soldadoehua jiyaramiquiriiri cuno monaa nojori naminiuria saniniuuja, nojori tiaca na catijiatanurajuhua. ⁸ Na nuhuaji, jiyaniijiaari na seya sequeere: “Puetunujuanaari tari jeenucuasano pa queranacunura cua niyanu camishacari. Cua masuusano pueyacuaajari saaja cua ruuretareeni. Namitia majaari nojori nijionu quimaa, saaja cua rerequetajacia nojori quiniucua. ⁹ Quiarijia cutara, nia quiaare nuu tunequetajajinia, tee queraatia pueya tajiniucuaatquiaacuajani. Nia masuure puetunu nia niquishano pueyajanaa”.

¹⁰ 'Na seyari quiojoquiaari tiaca nucuaco. Nojoriiri puetunu na riuritasano pueyajanaa rerejoteree, maninia pueya, sesa pueyano. Queranacunuusaquiri mishiquiaari masuusano pueyata. Camarnu seyari puetunu pueyajanaa cushiyotemiaari camishacari cushiyosano toqueya, nojori tiacquitiiasacari tiacu queranacunura.

¹¹ 'Na nuhuaji, jiyaniijiaajanaari tiuquiaaari masuusano pueya na niqiniuria. Tamonu pueyano niquishiiri camishacari cushiyosano toqueje. ¹² Jiyaniijiaari na sequeere: “Pueyanonaa, ¿taa quia tiuquimaa camishacari cushishano toqueejuni?” Pueyanoori sanaa na tojiriquiaa. Majaari na riuuanu quirii. ¹³ Cunora, jiyaniijiaari na seya sequeere: “¿Nia morojore na cashacucua, na numatucuanio! ¿Niocua na jartarohua carijiniacuma ninishiqui! Tii sapuenutaniyari. Na quiaa miaquenutaniyariuhua na noonuta, naquiya na miishacari”.

¹⁴ 'Naajuhua pueyanaa, Pueyasoori queraatia pueya masuya quiarijia na muerasu nojori quiniuria. Saniniuuja, secajaari saquiriojosaanutaniya nojorijinijinio seetanujanaa na muerasura nojori quiniuria.

Jiya jiyaniijia cuaara niquitiojosaaria na sequesano cumaneeca
(Mr 12.13-17; Lc 20.20-26)

¹⁵ Na nuhuaji, Fariseocuacaari quiojoquiaari Jesu shuriucuaji tama nojori niishitiojotonurajaaja. Nojoriiri Jesu pocuatenu paniquiaari sesa juuca, nocuara nojori saquiriojotanura. ¹⁶ Na nuhuaji, Fariseocuacaari na niishitiojosano pueya jiyaramiquirii Jesuucua, jiyaniijia Herodes panijiaa pueyata. Herodesri jiyaniijia César jiyatesano quiquiaari Judea jiyajinia jiyaniijia na quiniuria. Fariseocuaca jiyaramiquishano pueyari Jesu sequeese:

—Niishitiojonanaa, canaari niishiyani quiaari maninia pueyano. Majaari quia cuaracashijionu. Quiaari seetanujanaa casa niishitiojoquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiara quia pohuatanura quia niishishano. Majaari rimiajata quia niquiniu pueya. ¹⁷ Naaratej, canaa quia sequeere taa canaa miinitianiyani. Paari sequesaaquiaarini pa cumaneeca pa niquitiojonura jiyaniijiajanaa Césarra, taa cuno tahue César sequequiaaricuajani. Quiajanियariuhua, ¿taa quia sequeya saniniunijia?

¹⁸ Jesuuri ritia niishiquii, nojoriiri naa na nequesotariquiaa na saponjona. Nocuaji nojori sequeereeri:

—Sapuenutani maninia quijiacanaa, ¿casaara nia saniniujiya naa janiyani?

¹⁹ Cua niquitiri nia cumaneetoj, cuno, jiyaniijia César sequesano pa niquitiojonura nojuajani.

Nojoriiri Jesu niquitirii cumanee. ²⁰ Jesu niquishacari cuno cumanee, nojori nequesotareeri:

—¿Cana naaquiti nio nocuani? ¿Cana sesate nocua naajotasanojanuhua?

²¹ Nojoriiri na riuuaree:

—Jiyaniijia César naaquicuaja, na sesajuhua.

Jesuuri nojori sequeere:

—Jaara naa quiriritij, César nia niqutiojore tama na casaajaaja. Nojuacuaa-jaari na camaru. Saniniuuja, Pueyaso nia niqutiojore nerano tama na casaajaaja. Nojuaja cutaraari pa camarnu.

²² Nojori tojishacari naa Jesu sequesantej, jiuujiatecoreeri. Na tarinitia-
tureeri. Quiojiyarohuari.

¿Macunucuate samiitiaconutaniuha?

(Mr 12.18-27; Lc 20.27-40)

²³ Cuno juucaja, Saduceocuacaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutianihua. Naaratej, nojoriiri Jesu sequesee:

²⁴ —Niishitiojonanaa, supuetana Moisésri pa sequequiaari na naajio-
tasanoinia, pueyano jaara cusoyare mueyaju, na tarajanu cuaara cami-
ria mashiquio, mueya na mueratenura tarajanu niti. ²⁵ Tariija, tamonu
pueyanoori niya quiquiaari. Siete niqiohwaraca quiquiaariiri, saa canu-
ujua. Jiyapueranuuri camiquiaari. Na nuhuaji, shaajequiaariiri mue-
tuhuojuu. Naaratej, na mashiquioori camitishaaquiaari neyaca tarajanuta.

²⁶ Nojuajaari muetuhuojuu shaajequiaarijiuhuj. Naaratej, neyaca tar-
januuri mashiquio camiquiaarijiuhuj. Nojuajaari mueyaju cusoquiaari-
jiuhuj. Naa cusonuquiaariiri puetunu cuno siete canuujuanaa. ²⁷ Na
nuhuaji, mashiquioori cusoquiaarijiuhuj. ²⁸ Saniniuuja, macunucua jaara
samiitiacorohua, ¿teyano cuno siete neyacaajiniiniote seetanu neyacaanaa
quiniutianiiani, puetunu cuno pojorijianaa jaara neyaca quiquiaari?

²⁹ Jesuuri nojori riucaaree:

—¡Niaari jiyanohua jiyajeneya nia niishiyaquishacari Pueyaso Rupaajinia
naajiotasano, Pueyaso cumaacanio! ³⁰ Macunucua samiitiacosacariuhua,
majaari canuu camiyonu quiniutianiya maaji. Naajuhuj, maajipohuari
maja na camiyonu quiniutianiya neyacaara. Caya, maajinio, nojoriiri
juhuajaniya quijiaa quiniutianiya juhua jiyocuaaanu quijiaa Pueyaso
seya, maja camiyosano. ³¹ Socua cua tojitiare. Macunucuaari seetanujuanaa
samiitiacoriquianohua. ¿Majateeri nia serojonu quiquiaacuaaja taa Pueyaso
sequequiaari najaniyacuaajani? Naa sequequiaariiri:

³² “Janiyari nia supuetana Abraham Jiyaniijiani, nia supuetana Isaac Jiyani-
ijiajuhuaj, nia supuetana Jacobo Jiyaniijiano”.

Naaratej, nia sequeyanijia, Pueyaso muerasu shaajecononi, nojoriiri maja
macunucua na quini. Canapute seetanujuanaa Pueyaso muerasuni,
nojori cutaraari pueyaracaanu quijiaa.

³³ Pueya tojishacari naa Jesu niishitiojosantej, nojoriiri jiyanohua jiuuji-
ateree.

*Puetunu Pueyaso rootasanojinijianaani, teyanote socua na pueya to-
jishocoriquianoni*

(Mr 12.28-34)

³⁴ Fariseocuaca jaara niishiquiaari Jesu Saduceocuaca sanaajaree, no-
joriiri Jesuucua nijioquiaari nojori saniniujuuniuria nojuaja, nojori neque-
soreenuta. ³⁵ Nojoriiri jaarajaaja Jesu pocuatenu paniriquiaa sesa juucua.
Tamonu nojorijinijioori Moisés Rootasanojinijini niishitiojana quiquiaari.
Na saniniujuuniuria, nojuajaari Jesu nequesotaree:

³⁶ —Niishitiojonanaa, ¿Pueyaso rootasanojinijini, teyanote socua pa to-
jishocoriquianoni?

³⁷ Jesuuri na riucaaree:

—Naa naajiosano quiyacuaajaari:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia niishitijatajanaanio”.

³⁸ Niocuaajaari socua na pueya tojishocoriguiano Pueyaso rootasano.

³⁹ Tamonu na sequesanoori quera juhua niojuhuaj. Naa sequeyari:
“Quiarta pueyano quia paniri taa quia panyacuaa tama quia cuaqueyajaa-jani”.

⁴⁰ Puetunu Moisés rootasanojuanaa, mariyata puetunu tariucuacaanu Pueyaso sequesano caminiujiuniaa rootasanojuanaari nio caapiqui rootasanojinijicuaa.

*¿Cante Cristo supuetanani?
(Mr 12.35-37; Lc 20.41-44)*

⁴¹ Fariseocuaca quishacarijia cuniqui, Jesuuri nojori nequesotaree:

⁴² —¿Taa nia niishiriojiya Cristojinijini? ¿Cante na supuetanani?

Nojoriiri Jesu riucaaree:

—Pa jiyaniijiarano Cristoni, nojuajaari pa supuetana David niquihuacuajinio supuenutaniya.

⁴³ Jesuuri nojori sequerohuacuahuaj:

—Taaquiriirini. Jaara na quiritij, ¿niaateeri niishiyacuaja casaara David sequequiaari “cua Jiyaniijata” Cristocuararini, Pueyaso Sohuanu jaara na pocuatequiaari? Naa sequequiaariiri:

⁴⁴ “Jiyaniijia Pueyasoori cua Jiyaniijia Cristo sequequiaari: ‘Cua miaqueta-jara quia cajirijaara, janiya cuaara quia paraa shocojotare quiocuajijiaatijia’ ”.

⁴⁵ ¿Cristotucua taa David niquihuacuaji supuereni, David jaara Cristo jiyaniiquiya na jiyaniijata?

⁴⁶ Nojoriiri Jesu niqitiaree sanaa. Nojoriiri maja na naata na riucaanu quiquiaari. Cuno nuhuaji, pueyari maja socua na nequesoreenu paniniu quiquiaari Jesu.

23

*Jesu juaashacari Fariseocuaca, Moisés Rootasano niishitiojanaanio
(Mr 12.38-40; Lc 11.37-54; 20.45-47)*

¹ Na nuhuaji, Jesuuri tii quiniaa pueya sequeree, canaa na saquiriojosano pueyano:

² —Moisés Rootasanojiniji niishitiojanaa, mariyata Fariseocuacaari supuetana Moisés niti quiya, tariucuacaanu Pueyaso Rupaa nojori niishitiojona. ³ Naaratej, nia tojtiaare puetunu nojori sequesanojuanaa nijaniya. Saniniuujia, maja cutaraari nia miiniu taa nojori miiquiaacuaani. Nojoriiri najuhuana niishitiojoquiaa taa pueya miinitianiyani. Majaari saniniuujia nojori miiniu tama nojori niishitiojosanojuaja. ⁴ Nojoriiri tama nojori niishishanojuaja rootaquiaa, maja saaja tariucuacaanu Pueyaso niishitiojosano pa supuetanaa. Nojori rootasano pueya miishocoriguianoni, cunoori juhua jiyanohua niiquia casaa pueya nitiasocoriguiano. Nojoriiri maja quenaaja na naacutanu quiquiaa na jaashiquia sacasaruta. ⁵ Nojoriiri puetunu na miishanojuanaa miiquiaa saaja pueya niquishocoriguiano, pueya shuquiritianura nojori. Nojoriiri Pueyaso Rupaaajiniji naajiotasano cushitiquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuana socua puereetucara na quiquiora cusupuequiaa pueya shootiasocoriguiano. Naajuhua, nojoriiri na toqueecuaji sohuatacojua tunujutaquiaa taa pa supuetanaa Pueyaso tojtiaajaca miiquiaaricuaani. Saniniuujia, nojoriiri

puera tucuacujuara na tunujutaquiaa saaja pueya niquishocoriquiano, pueya shootianura nojori. ⁶ Nojori jaara masuusaare tamonu tiajinia queranacunura, nojoriiri secocoquiaa socua panishano cajitiujinia nojori cajitiuniuria tia camaru shuriucua. Naajuhuaaj, Pueyaso secuojua tiacajinia pueya rerejosacari, nojoriiri cajitiuniu paniquiaa camarucua cajitiucuaajinia pueya shootianura nojori. ⁷ Nojori rucuanajosacari tiacajinia, nojoriiri paniquiaa pueya saruhuatanura nojori. Panitiuquiaajaariuhua pueya jiyaniquiniuria nojori “niishitiojonaata”.

⁸ Niajaniya saniniuujia cua pueyanaa, majaari pueya shanacunu niaacua, nojori jiyaniquiniuria niajaniya “niishitiojonaata”. Niajaniya cutaraari niquiriyatujua Niishitiojonaraca. Puetunu niajanijajanaari niarta Pueyaso pueya tapueyocuaca. ⁹ Naajuhuaaj, majaari tamonu pueyano mijiria nia jiyaniquiniu “cua queta”. Niaacuaajaari niquiriyatu Queraca. Nojuajaari jiyocuaaanu Quinia. ¹⁰ Naajuhuaaj, majaari pueya nia shanacunu niaacua, nojori jiyaniquiniuria niajaniya “cua jiyaniijjata”. Niaari niquiriyatujua Jiyaniijjaracacuaaja. Nojuacuaajaari Pueyaso jiyarosano nia Jiyaniijjaranoni. ¹¹ Cante jiyaniijjajanaa cutara niajanijajiniinioni, cuno cuara jiyateera tama na cuaqueyajaaja nia cumaquinia na quiniuria. ¹² Cante tama na cuaqueyajaaja jiyateja pueya shocotaja na quiniuriani, narta pueya jiyaramiqijia na quiniurijuhuaaj, jiyano pueyano cutaraari cararosaanutaniya. Cante saniniuujia juhua narta pueya serura jiyateja tama na cuaqueyajaajani, cunoori jiyaniijjara jiyatesaanutaniya cutara.

¹³ ¡Cua tojitiare, Moisés Rootasanojiniji niishitiojonaanaa, niajaniya Fariseocuacajuhuaaj, niari cocuaatia miiquiaa! ¡Niari sapuenu juhua maninia quijiaa niquishano! Niaari pueya tarinitiaaquiquiaa nojori rupuenura Pueyaso. Niaari maja nia tiuuniu Pueyasocua. Naajuhuaaj, majaari pueya nia tarinitianu nojori tiuuniuria Pueyasocua, na muerasura nojori quiniuria.

¹⁴ ¡Niari taraatia miishaanutaniya, Moisés Rootasanojiniji niishitiojonaanaa, niajaniya Fariseocuacajuhuaaj! Niaari sapuenu juhua maninia miijiaa niquishano. Niaari mashiquiopue tiaca masequiaa secaja nia cumaneecata, nia sapojonuta nojori. Naacujitij, niari nojori tiaca masequiaa tama niajanijarajaaja. Naa nia miiniu nuhuaajitij, niari shitarayocua secocoquiaa najuhuana Pueyaso, pueya niquiara, maninia pueya nia jiyaniishaanura. Naaratej, niari socua jyanohua saniitiosaanutaniya tamasaca pueyajiniji.

¹⁵ ¡Niari puereeta miishaanutaniya Moisés Rootasanojiniji niishitiojonaanaa, niajanijuhuaaj Fariseocuaanaa! Niaari sapuenu juhua maninia miijiaa niquishano. Niaari tucuacaanu rucuanajoquiaa jiya caco, shoniniacu caminia taquijirianio, tamonu nia niishitiojonura najuhuana Pueyaso tojjijara na quiniuria jjuucua, juhua tama niajanijajaaja. Nia niishitiojosano pueyano jaara nia tojjijara quiri, nojuajaari socua jyanohua saniitiosocoriquiano quiya niajanijajiniji, sesa nia rootasano tojjija na quiniuucua.

¹⁶ ¡Niari taraatia miishaanutaniya mosanucuaanaa! Niajanijari juhua cariyujuaru, cante tamonu pueyano jaatucuya juucuanu, nuu nia niishiyaquishacari. Naacujitij, niari capa niishitiojoquiaa. Niaari rootaquiaa, pueyano panishacari tamonu tiuuniuria na sequesanoocua, nojuaja cuara sequeera: “Taa oro Pueyaso Secojoua tiajinia pueyaracaanu quiyacuaani, naajuhuaaj, cua sequesano quiajanijari seetanujanaa tohuateenutaniya quiaara”. Saniniuujia, niari sequequiaa, Pueyaso Secojoua tiajinia oro jaara sequeyaquishaare, majaari na sequesanoocua tiushaanu. Naacujitij, niari sequequiaa, pueyano sequesanoori nareja sequesano, nojuaja jaara sequere: “Taa Pueyaso Secojoua tia

pueyaracaanu quiyacuaani, naajuhuaaj, cua sequesano quiajanियari seetanujuaanaa tohuateenutaniya quiara". Niaari sequequiaa cuno sequesanoocuaari maja tiushaanu. ¹⁷ ¡Mosanucuaanaa, niaari juhua cariyojuaru! ¿Teyanote socua pueresanoni, cuno orotee, Pueyaso Secojoua tia soj? Cuno oroori naa pueresanora jiyatesaaquiaari saaja Pueyaso Secojoua tiajinia na quiniuucua. ¹⁸ Niaari rootaquiaajuhuaaj, pa sequesacari parta pueyano, casaa pa miiniutianiya nerani, pocua na tiuuniuria paa cuaara sequeera naatej: "Seetanujuaanaa quia sequeyanijia. Naatej, taa casaa Pueyasooacara catijiaja juhuacutuucua niasano jijanohua maninia quiyacuaa Pueyasorani, naajuhuaaj, cua sequesanoori saaja maniniajuhuaaj. Majaari cua sapojonu". Naacuajitij, niaari sequequiaa, paa jaara naa sequereni, paa cuaara miiria pa sequesano. Saniniuuja, niaari sequequiaa: "Pa sequesanoori najuhuaana sequesano, paa jaara saaja Pueyasooacara catijiaja juhuacutu sequereni. Majaari nocua tiushaanu". ¹⁹ ¡Cariyojuarujuriniaa! ¿Majateeri nia niishiniu? ¿Teyanote socua maniniani, Pueyasooacara catijiasocoriquiano casaatee, Pueyasooacara catijiaja juhuacutu soj? Catijiasocoriquiano casaari narejajuhuanajaj, jaara Pueyasooacara catijiajaacua niasoo quiyaquri. ²⁰ Naaratej, cante Pueyasooacara catijiaja sequeree seetanujuaanaani, nojuajaari maja saaja Pueyasooacara catijiaja na sequenu quirii. Nojuaja cutaraari na caco niasano sequereehuhuaaj. ²¹ Naajuhuaaj, cante Pueyaso Secojoua tia sequeree najuhuanani, cunoori maja saaja Pueyaso Secojoua tia na sequenu quirii. Nojuajaari Pueyaso sequereecuaaja, Pueyaso Secojoua tia na sequesacari. ¡Pueyasocuaajaari na Secojoua tiajinia quijia! ²² Naajuhuaaj, pueyano jaara sequere na sequesano seetanujuaanaa juhua jiya cajiniocua, nocua tiushaanura, cunoori maja saaja jiya cajiniocua na sequenu quirii. ¡Pueyaso cajishaqui sequereajaariuhuaaj, Pueyasojuaanaa sequereajaariuhuaaj, jiyocuaaanu casaa na sequesacari!

²³ ¡Niaari taraatia miishaanutaniya, Moisés Rootasanojiniji niishitiojonaanaa, nijaniyajuhuaaj Fariseocuaanaa! Niaari sapuenu juhua maninia miijiaa niquishano. Niaari Pueyaso niqutiojoquiaa maninia puetunu nio nia nataujinijijianaa, shanohua jaanujua jaamasucua, miaquesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajinijijianaa, Pueyasora nia niqutiosocoriquiano taa supuetana Moisés sequequiaaricuaajani. ¡Niaari saniniuuja socua pa tojishocoriquiano Moisés rootasano tojtiaaquiquiaa! ¡Naacuajitij, majaari maninia pueyano nia quiniu taa Moisés rootaquiaaricuaajani! ¡Majaari nia taraajenu quiquiaa niarta pueyanoocua! ¡Majaari nia tiuuniu Pueyasooacara! Niaari maninia niqutiojoquiaa nia nataacuacajiniji. Taa nia niqutiojoquiaa nia nataacuacajinijicuaani, inaa nia tojtiaarejuhua socua pa tojishocoriquiano rootasano Moisés Naajiotasanojiniji! ²⁴ Pueya nia niishitiojosacari Moisés Rootasanojiniji juucua, niaari juhua cariyojuaru cante narta cariyojuaru jaatucuya juucuaani. Niaari juhua tamonu pueyanohuaaj. Na ratusacari, nujujua taquirii na mashacajinijiri. Socua na ratusacariuhua, ¡saaja cuarta miataaree juhuajaniyari!

²⁵ ¡Niaari cocuaatia miiquiaa, Moisés Rootasanojiniji niishitiojonaanaa, nijaniyajuhuaaj Fariseocuaanaa! Niaari sapuenu juhua maninia miijiaa niquishano. Niaari juhua noo pueyajuhuaaj, cante nareja na ratujua cuaqueya jeequejoquiaani, na miacojua cuaqueyano. Na jiniacumaari saniniuuja jijanohua curuutuua quiyajaa. Nio miriqui cua sequesano nia niishiri. Nioojaari naa quiyajuhuaaj. Niaari nohuasenujuaca, jamuejancano. ²⁶ ¡Cariyojuaru Fariseocuaanaa, nia ratujua jiniacuma nia jeequere

coteenu, nia miacojua jiniacumano! Naacuajitij, na cuaqueyari maninia jeequesano quiniutianiyajuhua.

²⁷ ¡Niaari taraatia miishaanutaniya, Moisés Rootasanojiniji niishitiojon-
aanaa, nijaniyajuhua Fariseocuacanaa! Puetunu nijaniyajanaari sa-
puenu juhua maninia miijiaca niquishano, juhua macunucua quiquiao
shanohua niquishano, cohuajata noshijosano. Saniniuujia na jiniacuma
quiyari sacuaraatia jaanujua pueya nucuhua mocuaca. ²⁸ Niaari naajuhua.
Niaari sapuenu juhua maninia pueya niquishano. Saniniuujia nioojaari
jijanohua sesa, jiyanhua sapojonu niishija.

²⁹ ¡Niaari taraatia miishaanutaniya, Moisés Rootasanojiniji niishitiojon-
aanaa, nijaniyajuhua Fariseocuacanaa! Niaari sapuenu juhua maninia
miijiaca niquishano. Niaari macunucua niojotajara shanohua niquishano
shipinijioquiaa, tariucuacaanu pueyara Pueyaso sequesano caminiujiu-
niaa nucuahuacua. Naajuhua, niaari tariucuacaanu Pueyaso tojtiajaca
puecoosano quiquiao maniniushitijaca. ³⁰ Naa nia miishacaritij, niaari
juhua sequequiaaruhua: “Paa jaara shipinijosaaquiaari pa supuetanaa
quishacarijia tariucuacaanuni, paa maara nojori cojiaquiquiaari cutarani,
nojori puecoosacari Pueyaso sequesano caminiujunaa”. ³¹ Saniniuujia,
naa nia sequesacarijij, niaari tama niaacuara torejaacujua. Niaaquiri
cuno tariucuacaanu Pueyaso sequesano caminiujunaa puecoonaacujinio
supuenocujua. ³² Naa Pueyaso sequesano caminiujunaa puecoonaacua-
jino supueno nia quishacaritij, Pueyaso jiyarosano nia morejuhua, nia
tucuanura nia supuetanaa cotelesano.

³³ ¡Sesa miijiaca pueyanaa, niaari noonacuraca, juhua sacocua! ¿Ni-
aateeri jiyaniya niaari saniitioyaquishaanutaniya mani quiquojinia nia
supuetanaa? ³⁴ ¡Cua tojtiare! Janiyari Pueyaso rupaa caminiujiu-
niaa jiyaramiquiniutianiya niaacuani, Pueyaso Rupaa niishijiacajuhua,
Pueyaso rupaa niishitiojonaanio. Nojoriiri nia pohuatanutaniya Pueyaso-
jiniji. Niaari noojaqueya nojorijinijinio puecoonutaniya. Niaari tamasa
teetejonutaniya niyacutesanojinia nojori nia monura. Niaari tamasa
majacunutaniya Pueyaso secojojua tiacajinia. Niaari tamasa netey-
ojotanutaniya puetunu tiacajinijianaa, naquiya nia miiniuria nojori.
³⁵ Niaacuajaari niishiya, coteenujanaa mosaquiaari Abel, maninia mi-
ijia pueyano. Naa puecoosaaquiaari queraatia Pueyaso tojtiajaca pueya.
Na nuhujia, socua jaatesaaquiaari monuuri Zacarías, Berequías niyanu.
Cuno maninia pueyanoori mosaquiaari Pueyaso Secojojua tiajinia, Pueya-
soocua catijiasaqui shuriucua. Monu proocua nia quiniucua taa nia
supuetanaa quiquiaaricuani, niaari saniniuujia nocua namishaanutaniya-
acujua puetunu tariucuacaanu Pueyaso tojtianaa puecoosanuucujanaa.
³⁶ Seetanujanaa nia sequeyanijia, nio pa quishacari pueyani, nojoriiri
saniitiosaanutaniya puetunu cuno pueya puecoosanuucujanaa.

Jesu nujuquesacari Jerusalén tiacajinia quiniaa pueyacua
(Lc 13.34-35)

³⁷ ¡Jerusalén tiacajinia quiniaa pueyanaa, jiyanhua taraajeya niaacuani-
jia! Niaari Pueyaso sequesano caminiujunaa pueya puecoojua. Niaari
Pueyaso jiyaramiquishano pueya jacujuaa saitia nojori pohuatanucua
Pueyaso rupaa nia niquiara juucua. Janiyari cucua nia nijionura panijia ju-
ucuanii taraatia nia miyaquishaanuucujua cua tacunura niaacuaji, naate taa
caacaraja rijioquiaacuaa necohua na nesu cariquiacorani, na cojanura no-
jori. Niaari saaja cua paniaquijia cua cojanurana nijaniya. ³⁸ Cua tojtiare.
¡Niaari nia quiquojiniji sanaajasaanutaniya niiquiji! ³⁹ Seetanujanaa nia
sequeyanijia, majaari socua nia niqiniu quiniutianiya janiya, nia cuara

cua tiuquishacariuhua sequerejaatijia: “Pueyaso cuara shuquiritiiria pa Jiyaniijia qiriqiuano na jiyarosano.”

24

Jesu pohuatasacari, Pueyaso Secojoua tia niyartasaanutaniya
(Mr 13.1-2; Lc 21.5-6)

¹ Jesuuri Pueyaso Secojoua tiajiniji tohuataarohua. Nata canaa quiosacari nucuaco, canaa, na saquiriojosano pueyani, canaari nocua catecanoquiaarini. Canaari Jesu niqitiriquiaa Pueyaso Secojoua tiani, shanohua niqishano tia. ² Jesuuri saa canaa riucuaareejaa:

—Jaa, na niqiyacuajaniija. Naa cumaati maninia na niqiyacuajua. ¡Seetanjuanaa nia sequeyaniija, cuno tia niaa na niqiyani, cunoori niyartasaanutaniya puetunujuanaa! ¡Majaari quenaaja tamonu saajia manu quiniutianiya tamonu caco!

Taa pa niishiniutianiyani quera jiya puequesacari
(Mr 13.3-23; Lc 21.7-24; 17.22-24)

³ Na nuhuaji, canaari Olivo cuhuariquia tuhuananuucua quiojoquiaarini. Jesu cajishacari tii, canaa na saquiriojosano pueyani, canaari nocua catecanoquiaarini. Tama canaa quishacarijaaja, canaari na nequesotareeni:

—Canaa quia sequere ¿taacari Pueyaso Secojoua tia niyartasaanutaniyani? Naajuhuj, ¿taa canaa niishiniutianiyarini taacari quia tacatenutaniuhua mijiriani? Canaa quia sequerejuhuaj, ¿taacari jiya puequenutaniyani?

⁴ Jesuuri canaa riucuaaree:

—Tama nia cuaqueyajaaja nia cojuare tamasaca mariqui nia sapojoreeri.

⁵ Queraatia sapojonuujacaari supuenutaniya. Nojoriiri tama na cuaqueyajaaja sequenutaniya: “Janiyacuaja Cristoni, Pueyaso Jiyarosano”. Naa nojori sequesacari, queraatia pueya sapojonutaniyani. ⁶ Naajuhuj, niaari pueyapue miaquetooujunijiji tojiniuuniutianiya, niya, tamonu jiyacajiniano. Niaari miaquetooujuna miananajotoonujiniji tojiniuuniutianiyajuhuj. Naa jaara naa tojiniuuritij, majaari puerenu. Naa quiniutianiyari mijiria. Naajaa, juhuanojuajaari maja jiya puequesacari quiniutianiya. ⁷ Tamonu pueyari tamasaca pueyata miaquetooujonutaniya. Tamonu jiyajiniji jiyaniijaari tamonu jiyaniijlata miaquetooujonutaniyajuhuj. Jiyacaritij, jiyanohua miaajenuuri quiniutianiya queraatia jiyacajinia, cusonunujuhuj. Rijiaari queraatia jiyacajinia jiuuquiujiutianutaniya. ⁸ Naa naquiya miishacari mijiriatej, cunoori juhua manajaraca coteesacari noonu. Na nuhuaji, socua jiyacatenutaniyani naquiya miishacari, mijiria cua tiuquiyaquishacarija.

⁹ Jiyacaritij, niaari jiya camarucua niqitiojosaanutaniya cua muerasu nia quiniuucua, naquiya nojori miitianura nijaniya. Niaari puecoasaanutaniya. Puetunu jiyacajinijinio pueyajanaari nia niqiniu paniaquiniutianiya, cua muerasu nia quiniuucua. ¹⁰ Jiyacaritij, queraatia cucua tiuuniaa pueyari cucua tiuuniu tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niqiniu paniniu quiniutianiya tarija narta Pueyaso muerasu. ¹¹ Queraatia sapojonuujaca Pueyaso rupaa pohuatanaari supuenutaniya. Nojoriiri queraatia pueya sapojonutaniya. ¹² Jiyacaritij, sesa miiniuuri socua jiyanohua jiyacatenutaniya mijiria. Cunora, queraatia pueyari narta pueya paniniu

tarinitianutaniya. ¹³ Saniniuujia, cucua tiuujia jaara rejeretare pueyara-caanu cuno naquiya miishacari jiya cuaara puequerejaatijia, nojuaja cutaraari shacantuca quiijara jatanishaanutaniya, pueyaracaanu na rishini-uria. ¹⁴ Pueyaso rupaa jaara pohnuataaare janiyajiniji pueyapue niqiuara puetunu jiyacajiniajanaa, nojori niishiniuria taate nojori naata cua muera-sura quiniuni, jiyacaritij, jiyari shusha puequenutaniya cutara.

¹⁵ 'Pueyaso sequesano caminiujuunia Danielri tariucuacaanu pohnuataquiiaari sacuaraatia casaanaari supenutaniya, puereeta niquishano. Cunoori Pueyaso pueya shaajariquiano. (Cante nio serojiyani, cuaara niishiiria casaa na sequeyani.) Niaa jaara cuno sacuaraatia casaa niqiri Pueyaso Secojoua tiajinia nujuatesano, niocua mashiri. ¹⁶ Jiyacaritij, canapueete Judea jiyajinia quiyani, nojori cuaara mashiriia tuhuananuhua. ¹⁷ Canapueete na tia cacojiria quiyani, nojori cuaara tiuquiquiiria na tiajiniaaco maja na tarishiniuria na casamiicua. ¹⁸ Canapueete cuhuariquijinia quiyani, cuaara tacateyaquihuara na tiajiniohua na toqueyacia. ¹⁹ Jiyacaritij, jiyanohua taraatia quiniutianiyari maajipohuara, canapueete manajaatohua quiyani, mariyata canapueete supuejaca muerasu jiiitaani. ²⁰ Juhucarijia Pueyaso nia secojoriquia nia mashiyocuatunu panishacari quiyaquiniuria shuniyara, samaatenu juucanio. ²¹ Cuno quishacari, jiyanohua naquiya miiniuri quiniutianiya seetanujanaa. Jiya coteenujiniji, jiyano naquiya miiniuri maja na niqushaanu quiqiaari tari. Naajuhuaaj, naa naquiya pueya miiniu nuhuaajitij, majaari socua na caminiu quiniutianiuhua juhua nio naquiya miiniu. ²² Cuno naquiya miishacari jaara tajiyaquiri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacia na taraajesacari.

²³ 'Jiyacaritij, majaari nia tojinu, tamonu jaara sequere niajaniya: "¡Cua tarajanunaa, Cristoqui tari tiuquiriohua! Niya quiyano". Naajuhuaaj, majaari nia tojinu tamonu jaara nia sequere: "Nooj, jati quiyatej". ²⁴ Queraatia sapojonuujaacari supenutaniya. Nojoriiri tama na cuaqueyajaaja jiyatenutaniya juhua Pueyaso jiyarosana. Tamasacari sequenutaniyacua: "Janiyari Pueyaso sequenu panishano caminiujuuniani". Nojoriiri pueya sapojonutaniya jiyajeneta nojori miishanota. Naa nojori miishacaritij, mijiria quiniaa pueyari jiyaniutianiya nojori qui seetanujanaa Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniyajaariuhuaaj. ²⁵ Pueyanaa, naa cua sequesacari niajaniatej, janiyacuaajari juhucarijia nia numootereeni. ²⁶ Naaratej, majaari nia quianu cua pajenuucua, pueya jaara sequere niajaniya: "Cristo jati cariquia jiyajinia quiya". Naajuhuaaj, majaari pueya nia tojinu nojori jaara sequere niajaniya: "Miji, Cristo sohuacamara cajiya. Nia niqushiiija". Majaari nia shanacunu naa nia sapojosaanuratej. ²⁷ Mijiria cua tiuquishacariuhua, majaari jiyasohua cua tiuquiniu quiniutianiuhua. Naatej, taa pueya niqiquiaa miacana nunujiyano pananu muetasama-jicuaani, pananu tiuquishocoranio, pueyari naa cua niqiniutianiya cua tiuquishacariuhua. ²⁸ Tee casaa mocua quiyani, mohuari tii rerequeejonu-taniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojoriiri saniitiosaanutaniya.

Taa na quiniutianiyani Cristo tiuquishacariuhua
(Mr 13.24-37; Lc 21.25-33; 17.26-30, 34-36)

²⁹ Jesuuri naa canaa pohnuataquiiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na cuhuatanu quiniutianiya. Riyari totenutaniya. Jiya cajiniocua cumaaca jiitijacaari tetecatunutaniya. ³⁰ Jiyacaritij, puereeta casaari jiya cajiniocua niqushaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapuejanaari sapiyonunutaniya, jiyanoehua nojori taraajenuta. Na nuhuaji, cua niqutiuniutiani-yari cohuaja najacajinia roseyano, jiyanoehua cua cumaacata, jiyanoehua shacantuuca. ³¹ Janiyari jiyocuacaanuji cua seyata tiuquiniutianihuani, cua jiyaramiquiniuria nojori puetunu cua saquiriojosano pueyacuajanaa. Nojori tojtiasacari trompeta jonenenu jiyanoehua, nojoriiri cua saquiriojosano pueya rerejotenutaniya cucua, puetunu nio jiyajinjijijanaa.

³² 'Nia pohuatareera higo naanajiniji, socua maninia nia niishiniuria taacari jiya puequenutaniyani. Higo naana cashacucua jaara macumaaca quiri, na jaamasucuaari mueratiuya. Naa nia niqushacaritij, niaari niishiya tacarejonusqui quera quiniutianiya. ³³ Naajuhuj, niaa jaara puetunu cua sequesanojuanaa niquri tari tohuateyano, niocua niishiri janiyari quera tiuquihuani. Tari jiya puequesacari quera. ³⁴ Seetanujanaa nia sequeyanijia, nio pa quishacari pueyani, majaari nojori shaajenu quiniutianiya juhuanajuaja, nojori cuara puetunujanaa cua pohuatasano niqurijiaatijia. ³⁵ Jiya, jiya cajiniocuanio, cunoori shaajenutaniya. Cua sequesano cutaraari tohateenutaniyacujua. Cua rupaari pueyaracaanu seetanu rupaajanaa quiniutianiya.

³⁶ 'Maja cutaraari quenaaja tamonu pueyano niishiniu taacari jiya puequenutaniyani, mariyata taacari cua niniutianihuani. Jiyocuacaanu quiniaa Pueyaso seyari maja na niishinijuhuj. Majaari quenaaja cua niishinijuhuj. Saaja cua Queeri tamajaaja na niishiya cutara.

³⁷ 'Quera cua tiuquiniu panishacariuhua, mijiria pueyari juhuajaniya quiniutianiya taa Noé quishacari mijiria tariucuaaanu pueya quiquiaaricaani. ³⁸ Jiyacaritij, nio jiya pajaashitiaquishacarijia, supretanaari juhuajaniya miaquenuujua quiquiaari. Juhuajaniya queranacunuuriquiaajaariuhuj. Juhuajaniya necohua camiyoteriquiaajaariuhuj Noé jaara tiuquitiaquiaarijiaatijia na puereetuca buquejiniacuma. ³⁹ Nojoriiri saaja juhuajaniya quiriquiaa pajaa jaara nojori pajaashitiaquiaarijiaatijia. Puetunu pueyajanaari canashiyaguiji netasaaquiaari. Mariyata naa quiniutianiyari cua tiuquishacariuhua.

⁴⁰ Jiyacaritij, caapigui pueya quishacari cuhuariquiajiniya, niquriyatuuri rishaanutaniya, Pueyaso pueyano na quiniuucua. Tamonuuri jateenutaniya saniitiosocoriquiano saniniujua. ⁴¹ Naajuhuj, caapigui maajipohua riiquiniushacari tunanajiniacuma, niquriyatuuri rishaanutaniya. Tamonuuri jateenutaniya. ⁴² Nocuaji juhua sutejaca nia quiriquia. Majaari nia niishiniu taacari nia Jijaniijia tiuquiniutianihuani. ⁴³ Nio nia niishiri. Tia camaru jaara niishiriquia taacari nohuasejojua niniutianiya nocuani, nojuaja maara nocuaji sutere maja nohuasejojua tiuquiniuria na casami nohuasenura. ⁴⁴ Naaratej pueyanaa, niaa cumaati cua sashiya, janiya mariqui nia jiyajenetemohuarini.

Jesu pohuatasano maninia serujiniji, sesoriquia serujinijinio
(Lc 12.41-48)

⁴⁵ 'Socua cua pohuatasano nia tojtitiare pueyanaa. Jiyanoehua casamiriaca pueyanoori queraatia seyaraca quiquiaari. Cuno jiyaniijiaari tucuaaanu quiuanu paniquiaari tamonu jiyajinia. Naaratej, na nuhuajiria, nojuajaari niquriyatu na seyajinijinio jiyatequiaari juhua na tia camarura, narta

seya na mianuutenura maninia, puetunu juucajanaa. Cuno seruuri ni-
ishijia quiquiaari, na camarnu tojjijajuhaaj. ⁴⁶ Cuno seruuri shuquiriaatia
quiniutianiya na camarnu jaara na riuriasuhua maninia poonijiyano
taa na camarnu sequequiaari na nuhaajiriacuajani. ⁴⁷ Naaratej, seetanu-
juanaa nia sequeyanijia, na camarnuuri na jiyatenutaniya puetunu na
jiitiasanojuanaa cojuanara. ⁴⁸ Saniniuujia, cuno seru jaara sesa miijia
quiri, nojuajaari tama sequenutaniyajaacujua: “Cua jiyaniijiaari jiyano-
huhua tarishiniutianiya”. ⁴⁹ Jaara naa niishiriojore, nojuajaari narta seya piquiniu
coteenutaniya. Mashaasequenuujuaca cojiniutianiyajaariuhua querana-
cunuunura. ⁵⁰ Naa juhuajaniya na quishacaritij, na jiyaniijiaari jiyacari na
jiyajenetenutaniya. ⁵¹ Naa sesa na quiniucuatej, na jiyaniijiaari jiyano-
huhua na saniitionutaniya. Na nuhuaji, na jatanutaniyari na cojiritiasocoriguiano
saniitionu sapuenu juhua maninia niquishano miijiaa pueyata. Nojoriiri
tii nujuquetunutaniya. Na quicaa miaquenuunutaniyari, naquiya na mi-
quiosacari.

25

Jesu pohuatasano diez niyacoojorijini

¹ 'Nia pohuatareera taa Pueyaso shuriucua tiuquitianu panijiaa
quiniutianiya cua tiuquishacariuhuaani. Nojoriiri juhua diez niyacoojori
quiniutianiya, canapute camiriquiano pueyano sashiriquiaacuajani.
Cuno niyacoojoriiri quiojoquiaari camiriquiano pueyano sashiniuria,
na tiuquishacari nojori tiuquitianura nata tiaco. Nojoriiri samaritiu
patootaquiaari. ² Cinco cuno niyacoojorijiniijiri mosanucua quiquiaari.
Tamasacaari saniniuujia niishijiaa quiquiaari cutara. ³ Mosanucuaari
saaja niquiriyatu samaritiu patootaquiaari. Majaari socua samaritiu nojori
panu quiquiaari. ⁴ Niishijiaa cutaraari socua samaritiu pooquiaari, nojori
samaritiu puequesacari na noshitishocoriguiano. ⁵ Camiriquiano pueyano
tarishishacari, puetunu nojorijianaari maquenuujuquiaari. Nojoriiri
socua maquetuquee. ⁶ Shiyaqueya, tamonu pueyanoori nacaquiaari:
“¡Camiriquiano pueyano cumaji tari! ¡Nia naacusee!” ⁷ Puetunu cuno
niyacoojorijianaari ritia saneecuatuquiaari. Quera pueetacoyano na
samaritiu nishiriiniuuri. Nocuaji niishijiaa niyacoojoriiri socua na
pootusano samari noshitirii. ⁸ Jiyacaritij, mosanucua niyacoojoriiri narta
niyacoojori sequeree: “Canaara nia rashiquiojoreja nia samaritiujini.
Canaa samaritiu tari pueetaareeni”. ⁹ Cuno cinco niishijiaa niyacoojoriiri
nojori riucaare: “Maja. Maja maninia canaa niqutionura nijaniya,
puetunu pa samaritiujianaacua senota pueetama. Ritia nia quiaare
juhuari na masejosaqui, socua nia masenura tiji”. ¹⁰ Cuno mosanucua
niyacoojori quiojosacari samari masenuucua, camiriquiano pueyanoori
nojori niyacari tiuquishii. Cuno samaritiuriaca niyacoojori cutaraari
camiriquiano pueyanota tiuquitiaquiaari camishaqui tiaco queranacunura.
Tia tiotiuuri mishiquiosaquea. ¹¹ Na nuhuaji, mosanucua niyacoojoriiri
tiuquijioquiaariuhua. Tia tohuatayaji jiiquionuusuhuari. Sequetureeri:
“¡Jiyaniijianaa, jiyaniijianaa, canaacuaji quia riatareja tiotiu!” ¹² Jiyaniijiaari
saa sequereeja: “Seetanujuanaa nia sequeyanijia, maja cua niishiniu
nijaniya”.

¹³ Naa na pohuatanu nuhuajitij, Jesuuri canaa na saquiriojosano pueya
sequeree:

—Pueyanaa, nia quiri juhua sutejaca, nia niishiyaquishacari taacari cua
tiuquiniutianihuani, casaa juucatej.

Miriqui Jesu pohuatasano cumaneeca poonitijonaajiniji
(Lc 19.11-27)

¹⁴ Na nuhuaji, Jesuuri socua miriqui pohuataquiaari canaa na niishitio-noura taa Pueyaso muerasu miishaanutaniya jiya puequesacarini. Jesuuri naa canaa pohuataquiaariti:

—Tamonu jiyaniijaari tucuacaanu quianu paniquiaari tamonu jiyajinia. Na nuhuajiria, na seya niqutiojoquiaari na racatasano cumaneecaari, nojori cuara poonitijioora cuno cumaneeca na canijasocoriguano.

¹⁵ Naacuaajitij, coteenu seru niqutiooree cinco mil cumaneecaari. Tamonuuri niqutiosaaree dos mil. Tamonuuri niqutiosaaree mil cumaneeca. Na jiyaniijaari naa nojori niqutiojoquiaari na niishishacari nojoriiri rimiajata niishijaca quiquiaari, socua cuno cumaneeca nojori canijanura. Na nuhuaji, nojori jiyaniijaari quiaquiaari. ¹⁶ Cinco mil cumaneeca jitianari ritia coteequiaari casami masenura na niqutiojosocoriguano socua cumaneecara, na reratenura na jiyaniijara. Naacuaajitij, cuno seruuri socua cinco mil cumaneeca reratequiaari coteenu na jitiananojiniji. ¹⁷ Naajuahuaj, dos mil cumaneeca jitianari socua dos mil cumaneeca reratequiaari na jitiananojiniji. ¹⁸ Mil cumaneeca masenara saniniuujia maja na poonitijonu quiquiaari na jiyaniija niqutiosano cumaneeca. Nojuajaari saaja jiyajinia jiuutiaquiaari na jamojuara na jiyaniija cumaneeca. ¹⁹ Seya jiyaniijaari camueenujuquiaari jyanohua. Socua tiuquiquiaarihuari na cumaneeca na masejonuhua na seyajiniji. ²⁰ Coteenu nocua tiuquiquiaari cante cinco mil cumaneeca niqutiosaquiaaricuaani. Nojuajaari na jiyaniija sequeree: “Jiyaniijanaa, quiaari cua niqutioicanu cinco mil cumaneeca. Niya quiyari socua cinco mil cumaneeca quiaara, cua poonijosanojiniji cua reratesano”. ²¹ Na jiyaniijaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiquianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jitianarani. Miji quia tiuquimia. Niya cuata quia quishii shuquiriaatia”. ²² Na nuhuaji, tamonu seruuri na jiyaniijaacua tiuquishiijuhuaj, nooj, cante dos mil cumaneeca niqutiosaquiaaricuaani. Na jiyaniija sequereeri: “Jiyaniijanaa, quiaari cua niqutioicanu dos mil cumaneeca. Niya quiyari socua dos mil cumaneeca quiaara, cua reratesano cua poonijosanojiniji”. ²³ Na jiyaniijaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiquianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jitianarani. Miji quia tiuquimia. Shuquiriaatia niya quia quishii cuata”. ²⁴ Na nuhuaji, tamonu seruuri tiuquishiijuhuaj cante mil cumaneeca niqutiosaquiaaricuaani. Na jiyaniija sequereeri: “Jiyaniijanaa, janiyari niishiyani quiaacuajaari quiarta pueyacu tاراajeyashijia. Quiaari tamasaca natoosanojiniji senoojua. Quiaari tamasaca poonijosanojiniji miajajuhuj. ²⁵ Naaratej, janiyari quia cumaneeca pueretacanu nohuasenujuacani. Cunora janiyari quia cumaneeca jamocanu raamani. Quia niqiri. Niya quiyacuaja quia cumaneeca puetunjuanaa”. ²⁶ Na jiyaniijaari na juarii: “¡Quiaaqui sesoriquia pueyano! ¡Taajeca seque! ¿Quiaateeri niishiquianu janiyari tamasaca natoosanojiniji senoojua, tamasaca poonijosanojiniji miajajuhuj? ²⁷ Quiaa jaara cua jyaniquianu naa quijiatej, ¿casara cua cumaneeca quia niqutioyiquianu cumaneeca cojuanaarini? Nojori jaara cua cumaneeca poonijiotecanu, nojori maara socua na canijacanu quiria”. ²⁸ Jiyacaritij, jiyaniijaari tamasaca na seya sequeree: “Nio sesa cua serujiniji nia jaariuutiare cua mil cumaneeca. Nia niqutioire cutara cua

maninia seru, cante diez mil jiitiaa tariucuaiani. ²⁹ Naacuaajitij, cante casaa jiitiaacuani, nojuajaari socua niquitiosaanutaniya, queraatia jiitiaja na quiniuria. Saniniuujia, cante secaja jiitiaa najuhuanani, nojuajaari secaja na jiitiasano jaariutiasaanutaniya puetunujuanaa. ³⁰ Nio najuhuaa quijia seru saniniuujia, nia jatare carijiniacuma ninishiqui. Tii sapuenutaniyari. Na quiaa miaquenutaniyari na noonuta, naquiya na miishacari”.

Jiya puequesacari, puetunu pueyapuejanaari nequesoreesaanutaniya saniquitiosacoriquiano

³¹ Puetunu cua seyajanaari jiyocuacaanuji cua cojiniutianiya janiya jaara tiuquiriohuani Pueyaso shacantuuca cumaacata, Jiyaniijiajanaa cua quiniuria mijiria. Janiyari shanohua puereeta jiyaniijia cajitiujinia cajiniutianiyan, pueya cua nequesoreesacari. ³² Puetunu pueyapuejanaari cua rerejotesaanutaniya puetunu nio jiyajiniujinijuanaa. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquia cabraacuaca tajinijicuaani. ³³ Janiyari maninia pueya nujuatejonutaniya cua miaquetajarani. Saniniuujia, janiyari sesoriquia pueya nujuatejonutaniya cua muenecarani. ³⁴ Na nuhuaji, janiyari cua miaquetajara nujuatiuyano sequenutaniyani: “Miji, cua Que shuquiritiasano pueyanaa. Shusha jiya shipinishacari niaarano cua Que riuriotaca nia masere. ³⁵ Cunoori niajaniyara, maninia miijiaa nia quiniucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuaaanu cua rucanejosacari, niaari nia tiaco cua tiuquinijia. ³⁶ Toqueeju cua quishacari, niaari cua niquitioquiaari. Cusosu cua quishacari, niaari cua niquiniucua quiaia. Nujuatejojuajinia cua quishacari taraatia, niaari cucua quiojojua cua cumanijianuucua”. ³⁷ Na nuhuaji, maninia pueyari cua nequesotanutaniya: “Jiyaniijianaa, ¿taacari canaa niquiquiaari quiajaniya miaajeyanoni? ¿Canaateeri quia miaqueteguaarini? Majaruhua. ¿Taacari canaa niquiquiaari quiajaniya jiyamueyanoni? ¿Canaateeri quia raateguiaarini? ³⁸ ¿Taacari canaa niquiquiaari quiajaniya canaa jiyajinia rucanejeyanoni? ¿Canaateeri canaa tiajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhua, taacari canaa niquiquiaari quiajaniya toqueejuni? ¿Canaateeri quia niquitioquiaari toqeni? Maja. ³⁹ ¿Taacari canaa niquiquiaari quiajaniya cusosuni, nujuatejojuajinianio? ¿Canaateeri quioqua quiojoquiaari canaa niquiniuria quiajaniyani? Maja”.

⁴⁰ Janiyari cuno maninia pueya riucuanutaniyani: “Seetanujuanaa nia sequedianijia. Niaa jaara naa maninia miiquiaari tamonu cua muerasuniy-
ojuajinijinio, niaari maninia cua miiquiaarijuhuaj”.

⁴¹ Na nuhuaji, janiyari cua muenecara nujuatiuyano sequenutaniyani: “¡Cua shuriucuaaji niiquiji nia quiaare, sesoriquia pueyanaa! ¡Niaari cua Que sesacasano! Niaari mani quiquiojinia quejoosaanutaniya. Cuno mani quiquioori maquesaashijia. Shipinishaaquiaariiri samaruhua jiyaniijiaacuaji, na seya samaruhuacuajinio. ⁴² Niaari naa miishaanutaniyaqui nia taraajeyaquiniucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. ⁴³ Cua rucanejosacari nia jiyajinia, majaari nia tiajinia nia tiuquininiu quijia janiya. Toqueeju cua quishacarijuhuaj, majaari toque nia niquitionu quijia janiya. Nujuatejojuajinia cua quishacari, cusosu cua quishacarijuhuaj, majaari nia quianu quijia cua niquiniucua quenaaja”.

⁴⁴ Jiyacaritij, cuno pueyari cua nequesotanutaniya: “Jiyaniijianaa, ¿taacari canaa niquiquiaari quiajaniya miaajeyanoni, jiyamueyanujuhuaj? Majaari

canaa niqiniu quijia quiajaniya canaa jiyajinia rucuaneyiyo taaaju, to-
 queju quiyano, cusosu quiyano, nujuatejojuajinia quiyanojuhuaj. Canaa
 jaara naa quiyano quia niqiquiaarini, canaa maara quiocua taraaje-
 quiaarini”.⁴⁵ Janiyari nojori riucuanutaniyani: “Seetanujuanaa nia se-
 queyanijia, nia taraajeyaquiniucua tamonu cua muerasuniyojuaacua, ni-
 aari seetanujuanaa cucua taraajeyaquiquiaari”.⁴⁶ Jiyacaritij, maninia
 miyashijia pueyari quejoosaanutaniya pueyaracaanu saniitiosocoriquiano.
 Saniniuujia maninia miijia pueyari Pueyaso shuriucua quianutaniya,
 pueyaracaanu shuquiriaatia nojori quiniuria.

26

Judiocuaca camarucua roojotoosacari Jesu nojori qianura (Mr 14.1-2; Lc 22.1-2; Jn 11.45-53)

¹ Jesu jaara puetunu nio pohuatasanojuanaa pohuatanu puecaquiaari,
 canaa na saquiriojosano pueya sequereeri:

² —Niaacuajaari niishiya, tama tariquiri Pascua juucara
 queranacusacari. Janiyari jiyacari taucuaca niqitiosaanutaniyani,
 mosocoriquiano niyacutesanojinia teetesano.

³ Jiyacarijuhuaj, canaa Judiocuaca camarucuaari rerejoquiaari Caifás
 tiajinia. Caifási pueyacuara secojonaa jiyaniijajanaa quiquiaari. Cuno
 pueya rerejoquiaarini, nojoriiri quiquiaari pueyacuara secojonaa camaru-
 cua, canaa Judiocuaca camarucuanio. ⁴ Nojoriiri cuno tiajinia pocoojo-
 quiaari taa nojori sapojonutaniya Jesu na quiatusocoriquianoni, nojori
 mosocoriquiano. ⁵ Nojoriiri tama sequetooquiaarijaaaja: “Maja pa monu
 Pascuara queranacusacari, paa mariqui pueya juaatiriiri”.

Tamonu maaji totasacari na shanohua jaanutaja Jesuucua (Mr 14.3-9; Jn 12.1-8)

⁶ Tamonu juuca, Jesuta canaa quishacari Betania tiacajinia, canaari Simón
 tiajinia miaquenuuquiquiaani. Cuno Simónri tarijia lepra cusonujiniji Jesu
 naatanishano quiquiaari. ⁷ Miaquejajinia Jesu cajishacari, tamonu maa-
 jiiri nocua catecanoquiaari. Shiitianiyojuua shucuariquijaja pataconiyojua
 cacatariquiaari, cohuaja saajiajiniji quejasano. Tii quiriquiaari shanohua
 jaanutaja. Cuno jaanutajaari jiyanohua queraatia cumaneecata masesano
 quiquiaari. Cuno maajiiri Jesu nacaacua na totaree puetunujuanaa. ⁸ Canaa
 jaara niqiquiaari naa cuno maaji miishanotej, canaari juaaquioreeni.
 Noojiaqueya canaajinijinioori naa sequeturee:

—¿Casaara cuno maaji niitiaree najuhuana shanohua jaanutajani? ⁹ ¡Cuno
 jaanutaja maara queraatia cumaneecara niqitiosaaere, casamijiuniucua
 niqitiosocoriquiano!

¹⁰ Jesu tojishacari taa canaa sequeriquiaa cuno maajini, canaa sequereeri:
 —¿Casaara nio maaji nia taroojiyani? ¡Na miishano janiyani, cunoori
 jiyanohua maninia quiria! ¹¹ Casamijiuniucuaari niaata quiriqiano
 pueyaracaanu cutara. Janiya saniniuujia, majaari cua quiniu quiniutianiya
 pueyaracaanu niaata. ¹² Nio maaji totasacari cucua na shanohua jaanu-
 tajani, juhuacarijia cua cuaqueya jeecaari, raaco cua niasaanura janiya
 jaara mosaareni. ¹³ Seetanujuanaa nia sequeyanijia, pueyaracaanu pueya
 pohuatasacari Pueyaso rupaa janiyajiniji, nio maaji miishanoori pohu-
 atasaanutaniyahua puetunu jiyacajinijanaa. Naa na miishano janiyani,
 majaari na niyajetasaanu quiniutianiya pueyaracaanu.

Judas tacartasacari Jesu, na quiatenura (Mr 14.10-11; Lc 22.3-6)

¹⁴ Jiyacaritij, Judasri pueyacuara secojonaa jiyaniijianucuaacua quiaquiaari. Nojuajaari niqiriyatu canaajinijinio Jesu doce saquiriojosano pueyano quiquiaari. Na sesaari quiquiaari Judas Iscariote. ¹⁵ Secojonaa jiyaniijianucua sequeeseeri:

—¿Taa cumaneeca nia niqutionutaniya janiyani, janiya jaara nia quiatere Jesuni?

Nojoriiri ritia treinta cumaneeca niqutioquiaari Judas. ¹⁶ Na nuhuaji, Judasri pueyaracaanu niishiriojoriquiaa maatucua taacari quiatere Jesuni.

Jesu miaquesacari na nuhuajiria na pueyata
(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Puetunu marijarajanaa, canaa Judiocuacani, canaari poreetesoo pan miaquenuquiaari puetunu siete juucajanaani. Coteenu juucaari sesojosaaquiaari Pascua juuca. Naaratej, Pascua juuca, canaa, Jesu saquiriojosano pueyani, canaari nocua catecanoquiaarini naa canaa nequesotanura nojuaja:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

¹⁸ Jesuuri canaa riucuaere:

—Paacuaajari miaquenutaniyani tari cua sequesano pueyano tiajinia Jerusalén tiacajinia. Tii nia quiaare. Tia camaru nia sequeese: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajiniani’ ”.

¹⁹ Canaari naa miiquiaarini taa Jesu sequequiaari canaacuajani. Canaari tii majeetequiaari borregoni, Pascua juuca miaquesocoriquiano.

²⁰ Jaara niniquiaari, Jesuuri canaa na doce pueyata miaqueajinia caji-turiquiaa. ²¹ Canaa miaquenuusacari, Jesuuri canaa sequeere:

—Seetanujanaa nia sequeyanijia, tamonu niajanijajinijinioori cua tacartanutaniya, cua paraa na quiatenura janiya, nojori monura janiya.

²² Canaari jiyanohua taraajequeeni naa Jesu sequesacaritij. Puetunu canaajanaari Jesu nequesotareeni:

—¿Janiya jiyoteeri Jiyaniijianaa?

²³ Jesuuri canaa riucuaere:

—Cante cuata tureneetaa pa miacojuajinjini, nojuacuajaari cua quiatenutaniya mosocoriquiano. ²⁴ Janiyacuajaari mosaanutaniyani taa janijajinjiji naajiotasaaquiaaricuaajani tariucuaaanu Pueyaso Rupaajinia. Saniniuujia, jiyanohua taraatia miishaanutaniyari cua quiateriquiano pueyano. Maara socua maninia quiquiaari cuno pueyanora jaara raaquishaaquiaari.

²⁵ Na quiateriquiano Judasri socua Jesu nequesotareejuhuj:

—¿Janiya jiyoteeri Niishitiojonanaa?

Judas riucuaereeri:

—Taaquiririnij. Quiajanijacuaaquinatejaj.

²⁶ Canaa miaquesacari, Jesuuri pan ririi. Na Que Pueyaso secojoree nocuaraari.

Na nuhuaji, na neecasereeri puetunu canarajanaa, canaa miaquesocoriquiano. Canaa sequereeri:

—Jajaa, nia masere. Nia miaquere. Nio panri cua cuaqueya.

²⁷ Na nuhuaji, Jesuuri raatonuque pataree. Pueyaso na secojonu nuhuaji nocuara, Jesuuri canaa na niqutiooree. Canaa sequereeri:

—Niojiniji nia rature puetunu niajanijajanaa. ²⁸ Nioori cua nanaca, Pueyaso jiyanooniuria niajanija. Cua nanacaari queraatia pueyacuara shoonutaniya, nojori jiyanooshaanura sesa nojori miishanojiniji.

²⁹ Seetanujuanaa, majaari socua cua ratunu quiniutianiya niaata mijiria nio uva caacajiniji. Janiyari niaata na ratunutaniya cutarani janiya jaara tacatemoahuani, pueyaracaanu Jiyaniijiajanaa cua quiniuria. Jiyacaritij, jiyanohua maninia quiniutianiyari cuno quishacari. Paari mariyata jiyanohua shuquiriaatia quiniutianiya pueyaracaanuni.

Jesu sequesacari Pedro, nojuaja nocuaji seetanutaniya
(Mr 14.26-31; Lc 22.31-34; Jn 13.36-38)

³⁰ Canaa jaara jaaquequejoquiaari supuetana David naajioneejinijini, na nuhuaji canaari quiojoquiaarini Olivo cuhuariquia tuhuananuucua.

³¹ Jesuuri jiyacari canaa sequeree:

—Puetunu niajanijajanaari cucua tiuuniu tarinitianutaniya quiari niucuaaja. Naa naajiotasano quiyacuaajaari Pueyaso sequesano tarijia: “Janiyari borrego cojuana monutaniyani. Na borregohuari niyaquejonutaniya tamajaaja”. ³² Naajaa, janiya jaara samiitiarohua macujinijini, janiyari nia puetanutaniya Galilea jiyajiniani.

³³ Pedroori Jesu sequeree:

—Puetunu quia pueyajanaa jaara quiocua tiuuniu tarinitiare, janiya cutaraari maja cua catenu quiniutianiya quiocuaaji.

³⁴ Jesuuri Pedro sequeree saaja:

—Seetanujuanaa nio niucujani, caacaraja niunijiaquishacarijia, quiaari naa pacutejonutaniya seetanu cucuaji: “Maja cua niishiniu cuno pueyano”.

³⁵ Pedroori Jesu sequeree:

—¡Pueya cuara moora janiyaqui, naajaa, majaari cua seetanu quiniutianiya quiocuaaji!

Puetunu canaa Jesu pueyajanaari mariyata naa sequequiaaritij, taa Pedro sequeriquiaacuaani.

Jesu secojosacari Getsemani cuhuariquiajinia
(Mr 14.32-42; Lc 22.39-46)

³⁶ Na nuhuaji, Jesuuri tamonu cuhuariquiajinia tiuquiijoquiaari canaa na saquiriojosano pueyata. Cuno cuhuariquia sesaari quiquiaari Getsemani. Jesuuri canaa sequeree:

—Niyaja nia cajitiuri cua secojosacari cua Que jati socua nia tacoji.

³⁷ Jesuuri Pedro jiyataquiaari, caapiqui Zebedeo niquiohuanio. Jesuuri juhuacatecara taraajequiaari. Jiyanohua tacaariquiaajaariuhuj.

³⁸ Jiyacaritij, Jesuuri nojori sequeree:

—¡Coojia quera jiaqueya jiyanohua cua taraajenuta! ¡Quera cusoyanjia! Niyaja cua sashitiuri. Nia sutere nia tarajanura janiya quenaaja.

³⁹ Jesuuri nojori shuriucuaaji canujiyaree tamajaaja socua nojori tacoji. Jiyocuara jacamaseeri Pueyaso na secojonura. Naa sequereeri:

—¡Cua Quena, jaara na naata quiri, maja quenaaja cua cartenu naquiya cua miishaanura! Naajaa, janiya cuara miishaariaqui taa quia panyacuajani, maja juhua cua panishano.

⁴⁰ Na nuhuaji, Jesuuri na pueya niquishuhua. Nojoriiri saaja maqueturiquiaa. Pedro sequereeri:

—Pedronaa, ¿majate nia naata cuata sutenu quenaaja rupaquijia? ⁴¹ Nia sutere Pueyaso nia secojonura, niaa mariqui sesa miiriiri niaa jaara saniniu-jiushaare. Seetanujuanaa, poojiaari maninia miiniu panijia. Pa cuaqueyari saniniuujia sasaca quiyacujua. Naacuajitij, majaari pa naata maninia miiniu Pueyaso cumaquiyaquishacari pajaniya.

⁴² Jesuuri socua tacatequiaariuhua tamajaaja Pueyaso secojonuhua. Naa sequereeri:

—Cua Quenaa, janiya jaara naquiya miishaareni, janiya cuara miishaari-aqui taa quia paniyacuajani.

⁴³ Jesuuri na pueyacia tacateyarohuacuhua. Maquetiuyano nojori ririatasuhuariuhua. Nojori namijaari saaja seecutayariquiaa jiyanohua nojori maquenu paniniutia. ⁴⁴ Jesuuri nojori tarinitiaquiaari socua. Quiaquiaariuhuari na Que secojonuhua. Secojonu pacutequiaariiri taa na secorijouquiaa coteenucuajani. ⁴⁵ Na nuhuaji, na pueyacia nimiohuariuhua. Nojori sequesuhuari:

—Quiarijia cutara nia maquetiuyare. Nia paniyatere cutara maquetunu. ¡Juaj! ¡Nia tojiri! ¡Janiyari tari quiatesaanutaniya sesa miijiaca pueyani! Nojoriiri cua miiniutianiya taa na panitiuyacuajani. ⁴⁶ ¡Nia saneeature! Pa quiaare. Cumaji tari cua quiateriquiano.

Moronucua na paraa jaatucutasacari Jesu
(Mr 14.43-50; Lc 22.47-53; Jn 18.2-11)

⁴⁷ Jesu pocuasacarijia, Judasri jiyacari tiuquishii. Nio Judascuajaari niquiriyatu canaajinijinio Jesu doce saquiriojosano pueyajiniji quiquiaari. ¡Queraatia pueyari Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judocuaca camarucua jiyaramiquishano pueyajuhua. Nojoriiri nijiniaquetucujaja mueruu pooriquiaa, macacanio. ⁴⁸ Judasri tari niishitioquiaari Jesu quiaturiquiano pueya taa nojori niishiniutianiyani teyanote Jesuni. Nojuajaquiri tari nojori sequequiaari: “Teyano pueyano cua nujiya pa tiuquishacarini, cunocujajari nojuaja. Niocua na quiasee ritia”. ⁴⁹ Naacujitij, Judas tiuquishacari Jesuucua, na sequeseeri:

—Quiocua tiuquiyaniijia Niishitiojonanaa.

Jiyacarijia na nujuureeri. ⁵⁰ Jesuuri na sequeree:

—Cua rupuenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. ⁵¹ Jiyacaritij, tamonu canaajinijinio pueyanoori ritia shitiaree na nijiniaquetucujaja mueruu na shuacuaji. Nata jaateree secojonaa jiyaniijia seru numocoori. ⁵² Jesuuri na sequeree:

—¡Na co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutaniya-jaariuhua? ⁵³ ¿Quiaate niishiyaquiyajuhua, janiya jaara cua Que sequerene cucua na jiyaramiquiniuria na seya jiyocuacaanuji na cojuanura janiya, cua Que maara ritia cucua jiyaramiquiri cincuenta mil na seyajinijinio?

⁵⁴ Naajuhua, janiya jaara naa cua Que sequere na cojuatenura janiyani, ¿tariucacaanu Pueyaso Rupaajinia janiyajiniji naajiotasanotucua taa tohua-tereni?

⁵⁵ Jiyacaritij, Jesuuri na paraa sequeree:

—¿Taateni? ¿Janiyateeri nohuasejojuani, naa nia tiuquitianura cua quianura mueruuta, macacatanio? Niaacuajaari juucua cua niqijia puetunu juucajanaa Pueyaso Secojouja tajinia cajiyano, pueya cua niishitiojosacari. ¿Casaara tii nia quiaaquiquiano janiyani? ⁵⁶ Naajaa, naacujitij puetunu nia miishanojuanaari tohuatenutaniya, taa tariucacaanu Pueyaso Rupaajinia naajiotasaaquiaari janiyajinijicuajani.

Jiyacaritij, canaa, na saquiriojosano pueyani, canaari Jesu tiujiaquiaari niquiriyatuni. Puetunu canaajanaari mashiyocatureeni.

Judiocuaca camarucua nequesoreesacari Jesu
(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesu quianaari na jaatucuquiaari jiyaniijia Caifásqua. Caifásri pueyacuara secojonaa jiyaniijia quiquiaari. Judiocuaca camarucuari tari Jesuucuaji rerejoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucuanio. ⁵⁸ Pedroori Jesu nuhuajiquiaari tucuaaanuji secojonaa jiyaniijia tiajiniara. Cuno puereetuuca tia shocuaari mataca quiquiaari. Pedroori tii carijiniacuma tiaquiquiaarijiuhuj. Jiyaniijia Caifás seya tajinia cajishiiri, na niquiniuria taa nojori miiniutianiya Jesuni.

⁵⁹ Pueyacuara secojonaa jiyaniijianucuaari puetunu canaa Judiocuaca camarucujatanaa pajeriquiaa pueya, nojori saquirojotanura na sapojonuta Jesuucuara, na mosaanura. ⁶⁰ Queraatia pueyari najuhuaana Jesuucuara saquirojotaree juucua. Nojori sequesanoori rimiajata quiquiaari tamasaca sequesanojiniji. Na nuhuaji, socua caapiqui pueyari mariyata sesa saquirojotaree Jesuucuara. ⁶¹ Nojoriiri naa sequere:

—Cuno pueyano naa sequecanutej: “Janiya jaara Pueyaso Secojoua tia niyartareni, janyari na tianu tucatanutaniuhua jiuujianaraca juucajiniani”.

⁶² Jesuuri sanaa nujuariquiaa saaja. Nocuaji, secojonaa jiyaniijiaari nujuare. Jesu sequereeri:

—¿Majate quenaaja quia riuucuanuuja? ¿Quiaate pueya tojirii quiocuara saquirojotaano? ¿Seetanutejanaa nojori sequesano?

⁶³ Jesuuri saaja sanaa na tojiriqúiaa. Nocuaji secojonaa jiyaniijiaari Jesu sequere:

—¿Cua tojiri! Paa niya quiya Pueyaso niquiarani. ¡Cua riuucua! ¡Majaari sapojonu! ¿Quiaate Cristo, Pueyaso Niyanu?

⁶⁴ Jesuuri na riuucuaare:

—Jaa. Nojuacuajaniijia taa quia sequereecuajani. Cua tojitiare. Na nuhuaji, niaari cua niquiniutianiya Pueyaso miaquetajara cajijano. Niaari cua niquiniutianiyajuhuj jiyocuacaanuji tacateyanohua cohuajajinia.

⁶⁵ Pueyacuara secojonaa jiyaniijia jaara tojiquiaari naa Jesu sequesanootej, tama na toque sutareejaarijia na juaniutia. Nata quiniaa sequereeri:

—¡Juhuej! ¡Nia tojishuriucuara na sequesano! ¡Nojuajaari tama na cuaqueyajaaja jiyateya juhua Pueyaso na quiniuria! ¡Jiyanhua sacuaraatiaari na sequesano Pueyaso niquiara! ¿Paatucua casaara sashiri socua tamonu saquirojotanura nocuaraarini? Niaacuaja shusha tojitiaree tama na sequesanojuaja sacuaraatia Pueyaso niquiara. ⁶⁶ ¿Taa pa miiniutianiyanoj? ¿Taa nia sequeyani?

Nojoriiri pueyacuara secojonaa jiyaniijia riuucuaare:

—¡Cuara mosaaria!

⁶⁷ Jiyacaritij, tamasaari Jesu jiquioco riocoree. Na jiquioco na masetajotureejaariuhuj. Tamasaca saniniuujia, Jesu namijia na morotunu nuhuaji, na mcoritia na piquitiuriiri. ⁶⁸ Na nuhuaji Jesu nequesotajotureeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

Pedro seetasacari Jesuucuaji
(Mr 14.66-72; Lc 22.56-62; Jn 18.15-18, 25-27)

⁶⁹ Pedroori jiyacari tii cajiriqúiaajaa carijiniacuma. Jiyacaritij, secojonaa jiyaniijia seruuri Pedro niqúishii. Nojuajaari niyacoo quiquiaari. Pedro sequereeri:

—¡Jaj, quiaacuaja cuno Jesuta rucuanajojua, cuno Galilea jiyajinijinio pueyanotani!

⁷⁰ Pedroori jiyacari seetaree puetunu pueya niquiarajanaa. Naa sapojoreeri:

—¡Maja cua niishiniu casaa quia sequeyani!

⁷¹ Pedroori tohuatayajiria canujiyaree. Jati, tamonu niyacoori na niquiri-ijjuhuaj. Cuno seruuri jiyacari tii quiniaa sequere:

—¡Nio pueyanoori cuno Jesuta quijiajuhuaj, cuno Jesu, Nazaret tiacajini-
jiniño pueyanoni!

⁷² Pedroori Jesujiniji socua seetanu camiriohuacuahuaj:

—¡Maja cua niishiniu cuno pueyano! ¡Pueyasocujaari niishiya, seetanujua-
naa nia sequeyanijia!

⁷³ Pasaja na tarishiniu nuhuaji, quiniqui quiniaari Pedro sequetusee:

—¡Quiaaqui seetanujuanaa cuno Jesu pueyajinijino! ¡Quiaari juhua nojori
pocuaajuhuj!

⁷⁴ Jiyacaritij, Pedroori socua jiyacateree sapojonura. Naa cuno pueya
sequeereeri:

—¡Pueyasocujaari niishiya maja cua niishiniu cuno pueyano, niaa na
sequeyani! ¡Pueyasocujaari cua sequesano tojiya! ¡Majaari cua sapojonu
niajaniya!

Caacarajaari canashiyaquiji niunijioquee. ⁷⁵ Jiyacaritij, Pedroori naa
cuno niucujaja Jesu sequesano niishiqui: “Pedronaa, caacaraja niuni-
jijaquishacarijia, quiaari tari janiyajiniji seetanu pacutejonutaniya”. Pe-
droori tia shocua matacainiji tohuataquiaari ritia. ¡Jiyanoohua nujuque-
queeri na taraajenuta!

27

Judiocuaca camarucua niquitiosacari Jesu jiyaniijia Pilato (Mr 15.1; Lc 23.1-2; Jn 18.28-32)

¹ Tariquicuaji, puetunu pueyacuara secojonaa jiyaniijianucujajanaari
rerejoree narta Judiocuaca camarucua. Nojoriiri rojotooree taa na
miitiuniutianiya Jesu na motenurani. ² Na nuhuaji, Jesu morotureeri na
jaatucutunura jiyaniijia Pilatoocua. Pilatoori jiyaniijia Césarjanaa jiyatesano
quiquiaari Judiocuaca jiyaniijia na quiniuria Judea jiyajinia.

Judas Iscariote cusosacari

³ Judasri jiyanoohua macuhajequiaari na niquishacari Jesuuri mosaanu-
taniya na quiatenuucua nojuaja. Na tacaaniutia, Judasri quiaquiaari seco-
jonaa jiyaniijianucuaacua, canaa Judiocuaca camarucuaacuanio, nojori na
niquitionuhuaa cuno treinta cumaneeca. ⁴ Judasri nojori sequeese:

—¡Janiyaqui sesa miirucuaani, najuhuaa cua quiatenuucua maninia
pueyano niajaniya!

Nojoriiri saa na riucuaarejaa:

—Naajaa. Maja canaa miishano. Cunocujaari tama quia miishanojuaja.

⁵ Judasri nojori cari cuno treinta cumaneeca jataree Pueyaso Secojoua
tiajinia. Tiji quiacuahuari. Na riquiajiniji morotaquiaari sohuaneyocuaari.
Naa cusoquiaariiri. Sohuaneyocuaacuaji jaasutaari. ⁶ Secojonaa jiyani-
ijianucuaari Judas jatasano cumaneeca reratequiaari. Nojoriiri tama seque-
tooquiaariijaja:

—Nio cumaneecaari maja na naata Pueyasora racatajajinia
niasocoriquiano. Nio cumaneecaari pueyano monu sami.

⁷ Puetunu nojorijianaa jaara niishirioquiaari taa na miitiuniutianiya
cuno cumaneevani, nojoriiri marau paniyoru pueyano cuhuariquia
masequiaari cuno cumaneecata. Cuno cuhuariquiaari jiyatesaquiaari

rucoonaa jamojuara, nojori jaara cusoyare Jerusalén tiacajinia nojori quishacari. ⁸ Pueyano monu samitia cuno cuhuariquia masesaanuucua, cuno cuhuariquiaari sesojosaaquiaari “Nanaca samitia masesano cuhuariquia”. Naa quiyajaari na sesa. ⁹⁻¹⁰ Naacujitij, Pueyaso sequenu panishano caminiujuunia supuetana Jeremías sequesanoori maninia tohuateequiaari. Nojuajaari naa sequequiaaritij:

“Nojoriiri na treinta cumaneecca pataquiaari cuhuariquia masenura marau paniyoru pueyanojiniji, taa cua jiyaniijia Pueyaso sequequiaari janiyacujani. Tariija, cuno treinta cumaneeccata, maninia pueyanoori nata masesaaquiaari. Israel pueyari naa sequequiaaritij: ‘Cuaara treinta cumaneeccata masesaaria cuno pueyano’”.

Pilato nequesoreesacari Jesu
(Mr 15.2-5; Lc 23.3-5; Jn 18.33-38)

¹¹ Jesuuri jaatucusaaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquiniatejaj, taa quia sequereecujani.

¹² Secojonaa jiyaniijianucua, canaa Judiocuaca camarucuanio, nojori jaara Jesuucua saquiriojotariquiaa, Jesuuri sanaa tojiriquiaa nojori.

¹³ Naaratej, jiyaniijia Pilatoori Jesu sequeree:

—¿Majate quia tojinu nojori, quiocuara tonujiyano queraatia?

¹⁴ Majaari Jesu riucuanu quirii quenaaja. Pilatoori nocuaji jiuujiateree, casaara na riucuaaquia quenaajani.

Pilato sequesacari Jesuuri mosaanutaniya
(Mr 15.6-20; Lc 23.13-25; Jn 18.38–19.16)

¹⁵ Puetunu Pascua juucarajanaa, Pilatoori nujuatejojuajinia nujuatesano pueyano cartenu jiitiquiaari. Judiocuaca panishano pueyanoori cartesaquiaari pueyaracaanu. ¹⁶ Cuno quishacari, tamonu pueyanoori nujuatejojuajinia nujuatesano quiriquiaa, Barrabás jiyanishano. Puetunu pueyajanaari na niishijia sesa na miiniuucua. ¹⁷ Pueya rerejosacari Jesu na nacojotasacari Pilato niquiara, Pilatoori nojori nequesotaquiaari:

—Judiocuaanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosanona.

¹⁸ Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojtiaaquiriquiaa, nojori tojtianura Jesu. Cunora, camarucuaari Jesu monu paniriquiaa.

¹⁹ Pilato cajishacari na nequesoreesaqui, necocuaari nocua jiyaroquiaari tamonu na seru, naa na numootenuratej: “¡Narejatejataj, nareja! ¡Janiyari niucua maquiyojoree puereeta cuno pueyanoocujani!”

²⁰ Jiyacaritij, secojonaa jiyaniijianucuaari, canaa Judiocuaca camarucua pueya niishitiojoriquiaa nojori sequenura, Barrabás cuaara cartesaaria, Jesu cuaara mosaaria saniniuujia. ²¹ Naacujitij, jiyaniijia Pilato jaara pueya nequesotaquiaariuhua teyano nojori paniya na cartenurani, nojoriiri na riucuaaree:

—¡Barrabás quia cartere!

²² Pilatoori nojori nequesotaree:

—¿Naatee? ¿Taa cua miinitianiya Jesuurinitioj, pueya sequesano “Pueyaso jiyarosanoni?”

Puetunu pueyajanaari ritia na riucuaaree:

—¡Cuaara teetsaaria niyacutesanojinia!

²³ Pilatoori nojori nequesotarohuacuhuj:

—¿Casaarateni? ¿Sesa miiritijaara?

Pueyari saaja socua jiyanhua nacaree:

—¡Cuaara mosaaria niyacutesanojinia teetesano!

²⁴ Pilato cartenu saniniujuushacari Jesu juuca, pueyari saaja socua jiyanhua nactuoriquiaa. ¡Socua jiyanhua juaaquiuriquiaari! Pilato niishishacari maja na naata quiniutianiya Jesu cartenu, taa na paniriquiaa juucuacuajani, nojuajaari mohuaca maseree. Pueya niquiara shuquitiareeri. Na shuquitasacari, Judiocuaca sequereeri:

—¡Majaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. ¡Cunoori tama nia miishanojuajaaja!

²⁵ Puetunu pueyajanaari na riucuaaree:

—Naajaa. ¡Jaara mosaare, cuaara tiutiasaaria canaacua, canaa niquiohuacuano!

²⁶ Na nuhuaji, Pilatoori Barrabás tohuateree nujuatejojuajiniji. Saniniuujia Jesu majacutereeri. Na nuhuaji, na soldadohua na niquitioreeri niyacutesanojinia nojori teetesocoriquiano.

²⁷ Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya.

²⁸ Na nuhuaji, nojoriiri Jesu toque jocuaturee. Tamonu tucuaque toque cushitishaareeri, shaaruque, juhua jiyaniijajanaa cushishano. Naa na mitiuriiri na macaatiniuria. ²⁹ Nojoriiri juhuacontucua maaturee na nacaquerajuhuj. Na nuhuaji, na cushitituriiri Jesuuri. Naajua niquitiosaareejaariuhuj, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucuaa mojuquetacoquiaari. Nojoriiri naa na macaatirii:

—¡Jejee, Judiocuaca jiyaniijianaa!

³⁰ Nojoriiri Jesu riocojoree. Na naajua na jaariutiatoreeri. Nataja na naca piquituriiri. ³¹ Naa nojori macaatinu nuhuaji Jesutej, nojoriiri cuno tucuaque toque jocuaquiaariuhua nocuaji. Tama na toquejaaja cushitishaaruuari. Na nuhuaji, nojoriiri na jiyataquiaari na teetenura niyacutesanojinia.

Jesu teetasacari niyacutesanojinia
(Mr 15.21-32; Lc 23.26-43; Jn 19.17-27)

³² Nojori tohuareetasacari tiacajiniji pucoosaquiria nojori quiojosacari, nojoriiri tamonu pueyano naacumaa. Nojuajaari Cirene jiyajinijinio pueyano quiquiaari. Simónri na sesa quijia. Soldadohuari cuno Simón pateree Jesu teetjara niyacutesano. ³³ Nojoriiri tiuquijioseesa sesa miijaca pucoosaqui. Pueya pucoosaquini, na sesa quiquiaari “Gólgota”. Nioori pueyano rupaajinia sequeya “Pueyano nacaco”. ³⁴ Quiniqui, soldadohuari Jesu raateree vino juuca, casaa piajata cojitishano. Jesu jaara na saniquiaari, majaari na ratunu quirii.

³⁵ Jesu jaara niyacutesanojinia teetsaaquiaari tari, soldadohuari saitia tacuarishijioree nojori niishiniuria cante Jesu toque poonutianiya nerani. Naacuajitij, tama nojoriijaarijia Jesu toque seraatiaquiaari. Naa tohuateequiaariiri tariucuacaanu Pueyaso sequesano caminiuujunia sequesano, nojuaja jaara naa naajiotaquiaari:

“Pueyari saitia tacuarishijioree cua toque nojori seraatianura”.

³⁶ Na nuhuaji, cuno soldadohuari cajitiquiaari Jesu na cojuanura.

³⁷ Jesu nacaacuma, naajioneeri rupotasaquiaari. Tii naajiosano quiriquiaari casaara na teetsaareeni. Naa naajiosano quiriquiaari: “Nioori Jesu, Judiocuaca Jiyaniijia”.

³⁸ Caapiqui nohuasenujuacaari Jesu shuriucua teetsaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. ³⁹ Tamasaca pueya tajishacari nuacuco Jesu shuriuquico, nojoriiri Jesu macaatiquiaari. Na maanuquenuta, nojoriiri Jesu sequetuquiaari:

⁴⁰ —¡Jaj! ¡Cumaacaraca quijia naatiijia! Quiaacujaari sequeja quiaa jaara Pueyaso Secojojua tia niyartare, quia naata na tianu tucuatunuhua jiuujia-naraca juucajinia. ¿Naatee? ¡Quiaa jaara naa cumaacaraca quiriritij, canaa niquiara quia roserecuarajaj, quiaa jaara Pueyaso Niyanu quiri seetanujua-naa!

⁴¹ Secojonaa jiyaniijianucuaari tii quiriquiaajuhua Moisés Rootasanojiniji niishitiojonaata, canaa Judiocuaca camarucuanio. Nojoriiri Jesu macaatiriquiaajuhua. Tama sequetooriquiaajaarijia:

⁴² —Saaja tamasa naatanijiojuaquiri. Maja cutaraari na naata tama nocuajijiaaja tacunu. Jaara seetanujuaana pa Israel pueya jiyaniijia quiri, cuara roseera quiarijia pa niquiara niyacutesanojiniji, nocua pa tiuuni-uria. ⁴³ ¡Pueyasocua tiuujia naatiijia! Jaara naa quiriritij, Pueyaso cuara na roshiniiria, nojuaja jaara seetanujuaana Pueyaso panishano quiri. Nojuacuajaari pa sequeja: “Janiyari Pueyaso Niyani”.

⁴⁴ Cuno caapiqui nohuasenujuaca Jesu shuriucua teetejosano quiriquiaani, nojoriiri Jesu macaatiriquiaajuhua.

Jesu cusosacari

(Mr 15.33-41; Lc 23.44-49; Jn 19.28-30)

⁴⁵ ¡Panacari, mijiriaari ninishiquiria quiqui! Pananu mueecosacari cuhu-atemohuari. ⁴⁶ Jiyacaritij, Jesuuri jiyanojua nacaquiaari naatej:

—¡Elí, Eliinaa! ¿lama sabactani?

Nioori pueyano rupaajinia sequeya: “¡Cua Pueyasonaa, cua Pueyasonaa!, ¿casaara quia cartere janiyani?” ⁴⁷ Tamasaca na shuriucua nujuatunaari na tojitiariquiaa. Nojoriiri sequeree:

—¡Nia tojiri! ¡Supuetana Elías jiiquioonuyano! Noo Elías, tariucuaaanu pueyara Pueyaso sequesano caminiujunia quiquiaaritij.

⁴⁸ Tamonuuri ritia netequee namasu casaa na riniuria. Naajuaacua na morotanu nuhuaji, jereca vinojinia na shiriiri. Na nuhuaji, Jesuucua na shiitioreeri na raatenura. ⁴⁹ Tamasacaari sequeree:

—¡Pa shanacure! ¡Elías jiyoteeri nocua niniutianiya na roshiniuria niyacutesanojiniji!

⁵⁰ ¡Jiyacaritij, Jesuuri jiyanojua nacarohua! ¡Na nuhuaji na sohanu tohuataniriiri! ¡Cusoqueeri! ⁵¹ Pueyaso Secojojua tiajinia, shiquiaruque toquejiniji sohuacaari quiquiaari Pueyaso Quisaguji mishiquiotaja. ¡Jesu cusosacari, cuno toqueeri sutequee jiyocuaanuji jiyocuara puetunujua-naa! ¡Rijiaari jiya jiuuquiutiaquiaari jiyanojua! ¡Sairi jiaquetacoquiaari noo-jiacoji! ⁵² ¡Macunucua raacaari riatequequiaari! ¡Queraatia tariucuaaanu Pueyasocua tiuuniari samiiticoquee na raacajinia! ⁵³ Jesu jaara sami-itiaquiaariuhua, cuno samiitiaconohua pueyari tohareetaquiaari na raacajiniji. Nojoriiri Jerusalén tiacajinia tiuquitiaquiaari. Nojoriiri queraatia pueyacua muetaquiaari tii, Pueyaso panishano tiacajiniani. ⁵⁴ Soldadohua capitánri na pueyata Jesu cojuariquiaa, Jesu cuara cusoyarejaatijia nojori

niquiara. Nojori jaara jiya niquitiuguiaari jiuuquiutiaano, socua puetunu nojori niquishanojuanaanio, nojoriiri jiyanoehua puereturee. Sequetureeri: —¡Nio pueyanoqui seetanujuanaa Pueyaso Niyanu quiquianu!

⁵⁵ Queraatia maajipohuari tii quiriquiaajuhuj. Nojoriiri tucuaaanuji shootiaturiquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenuuriquiano. ⁵⁶ Cuno maajipohua tajinia quiriquiaari María Magdalena, Santiago nucua Maríajuhuj, José nucua Maríano, mariyata Zebedeo niqiohua nucuanio.

Jesu quete niasacari raaco

(Mr 15.42-47; Lc 23.50-56; Jn 19.38-42)

⁵⁷ Tamonu pueyanoori quiquiaari Arimatea tiacajinijinio. Jiyanoehua casamiriaca quijiaari. Na sesa quiquiaari José. Nojuajaari tarijia Jesu tojjijara quiquiaari. Joseeri Jesu cusonu juucaja tiuquiquiaari cuno tenacari. ⁵⁸ Joseeri Pilatoocua quiaquiaari Jesu quete na masenura. Pilatoori na pueya sequeree cuara na niquitiosaarianoj. ⁵⁹ Joseeri Jesu quete paquiaari na jeenucuanura raaco na niasocoriquiano. Na jiuniooreeri quenaaruque cohuajaque toquejinia. ⁶⁰ Na nuhuaji na niaquiaari tama na racojaarijia. Quiarinio raa quiquiaariiri, José jiuutianishano saajiajinia. Na nuhuaji, Joseeri puereetuuca saajia saquitiniquiaari raa tiotuuria. Quiacuhuari. ⁶¹ María Magdalenaari na sesaanucuata cajituriquiaa raa caneja taquijiria.

Soldadoehua cojuasacari Jesu raa

⁶² Pascuara jeenucuanu juuca nuhuaji, secojonaa jiyaniijianucuaari Pilatoocua quiojoquiaari Fariseocucata. ⁶³ Naa na sequetuseeri: —Jiyaniijianaa, canaari cuno sapojoua pueyano sequesano niishiquiini, na sequesano saminio na quishacarijia. Nojuajaari sequeja: “Janiyari jiuujianaraca juucajinia samiitianutaniuhuanu”. ⁶⁴ Nocuaji na raa quia cojuatere maninia tiosano, jiuujianaraca juuca cuara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacuaa. Nojori jaara naa sapojore pueyatej, socua jiyacatenutaniyari Jesu sequesano, nojuaja jaara sequedanu: “Janiyari Pueyaso Jiyarosanoni”.

⁶⁵ Pilatoori nojori sequeree:

—Niya quiyacuaja cua soldadoehua. Nojori nia cojuatere maninia cuno raa, taa nia paniyacuajani.

⁶⁶ Nojoriiri soldadoehua nujuatejoquiaari raa nojori cojuanura. Raa tiotiuuri rupanacusaquiaarijuhuaj jiyaniijia Pilato sesa naajiotajata.

28

Jesu samiitiasacariuhua

(Mr 16.1-8; Lc 24.1-12; Jn 20.1-10)

¹ Samaatenu juuca jaara shocoquiaari, coteenu juuca semaanajinijinio juhuaquesacari, shusha cuhuatesacari, María Magdalenaari raa niqiniucua quiariquiaa na sesaanucuata. ² ¡Canashiyajuiji, rijiaari jiyanoehua jiuuquiutiaree! Cunoori quiquiaari Pueyaso seru rosenuucua jiyocuaaanuji raacua. Raa tiotiu saajia saquitinishiiri. Na nuhuaji, saajiaacua cajiriohuari. ³ ¡Pueyaso seruuri niqishaaquiaari shacantuuca juhua miacana! Na toqueeri jiyanoehua cohuajaque quiquiaari, juhua sohanatuu. ⁴ Raa cojuatunaari jiyanoehua shiriiquitiquiaari nojori niqishacari Pueyaso seru. Jiyanoehua tetecatureeri. Na puerenuta socua cusojonuureeri. ⁵ Maajipohua jaara tiuquiquiaari raajinia, Pueyaso seruuri nojori sequeree:

—Maja nia shiriiquiniu. Janiyacuajaari niishiyani niaari Jesu pajeya, niyacutesanojinia mosanotej. ⁶ Maja niya na quiniu. Tari samiitiarohuano, taa nojuaja sequequiaari niajanियacuajani. Miji. Nia niquishushiiria na masaqui. Shaaqui. ⁷ Ritia nia quiaarohua. Na saquiriojosano pueya nia sequesuhua: “Jesu tari samiitiarohua. Nojuajaari nia puetanutaniya Galilea jiyajinia. Niaari jati na niquiniutianiya”. Janiyacuajaari tari nia sequereeni. Naa nia pohuatasuhua na pueya.

⁸ Maajipohuari masaacujutanuuriquihua raajiniji na puerenuta, na shuquiriniutiajuhuaj. Nojoriiri socua netecuatiuyarohuaquij, canaa na pohuatanuhua Pueyaso seru sequesano nojori. ⁹ ¡Jiyacaritij, Jesujuanaari canashiyaquiji nojoriicua muetaquee nuujinia! Nojori saruhuatareeri. Maajipohuari nocua catecanoree. Na cariquimiaji mojoquetacoreeri. Jesu niuhuaa quiatureeri. Jesu shootiatureeri na jiuujiatenuta. ¹⁰ Jesuuri nojori sequeere:

—Maja nia puerenu. Nia quiaarohua. Cua pueya nia sequesuhua nojori cuaara quiojora Galilea jiyajinia. Nojoriiri setanujuanaa cua tapuey-ocua. Nojoriiri jati cua niquitiuniutianiya.

Raa cojuanaa pohuatasano

¹¹ Maajipohua quiojosacariuhua, noojiaqueya raa cojuanaajiniiniori tiacajinia quiojoquiaariuhua pueyacuara secojonaa jiyaniijianucua nojori pohuatanura nojori niquishano. ¹² Pueyacuara secojonaa jiyaniijianucuaari canaa Judiocuaca camarucuaata rerejoree na roojotoonura taa na miitiuniutianiyan. Na nuhuaji, nojoriiri queraatia cumaneeca niquitioquiaari raa cojuanaa, pueya niquiara nojori pohuatanura tamaatia nojori niquishanojiniji. ¹³ Soldadohuari naa rootasaaquiaritij:

—Niocua naa sequeere pueyatej: “Canaa maquesacari, Jesu pueyaquiri niucua nohuasequee Jesu quete raajiniji”. Niocua naa sequeretej. ¹⁴ Jiyaniijia Pilato jaara niishiri naa nia pohuatasacaritij, majaari nia puerenu. Canaacujaari na shiniujanutaniyani jaara juaari. Naacujitij, majaari na juaanu quiniutianiya niajaniya.

¹⁵ Jiyacaritij, soldadohuari cumaneeca masere. Nojoriiri naa pohuatanu coteequiaari taa nojori rootasaareecuajani. Nojori cuaracashishanoori ritia caminiujushaaquiaari canaa Judiocuacara. Naacujitij, canaa Judiocua-caari naa sequeyajaa quiarijia.

Jesu rootasacari na pueya na jiyaramiquiyaquishacarijia nojori (Mr 16.14-18; Lc 24.36-49; Jn 20.19-23)

¹⁶ Canaa, Jesu once saquiriojosano pueyani, canaari Galilea jiyajinia quiojoquiaari tamonu tuhananuucuan. Jesuuri canaa sequequiaari canaa quiojonura tiriara, tii canaa coquetonura nata. ¹⁷ Canaa niquishacari Jesu qiyano tii, canaari nocuara mojoquetacoquiaari canaa shuquiritianura nojuajani. Tamasaca canaajiniiniori jiyaniiriqiaa maja naasucuaari Jesu.

¹⁸ Jesuuri canaacua catecanoree. Canaa sequereeri:

—Janiyari puetunu cumaacajanaa niquitiosareeni, Jiyaniijiajanaa cua quiniuria jiyocuacaanu, mijiriano. ¹⁹ ¡Naaratej, nia quiojore! ¡Puetunu pueyapuejanaa nia pohuatare cua rupaa, cua tojtiajacara nojori quiniuria! Moojinia nia tuquinijiore cua tojtiajaca Pueyaso sesajinia, nojori rupesacari pa Que Pueyaso, janiya, na Sohuanunio. ²⁰ Nojori nia niishitiojore puetunu cua rootasanojuanaa niajaniya, nojori tojishocoriquiano. Nia niishiri nio: ¡Janiyacujaari niaata quiniutianiya pueyaracaanuni, jiya cuaara puequerejaatijia!

MARCO NAAJIOTASANO JESUCRISTOJINIJI

*Cariiquia jiyajinia Tiuquinijiona Juan poojotasacari Pueyaso rupaa
(Mt 3.1-12; Lc 3.1-9, 15-17; Jn 1.19-28)*

¹ Pueyaso Nyanu Jesucristojiniiji naa coteetasaquiaari pohuatanutej.
² Tariucuacaanu pueyara Pueyaso sequesano caminiujiunia Isaiásri Pueyaso Nyanu niyacari naajiotaquiaari. Naajiotaquiaariiri taa Tiuquinijiona Juan poojotanutaniya pueya jeenucuanura nojori jiuujiani, niriqiano Jesu toji-jia nojori quiniuria. Isaiásri naa naajiotaquiaari Pueyaso sequesano miriqui Neyanutej:

“Janiyari quiocuaji jiyaronutaniya tamonuni, quiocuaji quia nuu jeenu-cuariquiano. ³ Na nacanuuri tojishaanutaniya cariiquia jiyajinia. Naa pueya sequeyari: ‘Nia jeenucuare Jiyaniijia nuu! ¡Nia nuunore maninia, maja shuutiuniu!’”

⁴ Quiari naataja, Tiuquinijiona Juanri seetanujuanaa naa miiquiaari cariiquia jiyajinatej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

—¡Nioojia nia tacatore sesa nia miiniujiniiji, moojinia cua tiuquinijionura nijaniya! ¡Pueyasocua sesa nia miishanojiniji nia jiyanoori puetunujuanaa!

⁵ Puetunu Judea jiyajinijinio pueyajanaari nocua nijioquiaari nojori toji-tianura nojuaja, Jerusalén tiacajinijinio pueyanio. Cuno pueya jaara sesa na miishano pohuataquiaari Juan niqiuara, Pueyaso niqiuarajuhua, Juanri nojori tiuquinijioquiaari Jordán moojinia.

⁶ Tiuquinijiona Juan toqueeri camello cajacajiniiji shitiasano quiquiaari. Na cajiniocua na camarucutesanoori quiquiaari shoque sacuanijiasano. Na miaquesanoori quiquiaari sequeru, samiyatunio, cariiquia jiyajinia na riuriatasano. ⁷ Juanri pueya niqiuara pohuataquiaari naatej:

—Tamonuuri cua nuhuaji niniutianiya. Nojuajaari socua cumaacaraca janiyajiniiji. Janiya maara shuquiriaatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jiyaniijiajanaa cutara janiyajiniiji. ⁸ Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohuanu tiuquinijionutaniya nioojiajinia, na cumaaca nia jiitianura, seetanujuanaa maninia miijia nia quiniuria.

*Jesu tiuquinishacari moojinia
(Mt 3.13-17; Lc 3.21-22)*

⁹ Jesuuri jiyacari Nazaret tiacajiniiji quiaquiaari Tiuquinijiona Juan-cua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquiaari Jordán moojinia. ¹⁰ Jesu tacasacari moojiniji na tiuquin-ishaanu nuhuaji, jiyacaritij, nojuajaari jiya cajiniocua niqiquiaari ri-ateyano. Pueyaso Sohuanu niqiriiri nocua roseyano juhua mococoonu. Nocua tiushuiri. ¹¹ Jiyacaritij, jiyocuaanuujitij tojishaquiaariiri Pueyaso pocuaano. Naa Jesu sequequiaariiri:

—¡Quiaari Quiyanuniyojua, cua panishano! ¡Jiyanojua quia timitiaanjia!

*Samaruhua jiyaniijia saniniujiushacari Jesu
(Mt 4.1-11; Lc 4.1-13)*

¹² Na nuhuaji, Pueyaso Sohuanuuri Jesu jiyatequiaari ritia cariiquia jiyajiniara. ¹³ Jesuuri cuarenta juuca shocojotequiaari tii tamajaaja, puereeta

jiya camaruhua casami quishaqui. Tii na quishacari, Satanásri Jesu sanini-
ujiuriquiaa na tojjijara Jesu quiniuria juucua. Na nuhuaji, Pueyaso seyari
nocua nijioquiaari na naacunura, na mianuutenurajuhuj.

Jesu coteesacari poonijionu Galilea jiyajinia

(Mt 4.12-17; Lc 4.14-15)

¹⁴ Jiyaniijia Herodes jaara Tiuguinijiona Juan nujuatequiaari nujuatejo-
juajinia, na nuhuaji, Jesuuri Galilea jiyajinia quiaquiaariuhua. Nojuajaari
pueya niquiara poojotaquiaari tii, maninia pohuatasano Pueyasojiniji, taa
Pueyaso jitianutaniya na muerasuni. ¹⁵ Jesuuri naa sequequiaari pueyatej:
—Nia sequeyanijia, nio pa quishacarini, quiarijiaari Pueyaso
jiyanooshacari pueya, na muerasura nia quiniuria. Cunora, Pueyasojiniji
cua pohuatasanoocua nia tiuuri. Nioojia nia taatore sesa nia miiniujiniji,
Pueyaso tojtiajaca nia quiniuria.

Jesu saquiriojosacari pueya, na tarajariquiano

(Mt 4.18-22; Lc 5.1-11)

¹⁶ Galilea caminia shuriuquioco Jesu rucuanijosacari, nojuajaari Pe-
dro niquiquiaari, tarajanu Andrésnio. Nojoriiri shiyaru jaquerootanaa
quiquiaari. Jiyacaritij, nojoriiri shiyaru jaquerootariquiaa caminiajinia.

¹⁷ Jesuuri nojori sequesee:

—¡Miji, cua nuhuajitiyuare! Janiyari nia jiyatenutaniya pueya quiojuara
saniniunijia, juhua sapitiaaja.

¹⁸ Nojoriiri ritia na shiyaru tiujiaquiaari. Jesuta quiojijareeri.

¹⁹ Socua shiitianiyojua na tacoji Jesu canujosacari, Santiago niquishiiri,
tarajanu Juannio. Nojoriiri na shiyaru cushipirijionuuriquiaa botejinia. No-
joriiri Zebedeo niquiohua quiquiaari. ²⁰ Jesuuri jiyacarari nojori sequequiaari
nata nojori quianurajuhuj. Nojoriiri na que Zebedeo tiujiaquiaari botejinia
na naacunaata. Nojoriiri Jesuta quiojoquee.

Samaruraca pueyanojiniji pohuatasano

(Lc 4.31-37)

²¹ Nojoriiri Capernaum tiacajinia tiuquishii. Samaatenu juuca, Jesuuri
tiuquiquiaari Pueyaso secojojua tiajinia. Tii pueya niishitiojonu cotee-
quiaariiri. ²² Pueyari jiyanhua jiuujiatequiaari na rootasano nojori to-
jishacari. Jesuuri juhua jiyaniijiajanana niishitiojoriquiaa. Majaari na ni-
ishitiojonu quiquiaari taa Moisés Rootasanojiniji niishitiojonaa niishitiojo-
quiaaricuaani. Nojoriiri saaja Moisés pohuatasanojiniji caminiujuquiaari,
pueya niquiara nojori pohuatasacari Pueyaso Rupaa. ²³ Samaruraca
pueyanoori Pueyaso secojojua tiajinia quiriquiaa tiijuhuj. Nojuajaari
nacaquiaari:

²⁴ —¡Nazaret tiacajinijinio Jesunaa!, ¿quiaateeri tari canaacua nimiaa, canaa
quia shaajanura? Janiyari quia niishiyani. ¡Quiaacuajaari Pueyaso Niyanu!

²⁵ Jesuuri cuno samaru juarii. Na sequeereeri:

—¡Quia sanaajere! ¡Quia tohuatare nio pueyanojiniji!

²⁶ Jiyacaritij, samaruuri jiyanhua taraatia mirii cuno pueyano.
Jiyanhua na sariyotequiaariiri na tohuatasacari nojuajiniji. Juhua macu
tiujiaquee pueyanoori. ²⁷ Puetunu pueyajanaari shiriiquitiuquiaari. Tama
nojoriijaarijia nequesoreetooquiaari:

—¿Casaatucuaa ñoni? ¡Nioruhua quiarinio niishitiojosano! ¡Nio pueyanoqui
cumaacaraca! ¡Taa samaruhua tojtiaa nojori na jiyarosacariiri!

²⁸ Pueyari ritia caminiujuquiaari Jesujiniji puetunu Galilea jiyajinia-
janaa.

Jesu naatanishacari Simón Pedro reyarucua

(Mt 8.14-15; Lc 4.38-39)

²⁹ Jaara tohuareetaquiaariuhua Pueyaso secojojuia tiajiniji, Jesuuri Simón, Andrés tiajinia quiaquiaari Santiagota, Juantanio. ³⁰ Simón reyarucuaari naseca matariquiaa maquetujinia. Cusosutuhuj. Tiajinia quiniaari Jesu sequeturee nojuaja cusosu mataa. ³¹ Jesuuri nocua canujiyaree. Na juaashiquiajiniji cusosu sanaseeri. Na cusunuuri seetanujuanaa ritia tajiquiaari nocuaji. Naacuajitij, nojuajaari pueya mianuutenu coteequiaari ritia.

Jesu naatanijosacari queraatia cusosuhua

(Mt 8.16-17; Lc 4.40-41)

³² Shusha ninishacari, Jesuucua patootasaquiaariiri puetunu cusosuhua-janaa, samaruhuaraca cusosu pueyanio. ³³ Puetunu cuno tiacajiniji pueyajanaari tia tohuateyaji rerequeequiaari tee Jesu quiriquiaacuajani. ³⁴ Jesuuri queraatia puetunu tamaatia cusonujuanaa naatanijioquiaari na rupaa cumaacata. Queraatia samaruhua tohuatanijioquiaari tamasaca pueyajinijiaariuhuj. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

Jesu pahuatasacari Pueyaso rupaa Galilea jiyajinia

(Lc 4.42-44)

³⁵ Jesuuri jiyanoehua tariquicuaji sanequiaari, ninishiqui quishacarijia. Tiacajiniji quiaquiaari tamaquiriaari, tii Pueyaso na secojonura tamajaaja. ³⁶ Na nuhuaji, Simónri Jesu pajenuucua quiojoquiaari, nata quiniaata. ³⁷ Jaara na riuriatatuquiaari, na sequetuseeri:
—iPuetunu pueyajanaa quia juuretaa!
³⁸ Jesuuri saaja nojori sequereee:
—Pa quiaare juhuari catecanaataja tiacajinia. Tii pa pahuatarehuhua Pueyaso rupaa pueya niquiara. Janiyacuajaari cunora jiyasohuaja tohuataareeni.

³⁹ Naacuajitij, Jesuuri puetunu Galilea jiyajiniajanaa rucuanajoquiaari. Pueyaso rupaa pahuataquiaariiri Pueyaso secojojuia tiacajiniaqueya puetunu Galilea jiya tiacajiniajanaa. Nojuajaari samaruhua tohuatanijioquiaarijuhuaj.

Jesu naatanishacari lepraraca pueyano

(Mt 8.1-4; Lc 5.12-16)

⁴⁰ Lepraraca cusosu pueyanoori Jesuucua catecanoquiaari. Jesu cariquimijaji mojoquetaseeri. Na sequereeri:

—Quiaa jaara paniri, quia naata cua naataniniu cua cusonujiniji.

⁴¹ Jesuuri nocua taraajequiaari. Na juaashiquia niaree nocuaari. Na sequereeri:

—Taaquiririninij. Quia naataniniu panianijia. Quia cuaqueya cuara jeequehuara.

⁴² Jesu jaara naa na sequequiaaritij, na lepraari ritia cushiriquii. Na cuaqueyajiniji shaajequiaariiri na cusonu. Na cuaqueyari maniniara quiquiaariuhua. ⁴³ Na jiyaroyaquishacarijia na naatanishano pueyano, Jesuuri jiyanoehua na rootaquiaari. Na sequereeri:

⁴⁴ —iCua tojiri, majaari pueya quia pahuatanu cua miishano! Saaja pueyacuara seconanaa jiyaniijia quia cuaqueya quia niqutishii, na cartenuhuara quiajanija, pueya tajinia quia rucuanenonuhua juhuajaniya. Mariyata ritia quia niqutiore quia seru Pueyasooacara catijiasocoriquiano. Naa quia

miiri taa Moisés niishitiojoquiaaricujani, puetunu pueyajanaa niishiniuria quiaa tari naatarohua quia cusonujiniji.

⁴⁵ Cuno pueyano jaara quiaquiaari, juhuacatecara pohuataquiaari puetunu pueyajanaari taa na naatanishaarohuani. Naaratej, puetunu pueyajanaari Jesu niqiniu panijia. Cunora, Jesuuri maja tari na naata tiuquiniu quiquiaari juhuajaniya tamonu tiacajinia. Nocuaji Jesuuri pueya quiyaquishaqui rucanejojua. Naajaa, puetunu cuno jiyajiniji pueyajanaari saaja nocua nijioquiaari na niqiniuria.

2

Jesu naatanishacari cumatacuruhuana cusosu

(Mt 9.1-8; Lc 5.17-26)

¹ Na rucanejonu nuhuaji, Jesuuri Capernaum tiacajinia tiuquiquiaariuhua na saquirojosano pueyata. Pueya jaara niishiquiaari Jesu tari na quijia tiajinia tiuquiriohua, ² queraatia pueyari nocua nijioquiaari cuno tiajinia. Nojoriiri tiaco mishiquiaari, tohuatējajijiuhuaj. Jesuuri cuno pueya niqiuara pohuataquiaari Pueyaso rupaa. ³ Jesu quishacari tii, nocua patasaquiaari pueyano cusosu na matujinia. Cuatro pueyari na pata-maa. Cuno cusosuuri pootia mataja quiquiaari pueyaracaanu, cumatacuruhuana na quiniuucua. ⁴ Cusosu patanaari maja na naata tiaco tiuquitianu quiquiaari Jesuucua, puera pueya rerequeesacari tohuatējaji. Nocuaji nojoriiri tia cacojiria cusosu tacataquiaari tacatuhuoco. Nojoriiri tia nijinia cuhuataquiaari. Namitia Jesu nujuasaquijjanaa cuhuataturee tiaari. Na nuhuaji, tia cuhuocojiniji, Jesuucua roshinitiasaareeri cusosu na matujinia. ⁵ Jesuuri cusosu patanaa pueya niquirii seetanujanaa nocua tiyano. Naaratej, Jesuuri cusosu sequeree:

—Quiyanunaa, sesa quia miishanojiniji quia jiyanoorii taricujajinijia.

⁶ Moisés Rootasanojiniji niishitiojonaari tii cajituriquiaa. ⁷ Nojori tojishacari Jesu jiyanoyno cuno pueyano, nojoriiri niishiriojonuuree: “¿Casaara nio pueyano pocuaa naani? Majaari quenaaja pueyano naata pa jiyanooni sesa pa miishanojiniji. ¡Nojuajaari tama na cuaqueyajaaja jiyateya juhua Pueyaso na quiniuria! ¡Cunoori jiyanohua sacuaratia! ¡Saaja Pueyaso cutaraari na naata pa jiyanooni!” ⁸ Jesuuri tamajaaja ritia niishiquiaari noojiajinia naa cuno pueya niishiriojonuusano. Jesuuri cunora nojori sequeree:

—¿Casaara naa nia niishiriojijiani? ⁹ ¿Casaate jiyajenetashiya sequenurani: “Sesa quia miishano tari jiyanooshaaree”? ¿Mariyata jiyajenatēteri sequenurajuhaj: “Quia sanere. Quia matu quia pataarohua”? ¹⁰ Seetanujanaa nia sequyanijia, janiyari quiarijia nia niishitiniutianiyani, pueyano cua quishacari mijiria, naajaa, janiyari Pueyaso cumaaca jitiaa sesa miijiaa cua jiyanooniuriani.

Jiyacaritij, Jesuuri cumatacuruhuana cusosu sequeree:

¹¹ —Cua tojiri. ¡Quia sanere! Quia matu quia patare. Quia tiajinia quia quiaarohua.

¹² Cusosuuri ritia sanequee. Pueya niqiuara na matu pataarohuari. Naaratej, pueyari jiuujiatequiaari. Pueyaso maninihuaqueetatureeri. Cuno pueyari naa sequetuquiaaritia, na shuquiritasacari Pueyaso:

—¡Majaari quenaaja pa niqiniu quiquiaari naa miishanotej!

Jesu sequesacari Leví na nuhuajiniuria

(Mt 9.9-13; Lc 5.27-32)

¹³ Na nuhuaji, Jesuuri na saquirojosano pueyata tacatequiaariuhua caminia casaqueyajiria. Queraatia pueyari nocua nijioquiaari. Jesuuri

cuniqui nojori niishitiojoquiaari Pueyaso rupaa. ¹⁴ Na nuhuaji, Jesu quiojosacari na saquiriojosano pueyata cuniquiji, Jesuuri Levi niquimiaa cajiyano Roma tiacajinia quijia jiyaniijara cumaneeca masejojuajinia. Nojua-jaari Alfeo niyanu quiquiaari. Jesuuri na sequeree:

—Miji. Cua nuhuajiyare.

Jiyacartitij, Leviiri sanequiaari. Jesu pueyanora quiaquiaariiri.

¹⁵ Cuno niucujaja, Jesuuri Levi tiajinia miaqueriquiaa. Levi tiajinia mi-
aquenuuriquiaajaariuhua queraatia narta cumaneeca masejonaa. Quera-
aatia tamasaca pueyari nojoritia miacquenuuriquiaajuhujaj, canapue Ju-
diocuaca camarucua sequequiaari sesa pueyatacuajani. Nojoriiri Jesuta
miacquenuuriquiaa, Jesu saquiriojosano pueyatanio. Jiyanohua queraatia
pueyari Jesu rupuenaa quiriquiaa. ¹⁶ Moisés Naajioneejiniji niishitiojonaa,
mariyata Fariseocuaca jaara Jesu niquirii cuno pueyata miacqueyano, nojori-
iri Jesu saquiriojosano pueya nequesotaquiaari:

—¿Casaara nia niishitiojona miacqueya cuno cumaneeca masejonaatani,
mariyata cuno sesa miijiacatani? ¿Casaara cuno pojoritia na ratuyajaani-
uhujaj?

¹⁷ Jesuuri cuno pueya sequesano tojirii. Nojori sequere miriquiiri:

—Jiyotuucari maja na paniniu naarajona. Cante cusosuni, cuno cu-
taraari naarajona paniya. Majaari cua ninu quiquiaari maninia miijia-
caacua. Niquiaari cutaranijia nia sequesano sesa miijiacua cua jiyanooniuria
sesa nojori miijiosanojiniji.

*Pueya nequesotasacari Jesu, casaara na pueya miacquenu carteyaquiyani,
nojori shuquiritiniuria Pueyaso*

(Mt 9.14-17; Lc 5.33-39)

¹⁸ Tamacari, Tiuquinijona Juan tojitiajaca, mariyata Fariseocuaca mi-
aqueyaquishacari, tamasaca pueyari Jesuucua nijioquiaari. Na seque-
tuseeri:

—¿Casaara quia saquiriojosano pueya carteyaquiya miacquenu quena-
jani? Tiuquinijona Juan pueya cutaraari miaajecoquiaa Pueyaso nojori
shuquiritiniuria. Fariseocuacaari naa miiquiaajuhujaj. ¿Casaara naa quia
pueya miyaquiyajaaniuhujaj?

¹⁹ Jesuuri nojori riucuaare miriqui:

—¿Masuusano pueyateeri miaajenutaniya nojori jaara queranacusaqui
quiya, pueyano camishacari maaji? Camiriquiano pueyano jaara nojoritia
quiyajaa, maja na naata nojori miaajenu, shuquiriaatia nojori quishacari.

²⁰ Tamacari cutara, cuno camiriquiano pueyanoori nojori tajiniji rishaanu-
taniya. Cua pueyari jiyacari miacqueyaquiniutianiya cutara.

²¹ 'Seetanujuaana nia sequeya cutaranijia, toque mocua cuhuocoori
maja na naata cushipirijiosaanu quiariqui toquerauta. Jaara jeequesaare,
quiarinio toquerauri posequeja. Naacuajitij, toque mocua cuhuocoori socua
queraaquetaaree. ²² Naajuhujaj, quiariniacu uva caacaari maja na naata
racatasaanu shoque tariucacojinia. Quiariniacu uva caaca jaara jerema,
shoque tariucuocho pojuaretaanu. Naacuajitij, paari najuhuaana niitiaa uva
caacani, shoquenio. Cunora, maninia cutaraari quiariniacu uva caaca
shuujionu shoque quiariquiojinia, maja vino niitiasaanura najuhuanaj,
shoquenio.

Jesuuri naa pahuataquiaaritij, pueya na niishitiojonura quiarinio na
niishitiojosanoori maja na naata cojitishaanu tariucuaaanu niishitiojosan-
ota.

Jesu pueya carojotasacari trigo samaatenu juuca
(Mt 12.1-8; Lc 6.1-5)

²³ Jesuuri samaatenu juuca quiojoquiaari cuhuariquiaajiniaaco na saquiriojosano pueyata. Na pueyari jiyacari trigo carojotanu coteequiaari na miaajenuta. ²⁴ Fariseocuaca jaara na niqiuquiaari, Jesu sequetureeri:

—¡Quia niquiri! ¿Casaara quia saquiriojosano pueya poonijiya samaatenu juucani? ¡Pueyaso Rupaajinia, paari piriyojoshiyacujani maja samaatenu juuca pa poonijionura!

²⁵ Jesuuri nojori sequeree:

—¿Majateeri nia serojonu quiquiaari Pueyaso Rupaajinia pa supuetanaa jiyaniijia David miishanojiniji, nojuaja jaara miaajequiaari na cojiniaata, nojori jiiitaaquishacari na coseyaca? ²⁶ Cuno quishacari, supuetana Abiatar pueyacuaa serojonaa jiyaniijia quiquiaari. Davidri tiuquiquiaari Pueyaso Secojojua tiajinia. Nojuajaari Pueyasora niqutiosano panjiniji saquiaari. Cuno panri saaja Pueyaso Secojojua tia cojuanaa sasocoriguiano quiquiaari. Naajaa, Davidri na saquiaari. Na neecasequiaarijiaariuhua nata quiniaa pueyara.

²⁷ Jesuuri nojori sequequiaarijuhuaj:

—Pueyasoori samaatenu juuca shipiniquiaari pueyara. Maja cutaraari Pueyaso shipinini quiquiaari pueya, samaatenu juucara. ²⁸ Naaratej, pueyano cua quishacari mijiraa, janiyari cumaacaraca cua Quejinijini cua sequenura casaa pa miiniutianiya samaatenu juucani. Janiyacujaari samaatenu juuca camarnuni.

3

Jesu jeecasacari pueyano juaashiquia cuseetucojuara joojequetano (Mt 12.9-14; Lc 6.6-11)

¹ Jesuuri Pueyaso secojojua tiajinia tiuquiquiaariuhua na saquiriojosano pueyata. Tii quiriquiaari pueyano, cuseetucojuara joojequetano juaashiquiaraca. ² Cuniqúi quiniaa Fariseocuacaari shanacutariquiaa na niquniuria taa Jesu miiniutianiyanoj. Nojoriiri tama sequetooreejaaja:

—¿Jesuteeri sesarucujua pueyano juaashiquia jeecanutianiya samaatenu juucani?

Nojoriiri Jesuucuaa saquiriojotanu paniriquiaa, nojuaja jaara samaatenu juuca poonijiore. ³ Jesuuri jiyacari sesarucujua pueyano sequeree:

—Quia sanere. Niya quia nujuasee canaa tajinia pueya niquiara.

⁴ Na nuhuaji, Jesuuri pueya nequesotaree:

—¿Casaate samaatenu juuca miishiyani? ¿Paate maninia miyani, paate sesa miya soj? ¿Pueyanote naatanishiya, moshiyajanaa soj?

Nojoriiri sanaa niqutiariquiaa saaja, Jesu sequesacari naatej. ⁵ Jesuuri na shocuaqueya nujuatiuyano pueya niqiniijioree na juaaniutia. Nojori-icua taraajeriquiaajaariuhuj, cumajiuujiaaca nojori quiniyuuca. Majaari nojori niishiniu paniniu quiquiaari taa Pueyaso paniya pueyacua taraajeja pa quiniuriani. Jesuuri sesarucujua pueyano sequeree:

—¡Quia juaashiquia quia shiitiore!

Na juaashiquia shiitioreeri. ¡Jiyacaritij, na juaashiquiaari ritia jeequequee!

⁶ Fariseocuaca niquishacari naa Jesu miishanotej, nojoriiri tohuareetaquee na juaaniutia. Nojoriiri Herodes panijiaa pueyata pocojoquiaari ritia, taa nojori monutianiya Jesuni.

Queraatia pueya rerequeejosacari caminia casaqueyaji

⁷ Na nuhuaji, Jesuuri quiojoquiaari caminiajinia na saquiriojosano pueyata. Queraatia pueyari na nuhuajiquiaarijuhuua Galilea jiyajiniji. ⁸ Pueya niishishacari puetunu Jesu maninia miishanojinijijianaa na cumaacata,

queraatia pueyari nocua nijioquiaari na niquniuria. Nojoriiri nocua nijioquiaari puetunu jiyacajinijiniojuanaa: Judea jiyajinijinio pueya, Jerusalén tiacajinijinio pueyajuhuj, Idumea jiyajinijinio pueyanio. Nijioquiaari-jiariuhua Jordán moo taquijirajiniiji pananu muetasamaji pueya, Tiro tiacajinijinio pueyanio. Sidón tiacajinijinio pueyari nijioquiaarijiuhuj na niquniuria Jesu. ⁹ Nocuaji Jesuuri na saquiriojosano pueya sequequiaari:

—Niocua juhuacarijia bote cojuare quiria, cua tacajara pueyacuaji, maja pueya tanuujunura janiya.

¹⁰ Jesuuri jiyacari jiyanhua queraatia pueya naatanijioriquiaa. Nocuaji cusosuhuari Jesuucua riutioconetariquiaa na quianura Jesu, nojori cusonujiniiji nojori naataconuhua.

¹¹ Samaruharaca pueya jaara Jesu niqutiuhua, nojoriiri nocuara mojoquetacoquiaari. Naa nacatuquiaariiri:

—¡Quiaacuajaari Pueyaso Niyanu!

¹² Nocuaji Jesuuri nojori sequequiaari na juaaniutia, maja nojori sequenura pueya niquiara cante nojuajani.

Jesu saquiriojosacari doce pueya na pueyajinijinio, na rupaa pohuatariquiano

(Mt 10.1-4; Lc 6.12-16)

¹³ Na nuhuaji, Jesuuri tacaquiaari tuhuananuucua. Nojuajaari tiji sequequiaari cana na paniquiaaricuajani. Nocua nijioquiaariiri na jyaniquishano pueya. ¹⁴ Jesuuri doce pueya saquiriojoquiaari nata nojori quiniuria. Nojori jiyatereeri na jiyaramiquishocoriquiano, Pueyaso rupaa nojori pohuatanura. ¹⁵ Nojori niqutioree na cumaacaari, cusosuhua nojori naatanijionura, samaruhua nojori tohuatejonurajuhuj. ¹⁶ Nioori na saquiriojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. ¹⁷ Jesuuri nojori sesojoquiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niqiohua quiquiaari. ¹⁸ Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaa pueya maanujinijinio quiquiaari. ¹⁹ Quiquiaarijiariuhua Judas Iscariote, Jesu quiatequiaari mosocoriquianoni.

Judiocuaca camarucua sapojosacari, Jesu samaruhua cumaaca jiiitaa

(Mt 12.22-32; Lc 11.14-23; 12.10)

²⁰ Na nuhuaji, Jesuuri na saquiriojosano pueyata tamonu tiajinia tiuqiti- aquiaari tamonu tiacajinia. Queraatia pueyari tiuqitiaguaarijiuhua cuno tiajinia Jesuucua. Naacuajitij, majaari nojori naata miaquenu quiquiaari.

²¹ Jesu tapueyocuaca jaara niishiquiaari naa nocuajitij, nojoriiri nocua nijioquiaari na riniuucua juucua. Tama sequetoiquiaajaarijia:

—¡Jesuqui tari paatecara quirijuhuanajaj!

²² Moisés Rootasanojiniji niishitiojonaa Jerusalén tiacajiniiji nijiono pueyari saniniuujia naa sequetuquiaari Jesujiniiji:

—Samaruhua jiyaniijia Satanáscuajaari cumaaca niqutiorucuaa cuno pueyano. Cunora, samaruhua tohuatanijiya pueyajiniiji.

²³ Naaratej, Jesuuri cuno pojori sequequiaari nojori na niishiriojotenura:

—Miji, niya cua tojitiasee. ¿Pueyanoteeri na naata Satanás tohuatenu pueyanojiniiji tama Satanás cumacatajaaja? Maja na naata. ²⁴ Naajuhuj, mijiria jiya jiyaniijia jaara juayonuutaa tama na pueyatajaaja, nojuajaari maja na naata nujuatanu na paraa, jaara nocua nijioma. Nojuajaari

shocotasaanutaniya. ²⁵ Naajaariuhuj, pueyano jaara tapueyocucata juay-onuutare, majaari nojori naata jatiqúi quiniu nojori tiajinia. ²⁶ Niaari saniniuujia cua sequeree, janiyana Satanás cumaacata tohuatanijioquia samaruhua. Satanás jaara naa miiritij, cuno maara tari quiri na shaajasaa-nurajanaa.

²⁷ 'Naajuhuj, pueyano maja na naata tiuquiniu cumueca pueyano casamiriaca tiajinia, na casami na jaariuutianura, jaara coteenu na camaru morojiaquiri. Pueyano jaara coteenu na camaru morojorejaatijia, naa cutara na naata na casami jaariuutianu.

²⁸ 'Seetanujuanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocusanoori jiyanooshiyajuhuj.

²⁹ Saniniuujia, cante sesa rimiaaqueja Pueyaso Sohuanuucuarani, cuno cutaraari maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu saniitiosaanutaniya.

³⁰ Jesuuri naa nojori sequequiaaritij, pueya sequesacari, nojuajana samaruraca quijia, Pueyaso Sohuanu cumaacata na tohuatejosacari samaruhua.

Jesu nucuajiniji pohuatasano, Jesu tapueyocucajinijinio
(Mt 12.46-50; Lc 8.19-21)

³¹ Jiyacaritij, Jesu nucuuari tiuquijioquiaari, Jesu tapueyocucacanio. Majaari tiajiniaaco na tiuquitianu quiquiaari Jesuucua. Saaja carijiniacumaji tamonu pueyano sequeteeri na numootenura Jesu nojoriicua. ³² Jesu shocuaqueya cajitiuniaari Jesu sequeturee:

—Quia nucuana quia tapueyocucata jati carijiniacuma nujuatiuya. Quia pajenuyaquinia.

³³ Jesuuri saaja nojori sequeree:

—¿Cante cua nucuani, cua tapueyocucajuhuj?

³⁴ Na nuhuaji, na shocuaqueya cajitiuniaa niquinijioreeri. Sequereeri:

—Nio pueyari cua nucu, cua tapueyocucacanio. ³⁵ Cante cua Que panishano miijiani, nojuaja cutaraari cua tarajanu, cua rimiatu, cua nucuanio.

4

Miriqui pohuatasano natoojouja pueyanojiniji
(Mt 13.1-9; Lc 8.4-8)

¹ Jesuuri socua Pueyaso rupaa niishitiojonu coteequiaariuhua caminia casaqueyaji. Jyanohua queraatia pueyari rerequeejoquiaari nojori tojtianura nojuaja. Boteeri tii cuatariquiaa caminiajinia. Naacujitij, Jesuuri botejinia tacaquiaari. Tii cajishiiri, caminia casaqueyaji rerequeejono pueya na niishitiojonura tiji. ² Cuno pueya niishitiojoreeri queraatia miriqui pohuatasanota. Na niishitiojosacari pueya, Jesuuri naa sequequiaaritij:

³ —Nia tojitiare nio sequesano. Tamonu juuca, pueyano na cuhuariquiajinia natoojonucua quiaquiaari. ⁴ Na jacutasacari, nucuaco totequiaari-iri tajaaca. Shuhuari na miojoree. Majaari na moritianu quiquiaari.

⁵ Tajaacaari totequiaari sai tajiniaqueyajuhuj. Majaari cuniqui puera jiya quiniu quiquiaari na maashiniuria. Naacujitij, najuhuaana ritia moriti- aquiaariiri. ⁶ Pananu jaara jaquiaari, na catijiareeri. Maja puera nujuacaraca na quishacari, ritia sorequeeri. ⁷ Tajaacaari totequiaarijuhua riyocucata tajinia. Jiohuacacaari socua ritia maashiquiaari. Natauri tarini- tiucua quiquiaari saniniuujia. Naaratej, majaari na muetunu quirii.

⁸ Tajaacaari saniniuujia totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia.

Niquiriyatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhuaaj socua cien jajau tanajajiniji.

⁹ Jesuuri nojori sequeree:

—Cante numaaracani, cuara cua sequesano tojtiaara.

Casaarate miriqui pahuatasaanoni
(Mt 13.10-17; Lc 8.9-10)

¹⁰ Na nuhuaji, Jesu quishacari tamajaaja, na saquiriojosano doce pueyari na nequesotaquiaari, tamasaca pueyanio. Cuno pojoricuajaari Jesu shuriu-cua quiriquiaa. Nojoriiri Jesu sequeree:

—¿Casaa miriqui quia pahuatasaanu sequenu paniyani?

¹¹ Jesuuri nojori sequeree:

—Pueyasoori nia niishitiojiya jiyasohua na miiniu panishano, taa na muerasu na jitianutaniya pueyaracaanu cutarani. Tamasacara saniniuujia, canapueete Pueyaso ruuretajacani, nojoririaari miriqui pahuatashiyacujua.

¹² Naacuajitij, nojoriiri cua cumaacata cua miishano niquitiuquiaa pueyaracaanu najuhuanaj. Majaari nojori niishiniu na niquishano. Naajuhuaaj, nojori jaara Pueyaso Rupaa tojtiaare, majaari na niishiniu na tojishano. Nojori jaara niishiri, nojori mariqui noojia tacatorohuari sesa nojori miishanojiniji nojori jiyanooshaanura.

Jesu niishitiojosacari miriqui na pahuatasaanu natoojonajiniji
(Mt 13.18-23; Lc 8.11-15)

¹³ Jesuuri nojori sequequiaarijuhuaj:

—¿Majateeri nia niishiniu miriqui cua pahuatasaanu? ¿Niaatucua taa niishiriquiaa socua tamonu cua pahuatasaanoni? ¹⁴ Cua pahuatasaanu cuhuariquiajinia natoojonajinijini, nojuajaari juhua Pueyaso Rupaa pahuatana.

¹⁵ Noojiaqueya pueyari juhua nucuaco toteno jajau. Najuhuaana Pueyaso Rupaa tojijari. Na tojinu nuhuaji, Satanásri nimiaa. Nojuajaari puetunu Pueyaso Rupaaajanaa noojiajinia natasanu jaariutiaquiaa.

¹⁶ Tamasaca pueyari juhua noo jajau saniniuujia, sai tajiniaqueya jacutasanotej. Nojori jaara Pueyaso Rupaa tojiri, jiyanohua na timitiaari. ¹⁷ Cunoori juhua secaja nujuacaraca moritiano jajau, sai tajinia na moritianoocua. Majaari na rishiniu. Naajuhuaaj, cuno pueya jaara saniniuujishaare taraatia, jaara naquiya miishaarejuhuaaj Pueyaso Rupaa tojijiaa nojori quiniuucua, nojoriiri ritia Pueyasoocua tiuuniu tarinitiaja.

¹⁸ Noojiaqueya pueyari juhua noo jajau, jiohuacaca tajiniaqueya jacutasanotej. Pueyaso Rupaa tojijari.

¹⁹ Na nuhuaji, nojoriiri puera niishiriojiya taa nojori quiniutianiya maninia mijiriani. Nojoriiri sapojosaaquiaa puera na shuquiritiasacari mijiria casami. Nio jiya casamiicua jiaatiaquiaajaarihuaj. Puetunu cunorajanaa, nojoriiri Pueyaso rupaa tojtiaquiaa na numaa shama. Naacuajitij, nojoriiri juhua muetuhuo quiya.

²⁰ Noojiaqueya pueya saniniuujia, nojori cutaraari maninia tojtiaja Pueyaso Rupaa. Cuno pueyari juhua cuhuariquiajinia natau, queraatia muetujua, maninia jiyajinia natasanu. Cuno maninia nataujinijinioni, noojiaqueyari maja puera na muetunu. Tarajanuuri maninia muetuna. Naajuhuaaj, tarajanuuri jiyanohua queraatia muetujua. Naajuhuaaj, cante Pueyaso Rupaa tojijia cutarani, nojuajaari juhua maninia muetujua natau.

Pueyaso muerasuuri juhua samari
(Lc 8.16-18)

²¹ Jesuuri nojori sequereejuhuaaj:

—¿Samaritiutiiri noshitishano, conatu cariquiaco jamotasocoriquiano, maquetu cariquiacojuhuaj? Maja. Samaritiu jaara noshitishaare, morijiuucua morotashiyari, tiajiniaaco na cuhuatanura maninia. ²² Naajuhuaaj, jiyasohua nia miishanoori puetunujuanaa niishishaanutaniya. Cua pohuatasanoori juhua samaritiu, puetunu pueya jiuujiaajanaa na cuhuatanura. Naajuhuaaj, Pueyaso Rupaa jaara nioojiajinia jamosaare, juhua muetunutanitari puetunu pueya niquishocoriquianojuanaa. ²³ Niajaniya, canapueete numaa jiitiaani, nia tojitiare cua pohuatasano.

²⁴ Jesuuri naa nojori sequequiaarijuhuaj:

—Nia niishiri nia tojishano. Nia shanacutajataja, teyanota nia shanacujuquiaa nia niquitiosocoriquianocujani, Pueyasoori cunotaja niaara shanacunutaniyajuhuaaj. Naacujitij, niaa jaara capora quiriquia tamasacata, Pueyasoori socua capora quiniutianiya niaarajuhuaaj. ²⁵ Cante na rupaa tojjiani, socua na niishitiojonutanitari. Saniniuujia, canapueete na rupaa tojitiaaquiyani, secaja na niishishanoori puetunu jaariutiasaanutanijajanaa.

Miriqui pohuatasano natau moritianojiniji

²⁶ Jesuuri nojori sequequiaarijuhuaj:

—Nia niishitiojonu saniriiria taa Pueyaso muerasu supuequiaani, Pueyaso jiitiasano nojori quiniuria. Tamonu pueyanoori na cuhuariquiajinia nataquiaari jajau. Na nuhuaji, majaari na tacatenu quiquiaariuhua pueyaracaanu na natasano na niquiniuria. ²⁷ Cuno pueyanoori na natanu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niquishacarijuhuaj. Tamonu juuca, na camaru tacatesacariuhua na natasano na niquiniuria, tariucua puereetucuari quiquiaari. Majaari na camaru niishiniu quiquiaari taa na moritiareeni. ²⁸ Jiyari tamajaaja moritianijia natau. Coteenu moritiaari na jiyona. Na nuhuaji, na jajau coori supueya. Na nuhuaji, na jajauri querasapijiaacara quimiaa na noshiniuria. ²⁹ Na natau jaara noshimia, na senoonaaari na senoojua na racatasocoriquiano. Pueyaso muerasuuri naa miishaanutaniyajuhuaaj.

Miriqui pohuatasano mostaza jajaujiniji

(Mt 13.31-32; Lc 13.18-19)

³⁰ Jesuuri socua sequequiaari:

—¿Juhua casaa niquishanote Pueyaso cumaacani? ¿Casaatate pa naata na saniniuujiniuni, taa Pueyaso Rupaa poonijiya pueya jiuujiajiniani? Quiar-ijia nia pohuatareeraj. ³¹ Pueyaso Rupaari pueya jiuujiajinia quiaa juhua mostaza jajau. Mostaza jajauri jyanohua socua shiitianiyojua puetunu tamasaca jajaujinijijanaa, majaari puera maatia na niquishaanu. Pueyaso Rupaari naajuhua pueya jiuujiajinia, nocua nojori tiuushacari. ³² Mostaza jajau jaara natasaare, maashiyari socua puereetucara tamasaca nataujiniji. Na cashacucuaari maashiya puereetucucua. Shuhuari na cashacucua cariquiaco nuuatujua shinishiqui.

Pueyaso Rupaari pueyano jiuujiajinia naa cumaacaracajuhuaaj, na jataniniuria na tojjia, maninia miijia na quiniuria.

Jesu niishitiojosacari pueya saa na miriqui pohuatasannotaja

(Mt 13.34-35)

³³ Jesuuri naa queraatia miriqui pohuatasannota niishitiojoquiaari Pueyaso rupaa saaja pueya niishishano casaata. Majaari socua jiyajeneta casaa na pohuatanu quiquiaari. ³⁴ Naacujitij, nojuaja jaara casaa niishitiojonu paniquiaari pueya niquiara, nojuajaari puetunujuanaa naa

niishitiojoquiaari miriqui na pohuatasanota. Tamajaaja nojori quishacari saniniujuia, Jesuuri na saquiriojosano pueya niishitiojoquiaari maatia, casaa miriqui na pohuatasano sequenu paniriquiaani.

Jesu pueyajetesacari paratu, mohuaca cajiniuucuanunio

(Mt 8.23-27; Lc 8.22-25)

³⁵ Cuno juuca jaara niniquiaari, Jesuuri na saquiriojosano pueya sequerquiaari:

—Caminia taquijiria pa quiaare.

³⁶ Cuniqijia pueya tiujiatiuyareeri, nojori quianura caminia taquijiria. Na pueyari Jesuta quiojiyaree cuno botejiniaja, tee nojuaja quiriquiaacua-jani. Jesu quiasacari caminia taquijiria, tamasaca boteeri nata jaate-quetariquiaajuhuaaj. ³⁷ Maja puera na quenaacoyaquishacarijia, maru-uriparatusa canashiyaquiji jiyanoahua niqiaari nojoriicua nojori niuuti-asacari. Paratuuri jiyanoahua cajiniuucuatequiaari mohuaca nojori bote-jiniacumara. Nocuaji na boteeri tari quera tiuquitiariquiaa mohuacata. ³⁸ Jesuuri jiyacari bote pajamaji maqueriquiaa juhuajaniya. Na nacaacuaji mataja caco maqueriquiaari. Na pueya niucuajatusacari nojuaja, Jesu sequetureeri:

—iNiishitiojonanaa!, ¿majateeri quia puerenuujua paa tari tiuquitiaareeni?

³⁹ Jesuuri sanemaa. Paratu sequereeri, caminianio:

—iQuia suraajere! iTariucuaja!

Paratuuri tajimiohua. Caminiaari pootia maquee. ⁴⁰ Jesuuri na saquirio-josano pueya sequereeri:

—¿Casaara nia puereya puerani? ¿Niaateeri Pueyasooqua tiuyashijiaca quiyajaaruahuaaj?

⁴¹ Nojoriiri jiyanoahua shiriqutiurii. Tama nojorijiaarijia sequetooquiaari:

—¿Cantejaaranojoni? ¡Paratu, caminiaari na tojirii!

5

Gerasa jiyajinijinio samaruahuaraca pueyanojiniji pohuatasano

(Mt 8.28-34; Lc 8.26-39)

¹ Na nuhuaji, nojoriiri caminia taquijiria tiuquijioquiaari, Gerasa jiyajinia. ² Jesu tacasacari botejiniji, nocua niqiaariiri tamonu pueyano raacajiniji, macunucua nucuhua paaquiosaquiji. Cuno pueyanoori samaru-raca quiquiaari. ³ Raacajinia quijia quiquiaariiri. Majaari na naata moronu quishaaquiaari quenaaja cumayocua shipinishano casaata. ⁴ Pueyari juucua na morojouja, na cashacucua, na juaashiquiacanio. Saaja na turojotajaari. Majaari quenaaja na nujuataja pueyano quiniu quijia. ⁵ Pueyaracaanu tuhuananuhuacua rucuanajoquiaariiri, raacajinianio. Na rucuanajosacari sariyacojojuuari, juuca, niucuanio. Tama na cuaqueya-jaaja piqijia saitiaari. ⁶ Nojuaja jaara Jesu niquiquiaari tucuaaanuji, nocua netequiaariiri. Jesu cariquimiaaji mojoquetaseeri. ⁷ Jesuucua naca-reeri:

—¿Casaacua miji quia niyani, Jesunaa, jiyocuaaanu Quijia Pueyaso Niya-nunaa? ¡Quia secojiyanijia maja naquiya quia miiniuria janiya!

⁸ Samaruahuaraca pueyanoori naa sequereeri Jesutej, tari Jesu sequenuucua samaru nojuajiniji na tohuatanura.

⁹ Jesuuri na nequesotaree:

—¿Taa sesanaacatequia?

Na riucaareeri:

—Canaa jiyanoahua queraatiani, cunora cua sesa “Queraatia”.

¹⁰ Cuno samaruuri jiyano hua Jesu secoriquiaa maja nojori na taanu-unura cuno jiyajiniji. ¹¹ Cushiyari jiyacari cateca naataja miaquenuuriquiaa tuhananucari. Jiyano hua queraatia cushiyari quiriquiaa. ¹² Samaruhuari Jesu secorejee naatej:

—¡Canaa quia jiyarore canaa tiuquitianura cuno cushiyacua!

¹³ Jesuuri samaruhua jiyaroree. Samaruhuari pueyanojiniji tohuareetaquee. Cushiyacua tiuquitia seeri. Dos mil cushiya naasucuaari quiriquiaa. Cuno cushiyari cocuategequiaari, samaruhuaraca nojori quiniuucua. Taconijini totese caminiajiniari. Puetunujuanaari tii shushiniuucuaari.

¹⁴ Cushiya cojuanaari jiyacari netecuaturuhua na shiriqiniutia. Na tiacajinia pueya poojotanuuhua nojori niqishanoori, cuhuariquiacajinia quinia pueyano. Nocuaji pueyari nijioquiaari nojori niqiniuria casaate quiquiaarini. ¹⁵ Cuno pueya jaara tiuquijioquiaari Jesu quishaqui, cuno tarija samaruhuaraca quija pueyano niqitiushiiri panaatia cajiyano, toqueraca. Naa nojori niqishacari nojuajatej, pueyari pueretuquiaari. ¹⁶ Jesu miishano niqitiuniaari cuno pueya pohuataquiaari taa samaruhuaraca pueyano miishaareeni, mariyata cushiyajinijinio. ¹⁷ Cunora, cuno pueyari Jesu secoteree na quianuhua cuniquiji, nojori jiyajiniji.

¹⁸ Jesu jaara tacaquiaariuhua na botejina, cuno tarija samaruhuaraca quija pueyanoori nata quianu paniquiaari juucua. ¹⁹ Majaari Jesu paniniu quiquiaari. Na sequeeree saajaari:

—Quia quiaarohua quia tijinia quia pueyacua. Quia pohuatasuhua nojori taa Pueyaso miirii quiajaniani, quiocua na taraajenuucua.

²⁰ Pueyanoori quiaarohua. Nojuajaari pohuatanu cotegequiaari cuno na jiya diez tiacajinia taa Jesu miiquiaari maninia nojuajani. Puetunu pueyanaari jiuujiatequiaari nojori tojishacari nojuaja. Cuno diez tiaca sesa quiquiaari “Decápolis”.

Jairo niyatujiniji pohuatasano, Jesu toque quiana maajijinijijuhua
(Mt 9.18-26; Lc 8.40-56)

²¹ Jesu jaara niuutiaquiaariuhua botejina caminia taquijiriohua, queraatia pueyari nocua tiuquijioquiaari na quishaqui. ²² Jesu quishacarijia caminia casaqueyaji, nocua tiuquiquiaariiri tamonu pueyano, Pueyaso sec-ojua tia jiyaniijia. Na sesa quiquiaari Jairo. Jaara Jesu niqiquiaari, na cariquimijaji mojoquetaseeri. ²³ Naa Jesu secorejee jiyano huari:

—¡Quiyatu quera cusoya! ¡Miji, quia juaashiquia nocua quia niaquee na naatanuhua!

²⁴ Jesuuri jiyacari nata quiaaree, na saquiriojosano pueyano. Puera jiyano hua queraatia pueyari na nuhaujiriquiaa. Jesu tanuujuturiquiaari.

²⁵ Cuno pueya tajinia quiri quiaajaariuhua tamonu cusosu maaji. Doce mar-ijiaari tari na shoconujuquiaari pueyaracaanu na naatesacari. ²⁶ Queraatia naarajonaari nareja naquiya na miiquiaari. Socua na jiyacatojioquiaari saajaari. Najuhua na cumaneeca puecaquiaariiri na naarajosaanura juucua. ²⁷ Cuno maaji jaara Jesujiniji tojiquiaari, na nijiniji na nuhaujiquiaari jiyasohuari. Na tucuaque toque quiaasee pueya tajiniaari. ²⁸ Cuno maajiri tama sequequiaarijiaaja: “Janiya jaara quenaaja na toque quiareni, janiyari naatanutaniuhua!”

²⁹ Naacuajitij, na quiasacari Jesu toque, na nanacaari rita curetaquee. Jiyacari na niishi quiiri. Tama sequequiaarijiaaja: “¡Cua cusonu tari tajiyatema!” ³⁰ Jesuuri jiyacari niishi quiiri nojuaja na cumacata cusosu naatanirii. Cunora, nojuajaari tacarecuaree na niqiniuria pueya. Pueya nequesotareeri:

—¿Cante cua toque quiareni?

³¹ Na saquiriojosano pueyari na sequeree:

—Quiaacuajaari queraatia pueya niquiya quia tanuujiyano. Quiaari najuhuaana nequesofaariquihua saajuhua: “¿Cante cua quiareeni?”

³² Jesuuri saaja na shocuaqueya niqunijioriquiaa, na niquniuria cante na toque quiareeni. ³³ Maajiiri jiyacari tetecariquiaa na puerenuta. Jesu cariquimijai mojoquetasee ritiaari. Nojuajaari niishiquiaari Jesu cumaaca na naataniriohua. Cunora, Jesu sequeree puetunu seetanujuanaari. ³⁴ Na nuhuaji, Jesuuri na sequeree:

—Sanaunaa, cucua quia tiuuniucua, quiaacuaja tari quia cusonujiniji naatarohua. Juhuaianiya quia quiaarohua. Quia cusonucua tari tajiyate-mohua quiocuaji.

³⁵ Jesuuri cuno maajiicua pocuariquiaajaa pueya tiuquiiiosacari Jairo tiajiniji. Cuno pojoriiri maaji samiriu que sequetusee:

—¡Quia niyatu tari cusoquee! Maja najuhuaana Niishitiojona riniu quia tiajiniaara.

³⁶ Jesuuri nojori sequesano tojiriri. Naaratej, maaji samiriu que sequereeri:

—¡Maja puerenu! ¡Cucua quia tiuuri saaja!

³⁷ Majaari Jesu paniniu quiquiaari tamasaca quiojonura nata. Saaja nata quiojoquiaari cutaraari Pedro, Santiago, Santiago tarajanu Juanio. ³⁸ Nojori jaara tiuquiiioquiaari Jairo tiajinia, pueya niquishii nujuquetiyanoori, sariyocuetiyanonio. ³⁹ Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

⁴⁰ Pueyari saaja Jesu saroojotaquiaari nojuaja na rerequetenuta, naa nojori na sequenucuatej. Jesuuri cunora nojori tohuatanijioree tiajiniaacoji. Jesuuri macucua sohuacamara tiuquinitiaquiaari Jairo necocuata, tama na pueyajaajanio, cuniqui tii nata quituriquiaani. ⁴¹ Macu juaashiquiajiniji quiaaseeri. Na sequereeri:

—Talita, cumi.

Nioori pueyano rupaajinia sequeya: “¡Maaji samiriuniaa, quia sequeyani-jia, quia sanere!”

⁴² Jiyacaritij, maaji samiriuri ritia sanequee. Juhucatecara ru-cuanereeri. Doce marijaari tari cuno maaji samiriu shocojoquiaari na queyata na quishacari. Pueya niquishacari naa Jesu miishanotej, nojoriiri jiyanhua jiuujiatequiaari. ⁴³ Jesuuri jiyanhua nojori rootaree maja nojori pohuatanura pueya niquiara na miishano. Saaja sequeree cutaraari maaji samiriu cuaara mianuutesaaria.

6

Jesu quishacari Nazaret tiacajinia

(Mt 13.53-58; Lc 4.16-30)

¹ Jesuuri cuniquiji quiaquiaariuhua tama na jiyajiniohuajaaja. Na saquiriojosano pueyari nata quiojoquiaarijuhuaj. ² Jaara quiquiaari samaatenu juuca, Jesuuri tii niishitiojonu coteequiaari Pueyaso secojojuia tiajinia. Queraatia pueyari na tojtiaariquiaa. Nojoriiri jiuujiatequiaari. Tamajaaja seque-toquiaariiri:

—¿Tee nio pueyano niishitiojosaquiaari puetunu niojuanaani? ¿Teje na masecanu puetunu na niishishanojuanaani, cuno cumaacanio, jiyajeneta miishano na miiniuriani? ³ Nojuacuajaari suruhuatujiniji casaa shipinijona tiajiniaacora, niya pa tiacajiniani. Nojuajaari pa tiacajinia quinia

María niyanu. Niya quiyajaariuhua na tapueyocuaca: Santiago, José, Judas, Simónnio. Na rimiatuhuari niya quiyajuhua pa tiacajiniani.

Cunora, majaari nojori tojtianu paniniu quiquiaari Jesu. ⁴ Naaratej, Jesuuri nojori sequere:

—Pueyari tiquiyocua Pueyaso sequenu panishano caminiujiunia tojiniu paniquiaa cutara. Saaja tama na tiacajinijinio pueya cutaraari maja na tojitiuniu paniniu, na jiyasojinijinio supueno pueyajuhua, tama na tiajinia quiniaajaajanio.

⁵ Naacuaajitij, nocua nojori tiuyaquiniuucua, majaari na naata na cumaacata na miiniu quiquiaari. Saaja secaja cusosuhuacua niojoquiaari na juaashiquiaari, nojori na naatanijionura. ⁶ Jesuuri jiuujiatequiaari nojori tiuyaquishacari nocua. Na nuhuaji, Jesuuri rucanejoquiaari pueya na niishifiojonura, queraatia shiitianiyojua tiacajinia catecaja na tiaca shocua.

Jesu jiyaramiquishacari na saquiriojosano pueya Pueyaso rupaa pohuata-nura

(Mt 10.5-15; Lc 9.1-6)

⁷ Na nuhuaji, Jesuuri na saquiriojosano doce pueya sequequiaari nocua nojori niniuria. Nojori jiyaramiquiniu coteereeri, nojori quiojonura caapiqui, caapiqui, Pueyaso rupaa nojori pohuatanura. Nojori niqutioree na cumaacari samaruhua nojori tohuatanijionura pueyajiniji. ⁸ Nojori sequereeri maja nojori panura nojori panishano, saaja nojori miojotu cutara. Nojori sequereajaariuhua, maja nojori panura caashoque, coseyaca, cumaneecanio. ⁹ Nojori sequereeri saaja nojori cushiniuria na sapatu cutara, maja socua toque nojori panura na cushishocoriquiano. ¹⁰ Nojori sequereajaariuhua:

—Niaa jaara tiuquishiiquia tamonu tiajinia, cuniquijia nia jiyojetare, niaa jaara cuniquiji quiaarejaatijia. ¹¹ Pueya jaara nia tiuquinitianu paniaquiri na tiajinia, nia pohuatasano nojori tojiniu paniaquishacarijiuhua, niocua cuniquiji quiaare. Niocua nia niohuacaacuaji jiya joocua piitiare nojori niqiyara, nojori niishiniuria Pueyasoori nojori saniitionutaniya, na rupaa tojiyashijanucua nojori quiniuucua.

¹² Na nuhuaji, Jesu jiyaramiquishano pueyari quiojoquiaari. Nojori-iri Pueyaso rupaa pohuatanuuquiaari pueya tacatonuhuara nojori jiuujia Pueyasocua. ¹³ Nojoriiri queraatia samaruhua tohuatanijioquiaari. Naajuhua, nojoriiri cusosuhuacua tarooquiaari naana jajau shiyocua, nojori naatanijosacari queraatia pueya.

Tiuquinijiona Juan mosacari

(Mt 14.1-12; Lc 9.7-9)

¹⁴ Jesu miishanojinijiiri caminiujiushaaquiaari puetunu cuno jiyajinijanaa. Naacuaajitij, Galilea jiya jiyaniijia Herodesri Jesujiniji pohuatasaaquiaarijiuhua. Herodesri cunora sequequiaari:

—¡Tiuquinijiona Juanqui samiitiarohuacuaa, cua mosano pueyanotej! Naaratej, cuno Jesuuri cuno cumaacaraca, jiyajeneta casaa na miiniuria na cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyanohua cumaacaraca Jesu quiniuucua. ¹⁵ Tamasaca pueyari Jesujiniji sequequiaari tamaatia saniniujia, nojori jiyajenesacarijiuhua. Naa sequetuquiaariiri:

—¡Nojuacuajaari tariucuaaanu pueyara Pueyaso sequesano caminiujiunia Elias!

Tamasaca pueyari saniniujia naa sequequiaari, nojori jiyajenesacarijiuhua:

—Nojuacuajaari quiarijia nio pa quishacari Pueyaso sequesano caminiu-jiunia pajaniyara, juhua tariucuaaanu pueyara Pueyaso sequesano camini-jiuniaajuhuj.

¹⁶ Herodes jaara pueya sequesano tojiqiaari, nojuajaari saa sequequiaar-ijia:

—Nojuacuaja Tiuquinijiona Juan, cana cua nacataniquianucujani. Sami-
tiarohuacuaaquiiri.

¹⁷ Tiuquinijiona Juan moyaquishacarijia, nojuajaari Herodías rupaajinia nujuatesaaquiaari. Cuno maaji Herodíasni, nojuajaari Herodes tarajanu Felipe niqiocua quiqiaari coteenu. Herodesri tarajanu Felipe niqiocua jaariutiaquiaari necocuara. ¹⁸ Nocuaji, Tiuquinijiona Juanri Herodes naca-sujujua. Naa na sequejaari:

—¡Pueyasora, majaari maninia quia jitianura quia tarajanu niqiocua!

¹⁹ Cunora, cuno maaji Herodíasri maja na niqiniu paniniu quijia Tiuquinijiona Juan. Na monu panijiaari. Majaari na naata quiqiaari saaja. ²⁰ Herodesri Tiuquinijiona Juan puereja. Nojuajaari niishiqiaari Tiuquinijiona Juanri maninia pueyano, Pueyaso tojjia pueyano, maja sesa miijia. Naaratej, Herodesri maninia na cojuateja nujuatejojuajinia. Ma-jaari na shanacunu quiqiaari sesa na miishaanura. Herodesri Tiuquini-jiona Juan pohuatasano tojinu maniniucujaja. Nojuajaari saaja noo-
jia niqijijoteja quiqiaari. Majaari na niishiniu quijia taa na miiniu-
tianiyan. ²¹ Saniniuujia, cuno maaji Herodíasri pueyaracaanu niishiri-
ojoriquiaa, Tiuquinijiona Juan na motenura. Jiyacaritij, namitia nera,
Herodes rasaanu juuca quiqiaari. Cuno juuca, jiyaniijia Herodesri quer-
aatia pueyata queranacuree. Na queranacunura, nojuajaari Galilea jiyajini-
jino jiyaniijianucua masuquiaari, tama na soldadohua jiyaniijianucujaa-
jano. ²² Jiyacaritij, Herodías niyatuuiri tiuquiquiaari queranacusaqui, ti
na nianjunura puetunu pueya niquiarajanaa. Herodesri niyacoo nianu-
juna shuquiritiaquiaari jiyanohua. Nata miaquenaa pueyari jiyanohua na
shuquiritiaquiaarijuhuaj. Naaratej, jiyaniijia Herodesri niyacoo sequeree:

—Cua masere quia panishano. Janiyacua quia niqitioereni.

²³ Herodesri socua puetunu pueya niquiarajanaa na sequerohuacuhuj:

—¡Seetanujuanaa quia sequeyanijia, maja cua sapojonu! Janiyari quia
niqitionutaniya quia masanonni. Quiaa jaara cua masere cua jitianano
cainiocua, naajaa, janiyari quia niqitionutaniyan.

²⁴ Niyacoori tohuataquee na nucua Herodías na nequesotanura. Na
sequeeeri:

—Cua nucuanaa, ¿casaa cua masenutaniya cua quenuni?

Na nucuuari na sequeree:

—¡Quia masere Tiuquinijiona Juan naca!

²⁵ Cuno niyacoori ritia tiuquiquihua jiyaniijia Herodes quishaqui. Na
sequeeeri:

—¡Quiarijia cua niqitioere Tiuquinijiona Juan naca miacojuajinia!

²⁶ Naa jiyaniijia Herodes tojshacaritij, jiyanohua taraajequeeri. Naajaa,
seetanujuanaa na sequenuucua na masusano pueya niqiara, majaari
tari na naata ruuretanu quiqiaari cuno niyacoo masesano. ²⁷ Naaratej,
jiyaniijiaari ritia jiyaroree na soldado, Juan naca na niqitionura cuno
niyacoo. ²⁸ Soldadoori quiaaree nujuatejojuajinia. Juan nacataseeri. Na
naca patamohua miacojuajiniaari. Soldadoori niyacoo na niqitiosuhua.
Nojuajaari na nucua na niqitiose saniniuujia.

²⁹ Tiuquinijiona Juan pueya jaara na niishiqiaari, na maanu patuquiaari-
iri, na jamotusocoriquiano.

Jesu mianuutesacari cinco mil pueya
(Mt 14.13-21; Lc 9.10-17; Jn 6.1-14)

³⁰ Jesu jiyaramiquishano pueyari tiuquiiioquiaariuhua Jesuucua nojori rucuanenon nuhuaji Pueyaso rupaa nojori pohuatanura. Nojoriiri Jesu pohuataquiaari puetunu nojori miitiushanojuanaa, nojori niishitiojosano-jinijinio. ³¹ Na nuhuaji, Jesuuri nojori sequeree:

—Miji, pueya quiyaquishaqui pa quiaare tamaqui, tii pa samaatenura rupaquijia quenaaja.

Jiyanohua queraatia pueyari pueyaracaanu nojoriicua nijioriquiaa. Tamasacaari quiojoriquihuacuaa. Tamasacaari saniniuujia shusha tiuquiiijioriquiaacujua. Naaratej, majaari jeya nojori quiniu quiquiaari na miaquenura quenaaja. ³² Jiyacaritij, Jesuuri saaja na jiyaramiquishano pueyata quiaquiaari botejina, pueya quiyaquishaqui. ³³ Queraatia pueyari saaja nojori niqutiurii quiaano. Cuno pojoriiri Jesu niishitiquiaari. Naaratej, puetunu caminia shuriuquioco tiacajinijijianaa pueyari netecuatuquiaari. Nojoriiri Jesuucuaaji cutesee. ³⁴ Jesu rosesacari botejiniji, saaja queraatia pueya niquriiri. Nojori na niquishacari, cuno pojoriicua taraajequiaariiri. Nojoriiri juhua cojuanaaju borregohua quiriqiaa. Naaratej, Jesuuri nojori niishitiojonu coteeree queraatia casaa Pueyasojiniji. ³⁵ Jaara quiquiaari tari tenacari, na saquiriojosano pueyari nocua nijioquiaari. Na sequetuseeri:

—Tari tenacari. Paa tiajyaqui quiyani. ³⁶ Pueya quia sequere, nojori cuara quiojora cateca naataja tiacajinia, na miaquesocoriquiano nojori masenura ti.

³⁷ Jesuuri nojori riuquaree saaja:

—Niaa mariqui nojori miaquetereja saniya.

Nojoriiri na sequeree:

—¿Quiaateeri paniya queraatia pan masenuucua canaa quianura puetunu cuno pojoririjanaa? ¡Pa mianuutenura nojori, panishiyari dosciento cumaneeca! Majaari pa jiitianu.

³⁸ Jesuuri nojori nequesotaree:

—¿Taa pan nia jiitiaani? Nia niquishiitioj.

Nojori jaara niishiquiaari taa pante quiyani, na sequetusuhuari:

—Cinco pan quiya, caapiqui sapitiaajanio.

³⁹ Jesuuri jiyacari na pueya sequeree nojori cajitijionura pueya jiyasocua-jinia, na mianuutesocoriquiano. ⁴⁰ Pueyari cajituriu cien, tamocora cincuenta, tamaqui socua cien, camiria cincuenta. Pueyari naa queraatia maapuera raquiriojotasaaree nojori mianuutesaanura. ⁴¹ Jesuuri cuno pan pataree, sapitiaajanio. Na nuhuaji, jiyocuacaanu maureeri Pueyaso na secojonura nocuara. Na nuhuaji pan neecasequiaari na saquirio-josano pueyaraari, nojori serotasocoriquiano pueya. Cuno caapiqui sapitiaaja shiquioreerejeaariuhua puetunu pueyarajanaa. ⁴² Puetunu pueya-janaari maninia miaquenuquiaari. Maninia tooquiorejeaariuhuj. ⁴³ Na nuhuaji, doce canaasatuuri mishinijiosaaquiaari pan raacuata, sapitiaaja raquiquiatanio. ⁴⁴ Cinco mil pueyari cuno panjiniji miaquenuuna quiquiaari.

Mohuaca caco Jesu rucuanenujiniji pohuatasano
(Mt 14.22-27; Jn 6.16-21)

⁴⁵ Nio nuhuaji, Jesuuri na saquiriojosano pueya tacanitiaquiaari bote-jinia, nojori puetanura nojuaja caminia taquijiria Betsaida tiacajiniara. Jiyacaritij, Jesuuri pueya sequeriquiaa nojori quiojonuhuara na tiacajin-
iohua. ⁴⁶ Pueya jaara tari quiojoquiaariuhua, Jesuuri tuhananuucua

tacaquiaari tii na secojonura na Que Pueyaso. ⁴⁷ Jaara niniquiaari, boteeri tari caminia jiuujiajinia jaaretariquiaa. Jesuuri juhuanojuaja na jateesacui quiriquiaajaa. ⁴⁸ Jesuuri nojori niqiquiaari najuhuaana juaarioconuyano. Majaari nojori naata jaaretanu quiriquiaa, puera paratu piyarojosacari nojoricuara. Quera juhuaquenu panishacari, Jesuuri nojori rupusee. Mohuaca caco canujuriquiaari. Quera nojori tajiriquiaari. ⁴⁹ Nojori jaara na niqituuquiaari mohuaca caco canujiyano, nojoriiri na jiyanituuquiaari samaru. Nocuaji sariyocatureeri. ⁵⁰ Puetunu nojorijianaari na niqituriiri. Shiriiqitiuriiri. Jesuuri ritia pocuaree. Nojori sequereeri:

—¿Casaara nia puereyani? ¡Nioojia nia cumaquiri! ¡Maja pueretunu! Janiy-acuajanijia.

⁵¹ Botejinia tacasee nojoriicuaari. Paratuuri jiyacari pueyajequee. Nojoriiri na shootariquiaa tacuriitia, jyanohua na jiuujiatenuta. ⁵² Nojoriiri juhuanojuaja maja na niishiniu quiquiaari Jesu miishano, queraatiara na jiyatesacari pan, pueya miaquesocoriquiano. Nojori jiuujiacaari juhua ninishiqui quiquiaarijia.

Jesu naatanijosacari cusosuhua Genesaret jiyajinia
(Mt 14.34-36)

⁵³ Jesuuri na pueyata caminia niuutiaquiaari. Tiuquiiioseeri Genesaret jiyajinia. Nojoriiri tii morotasee na bote. ⁵⁴ Nojori jaara tohuareetaquiaari botejiniji, cuniquijinio pueyari ritia Jesu niishiquiaari. ⁵⁵ Pueyari jiyacari netecuatuuquiaari, Jesujiniji nojori pohuatanura puetunu cuno jiyajinia-janaa. Cusosuhuari juhuaacatecara patootasaaquiaari na matucujinia tee Jesu quiriquiaa na rucuanijosacari nojori jiyajiniacuajani. ⁵⁶ Tiquiyocua Jesu rucuanijosacari, cusosuhuari nocuaji niojotasaaquiaari nucuaco, tuhuaqui tiacajinia, queraatia shiitianiyojua tiacajiniajuhuaj, cuhariiquia-cajinianio. Pueyari Jesu secojoree cusosuhua na quietenura quenaaja na toque casaca. Canapuate na toque quiaquiaarini, puetunu nojorijianaari na cusonujiniji naatacoquiaariuhua.

7

Casaate sesoriquiara pa jiyateja Pueyasorani
(Mt 15.1-20)

¹ Jesuucua catecanoquiaariiri Fariseocuaca, Moisés Rootasanojiniji niishitiojonaanio, canapuate Jerusalén tiacajiniji nijioquiaaricuajani. ² Cuno pojori quishacari tii, nojoriiri noojiaqueya Jesu pueyajinijinio niqiquiaari shuquitiojua miaqueyano. Nojoriiri jiyanjia, nojori rucuanijosacari sesa miijiaa pueya tajinia, sesa nojori quiniu na naata nojoriicua pacunu. Nojoriiri cunora shuquitianu jitiqiquiaari, nojori jyanishacari nojori jiuujia naasucua curuushiniutianiya, shuquitiojua nojori miaquesacari. Naaratej, cuno pueyari Jesu pueya pocuanu coteequiaari. ³ Cuno Fariseocuaca, puetunu narta Judiocuacajanaanio, nojoriiri maja na cartenu quijia tariucuacaanu nojori supuetanaa niishitiojosano. Naaratej, majaari nojori miaquenu quijia shuquitio. ⁴ Naacuajitij, nojori jaara miaquesano niqitiojosajiji tacatequiohua, majaari nojori miaquenu shuquitiojua. Socua queraatia quiyari cuno pojori niishishano. Naacuajitij, nojoriiri jyaniquiaa, sesa nojori quiyaquiniucujaji Pueyaso niquiara, nojori cuara na ratujua jeequejooa, pataco, coshi, na maquetucuanio. ⁵ Naaratej, Fariseocuaca, Moisés Rootasanojiniji niishitiojonaanio, nojoriiri Jesu nequestoquiaari:

—¿Casaara quia pueya tojtiaaquia pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

⁶ Jesuuri cuno pojori riucaaree:

—¡Niaari sapuenu juhua maninia pueya niquishano! ¡Niaacujaari seetanu juanaa sesa miijiaca! Pueyaso sequesano caminiujunia Isaiasri maninia sequequiaari nijaniyajinijicuaa, naa na naajiotasacari Pueyaso sequesano: “Nio pueyari saaja na rupaata shuquiritiaa janiya. Nojori jiuujiaari saniniuuja tucuacaanu quiya janiyajiniji. ⁷ Nojori miishano quiriani, cunoori najuhuanaj. Naa nojori miishanoni, majaari na shuquiritiniu janiya. Nojori niishitiojosanoni, cunoori tama pueya niishitiojosanojuaaaja, maja cua sequesano”.

⁸ Niaari cua pueya pocuariquiaa. ¿Niajaniyariuhujaj? ¿Casaara Pueyaso sequesano nia tojiyaquiquiaanijia? Niaacujaari Pueyaso sequesano tojiyaquiya, tama nia supuetanaa niishishanojuaaaja nia miiniuria najuhuanaj.

⁹ Jesuuri socua naa sequequiaari cuno pojoritij:

—Tama nia miiniu jiitishanoocua nia miiniurijaaja, ¡niaari Pueyaso sequesano shocortaa saaja! ¹⁰ Moisés cuajaari naa rootaquiaari: “Maninia quia miiri quia que, quia nucuanio. Majaari nojori rerequetenu. Cante na que, na nucua sesacajani, cuno pueyano cuara mosaaria”. ¹¹ Niaari sequeya saniniuuja, maniniacuaja, pueyano jaara na que, na nucua sequere: “Maja cua naata naacutanu nijaniya cua casamitia. Janiya tari Pueyasora jiyateree puetunu cua jiitiasanojuanaani”. ¹² Niaari sequequiaajuhujaj, pueyano jaara naa sequeretej, maniniacuaja maja na naacutanura na que, na nucuanio. ¹³ Naacuajitij, niaari Pueyaso sequesano shocortaa saaja, tama nia niishishanojuaaaja nia miiniuria najuhuanaj. Cuno nia niishishanocujaari saaja nia supuetanaajiniji caminiujishano. Niaari socua queraatia casaa miiquiaa juhua cunojuhuaj.

¹⁴ Naa na nacasunu nuhuaji cuno pojoritij, Jesuuri pueya rerejoterohua na shocua. Nojori sequereeri:

—Cua tojitiare puetunu nijaniyajanaa, maninia nia niishiniuria. ¹⁵ Casaa pa miaqueyani, Pueyasora naajaa. Cunoori maja na naata pueyano jiyatenu sesa miijiara. Poojiajania pa niishiriojosano cutaraari sesara pa jiyateya Pueyasora. ¹⁶ Cante numaaracani, nojuaja cuara tojitiaara cua sequesano.

¹⁷ Jesu jaara tiujiaquiaari cuno pueya, tiajiniaco tiuquiyarohuari. Na saquiriojosano pueyari tii na nequesotaree pueya na niishitiojosanojiniji. ¹⁸ Jesuuri nojori sequeree:

—¿Niaateeri cua sequesano niishiyaquiyajuhujaj? ¿Majateeri nia niishiniu? Puetunu pa jiniacuma tiuquijajanaani, cunoori maja na jiyatenu sesa miijiara pajaniya. ¹⁹ Pa miasanoni, majaari na tiuquiniu poojiajania, saaja pa seecojinia mishiya cutaraari. Na nuhuaji pocoma fajiyari pa marecuhuacuma.

Nio sequesanota, pueya niishitiojoriquiaari, puetunu miaquesanojuanaari maniniacuaja pa miaquesocoriquiano. Maja cutaraari na naata na jiyatenu pajaniya juhua curuutuucara Pueyasora. ²⁰ Jesuuri sequereejuhujaj:

—Pueyano niishiriojosano sesa noojiajiniani, cuno cutaraari sesara na jiyatequiaa. ²¹ Pueyano jiuujiajiniji supueya cutaraari sesa niishiriojosano, sesa na miiniuria. Naacuajitij, pueyanoori na camishoo maajipohua numuetucujua, seya numuetucujajuhujaj. Tamonu pueyano casami nohuasejoquiaari. Pueya moquiaajaariuhujaj. ²² Narta pueyano niquiocua numuetucujuaari. Tamonu pueyano casamiicua jiaatiaquiaari. Jiyanohua sesa miiquiaari. Cuaracashijonu niishiyari. Tama na cuaqueyajaaja shuquiritiquiaari na miiniu jiitishanota. Narta pueyano miananajoquiaari. Tamonuucuaa tonujuquiaari. Naajuhujaj, saaja tama na cuaqueyajaaja

shuquiritiaja quiquiaari. Juhujaniya sesa miiquiaajaariuhuj, moseeca na quiniucua. ²³ Puetunu nio sesa miishanojuanaari pueya jiuujiajiniji supuequiaa. Cuno cutaraari sesa quijiara pueya jiyateja Pueyaso niquiara.

Taatu tiuushacari Jesuucua
(Mt 15.21-28)

²⁴ Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajiniaari. Majaari na paniniu quiquiaari pueya niishiniuria nojuajiniji, tee na quiyani. Naajaa, majaari na naata jamaaniu quiriquiaa. ²⁵ Tamonu maajiiri ritia Jesujiniji niishiquiaari. Neyatuuri samaruraca quiriquiaa. Naaratej, maajiiri Jesuucua niquiara. Na cariquimiaji mojqetaseeri. ²⁶ Cuno maajiiri Sirofenicia jiyajinijinio taatu quiija. Jesu secjoseeri samaru na tohuataniniuria neyatujiniji. ²⁷ Jesuuri maaji sequeree miriqi:

—Quia tarinitiare, muerasu cuaara coteenu miaquenuura. Majaari maninia muerasu pa jaariutianura na miaquesano, sareyacari jatasocoriquiano.

²⁸ Maajiiri Jesu riucuaree:

—Jaa, Jiyaniijianaa. Naajaa, sareyacuajaari miaqueja cariquiacoji tatucaja, muerasu totinijiosano miaquesano shiriya.

²⁹ Jesuuri na sequeree:

—¡Quiaacuja maninia cua riucuaree! Quia tacateyarohua. Samarucuaajaari tari tohuataree quia niyatujiniji.

³⁰ Maaji tiuquishacariuhua na tiajiniohua, neyatu riuriatasuhuari na maquetujinia mataano. Samaruuri tari tohuatano quiriquiaa nocuaji.

Jesu jecasacari numeeju, tiquia pueyano

³¹ Jesuuri tacatequiaariuhua Tiro tiaca shocua jiyajiniji. Na tacatesacariuhua, Sidón tiaca shocjoquiaariuhuari, Decápolis jiya tiacanio. Galilea caminiajinia tiuquishuhuari. ³² Tii na quishacari, nocua jaatucusaquiaariiri numeeju, tiquia pueyano. Na jaatucunaari Jesu secjotuguiaari na juaashiquia na nianura nocua, na jeecanura cuno pueyano. ³³ Jesuuri pueyano numeeju jaatucuree tamocora pueyacuaji. Na numaama shirii na juaashiquiaari. Na nuhuaji, tama na juaashiquiajiniajaaja riocoreeri. Na riacau cojuata pocuaashijia niti quiareeri. ³⁴ Jiyacaritij, jiyocuaaanu maureeri. Noojia niareeri. Na nuhuaji, cusosu numaa sequereeri:

—¡Efata!

Nioori pueyano rupaajinia sequeya: “¡Quia riatere!”

³⁵ Jiyacaritij, numeeju numaaari riatequequee. Na nitiiri jeequequeejuhuaj. Ritia pocuaquee maniniaari. ³⁶ Jesuuri cuno pojori rootaree maja nojori pohuatnura na jecasano pueyanojiniji tamasaca niquiara. Nojoriiri saaja tiqiyocua pohuatnuguiaari. Naa Jesu rootasacari na naatanijosano pueyatej, maja nojori pohuatnura na miishanojiniji, nojoriiri saaja socua jiyacatequiaari pohuatnura. ³⁷ Pueyari jiyanohua jiuujiatequiaari Jesu miishano na niqitiushacari. Tama nojoriijiarjia sequetooquiaari:

—¡Puetunjuanaa miya maniniaari! Numeejunuca jiyateya tojtiajacaraari. Tiquianucua pohuateyajaariuhuj.

8

Jesu mianuutesacari cuatro mil pueya
(Mt 15.32-39)

¹ Jiyacaritij, jiyanoehua queraatia pueyari rerejoquiaari Jesu na tojtianura. Majaari nojori jiitianu quiquiaari casaa quenaaja na miaquetusocoriquiano. Jesuuri na saquiriojosano pueya piiri. Nojori sequereeri:

² —Nio pueyacia taraajeyanijia. Nojori tari jiuujianaraca juuca quiya niya cuata. Majaari quenaaja nojori jiitiatunu miaquesano. ³ Janiya jaara nojori jiyaramiquiriohua na tiajinia miaqueyojuani, nucuaco cusojo-niuyarohuacua. Noojiaqueya nojorijinijinioori niyara nijiorucuaa tucua-caanuji.

⁴ Na saquiriojosano pueyari na riucuaaree:

—¿Paatucua taa miaquetere nojori niyani, pueya quiaquishaquini?

⁵ Jesuuri nojori nequesotaree:

—¿Taa pan nia jiitiaani?

Nojoriiri na sequeree:

—Nareja siete.

⁶ Jesuuri na pueya sequeree, nojori cuara sequeera puetunu pueyanaa nojori cajitiuniuria. Na nuhuaji, Jesuuri cuno siete pan pataree. Pueyaso secojoree nocuaraari. Na nuhuaji, na saquiriojosano pueyara na neecasereeri. Nojoriiri saniniuujia pueya na serotaree puetunujuanaa.

⁷ Secaja sapitiaaja jiitiatuquiciaaariuhuj. Jesuuri socua nocuara secorohuacuhuj. Na nuhuaji, na pueya sequereeri nojori niquitiojonura pueya. ⁸ Puetunu pueyajanaari maninia miaquenuuree. Tooquioreejaariuhuj. Miaquesano cureenota mishinijiosaquiaari siete canaasatu. ⁹ Na miaquena pueyari quiquiaari cuatro mil pueya. Na nuhuaji, Jesuuri nojori sequeree nojori quiojonuhua. ¹⁰ Na nuhuaji, Jesuuri botejinia tacataquiaari na saquiriojosano pueyata. Quiaareeri Dalmanuta jiyajiniara.

Fariseocuaca niqiniu panishacari Jesu miishano Pueyaso cumaacata (Mt 16.1-4; Lc 12.54-56)

¹¹ Fariseocuacaari Jesuucua tiuquijiosee. Nata juayonuutaseeri. Nojori saniniuujiniuria Jesu, nojoriiri na sequeree juucua cuara nojori niquishocoriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujuanaa Pueyaso Jiyarosano.

¹² Jesuuri noojia niaree na taraajenuta. Sequereeri:

—¿Casaara nio pueya niqiniu paniya Pueyaso cumaacata miishanoni? Seetanujuanaa nia sequeyanijia, majaari cua niquitini quiniutianiya nianianiya cua cumaacata cua miishano.

¹³ Jiyacaritij, cuno pojori tiujiaqueeri. Na pueyata botejinia tacataaru-huari. Caminia taquijiria niuutiaareeri.

Jesu numootesacari na pueya Fariseocuaca niishitiojosanoocujaj (Mt 16.5-12)

¹⁴ Jesu pueyari na coseyaca niyajetatuquiaari. Nareja niquiriyatujua panniyojua jiitiatuquiciaa botejiniaari. ¹⁵ Jiyacaritij, Jesuuri nojori sequeriquiaa miriqui:

—Cua tojtitiare. Niocua tama nia cuaqueyajaaja cojuariquia Fariseocuaca pan poreetajaacuajaj, Herodes pan poreetajaacuajajiuuhuj.

¹⁶ Majaari na pueya niishiniu quiriquiaa naa Jesu sequesacaritij. Nojoriiri cunora tama sequetooriquiaajaaja:

—Pa jiyaniijia jiyoteeri naa pa sequeya, coseyaca pa paaquiniucua pa sasocoriquiano.

¹⁷ Jesuuri na saquiriojosano pueya niishiriojosano niishiquii. Nojori sequereeri:

—¿Casaara naa nia niishiriojiya pan nia jiitiaaquishacarini? ¿Majateeri juhuanajuaja nia niishiniu tamonu juuca cua miishanojiniji? ¿Niaateeri cumajuujiaacato, maja nia niishiniuria? ¹⁸ ¿Majateeri cua miishano nia niquiniu quiquiaacuaja nia namijiata? ¿Majateeri nia tojiniu quiquiaa nia numaatajuhuaj? ¿Niaateeri ritia niyjetarucuaa cua miishano? ¹⁹ Janiya jaara cinco pan neecasecanu cinco mil pueyaratej, ¿taa canaasatu nia mishinijiocanu miaquesano cureenotani?

Nojoriiri na riucuarree:

—Doce.

²⁰ —Naajuhuj, janiya jaara siete pan neecaserucuaa cuatro mil pueyaratej, ¿taa canaasatu nia mishinijiorucuaani?

Nojoriiri na riucuarree:

—Siete.

²¹ Naaratej, Jesuuri nojori sequere:

—¿Majateeri juhuanajuaja nia niishiniu naa cua miishanojinijitij?

Jiyacariti nojoriiri Jesu sequesano niishiqui.

Jesu jeeacasacari cariyujuaru pueyano, Betsaida tiacajinia

²² Na nuhuaji, Jesuuri Betsaida tiacajinia tiuquiiioquiaari na pueyata. Tii na quishacari, Jesuucua jaatucusaacuaariiri cariyujuaru pueyano. Pueyari Jesu secotujuquiaari cuno cariyujuaru namijia na quianura quenaaja. ²³ Jesuuri cariyujuaru quiaree na juaashiquiajiniji. Tiaca jiyaquiria na jaatucuyareeri. Cariyujuaru namijia piquiojoree na riacaataari. Na nuhuaji, na juaashiquia niaree nocuaari. Na nequesotareeri:

—¿Quia naatate niquiniu shiitianiyojua quenaaja?

²⁴ Cariyujuaruuri niquiniu sanirii. Jesu sequereeri:

—¡Jaa! ¡Pueya niquiyaniija, juhua nahua rucoyano!

²⁵ Jesuuri socua pacuterohua na juaashiquia nianu cariyujuaru namijiaacua. Cariyujuaruuri niquiniu saniriohuacuhuj. Jiyacaritij, tojetaarucua-janaa maninia niquijjara quiquiiri. ²⁶ Jesuuri na tiajinia na jiyarorohua. Cariyujuaru rootaree naari:

—Majaari tiacajinia quia quianuhua pueya quia pohuatanura cua miishanojiniji quiajaniya.

Pedro sequesacari, Jesu seetanujuanaa Pueyaso Jiyarosano

(Mt 16.13-20; Lc 9.18-21)

²⁷ Na nuhuaji, Jesuuri quiojoquiaari na saquiriojosano pueyata tucuaqui tiacajiniara Cesareya Filipino tiaca shocuaqueya. Na quiasacari nucuaco, na pueya nequesotareeri:

—¿Taa pueya sequequiaa janiyani, cantena janiyani?

²⁸ Nojoriiri na riucuarree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari saniniuujia quia sequequiaacuaja quiaanaari supuetana Elías. Naajuhuj, tamasaacari quia sequequiaa, quiaa naasucuaanaari tariucua-caanu pueyara Pueyaso sequesano caminiujjuna, samiitianohuatuhuj.

²⁹ Na nuhuaji, Jesuuri nojori nequesotaree:

—¿Niajanियarijataj, taa nia sequeyani, cante janiyani?

Pedroori na sequere:

—Quiajaniyacuaja Cristo, Pueyaso Jiyarosano.

³⁰ Jesuuri nojori rootaree maja nojori pohuatanura tamasaca niquiara nojuajiniji Pedro niishishano.

Jesu numootesacari na pueya, nojuaja mosaanutaniya

(Mt 16.21-28; Lc 9.22-27)

³¹ Jiyacaritij, Jesuuri na pueya niishitiojonu coteequiaari tama nojuajini-jijiaaja, taa Pueyaso Niyanu miishaanutaniya jiyano-hua naquiya taraatiani. Naa na pueya sequereeri:

—Parta Israel pueya jiyaniijianucuaari cua tojtiaaquiniutianiya, pueyacuara Pueyaso secojonaa jiyaniijianucujuhuj. Naajuhuj, Moisés Rootasanojiniji niishitiojonaari cua rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca juucajinia samiitianu-taniuhuanu.

³² Jesuuri naa seetanujuanaa nojori sequequiaari. Na pohuatasanoori maja miriqui na quiniu quiquiaari. Jesu jaara naa sequequiaari, Pedroori tamocora na jaatucuree. Cuniqiu na nacasureeri maja naa na pocuanuratej. ³³ Jesuuri na nijiniara tacatequee saaja. Na saquiriojosano pueya na niquniutia, Pedro sequereeri:

—¡Cua shuriucuaaji quia quiaare, Satanásnaa! Quia niishiriojosanoori maja Pueyasojiniji. Majaari quia niishiriojonu juhua Pueyaso panishano. Quiaari saaja juhua nio jiyajinijinio pueya niishiriojiya.

³⁴ Naa na sequenu nuhuajitij, Jesuuri na saquiriojosano pueya piirii, puetunu cuniqiu quiniaa pueyajanaano. Nojori sequereeri:

—Pueyano jaara cua tojjijara quiniu paniri, nojuaja cuaara niiria cucua, seetanujuanaa noojiata na panishacari janiya. Nojuaja cuaara niyajetaara tama na cuaqueya na cojuanurajaaja. Cuaara cucuara panitiaara tama na cuaqueyajaaja. ³⁵ Saniniuujia, cante tama na cuaqueyajaaja shuquiritini panijiani, na nuhuaji, nojuajaari jiyano-hua taraatia quiniutianiya pueyaracaanu. Saniniuujia, cante tama na cuaqueya panitiaa cua panishano na miiniuriani, na pohuatanura janiyajinijijuhuj, cuno pueyano cutaraari pueyaracaanu quiniutianiya shuquiriaatia. ³⁶ ¿Niaarate maninia, pueyano jaara puetunu nio jiya casamijianaa jitiare, na nuhuaji na sohanu jaara jataaare mani quiqiuojinia pueyaracaanura? ³⁷ ¿Pueyanote na naata Pueyaso niquitionu queraatia na casamijinijinio, Pueyaso jiyatenuhuara nojuaja pueyaracaanu rishijia na quiniuria nata? Maja na naata. ³⁸ Cante cua rupaa pohuatanu caririqiuja sesa miijiaca pueya niqiuara nio jiyajiniyani, janiyari nojori caririqiuiniutianiyaacuhuj. Naajuhuj, cante caririqiuja mijiria quiniaa niqiuara sequenurani, janiya nojori jiyaniijiani, janiyari cua tacatesacariuhua nojori caririqiuiniutianiyaacuhuj. Janiyari jiyacari cua Que cumaacata jiyocuacaanuji tacatenutaniuhuanu, maninia miijiaca cua Que seyatajuhuj.

9

¹ Jesuuri nojori sequequiaarijijuhuj:

—Seetanujuanaa nia sequeyanijia pueyanaa. Noojiaqueya niya quini-ajinijinio quiarijiani, majaari nojori cusonuunu quiniutianiya juhuano-juaja, nojori cuaara niquirijiaatijia Pueyaso cumaaca tiuquiyano cucua, na muerasu jitiariquianoni.

Jesu jatasacari shacantuucara
(Mt 17.1-13; Lc 9.28-36)

² Seis juuca nuhuaji, Jesuuri jiyaconaja tuhuananuucua tacaquiaari. Saaja nata quiojoquiaari Pedro, Santiago, Juannio. Jesu quishacari tuhuananujini, na cuaqueyari tamaatiuucara jataquiaari nojori niqiuara. ³ Na toqueeri shacantuquera jataquiaari, socua jiyano-hua cohuajara sohanatu-ujini. Nio jiyajinia toqueya jeequejonaari maja na naata jiyano-hua cohua-jaquera toque na jiyatenu, taa Jesu toque jataquiaaricuaani. ⁴ Jiyacaritij,

nojoriiri supuetana Elías niqutiuguiaari, supuetana Moisésjuhuaj, Jesuta pocoojiyano tii. ⁵Jiyacaritij, Pedroori Jesu sequeree:

—Niishitiojonanaa, ¡canaa namitia niya quiyani! ¡Canaacua niaacuaji suhuorojoreni: quiara, Moisésra, Elíasranio!

⁶Jesu pueyari shiriqutiuruquiaa. Nocuaji Pedroori naa juhuajaniya pocuariquiaa. Majaari na niishiniu quiriquiaa casaa na pocuariquiaani.

⁷Jiyacaritij, jiyocuaaanuji cohuaja najacaari nojoriicua roseguiaari. Cohuajari nojori mishiQuiomaa. Cohuaja najacajiniji, Pueyasoori tojishaaree pocuaano. Naa sequeguiaaritij:

—¡Niocuaja cua Niyanuniyojua, cua shuquiritiasano! ¡Saaja nojuaja nia tojiri!

⁸Jiyacaritij, nojori jaara ritia niquinijionuuquiaari na shocuaqueya, majaari quenaaja tamonu na niqutiuniu quiquiaari socua. Saaja Jesuuri tamajaaja quiriquiaa.

⁹Nojori rosetasacariuhua tuhananuucocoji, Jesuuri nojori rootaquiaari maja nojori pohuatanuhuaa tamasaca niquiara nojori niquishano. Jesuuri nojori sequeguiaari cuara noojiajinia racatatuura, nojuaja jaara samitiarohuajaatijia. ¹⁰Cunora, tama nojorijiaaritia maninia racataquiaari noojiajinia nojori niqutiushano. Maja cutaraari nojori niishitiuniu quiquiaari, casaara naa Jesu sequeree nojorini “cua samiitiasacariuhua”. ¹¹Cunora, nojoriiri Jesu nequesotaquiaari:

—¿Casaara Moisés Rootasanojiniji niishitiojona sequeguiaacuaraarini, Elíasna coteenu tiuquiniutianihua Pueyaso Jiyarosocoriquianoocuaji?

¹²Jesuuri nojori riucaaree:

—Seetanujanaacuaquinatejaj, Elíasri coteenu tiuquiriquiano quiquiaari, puetunu cucuaji jeenucuariquianojuanaa. ¿Niaate niishiya casaara tariucuacaanu Pueyaso Rupaajinia naa naajiotasaaquiaari janiyajinijini: “Pueyaso Jiyarosanoori naquiya miishaanutaniya? Pueyari na soonutaniyajuhua”. ¹³Janiyari seetanujanaa nia sequeyani, Elíascuajaari tari niquiaari. Pueyari naquiya na miiquiaari taa nojori paniquiaaricujani. Pueyaso Rupaajiniacuajaari naajiotasaaquiaari nojuajaari naa miishaanutaniyaquij. Seetanujanaa tari naa miishaaquiariiri.

Jesu tohuatesacari samaru, caya samijajiniji
(Mt 17.14-21; Lc 9.37-43)

¹⁴Na nuhuaji, Jesu jaara tacateguiaariuhua na saquiriojosano pueya quishaqi, queraatia pueya niquishuhuari nojori shocua maano. Tii qutiuruquiaajaariuhua Moisés Rootasanojiniji niishitiojona. Nojoriiri Jesu pueyeta juayonuutariquiaa. ¹⁵Pueya jaara Jesu niqutiuguiaari, puetunu pueyajaari nocuaji jiuujiateguiaari. Nojoriiri nocua netecuatuquiaari na saruhatanura. ¹⁶Jesuuri na saquiriojosano pueya nequesotaree:

—¿Casaajiniji nia juayonuutariquiaa cuno pojoritiani?

¹⁷Tamonu cuno pueyajinijinoori Jesu riucaaree:

—¡Niishitiojonanaa, quiocua nitiaaree quianunijia! ¡Samaru jitiaano! ¡Samaruuri na jiyateguiaari tiquiara! ¹⁸Tiquiyocua na quishaqui, samaruuri na pojotequiaa. Naa na cusojosacaritij, cushau jataquiaa na rupaamajiri. Na quiaa miaqueguiaajaariuhua. Na nuhuaji, pootia maquiaari juhua macu. Quiyanuuri cunora sasacaa quiyaree. ¡Socua piriuquiuniutianiyari! Janiyacuajaari tari sequeree quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiriquiaa.

¹⁹Jiyacaritij, Jesuuri naa sequeree:

—¡Niaaqui Pueyasoocua tiuyashijacaja! ¿Janiyaticua pueyaracaanu nia jiitariquiani? ¿Janiyateeri pueyaracaanu nia rejeretanutaniyajaanihuaj? ¡Miji nia jaatucure cuno caya samijia!

²⁰ Nocua jaatucusaareeri caya samijia. Samaru niquishacari Jesu, caya samijia miirii taraataari. Caya samijiaari pojoquee Jesu niquiara. Tii taquiriocuariquiaari. Na rupaamajiiri cushaariquiaa. ²¹ Jesuuri caya samijia que nequesotaree:

—¿Taacari na coteecanu naa na quiniuria juhuacatecarani?

Na queeri Jesu riucuree:

—Na naatujajini nia quijiajuhanajaj. ²² Na cusojuanura juucua, cuno samaruuri sequeyarucua na pojotequiaa manijinia, moojiniajuhuaj. Naaratej, ¡jaara quia naata quiri, canaacua quia taraajere quenaaja! ¡Canaa quia naacure!

²³ Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasoocua tiuya noojiata seetanujuanaani, nera miishiyari puetunu na panishanojuanaa.

²⁴ Jiyacaritij, caya samijia queeri nacaree:

—¡Jaa, quiocua tiuyanjia! ¡Cua naacure socua cua tiuuniuria quiocua!

²⁵ Jesu niquishacari queraatia pueya nocua rerequeejiano, ritia samaru sequereeri:

—¡Tojiyashijia, tiquia samarunaa, janiya quia sequeyani, quia tohuatare nio caya samijiajiniji! ¡Puetunu quia tohuatarejanaa! ¡Majaari socua quia tacatenuhua, nocua quia tiuquiniuhua!

²⁶ Samaruuri sariyocuaquee. Caya samijia taquiriocuaterohuarihuaj. Na tohuatesacari caya samijiajiniji, juhua macu na tiujiaqueeri. Nocuaij, queraatia na niquitianaa pueyari sequequiaari:

—¡Juaj! ¡Tari cusoquee cutaratej!

²⁷ Jesuuri na juashiquiajiniji na quiaree. Na sanareeri. Caya samijiaari juhuajaniya nujuaquiaariuhua.

²⁸ Na nuhuaji, Jesuuri tiaco tiuquitiaquiaari na pueyataja. Tamajaaja nojori quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiriquiaani?

²⁹ Jesuuri nojori riucuree:

—Jiyano samaruuri na naata tohuatanishaanu cutara saaja jiyanohua Pueyaso nia secojonuta nia miaqueyaquiniutia.

*Jesu pahuatanu pacutesacariuhua nojuaja mosaanutaniya
(Mt 17.22-23; Lc 9.43-45)*

³⁰ Nojori jaara quiojoquiaariuhua tiji, Galilea jiya tajimiaari. Majaari Jesu paniniu quiquiaari pueya niishiniuria tee na quiyani. ³¹ Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojoriquiaari. Naa nojori sequereeri:

—Janiyari pueya niquitiosaanutaniyani, nojori miiniuria janiya taa nojori paniyacuajani. Nojoriiri cua monutaniya. Jiuujianaraca juucajinia, janiyari samitianutanihuani.

³² Majaari quenaaja na pueya niishiniu quiriquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

*¿Cante jiyaniijajanaa cutarani?
(Mt 18.1-5; Lc 9.46-48)*

³³ Nojoriiri Capernaum tiacajinia tiuquijiose. Tari nojori quishacari tiajinia, Jesuuri nojori nequesotaree:

—¿Casaajiniji nia juayonuutariquiaa nucuamajini?

³⁴ Nojoriiri saaja sanaajetaquee. Na juayonuutanujiniji niishi-
turiquiaacuajaari. Nucuamaji, nojoriiri riutioconeetariquiaa teyano
nojorijinijiniote socua tojishano pueyanoni. ³⁵ Jesuuri jiyacari cajirii nojori
na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuaara qui-
iria juhua serura, narta pueya na naacunura puetunujuanaa.

³⁶ Na nuhuaji, Jesuuri mueya nujuatequiaari nojori tajinia. Cuno mueya
paree nojori niqiaaraari. Na pueya sequereeri:

³⁷ —Cante jiyano mueya maseja na paniniutia janiyani, nojuajaari cua
maseyajaacuhuj. Cante cua maseyani, majaari saaja na masenu janiya.
Jiyocuacaanu Quijia cua Jiyarona maseyajaariuhuj.

*Tamonu pueyano tohuatanijosacari samaruhua Jesu cumaacata
(Mt 10.42; Lc 9.49-50)*

³⁸ Tamacari, Juanri Jesu sequere:

—iNiishitiojonanaa, canaari tamonu pueyano niqiriini quia sesa
jiyaniquiyano samaruhua na tohuatanijonura pueyajiniji! Nojuajaari
maja pajaniyajinjinio. Nocujaji, ¡canaari na tenujureeni maja socua naa na
miiniuriatej!

³⁹ Jesuuri nojori sequere:

—¿Casaara nia tenujureeni? Pueyano jaara maninia miishano miiri cua
sesa cumaacata, na nuhuaji, nojuaja maja na naata sesa pocuanu janiya-
jiniji. ⁴⁰ Nia niishiri, cante maja pa paracani, nojuajaari pa jiyano. ⁴¹ Nia
rucuanejosacari, cante nia raateya mohuacaniyojua na paniniutia janiyani,
cua pueya nia quiniuucujuhuj, Pueyasoori saniniuujia maninia casaa na
niqutionutaniya na jiitiasanojiniji.

*Puereeta quiniutianiyari sesa miijiacara
(Mt 18.6-9; Lc 17.1-2)*

⁴² Nio mueyari cucua tiuujia. Cante jiyano mueya miitirii sesani,
nera maara socua maninia quiri, puereetuujaju saajia jaara morotasaare
na riquiajiniji, caminia queronijinia jartasocoriquiano. ⁴³⁻⁴⁴ Nio miriqui
cua niishitiojosano nia tojiri: tama nia juaashiquiajaaja jaara nia jiy-
ateres sesa miijiaara, nia juaashiquia nia rashiquiare juhuari niaa mariqui
mani quiquiojinia jataaareeri, sesa miijia nia quiniuucua. Cuno mani
quiquiojiniani, majaari mani maquesanu. ¿Niaateeri paniya tii nia jataa-
nura caapiquiquiojuata? Jiyano socua maninia cutaraari niaara,
juaashiquiaaju nia tiuquinishaanura Pueyaso shuriucua, pueyaracaanu
shuquiriaatia nia quiniuria nata. ⁴⁵⁻⁴⁶ Naajuhuj, nia nioluaca jaara nia jiy-
ateres sesa miijiaara, nia rashiquiarenoj maja nia jataaananura mani quiquio-
jinia. ¿Niaateeri paniya tii nia jataaananura caapiquiniocuata, pueyaracaanu
tii nia saniitiosaanura? Jiyano socua maniniaari niqiniocuata Pueya-
soocua nia tiuquiniuria, pueyaracaanu nata nia quiniuria shuquiriaatia.
⁴⁷⁻⁴⁸ Naajuhuj, nia namijia jaara sesa miitiri quia nijaniya, nia jiaterejoj.
Naa nia tariniitari sesa nia miiniu, maja nia jataaananura caapiqui namijia
pueyaracaanu mani noshishaqui. Sesa miijiaaari cuno mani quiquiojinia
quejoosaanutaniya, pueyaracaanu nojori saniitiosaanura. Cuno manijinia,
majaari porohua cusonuunu. Maniiri tii pueyaracaanu noshiya. Majaari
na maquesanu. Jiyano socua maniniaari nia tiuquiniuria Pueyasocua
niqiriyanujua namijiaata pueyaracaanu shuquiriaatia nia shootianura no-
juaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarinitianura jiyanohua na miiniu panishano, cuno jaara sesa miijara jiyateriquia nojori.

⁴⁹ Jesuuri socua niishitiojorohua:

—Puetunu Pueyaso muerasujuaaari saniniuujishaanutaniya juhua manitia, taa shu caquishiyacuaani na moqueyaquiniuucuaaji. ⁵⁰ Naajuhuaaj, shoniiri jiyanohua maninia, shu moqueyaquiniuucuaaji. Saniniuujia, shoni jaara shaacara quiri, ¿maatucua taa tiquriiquiara quiriouhua saajaniuhuaaj? Maja na naata. Naajuhuaaj, Pueyaso cumaaca nia jitiare nioojiajinia, niaa mariqui najuhuaana quijia quiriiri juhua Pueyaso niishiyashijia pueya. Naajuhuaaj, jiyanoojiaca nia quiri, jatiqui nia quiniuria shuquiriaatia.

10

Jesu niishitiojosano maja pueya cartenura necocua

(Mt 19.1-12; Lc 16.18)

¹ Na nuhuaji, Jesuuri Capernaum tiacajiniji quiaquiaari na saquiriojosano pueyata. Judea jiyajinia quiojiyareeri, Jordán moo taquijirajuhuaaj, pananu muetasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiojonu coteeree socua, taa na niishitiojoquiaari tarijiacuajani. ² Jiyacaritij, noojiaqueya Fariseocuacaari Jesuucua nijioquiaari na saniniuujuniuria nojori nequesotanuta, nocuara nojori saquiriojotanura juucua. Cunora, cuno pojoriiri Jesu nequesotaree:

—¿Maniniate pueyano cartenura necocua?

³ Jesuuri nojori nequesotaree saniniuujia:

—Cua sequeretoj, ¿taa Moisés sequequiaari nijaniyani?

⁴ Cuno pueyari Jesu riucaaree:

—Moisésri pa sequequiaaricuaaja, pueyanoori na naata necocua cartenu. Neyaca cuara coteenu na niqutioora na cartetaja naajionee, necocua na cartenura. Moiséscuajaari naa pa sequequiaaritij.

⁵ Jesuuri cuno pojori sequeere:

—Moisésri naa sequequiaari nijaniyatej, pueyaracaanu cumajiuujiaaca nia quiniuucua, nia niquiocuaacua taraajeyashijia nia quiniuucujuhuaaj.

⁶ Saniniuujia, Moisésri naa naajiotaquiaari pueyajiniji:

“Pueyaso jaara puetunu casaajanaa shipiniquiaari, nojuajaari niquiriyatu caya shipiniquiaari, niquiriyatu maajinio”.

⁷ Naaratej, pueyanoori na queya tiujanutaniya necocuara na caminiuria.

⁸ Nojori jaara camitioore, nojoriiri juhua niquiriyatujua pueyanora quiqui. Naacuajitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari. ⁹ Cunora, pueyano cuara necocua carteyaquiria, Pueyaso rupuetootesano nojori quiniuucua.

¹⁰ Majaari Jesu saquiriojosano pueya niishitiuniu quiquiaari naa Jesu sequesano. Na nuhuaji, tiajinia nojori quishacariuhua, na saquiriojosano pueyari Jesu nequesotaquiaari casaa na sequenu paniriquiaa naani.

¹¹ Jesuuri nojori sequeere:

—Cante necocua carteya tamonu maajitia na caminiuriani, cuno pueyanoori jiyanohua sesa miya coteenu necocua. Pueyasora, naa na miishacaritij, nojuajaari juhua narta pueyano niquiocuata quijia.

¹² Naajuhuaaj, maaji jaara cartere neyaca tamonuta na caminiuria, cuno maajiiri sesa miya Pueyaso niquiarajuhuaaj.

Jesu niasacari na juaashiquia naatujooriicua

(Mt 19.13-15; Lc 18.15-17)

¹³ Na nuhuaji, Jesuucua jaatucunuusaaquiaariiri naatujoori, Jesu nianura na juaashiquia nojori nacaacua. Na saquiriojosano pueyari naatujoori jaatucunaa tenujuriquiaa saaja. ¹⁴ Jesu jaara na niqiuquiaari, juaaquiiri. Nojori sequereeri:

—¡Nia tarinitiare naatujoori cuaara niiria cucua! ¡Maja na tenujunu! Canapue te Pueyaso muerasura quiniu paniyani, nojori cuaara juhua nio naatujooriria jataara. ¹⁵ Seetanujuanaa nia sequeyanijia, Pueyasocua nia tiuuri seetanujuanaa, taa naatujoori tiuya cucuacuaani na taacanuyaquiniutia. Saaja naacujajiti niaari Pueyaso pueyara jiyatesaanutaniya cutara, pueyaraanu Pueyaso jiitiasano nia quiniuria.

¹⁶ Jesuuri jiyacari cuno naatujooriniyoyua pooree. Nojori nacaacua niojoree na juaashiquiaari Pueyaso na secojonuta, Pueyaso miiniuria maninia nojori.

Jiyanhua casamiriaca mashaja pocoojosacari Jesuta
(Mt 19.16-30; Lc 18.18-30)

¹⁷ Quera Jesu quianu panishacari quiniquiji, nocua netequiaariiri tamonu pueyano. Jesu cariquimiaji mojoquetaseeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

¹⁸ Jesuuri na sequeree:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. ¹⁹ Quiaacuajaari Pueyaso niishitiojosano niishiya. Moiséscuajaari naa na naajiotaquiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucua tonujunu sapojonuta. Maja cuaracashionu. Quia queya tojjia quia quiriquia”.

²⁰ Pueyanoori Jesu riucaaree:

—Niishitiojonanaa, janiyacujaari puetunu cuno rootasanojuanaa tojjia pueyaracaanu cua naatujajinijini.

²¹ Jesuuri na paniniutia na niquirii. Na sequereeri:

—Juhuanoyajaja niquiriyatu casaari quiyajaa quia miishoo. Quia quiaarohua. Puetunu quia casamijianaa quia niqutiojocoo. Na nuhuaji, casamijiniucua nareja quia niqutioire quia masesano cumaneeca quia casami sami. Naacujajiti, quiaari quia casami jiitianutaniya jiyocuaaanu Pueyaso shuriucua. Na nuhuaji cutara, quiocua nimiohua cua nuhuajiriquiano.

²² Cuno pueyano jaara tojiquiaari naa Jesu sequesantej, jiyanhua tarajequeeri. Na tarajenuta quiacuhua na tijajiniaari. Nojuajaari jiyanhua casamiriaca pueyano quiquiaari. ²³ Na nuhuaji, Jesuuri na shocuaqueya niqiniijioree. Na saquiriojosano pueya sequereeri:

—¡Jiyanhua jiyajeneta cutaraari casamiriaca pueyano quiniuria Pueyaso pueyanora!

²⁴ Na saquiriojosano pueyari shiriquitiuquiaari naa na sequesacarij. Na nuhuaji, Jesuuri nojori sequenu pacutequiaari:

—Sanajooriniaa, seetanujuanaa nia sequeyanijia. Jiyanhua jiyajenetaari casamiriaca pueyano quiniuria Pueyaso pueyanora. ²⁵ Taa camello maja na naata cusupuetaja cuhuoco tamajiria tajiniucuaani, naajuhuj, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

²⁶ Na saquiriojosano pueya jaara na tojitiaquiaari, nojoriiri socua jiyanhua jiuujateree. Naaratej, tama nojorijiaarija nequesoreetooquiaari:

—¿Canteeri Pueyaso pueyanora jiyatesaanutaniya socuanitioj?

²⁷ Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniu. Pueyaso cutaraari na naata na jiyatenu na muerasura. Pueyasora, maja jiyajeneta casaa quiniu.

²⁸ Pedroori Jesu sequereer:

—Jiyaniijianaa, canaari puetunu canaa jiiatasanojuanaa tiujiaquiaarini quia pueya canaa quiniuria.

²⁹⁻³⁰ Jesuuri nojori riucuarer:

—Seetanujuanaa nia sequyanijia, shuquiriaatia quijia quiniutianiya cutaraari noo pueyano cante na jiiatasano tiujiaja cua tojjia na quiniuucuan, janiyajiniji pohuatana na quiniuucujuhua. Cante na tia tiujiajani, tapueyocuaca, na rimiatuhua, na queya, necohua, na cuhuariquiano, nojuajaari mania miishaanutaniya quiarijia mijiria na quishacarija. Nojuajaari socua jiyanoehua queraatia niqutiosaanutaniuhua na tiujiasanojiniji. Niqutiosaanutaniyari tiaca, tapueyocuaca, na rimiatuhua, na nucua, necohua, cuhuariquiano. Naajuhua, naquiya miishano quiniutianiyari cua tojjia na quiniuucua. Naajaa, na nuhuaji, pueyaracaanu Pueyasota shuquiriaatia quiniutianiyari quiarinio jiyajinia. ³¹ Saniniuujia, queraatia tojishano pueyari najuhua quijia quiniutianiya Pueyasora, nojori tojiyaquiniuucua nojuaja. Saniniuujia, Pueyaso ruuretajacara, queraatia Pueyaso pueyari quiarijia juhua najuhua quijia niqishano quiquiaa. Naajaa, nojoriiri na nuhuaji seetanujuanaa juhua jiyaniijianucua quiniutianiya Pueyasora, na tojitiajaca nojori quiniuucua.

Jesu pacutesacariuhua pohuatanu nojuaja mosaanutaniya

(Mt 20.17-19; Lc 18.31-34)

³² Jerusalén tiacajiniara nucuamaji nojori quiasacari, Jesuuri na saquiriojosano pueya pueteriquiaa. Nojoriiri na nuhuaji sacuariquiaa na puerenuta. Socua pueyari na nuhuajitiuriquiaa nojori puerenutajuhua. Nuu cajiniocua, Jesuuri na doce saquiriojosano pueya jaatiaree tamocora tamajaaja. Tii nojori sequeriquiaari taa nojuaja miishaanutaniyani, nojori tiuquishacari Jerusalén tiacajinia.

³³ Nojori sequereeri:

—Niaacuajaari niishiya, paa tari Jerusalén tiacajinia quiaani, tee cuniqui Pueyaso Niyanu niqutiosaanutaniya pueyacuara secojonaa jiyaniijianucuan, Moisés Rootasanojiniji niishitiojonaanio. Cuno pojoriiri cucuara tonjunutaniya jiyaniijianucua na sajojonuta, cua mosaanura. Janiyari taucua niqutiosaanutaniyani. Janiyari jiyanoehua naquiya miishaanutaniyani. ³⁴ Nojoriiri cua rerequetenutaniya. Cua picojotunutaniyari. Cua piquitiuniutianiyajaariuhua. Naa cua miishaanu nuhuajitij, nojoriiri socua cua monutaniya. Naajaa, jiuujianaraca juucajinia, janiyari seetanujuanaa samiitianutaniuhua.

Santiago, tarajanu Juanta, nojori sequesacari Jesu, maninia nojori na miiniuria

(Mt 20.20-28)

³⁵ Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niqiuohua quiquiaari. Jesu sequetuseeri:

—Niishitiojonanaa, canaara quia miiri canaa masenu panishano quianiya.

³⁶ Jesuuri nojori nequesotareer:

—¿Casaa nia paniya cua miiniuria niaarani?

³⁷ Nojoriiri Jesu riucuarer:

—Pueyaso jaara quia jiyatere pueya jiyaniijara, quiocua canaa cajitijore quia shuriucua, tamonu quia miaquetajara, tamonu quia muenecara, quia naacunaa canaa quiniuria.

³⁸ Jesuuri nojori sequeree:

—Majaari nia niishiniu nia masesano. ¿Nia naatateeri rejeretanu naquiya miiniu taa cua miishaanutaniyacuaani? Naquiya cua miiniuuri jiyanohera noonu quiniutianiya juhua pueyano jaara mani noshiyanojinia tiuquinishaare.

³⁹ Nojoriiri na riucuaaree:

—Taaquiririnij, canaa naatacuaaquinateja naquiya miiniu rejeretanu juhua quiajaniya.

Jesuuri nojori sequeree:

—Seetanujuanaa, niari na nuhuaji cua ratusano raturiquianojuhuaj. Niari juhua manijinia tiuquinishaariquianojuhuaj, taa cua tiuquinishaanutaniyacuaani.

Jesuuri naa nojori sequeriquiaa miriqui, taa jiyanohera naquiya na miishaanutaniyani, na cusosacari pueyacuara. Jesuuri naa nojori sequeree socuatej:

⁴⁰ —Maja cutara cua naata niqutionu niajaniya nia masesano, cua cajitiniuria niajaniya cua miaquetajara, cua muenecarano. Cunoori noo pojori niqitiosaanutaniya cutara, canra tari na jeenucuaaquaaricuaajani.

⁴¹ Narta saquiriojosano pueya jaara tojiqiaari nojori masesano Jesu juucua, nojoriiri juaaquoiquaari. ⁴² Jesuuri nojori piirii. Nojori sequereeri: —Niaacuajaari niishiya, mijiria jiya jiyaniijianucuaari na pueya jitiqiaa juhua na seya, tama nojori panishano na miiniuriajaaja nojoritia. Naajuhaaj, pueya jiyaniijianucuaari na jitijsano pueyacu paaretaquiaa na cumaaca, tojishano pueya nojori quiniuria. ⁴³ Niajaniya saniniuuja, majaari naa nia quiniu quiniutianiya. Cante tojishano pueyanora quiniu paniya niajanijajiniini, cuno cuaara jiyateera tama na cuaqeyajaaja juhua narta Pueyaso pueya serura na quiniuria. ⁴⁴ Cante nia jiyaniija quiniu paniyani, nojuaja cuaara quiiria narta Pueyaso muerasu cumaquinia. ⁴⁵ Janiyajuhuaaj, majaari mijiria cua ninu quiqiaari pueya cua poonijiotenura quiria, tama cua cuaqeya cua shuqiritiniuriajaaja. Janiya cutaraari niqiaarini pueya cua naacutanura, tama janiyajaaja mosaanura pueya nifi, queraatia pueyacuaji cua ritianura Sesaaca.

Jesu jeeacasacari Bartimeo namija

(Mt 20.29-34; Lc 18.35-43)

⁴⁶ Nojoriiri jiyacari tiuquijioquiaari Jericó tiacajinia. Jesuuri cuno tiacajinij quiariquiaa na saquiriojosano pueyata. Queraatia pueyari nata quiariquiaajuhuaaj. Jiyacaritij, tamonu cariyujuaru pueyanoori tii cariquiaa nuu shuucua. Na sesa quiqiaari Bartimeo, Timeo niyanu. Nojuajaari cumaneeca mashiniqijiona quiqiaari, cariyujuaru na quiniuuca. Nojuajaari maja na naata poonijionu quijia tamajaaja. ⁴⁷ Nojuaja jaara tojiqiaari cuno tajiyanu pueyano quiqiaari Jesu, Nazaret tiacajiniinio, nojuajaari naa nacanuu coteeree:

—iJesumaa, Pueyaso Jiyarosanonaa, cucua quenaaja quia taraajereja!

⁴⁸ Queraatia pueyari na tenujuriquiaa na sanaajanura juucua. Saaja socua nacaree jiyanohuari:

—iPueyaso Jiyarosanonaa, cucua quia taraajere!

⁴⁹ Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariyujuaruuri naa sequesaaree:

—¡Quia sanere! ¡Quia shuquiriri! ¡Quia sequeyacuaja! ¡Nocua quia canuji-yare!

⁵⁰ Naa na tojshacaritij, cariojoaruuri na tucuaque toque jataquee. Ritia jaaqueeri Jesuucua na catecanonura. ⁵¹ Jesuuri na nequesotaree:

—¿Casaa quia paniya cua miinuria quiajaniyani?

Cariojoaruuri na riucaaree:

—¡Niishitiojonanaa, niquijara quiniu paniuhuanijia! ¡Cua namijia quia jecarohua quiria!

⁵² Jesuuri na sequereee:

—Quia quiaarohua. Quia namijiaacuaja tari jeequerohua cucua quia tiuuniuucua.

Jiyacaritij, cariojoaruuri tari na naata niquiniu quiriquiaa. Nucuaqu Jesu nuhuajiyareeri.

11

Jesu tiuquishacari Jerusalén tiacajinia (Mt 21.1-11; Lc 19.28-40; Jn 12.12-19)

¹ Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquijioosee Olivo cuhuariquia tuhananuucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquirojosano pueya jiyaroree tiji. ² Nojori sequereeri:

—Cuno tiacajinia nia quiaare, pa tacoji niquishiyani. Niaa jaara tiuquishii tii, niaari burro riuriatanutaniya morotasano, pueyano cajishoojua na nijinia. Niaa jaara niquishinioj, niocua na samaacartasee. Niocua na jaatucumohua miji. ³ Pueya jaara naa nequesotare niajaniya: “¿Casaara nia samaacartaanoj?”, niocua na sequere: “Jiyaniijia na paniya rupaquijia. Ritia na niqutionutaniuhacuaja”.

⁴ Nojoriiri quiojoquiaari. Burro riuriatatusereeri morotasano nuujinia, tamonu tia tohuateya shuriucua. Nojoriiri na samaacartasee.

⁵ Tamasaca tii quiniaari nojori sequereee:

—¿Casaa nia miyani? ¿Casaara nia samaacartaa cuno burroni?

⁶ Nojoriiri na riucaquiaari taa Jesu rootaquiaari nojoricuajani. Naaratej, cuno pueyari nojoriria na tarinitiaquiaari. ⁷ Na nuhuaji, Jesuucua jaatucumohua cuno burroori. Pueyari na toqueya niojoquiaari burro nijinia, Jesu cajijia. Na nuhuaji, Jesuuri nocua cajirii. ⁸ Queraatia pueyari na toqueya muejoquiaari nucuaco, Jesuucuaaji nojori maniniushitiniuria nuu. Tamasacaari jaamasucua piyotacquiaari cuhuariquiaajini, Jesuucuaaji nojori niojotasocoriquiano na nucuacojuhuaj. ⁹ Jesu puetanaa, mariyata na nuhuaji nijionaari jiyanojua nacojonu coteequiaari nojori shuquiriniutia. Naa sequeturiquiaari:

—¡Pa shuquiritari pa Jiyaniijia Pueyaso! ¡Jiyanojua maniniacuaja pa Jiyaniijia, cuno, Pueyaso cumaacata tiuquiyani! ¹⁰ ¡Pueyaso cuaara na jiyateera maninia Jiyaniijia na quiniuria pajaniyara! ¡Nojuajaari pa supuetanaa jiyaniijia David niti pa jitianutaniya maninia cutara! ¡Jiyocuacaanu Quijia pa Pueyasocuaajaari pa shuquiritiasano!

¹¹ Jesuuri naa tiuquiquiaari Jerusalén tiacajiniatej. Pueyaso Secojojua tajaninia tiuquishii. Na niqunijionu nuhuaji puetunu casaajanaa, Betania tiacajiniara quiaquiaari ritiaari na doce saquirojosano pueyata. Jiyacaritij, tari tenacariiri quiriquiaa.

Jesu sesacasacari jajauju higo naana (Mt 21.18-19)

¹² Tariqui, nojori quiojosacari Betania tiacajiniji, Jesuuri miaajeriquiaa. ¹³ Tucuacaanuji niquirii higo naanaari queraatia jaamasucuaraca. Nocua canujiyareeri na niquiniuria seetanujuanaa jajauracate quiriquiaa. Saaja queraatia jaamasucuaari quiriquiaa. Maja higo muetusacari quiquiaari jiyacari. ¹⁴ Jesuuri naa sesacaree higo naana:

—Maja quiocuaji socua quia jajau miasaanu quiniutianiya.

Na saquiriojosano pueyari na tojtitariquiaa naa na sequesaciritij.

Jesu jaacasacari seya niqutiojonaa Pueyaso Secojoja tiajiniji
(Mt 21.12-17; Lc 19.45-48; Jn 2.13-22)

¹⁵ Nojori jaara tiuquijioquiaari Jerusalén tiacajinia, Jesuuri tiuquiquiaari Pueyaso Secojoja tiajinia. Tiji pueya tohuatanijionu coteereeri, cuno pojori, canapute Pueyasocua juhuacutucua puecosocoriquiano seya niqutiojoriquiaa cumaneecaracuajani. Na masejona tohuatanijioreejaariuhujaj. Cumaneeca tacatojojuaca juhuacutucua caponeetareeri, tee pueya tacatojoriquiaa taucuaca cumaneecacuajani, Pueyaso Secojoja tiajinia niqutiojosocoriquiano cumaneecaracuajani. Naajuhuj, Jesuuri mocoonu niqutiojonaa cajitiucua caponeetaree.

¹⁶ Naajuhuj, majaari na shanacunu quiquiaari pueya niyacunura najuhuaa Pueyaso Secojoja tia, na nitiotasano casamitia. ¹⁷ Na nuhuj, pueya niqiara niishitiojonu coteereeri. Naa sequereeri:

—Tariucuaaanu Pueyaso Rupaajinia naa naajiotasanocuaajaari quiya:

“Cua tia sesaari quiniutianiya, Pueyaso Secojoja tia. Puetunu jiyacajinijinjiojuanaa pueya secojonuujuara quiniutianiyari”.

Niaari saniniuujia na jiyatequiaari nohuasenujuaca quiqiora.

¹⁸ Pueyacuara secojona jiyaniijianucua, mariyata Moisés Rootasanojiniji niishitiojonaari niishiquiaari naa Jesu miishanojiniji. Cunora, nojoriiri roojotooquiaari taa na motunutaniya Jesuni. Saniniuujia, puetunu pueyajaanaari jiuujiateriquiaa Jesu niishitiojosano nojori tojishacari. Cunora, judiocuaca jiyaniijianucuaari Jesu puereturiquiaa, puetunu pueyajanaa tojishacari na niishitiojosano. ¹⁹ Jaara niniquiaari, Jesuuri Jerusalén tiacajiniji quiacuhua na saquiriojosano pueyata.

Higo naana sorenojiniji pahuatasano
(Mt 21.20-22)

²⁰ Tariquicuaji, nojori shocosacari higo naana, na niqutiuquiaariiri tariucua soreno, puetunu na nujuacatajanaa. ²¹ Pedroori jiyacari Jesu sequesano niishiquii. Jesu sequereeri:

—Niishitiojonanaa, ¡quia niquiri! ¡Quia sesacasano higo naanaqui tari soree!

²² Jesuuri nojori riucuaaree:

—Pueyasocua nia tiuuri. ²³ Seetanujuanaa nia sequeyanijia, niaa jaara Pueyasocua tiuuriquia nia taacanuyaquiniutia, nia naata nio tuhuananu sequenu: “Shiiquia niiquiji. Quia jaataare shoniacu caminiajina”. Naa jaara naa sequere seetanujuanaa Pueyasocua nia tiuuniutia, niaari nia sequesano niquiniutianiya. Naacuajitij, Pueyasocua nia taacanuyaquishacari, nia sequesano cuajaari tohuateenutaniya taa nia sequereecuajani. ²⁴ Janiyari cunora nia sequeyani, puetunujuanaa nia masesano nia secojosacari Pueyasoni, nia niishiri niaa na jiitiaa tari. Na nuhuj, niaari seetanujuanaa na masenutianiya. ²⁵ Naa secojosacari, niaa jaara niishiquii niaa sesa quia tamonu pueyanota, sesa na miiniucua nijaniya, nojuaja nia jiyanoori. Naacuajitij, jiyocuaaanu Quijia nia Queeri

nia jiyanooniutianiya sesa nia miishanojinijijihuhaj. ²⁶ Niaa jaara jiyano-ashijia quiriquia, jiyocuacaanu Quinia nia Queeri nia jiyanoaquiniutianiya, sesa nia miishanojinijijihuhaj.

Pueya nequesotasacari Jesu, cante na jiyaronani

(Mt 21.23-27; Lc 20.1-8)

²⁷ Na nuhuaji, nojoriiri quiaquiaariuhua Jerusalén tiacajinihua. Jesu rucuanesotasacari Pueyaso Secojojua tiajinia, nocua catecanoquiaariiri pueyacuara secojonaa jiyaniijianucua, Moisés Rootasanojiniji niishitiojonaa-juhua, narta Judiocuaca camarucuanio.

²⁸ Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojojua tia jiyaniija quia quiniuriani?

²⁹ Jesuuri nojori riucaaree:

—Janiya nia nequesotanutianiya saniniunijia. Niaa jaara cua nequesotasano riucaaree coteenucuaa, janiyari nia sequenutaniyajuhua cante cua jiyaroquiaari naa cua miiniuriani. ³⁰ Cua riucaaturetoj, ¿cante Tiuquinijiona Juan jiyaroquiaari pueya na tiuquinijionura moojiniani? ¿Narejaca pueyatee, Pueyaso soj? Cua riucaature.

³¹ Jiyacaritij, cuno pueyari jiyasohuaja tama juayonuutunu coteequiaari-jaaja. Naa sequetooquiaariiri:

—Paa jaara na sequereni Pueyaso na jiyaroquiaari, pa riucaarucua: “¿Casaara nocua nia tiyauquiuanucuaarini?” ³² ¿Paatucua taa sequereeri, nojuaja nareja pueya jiyarosano quiquiaari?

Cuno pojoriiri narta Israel pueya puereturiquiaa sequenura, Tiuquinijiona Juanri nareja pueya jiyarosano quiquiaari. Nojoricuaajari ni-ishiriquiaa puetunu pueyajanaari niishiquiaari Tiuquinijiona Juanri seetanujanaa Pueyaso sequesano caminiujjunia quiquiaari. Cunora, nojoriiri Tiuquinijiona Juan rerequetenu pueretuquiaari, pueya quishacari tii.

³³ Naacujitij, maja na naata na riucaatunu quishacari, Jesu sequetureeri:

—Maja canaa niishiniu.

Jesuuri nojori sequeree:

—Janiyajuhua, maja cua sequenu quiniutianiya nijaniya, cante cua jiyaroquiaari naa cua miiniuriani.

12

Miriqui pohuatasano sesa miijiaca poonijonaajiniji

(Mt 21.33-46; Lc 20.9-19)

¹ Jiyacaritij, Jesuuri miriqui pohuatanu coteequiaari cuno pojori niquiara. Cuno camarucua sequereeri:

—Tamonu pueyanoori cuhuariquiajinia uva natoquiaari. Na nuhuaji, na shuriuquioco matacoreeri. Naajuhua, saajia quejaquiaariiri uva rapijiojuara, na caaca reratesaanura. Jyaconajara tiarejaariuhua, tiji na cuhuariquia na cojuajara nohuasejojuacuaji.

² Na nuhuaji, tamasaca poonijionaa pueya na niqutioreeri nojori cojuasocoriquiano nera. Naacujitij, uva carojotasacari, nojoriiri nojuaja niqutionutianiya tijijihuhaj, na camarujanaa na quiniucua. Na nuhuaji, nojuajaari tucuaaanu quiaquiaari, tii marijia na shocotejonura. ² Jaara tari quiquiaari uva carojotasacari, saniya cuhuariquia camarujanaari na seru jiyaroquiaari cuhuariquia cojuanaa pueyaca. Na jiyaroquiaariiri cuhuariquia cojuanaa niqutionura nojori carojotasanojiniji, taa na camarujanaa pocoojoquiaaricuaaja nojoritia tarijiani. ³ Cuhuariquia cojuanaa pueyari saaja jiyarosano seru quiaturee. Na piquitiuriiri. Na

nuhuaji, juhuasu na jiyaroturohua na camarnuucuaari. ⁴ Na camaruuri socua jiyaroquiaari tamonu na seru. Cuno seruuri jacusaaree saitia. Na nacaari surtasaaere saajiata jasanu. Na sesacatureejaariuhuj. ⁵ Na camaruuri socua jiyaroquiaari tamonu na seru. Cuno na seru cutaraari mosaaquiaari. Na nuhuaji, socua jiyaramiquiaari queraatia na seyari. Puetunu nojoriinjinijuanaani, tamasaari piquishaaquiaari. Tamasacaari puecoosaaquiaari cutara.

⁶ 'Cuhuariquia camaruuri saaja niquiriyatujua niyanuniyojua jiitiaquiaari, jyanohua na panishano. Cunora, nojuajaari socua cuno neyanuniyojua jiyaroquiaari. Na queeri tama sequequiaarijaaja: "Cuno pueya jaara niquiri cua niyanu, nojoriiri na tojiniutianiya cutara".

⁷ Cuno cuhuariquiajiniya poonijionaa niquishacari nojori camarnu niyanu nojoriicua niyano, nojoriiri saaja tamajaaja niishitiojotooquiaari:

—iNiioori pa camarnu niyanu! Nio cuhuariquiaari tama nerajaaja quiniutianiya, na que jaara cusoyare. iPa morej! iPocua nio cuhuariquia camaruhuara quiquii tamajaajani!

⁸ 'Cunora, na quiatureeri. Na motureeri. Na motunu nuhuaji, nojoriiri macu jataree cuhuariquiaajiniji tamama.

⁹ Jiyacaritij, Jesuuri cuno pojori nequesotaree:

—¿Taa cuhuariquia camaru miiniutianiya socuani? Nia sequereera pueyanaa. Nojuajaari cuhuariquia cojuanaa puecoonutaniya. Na nuhuaji, tamasa pueya niqutionutaniya cuno cuhuariquiaari, nera nojori cojuanura.

¹⁰ '¿Majateeri tariucuacaanu Pueyaso Rupaajinia nia serojonu quiquianucuaaja nio? Naa sequeyari:

“Tiajonaa pueyari tamaatiujajau saajia jataree nojori tiasacari saijiniji tia. Na nuhuaji, cuno jatasano saajiaari socua cutara saajiaara jiyatesaaro-hua tamasa saijiniji. ¹¹ Cunoori pa Jiyaniijia miishano. Pajaniyara, na miishanoori jyanohua maninia. Nocuaji jiuujiatesano”.

¹² Jiyacaritij, cuno Judiocuaca camaruucuaari niishiriicuaaja miriqui Jesu pohuatasanoori tama nojoriinjiniijiaaja quiriquiaa. Naaratej, nojoriiri Jesu quiatunu panirii juucua, nojori nujuatesocoriquiano. Nojoriiri pueya puereriquiaa saaja, naa nojori miiniuria Jesutej. Naacuajitij, nojoriiri nareja quiojoquiaariuhua. Naa Jesu pohuatasacari miriqui cuno saajiajinijitij, nojuajaari tama na cuaqueyajiniijiaaja pohuatariquiaa.

Jiya jiyaniijia cuaara pueyaracaanu niqutiosaaria na sequesano cumaneeca

(Mt 22.15-22; Lc 20.20-26)

¹³ Na nuhuaji, Jesuucua jiyaramiquishaaquiaariiri noojiaqueya Fariseocacajinijinio, Herodes panijaca pueyajinijiojuhuaj. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotanura nocuara. ¹⁴ Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari seetanujuanaa sequeja. Majaari rimiajata quia niquniu pueyaju-huj. Majaari pueya naata sapojonu quiajaniya. Quiaari seetanujuanaa pueya jiuujia niqijia. Quiaa cutaraari seetanujuanaa Pueyasojiniji niishitiojua, taate pa naata maninia quiniu Pueyaso niqiarani. Naaratej, canaa quia sequere, ¿maniate pa niqutiojonura pa cumaneecajiniji jiyaniijia Césarra, taa cuno tahue sequequiaari pajaniyacuaajani? ¿Taa quia sequeyani, niqutiojoshiyatee, maja soj?

¹⁵ Jesuuri ritia niishiquii, naa nojori nequesotasacari nojuajatej, cuno pojoriiri na saniniujiuriquiaa sesa na pohuatenura najuhuanaj. Naaratej, Jesuuri nojori sequere:

—¿Casaara nia saniniujiya janiyani? Miji nia riri cumanee cua niquishocoriquiano.

¹⁶ Nera rishaareeri cumanee. Jaara na niquiquiaari, Jesuuri nojori nequesotaree:

—¿Cana naaquiti nocuani? ¿Cana sesateeri nocua naajiotasanojaniuhua? Nojoriiri na riucaaree:

—Jiyaniijia César naaquicuaja, na sesajuhua.

¹⁷ Jesuuri jiyacari nojori sequere:

—Jaara tama César casaajaaja quiri, tama na casaajaaja nia niquitiore na camaru. Saniniuuja, Pueyaso nia niquitiore nerano tama na casaajaaja.

Jesu jaara naa nojori riucaquiaaritij, nojoriiri jiyanojua jiuujiatequiaari.

¿Macunucuate samiitiaconutaniuhua?

(Mt 22.23-33; Lc 20.27-40)

¹⁸ Fariseocuaca nuhuaji, noojiaqueya Saduceocuacajinijinoori Jesuucua nijioquiaari. Saduceocuacaari jiyaniya macunucua maja na samiitiaconu quiniutianihua. Naaratej, nojoriiri Jesu nequesotasee nojori niishiniuria taa na sequenutaniya macunucujinijini. Na sequetuseeri:

¹⁹ —Niishitiojonanaa, supuetana Moiséscuajaari pa rootaa na naajioneejinia, pueyano jaara cusoyare mueyaju, tarajanu cuara camiriia mashiquio, mueya na mueratenura tarajanu niti. ²⁰ Tariija, tamonu pueyanoori niya quiquiaari. Siete niquiohuaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri muetuhuoja. ²¹ Naaratej, na nuhuajishanaari tarajanu mashiquio camiquiaari. Nojuajaari muetuhuoja cusoquiaarijuhuaj. Naajuhua, jiyareta na nuhuajishanaari na camiquiaari. Nojuajaari juhua tapueyocuaca cusoquiaari mueyajujuhua.

²² Cuno siete canuuri naa camiyocuaari cuno maaji. Puetunu nojorijianaari cusonuuquiaari. Majaari quenaaja niquiriyatujua mueya nojori mueratenu quiquiaari. Na nuhuaji, cuno maajiiri cusoquiaarijuhuaj. ²³ Naacujitij, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

²⁴ Jesuuri nojori riucaaree:

—Niaari jiyanojua jiyajeneya Pueyaso Rupaajinia naajiotasano nia ni-shiyaquishacari, Pueyaso cumaacanio. ²⁵ Macunucua samiitiacosacariuhua, majaari canuu camiyonu quiniutianiya maaji. Naajuhua, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuaaanu quijiaca Pueyaso seya, maja camiyosano. ²⁶ Niaa macunucua samiitianijionujiniji nequesoreetaate. ¿Majateeri nia serojonu quiquiaacuaja supuetana Moisés naajioneejinia, taa Pueyaso sequequiaari Moiséscuaja nequeru casaja noshiyanojinijini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijajuhua, quia supuetana Jacobo Jiyaniijiano”.

²⁷ Naacujitij, paari niishiyani Pueyaso pueya shaajeconoori saminiucua quiya Pueyasora cutara. Pueyasoori maja macunucua Jiyaniijia, saaja saminiucua pueya Jiyaniijia cutaraari. Janiyari cunora nia sequeyani, niaari jiyanojua jiyajeneya nia niishiyaquiniucua Pueyaso Rupa.

Puetunu Pueyaso Rootasanojinijianaani, teyanote socua pa tojishocoriqianoni
(Mt 22.34-40)

²⁸ Tamonu pueyanoori Jesu tojiriquiaa Saduceocuaca riuhaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuacaanu Pueyaso Rootasanojinijiniote socua pa tojishocoriqianoni?

²⁹ Jesuuri na riucaaree:

—Pueyaso sequesano socua na pueya tojishocoriqianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijijanaa. Majaari tamonu quiniu socua. ³⁰ Nia Jiyaniijia Pueyaso nia paniri puetunu nioojiatjanaa, puetunu nia sohuanutajanaa, puetunujanaa nia niishitiajata, puetunu nia cumaacatajanaa”. Nio rootasanoori socua pa tojishocoriqiano puetunu Pueyaso rootasanojinijijianaa. ³¹ Socua tarajanu na rootasano pa tojishocoriqianoori quera juhua coteenu na rootasanojuhuaj. Naa sequeyari: “Quiarta pueyano quia paniri taa quia paniyacuaa tama quia cuaqueyajaajani”. Puetunu Pueyaso rootasanojinijijianaani, majaari socua tamonu rootasano quiniu socua tojishocoriqiano nio caapiqui na rootasanojiniji.

³² Jiyacaritij, cuno Moisés Rootasanojiniji niishitiojonaari na sequeree:

—Quiaacuaja maninia sequeree, niishitiojonanaa. Seetanujanaari quia sequesano: quiyacuaaquinateja niquiriyatujua Pueyaso. Majaari socua tamonu quiniu juhua nojuaja. ³³ Seetanujanaa jiyanhua maninia cutaraari Pueyaso pa paniniuria puetunu poojiatajanaa, puetunujanaa pa niishitiajata, puetunu pa sohuanutajanaa, puetunujanaa pa cumaacatano. Naajuhua, jiyanhua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojijiaa quirini, cunoori jiyanhua socua maninia Pueyasora, puetunu seya catijasanojinijijianaa nocuara, mariyata puetunu pueya niquitiojosano na casamijiniijijianaa nera.

³⁴ Jesu jaara tojiquiaari naa cuno pueyano riuucasano maninatej, na sequereeri:

—Quiaaqui quera Pueyaso pueyanora quiya.

Na nuhuaji, majaari socua pueya nequesoretanu paniniu quiriquiaa Jesu.

¿Canaacuajinio supuenote Cristoni?

(Mt 22.41-46; Lc 20.41-44)

³⁵ Jesuuri Pueyaso Secojoja tiajinia niishitiojoriquiaa pueya. Jiyacaritij, nojuajaari na tojtianaa pueya nequesotaree:

—¿Casaara Moisés Rootasanojiniji niishitiojonaa sequequiaacuaarini: “Cristonaari supuetana David niquiohuacuajinio supuenutaniya”?

³⁶ Pueyaso Sohuanu pohuatesacari supuetana David, nojuacuajaari sequequiaari:

“Jiyaniijia Pueyasoori cua Jiyaniijia Cristo sequeree: ‘Quia cajirijiaara cua miaquetajara, janiya cuara quia paraa shocojotare quioacuajijiaati-
jia, Jiyaniijijanaa quia quiniuria pueyaracaanu cutara’ ”.

³⁷ Supuetana David jiyaniijiacasacari Cristo, ¿Cristotucua taa supuetana David niquiohuacuajinio supueno quirini? Davidcuajaari na jiyaniquiya “cua Jiyaniijia”.

Queraatia pueyari shanhua tojtiriqiaa Jesu pohuatasano.

Jesu sequesano Moisés Rootasano niishitiojonaajiniji

(Mt 23.1-36; Lc 11.37-54; 20.45-47)

³⁸ Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojonacuaji. Cuno pojoriiri puera tucuaque toque cushiyonu maniniucuaa nojori rucuanetajara, pueya shootianura nojori. Nojoriiri timiquiaa pueya saruhuatasaacari nojori, nojori quishacari tiaca jiuujajinia curotasano cajitiucuaajinia. ³⁹ Nojori jaara masuusaare tamonu tiajinia queranacunura, nojoriiri ritia secooquiaa socua panishano cajitiujinia nojori cajitiuniuria tia camaru shuriucua. Naajuhua, Pueyaso secojojua tiacajini-aqueya pueya rerejosacari, nojoriiri camarucua cajitiucuaajinia cajitiuniu paniquiaa, pueya shootianura nojori. ⁴⁰ Nojoriiri mashiquipue tiaca masequiaa secaja cumaneecata nojori na sapojonuta. Naa nojori miiniu nuhujitij, nojoriiri Pueyaso secojoquiaa shitiarayocua pueya niquiara, maninia pueya nojori jyanishaanura. Naaratej, Pueyaso saniitiosacari maninia miyashijia pueya, nojoriiri socua jyanohua naquiya miishaanutaniya tamasaajiniji.

Casamijiu mashiquio niquitiosacari na cumanee juuranee Pueyasora (Lc 21.1-4)

⁴¹ Tamacari, Jesuuri cajiriquiaa Pueyaso Secojoua tiajinia cumaneeca niquitiojoua tacoji, tee pueya niojoriquiaa na cumaneeca Pueyasoracua-jani. Jesuuri tiji pueya shootariquiaa na cumaneeca niquitiojiano. Queraatia casamiriaca pueyari queraatia cumaneeca niquitiojoriquiaa.

⁴² Jiyacari tiuquishijiaariuhua casamijiu mashiquio. Caapiqui cumaneeniyojua niasee cumaneeca niojojuajiniaari. Cuno cumaneeca na niasanoori maja puera cumaneeca na quiniu quiriquiaa. Saaja cobrejiniji shipinishano quiquiaariiri. ⁴³ Jesuuri jiyacari na saquiriojosano pueya piirii. Nojori sequereeri:

—Seetanujuanaa nia sequeyanijia, nio casamijiu mashiquio cutaraari socua queraatia niquitioree puetunu tamasaajinijijanaa. ⁴⁴ Puetunu pueyajanaari na cumaneeca curenojiniji niquitiojoriquiaa. Saniniuujia, nio maajiiri puetunujuanaa na miaquesocoriquiano na masetajarano niquitioree cutara.

13

Jesu sequesacari Pueyaso Secojoua tia niyartasaanutaniya (Mt 24.1-2; Lc 21.5-6)

¹ Jesu tohuareetasacari Pueyaso Secojoua tiajiniji, tamonu na saquiriojosano pueyajinijinioori na sequereeri:

—Niishitiojonanaa, quia niquiri Pueyaso Secojoua tia, puereetujuaaca saitia tiasano. jJyanohua shanohua tia!

² Jesuuri na riucaaree:

—¿Quiaateeri cuno shanohua tia niquiya, saijiniji tiasano jiyaconajani? Cuniqui, majaari saajia cureenu quiniutianiya tamonu caco maano quenaaja. Puetunu niyartasaanujuanaa quiniutianiyari.

Taa pa niishiniutianiyani jiya puequesacari quera (Mt 24.3-28; Lc 21.7-24; 17.22-24)

³ Na nuhujaji, nojoriiri quiojoquiaari olivo cuhuariquia tuhuananuucua. Cuniquiji, maja puera tucuaaanu quiquiaari Pueyaso Secojoua tia. Na taquijirajia quiquiaariiri. Jesu cajishacari tii, nocua catecanoquiaariiri Pedro, Santiago, Juan, Andrésnio. Nojoriiri na sequetuquiaari jiyasohuaja:

⁴ —Canaa quia sequere taacari Pueyaso Secojoua tia niyartasaanutaniyani. ¿Casaa Pueyaso miiniutianiyani canaa niishiniuria quia sequesano quera tohuateya?

⁵ Jesuuri nojori riucaaree:

—Tama nia cuaqueyajaaja nia cojuare tamasaca sapojiyaquiniuucuaaji niajaniya. ⁶ Nia numooteyacuajanijia, queraatia sapojonuujuaacari nijionutaniya nojori sequenura niajaniya: “Janiya Cristoni”. Naa sapojotunutaniya queraatia pueyari.

⁷ Naa jaara tojiniuuri miaquetoohonujiniji niya, tucuacaanujuhuaaj, maajaari najuhuaana nia shiriiquitiuniu. Seetanujuanaa naa quiniutianiyari. Naajaa, jiyacari, majaari jiya puequesacari quiniutianiya juhuanojuaja.

⁸ Tamonu rupaa pocuajacaari miaquetoohonutaniya tamaatiuucuaa rupaa pocuajacata. Pueyari tamonu jiyajiniji miaquetoohonutaniya tamonu jiyajinijinio pueyata. Naajuhuaaj, rijiaari jiuuquiujiutianutaniya queraatia tiqiyocua tiacajinia. Jiyanohua miaajesacariiri quiniutianiya jiyacari. Naajaa, puetunu niojuanaari saaja shusha naquiya miiniu coteesacari quiniutianiya.

⁹ Tama nia cuaqueyajaaja nia cojuare. Niaari tama nia tiacajinia jiyaniijianucuaajaaja niqutiosaanutaniya saniitosocoriguano. Naajuhuaaj, niaari Pueyaso Secojoua tiacajiniajanaa majacusaanutaniya. Naaari jiyatasaanutaniyajuhaa tiaca jiyaniijiaacua, jiya jiyaniijianucuaacuanio, nojori nequesoreenura niajaniya, janiyajiniji pohuatanaa nia quiniuucua. Naacuajitij, niocua janiyajiniji pohuatara nojori niquiarajuhuaaj. ¹⁰ Jiya puequeyaquishacarijia, Pueyaso rupaari tari pohuatasano quiniutianiya puetunu jiyacajiniajanaa. ¹¹ Cua tojiri, niaa jaara jiyatashiyare jiyaniijianucuaacua nequesoreesocoriguano, majaari nia tacaniu taa nia sequenutaniyani, taa nia pocuanutaniyani. Majaari quenaaja nia niishiriojonu naatej. Saaja nia sequere nojori niquiara jiyacari Pueyaso Sohanu niishitiojosano niajaniya. Nia pocuasanoori maja niajanijajiniji quiniutianiya, nia pocuasacari nojori niquiara. Cunocujajari Pueyaso Sohanu niishitishano quiniutianiya, na pocuatesacari niajaniya. ¹² Jiyacarijihuaaj, pueyanoori sesa miiniutianiya tama tarajanujuaaja, cua tojjia tarajanu quiniuucua. Tama tarajanujuaarijia na niqutionutaniya mosocoriguano. Jiyacaritij, pueyari tama necohuaajaaja miiniutianiya sesa, cucua tiuujiaca necohua quiniuucua. Naajuhuaaj, necohuari tama na queya tacartanutaniya monujuaaja, na queya tojiniuucua Pueyaso rupaa. ¹³ Puetunu nio jiyajinijinio pueyajaanaari maja na niqiniu paniniu quiniutianiya niajaniya, cua tojtiajaca nia quishacari. Naajaa, cante seetanujuanaa pueyaracaanu cucua tiuyajaani nio jiya jaara puequerejaatijia, nojuaja cutaraari shantuuca quijiaara jatanishaanutaniya, pueyaracaanu cuata na quiniuria shuquiriaatia.

¹⁴ Naa jaara cuno jiyanohua sacuaraatia casaa niqiri Pueyaso Secojoua tiajinia nujuatesano, taa supuetana Daniel sequeya na naajloneejiniacua-jani, niocua ritia mashiri. (Cante nio serojiyani, nojuaja cuara niishiiria casaa na sequeyani.) Judea jiyajinia quiniaa cuara mashiiria ritia tuhuanahuacua, cuno sacuaraatia casaa jaara nujuatesaare Pueyaso Secojoua tiajinia. ¹⁵ Canapueje jiyacari quiya na tia cacojiriani, nojori cuara tiuquiti-aquiiiria tiajiniaaco na casaa na riniuria juucua. ¹⁶ Canapueje jiyacari quiya na cuhuariquajiniani, nojori cuara tacateyaquihuara na toqueya na poonuhuaa. ¹⁷ Jiyacaritij, jiyanohua taraatia quiniutianiyari maajipohuara, nojori jaara manajaatohua quiya, jaara jiyacari jiitiare supuejaca conaajajuhuaaj. ¹⁸ Nia secojosacari, Pueyaso nia maseriquia juhuacarijia, nia mashiycuatusacari cuara quiyaquiiiria shiniquia quishacari. ¹⁹ Cuno quishacari, jiyanohua naquiya miiniuuri quiniutianiya. Tariucuaaanu, majaari naa naquiya miiniu quiquiaari Pueyaso shipininiu nuhuaji nio jiya. Naajuhuaaj, cuno naquiya miiniu nuhuaji, majaari jiyano naquiya miiniu

quiniutianihua socua, juhua nio. ²⁰ Pueyaso jaara ritia tajitijaquiri cuno naquiya miiquiosacari, pueya maara mijiria cureyaquirij. Pueyasocujaari ritia tajitiniutianiya cuno naquiya miiniu, na saquiriojosano pueyacua na taraajenuucua.

²¹ Jiyacaritij, tamasaca jaara nia sequere: “Nia niquiri, Cristo tari niya quiya”, jaara sequerejuhuaj: “Nooj, jati quiyatej”, majaari na tojtianunoj. ²² Jiyacaritij, queraatia sapojonuujuacaari supuenutaniya. Nojoriiri sequenutaniya: “Janiyacuja Cristoni”. Tamasacaari sequenutaniyajuhuaaj: “Janiya Pueyaso sequenu panishano caminiujiuniani”. Nojoriiri pueya niquishoo casaa miiniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaniya. ²³ Cunora pueyanaa, tama nia cuaqueyajaaja nia cojuare. Janiyacuajaari tari juhuacarijia nia numooteyani. Majaari cua sequesano nia niyajetanu.

Pueyaso Niyanu tacatenujiniji pahuatasano

(Mt 24.29-35, 42, 44; Lc 21.25-36)

²⁴ 'Naa naquiya pueya miiniu nuhuajitij, pananuuri ninishiquiria quiniutianiya. Naajuhuaaj, racaari maja na cuhuatanu quiniutianiya mijiria. ²⁵ Riyari totenutaniya. Jiyocuaaanu cumaacaraca quijiacaari tetecanutaniyajuhuaaj. ²⁶ Jiyacari, janiya Pueyaso Niyanuuri niquishaanutaniya jiyocuaaanuji roseyano cohuajajiniani, jianohua shacantuuca cua cumaacata. ²⁷ Jiyacaritij, janiyari cua seya jiyaramiquiniutianiyanoni nojori rerejotenura puetunu cua saquiriojosano pueyajanaa. Nojoriiri puetunu nio jiyajinijiniujuanaa rerejotesaanutaniya, socua jianohua tucuaaanu jiya cajiniocua puequeetujinijino.

²⁸ 'Quiarijia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacua jaara macumaaca quiri, quiarinio jaamasucuaari mueratumohua. Naa jaara naa niquiritij, niaari niishiquiaa tacareejonuqui quiniutianiya. ²⁹ Quiarijia saniniuujia, naatej taa nia niishiquiaa higo naanacuaani, niocua naa niishirijuhuaaj janiya quera tiuquihuani, niaa jaara puetunu cua pohuatasanojuanaa niquiri tohuatayano. ³⁰ Seetanujuanaa nia sequeyanijia, puetunu cua pohuatasanojuanaari niquishaanutaniya nio pa quishacari quiniaa pueya cusonuyaquishacarijia. ³¹ Jiya cajiniocuaari shaajenutaniya, nio jiyajuhuaaj. Cua Rupaa cutaraari maja na jatanu quiniutianiya. Cua sequesanoori puetunujuanaa tuhuatenuutaniya.

³² 'Maja cutaraari nia niishiniu taacari cua tiuquiniutianihuani, casaa juucatej. Majaari jiyocuaaanu quijiaca Pueyaso seya niishiniuujuhuaaj. Janiyajanaari maja cua niishiniu. Saaja cua que Pueyaso cutaraari tamaaja na niishiya.

³³ 'Cunora, janiyari nia sequeya cutarani, maja juhua maquenuujujuaca nia quiniu. Pueyaracaanu nia niqutiare cucuaji, juhua sutejaca. Tamajaaja nia soquere. Saaja pueyaracaanu nia secojoriquia Pueyaso. Majacuajaari nia niishiniu taacari cua tiuquiniutianihuani. ³⁴ Cunoori quiniutianiya juhua tamonu pueyano quianu panishacari tamonu jiyajiniara tucuaaanu. Na quianura, nojuajaari na seya seerataaree maninia nojori cojuanura na tia. Tamasaca niqutiouyaree na poonijosanoori, nojori poonijosocoriquiano. Tamonu sequereeri, tohuateyaji na cojuanura pueyaracaanu, nojuaja cuaara tiuquihuaraajaatijia. ³⁵ Naaratej, nia sutere. Maja maquenuujunu. Majaari nia niishiniucuaaja taacari tia camaru tiuquiniutianihuani, shusha nishacari, shiyaqueya, caacaraja niunijosacari, tariquicuaji soj. ¿Taacari cua tiuquiniutianihuani? Johuaaj, maja pa niishiniu.

³⁶ Cunora, juhua sutejaca nia quiriquia, janiya mariqui nia jiyajenete-suhuari, canashiyaquiji cua tiuquishacariuhua niaacua. ³⁷ Cua sequesano nijaniyani, cunoori puetunu pueyarajanaa: “¡Nia sutereja! ¡Maja maquenu!”

14

Judiocuaca camarucua rojotoosacari nojori quianura Jesu (Mt 26.1-5; Lc 22.1-2; Jn 11.45-53)

¹ Jiyacari, juhuanajuaja querajaa juuca quiriquiaajaari Pascua juucara queranacunura. Pascua juucajuhaaj, poreetajaaju shipinishano pan maquenu coteesaquiaari siete juucara. Pueyacuara secojonaa jiyaniijianucuaari jiyacari Moisés Rootasanojiniji niishitiojonaata rojotooriquiaa Jesuucua. Nojoriiri rojotooriquiaa taa nojori saPONONUTA nojori quiatunutaniya Jesu jiyasohuajani, na motusocoriquiano. ² Nojoriiri naa sequetooriquiaa:

—Maja queranacusacari naa pa miiniutij, paa mariqui puetunu pueyajanaa juaatiriiri.

Tamonu maaji totasacari na shanhua jaanutaja Jesuucua (Mt 26.6-13; Jn 12.1-8)

³ Jesuuri Betania tiacajinia quiriquiaa Simón tiajinia na saquiriojosano pueyataja. Cuno Simónri tarijia lepra cusotaja quiquiaari. Jesu cajishacari tii miaquejajinia, tamonu maajiiri tiuquiquiaari. Shiitaniyojua shucuariquiaja pataconiyojua cacatariquiaari, shanhua cohuaja saajiajiniji quejasano. Mishaja quiriquiaari shanhua jaanutajata, nardo jaamasucujajiniiji shipinishano. Jiyanhua queraatia cumaneecata masesano quiquiaariiri. Jiyacaritij, cuno maajiiri na shucuariquiaja pataconiyojua cocuataree, na totanura Jesu nacaacua. ⁴ Tamasaca tii quiniaa pueyari juaarii naa cuno shanhua jaanutaja niitiasaanucua. Tama nojoriijaarijia sequetooriquiaa:

—¿Casaara cuno shanhua jaanutaja niitiasaaree najuhuanani? ⁵ ¡Cuno jaanutaja maara niquitiosaacanu queraatia cumaneecara, casamiijiuniucua niquitiosocoriquiano!

Nojoriiri juhuacatecara cuno maaji juaarii.

⁶ Jesuuri nojori sequere saaja:

—¡Nia tariniutare! ¿Casaara nia rimiaaqueya nio maajiucarani? Naa na miishano janiyani, cunoori jiyanhua maninia quiria. ⁷ Casamiijiuniucua pueyacuajaari pueyaracaanu quiriquiano niaata. Nia naatacuajaari maninia miiniu nojori nia panishacari. Janiya saniniuujia, maja cutaraari cua quiniu quiniutianiya pueyaracaanu niaata. ⁸ Nio maajiiri maninia miiri. Majaari na naata miiniu quiriquiaa socua maninia nio na miishanojiniji. Na totasacari cucua na shanhua jaanutajani, nojuajaari juhuacarijia cua cuaqueya jeenucuaa, raaco cua niasaanura janiya jaara mosaareni. ⁹ Seetanujuanaa nia sequeyanijia, puetunu jiyacajinijanaa tee Pueyaso rupaa pohuataaanutaniyani, nio maaji miishanoori pueyaracaanu pohuataaanutaniyajuhaaj. Naa na miishano janiyatej, majaari na niyajetasaanu quiniutianiya.

Judas tacartasacari Jesu, na quiatenura (Mt 26.14-16; Lc 22.3-6)

¹⁰ Jiyacaritij, Judas Iscarioteeri quiaquiaari pueyacuara secojonaa jiyaniijianucuaata rojotoonura taa nojori na quiatenutaniya Jesuni. Nojuajaari Jesu saquiriojosano pueyajinijinio quiquiaarijuhaaj. ¹¹ Jiyaniijianucua

jaara tojiqiaari, Judas nojori quiatenu paniya Jesu, nojoriiri jiyanoehua shuquiriri. Nojoriiri Judas sequeree:

—Canaa quia niqutionutaniya cumaneecani, canaa quia quiatenu sami Jesu.

Cunora, Judasri niishiriojonu coteeqiaari taacari nojori na quiatenu-taniya Jesuni.

Jesu miaquesacari na nuhuajiria na pueyata
(Mt 26.17-29; Lc 22.7-23; Jn 13.21-30; 1 Co 11.23-26)

¹² Puetunu marijarajanaa, Judiocuacaari Jerusalén tiacajinia rerejo- quiaari poreetesoo pan nojori miaquenuunura siete juuca. Coteenu juuca sesaari quiqiaari “Pascua”. Cuno juuca puecoosaquiaariiri Pascuara ri- riotaca borregohua, Pueyaso niqiaara miaquenuosocoriquiano. Naaratej, Pascua juuca quishacari, Jesu saquiriojosano pueyari Jesu nequesotaree:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiariria Pascuarani?

¹³ Jiyacaritij, Jesuuri caapiqui na saquiriojosano pueyajinijinio sequeree:

—Nia quiaare Jerusalén tiacajinia. Niaari tii riuriatanutaniya tamonu pueyano, na mohuaca pataano na patacojinia. Niaa jaara na riuriatasee, niocua na nuhuajimia. ¹⁴ Jaara tiuquishii tiajinia, niocua cuno tia camaru se- quesee: “Niishitiojona naa quia sequeya: ‘¿Tee cuniqui cua miaquenuutaniya cua saquiriojosano pueyata quiariria Pascua niucuan?’ ” ¹⁵ Jiyacaritij, no- juajaari nia niqitiniutianiya pueretuuca sohuaca, jiyocuacaanu nataco, tariucua maninia jeenucuasano. Niocua cuniqui borrego majeetesee, niu- cua pa miaquesocoriquiano.

¹⁶ Na saquiriojosano pueyari quiojoquiaari. Tiacajinia tiuquijioseeri. Nojori tiuquijiosacari, nojoriiri puetunujuanaa riuriatasee taa Jesu se- queree nojoricuajani. Nojoriiri tii majeetesee borrego, Pascuara miaqueso- coriquiano.

¹⁷ Jaara niniquiaari, Jesuuri tiuquijioseer na saquiriojosano doce pueyata.

¹⁸ Nojori miaquenuusacari, Jesuuri nojori sequeree:

—Seetanujuanaa nia sequeyanijia, tamonu niajanijinijinio niya cuata miaqueyani, nojuajaari cua tacartanutaniya na quiatenura janiya, naquiya cua miishaanura.

¹⁹ Jesu sequesacari naatej, nojoriiri jiyanoehua taraajequee. Jiyacaritij, tama nojoriijaarijia na nequesoreetanu coteeree:

—¿Janiya jiyoteeri quia quiatenutaniyani Jiyaniijianaa?

Puetunu nojorijianaari naa na nequesotaree.

²⁰ Jesuuri nojori riucuaere:

—Niqiriyatujua doce niajanijinijiniocuaja, nojuacuajaari nio, shusha pan shiya miacojuajiniani, nojuajaari cua quiatenutaniya. ²¹ Janiyacuajaari maninia tohuateenutaniya puetunujuanaani, taa tariucuaaanu Pueyaso Rupaajinia janiyajiniji naajiotasaaquiaaricuajani. Saniniuuja, jiyanoehua taraatia quiniutianiyari cuno pueyanora, cantucuaja cua quiatenutaniya mosocoriquianoni. Maara socua maninia quiqiaari cuno pueyanora, no- juaja jaara raaquishaaquiaari.

²² Nojori miaquenuusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niqutiojoreeri. Na niqutio- josacari, naa miriqui sequequiaariiri:

—Jajaa. Nia miaguere. Nioori cua cuaqueya.

²³ Na nuhuaji, Jesuuri ratujua pataree. Na Que Pueyaso secojoreeri nojori ratusocoriquianoocuara. Na secojonu nuhuaji, na saquiriojosano

pueya niqutioreeri nojori ratunura tiji. Puetunu nojorijianaari ratujuajiniji raturee. ²⁴Nojori sequeree miriquiiri:

—Nioori cua nanaca. Cua nanacaari queraatia pueyacuara shoonutaniya. Naacaujitiij, Pueyasoori seetanujuanaa jiyanoonutianiya pueya, saaja nojori tiuuniucua cucua, taa Pueyaso sequequiaaricujani. ²⁵Seetanujuanaa nia sequeyanijia, maja socua cua ratunu quiniutianihua uva caacajiniji, janiya cuara tacatemohuajaatijia pueyaracaanu Jiyaniijiajanaa cua quiniuria. Jiyacaritij, janiyari shusha niaata na ratunutanihuani.

Jesu sequesacari Pedro, nojuaja nocuaji seetanutaniya
(Mt 26.30-35; Lc 22.31-34; Jn 13.36-38)

²⁶Pueyasora na jaaquequenuunu nuhuaji, nojoriiri quiojoquiaari olivo cuhuariquia tuhananuucua. ²⁷Na quiojosacari, Jesuuri nojori sequeree:

—Nio niucujani, puetunu nijaniyajanaari cucua tiuuniu tarinitianutaniya. Naa naajiotasano quiyacuajaari nijaniyajiniji tariucuaaanu Pueyaso Rupaajinia. Naa sequeyari:

“Janiyari borrego Cojuana monutaniyani. Na borregohuari na camaru nuhuaji niyaquejonutaniya tamajaaja”.

²⁸Na nuhuaji, janiya jaara samiitiarohua macujinijini, janiyari nia puetanutaniya Galilea jiyajiniani.

²⁹Pedroori jiyacari Jesu sequeree:

—Niya cuata quiniaa naasucua quiocuaji carajenutaniya. ¡Janiya cutara maja cua catenu quiniutianiya quiocuaji!

³⁰Jesuuri saaja na sequeree:

—Pedronaa, janiya seetanujuanaa quia sequeyani, nio niucujani, quiaari janiyajiniji naa seetanutaniya pueya niquiara: “¡Maja cua niishiniu Jesu!” Quiaari naa pacutejonutaniya sequenutej, caacaraja caminiujiaquishacarijia niunijionu.

³¹Pedroori saaja na pataariquiaa naa Jesu sequesacari nojuajatej. Socua sequerohuari:

—¡Janiya cuara mosaaria quiataqui, naajaa, majaari cua seetanu quiniutianiya quiocuaji!

Narta saquirojosano pueyari naa sequetureejuhuj.

Taraatia Jesu secojosacari Getsemani cuhuariquijinia
(Mt 26.36-46; Lc 22.39-46)

³²Nojoriiri jiyacari tiuquijioquiaari tamonu cuhuariquijinia. Cuno cuhuariquia sesa quiquiaari Getsemani. Jesuuri na saquirojosano pueya sequeree:

—Niyaja nia cajitiuri, cua secojosacari cua Que socua nia tacoji.

³³Nojuajaari saaja nocua rupojijaree juujianaraca na pueya: Pedro, Santiago, Juannio. Jesuuri juhuacatecara shiriiquiriquiaa. Tacaariquiaa-jaariuhuj. ³⁴Nojori sequereeri:

—¡Coojajinia taraajeya jiyanoahuanijia, quera cusoyanijia! Niyaja nia jiyotetare. ¡Niocua niqutiareja! ¡Majaari maquenu!

³⁵Jesuuri socua shiitianiyojua quiaaree nojori tacoji. Na secojonura Pueyaso, mojuquetaseeri. Jiyocuaa jacamaquiaariiri. Pueyaso masereeri, maja naquiya na miishaanura juucua. ³⁶Na secojosacari, nojuajaari naa sequequiaaritij:

—Cua Quenaa, quiaara maja jiyajeneta quia panishano quia miiniuria. Naaratej, janiya quia secojijani, nio raatonuque cucuaji quia tajitiri. Naa-jaa, cuara quiyaquiiiria juhua cua panishano. Saaja cuara quiiiria cutara taa quia paniyacuajani.

“Nio raatonuque” na sequesacari, Jesuuri miriqui sequeriquiaa naquiya na miishocoriquiano.

³⁷ Na secojonu nuhuaji, na saquiriojosano pueyacuatacategyarohuari. Nojori riuriatasuhua maquetiuyanoori. Jesuuri Pedro sequere:

—Simónnaa, ¿quiaate maqueya? ¿Majateeri quenaaja quia naata rejeretanu rupaquijia quia maquenu? ³⁸ Nia sutere. Maja maquenu. Pueyaso nia secjore niaa mariqui sesa miitishaareeri. Seetanujuanaa, poojiaari maninia miiniu panijia. Pa cuaqueyari saniniujia sasaca quiyacujua. Majaari pa naata maninia miiniu pa panishano tamajaaja. Cunora, Pueyaso nia secjore na cumaquiniuria nijaniya maninia nia miiniuria.

³⁹ Jesuuri quiaquiaariuhua socua secojonuhua. Na secojosacari, socua sequenu pacutequiaariiri juhua coteenu na sequesano. ⁴⁰ Na nuhuaji, socua tacatequiaariuhua na saquiriojosano pueyacuataari. Nojori riuriatasuhuarihua maquetiuyano. Nojori namijiaari saaja seecutayariquiaa na maquenuujunuta. Jiyacaritij, nojoriiri maja na niishiniu quiriquiaa taa na riucuatunutaniyanoj. ⁴¹ Jesuuri socua quiaquiaariuhua na Que secojonura. Na tacatesacariuhua secojonujiniji, nojori sequesuhuari:

—¿Niaate maquetiuyajaa? ¿Niaate samaateyajaa? ¡Tariucujaa! ¡Quiarijia cutara janiyari sesa miijiaa pueya quiatesaanutaniyani, nojori miiniuria janiya taa nojori panitiyacujani! ⁴² Nia saneecuate. Pa quiaare. Cua quiateriquiano tari cumaji.

*Na paraa quiasacari Jesu
(Mt 26.47-56; Lc 22.47-53; Jn 18.2-11)*

⁴³ Jesuuri pocuariquiaajaa Judas tiuquishacari nojoriicua. Cuno Judasri, Jesu saquiriojosano doce pueyajinijino quiquiaarijuhuaj. Queraatia pueyari Judasta nijioquiaari. Cuno pueyari nijiniaquetucujaa mueruu pooriquiaa, macacanio. Cuno pojoriiri pueyacuara secojonaa jiyaniijianucua jiyaramiquishano pueya quiquiaari, Moisés Rootasanojiniji niishitiojonaa jiyaniijianucua jiyaramiquishanojuhuaj, Judocuaca camarucua jiyaramiquishanonio. ⁴⁴ Judas, Jesu quiateriquianoni, nojuajaari juhuacarijia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacarini, cunocujaaari nojuaja. Niocua na quiaase. ¡Niaari maninia morojosano jaatucutaarohuaquinioj!

⁴⁵ Naacuajitij, Judas jaara tiuquiquiaari Jesuucua, nocua catecanoquiaariiri. Na sequereeri:

—¡Niishitiojonanaa!

Jiyacari na nujuureeri. ⁴⁶ Judasta nijionaa pueyari jiyacari Jesu quiaase. Morojosanoori jaatucutashiyarohua.

⁴⁷ Cuniqiu Jesuta quiniaa pueyajinijiononi, niquiriyatu nojoriijinijioori na shuucujai shitiaquiaari nijiniaquetucujaa mueruu. Nata jaateree pueyacuara secojonaa jiyaniijia seru numocoori. ⁴⁸ Jesuuri nocua nijionaa pueya sequere:

—¿Casaara cucua nia nijioree nijiniaquetucujaa mueruutani, macacatano, morojosano nia riniuria janiya juhua nohuasejojuani? ⁴⁹ Janiyacujaaari puetunu juucajanaa nia tajinia quiquiaani, Pueyaso Secojoua tijania cua niishitiojosacari pueya niqiara. Majaari tii cua quishacari nia quianu quiquianu janiya. Naajaa, naa nia miiriqui, tariucuaaanu janiyajiniji Pueyaso Rupaajinia naajiotasano tohuateenura.

⁵⁰ Jiyacaritij, puetunu Jesu saquiriojosano pueyajanaari na shuriucujai mashiyocuatucujaaari. Tamajaaja Jesu tiujiatucueeri. ⁵¹ Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco.

Nojuajaari saaja puereetuque lino toquerauta cuhuaajaatiariquiaa. Jesu quiatunaa niquishacari nojuaja, na quiatureejaariuhua. ⁵²Nojuajaari saaja na toque tiujaquee nojori juaashiquiajinia. Juhuaasuuri ritia netequee. Mashimiaari. Janiyacuajaari cuno pueyano quiquiaarini, nio naajiona-juhuaj.

*Judiocuaca camarucua nequesoreesacari Jesu
(Mt 26.57-68; Lc 22.54-55, 63-71; Jn 18.12-14, 19-24)*

⁵³ Jesu quiatunaaari Jesu jaatucuquiaari pueyacuara secojonaa jiyaniijia tiajinia. Puetunu nio pojorijianaari tii rerejoquiaari: pueyacuara secojonaa jiyaniijianucua, Judiocuaca camarucua juhuaj, Moisés Rootasanojiniji niishitiojonaanio. ⁵⁴ Pedroori Jesu nuhuajiquiaari tucuaaanuji. Jateeseeri pueyacuara secojonaa jiyaniijia tia carijiniacuma. Cuno jiyaniijijanaa seya tajinia cajishiiri. Mani jitiuriquiaa nojoritia cuniquiri.

⁵⁵ Pueyacuara secojonaa jiyaniijianucua, puetunu Judiocuaca camarucua janaari niishiriojonuuriquiaa nojori saquiriojotanura Jesuucua. Jesuucua tonujuriquianoori pajesaaquiaari juucua, na motenura. Saaja shaaqui quiquiaariiri sesa casaa, nocuara tonujusocoriquiano. ⁵⁶ Queraatia pueyari nocuara tonujuriquiaa juucua, nojori sapojonuta. Nojori saquiriojotanoori saaja rimiajata quiriquiaa puetunujanaa. ⁵⁷ Na nuhuaji, tamasacaari sanetaquiaari nocuara nojori tonujunura na sapojonutajuhua. Nojoriiri naa sequetuquiaaritij:

⁵⁸ —Canaa na tojiqianu sesa sequeyanoni. Naa sequecanuuri: “Janija nio Pueyaso Secojoua tia niyartanutaniyani, pueya tiasanoni. Jiuujianaraca juucajinia, janiyari tamajaaja na tianu tucuatanutaniuhua. Cunoori maja pueyata tiasano na quiniu quiniutianiya”.

⁵⁹ Nojori saquiriojotanoori saaja rimiajata quiquiaari jiyaniijianucua niqiuara.

⁶⁰ Jiyacaritij, pueyacuara secojonaa jiyaniijiaari nujuaree pocuanura. Jesu nequesotareeri:

—¿Majate quenaaja quia riucuanuujua? ¡Quia tojiri, pueyaruhua quiocuara tonujija!

⁶¹ Jesuuri saaja sanaa nujuariquiaa. Majaari na riucuanu quiriquiaa quenaaja. Pueyacuara secojonaa jiyaniijiaari socua na nequesotaquiaariuhua:

—¿Quiaate Cristo, jiyocuacaanuji Pueyaso Jiyarosano?

⁶² Jesuuri na riucuaaree:

—Jaa, nojuacuajanjia. Niaari cua niquniutianiya jiyocuacaanu cumaaca Jiitiana miaquetajara cajiyano. Na nuhuaji, niaari cua niquniutianiya tacatehuano cohuajajinia jiyocuacaanuji.

⁶³ Pueyacuara secojonaa jiyaniijia jaara tojiquiaari naa Jesu sequesantej, tama na toquejaaja sutaree na juaaniutiaari. Sequereeri:

—¿Casaara pa sashiya tamasaca saquiriojotanura saa nocuarajaaniuhua? ⁶⁴ Niaacuaja shusha tojirii Pueyasooacara na sequesano sacuaraatia. ¿Niajanijarijata, taa nia niishiriojijiani?

Puetunu pueyajanaari sequequiaari:

—¡Cuaara mosaaria!

⁶⁵ Jiyacaritij, tamasacaari Jesu riocojonu coteequiaari. Na jiquioco motoreejaariuhua maja na niquniuria. Na nuhuaji, pueyari na piquiniu coteequiaari. Na piniu nuhuaji, na nequesotaturiquiohuari:

—Quia niishiritioj, ¿cante quia piriini?

Secojoua tia cojuanaa pueyari na jiquioco piquituriijihua.

*Pedro seetasacari Jesujiniji**(Mt 26.69-75; Lc 22.56-62; Jn 18.15-18, 25-29)*

⁶⁶ Pedroori jiyaniijia tia carijiniacuma quiriquiaa. Jiyacaritij, tamonu niy-
 acoori rucuanajoriquiaa carijiniacuma. Nojuajaari pueyacuara secojonaa
 jiyaniijia seru quiquiaari. ⁶⁷ Pedro niquishii cajiyanoori, mani jitiuyano.
 Tacuriitia na shootariquiaari. Na nuhuaji na sequereeri:

—Jaj, quiaacuajaruhua Jesuta rucuanejojuajuhua, cuno Nazaret tiaca-
 jinijinio pueyanotani.

⁶⁸ Pedroori na seetaree. Na sequereeri:

—¡Cuno pueyano maja cua niishishano! ¡Majaari quenaaja cua niishiniu
 casaa quia sequeyani!

Pedroori canujiyaree. Mataca tohuateyaji nujuaseeri. Caacarajaari jiy-
 acari niunijioree. ⁶⁹ Cuno niyacoo jaara Pedro niquiquiaariuhua socua,
 juhuacatecara nata quiniaa sequereeri:

—¡Nio pueyanoori cuno Jesu pueyajinijiniojuhuaj!

⁷⁰ Pedroori socua na seetaquiaari. Pasaja na tarishishacari, cuniqui nata
 quiniaari Pedro sequeree socua:

—Seetanujuanaa, quiaari cuno pueyajinijinio. Quiaacuajaari Galilea
 jiyajinijinio pueyano. Canaa tojishacari quiajaniya, quia pocuanuuri juhua
 nojori pocuanujua.

⁷¹ Pedroori socua jiyanoohua sapojonu coteequiaari. Naa sequereeri:

—¡Pueyaso cuara saniitioora janiyaqui, janiya jaara sapojiyani! ¡Seetanu-
 juanaa, maja cua niishiniu cuno pueyano, canajiniji nia nequesoreetaacua-
 jani!

⁷² Jiyacaritij, caacarajaari niunijionu pacuterohuacuhua. Pedroori jiy-
 acari niishiquii naa Jesu sequesano nojuajatej: “Juhuanujuaja caacaraja ni-
 unijionu pacutejiyaquishacariria juhuaquenu panishacari, quiaari janiya-
 jiniji tari seetanu pacutejonutaniya”. Pedro jaara niishiquii naa Jesu seque-
 sano nojuajatej, jiyanoohua nujuquequeeri.

15*Jesuucuaara pueya saquiriojotasacari Pilato**(Mt 27.1-2, 11-14; Lc 23.1-5; Jn 18.28-38)*

¹ Tariquicuaji, pueyacuara secojonaa jiyaniijianucuaari rerejoquiaari Ju-
 diocuaca camarucuata, Moisés Rootasanojiniji niishitiojonaatajuhua, Sane-
 drín maanutanio. Nojoriiri moronucua Jesu jaatucutaquiaari Pilatoocua.
 Cuno Pilatocuaajaari Judea jiya jiyaniijia quiquiaari. ² Pilatoori Jesu neque-
 sotaree:

—¿Quiaate Judiocuaca jiyaniijia?

Jesuuri na riucaaree:

—Jaa. Naacuaaquinatejaj, taa quia sequereecujani.

³ Pueyacuara secojonaa jiyaniijianucuaari Jesuucuaara tonujuriquiaa
 queraatia sesa casaa. ⁴ Pilatoori Jesu nequesotarohuacuhua:

—¿Majateeri quenaaja quia riucaanuujua? Quia tojiri taa cuno pojori
 saquiriojotaa quiocuarani.

⁵ Jesuuri maja na riucaanu quiriquiaa quenaaja. Cunora, Pilatoori
 jiyanoohua jiuujiatequiaari.

*Na paraa sequesacari Jesu cuara mosaaria**(Mt 27.15-31; Lc 23.13-25; Jn 18.38-19.16)*

⁶ Puetunu marijijarajanaa, Pascuara queranacunu juuca, Pilatoori nuju-
 atesano pueyano tohuaniniu jiitiquiaari nujuatejojuajiniji, cana pueya

paniquiaari na cartesaanuracuajani. ⁷ Jiyacaritij, tamonu pueyanoori nujuatejojuajinia nujuariquiaa. Na sesa quiquiaari Barrabás. Nojuajaari tamasaca pueyata pueyano moquiaari. Cunoori quiquiaari nojori juaashacari, Romano taucuaca jiyaniijia jitianuucua Judiocuaca. ⁸ Pilato nequesoreesacari Jesu, jiyacaritij, queraatia pueyari Pilatoocua nijioquiaari naa nojori secojonura nojuaja:

—Pueyano quia carterohua nujuatejojuajiniji, taa quia miiquiaacujaja puetunu marijarajanaani.

⁹ Pilatoori nojori riucuaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

¹⁰ Nojuajaari tama niishiquiaarijiaaja, pueyacuara secojonaa jiyaniijianuucuaari Jesu niqiniu paniyaquiaari pueya shocotenuucua nojori saniniujia Jesuucuaara. ¹¹ Pilato nequesotasacari nojori, pueyacuara secojonaa jiyaniijianuucuaari jiyacari pueya shiniujuquiaari nojori sequenura Pilato, nojuaja cuara carteera Barrabás. ¹² Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

¹³ Nojoriiri naa nacaree jiyanoehua:

—¡Cuaara mosaaria niyacutesanojinia teetesano!

¹⁴ Pilatoori nojori riucuaree:

—¿Casaarateni? ¿Casaa na miiquianu sesajaaranani?

Nojoriiri saaja jiyanoehua nacaree:

—¡Niyacutesanojinia quia teetere!

¹⁵ Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniujia, Jesu majacuteree cutaraari. Na nuhuaji, na soldadoehua na niqutioreeri, niyacutesanojinia na teetsaanura.

¹⁶ Jiyacaritij, soldadohuari Jesu jaatucuquiaari jiyaniijia Pilato tiajiniaaco. Nojoriiri puetunu narta soldadohuajanaa rerejoteree Jesu shocua.

¹⁷ Soldadohuari Jesu cushitiquiaari shaaruque toque, juhua jiyaniijiajanaa cushishano. Juhuacontucua maatusano cushitishaareejaariuhua na nacaquera. ¹⁸ Na nuhuaji, nojoriiri na rupaa paaretanu coteequiaari Jesu na macaatiniuria:

—¡Jejejee, Judiocuaca camarnuna nooj!

¹⁹ Nojoriiri na naca piquirii naajuata. Na riocojotureejaariuhuj. Nocuara mojoquetacoreeri juhua jiyaniijiajanaa cariquimieja, nojori sapojonuta na macaatiniuria nojuaja. ²⁰ Naa na rerequetesaanu nuhuajitij, toque naatuqueeri nocuaji jocusaaquiaari. Tama na toquejaaja cushitishaarohuari. Na nuhuaji, soldadohuari na tohuataniquiaari. Na jiyatatuquiaariiri niyacutesanojinia na teetsaanura.

Jesu teetesacari niyacutesanojinia
(Mt 27.32-44; Lc 23.26-43; Jn 19.17-27)

²¹ Soldadoehua jiyatasacari Jesu, tamonu pueyanoori jiyacari tacateriquioehua na cuhuariquiaajiniji. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

²² Jesuuri shiitaniyojua tuhuananuucua jiyatasaaquiaari. Cuno tuhuananu sesa quiquiaari Gólgota. Nioori pueyano rupaajinia sequeya, “Pueyano

nacaco”. ²³ Soldadohuari Jesu raatequiaari vino juucua, mirrata cojitishano. Saaja na ratuyaquiriiri. ²⁴ Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijioquiaari, nojori niishiniuria cantucua Jesu toque poore nerani. Nacuaajitij, nojoriiri Jesu toqueya seraatiaquiaari tama nojoriirijaja.

²⁵ Jiyacaritij, niyacutesanojinia na teetesacari, shusha pananu tacasacariiri quiquiaari. ²⁶ Naajioneeri na nacaacuma rupotasano quiquiaarijuhuaj. Tii sequequiaariiri casaara na mosaareeni. Naa naajiosano quiquiaariiri cuno rupotasanojinia: “Nioori Judiocuaca jiyaniijia”. ²⁷ Jiyacaritij, caapiqui nohuasenujuacaari Jesu shuriucua teetejosaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. ²⁸ Naa tohuateequiaariiri taa tariucuaaanu Pueyaso Rupaa-jinia na naajiotasaaquiaaricujani. Naa sequeyari: “Na sesaari sesa miijaca pueya sesacata cojiritiasaaquiaari naajiotasaanujuhuaj”.

²⁹ Pueya tajishacari nucuaco Jesu shuriuquioco, nojoriiri na macaa-tiquiaari. Na maanuquenuta naa na sequetuquiaariiri:

—¡Jaj! ¿Majateeri quiajaniya cumaacaracacuja? ¿Quiaateeri jiyaniriquiaa, quiaa jaara Pueyaso Secojoja tia niyartare, quia naata na tianu tucuat-anuhua jiuujianaraca juucajinia? ³⁰ Quiaa jaara naa cumaacaraca quirritij, niyacutesanojiniji quia roserecuarajaj.

³¹ Pueyacuara secojona jiyaniijianucua, Moisés Rootasanojiniji niishi-tiojonaari na macaatiquiaarijuhuaj. Tama nojoriijaarijia naa seque-toquiaari:

—¿Maatucua saa tamasaca naatanijioriquiajaari? Tama nojuaja cutaraari maja na naata niyacutesanojiniji rosenu. ³² Jaara seetanujuanaa quiri Pueyaso Jiyarosano, pa jiyaniijia na quiniuria, cuaara roseera niyacutesano-jiniji pa niqiara. Pocua jiyacari nocua tiuuri cutarani.

Cuno nohuasenujuaca Jesu shuriucua teetejosano quiriquiaani, nojoriiri na sesacariquiaajuhuj.

Jesu cusosacari

(Mt 27.45-56; Lc 23.44-49; Jn 19.28-30)

³³ Panacari, jiyari ninishiquiria quiquiaari puetunjuanaa. Tarishiquiaariiri. Shusha tenacariishacari chuhatemohuari. ³⁴ Jiyacaritij, Jesuuri jiyanohua na rupaa paaretaquiaari:

—Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia carteree janiyani?”

³⁵ Na shuriucua nujuatunaa tojitiasacari naa Jesu paaretasacari na ru-paatej, nojoriiri sequeturee:

—¡Nia tojiri, supuetana Elías jiiquioonuyano, nocua na niniuria!

³⁶ Tamonu pueyanoori ritia netequiaari namasu casaa na shiniuria jereeca vinojinia. Na nuhuaji, na morotaree naajuacuaari, na shitiaso-coriquiano Jesu rupaama. Na raatereeri. Na nuhuaji, nojuajaari seque-quiaari:

—¡Pa shanacure! ¡Supuetana Elías jiyoteeri nocua ninutianiya na roshinini-uria niyacutesanojiniji!

³⁷ Jiyacaritij, Jesuuri jiyanohua na rupaa paaretarohuacuhuj. Cuso-queeri. ³⁸ Jiyacaritij, Pueyaso Secojoja tiajinacuma, shiquiquia toquejiniji sohuacaari sutequee tamajaaja, jiyocuacaanuji jiyocuara. Cunoori pueya pueresano quiquo mishiquiotaja quiquiaari, pueya mariqui cusoqueeri Pueyasoocua nojori tiuquishacari juucua, jiyanooshoojua nojori quishacari.

³⁹ Cuno Romano soldadohua jiyaniijiaari Jesu tacoji nujuariquiaa. Na niquishacari taa Jesu nacaquiaarini, naajuhuj, taa Jesu cusoquiaari na rupaa na paaretanutani, jiyacariti nojuajaari naa sequeree:

—¡Nio pueyanouqui seetanujuanaa Pueyaso niyanu!

⁴⁰ Maajipohuari tii quiriquiaajuhuj. Tucuacaanuji Jesu shootiatiriquiaari. María Magdalenaari nojoritia quiriquiaajuhuj, socua narta maajipohuanio. Cuno maajipohuani, nojoriiri quiquiaari Salomé, Maríano, cante Santiago, José nucua quiquiaaricujani. Nio Santiagoni, nojuajaari socua naatujua na sesaanucua Santiagojiniji. ⁴¹ Puetunu nio maajipohujanaari Jesu nuhuajiniaa quiquiaari. Nojoriiri nera pueraquenuanaa quiquiaari, Galilea jiyajinia na quishacari. Socua queraatia maajipohuari tii quiriquiaajuhuj, canapuate Jerusalén tiacajiniara nijioquiaari Jesutacujani.

Jesu quete niasacari raaco
(Mt 27.57-61; Lc 23.50-56; Jn 19.38-42)

⁴² Jesu cusonu juucani, cuno juuca sesa quiquiaari “Jeenucuanu juuca”, maja samaatenu juuca poonijionura. Saniniujia, tariqui quiquiaariiri samaatenu juuca. Cunora, pueyari juhuacarijia jeenucaquiaari puetunujanaa. ⁴³ Cuno juucajani, jeenucuanu juuca ninishacari quera, tamonu pueyanoori Pilatoocua quiquiaari. Nojuajaari José, Arimatea tiacajini-jinio pueyano. Cuno Joseeri tojishano pueyano quiquiaari narta Sanedrín pueyari. Joseeri mijiria Pueyaso Jiyarosocoriquiano niquiniucua jiaatijia quiquiaarijijuhuj, canaa jiyaniijiajanaa na quiniuria. Nojuajaari maja na puereu quiquiaari Pilatoocua na tiuquiniuria, Jesu quete na masenura. ⁴⁴ Pilatoori jiyanhua jiuujiatequiaari na tojishacari Jesu tari cusoquee. Pilatoori soldadohua jiyaniijia sequeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

⁴⁵ Soldadohua jiyaniijia jaara na riucuaquiaari taacari na cusoqueeni, Pilatoori jiyamitia José sequeree Jesu quete na panura. ⁴⁶ Joseeri jiyacari shanhua quenaaruque toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na jiu-niocreeri. Na nuhuaji, na niaquiaari raacoori. Cuno raari jiuutiasano quiquiaari saajiajinia. Joseeri raa tioree jiyanhua puereetuca quejasano saajata. ⁴⁷ María Magdalena, José nucua Maríano, nojoriiri na niquitiriquiaa tee na niasaareeni.

16

Jesu samitiasacariuhua
(Mt 28.1-10; Lc 24.1-12; Jn 20.1-10)

¹ Samaatenu juuca jaara shocoquiaari, María Magdalena, Santiago nucua Mariajuhuj, Salomeenio, nojoriiri shanhua jaanutaja masequiaari macucua na tuujutasocoriquiano. ² Jiyanhua tariquicuaji Domingo juuca, shusha pananu muetasacari, nojoriiri raajinia quiojoquiaari. ³ Nucuo na quiojosacari, tama nojoriijaarijia sequetooriquiaa:

—¿Canteeri pocuaji shuquitiniutianiya tamocora raa tiotituni?

⁴ Nojori jaara niquiquiaari raa, saajia niquituriiri tariucua tamocora shuquitishano. Puereetuca saajiaari quiquiaari raa tiotiu. ⁵ Nojoriiri raaco tiuquitiamaa. Mashaja niquitushiri tii cajiyano nojori miaquetajara, cohujia tucuaque toque cajitiaano. Nojoriiri jiyanhua shiriqituuquiaari

na niqutiushacari nojuaja. Cuno mashajaari Pueyaso seru quiriquiaa.
⁶Maajipohua sequereeri:

—¡Maja nia shiriiquiniu! Janiyari niishiyacuajani, niaari Jesu pajeya, Nazaret tiacajinijinio pueyano, niyacutesanojinia teetsaarucuaani. ¡Nojuacuaja tari samiitiarohua! Maja niya na quiniu. Nia niquishuriiria na maja, tee na niasaarucuaacuajani, shaacui. ⁷ Na saquiriojosano pueya nia sequesuhua, Pedrojaajanio: “Nojuajaari nia puetanutaniya Galilea jiyajiniara. Niaari tii na niquniutianiya, taa na sequecanu nijaniyacujani”.

⁸Maajipohuari netecuatuquiaariuhua raajiniji. Nojoriiri tetecaturiquiaa na shiriiquiniutia. Majaari quenaaja tamasaca pueya na sequetunu quiquiaari na puerenuta.

Jesu muetasacari María Magdalenaacua
(Jn 20.11-18)

⁹Jesu samiitanu nuhuaji, cuno Domingo juucaja, shusha semaana co-teenu juucani, Jesuuri coteenujuanaa muetaquiaari María Magdalenaacua. Jesucujaaari tarijia siete samaruhua tohuatanijioquiaari cuno Maríaajiniji.

¹⁰María Magdalena niquniu nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriquiaa. Nujuqueturiquiaari Jesu mosaanuucua. ¹¹María Magdalenaari nojori sequeese: —Pueyanaa, ¡Jesu tari samiitiarohua! ¡Janiya na niquiriini!
 Nojoriiri María sequesano cuaracashitirii saaja.

Jesu muetasacari caapiqui na saquiriojosano pueyacua
(Lc 24.13-35)

¹²Na nuhuaji, Jesuuri socua caapiqui na pueyacua muetaquiaari nojori quiojosacari tamocora. Nojuajaari tamaatia niquishano quiriquiaa nojoriria. ¹³Nojori niishishacari nojuacuaja Jesu quiquiaari, nojoriiri ritia riujuuquiaruhua tamasaca nojorijinijinio nojori numootenuhuara. Naajuhuj, Jesu saquiriojosano pueyari nojori pohuatasano cuaracashitiriijuhuaj.

Jesu rootasacari na jiyaramiquishocoriquiano pueya
(Mt 28.16-20; Lc 24.36-49; Jn 20.19-23)

¹⁴Tamacari, Jesuuri na once saquiriojosano pueyacua muetaquiaari. Nojoriiri miaquejajinia cajitiuriquiaa jiyacari. Jesuuri jiyacari nojori juuarii cumajiuujiaaca nojori quiniuucujaja. Majaari quenaaja nojori tiuuniu quiquiaari nojorijinijinio pueyacua, nojori sequesacari: “Canaa Jesu niquiriini, samiitiarohuacuaaqui”. ¹⁵Na nuhuaji, Jesuuri nojori sequeree:

—Nia quiaare puetunu jiyacajinijanaa, janiyajiniji Pueyaso rupaa nia pohuatanura, puetunu nia pohuatasanoocua tiuujiaa pueyapuejanaa jiyanooshaanura. ¹⁶Cante moojinia tiuquinishiya Pueyaso rupaacua na tiuuniuucuaani, Pueyasoori na jiyatenuutaniya na pueyanora. Saniniuujia, cante Pueyaso rupaacua tiuyaquiyani, nojuajaari saniitiosano quiniutianiya. ¹⁷Cucua tiuujiaacari nocuaji pueya jiuujiatesano casaa miiniutianiya cua cumaacata, pueya niishiniuria Pueyaso rupaacui seetanu rupaa-janaa. Naacuajitij, cucua tiuuniaa pueya nia quiniuucua, niaari samaruhua tohuatanijionutaniya cua cumaacata, nia jiyaniquishacari cua sesa. Niaari nia niishiyaquishoo rupaaca pocuajaca quiniutianiyajuhuj. ¹⁸Naajuhuj, niaa jaara soconu sajitishaare, niaa jaara casaa raatesaarejuhuaj nia cusojusaanura juucua, majaari nia cusonu quiniutianiya. Naajuhuj, cusosuhucua nia niasacari nia juaashiquia, cusosuhuari naataconutaniuhua.

*Jesu tacasacariuhua jiyocuacaanu na Queecua**(Lc 24.50-53)*

¹⁹ Na pocuanu nuhuaji, Jiyaniijia Jesuuri tacanishaaquiaariuhua jiyocua-
caanu. Nojuajaari Pueyaso miaquetajara cajiquiaariuhua. ²⁰ Na nuhuaji,
na saquiriojosano pueyari quiojoquiaari Pueyaso rupaa nojori pahuata-
nura puetunu jiyacajiniajanaa. Jiyaniijia Jesuuri pueyaracaanu nojori
cumaquiriquiaa. Pueya niqutirijiaariuhua na cumacata na pueya mi-
ijiosano, pueya niishiniuria maatia, Jesu jiyaramiquishano pueya pahu-
atasanoori seetanu rupaajanaa.

LUCAS NAAJIOTASANO JESUCRISTOJINIJI

Niya pohuatashiyari casaara Lucas naajiotaquiaari nioni

¹ Queraatia pueyari suraatia naajionu saniniujuquiaari puetunu canaa tajinia miishanojuanaa. ² Nojoriiri naajioquiaari taa Jesu jiyaramiquishano pueya pohuataquiaari Jesujiniji pajaniyani. Cuno pojoriiri Jesu niquiniaa quiquiaari, shusha poonijionu na cotesacari. Nojoriiri na nuhuaji na rupaa pohuatanaara jiyatesaaciaari. ³ Janiyari niishiriojoriquiaani, maniniaruhua quiocuara cua naajionurajuhuj cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniiji. ⁴ Naacuaajitij, quiocuara naajiyaniija na coteenujiniiji, seetanujuanaa quia niishiniuria puetunujuanaa, taa quia niishitiojosaacanucujani.

Pueyaso seru pohuatasacari Tiuquinijiona Juan rasaanutaniya

⁵ Herodes jaara jiyaniija quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niquiohuacuajinio supueno quiquiaari. Necocua sesa quiquiaari Isabel. Cuno maajiri supuetana Aarón niquiohuacuajinio supueno quiquiaari. Nojori supuetanaari mariyata tariucuacaanu pueyacuara secojona quiquiaari. ⁶ Zacaríasri necocua Isabelta maninia miijiaca quiquiaari Pueyaso niqiuara. Nojoriiri puetunu Pueyaso rootasanojuanaa tojitiajaca quiquiaari, taa Pueyasojiniji caminiujuniaa naajionuutaquiaaricujani. Nojoriicuara maja na naata sesa casaa tonujusaanu quiquiaari, saaja maninia miijiaca nojori quishacari. ⁷ Nojoriiri maja na muetunu quijia, niyajaru Isabel quiniuucua. Naajuhuj, nojoriiri maja tari na naata muetunu quiquiaari, saaquiapue nojori quishacari.

⁸ Tamacari, Zacaríasri narta pueyacuara secojonaata poonijioriquiaa Pueyaso Secojoua tiajinia Pueyaso niqiuara Jerusalén tiacajinia. Jiyacari saniniujia nojori poonijosacariiri quiquiaari. ⁹ Shanohua jaanutajaari catijiasaaciaari puetunu juucajanaa Pueyaso Shuriucua Quiquiojinia, Secojoua tiajinia. Pueyacuara secojo naari jitiquiaari saaja naajiosano jacatanura juhua tacuarishijosacari, nojori niishiniuria teyano nojoriijiniote Pueyaso Shuriucua Quiquio tiuquiniutianiyani, shanohua jaanutaja na catijianura tii. Cuno juuca saniniujia, saajaari Zacaríascuara tacatequiaari. Naacuaajitij Zacaríasri seeratasaaquiaari tii na tiuquiniuria shanohua jaanutaja na catijianura. ¹⁰ Na catijasacari, puetunu pueyajanaari Pueyaso secojonuuriquiaa Secojoua tia carijiniacuma. ¹¹ Jiyacaritij, Pueyaso seruri Zacaríascuara muetaquiaari. Nujuariquiaari shanohua jaanutaja catijiasaqui miaquetajara. ¹² Zacaríasri shiriquirii na niquishacari Pueyaso seru. Jiyanohua na puerereeri. ¹³ Pueyaso seruari na sequere:

—Maja puerenu Zacaríasnaa. Pueyasocuaajiaari quia secojosano tojiquiaari. Quia niquiocua Isabelri quiara muetunutaniya. Quiocua na sesojore “Juan”.

¹⁴ Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na rasacari. ¹⁵ Quia nitanuuri cutara pueyano quiniutianiya Pueyaso niqiuara. Nojuajaari vino ratuyashijia quiniutianiya, najatunacunio. Pueyaso Sohuanuraca pueyano quiniutianiyari na rasaacarijiojua. ¹⁶ Nojuajaari queraatia Israel pueya tacatonutaniuhua nojori Jiyaniija Pueyasocua. ¹⁷ Nio Juanri pa Jiyaniija

puetana quiniutianiya. Nojuajaari pueyara Pueyaso sequesano caminiujiunia supuetana Elías sohuanu jitianutaniya, na cumaacanio. Naacuajitij, pueya jiuujia taraajonutaniyari, nojori jiyanooniuria necohua. Naajuhuaaj, nojuajaari tojitiaashijiaca pueya rootanutaniya maninia, Pueyaso tojitiajaca nojori quiniuria. Naacuajitij, pueya jiuujiacaari jeenucasano quiniutianiya pa Jiyaniijiaacuaji.

¹⁸ Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujuanaa tohua-teenutaniya quiria? Janiyari tari saaquianoni. Cua niquiocuaari motajajuhuaaj.

¹⁹ Pueyaso seruuri na riucuaree:

—Janiyacuajaari Gabrielni, Pueyaso taccoji nujuana, na sequesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyasojiniji. ²⁰ Quiarijia saniniuujia, cua sequesanoocua quia tiyuaquiniucua, quiaari tiquia quiniutianiya. Majaari quia pocuanu quiniutianiya cuaara rasaarejaatijia quia niyanu. Naajaa, puetunu cua sequesanojuanaari naa quiniutianiya taa Pueyaso paniyacuajani.

²¹ Jiyacaritij, pueyari Pueyaso quiquio carijiniacuma sashiriquiaa, Zacarías cuaara tohuatohuara. Nojoriiri shiriiquitiurii pueyaracaanu Zacarías tarishishacari Pueyaso Shuriucua Quiquiojinia. ²² Zacaríasri socua tohuatamohua. Majaari na naata pocuanu quiriqiaa. Nareja shishinijoriquiaari. Naacuajitij, pueyari niishirii Pueyasoqui casaa niqitirii Zacarías, Pueyaso Shuriucua Quiquiojinia na quishacari.

²³ Zacarías jaara puecaquiaari puetunu na poonijionu juucajanaa taa na sequesaaquiaaricuajani, na tiajinia quiaarohuari. ²⁴ Na nuhuaji, necocua Isabelni manajeree. Na manaja jamaatiaquiaariiri. Majaari na muetanu quiquiaari na tiajiniji cuaara na shocojoquiaarijiaatijia cinco raca. Nojuajaari tama sequequiaarijiaaja: ²⁵ “Quiarijiani, cua Jiyaniijiaari maninia miirii janiya. Majaari socua pueya rerequetenu quiniutianiya janiya, mue-
tujua cua quishacari tari”.

Pueyaso seru sequesacari Jesu rasaanutaniya

²⁶ Seis raca jaara shocojoquiaari Isabel manajesacaricuaa, Pueyasoori na seru Gabriel jiyaroree Nazaret tiacajinia, Galilea jiyajinia. ²⁷ Tamonu niyacocua na jiyaroreeri, cante tari sequesaaquiaaricuajani José jiyanishano pueyanota na caminiuria. Na camiriquianoori supuetana jiyaniijia David niquiohuacuajinio supueno pueyano quiquiaari. Niyacoo sesa quiquiaari María. ²⁸ Pueyaso seruuri nocua tiuquimíaa. Na sequereeri:

—Janiyari quiocua jiyarosaareeni, Pueyaso shuquiritiasano niyacoona. Jiyaniijia Pueyasoori quita quia, socua shuquiriaatia quia quiniuria tamasaca maajipohuajiniji.

²⁹ Mariari jiyanojua tacaquiaari naa Pueyaso seru sequesacari nojuaja. Nojuajaari tamajaja niishiriojoriquiaa: “¿Casaara naa na sequeree jianiyani?” ³⁰ Na nuhuaji, Pueyaso seruuri na sequeree:

—Maríanaa, maja puereno. Pueyasoori quia shuquiritiniutianiya. Quiaacuajaari na timitiasano. ³¹ Quiarijiani, quiaari manajenutaniya. Quiaari cayaniyojua ranutaniya. Quiocua na sesojore “Jesu”. ³² Nojuajaari cutara pueyano quiniutianiya. Sesojosaanutaniyari “Pueyaso Niyanu”, jiyocuacaanu Quijia Niyanu. Pa Jiyaniijia Pueyasoori na jiyatenutaniya Jiyaniijiarajanaa na quiniuria na supuetana David niti. ³³ Israel pueya jiyaniijia quiniutianiyari. Pueyaracaanu jitianutaniya na pueyari. Majaari na shaajenu quiniutianiya jiyaniijia na quishacari.

³⁴ Mariari Pueyaso seru nequesotaree:

—¿Taa cua manajenutaniyari, niyacaaju cua quishacari?

³⁵ Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiiri quiocua pacunutaniya. Naacaujiti, quia niyanuranoni, cunoori Pueyaso Niyanu quiniutianiya. Nojuajaari seetanujuanaa Pueyaso tojjia quiniutianiya. ³⁶ Naajuhua, quia supuetanajinijinio motaja Isabelri neyanu ranu-taniyajuhua. Cuno maajiiri sequesaaquiaari “niyajaru maajitia”. Naajaa, seis racaari tari na shocojiya na manajesacari. ³⁷ Pueyasora, majaari jiyajeneta casaa quiniu. Nojuajaari cumaacarana na miiniuria puetunu na panishanojuanaa.

³⁸ Mariari sequeree:

—Maniniacuajaqui. Janiyacuajaari cua Jiyaniijia Pueyaso seruni. Pueyaso cu meta miiria janiya taa quia sequereecuajani.

Na nuhuaji, Pueyaso seruuri quiacuhua.

María quiasacari Isabel niquiniuucua

³⁹ Mariari jiyacari quiaquiaari na secoonuta Judea jiyajinia, Zacarías tiajinia tamonu tiacajinia. Cuno jiyari tuhuananuharaca. ⁴⁰ Zacarías tiajinia María tiuquishacari, Isabel sequereeri. ⁴¹ Isabel tojishacari María sequesano nojuaja, ¡conajaari na jiniacuma nujuanequequee! Pueyaso Sohuanuuri Isabelcua tiuquiqui na cumaaca na jitianura. ⁴² Naacaujiti, Isabelri jiyacari na rupaa paaretaree. Naa María sequereeri:

—¡Pueyasocujaari socua maninia miiruucua quiajaniya tamasa maa-jipohuajini! ¡Maninia miiniutianiya quia niyanujaariuhua! ⁴³ ¡Janiyateeri pueya tojishano maajini, cua Jiyaniijia nucua tiuquiniuria cua tiajinia, na niquiniuria janiya? ¡Maja! Naajaa, jiyanoehua timiyaniija! ⁴⁴ Shusha cua tojishacari quiajaniya cua sequeyano, cua mueyari cua jiniacuma nujuanequequee na shuquiriniutia. ⁴⁵ Shuquiriaatia quia quiri, quia tiuuniuucua Pueyaso sequesanoocua quiajaniya.

⁴⁶ Mariari sequeree:

—¡Coojia jiyanoehua shuquiritiaa cua Jiyaniijia Pueyaso! ⁴⁷ ¡Cua sohuanuuri cua Jiyanoonia Pueyaso timitiaani! ⁴⁸ Juhua najuhua quijianijia. Naajaa, Pueyasoori cua jiyanoorii. Cua saquiriojorucuaari na tojjia cua quishacari. Quiarijiani, pueyari pueyaracaanu cua sequenutaniya: “Pueyaso shuquiritasano María”. ⁴⁹ ¡Pueyasoori jiyanoehua maninia miirii janiya! Nojuajaari puetunu cumaacaracajanaa. Nojuajaari tojetaarucujanaa maninia quijia. ⁵⁰ Nojuajaari pueyaracaanu jiyanoocujia na tojitanaa, canapute na rerequeteyaquijiacacuajani. ⁵¹ ¡Nojuajaari jiyanoehua maninia miiquiaa na cumaacata! Nojuajaari niishijia pueya shocotequiaari, canapute tama na cuaqueyajaaja jiyatequiaari juhua niishijiacaracuajani. ⁵² Nojuajaari cutara jiyaniijianucua jatarae, cuno pojori jiyaniishano niishiyashijia pueya jiyatesaanura jiyaniijia nojori niti saniniuujia. ⁵³ Miaajeejunucua tootijioreeri maninia sumatuuta. Puera casamiriaca pueya taanuquiaariiri, casaaju nojori quiojonura. ⁵⁴ Na pueya Israel naacureeri. Majaari na niyjetanu quiquiaari nojoriicua na taraajenu. ⁵⁵ Naa miiquiaariiri taa na sequequiaari pa supuetanaacuajani. Pueyasoori naa pa supuetana Abraham sequesaaquiaari: “Seetanujuanaa quiocua taraajenutaniyaniija, quiocujiniao superiquiano pueyacuanio”.

⁵⁶ Na nuhuaji, Mariari queraatia tarishiquiaari Isabel tiajinia. Jiuujia-naraca raca nuhuaji, Mariari tacatequiaariuhua na tiajiniohua.

Tiuquinijiona Juan rasacari

⁵⁷ Na nuhuaji, Isabel rasacari quiquiaari. Jiyapueratereri. ⁵⁸ Na shuriucua quiniaa, mariyata na jiyasoocujainio supueno pueyajuhua, nojoriiri jiyanohua shuquiriquiaari nojori tojishacari taa Pueyaso jiyanohua taraajequiaari Isabelcuaní, na shuquiritiniuria neyanuta. Nojoriiri Isabelta shuquiriquiaarijuhua. ⁵⁹ Nojoriiri Zacarías tiajinia rerejoquiaari conaaja jiiatasacari ocho juuca, na cararaatiuquia co miatesaanura, taa Moisés rootaquiaaricujani. Nojoriiri na sesojonu paniriquiaa juucua Zacarías, na que sesaanucua na quiniuria. ⁶⁰ Na nucuaari saaja sequeree:

—¡Maja! Sesojosaanutaniyano “Juan”.

⁶¹ Pueyari saaja sequeree:

—¿Casaarateni? ¡Majaari quenaaja tamonu quia pueyajinijinio cuno sesaraca na quiniu quiquiaari! ¿Casaara naa quia sesojonu paniyarini?

⁶² Cunora, pueyari na que Zacarías shishinioree na nequesotanura taa na sesojonu paniriquiaa neyanuni. ⁶³ Zacaríasri naajooju casaa maseree na naajionura tii neyanu sesarano. Naajioreeri: “Na sesa, Juan”. ¡Pueyari jiuujiatequee! ⁶⁴ Jiyacaritij, Zacarías nitiiri sasaqutiicuhua. Juhucate-cara pocuarohuari. Pueyaso miishano pohuateree pueya niqiiaraari, na shuquiritasacari Pueyaso. ⁶⁵ Cunora, na tia shuriucua quiniaa pueyari jiuujiateree. Puetunu niojuanaari caminiujiushaaquiaari puetunujuanaa cuno Judea tuhuananuhuacua quijiaca pueyara. ⁶⁶ Puetunu nio tojtianaa pueyajanaari niishiriojonuuquiaari. Tama nojorijiaarjia nequesoreetooquiaari:

—¿Casaaquitijia cuno mueya quiniutianiya na nuhuajitijiaj?

Pueyari niishiquiaari Pueyasoori seetanujuanaa cuno mueyata quiriquiaa, na cumaquiniuria.

Zacarías sequesano na shuquiritasacari Pueyaso

⁶⁷ Na que Zacarías jiuujiaari jiyanohua mishaja quiriquiaa Pueyaso Sohuanuta. Pueyaso Sohuanuuri na pohuateree. Naaratej, Zacaríasri naa sequequiaari:

⁶⁸ —¡Jiyanohua maninia pa Jiyaniijia Pueyaso, pa supuetana Israel Jiyaniijia! ¡Cuaara jiyanohua shuquiritiasaaria mijiria na niniuucua na pueyacua, pocuaji na tacunura! ⁶⁹ Pocua jiyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David niquiohuacuajainio rasaanutaniya, taa Pueyaso sequequiaari tariucacaanucujani. ⁷⁰⁻⁷¹ Tariucacaanu na sequenu panishano caminiujuniacuajaari naa pohuataquiaari pa supuetanaa niqiiaratej, taa pa paraa na ritianutaniya pocujini, pa niquiniu paniaquijia pueyano. ⁷² Nojuajaari sequequiaarijuhua, majaari na niyjetanu quiniutianiya na sequesano pa supuetanaa, pocua na taraajenura. ⁷³⁻⁷⁴ Pueyasoori pa supuetana Abraham sequequiaari seetanujuanaa, nojuajanaari pocuaji ritianutaniya pa paraa, pa puereyaquiniutia nera pa poonijionura shitimia. ⁷⁵ Nojuajaari Abraham sequequiaarijuhua maninia quijiaara pa jataniniutianiyaquiniaari, saaja nera pa quiniuria pueyaracaanu. ⁷⁶ Quiajaniya saniniuujia, quianunioyuanaa, quiaari sesojosaanutaniya jiyocuacaanu Quinia sequenu panishano caminiujunia. ¡Quiaari pa Jiyaniijiaranojuanaa puetanutaniya, juhua na nuu jeenucuariquiano! ⁷⁷ Quiocua Pueyaso saquiriojosano

pueya niishitiojore, nojoriiri na naata jiyanooshano quiniu sesa nojori miishanojiniji Pueyaso pueya nojori quiniuria. ⁷⁸ ¡Pa Pueyasoori jiyanoohua jiyanoojia! Pocuara taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua. ⁷⁹ Maninia pa cuhuatanutaniyari, maninia pa rucuanenonura Pueyaso niquiara, panaatia poojiacata. Naacuajitij, majaari socua pa cajitiniyu quiniutianiya taraatia ninishiqui, juhua pa jamaca shuriucua.

⁸⁰ Conaajaari maashiquiaari. Nojuajaari tama na cuaqueyajaaja cumaquiquiaari socua seetanujuanaa Pueyasoocua tiuujia na quiniuria. Nojuajaari pueyaracaanu cariiquia jiyajinia quijia quiquiaari nojuaja jaara Pueyaso sequenu panishano caminiujiuniyu coteequiaarijiaatijia narta Israel pueya niquiara.

2

Jesu rasacari (Mt 1.18-25)

¹ Tiuquiniujona Juan rasaanu nuhuaji, jiyaca jiyaniijiajanaa César Augustoori Roma tiacajiniji sequequiaari puetunu na jiftasano pueyapuejanaa cuaara serojosaaria puetunu nojori jiyacajiniajanaa. ² Pueya jaara coteenujuanaa serojosaquiaari, Cirenio jyanishano pueyanoori jiyacari Siria jiyajinia jiyaniijia quiquiaari. Nojuajaari jiyaniijiaara César Augusto jiyatesano quiquiaari. ³ Puetunu pueyajanaari sequesaaquiaari nojori cuaara quiojohuara na raja tiacajinia, na sesaca naajiotasaanura tii.

⁴ Joseeri jiyacari Nazaret tiacajinia quiriquiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaquiaaricuaani. Naaratej, Joseeri Belén tiacajinia quiaquiaariuhua. ⁵ Mariari tari sequesaaquiaari nojuaja Joseeta caminiutianiya. Naaratej, Mariari nata quiaquiaarijuhua Belén tiacajinia, nojori sesaca naajiotasaanura tii. José niquiocuaranoori tariucua manajaraca quiriquiaa. ⁶ Belén tiacajinia nojori quishacari, jiyacari tari quiquiaari Maria ranu juuca. ⁷ Tii jiyapueratereeri. Conaaja juniocoquiaari toqueraacuacajiniaari. Na nucaari na niaquiaari juyaca miaquejajinia. Mariari naa raquiaari cuniqui maja quiquio quishacari nojoriria rucoonaa tiuquijia tijajinia.

Pueyaso seya muetasacari borrego cojuanaa pueyacu

⁸ Belén tiaca shuriucua cuno niucuaaja, borregohua cojuanaari suteriquiaa cuhuariquiajinia, na seya nojori cojuasacari. ⁹ Canashiyaquiji Pueyaso seruuri nojoriicua muetaquiaari. Jiyaniijia Pueyaso shacantuuca cumaacari nojori cuhuataquiaari. ¡Nojoriiri jyanohua shiriiquitiuri! ¹⁰ Pueyaso seruuri nojori sequeree:

—¡Maja nia puerenu! Niaacua nimiaanijia, jyanohua maninia casa cua pohuatanura nijaniya. Cunora, puetunu pueyajanaari shuquiriniutianiya. ¹¹ ¡Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhuj. ¹² Naa jaara nocua quiaare, niaari conaaja riuritanutaniya toqueraacuacajinia juniocosano, juyaca miaquejajinia maano. Naacuajitij, niaari niishiniutianiya, seetanujuanaari cua pohuatasano nijaniya.

¹³ Jiyacaritij, narta Pueyaso seyari na cojishii. Jyanohua queraatia quiriquiaari. Nojoriiri naa maniniuhuaqueetariquiaa Pueyaso:

14 —¡Jiyanoehua maninia pa Pueyaso, jiyocuacaanu Quijia! ¡Nojuajaari jiyanoehua pa shuquiritiasano, na jiyaronuucua jiyacua quiniaa jiyanoonia! Naacuajitij, cana Pueyaso shuquiritiaani, nojoriiri jiyanoootoonutaniya narta pueyata.

15 Pueyaso seya jaara tacataquiaariuhua jiyocuacaanu na quiquiojinioh-
hua, borregohua cojuanaari tama sequetooquiaarijiaaja:

—¡Belén tiacajinia pa quiaarequij! ¡Pa niquishii cuno, casaajiniji pa Jiyani-
jia numooteree pajaniyacujani!

16 Nojoriiri ritia quiojoquiaari. Conaaja riuriatatuseri, María, Josénio. Conaajaari juyaca miaquejajinia niasano mariquiaa. 17 Nojori niquishacari conaaja, nojoriiri ritia tii quiniaa pueya caminiujirui conaajajiniji Pueyaso seru pohuatasano nojori. 18 Puetunu pueyajanaa, cante nojori pohu-
atasano tojiriquiaani, nojoriiri jiuujiateree. 19 Majaari María niyjetanu quiquiaari puetunu nojori pohuatasanojuanaa. Noojajinia na niishirio-
joriquiaa pueyaracaanuuri. 20 Borregohua cojuanaari quiojoquiaariuhua. Nojoriiri Pueyaso maniniuhuaqueetariquiaa nojori tojishanojiniji, nojori niquishanojinijinio. Puetunujuanaari naa quiquiaari taa cuno niucua Pueyaso seru pohuataree nojoricujani.

*Conaaja Jesu pasacari Pueyaso Secojoua tiajinia, Pueyasora jiyateso-
coriquiano*

21 María conaaja jaara ocho juuca jiitiaquiaari, na cararaatiuuquia coori miatesaaquiaari, taa Moisés rootaquiaaricujani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Mariacuajani, na manajeyaquisacarijia.

22 Na nuhuaji, Moisés sequesano juucaari quiquiaari na nucua neyacata cuara juhua tuteera, jeequesano nojori quiniuria Pueyaso niquiara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. 23 Na tyeajari naa miquiaaritij, tariucuacaanu Pueyaso Rupaajinia naajiotasano tojtijajaca nojori quiniucua. Naajiotasanoori naa quiyatej: “Puetunu nia jiyapueranuhujanaa cuara Pueyasora jiyatesaaria”. 24 Naaratej nojoriiri quiaaree na seru mosaanura nojoriicuara Pueyaso Secojoua tiajinia, juhua jeequesano nojori quiniuria Pueyaso niquiara, taa pueya rootasaaquiaari Moisés naajiotasanojinijicujani. Pueyasoori naa sequequiaari Moisés tari-
jiatej:

“Cuara puecoosaaria caapiqui mococoonu. Mococoonu jaara quiyaquiri,
cuara puecoosaaria caapiqui shinijia”.

25 Jiyacaritij, tamonu pueyanoori Jerusalén tiacajinia quijia quiriquiaa. Na sesa quiquiaari Simeón. Nojuajaari maninia miiija quiquiaari Pueyaso niquiara. Pueyaracaanu Pueyaso shuquiritiaja quiquiaariiri. Noju-
jaari pueyaracaanu sashijia Pueyaso cuara jiyaroorá Israel pueyacuaji Tacuriquiano. Nojuajaari Pueyaso Sohanu jitiitaja. 26 Pueyaso Sohanuuri na niishitiquiaari majaari na shaajenu quiniutianiya nojuaja cuara niquiri Cristojiaatijia. Pueyaso jiyarosariquiano. 27 Pueyaso Sohanuuri na jiyate-
quiaari namitia cuno juuca Pueyaso Secojoua tiajinia. Naacuajitij, Jesu jaara pasaaquiaari Secojoua tiajinia, nera na miishaanura puetunu tari-
cuacaanu rootasanojuanaa, Simeónri jiyacari tii na niquirii. 28 Simeónri Jesu paree. Na cacanuureeri. Naa Pueyaso sequeree jiyanoehua na shuquiriniu-
tiaari:

29 —¡Cua Jiyaniijianaa, tariucuaja! ¡Quiarijia cutara cua naata cusonu
juhuajaniya, shuquiriaatia cua quishacari! Quiaacuajaari tari cua

niquitirii tarijia quia sequesano janiya, quia seru cua quiniuucua.

³⁰ Tari niquirii quia Jiyarosano cuajanijia, canaacuaji Tacuriquianoni.

³¹ Nojuajaari quia niquitiosano puetunu jiyacajinia quiniaa pueya-pueecuarajanaa. ³² Nojuajaari puetunu taucuaca jiuujijanaa cuhuatanutaniya, maninia nojori niishiniuria quiajaniya. Naajuhua, quia pueya Israelni, nojoriiri tamasa pueya shuquiritiasano quiniutianiya na seera.

³³ Jesu que, na nucujuhua, nojoriiri jiuujiateree naa Simeón sequesacari conaajajiniji. ³⁴ Na nuhuaji, Simeónri nojoriicua nieree na juaashiquia. Naa sequereeri:

—Pueyaso cuara jiitiaara maninia niajaniya.

Jesu nucua María sequereejariuhua:

—¡Cua tojiri! ¡Nio conaajaari cutara pueyano quiniutianiya! Querataia Israel pueyari juhua tiuriiniutianiya nojori ruuretasacari nojuaja. Saniniuujia, queraatia Israel pueyari cumaatia nujuatujuaca quiniutianiya, nocua nojori tiushacari. Na cumaacata na miinuucua, pueyari na naata Pueyaso niishiniu maninia. Naajaa, queraatia pueyari na ruuretanutaniya saaja. ³⁵ Naacuajitij, tama pueya niishiriojosano noojiacajiniajaarijia niishishaanutaniya. Quiara saniniuujia, jiyanohua taraatiaari quiniutianiya. Quioojaari juhua mueruuta tohuariquitiishaanutaniya quia mueyacu quia miishacari.

³⁶ Cuniqijia, Pueyaso Secojoua tiajiniani, tamonu motajaari tii quiriquiaajuhua. Cuno motajaari Pueyaso sequesano caminiujiunia quiquiaari. Na sesa quiquiaari Ana, Fanuel niyatu. Nojuajaari supuetana Israel niyanu Aser niqiuhuacuajinio supueno maaji quiquiaari. Jiyanohua motaja quiquiaariiri. Shusha niyaco na quishacari, nojuajaari camiquiaari. Na nuhuaji, siete marijiaari na shocojoquiaari neyacata na quishacari. ³⁷ Neyaca cusonu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyacaanu quiquiaari Pueyaso Secojoua tiajinia, Pueyaso na shuquiritiasacari juuca, niucuanio. Nojuajaari sequeyarucua miaqueyaquiquiaari Pueyaso na secijosacari pueyacaanu. ³⁸ Simeón pocuasacarijia, jiyacaritij, Anaari nocua nimiaa. Na niquishacari conaaja Jesu, Anaari noojiajinia niishiquiaari cante nojuajani. Cunora, Pueyaso sequeree na shuquiriniutiaari: “¡Paacarasho!” Na nuhuaji, nojuajaari juhuacatecara Jesujiniji pohuateree Pueyaso Jiyarosocoriquiano sashijiaa pueya niqiaara. Nojori sequereeri:

—¡Niocuaajaari pa sashishano pa pueyacuaji Tacuriquiano!

Na queya tacartasacariuhua conaaja Nazaret tiacajiniohua

³⁹ Jesu queyari puetunu Moisés naajioneejinia Pueyaso rootasanojuanaa tucuaatiquaari na conaajara. Na nuhuaji, nojoriiri Galilea jiyajiniara tacateguaariuhua tama nojori tiacajiniohuaajaaja, Nazaret tiacajinia. ⁴⁰ Naatujua Jesuuri maashiquiaari. Socua cumueecara quiquiaariiri, maninia niishi-jiarano. Pueyasoori jiyanohua na naacujua.

Mashajaniyojua Jesu quishacari Pueyaso Secojoua tiajinia

⁴¹ Puetunu marijiajanaa, Jesu queyari quiojoquiaari Nazaret tiacajiniji, Jerusalén tiacajiniara, Pascua juucajinia nojori queranacunura. ⁴² Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jiitiquiaaricuajani puetunu marijiajanaa.

⁴³ Queranacunuunu jaara puequequiaari, Jesu queyari quiojoriqiuohua juhuajaniya. Jesuuri jiyacari Jerusalén tiacajinia jijojequiaari. Majaari na

queya niishiniu quiriquiaa. ⁴⁴ Nojoriiri jiyaniquiaari Jesu naasucua narta quiojonaa tajinia quiariquiohuajuhuj. Naacujitij, nojoriiri juhuajaniya rucuaneree puetunu cuno juucajanaa. Cuno niucujaja, nojoriiri Jesu pajequiaari nojori pueya tajinia, nojori niishishano pueya tajinianio. ⁴⁵ Shaaqui quiriquiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

⁴⁶ Jiuujianaraca juuca nuhuaji, nojoriiri socua Jesu riuriataquiaari Pueyaso Secojoua tiajinia, Moisés Rootasanojiniji niishitiojonaa pueya tajinia cajiyano. Nojori tojiriquiaari. Nojori nequesoreetariquiaajaari-uhuj. ⁴⁷ Puetunu pueyajanaa, canapue te na tojtiriquiaani, nojoriiri jiuujiatequiaari niishijia Jesu quishacari. Jesuuri maninia nojori riuhaneriquiaa saaja, nojori jaara na nequesoreeriquiaa. ⁴⁸ Na queya jaara na niquiquiaari, nojoriiri shiriquitiuquiaari. Na nucuaari na sequeere:

—Quiyanunaa, ¿casaara naa quia miirii canaani? ¡Janiyari quia queta quia pajeriquiaani jyanohua canaa tacaaniutia quiocua!

⁴⁹ Jesuuri na riucaaree:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojoua tiajinia quiniucua jiaatiaani?

⁵⁰ Majaari nojori niishiniu quiquiaari Jesu sequesano.

⁵¹ Jesuuri na queyata quiaarohua nojori tiajiniohua Nazaret tiacajinia. Na queya tojjia quiquiaari. Na nucuaari pueyaracaanu noojiajinia racataja puetunu na niishishanojuanaa neyanu Jesujiniji. ⁵² Jesuuri socua maashiquiaari, socua niishijia quiquiaarijiaariuhuj. Pueyaso shuquiri-tiasano quiquiaari. Puetunu pueyajanaari na shuquiritiaquiaarijuhuaj.

3

Tiuquinijona Juan pohuatasacari Pueyaso rupaa cariquia jiyajinia (Mt 3.1-12; Mr 1.1-8; Jn 1.19-28)

¹ Na nuhuaji, Tiuquinijona Juanri Pueyaso rupaa pohuatanu coteequiaari. Jiyacaritij, quince marijiaari tari shocojoquiaari César Tiberio, jiyaniijajanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Traconite jiyajinianio. Lisanasri jiyaniijia quiriquiaa Abilinia jiyajinia. Puetunu cuno jiyaniijianucujanaani, nojoriiri jiyaniijianucuaara César Tiberio jiyatesano quiquiaari cuno jiyacajinia. ² Jiyacaritij, Anásri Caifásta Judiucuaacuara secojonaa jiyaniijianucua quiriquiaa. Jiyacaritij, Zacarias niyanu Juanri cariquia jiyajinia quiriquiaa. Tii na quishacari, Pueyasoori na rupaa na niishitiquiaari. ³ Naaratej, Juanri puetunu Jordán moo shuriuquico jiyacajanaa tajiquiaari na poojotasacari Pueyaso rupaa pueya niquiara. Nojuajaari naa pohuataquiaaritij:

—¡Nioojia nia tacatore maja socua sesa nia miiniuria, moojinia cua tiuquinijionura nijaniya, Pueyaso jyanooniuria nijaniya sesa nia miishanojiniji!

⁴ Naacujitij, supuetana Isafás naajiotasanoori tohuateequiaari. Pueyaso sequenu panishano caminiujunia na quiniucua, nojuajaari naa miriqui naajotaquiaari superiquiano Juanjiniji:

“Pueyano rupaari tojishiya cariquia jiyajinia nacaano. Sequeyari: ¡Jiyani-
jia nuura nia jeenucuare! ¡Puetunu manijajanaa nia nuunure,
maja shuutiuniu na quiniuria! ⁵ ¡Puetunu tacocujanaa cuara

mishiquiojosaaria maninia jamatunu na nuu quiniuria! ¡Puetunu tuhuananuhajanaa cuara jiuuroosaaria jaccanunu na nuu quiniuria! ¡Shuyorocotunu nuu cuara poccuareesaaria! ¡Puetunu suro-coshiquiajanaa cuara mishiquiojosaaria jaccanunu na nuu quiniuria!
 6 Naacuajitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootiriquiano pueyani’ ”.

Naa miriqui Isaías naajiotasanoni, cunoori pueya numooteriquiaa juhuacarijia nojori jeenucuanura noojiaca, Jiyaniijia Jesu tojitajaca nojori quiniuria.

7 Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juaaquiaari:

—¡Niaacuajaari juhua sacocua! ¿Cante nia numooteree nia mashiniuria jiyanoehua Pueyaso saniitionu panishacari nijaniyani? 8 ¡Maninia miijia nia quiri, canaa niishiniuria niaari seetanujuanaa nioojiaca tacateree sesa nia miiniujiniji! ¡Majaari najuhuaana tama nia cuaqueyajaaja nia sequenu: “Pueyaso pueyanonijia, supuetana Abrahamjinijinio cua supuenucua!” ¡Nia niishiri, Pueyaso jaara paniri, nojuajaari na naata nio saijiniji shipininu Abraham niqiuohuarajuhua! 9 ¡Pueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijiasocoriquiano. Naajuhuaaj, nijaniyari juhua sesa muetuna naana, maninia miyashijia nia quishacari. ¡Niaari quera saniitioshiyacuaaja!

10 Naaratej, pueyari Tiuquinijiona Juan nequesotaree:

—¿Taa canaa miyarinitioj?

11 Juanri nojori riucuaaree:

—Cante querajaqueya toqueracani, nojuaja cuara niqutioora taque cante toqueejuni. Naajuhuaaj, cante miaquesanoracani, nojuaja cuara niqutioora miaquesanojunucua.

12 Roma tiacajinia quijia jiyaniijiajanaa Césarra cumaneeca masejonaari Tiuquinijiona Juancua nijioquiaarijuhuaaj. Nojoriiri tiuquinijosano quiniu paniriqiaajuhuaaj. Naaratej, nojoriiri Juan nequesotaree:

—Niishitiojonanaa, ¿canaarijataj, casaa canaa miyarinijia?

13 Juanri nojori riucuaaree:

—Maja puera cumaneeca nia masenu pueyajiniji. Saaja nia jiyaniijia sequesano nia masejore.

14 Naajuhuaaj, soldadohuari Tiuquinijiona Juan nequesotaree:

—¿Canaarijataj? ¿Casaa canaa miiniutianiyarinijia?

Juanri nojori riucuaaree:

—Niaacuajaari puecootajaraca. Naajaa, majaari pueya casami nia jaar-iutianu, nojori nia miananajonuta, nojoriicuaara nia tonujusacarijuhua nia sapojonuta. Juhuaianiya nia quiri saaja nia jiyaniijia niqutiosano cumaneecata.

15 Pueyari jiyanoehua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niquniuucua jiaatiaja. Naaratej, nojoriiri jiyaniriquiaa Tiuquinijiona Juan naasucua Cristo, tariucuaaanu Pueyaso sequesano na Jiyarosocoriquianotej. 16 Nocuaaji, Tiuquinijiona Juanri puetunu pueyajanaa sequerree:

—Janiya nareja nia tiuquinijia moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. ¡Nojuajaari Pueyaso Sohanu tiuquinijionutianiya nioojiainia, na cumaaca nia jitianura, seetanujuanaa maninia miijia nia quiniuria! ¡Nojuajaari juhua manitia nia saniniujuniutianiyajuhuaaj, maninia jiuujjaraca nia quiniuria! ¡Nojuajaari socua jiyanoehua cumaacaraca janiyajiniji! Janiya maara

shuquiriaatia quirini, nojuaja jaara cua sequere cua naacutanura nojuaja juhua na seru, quenaaja na sapatu neyocua cua saacatanura. ¹⁷ Niaari ni-shiyacuaja taa pueyano miiquiaa na trigoni paratu panura na cocua, na su-cuanio, saniniuujia na jajau na racatasocoriquiano tiajiniaaco. Naajuhua, cuno pueyanoori tari niya quiya na pueya na saquiriojonura na tojiyashiji-aca pueya tajiniji, na rijiosocoriquiano nata nojori quiniuria. ¡Sesa pueyari juhua trigo sucua catijiasaanutaniya saniniuujia! ¡Nojoriiri jatasaanutaniya manijinia! ¡Cuno maniiri maja na maquesanu quiniutianiya!

¹⁸ Tiuquinijiona Juanri naa pohuataquiaari Pueyaso rupaa pueya niquiara. Maninia rupaari, na tojitiajaca pueya quiniuria shuquiriaatia. Socua queraatia quiquiaariiri na pohuatasano na numootenura pueya.

¹⁹ Jiyaniijia Herodesri jiyacari tarajanu Felipe niquiocua jiitariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquiaari sesa na miishanojiniji. Herodesri maja na tojinu quiquiaari saaja. Jiyaniijia Herodesri socua queraatia sesa casaa miiijia quiquiaari. ²⁰ Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniaari.

Jesu tiuquinishacari moojinia
(Mt 3.13-17; Mr 1.9-11)

²¹ Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijiuhua. Jesu tohuatasacari moojiniji, na que Pueyaso secojoriquiaari. Jiyacaritij, jiya cajiniocuaari riatequee. ²² Pueyaso Sohuanuuri Jesuucua roseyaree juhua mococoonu niquishano. Jiyocua-caanuji, Pueyaso rupaari tojishaaree sequeyano:

—¡Quiaacuajaari cua panishano quiyanuniyojua! ¡Jiyanohua quia shuquiri-tianiija!

Jesu supuetanaa sesaca
(Mt 1.1-17)

²³ Treinta marijia jaara na shoconujuquiaari, Jesuuri na Que Pueyasa-ora poonijionu coteequiaari. Pueyari jiyaniquiaari José naasucua see-tanujuanaa na que quiquiaari. Joseeri Elí niyanu quiquiaari. ²⁴ Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. ²⁵ Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Eslí niyanu quiquiaari. Eslíiri Nagai niyanu quiquiaari. ²⁶ Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri Judá niyanu quiquiaari. ²⁷ Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. ²⁸ Neriiri Melquí niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. ²⁹ Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. ³⁰ Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eli-aquim niyanu quiquiaari. ³¹ Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari

Natán niyanu quiquiaari. ³² Natánri David niyanu quiquiaari. Davidri Isaí niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. ³³ Naasónri Aminadab niyanu quiquiaari. Aminadabri Admín niyanu quiquiaari. Admínri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. ³⁴ Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. ³⁵ Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. ³⁶ Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeeri Lamec niyanu quiquiaari. ³⁷ Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. ³⁸ Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

4

Samaruhua jiyaniijia saniniujiushacari Jesu (Mt 4.1-11; Mr 1.12-13)

¹ Jesu quiasacariuhua Jordán moojiniji, Pueyaso Sohuanuuri noojiajinia quiriquiaa puetunu na cumaacajanaa na jiiitianura. Pueyaso Sohuanuuri na jiyatequiaari pueya jiyaqui cariiquia jiyajiniara. ² Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji míaajequiaariiri.

³ Jiyacaritij, Sesaacaari na sequeree:

—Quiaa jaara seetanujuanaa Pueyaso Niyanu quiri, nio saajia quia jataniri neecaruura na quiniuria.

⁴ Jesuuri saaja na riuquaree:

—Pueyaso Rupaajiniacuajaari naa naajiotasano quiya:
“Pueyanoori maja saminio na quiniu saa miaquesanotaja. Seetanujuanaa saminio quiyari na tojishacari puetunu Pueyaso Rupaajanaa”.

⁵ Na nuhuaji, Sesaacaari Jesu jiyataaree jiyanoehua jyaconaja tuhananucua. Sesaacaari ritia niqutiriji Jesu puetunu mijiria jiyacajanaa. ⁶ Jesu sequereeri:

—Janiya quia niqutionutaniya puetunu nio jiyaca jiyaniijianucua cumaacajanaani, maninia jiyaniijiajanaa quia quiniuria mijiria. Janiyari puetunu nio jiyacajanaa niqutiosaaquiaarini. Naacuajitij, janiyari cumaaca niqutioquiaani cana cua niqutionu paniyacuajani, jiyaniijiaara na quiniuria. ⁷ Puetunujanaari quiara quiniutianiya, quiaa jaara cucuara mojoquetare quia shuquiritianura janiya.

⁸ Jesuuri saaja na sequeree:

—Pueyaso Rupaajiniacuajaari naa naajiotasano quiya:
“¡Quia Jiyaniijia Pueyaso quia shuquiritiare! ¡Saaja nojuaja quia tojiri!”

⁹ Na nuhuaji, Sesaacaari Jesu jiyataaree Jerusalén tiacajine. Na tacaniriiri Pueyaso Secojojua tia cacojiria, jiyocuaaanu. Jesu sequereeri:

—Niiquiji quia jaataare jiyocua, quiaa jaara seetanujuanaa Pueyaso Niyanu quiri. ¹⁰ Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaninya. ¹¹ Nojoriiri quia quianutaniya, saajiaacua quia jiriataaquiniucujaji”.

¹² Jesuuri na riuquaree saaja:

—Naa naajiotasano quiyajaariuhua Pueyaso Rupaajinia:

“Maja quia Jiyaniijia Pueyaso quia saniniujiuniu”.

¹³ Sesaacaari naa Jesu saniniujiuniu puecaquiaari puetunujuanaa. Maajaari quenaaja na naata quiriquiaa sesa na miitiniuria. Naaratej, rupaquijia na tarinitiaquiaari tamacaririaari.

Jesu coteesacari na poonijosano miiniu Galilea jiyajinia

(Mt 4.12-17; Mr 1.14-15)

¹⁴ Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujutiooquiaari. ¹⁵ Jesuuri Pueyaso secojoja tiajiniaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

Jesu quishacari Nazaret tiacajinia

(Mt 13.53-58; Mr 6.1-6)

¹⁶ Jiyacaritij, Jesuuri quiaquiaari Nazaret tiacajinia, tee na canashitishaaquiaaricujani. Samaatenu juuca, Jesuuri Pueyaso secojoja tiajinia tiuquiquiaari taa na jitiqiaari miiniucujani. Nojuajaari nujuaquiaari Pueyaso Rupa serojonura pueya niqiara. ¹⁷ Pueyari na niquitioree tariucuacaanu Pueyaso sequesano caminiujiunia Isaías naajione juniocosano, pueya niqiara na serojosocoriquiano. Jesuuri na saacartaree. Serjonu coteereeri tee nio naajiotasano quiyacuajani:

¹⁸ “Pueyaso Sohuanuuri coojajinia quiyani, na cumaaca cua jitianura. Naacuajitij, Pueyasoori cua seeratarucuaa maninia rupaa cua pohuatanura casamijiuniucua pueya niqiara. Cua jiyaroreejaariuhua Sesaaca quioosano pueya cua pohuatanura maninia rupaa Pueyaso-jiniji. Naacuajitij, nojoriiri cartesano quiriohua Sesaaca sapojosano-jiniji. Cua jiyaroreejaariuhua cariyojuarujuri pueya namijiaa cua jeeanura, maninia niqijijia nojori quiniuhua. Cua jiyaroreejaariuhua taraatia miitiasusano pueya cua jiyatenura shuquiriaatia qui-jiacara. ¹⁹ Cua jiyaroreejaariuhua cua pohuatanura pueya niqiara, quiarijiaari Jiyaniijia Pueyaso jiyanooshacari pueya”.

²⁰ Na serjonu nuhuaji, Jesuuri naajione juniocorohua. Na niquitiorohua na cojuanaari. Jesuuri cajiriohua. Puetunu pueyajanaari tacuriitia na shootiatuquiquiaa. ²¹ Jesuuri juhuacatecara pocuarohua. Naa sequereeri:

—Quiarijiani, Pueyaso Rupaajinia nio naajiotasanoori tari tohuateeree nia niqiara.

²² Puetunu pueyajanaari jiuujiateree shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojorijiaarijia nequesoreetooriquiaa:

—¿Majate nio pueyano José niyanucuaaja, niya pa tiacajinia maashiniotej?

²³ Jesuuri nojori sequereeri:

—Niaa jiyoteeri cua sequenu paniya nio tariucuacaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajiniaajaani, taa nia tojiquianucuaaja cua miishanoiniji Capernaum tiacajiniacuaani.

²⁴ Jesuuri socua sequereeri:

—Seetanujanaa nia sequeyanijia, puetunu Pueyaso sequenu panishano caminiujiuniaajanaari tojishoo quijia, tama nojori tiacajiniaajaaja.

²⁵ Supuetana Elías quishacari, queraatia mashiquiopueeri quiquiaari Israel jiyajinia. Jiyanhua miaajesacari quiquiaari maru nyaquishacari pueyaracaanu. Jiuujianaraca marijaari shocojoqiaari socua seis rakanio, maru nyaquishacari. ²⁶ Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuajitij, cuno taatu mashiquioori miaquesano jittiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniucua Pueyasocua tiujia, cuno taatu miaquesanoori maja na pueetanu quiquiaari nojoriria. ²⁷ Naajuhua, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojorijinijinio naatanishaanu quiquiaari Eliseo jittiasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajinijinio pueyanoni.

²⁸ Pueyaso secojua tiajinia quiniaa pueya tojishacari naa Jesu pohanatanotej, puetunu nojorijianaari jyanohua juaaquioree. ²⁹ Nojoriiri saneecuatuquee. Jesu caponeeturee nojori tiacajiniijiiri. Nojoriiri Jesu jaatucuquiaari socua jiyocuacaanu nojori quijia tuhananujinijiria, teyanocua nojori tiaca tiasano quiquiaaricujani. Nojoriiri na capotunu paniriquiaa juucua tajojiyaji naa na monura. ³⁰ Jesuuri saaja nojori tajiniaaco canuquiciaari juhujaniya. Quiniquiji tamocora quiaareeri.

Samaruraca pueyanojiniji pohanatanotej
(Mr 1.21-28)

³¹ Jesuuri Capernaum tiacajinia quiaquiaari, Galilea jiyajinia tiaca. Samaateni juuca, Jesuuri pueya niishitiojoriquiaa. ³² Nojoriiri jiuujiateree na niishitiojosano nojori tojishacari. Na niishitiojosanoori seetanujanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujunina.

³³ Pueyaso secojua tiajinia, samaruraca pueyanoori jiyacari ti quiriquiaa. Na niquishacari Jesu, naa jyanohua nacareeri:

³⁴ —¡Nazaret tiacajinijinio Jesunaa! ¿Taa quia miiniu paniya canaani? ¡Canaa quia niquiri nareja! ¿Quiaate tari niyaree canaa sanuutionuucua? ¡Quia niishiyacuajaniija, cante quiajaniyani! ¡Quiaacuajaari sesa miyashijia Pueyaso Niyanu!

³⁵ Jesuuri samaru sequeree:

—¡Quia sanaajere! ¡Quia tohuatate nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quiri pueyano.

³⁶ Puetunu pueyajanaari shiriitiquiri. Tama Jesujiniji sequetooreejaariija:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jyanohua cumaacaraca! ¡Cunora samaruhua tohuataniriiri!

³⁷ Puetunu cuno jiyajinijanaa, Jesu miishanojinijiiri caminiujushaaquiaari pueya niquiarara.

Jesu naatanishacari Simón Pedro reyarucua
(Mt 8.14-15; Mr 1.29-31)

³⁸ Jesuuri Pueyaso secojua tiajiniji tohuareetaquiaari na pueyata. Quiojiyareeri. Simón tiajinia tiuquitiushiiri. Simón reyarucuaari jiyacari jyanohua naseeca matariquiaa. Pueyari Jesu sequeree na naataniniuria.

³⁹ Jesuuri cusosu caco nujuasee. Jesuuri na naseeca cusonu jiyaroree. ¡Na

naseecaari ritia shinitiaquee! Tariucua jiyotuucaari jiyacari sanemaa, na tiajinia quiniaa pueya na mianuutenura.

Jesu naatanijosacari queraatia cusosuhua
(Mt 8.16-17; Mr 1.32-34)

⁴⁰ Pananu tiuquishacari, puetunu pueyajanaa, cante cusosuhua jiiti-aquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhuaacajanaa. Nojoriiri queraatia tamaatia cusonu jiitiaquiaari. Jiyacari na naatanijoree puetunujuanaari. ⁴¹ Naajuhuj, queraatia samaruhuari tohuareetaquiaari cusosuhuaajiniji. Samaruhuari naa nacaquiaari Jesuucua:

—¡Quiaacuaja Pueyaso Niyanu!

Jesuuri nojori juaarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

Jesu pohuatasacari Pueyaso rupaa Pueyaso secojonuujua tiajiniaqueya
(Mr 1.35-39)

⁴² Tariquicuaji, Jesuuri tiacajiniji quiaquiaari tamaquicua tamajaaja. Pueyari na pajequiaari. Nojoriiri socua nocua tiuquijioquiaari na pajenu-usacari. Majaari nojori cartenu paniniu quiquiaari Jesu quianura cuniquiji.

⁴³ Jesuuri nojori sequeree saaja:

—Janiyari jiyarosaaquiaarini pueyapue niquiara cua pohuatanura quiarinio Pueyaso Rupaa. Quiarijiani, Pueyasoori pueya jiyanooni paniya, nojori quiniuria na pueya, nojori tiushacari nocua. Naaratej, janiyari na rupaa pohuatanura quianu paniya tamonu tiacajinijaniuhuj. Janiyacuajaari cunora jiyarosaaquiaarini.

⁴⁴ Naacuajitij, Jesuuri puetunu Judiocuaca jiyajiniajanaa rucuanajoquiaari Pueyaso rupaa pohuatanura puetunu Pueyaso secojonuujua tiajiniaqueyajanaa.

5

Sapitiaajara jaquerootanaa shiriiquitiushacari
(Mt 4.18-22; Mr 1.16-20)

¹ Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanohua pueyari nocua catecanoquiaari catecaji na tojtianura nojuaja. Nojoriiri Jesu tanuuriquiaa puera. ² Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. ³ Jesuuri Simón botejinia tacaquiaari. Simón sequereeri cuara bote juariocotaara caminia jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri. ⁴ Jesu jaara niishitiojonu puecaquiaari, Simón sequereeri:

—Queronijinia pa jaaretaare. Niocua tii jartasee nia shiyaruhua sapitiaajara.

⁵ Simónri na riucuaree:

—Niishitiojonanaa, canacuajaari tari jaquerootariquiaa najuhanani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaquerootarohuacuaraqij.

⁶ Nojori jaara socua na shiyaruhua jartaquiaariuhua, jiyanohua queraatia sapitiaaja ritiatureeri! Shiyaruhuari surequetanu coteequiaari. ⁷ Nojoriiri jatiqui nata poonijonaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui bote mishinioturee sapitiaajataari. ¡Quera tiuquitiariquiaari queraatia sapitiaajata!

⁸ Simón Pedro niqushacari naa Jesu miishano nojoririatej, Jesuucuaa mojoquetareeri. Jesu sequereeri:

—Jiyaniijianaa, maja cua rupuenu socua! Janiya puera sesa pueyanoni quia rupuena cua quiniuria.

⁹ Simónri shiriiquirii, jiyanoehua queraatia sapitiaaja nojori quiasacari. Nata quiniaa pueyari shiriiquitiuriijiuhaaj. ¹⁰ Cuno pojoritia quiriquiaa-jaariuhua Zebedeo niquiohua, Santiago, Juannio. Nojoriiri Simón cojiniaa quiquiaari. Jesuuri Simón sequeree miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

¹¹ Nojori shiitiasacari, nojoriiri puetunu na casaajanaa tiujiaquiaari Jesu nojori quiojonura.

Jesu naatanishacari lepraraca cusosu
(Mt 8.1-4; Mr 1.40-45)

¹² Tamonu tiacajinia Jesu quishacari, lepraraca cusosu pueyanoori tii quiquiaari. Na niqushacari Jesu, nocuaa jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

¹³ Jesuuri na quiaree. Na sequereeri:

—Taaquiriirinij. Quia naataniniu panianijia. Quia cuaqueya cuaara jeequehuara.

Naa na sequesacarij, na lepraari shaajequee na cuaqueyajiniji. ¹⁴ Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara secojona jiyaniijia quia niqutishii quia cuaqueya, na cartenuhuara quiajanija, pueya tajinia quia rucuanenonuhua juhua-janiya. Naajuhuaaj, quia seru quia niqutiose pueyasocuaa catijiasocoriquiano. Naa quia miiri taa Moisés rootaquiaaricuajani, puetunu pueyanaa niishiniuria quiaa tari jeequerohua quia cusonujiniji.

¹⁵ Maninia Jesu miishanojinijiiri jiyanoehua socua tamaquicua camini-ujishaaquiaari pueya niquiara. Naaratej, jiyanoehua queraatia pueyari nocua niijioquiaari na tojinuria, mariyata Jesu naatanijionura nojori, nojori cusonujiniji. ¹⁶ Jesuuri saaja pueya quiaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

Jesu naatanishacari cumatacuruhuana cusosu
(Mt 9.1-8; Mr 2.1-12)

¹⁷ Tamonu juuca, Jesuuri pueya niquiara niishitiojoriquiaa. Na tojtianaa tajinia cajituriquiaajaariuhua Fariseocuaa, Moisés Rootasanojiniji niishitiojonaano. Nojoriiri niijioquiaari puetunu Galilea jiya tiacajiniijianaa, Judea jiya tiacajiniji, Jerusalén tiacajinjinio. Jesuuri jiyanoehua Pueyaso cumaaca jitiariquiaa cusosuhua na naatanijionura. ¹⁸ Jiyacaritij, socua pueyari tiuquijioquiaari. Nojoriiri cumatacuruhuana cusosu patariquiaa na matujinia. Nojoriiri juucua na tiuquitianu paniriquiaa tajiniaaco Jesu-ucua. ¹⁹ Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocuaaji, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneca majeetejosano. Nojoriiri tia nijinia papataquiaari. Na nuhuaaji, nojoriiri cusosu roshinitariee cuhuocojiniji na matujinia, Jesu nujuasaqui pueya tajinia. ²⁰ Jesu niqushacari taa nojori tiuuriquiaa nocuani, cunora Jesuuri cusosu sequeree:

—Pueyanonaa, quiaacuaaja tari jiyanooshaaree sesa quia miishanojiniji.

²¹ Naa Jesu sequesacaritij, Moisés Rootasanojiniji niishitiojonaa, mariyata Fariseocuacaari naa niishiriojonuuriquiaa: “¿Cantejaara cuno pueyanoni? ¡Nojuajaari tama na cuaqueyajaaja jiyateya juhua Pueyaso na quiniuria! ¡Pueyanoori maja na naata tamonu pueyano jiyanooni sesa na miishanojiniji! ¡Saaja Pueyaso cutaraari na naata pa jiyanooni!”

²² Jesuuri naa nojori niishiriojosano niishiriquiaa. Cunora, nojori sequeereeri:

—¿Casaara naa nia niishiriojiyani? ¿Niaateeri cucuaji taacanuyajaa?

²³ Janiyara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetetejaariuhua sequenura: “Quia sanere. Quia rucuanere”? ²⁴ Cunora, janiyari quiaritia nia niishitiniutianiyani, janiyari mijiria jiyarosaaquiaarini pueya cua jiyanooniuria sesa nojori miishanojiniji.

Naacujitij, Jesuuri cumatacuruhuana pueyano sequeere:

—Cua tojiri. ¡Quia sanere! ¡Quia matu quia pataarohua quia tijajinia!

²⁵ Jiyacaritij, pueyanoori sanequee nojori niquiara. Na tijajinia pataarohua na matuuri. Shuquiriaatia quiariquiohua na tijajiniohuari Pueyaso na maniniuhuaqueetanuta. ²⁶ Puetunu pueyajaanaari shiriiquitiurii. Nojoriiri Pueyaso maniniuhuaqueetariquiaa cuno maninia casaa nojori niquiniuuca. Nojoriiri na puerenuta naa sequetuquiaarijihuaaj:

—¡Paari quiaritia jiyanohua maninia miishano niquiriini! ¡Nocujaji jiuuji-atesano!

*Jesu sequesacari Leví, na pueyano na quiniuria
(Mt 9.9-13; Mr 2.13-17)*

²⁷ Nio nuhuaji, Jesuuri tohuataquiaari. Tamonu pueyano niquiriiri jiyani-ijiajanaa Césarra cumaneeca masejosaqui cajiyano. Na sesa quiquiaari Leví. Jesuuri na sequeere:

—¡Cua nuhuajiri, cua pueyano quia quiniuria!

²⁸ Jiyacaritij, Leviiri ritia sanequiaari. Puetunu na jiiitasanojuanaa tiuji-aqueeri. Jesuta quiaqueeri.

²⁹ Na nuhuaji, Leviiri jiyanohua queraatia sumatuquiaari na tijajinia, Jesu na queraanacutanura. Queraatia narta cumaneeca masejonaari tii quiriquiaajaacuhuaaj. Nojoritia miaquejajinia cajitiriquiaari, socua tamasaca pueyano. ³⁰ Moisés Rootasanojiniji niishitiojonaa, mariyata narta Fariseocuacaari juhuacatecara Jesu pueyacuara rimiaaquenu coteequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacartajacatajaajani? Nojoriiri pa paraa sequera cumaneeca masejona.

³¹ Jesuuri nojori riucuaere:

—Cante na cuaqueya jiyaniyani nojuaja maja cusosu na quiniu, nojuajaari maja naarajona na paniniu. Cusosuhua cutaraari naarajona paniya.

³² Naajuhuaaj, majaari mijiria cua ninu quiquiaari maninia miijia pueyacu. Niquiaari cutaranijia sesa miijica cua tacatonuhua Pueyasocua, maninia miijia nojori quiniuria.

*Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura
(Mt 9.14-17; Mr 2.18-22)*

³³ Pueyari Jesu sequeere:

—Tiuquinijiona Juan pueya cutaraari sequeyarucua miaqueyaquiaa. Nojoriiri naa Pueyaso secojoquiaa pueyaracaanu. Fariseocuacaari naa

miiquiaajuhuaaj. Quia pueya saniniuuja, saaja miaquequiaari, ratuquiaari. ¿Casaarateni?

³⁴ Jesuuri nojori riucuaaree:

—Pueyano camishacari maaji, majaari masuusano pueya miaajenu, camiriqiuano pueyano jaara nojoritia quiyajaa. ³⁵ Tamacari, camiriqiuano pueyano jaara jaariutiasaare nojori tajiniji, jiyacariti nojori cutaraari mi-
aqueyaquiniutianiya. Naajuhuaaj, janiyari cua pueya tajiniji jaariutiasaanu-
tianiyan. Jiyacariti nojori cutaraari miaqueyaquiniutianiya.

³⁶ Jesuuri socua nojori niqiuara pohuataquiaari nio miriqui sequesano:

—Majaari pueyano miatenu quijia na toque quiariquijiniji, na toque mocua cuhuoco na cushipirijiotajara. Saniniuuja, jaara naa miiritij, na toque quiariqui sesoyari. Quiarinio toquerauri sesoshiyajuhuaaj, toque mocuajinia na posequesacari. Cua rupaari naajuhuaaj, juhua quiarinio toque. ³⁷ Naajuhuaaj, majaari na naata quiariniacu uva caaca mishinishaanu shoque tariucuacojinia, tariucuaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhuaana niitiashiya. Shoqueeri najuhuaana sesoshiyajuhuaaj. ³⁸ Naaratej, maninia cutaraari quiariniacu uva caaca shuujionu shoque quiariquiojinia, maja vino niitiasaanuucujaji, na quiquio shoquenio. Naajuhuaaj, nia niishitiojosanoori juhua tariucuaco shoque. ³⁹ Naajuhuaaj, pueyano jaara vino tar-
iucuanacu ratujua quiri, majaari na paniniu quiariniacu vino. Sequeyari: “Tariucuanacuuri maniacuaja”. Naajuhuaaj, majaari cua niishitiojosano nia paniniu, quiarinio na quiniuucua.

Jesu pueya carojotasacari trigo samaatenu juuca
(Mt 12.1-8; Mr 2.23-28)

6

¹ Tamonu samaatenu juuca, Jesuuri trigo cuhuariquiajiniaaco quio-
joriquiaa na pueyata. Na pueyari trigo carojotariquiaa. Nojoriiri na
juaashiquiajinia na shuquiojoriquiaa na corequetanura. Na nuhuaji, na
jajau miojonuuriquiaari. ² Fariseocuacaari na niqutiariquiaa. Nojoriiri
Jesu pueya juarii:

—¿Casaara nia tojitiaaquia Moisés Rootasanoni, taa na sequequiaaricua-
jani maja pa poonijonura samaatenu juuca?

³ Jesuuri nojori riucuaaree:

—¿Majateeri nia serojonu quiquiaacuaja casaa supuetana David mi-
iquiaari na miaajesacarin, mariyata na cojiniaa miaajesacarijuhuaj?

⁴ Nojuajaari Pueyaso Secojoua tiajinia tiuquiquiaari. Pueyatora niojosano
pan pooquiaariiri. Na sareeri. Mariyata nata quiniaa niquitiojoreeri nojori
sanurajuhuaaj. Cuno panri sequesaaquiaari saaja pueyacuara secोजना
sasocoriguiano. Naajaa, Davidri na saquiaari. Majaari Pueyaso juaaniu
quiquiaari naa David miiniuucua.

⁵ Jesuuri socua cuno Fariseocuaca sequequiaari:

—Janiyacuajaari Pueyaso Jiyarosanoni. Jiyaniijara jiyatesaaquiarinijia
cua sequenura casaate samaatenu juuca miishiyani, Pueyaso pa shuquiri-
tiniuria.

Jesu jeeacasacari pueyano juaashiquia, cuseetuajuara joojequetano
(Mt 12.9-14; Mr 3.1-6)

⁶ Tamonu samaatenu juuca, Jesuuri Pueyaso Secojoua tiajinia
tiuquiquiaari. Tii niishitiojoriquiaari. Quiniqui quiriquiaari
pueyano, cuseetuajuara joojequetano na juaashiquia miaquetajara.

⁷ Moisés Rootasanojiniji niishitiojona, mariyata Fariseocuacaari

Jesu shanacutariquiaa. Nocuara tonujunu paniriquiaari Jesu jaara cuseetucojuara joojequetano juaashiquiaraca pueyano jeccare samaatenu juuca. ⁸ Jesuuri tari niishiriquiaa taa nojori niishiriojoriquiaani. Jesuuri cuno rimiajatucojua pueyano sequeree:

—¡Quia sanere! ¡Niya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanu-racuajani. ⁹ Jesuuri nocuara tonujunu panijiaca pueya sequeree:

—Nia nequesotareeraj. Cua sequere, ¿taa pa niishitiojosaquiaari Moisés Rootasanojinijini? ¿Paate maninia miya samaatenu juucani? ¿Paate sesa miya soj? ¿Cusosuhate naatanijoshiya, puetushiyajanaa monu soj? ¿Taa nia sequeyani?

¹⁰ Jesuuri puetunu na shocuaqueya quiniaajanaa niquinijoree. Na nuhuaji cusosu sequereeri:

—¡Quia juaashiquia quia shiitiore!

Pueyanoori na juaashiquia shiitioree. ¡Na juaashiquiaari ritia jeeque-quee! ¹¹ Cuno pueyari jiyanojua juaaquioree naa Jesu miishacaritij. Nojoriiri naa pocoojoquiaari tamajaaja: “¿Taa pa miniutianiya socua cuno Jesuurini?”

Jesu saquiriojosacari doce pueya na jiyaramiquishocoriquiano
(Mt 10.1-4; Mr 3.13-19)

¹² Jiyacaritij, Jesuuri tamonu tuhuananuucua quiaquiaari, Pueyaso na secojonura. Puetunu niucujanaa secojoriquiaa Pueyasoori. ¹³ Jaara juhuaquequiaari, Jesuuri na tojtiajaca pueya sequequiaari nocua nojori nijionura. Puetunu nojorijinijiniojuanaa, Jesuuri nareja doce pueya saquiriojoquiaari. Nojori sesojoreeri, “cua jiyaramiquishocoriquiano pueya”. ¹⁴⁻¹⁵ Nioori Jesu saquiriojosano pueya sesaca: Simón. Jesuuri na sesojoquiaarijuhua “Pedro”. Simón tarajanu Andrésri saquiriojosaquiaarijuhuaj, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. ¹⁶ Santiago niyanu Judasri saquiriojosaquiaarijuhuaj, Judas Iscarioteno. Nojuajaari quiquiaari Jesu quiateriquiano mosocoriquiano.

Jesu niishitiojosacari queraatia pueya
(Mt 4.23-25)

¹⁷ Na nuhuaji, Jesuuri tuhuananujiniji rosetaquiaarijuhua na saquiriojosano pueyata, jamatujiniara. Cuno jamatujinia, queraatia na nuhujinia pueyari tari nocuaji quiriquiaa. Mariyata jiyanojua queraatia pueyari tii quiriquiaa puetunu Judea jiyajinijinio, Jerusalén tiacajinijiniojuhuj, shoniniacu caminia shuriuquiumia quijiacajinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijioquiaari nojori tojiniuria Jesu, na cusonujiniji nojori naatanijiosaananurajuhuj. Jesuuri nojori naatanijoree. ¹⁸ Naajuhuj, taraatia samaruhua miishano pueyari naatanijiosaquiaarijuhuaj. ¹⁹ Puetunu cusosuhujanaari Jesu quianu paniriquiaa, naatanijosano nojori quiniuria. Jesu cumaacaari jiyanojuaa pocoojoriquiaa. Naaratej, puetunu pueyajanaari naatanijiosaariquiaa, saaja nojori quiasacari nojuaja.

Jesu pohuatasano shuquiriaatia quijajiniji, taraatia quijajinijinio
(Mt 5.1-12)

²⁰ Na nuhuaji, Jesuuri na pueya niquirii na pocuanura. Naa sequereeri:

—Niaari Pueyaso shuquiritiasano, niaa jaara niishiriquia nioojia saaja sesa miijia. Niaa jaara niishiri nioojia naa quiyatej, niaari Pueyaso jütiasano pueya quiniutianiya.

²¹ 'Niaari Pueyaso shuquiritiasano, niaa jaara maninia miijia quiniucua jiaatiaa, taa miaajeyano pueyano miaquesanoocua jiaatiaacuaani. Niaa jaara naa quiniucua jiaatiaa, Pueyasocuaajaari nia jataniniutianiya maninia quijiara nia quiniuria.

'Niaari Pueyaso shuquiritiasano, niaa jaara sesa nia miiniu nuhuaji taraajequiaa. Niaari na nuhuaji saroojonutaniya nia shuquiriniutia, niaa jaara jiyanooshaarohua.

²² 'Niaari Pueyaso shuquiritiasano, pueya jaara nia niquniu paniyaquiri, pueya jaara nia taanuure, pueya jaara nia macaatiri, pueya jaara nia soore cua tojijia nia quishacari. ²³ Niaa jaara naa miishaaretej, jiyanoohua nia timiri. Nia jaacuatere nia shuquiriniutia. Niaa jaara naa nia miishacari rejeretajaca quiri, Pueyasoori nia niishishoo casaa racatasano jüitiaa jiyocuaaanu, na niquitiosocoriguiano niajaniya. Nia paraa supuetanaari naa taraatia miiquiaari tariucuaaanu Pueyaso sequenu panishano caminiuju-niaa pueyajuhua.

²⁴ 'Niaari saniniujuia taraatia quijiaa quiniutianiya, jamuejaca casamiriacua pueyanaa. Niaacuaajaari tari shuquiriaatia quiquianu, puetunu nia panishanojuanaa nia jütiasacari.

²⁵ 'Taraatia quijiaaari niajaniya, cante sequejani: "Janiyacuaaja maninia pueyanoni. ¿Janiyatucua casaara paniri Pueyaso jiyanooniuria janiyani?" Naa sequejaca pueyanaa, na nuhuaji, niaari niishiniutianiya niaari saaja sesoriquia pueya seque.

'Taraatia quijiaaari niajanijuhua, jeya nia quiyaquishacari Pueyasora, saaja tamajaaja shuquiriaatia nia quiniuria nia cojesacari pueyaraaanu. Niaari na nuhuaji sapuenutaniya Pueyasooju nia quishacari pueyaraaanu.

²⁶ 'Taraatia quijiaaari niajaniya, puetunu pueyajanaa jaara maninia pohuataquiaa niajanijajiniji, maninia nia kojiniucua cuno pueya, Pueyaso tojiyashijia pueyani. Cuno pojori supuetanaacuaajaari naa shuquiritaquiaari cuno sapojonuujua, canapuate maja seetanujuanaa Pueyaso sequesano caminiujuinaa quiquiaaricuaajani.

Pa paraa panijiaa pa quirij

(Mt 5.38-48; 7.12)

²⁷ 'Niajaniya, cante niya cua tojtiaacuajani, cua tojitiuri. ¡Nia paraa nia paniri! Maninia nia miiri nia niquniu paniyashijia pueya. ²⁸ Saaja maninia nia riuucua nia juayano pueyano. Sesa nia miijiaa pueyacua nia secojore Pueyaso. ²⁹ Pueyano jaara quia maseca piri, quia jiyanoori nojuaja. Jaara taquijiria pirijuhua, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojoqui quia niquitiorejuhua. ³⁰ Pueyano jaara quia sequere quia casamijiniji quia niquitionura nojuaja, quia niquitiore nareja. Pueyano jaara quia casaa jaariutiare, majaari na sequenu: "Cua niquitiorohua".

³¹ Maninia nia miiri tamasaca, taa nia paniquiaa tamasaca miiniuria niajaniyacuaani.

³² 'Niaa jaara saaja nia panijiaa paniriquia, majaari nia jiyaniniu Pueyasoori nia shuquiritiaa naa nia miishacari. Sesa miijiaa pueyari naa paniquiaa nojori panijiacajuhua. ³³ Maja puera maninia miijia niajaniya, niaa jaara maninia miiquiaa saaja noo pojori, canapuate maninia miiquiaa

niajanियacuaani. Sesa miijiaca pueyari naa maninia miiniu niishiquiaa-juhuaj, noo pojori canapuate maninia miiquiaa nojoricuaani. ³⁴ Maja puera maninia miijia niajanिया, niaa jaara nia masena niqutioquiaa na panishano, nia niishishacari nojuaja ritia niqutionutaniuhua niajanिया-jiniji na masesano casaa. Sesa miijiaca pueyari na casaa rupaquijara niqutioquiaa narta sesa miijia pueyajuhua, na niishishacari nojori ritia niqutionutaniuhua nojori masesano casaa rupaquijara. ³⁵ Nia paniri nia paraa. Maninia nia miiri nojori. Nia casami nia niqutiore nareja, pueya jaara na paniya rupaquijara. Majaari nia taraajenu cuno pueyano jaara nia niqutioyaquiriohua nia casaa. Naa nia miishacaritij, niaari seetanujanaa jiyocuaaanu Quijia muerasu. Pueyasoori socua jiyanoehua queraatia nia niqutionutaniya tamasa nia niqutiosanojiniji. Naaratej, capora nia quiri, taa nia Que Pueyasocuaani. Nojuajaari nareja niqutiojoquiaa sesa miijiaca pueya, mariyata canapuate na sequeyashijiacani “paacarasho”. ³⁶ Naaratej, jyanootio nia quiri, taa nia Que Pueyasocuaani, jyanoojia.

Maja sesa nia niishiriojonu niarta pueyanooacara
(Mt 7.1-5)

³⁷ Maja nia rimiaaquenu tamasaacuara, Pueyaso mariqui saniniuujia nia jyanoyaquiriiri. Niaa jaara tamasaacuara tonujiyashijia quiri, naajuhua, Pueyasoori maja na saneenu quiniutianiya sesa nia miishanojuhuaj. Niaa jaara jyanootio quiri, Pueyasoori nia jyanoniutianiyajaacuhua. ³⁸ Niaa jaara tamasa niqutioquiaa na panishano, Pueyasoori naa nia niqutionutaniya nia panishanojuhuaj, maninia shanacusanu, jiuuquitiiasano, maninia quianujusano, mishaja quera niitiyano. Pueyasoori mariyata juhua nia shanacutajajiniaja niqutionutaniya niajanिया, taamueca shanacutajajinia nia niqutioquiaa pueyacuaani.

³⁹ Jesuuri socua niishitiojoquiaari pueya, nio miriqui sequesanota:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama. ⁴⁰ Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiyajaariuhua, juhua na niishitiojonaja.

⁴¹ ¿Casaara nia niquiyu rucucua maano quia tarajanu namijiajiniani, niaa jaara puereetucua maca jitiiaa tama nia namijiajiniajaaja? ⁴² Niaa jaara puereetucua maca shanacuya tama nia namijiajiniajaaja, ¿niaatucua casaara sequere quiarta pueyanoni: “Cua tarajanunaa, cuno rucucua pa taquiri quia namijiajiniji”? Sesa jiuujiaracanaa, tama nia namijiajinijiaaja nia pare coteenu cuno maca. Na nuhuaji cutara nia naata maninia niquiniu, cuno rucucua nia taquiniuria nia tarajanu namijiajiniji. Naaratej, majaari nia rimiaaquenu niarta pueyanooacara.

Naanaari niishishano na jajaujiniji
(Mt 7.17-20; 12.34-35)

⁴³ Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu. ⁴⁴ Puetunu naanaanaari maninia niishishano na muetusanojiniji. Majaari pa naata satuna carojonu shuunajiniji. Naajuhua, majaari pa naata tuhuaracona carojotanu saarianajiniji. ⁴⁵ Naajuhua, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaara nia rimiaaqueja, sesa jiuujiaraca na quishacari. Casaa pa niishiriojoquiaa poojiajiniani, paari cuno pocuaani.

Miriqui Jesu pohuatasano cumueeca jiyajiniji, sasaca jiyajinijinio
(Mt 7.24-27)

⁴⁶ ¿Casaara nia sequequiaa janiyani, “Cua jiyaniijianaa, cua jiyaniijianaa”, niaa jaara cua rootasano tojtiaaquiuaa? ⁴⁷⁻⁴⁸ Cua tojiri. Cante cua rupenara quirii cua rootasano tojijia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucuaaji. Na nuhuaji, moo jaara pajaashiquiaari, pajaacaari jiyanohua cajiquiaari cuno tiaacua. Naajaa, majaari na mueecurujutanu quiquiaari, maninia nujuatejosano na morijiuucua quishacari cumueeca jiyajinia. ⁴⁹ Saniniuujia, cante nujuhanaa cua niishitiojosano tojiaquiuaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanohua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

7

Jesu naatanishacari Romano capitán seru
(Mt 8.5-13)

¹ Jesu jaara pueya niishitiojonu puecaquiaari, na pueyata quiaaree Capernaum tiaajiniari. ² Romano soldadohua capitánri quiniqui quijia quiquiaari. Jiyanohua na panishano seruuri cusosu matariquiaa. Quera cusoriquiaari. ³ Capitán jaara tojiquiaari Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuaara niiria nocua na seru na naataniniuria. ⁴ Judiocuaca camarucuaari Jesuucua quiojoquiaari. Nojoriiri juhuacatecara Jesu secojonu coteequiaari jiyanohua, nojoritia na quianura. Nojoriiri Jesu sequeree:

—Cuno Romano capitánri canaa jiyaroreeni, ¡nojuajaari jiyanohua maninia pueyano! ¡Quenaaja quia miiri na panishano! ⁵ Nojuajaari parta Judiocuaca panijia. ¡Nojuacuajaari Pueyaso secjojua tiatequiaari canaara tama na cumaneecatajaaja!

⁶ Naacuajitij, Jesuuri nojoritia quiaquiaari capitán tiajiniara. Tari Jesu quishacari cateca na tiaacuara, capitánri na rupenaa pueya jiyaroquiaari Jesuucua, nojori caminiujiuniuria na sequesano Jesura. Naaratej, nojoriiri naa Jesu caminiujiushii capitán sequesano:

—Jiyaniijianaa, capitán naa sequeya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia. ⁷ Nocuaaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequere, cua seruuri naatanutaniuhua. ⁸ Janiyari niishiyajaniuhua, cuno cusonuuri quia tojiniutianiya taa cua tojiquiaa cua jiyaniijanucuaaani. Janiyari cua jiyaramiquishano soldadohua jiiitiaajuhua. Janiya jaara tamonu sequereni, ‘Quia quiaare’, nojuajaari quiaqueequiaa. Janiya jaara tamonu sequereni, ‘Miji’, ritia nimiaquiaari. Janiya jaara cua seru sequereni casaa na muniuria, ritia na miyari. Niishiyanjia quiaari jiyano cumaacaracajuhuaj”.

⁹ Jesu tojishacari cuno pojori caminiujiushano capitán sequesano, Jesuuri jiuujiateree. Jesuuri na nuhuajiniaa pueya niquiniijoree. Nojori sequereeri:

—Seetanujuanaa nia sequeyanijia, puetunu parta Israel pueyajinijiniojuanaani, ¡majaari quenaaja cua niquiniu quiqianu Pueyasoocua tiuujia pueyano juhua nio tahue!

¹⁰ Capitán jiyaramiquishano pueya tiuquijiosacariuhua capitán tiajiniohua, nojoriiri Capitán seru niquishuhua tariucua naatanohua.

Jesu samiitianishacariuhua mashiquio niyanu

¹¹ Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaajuhua, socua queraatia tamasaca pueyano. ¹² Nojori catecanosacari Naín tiacaacua, Jesuuri pueya niquiquiaari macu pataano jamosocoriquiano. Macuuri jiyacunojuanaa na nuca niyanu quiquiaari. Na nucuaari mashiquio quitiasuquiaari. Queraatia pueyari na nucuaata macu nuhuaji sacuariquiaa, jamajiniara nojori quiojosacari. ¹³ Jesu niquishacari mashiquio, nocua taraajereeri. Na sequereeri:

—Maja nujuquenu.

¹⁴ Jesuuri macuucua catecanoree. Macu quiquio quiatareeri. Na patanaari pootia na nujuataquee. Jesuuri macu sequereeri:

—Mashajanaa, janiya quia sequeyani: “¡Quia sanere!”

¹⁵ ¡Macuuri cajiqui! Juhucatecara pocuareeri. Jesuuri na nucuaacua na jaatucuree. ¹⁶ Puetunu pueyajanaa jaara naa Jesu miishano niquiquiaari, jiyanohua pueretureeri. Nojoriiri Pueyaso shuquiritiaree jiyanohua. Na puerenuta sequetureeri:

—¡Pueyaso sequenu panishano caminiujiuniaqui niya supueree pa tajinia! ¡Jiyanohua cumaacara!

Nojoriiri naa sequetureejuhua:

—¡Pueyasoori shusha quiaritia na saquiriojosano Israel pueya niishiriohuacuhua, na cumaquiniuria pajaniya!

¹⁷ Jesujiniji pueya pahuatasanoori caminiujishaaquiaari puetunu Judiocuaca jiyajiniajanaa, mariyata puetunu na shocuaqueya jiyacajiniajanaano.

Tiuquinijiona Juan jiyaramiquishano pueya nequesoreesacari Jesu (Mt 11.2-19)

¹⁸ Tiuquinijiona Juan pueyari puetunu Jesu miishanojuanaa pahuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

¹⁹ —Jesuucua nia quiaare. Niocua na sequesee: “¿Quiaate seetanujanaa Pueyaso Jiyarosano, tariucuacaanu sequesano niriqianotej, tamonute sashishiyajara soj?”

²⁰ Naaratej, Tiuquinijiona Juan jiyarosano pueyari Jesuucua quiojoquiaari. Na sequetuseeri:

—Tiuquinijiona Juanri canaa jiyaroree quiocuani, canaa nequesotanura quiajaniya: “¿Quiaatena Cristo, Pueyasojiniji niriqianotej, canaate tamonu sashiyajara soj?”

²¹ Nojori tiuquijiosacari Jesuucua, jiyacaritij, Jesuuri queraatia pueya naatanijioree nojori niquiara; cusosuhua, pueyaracaanu nootunejaca, samaruharaca pueyano. Mariyata queraatia cariojuarujuri jiyaterohua niquijiacaraari. ²² Na nuhuaji, Jesuuri naa Tiuquinijiona Juan pueya sequereeri:

—Nia quiaarohua. Tiuquinijiona Juan nia pahuatasuhua taa nia niquiricuajani, nia tojishanonio. Nia sequesuhuanoj: “Cariojuarujuriiri niquijiacara quiriohua. Shipiinuquiujiuniaari maninia rucoorohua. Lepra cusotajacaari cushiriitishaarohua juhua juhuanaraja nojori quiniuhua. Numueejunucuaari tojjiacara quiriohua. Macunucuaari samiitianijiosaarohua. Casamiijiunucua pueyari Pueyaso rupaa pahuatasaree, Pueyaso

pueyara nojori jiyatesaanura. ²³ Shuquiriaatia quijia cutaraari nooj, cante cucua tiuuniu tarinitiaaquiyani”.

²⁴ Tiuquinijiona Juan jiyarosano pueya jaara quiojoquiaariuhua, Jesuuri juhuacatecara pueya pohuataree Tiuquinijiona Juanjiniji. Jesuuri naa nojori nequesotaree:

—¿Casaa niquniuucua nia quiojocanu cariiquia jiyajiniani? ¿Niaate noojia niqijijoteja niquniuucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. ²⁵ ¿Casaa niquniuucua nia quiojocanunioj? ¿Niaate maniniuqi toque cushijia niquniuucua quiojocanu? Niaacuaajaari niishiya, shanohua toqueya cushiyonuujuacaari saaja jiyaniijianucua tiajinia quiyano niquishano. Nojoriiri tama na panishanojuaja mijiaca. ²⁶ ¿Taateerinitioj? ¿Casaa niquniuucua nia quiojocanuurini? ¿Pueyaso sequenu panishano caminiujiuniate quiqianu? Taaquiririni. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujiunijianijianaa. ²⁷ Cuno Juanjinijicuaajaari tariucuaaanu Pueyaso Rupaajinia naajiotasano quiquiaari. Pueyaso sequesano nojuajinjijiri naa naajiotasaaquiaritij:

“Cua sequenu panishano caminiujiuriquiano jiyaroyanjia, na puetanura quiajanija, nuu jeencuariquiano quiocuaji”.

²⁸ Seetanujuanaa nia sequeyanija, puetunu Pueyaso sequenu panishano caminiujiunijianijianijianaa, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muera-suniyojua quiya cucua na tiushacarini, Pueyasora, nojuajaari socua cutara pueyano Tiuquinijiona Juanjiniji.

²⁹ Puetunu pueyajanaa, mariyata cumaneeca masejonaa Roma tiacajinia quijia jiyaniijiarani, nojoriiri niishi-quianu Tiuquinijiona Juan pohuatasano Pueyasojinijijiri seetanu rupaajanaa quiqianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijosaacanu.

³⁰ Saniniuujia, Fariseocuaca, mariyata Moisés Rootasanojiniji niishitiojonaani, nojoriiri Tiuquinijiona Juan pohuatasano ruuretacanu saaja. Naacuaajitij, majaari nojori tiuquinijosaanu quiqianu, nojori seetanuucua nojoriiri sesa mijiacajuhua. Nojoriiri Pueyaso miiniu panishano nojoriria soocanu saaja. Naacuaajitij, majaari nojori jiyanooshaanu quiqianu.

³¹ Jesuuri socua sequeree:

—¿Quiarjia nio pa quishacari pueyarijataj? ³² Nojoriiri juhua naatujoori, na tacuarishijionu panishacari, na cajitiushacari tiaca jiuujiajinia cajitiucuaa curotasanojinia. Nojoriiri narta naatujooriicua nacia: “Canaari juucua naajua jonenejyani. Majaari nia nianujunu paniniu. Canaari taraatia jaaquequejosano jaaquequejyani. Majaari nia sapuenu paniniu-juhua”. ³³ Naajuhua pueyanaa, niaari Tiuquinijiona Juan tojijaquiquianu Pueyaso rupaa na pohuatasacari nia niquiara. Nojuaja cutaraari miaguesano miaqueyashijia quijia, vino ratuyashijiani. Naaratej, niaari na sequeja, “samaruraca”. ³⁴ Na nuhuaji, janiyari niqianuni. Janiyari saniniuujia miaquesano miaquejojuani, vino ratujuajuhua. Cunora niaari cua sequequiaa: “Cunoori sacuraatia miaquejoru, ratunu porocuanio, sesa mijiaca rupueja sacuraatia, mariyata pa soosano cumaneeca masejonaa rupuenanio”. Naa nia sequesacaritij, niaari cua tojtiaaquiyajaacuhua.

³⁵ Naajaa, pueya jaara canaa pohuatasano tojijiaa quiri, jiyacari cutara nia naata niishiniu canaa niishitiojosanoori seetanujuanaa Pueyasojiniji, cua tojijiaa jatasacari maninia quijiacara.

Jesu miaquesacari Fariseo Simón tiajinia

³⁶ Tamonu Fariseo pueyanoori Jesu masuuquiaari na tiajinia na mi-aquenura. Jesuuri na tiajinia quiaaree. Miaquenuujua shuriuquiu-mia roshishiiri. ³⁷ Paanatuuri cuno tiacajinia quijia quiquiaari. Na nishishacari Jesuuri cuno Fariseo tiajinia tiuguirii miaquenura, nojuajaari cuno tiajinia quiaquiaarijiuhuj. Shiitaniyojua seesariquiaja pataconiyojua cacatariquiaari, cohuaja saajiajiniji quejasano. Mishaja quiriquiaari shanohua jaanutajata. ³⁸ Maajiiri Jesu cashacuucuma mojoquetasee. Nujuqueriquiaari. Na namijiaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. ³⁹ Cuno Fariseo pueyano niquishacari naa cuno maaji miishanotej, noojiajinia niishiriojoriquiaari: “Jesu jaara seetanujuanaa Pueyaso sequenu panishano caminiujuunia quiri, mariqui niishiri cante na coyani, taamueca maajitijanojoni”. ⁴⁰ Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu panianijia.

Fariseo pueyanoori Jesu riucuaaree:

—Cua sequere, Niishitiojonanaa.

⁴¹ Jesuuri na sequere:

—Caapiqui pueyanoori cumaneeca masequiaari rupaquijjara tamonu cumaneeca niqutiojonajiniji. Niquiriyatu pueyanoori queraatia cumaneeca masequiaari, juhua quiniento juuca poonijiosanojiniji masano. Tamonu pueyanoori masequiaari nareja juhua cincuenta juuca poonijiosanojiniji masano. ⁴² Na nuhuaji, nojori sequesano juuca jaara tari quiquiaari na camaru nojori niqutionuhuara na cumaneeca, majaari nojori jitianu quiquiaari cumaneeca. Naaratej, cumaneeca niqutiojonaari nojori sequere: “Naajaa, maja socua nia niishiriojoni nia niqutionuhuara tarijia cua niquticosano cumaneeca nijaniya”. Cumaneeca niqutiojonaari naa cuno caapiqui pueya jiyanoquiaari. Simónnaa, cua sequeretoj, ¿teyano cuno caapiqui pueyanoinijiniote socua cuno cumaneeca niqutiojona panijjara qiniutianiyani?

⁴³ Simónri Jesu riucuaaree:

—Cunocujani, cante socua queraatia cumaneeca niquticosaaquiaaricujani.

Jesuuri na sequere:

—Taaquiririnij.

⁴⁴ Jiyacaritij, Jesuuri cuno maajicua tacateree. Simón sequereeri:

—¿Quiaate nio maaji niquiya? Cua tiuquishacari quia tiajinia, majaari quenaaja quia niqutionu quiri mohuaca janiya, cua niohuaca cua jeequetajara. Nio maaji cutaraari cua niohuaca jeequere na namijiaacata. Na sacuanijiarohua na muecacataari. ⁴⁵ Majaari quenaaja quia nujuunu quiri janiya, quia sarhuatasacari janiya. Nio maaji cutaraari cua niohuaca nuju-unequejoriquiaa pueyaracaanu, niya cua cajishacari. ⁴⁶ Naajuhuj, majaari quia totanu quiri muesu nunacu cua nacaacua. Nio maaji cutaraari cua niohuacaacua totaree shanohua jaanutaja. ⁴⁷ Naaratej cua tojiri. Nio maajiiri jiyanhua sesa mijjia quiri quiaa. Naaratej, jiyanhua cua paniyari puetunu sesa na miishanojinijianaa cua jiyanooniucua nojuaja. Saniniuuja, cante secaja sesa na miishanojiniji jiyanooshaareeni, naajuhuj, nojuajaari secaja panijia na jiyanoonia.

⁴⁸ Na nuhuaji, Jesuuri cuno maaji sequeree:

—Quiaacujajari tari jiyanooshaaree sesa quia miishanojiniji.

⁴⁹ Narta masuusano pueya nata cajitiyanoori juhuacatecara tama sequereejaja:

—¿Cantucuaa nio pueyanoni, sesa miijia jiyanooriquianoni?

⁵⁰ Jesuuri maaji sequeree saaja:

—Cucua quia tiuushacari, quiaacuaajaari tari jiyanooshaaree. Juhua-janiya quia quiaarohua.

8

Jesura pueraquena maajipohuajiniji pahuatasano

¹ Na nuhuaji, Jesuuri rucanejoquiaari queraatia tiacajinia, shiitiani-yojua tiacajiniajuhuaj. Nojuajaari tii Pueyaso rupaa pahuatariquiaa, taa Pueyaso jütianu paniya na muerasuni. Na doce saquiriojosano pueyari na cojiriquiaajaacuhuj. ² Noojiaqueya maajipohuari na tarajariquiaa-juhuaj. Cuno maajipohuari tamaatia cusonujiniji Jesu naatanijosano quiquiaari. Tii quiriqiaajaariuhua noo maajipohua, Jesu nojorijiniji tohuatanijioquiaari samaruhatej. Nojorijinijinioori quiquiaari María Magdalena. Jesuuri cuno Maríajiniji tohuatanijioquiaari siete samaruhua. ³ Quiriqiaajaariuhua Juana, Cuza niquiuocuan. Cuzaari jiyaniijia Herodes jütiasano casami cojuana quiquiaari. Susaanaari nojorijinijinio quiquiaar-ijihuhuj. Socua queraatia maajipohuari quiriqiaa. Puetunu cuno maajipohuajanaari Jesu naacutaquiaari tama nojori jütiasano casaatajaaja. Nojoriiri nera pueraquenuuna quiquiaarijuhuaj, tiquiyocua nojori rucuanesacari Jesuta.

Jesu pahuatasano natoojona pueyanojiniji

(Mt 13.1-9; Mr 4.1-9)

⁴ Queraatia cuno jiya tiacajinijinio pueyari nijioquiaari nojori niquniuria Jesu. Jaara nocua rerequeejoquiaari queraatia pueya, Jesuuri nojori niishitiojioquiaari miriqui, nio pahuatasano. Nojori sequereeri:

⁵ —Tamonu pueyanoori na cuhuariquiajinia quiaquiaari natoojonuucua. Na jacutasacari, secajaari totequiaari nucuaco. Tii rapijiosaaquiaariiri. Shuhuari na mijoquiaari. ⁶ Tajaacaari totere sai tajinia. Cuno jajau jaara moritiaquiaari, ritia sorereeri puera joojuashiqui na quishacari. ⁷ Tajaacaari totere riyocuaca tajinia. Riyocuacaari socua ritia maashiquiaari. Na natasanoori tarinitiucuaa quirii. ⁸ Socua tajaacaari maninia jiyajinia totere. Tii maashiquiaari maniniaari. Queraatia mueturee cutaraari. Noojiaqueya cuno nataujinijiiri cien jajau quiquiaari niquiriyatu jiyonajiniji.

Nio pahuatasano na puecasacari, Jesuuri na rupaa paaretaree. Naa sequereeri:

—¡Niaa jaara numaaraca quiri, nia tojitiare cua pahuatasano!

Casaarate miriqui pahuatanoni

(Mt 13.10-17; Mr 4.10-12)

⁹ Na nuhuaji, Jesu pueyari na nequesotaree casaa na miriqui pahuatasano niishitiojonu paniyani. ¹⁰ Jesuuri nojori riucaaree:

—Niaari saquiriojosaaquiaari nia niishiniuria taa Pueyaso poonijiya pueya jiuujajiniani, na muerasura nojori quiniuria. Cunoori tariucuaaanu pueya niishishoo. Janiyari tamasaca pueya niqiara pahuataquiaa miriqui cutarani. Naacuajitij, nojoriiri cua pahuatasano niishiyaquiaa na tojiti-asacari. Naajuhuj, cua cumaacata cua miishano cariyoshitiuquiaari, nojori niqiara cua miishacari.

Jesu niishitiosacari na pueya, miriqui na pahuatasano natoojonajiniji
(Mt 13.18-23; Mr 4.13-20)

¹¹ Nia niishitiojoreera miriqui cua pohuatasano natoojonajiniji. Pueyano natoojosano jajauri juhua Pueyaso rupaa. ¹² Pueyano jaara Pueyaso rupaa tojiri najuhuanaj, nojuajaari juhua nucuaco toteno jajau. Sesaacaari nimiaa. Pueyaso rupaa na tojishano jaariutiariohua noojajinijiiri, maja nocua na tiuniuria, nojuaja mariqui jiyanooshaareeri. ¹³ Sai tajinia toteno jajauri juhua noo pueya, canapueete Pueyaso rupaa tojiriini. Na nuhuaji, rupaquijia Pueyasocua tiuquuaa shuquiriaatiaari. Naa miijiaacaari juhua puera shiitianiyojua nujuacaraca. Naacuajitij, nojori jaara saniniujiushaare, nojoriiri ritia Pueyasocuaaji rupatequiaa. ¹⁴ Riyocuaca tajinia toteno jajauri juhua noo pueya, canapueete maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiriacua nojori quiniuria, tama na cuaqueyajaaja nojori shuquiritiniuriajuhuaj. Naaratej, nojoriiri juhua muetuhuo natau quiya, tarinitiucara riyocuaca tariyoshitishano. ¹⁵ Maninia jiyajinia toteno jajauri saniniuujia juhua noo pueya, canapueete maninia tojtiaarecuaaja Pueyaso rupaani. Na racataa maninia noojajiniaari. Pueyaraaanu na tojtiaquiaari. Majaari na pishiniu Pueyasocuaaji. Naacuajitij, nojoriiri juhua queraatia muetujua natau.

Pueyaso muerasuuri juhua samaritiu cuhuataja
(Mr 4.21-25)

¹⁶ Majaari pueya noshitiniu quiquiaa samaritiu, na jamotasocoriguiano conatu cariquiaco, maquetu cariquiaconio. Samaritiu jaara noshitishaare, morijiucua morotashiyari na cuhuatanura, pueya tiuquitasacari tijajiniaaco. Naajuhuaaj, Pueyaso Rupaari pueya jiuujia cuhuataja. Cunora, Pueyaso Rupaa cuara maatia pohuatasaaaria puetunu pueya niquiarajanaa. ¹⁷ Puetunu jamojosano casaajanaari riuriatasaanutaniya. Puetunu jiyasohuaja nia miijiosanojuanaari niishishaanutaniyajuhuaj. Cuhuatasaanutaniyari maninia niquishocoriguiano. ¹⁸ Cunora, cua sequesano tojtiajaca nia quiri maninia. Cante maninia jiiitiaa cua rupaani, nojuajaari socua na niishijara jiyatasaanutaniya. Saniniuujia, cante cua rupaa tojijashijiani, secaja najuhua na niishishanoori jaariutiasaanutaniya, puetunu shaaquirijanaa.

Jesu tapueyocuaa tiuquijiosacari Jesuucua nojori nuuata
(Mt 12.46-50; Mr 3.31-35)

¹⁹ Jiyacaritij, Jesu nucua Jesu tapueyocuaata tiuquijioquiaari Jesu quishaqui. Majaari nojori naata tiuquitianu quiriquiaa Jesuucua. Jiyanohua queraatia pueyari nocuara ritiariquiaa saaja tia tohuateyaji.

²⁰ Tamonuuri Jesu numooteree:

—Quia nucua quia tarajanuhuata jati carijiniacuma quiya. Quia niqitiuiniu paniaquinia.

²¹ Jesuuri tii quiniaa niquiarasequeree saaja:

—Canapueete seetanujanaa Pueyaso Rupaa tojtiajacani, nojoriiri cua nucua cufara, cua tarajanuhanio.

Jesu pueyajetesacari paratu, mohuacanio
(Mt 8.23-27; Mr 4.35-41)

²² Tamonu juuca, Jesuuri botejinia tacataquiaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariquiaa. ²³ Nojori niuutiasacari, Jesuuri maqueriquiaa. Canashyaquiji paratuuri juhuacatecara piyarajonu coteeree jiyanohua. Mohuaca queyaqueteriquiaa bote jiniacumaraari. Boteeri quera

tiuquitiariquiaa tari. ²⁴ Jiyacaritij, na pueyari Jesu niucujasee ritia. Na sequetuseeri:

—¡Niishitiojonanaa! ¡Niishitiojonanaa! ¡Paa tari tiuquitiaani!

Jesuuri sanemaa. Paratu sequereeri, mohuacanio:

—¡Tariucujaja! ¡Nia suraajere!

Paratu, mohuacaari ritia suraajequee. Paratu piyarojonuuri tajimiaa, caminia queyocuaanonio. ²⁵ Jesuuri na pueya sequerohua:

—Niaacujaja juucua Pueyasocua tiuujiaa. ¿Casaa nia tojetareerini?

Nojoriiri Jesuucujaja juujiatecoree. Shiriiquitiuriquiaari Jesu miishano nojori niquishacari. Tama nojoriiaarijia nequesoreetooriquiaa:

—¿Cantucuaanojoni? ¡Paratu, mohuacaari na tojirii na sequesacari!

*Gerasa jiyajinijinio samaruhuaraca pueyanojiniji pohuatasano
(Mt 8.28-34; Mr 5.1-20)*

²⁶ Na nuhuaji, nojoriiri shiitiaseequiaari Gerasa jiyajinia, Galilea jiya taquijiria. ²⁷ Jesu jaara rosequiaari botejiniji, jiyacaritij, samaruhuaraca pueyanoori nocua niquiaari, cuno jiya tiacajinijinio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quijia. Naajuhuj, majaari tiajinia na quiniu quijia. Saaja raacajinia quijiaari, macunucua nucuhua paaquiosaqui. ²⁸ Na niquishacari Jesu, na cariquimiaji mojoquetaseeri. Jesuucua nacareeri:

—¿Casaara quia niyaree miji canaa quia cushionurani Jesunaa? ¡Quia niishiyanjia! ¡Quiaacujajaari Jiyaniijiajanaa Pueyaso Niyanu! ¡Cua tarinitiare quenaaja! ¡Maja naquiya cua miiniu!

²⁹ Samaruhuaraca pueyanoori naa sequeriquiaa Jesutej, Jesu sequesacari tari nojuaja, cuaara tohuataara cuno pueyanojiniji. Samaruuri sequerayucua cuno pueyano miitiquiaari sesa. Narta pueyari juucua na cashacucua, na numatucua morojoquiaari cumayocua jiyocua shipinishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiquiyocua, pueya quiaquishaqui na quiniuria.

³⁰ Jiyacaritij, Jesuuri na nequesotaree:

—¿Taateja quia sesani?

Samaruuri na riuquaree:

—Cua sesa “Queraatia”.

Naa Jesu sequequiaariiri jiyanhua queraatia samaruhua na jiitiasacari.

³¹ Samaruuari jiyanhua secoree Jesu, maja nojori na jiyaronura puequeetuaju raama saniitiosocoriquiano. ³² Jiyacaritij, queraatia cushiyari miaquenuuriquiaa cateca naataja, tuhuananujinia quiniqui. Samaruuari cunora Jesu secoree nojori na tiuquitianiniuria cushiyajinia. Jesuuri nojori tarinitiaree. ³³ Cunora, samaruuari pueyanojiniji tohuareetaquee. Cushiyajinia tiuquitiaseeri. Puetunu cushiyajanaari cocuatere. Tacobiniji totesee caminiajiniaari. Tii shushiniuuriiri.

³⁴ Cushiya cojuanaa jaara niquiquiaari naa miishanotej, nojoriiri netecuatuquiaari na shiriiquiniutia, Jesu miishano nojori pohuatanura tiacajinia, cuhuariguiaacajiniajuhuj, tee pueya quiriquiaacuajani. ³⁵ Puetunu pueyajanaari Jesuucua nijioquiaari na tiacajiniji, pueya pohuatanuusanojiniji nojori niquiniuria. Nojori tiuquijiosacari Jesuucua, nojoriiri cuno pueyano niquishii, canajiniji samaruhua tohuareetareecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niquishacari nojuajatej, pueretuquiaariiri. ³⁶ Jiyacaritij, Jesu miishano niquitunaaari shusha nijiono pueya pohuataree taa samaruhuaraca pueyano naatanishaarohuani. ³⁷ Cunora, puetunu Gerasa jiyajinijinio pueyajanaari jiyanhua puereturiquiaa. Naaratej, ¡Jesu secojotureeri na quianura nojori

jiyajiniji! Naaratej, Jesuuri botejinia tacataquiaariuhua na pueyata na quianuhua. ³⁸ Cuno pueyano, canajiniji samaruhua tohuareetareecua-jani, nojuajaari Jesu secojoree juucua nata na quianura. Jesuuri saaja naa na sequeree:

³⁹ —Quia tiajinia quia quiaarohua. Quia pueya niquiara quia pahuata-suhua taa Pueyaso miirii maninia quiajaniani.

Pueyanoori quiaarohua. Puetunu na tiacajiniajanaa pahuatasuhuari taa Jesu miiriucuaa maninia nojuajani.

Jesu naatanishacari Jairo niyatu, Jesu toque quiana maajinio

(Mt 9.18-26; Mr 5.21-43)

⁴⁰ Jesu jaara niuutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa. ⁴¹ Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojoua tia jiyaniijia quiquiaari cuno tiacajinia. Jesu cariquimiaji mojoquetaseeri na secjonura na tiajinia Jesu quianura. ⁴² Neyatuniyojuuari quera cusoriquiaa jiyacari. Majaari socua niquiohwaraca na quiniu quijia. Doce marijaari tari shocojoquiaari cuno neyatu.

Jesu quiasacari Jairota, jiyanoohua queraatia pueyari nata quiojoriquiaa-juhua. Pueyari jiyanoohua na tanuujuriquiaa, nata nojori quiojosacari nucuaco.

⁴³ Tamonu maaji cusosuuri cuno pueya tajinia quiriquiaajuhua. Doce marijaari tari na shocojoquiaari pueyaracaanu na naatesacari. Cuno maajiri puetunu na cumaneeca puecaquiaarijianaa najuhuanaj, na naara-josaanura juucua. Naarajonaari maja na naata na naataniniu quiquiaari.

⁴⁴ Maaji cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

⁴⁵ Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaninya.

Pedroori Jesu sequeree:

—Niishitiojonanaa, ¿majateeri quia niquniucua? Queraatia pueyacua-jaari quia tanuujia.

⁴⁶ Jesuuri saaja sequeree:

—Maja. Cusosu cua quiareeni. Niishianijia cua cumaacaari tari na naatanirii.

⁴⁷ Maaji niishishacari na miishano jiyasohuaa tari niishishaaree, Jesuucua nimiaari. Na puerenuta tetecariquiaari. Jesu cariquimiaji mojoquetaseeri. Puetunu pueya niquiarajanaa pahuatareeri casaara Jesu na quiareeni. Pahuatareerajuhua taa na naataquee ritiani, Jesu na quiasacari.

⁴⁸ Jesuuri na sequeree:

—Sanaunaa, cucua quia tiuuniucua, quiaari naatarohua. Quioojia quia cajitiriohua. Juhujaninya quia quiaarohua.

⁴⁹ Jesu pocojosacarijia cuno maajitia, tamonu pueyanoori tiuquiquiaari Jairo tiajiniji. Jairo sequeseeri:

—¡Quia niyatu tari cusoquee! Maja najuhuaana riniu paniniu Niishitiojona quia tiajinia.

⁵⁰ Jesu tojishacari cuno pueyano sequesano, Jairo sequereeri:

—Maja puerenu. Cucua quia tiuuri saaja. Quia niyatucuaa naatanutani-uhua.

⁵¹ Jesu tiuquishacari Jairo tiajinia, nojuajaari maja na shanacunu quirii quenaaja tamonu pueyano tiuquiniuria macuucua. Saaja nata tiuquitiamaa

cutaraari Pedro, Santiago, Juan, maaji samiriu que, na nucuanio. ⁵² Puetunu tii quiniaa pueyajanaari maaji samiriuucua nujuqueturiquiaa. Sapiyonu-uriquiaajaarihuaj. Jesuuri nojori sequere:

—Maja najuhuaana nia nujuquenu. Maaji samiriu maja macu, nareja maqueyano.

⁵³ Naa Jesu sequesacaritij, pueyari na saroojotaree saaja. Nojoricuajaari niishiriquiaa maaji samiriuuri seetanujuanaa macu quiriquiaa.

⁵⁴ Jiyacaritij, Jesuuri macuucua tiuquiqui. Na juaashiquiajiniji na quiaaseeri. Jiyanohua na sequereeri:

—Maaji samiriuniaa, ¡quia sanere!

⁵⁵ Na sohuanuuri nocua tacatemohua jiyacari. Samiitiamohuari. Ritia sanequeeri. Jesuuri na nucua sequeree na mianuutenura. ⁵⁶ Na queyari jiyanohua jiuujateree. Jesuuri nojori sequeree, maja nojori pohuatanura tamasaca niqulara na miishano.

9

Jesu jiyaramiquishacari na doce pueya Pueyaso rupaa nojori pohuatanura (Mt 10.5-15; Mr 6.7-13)

¹ Jesuuri na doce saquiriojosano pueya rerejotequiaari na jiyaramiquishocoriquiano. Nojori niqutioree cumaacaari, puetunu tamaatia sesa samaruhuajanaa nojori tohuatejonura, cusosuhua nojori naatanijionurajuhuj. ² Nojori jiyaramiquiriiri Pueyaso rupaa nojori pohuatanura pueya niqulara, pueya niishiniuria taa Pueyaso jiyanooniu paniya nojorini, na muerasu nojori quiniuria. Nojori jiyaramiquiriijaarihuua cusosuhua nojori naatanijionura. ³ Jesuuri nojori sequeree:

—Maja nia panu nia rucuanejotajara nia panishano. Majaari nia miojotu nia panu, nia caashoque, nia coseyaca, nia cumaneecanio. Saa nia cushishano toquetaja nia quiaare cutara. Maja socua toque nia panu nia cushishocoriquiano. ⁴ Naa jaara tamonu tiajinia tiuquishiitquia, niocua cuniqui jiyojetaseequiaja, naa jaara cuno tiacajiniji quiaarejaatijia. ⁵ Naa jaara tamonu tiacajinia tojinu paniyaquishaare, cuno tiacajiniji nia quiaare. Naa nuhuajiria, cuno pueya niqulara niocua nia niohuacajiniji cuno tiaca jaaquia nuutare. Naacuajitij, cuno pueyari niishiniutianiya, Pueyasoori nojori jiyanoyaquiniutianiya, nojori tojitianu paniyaquiniucua Pueyaso rupaa pohuataanaa.

⁶ Na nuhuaji, Jesu pueyari nojooque puetunu cuno jiyajinia shiitaniyua tiacajiniajanaa, Pueyaso rupaa nojori pohuatanura tii. Nojoriiri Pueyaso rupaa pohuatanuquiaari pueya jiyanooshaanura, Pueyaso pueya nojori quiniuria. Naajuhuj, cusosuhua naatanijiotuquiaariiri.

Jiyaniijia Herodes niishiniu panishacari cante Jesuni (Mt 14.1-12; Mr 6.14-29)

⁷ Jiyaniijia Herodesri pohuatasaaquiaari puetunu Jesu miishanojinijianaa. Herodesri saaja jiyajenequiaari cante Jesuni. Jiyacaritij, noojiaqueya pueyari sequeriquiaa: “Jesucuajaari jiyaniijia Herodes nacatanishano Tiuquinijiona Juan samiitianohua”. ⁸ Tamasaca pueyari Jesujiniji sequeriquiaajuhuj: “Supuetana Eliascuaja tari tiuquiriohua”. Nojuacuajaari tariucuaaanu Pueyaso sequenu panishano caminiujuunia quijia. Saniniujia, tamasaca pueyari sequeriquiaajuhuj: “Jesucuajaari tamonu tariucuaaanu Pueyaso sequenu panishano caminiujuunia samiitianohua”.

⁹ Herodesri saniniujia sequeree:

—Janiyacuaajaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojiniuyani. Cunora, Herodesri jiyanhua Jesu niqiniu paniriquiaa juucua.

Jesu mianuutesacari cinco mil pueya
(Mt 14.13-21; Mr 6.30-44; Jn 6.1-14)

¹⁰ Jesu jiyaramiquishano pueya tacatesacariuhua, nojoriiri Jesu pohuataquiiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. ¹¹ Pueya niishishacari tee Jesu quiriquiaani, nojoriiri saaja nocua quiojoquiiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijiorejhuaj.

¹² Tenacariishacari, Jesu doce pueyari nocua catecanoquiiaari. Na seque-
tureeri:

—Pueya quia jiyaramiquiri cateca tiacajinia, nojori cuaara cuniqui pajuenuura na miaquenuusocoriquiano, na maquetujuarajhuaj. Nojori panishanoori shaaqui niya pa quishaquini.

¹³ Jesuuri nojori sequeree saaja:

—Niaa mariqui nojori mianuutere saniya.

Nojoriiri Jesu sequeuree:

—¿Canaateeri miaquesanoracajaarani? Canaa saaja cinco panniyojua jitiaani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyarajanaani?

¹⁴ Cuniqui nojoritia quiriquiaa naasucuaari cinco mil pueya. Jesuuri na pueya sequeree:

—Pueya nia raquiriojotare maninia. Cuaara cajitiuuria cincuenta jatiqui, socua cincuenta tamaqui. Mianuutesocoriquiano puetunu pueyajanaa, cuaara naa cajitiuuriatej.

¹⁵ Nojoriiri Jesu sequesano miirii. Puetunu pueyajanaari cajitiurii. ¹⁶ Na nuhuaji, Jesuuri cuno cinco pan pataree, caapiqui sapitiaajanio. Jiyocua-
caanu maureeri na Que Pueyaso na secojonura miaquesanoocuaara. Na nuhuaji na neecasereeri. Na pueya na niqutioreeri puetunu pueyajanaa nojori serotasocoriquiano. ¹⁷ Puetunu pueyajanaari na miaquenuuree. Maninia tooquioreeri. Na nuhuaji, doce canaasatuuri mishinijiosaaquiiaari pan raacuata, sapitiaaja raquiquiatanio.

Pedro sequesacari Jesuuri seetanujuanaa Cristo
(Mt 16.13-19; Mr 8.27-29)

¹⁸ Tamacari, Jesuuri Pueyaso secojoriquiaa tamajaaja. Na saquiriojosano pueyari nata quiriquiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?

¹⁹ Nojoriiri na riucuaaree:

—Noojiaqueya pueyari quia sequequiaa, quiaana nacatasano samiitianohua Tiuquinijiona Juan. Tamasacaari quia sequequiaajhuaj, quiaana Elias, tariucuacaanu Pueyaso sequenu panishano caminiujunia. Tamasacaari saniniujia quia sequequiaa, quiaa naasucuaana tamonu tariucuacaanu Pueyaso sequenu panishano caminiujunia samiitianohua.

²⁰ Jesuuri saniniujia nojori nequesotaree:

—¿Niajanियariuhuj? ¿Taa nia sequeyani, cante janiyani?

Pedroori na sequeree:

—Quiajaniyacuaajaari Cristo, Pueyaso Jiyarosano.

²¹ Jesuuri jiyanhua nojori rootaree maja nojori pohuatanura tamasaca niqiuara cante nojuajani.

Jesu numootesacari na pueya, nojuaja mosaanutaniya
(Mt 16.20-28; Mr 8.30-9.1)

²² Jesuuri naa nojori sequerohuacuhuj:

—Janiyari jiyanoehua naquiya miishaanutaniyani. Pa Judiocuaca camarucuaari cua niqiniu paniyaquiniutianiya, na tojitianu paniyaquishacari janiya. Naajuhuj, pa pueyacuara secojonaa jiyaniijianucuaari cua niqiniu paniyaquiniutianiya, Moisés Rootasanojiniji niishitiojonaanio. Nojoriiri cua monutaniya. Naajaa, jiuujianaraca juucajania, janiyari samitianutaniuhuanu.

²³ Na nuhuaji, Jesuuri puetunu pueyajanaa sequeree:

—Cante cua nuhuajiniu paniyani, cua pueyano na quiniuria, nojuaja cuaara niyajetaara tama na miiniu panishanojuaja. Cuaara panitiaara tama na cuaqueyajaaja puetunu juucajanaa, cua tojjia na quiniuria seetanujanaa. ²⁴ Saniniuuja, cante tama na cuaqueyajaaja shuquiritiniuria niishiriojoquiaani, nojuajaari jiyanoehua taraatia quiniutianiya na nuhuaji. Saniniuuja, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. ²⁵ Pueyano jaara puetunu nio jia casamijianaa jitiiana quiri, cuno maara najuhua quiri, nojuaja jaara na shaajesacari jataasaare mani quiqiojinia Pueyasooju. ²⁶ Cante cua seera caririquiya mijiria quiniaa pueya niquiara sequenurani, janiyari nojori jiyaniijiani, naajuhuj janiyari nojori seera caririquiniutianiyani cua tiuquishacariuhua Jiyaniijia cua quiniuria. Janiyari shanohua niquishano quiniutianiya cua tiuquishacariuhua cua Que shacantuuca cumaacatani, na seya cumaacatajuhaj. Naajuhuj, cante cua rupaa pohuatanu caririquiya sesa miijiaa pueya niquiarani, janiyari nojori seera caririquiniutianiya-juhaj. ²⁷ Seetanujanaa nia sequeyanjia, noojiaqueya niajaniyajinijioori maja nia cusonunu quiniutianiya juhuanojuaja, niaa cuaara niquiri-jiaatija Pueyaso cumaacu tiuquiyano cucua, na muerasu jitiariquianoni.

Jesu jatasacari shacantuucara
(Mt 17.1-8; Mr 9.2-8)

²⁸ Naa Jesu sequenu nuhuajitij, ocho juuca nuhuaji, nojuajaari tuhuananuucua tacaquiaari na Que Pueyaso na secojonura. Nata quiaareeri Pedro, Santiago, Juannio. ²⁹ Jesu secojosacari Pueyaso, na jiquicoori tamaatiara jataquiaari. Na toqueeri jiyanoehua cohuajara jataquiaarijuhaj, shacantuquera. ³⁰ Jiyacaritij, caapiqui pueyari nocua muetaquiaari. Jesuta pocoojoriquiaari. Nojoriiri quiriquiaa supuetana Moisés, supuetana Eliasnio. ³¹ Nojori nujuatusaquiiri shacantuuca quiriquiaa puetunu nojori shocujanaa. Nojoriiri pocoojoriquiaa taa Jesu mosaanutaniya Jerusalén tiacajiniani. ³² Jiyacaritij, Pedroori jiyanoehua maquenuujuriquiaa, nata quiniaajuhuj. Naajaa, majaari nojori maquenu quiriquiaa. Naacuajitij, nojoriiri Jesu shacantuuca niquiquiaari. Cuno caapiqui supuetanaa niq-uitiirijiaariuhuj, Jesuta pocoojijano. ³³ Cuno caapiqui pueya quiojonu panishacariuhua Jesu shuriucujaj, Pedroori Jesu sequeree najuhanaj:

—¡Niishitiojonanaa, canaa namitia niya quiyani! ¡Canaa suhuororeera jiuujianaraca suhuorotucua; quiara, Moisésra, Eliasranio!

Pedroori naa najuhuaa pocuariquiaa. Majaari na niishiniu quiquiaari casaa na sequeriquiaani. ³⁴ Pedro pocuasacarijia, cohuaja najacaari nojori mishiquomaa. Nojoriiri puereturiquiaa cohuaja najacajinia nojori quishacari. ³⁵ Na nuhuaji, nojoriiri Pueyaso tojirii pocuaano cuno cohuaja najacajiniji. Naa sequereeri:

—¡Nioori cua Niyanu, cua saquiriojosano nia Jiyaniijia na quiniuria! ¡Nojuaja nia tojitiare!

³⁶ Naa nojori tojiniu nuhuaji cuno rupaatej, nojoriiri Jesu niquiriohua. Tari tamajaaja nujuariquiaari. Nojoriiri sanaa na niqutiariquiaa. Na nuhuaji, majaari quenaaja tamonu nojori pohuatanu quiquiaari nojori niquishano, Jesu jaara samiitiaquiaariuhuaajatiijaj.

Caya samijiajiniji Jesu tohuatesacari samaru
(Mt 17.14-21; Mr 9.14-29)

³⁷ Tariqui, nojori jaara rosetaquiaariuhua tuhuananujiniji, queraatia pueyari Jesuucua nijioquiaari. ³⁸ Cuno pueya tajiniji, tamonu pueyanoori na nacaquiaari:

—¡Niishitiojonanaa, cucua quia taraajere quenaaja! ¡Cua niyanuniyojua quia niquiri! ¡Jiyaniojuanaari quiyaniuniyojua! ³⁹ ¡Samaruuri na miiquiaa taraatia! ¡Na sariyotequiaari! ¡Na taquiriocuatequiaajaariuhujaj! ¡Na rupaa-majiiri cushaaquiaa! ¡Na cuaqueya miiquiaa moqutiuriuriaari! Majaari ritia na cartenu paniniu quiquiaa. ⁴⁰ Janiyari juucua quia pueya sequereeni, cuno samaru nojori tohuatenura. Majaari nojori naata quiriquiaa na tohuatenura.

⁴¹ Jesuuri sequeree:

—Pueyaso tojtiaashijiicanaa, niaaqui Pueyasocua tiuyashijiacajuhuanajaj. ¿Janiyateeri pueyaracaanu rejeretanutaniya niajaniani? Miji quia niyanu quia jaatucure.

⁴² Caya samijia catecanosacari Jesuucua, samaruuri na pojotequee. Na taquiriocuatereeri. Jesuuri samaru sequeree na tohuatenura. Caya samijia naataniriiri. Na niqutiiorohua na queeri. ⁴³ Puetunu pueyajanaari jiyanohua jiuujiateree nojori niquishacari Jesu miishano Pueyaso cumacata.

Jesu pacutesacari pohuatanu nojuaja mosaanutaniya
(Mt 17.22-23; Mr 9.30-32)

Pueya jiuujiatesacarijia puetunu Jesu miishanojinijijianaa, Jesuuri na pueya sequeree:

⁴⁴ —Maninia nia tojiri casaa cua sequenutaniya niajaniani. Majaari na niyajetanu. Janiyari niqutiosaanutaniyani pueya miiniuria janiya taa nojori paniyacuajani.

⁴⁵ Majaari na pueya niishiniu quiriquiaa Jesu sequesano. Juhua miriqui sequesanoori quiriquiaa nojoriiria. Naacuajitij, majaari nojori naata niishiniu quiquiaari. Nojoriiri Jesu nequesotanu puereturiquiaajuhujaj, casaa nojori na pohuatasano sequenu paniriquiaani.

Cante jiyaniijijajanaa cutarani
(Mt 18.1-5; Mr 9.33-37)

⁴⁶ Jesu pueyari juhuacatecara juayonuutariquiaa teyano nojoriininijiniote jiyaniijijajanaa quiniutianiyani. ⁴⁷ Jesuuri nojori niishiriojosano niishirii. Naaratej, Jesuuri naatujua nujuateree na shuriucua. ⁴⁸ Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniuucuanu, nojuajaari cua rupueyajuhujaj. Cante cua rupueyani, cua jiyarona rupueyajaariuhujaj. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuanu, nojuajaari jiyaniijijajanaa quiniutianiya puetunu narta Pueyaso muerasujinijiniojuanaa.

Cante maja pa paracani, nojuajaari pa jiyano
(Mr 9.38-40)

49 Juanri Jesu sequeree:

—Niishitiojonanaa, canaari pueyano niquriucuaani samaruhua tohuatanijiyano quia cumaacata. Canaari na tenujurucuaani nojuaja quiyaquiniucua pajaniyajinijinio.

50 Jesuuri na riucaaree:

—¿Casaara nia tenujurucuaarinioj? ¿Niaateeri niishiyaquiya, cante pa paraca quiyaquiyani, nojuajaari pa jiyano?

Jesu nacasusacari Santiago, Juannio

51 Quera Jesu tacanu panishacari jiyocuaaanu, nojuajaari juhuacate-cara Jerusalén tiacajiniara quiaaree, juhua jiuujiaaju na puereyaquiniutia.

52 Jerusalén tiacaacuara nuu cajiniocua Samaria jiyajinia Jesu quishacari na pueyata, noojiaqueya na pueyajinijinio puerateree tamonu tiacajinia nojori masenura tia nojoriicujiri. Naacuajitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara nojori pajenura.

53 Cuno Samaria pueya jaara niishiquiaari Jesuuri Jerusalén tiacajiniara quiariquiaa, majaari nojori paniniu quirii Jesu maquenura nojori tiacajinia.

54 Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyaniijanaa, ¿quiaate paniya canaa tininiuria mani jiyocuaaanuji, cuno pojori na catijianura, taa tariucuaaanu Pueyaso sequenu panishano caminiujunia Elías miiquiaaricuaani?

55 Jesuuri nojoriicua tacateree. Nojori nacasureeri naa nojori saniitionu panishacari cuno Samaria pueya. Naa nojori sequereeri:

—Majaari nia niishiniu cana sohuanute naa nia niishiriojoteyani. Nia niishiri, majaari cua ninu quiquiaari mijiria cua puecoonura pueya. Saaja niquiaari cutaranija, pueyacuaji cua tacunura.

56 Na nuhuaji, nojoriiri tamonu shiitianiyojua tiacajinia quiojyaree tii maquenura.

Tamasaca pueya quiniu panishacari Jesu pueyara juucua

(Mt 8.19-22)

57 Nojori quiojosacari nucuaco, tamonu pueyanoori Jesu sequequiaari:

—Jiyaniijanaa, quia pueyanora quiniu paniyanija. Janiyacua quia tara-jareni puetunu tiqiyocua quia rucuanesacarijanaa.

58 Jesuuri na riucaaree:

—Quioojuapueeri na raaca jiiitiaa cutara. Shuhuari na jesuhua jiiitiaa-juhuaj. ¿Saniniujia Pueyaso Niyanuurijataj? Majaari cua jiiitianu tama cua maquejarajaaja.

59 Jesuuri tamonu pueyano sequeree:

—Cua nuhuajiniara quia quiri.

Nojuajaari saa sequereaja:

—Cuaara Jiyaniijanaa. Cua que cuaara cua niqiyara shaajeerajaara. Janiya jaara na jamoreni, janiyacua na nuhuaji quiata rucuanesore cutarani.

60 Jesuuri na riucaaree:

—Naajaa, quia tarinitiare. Cua tojtiaashijiacaari juhua macunucua. Naaratej, cuno macunucua cuaara jamoora tama narta macujaaaja. Quia rucuanesore cutara Pueyaso rupaa quia pohuatanura.

61 Na nuhuaji, tamonu pueyanoori Jesu sequeree:

—Jiyaniijanaa, janiya cutara quiata quianu paniyani. Coteenu cua tia-jinja quiquioraj, cua pueya cua niqiniuria cua nuhuajiria.

62 Jesuuri miriqui na riucaaree:

—Pueyano jaara na juyaca poonitijia, jiya jiacataja na jayotanura na cuhuariquia na jeenucuanura, maja cumaati na nijiniara na niqiniu. Na

camaru jaara na nijiniara niquire, sesa naaniutianiyari shuyorocotiuycuara. Naajuhuaaj, cua pueyano jaara na quiquiojinia tacatenu panijiohua quiri, nojuajaari maja maninia Pueyasora poonijiona.

10

Jesu jiyaramiquishacari setenta y dos na pueyajinjinio, Pueyaso rupaa nojori pohuatanura

¹ Nio nuhuaji, Jesuuri socua setenta y dos pueya saquiriojoquiaari, nojori puetanura nojuaja, puetunu Israel pueya tiacajiniajanaa Pueyaso rupaa nojori pohuatanura. Jesuuri nojori nuhuaji tii quianu paniriquiaajuhuaaj. Puetunu nojorijianaa jiyaramiquiriiri caapiqui, caapiqui. ² Nojori nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quiya, juhua senoosocoriquiano. Saniniuujia, secaja na senoonaari quiya. Cunora, cuhuariquia camaru nia secojore, socua senoona na jiyaramiquiniuria puetunujuanaa na senoosaanura. ³ Nia quiojiyare pueyanaa. Nia niishiri, janiyari nia jiyaramiquiya juhua borrego niquiohuani puereeta sareya tajinia. Pueyaso paraari juhua puereeta sareya. ⁴ Nia quiojosacari, majaari nia caashoque nia patanu, nia cumaneeca quiquiojuhuaaj, nia sapatunio. Majaari nu cuaco nia tarishiniu pueya nia saruhuatasacari. ⁵ Tamonu tiajinia nia tiuquishacari, coteenu nia saruhuatare na camaru nio sequesano: “Juhua-janiya nia quiri, nio tiajinia quiniaanaa”. ⁶ Cuno tiajinia quiniaa pueya jaara jiyanoojiaca quiri, naa nia sequesacaritij, Pueyasoori nojori miiniutianiya maninia. Nojori jaara juaajiaca quiri saniniuujia, Pueyasoori nojori shuquiritiyaquiniutianiya. ⁷ Tee nia masesaareni, cuno tiajinia nia jiyojere. Nia miaquere, nia rature nojori niquitiosano nijaniya. Nia pohuatanucua Pueyaso rupaa nojori niqiuara, nijaniya cuaara niquitiosaria nia panishano. Majaari tamasa tiajinia nia pacunujunu tii nia miaquenura. ⁸ Nia tiuquijosacari tamonu tiacajinia, pueyano jaara nia masuere na tiajinia nia quiniuria, niocua niaara nojori rupojosano miaquere. Majaari na soonu. ⁹ Cusosuhua nia naatanijiore cuno tiacajinia. Pueya niqiuara nia sequere: “Pueyasoori quiaritia nia jiyatenu paniya na muerasu nia quiniuria”. ¹⁰ Nia tiuquishacari tamonu tiacajinia, pueya jaara tii nia tojinu paniyaquiri, niocua cuno tiaca nuucujinia naa nacare pueya niqiuara: ¹¹ “Nia tiacajinjinio jaaquiani, canaari canaa niohuacaacuaji na majiri-utiaani. Cunoori nia niishiniuria, Pueyaso jaara nia saniitiore, majaari canaacua na tiutiasaanu quiniutianiya. Pueyasocuaajaari nia jiyanooni paniriquiaa juucua, na muerasu nia quiniuria”. ¹² Seetanujanaa nia sequyanijia pueyanaa, Pueyaso saniitionu juuca jaara quiri, cuno tiacajinia quiniaari socua jiyanohua saniitiosaanutianiya Sodoma tiacajinia quiniaa pueyajiniji.

Jesu piriyojosacari Pueyaso tojtiaashijiaca pueya
(Mt 11.20-24)

¹³ ¹Corazn tiacajinia quiniaa pueyanaa, mariyati Betsaida tiacajinia quiniaa pueyanaa! Cua tojiri. ¡Niari jiyanohua saniitiosaanutianiya! ¡Ni-aari socua Pueyaso tojiyashijiaca quiya cuno tariucuacaanu Tiro tiacajinia quiniaa pueyajiniji, Sidón tiacajinia quiniaa pueyajinjinio! Cuno pueya jaara Pueyaso cumacata miishano niqiuquiaari, taa cua miiquianu nia tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinjinio pueya maara cocuaque toqueya cushiyonuquiaari, nojori taraajesacari sesa nojori miiniucua. Naa-juhuaaj, nojori maara juuca niojoquiaari nojori nacaacua quera nojori

macaashacari, sesa miijiaca nojori quiniuucua. ¹⁴ Niaa cutaraari cua cumaacata cua miijosano niquijiaca. Naajaa, majaari nioojia nia tacatonu quiquianu Pueyasoocua. Naaratej, Pueyaso saniitionu juucajinia, ñiaari socua jiyanhua saniitosaanutaniya Tiro tiaca pueyajiniji, Sidón tiaca pueyajinijinio! ¹⁵ Niajaniyarijiataj, Capernaum tiacajinia quiniaa pueyanaa, ¿niaateeri jiyaniya niaari jiyocuacaanu quiniaara jiyatesaanutaniya? ¡Maja! ¡Ñiaari puequeetuujü raama quejoosaanutaniya saniya!

¹⁶ 'Cua pueyanaa, cante nia tojtiajacani, nojoriiri cua tojtiajacajuhua. Naajuhua, cante nia ruuretaa cua rupaa nia pohuatasacarini, nojoriiri cua ruuretaajuhua. Cante cua ruuretaani, nojoriiri cua jiyarona ruuretaajuhua.

Jesu jiyaramiquishano setenta y dos pueya tiuquiiijosacariuhua nocua

¹⁷ Jesu jiyaramiquishano setenta y dos pueyari Jesuucua tiuquiiioquiaaruhua. Nojoriiri jiyanhua shuquiriaatia quiriqiaa. Jesu sequetureeri:

—¡Jiyaniijianaa, samaruhuari canaa tojtiaacanuni canaa tohuatanijiosacari nojori, canaa jiyaniquishacari quia sesa!

¹⁸ Jesuuri nojori sequeree:

—Taaquiriirinj. Janiyari Sesaaca niquiquianuni juhua niaco tiyano jiyocuacaanuji. ¹⁹ Jiyacuajaari cua cumaaca nia niqutiocanuni, juhujaniya nia rucuanenura sacocua caco, turucuaniniu cacionio. Cua cumaacata, ñaari puetunu Sesaaca cumaacajanaa shocotanutaniya, juhujaniya panaatia nia rucuanenura, cua rupaa nia pohuatanura. Majaari quenaaja tamonu casaa miiniu quiniutianiya naquiya ñajaniya. ²⁰ Naajaa, majaari saaja shuquiriaatia nia quiniu samaruhua tojtianuucua ñajaniya. Shuquiriaatia nia quiri cutara nia sesaca naajiotasano quishacari jiyocuacaanu, Pueyaso muerasu sesaca naajiotasaqui.

Jesu shuquirishacari (Mt 11.25-27; 13.16-17)

²¹ Jiyacaritij, Pueyaso Sohuanuuri Jesu shuquiriritii jiyanhua. Cunora, Jesuuri na Que Pueyaso sequeree:

—¡Quia shuquiritiaanijia cua Quenea! ¡Quiaacuajaari Jiyaniijijanaa quiya jiyocuacaanu, mijiriano! ¡Quiaari maninia miirii! Cua pueyari juhua naatujoori, maja puera ñiishijia. Naajaa, quiaari quiarijia nojori ñiishitirii quia ñiishishano, quia jamosano mijiria ñiishijiaacuaji. Jaa, cua Quenea, quiaacuajaari naa nojori panitaja.

²² 'Cua Queeri tari cua niqutioquiaari puetunu na jiiatasanojuanaa, Jiyaniijiarano cua quishacari. Majaari tamonu ñiishiniu quenaaja cante Pueyaso Niyanuni, saaja cua Que cutaraari cua ñiishiya. Naajuhua, majaari tamonu ñiishiniu cutara cante cua Queni. Saaja janiya cutaraari na ñiishiyani. Naajuhua, noo pueyari na ñiishiya, canapue cua ñiishitiniu panija cua Quecuajani.

²³ Na nuhuaji, Jesuuri na pueyacia tacateree. Saaja nojori sequereeri:

—Shuquiriaatia quijia cutaraari ñajaniya, nia niquiniuucua puetunu nia niquishanojuanaa nia rupuenuucua janiya. ²⁴ Seetanujuanaa nia sequenijia, queraatia tariucuacaanu Pueyaso sequesano caminiujunaa pueya, mariyata jiyacia jiyaniijianucuanio, nojoriiri nia niquishano niquiniuucua jiaatiaquiaari juucua. Majaari na niqutiuniu quiquiaari. Nojoriiri cuata nia quishacari nia tojishano tojtianuucua jiaatiaquiaari juucujuhua. Majaari na tojitiuniu quiquiaari.

Samaria jiyajinijinio maninia miijajiniji pohuatasano

²⁵ Na nuhuaji, Moisés Rootasanojiniji niishitiojona pueyanoori Jesuucua niqúiaari nata na pocoojonura. Jesu na pocuatenuura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaracaanu rishijia cua quiniuriani?

²⁶ Jesuuri na riucaaree:

—¿Taate Moisés Rootasanojinia naajiotasani? ¿Taa quia niishiriojo-quiaani, quiaa jaara na serojoquiaa?

²⁷ Moisés Rootasanojiniji niishitiojonaari Jesu riucaaree:

—Naa sequeyano:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia cumaacatajanaa, puetunu quia niishitiajatajanaanio. Naajuhuj, quiarta pueyano quia paniri taa quia paniyacuaa tama quia cuaqueyajaajani”.

²⁸ Jesuuri na sequeree:

—Quiaacuajaari maninia riucaaree. Naa quia miishacaritij, quiaari pueyaracaanu rishijia quiniutianiya.

²⁹ Moisés Rootasanojiniji niishitiojonaari tama nocuaji tacunu paniriquiaajaaja, maninia quijia na quiniuria Pueyaso niquiara. Naaratej, naa nequesotarohua Jesuuri:

—¿Canteeri cuarta pueyanoni?

³⁰ Jesuuri nio pohnuatasano na pohnuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajiniji. Nohuasenuujuaca pueyari na quiaree. Puetunu na jiiti-asanojuanaa na jaariuutiatureeri, na cushishano toquenio. Na piquitiuriiri. Quera macu na tiujiatuqueeri. ³¹ Na nuhuaji, pueyacuara secojonaari cuno nucuaco quiariquiaajaacuhuj. Na niquishacari piquishano narta Judio pueyano mataano nuu shuriuquiocora, na shocortamaa saajaari.

³² Na nuhuaji, Levita pueyanoori cuno nucuaco quiariquiaajuhuj. Na niquishacari narta Judio piquishano pueyano, nojuajaari saaja na shocortamaajuhuj. ³³ Na nuhuaji, Samaria jiyajinijinio tahueri cuno nucuaco quiariquiaajuhuj. Na niquishacari parta Judio pueyano mataano, Samaria jiyajinijinio tahueri nocua taraajeree. ³⁴ Na cacataseeri. Nohuasenuujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijinia-jaarijia. Ritia na jiyataaree rucoojuuca tiuquijiojuua tiajiniaari. Cuniqni na cojuatareeri. ³⁵ Tariqui, cuno tahue quianu panishacariuhua, nojuajaari caapiqui cumaneeca pueraree. Rucoonaa tia camaru na niqutioreeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneeca nocua puecare, janiyacua saniniuujia quia niqutiiorohanijia cua tacatesacariuhua”.

³⁶ Nio pohnuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca rucoonaa pueyainijinioni, ¿teyano cuno pojorijinijiniote narta pueyanocua taraajeja cutarani?

³⁷ Moisés Rootasanojiniji niishitiojona pueyanoori Jesu riucaaree:

—Cuno Samaria jiyajinijinio tahuecuajani, nocua taraajequiaarini.

Jesuuri na sequeree:

—Taaquiririni. Quia quiaarohua. Naa pueyacuara taraajeja quia quirijihuj, taa cuno tahue taraajequiaaricuaani.

Jesu quishacari Marta, María tiajinia

³⁸ Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuuquiaari. Naaratej, na tiajinia na tiuquinitiareeri. Cuno maaji sesa quiquiaari Marta. ³⁹ Martaari tarajanu jiiitaja. Na sesaari quiquiaari María. Mariari Jesu niohuaca shuriuquiumia cajiriquiaa, na tojiniuria Jesu pohuatasano. ⁴⁰ Marta cutaraari poonijioriquiaa queraatia na miishocoriquiano na jiiitiasacari. Cunora, Martaari Jesuucua catecanoree. Na sequereeri:

—Jiyaniijianaa, ¿majate cucua quia taraajenu? Cua tarajanuuri cua tarini-tiaquee niquiriyatujua, puetunu nio poonijosanotajanaa. ¡Quia sequere na naacutanura janiya!

⁴¹ Jesuuri saaja na sequereer:

—Martanaa, quioojia quia cajitiri sanaunaa. Quiaari puera quia miishano tacaatiaa. ⁴² Saaja niquiriyatu casaa cutaraari jiyanohua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojiajiniji.

11

Jesu niishitiojosacari na pueya nojori secojonura Pueyaso (Mt 6.9-15; 7.7-11)

¹ Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajiniiniori na sequereer:

—Jiyaniijianaa, canaa quia niishitiojore canaa secojonura Pueyaso, taa Tiuquiniijiona Juan niishitiojoquiaari na pueyacaani.

² Jesuuri nojori sequereer:

—Pueyaso nia secojosacari, naa nia sequereer:

“Jiyocuacaanu quijia canaa Quenaa, puetunu pueyajanaa cuaara niishiiria quiaari tojetaarucujanaa sesa miyashijia. Pueya cuaara seetanujuanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuacaanu miishiyacaani.

³ Canaa quia niquitioriquia canaa miaquesocoriquiano canaa panishano puetunu juucajanaa. ⁴ Canaa quia jiyanoori sesa canaa miishanojiniji, taa canaa jiyanooquiaacuaa sesa canaa miiniaani. Naa-juhuaj, canaa quia cojuare, maja sesa canaa miitishaanura”.

⁵ Jesuuri naa sequereerjuhuaj, socua nojori na niishitiojonura:

—Niaa jaara nia rupuenacua quiaare shiyaqueya, casaa nia masenura nojuajiniji, ¿nojuajatucua taa quia sequereni?, quiaa jaara na sequereer: “Cua rupuenanaa, cua niquitiore jiuujanaraca pan. ⁶ Tamonu cua cojiniaari shusha tiuquiriohua tucuaaanuji, miaajeyari. Shaaquiiri cua sumatuu cua miaquetesocoriquiano nojuaja”. ⁷ ¿Quiaatucua taa miirini quia rupuenaa jaara na tiajiniaacumaji quia riuucare?: “Maja cua taajetenu. Cua tia tiootiu tioree tarinijia. Tari cua mueya mataa maquetujinianijia. Maja cua naata sanenu cua niquitionura quia panishano”. ⁸ Jaara naa sequereeretej, niaa jaara na tia tiootiu piquiniu tarinitiaaquiri, janiyari seetanujuanaa nia sequeyani, nojuajaari sanenutaniya na niquitionura nijaniya puetunu nia panishanojuanaa. Majaari na sanenu quiniutianiya saaja nia rupuenaa na quiniucua. Sanenutaniyari pueyaracaanu taajeta nia piquishacari na tia tiootiu. ⁹ Naajuhuaaj, maja nia tarinitianu Pueyaso nia secojonu. Nojuajaari nia panishano nia niquitionutaniya. Cunora, nia panishano nia pajeriquia. Niocua na riuriatare. Tiootiu nia piquiriquia. Niaara riatasaanutaniyari. ¹⁰ Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiootiu piquiquiaani, nera riatasaanutaniyari.

11 '¿Niaatucua nia niyanu niqutiore saajia, neecaruu na masesacari nijaniya? Maja. ¿Niaatucua soconu niqutiore nia niyanu, sapitiaaja na masesacari nijaniya? Maja. 12 ¿Niaatucua turucuaniniu niqutiore nia niyanu, caacaraja riuriuguu na masesacari nijaniya? Maja. 13 Puetunu nijaniyajanaari sesa mĩniu niishijaca. Naajaa, niaari maninia casaa niqutionu niishiya nia niquiouhua. ¿Taatucua socua jiyocuaaanu Quijia nia Que Pueyasoni, tojetaarucujanaa sesa miyashijiani? Seetanujuanaa capora na quishacari, nojuacuajaari na Sohuanu niqutionu niishijia na muerasu, canapue te na masequiaacuajani.

Pueya sequesacari Jesu, samaru cumaacaracana
(Mt 12.22-30; Mr 3.20-27)

14 Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jiiiasacari. Samaru jaara tohuataquiaari cuno pueyanojiniji, pocujara quiriohuari. Pueya niquishacari naatej, nocuaji jiuujiatereeri. 15 Tamasaca pueyari saa sequesaaarijia:

—Cuno pueyanoori samaruhua tohuatanijia samaruhua jiyaniijia Satanás cumaacata.

16 Tamasaca pueyari Jesu saniniujiuniu paniriquiaa. Naaratej, nojoriiri na sequeturee na cumaacata na miiniuria casaa, na niqitiniuria nojori, nojori niishiniuria nojuajaari seetanujuanaa Pueyasojinijio. 17 Jesuuri nojori niishiriojosano niishiriquiaa. Nocuaji nojori sequereeri:

—Tamonu jiyajinia, cuno pueya jaara miaquetoojia tama nojori puey-atajaaja, nojoriiri maja na naata na paraa nujuatunu, na paraa jaara nocua tiuquitiare raquritiano nojori quishacari. Naajuhuaaj, niquriyat-utu tiajinia quiniaa jaara tama nojorijiaaja juayonuujuataquiaa, nojoriiri maja na naata jatiqui quiniu. 18 Naajuhuaaj, niaari cua sequeriquiaa, janiyana samaruhua tohuatanijia Satanás cumaacatani. Jaara naa quir-itij, ¿Satanástucua taa pueyaracaanu quiri jiyaniijiani, nojuaja jaara tama na samaruhuaajaaja tohuatanijia tama na cumaacatajaaja? 19 Naajuhuaaj, janiya jaara samaruhua tohuatanijia Satanás cumaacatani, taa nia sequey-acuajani, ¿nia niishitiojosano pueyariuhuaaj, cana cumaacata nojori tohuatanijioquiaa samaruhuani? ¿Taa nia sequeyani? ¿Satanás cumaacataree? Majaruhua. Naacuajitij, tama nijaniyajaaja nia niishiri, niaari jiyajeneya. 20 Naa Pueyaso cumaacata cua tohuatanijiosacari samaruhuatej, naacuajiti nia niishiri, Pueyasoori tari nia masuya seetanujuanaa na muerasu nia quiniuria.

21 Niojinia nia niishiriojorejuhuaaj: cumueeca pueyano jaara na tia cojuaa queraatia na miaquejotaja casaata, majaari tamonu naata na jiiiasano casami jaariuutianu. 22 Saniniujia, socua cumueeca pueyano jaara nocua tiuquiri, na miaquejotaja casaa jaariuutiaari, cuno, nocua na tiuushano juucuanu. Na nuhuaji, na jaariuutiasano casami paari, na pueya na serotaso-coriquiano. Naajuhuaaj, janiyari Satanás jiiiasano jaariuutiajani.

23 Cante cua jiyano quiyaquiyani, nojuajaari cua paraca. Cante cua naacutaquiya pueya rerecojonura Pueyasoni, nojoriiri saaja pueya cocuataa Pueyasocujia. Naaratej, jacaria nia niishiriojore casaa nia niishiriojia jiyajinijini.

Samaruhuari riujuujia na quiquojiniahua
(Mt 12.43-45)

24 Samaru jaara tohuatare pueyanojiniji, joojuashiquio rucuaneyiyari na samaatejara na pajenura. Jaara na riuriataaquiri, niishiriojyari: “Cua

quiquiojinia riujiuyarohuaraqui teje cua tohuatacanucujani”. ²⁵ Samaru tiuquishacariuhua cuno pueyanoocua, na riuriatasuhuari shaaco, juhua maninia netoonujusano tia, maninia jeenucuasanojuhuj. ²⁶ Naaratej, cuno samaruuri socua sesa miijiaca nojuajiniji siete narta samaruhua riquiohua nata na quiniuria. Puetunu nojorijianaari cuno pueyanojinia tiuquitia-suhua. Naacujitij, cuno pueyanoori socua sesara jiyacateja, tarijia na quiniujiniji.

Seetanujanaa shuquiriaatia quiniu cutara

²⁷ Jesu pohuatasacari nio, tamonu maajiiri jiyacari pueya tajiniji naa nacaree:

—¡Shuquiriaatia quijia cutaraari cuno maaji cante quia raquiaarini, cante quia canashitiquiaarini!

²⁸ Jesuuri saaja na riucaaree:

—Socua shuquiriaatia quijia saniya sajara cante Pueyaso rupaa tojjijiani, cante Pueyaso panishano miiquiaajaaniuhuj.

Sesa pueyari saaja Pueyaso cumaacata miishano niqiniu panijaca

(Mt 12.38-42; Mr 8.12)

²⁹ Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuataree nojori niquiara:

—Nio pa quishacari pueyari sesa miijiaca. Nojoriiri cua sequequiaa, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosanoni. Seetanujanaa majaari socua cua niqitiniu quiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás mi-shaaquiaaricuaani. ³⁰ Jonás miishaanuuri nocuaji jiuujatesano quiquiaari cutara. Naacujitij, Nínive tiacajinia quiniaa pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyajaaaniuhuj, nio pa quishacari pueya niishiniuria janiyari Pueyaso Jiyarosanoni. ³¹ Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shuucuaji jiyajinia jiyaniijia quiquiaari. Nojuajari jiyanohua tucuacaanuji niqiaari narta jiyaniijia Salomón tojinuucua, jiyanohua niishijia Salomón quishacari. Jiya puequesacari Pueyaso sanini-ujishacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijijanaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. ³² Naajuhuj, cuno tariucuacaanu Nínive tiacajinia quiniaa pueyari saneecuatanutaniya Pueyaso nequesoresacari nio pa quishacari pueya. Nojoriiri nio pa quishacari pueyacuara tonujunutanijajuhuj, nojori tacatoyaquiniuucua nojori jiuujia sesa nojori miishanojiniji, Pueyaso rupaa nojori tojiyaquiniuucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujunia Jonás jaara Pueyaso rupaa pohuataquiaari nojori niquiara. Pueyaso sequenu panishano caminiujunia quiaaritia nia tajinia quiyani, nojuajaari socua cutara Jonásjiniji. Janiyacuajaari nojuajani.

Pueya jiuujia cuhuatanajiniji pohuatasano

(Mt 5.15; 6.22-23)

³³ 'Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyocuaaanu na mo-rotanu, tiaco tiuquitianaa cuhuatariquiano. ³⁴ Pa namijiaari juhua pa cuaqueya cuhuatanajuhuj. Naacujitij, paa jaara Pueyaso casaacua jia-atiaja quirini, paari cuhuashiqui quiya puetunujuanaani. Saniniujia,

pa namijia jaara sesa casaa niquniuucua jiaatiaja quiri, paari ninishiqui quiya puetunujuanaani. ³⁵ Tama nia cuaqueyajaaja nia cojuare, niaa mariqui nioojia cuhuatana maquishajareeri. ³⁶ Niaa jaara puetunujuanaa juhua cuhuashiqui quiya, sesa casaacua jiaatiaashijia nia quishacari, niocua maninia niqunijiaara quiri puetunujuanaa, juhua samaritiu cuhuatasacari niajaniya. Naacuajitij, niocua niishijia quiri, maninia miijia nia quiniuria.

Jesu nacasusacari Fariseocuaca, Moisés Rootasanojiniji niishitiojonaanio (Mt 23.1-36; Mr 12.38-40; Lc 20.45-47)

³⁷ Jesu puecasacari pocuanu, tamonu Fariseo pueyanoori na masuquiaari na tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishijianaari. ³⁸ Fariseo pueyanoori jiuujiatequiaari na niquishacari Jesuuri shuquitioo tari cajiriquiaa miaquenura. Judiocuacaari jiyaniija, nojori rucoojosacari tamasaca pueya tiajinia, tamasaca sesa miishanoori na naata nojoriicua pacunu. Nocuaji nojoriiri shuquitianu niishijia, tiajinia nojori tiuquishacariuhua. ³⁹ Naa cuno Fariseo pueyano niishiriojosacaritij, Jesuuri saa na sequereejaa:

—Niajaniya Fariseocuacanaa, niaari juhua noo pueya, canapue te saaja na ratujua cuaqueya jeequejoquiaacuajani, saaja na miacojua cuaqueyano. Majaari na jiniacuma na jeequenu. Niaari naajuhua. Niaari sapuenu maninia pueya niquishano. Saniniuujia nioojiaacari jiyanojua sesa quiya, casami nia masejonuucua nia nohuasejonuta, puetunu sesa nia miiniutiajanaajuhua. ⁴⁰ Mosanucanaa, ¿niaateeri niishiyaquiya, pa cuaqueya Shipinianiari poojia shipiniquiaarijuhuaj? Naaratej, nioojia nia jeequere cutara, maja saaja nia cuaqueya. ⁴¹ Niaa jaara puetunu nioojiajinia nia jiti-sanojuanaa jiyatere Pueyasora na quiniuria, niaa maara juhua jeequesano quiri puetunujuanaa.

⁴² ¡Niaari taraatia miishaariquiano, Fariseocuacanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucujinijinojuanaa, Pueyasora nia niqutiosocoriguiano. Cuno jaamasucuaari culantro, menta, socua tamonu jaamasucuaniojuanio. Niaari naa maninia miiquiaa taa Moisés niishitiojoquiaaricuajani. Naajaa, Moisésri niishitiojoquiaarijuhua maninia pa miiniuria parta pueya, Pueyaso pa paniniuriajuhuaj. Majaari cuno na sequesano nia miiniu quiquiaa. Puetunu na sequesanojuanaa tojijia nia quiri. Majaari saaja jaamasucua niqutiojojuaca nia quiniu.

⁴³ ¡Niaari taraatia miishaariquiano, Fariseocuacanaa! Niaari jiyaniijianucua shuriucua cajiniuucua jiaatiaquiaa, Pueyaso secojojua tiajinia nia quishacari, juhua cutara pueya nia quiniuria pueya niquiara. Naajuhua, niaari pueya paniquiaa nojori saruhuatanura niajaniya juhua jiyaniijianucua, nia rucanejosacari tiacajinia.

⁴⁴ ¡Niaari taraatia miishaariquiano! Niaacuajaari juhua niquishoo jamaca. Pueyari juhuajaniya na caco rucooquiaa na niishiyaquishacari. Naajuhua, pueyari juhuajaniya nia rupuequiaa, nojori niishiyaquishacari nioojiaari jiyanojua sesa, juhua pueyano mocua jamajinia.

⁴⁵ Jiyacaritij, tamonu Moisés Rootasanojiniji niishitiojonaanio Jesu sequere:

—¡Niishitiojonanaa, naa quia sequesacari Fariseocuacatej, quiaari canaa sequējajuhua!

⁴⁶ Jesuuri na riucaaree:

—Taaquiririni. ¡Niaari taraatia miishaariquianojuhuaj, Moisés Rootasanojiniji niishitiojonaanaa! Puetunu nia rootasanojuanaari juhua jiyanojua niiquia casaa nitiasocoriguiano. Majaari nia tojitiajaca pueya

nia naacunu quiquiaa quenaaja nia juaashiquia sacasaruta, cuno niiquia casaa nitiasaanura. Naacujitij, pueyari maja na naata rejeretanu nia niishitiojosano.

⁴⁷ 'Niaari taraatia miishaariquiano! Niaari macunucua niojotajara shipinijioquiaa shanohuara, tariucuaaanu pueyara Pueyaso sequesano caminiujiuniaa nucuhuacuaji, teyano nia supuetanaa puecooquiaaricua-jani. ⁴⁸ Naacujitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuhua.

⁴⁹ 'Naacujitij, Pueyasoori na niishiniutia sequequiaari: "Janiyari cua sequenu panishano caminiujiuniaa jiyaramiquiniutianiya Is-rael pueyacuanu, cua rupaa niishitiojonaanio. Israel pueyari noo-jiaqueya puecoonutaniya. Tamasacaari naquiya miishaanutaniya-juhuaj".

⁵⁰ Cunora, Pueyasoori nio pa quishacari pueya naminiutianiya puetunu na sequenu panishano caminiujiuniaa nanacaacuajanaa, canapuate nio jiya coteejajiniji puecoosaaquiaaricua-jani. ⁵¹ Coteenujanaa mosaaquiaari-iri Abel. Na nuhuaji, queraatia Pueyaso sequesano caminiujiuniaari puecoosaaquiaari. Na nuhuaji, Zacariasri socua jaatesaaquiaari monu-juhuaj. Nia supuetanaari na moquiaari Pueyaso Secojoua tiajinia, Pueyaso Shuriucua Quiquio tacoji, Pueyasooacara catijiasaqui shuriucua. Seetanu-janaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

⁵² 'Niaari taraatia miishaariquiano, Moisés Rootasanojiniji niishitiojon-anaa! Niaari najuhuaa Pueyaso Rupaa jiiitia. Majaari nia tojinu paniniu, Pueyaso jiyanooshano pueya nia quiniuria. Saniniuujia, tamasa jaara Pueyaso Rupaa niishiniu paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

⁵³ Jesu jaara nio sequequiaari, Moisés Rootasanojiniji niishitiojonaa, mariyata Fariseocuacari jyanohua juaaquioree. Jiyanhua nojori juaaquiiosacari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua. ⁵⁴ Nojoriiri nocuara tonujunu paniriquiaa juucua, jaara sesa quiri na sequesano.

12

Jesu niishitiojosano, maja sapuenu maninia pueyano niquishano pa quini-uria

¹ Jiyacaritij, jyanohua jyanohua queraatia pueyari Jesucua rerejoree. Tama nojorijiaarijia rapijioooriquiaa puera nojori rerequeejosacari. Jiy-acaritij, Jesuuri saa na pueyaja sequenu coteeree. Naa nojori sequereeri:

—Tama nia cuaqueyajaaja nia cojuare Fariseocuaca pan poreetajacaaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniujiniji. Nojoriiri sapuenu maninia miijiaa pueya niquishano tamasa niquiara. Saniniuujia, nojori jiuujiaari saa sesaja pueyaracaanu. ² Nia niishiri, puetunu jiyasohuaja miishanojuanaari ni-ishishaanutaniya. Puetunu jamosano casaajanaari niquishaanutaniya-juhuaj. ³ Puetunu nia sequesanojuanaa ninishiquini, cuhuashiqui camini-ujushaanutaniyari. Naajuhuj, nia sasacojosano tama nia sohucamara-jaajani, cunoori jiyocuacaanu tia nijiniji nacatasaanutaniya puetunu pueya tojshocoriqianojuanaa.

*Cante puereshiya cutarani
(Mt 10.26-31)*

4'Cua rupuenanaa, majaari nia puerenu canapuede nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani. 5 Seetanujuanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jatanura niajaniya mani quiqiojiniani, na cusojuanu nuhuaaji niajaniya. Saaja nojuaja nia puerere cutara.

6'Cinco shuhuari saaja caapiqui cumaneecaniyojuata masesano. Pueyara, cunoori najuhuanaj. Naajaa, majaari Pueyaso niyjetanu cuno shuhua jaara puecoosaare. Nojuajaari na niishiya cutara. 7 Naajuhuaaj, nia muesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyanoehua Pueyaso panishano cutara queraatia na cojuasano shuhuaajiniji.

Tamasaca niqiuara pa sequere paari Jesucristo pueyani
(Mt 10.32-33; 12.32; 10.19-20)

8'Cua tojitiare. Cante tamasaca niqiuara sequejani: "Janiya Jesucristo pueyanoni", naajuhuaaj, janiyari cua Que Pueyaso seya niqiuara sequenutaniyani: "Nojuaja cua pueyano". 9 Cante saniniuujia tamasaca pueya niqiuara seetaa janiyajinijini, cua pueyano na quishacarini, janiyari cua Que Pueyaso seya niqiuara na tamacanutaniyajuhuaaj.

10'Cante cua sesacareeni, nojuaja na naata jiyanooshaanu. Saniniuujia, maja cutaraari na naata jiyanooshaanu cante Pueyaso Sohuanu sesacareeni.

11'Cua muerasu nia quiniucua, niaari Pueyaso secojoja tiajiniaqueya jiyatasaanutaniya, nequesoreenaa niqiuara, mijiria jiyaniijianucua niqiuarani. Nojori nequesoresacari niajaniya, majaari nia niishiriojonu taa nia riucuanutaniyanoj, casaa nia sequenutaniyajaniuhuaaj. 12 Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

Puereetaari casamiriaca pa quishacari

13 Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequere na niqutionura janiya canaa shipininio jiiatasanojiniji, taa canaa shipininio sequequiaari canacuajani, saminio na quishacarijia.

14 Jesuuri saaja na riucuaaree:

—Pueyanonaa, jjaniateeri pueya nequesoreenara jiyatesaaquiaarini, cua serotanura niajaniya nia shipininio casamini?

15 Jesuuri naa nojori sequequiaarijuhuaaj:

—Jiyanoehua nia cojuare tama nia cuaqueyajaaja, maja casamiicua jiaa-tiajaca nia quiniuria. Pa naata shuquiriaatia quiniu casamijiu. Queraatia casamiiri maja na naata seetanujuanaa shuquiriaatia quijiacara na jiyatenu pajaniya.

16 Na nuhuaaji, Jesuuri pueya niishitioree nio miriqui pohuatasano. Naa sequereeri:

—Tamonu pueyanoori quiqiaari, jiyanoehua casamiriaca. Na cuhuariquiajinia na natoosanoori jiyanoehua muetuquiaari. Naacuajitij, queraatia miaquesocoriquiano jiiatiaquiaariiri na cuhuariquiajiniji na carojotasano. 17 Tama sequereearijia: "¿Taa cua miiniutaniyani? Cua tiajosano cua racatajara cua carojotasanoori puetunujuanaa tari mishaja quiya. ¿Tee cua racatanutaniya shusha cua carojotasanoorinitioj?"

18 ¡Aj, niishiquiinijia! Coteenu cua tiajosano cua casamiicuaaji niyaroorohuarajij. Janiyari socua puereetucocua tiajonutaniyani. Janiyari cuniqui mishinijionutaniya puetunu cua carojotasano cua

cuhuariquiajinijiniojuanaani, puetunu cua jittiasano casamijianaanio. ¹⁹ Na nuhuaji, janiyari tama cua cuaqueyajaaja sequenutaniyani: 'Pueyanonaa, quiarijia cutara juhuajaniya quia quiri. Quiaari queraatia casamiriacaquaja, queraatia marijara. Quiaari queraatia quia miaquesocoriguiano jittiaacuaja. Quiarijia cutara quia samaatere. Quia miaquere. Quia rature. Tama quia cuaqueyajaaja quia shuquitiri' ". ²⁰ Cuno niucuaja, Pueyasoori na sequequiaari: "Mosecanaa, quiaari quiarijia macu juhuaquenutaniya. ¿Canteeri puetunu quia jamuesano casamijianaa jittianutaniya quia nuhuajini? ¿Canra na quiniutianiyarini?" ²¹ Naa miishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujuanaa casamijiuniucua Pueyasora.

Pueyasoori na muerasu cojuaja maninia
(Mt 6.25-34)

²² Na nuhuaji, Jesuuri na saquiriojosano pueya sequequiaari: —Naaratej nia sequeyanijia pueyanaa, majaari nia tacaaniu casaa nia miaquenutaniyani, casaa nia cushiniutianiyani. ²³ Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhuj. Naajaarihuuaj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuj. ²⁴ Riquiacujua nia niquiriquia. Majaari nojori natoojonu. Majaari nojori carojotanu na racatasocoriguiano, na nuhuaji na mijosocoriguiano. Naajuhuj, majaari nojori jittianu na mijosano na racataja. Majaari tiaca nojori jittianu na carojotano nojori racatajarajuhuj. Naajaa, Pueyasoori nojori mijotequiaa. Naa cutaraari socua jiyanohua Pueyaso panishano cuno riquiacuhujiniji. ²⁵ Naajuhuj, nia nequesotaanijia, niaa jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jiyanohua nia tacaaniutia? Maja nia naata. ²⁶ Naaratej, nia tacaaniu jaara najuhua quia socua shiitaniyujua nia rishiniuria, ¿niaatucua casaara tacaari tamonu casaacuani? ²⁷ 'Natau shuucuaca nia niquishurij, taa nojori corequetaani. Majaari nojori poonijionu. Majaari na cuspuenuunujuhuj. Supuetana jiyaniijia Salomónri jiyanohua shanohua toqueyaraca quiquiaari. Cuno jiyanohua shanohua niqishano na cushishano toquení, naajaa, majaari na shocotanu cuno natau shuucuaca. ²⁸ Pueyasoori cuno natau shuucuaca shipiniquiaari rupaquijia naa shanohua niquishocoriguianotej. Jaara sorere, tariquí catijashiyaa saniniuurijia pan majeetetajara. Pueyaso jaara naa maniniushitiyacuaa shuucacatej, ¿majateeri na naata cushitiniu nijaniyajuhuj, jatarinitiaja Pueyasocua tiuujicanaa? ²⁹ Naaratej, nia sequeyanijia, maja nia tacaaniutia nia pajenu casaa nia miaquenutaniyani, casaa nia ratanutaniyani. ³⁰ Pueyaso niishiyashijia pueyari pueyaraanu na panishano casaacua tacaquiaa. Nijaniya cutaraari Queraca. Nojuacuajaari tari niishiya puetunu nia panishanojuanaa. ³¹ Naaratej, nia niishiriojore Pueyaso panishano nia miiniuria. Nojuajaari saniniuurijia nia niqutionutaniya puetunu nia panishanojuanaa.

Nia casami nia racatare Pueyaso shuriucua
(Mt 6.19-21)

³² 'Maja nia puerenu, cua muerasuniyojuanaa. Niaari secajaniyujua. Naajaa, cua Queeri nia panijia. Capora na quiniucua, ¿nia niqutionutaniya puetunu na jittiasanojuanaari? ³³ Nia casami nia niqutiojore cumaneecara. Na nuhuaji, cuno cumaneeca nia niqutiojore nareja casamijiuniucua pueya. Naa nia miishacaritij, niaari jiyocuaaanu racataa nia jittiasano.

Tee Pueyaso racataa nareja nera nia niqutiosanocuajani, cuniqui, nia cumaneeca quiquioori maja na piquiniu. Niaari tii nia racatasano jitianutaniya pueyaracaanu. Majaari nohuasejojua na naata nocua tiuquiniu na nohuasenura. Naajuhuj, surequeyari maja na naata miaquenu nia casami tii. ³⁴ Nia casami jaara naa racatasano quiyia jiyocuacaanu Pueyaso shuriucuatej, niaari saaja Pueyasocua niishiriojonutaniya, tee nia casami racatasano quiyacuani.

Jeenucuasano nia quiri nia Jiyaniijiaacuaji

³⁵ Juhuata jeenucasano nia quiri pueyaracaanu, nia sashishacari nia Jiyaniijia, taa tijainiaaco maninia seyacuani. Nojori sashishacari na jiyaniijia, nojoriiri na toqueya cushiyono quiya tari, na samaritiu noshitishanojuhuaj. ³⁶ Naa jeenucasano nia quiriujuhuj, juhua cuno seyaja. Nojoriiri na jiyaniijia sashiya na caminiujiniji na tiuquishacariuhua. Nojuaja jaara tohuateya piquishuhua, nojoriiri ritia nocuaji riatanutaniya tia tohuateya. ³⁷ Shuquiriaatia quijiaca cutaraari cuno seya, canapue te na jiyaniijiaacuaji sutyajaa ni, na jiyaniijia cuaara tiuquiriohuajaatijia. Seetanujuanaa nia sequeyanijia, nojori jiyaniijiaari nojori cajitijionutaniya miaquejajinia. Na toque maniniuqui jocuanutaniyari na mianuutenura nojori. ³⁸ Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaatia quijiaca quiniutianiyari cuno seya, nojori jaara sutyajaa tia tohuateya riatariquiano nojori jiyaniijiaacuaji. ³⁹ Nio nia niishirijuhuj, tia camaru jaara niishiri taacari nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami na nohuasenura. ⁴⁰ Naajuhuj, jeenucasano nia quiri pueyanaa, juhua cuno sutejaca seyaja. Naa jaara jiyaniya juhuanujuaja maja cua tiuquiniu quiniutianiyari, janiyari jiyacari nia jiyajenetutaniyani.

Jesu pohuatasano maninia serujiniji, sesa serujinijino
(Mt 24.45-51)

⁴¹ Jiyacaritij, Pedroori Jesu nequesotaree:

— Jiyaniijianaa, ¿quiaate nio pohuataree saa canaaraja, puetunu pueyaranaa soj?

⁴² Jiyaniijiaari na riucaree:

— Tamonu seru jaara maninia seru quiri, nocua tiuushano, niishijiajuhuaj, na jiyaniijiaari cuno na seru jiyatenutaniya narta seya jitiariquiano na niti na niyacari. Nojori jiyaniijia niyacari, cuno seeratasano seruuri narta seya mianuutenutaniya maninia, taa nojori jiyaniijianaa mianuutequiaa nojoricuani. ⁴³ Cuno seruuri shuquiriaatia quiniutianiya na jiyaniijia jaara na riuratasuhua naa maninia miyanojua, taa na sequesaaquiaari na miiniuriacuajani. ⁴⁴ Seetanujuanaa nia sequeyanijia, na jiyaniijiaari cuno maninia seru jiyatenutaniya puetunu na jitiiasano casamijianaa cojuana na quiniuria. ⁴⁵ Saniniuujia, cuno seru jaara sesa miiniuria niishiriojore, na jyanishacari na jiyaniijiaari jyanohua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuj nojuajaari saaja miaquejonutaniya. Pueyaracaanu rarujunutaniyari. Mashaaseqejonutaniyajaariuhuj. ⁴⁶ Na jyanishacari na jiyaniijia juhuanujuaja maja na tiuquiniu quiniutianiyari, jiyacaritij, cuno juucaja, na jiyaniijiaari tiuquiniutianiyari canashiyaquiji. Naa cuno seru miiniuucua sesatej, na jiyaniijiaari jyanohua na saniitijonutaniya. Na jatanutaniyari Pueyaso tojiyashijiaa pueyata na saniitiosocoriquiano.

⁴⁷ Tamonu jiyaniijia jaara na seru rootare maninia, taa nojuaja miiniutianiyani, cuno seru jaara jeenucuacquiri na jiyaniijiaacuaji, mariyata jaara

miyaquiri taa na jiyaniijia sequequiaari na nuhuajiriacuajani, nojuajaari jiyanoehua majacusaanutaniya cutara. ⁴⁸ Saniniuuujia, tamonu seru jaara sesa miiri na niishiyaquiniuucua na jiyaniijia panishano na miiniuria, nojuajaari saaja secaja majacusaanutaniya. Naajuhuaaj, cante queraatia niquitiosaareeni, cuno serujiniijiri queraatia masenu panishaanutaniya. Naajuhuaaj, cante jiyatesaaree queraatia jiiitiana na quiniuriani, na jiyaniijiaari nocua tiuuniutianiya socua jiyanoehua maninia miijia na quiniuria.

Jesuucua tiuujiacaari narta pueya panishoo

(Mt 10.34-36)

⁴⁹ Mijiria niquiaarinijia, juhua mani cua noshitiniuria pueya tajinia. ¡Seetanujuanaa na noshitiriquia tarinij! Cua rupaari juhua mani quiniutianiya. ⁵⁰ Coteenu, janiyari jiyanoehua saniniujiushaanutaniya juhua manitiani. Nocuaaji coojiaari tacaya janiya jaara naa miishaarejaatijia. Seetanujuanaa na jiyateriquia tariucua tucuateenonij. ⁵¹ ¿Niaateeri jiyaniya janiyari niquiaarini mijiria quiniaa quiniuria juhuajaniya? ¡Maja! Seetanujuanaa nia sequeyanijia, janiyari niquiaarini pueya cua raquiriojotanura. ⁵² Naaratej, pueyari quiarijia juayonuutanu coteenutaniya. Pueyano jaara necocuata jiiitiare jiuujianaraca niquioehua na tiajinia, jiuujianaraca nojorijiniinjio jaara cucua tiuuri, cuno caapiqui cucua tiuyashijiaaari saniniuuujia nojori juajaiaa quiniutianiya. Naa noojiaqueya pueyajiniinjio tiuuniuucua cucuatej, queraatia pueyari naa tama tacaresetanutaniyajaacujua. Naacuaajitij, tamonu tiajinia, querajaa pueyari caapiquiriyatu cucua tiuujiaca juajaiaa quiniutianiya. ⁵³ Pueyari necohua paracaajia quiniutianiya, necohua tiushacari cucua. Naajuhuaaj, necohuari na que paracaajia quiniutianiya na que tiushacari cucua. Naajuhuaaj, maajipohuari necojori paracaajia quiniutianiya necojori tiushacari cucua. Naajuhuaaj, necojoriiri na nucua paracaajia quiniutianiya na nucua tiushacari cucua. Naajuhuaaj, maajipohuari necohua niquiocohua paracaajia quiniutianiya, necohua niquiocohua quiniuucua cucua tiuujiaca. Naajuhuaaj, pueya niquiocohuari na quinia paracaajia quiniutianiyajuhuaaj, cucua tiuujiaca na quinia quiniuucua.

Pueya cuaara niishiiria quiarijia Pueyaso miishanojiniji, casaa na niishitiniu paniyani

(Mt 16.1-4; Mr 8.11-13)

⁵⁴ Jesuuri naa sequequiaari pueyajuhuaaj:

—Niaa jaara niquitioocua niquiquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari. ⁵⁵ Naajuhuaaj, paratu jaara piyarojoquiaa pananu shuucuaaji, niaari sequequiaa: “Tacareejonuqui quiniutianiya”. Naa quiquiaari. ⁵⁶ Pueyanaa, ¿niaateeri seetanujuanaa niishijiaa? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniuuujia, nia niquishacari quiarijia Pueyaso miishano nia niquiara, majaari cuno nia niishiniu, casaa na sequenu paniyani. Naaratej, majaari seetanujuanaa niishijiaa nijaniya.

Niaacuara tonujunata nia jeecatoore

(Mt 5.25-26)

⁵⁷ Niaacuajaari niishiya, sesa miijiaaari saniitiosaanutaniya. Naaratej, tama nijaniyajaaja nia niishiriojore, casaate maninia nia miiniuriani. ⁵⁸ Tamonu pueyano jaara quiocuara tonujure quia sesonuucua na casaa, quia saniri juhuata nata pocojonu maninia, na jaatucusacari quiajaniya nequesoreena pueyanoocua. Quia sequerenoj casaa quia miiniutianiya nerani, na jiyanooniuria quiajaniya. Quiaa jaara jeecatoyaquiri nata, nojuajaari quiocuara saquiriojotanutaniya nequesoreena pueyano. Jaara

quiocuara saquiriojotare nequesoreena pueyano, nequesoreenaari sanini-uujia quia niqutionutaniya na pueya, quia nujuatesaanura nujuatejojua-jinia. ⁵⁹ Seetanujuanaa nia sequeyanijia, majaari nia tohuatanu quiniutianiya nujuatejojua-jiniji, niaa jaara puetunu nequesoreena sequesano cumaneecajanaa niquitiorejaatijia niaacuara tonujuna pueyano.

13

Nioojia nia tacatore sesa nia quiniujiniji

¹ Jiyacari, tamasaca pueyari Jesuucua tiuquiijoquiaari. Cuno pueyari naa Jesu pohuataquiaari:

—¡Jiyaniijia Pilatoori Galilea jiyajinijinio pueya puecoorucuaa! ¡Na nuhuaji, nojori nanaca cojitiriiri Pueyasooacara nojori puecoosano seya nanacata!

² Jesuuri nojori sequereee:

—¿Niaateeri jiyaniya cuno Galilea pueyari naa miishaarucuaa socua jiyano-hua sesa miijiaa nojori quiniucua narta Galilea pueyajiniji?

³ Seetanujuanaa nia sequeya cutaranijia, nojoriiri maja socua sesa miijiaa quiquianu niajanijajiniji. Niajanijajuhua, niaa jaara tama nioojiajaaja tacatoyaquiri sesa nia miiniujiniji, niaari taraatia puecoosaariquianojuhuaj. ⁴ ¿Cuno dieciocho pueyarihuaj, canapuede cusonuucanu cuno jyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaa quiquianu narta Jerusalén tiacajinia quiniiaa pueyajiniji? ⁵ Seetanujuanaa nia sequeyanijia, nojoriiri maja socua sesa miijiaa quiquianu niajanijajiniji. Janiyari quiarijia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhua.

Miriqui Jesu niishitiojosano muetuhuo naanajiniji

⁶ Jesuuri na nuhuaji pueya niishitiojoquiaari nio miriqui pohuatasanta:

—Tamonu pueyanoori higo naana jiitiaquiaari na uva cuhuariquiajina. Tamacari, na camaruuri nocua quiaquiaari na niquiniuria. Na jajau mianu paniriquiaa juucuaari. Shaanoori quiriquiaa. ⁷ Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhua niquiaani na jajau pajenura. Pueyaracaanu muetuyaquiyari. Tari na shocorucuaari jiuujianaraca marijia. ¡Quia nure! Tamonu cuara na nujuasaqui natasaaria, na muetunura cutara”. ⁸ Cuhuariquia cojuanaari na riucuaaree: “Jiyaniijianaa, quia tarinitiarejaara tamonu marijia. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paatiniutaniyani. ⁹ Janiya jaara naa na miirini, muetunutaniya naasucua. Jaara muetuyaquiri, pocua socua na nureni”. Naajuhua pueyanaa, Pueyasoori sashiya, maninia miijiaa nia quiniuria.

Jesu jeeacasari porocuatucua samaatenu juuca

¹⁰ Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojua tiajinia. ¹¹ Tamonu maaji cusosuuri tii quiriquiaajuhua. Dieciocho marijiaari na shoconujuquiaari porocuat na quishacari. Samaruuri naa na jiyatequiaari. Majaari quenaaja na naata maninia nujuanu quijia. ¹² Jesu jaara na niquiquiaari, na sequereeri:

—¡Maajinia miiji! ¡Quia nijiniacuaa tari jeequerohua!

¹³ Jesuuri na juaashiquia niaree maajiuca. Jiyacaritij, maajiiri maninia jeequequee. Nojuajaari Pueyaso maninuhuaqueetanu coteeree naa na miishaanuucuatej. ¹⁴ Pueyaso secojojua tiajinia jiyaniijiaari juarii naa Jesu

miiniuucua samaatenu juuca. Naaratej, tii quiniaa pueya sequeree Jesu niquiaraari:

—¿Seis juucacuajaari quiya puetunu semaanajiniajanaa pa poonijionura! ¿Niocua cuno juuca nijioriquia nia naatanijiosaanura, maja samaatenu juuca!

¹⁵ Jiyaniijia Jesuuri sequeree:

—¿Sapuenu juhua maninia miijiaca niquishano pueyanaa, puetunu nianianiyajanaari nia juunu, nia burro samaacartaquiaa samaatenu juuca, nia jaatucosocoriquiiano mohuaca na raatenura! ¹⁶ ¿Nio maajiirihuaaj? Nojuaja cutaraari supuetana Abraham niquiohuacuajinio supueno. ¿Majateeri maniniajuhua samaatenu juuca pa samaacatanura Satanás morojosano? Dieciocho marijiaari tari nio maaji shoconujurucuaa pueyaracaanu porocutu na quishacari.

¹⁷ Naa Jesu sequesacaritij, puetunu na paraajanaari caririquitirii. Saniniuuja, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

Miriqui Jesu pohuatasano mostaza jajaujiniji

(Mt 13.31-32; Mr 4.30-32)

¹⁸ Jesuuri sequequiaari:

—¿Taate cua naata niishitiojonu nianianiyani, nia niishiniuria taa Pueyaso poonijiya pueya jiuujajinia na rupaatani? ¹⁹ Na rupaari juhua mostaza jajaujiojua, pueyano natasano na cuhuariquijinia. Cuno jajau jaara moritiare, puereetucara caneyari. Naacuajitij, shuhuari na cashacucuaacua jesuya. Naajuhuaaj, Pueyaso rupaari caneya pueya jiuujiacajinia puetunu nio jiyajiniajanaa maninia miijiaca nojori quiniuria.

Miriqui Jesu pohuatasano pan poreetajajiniji

(Mt 13.33)

²⁰ Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijiya miriria na rupaatani? ²¹ Pueyaso rupaari juhua pan poreetaja maaji cojitishano trigo cashojuata, shanacusanu jiuujianaraca shiitianiyojua tohuatashijinia. Pan poreetajaari puetunu cuno cashojua miniquiootasanojuanaa poreeteja. Pueyaso rupaari naa poonijiojuajuhuaaj.

Juhua shiitianiyojua tohuateyari quiya Pueyasocua pa quianura

(Mt 7.13-14, 21-23)

²² Jesuuri Jerusalén tiacajiniara quiariquiaa na pueyata. Nucuaaco na quiasacari, pueya niishitiojoriquiaa tiacajiniaari, shiitianiyojua tiacajiniano. ²³ Jiyacaritij, tamonu pueyanoori na nequesotaree:

—Jiyaniijianaa, ¿saaja quenaaraqui pueyateeri Pueyaso pueyara jiyateaanutaniya?

Jesuuri nojori riuquaree miriqui:

²⁴ —Jiyanhua nia saniniujiuri shiitianiyojua tohuateyaco nia tiuquiniuria, Pueyaso nia rupuenura. Juhucarijia nia numooteyanijia, queraatia pueyari nocua tiuquitianu paniniutianiya juucua. Majaari nojori naata quiniutianiya saaja. ²⁵ Cua tojitiare. Tia camaru jaara sanere, tohuateya tionutaniyari. Nianianiya, cante na tia carijiniacuma quiyajaani, niaari tohuateya piquiniuniutianiya najuhuanaj. Niaa jaara naa nacare: “¿Jiyaniijianaa, canaacuaji quia riatare tohuateya!” nojuajaari nia riuquanutaniya: “Maja cua niishiniu tejenote nijianiyani”. ²⁶ Jiyacaritij, niaari juhuacatecara sequenutaniya: “¿Majateeri canaa quia niishiniu? Canaacuajaari quiata miaquenuujuani. Canaari quiata ratujua mariyatani. Quiaacuajaari canaa

tiaca nuucucacajinia niishitiojua”. ²⁷ Tia camaruuri nia riucuanutaniya: “Janiyacuaaari tari nia sequereeni, maja cua niishiniu tejenote niajaniyani. Nia quiojorohua niiquiji, puetunu niajanijajanaa sesa miijiacanaa”. ²⁸ Naa na taanusacari niajanijatej, niaari nujuquetunutaniya. Niaari nia quiaa miaquenutaniya jiyanoahua nia taraajenuta, nia niquishacari Abraham, Isaac, Jacobo, puetunu pueyara Pueyaso sequesano caminiujiuniaa Pueyaso shuriucua quiyancuaa. ²⁹ Queraatia tamasaca pueyapueeri nijionutaniya puetunu jiyacajinijiojuanaa Pueyaso shuriucua cajitiuniuria, nojori miaquenuunura nata. Nijionutaniyari pananu muetasamaji, pananu tiuquishacojinio, pananu shuucuaij jiyacajinijinio, pananu muetasamaji miaquetajara jiyacajinijiojuhuaj. ³⁰ Quiarijiani, queraatia pueyari juhua tojishoo quiya narta pueyara. Cuno quishacari saniniuujia, nojori cutaraari seetanujuanaa tojishano pueya quiniutianiya Pueyasora, Pueyaso tojitiajaca nojori quiniucua mijiria. Naajuhuj, quiarijiani, queraatia pueyari juhua tojishano pueya quiya narta pueyara. Saniniuujia, jiya puequesacari, nojoriiri najuhuaa quijiaa quiniutianiya Pueyasora, nojori tojitiaquiniucua nojuaja.

Jesu taraajesacari Jerusalén tiacajinia quiniaa pueyacu
(Mt 23.37-39)

³¹ Jiyacari noojiaqueya Fariseocuaaari Jesuucua tiuquijioquiaari. Nojoriiri Jesu numooteree:

—iNiiquiji quia mashiri! ¡Jiyaniijia Herodes quia monu pania!

³² Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: “Janiyari samaruhua tohuatanijiyani. Janiyari cusosuhua naatanijiyajaanihuaj. Janiyari naa miya quiarijiani, tariquijuhuj. Janiyari tama tariqui tucuatanutaniya puetunu cua miiniu panishanojuanaani”. Naa nia sequesuhua cuno pueyano. ³³ Cuaara ru-paquijia cua sashiiria. Janiya quiarijia rucuanenutaniyajaarani, tariqui, tama tariquinio. Janiya cuaara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujiuniaajanaa puecoosaaquiaaricuaani. Majaari tamaqui cua monu quishaanutaniya.

³⁴ ‘Jerusalén tiacajinia quiniaa pueyanaa, niaacuajaari Pueyaso sequesano caminiujiuniaa puecojuaca. Niaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatijani, taa caacaraja necohua rijioquiaacuaa na nesu cariquiaconi. Niaari saaja paniaquiquiaa cua cojuanura niajaniya. ³⁵ ¡Cunora, cua tojitiare! Nia quiquoori tojetaarucujanaa shaaqui quiniutianiya. Naajuhuj, majaari socua nia niquiniu quiniutianiya janiya, niaa jaara nia timitiasacari janiya sequerejaatijia: “¡Cuaara shuquiriaatia quiiiria pa Jiyaniijia, Pueyasojiniji tiuquihuano!”

14

Jesu naatanishacari cusosu poreeno pueyano

¹ Tamonu samaatenu juuca, Jesuuri tamonu Fariseocuaa jiyaniijia tiacajinia quiaquiaari miaquenura, socua tamasaca Fariseocuataniyo. Nojoriiri Jesu shootiatuquiquiaa nojori niishiniuria casaa na miiniutianiya samaatenu juucani. ² Jiyacaritij, tamonu pueyanoori Jesu taccoji nujuariquiaa, poreeno cusotaano. ³ Jesuuri Moisés Rootasanojiniji niishitiojanaa nequesotaree, Fariseocuaacani:

—¿Taa nia serojuquiaa Moisés Rootasanojiniani? ¿Maniinate cusosu pa naataniniu samaatenu juuca?

⁴ Nojoriiri saaja sanaa na tojitiariquiaa. Jesuuri cusosu quiaree jiyacari. Na naataniriiri. Na jiyarorohua na tiajiniaari. ⁵ Na nuhuaji, Jesuuri cuno Fariseocuaca sequereee:

—Nia burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaaniuhuara nia seru?

⁶ Majaari nojori riucuanu quirii quenaaja.

Taa pa miyani queranacunura masuusano pa quishacari, taamueca puey-ate masuushiyaajanihuaj

⁷ Jesuuri shootiariquiaa taa masuusano pueya socua panishano cajitiucujajinia nojori cajitiuniuria riutioconeetariquiaani. Jesuuri cunora nojori niquiara pohuatatee nio pohuatasano. Naa sequereeri:

⁸ —Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajanijajiniji.

⁹ Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajanija: “Shiiquia. Quia sanere nio pueyanoocujaji”. Naacuajitij, quiaari cajitishaanutaniya quia caririqiniutia pueya paniyaquishano cajitiujinia, miaqueja puequeetujinia. ¹⁰ Nocuaji nia sequeyanijia, niaa jaara masuusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacuajitij, quia masuuna jaara niquiri quiajanija, nojuajaari quia sequenutaniya: “Cua rupuenanaa, ¡niya quia cajishii socua panishano cajitiujiniani!” Naacuajitij, cuniqui quiata quiniaari niishiniutianiya, quiajanijaqui nia masuuna panishano pueyano. ¹¹ Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Saniniuuja, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

¹² Jesuuri na masuuna pueyano sequereejuhujaj:

—Quiaa jaara queranacunu paniya, majaari quia masuunu saaja quia rupuenaa, quia tapueyocuaca, quia panishano pueyano. Naajuhujaj, majaari quia masuunu quia shuriucua quiniaa casamirijaca pueya. Quiaa jaara nojori masuure, nojoriiri quia masuunutaniya saniniuuja. Naacuajitij, quiaari tari namishaarohuacuaja. Cunora, majaari socua quia masenu quiniutianiya Pueyasojiniji. ¹³ Naaratej, quiaa jaara queranacunu paniya, quia masuure casamijiunucua pueya, sesaruneca pueya, sesacujuanucua pueya, cariyojuarujurinio. ¹⁴ Naacuajitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajanija saniniuuja. Naaratej, Pueyaso cutaraari maninia miiniutianiya quiajanija saniniuuja, na samiitianijosacariuhua maninia miijijaca pueya.

Miriqui Jesu pohuatasano na queranacunujiniji

(Mt 22.1-10)

¹⁵ Jesuta cajiyano pueyano tojishacari naa Jesu pohuatasanotej, Jesu sequereeri:

—¡Shuquiriaatia quijia cutaraari cuno, cante Pueyaso shuriucua miaquenu-taniya jiyocuacaanuni!

¹⁶ Jesuuri na sequereee:

—Tamonu pueyanoori queraatia sumatuquiaari pueyata na queranacunura. Nojuajaari coteenu queraatia pueya masuquiaari. ¹⁷ Quera miaquenuusacari, na seru jiyaroreeri na masuusano pueya na sequenura: “Miji, puetunujuanaa tari jeenucuasaaree niaacuaji. Nia miaquesee”.

18 'Puetunu masuusano pueyajanaari juhuacatecara sequequiaari maja na naata quianu miaquenuucua. Coteenu masuusano pueyanoori cuno seru sequeree: "Janiyari shusha maseree tamonu cuhuariguiani. Janiyari nocua quiaa na niqiniyuucuanu. Cua jiyanoori quenaaja. Maja cua naata quianu quiaata queranacunuucua". 19 Tamonu masuusano pueyanoori sequeree: "Janiyari diez poonijiojuaca juyaca masereeni. Na saniniuucua quiaanijia. Quiocua cua jiyanoori cua quiaaquishacari queranacunujinia". 20 Tamonu masuusano pueyanoori sequereejuhuj: "Shusha camiriinjia. Cunora, maja cua naata quianu". 21 Seruuri tamajaaja tacateyarohua na camarnu tiajiniohua. Na jiyaniijia pohuatasuhua na masuusano pueya sequesanoori. Na jiyaniijaari juaaquii. Na seru sequereeri: "Ritia quia quiaare tamasaca pueya masuunuucua tiaca nucuaacaco. Miji quia rijiooco casamijiuucua pueya, sesaruneca pueya, sesacujua pueya, cariyojuarujuri pueyano". 22 Seru tiuquishacariuhua, na jiyaniijia sequesuhuari: "Jiyaniijianaa, janiyari tari miiriini taa quia sequeree janiyacujani. Juhuanajuaja maja tia mishiniu". 23 Na jiyaniijaari na sequeree: "Socua pueya quia pajecoo tiaca nucuaacaco, tamasaca tiacajiniara nucuaacaconio. ¡Socua pueya quia nenecojocoo nojori niniuria, cua tia mishiniuria! 24 Seetanujanaa nia sequeyanijia, coteenu cua masuusano pueyajiniinjio, majaari quenaaja niquiriyatu nojorijiniinjio saniniu quiniutianiya cua sumatusano".

Saaja tama na cuaqueya panitijajarjia na naata Cristo nuhuajiniu (Mt 10.37-38)

25 Jiyanhua queraatia pueyari Jesuta quiojoriquiaa. Jesuuri nojoriicua tacateree. Nojori sequereeri:

26 —Cante cucua niya cua pueyano na quiniuriani, nojuaja cuaara niishiria nio. ¡Maja nia naata cua pueyano nia quiniu nia paniyaquishacari janiya socua nia quejiniji, nia nucujiniinjio! Nia niquiocua, nia niquiuhua, nia tapueyocua, nia rimiatuhajuhuj, nia panishacari nojori socua janiyajiinjiji, ¡majaari nia naata cua pueyara nia quiniu! Naajuhuj, ¡majaari quenaaja nia naata tama nia cuaqueyajaaja panijia nia quiniu socua janiyajiinjiji! 27 Cante tama na cuaqueyajaaja panitiaaquijia cucuarani, majaari na naata cua pueyanora na quiniu. 28 Niaa jaara jiyaconaja tia tianu paniri, ¿majate coteenu nia cajiniu nia niishiriojonura taa cumaneecate panishaanutaniyani, na tucuatnura puetunujanaa? Naajuhuj, niaari niishiriojia, queraatia quiyacujate nia cumaneeca. 29 Niaa jaara coteenu naa miyaquiri, niaari najuhua morijiucua nujuatejonutaniya, na nuhuaji majaari socua nia cumaneeca quiniu nia tucuatnura nia tia. Puetunu nia tia niqiniiajanaari juhuacatecara nia macaatiutianiya. 30 Nojoriiri sequenutaniya: "Cuno pueyanoori tianu cotecanu najuhuanaj. Majaari na naata na tucuatnuru quiarjia". 31 Naajuhuj, jia jiyaniijia jaara quianu paniri narta jiyaniijata miaquetonura, ¿majate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? 32 Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetonu quiniutianiya. Saniniuujia, tucuaaanu narta jiyaniijia quishacarijia, nocua jiyaramiquiniutianiya na pueyari, nata nojori pocoojonura maninia, nojori jiyanoootionura. 33 Naajuhuj, niaa jaara carteyaquiri puetunu nia jiiitiasanojanaa, majaari nia naata cua pueyanora nia quiniu.

Miriqui Jesu pohuatasano shonijini (Mt 5.13; Mr 9.50)

³⁴ 'Shoni jaara tiquiriquia quiya, maniniaari, pa panishano. Jaara shaacara quiqui, ¿taate na naata tiquiriquiara na quiniuhuani? Maja na naata. ³⁵ Najuhuana quiyari. Majaari quenaaja maninia na quiniu cuhuariquaijina jatasocoriquiano maninia na moritianiniuria nataacuaca. Majaari quenaaja maniniajuhuaj, na paatishaanura na moquijianura, natau pajama niojosocoriquiano. Jaara naa maninia quiyaquiriti, nareja jatashiyari. Cante numaaracani, cuaara tojtiaara miriqui cua pohuatasano. Cuaara na niishiirijuhuaj. Seetanujuanaa cua tojtiajaca pueyani, nojoriiri juhua shoni mijiria.

15

Jesu pohuatasano miriqui tashucano borregojiniji (Mt 18.10-14)

¹ Roma tiacajinia quijia jiyaniijara cumaneeca masejona, mariyata sesa miijiaa pueyari Jesuucua nijioriquiaa na pohuatasano nojori tojtianura. ² Cuno pojoriiri Fariseocuaca soosano pueya quiriquiaa, Moisés Rootasanojiniji niishitiojona soosano pueyanio. Cunora, Fariseocuacaari, mariyata Moisés Rootasanojiniji niishitiojonaari tama rimiaaqueturiquiaajaaja Jesuucua. Naa pocaturiquiaa Jesuuri:

—Cuno pueyanoori sesa miijiaa pueya shanacuquiaa nocua nojori nijonura. ¡Juhuajaniya nojori miaquequiaajaariuhuaj!

³ Naaratej, Jesuuri nojori niqiaara pohuataree nio miriqui pohuatasano:

⁴—Niaa jaara cien borregohua jiitariquia, nojorijinijinio niquiriyatunioyujua jaara tashucua, ¿taa nia miiquiaani? ¿Niaatucua nia noventa y nueve borregohua cureeno tiujiaaquiri rupaquijia cuhuariquaijina, tashucuanano borrego nia pajenura, niaa cuaara na riuriatarohuaajatiija? Taaquiririnij. Niaacuaajari nia miiquiaaquij. ⁵ Niaa jaara na riuriatasee, niaari nia shuquiriniutia na paquiohua nia numuecuaji. ⁶ Niaa jaara na tiuquitarohua nia tiajiniohua, niaari nia rupueña, mariyata nia shuriucua quiniaa rerejotenutaniya nia sequenura nojori: “¿Cuata nia shuquiriri quiarija! ¡Tari riuriatarohua cua borregonioyujua tashucuanonijia!” ⁷ Seetanujuanaa nia sequeyanija, naajaariuhuaj, jiyocuaanu quiniaari jiyanoohua shuquiritiquiaa niquiriyatu sesa miijia jaara noojia tacatore sesa na miiniujiniji. Cuno pueyanoori socua jyanohua shuquiritiasano tamasaca noventa y nueve pueyajiniji, canapuetucuaa tari maninia pueyacuani.

Jesu pohuatasano miriqui juurequetesano cumaneejiniji

⁸ Naajuhuaj, tamonu maaji jaara diez cumaneecaraca quiri, jaara niquiriyatu juurequetera tiajiniaaco, ¿maatucua taa miirini? Na samaritiu nohitiniutianiyari, na tia na netoonujunura. Pueyaracaanu jacaria na pajenutaniyari cuaara na riuriatareajaatiija. ⁹ Na riuriatasacari na juurequetesano cumanee, maajiiri na rupueña, mariyata na shuriucua quiniaa maajipohua rerejotenutaniya na sequenura nojori: “¡Miji nia nimia! ¡Cuata nia shuquiriri! ¡Tari riuriatarohua cua juurequetesano cumaneenijia!” ¹⁰ Seetanujuanaa nia sequeyanija, jiyocuaanu Pueyaso seyari nia shuquiriquiaajuhuaj sesa miijia jaara noojia tacatore sesa na miiniujiniji.

Jesu pohuatasano taa tamonu pueyano jiyanooquiaari neyanuni

¹¹ Na nuhuaji, Jesuuri nio pohuatareejuhuaj:

—Tamonu pueyanoori caapiqui niyanuraca quiquiaari. ¹² Socua naatuujaari na que sequeree: “Cua quena, quiarija cua niqitioie quia jiitiasanojiniji, quiria quiriquiano quiaa jaara shaajeyare”. Naacujitij, na

queeri puetunu na jiitiasanojuanaa niqutiojoree necohua. ¹³ Socua naatujuuari rupaquijia camueenujuquiaari na que tiajinia. Na nuhuaji, puetunu na que niqutiosanojuanaa nojuajani, nojuajaari saniniuujia tamasa na niqutiojoree na cumaneecara. Na nuhuaji, na cumaneeca quiaquiaari tucuaaanuuri, tamonu jiyajinia. Cuniqiu, puetunu na cumaneecajanaa puecaquiaariiri sesa na miiniutia. ¹⁴ Nojuaja jaara puetunu na cumaneeca puecaquiaarijanaa, cuno jiyajiniaari jiyanohua miaajesacari quiquiaari. Mashajaari juhuacatecara miaajequiaari. ¹⁵ Cunora quiaaree tamonu tahueca cuno jiyajiniaari, nera na poonijonura. Cuno tahueri na jiyaroree na cuhuariquiajinia na cushiyya na cojuanura. ¹⁶ Mashajaari cushiyya miaquesano miaquenu paniriquiaa juucua na miaajenuta. Cunoori tamaatia purootu cocua quiquiaari. Majaari tamonu pueyano niqutionu quijia quenaaja na miaquesocoriguiano. ¹⁷ Na nuhuaji, tama sequerejaarijia: “Cua queeri queraatia na tiajiniaaco seyaraca. Nojoriiri maninia miaquenuquiaa taquiya. Nojori sumatuuri cureequiaajuhua. ¿Janiyarijiataj? ¡Janiyari niya quera cusoya cua miaajenutani! ¹⁸ ¡Cua queecua tacateyarohuaraj! Janiyacua na sequesuhuan: ‘Cua quena, janiyari Pueyaso miiquianu sesani. Janiyari sesa miiquianu quiajanijuhua. ¹⁹ Majaari socua cua sequenu quia niyanuta. Janiyari puera sesa miijiani. Cua jiyatere juhuari juhua quia seru cua quiniuria, quiaara cua poonijonura’”. ²⁰ Naa na niishiriojonu nuhuajitij, mashajaari quiaquiaariuhua na queecua.

“Tucuaaanu na quishacarijia na que tiajiniji, na queeri na niqiriiri. Nocua taraajereeri. Nocua neteyareeri na naacunura. Na cacaseeri. Na nujuunequerejaariuhua. ²¹ Neyanuuri na que sequere: “Cua quena, janiyari sesa miiquianu Pueyasoni, quiajanianio. Majaari cua sequenu quia niyanuta”. ²² Na queeri saaja na tiaco seya sequere: “¡Ritia! ¡Socua maniniuqui toque miji nia riquioo! ¡Niocua quiyanu cushitirinioj! ¡Jaaniisho nia cushitiri! ¡Sapato nia cushitirijuhua! ²³ Pa riutianishano juunu niqiojua nia quiaaco mosocoriguiano. Quiarijia pa queranacure. Pocua miaquenuureni, quiyanu pa shuquiritasacari. ²⁴ Nio quiyanuniojuuari juhua macu quiriquiaa. Quiarijia samiitiarohuari. Nojuajaari shaajequiaari. ¡Tari pocua muetarohuari!” Naacuajitij, nojoriiri juhuacatecara queranacuaquiaari.

²⁵ Jiyacaritij, jiyapueranuuri cuhuariquiajinia quiriquiaa. Na tacate-sacariuhua tiajiniohuara, jaara tari cateca quiriquiaa, saaja pueya tojiriiri jaaguequenuyanoori, nianujuniuyanonio. ²⁶ Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” ²⁷ Seruuri na riuquaree: “Quia nuhuajishanacuaa tari tiuquiorhuano. Quia queeri shuquiriaatia quia maninia na tiuquishacariuhua, maja cusos. Naaratej, canaa sequereeri querasapiquia juunu niqiojua canaa monura”. ²⁸ Jiyacaritij, jiyapueranuuri jiyanohua juaaqui. Majaari tiajinia na tiuquiniu paniniu quiriquiaa. Nocuai na queeri nocua tohuatamaa carijiniacuma, na nenecojonura tiajinia na tiuquiniuria. ²⁹ Na que sequere saajaari: “Quiaacuajaari niishiyya, janiyari pueyaracaanu poonijioquiaa quiarani. Majaari quenaaja cua tarijonu quiquiaa quiajaninya. Naa maninia tojjia cua quishacari quiajaniyatej, ¡majaari quia niqutionu quiquiaari janiya quenaaja niquiriyatu cabraniojua, cua queranacunura cua rupenaata! ³⁰ Quiarijia saniniuujia, quia niyanu seque tiuquishacariuhua, ¡quiaari querasapiquia juunu niqiojua moree nera! ¡Nojuajaari quia cumaneeca puecakanu paanaturicua!” ³¹ Na queeri na sequere: “Sana-janaa, quiaari pueyaracaanu cuata quia. Puetunu cua jiitiasanojuanaari quia casa. ³² Naajaa, quiarijiani, maninia pa queranacure. Shuquiriaatia

pa quirij. Quia tarajanuuri juhua macu quiriquiaa tari. Quiarijia samiitiarohua pajaniyaraari. Nojuajaari juhua tashucuacanu pocuaji. Quiarijia pocua muetarohuari”.

16

Miriqui Jesu pahuatasano pueyanojiniji, cante na jiyaniijia cumaneeca riutocofuani

¹ Jesuuri na pueya pahuataquiaari nio miriqui pahuatasanojuhuaj, nojori na niishitiojonura:

—Tamonu casamiriaca pueyanoori tamonu pueyano jiiitiaja na casami cojuariquiano, na cumaneecano. Tamasaca pueyari cuno camarnu pahuataree na seruna na cumaneeca riutocoriquiaa jiyasohuaja, tama nerajaaja.

² Cunora, jiyaniijiaari cuno na seru sequeree: “¿Taa quia miiquiaa janiyani? ¡Quiaana sesa miiquiaa! Quiarijia cua niquitiore quia naajiotasano puetunu quia miishanojinijianaa. Majaari socua quia quiniu quiniutianiya cua casami cojuana”. ³ Cunora, cumaneeca cojuanaari niishiriojoquee. Tama sequereejaarija: “¿Taa cua miiniutianiyarini cua jiyaniijia jaara cua jatare cua poonijiosanojiniji? Janiyari maja cumueecani, cuhuariquiajinia cua poonijionura. Naajuhuj, jiyanoehua cararaatiaari quiria, pueyajiniji nareja cua mashiniquijionura cua panishano. ⁴ ¡Jaj! Tari niishiquiniijia taa cua miiniutianiyani tamasaaca taraajenura cucua, nojori masuunura janiya nojori tiajinia cua quiniuria, janiya jaara nio poonijiosanojiniji jatasaareni”.

⁵ Naaratej, nojuajaari naa miiquiaari. Juhucatecara sequequiaari pueyari, nojori nijionura nocua, canapue na jiyaniijia niqutiojoquiaari casamicuajani. Coteenu tiuquinia pueyano nequesotareeri: “¿Casaa cua jiyaniijia niqutiojocanu quiajaniyani?” ⁶ Pueyanoori na riucaare: “Cua niqutiojocanu cien pataocua mishaja shiyocuan”. Cumaneeca cojuanaari na sequeree: “Ritia quia cajiri. Niya quiya quia masesano casamijiniji naajiotasano. Tamonu quiarinio quia miiri. Quia naajiotare saaja cincuenta pataocua mishaja shiyocua”. ⁷ Na nuhuaji, tamonu pueyano nequesotareeri: “¿Quia-janiyarihuaj? ¿Casaa cua jiyaniijia niqutiojocanu quiajaniyani?” Na riucaareeri: “Cua niqutiojocanu cien canaasatu mishaja trigoni”. Cumaneeca cojuanaari na sequeree: “Niya quiya quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”.

⁸ Na jiyaniijia jaara niishiquiaari sesa na seru miishano, na sequereeri: “¡Quiaaquí jiyanoehua niishijia tama quia cuaqueyajaaja quia cojuanura!”
⁹ Seetanujuanaa pueyanaa, Pueyaso niishiyashijiaca pueyari socua jiyanoehua niishijiaca cuhuashiqui quijiaca pueyajiniji. Nojori cutaraari niishijia maninia nojori miiniuria narta pueya, pueya paniniuria saniniuuja nojori.

⁹ Naarate nia nacasuyanijia, naa capora nia quirijihuaj, maninia nia miiniuria pueya. Maja nia casami nia jamuenu. Cunocuaajaari nareja Pueyaso niquitiosano nijaniya. Naacuajitij, capora nia quishacari mijiria jaara puequema, nia Jiyaniijiaari nia tiuquinitianuniya pueyaracaanu quishaqui jiyocuacaanu, jiyanoehua na shuquiritiasacari nijaniya.

¹⁰ Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuana na jiyatenutianiya. Saniniuuja, cante jiyatesaare secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohuaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniyajaarihuaj. ¹¹ Naajuhuj,

niaa jaara maninia jiiitiaaquiuaa mijiria casami, Pueyasoori niaacua tiuyaquiniutianiya seetanujuanaa maninia jiyocuacaanuji casami nia jiiitiana. ¹² Naacujitij, niaa jaara tamonu pueyano casami cojuaaquiuaa maninia, ¿Pueyasotucua taa niquitiore niarano na riuriotacani? Maja cutaraari nia niqutiosaanu quiniutianiya.

¹³ Poonitijiosano pueyanoori maja na naata caapiqui jiyaniijiaraca poonijionu. Jaara caapiqui jiyaniijiaraca quiri, tamonu samiritiaari, na panishacari tamonu. Naajuhuj, niquiriyatu jiyaniijia tojjia quiniutianiya maniniaari, na soosacari tamonu. Naajuhuj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijiotesaanutaniya saaja. Naacujitij, Pueyasoori maja na naata nia poonitijionu nera.

¹⁴ Fariseocuaacari jiyanoohua cumaneeca panijiaa quijia. Naaratej, nojori tojjishacari Jesu sequesano, nojoriiri saaja na rerequeteree. ¹⁵ Jesuuri nojori sequeree:

—Niaacuajaari tama nia cuaqueyajaaja jiyatequiaa sapuenu pueyano maniniu nia niqushaanura. Pueyasocuaajaari nioojia niishiya. Niaari pueya jiyajenetequiaa nojori jyanishacari niaari Pueyaso panishano cutara, queraatia casami nia jiiitiasacari. Saniniuujia, casaa pueya jiyatequiaa socua jyanohua na panishanorani, Pueyasoori cuno soya cutara.

Moisés Rootasanoori coteenu quiquiaari, quiarijia quiya cutaraari quiarinio Pueyaso Rupaa

¹⁶ Moisés Rootasano, mariyata puetunu tariucuaaanu Pueyaso sequenu panishano caminiujiuniaa pohuatasanojuanaari pueya tojjitiasocoriquiano quiquiaari, Tiuquinijiona Juan pohuatasanojuhuaj. Quiarijia saniniuujia, maninia rupaa Pueyasojinijiri pohuatasaaquiuaa, taa Pueyaso jiyanooniu paniya pueyani, na muerasu nojori quiniuria. Quiarijiani, puetunu pueyanaari jyanohua saniniuujia Pueyaso muerasu nojori quiniuria.

¹⁷ Nio jiyari shaajeriquiano, jiya cajiniocuanio. Saniniuujia, tariucuaaanu pueyara Pueyaso sequesano caminiujiuniaa pohuatasano cutaraari maja na shaajenu quiniutianiya quenaaja.

Jesu niishitijosano, pueyano carteyaquiniuria necocua
(Mt 19.1-12; Mr 10.1-12)

¹⁸ Pueyano jaara necocua cartere tamonu maajitia na caminiuria, cuno pueyanoori jyanohua sesa miya Pueyaso niquiara. Naajuhuj, cante cartesano maajitia camiyani, cunoori sesa miyajuhuj.

Jesu pohuatasano casamiriaca pueyanojiniji, Lázarojinijinio

¹⁹ Casamiriaca pueyanoori quiquiaari. Jyanohua maniniuqui toqueya cushiyojuaari, juhua jiyaniijianucua toqueya. Jyanohua na shuquiriniutia, puetunu juucajananaa queranacujuhuaari. ²⁰ Jiyacaritij, casamiiju pueyanoori quijiajuhuaj. Jyanohua sapueyaraca. Nojuajaari cuno casamiriaca pueyano tia tohuatayaji niojotasano puetunu juucajanana. Na sesaari quijia Lázaro. ²¹ Nojuajaari casamiriaca miaquejajiniji totinijiosano raacua miaquenu panijia juucua. Saaja sareyari na sapueya rimianacunuujuua. ²² Na nuhuaji, cuno casamiiju pueyanoori cusoquiaari. Pueyaso seyari na riqiiaari supuetana Abrahamta na quiniuria, Pueyaso muerasurano shanohua quiquiojinia. Cuno casamiriaca pueyanoori cusoquiaarijuhuaj. Jamosaquiiaariiri. ²³ Sesa miijiacarano quiquiojinia na quishacari, naquiya na miishacari tii, nojuajaari mauquiaari. Cuniqiji tucuaaanu niqiriiri Lázaroori, shuquiriaatia quiyano supuetana Abrahamta. ²⁴ Casamiriaca pueyanoori nacaree: “¡Cua supuetana Abrahamnaa, cucua quia taraajere

quenaaja! ¡Lázaro quia jiyarore cucua! ¡Cuaara na juaashiquia nacatu shiiria mohuacajinia! ¡Cua niti shiniajaquee quenaajacua! ¡janiyari puera jiyanhua naquiya miya nio manijiniani!”²⁵ Abrahamri saaja na riucaaree: “Sanajanaa, quia niishiri taa jiyanhua maninia quia quiquiaarini, pueyaraanu jiyocua quia quishacari. Lázaroori saniniuujia jiyanhua taraatia quiquiaari pueyaraanu, jiyocua na quishacari. Lázaroori quiaritia niya cumanijiashiya. Quiaari saniniuujia naquiya miishiyacujua.”²⁶ Naajuhuaaj, jiyanhua tucuaa tacoori pa tajinia quia. Cunora, cante niiquiji niuuniu paniya cuniquijiria quocuani, majaari na naata. Naajuhuaaj, cante quia quiquojiniji niuuniu paniya niiquijiriani, majaari na naatajuhuaaj.”²⁷ Casamiriaca pueyanoori supuetana Abraham sequerohuacuhuaaj: “Naa naasucuaaj cua supuetana Abrahamnaa. Naajaa, quia secojijianijia, Lázaro quia jiyarorohua cua que tiajinia.”²⁸ Tii quiyajaari cua tapueyocua. Cinco tarajanuhuaracanjia. Lázaro cuaara nojori numooteera, maja nojori quejoosaanurajuhua nio saniitiosaqui quiquojinia.”²⁹ Abrahamri na riucaaree: “Nojoricuajaari Moisés Rootasano jiitiaa, puetunu Pueyaso sequesano caminiujiunaa naajiotasanojuanaanio. Quia tapueyocua cuaara tojitiaara cuno.”³⁰ Casamiriaca pueyanoori riucaaree: “Naa naasucuatuhuaaj, cua supuetana Abrahamnaa. Naajaa, tamonu pueyano macunucuaajinijinio jaara muetarohua nojoriicua, nojoriiri noojia tacatonutaniya sesa nojori miiniujiniji.”³¹ Abrahamri saaja na riucaaree: “Nojori jaara Moisés Rootasano tojitianu paniyaquiquiaa, Pueyaso sequesano caminiujiunaa naajionuutasanonio, majaari nojori tojitianu quiniutianiyajuhuaaj, macu pueyano jaara samitiarohua”.

17

Puereetaari quiniutianiya sesa miijiacara (Mt 18.6-7, 21-22; Mr 9.42)

¹ Na nuhuaji, Jesuuri na pueya sequequiaari:

—Mijiria, pueyari pueyaraanu sesa miitishaaquiaa. Jiyanhua taraatia quijiaari cuno, cante sesa miitirii tamonuni.² Jiyano pueyanoratej, maara socua maninia quiri nera, puereetuca saajia jaara na riquiajiniji morotasaare, shoniniacu caminia jiuujiajinia jartasocoriquiano. Jaara naa miishaaretej, maara maninia quiri, maja sesa miijiaara na jiyatenura niquiriyatu nio muerasuniyojuajinijinio.³ Cunora, tama nia cuaqueyajaaja nia cojuare maja quenaaja sesa nia miitiniuria pueya.

’Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniucua quiajaniya, quia jiyanoorinioj.⁴ Nojuaja jaara sequeyarucua sesa miya quiajaniya niquiriyatu juuca, naajaa, quia jiyanooriquia, nojuaja jaara quia sequere: “Sesa miirii quiajaniyanijia. Cua jiyanoori quenaaja”. Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooni.

Pueyasocua tiuujia pueyanoori jiyanhua cumaacaraca

⁵ Jesu saquiriojosano pueyari Jesu sequequiaari:

—Jiyaniijianaa, socua jiyanhua canaa quia tiuutiri Pueyasocua, socua cumaaca canaa jiitianura.

⁶ Jiyaniijia Jesuuri nojori riucaaree:

—Pueyasocua nia tiuuniu jaara quiri quenaaja juhua mostaza jajauniyocua, jiyanhua shiitianiyojua, nia jaara nio satuna jiyona sequere: “Niiquiji quia pacure. Moojinia quia nujuasee”, maara nia sequesano tojiri.

Pueyasora poonijionatucua taa miijia quiriqianij

7 Níaa jaara seruraca quiriquia, nojuaja jaara tiajinia tiuquiriohua quia cuhuariquiajiniji tee na namitiariquiaacuajani, quia seya cojuanujiniji soj, ¿niaatucua na sequere: “Miji, quia miaquesuhua?” 8 Majaruhua. Níaaari saaja na sequenutaniya: “¿Quiria quia sumate! Cua mianuutere coteenu. Cua raaterejuhuaj. Cua miaquenu nuhuaji, quiocua saniniuujia miaquerohua. Quiocua raturohuajuhuj”. 9 Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa “paacarasho”? ¡Maja! 10 Naajuhuj, níaa jaara puetunu Pueyaso sequesanojuanaa miiri, tama nia sequerejaaja: “Janiyari maja maninia seruni. Majaari tama cua niishitiajinijijiaaja cua miiniu quiquiaa cua Jiyaniijara. Janiyari saaja pueyaracaanu paniquiaa cucua na tequejonura juhua naatujuaacuani”.

Jesu naatanijosacari diez pueya, lepraraca cusosuhua

11 Jesuuri Jerusalén tiacajiniara na pueyata quiariquiaacuhuj. Jiyacari, Galilea jiya, Samaria jiya tajiniaaco quiariquiaari. 12 Quera na tiuquishacari shiitianiyojua tiacajinia, diez pueya lepraraca cusosuhuari na naacuquiaari. Nojoriiri tucuaaanujijia Jesuucujaji nujuatusee. 13 Nojoriiri Jesuucua nacaree:

—¡Niishitiojona Jesunaa, canaacua quia taraajere!

14 Jesu niquishacari nojori, nojori sequereeri:

—Nia cuaqueya nia niqitishii pueyacuara secojona, taa supuetana Moisés sequequiaaricuajani.

Nojori canujuucuatucarajia, nojori cusuuri shaajequee. 15 Tamonu nojorijinijinio niquishacari na cuaqueya tari cushiriiqui, nojuajaari Jesuucua tacateyarohua. Nojuajaari na rupaa paaretariquiaa na maniniuuaqueetasacari Pueyaso. 16 Jesu cariquimijaji mojuquetaseeri. Jiyocuara naniriiri. Jesu sequereeri: “¡Paacarasho Jesunaa!” Cuno pueyanoori Samaria jiyajinjinio tahue quiquiaari. 17 Jesuuri na pueya niqiarua naa sequere:

—¿Majateeri diez cusosuhua naatanijosaanu quiri? ¿Teeteeri narta naat-
aconohua nueve pueyani? 18 ¿Saaja nio tahueteeri tacaterohua Pueyaso na maniniuuaqueetanura?

19 Na nuhuaji, Jesuuri cuno tahue sequereeri:

—Quia sanere. Quia quiaarohua. Quiaacuaja naatarohua cucua quia tiuuniucua.

Taa na quiniutianiyani, Jiyaniijia Cristo tiuquishacariuhua (Mt 24.23-28, 36-41)

20 Fariseocuacaari Jesu nequesotaquiaari taacari Pueyaso Jiyarosocoriquiano niniutianiya jiyaniijara na quiniuria mijiriani. Jesuuri nojori riucuaaree saaja:

—Pueyaso Jiyarosano jiiitasacari na muerasu, majaari namijiata niquis-
hano. 21 Majaari na naata sequesaanu: “Niya quia pa Jiyaniijia quiquio”,
“Jati quiyaruhua”. Pueyasocujajari tari niya jiiitia na muerasu nia tajinia.

22 Na nuhuaji, Jesuuri tama na pueyajaja sequequiaari:

—Na nuhuaji, taraatia quishacariiri quiniutianiya. Níaaari cua niquiniu-
ucua jiaatiantutaniya niaata cua quiniuria rupaquijia, taa niaata cua quia
quiarijiacuaani. Majaari nia niquiniu quiniutianiya janiya. 23 Tamasacaari
nia sequenutaniya: “¡Niya quiyacuaja nia Jiyaniijia!” Tamasacaari sanini-
uujia sequenutaniyacujua: “¡Nooj, jati quiyatej!” Majaari nia tojinu
jityano pueyatej, nojori jaara naa nia sequeriquia. Majaari nojori netey-
otanu najuhuanaj. 24 Mijiria cua tacatasacariuhua, cuno juuca, jani-
yari niquishaanutaniyani, naatej, taa miacana puetunu jiya cajiniocua-
janaa niquishaacuaacuani na nunujusacari. 25 Saniniuujia, mijiria cua

quishacarijia, janiyari coteenu jiyano hua na quiya miishaanutaniyani. Nio pa quishacari pueyari cua paniyaquiniutianiya. ²⁶ Quera cua tiuquiniu panishacariuhua mijiria, naa quiniutianiyari taa mijiria quiniaa pueya quiquiaaricuaa supuetana Noé quishacarini. ²⁷ Naa quiquiaariiri cuno quishacari. Mijiria quiniaa pueyari juhuajaniya miaquenuujua. Raruujuaari. Juhuajaniya maaji camiojuaari. Pueyari necojori camiyoteja. Pueyari naa juhuajaniya miijioriquiaa Noé jaara tiuquitiaquiaari na puereetuca buquejinia. Canashiyaquiji, maruuri jiyano hua ni quiaari. Puetunu mijiria quiniaajanaari cusuquiquiaari pajaacajinia. ²⁸ Naa quiquiaarijuhua supuetana Lot quishacari Sodoma tiacajinia. Cuno pueyari juhuajaniya miaquenuujua. Raruujuaari. Casami masejojuaari. Juhuajaniya na casami niqitiojuaari. Na cuhuariquiaa natojuaari. Na tiacara tiajojuaariuhua. ²⁹ Naa juhuajaniya nojori quishacaritij, Lotri tohuataquiaari Sodoma tiacajiniji. Jiyacaritij, maniiri asufreta cojitishano juhua maru ni quiaari jiyocuaanu. Puetunu cuno sesa miijiacajanaari manijinia catequiaari. ³⁰ Naa quiniutianiyajariuhua quera jiya puequesacari. Pueyari juhuajaniya quiniutianiya. Janiyari jiyacari canashiyaquiji tiuquiniutianiuhani.

³¹ Cuno juuca, pueyano jaara na tia cacojiria quiya, cuaara roseyaquiiira na casamiicua tiajiniaaco. Naajuhaaj, pueyano jaara na cuhuariquiajinia quiya, nojuaja cuaara tacateyaquihuara na tiajinia. ³² Nia niishiriquia supuetana Lot ni quiocua. Na mashishacari, nojuajaari ritia cusoquiaari na nijiniara na ni quiniuucua, na casamiicua na taraajesacari. ³³ Cante saaja shuqiriaatia mijiria na quiniuria niishiriojuaari, nojuajaari na nuhaaji jiyano hua taraatia quiniutianiya Pueyasooju. Saniniuujia, cante tama na cuaqueyajaaja panitija cua tojijiara na quiniuriani, nojuajaari pueyaraaanu shuqiriaatia quijiara jiyatesaanutaniya.

³⁴ Cua tojiri. Cuno niucajuhaaj, caapiqui pueya jiuiriatoosacari juuca na maquetujinia, niquiriyatujuaari rishaanutaniya jiyocuaaanura, Pueyaso pueyano na quiniuucua. Tamonuuri tiujiasaanutaniya saniitiosocoriguiano. ³⁵ Cuno juucajuhaaj, caapiqui maajipohua ri quiniushacari jatiqui juucua, cucua tiuujiaari tarajanu shuriucuaaji rishaanutaniya. Tamonuuri tiujiasaanutaniya saniitiosocoriguiano. ³⁶ Caapiqui pueya quishacari cuhuariquiajinia, cua pueyanoori rishaanutaniya. Tamonuuri tiujiasaanutaniya saniitiosocoriguiano.

³⁷ Jesu pueya tojishacari naa Jesu sequesantej, nojoriiri na nequesotaree:

—¿Tee nio quia pahuatasano ni quishaanutaniyarini?

Jesuuri nojori riucaree miriqui:

—Tee casaa moqueyani, mohuari tii rerejiya.

Naajuhaaj, majaari quenaaja niquiriyatu Pueyaso tojiyashijia cureenu quiniutianiya saniitiosoo.

18

Jesu pahuatasano mashiquiojiniji, pueya nequesoreena pueyanojinijinio

¹ Jesuuri na pueya pahuataquiaari nio miriqui pahuatasano nojori na niishitiojonura, nojori cuaara Pueyaso secojora pueyaracaanu, nojori taanuyaquiniutia. ² Naa nojori sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia quijiaari, pueya rerequetejanio. ³ Cuno tiacajiniaja tamonu mashiquioori quiquiaarijuhaaj. Mashiquioori cuno nequesoreenaacua rucanejojua pueyaracaanu. Na secojojuaari sesa na miinia pueyano

cuaara na niqutiohuara na casaa saniniuujia, sesa na miishanojiniji nojuaja. ⁴ Majaari nequesoreena tojiniu paniniu quijia pueyaracaanu cuno mashiquio. Naajaa, pueyaracaanu nocua na rucuanajosacari, cuno nequesoreenaari socua tama sequequiaarijaa: “Janiyari maja Pueyaso puerejani. Janiyari pueya tojiyashijia cutarani. ⁵ Naajaa, naa nio mashiquio taajetesacari janiya pueyaracaanutej, janiyari quiarijia na panishano miiniutianiya nerani, mariqui cua juaatijiore pueyaracaanuuri na nenecojosacari janiya”.

⁶ Maninia na pueya niishiniuria na pahuatasano, Jiyaniijia Jesuuri naa nojori sequerohuacuhuj:

—Naa miiquiaariiri, cuno pueya nequesoreena seque. Jiyanojua pueya rerequeteja quiquiaariiri, naajaa, nojuajaari maninia miiquiaari cuno mashiquiora. ⁷ ¿Nia que Pueyasoarijataj? ¿Niaateeri jiyaniya maja nojuaja tojiniu quiniutianiya na muerasu, canapute na secojoquiaani juuca, niucuanio? ¿Pueyasoteeri nia sashitiniutianiyajaa? ¡Maja! ⁸ Nojuajaari maja na tarishiniu quiniutianiya. Ritia nia naacunutaniyari sesa nia miijiaa pueyacuaji. Sesa nia miijiaaari namishaanutaniya niaacua. Naaratej, majaari secojonu nia tarinitianu. Mijiria cua tiuquishacariuhua, ¿janiyate Pueyasoocua tiuujiaa riuritanutaniya naa pueyaracaanu secojonuujua-cani?

Jesu pahuatasano miriqui Fariseo pueyanojiniji, Romano jiyaniijara cumaneeca masejojuajinijinio

⁹ Jesuuri socua nio miriqui pahuatasano pahuataquiaari noo pueya niqiuara, canapute tama na cuaqueyajaaja jiyaniijiani nojoriiri maninia pueyano. Naacuaajitij, nojoriiri tamasaca pueya soojea, nojori jyanishacari cuno pueyari socua sesa miijiaa nojorijiniji. Cunora, Jesuuri nojori niqiuara naa pahuataquiaari:

¹⁰ —Fariseo pueyanoori quiaquiaari Pueyaso Secojoua tiajinia na secojonura Pueyaso. Jiyacaritij, Romano jiyaniijara cumaneeca masejojuua pueyanoori quiaquiaari Pueyaso na secojonura tiijuhuj.

¹¹ Fariseo pueyanoori nujuariquiaa Pueyaso na secojosacari. Naa sequeriquiaari: “Pueyasonaa, paacarasho janiyari maja juhua tamasaca pueyani. Tamasaca cutaraari nohuasenuujuaca, sesa miijiaa, maaji porocuajuhuaj. Naajuhuj, shuquiriaatia quiyaniija, janiyari maja sesa miijiani juhua nio pueyanouja niya cuata secojiyani, cumaneeca masejona pueyanoni. ¹² Janiyari caapiqui juuca miaqueyaquiquiaani puetunu semaanajanaa cua shuquiritiniuria quiajaniya. Naajuhuj, janiyari pueyaracaanu puetunu cua masesanoinijijianaa niqutioquiaa quiarani, taa Moises rootaquiaaricujani”.

¹³ Cumaneeca masejonaari saniniuujia tucuaaanuji nujuasee. Na secojosacari, majaari quenaaja na maunu quiriquiaa jiyocuaanu. Tama nojuajaari na jiriquia piquiriquiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. ¡Cua jiyanoori! ¡Sesa miijianijia!” Naa secojoquiaariiri.

¹⁴ Seetanujuanaa nia sequeyanijia, cumaneeca masejonaari Pueyaso jiyanooshano tacateyarohua cutara. Fariseo pueyanoori saniniuujia jiyanoaquishoo tacateyarohucujua. Naacuaajitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararasaanutaniya. Saniniuujia, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuanaa sesa miyaquijia na quiniuria.

Jesu niasacari na juaashiquia conaajaacua
(Mt 19.13-15; Mr 10.13-16)

¹⁵ Jiyacaritij, conaajaari poosaariquiaa Jesuucua, Jesu nianura nojoriicua na juaashiquia, Pueyaso jitianura maninia nojori. Jesu saquiriojosano pueya jaara niquiquiaari conaaja pooshiyano Jesuucua, nojoriiri na poonaa juarii. ¹⁶ Jesuuri saaja conaaja poonaa sequeree, conaaja cuara nocua poosaaria. Na nuhuaji, na pueya sequereeri:

—Naatujoori cuara poosaaria cucua. Maja na poonaa tenujunu. Cante Pueyaso muerasura quiniu paniyani, nojori cuara jiyateera tama na cuaqueyajaaja juhua nio naatujooriria. ¹⁷ Seetanujuanaa nia sequeyanijia, cante tama na cuaqueyajaaja jiyateyaquiya juhua naatujooriria Pueyaso ru-paacua na tiuuniuriani, cuno pueyanoori maja na naata Pueyaso muerasura na quiniu.

Casamiriaca pueyano pocoojosacari Jesuta
(Mt 19.16-30; Mr 10.17-31)

¹⁸ Tamonu Judiocuaca camarnuuri Jesu nequesotaquiaari:

—Maninia niishitiojonanaa, ¿taa cua miiniutianiyani, jiya puequesacari cua samiitianishaanura, pueyaracaanu quijiara cua quiniuria Pueyasotani?

¹⁹ Jesuuri na riucaaree:

—¿Casaara quia sequeya janiya maninia pueyanotani? Saaja Pueyaso cutaraari seetanujuanaa maninia. Majaari socua tamonu quiniu.

²⁰ Pueyanonaa, quiaacuajaari Moisés Rootasano niishijia. Naa naajiotasanocujaari quiya: “Maja quia camishoo maaji numuetucunu. Maja monu. Maja nohuasenu. Maja tamonuucua saquiriojotanu quia sapojonuta. Quia que, quia nucua tojjia quia quiri”.

²¹ Pueyanoori Jesu riucaaree:

—Janiyacuajaari cua naatujuaajiniji puetunu cuno tojjiajanaani.

²² Naa na sequesacaritij, Jesuuri na sequeree:

—Quiyajaari niquiriyatu casaa quia miishoojua. Nio quia miiri: puetunu quia jitiiasanojuanaa quia niquitiojore cumaneecara. Na nuhuaji, casamijiuniucua pueya cuno cumaneeca quia niquitiojore nareja. Naacuajitij, quiaari jiyanhua casamiriaca quiniutianiya cutara jiyocuacaanu. Na nuhuaji, quiocua nimiohua cutara, cua pueyano quia quiniuria.

²³ Na tojishacari Jesu sequesano, nojuajaari jiyanhua taraajeeque, jiyanhua queraatia casamiriaca na quishacari. ²⁴ Jesu niquishacari nojuaja taraajeyano, Jesuuri na pueya sequeree:

—Casamiriaca pueyara, jiyanhua jiyajenetaari Pueyaso muerasu nojori quiniuria. ²⁵ ¿Camelloteeri na naata cusupuetaja cuhuoco tamajiria tajiniu? Maja na naata. Naajuhuj, casamiriaca pueyanora, socua jiyanhua jiyajenetaari Pueyaso muerasu na jatanishaanura.

²⁶ Pueya tojishacari naa Jesu sequesantej, nojoriiri naa na nequesotaree:

—¿Canteeri Pueyaso muerasura quiniutianianitioj?

²⁷ Jesuuri nojori riucaaree:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

²⁸ Pedroori Jesu sequeree:

—Jiyaniijianaa, ¿canaarijiataj? Canaari puetunu canaa jitiiasanojuanaa tiujiaquiaarini canaa nuhuajiniuria quiajaniya.

²⁹ Jesuuri na riucaaree:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanhua queraatia masenutaniya mijiria na quishacarijia. ³⁰ Na nuhuaji, samiitianishano quiniutianiyari

pueyaracaanu shuquiriaatia na quiniuria Pueyaso shipinishocoriqiano quiarinio jiyajinia.

Jesu pacutesacari pohuatanu, nojuaja mosaanutaniya
(Mt 20.17-19; Mr 10.32-34)

³¹ Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarijia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucuacaanu pueyara Pueyaso sequesano caminiujiunaa sequequiaaricuaaja janiyajinijini. ³² Naacuaajitij, janiyari tahua niqutiosaanutaniyani. Nojoriiri cua macaatiunianiya. Taraatia cua miitiunianiyari. Cua riocojotunutaniyani. ³³ Cua piqutiunianiyajaaruahuaj. Na nuhuaji, cua motunutaniyani. Naajaa, jiuujianaraca juucajinia, janiyari samiitianutaniuhuan.

³⁴ Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

Jesu jeeacasacari cariojuaru pueyano Jericó tiacajinia
(Mt 20.29-34; Mr 10.46-52)

³⁵ Na pueyata Jesu quishacari tari cateca Jericó tiacaacuara, cariojuaru pueyanoori nuu shuucuaaji cajiriquiaa, cumaneeca na masejonura pueya tajishacari nucuaco. ³⁶ Cariojuaru tojishacari queraatia pueya tajiiano, pueya nequesotareeri:

—¿Casaatejanojoni?

³⁷ Pueyari na sequeree:

—Nazaret tiacajinijinio Jesucuaaja tajiya.

³⁸ Cariojuaruuri nacaquee:

—¡Jesunaa! ¡Supuetana David niqiuohuacujinio supueno pueyanonaa! ¡Cucua quia taraajere quenaaja!

³⁹ Jesu puetanaa pueyari na juaarii na sanaajanura juucua. Nojuajaari saaja socua jiyanhua nacaree:

—¡Supuetana David niqiuohuacujinio supueno pueyanonaa! ¡Cucua quia taraajere!

⁴⁰ Jesu tojishacari nojuaja, nujuaseeri. Jesuuri pueya sequeree cariojuaru cuara jaatucusaaria nocua. Cariojuaru tiuquishacari nocua, Jesuuri na nequesotaree:

⁴¹ —¿Casaa quia paniya cua miiniuria quiajanianiyani?

Cariojuaruuri Jesu riucuaree:

—¡Jiyanijianaa, niqijijara quiniu paniuhuanijia!

⁴² Jesuuri na sequeree:

—¡Niqijijara quia quiriohua! Quia namijiacuaaja tari jeequerohua cucua quia tiuushacari.

⁴³ Jiyacaritij, cariojuaruuri maninia niqijijara quiqii. Jesu nuhuaji sacuaareeri na shuqiritianuta Pueyaso. Puetunu Jesu miishano niquniaa-janaari Pueyaso maniniuhuaqueetariquiaa.

19

Jesu pocoojosacari Zaqueota

¹ Jesuuri Jericó tiacajinia tiuquijioquiaari na pueyata. Tiaca jiuujiaaco quiariquiaari. ² Cuno tiacajinia quiquiaariiri casamiriaca pueyano. Na

sesa quiquiaari Zaqueo. Zaqueori Roma tiacajinia quijia jiyaniijiaara cumaneeca masejona camarnu quiquiaari. ³ Nojuajaari Jesu niishiniu panijia juucua. Majaari na naata niquniu quiriquiaa Jesu, puera jiyanoehua pueya quiniuucua Jesu shocua. Naajuhuj, Zaqueori puera posucuwashi quijia. ⁴ Cunora, Zaqueori netequiaari Jesu tajoji. Nuu shuucujaji sicómoro naanaacua macaseeri, maninia na niquniuria tiji Jesu, jaara cunoco tajimia. ⁵ Jesu tajishacari Zaqueo cariquiaco, Jesuuri nocua mauree. Na sequereeri: —Zaqueonaa, ¡ritia quia rosemohua! Janiya quiarjia quia tiajinia maquetunatiani.

⁶ Zaqueori ritia rosemohua. Jesu tiuquinitiaree na tiajiniaari jiyanoehua na shuquiriniutia. ⁷ Tamasaca pueya jaara Jesu niquiquiaari Zaqueo tiajinia tiuquiyano, puetunu nojorijianaari Jesu sesacanu coteequiaari. Tama sequeturiquiaajaarijia: “Cuno pueyanoori sesa mijia pueyano tiajinia tiuquishii”. ⁸ Na nuhuaji, Zaqueori nujuaree. Jesu sequereeri:

—Seetanujuaana quia sequeyanijia, Jiyaniijanaa, janiyari quiarjia quiocua tiuuriini. Naacujitij, janiyari casamijiuniucua nareja niqutiojonutaniya puetunu cua jiiiasano cajiniocuajiniijianaani. Naajuhuj, janiya jaara puera cumaneeca masecanu tamasaca pueyajiniji cua sapojonutani, janiyari nojori niqutionutanihua socua jiyanoehua queraatia cumaneecani cua nohuasesanojiniji nojori.

⁹ Jesuuri na sequeree pueya niquiara:

—¡Quiarjiani, nio tiajinia quiniaa pueyari tari jiyanooshaaree! Nio pueyanocuaajaari supuetana Abraham niqiohuacuajinio supuenojuhuj. Nojuajaari cucua tiuuri taa Abraham tiuquiaari Pueyasocuaacuaani. ¹⁰ Janiyacuajaari cunora mijiria niquiarini, tashucano pueya cua paenura, nojori cua jaariutianura Sesaaca.

*Miriqui Jesu pohuatasano diez cumaneecajiniji
(Mt 25.14-30)*

¹¹ Tii quiniaa pueyari Jesu pohuatasano tojtiariquiaa. Jesuuri tari cateca quiriquiaa Jerusalén tiacajiniji. Pueyari jiyaniriquiaa Jesuuri Israel pueya jiyaniijiaara quiniutianiya tari, Pueyaso muerasu na jiiitianura mijiria. Nocuj, Jesuuri nojori pohuataree nio miriqui pohuatasano, nojori na niishitiojonura. ¹² Naa nojori niquiara pohuatareeeri:

—Tamonu jiyanjia quiaquiaari niyanuuri quiquiaari. Nojuajaari tucuaaanu tamonu jiyanjia quiaquiaari jiyaniijiaara na jiyatesaanura. Jiyaniijiaara na jiyatesaanu nuhuaji, nojuajaari tacateriquianohua quiriquiaa, narta pueya jiyaniijia na quiniuria. ¹³ Na nuhuajiria, nojuajaari diez na seya sequeree nocua nojori nijionura. Nojuajaari puetunu nojorijianaa niqutiojoree niquiriyatu cumanee, orojiniji shipinishano. Nojori sequereeri: “Nio cumanee nia poonitijore, janiya cuaara tiuquiriohuajaatiinijia”. ¹⁴ Na nuhuaji quiaqueeri. Na jiyajinjio pueyari maja na niquniu paniniu quijia cuno pueyano. Cunora, nojoriiri pueya jiyaramiquirii na nuhuaji, jiyaniijiajanaa nojori sequenura: “Maja canaa paniniu cuno pueyano, canaa jiyaniijia na quiniuria”.

¹⁵ Naajaa, nojuajaari saaja jiyatesaaree jiyaniijia na quiniuria. Na nuhuaji, na jiyanjia tacateyarohuari. Jaara tiuquishuhua, na cumaneeca na niqutiojosano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiarini, nojori poonitijosacari na niqutiojosano cumaneeca. ¹⁶ Coteenu seruuri nocua nimiaa. Na jiyaniijia sequeereeri: “Cua jiyaniijanaa, cua poonitijosacari quia niqutiojosano cumanee janiya, janiyari socua diez cumaneeca reratecanuni”. ¹⁷ Na jiyaniijiaari na sequeree: “¡Maniniacuaja! ¡Quiaacuajaari maninia

cua seru! Quiaari secaja cua niqutiosano quiajaniya poonitijoriguiaa shitimia quiria. Naaratej, janiyari quia jiyatenutaniya diez tiaca jiyaniijia quia quiniuriani". ¹⁸ Na nuhuaji, tamonu na seruuri nocua nimiaajuhuaaj. Nojuajaari na jiyaniijia sequeree: "Cua jiyaniijianaa, cua poonitijosacari quia niqutiosano cumanee janiya, janiyari socua cinco cumaneeca reratecanuni". ¹⁹ Na jiyaniijiaari na sequereejuhuaaj: "Quiaari cinco tiaca jiyaniijia quiniutianiya".

²⁰ Na nuhuaji, tamonu na seruuri nocua nimiaajuhuaaj. Na jiyaniijia sequeseeri: "Jiyaniijianaa, niya quiya quia cumanee quia niqutiosano janiya. Janiyari na cojuacanu maniniani, togueraujinia jiuniososano. ²¹ Janiyari naa miquiianuni cua pueresacari quiajaniya. Janiyari niishiyani, quiaari quiarta pueyacia taraajeyashijia. Quiaari tamasaca racatasanojiniji poojua. Quiaari tamasaca natoosanojiniji senoojuajuhuaaj". ²² Na jiyaniijiaari na jaarii: "Sesaacanaa, tama quia sequesantajaaja janiyari quia nequesoreenutaniyani. ¿Naatee? ¿Quiaateeri niishiguijanu janiyari pueyacia taraajeyashijiani? ¿Janiyateeri tamasaca racatasanojiniji poojuani? ¿Janiyateeri tamasaca natoosanojiniji senoojuajuhuaaj? ²³ Quiaa jaara jiyaniquianu janiya naa miijiani, ¿casaara cua cumanee quia niqutiotyaquiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriatasuhuanu, cua tiajinia cua tiuquishacarihuua". ²⁴ Cunora, na jiyaniijiaari tii quiniaa pueya sequeree: "¿Cua cumanee nia jaariutiare cuno! Nia niqutiore cua maninia seru, cante diez cumaneeca jiiitaaquajani". ²⁵ Nojoriiri na sequeree: "Jiyaniijianaa, ¿casaarateni? Nojuacuaaja tari diez cumaneeca jiiitaa". ²⁶ Jiyaniijiaari saaja nojori riucuaare: "Seetanujuaanaa nia sequeyanijia, cante tari jiiitiani, nojuajaari socua niqutiosaanutaniya. Cante na jiiitaaquiyani, secaja na jiiitasanoori puetunujuaana jaariutiasaanutaniya, cucua tiuyashijia na quiniuucua. ²⁷ Quiarijia, cua paraa saniniuujia, cuno pojori canapuete cua paniyaquiquianu nojori jiyaniijia cua quiniuriani, miji nia jayore nojori. Niya cua niquiara nia puecoore cua ruuretajaca seque".

Jesu tiuquishacari Jerusalén tiacajinia
(Mt 21.1-11; Mr 11.1-11; Jn 12.12-19)

²⁸ Nio na pohuatanu nuhuaji, Jesuuri na pueya puetaareecuhuaaj Jerusalén tiacajiniara. ²⁹ Jaara cateca quiriqiaa tari Betfagé tiaca, Betania tiacanio, Olivo cuhuariquia tuhuananujuhuaaj, Jesuuri caapiqui na pueya sequeree:

³⁰ —Cuno shiitianiyojua tiacajinia nia quiaare, pa taccoji niqushiyani. Niaa jaara tiuquishii, niaari burro riuriatanutaniya morotasano, pueyano cajishoojua na nijinia. Niaa jaara na niqushii, niocua na samaacartasee. Niaari na jaatucumohua miji. ³¹ Pueya jaara nequesotare niajaniya casaara nia samaacartaanoj, niocua na riucuaare: "Jiyaniijia na paniya".

³² Jesu pueyari quiaaree. Nojoriiri na riuriatasee taa Jesu sequequiaaricuaajani. ³³ Nojori samaacartasacari burro, na camaruhuari nojori nequesotare:

—¿Casaara nia samaacartaa canaa burroni?

³⁴ Nojoriiri na riucuaaree:

—Jiyaniijia na paniya.

³⁵ Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijiara. Na nuhuaji, nojoriiri Jesu cajitirii na nijinia. ³⁶ Na quiasacari Jerusalén tiacajiniara, pueyari na toqueya muejoquiaari nucuaco Jesuucua. ³⁷ Nojori rosetanu panishacari

Olivo cuhuariquia tuhuananujiniji, puetunu Jesu pueyajanaari juhuacatecara nacoquiaari nojori shuquiriniutia. Nojoriiri Jesu maninuhuaqueetariquiaa puetunu na cumaacata na miishanojuanaa nojori niquiniuucua. Nojoriiri cunora jiyanohua shuquiritariquiaa Pueyaso. ³⁸ Nojoriiri naa nacooriguiaa:

—¡Pueyaso cuaara shuquiritiiria pa Jiyaniijia, Pueyaso Jiyarosano na quiniuucua! Pueyaso pocua taraajerohuani. Pa jiyanooriohuani. ¡Nojuajaari jiyanohua maninia! ¡Pa shuquiritiarenøj!

³⁹ Cuniqúi pueya tajinia quiniaa Fariseocuaca tojishacari naa nojori sequesantej, nojoriiri Jesu sequeree:

—¡Niishitiojonanaa, quia pueya quia sanaajare, maja naa nojori sequenura!

⁴⁰ Jesuuri saa sequereejaa:

—Seetanujuanaa nia sequeyanijia, nio pojori jaara sanaajetare, ¡sairi saniniuujia nacoanutaniyacujua!

⁴¹ Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quiniaacua nujuqueree. ⁴² Cunora, juhua pueyano sequeree Jerusalén tiacaari:

—Jerusalén tiacanaa, quia niishitiriquia quiarijiani, casaa quia paniya jiyanooshano quia quiniuriani, shuquiriaatia quia quiniuriajuhuaj. Taraatia quijianaa, quia Jiyanooriguianoori juucua niya quiya. Majaari quia niishiniu nojuaja, juhua nimishitiu quia quishacari. ⁴³ Cunora, na nuhuajiri jiyanohua taraatia quiniutianiya quiaara. Quia paraari quia mataconutaniya quia shocuaqueya, na cosenura maninia quiajaniya quia mashiyaquiniuu-cuaji. Naacuajitj, quia paraari quiocua juhuacunutaniya na miaquejonura quiajaniya. ⁴⁴ Quiaari jiyareta sureesaanutaniya. Quia tiacajinia quiniaari puecoosaanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia caco maano. Quiaari naa miishaanutaniyatej quia niishiyaquiniuucua, Pueyasoori quiocua niquiaari najuhuanaj, quiocuaji na tacunura juucua. Quiaari saaja na ruuretacanu.

Jesu jaacasacari seya niqutiojonaa Pueyaso Secojojua tiajiniji
(Mt 21.12-17; Mr 11.15-19; Jn 2.13-22)

⁴⁵ Na nuhuaji, Jesuuri Pueyaso Secojojua tiajinia tiuquiquiaari na pueyata. Nojuajaari juhuacatecara pueya tohuatanijioree, canapuete na seya niqutiojoriquiaacuajani Pueyasocuara puecoosocoriquiano. ⁴⁶ Jesuuri nojori sequeree:

—Tariucuacaanu Pueyaso Rupaajinia naa naajiotasaaquiaariti Pueyaso sequesano: “Cua tiaari pueya secojonuujuua janiya”. ¡Niaari saniniuujia na jiyatecanu nohuasenuujuaca quiquiora!

⁴⁷ Puetunu juucajanaa, Jesuuri jiyacari pueya niishitiojoriquiaa Pueyaso Secojojua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojoriijianaari tari roojotooriquiaa juucua taa na motunutaniya Jesuni.

⁴⁸ Puetunu pueyajanaari saaja shamaatia tojititariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriquiaa Jesu.

20

Pueya nequesotasacari Jesu, cante na jiyaronani
(Mt 21.23-27; Mr 11.27-33)

¹ Tamonu juuca, Jesuuri Pueyaso Secojoua tiajinia niishitiojoriquiaa. Pueya niqiuara pohuatariquiaari taate nojori naata Pueyaso muerasura quiniuni. Jiyacaritij, pueyacuara secojonaa jiyaniijianucuaari Jesuucua nijiomaa. Moisés Rootasanojiniji niishitiojonaari nojoritia nijiomaaajuhaaj, narta Judiocuaca camarucanuni. ² Nojoriiri Jesu nequesotaree:

—¿Cante quia jiyatecanu Pueyaso Secojoua tia jiyaniijia quia quiniuriani? ¡Canaa quia riucuaare! ¿Cante quia jiyaronani?

³ Jesuuri nojori sequeree saniniuujia:

—Janiya nia nequesotanu paniyajuhuaaj. Cua riucuaare. ⁴ ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

⁵ Nojoriiri juhuacatecara tamajaaja pocoojoquiaari. Tama sequetooriquiaajaarijia:

—¿Taa pa riucuanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaari-irini?” ⁶ Saniniuujia, paa jaara na sequereni: “Juancuaja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricuajaari sequequiaa: “Juanna seetanujanaa Pueyaso sequenu panishano caminiujuinia quiquiaari”.

⁷ Nojoriiri cunora Jesu riucuaaree:

—Johuaaj. Maja canaa niishiniu canaquitijia Juan jiyaroquiaari na tiuquinijionura pueyatej.

⁸ Naaratej, Jesuuri nojori sequeree:

—Janiyajuhuaaj, majaari cua sequenu quiniutianiya niajaniya, cante cua jiyaroquiaarini naa cua miiniuriatej.

*Miriqui Jesu pohuatasano sesa miijiaca poonijionaajiniji
(Mt 21.33-44; Mr 12.1-11)*

⁹ Na nuhuaji, Jesuuri pueya niishitiojonu coteerohuacuhuaaj nio miriqui pohuatasanota. Sequereeri:

—Tamonu pueyanoori cuhuariquiajinia uva natoquiaari. Na nuhuaji, na niqutioquiaari tamasaca pueyari, nojori cojuanura nera. Na camaruuri tu-cuacaanu quiaaree, tii na shocotejonura marijia. ¹⁰ Uva quishacari noshuri-ujua, saniya cuhuariquia camarujanaari na seru jiyaroree cuhuariquia cojuanaa pueyacu. Jiyarosaareeri tiji na masenura na camarujanaa, uva carojotasanojiniji. Na camarujanaacuajaari tarijia pocoojoquiaari cuhuariquia cojuanaa pueyata, taa nojori niqutionutaniya na carojotasanojinijini. Cuhuariquia camaru seru tiuquishacari, ¡cuhuariquia cojuanaari na piquitiurii saaja! Na jiyaroturohua juhuasuuri. ¹¹ Cunora, cuhuariquia camarujanaari tamonu na seru jiyaroree. Cuhuariquia cojuanaari na miitiurii sesajuhuaaj. Na saarijiotureeri. Na piquitiuriri. Na jiyaroturohua juhuasuajariuhuaaj. ¹² Cuhuariquia camarujanaari socua tamonu na seru jiyaroree nojoriicua. Nojoriiri sesa miitiurii nojuajuhuaaj. Na nuhuaji, nojoriiri na caponeeree cuhuariquiajiniji tariucua naatishano.

¹³ Naaratej, cuhuariquia camaruuri tama sequereejajaaja: “¿Taa cua miiniutianiyarini? Quiyanuniojua jiyaroreeraquij. Cuno pojori jaara cua panishano niyanu niqutiuri, maja naasucua nojori rerequetenu quiniutianiya nojuaja”. ¹⁴ Saniniuujia, cuhuariquia cojuanaa jaara cuhuariquia camaru niyanujanaa niqurii nojoriicua niyano, tama nojoriijaarijia sequetoree: “Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia”. ¹⁵ Naacuajitij, cuno cuhuariquia cojuanaa

pueyari cuhuariquia camaru niyanu jaatiurii cuhuariquiajiniji. ¡Cuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniuucua neyanutej, ¿taa na que miiniutianiya cuno sesa pueyarini? ¹⁶ Seetanujuanaa nia sequeyanijia, nojuajaari nocua quianutianiya nojori na puecoonura. Na nuhuaji, na cuhuariquia niqutionutianiya tamasaca pueyari, nera nojori cojuanura cutara.

Pueya tojishacari nio, nojoriiri sequequiaari:

—¡Juhuej! ¡Pueyaso cuaara naa miyaquiiariatej!

¹⁷ Jesuuri nojori niqiniijioree. Nojori sequereeri:

—¿Naatee? ¿Nio naajiotasanoorihuaj, tariucuacaanu Pueyaso Rupaajini-ani? ¿Niaate niishiya casaa na sequeyani? Naa sequeyariquij:

“Saitia tianaa pueyari tamonu saajia soojotanutianiya, nojori jiyanihacari cuno saajia sesarujau. Na nuhuaji, cuno saajiaari socua panishano saajiaa jiyatesaanutaniuhua”.

¹⁸ Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanoocua tiyare, cuno pueyano jacanajonutaniyari. Shahuej.

¹⁹ Jiyacaritij, pueyacuara secojonaa jiyaniijianucua, mariyata Moisés Rootasanojiniji niishitiojonaari Jesu quianu panirii juucua. Nojoricuajaari niishirii, Pueyaso saquiriojosano Israel pueya jitianaa nojori quiniuucua, Jesuuri miriqui pohuatariquiaa nojorijiniji, tianaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori puere-sacari Jesu panijiaa pueya.

Jiya jiyaniijia cuaara niqutiosaaria na sequesano cumaneeca
(Mt 22.15-22; Mr 12.13-17)

²⁰ Naaratej, nojoriiri tamasaca pueya jiyaramiquiquiaari Jesuucua, sapuenu juhua maninia pueya niquishano. Cuno pueyari jiyaramiquishaaquiaari Jesu nojori pocuatenura sesa juucua, nocuara tonujusaanura. Jesu jaara nojori riucuaquiaari sesa, maara Romano jiyaniijia niqutiosaaquiaari saniitiosocoriquiano. ²¹ Naacuajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhua, majaari rimiajata quia niqiniu pueya. Quiaacuajaari seetanujuanaa niishitiojoquiaa, taa Pueyaso paniya canaa miiniuriacuajani. ²² Cunora, canaa quia sequere taa canaa miiniutianiyan. Roma tiacajinia quijia jiyaniijiaari pa sequequiaari Judiocuaca cuaara cumaneeca niqutiojora nera, na jitianano pueya pa quishacari. Naaratej, ¿maniateeri pa miiniuria na sequesano?

²³ Jesuuri niishiqui nojoriiri nojuaja nequesotariquiaa najuhanaj, nojori sapojonuta. Cunora, nojori sequereeri:

²⁴ —Cua niqutiri quia cumanee. ¿Nioorihuaj? ¿Cana naaquiti nocuani? ¿Cana sesate nocua naajiotasani?

Jesu riucatureeri:

—Cunocuja canaa sequesano Roma tiacajinia quijia jiyaniijia César naaqui, na sesajuhua.

²⁵ Jesuuri nojori sequereeri:

—Jiyaniijia César cuaara tama na casaajaaja niqutiosaaria. Nojuacuajaari na camaru. Saniniuujia, Pueyaso nia niqutiore cutara nerano tama na casaajaaja. Nojuajaari pa camarnu.

²⁶ Saaja maninia Jesu riuucasacari pueya niquiara nojori, majaari nojori naata nocuara tonujunu quirii. Nojoriiri saniya jiuujiateree Jesu riuucasacari saaja maninia nojori. Naacuajitij, nojoriiri socua sanaajetaree.

¿Paate samiitiaconutaniuhuaani?

(Mt 22.23-33; Mr 12.18-27)

²⁷ Na nuhuaji, noojiaqueya Saduceocacajinijinoori Jesuucua niquiaari. Saduceocuaacari jiyaniija macunucua pueya maja na samiitiaconu quiniutianihua. Naaratej, nojoriiri Jesu sequereee:

²⁸ —Niishitiojonanaa, supuetana Moiséscaujaari pa rootaa na naajioneejinia, pueyano jaara cusoyare mueyaju, tarajanu cuaara camiriia mashiquio, mueya na mueratenura tarajanu niti. ²⁹ Tamonu mashajaari seis tapueyocucaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhuojuua. ³⁰ Cunora, na nuhuajishanaari na mashiquio camirii. Nojuajaari muetuhuojuua cusoquiaarijuhuaj. ³¹ Naaratej, neyaca tarajanuuri mashiquio camiquiaarijuhuaj. Nojuajaari muetuhuojuua cusoquiaarijuhuaj. Puetunu cuno mashiquiorijanaari naa camiyocuaari cuno maajitia. Puetunu nojorijanaari cusunucuaari muetuhuojuua. ³² Na nuhuaji, pueya mashiquioori shaajequiaarijuhuaj. ³³ Naacuajitij, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniutianiyani? Cuno mashiquiocujaari puetunu cuno siete pueya niquiocua quiquiaari.

³⁴ Jesuuri nojori riucaaree:

—Mijiria pa quishacariija, canuu, maajipohuari camiyocuaa.

³⁵ Saniniuujia, majaari noo pojori camiyonu quiniutianiya canapueete samiitianijiosaanutanihuacuajani, maninia quijiaca nojori quiniucua Pueyaso niquiara mijiria. ³⁶ Majaari nojori shaajenu quiniutianihua. Nojoriiri shaajeyashijaca quiniutianiya juhua Pueyaso seya. Nojori samiitiaconuucua macujiniji, cunora, nojoriiri Pueyaso muerasujanaa quiniutianiya cutara. ³⁷ Supuetana Moiséscaujaari pa niishitiquiaari, macunucuaari samiitianijiosaanutaniuhua. Moisésri naa naajiotajuaari Pueyaso sequesano nojuaja nequeru casaja noshijanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijanio, quia supuetana Jacobo Jiyaniijajuhua”.

³⁸ Naacuajitij, paari niishiyani, puetunu Pueyasocua tiuujiaa shaajecono pueyajanaani, nojoricujaari saminiucua quia Pueyasora. Pueyasoori maja macunucua Jiyaniija. Na pueya shaajecocujaari saminiucua quia nera cutara.

³⁹ Noojiaqueya Moisés Rootasanojiniji niishitiojanaa pueya tojishacari naa Jesu sequesantej, nojoriiri Jesu sequereee:

—Maniacujaari quia sequesano, Niishitiojonanaa.

⁴⁰ Naa Jesu riuhanesacari saaja maninia nojoritij, majaari socua pueya nequesoreenu paniniu quiriquiaa nojuaja.

¿Cante Cristo supuetanani?

(Mt 22.41-46; Mr 12.35-37)

⁴¹ Jesuuri naa nojori nequesotaree saniniuujia:

—¿Casaara na sequesaaquiaacuaraarini, Pueyaso Jiyarosanaari supuetana David niquihuacuajinio supuenutaniya? ⁴²⁻⁴³ Supuetana Davidjanaacujaari naa naajiotajuaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuaara quia paraa shocotare puetunujuanaa-jaatijia’”.

⁴⁴ ¿Cristotucua taa David niquiohuacuajinio supuereni? Davidcuaajaari na sequeya “cua Jiyaniijiaata”.

Cuno pueyari maja na naata na riucuanu quiriquiaa.

Jesu numootesacari na pueya, Moisés Rootasanojiniji niishitiojonaa puey-acuaji

(Mt 23.1-36; Mr 12.38-40; Lc 11.37-54)

⁴⁵ Puetunu pueyajanaa tojitiasacarijia Jesu, Jesuuri naa na saquiriojosano pueya sequeree:

⁴⁶—Tama nia cuaqueyajaaja nia cojuare Moisés Rootasanojiniji niishitiojonaa pueyacuaji, nia miyaquiniucuaaji taa nojori miiquiaacuaani. Nojori-iri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhu-atanura nojori juhua tojishano pueya, nojori rucuanesacari tiaca jiuu-jiainia curotasano cajitiucujinia. Nojoriiri socua panishano cajitiucua- jinia cajiniu maniniucuaquiaa Pueyaso Secojoua tiajinia, tamasa tiajini-ajuhua, nojori jaara masuusaare queranacunura. ⁴⁷ Naajuhua, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miiniu nuhuajiti, pueya niquiara, nojoriiri najuhuaa tucuaayocua secojoquiaa Pueyaso, pueya jiyaniinuria nojori maninia pueya cutara. Naa nojori miiniuucuatej, nojoriiri jiyanohua saniitiosano quiniutianiya.

21

Casamijiu mashiquio niqutiosacari na cumanee juurane Pueyasora
(Mr 12.41-44)

¹ Pueyaso Secojoua tiajinia, Jesuuri casamiriaca pueya shootiariquiaa na cumaneeca nojiyano cumaneeca racataja quiquiojinia, nojori niqutiosano Pueyasora. ² Jesuuri tamonu casamijiu mashiquio niquiriijuhua caapiqui cumaneeniyojua niaano tiijuhua. Na niasanoori nareja cobrejiniji shipin- ishano cumaneeca quiquiaari. ³ Jesuuri na pueya sequeree:

—Seetanujuanaa nia sequeyanijia, cuno casamijiu mashiquioori socua queraatia niqutioree Pueyaso, cuno casamiriaca pueyajiniji. ⁴ Puetunu cuno pojorijianaari saaja na cureeno cumaneecajiniji niqutiojiya puetunu nojori panishanojuanaa nojori masejonu nuhuaji. Cuno mashiquio cu- taraari puetunu na miaajaara na masetajara cumaneecajanaa niqutioree.

Jesu pahuatasacari, Pueyaso Secojoua tia niyartasaanutaniya
(Mt 24.1-2; Mr 13.1-2)

⁵ Noojiaqueya ti quiniaa pueyari pocojoriquiaa Pueyaso Secojoua tia- jiniji. Jiyanohua shanohua saitia shipinishano quiriquiaari. Nojoriiri na shootiariquiaa, naajuhua taa na maniniushitishaaquiaari nareja pueya niqutiojosano casamitiani. Jesuuri nojori sequeree:

⁶—Puetunu cunojuanaa niaa na niquiyani, tamacari niyartasaanutani- yari. Majaari quenaaja tamonu saajia cureenu quiniutianiya tamonu caco maano. Puetunu niyartasaanutaniyanaari.

Taa nio jiya puequenu panishacari quiniutianiyan
(Mt 24.3-28; Mr 13.3-23)

⁷ Na pueyari Jesu nequesotaquiaari:

—Niishitiojonanaa, ¿taacari nio tia niyartasaanutaniyarini? ¿Casaa canaa niquniutianiyarini, canaa niishiniuria quia sequesanoori quera tohuateya?

⁸ Jesuuri nojori riucaaree:

—Tama nia cuaqueyajaaja nia cojuare niaa mariqui sapojosaareeri. Queratia sapojonuujaca pueyari supenutaniya. Nojoriiri sequenutaniya: “janiya Cristoni, Pueyaso Jiyarosano! ¡Nio jiya quera puequeya!” Niaa jaara naa sequesaretej, majaari nia tojiniu cuno sapojonuujaca. ⁹ Naajuhuaaj, majaari nia puerenu niaa jaara tojiri tamonu jiyajinijinio pueyari tamasa jiyacajini pueyata miaquetoojiya, naajuhuaaj, pueya jaara juaatiooquiaa tama nojori jiyaniija nojori jatanurajaaja. Naa quiniutianiyari coteenu. Naajaa, juhuanojuaja maja nio jiya puequesacari.

¹⁰ Jesuuri naa nojori pohuatariquiaa socua:

—Tamonu rupaa pocuajacaari miaquetoojonutaniya tamaatia rupaa pocuajacata. Naajuhuaaj, tamonu jiyajinijinio jiyaniijaari miaquetoojonutaniya tamonu jiyajinijinio narta jiyaniijaata. Naa queraatia miaquetoojonuuri quiniutianiya. ¹¹ Rijiaari jyanohua jiuuquiujiutianutaniya queraatia jiyacajinia. Jyanohua miaajenuuri quiniutianiya queraatia tamonu jiyacajiniajuhuaaj. Paqueja cusuuri quiniutianiya nia, tamaquicuajuhuaaj. Naajuhuaaj, jyanohua puereeta casaari niquishaanutaniya jiyocuacaanu, mijiria quiniaa niishiniuria jiya puequenuraari tari catecanoya.

¹² Cuno puereeta quiaquishacarija, niaari quioosaanutaniya naquiya nia miishaanura, cua pueya nia quiniuucua. Niaari jaatucusaanutaniya Pueyaso secojonuujaa tijiniaqueya nequesoreesocoriguiano. Niaari nujatejojacajinia nujatejosaanutaniya. Niaari nia pueya camarucuaacua, mariyata jiyaca jiyaniijanucuaacua jaatucusaanutaniya nequesoreesocoriguiano. Niaari naa miishaanutaniya nia pohuatanuucua janiyajiniji pueya niqiara. ¹³ Naacuajitij, nia naata cuno jiyaniijanucua niqiara pohuatanu janiyajiniji. ¹⁴ Nioojiaca nia cajitiri, maja juhuacarija nia niishiriojonura taa nia riucaanutaniya nojorini. ¹⁵ Niyacuajaari jiyacari nia niishitiojonutaniyani taa nia riucaanutaniyanoj, mariyata casaa nia pohuatanutaniya jyanohua cua niishitijatanani. Niaari nojori sanaajanutaniya maninia nia rihuuanesacari saaja. Nia paraari maja na naata nia sequesano rerequetenu quiniutianiya. ¹⁶ Jiyacarijuhuaaj, tama nia queyajaarija nia tacartanutaniya, cua pueya nia quiniuucua. Nia tapueyocuaacari nia tacartanutaniyajuhuaaj, nia jiyasoocujiniio supeno pueyajuhuaaj, nia rupenaanio. Nojoriiri noojiaqueya niajaniyajinijinio puecoonutaniya. ¹⁷ Puetunu mijiria quiniaa pueyajaanaari nia niquniu paniyaquiniutianiya cua pueya nia quishacari. ¹⁸ Naajaa, majaari nia puerenu. Majaari quenaaja niqiriyatu muesu shaajenu quiniutianiya nia nacajiniji, Pueyaso jaara paniyaquiri. Pueyaso jaara naa nia muesu cojuaacuaa, ¿maatucua casaara cojuaquiri saniya niajaniyani? ¹⁹ Naaratej, rejeretajaca nia quiri. Niaa cutaraari shacantuuca quijiacara jatanishaanutaniya pueyaracaanu nia rishiniuria, niaa jaara cumaatia nujataru pueya miishacari sesa niajaniya.

²⁰ Niocua niishiri Jerusalén tiaca tari niyartasaanutaniya, niaa jaara na paraa niqiri puetunu na shocuaqueyajanaa maano. ²¹ Jiyacaritij, canapuete Judea jiyajinia quiyani, cuno pojori cuara mashiiria tuhuanahuacua. Canapuete Jerusalén tiacajinia quiyani, nojori cuara ritia mashiiria tiji. Canapuete na cuhuariquijajinia quiyani, nojori cuara tacateyaquihuara Jerusalén tiacajiniohua. ²² Cuno quishacari, jyanohua saniitiosacariiri quiniutianiya. Jiyacaritij, puetunu Pueyaso Rupaajinia naajiotasanojuanaari tohuateenutaniya. ²³ Jyanohua taraatia quiniutianiyari noo maajipohuara, canapuete manajaatohua quia jiyacariini, mariyata

canapueete conaaja supueja jiitiaani. Jiyanoehua naquiya quiniutianiyari cuno quishacari nio jiyajinia. Nio jiya pueyari jiyanoehua saniitiosaanutaniya. ²⁴ Noojiaqueya nojorijiniiniioori pucoosaanutaniya tahua miaque-toosacari nojoritia. Tamasaca nojorijiniiniioori quioosaanutaniya. Nojoriiri puetunu jiyacajiniarajanaa rijiosaanutaniya poonitijosocoriquiano. Tau-cuacaari Jerusalén tiaca jiitianutaniya tama nojoririrajaaja, Jerusalén tiaca nojori jiitianu cuaara puequerejaatjia, taa Pueyaso sequequiaari tamacajani.

Taa na quiniutianiyani Jesu tacatesacariuhua

(Mt 24.29-35, 42-44; Mr 13.24-37)

²⁵ Mijiria quiniaa niishiniuria jiya quera puequeya, nojoriiri puereta casaa niqiniutianiya pananujinia, racajinia, riyajiniajuhaaj. Shoniniacu caminiaacuaji shiriqutiuniutianiyajaariuhuaaj, jiyanoehua na quey-ocuasacari. Nojoriiri cushitiniutianiya na pueretunutajuhaaj, jiyanoehua cojuata shoniniacu caminia cajiniucuasacari. ²⁶ Mijiria quiniaari cu-sojoununutaniya na puerenuta, nojori niishiriojosacari taa nio jiya mi-shaanutaniyani. Puetunu jiya cajiniocua Pueyaso shipinishano casaa-janaari jiuuquiutiasaanutaniya jiyanoehua. ²⁷ Jiyacaritij, mijiria quiniaari cua niqutiuniutianiya cohuaja najacajinia niyano, jiyanoehua shacantuuca cua cumaacata. ²⁸ Naaratej, niaa jaara nio cua pohuatasano niquri tari coteyano, niocua tama cumaquitiorejaaja. ¡Niocua timiri! ¡Niacuajaari quera rijiosaanutaniya niiquiji, pueyaracaanu cuata nia quiniuria!

²⁹ Jesuuri nojori pohuataree nio miriqui pohuatasanojuhaaj:

—Higo naana nia niquri, tamonu jaranacujua naananio. ³⁰ Na jaamasu-cua jaara mueratuure, niaari niishiya, tacareejonuqui quera quiniutianiya.

³¹ Naajuhuaaj, niaa jaara puetunu cua pohuatasanojuanaa niquri tari to-huatelyano, niocua jiyacari niishiri, janiyari quera tiuquihuani, Jiyaniijia-janaa cua quiniuria.

³² Seetanujanaa nia sequeyanijia, puetunu cua sequesanojuanaari tohu-ateenutaniya Pueyaso tojitiaashijiaca pueya puequeyaquishacarijia. ³³ Jiya cajiniocua, mariyata nio jiyari shaajenutaniya. Cua sequesanoori saniniuu-jiya puetunu tohuateenutaniyajanaa cutara, taa cua sequeyacujani.

³⁴ Tama nia cuaqueyajaaja nia cojuare niaa mariqui cua tojiyashiji-acara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutano. Maja naa nia quiniu, janiyari mariqui nia cariy-atuereeri, jeenucuasoo nia quishacari, canashyaquiji cua tiuquishacari-uhua. ³⁵ Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashyaquiji majaacuaani.

³⁶ Cunora, cucuaji jeenucuasano nia quiri juhuacarijia. Pueyaso nia secojore pueyaracaanu, maja naquiya nia miishaanura cuno taraatia quishacari, taa cua sequeyacujani, mariyata juhuajaniya nia nujuatunura cua tacoji, cua nequesoreesacari puetunu pueyajanaa.

³⁷ Jesuuri puetunu juucajanaa niishitiojua Pueyaso Secojoua tiajinia. Saniniuujiya, niucua quiojojuaari Olivo cuhuariquia tuhuananujinia tii na quiniuria. ³⁸ Puetunu pueyajanaari tariquicuaji quiojojua Pueyaso Secojo-ua tiajinia, nojori tojiniuria Jesu pohuatasano.

22

Judiocuaca camarucua roojotoosacari Jesu nojori quianura
(Mt 26.1-5, 14-16; Mr 14.1-2, 10-11; Jn 11.45-53)

¹ Quera Pascuara queranacunuusacari quiquiaari, pueya miaquesacari pan na poreetajaaju shipinishano. ² Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari roojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jiyanohua queraatia pueya paniniucua Jesu.

³ Jiyacaritij, Satanásri Jesu pueyano Judas Iscariote jiuujiajinia tiuquiuaari. ⁴ Nojuajaari pueyacuara secojonaa jiyaniijianucuaacua quiaquiaari, Pueyaso Secojoua tia cojuanaa jiyaniijianucuaacuaajuhaaj. Judasri cuno pojoritia pocoojoquiaari. Nojori sequereeri nojuaja na naata nojori quietenu Jesu. ⁵ Nojoriiri shuquiririi. Cunora, Judas sequetureeri taa cumaneeca nojori niqutionutaniya nojuajani. ⁶ Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quietenutaniya Jesu jiyasohujani.

Jesu miaquesacari na nuhuajiria na pueyata
(Mt 26.17-29; Mr 14.12-25; Jn 13.21-30; 1 Co 11.23-26)

⁷ Poreetajaaju pan miaquenu juucaari tari quiquiaari. Cuno juucajuhuaj, borregoori mosano quijia, Pueyaso niquiara miaquesocoriquiano Pascuara queranacusacari. ⁸ Cunora, Jesuuri Pedro jiyaroree Juannio, nojori miaquesocoriquiano nojori majeetenura. Nojori sequereeri:

—Nia quiaare. Borrego nia majeeteseecuaa pocuaji, pa miaquesocoriquiano quiarjia Pascuara.

⁹ Nojoriiri na nequesotaree:

—¿Tee quia paniya canaa majeetenurani?

¹⁰ Jesuuri nojori riucuaare:

—Niaa jaara Jerusalén tiacajinia tiuquishii, niari tamonu pueyano riuriatanutaniya mohuaca taquitiaano patacojinia. Niocua na nuhuaji rupaamia na tiajinia. ¹¹ Cuno tiajinia na tiuquishacari, niocua cuno tia camaru sequeese: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarjia Pascua niucuan?’” ¹² Nojuajaari nia niqitiniutianiya puereetuca sohuaca, nataco na tiajinia, tariucua jeenucuaasano. Niocua cuniqui miishii puetunujuanaa pa miaquesocoriquiano.

¹³ Jesu pueyari quiaaree. Nojoriiri puetunujuanaa riuriataquiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miaquesocoriquiano.

¹⁴ Jaara tari quiquiaari Pascuara miaquesacari niucua, Jesuuri na saquiri-
ojosano pueyata cajitishii miaquejajinia. ¹⁵ Jesuuri nojori sequeree:

—Janiyari jiyanohua niaata miaquenu paniriquiaa nio Pascua niucuan, pueya moyaquishacarijia janiya. ¹⁶ Seetanujuanaa nia sequeyanijia, majaari socua cua miaquenu quiniutianiya Pascuara, janiya jaara tiuquiriohuajaatijia puetunu Pueyaso muerasuranotajanaa. Jiyacari cutara, paari jatiqui miaquenutaniyani, Jiyaniijiajanaa cua quishacari.

¹⁷ Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu niajanijajanaa.

¹⁸ Seetanujuanaa nia sequeyanijia, majaari socua cua ratunu quiniutianiya uva caacajiniji, janiya jaara tiuquiriohuajaatijia, Jiyaniijiajanaa cua quiniuria puetunu Pueyaso muerasurajanaa.

¹⁹ Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niqitiojoreeri. Nojori sequereeri:

—Nioori cua cuaqueya niaacuara mosocoriquiano. Niocua naa miiriquia pueyaracaanutej, nia niishiriojonura janiya.

²⁰ Nojori miaquenu nuhuaji, Jesuuri ratujua patareejuhuj. Naa sequeerei:

—Cua nanacaari niaacuara shoonutaniya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

²¹ 'Cua tojitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya. ²² Janiyari naa miishaanutaniyani taa janiyajiniji juhuacarijia pohuatasaaquiaaricujani tariucuaanuu Pueyaso Rupaajinia. Saniniujia, cua tacartanaari jiyanoohua taraatia quiniutianiya naa na miiniuucua janiya.

²³ Jesu pueyari jiyacari juhuacatecara nequesoreetoree tama nojorijiaaja:

—¿Canteeri na tacartanutaniyani?

Cante seetanujuanaa jiyaniijajanaani

²⁴ Jesu pueyari tama juayonuutariquiaajaacujua, teyano nojorijiniotote jiyaniijajanaani. ²⁵ Jesuuri nojori sequeeree saaja:

—Mijiria, jiya jiyaniijianucuaari jiyanoohua jiyaramiquiniu niishijia nojori jiiitasano pueya, juhua nojori poonitijosano pueya. Nojoriiri tama nojorijiniijiaaja sequeja: “Canaari maninia miiquiaa canaa pueyani”.

²⁶ Niajaniya saniniujia, majaari naa nia quiniu juhua nojorijia. Cante socua tojishano pueyano quiya nijaniyajinijinioni, nojuaja cuaara tama na cuaqueyajaaja jiyateyaquiiira na cumaaca paaretaja pueyacua. Cuaara quiiira jacaria pocuaja. Naajuhuj, cante jiyaniijajanaa quiya nijaniyajinijinioni, nojuaja cuaara jiyateera tama na cuaqueyajaaja juhua nia serura.

²⁷ ¿Taa nia sequeyani? ¿Cante jiyaniijajanaani? ¿Miaqueyano pueyanotee? ¿Na mianuutena soj? ¡Miaqueyano pueyanocuaaja! Naajaa, janiyari juhua nia seru quiquiaa niaarani, maninia cua miiniuria nijaniya. Naajuhuj, naa maninia miijica nia quiriqia.

²⁸ 'Niaacuajaari pueyaracaanu cua cojiriqiaa janiya jaara saniniujiushaariquiaani. ²⁹ Naaratej, janiyari nia jiyatenutaniya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria.

³⁰ Naacuajitij, niaari cua miaquejajinia cajituniutianiya cuata nia miaquejonura, cuata nia raruujunurajuhuj, Jiyaniijajanaa cua quishacari. Niaari mariyata jiyaniijianucua quiniutianiya, supuetana Israel doce niquiohuacuajinio supueno pueyapue nequesoreena nia quiniuria.

Jesu sequesacari Pedro, nojuaja nocuaji seetanutaniya (Mt 26.31-35; Mr 14.27-31; Jn 13.36-38)

³¹ Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuaa Pueyaso, jiyanoohua na saniniujiunuria nijaniya. Naacuajitij, niaari jiyanoohua saniniujiushaanutaniya, naatej, taa trigo quejooshiya jiyocuaaanucuaani, paratu panura na cocua. ³² Janiyari saniniujia Pueyaso secojoree quiocuara cutarani Simónnaa, cucua tiuuniu quia tarinitiaquiniuucujia. Naacuajitij, quiaa jaara quioojia tacatorohua cucua, quiocua quiarta pueya cumaquiriohuajuhuj, nojori tiuuniuria seetanujuanaa pueyaracaanu cua.

³³ Simónri Jesu sequeerei:

—¡Cua Jiyaniijianaa, quiaa jaara nujuatejojuajinia nujuatesaare, janiya cuaara nujuatesaaria quiatajuhuaaj! ¡Quiaa jaara mosaare, naajaa, janiya cuaara cojiritiasaaria quiajanijajuhuaaj!

³⁴ Jesuuri na sequeree:

—Pedronaa, seetanujuanaa quia sequyanijia, caacaraja niunijyaquishacarijia quiarijia, quiaari tari naa cucuaji seetanu caminiujiuniutianiya pueya niquiara: “¡Maja cua niishiniu Jesu!”

Quera Jesu miishacari taraatia

³⁵ Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pohuatanura caashoqueejuni, cumaneeca quiquiooju, sapatuujunio, ¿niaateeri nia panishano casaa niquitioyaquishaaquiaari?

Nojoriiri Jesu riuquaree:

—Maja. Canaacujaari puetunu canaa panishanojuanaa niquitiojosaquiaarini.

³⁶ Jesuuri nojori sequeree:

—Quiarijia saniniuujia, cante caashoqueracani, cuaara na pataara. Cante cumaneeca quiquioracani, cuaara na pataarajuhuaaj. Cante nijiniaquetucuaa mueruu jiiitiaaquiyani, cuno cuaara niquitioora na shiniquiaacuaji toque, nijiniaquetucuaa mueruu na masenura na toque samitia. ³⁷ Seetanujuanaa nia sequyanijia, tariucuaaanu Pueyaso Rupaajinia janiyajiniji naajiotasanoori tohuateenutaniya. Janiyajiniji naajiotasanoori naa sequerate: “Nojuajaari jiyaniishaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaaquiaaricujani.

³⁸ Nojoriiri Jesu sequeree:

—Jiyaniijianaa, niya quiya caapiqui nijiniaquetucuaa mueruu.

Nojori riuquareeri:

—Tariucuaaja.

Jesu secojoscari Pueyaso, Getsemani cuhuariquijajinia

(Mt 26.36-46; Mr 14.32-42)

³⁹ Na nuhuaji, Jesuuri tohuataquiaari tijajiniji. Olivo cuhuariquia tuhuananujiniara quiaareeri. Nojuajaari cuniqui quianura jiiitiquiaari. Na saquirojosano pueyari na nuhuajiyaree. ⁴⁰ Na tiuquishacari tii, Jesuuri nojori sequeree:

—Pueyaso nia secojore, niaa mariqui sesa miiriiri niaa jaara saniniu-jiushaare.

⁴¹ Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojoquetasee Pueyaso secojonuraari. ⁴² Naa secojoreeri:

—¡Cua Quenaa, maja cua miiniu paniniu naquiya! Naajaa, janiya cuaara miyaquishaaria taa cua paniyani. Janiya cuaara miishaaria cutara taa quia paniyacuajani.

⁴³ Jiyacarijij, Pueyaso seruuri jiyocuaaanuji nocua nimiaa na cumaquini-uria. ⁴⁴ Jesuuri jiyanoohua naquiya miiriquiaa. Noojaari quera jiaqueriquiaa na tacaaniutia. ¡Jiyanoohua, jiyanoohua secojoriquiaa Pueyasoori! Cunora, na paneyacaari puereetujuaaca juhua nanaca quiriquiaa, na caate-sacari jiyocua. ⁴⁵ Na secojonu nuhuaji, Jesuuri sanerohua. Na pueyacia tacateyarohuari. Nojori niquishuhua maquetiuyano saajaari, puera nojori taraajenucua. ⁴⁶ Jesuuri nojori sequeree:

—¿Casaara nia maquetiuyani? Nia saneecuature. Pueyaso nia secojore na cojuanura niajaniya, maja sesa nia miiniuria niaa jaara saniniujiushaare.

Judiocuaca camarucua quiasacari Jesu
(Mt 26.47-56; Mr 14.43-50; Jn 18.2-11)

⁴⁷ Jesu pocuasacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquirio-josano pueyajinijinio quiquiaari. Judasri Jesuucua nimiaajanaa. Na saruhu-ataseeri na nujuunuta. ⁴⁸ Jesuuri na sequeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

⁴⁹ Jesu pueya niquishacari casaa cuno pueya miiniu paniriquiaani, nojori-ri Jesu nequesotaree:

—Jiyaniijianaa, ¿canaate nojori miaqueyani?

⁵⁰ Tamonu nojorijinijinioori pueyacuara secojonaa jiyaniijia seru piri na mueruuta. Saaja na miaquetajara numoco jaatereeri. ⁵¹ Jesuuri na sequeree:

—¡Tariucuaja! Maja naa miiniu.

Jesuuri numoco ririi. Na ruporohuari. ⁵² Judasta quiriquiaari pueyacuara secojonaa jiyaniijianucua, Pueyaso Secojoua tia cojuanaa jiyaniijianucua-juhuj, Judiocuaca camarucuanio. Nojoriiri Jesuucua nijioquiaari na quia-nura. Jesuuri cuno pojori sequeree:

—¿Casaara cucua nia nijioree nijiniaquetucuaja mueruutani, macacatanio nia quianura janiyani? ¿Janiyateeri nohuasejojuani, naa nia nijionura cu-cuatej? ⁵³ Pueyaracaanu cua quishacari niaata Pueyaso Secojoua tiajinia, majaari nia quianu quijia janiya. Naajaa, quiarijia cutaraari niajaniyara, nia panishano nia miiniuria janiya. Quiarijiani, Sesaacaari cumaacaraca na panishano na miiniuria.

Pedro seetasacari Jesujiniji

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jiyacaritij, nojoriiri Jesu quiaree. Na jaatucutiuyareeri pueyacuara secojonaa jiyaniijia tiajinia. Pedroori tucuaaanuji na nuhuajiriquiaa.

⁵⁵ Jiyacaritij, pueyari jiyaniijia tia carijiniacuma mani noshitirii. Na shocua cajituriuhuari. Pedroori nojori tajinia cajishiijuhuaj. ⁵⁶ Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootiariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuaj.

⁵⁷ Pedroori seetaree. Naa sequereeri:

—Niyacoonaa, ¡majaari quenaaja cua niishishano cuno pueyano!

⁵⁸ Na nuhuaji, tamonu pueyanoori Pedro niquiriijuhuj. Nojuajaari cuno jiyaniijia seru quiriquiaajuhuj. Pedro sequereeri:

—¡Quiaaqui cuno pojorijinijinio pueyanohuj!

Pedroori saa sequereejaa:

—¡Maja, pueyanonaa! ¡janiya maja nojorijinijinioni!

⁵⁹ Pasaja na tarishiniu nuhuaji, tamonu pueyanoori sequenu pacutero-hua:

—Nio pueyanocuaaari cuno pueyanota quijia. Nojuajaari Galilea jiyajini-jinijuhuj.

⁶⁰ Pedroori saa sequereejaa:

—¡Pueyanonaa, maja cua niishiniu quenaaja casaa quia sequeyani!

Pedro pocuasacarijia, jiyacaritij, caacarajaari niunijioree. ⁶¹ Jiyaniijia Jesuuri tacatequee. Na nijinara niquirii Pedroori. Pedroori jiyacari jiyaniijia sequesano nojuaja niishiquii, naa na sequesanojetej: “Quiaari tari

seetanu caminiujiuniutianiya janiyajiniji pueya niquiara, caacaraja niunijyaquishacariija”. ⁶² Pedroori cuniquiji tohuataquee. Jiyano hua nujuqereeri na taraajenuta, sacuaraatia na seetanuucua.

Pueya macaatishacari Jesu
(Mt 26.67-68; Mr 14.65)

⁶³ Jesu cojuanaa pueyari Jesu macaatiriquiaa. Nojoriiri na piquitiuriquiaa. ⁶⁴ Nojoriiri Jesu namijia morotuquiaari coteenu. Na jiquioco piquitiuriohuari. Na nuhuaji, na sequetureeri:

—¡Quia niishiritioj! ¿Cante quia piriini?

⁶⁵ Nojoriiri socua queraatia sesa casaa sequeturiquiaa na macaatiuria Jesu.

Judiocuaca jiyaniijianucua nequesoreesacari Jesu
(Mt 26.59-66; Mr 14.55-64; Jn 18.19-24)

⁶⁶ Jaara juhuaquequiaari, Judiocuaca camarucuaari rerejoree pueyacuara secojonaa jiyaniijianucua, mariyata Moisés Rootasanojiniji niishitiojonaatajuhuj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tajoji, nojori nequesorenura tii nojuaja. Nojoriiri naa Jesu nequesoreeree:

⁶⁷ —Canaa quia sequere, ¿quiaate Cristo, Pueyaso Jiyarosano?

Jesuuri nojori riucaaree:

—Janiya jaara nia sequereni: “Taaquiririnij”, niaari saaja cua sequenutaniya: “Quiaa sapojija”. ⁶⁸ Saniniuujia, janiya jaara nia nequesoreere Pueyaso Jiyarosanojinijini, majaari nia riucaanu quiniutianiya janiya.

⁶⁹ Naajaa, quiarijiani, janiyari puetunu cumaacaraca Quijijajanaa miaquetajara cajiniutianiya jiyocuacaanuni.

⁷⁰ Naa Jesu sequesacariitij, puetunu nojorijianaari na sequeree:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucaaree:

—Taaquiririnij. Naacuaaquinatejaj, taa nia sequeyacuajani.

⁷¹ Nojoriiri tama sequetooreejaaja:

—¿Paatucua casaara socua tamonu pueyano pajere nocuara tonujuriquianoni? Paacujaari tari tama pa numaatajaaja sesa na sequesano tojtiareeni.

23

Pilato nequesoreesacari Jesu
(Mt 27.1-2, 11-14; Mr 15.1-5; Jn 18.28-38)

¹ Cuno nuhuaji, puetunu nojorijianaari sanetaree. Jesu jiyatatiuyareeri jiyaniijia Pilatoocua. ² Cuniqui, nojoriiri juhuacatecara Jesuucuaa saquiriojotaree na sapojonuta. Pilato sequetureeri:

—Canaari nio pueyano niishiyani. Nojuajaari canaa Israel pueya najojoquiaa pocuara. Nojuajaari niishitiojoquiaajuhuj, maja canaa Israel pueya niqutiojonura canaa cumaneeca pa jiyaniijijajanaa Césarra, taa César sequetureeri. Naajuhuj, tama nojuajaari naa sequetureeri: “Janiya Cristoni, Pueyaso Jiyarosano, nia jiyaniijia cua quiniuria”.

³ Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Taaquiririnij. Naacuaj, taa quia sequereecuajani.

⁴ Jiyacaritij, Pilatoori pueyacuara secojonaa jiyaniijianucua sequeree, pueya maanunio:

—Nio pueyano nequesoreeree tarinjia. Nojuajaari maja sesa miijia.

⁵ Nojoriiri saaja socua jiyacaterree Jesuucuaa tonujunu. Naa seque-
tureeri:

—¡Nojuajaari puetunu canaa Judiocuacajanaa sesoya na niishitiojosanota!
Nojuajaari Galilea jiyajinia niishitiojonu coteequiaari. Quiarjia, niya niishi-
tiojijajaariuhua Judea jiyajiniani.

Jiyaniijia Herodes nequesoreesacari Jesu

⁶ Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajiniijinio?

⁷ Nojoriiri na riucaaree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herode-
scua. Herodesri namitia tii Jerusalén tiacajinia quiriquiaa jiyacari.

⁸ Nojuajaari pueyaracaanu Jesu niquniuucua jiaatija juucua. Herodesri
tari pohuatasaaquiaari Jesujiniji. Naaratej, Herodesri Jesu miishacari na
cumaacata niquniu panijia juucua. Naacuajitij, na niquishacari Jesu, nojua-
jaari timirii. ⁹ Herodesri queraatia nequesoreeree Jesu. Majaari quenaaja
Jesu riucaanu quiquiaari nojuaja. ¹⁰ Pueyacuaa secojonaa jiyaniijianu-
cuaari tii quiriquiaajuhua, Moisés Rootasanojiniji niishitiojanaanio. Cuno
pojoriiri jiyanoehua Jesuucua saquiriojotariquiaa queraatia sesa casa.

¹¹ Herodesri na soldadohuta Jesu rerequeteriquiaa. Na macaatiriiri. Na
cushitirii jiyanoehua shanohua toqueeri juhua jiyaniijia cushishano. Na
nuhuaji, Herodesri pueya jiyarotrohua Jesu Pilatoocua. ¹² Herodesri cuno
juuca Pilato rupuenara quiquiaari. Coteenu, majaari nojori niqutioonu
paniniu quijia. Nojoriiri saaja shocotetoojua.

Puetunu pueyajanaa sequesacari Jesu cuaara mosaaria
(Mt 27.15-26; Mr 15.6-15; Jn 18.39-19.16)

¹³ Na nuhuaji, Pilatoori pueyacuaa secojonaa jiyaniijianucua rerejote-
quiaari na tacoji, Judiocuaca camarucujuhua, tii quiniaa pueyano.

¹⁴ Nojori sequeereeri:

—Niaari nio pueyano jaatucuree cucua najuhuanaj. Niaari cua seque-
turee, nojuajaari niarta pueya nasajoquiaa. Janiyacuajaari na neque-
soreeriquiaa nia niqiarani. Niaacuajaari cua tojitiariquiaa cua neque-
soreesacari nojuaja. Quiarjia niishiya cutaranjia, puetunu nocuaa nia
tonujusanojuanaari maja seetanujuanaa. ¹⁵ Jiyaniijia Herodesquiiri tari ni-
ishiyajuhua, majaari seetanujuanaa nocuaa nia saquiriojotasano. Cunora,
Herodesri pocua na jiyarorohua. Seetanujuanaa, majaari sesa na miiniu
quiqianu na mosaanura. ¹⁶ Janiyari na majacutenutaniya narejani, carte-
saarohuari.

¹⁷ Pascua juucara queranacusacari, Pilatoori nujuatesano pueyano
cartenu jitiqquiaari nujuatejojuajiniji. Nojuajaari naa miqquiaari
pueyaracaanutej, pueya na shuquiritiniuria. ¹⁸ Jiyacaritij, puetunu
pueyajanaari juhuacatecara jiyanoehua nacaree jatiqui:

—¡Jesu quiaa more! ¡Barrabás quiaa cartere saniniuuja!

¹⁹ Tarijia cuno Barrabásri narta nasojosano Judiocuacata Romano pueya
taanuququiaari juucua Jerusalén tiacajiniji. Nojuajaari jiyacari pueyano
moquiaarijuhua. Cunora, nojuajaari nujuatejojuajinia nujuatesano
quiriquiaa. ²⁰ Pilatoori Jesu cartenu panijia juucua. Naaratej, Pilatoori
pueyati pocoojrohua socua. ²¹ Pueyari saaja jiyacaterree jiyanoehua
nacoonura jatiqui:

—¡Cuaara mosaaria niyacutesanojinia teetesano! ¡Cuaara mosaaria!

²² Pilatoori pueya sequenu pacuterohuacuhuj:

—¿Maatucua casaara mosaarejaarani? ¿Sesa miiriitijiaaraj? Janiyacuajaari tari na nequesoreereeni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji cartesaarohuari.

²³ Pueyari saaja socua jiyanhua nacooree niyacutesanojinia na mosaanura. Pueyacuara secojonaa jiyaniijianucuaari mariyata pueyata jiyanhua nacooriguiaa. Puera jiyanhua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. ²⁴ Naaratej, Pilatoori socua tariniriohua. Pueya panishano miiriiri. ²⁵ Pueya sequesano pueyano cartereeri, cante nujuatesaaquiaari nujuatejojuajiniacuajani na taanuunu paniniuucua Romano pueya, na monuucua pueyanohuj. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriquiaacuajani.

Niyacutesanojinia Jesu teetesacari
(Mt 27.32-44; Mr 15.21-32; Jn 19.17-27)

²⁶ Pueya jiyatasacari Jesu puecoosacaria, nojoriiri tamonu pueyano quia-ree Jerusalén tiacajiniara riujuayano juucua. Nojuajaari Cirene jiyajiniinio pueyano quiquiaari. Na sesa quiquiaari Simón. Nojuajaari niyacutesano patesaaree Jesu nuhuaji.

²⁷ Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuriquiaari, nocua nojori taraajenuta. ²⁸ Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaaja nia nujuquette, nia niqiuohuacuanio. ²⁹ Na nuhuaji, jiyanhua taraatia quishacariiri quiniutianiya niaara, jiyanhua taraatia. Jiyacaritij, pueyari sequenutaniya: “Socua shuquiriaatia quijiaa cutaraari noo maajipohua cante muetuyashijiani, cante manajeyashijianucuan, mariyata cante mueya supuetyashijianucuanuhuj”. Mueyaraca maajipohuari jiyacari jiyanhua taraajenutaniya, nojori niquishacari necohua miishacari naquiya. ³⁰ Naquiya miishacari, jiyacaritij, pueyari tuhuanuhua sequenutaniya: “¡Canaacua quia jiyaretaare!” Naajuhuj, shitiyaniyoyua tuhuananuhua sequenutaniyari: “¡Canaacua nia tiyare canaa nia jamonura!” ³¹ Jiyacariiri jiyanhua naquiya miishacari quiniutianiya. Quiarijia, janiya jaara naa naquiya miishiyacuaani, ¿taaqitijia Pueyaso tojitiaashijiaa miishaanutaniyatejaj?

³² Caapiqui sesa miijiacari jaatucunuusaariquiaajuhuj, mariyata teetesosocoriquiano Jesuta. ³³ Nojoriiri puecoosaqui tiuquijiosee. Cuniqui pueya puecoosaquini, na sesa quiquiaari “Pueyano Nacaco”. Nojoriiri tii Jesu teeteree maca niyacutesanojinia. Cuno caapiqui sesa miijiacari teetesaa-reejuhuaj, niquiriyatu na miaquetajara, tamonu na muenecara. ³⁴ Jesu jaara tari pijosaariquiaa maca niyacutesanoocua, nojuajaari na Que Pueyaso sequeree:

—¡Cua Quenaa, quia jiyanoori nio pojori! Majaari nojori niishiniu casaa na miitiuyani.

Na nuhuaji, soldadohuari saitia tacuarishijiooree, nojori niishiniuria taa nojori seraatianutaniya Jesu toqueni. ³⁵ Pueyari Jesu shootiariquiaa. Judiocuaca jiyaniijianucuaari jaarajaaja Jesujiniji naa tama sequetooriquiaajaaja:

—Nojuajaari saaja tamonu pueya naatanijiojua. Quiarijia, nojuaja jaara seetanujanaa Pueyaso Jiyarosano Cristo quiri, cuara roseera niyacutesanojiniji pa niqiara.

³⁶ Soldadohuari Jesu macaatiriquiaajuhuaaj. Nojoriiri Jesu raateree pi-
iquia vino juucua. ³⁷ Jesu sequetureeri:

—Quiaa jaara Judiocuaca jiyaniijia quiri, iniyacutesanojiniji quia rosere-
cuarajaj!

³⁸ Jesu nacaacuma, suruhuatuneeri rupotasaquiaari naajiosano Griego
rupaajinia, Romano pueya rupaajinia, Hebreo rupaajinianio. Tii naajio-
tasano quiriquiaari naa nocuara pueya saquirojotasano: “Nio pueyanoori
Judiocuaca jiyaniijia”.

³⁹ Tamonu cuno sesa miijiacajininio Jesu shuriucua teetesano
quiriquiaani, nojuajaari Jesu rerequeteriquiaajuhuaaj. Naa Jesu
sequeriquiaari:

—Quiaa jaara Pueyaso jiyarosano Cristo quiri, tama quia roserejaaja
cuniquiji. ¡Canaa quia roshinijiorejuhuaaj!

⁴⁰ Narta sesa miijiaari na juaari:

—¿Quiaateeri Pueyaso puereyashijia? Quiaari mosaanutaniyajuhuaaj.

⁴¹ Pajaniya cutaraari sesa pa miiniucua naquiya miishiyani. Paacuajaari
maninia saniitioshiyani sesa pa miiniucua. Saniniuujia, nio pueyano pa
tajinia nujuataani, inojuajaari sesa miyashijia cutara!

⁴² Na nuhuaji, narta sesa miijia juaaniaari Jesu sequeree:

—Jesunaa, majaari cua niyajetanuuja, Pueyaso jaara quia jiyatere Jiyani-
ijajanaa quia quiniuria.

⁴³ Jesuuri na riucaaree:

—Seetanujuanaa quia sequeyanijia, quiarijiani, nio juucaja, quiaari cuata
quintianiya shuquiriaatia quishaqui cutara.

Jesu cusosacari

(Mt 27.45-56; Mr 15.33-41; Jn 19.28-30)

⁴⁴ Panacari, jiyari ninishiquiria quiquiaari puetunujuanaa, juhua niucua!
Pananu piriushacari, cuhuatemohuari. ⁴⁵ Jiya quishacarijia ninishiqui,
jiyacaritij, Jerusalén tiacajinia Pueyaso Secojojua tajinia, jiyanohua shiqui-
iquia toquejiniji sohuaacari noojiaacoji sutequiaari puetunujuanaa quera-
jaquera! ⁴⁶ Jiyacarijihuaaj, Jesuuri nacaree:

—¡Cua Quenaa, cua sohuanu quia cojuare!

Naa na sequenu nuhuajitij, Jesuuri cusoquee.

⁴⁷ Romano soldadohua jiyaniijia niquishacari puetunu niojuanaa, nojua-
jari maninia sequeree:

—¡Seetanujuanaa, nio pueyanoqui sesa miyashijia quiquianu!

Naa na sequesanoori Pueyaso shuquiriritiji.

⁴⁸ Puetunu pueyajanaa, canapuete Jesu shootiariquiaa cusoyanoni, no-
joriiri taraatia na tajinia quiojoquiaariuhua. Nojoriiri tama na jiriquiajaaja
piquiniuuquiaariuhua, jiyanohua nojori tacaaniutia naa nojori monuucua
Jesu. ⁴⁹ Saniniuujia, puetunu Jesu niishishano pueyajanaari tii jiyojetaro-
huajaa, maajipohuaajuhuaaj, canapuete Jesu nuhuajiquiaari Galilea jiyajini-
jicujani. Puetunu nojorijianaari tucuaaanuji niqutiariquiaa Jesu.

Jesu quete niasacari raaco

(Mt 27.57-61; Mr 15.42-47; Jn 19.38-42)

⁵⁰ Tamonu maninia pueyanoori quiquiaari. Nojuajaari Pueyaso toji-
jia pueyano quiquiaari Arimatea tiacajininio. Cuno tiacaari Judea jiya-
jiniajuhuaaj. Cuno pueyano sesa quiquiaari José. Nojuajaari Judiocuaca
jiyaniijianucujininio quiquiaari. ⁵¹ Cuno Joseeri Pueyasocua tiuuja
quiquiaari. Nojuajaari pueyaracaanu sashijia, Pueyaso Jiyarosocoriquiano
cuara Jiyaniijiaari jiyatesaaria cutara. Cunora, majaari José paniniu

quiquiaari cutara, narta jiyaniijianucua sequesacari Jesu cuaara mosaaria. ⁵² Naacuaajitij, Jesu cusosacari, Joseeri Pilatoocua quiaquiaari, Jesu quete na masenura. ⁵³ Na nuhuaji, Jesu quete roshinirii niyacutesanojinijiiri. Na jiuniocoreeri cohuajaque quenaaruque toquejinia. Jesu quete niaree tarijia na jiuutianishano saajiajiniaari. Cuno raajinia, juhuanojuaja maja macu niasaanu quiquiaari. ⁵⁴ Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori samaatenu juucaari quera coteeriquiaa tari. Judiocuacaara, pananu tiuquishacari, tamonu juucaari tari coteequiaari nojoriria.

⁵⁵ Cuno maajipohua, cante Jesuta nijioquiaari Galilea jiyajiniicujajani, cuno pojoriiri José nuhuajiquiaari raajiniara. Nojoriiri raaco niquishii, taa Jesu quete niasaareeni. ⁵⁶ Nojori riujuushacariuhua na tiajiniohua, nojoriiri juhuataja shanohua jaanutaja cojitijosuhua, macuucua nojori niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaaricujajani.

24

Jesu samiitiasacariuhua

(Mt 28.1-10; Mr 16.1-8; Jn 20.1-10)

¹ Coteenu semaana juucajinia, cuno maajipohuari tariquicuaji raajiniara quiaquiaari. Nojori cojitijosano shanohua jaanutaja patootaareeri. ² Nojori tiuquijiosacari raajinia, saajiajiniji quejasano raa tiootu niqutiushiiri tariucua tamocora shuuquitishano. ³ Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete. ⁴ Nojoriiri shiriiquirii. Maajaari nojori niishiniu quiriquiaa taa nojori miiniutianiyani. Canashiyajuij caapiqui pueyari nojori shuriucua nujuatuquee. Nojori toqueeri shacantuque quiriquiaa. ⁵ Maajipohuari na puerenuta jiyocuara naniquioree. Cuno canuuri nojori sequeeree:

—¿Casaara nia pajeya saminio pueyano macu niojosaquini? ⁶ Maja tari nia na quiniu. ¡Tari samiitiarohuano! ¿Niaateeri tari niyajetaree na sequesano nijaniya, Galilea jiyajinia na quishacarijia? ⁷ Nojuajaari tari nia sequecanucua, nojuaja sesa miijica niqutiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

⁸ Jiyacaritij, maajipohuari shusha niishiquii tarijia Jesu sequesano nojori. ⁹ Nojori tacatesacariuhua jamajiniji, nojoriiri Jesu once saquiriojosano pueya caminiujuishuhua puetunu niojuanaa, puetunu Jesuucua tiunuaa pueyajanaano. ¹⁰ Cuno maajipohua, Jesu saquiriojosano pueya pohuataquiaariuhua, nojoriiri nio maajipohua quiquiaari: María Magdalena, Juana, Santiago nucua Maríajuhuj, socua tamasaca maajipohuano. ¹¹ Jesu once pueyara, maajipohua pohuatasanoori juhua paateca sequesano quiquiaari saaja. Nojoriiri saa cuaracashitirijiaa maajipohua pohuatanuusanu.

¹² Naajaa, Pedroori tiajiniji netequiaari raajiniara. Raaco na cuquesacari, saaja Jesu jiuniocotaja cohuajaque toque niquiquiaari maanoori. Pedroori juhua jiuujiaaju tacateyarohua na shiriiquiniutia, na niquishanojiniji, maajipohua pohuatasanojinijinio.

Jesu tojtianaa pueya niquishacari Jesu, nojori quiasacari Emaús tiacajiniara

(Mr 16.12-13)

¹³ Cuno domingo juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora quiquiaari Jerusalén tiacajiniji, niohuacata quiasacari tiriara. ¹⁴ Nojori quiojosacari nucuaco, nojoriiri Jesujiniji pocoojoriquiaa, mariyata shusha naataja pueya miishanojiniji Jesu. ¹⁵ Naa nojori pocoojosacari nucuacotej, Jesujuanaari jiyacari nojori rupusee. Juhuajanya nojoritia pacutaareeri. ¹⁶ Majaari nojori niishiniu quiquiaari cana pueyanote cuno quiquiaarini. Nojori namijaari tojequiaari, maja nojori niishiniuria Jesu. ¹⁷ Jesuuri nojori nequesotaree:

—¿Casa nia pocoojotaacuaani?

Nojoriiri nujuatuquee. Taraajecoyano niquishaariquiaari.

¹⁸ Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucaaree:

—Puetunu pueyajanaacuaajaari niishiya casaate Jerusalén tiacajinia miishaarucuaa taraatiani. Quiaacuaajaari Jerusalén tiacajinia quiquianujuhuaj. ¿Quiaatucua casaara niishiyaquirini casaate miishaarucuaani?

¹⁹ Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—¡Nazaret tiacajinijinio Jesuuri mosaarucuaajaj! Nojuajaari Pueyaso sequesano caminiujiunia quiquianu. ¡Jiyanohua maninia quijiaari na cumaacata na miijosano, na niishitiojosanojuhuaj! Pueyaso timitiasano quijiaari, puetunu pueya panishanojuanaanio. ²⁰ Pueyacuara secojonaa jiyaniijianucua, mariyata pa camarucuaari na niquitorucuaa Romano jiyaniijia na motesocoriquiano. Niyacutesanojinia mosaarucuaari. ²¹ Canaari juucua jiyaniqianuni, nojuajaari Romano pueya taanuunutaniya, pa Israel pueya quiniuria juhuajaniya tama pajaniyajaaja. Quiarijiani, jiuujanaraca juucaari tari na shoconujiya na mosaanujiniji. ²² Tamasaca maajipohua canaa maanujinijinioori canaa shirioree nojori pohuatasanta. Nojoriiri quiarijia tariquicuaj quiojomaa Jesu raajinia. ²³ Nojoriiri maja na riuriatanu quishii na quete. Nojori tacatesacariuhua, nojoriiri canaa pohuatasuhua, nojoriiri Pueyaso seya niquirii juhua na maquenujinia. ¡Cuno Pueyaso seyanaari nojori sequeree, Jesu tari samiitiarohua! ²⁴ Na nuhuaji, tamasa canaajinijinioori raajinia quiojiyareejuhua. Seetanujuanaa naa quiriquiaari, taa maajipohua sequeree canaacujani. Maja cutaraari nojori niquiniu quirii Jesu.

²⁵ Jiyacaritij, Jesuuri nojori sequeree:

—Pueyanaa, majaquiiri juhuanojuaja nia niishiniu. Niaari taacanuyajaa puetunu tariucuaaanu Pueyaso sequesano caminiujiuniaa naajiotasanoocujanaa nia tuuniuria. ²⁶ ¿Majateeri naa na pohuatasaanu quiquiaaricuaaja: “Cristoori coteenu naa mosaanutaniyaquij. Na nuhuaji cutara, jiyanohua cumaacaracara quijiaara jiyatesaanutanihuari Jiyaniijianaa na quiniuria”?

²⁷ Jesuuri juhuacatecara nojori niishitiojoree puetunu tariucuaaanu Pueyaso Rupaajinijianaa, tee nojuajiniji naajiotasano quiyacujani. Moisés naajiotasanojiniji pohuatanu coteereeri, na nuhuaji, puetunu Pueyaso sequesano caminiujiuniaa naajiotasanojinijijianaanio.

²⁸ Nojori tiuquishacari cuno tiacajinia, terara nojori quiojoriquiaacujani, Jesuuri juhua shocoriquiano canujoriquiaa. ²⁹ Nojoriiri nojoritia na jiyotetenu paniriquiaa jiyanohua. Nojoriiri na sequeree:

—¡Niyaja canaata quia jiyojere! Paa tari niniyareeni.

Naaratej, Jesuuri nojoritia jiyojese cuniqui. ³⁰ Jesu jaara nojoritia cajiriquiaa tari miaquejajinia, nojuajaari pan ririi. Nocuara Pueyaso

secojoreeri. Nojoriria na neecasereeri. Na nuhuaji, nojori serotareeri. ³¹ Jiyacaritij, nojori namijjaari juhua riateguequee. Jiyacariqui na niishi-tiuquuiiri. Jesuuri saaja shaajequee cuniquijia nojori tajiniji. ³² Nojoriiri sequetooree:

—¡Jesucuaajaquiri quiriquiaa! ¡Cunora poojiaqui jiyamitia timiriquiaa na pocoojosacari pajaniyata nucuamaji, nojuaja jaara niishitiojoriquiaa pajaniya Pueyaso Rupaajinia naajiotasantej!

³³ Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén tiacajiniara tacaretaarohuari. Nojori tiuquishacariuhua, nojoriiri puetunu Jesu once saquiriojosano pueyajanaa riuriatasuhua tii tariucua rerejono, mariyata socua narta Jesu pueyata. ³⁴ Tariucua tiajinia quiniaari Emaús tiacajiniji tiuquijionaa sequeree:

—¡Pa Jiyaniijiaqui seetanujuanaa samiitiarohua! ¡Simónri na niquirii!

³⁵ Na nuhuaji, shusha tiuquijionaari nojori pohuatareejuhua, taa Jesu pocoojoriquiaa nojoritiani, nucuaco nojori quiasacari, mariyata taa nojori niishirii nojuajani, pan na neecasacari nojoriria.

Jesu muetasacariuhua na saquiriojosano pueyacua

(Mt 28.16-20; Mr 16.14-18; Jn 20.19-23)

³⁶ Nojori pocoojosacarijia nojori niquishanojiniji Jesu, jiyacaritij, Jesujua-naari canashiyaquiji nojori tajinia nujaaquee. Naa nojori sequereeri:

—¿Niaate quiyajaa? Nioojia nia cajitiri.

³⁷ Nojoriiri shirriiquituuqui. Jiyanohua puereturiquiaari. Nojoriiri Jesu jiyaniriquiaa naaqui. ³⁸ Jesuuri nojori sequeree:

—¿Casaara nia pueretiuyani? ¿Casaara nia jiyajenetaa janiyani? ³⁹ Cua juaashiquia nia niquiri, cua nihuacanio, nia niishiniuria janiyacuaajaari quiyani. ¡Cua cootiuri! ¡Cua niqutiuri! Naaquiiiri maja cuaqueyaraca, maja nucuhearaca taa nia niquiya janiyacujani.

⁴⁰ Naa nojori na sequesacarijij, Jesuuri nojori niqutiijoree na juaashiquia, na nihuacanio. ⁴¹ Puera nojori jiuujiatesacari, puera nojori shuquirishacarijuhuaj, nojoriiri taacanuuriquiajaa, maja naasucua Jesu. Cunora, Jesuuri nojori sequeree:

—¿Niaate miaquesocoriquiano jitiaacuaa?

⁴² Nojoriiri Jesu niqutioree sapitiaaja raqui caquishano. ⁴³ Jesuuri na maseree. Nojori niquiara na miaquereeri. ⁴⁴ Na nuhuaji, nojori sequereeri:

—Janiyari naa miishaarucuaani taa cua pohuataquiaari nijaniyacua-jani, pueyaracaanu niaata cua quishacari tarijia. Nia sequequiaaricuaajani-jia, janiyari naa miishaanutaniyani, taa Moisés naajiotaquiaari janiyajini-jicujani. Puetunu Pueyaso sequesano caminiujuuniaajanaari janiyajiniji naajionuutaquiaarijuhuaj. Supuetana Davidri janiyajiniji naajiotaquiaar-ijuhua na jaaquequejoneejinia. Quiarijia tari tohuateerucuaari puetunu janiyajiniji cuno naajionuutasanojuanaa.

⁴⁵ Jiyacaritij, Jesuuri nojori niishitirii tariucuaaanu Pueyaso Rupa naajiotasano. ⁴⁶ Nojori sequereeri:

—Tariucuaaanu naa naajiotasanoori quiya: “Pueyaso Jiyaroso-coriquianoori mosaariquiano, na nuhuaji, jiuujianaraca juucajinia samiitianutaniuhuari”. ⁴⁷ Naa naajiotasaquiaarijuhuaj, Jerusalén tiacajinia, janiyajinijiiri pohuataasaanutaniya pueya niquiara, na nuhuaji puetunu jiyacajiniajanaano. Pueya tiushacari cucua, nojori jaara noojica tacatorohua sesa nojori miiniujiniji, sesa nojori miishanoori tuujusaanutaniya, Pueyaso jiyanooshacari nojori. ⁴⁸ Niaacuajaari puetunu cua miishanojuanaa niqijijaca. ⁴⁹ Cua tojitiare. Janiya jaara jiyocuaaanu

quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricuajani. Niyaja pootia nia quiri Jerusalén tiacajiniani, niaa jaara jiyocuacaanuji niriqiano cumaaca maserejaatijia.

Jiyocuacaanu Jesu tacasacariuhua
(Mr 16.19-20)

⁵⁰ Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqúi nojori quishacarijia, Jesuuri na juaashiquia shiitioquiaari nojoriicuara na secojosacari Pueyaso, Pueyaso jiiitanura maninia pueyaracaanu nojori. ⁵¹ Nojoriicuara na secojosacarijia, Jesuuri nojori shuriucuaji tacanishaaquiaari jiyocuacaanu. ⁵² Nojoriiri na shuqiritiaree. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanoehua shuquiriaatia quiriquiaa. ⁵³ Nojoriiri pueyaracaanu quijia Pueyaso Secojua tiajinia. Tii Pueyaso maniniuhuaqueetatumia pueyaracaanuuri. Tariucuaja.

JUAN NAAJIOTASANO JESUCRISTOJINIJI

Pueyaso Rupaa jatasacari pueyanora

¹ Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijiaaariuhuj. ² Jiya coteesacari, nojuajaari na Que Pueyasota quiriqiaa. ³ Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipininia quiniu socua. ⁴ Nojuajaari quijiajuhuanajaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniuriajuhuaj. ⁵ Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. ⁶ Pueyasoori quiari naataja tamonu pueyano jiyaroquiaari, Neyanujiniji pohuatariquiano. Na sesa quiquiaari Tiuquinijiona Juan. ⁷ Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesuucua, nojori jiuujia na cuhuatanura. ⁸ Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishiniuria cante saniya poojia cuhuatana cutarani. ⁹ “Pueyaso Rupaari” seetanu poojia cuhuatanajanaa. Nojuajaari Jesucristo. Jiyocua niquiaariiri puetunu pueyajanaa niishiniuria cante Pueyasoni.

¹⁰ “Pueyaso Rupaari” mijiria rucuanajoja quiquiaari. Pueyari tama nojori Shipinijajaaja niishiyaquiquiaari. ¹¹ Tama na saquiriojosano Israel pueyacia niquiaariiri. Nojoriiri na tamacaquiaari saaja. ¹² Saaja noojiaqueya pueyari nocua tiuuquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. ¹³ Nojoriiri Pueyaso jatanishano, seetanujuanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajuhuj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiushacari saaja.

¹⁴ “Pueyaso Rupaari” seetanujuanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na miijosano niquiquiaarini. Jiyanohua maninia quiquiaariiri. Na Que Pueyasoori na cumaqijia jiyanohua maninia na miiniuria, Neyanuniyojua na quishacari. Nojuajaari saaja seetanu rupaajanaa sequeja Pueyasojiniji. Jiyanoojia quijiaari. ¹⁵ Tiuquinijiona Juanri Jesucristojiniji pohuataquiaari pueya niquiara. Jiyanohua na rupaa paaretaquiaariiri pueya tojitianura nojuaja. Naa sequejaari:

—Janiyacuaajaari nojuajiniji nia pohuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyaniijajanaa cutara janiyajiniji. Nojuajaari tari quijia cua quiyaquishacarijia.

Juanri naa pohuataquiaari Jesucristojiniji.

¹⁶ Jiyaniijajanaa Jesucristo quiniucua, puetunu pajaniyajanaari na jitasanojiniji masequiaani. Jiyanohua capora na quiniucua, nojuajaari pueyaracaanu pa cumaqiuiqiaa. ¹⁷ Pueyasoori supuetana Moisés naajotequiaari na rootasano pajaniyara. Cunoori maja na cumaqiniu quiquiaari pajaniya. Quiarijia saniniuujia, pa panijia Pueyaso quiniucua, nojuajaari

Neyanujuanaa jiyaroquiaari pocua, pa jiyanooshaanura, naajuhua, see-tanu rupaajanaa pa niishiniuria nojuajiniji. ¹⁸ Majaari quenaaja tamonu pueyanó niqiniu quiia Pueyaso. Neyanu, cante na Que shuriucua quiija-acuajani, nojuajaari na Que pa niishitioquiaari.

Tiuquinijiona Juan pahuatasano Jesucristojiniji
(Mt 3.11-12; Mr 1.7-8; Lc 3.15-17)

¹⁹ Jerusalén tiacajinjinio canaa Judiocuaca camarucuaari na pueya jiyaramiquiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niqiuoacuajinio supueno pueya. Noojiaqueya cuno pojorijinjinio-oori quiquiaarijuhua pueyacuara secojona pueya. ²⁰ Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujuanaa naa nojori sequequiaariiri:

—Janiyari maja Pueyaso Jiyarosano Cristoni.

²¹ Cuno pueyari socua na nequesotarohua:

—¿Canteeri quiajaniyani? ¿Quiaa jiyoteeri samiitiarohuacuaa?

Tiuquinijiona Juanri saaja nojori riucuaaree:

—Maja. Janiya maja supuetana Elíasni.

Cuno pueyari socua na nequesotarohuacuahuaj:

—¿Quiaa jiyoteeri Pueyaso sequesano caminiujiunia, noj tariucuaaanu sequesaaquiaari niriqianotej?

Juanri saaja nojori riucuaaree:

—Maja.

²² Cuno pueyari socua na sequere:

—Canaa quia pahuatareja, ¿cante quiajaniyani? Canaacua saniniuujia canaa camarucua pahuatasuhanijia.

²³ Juanri saaja naa nojori riucuaaree:

—Janiyacuaajaari nooni, cariiquia jiyajinia nacajatej, taa supuetana Isaías juhuacarijia naajiotaquiaari janiyajinjicuaajani: “¡Jianijiaacuaji nia nu-unore maninia! ¡Maja shuutiuniu!”

²⁴ Jiyacaritij, Fariseocuaca camarucua jiyaramiquishano pueyari Tiuquinijiona Juan nequesotaree:

²⁵ —Quiaa jaara quiyaquiri Cristo, Elíasjuhuaj, cuno tariucuaaanu sequesaaquiaari niriqiano Pueyaso sequenu panishano caminiujiuniatej, ¿casaara pueya quia tiuquinijiya moojinacuaraarini?

²⁶ Juanri nojori riucuaaree:

—Janiyari nareja moojinia tiuquinijiya pueyani. Saniniuujia, tamonuuri niya quia, nia niishiyaquishoojua. ²⁷ Nojuajaari cua nuhuaji niniutianiya. Nojuajaari Jiyaniijajanaa cutara. Majaari quenaaja cua naata na seru qiniu na sapatu neyocua cua saacatanura nera.

²⁸ Naa cuno pojori nequesoreesacari Tiuquinijiona Juantej, cunoori quiriquiaa Betania jiyaniishano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuajani.

Jesu juhua Pueyaso borregoniyojua pocuara mosaariquiano

²⁹ Tariqui saniniuujia, Tiuquinijiona Juanri Jesu niquirii nocua niyano. Juanri naa sequere canaa niqiuara:

—Paari pueyaracaanu mooquiaa borregohuani Pueyaso jiyanooniuria pajaniya. ¡Nia niquiri! ¡Cuno cumaji canujiyani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanoiniji pa jiyanooshaanura! ³⁰ Janiyacuajaari nojuajiniji nia

pohuatajani janiya jaara nia sequejani: “Cua nuhuaji niniutianiyari Jiyani-
ijiajanaa cutara. Nojuajaari tari rishijia cucuaji cua quiyaquishacari-
jia”. ³¹ Janiyari na niishiyaquijiajuhuaj, cante nojuajani. Naajaa, janiyari
parta Israel pueya tiuquinijioquiaa moojiniani, noojia nojori jeenucuanura,
Pueyaso Jiyarosano nojori niishiniuria cutara.

³² Tiuquinijiona Juanri pueya sequereejuhuaaj:

—Janiyari Pueyaso Sohuanu niquiriucuaani jiyocuacaanuji roseyano
nocua juhua mococoonu. Nocua tiuushiiri. ³³ Cuno, cua jiyaroquiaari pueya
cua tiuquinijionura moojiniani, nojuajaari cua sequequiaari: “Quiaa jaara
cua Sohuanu niquiri pueyanocua roseyano, nocua na tiuuniuria, quiocua
niishiri, cunocuaajaari cua sequesano quiajaniya. Nojuajaari cua Sohuanu
tiuquinijionutaniya pueya jiuujiajinia cutara, seetanujuanaa cua muerasu
nojori quiniuria”. Nojuaja jaara naa cua sequeyaquiquiaari, janiya maara
na niishiyaquiquianuni. ³⁴ Janiyacuajaari tari na niquiquianuni. Naaratej,
janiyari saniniujia nia pohuataani pueyanaa, jnojuajaari seetanujuanaa
Cristo, Pueyaso Niyanu!

Coteenujanaa Jesu pueyajiniji pohuatasano

³⁵ Tariqui, Tiuquinijiona Juanri tii quishiiquihua caapiqui na puey-
ata. Janiyari niquiriyatu cuno caapiqui pueyanojinijinio quiriquiaani.

³⁶ Tiuquinijiona Juan jaara Jesu niquiquiaari shocoyano, jiyacari canaa
sequereeri:

—iNia niquiri! Cunoori cua sequesano niajaniya, Pueyaso Jiyarosano
pocuaa mosocoriquiano juhua borrego, sesa poojia seque jeequesaanura.

³⁷ Naa canaa tojishacari Juan sequesantej, canaari Jesu
nuhuajiquiaarini. ³⁸ Jesuuri canaacua tacateree. Canaa na niquishacari
na nuhuaji sacuaano, canaa sequereeri:

—¿Casaan nia panianiyani?

Canaari na sequereeni:

—Niishitiojonanaa, ¿tee quia maquequiaacuaani?

³⁹ Jesuuri canaa riucuaaree:

—Miji. Nia niquiquii.

Canaari nata quiaareeni. Canaari na quijia niqutiushiini. Tari pananu
piriuushacariiri quiriquiaa jiyacari. Cunora, canaari tii maquetusee Jesu-
tani.

⁴⁰ Tiuquinijiona Juan niqitiniucua Jesu canaa, canaari Jesu nuhua-
jiquiaarini. Andrésri cua cojiriquiaa. Andrésri tarajanu jiiitaja. Na sesaari
quijia Simón Pedro. ⁴¹ Tariquicuaji, Andrésri ritia tarajanu Simón pajenuu-
cua quiaquiaari. Na riuriasacari, na sequereeri:

—iCua tarajanunaa, canaari Cristo niquiriquiaacuaani, tariucuaaanu
Pueyaso sequesano na jiyarosocoriquianotej!

⁴² Na nuhuaji, Andrésri tarajanu Simón jiyataaree Jesuucua. Jesu
niquishacari Simón, na sequereeri:

—Quiaacuajaari Simón, Juan niyanu. Quiarijia saniniuuja, quia sesaari
qiniutianiya Cefas.

Griego rupaajinia, niiori sequeya Pedro. Pedroori saniniuuja pueyano
rupaajinia sequeya “Saajia”.

Jesu saquiriojosacari Felipe, Natanaelnio

⁴³ Tariqui, Jesuuri Galilea jiyajiniara quiariquiaa. Felipe riuriasamaari.
Na sequereeri:

—Cua tarajare cua pueyano quia quiniuria.

⁴⁴ Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedrota cuno tiacajinijinio quiquiaarijuhuaj. ⁴⁵ Na nuhuaji, Felipeeri Natanael pajeree. Na riuriasacari, na sequereeri:

—¡Canaa noo pueyano niquiriini, Moisés nojuajiniji naajiotaquiaari tariucuaaanutej! Tariucuaaanu Pueyaso sequesano caminiujiuniaa pueyari nojuajiniji naajionuutaquiaarijuhuaj. ¡Nojuajaari Nazaret tiacajinijinio Jesu, José niyanu!

⁴⁶ Natanaelri saa riucaareejaa:

—¡Jaj! ¿Na naatate maninia miijia pueyano supenujuaara cuno sesa miijiaa Nazaret tiacajiniji?

Felipeeri na sequeree saaja:

—¡Miji! ¡Pa niquishii!

⁴⁷ Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niquiohuacujinio supuenojuanaa cutara. Majaari na niishiniu sapojonu.

⁴⁸ Natanaelri na sequeree:

—¿Taa quia niishiya janiyarini?

Jesuuri na riucaaree:

—Felipe sequeyaquishacarijia quiajaniya cucua quia niniuria, janiyari tari quia niquirii coojiatani, higo naana pajama tateyano.

⁴⁹ Natanaelri shiriquirii. Jesu sequereeri:

—Niishitiojonanaa, ¡quiaacuaajaquí Pueyaso Nyanu! ¡Quiaari parta Israel pueya jiyaniijiaranojuhuaj!

⁵⁰ Jesuuri na sequeree:

—¿Quiaateeri cucua tiuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanjia, quiaari na nuhuaji cua cumaacata cua miijiosano niquniutianiya cutara.

⁵¹ Jesuuri cuniqui quiniaa pueya sequereejuhuj:

—Seetanujuanaa nia sequeyanjia, niaari jiya cajiniocua niquniutianiya riateno. Pueyano cua quishacari, niaari Pueyaso seya niquniutianiya cucua roseetaano, cucuaji taqueetaanojuhuaj.

2

Jesu jatanishacari mohuaca vinora, pueyano camishacari

¹ Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masuusano pueyari queranacuriquiaa. Jesu nucuaari tii quiriquiaajuhuj. ² Jesuuri na saquiriojosano pueyata masusaaquiaarijuhuaj, camishacari queranacunura. Janiyari na saquiriojosano pueyano quiriquiaa jiyacari tarijuhuaj. ³ Jiyacaritij, mashacaari ritia puequema. Na nucuaari Jesu sequeree:

—Sanaa, mashaca tari puequema.

Mashacaari quiquiaari uva caaca, vinotuhuj. ⁴ Jesuuri na nucua riucaaree saaja:

—Maajiniaa, ¿casaara quia sequeya janiyani? Juhuanouaja maja cua poonijosacari Pueyaso cumaacata.

⁵ Na nucuaari pueya raatojonaa sequeree:

—¡Niocua Jesu tojirijia! Jaara nia sequere, niocua puetunu na sequesano-juaana miiri.

⁶ Tii cajitiuriquiaari seis conatu, saajiajiniji quejasano. Canaa Judiocua-caari sequeyarucua shuquirioojua tiajinia nojori tiuquishacariuhua, juhua jeequesano nojori quiniuria Pueyaso niquiara. Nojori mohuaca cajiticojua

quiquiaariiri cuno conaa. Jiyanohua puereetucocua quijiaari. Cuno conatu-
uri setenta tumococua mishaja mohuacata mishinishano quijia. ⁷ Jesuuri
pueya raatojonaa sequeree:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijioree. Mohuacaari conaa rupaacuma
puecacoose. ⁸ Jesuuri nojori sequeree:

—Quiarijiani, tiji nia shuuri. Queranacunu camaru nia sanitiore coteenu.

Raatojonaari na raatesee. ⁹ Queranacunu camaruuri vinora jatano mo-
huaca sanirii. Majaari na niishiniu quiquiaari cuno na ratusanoori mo-
huacajiniji jatanishaaree vinora. Saaja pueya raatojonaa cutaraari na ni-
ishiriquiaa. Nojoricuajaari mohuaca mishinijioree cuno conaajinia. Quer-
anacunu camaru saniniu nuhuaji cuno ratusano, camiyano pueyano piiriiri.

¹⁰ Na sequereeri:

—Pueyaruhuatijia coteenu raateja shocuanacu vinote. Puetunu masuu-
sano pueya jaara tari raruure queraatia, na nuhuaji raatesano cutaraari
shaarunacu vino. ¡Quiarijia saniniuujia, nio cua ratusanoni, cunoori socua
maniniuniacu vino coteenu quia raatojotesanoinijii!

¹¹ Naa Jesu jatanishacari mohuaca vinoratej, cunoori coteenujuanaa na
cumaacata na miishano quiquiaari Caná tiacajinia, Galilea jiyajinia. No-
juajaari naa niquitiquiaari Pueyasojiniji na cumaaca. Naacuajitij, canaa
na saquiriojosano pueyani, canaari niishiquiaarini Jesuuri seetanujuanaa
Pueyaso Jiyarosano.

¹² Na nuhuaji, Jesuuri Capernaum tiacajinia quiaaree na nucuata, tapuey-
ocuacatajuhuaj, canaa na saquiriojosano pueyano. Canaari tii camueenu-
juquiaari pasajani.

Jesu jaacasacari seya niqutiojonaa Pueyaso Secojoua tiajiniji
(Mt 21.12-13; Mr 11.15-18; Lc 19.45-46)

¹³ Quera canaa Judiocuaca queranacusacari Pascua juucara Jerusalén tia-
cajinia, Jesuuri tii canaa jiyataareejuhuaj. ¹⁴ Na tiuquishacari, Pueyaso Seco-
jojua tiajinia quiamaaari. Tii niquishii pueyari juyaca niqutiojiyano Pueya-
soocuara puecosocoriquiano, borregohua, noseyano. Pueyari tii na juhua
cutucujajinia cajituriquiaajuhuj, pueya na tacatojonura taucuaca cumaneeca,
Pueyaso Secojoua tiajinia niqutiojosocoriquiano cumaneecara.

¹⁵ Naa na niquishacari pueya miyano Pueyaso Secojoua tiajiniatej, Jesuuri
seya morojotaja jiyocua tatucuaaree. Na majacutajara na shitiareeri. Cunota,
puetunu nojorijianaa jaacaree Pueyaso Secojoua tiajinijiiri, puetunu nojori
borregohuatajanaa, mariyata puetunu nojori juyacatajanaano. Cumanee-
ca rerecojoree jiyocuara juhuacutucujajiniiri. Naajuhuj, cumaneeca
juhuacutucua caponeetareeri. Pojotaariquiaacuaari. ¹⁶ Noseya niqutio-
jonaa pueya sequereeri:

—¡Niiquiji nia patootare nio noseya! ¿Casaara nia jiyatecanu juhua casami
niqutiojosaquiria cua Que tiani?

¹⁷ Jiyacaritij, canaa, Jesu saquiriojosano pueyani, canaari niishiquiini, see-
tanujuanaa tariucuaaanu Pueyaso Rupaajinia naa naajiotasanoori quiya:
“Quia tiaacua juaatishaaree jiyanojuanijia, jiyanohua cua panishacari quia
tia”.

¹⁸ Naa Jesu miiniuucuatej, narta Judiocuaca camarucuaari Jesu nequeso-
tataree:

—¿Cante quia sequerucuaa naa quia miiniuriani? ¡Canaa quia niqi-
tiricuaraja Pueyaso cumaacata quia miishano, canaa niishiniuria quiaari
seetanujuanaa Pueyaso Jiyarosano!

¹⁹ Jesuuri nojori riucuaare miriqui:

—Pueyaso tia nia niyartare, janiyacua saaja jiuujianaraca juucajinia na tucuatrohua tianu tamajaajani.

²⁰ Narta Judiocuaca camarucuaari na riuucaree:

—¡Cuarenta y seis marijaari shoconujuquiaari pueya tucuatnura nio secojojua tia! ¿Quiaateeri jiyaniya quia naata na tianuhua ritia, saaja jiuujianaraca juucajinia? ¡Maja quia naata!

²¹ Jesuuri tama na cuaqueyajaaja pohuatariquiaa, Pueyaso tia na sequesacari. ²² Naacuajitij, Jesu jaara samiitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuaaanu Pueyaso Rupaaajinia naajiotasanoocua tiuquiaarini, Jesu sequesanoocuanio.

Jesu puetunu jiuujia niishijajanaa cutara

²³ Canaari ocho juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniaa pueyari Jesu cumaacata na miiijosano niiquiaari. Naaratej, queraatia pueyari nocua tiuquiaari. ²⁴ Naajaa, majaari Jesu tiuuniu quiriquiaa seetanujuanaa nojoriicua. Nojuajaari nojori niishiriquiaa, taamueca pueyate nojorini. ²⁵ Tamonu pohuataaquishacaribia nojuaja, nojuajaari tari niishiya taamueca jiuujiaracate pueyani.

3

Nicodemo pocoojosacari Jesuta

¹ Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucujinijinio quijia, Fariseocuaca maanujinijiniojuhuaj. Tojishano pueyano. ² Jesuucua na tiuquishacari, naa na sequeseeeri:

—Niishitiojonanaa, quia cumaacata quia miiniucua canaa niquiara, canaari cunora niishiyani quiaari Pueyaso jiyarosano, canaa niishitiojoriquiano. Seetanujuanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijionu taa quia miiquiaacuaani.

³ Jesuuri Nicodemo sequere:

—Seetanujuanaa quia sequeyanijia, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jitianura nojuaja.

⁴ Nicodemoori Jesu nequesotaree:

—¿Pueyanotucua taa rasaanuhua, nojuaja jaara tari cumantumaca quiya? Majaari na naata na nasa saracajinia tiuquiniuhua na rasaunuhua.

⁵ Jesuuri na riuucaree:

—Seetanujuanaari cua sequesano. Cua tojiri. Paari coteenu rasaanquiaari pueyano pa quiniuriani. Saniniuujia, cante quiarinio pueyanora jataniaquishano Pueyaso Sohuanutani, nojuajaari maja Pueyaso jiiitiasanoniojua na quiniu quiniutianiya. ⁶ Mijiria pueya muetusanoori saaja pueyano. Saniniuujia, cante Pueyaso Sohanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano. ⁷ Naaratej, majaari quia shiriiquiniu puera, naa cua sequenuucua quiajaniatej, quiaa cuara rasuhua, seetanujuanaa quiarinio pueyano quia quiniuria. ⁸ Mijiria, paratuuri piyarajoquiaa taa na paniyacuajani. Paari nareja na cojuatunenu tojiquiaani. Majaari pa niishiniu teje na piyarojiyani, tee cunocora na quiaajaanuhua.

Naajaariuhuj, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

⁹ Nicodemoori Jesu nequesotarohuacuhuj;

—¿Pueyanotucua taa quiarinio pueyanora jatanishaarejaarani?

¹⁰ Jesuuri na riuacuarree:

—¿Majateeri quia niishiniu cua sequesano quiajaniya? Quiaari Pueyaso Rupaa niishitiojonacuaja Israel pueyara. ¹¹ Canaari seetanujanaa pohuataquiaa canaa niishishanoni, canaa niquishanojuhuaj. Niaari saniniuujia saaja na cuaracashitiquiaa, canaa pohuatasacari niajaniya seetanu rupaajanaa. ¹² Niaa jaara saaja cuaracashitiquiaa cua pohuatasano mijiria casaajiniji, ¿niaatucua taa niishiriqiuani, janiya jaara nia pohuatare jiyocuacaanuji casaani? ¹³ Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinio roseno cutara. Nojuacuajaari janiya. ¹⁴ Cariiquia jiyajinia pa supuetanaa Israel pueya rucuanesacari, Moisésri na shipinishano soconu nujuaretaquiaari macaacua, soconu sasuhua niquishocoriquiano. Na niquiniaa pueyari naatacoquiaariuhua. Naajuhuj, janiyari macaacua nujuaretasocoriquianoni. ¹⁵ Naacuajitij, puetunu cucua tiuuniaajanaari pueyaracaanu quijiaca quiniutianiya.

Pueyasoori puetunu mijiria quiniaa pueyajanaa panijia

¹⁶ 'Jyanohua cua Que Pueyaso paniniuucua puetunu mijiria quiniaa pueyajanaa, nojuajaari Neyanujanaa jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitioyaquishaanutaniya cutara. Nojori cutaraari pueyaracaanu rishijiaca quiniutianiya Pueyaso shuriucua. ¹⁷ Pueyasoori maja na jiyaronu quiaaari janiya pueya cua saniitionura. Seetanujanaa cua jiyaroquiaari cutaraari pueyacuaji Tacuna cua quiniuria.

¹⁸ Cante cucua tiuujiani, majaari na saniitiosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitiosocoriquiano jiyatesano quiya. ¹⁹ Janiyari mijiria niqiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniuucua. Sesa miijiaa nojori quiniuucua, majaari nojori paniniu cuhuatasano nojori quiniuria. Naaratej, nojoriiri saniitiosaanutaniya. ²⁰ Puetunu sesa miijiacajanaari cua niqiniu paniyashijia, pueya jiuujia cuhuatana cua quishacari. Majaari nojori ninu paniniu cucua, sesa nojori miishano mariqui niishishaareeri. ²¹ Saniniuujia, cante maninia miqiaani taa Pueyaso sequesane na Rupaajiniacuajani, nojoriiri cuhuashiqui quiniu panijiaa cutara. Nojoriiri cucua nijioquiaa na niishiaanura nojori miishano cutaraari puetunu maniniajanaa, taa Pueyaso paniyacuajani.

Tiuquinijiona Juan pohuatasacari socua Jesujiniji

²² Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. ²³ Tiuquinijiona Juanri jiyacari pueya tiuquinijioriquiaajuhua Enón tiacajinia, Salím tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijuhuaj tiuquinijosano nojori quiniuria. ²⁴ Juanri jiyacari nujuatejojuajinia nujuatesoo quiriqiaajaa.

²⁵ Cuno quishacari, Tiuquinijiona Juan pueyari tamonu narta Judio pueyanota pocoojoriquiaa taate pueya naata juhua jeequesano quiniu

Pueyaso niquliarani. ²⁶ Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pahuatacanutej, noo quiata quiqianu Jordán moo taquijiratej, nojuajana pueya tiuquinijiyahuaj. Puetunu pueyajanaana nocua quiojiya tiuquinijosano nojori quiniuria.

²⁷ Tiuquinijiona Juanri nojori riucaaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. ²⁸ Niajaniyacuajaari cua tojiqianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. ²⁹ Pueyano rupuenta jaara camiya necocuara, quiarijia cutara necocuaari seetanujuanaa saaja nerano. Naajaa, na rupuenta quishacari na shuriucua, na timitiaari na tojishacari necota pocoojiyano shuquiriaatia. Naajuhua, janiyari cunora shuquiriaatia quiarijia quiyani pueya rupuesacari Jesucristo. ³⁰ Janiyari cunora jiyarosaaquiaaricujani, pueya cua tojitiuniuria nojuaja. Naaratej, pueya cuaara carteera janiya, Cristoocua nojori pacunura saniniuuja, nojori tojiniuria nojuaja. ³¹ Cante jiyocuaaanuji niqiaaricujani, nojuajaari Jiyaniijajanaa cutara. Janiyari saaja mijiria quiniuria. Cunora, cua pahuatasanoori saaja mijiria cua tojishano. Jesucristo saniniuuja, nojuajaari jiyocuaaanuji ninio cutara. Nojuajaari Jiyaniijajanaa. ³² Naacuajitij, na pahuatasanoori tama na niqushanojuaaja jiyocuaaanu, na tojishanonio. Pueyari na pahuatasano cuaracashitiquiaa saaja. ³³ Canapuee Jesucristo pahuatasanoocua tiuujiacani, nojoriiri sequeya, seetanujuanaaqui Pueyaso sequesano Neyanujiniji. ³⁴ Pueyasoori jiyanojuaa queraatia na Sohuanu niqutioquiaari na Jiyarosano. Naacuajitij, seetanu Pueyaso rupaajanaa pahuataari. ³⁵ Pueyasoori jiyanojuaa panijia Neyanu. Naaratej, nojuajaari na jiyatequiaari puetunu casaa jitianarajanaa na quiniuria. ³⁶ Canapuee Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuuja, canapuee Neyanuucua tiuyashijiacani, nojoriiri tariucua Pueyaso juashano quiya. Nojoriiri saniitiosaanutaniya Pueyasooju nojori quiniuria pueyaracaanu.

4

Jesu pocoojosacari Samaria jiyajinjinio maajitia

¹ Fariseocuacaari pahuatasaaquiaari, jiyanojuaa queraatia pueya Jesuucua quiojiya na tojitiaana nojori quiniuria. Nojoriiri pahuatasaaquiaar-ijihuaaj, Jesuuri socua queraatia pueya tiuquinijia Tiuquinijiona Juanjiniji. ² Seetanujuanaa majaari Jesujuanaa tiuquinijionu quiriquiaa pueya. Saaja canaa cutaraari pueya tiuquinijioriquiaani. ³ Jesu jaara niishiquiaari Fariseocuaca naa pahuatasaarucuaa nojuajinijitij, nojuajaari Judea jiyajiniji jiyataquiaarihua canaa Galilea jiyajinaria.

⁴ Canaa quiasacari nuucalo, canaari Samaria jiyacuma tajiriquiano quiriquiaani. ⁵ Naa canaa quiasacari nuucacotej, canaari Sicar tiacajinia tiuquishiini, Samaria jiyajinia. Cuniquiji, cateca quiriquiaari supuetana José cuhuariquia, na que Jacobo niqutiosano nojuaja. ⁶ Cuno cuhuariquia-jinia quiriquiaari cuari, supuetana Jacobo jiuutiasano tariucuaaanu. Pueyaracaanu Jesu rucuanenuucua nuucamaji, nojuajaari cuno cuari shuriucua cajishii na samareenuta. Panacariiri quiriquiaa. ⁷⁻⁸ Jiyacaritij, canaari tiacajinia quiamaanii canaa miaquesocoriqiano canaa masenura casaa.

Canaa niyacari, cuno Samaria tiacajinijinio maajiiri cuarimia quiaquiaari mohuaca taqutianura. Jesuuri na sequeree:

—Cua raatere.

⁹ Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quiajaniyani? Quiaacuajaari Judio.

Cuno maajiiri naa sequeree Jesutej, na niishiniuucua Judiocuacacujaari maja na niqiniu paniniu quijia Samaria jiyajinijinio pueya.

¹⁰ Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiitiaa quiarani, quiaa maara cua sequere cua raatenura quiajaniya. Quiaa jaara cua masere, janiya maara quia raatere pueya samiitianijia mohuacani.

¹¹ Maajiiri na sequeree:

—Jiyaniijanaa, majaari quenaaja quia jiitanu casaa, mohuaca quia taquiriatajara. Nio cuariiri jiyanoahua tucuaa. ¿Quiaatucua teje taqutiare cuno mohuacani, pueya samiitianijiani? ¹² ¿Quiaateeri jiyaniijajanaa cutara, socua pa supuetana Jacobojiniji? Nojuajaari nio cuari tuujaquiaari canaara. Nojuajaari niquiji ratujua quiquiaari necohuata, na seesano seyano.

¹³ Jesuuri na riucuaare miriqui:

—Puetunu nio cuarijiniji ratujuacajanaari saaja jiyamuecoquiaa.

¹⁴ Saniniuujia, cante cua mohuaca ratunutaniyani, majaari socua na jiyamuenu quiniutianihua. Cua mohuacaari juhua samo naca pacartananiya pueyaracaanu noojajinia, shuquiriaatia na rishiniuria pueyaracaanu.

¹⁵ Cuno maajiiri Jesu sequeree:

—¡Pueyanonaa, cuno mohuaca cua niqutiore cua ratusocoriquiano, maja socua cua jiyamuenu, naajuhua, maja pueyaracaanu cua taquirioonura nio cuarijiniji!

¹⁶ Jesuuri na sequeree:

—Miji quia niyaca quia sequereo coteenu.

¹⁷ Maajiiri na riucuaare:

—¿Janiyate niyacaracajaraani, quiaa jaara naa cua sequere?

Jesuuri na sequeree:

—Quiaacuajaari seetanujuanaa cua sequeree: “Niyacaajunijia”.

¹⁸ Seetanujuanaari. Quiaari tari cinco niyacaaraca quiquiaari. Mariyata cuno, quiarijia quiata quiyani, majaari quia niyacajuhua.

¹⁹ Naa cuno maaji tojishacari Jesu sequesantej, Jesu sequereeri:

—Jiyaniijanaa, ¡quiaaqui Pueyaso sequenu panishano caminiujunia!

²⁰ Canaa supuetanaa pueyari niya nio tuhananuucua Pueyaso secojonuuja tarijia. Niajaniya saniniuujia, Judiocuacani, niaari sequequiaa Pueyaso cuara secojosaaria saaja Jerusalén tiacajinia.

²¹ Jesuuri na riucuaare:

—Seetanujuanaa quia sequereera maajiniaa. Cua sequesanoocua quia tiuuri. Quera quiniutianiyari Pueyaso nia secojosacari puetunu tiqiyocua nia quishacarijanaa. Majaari tari Pueyaso secojosaanu quiniutianiya saaja Jerusalén tiacajinia, nio tuhananuucujuhua, taa quia sequerecuaani.

²² Niajaniyari maja nia niishiniu cana nia secojoquiaani. Canaa Judiocuacani, canaa cutaraari niishiyani cana canaa secojoquiaani. Pueyasocua-jari canaa Judiocuaca supuetanaa niishitioquiaari pueyacuaaji Tacosuaari supenuaniya tama canaa Judiocuacajinijiniojuaja. ²³ Quiarijia cutara, cante seetanujuanaa Pueyaso shuquiriaajacani, nojoriiri na Que Pueyaso

secojonutaniya puetunu noojiatajanaa, seetanujuanaa na tojjiaa nojori quishacari. Pueyasoori naa paniya pueya secojonura nojuaja, cante na secojonuujuacuajani. ²⁴ Pueyasoori sohanu. Naaratej, cante Pueyaso shuquiritini panijacani, nojori cuara secojora Pueyaso puetunu noojiatajanaa, Pueyaso Sohanu tojjiaa nojori quishacari.

²⁵ Cuno maajiiri Jesu sequeree:

—Janiyacuaajaari niishiyani Pueyaso sequesano Cristo mijiria na jiyaroso-coriqianoori niniutianiya. Nojuaja jaara tiuquiri, nojuajaari puetunu maninia pa pohuatanutaniyajanaa.

²⁶ Jiyacaritij, Jesuuri maatia na sequeree:

—Janiyacuaajaari cunoni, quiata pocoojiyacujani.

²⁷ Jiyacaritij, canaari Jesuucua tiuquijiorohuani. Canaari jiuujiate-quiaraani canaa niquishacari Jesu pocoojiyano cuno maajitia. Majaari quenaaja canaa nequesotanu quiri Jesu, casaa cuno maaji paniriquiaani, mariyanta casaajiniji nojori pocoojoriquiaani. ²⁸ Cuno maajiiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

²⁹ —¡Miji pueyanaa, nia niquiquii pueyano! ¡Nojuajaari cua sequeree puetunu cua miishanojuanaa! ¿Majate Cristoni, tariucuacaanu Pueyaso sequesano pocua na jiyaroso-coriqianotej?

³⁰ Pueyari cuno tiacajiniji Jesuucua nijioquiaari. ³¹ Cuno maaji quiasacari na tiacajiniahua, jiyacaritij, canaari Jesu mianuutenu paniriquiaa juucuan. Canaari na sequeriquiaani:

—¡Niishitiojonanaa, quia miaquere!

³² Jesuuri saaja canaa sequeree:

—Janiyacuaaja miaquesanoracani, cuno miaquesanoori nia niishishoo.

³³ Canaa, Jesu saquiriojosano pueyani, canaari naa tama nequesoree-tooreejaanijia:

—Pa niyacari miaquetesaaquee jiyotucuaajaari.

³⁴ Jesuuri miriqui canaa sequeree:

—Cua miishacari cua Jiyarona panishano, cunoori cua miaquesano, naa-juhuaj, cua tucuatascari na panishano. ³⁵ Niaari sequequiaa: “Cuaara shocojoraara cuatro raza. Pueyari jiyacari shusha cofeenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatate maninia nia niquiniuria. Nataacuacuaaja tari noshiquia, carojotasocoriqiano. ³⁶ Na carojotanaari na poonijionu sami niqutioshiya. Na carojotasanoori pueyaracaanu quiriquiano. Naacuajitij, cuhuariquia natoonaari jatiqui shuquiriniutianiya nataacuaca carojotanaata. ³⁷ Naaratej, seetanujuanaari nio tariucuacaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuuja na carojotaja”. ³⁸ Janiyari saniniuuja nia jiyaramiquiquianuni nataacuaca nia carojotanura quenaaja nia poonijiaquishoo cuhuariquiajinia. Cunoori tamasaca poonijosano quiquiaari. Niaari juhuajaniya tamasaca poonijosanojiniji carojotaquiaa shuquiriaatia.

³⁹ Queraatia pueya cuno Samaria tiacajinijinoori Jesuucua tiuquiaari, nojori tojishacari naa cuno maaji sequesanootej: “Cua sequeree puetunu cua miishanojuanaani”. ⁴⁰ Naaratej, cuno pueya jaara Jesuucua tiuquijioquiaari, nojoriiri na masuquiaari tii na camueenjunura nojori tiacajinia quenaaja. Naaratej, canaari Jesuta tii camueequiaari caapiqui juucani. ⁴¹ Socua queraatia cuno pueyajinijinoori Jesuucua tiuquiaari, nojorijianaa jaara Jesu tojiquiaari Pueyaso rupaa pohuataano. ⁴² Naaratej, nojoriiri cuno maaji sequeturee:

—Quiarijiani, majaari canaa tiuuniu Jesuucua, saaja canaa quia pohu-
atanuucua nojuajiniji. Quiarijia cutara, canacuajaari tama canaa nu-
mataajaaja tojirii na pohuatasanonni. Naaratej, canaari quiarijia niishiyani,
Jesuuri seetanujuanaa Pueyaso jiyanootiriquiano pajaniya, puetunu mijiria
quiniaa pueyajanaano.

Jesu naatanishacari jiyaniijia Herodes pueyano niyanu

⁴³ Caapiqui juuca Jesu camueetanu nuhuaji canaa, Samaria pueya tia-
cajinia, nojuajaari cuniquiji canaa na pueya jiyataaree Galilea jiyajiniara.

⁴⁴ Jesuuri tarijia sequequiaari: “Nio tariucuacaanu sequesanoori seetanu-
juanaa sequesano. Naa sequeyari: ‘Pueyaso sequenu panishano caminiuji-
uniaari maja tojishano quijia tama na jiyajiniajaaja’ ”. ⁴⁵ Naajaa, Jesu jaara
canaa tiuquitiaseequiaari jiyacari Galilea jiyajinia, cuniquijinio pueyari
maninia na tiuquitiquiaari saaja. Nojoriiri naa maninia na tiuquitiquiaari
tari nojori niquniuucua Jesu miishano na cumaacata Jerusalén tiacajinia,
Pascuara nojori queranacusacari tii.

⁴⁶ Galilea jiyajinia canaa quishacari, Jesuuri canaa jiyataaree Caná tia-
cajinia, tee na jataniquiaari mohuaca vinoracuajani. Jiyacaritij, Caper-
naum tiacajinia quiquiaariiri tamonu pueyano, Galilea jiya jiyaniijia jiyate-
sano camarnura. Cuno pueyano niyanuuri jiyanohua cusosu matariquiaa.

⁴⁷ Cuno camarnu jaara niishiquiaari Jesu tari tiuquiriohua Judea jiyajiniji,
nojuajaari jiyacari niqiaari Capernaum tiacajiniji Jesuucua, Caná tiaca-
jinia. Na tiuquishacari Jesuucua, na sequeseeeri:

—jIyanijianaa, cucua quia taraajere! ¡Cua niyanu quia naataniquii, quera
cusoyano!

⁴⁸ Jesuuri na riuuaree:

—Niaa jaara cua cumaacata cua miishano niquiyaquiri, niaari cucua
tiuyaquiquiaa.

⁴⁹ Cuno camarnuuri saaja Jesu sequeree:

—jIyanijianaa, mijijijaj, jati pa quiaare cua tiajinia, quiyanu cusoy-
aquishacarijia!

⁵⁰ Jesuuri na sequeree:

—Quia quiaarohua. Quia niyanucuaja tari naatarohua.

Cuno camarnuuri Jesu sequesanoocua tiuurii. Quiaarohuari. ⁵¹ Jiyacari
na tiajinia, na seyari niqiquiaari camarnu niyanuuri seetanujuanaa
maninia naatarohua. Naaratej, nojoriiri quiojoquiaari na camarnu nu-
mootenuucua. Nojori quiojosacari, na camarnu naacuteree saaja nuu
cajiniocuaari. Nojoriiri na sequeree:

—¡Quia niyanu tari naatarohua!

⁵² Nojori camarnuuri nojori nequesotaree:

—¿Taacari na cusonu tajiyatemohuacuaani?

Nojoriiri na riuuaree:

—Naseeca nocuaji tajimiohuacuaa shusha pananu mueecosacari nio
niriquiauaani.

⁵³ Cusosu queri niishiquii, Jesucuajaari jiyacari na sequeriquiacuaa:
“Quia niyanu tari naatarohua”. Naaratej, camarnuuri necocuataja Jesuucua
tiuurii, puetunu necohuatajanaano.

⁵⁴ Judea jiyajiniji Jesu tiuquishacarihuaj, naa na naatanishacari cuno
cusotej, cunota tari caapiqui quiquiaariiri na cumaacata na miishano
Galilea jiyajinia.

¹ Tamacariuhua, socua canaa Judiocuaca queranacusacari quiquiaari Jerusalén tiacajinia. Naaratej, canaari Jesuta nocua quiojoquiaarijuhuaj. ² Jerusalén tiacaari puetunujuanaa puereetuuca sohuacajiniacuma quiya. Tohuateyacaari quiya tiuquitiajara. Tamonu tohuateya sesa quiquiaari “Borregohua tiuquitiaja”. Na shuriucua quiyari cuari. Canaa Judiocuaca rupajiniani, cuno cuariiri sesojosaquiaari “Betzata”. Cinco suhuorotucuaari quijia cuno cuari shuriuquioco. ³ Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariojuarujuri, shipiiniquiujiunaa, cumatacuruhua cusosuhuanio. Nojoriiri mohuaca sashijia cuaara queyaquetesaaria. ⁴ Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante co-teenujuanaa rosequiaari tiini, nojuajaari naataquiaariuhua na cusonujiniji. ⁵ Tamonu cusosuuri tii narta cusosuhua tajinia matariquiaajuhua. Tari na shonujuquiaariiri treinta y ocho marijia, pueyaracaanu na matasacari. ⁶ Jesuuri na niquiquiaari mataano. Noojiajinia niishirijiaariuhua cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequeree:

—¿Quiaate naatanu paniya?

⁷ Cusosuuri na riucuaree:

—¿Cantucua cua naacure cuarijinia cua rosenurani, mohuaca jaara queyaquetesaarecua? Janiya jaara rosenu paniquiaa juucuaani, cuarta cusosuuri saaja cua shocotaquiaani.

⁸ Jesuuri na sequeree:

—¡Quia sanere! Quia matu quia pataarohua.

⁹ Jiyacaritij, cusosuuri ritia jeequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquiara. ¹⁰ Canaa Judiocuaca camarucua jaara cusosu niquiquiaari na matu pataano, na juatiuriiri. Naa na sequetureeri:

—¿Majateeri quia niishiniu, quiarijiaari Sábado? ¡Maja quia matu quia patanujaj!

¹¹ Cusosu naatanohuari nojori riucuaree:

—Cua naataniniacuaja cua sequereeno: “Quia matu quia pataarohua”. Janiyari cunora na pataani.

¹² Narta Judiocuaca camarucuaari na nequesotaree:

—¿Cantejaara naa quia sequereeni?

¹³ Nojori riucuareeri:

—Johuaj. Maja cua niishiniu canaquitijia cua naataniritij.

Jesu naatanishacari cuno pueyano, queraatia pueyari namitia tii quiriquiaa. Naacuajitij, Jesuuri ritia tajiniocuareequiaari pueya tajinia, na naatanishano pueyanoocujaji. ¹⁴ Na nuhuaji, Jesuuri na riuriataquiaari cuno juucaja Pueyaso Secojoua tiajinia. Jiyacari na sequereeri:

—Quiaacuajaari tii naatanishaarohua. Quiarijia cutara tama quia cuaqueyajaaja quia cojuare maja sesa quia miinihuara socua, quiaa mariqui socua taraatia miiriiri.

¹⁵ Naacuajitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori sequeseeri:

—Jesuqui cunocuaja cua naataniriini.

¹⁶ Naa Jesu miiniucua samaatenu juucatej, narta Judiocuaca camarucuaari na quiatunu panijia juucua. ¹⁷ Jesuuri saaja nojori sequeree:

—Cua Queeri pueyaracaanu poonijiya. Janiyari cunora poonijiya-jaacuhaj.

¹⁸ Naa Jesu sequesacari nojoritij, narta Judiocuaca camarucuaari jiyanoehua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionuucua. Socua jiyanoehua na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

Jesuuri Jiyaniijajanaa, Pueyaso Niyanu na quishacari

¹⁹ Nocuaji Jesuuri narta Judiocuaca camarucua sequeree:

—Seetanujanaa nia sequeyanijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niqiquiaa miyanocuaani. Casaa cua Que miiquiaacuaani, janiyari naa miiquiaajaacuhuj. ²⁰ Cua Queeri cua panijia. Cunora, nojuajaari puetunu na miishanojuanaa cua niishitiojoquiaa. Naajuhuj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaji shiriiquitianiyania. ²¹ Cua Queeri macunucua samiitianijioquiaa, pueyaracaanu rishijia nojori quiniuria. Naajuhuj, janiyari pueya samiitianijioquiaani, cana cua samiitianiniu paniyacuajani. ²² Cua Queeri maja na nequesoreenu quiniutianiya pueya. Nojuacuajaari tari cua niqitocanu na cumaaca, puetunu pueyajanaa cua nequesoreenura. ²³ Nojuajaari naa miiquianu puetunu pueyajanaa quiniuria cua tojtijajaca, naatej, taa cua Que na tojtijiatuquiaacuaani. Cante cua ruuretajani, cunoori cua Que ruuretajajuhuj, nooj, cante mijiria cua jiyaroquiaaricujani.

²⁴ Seetanujanaa nia sequeyanijia, cante cua sequesano tojjijani, mariyata cante cua Jiyaronaacua tiuyajaaniuhuj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutianiya. Nojuacuajaari tari samiitianishaarohua juhua macu na quiniujiniji Pueyasooju na quishacari. ²⁵ Seetanujanaa nia sequeyanijia, quera quiniutianiyari juhua macunucua quijijaca samiitiasacari. Seetanujanaa quiarijiaari, juhua macunucua quijijacaari cua rupaa tojtianutianiya. Cua rupaa tojtijajacaari samiitiaconutianiya, pueyaracaanu rishijia nojori quiniuria. ²⁶ Cua Queeri quijijajuhuanajaj. Majaari na naata shaajenu. Nojuajaari naa quijiaari cua jiyatequiaarijihuuj, juhua nojuarajuhuj. Naacujitij, cua naata pueya jiyatenu naa quijiarajuhuj. ²⁷ Pueyanora cua quiniuucua, na cumaaca cua niqitioereeri cuarta pueya cua nequesoreenura, nojori cua saniitionurajuhuj. ²⁸ Cua tojtitiare. Majaari nio sequesanoocujaji nia shiriqiniu. Tamacari, puetunu macunucujajanaari cua rupaa tojtitiuniutianiya. ²⁹ Macunucua tojtitiushacari cua rupaa, nojoriiri samiitiaconutianiya, na jamacajiniji nojori tohuareetanura. Cante maninia miijiaa quiquiaarini, samiitiaconutaniuhuari pueyaracaanu shuquiriaatia quijijaca nojori quiniuria Pueyasota. Saniniujia, cante sesa miijiaa quiquiaarini, puetunu nojorijianaari quejoosaanutianiya pueyaracaanu saniitiosocoriquiano.

Jiyaniijajanaa na quiniuucua, Jesu tama nojuajiniji pahuataajaaja

³⁰ Pueyaso Niyanu cua quishacari, naajaa, majaari cua miiniu tama cua panishanojuajaaja. Janiyari sesa miijiaa juaaquiaacujani, saaja cua Que niishitishacari janiya, nojori miishanoori sesa. Tama cua panishanojuajaaja miyashijia cua quiniuucua, janiyari namitijajanaa nojori juaaquiaani. Janiyari pueyaracaanu miiquiaa saaja cua Jiyarona panishanoni. ³¹ Pueyano jaara tama nojuajinijiaaja pahuataa narta pueyano, na pahuatasanoocua maja tiushano. Naaratej, janiya jaara tama janiyajiniji pahuatariquia nia niquiarani, tama cua pahuatasanojuajaaja maara najuhuaana quiriqiaaj. ³² Naajaa, quiarijia cutara nia naata niishiniu cua pahuatasanoori seetanujanaa. Tamonucujajari janiyajiniji pahuataa seetanujanaa. Nojuajaari

cua Que. Cunora, niishiyaniija na pohuatasano janiyajiniijiiri maja najuhuanaj.

³³ 'Niaari nia pueya jiyarocanu Tiuquinijiona Juancua, nojori nequesotamura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu quiquianu janiyajiniji. ³⁴ Nojuaja jaara seetacanu janiyajiniji niajaniya, quiria, naajaa. Janiyacuajaari niishiyani seetanujuanaari cua pohuatasano niajaniya tama janiyajiniijiaaja. Tiuquinijiona Juanri seetanujuanaa pohuatacanu janiyajiniji niajaniya. Naa cuaara na pohuatasanoocua tiuuria, Pueyaso jiyanooniuria niajaniya. Janiyari saaja cunora nia pohuataa Tiuquinijiona Juanjinijini. ³⁵ Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari niajaniya. Niaari najuhuaana tojiquianu na pohuatasano. ³⁶ Tiuquinijiona Juan pohuatasano janiyajiniijiiri seetanujuanaa. Naa jaara na pohuatasanoocua tiuuniu paniyashijiaca quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miiniuriatej. ³⁷ Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojinu quiquiaari na pocuanu. Nojuajaari nia niquishoojuhuaj. ³⁸ Majaari quenaaja na rupaa quiniu nioojajinia, nia tiuyaquishacari na Jiyarosanoocua. ³⁹ Niaari suraatia serojoquiaa tariucuaaanu naajiosano Pueyaso Rupaa. Niaari jiyaniya niaa jaara Pueyaso Rupaa niishijiaca quiria, niaari naa pueyaraanu quiijara quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja. ⁴⁰ Niaari saaja cucua ninu paniaquiquiaa cua jiyatenura niajaniya pueyaracaanu quijiacara cutara.

⁴¹ 'Maninia cua miishanoori maja pueya sequenura janiya: "Quiaari maninia pueyano". Janiyari saaja cua Que shuquiritiquiaa cutarani. ⁴² Janiyari seetanujuanaa nia niishiyani. Niaari Pueyaso shuquiritiaashijiaca, nia paniaquishacari nojuaja. ⁴³ Cua Quecuajaari cua jiyaroquiaari cua niishitiojonura niajaniya nojuajiniji. Quiarijiani, majaari nia tojinu paniniu janiya. Saniniuuja, tamonu jaara tama na cuaqueyajaaja jiyateya juhua Pueyaso Jiyarosnora na quiniuria, niaa maara cuno tojiri cutara, nojuaja jaara niaacua nimia na niishitiojonura niajaniya tama na niishishanojuaja. ⁴⁴ Majaari nia naata cua pohuatasanoocua tiuuniu, niaa jaara saaja niarta pueya shuquiritiasano quiniu paniquiaa, maja Pueyaso shuquiritiasano. ⁴⁵ Majaari nia jiyaniiniu janiya niaacuara tonujunutaniya cua Queni. Tama Moiséscuajaari niaacuara tonujunutaniya, cua tojitiaashijiaca nia quiniuucua. Niaari jiyaniya niaa Pueyaso mueras, juhua Moisés tojijiaca nia quishacari. ¿Niaateeri seetanujuanaa Moisés tojijiaca? ¡Maja! ⁴⁶ Nojuacuajaari janiyajiniji naajiotaquiaari. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiurijiuhuaj. ⁴⁷ Nocujaj, niaa jaara Moisés naajiotasanoocua tiuyaquiquiaa, ¿niaatucua taa tiuri quiarijia cua pohuatasanoocuanii?

6

Jesu mianuutesacari cinco mil canuu
(Mt 14.13-21; Mr 6.30-44; Lc 9.10-17)

¹ Na nuhuaji, canaari Jesuta niutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. ² Jiyanoohua queraatia pueyari Jesu niquiquiaari tari, cusosuhua na naatanijosacari.

Naaratej, nojoriiri Jesu neteyotariquiaa caminia shuriuquioco. ³ Canaa shiitiasacari caminia taquijiria, Jesuuri canaa tacatamaa tuhuananuucua. Tii cajitiasee canaari. ⁴ Jiyacaritij, quera Pascuara queranacuscariiri quiriquiaa. ⁵ Jesu niquishacari jiyanohua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

⁶ Naa Felipe nequesotareeri nareja na saniniuria. Jesuuri tari ni-shiriquiaa taa nojuajanaa mianuutenutaniya cuno pueyani. ⁷ Felipeeri na riucuaaree:

—¡Paa jaara cumaneeca jiitiare doscientos juuca pa poonijosanojiniji pan pa masetajarani, cuno maara najuhuana secaja quiri puetunu nojoririjanaa!

⁸ Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquiriojosano pueyanojuhuaj. Jesu seque-seeri:

⁹—Jiyaniijanaa, caya samijia niya cinco pan jiitaa cebada cashojuajiniji shipinishano, caapiqui sapitiaajanio. Naajaa, cunoori najuhuana puetunu cuno pueyarajanaa.

¹⁰ Jesuuri saaja canaa na saquiriojosano pueya sequeere:

—Puetunu pueyajanaa nia sequere cuaara cajitiuuria.

Cuniqui, canaa tii quiriquiaani, shanohua jiyasocuaari quiriquiaa, maninia cajituijia. Naaratej, pueyari cajitiurii. Puetunu cuno pueya maanujinijiniojuanaani, saaja canuuri quiquiaari cinco mil pueya.

¹¹ Jiyacaritij, Jesuuri cuno pan pataree. Pueyaso secojoree nocuaraari. Na nhuajaa, canaa na serotaniiri. Canaari cajitiuyano pueya puetunu na panishanojuanaa niqutiojoreeni nojori miaquenuusocoriquiano. Jesuuri naa miirii sapitiaajahuaj. ¹² Puetunu pueyajanaa jaara tooquioquiaari, Jesuuri canaa na saquiriojosano pueya sequereeni:

—Puetunu miaquesano raquiquiajanaa nia reraterohua, maja najuhuana na niitiasaanura.

¹³ Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijioreeni. ¹⁴ Pueya niquishacari naa Jesu miishano na cumaacatej, nojoriiri sequeturiquiaa:

—¡Nio pueyanoqui setanujanaa Pueyaso sequenu panishano caminiujunia, nooj, tariucuacaanu sequesaaquiaari pocua niriqianotej!

¹⁵ Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaji, Jesuuri tamajaaja tacaquee socua jiyaconaja tuhuananuucua.

Jesu rucuanesacari mohuaca caco
(Mt 14.22-27; Mr 6.45-52)

¹⁶ Tariucua pananu tiuquishacari, canaa, Jesu saquiriojosano pueyani, canaari rosetaarohua caminiajiniarani. ¹⁷ Canaari botejinia tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiQUIIRI quiriquiaa. Majaari Jesu tiuquiniu quiriquiohua juhuanajuaja canaacua. ¹⁸ Tari canaa niuutiasacari, paratuuri jiyanohua piyarojoriquiaa. Caminiaari cunora jiyanohua cajiniuucuariquiaa. ¹⁹ Canaari tari caminia jiuujiajinia quiriquiaani, seis kilómetroruhua canaa ruparetasaquiji. ¡Canaari jiyacari casaa niquirii canaacua catecanoyanoni! ¡Mohuaca caco canujuriquiaari! ¡Canaari nocuaji shiriiquitiurii jiyanohuani! ²⁰ Jiyacaritij Jesuuri canaa sequereeni:

—¡Maja pueretunu! ¡Janiyacujanijia!

²¹ Na rupaa canaa tojishacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quiariquiaacua-jani.

Jesu mianuutesano pueya pajesacari nojuaja

²² Jaara juhuaquequiaari, Jesu mianuutesano pueyari na pajenuunu co-teequiaari tee canaa quiriquiaa caminia taquijiriacuajani. Nojoricuajaari tenacari niquiriquiaari saaja niquiriyatu boteeri shiitariquiaa. Saaja canaa, Jesu saquiriojosano pueyani, canaari cuno botejinia quiaquiaariuhua nojori niquiarani. Majaari Jesu quianu quiriquiaa cutara canaata. ²³ Jiyacaritij, Tiberias tiacajiniji boteeri tiuquijioquiaari catecaja nojorijiniji, tee Jesu mianuutequiaari nojoricuajani. ²⁴ Cuno pojori niishishacari maja Jesu quiniu quiriquiaa tari tii, canaa na saquiriojosano pueyajuhuj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

Jesucristo juhua poojia miaquesano

²⁵ Cuno pojori tiuquijiosacari caminia taquijiria, Jesu riuriatatureeri. Na nequesotatureeri:

—Niishitiojonanaa, ¿taacari quia niyarohuacuuarini?

²⁶ Jesuuri saaja nojori sequeree:

—Janiyari seetanujuanaa nia sequeyani, majaari nia pajenu janiya nia niquiniuucua cua cumaacata cua miishano. Niaari cua pajenuya saaja cua mianuutenuucua nijaniya, taa nia tooquiorucuaacuajani, cua mianuutesacari nijaniya. ²⁷ Maja saaja miaquesanoocua nia tacaaniu, nia cuaqueya nia cumaquitajara. Cunoori maja na jiyatenu quiniutianiya nijaniya pueyaracaanu rishijara. Saaja nia tacaari cutara nioojia samiitianiya miaquesanoocua, pueyaracaanu rishijia nia quiniuria. Janiyacuajaari cuno nia niqitioriquianoni, pueyano cua quiniuucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosani.

²⁸ Cuno pueyari Jesu nequesotaree:

—¿Casaa canaa miiniutianiyanii Pueyaso panishano canaa miiniuria, Pueyaso shuqiritiasano canaa quiniuriajuhuaj?

²⁹ Jesuuri nojori riucuree:

—Pueyaso jiyarosanoocua nia tiuuri. Saaja naa nia miishacaritij, Pueya-soori nia shuqiritianutaniya.

³⁰ Cuno pueyari Jesu sequeturee:

—Canaa niquiara quia cumaacata casaa quia miiricuarajaj, canaa ni-ishiniuria quiaari seetanujuanaa Pueyaso jiyarosano. ¿Casaa canaa quia niqitiniutianiya canaa tiuuniuria quiocuani? ³¹ Canaa quia niqitir-icuaraja quia cumaacata quia miishano, taa Moisés niqitiquiaari canaa supuetanaacuani. Nojuajaari jiyocuacaanuji pan tiniquiaari pueyara-caanu nojoriria, cariiquia jiyajinia nojori rucuanijosacari. Naa naajio-tasano quiyacuajaari tariucuacaanu Pueyaso Rupaajinia:

“Nojuajaari nojori mianuutequiaari jiyocuacaanuji tinio pan”. Naacuajitij, canaari niishiyani Moiséscuajaari Pueyaso jiyarosano quiquiaari.

³² Jesuuri nojori riucuree:

—Seetanujuanaa nia sequeyanijia, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji pan na quiniu quiquiaarijuhuaj. Quiarijia cutara, cua Queeri niaacua jiyarorucuaa seetanujuanaa jiyocuacaanuji panjanaa cutara. ³³ Cuno,

Pueyaso niqutiosano pan jiyocuacaanuji rosenoni, cunoori puetunu mijiria quiniaa pueyajanaa samiitianijiojua cutara.

³⁴ Naaratej, cuno pueyari Jesu sequeree:

—¡Jiyaniijianaa, quiocua pueyaracaanu canaa niqutioriquia cuno pan!

³⁵ Jesuuri nojori sequeree:

—Janiyacuaajaari cuno panni, pueya samiitianijiojuani. Cante cucua niyani, majaari na miaajenu quiniutianiya socua. Cante cucua tiuuriijaani-uhuj, majaari na jiyamuenu quiniutianiyajuhuj. ³⁶ Taa cua sequeree tari niajaniyacuaajani, niaari juucua cua niquiya. Majaari quenaaja cucua nia tiuuni. ³⁷ Naajaa, puetunu cua Que niqutiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretanu nojori.

³⁸ Majaari jiyocuacaanuji cua rosenu quiquiaari cua miiniuria tama cua miiniuria panishanojuaaja. Mijiria niqiaarinijia saaja cua Que panishano cua miiniuria, cante cua jiyaroquiaaricuaajani. ³⁹ Majaari cua Jiyarona paniniu cua juurequetenura quenaaja niquriryatujua na niqutiosanojiniji janiya. Nojuajaari paniya cutara, nojori cua samiitianijionura jiya puequesacari.

⁴⁰ Canapuate cucua tiuujiacani, nojori niishishacari janiya Pueyaso Niyanuni, cua Queeri puetunu cuno pojorijianaa paniya pueyaracaanu rishijiaca nojori quiniuria. Naacujitij, janiyari nojori samiitianijionutaniya jiya puequesacari.

⁴¹ Jesu sequenuucua, “Janiya jiyocuacaanuji roseno panni”, tii quiniaa narta Judiocuacaari cunora juaaquioree. ⁴² Segetureeri:

—¿Majate nio pueyano Jesucuaaja, José niyanutej? ¡Pacuaajaari na queya niishiyan! ¿Casaara quiarijia na sequeyari: “Jiyocuacaanuji rosenonijia”?

⁴³ Jesuuri nojori sequeree:

—¡Tariucuaaja! ¡Maja nia juaaquionu! ⁴⁴ Pueyanoori maja na naata tiuuni cucua tamajaaja, cua Que jaara noojiajinia poonijiyaquiri. Janiyari puetunu cucua tiuuniaajanaa samiitianijionutaniya jiya puequesacari. ⁴⁵ Tariucuaacaanu pueyara Pueyaso sequesano caminiujiunia naajiotasanocuaajaari naa sequeya:

“Pueyasocuaajaari puetunu nojorijianaa niishitiojonutaniya”.

Naacujitij, cante cua Que niishitiojosano tojjia seetanujuanaani, nojuajaari cucua tiuya.

⁴⁶ ‘Cua Queeri maja pueya niquishano quenaaja. Saaja na niqunia cutaraari janiya cante Pueyasojiniji niqiaaricuaajani. ⁴⁷ Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijiaara jatanishaaree. ⁴⁸ Janiyacuajaari pueya samiitianijia panni. ⁴⁹ Cariiquia jiyajinia nia supuetanaa camarucuneejotasacari, nojoriiri cuno jiyocuacaanuji tinio pan miaquenuuquiaari juucua. Naajaa, saaja cusonu-quiaariiri. ⁵⁰ Saniniuujia, cante quiarijia seetanujuanaa jiyocuacaanuji roseno pan miaqueyani, majaari Pueyaso shaajanu quiniutianiya nojuaja.

⁵¹ Janiyacuajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niqutionutaniya puetunu mijiria quiniaa pueyacuara-janaani, cunoori tama cua cuaqueyajaaja.

⁵² Jiyacaritij, tii quiniaa narta Judiocuacaari naa sequetooree tamajaaja na juaaniutia:

—¿Nio pueyanotucua taa miaquetera tama na cuaqueyajaaja pajaniyani?

⁵³ Jesuuri jiyacari nojori sequeree miriqui:

—Seetanujuanaa nia sequeyanijia, niaa jaara miaqueyquiri cua shu, niaa jaara ratuyaquiri cua nanacajuhuj, majaari samiitianijosano nia quiniu quiniutianiya, pueyaracaanu quijia nia quiniuria. ⁵⁴ Cante cua shu

miaquereeni, cante cua nanaca ratureejaaniuhuaaj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiniutianihuaa jiya puequesacarini. ⁵⁵ Cua shuuri seetanujuanaa miaquesano cutara. Naajuhuaaj, cua nanacaari seetanujuanaa ratu-sano cutara. Cunoori maja juhua mijiria nia miaquesano. ⁵⁶ Cante cua shu miaquenani, cante cua nanaca ratunajaniuhuaaj, nojuajaari coojia rupueja. Janiyari noojia rupuejajuhuaaj, pueyaracaanu rupuetootesano canaa quiniuria. ⁵⁷ Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiyajuhuaaj, na rupuesacari janiya. ⁵⁸ Janiyari maja juhua nia supuetanaa miaquesano panni. Nia supuetanaari cuno pan miaquenuuquiaari najuhuanaj. Naajaa, saaja cusonuquiaariiri. Janiyari seetanujuanaa jiyocuacaanuji roseno pan cutarani, nia miaquesocoriguiano. Cante cua miaquejani, jaara cusoyare, naajaa, samiitianutaniuhuari pueyaracaanu quijia na quiniuria.

⁵⁹ Jesuuri puetunu niojuanaa pohuataquiaari pueya niquiara Pueyaso secojojua tiajinia Capernaum tiacajinia.

Queraatia Jesu nuhuajinia pueya cartesacari nojuaja

⁶⁰ Naa pueya tojishacari Jesu niishitiojosanotej, queraatia na nuhuajinia pueyari naa sequetooquiaari tamajaaja:

—Cuno na sequesanoori jiyanohua jiyajeneta pa miiniuria puetunujua-naa. Maja pa naata. ¿Cantucua na tojirijaaraaranijia?

⁶¹ Jesuuri naa nojori sequesano niishirii noojiajinia. Nocuaji nojori se-queereeri:

—¿Niaateeri naa cua sequenuucua juaya? ⁶² ¿Niaatucua taa sequere socuani, niaa jaara cua niquiri tacaano jiyocuacaanuhua, teje cua niquiaaricujani?

⁶³ Cua shu maja cumaacaraca pueya na samiitianiniuria. Saaja cua So-huanu cutaraari pueya samiitianijia, pueyaracaanu rishijiaca nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria niajaniya. ⁶⁴ Noojiaqueya niajanijajiniinooori cucuaji taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quiatenutaniyani.

⁶⁵ Naa sequeree socua cuno pojoriiri:

—Janiyacuajaari cunora nia sequereeni: “Maja pueyano naata cucua tiuuniu, cua Que jaara noojiajinia poonijiyaquiri”.

⁶⁶ Jiyacaritij, queraatia Jesu nuhuajinia pueyari na cartequiaari. Nojori-iri maja tari Jesuta na rucoojonu quijia. ⁶⁷ Nocuaji, Jesuuri jiyacari canaa na saquiriojosano pueya nequesotaree:

—¿Niajanijariuhuaaj, niaateeri cua cartenutaniyajaacuhuaaj?

⁶⁸ Simón Pedroori Jesu riucree:

—¡Maja Jiyaniijajanaa! ¿Canaatucua tamonu jiyaniijiaacua pacureni? Canaa quia pohuatasanocujaari na naata canaa jataniniu pueyaracaanu rishijia canaa quiniuria. ⁶⁹ Canaacujaari tari quiocua tiuquianuni, canaa niishishacari quiaari Pueyaso Niyanu, saa maninia miijiaja.

⁷⁰ Jesuuri canaa sequeree:

—Niaacuajaari tama cua saquiriojosano doce pueyajaaja. Saniniuuja, niquiriyatu niajanijajiniinooori sesaaca.

⁷¹ Naa Jesu sequesacaritij, Judasjiniji sequeriquiaari, Simón Iscariote nianyani. Nojuajaari seetanujuanaa niquiriyatu canaajinijinio Jesu doce saquiriojosano pueyajinijinio quiquiaari. Naajaa, tama na Jiyaniijajajaaja tacartariquiano quiriqiaaquiri.

7

Tama Jesu tapueyocuacaja Jesuucua tiuyashijiaca quiquiaari

¹ Na nuhuaji, Jesuuri Galilea jiyajinia rucuaneriquiaa. Canaari na cojiriquiaani. Majaari na quiniu paniniu quiriquiaa Judea jiyajinia, tii quiniaa Judiocuaca monu panishacari nojuaja. ² Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariira pueyari ocho juuca shocotojoquiaari suhuorotucujinia nojori quishacari. Naa miitiquiaariiri puetunu marijarajanaa canaa niishiriojonura, canaa supuetanaa Israel pueyari saaja suhuorotucujinia quijiaca quiquiaari, pueyaracaanu nojori camarucuneejotasacari cariquia jiyajinia nojori quishacari. ³ Jiyacaritij, tama Jesu tapueyocuacajaariija naa Jesu sequeturee nojori macaafiniuria nojuaja:

—iMajaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumaacata, quia jiyopue niquniuria puetunu quia miishanojuanaa. ⁴ Pueyano jaara puetunu pueyajanaa tojiniu panishano pueyano quiniu paniri, ¿maatucua casaara jiyasohuaja miijiore na cumaacatani? Naatej, taa niya quia miijioquiaa quia cumaacatacuaani, naa quia miijiosee puetunu pueya niquiarajanaa Jerusalén tiacajiniajuhuaj.

⁵ Majaari quenaaja tapueyocuaca tiuuniu quiija Jesuucua. Cunora naa na sequetureeri. ⁶ Jesuuri saaja nojori riucaaree:

—Juhuanajuaja maja cua quiasacari cua miiniuria taa nia sequeyacuajani. Naa jaara quianu paniri, niama juhuajaniya quiaaretej. ⁷ Niarta mijiria quijiaca pueyari maja na naata juaani niajaniya. Janiya cutaraari nojori niquniu panyaquishooni. Cua niqitiuniu panyaquiquiaari, nojori cua niishitishacari nojori miishanoori sesa. ⁸ Nia quiojiyare queranacunuucua. Janiya cutaraari maja cua quianu quiniutianiya juhuanojuaja. Quiarijani, puera juhuacarijaari cua miiniuria taa nia sequeree janiyacujani.

⁹ Naa nojori na sequenu nuhuajitij, Jesuuri cuniquijia jiyojeree Galilea jiyajinia.

Jesu quishacari cuno queranacunuujinia

¹⁰ Na tapueyocuaca jaara quiojoquiaaricuaa Jerusalén tiacajiniara tii queranacunuunura, Jesuuri jiyasohuaja quiaaree nojori nuhuajijihuaj.

¹¹ Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

¹² Puetunu pueyajanaari Jesujiniji sasacotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—iMaja maninia pueyano! ¡Pueya sapojojua najuhanaj!

¹³ Puetunu pueyajanaari naa sasacotooriquiaa jiyasohuaja, nojori pueresacari narta Judiocuaca camarucua.

¹⁴ Jiuujianaraca juuca jaara tari shocotojoquiaari nojori queranacunuusacari, Jesuuri jiyacari shusha tiuquiquiaari Pueyaso Secojojua tiajinia. Tii coteeree pueya niishitiojonuuri. ¹⁵ Canaa Judiocuaca camarucuaari jiuujiatequiaari nojori tojishacari Jesu niishitiojosano. Naa sequetureeri:

—iCuno pueyanoori maja quenaaja na serojua quiquiaari! ¿Taa na niishiya pueraarini?

¹⁶ Jesuuri nojori sequeree:

—Cua niishitiojosanoori maja tama cua niishishanojuuaaja. Cunoori cua Jiyarona niishitishano janiya. ¹⁷ Cante Pueyaso panishano miiniu paniyani, nojuaja cuaara miiria taa cua niishitiojiyacuaani. Naacuaajitij, nojuajaari jiyacari niishiniutianiya, cua niishitiojosanocuaajaari Pueyasojiniji seetanujuanaa, maja tama cua niishishanojuuaaja. ¹⁸ Cante tama na niishiriojosanojuuaaja pahuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuaara tojiyaquishaaria. Saniniuuja, cante na jiyarona niishitiojosano pahuataa pueyani, pueya tojiniuria na jiyarona, cuno pueyano pahuatasano cutaraari seetanujuanaa. Cuno pueyanoori maja pueya sapojoja.

¹⁹ ¿Niaateeri seetanujuanaa supuetana Moisés Rootasano tojitiajaca? Maruhua. Majaari quenaaja niquiriyatu niajanijajiniinio na rootasano tojijia. ¿Casaara nia monu paniya janiyani? ¿Supuetana Moiséste naa nia niishitiojiya na naajioneejinia?

²⁰ Nojoriiri Jesu riucaturee na juaaniutia:

—¿Quiaaqui samaruraca! ¿Cante quia monu paniyani? ¿Canaa quia sequere-toj!

²¹ Jesuuri nojori sequeree:

—Puetunu niajanijajanaari shiriiquitiuquianu samaatenu juuca cua miishacari niquiriyatu casaaniyoja cua cumaacata. ²² Supuetana Moisésuajaari nia rootaquiaari nia mueya cararaatiuuquia co nia miatenura, ocho juuca jaara na shocojore na rasaanujiniji. Seetanujuanaa, nio niishishanoori maja tama Moisés niishishanojuuaaja. Cunoori tariucuacaanu pa supuetanaa niishishano Moisés niyacarijia. Pueyari naa rootasaaquiaari naa nojori miiniuria necohua, seetanujuanaa Pueyaso saquiriojosano Israel pueya nojori quiniurijuhuj. Naaratej, jaara quiri samaatenu juuca, naajaa, niaari naa nia niquihua cararaatiuuquia co miatejoquiaa. ²³ Naa nia miishacari samaatenu juucatej Moisés Rootasano nia tojiniuria, ¿casaara nia juaya janiyani, cua naataniniuucua cusosu samaatenu juucani? Niaari saaja shiitaniyoja miatejiya, maninia nia niquihua quiniuria Pueyaso niquiara. Janiya cutaraari puetunu cuno cusosu cuaqueyajanaa jeecacanuni. ²⁴ Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojoja nia quiri, niaa mariqui najuhua pueya juaariiri na miishano jaara sesa quiaquiri.

Jesu pahuatasacari tama nojuajinijijiaaja

²⁵ Jiyacaritij, nooiaqueya Jerusalén tiacajiniinio pueyari tama sequerejaaja:

—¿Majate nio pueyano pa camarucua pajesanocuaaja na mosocoriquianotej? ²⁶ ¿Taateni? Noocujaruhua juhuajaniya pahuataa pueya niquiaratej. Majaari quenaaja pa camarucua tenujununoj. ¿Pa camarucuate jiyaniya soj, nojuaja seetanujuanaa Cristo, tariucuacaanu sequesano pocua jiyarosaariquianotej? ²⁷ Paacuaajaari nio pueyano niishiyani, tejenote nojuajani. Saniniuuja, Cristojuanaa jaara tiuquiri, majaari quenaaja na niishishaanu quiniutianiya cutara tejenote nojuajani.

²⁸ Jesuuri jiyacari niishitiojoriquiaa Pueyaso Secojojuajinia. Naa na tojishacari pueya sequesantej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiyajuhuj, tejenote janiyani? Naajaa, majaari cua ninu quiquiaari tama cua panishacarijiaaja. Janiyari jiyarosanoni. Cua Jiyaronaari seetanujuanaa quijiajuhanajaj. Nojuajaari nia niishishoo. ²⁹ Janiyari na niishiya cutarani. Janiyacuajaari tiji ninioni. Nojuajaari cua jiyaroquiaari.

³⁰ Nojoriiri jiyacari Jesu quiatunu panirii. Naajaa, majaari quenaaja tamonu naata quiriquiaa na quianura. Majaari na naata quianu quishaaquiaari, juhuanojuaja na monu juuca quiyaquishacarijia. ³¹ Saniniuuja, queraatia cuniqui quiniaa pueyari Jesuucua tiuquuaari. Nocua tiuuniaari naa sequetuquuaari:

—¿Cristojuanaa jaara tiuquiri, nojuajatucua socua jiyajeneta casaa miiri na cumaacata nio pueyano miishanojiniji?

Fariseocuaca quiatenu panishacari Jesu juucua

³² Fariseocuacaari cuno pueya tojiquaari naa nojori maniniuhuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijianaari Jesuucuaa roofotooquiaari. Na nuhuaji, nojoriiri Pueyaso Secojojuua tia cojuanaa pueya jiyaramiquiquaari Pueyaso Secojojuua tijajiniara, tii nojori quianura Jesu. ³³ Jesuuri jiyacari nojori sequeree:

—Janiyari saaja rupaquijia niaata quiniutianiyanii. Na nuhuaji, janiyari cua jiyaronaacua riujuuuniutianihuani. ³⁴ Niaari cua pajenuunutaniya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuaani.

³⁵ Nocuaji, cuno Judiocuacaari tama sequetooreejaaja:

—¿Tee na quianutaniyajanojoni naa pocuaaniquitij, na riuriataaquishaanurajuhujaj? ¿Parta Judiocuacaacua quianutaniya soj, noo pojoriicua Griego-hua tajinia niaquejoquiaaritij? ¿Tii niishitiojonutaniya cuno taucuaca soj? ³⁶ ¿Casaa na sequenu paniya pajaniyarini na sequesacari: “Niaari cua pajenutaniya najuhuanaj. Majaari nia riuriatanu quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani”?

Jesu pohuatasano miriqui Pueyaso Sohuanujiniji

³⁷ Siete juuca jaara tari shocojoquiaari, queranacunuunu puequesacari juucajanaari juhuaquegiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujuaquiaari pueya niqiiara. Jiyanohua na rupaa paaretareeri. Naa sequereeri:

—¡Cante jiyamueyani, nojuaja cuara niiria cucua, na ratunura janiyajiniji! ³⁸ Cucua na tiuushacari, nera quiniutianiyari taa na naajiotasaaquiaari tariucuaaanu Pueyaso Rupaajiniacujani. Naa sequeyari: “Cante cucua tiuyani, pueyano samiitianijiojuua mohuacaari noojiajiniji jaatenutaniya”.

³⁹ Naa Jesu sequesacaritij, nojuajaari Pueyaso Sohuanujiniji pohuatariquiaa miriqui. Jiyacaritij, Pueyaso Sohuanuuri juhuanojuaja maja na quiniu quiriquiaa mijiria, Jesu tacaquishacarijia Jiyaniijajanaa na quiniuria. Naaratej, tii quiniaa pueya sequeriquiaari, cante quiarjia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuaaanuji.

Pueya juaatioosacari Jesuucua

⁴⁰ Jesu jaara pohuatanu puecaquiaari, tii quiniaa pueyari tama pocoojoriquiaajaaja. Noojiaqueya nojorijinijinioori sequeree:

—¡Nio pueyanoqui seetanujuanaa Pueyaso sequenu panishano caminiujinia, nooj, tarjia sequesaaquiaari pocua niriqunotej!

⁴¹ Tamasacaari saniniuuja naa sequeriquiaacujua:

—¡Nojuacuajaari Cristo, Pueyaso Jiyarosano pocua!

Tamasacaari saaja nojori riucaaree:

—¿Cristoteeri Galilea jiyajiniiji supuenutaniya? ¡Maja! ⁴² Tariucuacaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia David niqiuohuajiniiji supuenutaniya. Belén tiacajinia rasaanutaniyari, supuetana David tiacajinia.

⁴³ Naacuaajitij, puetunu pueyajanaari Jesuucua juayonuutaquiaari.

⁴⁴ Tamasacaari saniniuuja Jesu quianu paniriquiaa juucua. Naajaa, majaari na quiatunu quirii.

Judiocuaca camarucua tiuyaquishacari Jesuucua

⁴⁵ Pueyaso Secojoua tia cojuanaa pueyari Jesu tojtitariquiaa juhuajaniya. Na nuhuaji, socua quiojyiarohuari na jiyaramiquiniaa pueyacua. Nojori jiyaramiquiniaa pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniaari nojori sequeree:

—¿Casaara Jesu nia jaatucuyaquimiohuani?

⁴⁶ Nojori jiyaramiquishano pueyari saaja nojori riucuaaree:

—¡Majaari quenaaja tamonu pueyano pocuanu juhua cuno pueyanojua, seetanu rupaajanaa pohuataja cutara!

⁴⁷ Fariseocuacaari cunora nojori juarii:

—¿Niaateeri niaacua na shanacuree na sapojonura niajanijajuhuaaj?

⁴⁸ ¿Tamonu pa camarucujiniijiniote nocua tiuurii, canaa Fariseocuacajini-jiniojuhuaaj? ¡Maja! ⁴⁹ ¡Cuno pojori Jesuucua tiuujiacani, nojoriiri Moisés Rootasano niishiyashijia! ¡Nojoriiri sesoriquia seque!

⁵⁰ Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niqiaari niucuatej. Nojuajaari narta Fariseocuaca sequeree:

⁵¹ —Pueyanaa, supuetana Moisés cuajaari pa rootaquiaari maja najuhuaana pa sesacanura pueyano, paa jaara coteenu na nequesoreyaquirini casaa na miiriini.

⁵² Narta Fariseocuacaari Nicodemo juarii saaja:

—¿Quiaateeri narta Galilea jiyajiniijinio pueyanojuhuaaj? ¡Jacaria quia paje tariucuacaanu Pueyaso Rupaajinia! ¡Quiocua jiyacari niishiri majaari quenaaja niquiriyatu Pueyaso sequesano caminiujunia pueyano supueni quiutianiya Galilea jiyajinia!

⁵³ Na nuhuaji, puetunu cuno pojorijianaari na tiajinia quiojyiarohua.

8

Jesu jiyanooshacari maaji

¹ Jesuuri saniniuuja Olivo cuhuariquijania quiaaree. ² Jesuuri tariquicuaaji tiuquiriohua Pueyaso Secojoua tiajinia. Canaari nata quiriquiaa-juhuaaj. Pueyari nocua rerejoquiaari. Nojuajaari cajirii pueya na niishitiojonura juucua.

³ Moisés Rootasanojiniji niishitiojonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiiri riuriatasaaquiaari numuetucushiyano. Nojoriiri cuno maaji nujuateree pueya tacji. ⁴ Jiyacari Jesu sequetureeri:

—Niishitiojonanaa, nio maajiiri quiasaaree numuetucushiyano. ⁵ Moisés Rootasanojiniji paari niishiyani, jiyano maaji cuaara mosaaria saitia jacu-sano. ¿Quiajaniyarijiataj, taa quia sequeyanijia?

⁶ Judiocuaca camarucuaari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucuanu

quirii. Nojuajaari saaja jojoree, jiyajinia na naajionura na juaashiquiata. ⁷ Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajanijajiniote sesa miyashijiani, nojuaja cuaara na coteetaara janu.

⁸ Jesuuri jojorohuacuhua socua na naajionura jiyacua. ⁹ Cuno pojori tojishacari naa Jesu sequesanotej, puetunujuanaari sanaa quiojorohua. Juhuacatecara quiojonu coteequiaariiri socua saaquiapue, na nuhuaji, socua naatujoori nojorijiniji. Nojoriiri naa quiojoquiaariuhua puetunujuanaa. Saaja Jesuuri jateequue cuno maajitia. ¹⁰ Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiajaniya saitia?

¹¹ Maajiiri Jesu riucuaaree:

—Shaaqui puetunujuanaa, Jiyaniijianaa.

Jesuuri maaji sequereeri:

—Janiyari quia jiyanoya cutarani. Juhuajaniya quia quiaarohua. Majaari sesa quia miiniu socua.

Jesuuri pueya jiuujia cuhuatana

¹² Nojori nuhuaji, Jesuuri pueya niishitiojonu coteerohua. Nojori sequereeri:

—Janiyari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

¹³ Tii quiniaa Fariseocuacaari naa Jesu juaari:

—¡Quiaacuajaari tama quia cuaqueyajiniji pahuataa! ¡Puetunu quia pahuatasanojuanaari maja tojishano!

¹⁴ Jesuuri nojori riucuaaree:

—Tama cua cuaqueyajinijiaaja cua pahuatasacari, cunoori maja najuhua pahuatasano. Cua pahuatasanoori seetanujuanaa cutara. Janiyacuajaari niishiyani teje cua niquiaarini, tee cua quianutaniuhua. Niaari saniniuujia niishiyaquiyacujua teje cua niquiaarini, tee cua quianutaniuhua. ¹⁵ Niaari pueyacuara saquiriojotaquiaa saaja nia niquishanojiniji, nia tojishanojinijiuhuaj. Janiya cutaraari maja cua saquiriojotanu pueyacuara. ¹⁶ Janiya jaara juaari sesa miijia cutarani, cua sequesano cutaraari seetanujuanaa, niquiriyatujua cua quiaquishacari. Cua Jiyarona cua Quecuajaari cua cojiquiaa cuata na juaaniuria sesa miijia. ¹⁷ Niaacuajaari Moisés Rootasanojiniji niishitiojoquiaa: “Caapiqui pueyano pahuatasano jaara juhua tarajanu pahuatasano quirijiuhuaj, cuno cutaraari seetanujuanaa”. ¹⁸ Naajuhuj, canaari caapiquini. Tama cua cuaqueyajaaja cua pahuatasacari, cunoori seetanujuanaa, cua Jiyarona cojishacari janiya. Nojuajaari cua Que.

¹⁹ Fariseocuacaari na nequesotaree:

—¿Teeteeri quia queni?

Jesuuri nojori riucuaaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijiuhuaj.

²⁰ Jesuuri puetunu nio pahuatariquiaajanaa Pueyasora niqutiojosano cumaneeca racataja shuriucuaji, Pueyaso Secojoua tiajinia. Naajaa, majaari pueya quianu quiriquinioj, juhuanouaja na monu juuca quiaquishacarijia.

Jesuucua tiuyashijiacaari jiyanoyaquishaanutaniya

²¹ Jesuuri cuno Fariseocuaca sequerohuacuhaj:

—Janiyari quianutaniyani. Niaari cua pajenuunutaniya juucua. Niaari cusonuunutaniya sesa miijiacaja, jiyanooshoo nia quishacarijia, cucua nia tiuyaquiniucua. Naaratej, majaari nia naata quianu quiniutianiya tee cua quianutaniyacuani.

²² Naa Jesu sequesacaritij, cuno narta Judiocuacaari tama sequetooree-jaaja:

—¿Casaara na sequereecuararini: “Maja nia naata quianu quiniutianiya tee cua quianutaniyacuani”? Tama na cuaqueyajaaja miaquenutaniya jiyoteeri.

²³ Jesuuri nojori sequeree:

—Niaari ninishiqui quiquojinjinio. Janiya cutaraari jiyocuaanujini-jinioni. Niaari saaja mijiria quijiaca. Janiya cutaraari maja niiquijinioni.

²⁴ Janiyacuajaari cunora nia sequereeni, niaari jiyanooshoojua cusonu-unutaniya nia cuaracashitiniucua janiyari maja Pueyaso Niyanuni, taa cua sequequiaa nijaniyacuajani. Cunora niaari jiyanooshoo quiniutianiya, pueyaracaanu saniitiosano nia quiniuria.

²⁵ Nojoriiri Jesu nequesotaree:

—¿Canteeri quiajaniyani?

Jesuuri nojori riucaaree:

—Janiyari najuhuana niaata pocoojiyani. Majaari nia tojinu janiya. Janiyacuajaari tari nia sequereeni cante janiyani. ²⁶ Janiyari queraatia jitiiajaa cua sequesocoriquiano nijaniyani. Niaa jaara nocua tiuyaquiri, niaari pueyaracaanu saniitiosaanutaniya. Puetunu cua sequesanojuanaa nijaniyani, cunoori seetanujuanaa. Cua pohuatasano mijiria, cunoori cua Jiyarona sequesano janiya. Na sequesanoori seetanujuanaa cutara.

²⁷ Majaari nojori niishiniu quiriquiaa Jesuuri na Que Pueyasojiniji pohu-atariquiaa na sequesacari “cua Jiyarona”. ²⁸ Jesuuri cunora nojori sequeree:

—Niaa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyajuhuj, majaari tama cua niishiri-ojosanojuaja cua miiniu quijia. Janiyari saaja cua Que niishitiojosano pohuatajani. ²⁹ Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniuucua na panishano.

³⁰ Naa Jesu pohuatasacari pueya niqiaratej, queraatia pueyari jiyacari nocua tiuuri.

Pueyaso pueyajiniji pohuatasano, Sesaaca pueyajinjinio

³¹ Jesuuri shusha nocua tiuunaa narta Judiocuaca sequeree:

—Niaa jaara seetanujuanaa cua pohuatasano tojjiaca quiri pueyara- caanu, niaari cua pueya quiniutianiya. ³² Naa jaara naa miiritij, niaari see- tanu rupaajanaa niishijiaca quiniutianiya. Naacujitij, niaari seetanujua- naa juhua cartesano pueya quiniutianiya, juhuajaniya quijiaca nia quini- uria.

³³ Narta Judiocuacaari Jesu riucaaree:

—Canaacujaruhua supuetana Abraham jiuhuacujinino supueno pueyani. Majaari quenaaja canaa quiniu quijia tamasa poonijotesano pueya. ¿Casaara naa quia sequeya canaarini, canaa quiniuria cartesano pueyani?

³⁴ Jesuuri nojori sequeree:

—Seetanujuanaa nia sequeyanijia, cante sesa miijiacani, nojoriiri juhua poonijotesano pueya quiya. Majaari na naata maninia mijia na quiniu.

³⁵ Poonijjotesano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaraaanu quiniutianiya cua camarnutani”. Na camarnu jaara na paniyaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. ³⁶ Naajuhuaaj, janiya jaara nia jaariuutiare nia poonijjotenjini, niaari seetanujuanaa cartesano pueya quiniutianiya, Pueyaso muerasura nia quiniuria cutara. ³⁷ Janiyacuajaari niishiyani, niaari seetanujuanaa pa supuetana Abraham jiuhuacuajinio supueno pueya. Naajaa, niaari cua tojiniu paniyaquiya. Niaari cunora cua monu paniya. ³⁸ Janiyari nia pohuatariquiaa cua Quejiniji cua niquishanoni. Niaari saniniuujia nia que sequesano miiquiaacujua.

³⁹ Nojoriiri Jesu sequeree:

—¡Abrahamcuajaari canaa shipininio!

Jesuuri nojori riucuaaree saaja:

—Abraham jaara seetanujuanaa nia shipininio quiri, niaa mariqui maninia miijiaca quiricuaa, taa Abraham quiquiaaricuaani. ⁴⁰ Saniniuujia, niaari cua monu paniya saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara.

⁴¹ Niaari saaja sesa miijiaca taa nia que miiquiaacuaani.

Nojoriiri Jesu juaarii:

—¿Casaa quia sequenyani? ¡Canaari maja saa maaji rasanajuani! ¡Pueyasocuaajaari canaa Que, maja tamonu!

⁴² Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua ninu quiquiaari. Cua Que Pueyasocuaajaari cua jiyaroquiaari. ⁴³ Cua rupaa nia tojiniu paniyaquishacari, niaari cunora cua pohuatasano niishiyaquiya.

⁴⁴ Seetanujuanaa, nia quecuajaari Sesaaca, samaruhua jiyaniijia. Niaari cunora miiniu paniquiaa na panishano. Nojuaja jaara shushajanaa co-teequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaraaanu sapojouuari. Na sapojosacari, naa miyari sapojoua na quiniuucua. Sapojonu niishiniuni, cunoori nojuajiniji supuequiaari. Niaari cunora nia que tojijiaa. Nocuaji niaari naa sapojonuujuacuajuhuaaj. ⁴⁵ Saniniuujia, cua pohuatasacari seetanu rupaajanaa nijaniya, majaari cucua nia tiuuniu quiquiaa. ⁴⁶ ¿Casaa cua miiquianu sesani? Cante na niishiyani cuara sequere. Saniniuujia, janiya jaara sesa miyashijia quirini, ¿casaara cucua nia tiuyaquiyacuaraarini, seetanu rupaajanaa cua pohuatasacari nijaniyani? ⁴⁷ Cante Pueyaso pueyani, nojoriiri Pueyaso rupaa tojiquiaa cutara. Nijaniya saniniuujia, niaari na rupaa tojiaquiya, na muerasu nia quiaquishacari.

Jesuucristoori tariucuaaanu quijiajuhuanaja Abrahamjiniji

⁴⁸ Narta Judiocuacaari naa Jesu juaarii:

—¡Canaacuajaquiri maninia sequeriquiaa quiajanijajinijini, quiaari Samaria jiyajinijinio tahue, samaruraca pueyanotuhuaaj!

⁴⁹ Jesuuri nojori riucuaaree:

—Majaari janiya samaruracani. Janiya cutaraari saaja cua Que tojiquiaani. Niaari saniniuujia cua rerequeteguiaacujua. ⁵⁰ Naajaa, majaari cua tacaaniu naa nia sesacasacari janiya. Tamonu cutaraari quiya, nojuajaari paniya pueya tojiniuria janiya. Nojuajaari cua rerequetejaca sanitiuriquiano. ⁵¹ Seetanujuanaa nia sequenyaniija, cante cua rupaa tojijiani, nojoriiri maja na shaajenu quiniutianiya.

⁵² Narta Judiocuacaari na sequere:

—¡Quiarjia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujiuniaajanaanio. Quiaari saniniujia quiarjia sequeyacujua: “Cante cua rupaa tojjijani, majaari na shaajenu quiniutianiya”. ⁵³ ¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequiaari. Mariyata puetunu Pueyaso sequesano caminiujiuniaa pueyajanaari shaajequiaarijihuaj. ¿Canteeri quiajaniyani naa quia sequenuratej?

⁵⁴ Jesuuri nojori riucaaree:

—Janiya jaara tama cua cuaqueyajaaja jiyatenu paniri juhua jiyani-ijiarani, cunoori najuhuanaj. Seetanujuanaa, cua Quecuajaari cua jiyatequiaari Jiyaniijiarajanaa. Nojuajaari nia sequesano nia Pueyasota. ⁵⁵ Niaari seetanujuanaa na niishiyashijaca. Janiya cutaraari cua Que Pueyaso niishiyani. Janiya jaara nia sequerene, maja cua niishiniu nojuaja, janiya maara sapojoua quirini taa nia quiyacuaani. Janiya cutaraari na niishiyani. Janiyari cunora na rupaa tojjijani. ⁵⁶ Nia supuetana Abrahamri timiquiaari na niishishacari janiya mijiria supuenutaniyani. Nojuaja jaara cua niquiquiaari mijiria quiyano tari, jyanohua timiquiaariiri.

⁵⁷ Narta Judiocuacaari Jesu juarii. Naa na sequetureeri:

—¡aj! Majaruhua juhuanouaja cincuenta marijia shocojonu quiajaniya. ¿Taa quia sequerari quiaa canaa supuetana Abraham niquiquiaari?

⁵⁸ Jesuuri nojori riucaaree:

—Janiya nia sequeya seetanujuanaani, Abraham raaquishacarjia, janiyari tari quijiani.

⁵⁹ Naa nojori tojjishacari Jesu sequesanotej, narta Judiocuacaari sai pajuuree Jesu na jacutajara juucua. Jesuuri nojoriucujajamaari saaja. Pueyaso Secojoua tiajiniji tohuatamaari.

9

Jesu jeeacasacari cariyoujuru namijia, naa rasanouhuanajaj

¹ Tamacari Jesu rucuanesacari canaata, canaari cariyoujuru pueyano niquiriini, naa rasanouhuanajaj. ² Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaaquiaari cariyoujuru, na queya miiniucua sesatee, tama sesa na miiniucuaajaaja soj?

³ Jesuuri canaa riucaaree:

—Maja. Maja cunora naa na rasaanu quiquiaari. Naa rasaaquiaariiri Pueyaso cumaaca niishishaanura, na namijia jaara jeecasaare niquijia na quiniuria. ⁴ Juuca quishacarjia, pa tucuatate miiniu cua Jiyarona sequesano cua miiniuria. Paa quera niniyani. Jaara niniqui, majaari pa naata poonijionu quiniutianiya tari. ⁵ Mijiria cua quishacarjia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.

⁶ Naa Jesu sequenu nuhuajitij, nojuajaari jiyocua riocoree. Na riacauta coniquioreeri. Coriyacau mara ruporohua cariyoujuru namijiaacuaari.

⁷ Cariyoujuru sequerohuari:

—Siloé cuarimia quia jeequese quia namijia.

Hebreo rupaajinia, Siloé cuariiri sequeya “Pueyaso Jiyarosano cuari”. Cariyoujuru cuarimia quiaaree. Tii na namijia jeequeseeri. Tariucua

niquijiaari na tiajinia tiuquiriohua. ⁸ Cariyojuaru na quishacarijia, nojuajaari na miajajau na masetajara cumaneeca mashiniquijiojua quiquiaari. Puetunu pueyajanaari na niqutiujia naa na mashiniquijiosacari. Naacujitij, nojuaja jaara niquijiaari quiquiaari, tarijia na niquiniaa pueyari, mariyata na shuriucua quiniaa pueyanio, nojoriiri tama sequetooquiaarijaaja:

—¿Cante cuno pueyanojaarani? ¿Majate noocujaja tarijia cumaneeca mashiniquijiojuatej?

⁹ Noojiaqueya pueyari sequere:

—¡Taaquiriirinij, nojuajacuj!

Tamasacaari saniniuujia sequereecujua:

—Nojuajaquinio naasucua. Juhua nojuaja niquishiyacuj, majaari seetanujuanaa nojuaja.

Tarijia quijia cariyojuaruuri saa sequereejaa:

—Taaquiriirinij, janiyacuaaquiniatejaj.

¹⁰ Naaratej, pueyari na nequesotaree:

—¡Quiaacujaja cariyojuaru quijiaruhua! ¿Taa niquijia quia quiriohuarini?

¹¹ Nojuajaari pueya riucaare:

—Cuno, Jesu jiyaniushano pueyanoni, nojuajaari mara coniquioree cucuara. Cua namijiaacua na ruporohuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, janiyari niquijiaari quiquini!

¹² Pueyari na nequesotaree:

—¿Teeteeri quia namijia jecana pueyanoni?

Nojori riucaareeri:

—Johujaj. Maja cua niishiniu.

Fariseocuaca nequesoreesacari na namijia jecasano pueyano

¹³ Pueyari Fariseocuacaacua jiyataaree Jesu jecasano cariyojuaru pueyano. ¹⁴ Jesu jaara mara coniquioquiaari na jecanura cuno pueyano namijia, cuno juucaari Judiocuaca samaatenu juuca quiquiaari. ¹⁵ Nocujaji Fariseocuacaari tarijia cariyojuaru quijia nequesotaree taa niquijiaari na quiriini. Nojuajaari nojori riucaare:

—Jesu cua namijiaacua rupojorucuaa marani. Na nuhuaji, janiyari cua namijia jeequeseeni. Naacujitij, janiyari quiarijia niquijia quiyani.

¹⁶ Noojiaqueya cuno Fariseocuacajinijinioori saa sequereejaa:

—Cuno pueyano, nio pueyano namijia jecarucuaani, nojuaja maja Pueyaso Jiyarosano. ¡Nojuajaari Moisés Rootasano tojiyashijia, naa na miinuucua samaatenu juuca!

Tamasacaari saniniuujia sequeriquiaacujua:

—Jaara sesa miijia quiri, ¿maatucua casaara poonijiore Pueyaso cumaacat-acuaraarini?

Naa nojori juayonuutanuucuatej, nojoriiri juhua raquitiiri. ¹⁷ Nocujaji tarijia quijia cariyojuaru nequesaturohuarihuajaj:

—Niquijia quia quishacari quiarijia, ¿taa quia sequeya Jesuni? ¿Maninia miijiatee?

Nojuajaari saaja Fariseocuaca riucaare:

—Janiyara, nojuajaari Pueyaso sequesano caminiujunia.

¹⁸ Tii quiniaa Judiocuacaari na cuaracashitirii saaja. Nojoriiri jiyaniquiaari maja naasucua seetanujuanaa cariyojuaru cuno pueyano quiniu quijia. Nocujaji nojoriiri na queya sequeturee nojoriicua na niniuria.

¹⁹ Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariyujuaru rasanøjuhuanani? ¿Taa quiarijia niqijijara na quirihuarini?

²⁰ Na queyari cuno pojori riucuaaree:

—Taaquiriirini, nojuacuaaquiniateja canaa niyanujuaj. Naa cariyujuaru rasaanquiaariiri. ²¹ Majaari canaa niishiniu cutara taa na quiriöhua niqijijarani. Majaari canaa niishiniujuhuaj, cante na namijia jecarucuaani. Nojuaja nia nequesotare, tari cumantumacacujaja. Nojuajanaa cuaara nia pohuataara cutara.

²² Na queyari naa riucuaquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuquiaari: “Cante Jesu sequeyani nojuaja seetanujuanaa Pueyaso Jiyarosano, naa sequējaca pueya cuaara tenujusaaria maja Pueyaso secojojua tiajinia na tiuquiniuria socua”. ²³ Naaratej, na queyari naa narta Judiocuaca riucuaquiaari: “Nojuaja nia nequesotare, cumantumacacujaja”.

²⁴ Cunora cuno Judiocuacaari socua piiriohua na namijia jecasano pueyano. Nojoriicua na nishacari, na sequetureeri:

—¡Paacuajaari Pueyaso niquiara niya quiyani! Naaratej, ¡seetanujuanaa canaa quia pohuatare cuno pueyanojiniji! ¡Canaa cutaraari niishiyani cuno pueyanoori sesa miijia!

²⁵ Na namijia jecasano pueyanoori nojori riucuaaree:

—Naajaa, jaara sesa miijia quiri, jaara maninia miijia quirijihuaj, maja cua niishiniu cuno. Janiya cutaraari niishiyani, ¡janiyari tarijia niqiyashijia quiquiaarini! ¡janiyari saniniuujia quiarijia niqijijia quiya cutarani!

²⁶ Nojoriiri na nequesotiarohuacuhuaaj:

—¿Taa na miiriucuaa quiajanijajarani, niqijijia quia quiniuriani?

²⁷ Narta Judiocuaca camarucua sequere saajaari:

—Janiyacujaja tari nia pohuataareni. Majaari nia tojinu paniniu janiya. ¿Casaara nia paniya socua cua pacutenura sequenu nijaniyani? ¿Niaate na pueyara quiniu paniya soj?

²⁸ Naa na sequesacari nojoritij, cuno Judiocuaca camarucuaari na sesacaturee. Naa na sequetureeri:

—¡Quiaari cuno pueyano tojjijiacujaja! ¡Canaa cutaraari supuetana Moisés Rootasano tojjitijacani! ²⁹ ¡Canaa cutaraari niishiyani Pueyasøjuaanaari Moisésua muetaquiaari na rootanura nojuaja! ¡Saniniuujia cuno pueyanoori-jataj, majaari quenaaja pa niishiniu teje na supuequiaarini!

³⁰ Na namijia jecasano pueyanoori nojori riucuaaree:

—¡Niaaquiiri mosanucua seetanujuanaa! ¿Majateeri nia niishiniu teje na supuequiaarini? ¡Nojuajaari cua namijia jecarucuaa! ³¹ ¡Paacuajaari niishiyani Pueyaso maja na tojinu quijia sesa miijiacu secojosano! ¡Saaja na timitijaca secojosano tojiya cutaraari, cante na panishano miiquiaacujani! ³² ¡Majaari quenaaja pa tojinu quijia tamonu pueyanojiniji, cante cariyujuaru namijia jecajani, naa cariyujuaru rasanøjuhuanaj! ³³ Cuno pueyano jaara Pueyaso Jiyarosano quiyaquiri, ¿taa cua namijia na jecaruacuaraarini?

³⁴ Cuno pojoriiri na juaaniutia na sequeturee:

—¡Quiaari sesa miijia rasaanquiaari! ¿Quiaateeri jiyanojuaa canaa niishitijonu paniyaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso secojojua tiajinia. Naacuajitij, cuno pueyanoori juhua taanusano pueyano quiquiaari narta Pueyaso timitijaca pueyajiniji.

Jesu tojitiaashijiaca pueya juhua cariyojuaru

³⁵ Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequereee:

—¿Quiaate Pueyaso Niyanuucua tiuujia?

³⁶ Jesu sequereeri:

—Jiyaniijianaa, cua sequere canteeri nojuajani, nojuaja cua niishiniuria nocua cua tiuuniuria.

³⁷ Jesuuri na sequereee:

—Quiaacuaja na niquiyaruhua. Nojuajaari cunocuaja, quiata pocoojiyani.

³⁸ Jiyacaritij, pueyanoori Jesu cariquimiaji mojoquetaree. Na sequereeri:

—¡Quiocua tiuyanijia, cua Jiyaniijianaa!

³⁹ Na nuhuaji, Jesuuri cuniqui quiniaa pueya niquiara sequereee:

—Janiyari mijiria niquiaarini juhua cua raquiriojotanura mijiria quiniaa. Naacuajitij, cante niishiyani nojuaja juhua cariyojuaru quiya, nojuajaari juhua namijiaraca quiniutianiya cucua na tiuushacari. Saniniuuja, cante jiyaniyani nojuaja niquijia cutara, nojuajaari juhua cariyojuarura tari jiyatesaaree, cucua na tiuyaquiniuucua.

⁴⁰ Tii quiniaa Fariseocuaca jaara tojiquiaari naa Jesu sequesanotej, nojoriiri Jesu sequereee:

—Naa quia sequesacaritij, ¿quiaateeri sequeya canaari cariyojuarurijiuuhuj?

⁴¹ Jesuuri nojori riuucaree:

—Niaa jaara tama nia cuaqueyajaaja jiyatere juhua cariyojuarura cucua nia tiuuniuria, Pueyaso maara nia jiyanoori. Quiarijiani, tama nia sequenucuajaaja, “Canaa niquijia cutarani”, niaari jiyanooshoojua nioojia nia tacatoyaquiniuucua.

10

Jesu pahuatasano miriqui borrego cojuanajiniji

¹ Jesuuri socua pahuatarohua pueya niquiara. Naa sequereeri:

—Seetanujanaa nia sequeyanijia, cante borrego mataca tohuateyaco tiuquiyaquijiani, nojuaja jaara tamocoji tiuquimia, cunoori nohuasejojua.

² Saniniuuja, cante tohuateyaco tiuquijia cutarani, cunoori borregohua camarujanaa cutara. ³ Tohuateya cojuanaari tootiu riataquiaa nocuaji. Borregohua camaruuri puetunu na seya sesacajanaa jiyaniquijia. Na borregohuari na rupaa niishijia. Na camaruuri naa na tohuatanijiojua puetunujuanaa na matacainijia. ⁴ Puetunu na borregohujanaa jaara tohuareetama, na camaruuri na puetaja. Na seyari na nuhuaji sacujaja, na camaru rupaa nojori niishishacari. ⁵ Saniniuuja, borregohuari maja na nuhuajini quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

⁶ Jesuuri naa pahuataquiaari miriqui nojori niquiara. Nojoriiri saaja niishiyaquiquaari casaa na niishitiojonu paniriquiaa nojorini.

Jesu Cristo, maninia pa cojuana

⁷ Nocuaji Jesuuri naa nojori sequerohua maatia:

—Seetanujanaa nia sequeyanijia, janiyari juhua tohuateyani, cua borregohua tiuquitianura cua Que Pueyasocua. ⁸ Cante cua niyacarijia nijioquiaari coteenuni, nojoriiri sesa mijiaaca quiquiaari, nohuasenujuaca. Cua borregohuari namitia nojori numueejushiquiaari. ⁹ Janiyari juhua tohuateyani. Cante janiyajiniji tiuquiya cua Queecuani, nojuajaari Pueyaso

pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutianiyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijiniacuma.

¹⁰ 'Nohuasejojaari saaja tiuquijia borregohuacua na nohuasenua, na puecoonurajuhua. Naa na shaajaaja puetunujuanaari. Janiyari saniniuujia niqiaarini cua borregohua cua jiyatenura pueyaracaanu quijiacara, seetanujuanaa jyanohua shuquiriaatia quijiacara nojori quiniuria. ¹¹ Janiyari maninia cojuanani, maja tamonu. Pueyano jaara maninia na seya cojuana maniniu quiri, tama na cuaqueyajaaja panitiaja na seyacuaari. ¹² Saniniuujia, borregohua camarujuanaa jaara tamonu cojuateya na seya, cuno pueyano jaara niquiri sare nocua canujiyano, nojuajaari na puerenuta neteja. Borregohua tiujiaqueeri. Naa miijiaari cuno borregohua quiyaquiniucua na seyajanaa. Naacujitij, sareeri borregohua soojua. Naa na cocuatajaari. ¹³ Cuno borregohua cojuanaari naa neteja sareecuaji na tacayaquishacari seetanujuanaa cuno borregohuacua. Nojuajaari saaja paniya na poonijosano sami na niquitiosaanura.

¹⁴ 'Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. ¹⁵ Nojoriiri cua niishiyajuhua, taa cua Que niishiya janiyacuaani, mariyata taa cua niishiya cua Quejaniuhua. Janiyari tama cua cuaqueyajaaja panitiaja cua borregohuacuarani. ¹⁶ Janiyari socua borregohua jitiaani. Nojoriiri maja nio cua borregohua maanujinijino. Janiyari nojori rijionutaniya niyarajuhua. Nojoriiri cua tojtiriqiuano. Naacujitij, puetunu cua borregohujanaari jatiqui quiriquiano, niquiriyatu cojuanaracajuhua.

¹⁷ 'Cua Queeri cua paniya naa cua panitiasacari tama cua cuaqueyajaaja cuno borregohuacua. Janiyari tama cua panishacarijaaja mosaanutaniyani, na nuhuaji cua samiitianuhua, pueyaracaanu quijia cua quiniuhua. ¹⁸ Majaari quenaaja tamonu naata monu janiya cua paniyaquishacari. Janiyari cua panishacari cusunutaniya cua borregohuacuarani. Janiyari cumaacaracani nojoriicuara cua cusunura. Janiyari cumaacaracajuhua cua samiitianuhua. Cua Quecujajaari naa cua miinuria cua jiyaroquiaari mijiria.

¹⁹ Narta Judiocuaca jaara tojiqiaari naa Jesu sequesantej, nojoriiri socua tama juayonuutaquiaarijaaja Jesuucua. ²⁰ Queraatia pueyari jiyacari sequeere:

—¡Cuno pueyanoori samaruraca! ¡Maja na tojiniu, pueyanaa! ¡Najuhua na pocuaano!

²¹ Tamasacaari saniniuujia sequeriquiaacujua:

—¿Samaruraca pueyanoteeri maninia casaa pohuatajajaara juhua nio pueyanojua? ¡Maja! ¿Pueyanoteeri na naata samaru cumaacata jecanu cariyojuaru namijiajaara? ¡Maja na naata!

Judiocuaca camarucua niqiniu paniyaquishacari Jesu

²² Tamacari, Jerusalén tiacajiniaari queranacusaariquiaa. Cunoori quiriquiaa pueya niishiriojonura nojori juhua cuno juucajinia Pueyaso Secojoja tii jiyatequiaariuhua seetanujuanaa juhua Pueyaso quiquiora na quiniuhua. Jiyacariiri shuniya quiriquiaa. ²³ Jesuuri tii quiriquiaajuhua. Pueyaso Secojoja tiajinia quiriquiaari. Nojuajaari pueya jiyaniquisano tariucuaaanu jiyaniija Salomón canujuucojojuajinia riujuuniuquiojoriquiaa. ²⁴ Jiyacaritij, canaa Judiocuaca camarucuaari tii na cosese. Naa na nequesotatureeri:

—¿Taacarí canaa quia sequenutaniya socuaari cante quiajaniyani? ¡Quiaa jaara seetanujuanaa Pueyaso Jiyarosano quiri, quiaríjia canaa quia se-
quere!

²⁵ Jesuuri nojori riucuaaree:

—Janiyacuaaja tari nia sequecanuni. Niaari saaja na cuaracashitiquianu. Níaa cuara niishiiria cante janiyani, nia niquishacari cua miishano cua Que sequesano janiya. ²⁶ Niaari saaja cucua tiyuaquiquiaa cua borregohua maanujinjinio nia quiaquishacari. ²⁷ Cua borregohuari cua rupaa tojjíia cutara. Janiyari nojori niishiyajaaníuhaj. Nojoriiri cunora cua nuhua-
jiquiaa. ²⁸ Janiyari pueyaracaanu quíjia nojori jiyatequiaani. Majaari nojori juurequenu quiniutianiya. Majaari quenaaja tamonu naata jaari-
uutianu quiniutianiya nojori janiyajiníi. ²⁹ Cua Queeri cua borregohua cua níquítioquiaari. Nojuajaari socua jíyanohua cumaacaraca tamasa
cumaacaraca quíjiacajiníi. Naacujatíj, maja quenaaja tamonu naata cua borregohua jaariuutianu cua Quejiníi. ³⁰ Janiya cua Queta, canaari juhua níquiriyatuni.

³¹ Jiyacarítj, canaa Judíocuaca camarucuaari sai ríjiorohuacuhaj, Jesu na jacutajara juucua. ³² Jesuuri saaja nojori sequeree:

—Janiyari queraatia maninia casaa míiquianu saaja cua Que cumaacata nia níquiaraní. ¿Teyanoocua nia jacunu paniya janiyani?

³³ Nojoriiri Jesu riucuaaree:

—Majaari canaa jacunu quiniutianiya quiajaniya maninia quia miiniuu-
cua. ¡Canaari quia jacunutaniyani sacuaraatia quia pocuanuucua Pueyaso níquiara! ¡Quiaari tama quia cuaqueyajaaja jíyateya juhua Pueyasora!
¡Cunoori jíyanohua sesa! ¡Quíaacuaajaari pueyano, juhua canaajuhaj!

³⁴ Jesuuri nojori sequeree:

—Níaacuaajaari tariucuaacaanu naajiosano Pueyaso Rupaa jíitiaa. Pueyaso sequesanoori naa naajiotasano quíya tíi:
“Janiyacuaajaari nia sequequiaaríní, níaari pueyasohua”.

³⁵ Paacuaajaari níshiyani, Pueyaso Rupaajinia naajiotasanoori maja na naata cuaracashitishaanu. Pueyasojuanaari pueya jíyaníquiquiaari “pueyasohuata”, noo pojori, teyano nojuaja jíyatequiaari Israel pueya jíitianaaracuajani. ³⁶ Naajuhaj, Pueyasocuaajaari cua saquíriojoquiaari míjiria na jíyarosocoríquiano. Naa Pueyasojuanaa Jiyarosano cua quishacarítj, ¿níaatucua casaara sequerení janiya Pueyaso níquiara pocuaaree sesaní, cua sequesacari janiya Pueyaso Níyanuní? ³⁷ Janiya jaara cua Que panishano míyaquíri na cumaacataní, janiya maara nia juayaquíriní cucua nia tiyuaquíniuuucua. ³⁸ Níaacuaajaari cua Que cumaacata cua miishano níquiquiaa. Níaa jaara cua pohuatasanoocua tíuuníu paníyaquíri, naajaa, cua Que cumaacata cua miishanoocua nia tíuuri quenaaja. Níaa jaara níshírí puetunu cua miishanojuanaari cua Que Pueyaso cumaacata miishano, níaa maara níshírí Pueyasoorí coojia rupueja, janiyari noojia rupueyajaaníuhaj.

³⁹ Jiyacarítj, nojoriiri socua Jesu quíatunu paníríohuacuhaj. Jesuuri saaja nojoriícuají mashíquíi.

⁴⁰ Jesuuri canaa jíyataarohua Jordán moo taquíjiria tee Juan tíuquíni-
quiaari taríjia pueyacuajani. Canaari tíi quíshíiní. ⁴¹ Queraatia pueyari Jesuucua níjíoquiaari tee canaa quíríquiaacuajani. Nojoriiri tama seque-
quiaaríjiaaja Jesujiníi:

—Tíuquíniójia Juaní maja quenaaja na miíníu quíjia casaa Pueyaso cumaacata. Naajaa, puetunu níó pueyanójiníi na sequesanojuanaaquíri seetanujuanaa quíjia.

⁴² Naacuaajitij, queraatia pueyari Jesuucua tiuquuaari tii, tee canaa quiriqiaacuajani.

11

Lázaro shaajenujiniji pohuatasano

¹ Jiyacaritij, tamonu pueyanoori cusosu matariquiaa. Na sesa quiqiaari Lázaro. Nojuajaari Betania tiacajinijiniojuanaa quiqiaari, Judea jiyajinia. Na rimiatuhua quiqiaari María, Martanio. Nojoriiri cuno Betania tiacajinijinio quiqiaarijuhuaj. ² Lázaro rimiatu Maríani, nojuajaari noo maajicuaa Jesu niohuaca sacuanijiaquiaari na muecacatatej, nocua na totanu nuhuaji na shanohua jaanutaja. ³ Lázaro matasacari cusosu, na rimiatuhuari pueyano jiyarotuhuaari Jesu numootenuucua. Naaratej, cuno pueyano tiuquishacari Jesuucua, nojuajaari naa caminiujuquiaari Lázaro rimiatuhua sequesano nojuaja:

—Jiyaniijianaa, quia panishano pueyanona cusosu mataa.

⁴ Jesu tojishacari naa cuno pueyano sequesantej, tii quiniaa pueya sequeeri, canaajuhuaaj:

—Nojuajaari maja na cusunu quiniutianiya na shaajenura puetunujuaana. Cuno cusunu na jiiatianojinijini, pueyari Pueyaso cumaacata miishano niqiniutianiya. Pueyari cunora Pueyaso Niyanu maniniuhuaqueetanutaniya, cua Que Pueyasojuhuaj.

⁵ Marta, María, Lázaronio, nojoriiri Jesu panishano pueya quijia. ⁶ Naajaa, Jesu jaara numootesaaquiaari Lázarojiniji, majaari nocua na quianu quiqiaari ritia. Caapiqui juuca camueeree cuniquijiaaraari, tee canaa quiriqiaacuajani. ⁷ Na nuhuaji, canaa na saquiriojosano pueya sequeeri:

—Judea jiyajinia pa quiaarohuacuara socua.

⁸ Canaari Jesu sequereeni:

—Niishitiojonanaa, cuniquijinio Judiocuacacuaajaari shusha naataja tii quia jacunu paniquianu. ¿Casaara socua tii quia quianu paniuhuariniuhuaaj?

⁹ Jesuuri canaa riucaaree miriqui:

—Janiyara, juuca juhuanujuaja. Juucaari maninia seetanujuanaa pa rucuejonura. Paa jaara pananu tiuquiyaquishacarijia rucuejoreni, paari maninia niqiyua pocuajini. Majaari pa tiuriiniu. ¹⁰ Paa jaara ninishiqui rucuejore saniniunijia, paari tiuriijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriqiaa Judiocuaca niqiara na rucuejonura, na mosaanu juuca quiyaquishacarijia. ¹¹ Na nuhuaji, Jesuuri naa canaa sequeree socua:

—Pa rupuena Lázaroori tari maquequee. Janiyari na niucujanuuca quianutaniyani.

¹² Canaari Jesu sequereeni:

—Jiyaniijianaa, nojuaja jaara maqueya, maniacuaajaqui. Naacuaajiti paari niishiyani naatanutanihuacuajaaqui. ¿Paatucua casaara najuhuaana nocua quiaareni?

¹³ Naa Jesu pohuatasacari canaa Lázarojinijitij, canaa sequeriquiaa juucuaari Lázaro tari macu quiriqiaa. Canaari saniniuuja jiyaniriqiaani Jesu naasucuaari canaa pohuatariquiaa Lázaro nareja maqueriquiaa. ¹⁴ Nocuaaji Jesuuri maatia canaa sequeree:

—Lázaro tari cusoyarucuaa. ¹⁵ Janiyari timiyani tii cua quiyaquiniucua Lázaro quishacarijia saminio. Naa quiarijia macu na quishacaritij, niaari socua jiyajeneta casaa cua miishano niqiniutianiya, seetanujuanaa cucua nia tiuuniuria cutara. Quiarijia cutara, nocua pa quiaare.

¹⁶ Jiyacaritij, Tomásri canaa narta saquirojosano pueya sequeree:
—Pa Jiyaniijata pa quiaarejuhuaj, nata pa cojiritiasaanura puecoonu.
Cuno Tomásri pueya sesojosano quiquiaari “Caapueya muetusano”.

Jesu, macunucua samiitianijojua

¹⁷ Canaa jaara tiuquijioseequiaarini, Jesuuri pohuatasaquiaari Lázaro tari cuatro juuca shocotejoriquiaa raaco na niasaanujiniji. ¹⁸ Betania tiacaari catecaja Jerusalén tiacajiniji. (Nareja media hora paa jaara ritia rucuaneyareni). ¹⁹ Naaratej, queraatia narta Judiocuacaari quiojoquiaari Marta, María tiajinia, nojori na cumanjianura na nanu nuhuaji. ²⁰ Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María niniu quiriquiaa cutara. Tiajiniaja quiriiri. ²¹ Canaacua Marta tiuquishacari, nojuajaari Jesu sequeree:

—Jiyaniijanaa, ¡quiaa jaara niya quiquianu, cua nanu maara shaajeyaquiuanu! ²² Naajaa, janiyari niishiyani quiaa jaara Pueyaso secojore, Pueyasoori quia secojosano tojiniutianiya.

²³ Jesuuri Marta sequeree:

—Quia nanucujaja samiitanutaniuhua.

²⁴ Martaari na riuucaree:

—Taaquiriirini, janiyacujaja niishiyani nojuajaari samiitanutaniuhua macunucua samiitiacosacariuhua jiya puequesacari.

²⁵ Jesuuri na sequeree:

—Janiyacujajaari macunucua samiitianijojuani. Cante cucua tiuujiani, jaara cusoyare, naajaa, samiitanutaniuhuari. ²⁶ Cante cucua tiuuri saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

²⁷ Nojuajaari Jesu riuucaree:

—Jaa, Jiyaniijanaa. Janiyacujaja niishiyani quiaari Cristo, Pueyaso Niyanu, noj tariucuaaanu sequesaaquiaari mijiria niriqianotej.

²⁸ Naa Marta riuucuanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quianura.

²⁹ Naa María tojishacari Marta sequesanootej, ritia sanequeeri. Jesuucua nimiaari tee canaa quiriquiaacuajani. ³⁰ Jesuuri juhuanojuaja maja na tiuquitianu quiquiaari canaa cuno tiacajinia. Canaari tiaca shuriucua quiriquiaajaani tee Marta naacuquiaari canaacujani, Jesuucua na nishacari. ³¹ Nojori cumanjianaa pueya jaara María niquiquiaari ritia tohuataano tiajiniji, nojoriiri na jianiquiaari na nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

³² María tiuquishacari canaacua, Jesu cariquimiaji mojuquetaseeri. Naa na sequereeri:

—Quiaa jaara niya quiquianu, cua nanu maara shaajeyaquiuanu.

³³ Jesu niquishacari María nujuqueyano, mariyata nata quinia nujuqueyanojuhuaj, Jesuuri nojori taraajetaree. ³⁴ Jesuuri pueya nequesotaree:

—¿Tee na niasaarucuaani?

Pueyari Jesu sequeree:

—Miji, Jiyaniijanaa. Quia niquiqui. Niya niasaarucuaano.

³⁵ Jesuuri nujuquese. ³⁶ Tii quinia Judiocuaca niquishacari Jesu nujuqueyano, tama sequetooreejaarija:

—¡Nia niquiri! Jiyanoehua Lázaro panijiaquiiri.

³⁷ Noojiaqueya cuno pojorijinijinioori sequeriquiaajuhuaaj:

—Jesu jaara cariyajuaru namijia jeecacanucuaa, maara Lázaro naataniquianujuhuaaj maja na shaajenura.

Jesu samiitianishacari Lázaro

³⁸ Jesuuri jiyanoehua na taraajenuta raa jiyajiria catecanoquiaari, canaa-juhuaaj. Raari puereetuca saajiaata mishiquiosano quiriquiaa. ³⁹ Jesuuri pueya sequeree:

—¡Saajia nia ruutiniri tamocora!

Martaari Jesu sequeree:

—¡Jiyaniijianaa, cuatro juuca tari na shoconujiya! ¡Tari mocuaatia jaaniuya naasucua!

⁴⁰ Jesuuri Marta sequeree:

—Janiyacuaaja tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niquniutianiya.

⁴¹ Jiyacaritij, pueyari saajia ruutinirii tamocora. Jesuuri jiyocuacaanu maure. Naa Pueyaso sequereeri:

—Cua Quenaa, quia timitiaanjia. Quiaari tari cua sequesano tojiriucuaacuaaja. ⁴² Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyaroquiaari.

⁴³ Naa Jesu sequenu nuhuajitij, jiyanoehua na rupaa paaretareeri. Naa sequereeri:

—¡Lázaronaa, quia tohuatama!

⁴⁴ Macuuri tariucua saminio tohuatamaa. Na juaashiquiaca, na niohuacaari jiuniosano quiriquiaajaa. Na nacaari puetunu na jiquiocotajanaa mishiquiosano quiriquiaajuhuaaj, toquerauta morosano. Jesuuri pueya sequeree:

—Nia saacatare, cuaara rucuanera.

Judiocuaca camarucua roojotoosacari na monura Jesu

(Mt 26.1-5; Mr 14.1-2; Lc 22.1-2)

⁴⁵ Naa Jesu samiitianishacari Lázarotej, queraatia narta Judiocuacaari nocua tiuququiaari, noo pojori canapute Mariacua nijioquiaari na cumanijianuracujani. ⁴⁶ Noojiaqueya cuno Judiocuacajinijinioori Fariseocuaacua quiojoquiaari nojori pohuatanura Jesu miishano. ⁴⁷ Naaratej, Fariseocua, pueyacuara secojonaa jiyaniijianucuanio, nojoriiri rerejoquiaari puetunu Judiocuaca camarucuatajanaa. Nojoriiri sequetuquiaari:

—¿Taa pa miiniutianiya? Cuno pueyanoori queraatia casaa miiquiaa na cumaacata pueya niquiri. ⁴⁸ Paa jaara nareja na shanacure naa na miiniuriatej, ¡puetunu pueyajanaari na pueyara quiniutianiya, nocua nojori tiuushacari! Nojoriiri na jiyaniijiaara socua na jiyatenutaniya. Naaratej, pa jiiitianaa Romano pueyari pocua nijionutaniya Pueyaso Secojoua tia nojori niyartanura, pa pueya na pucoonurajuhuaaj.

⁴⁹ Caifásri tii quiriquiaajuhuaaj. Nojuajaari canaa pueyacuara secojonaa jiyaniijiajanaa quiriquiaa cuno marijiaara. Jiyacaritij, nojuajaari narta camarucua sequeree:

—¡Niaaquiiri niishiyashijiaca seetanujuanaa! ⁵⁰ ¿Majateeri nia niishiniu? Maninia cutaraari niquiriyatu pueyano cusonura pa niti, maja najuhuaana puetunu pa pueyajanaa puecoosaanura.

⁵¹ Caifás sequesanoori maja tama na sequesanojuaja quiquiaari. Pueyacuara secojonaa jiyaniijiajanaa na quishacari, Pueyasoori naa na

pohuaterree taa Jesu cusonutaniya puetunu Judiocuacaacuarajanaani.⁵² Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapueecuarajanaajuhua, tee tiqiyocua niaqwejonu na muerasurano quiyacuajani. Nojuajaari cusoriquiano puetunu cuno pojorijanaa na rerejotenura, jatiqui na qutiuniuria juhua niquriyatu maanu.⁵³ Naacuajitij, cuno juucajiniji, cuno Judiocuaca camarucuaari roojotooriquiaa taa nojori monutaniya Jesuni.

⁵⁴ Nocuaji, Jesuuri maja tari na rucuanenonu quijia narta Judiocuaca niqiara. Cunora tamaquiria canaa jiyataquiariiri. Canaari nata quishii cariiquia jiya shuriucua tamonu tiacajiniani. Cuno tiaca sesa quiquiaari Efrain.

⁵⁵ Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajinijijiaaja. Nojoriiri quiojoquiaari juhuacarijia nojori jeenucuanura na cuaqueya nojori puecosacari tama na seyajaaja nojoriucara. Nojoriiri naa miqiaari jiyanooshano nojori quiniuria Pueyaso niqiara, taa supuetana Moisés rootaquiariicujani. Nojoriiri naa miqiaari juhuajaniya nojori queranacunura Pueyaso niqiara Pascua juuca.⁵⁶ Pueyari tii Jesu pajenuuriquiaa. Pueyaso Secojoja tiajinia nojori quishacari, nojoriiri tama nequesoreetooriquiaajaaja:

—¿Taa nia sequeyani? ¿Pa queranacunujinia niniutianiyatenojotij, maja soj?

⁵⁷ Pueyacuara secojonaa jiyaniijianucua, Fariseocuananio, nojoriiri tari pueya rootaquiari, tamonu pueyano jaara niishiri tee Jesu quiyani, cuaara nojori numooteera nojori quiatenura Jesu.

12

María totasacari na shanohua jaanutaja Jesuucua (Mt 26.6-13; Mr 14.3-9)

¹ Seis juuca jaara cureeriquiaaja Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samiitianiquiaariicujani. ² Cuno tiacajinijinio Jesu rupuenaa pueya timitiasacari Jesu, nojoriiri sumatunuquiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuuriquiaa narta masuanso pueyata, canaatanio. ³ Jiyacaritij, Mariari Jesuucuaara pataree na shanohua jaanutaja. Cunoori “nardo” jiyaniishano nataujiniji shipinishano quiquiaari. Jiyanohua queraatia cumaneecata masesano. Puereetuca motiquio cajiniocua puecariquiaari cuno shanohua jaanutaja. Mariari Jesu nihuacaacua na totaree. Na nuhuaji, na sacuanijiarohua na muecataraari. Puetunu tiacojuanaari shanohua jaanuriquiaa. ⁴ Naa María miishacaritij, niquriyatu canaajinijinio Jesu saquiriojosano pueyanoori juarii. Nojuajaari Judas Iscariote quiriquiaa, na nuhuaji Jesu quiatequiaari na paraani. Nojuajaari naa sequeree:

⁵ —¿Casaara cuno shanohua jaanutaja niqutioyaquishaaree queraatia cumaneecarani, casamijiunucua pueya niqutiosocoriquianoni? ¡Jaara masenu panishaare, maara niqutiosaare juhua niquriyatu marijara pueyano poonijionu sami!

⁶ Naa Judas sequesacaritij, majaari seetanujuanaa na taraajenu quiriquiaa casamijiunucua pueyacu. Naa sequereeri saaja cumaneecaacua jiaatija na quiniucua, nohuasejojua na quishacari. Judasri cumaneeca quiquio cojuatana quijia puetunu canaarajanaa.

Naacuaajitij, nojuajaari tiji nohuasejojua, pueya niqutiojosanojiniji canaara. ⁷ Jesuuri saaja Judas sequeeree:

—Nareja quia niquiri. Nojuajaari nio shanohua jaanutaja cojuataja pueyaracaanu, juhuacarijia na jeenucuatajara cua cuaqueya, pueya niaaquishacarijia janiya raajinia, janiya jaara mosaareni. ⁸ Casamiijiuniucua pueyari pueyaracaanu niaata quiriquiano cutara. Saniniujia, janiyari maja pueyaracaanu niaata quiriquianoni.

Pueyacuara secojonaa jiyaniijianucua roojotoosacari Lázaroocua

⁹ Queraatia canaa Judiocuacaari niishiquaari Jesu Betania tiacajinia quiriquiaa. Cunora, nojoriiri nocua quiojoquiaari na niquniuucua, Lázaro niquniuucujuhuj, tevano Jesu samiitianiquiaaricujani. ¹⁰⁻¹¹ Jesu samiitianiniuucua Lázaro, queraatia canaa Judiocuacaari Jesuucua tiuququiaari, na pueya nojori quiniuria. Cunora, canaa pueyacuara secojonaa jiyaniijianucuaari roojotooquiaari Lázaro na motunurajuhuj.

Juhua Jiyaniijajanaa Jesu tiuquishacari Jerusalén tiacajinia
(Mt 21.1-11; Mr 11.1-11; Lc 19.28-40)

¹² Cuno queraatia pueya, tari Jerusalén tiacajinia quiriquiaacuaa Pascua juucara queranacunurani, nojoriiri niishiquaari Jesu tariqui tiuquiniutianiyajuhuj. ¹³ Nocuai, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiimotanuuriquiaari. Naa nacooriquiaajaaru-hua nojori shuquiritiasacari Jesu:

—¡Pocuai Tacuna! ¡Pocuai Tacuna! ¡Cuaara shuquiriaatia quiiria pa Jiyaniijia, tevano Pueyaso jiyaroquiaari pocuacujani! ¡Nojuacuajaari Israel pueya Jiyaniijajanaa!

¹⁴ Jesuquiiri jiyacari burro niquiojua riuriatamaa. Tari na nijinia cajiriquiaari, taa tariucuaaanu Pueyaso Rupaajinia naajiotasano quiyacujani. ¹⁵ Naa sequeyari:

“¡Sión tuhananuucua quiniaa pueyanaa, maja puerenu! ¡Nia niquiri! ¡Nia Jiyaniijia cumaji niya niaacua! ¡Burro niquiojua nijinia cajiyari!”

¹⁶ Jiyacaritij, majaari canaa niishiniu quiriquiaa naa canaa tiuquitishacari canaa Jiyaniijia Jesutej, canaari nio tariucuaaanu Pueyaso Rupaajinia naajiotasano tohuateeriquiaani. Pueyaso jaara Jesu samiitianiquiaariuhua, canaari jiyacari shusha niishiquiaarini cuno naajiotasanoquiiri Jesujiniji quiquiaari.

¹⁷ Cuno pueya, Jesu samiitianishacari Lázaro niquiquiaarini, nojoriiri pueya pohuatariquiaa taa Jesu jiiquiooquiaari Lázaro na raacoji na tohuatanurani. ¹⁸ Queraatia pueya niishishacari naa Jesu miishano na cumaacatej, nojoriiri Jesu naacunuucua nijiyaree. ¹⁹ Nocuai, Fariseocuacaari tama sequeooriquiaajaaja:

—¡Canaacuajaari cunora nia sequequiaani pa morejanaa! ¿Niaate na niquiya? ¡Puetunu pueyajanaari cuno pueyanooqua pacuree, na pueya nojori quiniuria!

Grecia jiyajinijinio taucuaca pocoojonu panishacari Jesuta

²⁰ Grecia jiyajinijinio taucuacaari Jerusalén tiacajiniara nijioquiaarijihuaj Pueyaso niquiara nojori queranacunuunura Pascua. ²¹ Cuno nojoriiri canaa cojinia Felipeecua catecanoquiaari. Felipeeri Betsaida tiacajinijinio quiquiaari. Cunoori Galilea jiyajinia tiaca. Cuno Griegohuari Felipe sequeuree:

—Pueyanonaa, canaa quia Jiyaniijia Jesuta pocoojonu paniyani.

²² Jiyacaritij, Felipeeri Andrés sequesee cuno pojori sequesano nojuaja. Na nuhuaji, Andrésri Felipeta quiaaree Jesuucua. Nojoriiri Jesu pohuatasee-juhuaj. ²³ Jesuuri naa nojori riucuaaree:

—Quiarijiani, tama janiyajaarjia mosaanutaniya pueya nitini. ²⁴ Seetanujuanaa nia sequeyanijia, sohuajajau jaara raama jataaquishaare, pueyaracaanu niquijijajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. ²⁵ Naajuhuj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitajia na tojiniuria janiya mijiriani, nojuajaari pueyaracaanu shuquiriaatia rishijiaari jiyatesaanutaniya. ²⁶ Cante quiria poonijionu paniyani, cuara seetanujuanaa cua tojjijia quiriia. Tee cua quiniutianiyacuaani, cua tojitiyajacaari tii quiniutianiyajuhuj. Cua Queeri cua tojjijia timitianutaniya. Jijyanohua maninia nojori miiniutianiyajaariuhuj!

Jesu pohuatasacari nojuaja mosaanutaniya

²⁷ Quiarijiani, janiyari jiyanhua tacayani. ¿Casaa cua sequeyarini? ¿Janiyate sequeya soj: “Cua Quenaa, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niqiaari mijiriani. ²⁸ ¿Cua Quenaa, janiya cuara miishiiriaqui taa quia paniyacuajani, pueya niishiniuria quiaari jiyanhua maninia!

Jiyacaritij, Pueyasoori tojishaaree pocuaano jiyocuacaanuji. Naa Neyanu sequereeri:

—Janiyacuajaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuaru mosaare.

²⁹ Cuno pueya, canaata tii quiriqiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuaja cuno tojishaareeni!

Tamasacaari saniniuujia sequereecujua:

—¡Pueyaso serucuaja nocua pocuareeno!

³⁰ Saniniuujia, Jesuuri canaa sequeree:

—Cuno rupaa niaa na tojiriini, majaari quiria na quiniu quiriqiaa. Cunoori nia tojishocoriquiano quiriqiaa, nia niishiniuria cua Queeri cua tojiqiaa cua secojosacari nojuaja. ³¹ Quiarijiani, mijiria quiniaa miishacari naquiya janiya, nojoriiri saniniuujia saniitosocoriquiano jiyatesaaree tari. Naajuhuj, mijiria jiyaniijia Sesaacaari jataasaanutaniyajuhuj, maja cumaacaraca na quiniuria socua. ³² Janiya jaara nujuaretasaareni, janiyari puetunu pueyapuejanaa nijlotenutaniya cucuani. Nojoriiri juhua jaatiasaanutaniya cucua, cucua nojori tiuuniuria, nojori ruuretanura janiya soj.

³³ Naa Jesu sequesacaritij, canaa niishitiriiri taa pueya monutaniya nojuajani. ³⁴ Tii quiniaa pueyari na riucuaaree:

—Canaacuajaari tariucuaaanu Pueyaso Rupaaajiniji niishiyani, Pueyaso Jiyarosocoriquiano Cristoori pueyaracaanu rishiriquiano cutara. Quia-janiyarijitaj, ¿casaara quia sequeyarinijia, Pueyaso Jiyarasanoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarasanoni?

³⁵ Jesuuri nojori sequereere saaja:

—Janiya, nioojia cuhuatanani, janiyari niaata quiniutianiyajaara ru-paquijiani. Nocua nia tiuuri juhuacarijia, ninishiqui quiyacuishacarijia. Cante ninishiqui rucuanajojuani, nojuajaari maja na niishiniu tee na

quiaani. ³⁶ Nioojia cuhuatanaacua nia tiuuri, niaata cua quishacarijia, seetanujuanaa cuhuashiqui quijiaca nia quiniuria.

Naa Jesu sequenu nuhuaji cuno pojoritij, quiacuahuari. Nojoriicuaji ja-maashiiri.

Judiocuaca tiuyaquishacari Jesuucua

³⁷ Jesuuri jiyanoehua queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari.

³⁸ Naacujitij, tariucuacaanu Pueyaso sequenu panishano caminiujujia Isaiás pohuatasanoori tohuateequiaari, nojuaja jaara naa sequequiaari:

“Jiyaniijianaa, ¿cante canaa pohuatasanoocua tiuuriini, canaa pohuatasacari quia Jiyaroscoriguanojinijini? ¡Shaaquil! ¿Cante niishiriijaanihuaj, jiyajeneta casaa nojori niquishanoori seetanujuanaa quia cumaacata miishano quiri quiaa? ¡Shaaquil!”

³⁹ Naacujitij, majaari nojori naata tiuuniu quiquiaari Jesuucua. Isaiási naa naajiotaquiaarijuhuaj:

⁴⁰ “Pueyasoori nojori jiyateree juhua nimishitiuria, maja nojori niquiniuria na namijiata. Nojori niishitajia cushitioerejaarihuaj, maja nojori niishiniuria nojori jiuujiata. Naa nojori miiriiri maja nojori tacatonura nojori jiuujia, cua jiyanooniuria nojori, quiarinio pueyara cua jataniyaquiniuria nojori juhuaj”.

⁴¹ Supuetana Isaiási naa caminiujuquiaari Pueyaso niishitishano nojuajatej, Jesu na niquiniucua na shacantuuca cumaacajinia quiyano. Naa na pohuatasacari, nojuajaari juhuacarijia Jesujinijia pohuatariquiaa.

⁴² Naajaa, queraatia narta Judiocuacaari Jesuucua tiuquiaari. Queraatia canaa jiyaniijianucuaari nocua tiuquiaarijuhuaj. Cuno jiyaniijianucuaari maja na pohuatanu quijia pueya niquiara, Jesuucua tiuujia nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureeri maja socua nojori tiuquitianura Pueyaso secojojua tiacajinia. ⁴³ Nojoriiri saaja narta pueya shuquiritasano pueya quiniu panijia, maja Pueyaso shuquiritasano cutara.

Pueya tojtiaaquiniucua Jesu sequesano, nojoriiri saniitiosaariquiano

⁴⁴ Jesuuri jiyanoehua na rupaa paaretaree. Naa sequereeri:

—¡Cante cucua tiuuriini, majaari saaja na tiuuniu cucua! ¡Cua Queecua tiuuriijaarihuaj, cante cua jiyaroquiaaricujani! ⁴⁵ ¡Cante cua niquiriini, nojuajaari cua Jiyarona niquiriijuhuaj! ⁴⁶ Janiyari mijiria niquiaarini cua cuhuatanura nijaniya. Naacujitij, cante cucua tiuuriini, majaari tari na quiniu ninishiqui. ⁴⁷ Pueyano jaara cua rupaa tojiriquia najuhuanaj, janiyajanaari maja nocuara cua saquiriojotanu quiniutianiya na saniitiosaanura. Majaari cua niniu quiquiaari mijiria, pueya cua saniitionura. Janiya cutaraari niquiaarini nojoriicuaji cua tacunura. ⁴⁸ Cante cua ruuretaja saajani, cua sequesano tojiaquiyajaarihuaj, nojuajaari tari nocuara saquiriojotana jütiaa na saniitiosaanura. Nojoriria cua sequesano cutaraari tama nojoriicuara saquiriojotariquianojuaja nio jiya puequesacari. ⁴⁹ Cua pohuatasanoori maja tama cua niishishanojuaja. Cua Jiyarona cua Quecujiaari cua niishitiquiaa casaa cua sequenutaniyani, mariyata casaa cua niishitiojonutaniyani. ⁵⁰ Janiyari niishiyani cante cua Que rupaa tojijiani, nojuajaari pueyaracaanu quijia quiniutianiya cutara. Naaratej, janiyari seetanujuanaa saaja na sequesano caminiujuquiaani, ta na niishitiquiaa janiyacujani.

13

Jesu jeequejosacari na saquiriojosano pueya niohuaca

¹ Jesuuri canaa na saquiriojosano pueyata rerejoquiaari Pascuaacuara juucajinia. Jesuuri jiyacari niishiquiaari tari quiquiaariiri quera na tiujiasacari canaa mijiria, na Queecua na tacanuhuara. Nojuajaari canaa paniriquiaajaa, taa canaa na paniquiaari pueyaracaanucujani, mijiria na quishacari canaata.

² Cuno niucujaja, Jesuuri canaa na saquiriojosano pueyata miaqueriquiaa. Sesaacaari tari Judas Iscariote niishitirii noojiajinia, nojuaja cuara Jesu quiateera na paraa, na mosaanura. Cuno Judasri tamonu Simón jiyanihano pueyano niyanu quiquiaari. ³ Jesuuri niishijia nojuaja seetanujanaa Pueyasojiniji niquiaari. Naajuhuaaj, nojuajaari niishiquiaari, na Que Pueyasoori na jiyatequiaari Jiyaniijiarajanaa, puetunu casaa jitianajanaa na quiniuria. Niishiriquiaajaariuhua nojuajaari quera na Queecua tacanutanuhua. ⁴ Jiyaniijiajanaa na quishacari, naajaa, nojuajaari miaquejajiniji sanequiaari. Na tucuaque toque jocuareeri. Na nuhuaji na cajiniocua camarucuteree cuaqueya tuujutajaari. ⁵ Na nuhuaji, mohuaca shuurii tohuatashijiniaari. Canaa niohuaca jeequejoriguiaari juhua tiaco seru. Na nuhuaji, na sacuanijiariquiaajaariuhuaaj na cajiniocua na camarucutesano cuaqueya tuujutajata.

⁶ Na jeequenu panishacari Simón Pedro niohuaca, Pedroori saaja Jesu sequeree:

—Jiyaniijianaa, ¿taa quia miyani? ¿Quiaateeri cua niohuaca jeequenu-taniya?

⁷ Jesuuri Pedro riucaaree:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutianiya.

⁸ Pedroori Jesu sequeree:

—¡Cua Jiyaniijianaa, janiya cutaraari maja quenaaja cua shanacunu quiniutianiya cucua quiajaniya, cua niohuaca quia jeequenura!

Jesuuri na riucaaree:

—Janiya jaara quia niohuaca jeequejijaquirini, majaari cua pueyano quia quiniu quiniutianiya.

⁹ Simón Pedroori na sequeree:

—¡Jaara naa quiriritij Jiyaniijianaa, maja saaja cua niohuaca jeequenucuaraaj! ¡Quia jeequerejuhua cua juaashiquiaca, cua nacanío!

¹⁰ Jesuuri na sequeree:

—Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quiya. Puetunu niajanijajanaari tarijeequejosano quiyacuaja. Saa niquiriyatujajaari jeequesoo quiya saniniujia.

¹¹ Jesuuri tari niishiquiaari cante na quietenutaniya na paraani. Nocuaji sequeriquiaari: “Niquiriyatu pueyanoori jeequesoo quiya cutara”.

¹² Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani?

¹³ Niaacuajaari cua sequequiaa “Niishitiojonata”, nia “Jiyaniijiatanio”. Seetanujanaa nojuacuajajinia, taa nia jiyaniquiquiaa janiyacujani.

¹⁴ Naaratej, janiya jaara jeequejoree nia niohuacacuaani, nia Jiyaniijia cua quishacari, nia Niishitiojonajuhuaaj, naa nia miiriquia niarta Pueyaso muerasujuhuaaj. ¹⁵ Janiyari naa miiriini, cua niishitiojonura niajaniya, naa nia miitioonurajuhuaaj taa cua miirii niajanijacuaani. ¹⁶ Seetanujanaa

nia sequeyanijia, seruuri maja socua tojishano quijia na camarnujiniji. Naajuhuaaj, jiyarosano pueyanoori maja socua tojishano quijia na jiyaranoajiniji. ¹⁷ Niaa jaara cua rootasano niishiri, niaari shuquiriaatia quijiaa quiniutianiya niaa jaara na tojjijiaa quiri.

¹⁸ Shusha cua sequesano niajaniani, cunoori maja puetunu niajaniyaranojuanaa. Janiyacuajaari niishiyani canapue cua saquiriojoquiaarini, taamueca pueyate niajaniani. Naacujitij, tariucuacaanu Pueyaso Rupajinia janiyajiniji naajiotasanoori tohuateenutaniya. Naa sequeyari: “Tama cuata miaquenajaarijia cua paracara quirii”.

¹⁹ Janiyari juhuacarijia nia toyani. Naacujitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyanuni. ²⁰ Seetanujuanaa nia sequeyanijia, cante cua jiyaramiquishano pueya tojjijiani, nojuajaari cua tojjiyajuhuaaj. Cante cua tojjijiaa quiriini, nojuajaari cua Jiyarona tojjijiaa quiriijuhuaaj.

Jesu pohuatasacari, Judascujaari na paraa na quiateriquiano
(Mt 26.20-25; Mr 14.17-21; Lc 22.21-23)

²¹ Naa Jesu sequenu nuhuaji canatej, jiyanoohua na taraajenuta naa canaa sequereeri:

—Seetanujuanaa nia sequeyanijia, niquiriyatu niajanijajinijioori cua paraa cua quiatenutaniya.

²² Canaari jiyacari tama niquitiooreejaanijia. Majaari canaa niishiniu quiriquiaa canajiniji naa Jesu sequeriquiaani. ²³ Jiyacaritij, janiyari na shuriucuaji cajiriquiaa miaquenujuajiniani, na panishano pueyano cua quiniuucua. ²⁴ Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni. ²⁵ Naarate janiyari Jesucua tatereni, jiyasohuaaja cua nequesotanura nojuaja. Janiyari naa na sasacareeni:

—Jiyaniijianaa, ¿canteeri naa quia miiniutianiyani?

²⁶ Jesuuri cua riucuaree:

—Janiyari pan rau piquiojonutaniya caacajiniani. Cana cua niqutionutaniyani, nojuajaari cuno.

Jesuuri jiyacari pan rau piquiojoree. Judas Iscariote na niquitioereeri. Nojuajaari tamonu Simón jyanishano niyanu. ²⁷ Judas masesacari cuno pan rau, Satanásri noojiajinia tiuquiquii. Jesuuri jiyacari Judas sequereeri:

—Cuno, quiaa na niishiriojiya miiniuni, quiocua ritia miirinioj.

²⁸ Canaa na saquiriojosano pueya nata miaquenuuriquiaani, majaari quenaaja canaa niishiniu quiriquiaa casaara naa Jesu sequereeri Judasni.

²⁹ Judasri canaa cumaneeca cojuatana quijia. Naaratej, noojiaqueya canaajinijinioori jyaniriquiaani Jesu naasucua na jiyaroriquiaa socua casaa na masenura canaa queranacuutajara, casamijiuniucua na niquitiojonura cumaneeca soj. ³⁰ Judas jaara masequiaari Jesu niquitiosano pan, jiyacari tohuataqueeri. Tariucua niucuuaari quiriquiaa.

Jesu rootasano quiarinio

³¹ Judas tohuatanu nuhuaji, Jesuuri canaa sequereeri:

—Quiarjia cua miishanojiniji, janiyari maniniuhuaqueetasanutaniyani. Pueyasoori jyanohua maniniuhuaqueetasanutaniyajuhuaaj, naa cua miishanojiniji. ³² Pueyaso jaara maniniuhuaqueetasaaare naa maninia cua miiniucuatej, nojuajaari cua jiyatenutaniya cumaacaraca quijia cua quiniuria na shuriucua. Quera naa cua miiniutianiyari. ³³ Quiquihuaniyojuanaa, janiya rupaquijia niaata quiniutianiyajaarani. Taa cua sequecanu parta

Judiocuacacuaani, janiyari naa nia sequeyajaanihuaj. Niaari cua pajenu-unutaniya juucua. Majaari nia naata quianu quiniutianiya cucua, tee cua quianutaniyacuaani. ³⁴ Quiarijia nia niishitiriiria nio quiarinio rootasano. Nia tojiri. ¡Panitioojuaca nia quiri! Naatej, taa cua paniquiaacuaa niajaniyani, naa nia panitioorejuhuaj. ³⁵ Naa jaara naa panitioojuaca quiri, puetunu Pueyaso niishiyashijaca pueyajanaari naacuaji niishiniutianiya, niaari cua tojtiajaca pueya.

Jesu pohuatasacari Pedro nocuaji seetanutaniya
(Mt 26.31-35; Mr 14.27-31; Lc 22.31-34)

³⁶ Simón Pedroori jiyacari Jesu nequesotaree:

—Jiyaniijanaa, ¿tee quia quianutaniyani?

Jesuuri na riucuaaree:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiano.

³⁷ Pedroori na sequeree:

—Jiyaniijanaa, ¿casaara quia sequeyarini, quiarijia cutara maja cua naata quianu quiata? Janiyacuaja tama cua cuaqueyajaaja tarinijiotaaree quiocuarani.

³⁸ Jesuuri na riucuaaree:

—¿Naatee? ¿Quiaate tama quia cuaqueyajaaja tarinijiotaaree cucuara? Janiyari seetanujuanaa quia sequeyani: juhuaquenu panishacari caacaraja niunijiyaquishacarijia, quiaari jiyacari cucuaji seetanu pacutejonutaniya tari.

14

Jesuuri juhua nuu Pueyasocua

¹ Jesuuri naa canaa sequeree socua:

—Maja nia tacaaniu, pueyanaa. Nioojia nia cajitiri. Saaja Pueyasocua nia tiuuri. Cucua nia tiuurijuhuaj. ² Cua Que tiaari puereetuca. Queraatia quiquiiori tii quiya. Cunora, janiyari coteenu nia puetanutaniyani, niaacuaji cua jeenucuanura nia quijiara. Jaara naa quiyaquiritij, janiya maara nia sequeyaquirini janiya nia puetanutaniyani, niaacuaji cua jeenucuanura. ³ Cua jeenucuanu nuhuaji nia quiquiora, janiyari niaacua tacatenu-taniuhuanu, cua rijionuhuara niajaniya, cuata nia quiniuriajuhuaj tee cua quiniutaniyacuaani. ⁴ Niaacuajaari cua quiquiojiniara neteja nuu niishiya, tee cua quianutaniyacuaani.

⁵ Tomásri Jesu sequeree:

—Jiyaniijanaa, ¡maja canaa niishiniu quenaaja tee quia quiaani! ¿Canaatu-cua taa cuno nuu niishirini, quiaa na sequeyani?

⁶ Jesuuri na riucuaaree:

—Janiyacuajaari cuno nuuni, Pueyasocua nia quianura. Janiyacuajaari seetanujuanaa Pueyaso Rupaani. Janiyari pueya samiitianijiajuhuaj. Majaari pueya naata Pueyaso rupuenu tamajaaja. Saaja janiya cutaraari pueya ruputeja Pueyasoni, nojori tiuushacari cucua. ⁷ Naa jaara seetanujuanaa cua niishiquiaaricuaa, niaa maara cua Que niishirijihuaj. Seetanujuanaa, niaari tari na niishiyacuaja. Niaari na niquiquiaajuhuaj.

⁸ Felipeeri na sequeree:

—Jiyaniijanaa, quiaa jaara canaa niquitiri quia Que Pueyaso, canaacua panaatia quiriohuani.

⁹ Jesuuri Felipe riucuaaree:

—Felipenaa, janiyacujaruhua pueyaracaanu niaata quiquiaa juucuanu. ¿Majateeri juhuanojuaja quia niishiniu janiya? Cante cua niquiquiaani,

cua Que niqiquiaaajaariuhuaaj. ¿Casaara quia sequeya cua niqutiniuria cua Que niajanियarini? ¹⁰ ¿Majateeri quia tiuuniu cucua cua sequesacari quiajanिया, janiyari cua Que jiuujiajinia quiyani, cua Queeri saniniuuja coojiajinia quiyacujua? Canaari maja rimiajatani. Nio, cua sequesano niajanियani, cunoori maja tama cua niishishanojuaaja. Cua Que, coojiajinia quiyani, nojuajaari na panishano miitiquiaa janiya. ¹¹ Cucua nia tiuuri cua sequesacari niajanिया, janiyari cua Que jiuujiajinia quiyani, cua Queeri saniniuuja coojiajinia quiyacujua. Niaa jaara cua sequesanoocua tiuuniu paniaquiri, cucua nia tiuuriqui na cumaacata cua miiniucua nia niquiara. ¹² Seetanujuanaa nia sequeyanijia, cante cucua tiuujiani, nojuajaari puetunu cua miishanojuanaa miiniutianiyajuhuaaj. Cua tacasacariuhua cua Que shuriucua cua quiniuhuara, cucua tiuujiaaari cua cumaacata seetanujuanaa socua jiyajeneta casaa miiniutianiya cua miishanojiniji. ¹³ Seetanujuanaa nioojiajinia cua quishacari, janiyari niaara miiniutianiyani puetunu nia masesanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyanohua maninia mijia. ¹⁴ Nioojia rupetoosacari coojiaata, janiyari puetunu nia masesanojuanaa miiniutianiya niaarani.

Jesu sequesacari, nojuaja Pueyaso Sohuanu jiyaronutaniya mijiria

¹⁵ 'Niaa jaara seetanujuanaa cua panijiaa quiri, niaari cua rootasano tojtiajaca quiniutianiya. ¹⁶ Naajuhuaaj janiyari cua Que secojonutaniyani, niaacua na jiyaronura tamonu cua niti mijiria, nia cumaquiriquiano. Nojuajaari pueyaracaanu niaata quiriqiano. ¹⁷ Nojuajaari Pueyaso Sohuanu, seetanu rupaa jiiitianajanaa. Pueyaso tojiyashijiaa pueyari maja na naata cuno Sohuanu na jiiitianu, nojori niquiyaquiniucua nojuaja, na niishi-tiuyaquiniucua nojuajuhuaaj. Niaa cutaraari na niishijiaa. Nojuajaari niaata quiyacujua. ¡Pueyaracaanu nioojiajinia quiriqianojaariuhuaaj!

¹⁸ 'Majaari seetanujuanaa cua tiujianu quiniutianiya niajanिया juhua japueyojuaca nia quiniuria. Janiyacuajaari tacatenutaniuhuanu niaata cua quiniuhuara. ¹⁹ Pueyaso tojtiaashijiaa pueyari quiari naataja cua niquiyaquiniutianiya socua. Niaa cutaraari cua niquijiaa quiniutianiya. Samiitianiijiojua cua quiniucua, niaari pueyaracaanu quijiaa quiniutianiyajuhuaaj. ²⁰ Jiyacaritij, niaari niishiniutianiya janiyari cua Que jiuujia rupuejani, niaari coojia rupuejajuhuaaj. Janiyari saniniuuja nioojiajinia quijiani. ²¹ Cante cua rootasano niishijiani, nojuaja jaara na tojjiaa quiri-juhuaaj, nojuajaari cua panijia cutara. Cante cua panijiani, cua Queeri na panijia quiniutianiyajuhuaaj. Janiyari na panijia quiniutianiyajuhuaaj. Janiyari cua panijiaacua niniutianiyani, seetanujuanaa na niishiniuria janiyari nata quiyani.

²² Canaa cojinia Judasni, nooj, Judas Iscariote sesaanucuatej, nojuajaari Jesu nequesotaree:

—Jiyaniijianaa, ¿casaara saaja canaacua quia niniutianiyarini, maja puetunu mijiria quiniaa pueyacujanaa?

²³ Jesuuri na riucaare:

—Cante cua panijiani, cua rootasano tojjiaajaariuhuaaj. Cua Queeri jiyano pueyano panijia. Naaratej, canaari nocua niniutianiyani, noojiajinia canaa quiniuria, canaa quiquiora canaa jiyatenura nojuaja. ²⁴ Saniniuuja, cante cua paniaquijiani, jiyano pueyari cua rootasano tojiyashijiaacajuhuaaj. Puetunu cua rootasanojuanaa, niaa na tojiqianoani, cunoori maja tama cua niishishanojuaaja. Cunoori cua Que niishitishano janiya, cante mijiria cua jiyaroquiaaricujani.

²⁵ 'Janiyari puetunu niojuanaa nia pohuataani, niaata cua quishacarijia mijiria. ²⁶ Cua Que jiyarosocoriquiano na Sohuanuuri nia cumaquiriquiano. Nojuajaari nia niishitiojonutaniya puetunu cua niishitionu panishanojuanaa niajaniya. Naajuhuj, nojuajaari nia niishitiniutianihua puetunu tari cua pohuatasano niajanijajanaa.

²⁷ 'Janiyari nioojia cajitiniutianiyani. Janiyari coojia nianutaniya nioojia-jiniani, juhujaniya quijiaca nia quiniuria taa cua quiyacuaani. Naacuajitij, niaari seetanujuanaa juhujaniya quiniutianiya. Mijiria quiniaa pueyari maja na niishiniu cumanijianu juhua janiya. Naaratej, maja nia tacaaniu. Majaari puerenujuhuj. ²⁸ Tari nia sequereecuajaniija: "Janiya quera quiohuani. Janiyari na nuhuaji tacatenutianihuanu niaata cua quiniuria". Niaa jaara seetanujuanaa cua panijiaa quiriquia, niaa maara shuquiriri nia niishishacari janiyari cua Queecua quiohuani. Nojuajaari seetanu Jiyaniijajanaa cutara janiyajiniji. ²⁹ Janiyacuajaari juhuacarijia nio nia sequeyani. Naacuajitij, niaa jaara niquiri tohuateyano cua sequesano niajaniya, niaari niishiniutianiya puetunu cua pohuatasanojuanaari seetanujuanaa.

³⁰ 'Majaari puera cua pocojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniyacuajani. Nojuajaari Pueyaso tojtiaashijiaa jiyaniija. Pueyaracaanu cua Que Pueyaso tojjijia cua quiniucua, cua Paraca maara naquiya cua miyaquiri janiya jaara cucua na shanacuyaquirini. Na cumaacari maja na shocotanu cua cumaaca cutara. ³¹ Naajaa, na miishanojiniji janiya, puetunu pueyajanaari niishiniutianiya, janiyari puetunu cua Que sequesanojuanaa tojjijiani, na panijia cua quiniucua.

'Nia sanetare. Niiquiji pa quiaare.

15

Jesu pueyari juhua Jesu cashacucua, Jesu quishacari juhua neyona

¹ Jesuuri naa pohuataquiaari socua canaa niquiara:

—Janiyari juhua uva jiyonani, cua Que natau. ² Cua pueyari juhua cua cashacucua. Tamonu cua cashacucujinijinio jaara muetuyashijia quiri, cua Queeri na piyotaja. Teyano cua cashacucujinijiniote muetujua saniniunijia, cua Queeri na nacareetaja, socua queraatia na muetunura. ³ Nia tojiniucua cua rootasano, niaari tari juhua nacareetasano quiya. ⁴ Pueyaracaanu coojia nia rupuere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaji piyotasaare, majaari na naata muetunu tari. Naajuhuj, majaari nia naata muetujua quiniu, niaa jaara coojia rupueyashijiaa quiri.

⁵ 'Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya niajanijacuaani, naacuajitij, niaari juhua queraatia muetujuaa quiniutianiya. Cucuaji rupatejacaari maja na naata casaa miiniu janiyajaju. ⁶ Cante cua rupueyashijiani, nojuajaari taraatia miishaanutaniya juhua uva cashacucua piyotasano neyonajiniji, tamocora jaque-rootasano. Jaara sorere, tatucusaarohuari manijinia quejoosocoriquiano. Tii cateyari.

⁷ 'Niaa jaara coojia rupuejaca quiri, niaa jaara cua rootasano tojjijiaa quirijihuj, puetunu nia panishanoocuarajanaa nia secojore Pueyaso. Nojuacuajaari nia masasano miiniutianiya. ⁸ Naa cua Que miishacari nia panishanotej, niaari juhua queraatia muetujuaa quiniutianiya. Naacuajitij, cua Queeri jiyanohua timitiasaanutaniya. Naacuajitij, niishishaanutaniya-jaariuhua niaari cua tojtiajaca pueyanijoyua. ⁹ Janiyari nia panijiani, taa cua Que panija janiyacuaani. Coojia rupuejaca nia quiri pueyaracaanu,

cua panishano pueya nia quiniuria. ¹⁰ Janiyari cua Que panishanoni, pueyaracaanu cua miiniuucua na panishano. Naajuhuaaj, niaa jaara cua rootasano tojjiaqua quiriquia, niaari pueyaracaanu cua panishano pueya quiniutianiyajuhuaaj.

¹¹ 'Janiyari naa nia sequeyani, shuquiriaatia quijiaca nia quiniuria, taa shuquiriaatia quijia cua quiyacuaani. Naacujitij, niaari tojetaarucujanaa shuquiriaatia quijiaca quiniutianiya. ¹² Cua tojiri. Nioori cua sequesano niaara: "¡Pueyaracaanu panitioojuaca nia quiriquia, taa cua paniya nia-janiyacuaani!" ¹³ Cante tama na cuaqueyajaaja panitiaja na cusonura na rupuenaa nitini, naa miijia cutaraari seetanujuanaa jiyanohua narta pueya panijia. ¹⁴ Niaa jaara cua sequesano miijiaqua quiri, niaari cua rupuenaa. ¹⁵ Naacujitij, majaari cua sequenu quiniutianiya tari niajaniya cua seyata. Pueyano seruuri maja na niishiniu casaa poonijosano na camarnu mi-iquiaacuaani. Janiyari quiarjia nia sequeya cua rupuenaatani, cua niishi-tiniuucua niajaniya puetunu cua Que sequesanojuanaa janiya. ¹⁶ Majaari nia saquiriojonu quiquiaari janiya. Janiya cutaraari nia saquiriojoquiaarini cua jiyaramiquiniuria niajaniya, cua panishano nia miiniuria. Naa nia mi-shacari cua panishanotej, niaari juhua queraatia muetujua naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masanojuanaa nia niqutionutianiya seetanujua-naa coojia rupuejaca nioojia quishacari. ¹⁷ Janiyari cunora nia sequeyani: "Pueyaracaanu panitioojuaca nia quiri".

Pueyaso niishiyashijia pueyari Pueyaso muerasu niqiniu paniyashijia- aca

¹⁸ 'Pueyaso niishiyashijia jaara nia niqiniu paniaquiriquia, ma-jaari nia tacaaniu. Cuno pojoricuajaari naa cua niqitiuniu paniaqui-jiacacuaa. ¹⁹ Niaa jaara Pueyaso muerasu quiaquiriquia, Pueyaso ni-shiyashijia maara nia panijiaqua quiriquia, taa nojori paniquiaa narta Pueyaso niishiyashijiacuaani. Niaari Pueyaso niishiyashijia quiquiaar-ijihuaaj. Naajaa, janiyari nojori tajiniji nia saquiriojoquiaarini, cua pueya nia quiniuria. Cunora, Pueyaso niishiyashijiaaari nia niqiniu paniaquiquiaa, maja tari nia quishacari juhua nojori. ²⁰ Majaari nio cua sequesano nia niyajetanu: "Seruuri maja socua tojishano na ca-marnujiniji". Naaratej, Pueyaso niishiyashijia jaara naquiya cua mi-iquiaacuaa, niaari naquiya miishaanutaniyajuhuaaj. Naajuhuaaj, nojori jaara cua rootasano tojiquiaacuaa, nojoriiri nia rootasano tojjiaqua quiniutianiya-juhuaaj. ²¹ Nojoriiri naa naquiya miiniutianiya niajanijatej, cua pueya nia quiniuucua, nojori niishiyaquishacari cua Jiyarona.

²² 'Janiya jaara niaquiquiaari nojori cua pohuatanura Pueyaso rupaani, nojoriicuara maara saquiriojotaaquishaare, sesa nojori miishanojiniji. No-jori niquiara cua pohuatanuucua Pueyaso rupaa, majaari nojori naata sequenu quiniutianiya: "Cua jiyanoori. Maja cua niishiniu quiquiaari quia rootasano". ²³ Cante cua niqiniu paniyashijiani, nojoriiri cua Que niqiniu paniyashijiajuhuaaj. ²⁴ Sesa nojori miishano maara nojoriicuara saquiriojotaaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa miijioquiaari cua cumaacata nojori niquiarani, socua tamasaca miishanojiniji. Naajaa, naa nojori niquishacari cua cumaacata cua miishanotej, nojoriiri saaja cua niqitiuniu paniaquijiaqua, cua Que niqitiuniu paniaquijiaajariuhuaaj. ²⁵ Naajaa, naa nojori miiniuucua janiyatej, tariucuacaanu Pueyaso Rupaajinia naajio-tasano janiyajinijiiri tari tohuateeree. Naa sequeyari:

“Janiyari najuhuana niquniu paniyaquishiyani”.

²⁶ Janiya jaara cua Que shuriucua quishuhuanu, janiyari tiji Pueyaso Sohuanu jiyaronutaniya mijiriani. Nojuajaari seetanu rupaajanaa jitiiaja. Nojuajaari janiyajiniji niishitiniutianiya pueya. ²⁷ Niaari janiyajiniji pohuatanutaniya pueyajuhua, pueyaracaanu cuaa nia quiniuucua shushajanaa cua cotesacari pohuatanu Pueyaso rupaa.

16

¹ Janiyari naa nia numooteyani maja nia tarinitianura cucua tiuuniu niaa jaara naquiya miishaare. ² Cua pueya nia quiniuucua, majaari nia shanacusaanu quiniutianiya nia tiuquitianura Pueyaso secojojua tiacajinia. Pueya jaara nia puecoorejuhuaj cua tojitiajaca nia quiniuucua, nojoriiri jiyaniutianiya nojori maninia miya Pueyasora, naa nojori miishacari. ³ Nojoriiri naa miiniutianiya nijaniyatej, nojori niishiyaquiniuucua janiya, cua Quejuhuaj. ⁴ Janiyacuajaari juhuacarijia naa nia sequeyani. Naacujitij, niaa jaara naquiya miishaare, niocua jiyacari niishiri janiyacujaari tari naa nia sequequiarini. Majaari quenaaja nio cua sequenu quijia nijaniya, pueyaracaanu niaata cua quiniuucua.

Pueyaso Sohuanu miishanojiniji pohuatasano

⁵ Quiarijiani, janiyari cua Jiyaronaacua quiohuani. Quiarijiani, majaari quenaaja nijaniyajinijino nequesotanu janiya: “¿Tee quia quiohuarini?”

⁶ Janiya jaara nia sequereeni janiya quianutaniuhuanu, niaari saaja taraa-jequee. ⁷ Seetanujanaa nia sequedianijia, socua maninia quiniutianiya niaaraari, janiya jaara quiaarohuani. Janiya jaara quiaaquiarohuani, majaari Pueyaso Sohuanu ninu quiniutianiya niaacua, na cumaquiniuria nijaniya. Janiya jaara quiaarohua cutarani, janiyari niaacua na jiyaronutaniyani. ⁸ Mijiria na tiuquishacari, nojuajaari pueya jiuujia-jinia poonijionutaniya, nojori na niishitiniuria nojoriiri seetanujanaa sesa miijiaa. Nojori niishitiniutianiyajaariuhua nojoriiri na naata sesa miyashjiacara jiyatesaanu. Naajuhua, nojori niishitiniutianiyari Pueyasoori na naata jiyanooni nojori, maja Sesaacata nojori cojiritiasaanura mani quiquiojinia quejoonu. ⁹ Seetanujanaa, Pueyasora, nojoriiri sesa miijiaa nojori tiuyaquiniuucua cucua. ¹⁰ Jiyocuacaanu cua tacasacariuhua cua Queecua, majaari socua nia niquniu quiniutianiya janiya. Naacujitij, Pueyaso Sohuanuuri pueya niishitiniutianiya, janiyari seetanujanaa cua Que Pueyaso jiyanootijia cucua tiuuriquiano pueyani. ¹¹ Cua shocotacacari Sesaaca, Pueyaso Sohuanuuri pueya niishitiniutianiya, nojoriiri saniitiosaanutaniya. Naacujitij, nojori jiyaniijia Satanás jaara tari saniitiosocoriquiano quiyacuaa, nojoriiri saniitiosaanutaniyajuhua, cucua nojori jiyacuiniuucua.

¹² Janiyari queraatia jitiiaajaa cua pohuatanura nijaniyani. Naajaa, majaari cua pohuatanu quiniutianiya quiarijia nijaniya. Juhuanujuaja maja nia naata na niishiniu. Pueraruhua. ¹³ Pueyaso Sohuanu tiuquishacari niaacua, nojuajaari nia niishitiniutianiya puetunujanaa cutara. Nojuajaari seetanu rupaajanaa jitiiaja. Nojuajaari maja tama na niishishanojuaja nia niishitini quiniutianiya nijaniya. Puetunu na tojishanojuanaa janiyajinijini, cuno nia niishitiniutianiya cutaraari. Nia niishitiniutianiyajaariuhua taate nio pa quishacari nuhuaji quiniutianiyani. ¹⁴ Niaari cua shuquiritianutianiya, nojuaja niishitiniucua nijaniya janiyajiniji. ¹⁵ Puetunu cua Que jitiiasanojuanaani, cunoori cua casaajuhua. Naaratej, janiyari nia sequereeni, Pueyaso Sohuanuuri janiyajiniji masenutaniya cua jitiiasano niaara, na caminiujuniuria nijaniyarajuhua.

¹⁶ 'Niaari saaja quiarijia cua niquiya. Na nuhuaji cutara, majaari socua nia niquniu quiniutianiya janiya. Pasa naataja na nuhuaji, niaari cua niquniutianihuacuahuaj.

Nia taraajenuuri jatanutaniya shuquiriaatia nia quiniuria

¹⁷ Jiyacaritij, noojiaqueya canaa na saquirojosano pueyajinijiniori tama nequesoreetooreejaaja:

—¿Casaa na sequenu paniyarini, nojuaja jaara sequeree: “Niaari saaja quiarijia cua niquiya. Na nuhuaji cutara, majaari socua nia niquniu quiniutianiya janiya”? ¿Casaa na sequenu paniyajaanihuua na sequesacari: “Pasa naataja na nuhuaji niaari cua niquniutianihuacuahuaj”, na sequesacarijuhuaj: “Cua Queecua quianutianihuuanijia”? ¹⁸ Naajuhuj, ¿casaa na sequeyarini na sequesacari “quiarijiani”, mariyata “pasa naataja na nuhuaji”? ¡Majaari pa niishiniu casaaraqui na sequeyatejaj!

¹⁹ Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarijia cua niquiya, na nuhuaji cutara maja socua nia niquniu quiniutianiya janiya. Pasa naataja na nuhuaji, niaari cua niquniutianihuacuahuaj”. ¿Niaatejaara niojiniji nequesoreetoya tama nijaniyajaaja? ²⁰ Seetanujuanaa nia sequeyanijia, niaari nujuquenutaniya. Niaari taraajeconutaniyajuhuj. Jiyacaritij, Pueyaso niishiyashijiaacari taquiya shuquiriaatia quiniutianiyacuaa nijaniyajiniji. Naajaa, cuno nia taraajenuuri jatanutaniya shuquiriaatia nia quiniuria. ²¹ Naajaarihuaj, maaji ranu panishacari na mueya, jiyanohua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. ²² Quiarijiani, niaari naa taraatia quiyajuhuj. Naajaa, niaacua tacatenutanihuuanijia. Niaari jiyanohua shuquirinutianiya nia niquishacari janiya. Majaari quenaaja tamasaca pueya naata quiniutianiya cuno nia shuquiriniu jaariutianu.

²³ Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niqutionutaniya puetunu nia masenanujuanaa nojuaja, seetanujuanaa coojia rupuejaca nioojia quishacari. ²⁴ Majaari juhuanujuaja nia secojonu Pueyaso seetanujuanaa ta cua sequeyacuajani, seetanujuanaa coojia rupuejaca nioojia quishacari. Naa nia secojoretej. Niocua nia panishano niquitiosaare, seetanujuanaa shuquiriaatia nia quiniuria.

Jiyaniija Jesuuri Sesaaca shocotana

²⁵ Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujuanaa cua Quejiniji cutarani.

²⁶ Jiyacaritij, niaari cua Que secojonutaniya coojia rupuesano nia quishacari. Jiyacaritij, majaari na panishaanu quiniutianiya cua shiniujuniuria cua Que, na tojinijia nijaniya. ²⁷ Cua Quejanaacuajaari nia panijia, nia paniniuucua janiya, nia niishiniuucujuhuj janiyari na jiyarosanoni. ²⁸ Niaacuajaari niishiya, janiyari cua Que shuriucuaji niqiaarini pueyanora cua quiniuria mijiria. Quiarijia saniniuujia, janiyari nio jiya tiujanutaniyani, cua Queecua cua quianuhua.

²⁹ Naa Jesu sequesacari canaatej, canaari na sequereeni:

—Quiarijia cutara, quiaari maatiajanaa sequeree, maja miriqui. ³⁰ Quiarijia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajaniya. Naacuajitij, canaari niishiyani, quiaacuajaqui Pueyaso Jiyarosano.

³¹ Jesuuri canaa sequeree:

—¿Naatee? ¿Niaate shusha cucua tiuyaruhua? ³² Tari quenaacoyari naquiya cua miishaanura. Seetanujuanaa quiarijiaari. Niaari cucuaji cocuatasaanutaniya puetunujuanaa. Niaari tamajaaja cua tujianutaniya. Naajaa, seetanujuanaa maja cua quiniu tamajaaja. Cua Quecuajaari cua cojiyani. ³³ Janiyari puetunu niojuanaa nia sequeyani, nioojia nia caji-tiniuria nio cua pohuatasanoocua nia tiuushacari. Mijiria nia quishacari, niaari seetanujuanaa naquiya miiniutianiya. Naajaa, janiyacuaajaari mijiria jiyaniijia shocotareeni. Naacuajitij, nioojia nia cumaquiri tamajaaja.

17

Jesu secojosacari na pueyacuara

¹ Naa Jesu sequenu nuhuajitij, jiyocuacaanu na mausacari, naa na Que sequereeri:

—Cua Quenaa, janiya nio juuca naquiya miishaanutaniyani taa quia sequequiaaricuajani. Cua tojiniuucua quiajaniya, quia Jiyarosano quia jiyatere pueya timitiasano cua quiniuria. Naacuajitij, janiyacua saniniu-ujia quia jiyatere pueya timitiasano quia quiniuriani, tojetaarucujanaa maninia miijia quia quiniuucua. ² Quiaacuajaari quia cumaaca cua niqutio-quiaari puetunu pueyajanaa cua jiiitianura. Naacuajitij, janiyari saniniuujia nojori jiyatenutaniya pueyaracaanu quiijaca nojori quiniuriani, teyano pojori quia niqutioquiaari janiyacuaajani. ³ Nojori niishishacari saaja janiyari seetanujuanaa Pueyasocuaaja, naajuhuj, nojori niishishacari janiyari quia jiyarosaroni, naacuajitij, nojoriiri pueyaracaanu quiijara quiniutianiya shuquiriaatia.

⁴ Janiyari tari tucuatree quia sequesano cua miiniuria mijiriani. Naa cua miiniuucua puetunu quia panishanojuanaatej, pueyari quia timitiaa. ⁵ Jiya shipiniyaquishacarijia, janiyari jiyanoohua shuquiriaatia quiijia quiaquiari quia shuriucuan, jiyaniijiajanaa cua quishacari. Cua Quenaa, naa quiijara cua jiyaterohua quiarijiani, quia shuriucua cua quiniuhuara.

⁶ Quia niquticosano pueya janiya, quia saquiriojosano pueya quia nishiyashijiaa pueyajiniinioni, quiarijia cutara, nojoriiri niishiya cante quiajaniyani. Nojoriiri quia niishiya, nojori niquiniuucua cua miijosano quia cumaacata, cua pohuatasano quiajaniyajiniji nojori tojiniuucuaajuhuj. Nojoriiri quia pueya quiijia. Quiaari saniniuujia nojori cua niqutioquiaari. Nojoriiri quiarijia quia rupaa tojitiajaca cutara. ⁷ Nojoriiri niishiya puetunu cua jiiitasanojuanaani, cunoori quia niquticosano janiya. ⁸ Janiyari quia rupaa rootacanu nojorini, quia niishitishano janiyani. Nojoriiri seetanujuanaa nocua tiuuri. Nojoriiri seetanujuanaa niishiya, janiyari quia shuriucuaaji niqiaarini. Niishitiyajaariuhuj, janiyari seetanujuanaa quia jiyarosaroni.

⁹ Janiyari cunora nojoriicuaa quia secojiyani, seetanujuanaa quia pueya nojori quiniuucua. Majaari cua secojonu quia niishiyashijiaa pueyacuara. Saaja noo pojoriicuaa quia secojiyanijia, quiaa na niqutioquiaari janiyatej. ¹⁰ Naaratej, puetunu cua jiiitasano pueyajanaari quia pueyajuhuj. Mariyata puetunu quia jiiitasano pueyajanaari cua pueyajuhuj. Nojori tiuuniuucua cucua, nojoriiri jatanishano pueya quiniutianiya. Naacuajitij, queraatia pueyari cua timitianutaniyajuhuj, naa nojori niquishacari cua cumaaca.

¹¹ Majaari puera cua tarishiniu quiniutianiya mijiria. Cua pueya cutaraari mijiria quiniutianijajaara, janiya jaara quiaarohua quiocuan. Jiyanoohua maninia cua Quenaa, nojori quia cojuare quia cumaacata, teyano pojori quia niqutioquiaari janiyacuaajani. Naa quia jiiitare nojori, jatiqui

nojori quiniuria juhua niquiriyatu jiuujjaraca, taa pa quiyacuaani. ¹² Mijiria cua quishacari nojoritia, janiyari nojori cojuajani quia cumaacata, quia rupaacua tiuujjaca nojori quishacari. Majaari quenaaja niquiriyatu nojori-jiniujnio cua juurequetenu quiquiaari. Saa noojuuari juurequecanu cutara, tariucua juurequeriquiano quijiacuajatej. Naacujitij, tariucuaaanu quia rupaajinia naajlotasanoori tohuatecanu.

¹³ 'Quiarijiani, janiyari quiocua quianutaniyani, tee quia quiyacuaani. Niya cua quishacarijia, janiyari nio sequeya nojori niquliarani, nojori jiiitanura cua shuquiriniuujuhuj, tojetaarucuaajanaa shuquiriaatia quijiaca nojori quiniuriajuhuaj. ¹⁴ Janiyari nojori niishitiocanu quia rupaani. Naa nojori tojishacari quia rupaatej, quia niishiyashijia pueyari nojori niquniu paniyaquiquiaa. Cua pueya nojori quishacari, nojoriiri maja saaja mijiria quijiaca na quiniu tari, taa janiyacuaani. Naaratej, mijiria quijiaca pueyari nojori niquniu paniyaquiquiaa. ¹⁵ Naa cua secojosacari quiarijia nojoriicuaratej, majaari cua sequenu quiajaniya nojori quia rijionura niquiji. Saaja quia secojiya cutaranijia, nojori quia cojuanura Sesaacaacuaji. ¹⁶ Nojoriiri maja mijiria quijiaca na quiniu tari cua pueya nojori quishacari, taa nio jiyajiniujnio cua quiaquiyacuaani. ¹⁷ Quia rupaa quia poonijjotere nojori jiuujjajinia, tojetaarucuaajanaa quia tojjijaca nojori quiniuria. Quia rupaari seetanu rupaajanaa cutara. ¹⁸ Quiaacuajaaari quia jiyaroquiaari mijiria quiniaa pueya niqiuara cua pohuatanura quia rupaa. Naajuhuj, janiyari cua pueya jiyaramiquiyani mijiria quiniaa pueyacuajuhuj. ¹⁹ Quia tojjijaca nojori quiniuria seetanujuanaa, janiyari fama cua cuaqueyajaaja jiyateya puetunu quia panishanojuanaa miijia cua quiniuriani. Naacujitij, nojori niishishacari seetanu rupaajanaa janiyajiniji, nojoriiri tojetaarucuaajanaa maninia miijiacara jatanishaanutaniya.

²⁰ 'Majaari saaja cua secojonu nio pojoriicuaara, tariucua quia tojtiajacuaaani. Janiyari secojiyajuhuj na nuhuaji cucua tiuuriquiano pueyacuara, noo pojoriicuaara cante cucua tiuuniutianiya na nuhuajini, nojori tojishacari nio pojori pohuatasano janiyajiniji. ²¹ Cucua tiuuriquiano pueyacuara secojiyanijia puetunu cucua tiuuniaajanaa cuaara quiiria jatiqui, juhua rupuetootesano, taa pa quiyacuaani, cua Quenaa. Naatej, taa cua quia quioojiajiniaacuani, quiaari saniniuujia coojiajinia quiyacuajaa. Nojori jiuujia cuara juhua rupuetootesano quiiria poojiatajuhuaj, mijiria quiniaa pueya niishiniuria, quiaari cua jiyaroquiaari mijiria. ²² Janiyari nojori cumaguia quia Sohanutani, quia niqutiosano janiyacuaa, juhua niquiriyatu jiuujjaraca nojori quiniuria, naatej, taa niquiriyatu jiuujjaraca pa quiyacuaani. ²³ Quiaari coojiajinia quia. Naajuhuj, janiyari nojori jiuujjajinia quiyacuajuhuj. Naacujitij, paari nojoritia juhua niquiriyatu quiniutianiyani. Naacujitij, mijiria quijiacaari niishiniutianiya, quiaari seetanujuanaa mijiria cua jiyaroquiaari. Nojoriiri niishiniutianiya juhuaj, quiaari jiyanojua cua pueya panijia, taa quia paniya janiyacuaani.

²⁴ 'Cua Quenaa, cuno pueya quia niqutiosano janiyani, janiyari paniyani nojori quiniuria cuata quia shuriucua, nojori niquniuria cua shacantuuca cumaaca. Quiaari cuno cumaaca quia niqutioquiaari pueyaracaanu quia paniniucua janiya, jiya shipiniyaquishacarijia. ²⁵ Tojetaarucuaajanaa sesa miyashijia cua Quenaa, mijiria quijiaca pueyari maja na niishiniu quiajaniya. Janiya cutaraari quia niishiyani. Nio cua pueyari niishiyajuhuj, janiyari seetanujuanaa quia jiyarosanonni. ²⁶ Janiyari nojori niishitiocanuacuajani cante quiajaniyani. Janiyari naa pueyaracaanu nojori jiuujjajinia niishiniutianiya quiajaniyajinijini, seetanujuanaa nojori niishiniuria quiajaniya. Naacujitij, taa quia paniya janiyacuaani, nojori cuaara cuno

paniniu jiitiaara nojori jiuujiajiniajuhuj. Naa nojori niishishacari quia-janiyatej, janiyari nojori jiuujiajinia quiniutianiyajuhuj.

18

Na paraa quiasacari Jesu

(Mt 26.47-56; Mr 14.43-50; Lc 22.47-53)

¹ Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari matacosna quijia puetunu na shocujanaa. Jesuuri tii tiuquitiamaa canaa, na Que Pueyaso na secojonura. ² Jesuuri tii jiitiquiaari canaata na rerejonura. Naacuajitij, na paraa na quiaterigiano Judasri cuno cuhuariquia niishiquiaarijuhuj. ³ Canaa quishacari tii, Judasri jiyacari soldadohua tiuquitiasee, Pueyaso Secojoja tia cojuanaa pueyano. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyano. Nojoriiri pueya na miaquetaja pooriqiaa, nocuaji na nunutaja jayoco, samarinio. ⁴ Jesuuri tari puetunu-janaa niishiriquiaacuaja taa nojuaja miishaanutanyani. Naaratej, nojuajaari cuhuariquia matacajiniji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

⁵ Na paraari na riucaree:

—Canaa Nazaret tiacajinijinio Jesu pajeyani.

Jesuuri nojori riucaree:

—Janiyacuaja nojuajani.

Jesu tacartana Judasri cuno pojoritia quiriquiaa tii. ⁶ Jesu sequesacari, “Janiyacuaja nojuajani”, na paraari na nijiniara pojotuquee. ⁷ Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

⁸ Jesuuri nojori riucaree:

—Janiyacuaja tari nia sequereeni, janiyacuaja nojuajani. Naa jaara cua pajeya, nareja nia niquiri nio, cua cojiniaani.

⁹ Naacuajitij, tama Jesu sequesanojuaarjia tohuateequiaari, nojuaja jaara naa na Que sequequiaari: “Majaari quenaaja niquiriyatu pueyano cua juurequetenu quiquiaari quia niquitosano pueyajinijinio janiya”.

¹⁰ Jiyacaritij, Simón Pedroori tama na mueruujuaaja shitiaree na shuucuaji shiyano. Nata, pueyacuara secojonaa jiyaniijia seru numoco jaatereeri, na miaquetajara na numoco. Cuno seru sesa quiquiaari Malco. ¹¹ Jesuuri Pedro sequere:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiya cua miishaanurani? ¡Taaquiriirinij!

Anás nequesoreesacari Jesu

(Mt 26.57-58; Mr 14.53-54; Lc 22.54)

¹² Jiyacaritij, na paraari Jesu quiaree. Nojoriiri quiquiaari Romano soldadohua, nojori jiyaniijiajuhuj, Pueyaso Secojoja tiaco cojuanaa pueyano. Nojoriiri Jesu morojoturee. ¹³ Na nuhuaji, nojoriiri coteenu na jaatucutaquiaari Anásua, canaa pueyacuara secojonaa jiyaniijia Caifás cama na quiniucua. Cuno marijara, Caifásri pueyacuara secojonaa jiyaniijijanaa quiriquiaa. ¹⁴ Cuno Caifásacuajaari tari naa sequequiaari narta

Judiocuaca camarucua: “Maniniacuajaari niquiriyatu pueyano mosaanura puetunu pueya nitijianaa, maja najuhuana puetunu pueyajanaa puecoosaa-nura”.

Pedro coteesacari seetanu Jesujiniji

(Mt 26.69-70; Mr 14.66-68; Lc 22.55-57)

¹⁵ Simón Pedroori cuata Jesu nuhuajiriquiaa tucuacaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacuaajitij, janiyari tiuquinishaaree cutara Jesutani, jiyaniijia tia shocua mataca jiniacuma. ¹⁶ Saaja Pedro cutaraari tohuatayaji jateese. Jiyaniijiajanaa niishishano pueyano cua quiniuucua, janiyari tohuatayaji cojuana niyacoota pocojoseeni, Pedro na tiuquininiuriajuhuaj. ¹⁷ Cuno niyacoori Pedro nequesotaree:

—¿Majate quiajaniya cuno Jesu pueyajinijiniojuhuaj?

Pedroori na riucuree:

—¡Maja janiya!

¹⁸ Shiniquiaari jiyacari jaanujiriquiaa. Nocuaji cuno jiyaniijia seyari Pueyaso Secojoua tiajinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiriquiaajuhuj. Mani jitiuriquiaari.

Pueyacuara secojonaa jiyaniijia nequesoreesacari Jesu

(Mt 26.59-66; Mr 14.55-64; Lc 22.66-71)

¹⁹ Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreereejaariuhuj. ²⁰ Jesuuri na sequeree:

—Janiyacuajaari pueyaracaanu puetunu pueya niquiarajanaa maatia niishitioquiaani. Janiyari pueyaracaanu tiqiyocua Pueyaso secojonuujuaca tiacajiniaqueya niishitioquiaa pueyani. Naajuahuaj, janiyari niya Jerusalén tiacajinia Pueyaso Secojoua tiajinia niishitiojoriquiaani, tee puetunu parta Judiucacajanaa rerejoquiaacuajani. Majaari quenaaja jiya-sohua cua rootanu quiquiaa pueya. ²¹ ¿Casaara quia nequesoreya janiyani? Quia nequesoreere juhuari cuno pojori, canapueete cua pohuatasano tojiquianuni. Nojoricuajaari quia sequenutaniya casaa cua rootaquiaa nojorini.

²² Jiyacaritij, Pueyaso Secojoua tiaco cojuana pueyanoori Jesu shuriucua nuuariquiaa. Naa Jesu riucuasacari jiyaniijia Anástej, Secojonuujuaca tiaco cojuana pueyanoori Jesu jiquioco maseteree. Naa Jesu sequereeri:

—¿Naa riucuasanote pueyacuara secojonaa jiyaniijia?

²³ Jesuuri na riucuree:

—Janiya jaara sesa riucureeni, cua sequere casaate sesa quiriini. Sanini-ujia, janiya jaara maninia sequereeni, ¿casaara quia maseteree cua jiquio-cuaraarini?

²⁴ Canaa pueyacuara secojonaa jiyaniijiajanaa Caifás quiniuucua, jiyacar-itij, Anásri Jesu moronucua jiyarotaree Caifásua.

Pedro pacutesacari seetanu Jesujiniji

(Mt 26.71-75; Mr 14.69-72; Lc 22.58-62)

²⁵ Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiniojuhuaj?

Pedroori saaja seetaree. Sequereeri:

—¡Maja janiya!

²⁶ Pueyacuara secोजना jiyaniijia seruuri Pedro niquirii. Nojuajaari noo pueyano cuna quiriquiaa, Pedro jaatesano na numocotej. Nojuajaari Pedro sequeree:

—¡Janiyacujaruhua quia niquirii cuno pueyanota quia quishacari olivo cuhuariquiajiniani!

²⁷ Pedroori na seetarohuacuhuj. Caacarajaari jiyacari niunijioquee.

Jiya jiyaniijia Pilato nequesoresacari Jesu
(Mt 27.1-2, 11-14; Mr 15.1-5; Lc 23.1-5)

²⁸ Caifás tiajiniji, Jesuuri jaatucusaquiaari Romano jiyaniijia tiajinia. Cuno tiaari jyanohua puereetuuca quiriquiase, jiyaniijiaacuaji tiasano. Cuno jiyaniijiani, nojuajaari Romano jiyaniijiajanaa César jiyatesano quiquiaari jiyaniijiajanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquijioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui juhua curuushiriiri Pueyaso niquiara, nojori tiuquitianuucua tahue tiajinia. Nojori jaara juhua curuutuuca quiri Pueyaso niquiara, naacuajitij, nojori maara Pascuara miaquesano borrego miaqueyaquirij. ²⁹ Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miiriucuaani, miji nia nitianura cucuani?

³⁰ Nojoriiri saaja riucuree:

—Jaara sesa miyashijia quiriquia, ¿canaatucua casaara quiocua na nitiamani?

³¹ Pilatoori nojori sequeree:

—¡Niiquiji nia jiyataarohua! ¡Tama nia nequesoresuhuaajaaja, taa nia supuetanaa rootasano sequeyacuajani!

Canaa Judiocuaca camarucuajari Pilato riucuree:

—¡Niajaniya Romano pueyani, niaacuajari canaa sequecanu maja canaa monura pueyano!

³² Naacuajitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia.

³³ Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate seetanujuanaa Judiocuaca jiyaniijia?

³⁴ Jesuuri Pilato sequeree:

—¿Cunote tama quia niishishanojuajaaja naa quia nequesotanura janiyatej? ¿Tamonu soj quia pahuatatanu janiyajiniji?

³⁵ Pilatoori Jesu juaarii. Na sequereeri:

—¡Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacacuajari cucua nitiamaa quiajaniya, nia pueyacuara secोजना jiyaniijianuucua! ¡Cua sequere casaa quia miiriucuaani!

³⁶ Jesuuri na riucuree:

—Janiyacujari Jiyaniijiani, maja juhua mijiria jiyaniijia. Janiya jaara mijiria jiyaniijia quiriquiani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Majaari jiyaniijia cua quiniu mijiria, taa quia quiyacuaani.

³⁷ Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucuree:

—Jaa. Janiyacuaja Jiyaniijiani. Janiyacuajaari cunora rasaaniaarini. Janiyari mijiria niqiaarini seetanu rupaajanaa cua niishitiniuria pueya. Cante seetanu rupaajanaa panijiani, nojoriiri cua sequesano tojtiajaca.

³⁸ Pilatoori najuhuana na nequesotaree:

—¿Casaateeri cuno seetanu rupaajanaani?

Naa na nequesotanu nuhuajitij, Pilatoori tohuatamohuacuhua canaa Judiocuacaacua.

Pueya sequesacari Jesu cuaara mosaaria

(Mt 27.15-31; Mr 15.6-20; Lc 23.13-25)

Pilatoori jiyacari pueya sequeree:

—Nio pueyano nequesoreereecujanijia. Nojuajaqui maja sesa na miiniu quiquianu. ³⁹ Niajanija Judiocuacani, niaari puetunu Pascua juucarajanaa cua nenecojoquiaa cua cartenura nujuatejojuajiniji nujuatesano pueyano. Quiarijiani, ¿cana nia panija cua cartenura nio Pascua juucarani? ¿Niarta Judiocuaca jiyaniijiatee?

⁴⁰ Puetunu pueyajanaari naa jiyanohua nacoorohuacuhuj:

—¡Maja cuno cartenu! ¡Barrabás quia cartere cutara!

Cuno Barrabásri nohuasejojuia quijia.

19

¹ Jiyacaritij, Pilatoori na soldadohua majacuteree Jesu, coqueeca casaata. ² Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaatinuria, shaaruque toque cushitishaarohuari, juhua jiyaniijia toque. ³ Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—¡Judiocuaca jiyaniijianaa! ¡Quia timiri, Judiocuaca jiyaniijianaa!

Naa nojori sequesacari Jesutej, nojoriiri na jiquioco piquituri.

⁴ Pilatoori socua tohuataquiaari canaa Judiocuacaacua. Nojori sequeereeri:

—¡Nia niquiri! Janiya na tohuateya niaacuani, nia niishiniuria janiyacuja tari na nequesoreereeni. Janiyari quiarijia niishiyani, nio pueyanoqui maja sesa na miiniu quiuriucuaa.

⁵ Jesu muetasacari nojoriicua, juhuacontucujiniji nacaque cushiriqiaari, shaaruque toquenio. Pilatoori Judiocuaca sequeree:

—Nia niquiri niarta pueyano.

⁶ Canaa pueyacuara secोजना jiyaniijianucua, Pueyaso Secojoua tiaco cojuanaa pueyajuhuj, nojori jaara Jesu niqiquiaari, na nacoonu coteetureeri:

—¡Niyacutesanojinia quia teetere tii na cusonura! ¡Niyacutesanojinia quia teetere!

Pilatoori nacoyano riuquaree saaja:

—¡Maja! ¡Janiyacujaari niishiyani, nio pueyano maja sesa na miiniu quiquianu! ¡Niaa jaara na monu paniri, nia teetere tama niajanijajaaja!

⁷ Canaa Judiocuacaari Pilato riuquaree:

—¡Canaari Pueyaso Rootasano naajione jiiitaani! ¡Canaari cunojiniji niishiyani, nio pueyano cuaara mosaaria tama na cuaqueyajaaja na jiyatenucua Pueyaso Niyanura!

⁸ Pilato tojishacari naa canaa Judiocuaca sequesantej, nojuajaari socua puerequiaari. ⁹ Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajanijiani?

Jesuuri maja na riuucuanu quirii. ¹⁰ Pilatoori na sequeree:

—¡Cua riucutarejaj! ¿Quiaate niishiyaquiya, janiya jiyaniijiani? ¡Janiya jaara panirini, cua naata cua pueya sequenu na teetenura quiajaniya! ¡Janiya jaara paniaquirijihuhaj, cua naata quia cartenujuhujaj!

¹¹ Jesuuri saaja na riucutaree:

—Jiyocuacaanu Quiija jaara quia jiyateyaquiquiaari jiyaniijia quia quiniuria, quiaa maara quia cumaaca paaretaaquiri cucuj. Naaratej, cante niyara cua nitiamaa quiocuani, nojuajaari socua jiyanoehua sesa miirii quiajanijajini.

¹² Naa Pilato tojishacari Jesu sequesantej, nojuajaari socua shiriquiaari. Nocuaji, Jesu cartenu saniniujiriquiaa juucuaari. Judiocuacaari saa nacooreejaa. Naa Pilato sequetureeri:

—¡Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! ¡Naaratej, quiaa jaara cuno pueyano cartere, majaari socua pa jiyaniijijanaa César rupuena quia quiniu quiniutianiya!

¹³ Naa Pilato tojishacari pueya sequesano nojuajatej, nojuajaari na soldado sequeree na tohatenuhuara Jesu pueya niquiara. Pilatoori jiyacari cajirii pueya na nequesoreesaquiji cajitujinia. Pilato tii cajiriquiaani, na tacoji pueya nujuatusaquini, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca rupaajinia saniniujia, cunoori quiquiaari “Gábata”. ¹⁴ Jiyacariiri panacari quiriquiaa. Cuno juuca, canaa Judiocuacaari juhuacarijia jeenucuariquiaa Pascuara juucajinia. Pilatoori jiyacari tii quinia Judiocuaca sequeree:

—¡Nia niquiri nia jiyaniijia!

¹⁵ Pueyari saa nacooreejaa:

—¡Cunoori maja canaa panishano canaa jiyaniijia na quiniuria! ¡Niyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? ¡Maja!

Pueyacuaa secjonaa jiyaniijianucuaari Pilato sequeree:

—¡Jiyaniijia Césarcaajaari canaa jiyaniijijanaa! ¡Maja socua tamonu jiyaniijia canaa jitianu!

¹⁶ Pilatoori socua Judiocuaca niqutioree Jesu, nojori teetesocoriquiano. Naaratej, nojoriiri na jiyataquiaari na teetenucua.

Jesu teetesacari

(Mt 27.32-44; Mr 15.21-32; Lc 23.26-43)

¹⁷ Jesuuri tama na teejaranojuajaaja canujataaree pueya puecoosaquiria. Puecoosaqui sesa quiquiaari “Pueyano nacaco tuhananu”. Judiocuaca rupaajinia saniniujia, “Gólgota”. ¹⁸ Jesuuri tii teetesaaquiaari, socua caapiqui pueyano. Jesuuri cuno pojori tajinia nujuaretasaaree. ¹⁹ Pilatoori naa naajiotequiaarijuhuj Jesu nacaacuma rupotasocoriquiano: “Nazaret tiacajinjini Jesu, Judiocuaca jiyaniijia”. ²⁰ Naajiosano quiriquiaari canaa Judiocuaca rupaajinia, Romano pueya rupaajiniajuhuj, Griego rupaajiniario. Jesuuri catecaja teetesaaquiaari Jerusalén tiacajiniji. Naacuajitij, queraatia Judiocuacaari cuno naajio serojoquiaari. ²¹ Naaratej, Judiocuacaacuara secjonaa jiyaniijianucuaari Pilato juaatiurii:

—¿Casaara naa quia naajiotereeni: “Judiocuaca jiyaniijia”? Cuaara naajiosaria cutara: “Tama na cuaqueya sequejajaaja, Judiocuaca jiyaniijiani”.

²² Pilatoori nojori riucutaree saaja:

—Janiyacuaajaari naa naajiotereeni. ¡Cuaara naa quiriartej!

²³ Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu tucuaque cacojoqui. Cuno toqueeri shitasano quiquiaari na riquiajiniji jiyocuara. Maja cusupuesano. ²⁴ Naaratej, cuno soldadohuari sequetooquiaari:

—Maja pa surenu nio toque. Coteenu pa tacuarishijiore, pa niishiniuria cante nera na panutaniyani.

Naacujitij, tariucuacaanu Pueyaso Rupaajinia naajiotasanoori tohuateequiaari. Naa naajiotasano quiyari:

“Cua toqueeri seraatiasaaree. Cua tucuaque toqueecuara tacuarishiyonuureeri, na pasocoriquiano”.

Seetanujuanaa, naa miitiquiaariiri cuno soldadohua.

²⁵ Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhuj, Cleofas niquiocua Maríajuhuj, María Magdalenanio. ²⁶ Jiyanohua Jesu panishano pueyanoori Jesu nucua shuriucua nujuariquiaa. Cuno pueyanocuaajari janiya. Jesu niquishacari canaa, na nucua sequereeri:

—Maajiniaa, cua panishano pueyano cuaara quiiria juhua quia mueya cua niti.

²⁷ Na nuhuaji, cua sequereajaariuhuj:

—Juannaa, cua nucua cuaara quiiria juhua quia nucua.

Naaratej, janiyari María riquiaari cua tiajinarani, tii na quiniuria canaata.

Jesu cusosacari

(Mt 27.45-56; Mr 15.33-41; Lc 23.44-49)

²⁸ Na nuhuaji, Jesuuri niishiquiaari puetunu nojuajiniji naajiotasanojuanaari tari tohuateere. Naajuhuj, tariucuacaanu Pueyaso Rupaajinia naajiotasano tohuateenurajuhuj, Jesuuri sequequiaari:

—¡Jiyamueyanijia!

²⁹ Cuniqúi, vino jereecaari patacojinia mishaja cajitiariquiaa. Jiyacaritij, namasu casaari jereeca vinojinia shishaaree. Naajuaacua na morotatureeri. Na nuhuaji, Jesu rupaama shitasareeri. ³⁰ Jesu ratunu nuhuaji cuno jereeca vino, naa sequerohuari:

—¡Tari tucuataree puetunujuanaacuajaniija!

Naa na sequenu nuhuajitij, naniquiri. Cusoqueeri.

Soldado jitasacari Jesu shuucujaji na cashanata

³¹ Cuno juucaari canaa Judiocuaca jeenucuasacari quiriquiaa Pascuaacuara juucajinia. Cuno marijara, Pascua juucaari Sábado juucajinia quiriquiaajuhuj, samaatenu juuca. Naaratej, canaa Judiocuaca camarucuuari maja na paniniu quiriquiaari samaatenu juuca macunucua jaasuconura na niyacutesanojinia. Naaratej, nojoriiri Pilato sequereee cuno teetejosano pueya cashacucua na shuniitianiniuria, ritia nojori cusonuunura, na roshinijiosaanura cuno juucaja. ³² Naaratej, Pilatoori na soldadohua jiyaramiquirii. Cuno soldadohuari coteenu shuniitiree niquiriyatu pueyano cashacucua. Na nuhuaji, tamonu cashacucua shuniitiatuureejaariuhuj. ³³ Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitaaquirii.

³⁴ Naajaa, tamonu soldadoori Jesu shuucujaji jitiaree na cashanata nujuuanaj. Ritia shooqueeri nanaca, mohuacanio. ³⁵ Cuno pueyano, na naajiojinia naa nia pohuataani, cunocuaajari janiya. Janiyajanaari na niquiquiaarini. Naarate janiyari seetanujuanaa nia pohuataani. Tama

janiyaajarijia niishiyani cua sequesanoori seetanujuanaa, nocua nia tiuuniuria. ³⁶ Jesuuri naa miishaaquiaaritij, tariucuaaanu nojuajiniji naajiotasano tohuateenura. Naa sequeyacuajaari juhuacarjia nojuajiniji naajiotasano:

“Majaari quenaaja na nucu shuniitiasaanu quiniutianiya”.

³⁷ Tamaquiiri nojuajiniji naa naajiotasano quiyajuhuj:

“Cashanata na shuucujaji na jitiatusano niquitiuniutianiyari”.

Jesu quete niasacari raaco

(Mt 27.57-61; Mr 15.42-47; Lc 23.50-56)

³⁸ Na nuhuaji, Arimatea tiacajinijinio Joseeri Pilato sequesee:

—Cua niquitiore Jesu quete raaco cua niasocoriguiano.

Nio Joseeri jiyasohujaja Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacujitij, Joseeri quiaaree. Macu paquiaariiri. ³⁹ Nicodemojuhuaj, noo pueyano Jesuucua niquiaari niucua nata pocoojonuratej, nojuajaari jiyacari tiuquishii Joseecua. Nojuajaari queraatia shanohua jaanutaja nitariquiaa, macuucua niojosocoriguiano. Na niiquiaari quiquiaari cuarenta y cinco kilo. Cuno shanohua jaanutajaari quiquiaari mirra, aloeta cojitijosano.

⁴⁰ Joseeri Nicodemota Jesu jiuniocoree toqueneecajinia. Nojori jiunio-cosacari, nojoriiri nocua niojoriquiaa cuno shanohua jaanutaja. Canaa Judiocuacari naa miitijiaa quiquiaari, na macu na niatunura raaco.

⁴¹ Tee Jesu teetesaaquiaaricujani, cuniquijia na shuriucua quiquiaari-iri cuhuariquia. Cuno cuhuariquiajiniani, quiarinio jiuutiasano raari quiriquiaa, macunucua niojojuara. Cuno raaconi, juhuanojuaja maja macu niasaanu quiquiaari. ⁴² Macuuri cuno raaco niasaaquiaari, cateca na quiniucua. Naajuhuj, quera puequeriquiaari canaa Judiocuaca jeenucuanu juuca. Cunoori, Pascuaacuara juuca.

20

Jesu samiitiasacariuhua

(Mt 28.1-10; Mr 16.1-8; Lc 24.1-12)

¹ Domingo, coteenujuanaa semanaa juucani, María Magdalenaari tariquicuajaji quiaquiaari Jesu raajiniara. Ninishiquiiri quiriquiaajaa. Na tiuquishacari, cuno puereetuca saajia niquishiri tariucua tamocora ruutinshano, teyanota raa tiosaaquiaaricujani. ² Naa na niquishacaritij, nojuajaari neterohua Simón Pedroocua, cucuanio. Canaa sequesuhuari:

—¡Pueyanaa, pa jiyaniijiaqui na raajiniji pasaaree! ¡Majaari canaa niishiniu teeriquitijia na niasaaretejaj!

³ Naaratej, janiyari Pedrota netequiaari raajiniarajuhuj. ⁴ Canaari mariyata netecuaturiquiaa coteenuni. Janiya cutaraari socua ritia netequiaari Pedrojinijini. Naacujitij, janiyari coteenu tiuquishii raajiniani. ⁵ Janiyari raaco cuuqueseeni. Janiyari saaja Jesu jiunioctaja toque niquirii maanoni tee Jesu quete niasaarucuaacujani. Majaari cua tiuquiniu quimaa raaco.

⁶ Simón Pedroori cua nuhuaji tiuquishii. Cami tiuquimiaajanaa cutaraari. Nojuajaari Jesu jiunioctaja toque niquishii tii maanojuhuaj. ⁷ Jesu naca jiunioctaja niquiriijiaariuhuj tamoco maano, maninia mariquiosano. Majaari na manu quiriquiaa Jesu cuaqueya jiunioctaja toqueta. ⁸ Pedro tiuquiniu nuhuaji raaco, janiyari shusha jiyacari tiuquimiaajaanuhuj. Cua niquishacari Jesu jiunioctaja toque, janiyari niishiquiini Jesuqui tari samiitiarohua. ⁹ Canaari juhuanojuaja maja canaa niishiniu quiriquiaa

tariucuacaanu Pueyaso Rupaajinia naajiotasano Jesujiniji. Tii sequeyacuajaari Jesuuri samiitianutaniuhua macujiniji. ¹⁰ Na nuhuaji, canaari tiajinia quiaarohuani.

Jesu muetasacari María Magdalenaacua
(Mr 16.9-11)

¹¹ Canaa quiojosacariuhua raajiniji, María Magdalenaari tiijia jateequiaari. Raa shuriucua nujuqueriquiaari. Na nujuquenuta, raaco cuquereeri. ¹² Raaco na niquishacari, caapiqui Pueyaso seya niquiriiri, cohuajaque toqueyaraca. Nojoriiri macu niasaqui cajitiuriquiaa, tamonu na nacaacora, tamonu na cashacuucumara. ¹³ Pueyaso seyari María Magdalena sequeree:

—Maajiniaa, ¿casaara quia nujuqueyani?

Nojuajaari Pueyaso seya riucaaree:

—Cua jiyaniijia quete niqumi pasaarucuaa. Majaari cua niishiniu teeriquitijia na niasaarucuaatejaj.

¹⁴ Naa na sequenu nuhuajitij, na nijiniara tacaterohuari. Saaja Jesu niquiriiri na shuriucua nujuanoori. Maja cutaraari na niishiniu quiriquiaa nojuaja Jesu.

¹⁵ Jesuuri na nequesotaree:

—Maajiniaa, ¿casaara quia nujuqueyani? ¿Cana quia pajeyani?

Mariari na jyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua sequere tee quia niarucuaanoj. Janiyacua nocua quiaare na panurani.

¹⁶ Jesuuri na sequeree:

—¡Maríanaa!

Jiyacaritij, Mariari nocua tacatequee na niishishacari nojuajaari Jesu. Hebreo rupaajinia na sequereeri:

—¡Rabuni!

Cunoori sequeya, “Cua Niishitiojonanaa”. ¹⁷ Jesuuri María sequeree:

—Maja cua quianu. Juhuanujuaja maja cua tacanu quiquiao cua Queecua. Quia quiaarohua. Cua tapueyocuaca quia sequesuhua: “Janiya cua Que Pueyasocua tacanutaniuhuani. Nojuajaari nia Quejuhuaj. Nojuajaari cua Jiyaniijia, nia Jiyaniijiajuhuaj”.

Jesuuri naa na saquiriojosano pueya sequeree na tapueyocuacata, na Que Pueyaso na jiyatesacari nojori Quejuhuaj. ¹⁸ Jiyacaritij, María Magdalenaari nimiohua canaacua, Jesu saquiriojosano pueyacuani. Nojuajaari canaa pohuatasuhua taa Jesu na niquiriini. Naajuahuaj, Jesu sequesano caminiujiurii canaaraari.

Jesu muetasacari na saquiriojosano pueyacua
(Mt 28.16-20; Mr 16.14-18; Lc 24.36-49)

¹⁹ Cuno domingo juucajani, shusha ninishacari, canaa, Jesu saquiriojosano pueyani, canaari jatiqui quiriquiaa tiaconi. Canaari tia tohuataya mishiquiojoquiaari cumaatiiani, canaa pueresacari Jesu motenaa Judiocuaca. Naa tia tiotiu mishiquiojosano quishacaritij, Jesuuri saaja canaacua tiuquimiaa. Canashyaquiji nujuasee canaa tajiniari. Naa canaa sequereeri:

—¿Niaate quiyajaa? Juhujaniya nia quiri.

²⁰ Naa canaa na sequenu nuhuajitij, canaa niqitijioree na juaashiquiaari, na shuucujaj cashana jyanio. Canaari jyanohua umiriini canaa niquishacari canaa Jiyaniijia. ²¹ Jesuuri socua pacuterohua sequenu:

—¡Juhujaniya nia quiri! Naatej, taa cua Que jiyaroquiaari janiya mijiria na rupaa cua pohuatanuracuaani, janiyari naa nia jiyaramiquiniutianiya-juhuaj.

²² Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia. ²³ Naa jaara pueyano shiyanoori sesa na miishanojiniji, seetanujuanaa jiyanooshano quiniutiani-yari. Saniniuuja, niaa jaara pueyano jiyanoyaquiri sesa na miishanojiniji, Pueyasora, jiyanooshoo quiniutianiyaajaariuhuaj.

Tomás niquishacari Jesu, saminio seetanujuanaa

²⁴ Majaari Tomás quiniu quiriquiaa canaata, narta saquiriojosano puey-atani, Jesu muetasacari canaacua. ²⁵ Naaratej, canaari Tomás sequequiaari na nuhuajini:

—¡Caapueyanonaa, canaa pa Jiyaniijia niquiriicuaani!

Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu juaashiquiajinia niquiyaquiri clavo jiyacani. Janiya jaara cua juaashiquia shiyoquiri clavo jiyamani, janiya jaara cashana jiyama pueraaquiri na shuucuajijihuaj, janiyari nia cuaracashitiniutianiyan.

²⁶ Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaarihuani. Tomásri jiyacari canaata quiriquiaa cutara. Tia tiotiuuri maninia mishiquiojosano quiriquiaa. Naajaa, Jesuuri saaja canaacua tiuquiquiaari. Canashiyaquiji canaa tajinia nujuaseeri. Canaa sequereeri:

—¿Niaate quiyajaa? Juhujaniya nia quiri.

²⁷ Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucuaji quia puerarejuhuaj. ¿Casaara cucuaji quia taacanuyajaani? Cucua quia tiuuri.

²⁸ Tomásri jiyacari Jesu sequereeri:

—¡Cua Jiyaniijianaa! ¡Cua Pueyasonaa!

²⁹ Jesuuri na sequereeri:

—Quia niquishacari janiya, quiaari shusha cucua tiuya. Socua shuquiri-aatia quiniutianiya cutaraari noo pojori, canapuate cucua tiuuniutianiya saaja nojori tojishacari janiyajinijini, nojori niquiyaquishacari janiya.

Casaara Juan naajioquiaari nio naajioneeni

³⁰ Jesuuri jiyanohua socua queraatia casaa miiquiaari na cumaacata canaa na saquiriojosano pueya niquiara. Cunoori nio nequesoreetunee-jinia naajiotasoo. ³¹ Janiyari seaja saquiriojoree niya cua naajiotaso-coriquianoni, nia niishiniuria Jesuuri seetanujuanaa Pueyaso Jiyarosano, Pueyaso Niyanutuhuaj. Janiyari nio naajioreeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quini-uria.

21

Tiberias caminiajinia Jesu muetasacari na saquiriojosano pueyacia

¹ Na nuhuaji, Jesuuri canaa na saquiriojosano pueyacia muetaquiaar-ihua Tiberias caminiajinia. Naa quiquiaariti na muetasacari canaacua.

² Nio pojoriiri jiyacari mariyata quiriquiaa: Simón Pedro, Tomás (Caapueyano jyanishano), Natanaeljuhuaj. Nojuajaari Caná tiacajinijinio quiquiaari, Galilea jiyajinijinio. Janiyari cua tarajanuta tii quiriquiaajaani-uhuj. Canaari Zebedeo niquiohuani. Socua caapiqui Jesu saquiriojosano

pueyajinijinoori tii quiriquiaajuhuaaj. ³ Simón Pedroori jiyacari canaa sequeree:

—Sapitiaajara quejootaseera shiyaru.

Canaari na riucuaareeni:

—Canaa quiata quiaajuhuaaj.

Naacuajitij, canaari quiojiyareeni. Canaari botejinia tacataseeni. Canaari puetunu cuno niucujanaa shiyaru quejootariquiaa sapitiaajara juucuaní. Canaari shaa juhuaquetumaani. ⁴ Jiyacaritij, Jesuuri caminia casaqueyaji jaaquiajinia nujuariquiaa. Majaari canaa niishiniu quiquiaari cante nojuajani. ⁵ Jesuuri canaa jiiquiooree. Cana nequesotareeri:

—¡Sanajooriniaa! ¿Niaate na quiaree?

Canaari na riucuaareeni:

—¡Maja! ¡Shaaqui sacaj!

⁶ Jesuuri canaa sequeree:

—¡Nia shiyaru nia jartare nia miaquetajara bote tamajiria! ¡Niaari cuniqui na quianutaniya cutara!

Canaari naa miiriini taa na sequeree canaacujani. Na nuhuaji, majaari canaa naata canaa shiyaru jaatianu quiriquiaa, queraatia sapitiaaja canaa ritiasacari. ⁷ Jiyacaritij, janiyari Pedro sequereeni:

—¡Pa Jiyaniijiaqui!

Naa Pedro tojishacari cua sequesantej, nojuajaari ritia na toque cushirii. Nojuajaari juhuasu quiriquiaa. Na toque na cushiniu nuhuaji, caminiajinia jaataareeri Jesuucua na quianura. Jiritiuri quiriquiaa. ⁸ Canaari na nuhuaji jaatiariquiaa shiyaru botejinijini. Jaaquiaari namitia maja tucuaaanu na quiniu quiriquiaa, saaja cien metroruhua. ⁹ Canaa rosetasacari botejiniji, canaari na mani niquishiini. Sapitiaajaari tii majeeriquiaa, panino. ¹⁰ Jesuuri canaa sequeree:

—Nia sapitiaajajiniji miji nia riri rarishocoriguiano.

¹¹ Simón Pedroori ritia botejinia tacamaa. Shiyaru tacanitiaree jaaquiajiniiaari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucujaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja. ¹² Jesuuri canaa sequeree:

—Pueyanaa, miji. Nia miaquesee.

Majaari quenaaja niquiriyatu canaajinijinio nequesotanu quiriquiaa, cantejaaranononi. Canaacuajaari niishiriquiaani nojuacuajaari canaa Jiyaniijia Jesu. ¹³ Jiyacaritij, Jesuuri pan rishii manijiniji. Canaa na serotareeri. Sapitiaaja rariquia canaa niquitiojoreejaariuhuaaj.

¹⁴ Jiyacari Jesu muetasacari canaa na saquiriojosano pueyacuatej, cunota tari quiquiaari jiuujianaraca na muetasacari canaacua na samiitianu nuhuaji.

Jesu pocojosacari Simón Pedrotá

¹⁵ Canaa miaquenuunu nuhuaji, Jesuuri Simón Pedrotá pocojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquiriojosano pueyajiniji?

Pedroori na riucuaaree:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequeree:

—Cua borregohua niquiohuanioyua cojuanara quia quiriqui.

Naa Jesu sequesacari Pedrotej, nojuajaari miriqui na sequeriquiaa maninia na jiiitanura narta Pueyaso muerasu. ¹⁶ Jesuuri Pedro nequesotaru huacuhuaaj:

—Juan niyanu Simónnaa, ¿quiaate cua panijia?

Pedroori Jesu riucuaeree:

—Jaa, Jiyaniijianaa. Quiaacuaajaari niishiya janiyari quia paniyani.

Jesuuri na sequeree:

—Cua borregohua cojuanara quia quiriqui.

¹⁷ Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujuanaa Jesu riucuaereeri:

—¡Jiyaniijianaa, quiaacuaajaari puetunujuanaa niishijia! ¡Quiaari niishiya janiyari quia paniyani!

Jesuuri na sequeree:

—Cua borregohuanijoyua cojuanara quia quiriqui. ¹⁸ Seetanujuanaa quia sequeyanijia, mashaja quia quishacari, tama quiajaniyajaarijia quia toque cushijia, quia quianura quia panishaqui. Saniniuuja, quiaa jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniyaquishaquiria.

¹⁹ Naa Jesu pahuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutaniya na mosaanuucua. Na nuhuaji, Jesuuri na sequeree:

—¡Pueyaracaanu cua tojjia quia quiri! Pa quiaarej.

Juanjiniji pahuatasano

²⁰ Pedro tacatesacari na nijiniara, Jesu panishano pueyano niquirii na nuhuaji sacuaanoori. Nojuacuaajaari janiya. Janiyari noo pueyanocuaiani, canaa miaquenuusacari Pascuara, Jesu shuriucua cua cajishacari na nequesotaquiaaritij: “¿Cantejaara cunoni, quia quiatenutaniyani?” ²¹ Quiarijiani, Pedro niquishacari janiya saniniuuja, Jesu nequesotareeri:

—Jiyaniijianaa, janiya jaara naa mosaanutaniyacuaani, ¿nojuajaarijiaataj, taa na miishaanutaniyarini?

²² Jesuuri Pedro riucuaeree:

—Janiya jaara paniri nojuaja rishiniuria pueyaracaanuni, janiya jaara jiyocuacaanuji tiuquiriohuajaatijia, quiaara, naajaa. Quiajaniya cutara, pueyaracaanu cua tojjia quia quiri.

²³ Naa Jesu sequenuucua Pedrotej, puetunu cuarta Jesu pueyajanaari jyaniriquiaa janiya naasucua shaajeyaquiriquianoni. Jesuuri seetanujuanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuacaanuji tacatemohuajaatijia, quiajaniyara naajaa”.

²⁴ Janiyacuajaari nojuajani, Jesucristo panishano pueyanoni. Nio cua naajojiniani, janiyari nojuajiniji cua niquishano pahuataani. Cua pahuatasanoori seetanujuanaa.

²⁵ Jesuuri jiyanhuaa queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiquio quiaquiri puetunu cuno nequesoreetunecaacuaajianaa.

JESUCRISTO JIYARAMIQUISHANO PUEYA MIISHANO

“Pueyaso Sohuanu niaacua jiyarosaanutaniya”

¹ Quiocuara naajionu pacuterohuanijia, cua panishano Teófilonaa. Co-teenu cua naajiosanojinia, janiyari quia pohnuataquiaarini taa Jesu na poonijosano coteequiaari mijiriani. Puetunu na miishanojuanaa naajio-taquiaarinijia, mariyata na niishitijosano na coteenujiniji, jaara tacan-ishaaquiaariuhua jiyocuacaanu na Queta na quiniuhua. ² Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajani. ³ Jesu cusonu nuhuaji, nojuajaari muetaquiaariuhua na saquiriojosano pueyacia. Nojoriicua mueranacujuquiaariiri. Cuarenta juuca nuhuaji taciaquiaari-uhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa samini quia. Nojoritia pocoojo-quiaariiri taa Pueyaso jitianutaniya na muerasuni.

⁴ Nojoritia na pocoojosacari tamonu juuca, Jesuuri nojori numootequiaari maja ritia nojori quianuhua Jerusalén tiacajiniji. Nojori sequequiaariiri:

—Nia sashirijaara cua Que cuara niquitioorajaara na Sohuanu nia-janiya. Nojuajaari cua sequequiaari na niquitionutaniya nijaniyana, taa cua caminiujuquiaari tari niaaracujani. ⁵ Naa sequequiaari nijaniy-iacujani: “Tiuquinijona Juanri nia tiuquinijioquiaari moojinia, Pueyaso tojjijara nia jatasacari. Pueyasoori saniniuuja na Sohuanu nioojiajinia tiuquinijionutaniya, seetanujuanaa Pueyaso tojjijara nia quiniuria”. Quera niaacua tiuquinutaniyacujajani. Naaratej, nia sashiri.

Jesu tacasacariuhua jiyocuacaanu

⁶ Tamonu juuca, Jesu pueyari Jesuucua rerejoquiaari. Na nequeso-tatureeri:

—Jiyaniijianaa, ¿quiaate Jiyaniijara jiyatesaanutaniya quiarijia Israel pueyara, maninia pa quiniuhua tama pa jiyaniijiatajaaja, taa pa supuetanaa quiquiaaricuaani?

⁷ Jesuuri nojori riucuaaree:

—Nio cutaraari maja nia niishishocoriquiano, taacari Israel pueya jiyani-ijara cua jiyatesaanutaniyani. Pa Que Pueyasoori cuno niishishano racataa tama nerajaaja. Saa nojuajaari na niishiya cutara. ⁸ Naajaa, niaari Pueyaso cumaaca masenutaniyacujaja, Pueyaso Sohuanu jaara nioojiajinia tiuquiri. Niaari janiyajiniji pohnuatanutaniya pueya niquiara Jerusalén tiacajinia, puetunu Judea jiyajiniajanaano, Samaria jiyajiniajuhuaj. Naa pohnuataaanutaniyacujariuhua puetunu jiyacajiniajanaa, socua tucuacaanu jiya puequetujiniano.

⁹ Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajajinia shaajemaari pueya niquiyaquini-uucujaji nojuaja. ¹⁰ Nojori mautasacari jiya cajiniocua Jesu tacasacari, canashiyajiji, caapiqui pueyari nojori shuriucua nujuatuquiaari. Nojori toqueeri jiyanhua cohuajaque quiriqiaa. Nojoriiri jiyocuacaanujinio Pueyaso seya quiquiaari. ¹¹ Nojoriiri Jesu pueya sequeere:

—Galilea jiyajinijino pueyanaa, ¿casaara nia mautaa jiyocuacaanuni? Taa nia niquiri tacaanocujani, niaari naa na niquiniutianiya tacatehuanohua-juhuaj.

¹² Nojoriiri jiyacari Olivo nacuhua tuhuananuucua quiriquiaa. Pueyaso seya nuhuaji, Jesu pueyari Jerusalén tiacajiniohua tacatequiaari. Cuniqiji, cateca naataja quiquiaari Jerusalén tiaca. Moisés Naajiotasanojiniji, Judiocuacaari naa rootasaaquiaari maja socua tucuaaanu nojori rucuanenura samaatenu juuca. ¹³ Nojori tiuquiiijosacari Jerusalén tiacajinia, nojoriiri nojori quijia tiajinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucujani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricujani. Quiquiaarijiaariuhua Simón, cante tari quiquiaari Romano pueya jatanu panijiacujani. Mariyata quiriquiaari Judas, Santiago tarajanu. ¹⁴ Nojoriiri jiyacari pueyaracaanu Pueyaso secojonuuriquiaa tii maajipohuata, mariyata Jesu nucua Mariata, Jesu tapueyocuataniao.

Pueya saquiriojosacari Matías Judas niti

¹⁵ Nojori sashishacari Pueyaso Sohuanu tii, tamonu juuca, Pedroori nujuquiaari pueya niquiara na sequenura nojori. Naa naasucuatuhuaj ciento veinte pueyari tii quiriquiaa puetunujuanaa. Naa nojori sequereeri:

¹⁶—Cua tapueyocuaanaa, Pueyaso Sohuanu sequesanoori maja na naata naajaa tajiniu. Seetanujuanaa tari tohuateerucuaari Judasjiniji na pohuatanishano pa supuetanaa jiyaniijia David. Naacujitij, Judasri Jesu monaarano niishitiquianu tee Jesu quiriquiaani, nojori na quiatenura. Judasri cunora niquitiosaacanuu cumaneeca, naa nojori na niishitiniucua Jesu quiasaanura. ¹⁷ Nojuacujajaari parta Jesu saquiriojosano pueyano quiquiaarijihuaj. Nojuajaari mariyata Jesu jiyaramiquishano quiriquiaa juhua pajaniyajuhaaj. ¹⁸ Tamonu cuhuariquiaari masesaacanu sesa na miishano samitia. Na nuhuaji, tama cusoyareejaarijia. Jiyocuaaanuji tiquianu na nacaraari. Na saracaari cocuaretasee. ¹⁹ Jerusalén tiacajinia quiniaa jaara na niishiquianu, nojoriiri cunoo cuhuariquiaa sesojoree “Acéldama”. Acéldamaari pueyano rupaajinia sequeya “Nanaca samitia masesano cuhuariquia”. ²⁰ Judasjinijiiri naa naajiotasaaquiaarijihuua tarucuaaanu supuetana David jaaquequejojuajinia. Naa sequeyari: “Na quiquio cuaara quiiria shaaco. Cuaara quiiria sanaaca, camaruuju”. Sequeyajaarihuaj:

“Tamonu pueyano cuaara jiyatesaaria na poonijosano miiriquiano na niti”.

²¹ ‘Cuarta Jesu saquiriojosano pueyanaa, niya quiyacujaja pueya, canapuetucujaja pa tarajacujajaari pueyaracaanu pa Jiyaniijia Jesu quishacari pata. ²² Nojoriiri Juan niquiquiaarijihuaj Jesu tiuquiniyano moojinia, Jesu tacasacariuhua jiyocuaaanunio. Canapuetucujaja puetunu nio niquiquiaarijianaani, niquiriyatu nojorijinijinio cuaara jiyatesaaria Jesu jiyaramiquishanora, pata na quiniuria, Jesu samiitanujiniji na pohuatanurajuhaaj.

²³ Naaratej, pueyari caapiqui pueya saquiriojoquiaari. Cuniqiji quiriquiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriquiaajuhuaj, Matías. ²⁴ Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijajanaa. Canaa quia niishitiri teyano pueyano tari quia saquiriojoreeni, quia jiyaramiquishocoriquiano na quiniuria, Judas niti poonijioriquiano. ²⁵ Judasri quia niquitiosano poonijosanojiniji catecanu sesa na miiniucua, naquiya miishaqui na quianura, sesa miijia na quiniucua.

²⁶ Na nuhuaji, pueyari naajiosano saajia jaquerooree nojori niishiniuria teyanote Pueyaso panishano pueyanoni. Saajiaari Matiascuara tacatasee. Naacuajitij, Matiasri Jesu saquiriojosano pueyanora quiquiaarijuhuaj. Naacuajitij Jesu saquiriojosano pueyari juhua juhuanoraja quiquiaariuhua doce.

2

Pueyaso Sohuanu tiuquishacari

¹ Pentecostés juuca jaara quiquiaari, puetunu Jesucua tiuuniaajanaari rerejono quiquiaari tamonu tiajinia Jerusalén tiacajinia. ² ¡Canashyaquiji, paratuuri tojishaaquiaari jiyocuacaanuji, juhua paratu pocuaano jiyano hua cojuata! Jiyano hua tojishaareeri cuno tiajinia tee Jesu pueya caji-tiuriquiaacuajani. ³ Jiyacari, juhua maniiri niqushaaree pueya caco rimi-anuqueyano. Puetunu nojori cacojuanaa rimianacuriquiaari juhua mani. ⁴ Jiyacaritij, Pueyaso Sohuanuuri puetunu tiajinia quiniaa jiuujiajiniajanaa tiuquirii. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocooteree puetunujuanaa tamaatia rupaaca.

⁵ Cuno quishacari, queraatia Judiocuaca puetunu jiyacajinijinojuanaari camueenujiquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojtia-jaca quiquiaari. ⁶ Nojori tojishacari cuno cojuatunenu, nojoriiri cuqueree tee Jesu pueya pocooriquiaa tamaatia rupaacacuajani. Nojori tojishacari naatej, nojoriiri jiyano hua cushitiirii. Naatej, puetunu rucoonaajanaari tama na jiyajinijinio rupaacajaaja tojtiairiquiaa, cuno pojori pocosacari. Nojoriiri maja na niishiniu quiquiaari casaara naa nojori miiriini. ⁷ Nojoriiri jiyano hua jiuujiatecoree. Tama sequetooreejaarijia:

—¡Juhuej! ¿Cuno pojoriti maja Galilea jiyajinijinio pueyacuaja naa pocoy-aniquitij? ⁸ ¿Taa nojori pocuaa puetunu coteenu pa rupaacajanaani? Pajaniyacuajaari queraatia tamaatia jiyacajinijinioni, puetunu tamaatia rupaaca pocuajacajanaa.

⁹ Seetanujanaari. Cuno pojoriiri Partiya jiyajinijinio nijiono quiquiaari, Media jiyajinijinio, Elam jiyajinijinio, Mesopotamia jiyajinijinio, Judea jiyajinijinio, Capadocia jiyajinijinio, Ponto jiyajinijinio, Asia jiyajinijinio. ¹⁰ Quiquiaarijaariuhuj Frigia jiyajinijinio, Panfilia jiyajinijinio, Egipto jiyajinijinio, África jiyajinijinio. Cuno Africa jiyajinijinio pueyari quera Cirene tiaca shuriucuaji quiquiaari. Roma tiacajinijinio pueyari tii quiquiaarijuhuaj, canapuete Jerusalén tiacajinia pacunaa quiquiaaricua-jani. Puetunu cuno pojorijianaari Judiocuaca quiquiaari. Nojiaqueyari rasaanuajiaari Judiocuacajanaa. Tamasacaari na cararaatiuquia co miate-josaaquiaari Judiocuacara na quiniuria, Pueyaso tojjiacara nojori quiniu panishacari. ¹¹ Creta jiyajinijinio pueyari tii quiriquiaajuhuj, Arabia jiyajinijinio. Puetunu cuno jiyacajiniajanaari tamaatia rupaaca pocuajaca quiquiaari. Nojoriiri socua naa sequetooriaari:

—¿Taateni? ¡Puetunu pajaniyajanaari cuno Galilea pueya tojtiaani Pueyaso cutara miishano pahuataano, tama pa coteenu rupaajiniajaaja!

¹² Puetunu nojorijianaari jiuujiaateriquiaa nojori jiyajenenuta. Tama nojorijiaarijia nequesoreetooquiaari nojori tacaaniutia:

—¿Casaa na miituyajaanonojoni?

¹³ Tamasaca nojorijinijinoori saaja Jesu pueya macaatiiri. Tama nojorijiaarijia tama sequetooreejaacujua:

—Cuno pojoriqui mashaasequenuya shocuanacuata.

Pedro pohuatasano pueya niquiara

¹⁴ Jiyacaritij, Pedroori juhuacatecara pocuaree cuno pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojitiare casaa cua sequenutaniya niajaniyani. Puetunu Jerusalén tiacajinia quiniaajanaa cuaara niishiiria cua pohuatasano. ¹⁵ Niaari canaa jiyaniya mashaasequenuyano. Pananucua-jaari shusha taqueejia. Maja canaa mashaasequenuunu. ¹⁶ Niaari canaa tojitiaa tamaatia rupaaca pocuaano. Niocuajaari tariucuaaanu Pueyaso sequesano caminiujiunia Joel pohuatasano. Cuno niaa na niquiyani, cunocua-jaari na sequesano, shusha tohuateyani. Nojuajaari na sequequiaaritiaj:

¹⁷ “Pueyasoori na sequeyaquij: ‘Quera jiya puequesacari, janiyari cua Sohuanu niquitionutaniya puetunu pueyarajanaani. Naacuajitij, mashiquioriiri janiyajini pohuatanutaniya, niyacoojorinio. Cua Sohuanuuri cua niishishano niquitiniutianiya mashiquiori juhua na maquenujia. Cua niishishano niishitiojonutaniya saaquiapue na maquenujiniajaarihuaj. ¹⁸ Cuno quishacari, janiyacua cua Sohuanu niquitiore puetunu cua tojitianaajanaani, canuu, maajipohuanio. Nojoriiri janiyajini pohuatanutaniya pueya niquiara. ¹⁹ Puereeta cua miishanoori jiya cajiniocua niquishaanutaniya. Cua miishanoori jiy-acia niquishaanutaniyajuhua, pueya na numootenura. Nanacaari niquishaanutaniya, mani, jiyanohua najacanio. ²⁰ Pananuuri nin-ishiquiria quiniutianiya. Racaari juhua nanacara quiniutianiya-juhua. Naa coteenutaniyari jiya puequenura. Na nuhuaji, Jiyaniijia-janaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutianiyaari, puereetajuhua. Jiyanohua shanohua quiniutianiyaari na rosesacari. ²¹ Puetunu Jiyaniijia secोजना pueyajanaari jiyooshaanutaniya Pueyaso pueya nojori quiniuria’”.

‘Supuetana Joelri naa naajioaquiaari Pueyaso sequesano tarijiatej.

²² Naaratej, socua cua tojitiare cuarta Israel pueyanaa. Jesujini nia pohuatanutaniyanijia, Nazaret tiacajinijinio pueyano. Pueyasocuaajaari pa nishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijioquiaari pa niquiara jiyanohua jiyajeneta casaa na miini-uria. Paacuaajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishinuria Jesuuri seetanujuanaa Pueyaso Jiyarosano quiquiaari. Niajaniyacuaajaari maninia niishiya puetunu maninia na miishanojuanaa. ²³ Saniniuujia, Jesu jaara niquitiosaarucuaa niajaniya, niaari na quiarucuaa juhua sesa miijia. Na nuhuaji, niaari Pueyaso tojiyashijia pueya na moterucuaa maca niyacutesanojinia, taa Pueyaso paniquiaari tarijiaacuajani. Pueyasocuaajaari niishiquiaari naa mosaanutaniyari Jesu. ²⁴ Pueyaso cutaraari na samitianiariohuacuaa macujinijia. Na carterohua macujinijia. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaracaanua. ²⁵ Pueyaso Sohuanu jaara pohuatequiaari pa supuetanaa jiyaniijia David, nojuajaari juhuacarijia naa pohuataquiaari Jesu sequesocoriqianotej:

“Cua shuriucua niquiquiaa Jiyaniijianijia. Nojuajaari cua shuriucua quiya, cua miaquetajara, maja quenaaja casaa teteyatenura janiya. ²⁶ Naaratej, coojaari timirii. Cua niti taquiriocuaterecua shuquiriniutianijia. ²⁷ Naajuhua, cua cusosacari, cua queteeri juhuajaniya quiniutianiya, cua niishishacari quiaari cua tarinitiaaquiniutianiya macunucua quiquiojinia. Quiaari cua shu

moquijiaaquiniutianiya saa maninia miijiaja cua quishacari quia niquiara. ²⁸ Quiaari cua niishitiojoree maninia cua miiniuria, pueyaraaanu quiijara cua quiniuria. Quiaari jiyanoehua cua shuquiritiniutianiya quiaata cua quishacari pueyaraaanu”.

²⁹ Cua pueyanaa, paacuaajaari niishiyani, pa supuetanaa jiyaniijia Davidri jamosaaquiaari na cusosacari. Na jamaari niya quiyajaa Jerusalén tiacajinia. ³⁰ Nojuajaari niishiquiaari Pueyasoori tari na sequequiaaricuaaja:

“Davidnaa, tamonu pueyanoori supuenutianiya quiajanijajiniji, jiyanoehua quia nuhuaji. Cuno pueyanoori jiyaniijara cua jiyatesano quiniutianiya quia niti. Nojuajaari cua jiyarosocoriquiano Cristo. Seetanujanaa naa quiniutianiyari Davidnaa. Maja cua sapojonu”.

‘Pueyanaa, paacuaajaari niishiyani Davidri Pueyaso sequesano caminiujunia quiquiaari. ³¹ Naacuajitij, Davidri Cristojiniji pohuatariquiaa jiyanoehua tariucuaaanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutaniani. Naacuajitij, Davidri Cristo samiitianujiniji pohuatariquiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutianiyari”. ³² Pueyasoori nio Jesu samiitianiriohuacuaa. Na samiitanu nuhuaji, puetunu canaanojaanaari na niquiquianuni. Janiyari nia pohuataa seetanu canaa niquishanojuanaani.

³³ Cutara na cumaacata, Pueyasoori na tacanirioehua na miaquetajara cajiriquiano, jiyaniijajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniuujia quiarjia canaa na niquitioree. Naaratej, niaari canaa niquirii tamaatia rupaaca pocuaano. ³⁴ Majaari David tacanu quiquiaari jiyocuacaanu cutara. Nojuacuajaari Jesujiniji sequequiaari:

“Jiyaniijia Pueyasoori cua jiyaniijia sequequiaari: ³⁵ ‘Cua miaquetajara quia cajishiijiaara, janiya cuaara quia paraa shocotarejaatijia’ ”.

³⁶ Cunora, puetunu nijanijajanaa Israel pueyanaa, niaa cumaati niishiya, Pueyasocuaajaari nio Jesu jiyatecanu jiyaniijajanaa na quiniuria. Niaacuajaari niyacutesanojinia na mocanucuaaja. Nojuajaari Cristo, Pueyaso jiyatesano jiyaniijara. Majaari canaa pohuatasanojiniji nia taacanuunu pueyanaa.

³⁷ Pueya tojishacari naa Pedro pohuatasanootej, nojoriiri tetecatuquiaari. Pueyari saniniuujia Pedro nequesotaquiaari, na cojiniaanio:

—Canaa pueyanaa, ¿taa canaa miiniutianiyarinijia?

³⁸ Pedroori nojori riucuaquiaari:

—Nioojia nia tacatoree sesa nia miiniujiniji. Niajanija cuaara moojinia tiuquinijosaaaria Jesucristoocua nia tiuushacari, nia jiyanooshaanura sesa nia miishanojiniji. Naa nia miishacaritij, Pueyasocua nia niquitioree na Sohuanu. ³⁹ Pueyaso sequesacari nojuaja na Sohuanu niquitionutianiya pueya, cunoori niaaranocuaaja, nia niquiohuaranonio, tucuaaanu quijiacarajuhua. Pueyaso Sohuanucuaajaari puetunu pueyajanaa niquitiosaanutianiya, cana pa jiyaniijia Pueyaso sequeya na muerasura na quiniuriacuajani.

⁴⁰ Pedroori jiyacari pueya pohuataree queraatia socua Jesujiniji na niishishano. Jiyanoehua nojori nacasureeri. Naa nojori sequereeri:

—Nioojia nia tacaatorohua Pueyasocua, maja Jesu ruuretajaca nia cojiritiasaanura quejoonu mani quiquiojinia.

⁴¹ Pedro pohuatasanoocua tiuuniaari tiuquinijosaaquiaari. Cuno juuca, tres mil pueya naasucuaari coteenu Jesu tojtianaa rupuenaa quiquiaari. Pueyaso pueyari naa canequiaaritij. ⁴² Puetunu nojorijianaari maninia

tojitiaquiaari pueyaracaanu Jesu jiyaramiquishano pueya niishitiojosano. Nojoriiri jatiqui quijia maninia. Majaari nojori juayonuujutanu quijia. Nojoriiri pueyaracaanu rerejojua neecaruu serotanura Jesu cusonu niishiniuria. Mariyata Pueyaso secojonuujua pueyaracaanuuri.

Panitiojuaca Jesu tojtianaa quishacari juhua tapueyocucata

⁴³ Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacujitij, puetunu pueyajanaari puereturiquiaa. Pueyari shiriiquitiurii. ⁴⁴ Puetunu Jesuucua tiuuniaajanaari maninia rupuetooquiaari juhua tapueyocucata. Nojoriiri maja jamuejaca quiquiaari. Casamiriaca pueyari na casami niquitiojoquiaari nareja casamijiuniucua pueya. ⁴⁵ Tamasacaari na jiitiasano casami niquitiojoquiaari na cumaneeca na masenura na casami sami. Na cumaneeca na masenu nuhuaji, nojoriiri tamasa niquitioquiaarijuhuj, casamijiuniucua jiitianura puetunu nojori panishanojuanaajuhuj. Tamasaca pueyari na cuhuariquia niquitiojoquiaari nojori jiitianura na cumaneeca, tamasa na naacunurajuhuj. ⁴⁶ Nojoriiri jatiqui rupuetooquiaari. Nojoriiri rerejojua puetunu juucajanaa Pueyaso Secojoua tijinia. Mariyata tama nojori tijiniajaaja nojoriiri rerejojua, neecaruu neecasenura Jiyaniijia Jesu cusonu nojori niishiniuria, mariyata jatiqui nojori miaquenuunura nojori shuquiriniutia. Nojoriiri maninia juujaraca quiquiaari. Nojoriiri maja tamonu pueya shocotanu panijiaa quiquiaari. ⁴⁷ Nojoriiri pueyaracaanu Pueyaso maninihuaqueetariquiaa nojori shuquiriniutia. Puetunu Jesuucua tiuyashijiaa pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiuushacari nocua.

3

Sesarunocua pueyano jeeacasacari

¹ Tamonu juuca, Pedroori Juanta tacatariquiaa Pueyaso Secojoua tijiniara. Tari quiquiaariiri pananu piriuushacari. Nojoriiri jiyacari quiojonu jiitiquiaari Pueyaso secojonura Secojoua tijinia. ² Jiyacaritij, tamonu sesarunocua pueyanoori tii cajitiariquiaa Secojoua tia tohuatayaji. Nojuajaari naa rasanojuhuanaja quiquiaari. Pueyaracaanu patoojotasaaquiaariiri Pueyaso Secojouajiniara, pueya na mashiniquiniuria cumaneeca nojori tiuquitasacari. Na cajitiasaqui tohuateya sesa quiquiaari “Tohuateya Maniniu”. ³ Sesarunocua pueyano jaara niquiquiaari Pedro, Juannio, nojori tiuquitianu panishacari Secojoua tijinia, nojori maseree juucua na cumaneecaari. ⁴ Pedroori Juanta na shootiaree tacuriitia. Jiyacaritij, Pedroori na sequeere:

—Canaa quia niquiri.

⁵ Sesarunocuaari juucua shootiariquiaa nojori. Cumaneeca niquitiosariquiano jiyaniriquiaa juucuaari. ⁶ Pedroori na sequequiaari:

—Shaaqui cua cumaneeca. Shaaqui tojetaarucujanaa. Naajaa, cua jiitiasanota quia naacureera quiarijia. Quia sequeya Jesucristo sesajinianijia: “Quia sanere. Quia rucuanerejuhuj”.

⁷ Pedroori na juaashiquajiniji na quiaquiaari. Na nuuatereeri. Na niohuacaari jiyacari ritia jeequequiaari na sanesacari. Na sairi maniniujaacara quiquijihuj. ⁸ Sesarunocuaari juhuacatecara rucuanequiaari. Nojoritia tiuquiquiaari Pueyaso Secojoua tijiniaari. Maninia rucuaneriquiaari. Jaacuatariquiaari. Pueyaso maninihuaqueetariquiaajarijuhuj.

⁹ Puetunu pueyajanaari na niquiquiaari rucuaneyano, Pueyaso maniniuhuaqueetaanojuhuaj. ¹⁰ Puetunu pueyajanaari na niishiquiaari nojuajaari sesarunocuacuaja, Secojojuua tiajinia tohuateya Maniniujinia cumaneeca mashiniquijiojuatej. Pueyari cunora jiuujiatequiaari. Jiyanhua shiriiquiquiaariiri.

Pedro pahuatasacari Pueyaso rupaa pueya niqiuara

¹¹ Sesarunocuaari Pedro juashiquia carteyaquiquiaari, Juan juashiquiano. Nojoriiri Pueyaso Secojojuajinia nujuaturiquiaa tamocora. Nojori nujuatusaquiiri pueya jiyaniquishano tariucuaacaanu jiyaniijia Salomón canujuucojojuua quiquiaari. Puetunu pueyajanaari nocua netecuatuquiaari na shiriiquiniutia. ¹² Pedro niquishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocuajini? ¿Casaara nia niquitiaa canaani? ¿Niaate jiyaniya canaa na niohuaca jeeareeni? Maja canaa. Majaari canaa cumaacata na jeequenu quirii. Niaa naasucuaari jiyaniya canaari nio miiriini socua maninia miijia canaa quiniuucua Pueyaso niqiuara tamasaca pueyajiniji. ¡Maja! ¹³ ¡Jesucuaajaari na jeecarohua! Nojuacuajaari na Que Pueyaso jiyatesano Jiyaniijajanaa na quiniuria. Jiyaniijajanaara na jiyatenacuajaari Pueyaso, cante nio pojori pa supuetanaa jiyaniijia quiquiaaricuajani: Abraham Jiyaniijia, Isaac Jiyaniijiano, Jacobo Jiyaniijiajuhuaj. Tama pa supuetanaa Jiyaniijia Pueyasocuaajaari Neyanu Jesu jiyatequiaari Jiyaniijajanaa na quiniuria. Niaa cutaraari Pueyaso Nyanu niquitiocanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. ¹⁴ Niaa maara maninia pueyanoocuaaji tacucanu saniya cutara, niaari pueyano puecojuacuua shiriiquitiurii saaja Pilato cartenura jiyano sesoriquia pueyano seque. ¹⁵ Niaari naa motecanu pueyano samiitianiijiacuajatej. Naajaa, Pueyasoori na samiitianiquianuhua macujiniji. Canaari na niquiquianuni. Naacuajitij, canaari nojuajiniji nia pahuataani. ¹⁶ Nio sesarunocua pueyanoori Jesuucua tiurii. Naacuajiti jeequerohuari. Nojuacuajaari sesarunocua quiquiaari taa nia niquiquiaaricuajano. Jesuucua na tiushacari, na cuaqueya cumaquiiri. Na cuaqueyari seetanujuanaa jeequerohua maninia, taa nia niqiyacuajanoj. ¹⁷ Cuarta Israel pueyanaa, quarijia niishyanijia, majaari nia niishiniu quiquianu casaa nia miiquianuni. Majaari pa camarucua niishiniu quiquianujuhuaj. Niaari Pueyaso Jiyarosan mocanu nia niishiyaquishacari cante nojuaja quiquianuni. ¹⁸ Naacuajitij, Pueyasoori na sequesano tohuateecanu, tarijia na niishitishano na rupaa caminiujuninaa. Seetanujuanaa, puetunu Pueyaso sequesano caminiujuninaajanaari pa supuetanaa niqiuara poojotaquiaari: “Pueyaso Jiyarosanoranoori naquiya miishaanutaniya”. Jesuuri naa miishaacanu taritij. ¹⁹ Naaratej, nioojia nia tacatore sesa nia miishanoiniji. Pueyasocua nia tacatorehua sesa nia miiniu tuujusaanura. ²⁰ Naacuajitij, pa Jiyaniijia Pueyasoori na naata juhua maniniushiquiariria jiyatenuhua pajaniyara, shuquiriaatia pa quiniuhuara mijiria na jiyarosacariuhua Jesu. Pueyasoori tarijia na sequequiaari pa Jiyaniijia nia quiniuria. ²¹ Nojuajaari jiyocuaacaanu quiniutianiya na Que shuriucua, Pueyaso cuara tucuatarejatiijia puetunu tariucuaacaanu na pahuatanishanojuanaa na sequenu panishano caminiujuninaa. ²² Moisés cuajaari naa sequequiaari pa supuetanaatej: “Jiyaniijia Pueyasocuaajaari niaacuua jiyaronutaniya nojuajiniji pahuatana tama nia niquiohuacuajinio supuenojuaja, taa na jiyaroquiaari

janiyacuaani. Nojuaja jaara supuere, niocua puetunu na sequesano-juanaa tojiri. ²³ Canapuate cuno pueyano pohuatasano ruuretanu-taniyani, nojoriiri Pueyaso saquiriojosano pueya tajiniji shaajasaanu-taniya puetunurajanaa”.

²⁴ Pueyanaa, puetunu Pueyaso sequesano caminiujiuniaajanaari Moisés nuhuaji naa Jesujiniji pohuatanuuquiaarijuhuaj. Naacuajitij, Samuelri Jesucristojiniji pohuataquiaari taa na niniutianiyan. Naajuhuj, Samuel nuhuaji, puetunu Pueyaso sequesano caminiujiuniaajanaari naa pohu-atanuuquiaarijuhuaj. ²⁵ Puetunu Pueyaso sequesano Jesujinijianaani, canuori quiarjia pajaniyara, taa Pueyaso pohuataquiaari tariucuaaanu na sequenu panishano caminiujiuniaacuajani. Nojoriiri pa supuetanaa quiquiaari. Pajaniyaranojaariuhuj Pueyaso sequesano pa supuetana Abraham. Pueyasoori naa sequequiaari pa supuetana Abraham: “Quia metusanojiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajinijanaacuajani”.

²⁶ Pueyaso jaara na tojjia Niyanu samiitiani-quianu, coteenu na jiyarree pocuaari poojia tacatoriquiano, sesa pa miiniu pa cartenura, shuquiriaatia quijiaara pa quiniuria.

Pedroori naa pohuataquiaari pueya niquiaratej.

4

Judiocuaca camarucua nequesoreesacari Pedro, Juannio

¹ Pedro pohuatasacarijia pueya niquiara, nocua nijioquiaariiri pueyacuara secojonaa, Pueyaso Secojoua tia cojuanaata, Saduceocuacatanio. ² Nojoriiri Pedro tojiquiaari pueya niishitiojiyano. Nojuajaari pueya niishitiojiquiaa macunucuaari saneecuatanutaniuhua na jamacajiniji, naatej taa Jesu samiitiarohuacuaani. Cuno jiyaniijianucua jaara naa tojiquiaari se-queshiyanotej, nocuaji jiyanohua juaaquoquiaariiri, na ruuretasacari Pedro sequesano. ³ Cuno juaaquoiyanoori Pedro quiatuquiaari, Juannio. Jiyacariiri tariucua tenacari quiquiaari. Tariucua niucua nujuatejosaquiaari-iri. Nojoriiri tii juhuaquequiaari nujuatejojuajinia. ⁴ Naajaa, queraatia pueyari Jesuucua tiuquiaari Pedro pohuatasacari Jesujiniji. Quera cinco mil saaja canuuri tari Jesuucua tiunnaa quiquiaari. Maajipohuari sero-josoo quiquiaari.

⁵ Tariqui, Judiocuaca camarucuaari rerejoquiaari camarucua naca-sunaata, Moisés Rootasanojiniji niishitiojonaatanio. Nojoriiri Jerusalén tia-cajinia rerejoquiaari Jesujiniji pohuataanaa nojori nequesoreenura. ⁶ Anásri tii quiriquiaajuhuj. Nojuajaari pueyacuara secojonaa jiyaniijia quiquiaari. Caifásri tii quiriquiaajuhuj, tamonu Juannio, Alejandronio, mariyata puetunu secojonaa jiyaniijia tapueyocuaanio. ⁷ Pedro, Juannio, nojori-iri nujuatejojuajiniji tohuatejosaquiaari. Nujuatejosaaree jiyaniijianucua tajiniaari. Pedro shocua, Juan shocua cajitiunnaari nojori nequesoreeree:

—¿Taa nia miirucuaa noonijia, sesarunocuatej? ¿Cana cumaacata nia jee-carohuacuaanoj? ¿Cante nia sequecanu naa nia miiniuriani?

⁸ Jiyacariitij, Pueyaso Sohanuuri Pedro jiuujia camaquiquiaari Pueyaso niishitiajata na pocuanura. Naacuajitij, Pedroori naa nojori riucuaquiaari:

⁹—Canaa camarucuaanaa, nia pohuatareera sesarunocujiniji, taa na jee-querohuacuaani. ¹⁰ Naa canaa nequesoreetaate, nia tojitiare canaa sequesano, nia niishiniuria cua pohuatasano, puetunu Israel pueyajanaa niishini-uriajuhuaj. ¹¹ Cuno pueyano niya nujuaani, nojuajaari Jesucristo cumaacata jeequerohuacuaa. Naaari Nazaret tiacajinijinio Jesu cusojucuanu niyacute-sanojinia. Pueyaso cutaraari na sanacanhua macujiniji, pueyaracaanu na

quiniuhuara. ¹¹ Niajanियari juhua saitia tiajonaa Pueyasora. Nia tiasacari, niaari maniniujiajau saajia jataquiaari, nia jiyanihacari sesarujajau naa-sucua. Na camaruuri saniniuujia sequeya:

“Cuno nia jatasano saajiani, cunoori saniya cua maniniujiajau saajia”.

Niaari naa Jesu jataquiaari juhua saajia sesarujajau. Naajaa, Pueyasoori na niaquiaariuhua socua maniniushiqui. ¹² Majaari tamonu quiniu pocuaji tacuna. Puetunu pueya tajinijiniojuanaani, maja Pueyaso tamonu pueyano sesa jiyaniquiniu quiquiaari cante pocuaji tacuriquianoni. Saaja Jesu cutaraari sequesaaquiaari pocuaji tacuriquianora.

¹³ Judiocuaca camarucuaari jiyano-hua na namijiaa riunitiquioquiaari nojori niquishacari taa Pedro, Juan seetanujuanaa cumaacata pohanariquiaa nojori niquiarani. Nojoriiri Pedro, Juan niishiquiaari nojoriiri seetanujuanaa maja puera naajionuujuaca quiquiaari. Nareja poonijionuujuaca pueyajinijinio quiquiaariiri. Naa nojori niishishacaritij, nojoriiri seetanujuanaa niishirii nojoriiri Jesu cojiniaa quiquiaari. ¹⁴ Sesarunocua jee-quenohuari cuniqui nojori shuriucua nujuariquiaajaacuhua. Naaratej, jiyaniijianucuaari socua sanaajetaquiaari. Saaja niishiriojonuuriquiaari.

¹⁵ Camarucuaari Pedro, Juan tohuananijioquiaari tamocora nojori tajiniji. Jiyareta camarucuaari tama pocoojoquiaariiaaja. ¹⁶ Naa sequetuquiaariiri:

—¿Taa pa miya socua nio pueyarini? Puetunu Jerusalén tiacajinia quinaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeeCASOO. Nojoricuaajari tari maninia na niishitiuya. ¹⁷ Nio pojori pa piriyojore juhua, maja socua quaijaria nojori pohanunura Jesujiniji pueya niquiara, nojori miishano paaqueyaquiniuria socua niya pa tiacajiniani.

¹⁸ Camarucuaari socua piiquiaariuhua Pedro, Juannio. Nojori nacasuree jiyano-huari, maja socua quenaaja nojori pohanunura Jesujiniji pueya niquiara.

¹⁹ Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojinijuria niajanianiyani? ¿Taa nia sequeyani jiyaniijianucuaanaa? ²⁰ Maja cutaraari canaa naata tarinitianu pohanunura canaa niquishano, canaa tojishanonio.

²¹ Camarucuaari nojori piriyajoquiaari juucuohua. Puetunu pueya-janaari saaja maniniuhuaqueetariquiaa Pueyaso, puetunu maninia na miishanojinijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii. ²² Pedro jeeCASANO-hua sesarunocua pueyanoni, nojuajaari cuarenta marijia shocotejoquiaari tari na quishacari.

Jesu pueya secijosacari Pueyaso, na cumaquiniuria nojori

²³ Pedro, Juan jaara cartesaaquiaari, nojoriiri narta Pueyaso pueyacu quiojoquiaariuhua. Nojori pohanunura Judiocuaca camarucua sequesano nojori, camarucua nacasunaa sequesanojuhuaj. ²⁴ Na tojishacari camarucua piriyojosano, puetunu nojoriijianaari Pueyaso secjonu cotee-quiaari. Naa sequetuquiaariiri:

—Canaa Jiyaniijianaa, quiaari jiya cajiniocua shipiniania, jiyanio. Shoniniacu caminiaari quia shipinishanojuhuaj. Puetunu casaajanaari quia shipinishano. Quiaari jiyano-hua maninia. ²⁵ Canaa supuetanaa jiyaniijia Davidri quia seru quiquiaari. Naacuajitij, quia Sohuanuuri na pohanunura quiaari quia sequesano Jesujiniji juhua tariucua miishano. Quiaari naa na pohanunura quiaariiri:

“¿Casaara jiyacu quiniaa pueya juayani? Pueyari najuhuaana sesa niishiriojoriquiaa juucua. ²⁶ Jiyajinijinio jiyaniijianucuaari na juaaquiaa

sanetaree. Queraatia tiacajinijinio camarucuaari Jiyaniijia Pueya-soocuaa roojotooree, na jiyarosano Cristoocuaranio”.

²⁷ Pueysonaa, naacuaaquinatejaj. Jiyaniijia Herodes, Poncio Pilatonio, nojoriiri nio tiacajinia rerejocanu narta taucacata, Israel pueyatano. Quia Niyanuucuaa roojotoocanuuri, tama quia Jiyarosanoocuarajaaja. ²⁸ Naa nojori miinuucuatej, nio pueyari tari quia miiniu panishano miiriucaa, taa quia sequequiaari tariucuaaanucujani: “Cua Niyanu cuaara mosaaria puetunu pueyacuaraajanaa”. ²⁹ Canaa Pueysonaa, quia tojishuriucuaraj. Nojoriiri quiarijia canaa miananojija saniniuujia. Canaacuaajaari quia seyani. Canaa jiuujia quia cumaquiri quiarijia, canaa pohuatanura socua quia rupaa canaa puereyaquiniutia. ³⁰ Cusosuhua cuaara naatanijiosaaria quia cumaacata. Canaa jiyaniquishacari quia Niyanu sesa, jiyajeneta casaa cuaara mijiosaaria quia cumaacata pueya niqishocoriquiano. Nojuacuaajaari saa maninijaja.

³¹ Nojori puecasacari secojonu, nojori quishaqui tiaari canashiyajuii jiuuquiutiaquiaari. Pueyaso Sohuanuuri puetunu nojori jiuujiajinia tiuquiquiaari, nojori na cumaquiniuhuaa. Naacuajitij, pueyari saaja maninia pohuataquiaari Pueyaso rupaa pueya niqiuara. Majaari na pueretunu quiquiaari.

Jamueyashijica Jesu tojtianaa quishacari

³² Jesuucua tiunianiari maninia juhua rupeutootesano quiquiaari puetunujuanaa. Nojoriiri juhua seetanujuanaa tapueyocuaacataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiiitasano casamiiri saniniuujia puetunu narta Jesuucua tiuniarajanaa quiquiaarijuhuaj. ³³ Jesu saquiriojosano pueyari Jesu samiitanujiniji poojotaquiaari jiyanoohua cumaacata. Naajuhuj, Pueyasoori puetunu Jesuucua tiuniaajanaa naacuriquiaa jiyanoohua, shuquiriaatia nojori quiniuria. ³⁴ Puetunu Pueyaso pueyajanaari na panishano jiiitaquiaari puetunujuanaa. Nojoriijinijinio jaara cuhuariquia jiiitaquiaari, tiano, nojoriiri na niqutioquiaari cumaneecara. ³⁵ Jaara cumaneeca masequiaari na casaa sami, nojoriiri nareja na niqutioquiaari Jesu saquiriojosano pueya. Nojoriiri saniniuujia casamijiu Pueyaso pueya na serotaquiaari, nojori jiiitanura na panishanojuhuaj. ³⁶ Nojoriijinijinio, tamonu pueyanoori quiquiaari. Na sesaari José, Levita pueyano. Jesu jiyaramiquishano pueyari na sesojoquiaari Bernabé. Nioori sequeya “Cumanijiana”. Chipre jiyajinia na raja. ³⁷ Bernabeeri cuhuariquia jiiitaquiaari. Na cuhuariquia niqutioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niqutioquiaari Jesu jiyaramiquishano pueya, casamijiu narta Pueyaso pueya niqutiojosaanura saniniuujia.

5

Ananías, Safira sesa miishanojiniji pohuatasano

¹ Tamonu pueyanoori quiquiaari. Na sesaari Ananías quijia. Necocua sesa quiquiaari Safira. Nojoriiri na cuhuariquia niqutioquiaari cumaneecara-juhuaj. ² Ananíasri na cuhuariquia samijiniji queyataquiaari nera. Na cureeno pataquiaari Jesu saquiriojosano pueyacuaari. Juhua papatasoo niqutioquiaari na sapojonutaari. Necocuaari na miishano niishiquaari-juhuaj. Majaari neyacata na quiniu quiriquiaa Ananías niqutiojacari nareja na cumaneeca. ³ Ananías niqutiojacari na cumaneeca, Pedroori na sequee:

—Ananíasnaa, ¿casaara quia tiuquinirii Sesaaca quioojiajiniani, quia saponura Pueyaso Sohuanu juucuaní? ¡Nojuacuajaari cua niishitiquii nio cumaneecaari maja puetunu quia masanojuanaa quia cuhuariquia samijiniji! ¡Quiaacuajaari tiji queyataree! ⁴ Quia cuhuariquia quia niquitioyaquishacar-ijia cumaneecara, cuno cuhuariquiaari quia casaa quiriquiaa. Na nuhuaji, quiaa jaara quia cuhuariquia niquitioree cumaneecara, quia cuhuariquia samiiri quia casaa quiriquiaajuhuj. ¿Casaara naa sesa quia niishiriojoreerini? Naa sacuaaratia quia miishacaritij, majaari quia saponu quirii parta pueyano. ¡Quiaa cutaraari Pueyaso sapojoree juucua!

⁵ Ananías tojishacari naa Pedro sequesantej, ¡macuuri pojoquee! Puetunu pueyajanaa jaara tojinuuquiaari nocuaji, jyanohua shiriquitiuquiaariiri.

⁶ Mashiquoriiri na jniunioquiaari toquejinia. Na nuhuaji, na patuquiaari na jamonuraari.

⁷ Jiuujianaraca hora nuhuaji, necocuaari juhuajaniya tiuquiquiaari Pedrocuajuhuj. ⁸ Pedroori na nequesotaree:

—Cua sequere, ¿niojuanaate nia cuhuariquia sami quiriucaa?

Na riucaareeri:

—Jaa, niojuanaacuaaquinatejaj.

⁹ Pedroori na sequeree:

—¿Casaara naa nia rojotoorucuaa Pueyaso Sohuanu nia saponurani? Quia niquiri. Cuno mashiquoriiri quia niyaca jamonu nuhuaji shusha tiuquijiohua. Nojoriiri quiarijia quia panutanijajuhuj.

¹⁰ Jiyacaritij, maajiri macu pojoquee Pedro shuriucujuhuj. Mashiquori tiuquijiosacariuhua, nojoriiri Safra niqishuhua pojijanojuhuaj, tariucua macu. Nojoriiri na patuquiaarijuhuaj. Neyaca shuriucua na jamotuquiaariiri. ¹¹ Puetunu Pueyaso pueyajanaa, tamasaca pueyano, nojori jaara tojinuuquiaari puetunu nio miishanojinijianaa, jyanohua pueretuquiaariiri.

Queraatia mijiosacari Pueyaso cumaacata pueya niqiuara

¹² Jesu jiyaramiquishano pueyari jyanohua cutara casaa miijioquiaari Pueyaso cumaacata. Queraatia pueya naatanijioquiaariiri. Puetunu Pueyaso pueyajanaari pueyaracaanu rerejoquiaari pueya jyaniquishano tariucuaacaanu jyanijia Salomón canujuucojojuajinia, Pueyaso Secojua tiajinia. ¹³ Tamasaca pueyari nojori puerequiaari. Majaari nojori rupesaanu quijia. Na pueretujuacaari nojorijiniji sequetujua:

—Cuno pojoriiri maninia pueya.

¹⁴ Queraatia pueyari Jyaniijia Pueyasocua tiuquiaari, canuu, maajipuhano. ¹⁵ Naajuhuj, cusosuhuari patootasaquiaari na maquetucujinia nuujiniara. Pueyari naa niishiriojoquiaari, Pedro jaara cusosuhua shuriuquico tajimia, cusosuhuari naataconutaniuhua Pedro naaqui jaara nojori caco netema. ¹⁶ Queraatia Jerusalén tiaca shocua quiniaa pueyari na cusosuhua patootaquiaarijuhuaj, Jerusalén tiacajiniara. Samaruhua sesosano pueyari jaatucunuusaquiaarijuhuaj. Puetunu pueyajanaari naatanijosaaquiaari.

Pedro, Juan nujuatejosacari nujuatejojuajinia

¹⁷ Naaratej, pueyacuara secojonaa jyaniijia, nata quiniaa narta Sduceocucacano, nojoriiri juaaquioquiaari shocotasano nojori quishacari.

¹⁸ Secojonaa jyaniijiaari na pueya jiyaroquiaari Jesu jiyaramiquishano pueya nojori quioonura. Jaara na quiootuquiaari, nujuatejosaaquiaariiri

Judiocuaca nujuatejojuajinia. ¹⁹ Pueyaso seruuri niucua jiyocuacaanuji nojoriicua rosequiaari. Nujuatejojuu tohuateya riataseeri. Na tohuatejosacari Pedro, Juannio, nojori sequeereeri:

²⁰ —Juhuajanya nia quiaarohua. Pueyaso Secojojuu tiajinia puetunu Jesujiniijianaa nia pohuatere pueya niquiara. Nia pohuaterejuhuaj taa jatanishano pueya nia quiya quiarijiani.

²¹ Nojoriiri Pueyaso seru sequesano tojiquiaari. Nojoriiri tariquicuajii quiojoquiaari Pueyaso Secojojuu tiajinia. Tii niishitiojonuuriquiaa juhuajanya Jesujiniji pueyari. Jiyacari, pueyacuara secojonaa jiyaniijiaari nata qaniiaa saniniuuja quiojoquiaari pueya nequesoreesaqui. Puetunu Israel pueya camarucujanaa rerejotereeri, nojori nequesoreenura Jesu jiyaramiquishano pueya. Puetunu nojorijianaa jaara tari rerejoquiaari, na pueya sequequiaariiri nojori tohuatejonura Jesu jiyaramiquishano pueya nujuatejojuajiniji, nequesoresocoriquiano. ²² Na pueya jaara tiuquiti-aquiaari nujuatejojuajinia, majaari nujuatejosano na riuriatatanu quishii nujuatejojuajinia. Nojoriiri tacaretacuhua na shaacanu nuhuaji. ²³ Naa pohuatanuusuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tiotiu. Canaa riatasacari tohuateya, jshaacoori quiriquiaa!

²⁴ Secojojuu tia cojuanaa camarnu, mariyata pueyacuara secojonaa jiyani-ijianucuaari tama sequetooquiaariijaaja nojori shiriiquiniutia:

—¿Taateerini? ¿Taariquitijia socua na nuhuaji quiniutianiyatej?

²⁵ Jiyacariitij, tamonu pueyanoori camarucuaacua tiuquishii. Naa nojori sequeeseeri:

—iNoo pojori, niaa na nujuatejocanu nujuatejojuajiniatej, nojoriiri juhua-janiya pueya niishitiojonuya Pueyaso Secojojuu tiajinia!

²⁶ Tari nojori niishishacari tee Jesu jiyaramiquishano pueya quiriquiaani, Secojojuu tia camarnuuri na pueyata quiojoquiaari Jesu jiyaramiquishano pueya quioonura. Jaara na quiootquiaari, nojoriiri jacaria na jaatu-cunuuquiaariuhua. Secojojuu tia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniuuriija. Nojoriiri cuno puerequiaari. Nocuaji Jesu jiyaramiquishano pueyari jacaria jaatucunuusaquiaari. Majaari na caponeesaanu quiquiaari. ²⁷ Jaara tiuquitiiasaaquiaariuhua, nojoriiri Israel pueya camarucujanaa tajinia nujuatejosaaquiaari, Sanedrincuaca tajiniatuhua. Pueyacuara secojonaa jiyaniijiaari nojori sequequiaari:

²⁸ —iMajaquiiri nia niishiniu tojinii! Canaacuajaari tari nia tenujucanu ju-cucani maja socua cuno Jesujiniji nia pohuatanura pueya niquiara. ¿Niaate nia numaa shama tojiqianu canaa sequesano? Naa nia niishitiojosacariitij, jpuetunu Jerusalén tiacajinia quiniaajanaari canaacua tiutianutaniya Jesu mosaanu! Canaa sequetunutaniyari: “Cuno pojoriiri Jesu motucanu”.

²⁹ Pedroori narta Jesu saquiriojosano pueyata nojori riucuaquiaari:

—Seetanujanaari, pueya cuara Pueyaso sequesano miiria coteenu, maja narta pueya sequesano. Maja cutaara canaa tarintianunoj. Na nuhuaji cutara, nio jiyajinia jiyaniijianucua sequesano cuara miishaaria.

³⁰ Pueyasoori tariucuaaanu pa supuetanaa jiyaniijia quiquiaarijuhuaj. Cuno Pueyasojuanaacuajaari niyacutesanojinia nia casojuasano samiitian-iquianuhua. ³¹ Pueyasoori na tacaniquianu jiyocuacaanu. Na miaquetajara na cajitiquianuuri jiyaniijijanaa na quiniucua, pocuaji Tacuna na quini-uucuajuhuaj. Naa miiquianuuri Israel pueya tacatonuhua noojia Pueya-soocua, Pueyaso jiyanooniuria pajaniya sesa pa miishanojiniji. ³² Naaratej,

canaari canaa tojishano pahuataani, canaa niquishanonio. Naajuhuj, Pueyaso Sohuanuuri canaa niishitiojoquiaa maninia canaa pahuatanura pueya niquiara. Pueyasocujaari na tojitianaa niqutioquiaa na Sohuanu.

³³ Naa Judiocuaca camarucua tojishacari nojori sequesantej, juaaquioreeri. Nojori pueoonu panirii juucuaari. ³⁴ Jiyacaritij, tamonu pueyanoori narta camarucua tajiniji nujaquiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuaaanu rootasano niishijia quiquiaari cutara. Naajuhuj, nojuajaari jiyanoohua narta Israel pueya tojishano pueyano quiquiaari. Gamalielri Secojoua tia cojuanaa camarnu sequequiaari Jesu jiyaramiquishano pueya na tohuatanijionura rupaquijia. ³⁵ Na nuhuaji, saa camarucua quishacarijia tii nata, nojuajaari naa nojori sequequiaaritij:

—Cuarta Israel pueyanaa, jacaria nia niishiriojore taa nia miiniutianiya nio pueyani. ³⁶ ¿Majateeri nia niishiniu taa Teudas miiquiaari quiari naatajani? Nojuajaari jiyaniijara quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niyaquejoquiaariuhua. Naa puequequiaariiri Teudas miiniu panishano. ³⁷ Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajiniinio tamonu Judasri jiyacari César ruuretaquiaari. Queraatia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijuhuaj. Puetunu na pueyajanaari niyaquejoquiaariuhujuhuj. ³⁸ Naaratej, naa nia sequeyanijia: nia tarinitiare nio canuu. Nojori niishitiojosano jaara tama nojori niishishanojuaja quri, shaajenutaniyari. ³⁹ Saniniujia, nojori miishano jaara seetanujanaa Pueyasojiniji quri, majaari nia naata nojori tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaquetoonuruhua, naa nojori nia miishacaritij.

⁴⁰ Puetunu camarucujanaari Gamaliel sequesano tojiquiaari. Na nuhuaji, Jesu jiyaramiquishano pueyari tiuquinitiasaahua. Camarucuaari nojori mojooree nareja. Nojori tenujufureeri maja Jesujiniji nojori pahuatanura socua pueya niquiara. Naa nojori miishaanu nuhuajitij, Jesu pueyari cartequesaquiaariuhua. ⁴¹ Jesu jiyaramiquishano pueyari camarucua rerejojuajiniji tohuareetaquiaariuhua shuquiriaatia. Nojoriiri timiquioriquiaa cararaatia nojori camarucua miiniucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji. ⁴² Majaari nojori pishiniu quiquiaari nojori pahuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niquiara pahuatariquiaa Jesucristojiniji, puetunu jucajanaa, Pueyaso Secojoua tiajinia, mariyata puetunu Jerusalén tiacajini- aqeyajanaano.

6

Mashiquiopue mianuutenaara saquiriojosacari

¹ Jiyacaritij, Jesuucua tiuninia pueyari socua canequiaari. Puetunu nio pojorijinijiojuanaani, noojiaqueyari Judio rupaa pocuanaa quiquiaari. Naajuhuj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquoiquiaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niqutioyakuquiaa miaquesanonijia?

² Nocuaji, Jesu jiyaramiquishano doce pueyari puetunu Jesuucua tiuninia pueyajanaa rerejoquiaari. Naa nojori sequequiaariiri:

—Maja maninia canaa cartenura Pueyaso rupaa pohuatano, canaa mi-anuutenura mashiquiopue. ³ Cunora canaa tapueyocucanaa, tama ni-ajaniyajinjinio nia saquiriojore siete maninia miijiaca pueya, niishijica, Pueyaso Sohanuraca cutara. Nojori nia seeratare nio poonijosano, maninia nojori mianuutenura pa mashiquiopue. ⁴ Canaa saniniuwija saa Pueyaso secojorenija. Naajuhuj, majaari canaa tarinitianu quiniutianiya Jesujiniji niishitiojono.

⁵ Puetunu pueyajanaari na shuquiriniutia naa riucuaquiaari:

—Taaquiriirinij, naacuaaquinateja maniniajaj.

Jiyacaritij, pueyari Esteban saquiriojoquiaari. Nojuajaari jiyanohua Pueyasocua tiuuja pueyano quiquiaari. Nojuajaari Pueyaso Sohanu cumaacaraca quiquiaarijuhuaj. Nio pojoriiri Estebanta saquiriojosaquiaarijuhuaj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquiya tiacajinjinio. Tii rasaquiaariiri. Nojuajaari tarija Judiocuaca niishitiojosano pueyano quiquiaari, Judio pueyanora na quiniuria.

⁶ Puetunu pueyajanaa jaara cuno siete pueya saquiriojoquiaari, nojori jiyataquiaariiri Jesu jiyaramiquishano doce pueyacu. Jesu saquiriojosano pueyari cuno siete canuu nacaaca niaquiaari na juaashiquiaca. Pueyaso secojoturee nojoriicuaraari Pueyaso Sohanu cumaquiniuria nojori, miaquesano niqutiojonaa nojori quiniuria.

⁷ Jiyacariti Pueyaso rupaari socua tojishano quiquiaari. Jesuucua tiuuniaari socua canequiaarijuhuaj. Queraatia Judiocuacaacuara secojonaa pueyari Jesuucua tiuquiaarijuhuaj.

Jesu ruuretajaca quiasacari Esteban

⁸ Estebanri Pueyaso cumaacaraca quiquiaari jiyanohua. Pueyasoori maninia na jitiaquiaari. Naacujitij, nojuajaari cusosuhua pueya naatanijioquiaari Pueyaso cumaacata. Pueyari niishiquiaari Esteban pohuatasanoori seetanujanaa Pueyasojiniji quiquiaari, nojori niquishacari jiyajeneta na miishano Pueyaso cumaacata. ⁹ Jiyacariti, tamasaca Judiocuacaari Jerusalén tiacajinia quiriqiaa. Nojori maanuari sesojosaquiaari “Quiosanojiniji carteqesano pueya”. Quiquiaarijiaariuhua Cirené tiacajinjinio pueya, Alejandria tiacajinjinio pueya, Cilicia jiyajinjinio pueyajujuhuaj, Asia jiyajinjinio pueyanio. Puetunu nojorijianaari Estebanua rerejoquiaari nata juayonuutanura. ¹⁰ Nojoriiri maja na naata Esteban shocotano quiquiaari nojori niishishanota. Estebanri saniya nojori shocotaquiaarijia. Nojuajaari Pueyaso Sohanu niishitiojosanota saa maninia pohuataquiaarijia nojori niqiaara. ¹¹ Maja socua nojori rejeretasacari Esteban pohuatasano, nojoriiri tamasaca pueya niqutioquiaari cumaneeca, najuhua nojori cuaracashiniuria camarucua niqiaara Estebanucua. Cuno pueya, cumaneeca niqutiojosaquiaari na cuaracashiniuriani, nojoriiri naa sequequiaari Judiocuaca camarucua niqiaratej:

—i Taaquiriirinij, canaacuaajaari cuno pueyano tojiquianu Moisés sesacaanoni, Pueyaso sesacaanojuhuaj!

¹² Naa nojori sequesacaritij, puetunu pueyajanaari juaaquioree, Judiocuaca camarucujuhuj, Moisés Rootasano niishitiojanaano. Puetunu nojorijianaari Estebanua catecanoquiaari. Na quiatureeri. Na nuhuaji, na jaatucutuquiaari pueya nequesoreesacariaari, Israel pueya camarucua nequesoresocoriquiano tii nojuaja. ¹³ Socua pajesacuaariiri tamasaca, Estebanucua tonujuriquiano najuhuanaj, na cuaracashiniutia. Cuno pojoriiri naa sequequiaari camarucua niqiaratej:

—Nio pueyanoori pueyaracaanu sesacaquiaa Pueyaso Secojojua tia. Moisés Rootasano sesacaariquiohuariuhuj. ¹⁴ Canaari socua naa na seque-sano tojiquiaajaaniuhuj: “Nazaret tiacajiniñio Jesuni, nojujaari Pueyaso Secojojua tia niyartanutaniya”. Naajuhuj, tariucuacaanu Moisés niishitio-josano pajaniya pa cartetenuñiayacuñiaari.

¹⁵ Puetunu camarucujanaari na cajitiushaquiji niqutiariquiaa Esteban. Nojoriiri na jiquioco niqiquiaari shacantuca, juhua Pueyaso seru jiquioco.

7

Esteban pohuatasano

¹ Pueyacuara secojona jiyaniijaari Esteban nequesotaquiaari:

—¿Seetanutejanaa taa nio pojori sequereecuajani?

² Nojujaari na riucuaaree:

—Cua panishano pueyanaa, cua camarucuaanaa, cua tojitiare. Pueyasoori jiyanohua maninia. Nojujaari pa supuetana Abrahamcua muetaquiaari Mesopotamia jiyajinia na quishacari, na pacuyaquishacarijia Harán tiacajinia. ³ Pueyasoori jiyacari naa na sequequiaari:

“Quia tiujiaare quia jiya, quia pueyano. Niñquiji quia quiaare, janiya cuara quia sequerejaatijia, niya quia quishi. Quiocua tii jiyojese cutara”.

⁴ Abrahamri Pueyaso sequesano tojiquiaari. Quiaquiaariiri Caldeo pueya jiyajiniji. Harán tiacajinia quishiiri. Tii shaajaquiaari na shipininioori. Na nuhuaji, niyara pacuquiaariiri, paa tii quiyani. ⁵ Jiyacaritij, Pueyasoori juhuanojuaja maja Abraham na niqutionu quiquiaari nio jiya. Naacuajitij, Abrahamri maja quenaaja jiya na jütianu quiquiaari tama na quijiarajaaja. Naajaa, Pueyasoori na sequequiaari:

“Janiya na nuhuaji quia niqutionutaniya nio jiyani. Quiaa jaara shaajeyare, quia niqiuojuara quiniutianiya saniniuurijia”.

Pueyaso jaara naa sequequiaari Abrahamtej, Abrahamri jiyacari juhuanojuaja niqiuojuaju quiquiaari. ⁶ Pueyasoori naa pacutequiaari sequenu Abrahamtej:

“Puetunu quia jinianuucujiniño supueno pueyajanaani, nojoriiri na ni- ishishoo pueya jiyajinia quiniutianiya. Cuno jiya pueyari nojori poonijiotenutaniya jiyanohua. Naa naquiya miishaanutaniyari. Tii nojori quishacari, na shoconujunutaniyari cuatro ciento marijia”.

⁷ Pueyasoori Abraham sequereejuhuj:

“Janiyari saniniujia cuno taucuaa naminiutianiya quiocuajiniño supueno pueyacuani. Janiyari nojori saniutionutaniya saniniunijia nojori poonijiotenuucua quiocuajiniño supueno pueya. Na nuhuaji, nojoriiri tiji quiojonutaniuhua niyara. Nojori tiuquijiosacariuhua, nojoriiri cua secojonuujuaa quiniutianiya niya”.

⁸ Pueyasoori naa Abraham rootaquiaarijuhuaj:

“Niocua nia cararaatiuuquia co miatejore. Cunoori juhua naajiosano nia cuaqueyajinia quiniutianiya, pueyaracaanu nia niishiniuria cua sequesano niajaniya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaquiaari, na queeri neyanu cararaatiuuquia co miatequiaari na camueesacari ocho juuca. Isaacri naa miiquiaari neyanu Jacobojuhuj. Pueyasoori Jacobo sesojoquiaari “Israel”. Jacoboori naa miiquiaari necohujuhuj. Necohuari quiquiaari doce canuu. Cuno doce canuu, Jacobo niqiuojuani, nojoriiri puetunu pa doce Israel pueyapue supuetanaajanaa.

⁹ 'Pa supuetana Jacobo niquiohuajinijinioni, tamonuuri sesojosaaquiaari José. Tapueyocuacaari José juaajiaca quiquiaari jiyanoehua, puera na que panishano José quishacari. Majaari nojori niquituniu paniniu quijia nojuaja. Na queeri socua jiyanoehua José panijia quiquiaari na pueranaajinijia. Tapueyocuacaari cunora casami niquitiojanaa pueya niquitioquiaari cumaneecara tarajanu José. Casami niquitiojanaari José jiyataquiaari Egipto jiyajinia, saniniuuja tii na niquitiosocoriquiano serura. Naajaa, Pueyasoori Joseeta quiriquiaa. ¹⁰ Pueyasoori na naacuquiaari naquiya na miishacari. Pueyasoori na jiyatequiaari niishijiaara. Naaratej, Egipto jiya jiyaniijia Faraónri na maniniucuaquiaari. Na jiyatequiaari puetunu Egipto jiya pueya camarnurajanaa. Na jiyateree na tia camarnurajariuhuj.

¹¹ 'Na nuhuaji, miaajenuuri quiquiaari puetunu Egipto jiyajinijanaa, Canaán jiyajinianio. Pa supuetanaa quishacari Canaán jiyajinia, nojoriiri quera titiacoquiaari na miajajaara. Seetanujanaa shaaqui quiquiaariiri nojori miasano. ¹² Jiyacaritij, Jacoboori caminiujishaaquiaari: "Egipto jiyajinia quiyaquinia trigo". Naaratej, necohua jiyaroreeri trigo masenura. Jiyacari nojori quiojosacarin, cunoori shushajanaa nojori quianu quiquiaari Egipto jiyajinia. Cuno Jacobo niquiohuani, nojoriiri pa supuetanaacuaaja. ¹³ Coteenu nojori masesano jaara puequequiaari, nojoriiri Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocuaca sequequiaari: "Janiya nia tarajanuni". Joseeri Faraónri niishitiquiaari tapueyocuacajuhuj. Naaratej, Faraónri shusha niishitiquiaari tejeno pueyanote José quiquiaarin. ¹⁴ Joseeri tapueyocuaca sequequiaari: "Pa que Jacobo nia riquioo niyara, puetunu necohuatajanaa". Puetunu nojorijianaari quiquiaari setenta y cinco pueya. ¹⁵ Jacoboori naa pacuquiaari Egipto jiyajiniaratej. Na nuhuaji, saaquianoori tii shaajeseequiaari. Necohuari tii puequeequiaarijiuhuj, tariucua saaquiapue. ¹⁶ Na nuhuaji, Egipto jiyajiniji pacusaaquiaariiri nojori nucuhua. Siquem tiacajinia nojosaquiaariiri na supuetana Abraham raaco. Cuno raari cuhuariquiajinia quijia. Abrahamri cuno cuhuariquia masequiaari tariucuaaanu pueyajiini raa na jiiitanura necocua na nijara jaara cusoyare. Cuno cuhuariquia masequiaariiri cumaneecata Hamor niquiohuajiniji, Siquem tiacajinia.

¹⁷ 'Pueyasocuaajaari tariucuaaanu Abraham sequequiaari nojuajaari nio jiya na niquitionutaniya. Quera na niquitionu panishacari, Israel pueyari jiyanoehua canequiaari Egipto jiyajinia. ¹⁸ Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanoehua tarjia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. ¹⁹ Cuno jiyaniijiaari taraatia miiquiaari shusha roosano pa supuetanaa niquiohua. Pa supuetanaa sequequiaariiri shusha roosano cuara quejoosaaria moojinia. Pa supuetanaari taraatia miiquioquiaari naacuatej. ²⁰ Moisésri jiyacari rasaanquiaari. Pueyasoori na maniniucuaquiaari. Na queyari na jiiitiquiaari rupaquijia. Jaara na shoconujuquiaari jiuujianaraca raca, conaajaari carijiniacuma niasaaquiaari. ²¹ Faraónri niyatuuri na paquiaari saniniuuja. Na canashitiquiaari juhua na mueyari. ²² Egipto pueyari Moisés niishitiojoquiaari puetunu nojori niishishanojuanaa. Puetunu Moisés sequesanojuanaari jiyanoehua tojishano quiquiaari cutara. Puetunu na miishanojuanaari maninia quiquiaarijiuhuj.

²³ 'Cuarenta marijia jaara shocojoquiaari Moisés, mashaja na quishacarijia, narta Israel pueyacu rucuanenu paniquiaariiri, nojori na niquiniuria. Judiucacacuaajaari cuno pojori, naa sesojoshiya Israel pueyatani, maja

tamonu. ²⁴ Naacuaajitij, Moisés jaara quiaquiaari narta Israel pueya niquniuucua, saaja Egipto pueyano niquishii narta Israel pueyano majacuyanoori. Moisésri narta Israel pueyanocua namiquiaari. Na juaaniutia moquiaari saniniuujia cuno Egipto pueyanoori. ²⁵ Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. ²⁶ Moisésri socua tariqui quiaquiaari narta Israel pueya niquniuuquiohuaj. Nojuajaari saaja riuriatasee tama nojori piyotanojuaja. Juucua nojori ruparetanu panishiiri. Nojori sequereeri: “¿Niaateeri tamonu, niaa jaara naa miitioyaniquitij? ¿Casaara naa nia nootujutoyani?” ²⁷ Cuno narta pueyano piquiriquiaani, nojuajaari saaja Moisés caporee. Na sequereeri: “¿Cante quia jiyatecanu juhua canaa jiyaniijia quia quiniuriani, naa quia sequenura canatej? ¿Cante quia jiyatecanu canaa nequesoreenarani? ²⁸ ¿Quiaateeri cua monu panyajuhua, naatej taa quia morucuaa cuno Egipto pueyanocuaani?” ²⁹ Moisés tojishacari naa cuno pueyano sequesanotej, ritia mashiquiaari Egipto jiyajiniiri. Madián jiyajinia quishiiri tamonu pueya jiyajinia. Moisés quishacari cuno jiyajinia, ti camiquiaariiri. Caapiqui canuuniyojua mueratejoquiaariiri.

³⁰ Cuniqiu na quishacari, na shocojoquiaariiri cuarenta marijia socua. Tamonu juuca, Moisésri rucuaneriquiaa cariiquia jiyajinia, pueya sesojasano Sinaí tuhuananu shuriucua. Pueyaso seruuri tii nocua muetagiaaari nequeru casaja noshiyanojiniji. ³¹ Moisés niquishacari mani noshiyano, nojuajaari shiriiquiaari. Jaara nocua catecanoquiaari na niquniuria maninia, saaja Jiyaniijia Pueyaso tojiri manijiniji pocuaanoori. ³² Pueyasoori naa na sequequiaaritij: “Janyacuajaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijiajuhuaj, Jacobo Jiyaniijiano”.

Moisés jaara naa tojiquiaaritij, tetecareeri. Majaari mani noshiyano na niquniu paniniu quiquiaari na puerenuta. ³³ Pueyasoori na sequequiaari: “Cuniquijia quia jocojore quia sapatu. Niya, quiaa tii nujuaani, nioori cua quishaqui. ³⁴ Janyacuajaari cua pueya niquniquiaa Egipto jiyajinia quiyanoni. Egipto pueyari nojori miitaa puera. Cua pueyari noonu rejeretacoya. Janyari nojori sariyocuatunu tojiquiaa taraatiani. Nojoriicua roseyareenijia cua mashiquiniuria nojori Egipto pueyajiniji. Cunora, janyari quia jiyaronutaniya Egipto jiyajiniani”.

Pueyasoori naa Moisés sequequiaaritij.

³⁵ Israel pueyari tarijia Moisés juaaquiaaricuaaja. Naa na sequetuquiaariiri: “¿Cante quia jiyatecanu juhua canaa jiyaniijia quia quiniuriani, canaa nequesoreenarajuhua?” Naajaa, Pueyaso cutaraari seetanujuaana na jiyaroquiaariuhua nojori jiyaniijia na quiniuria, Pueyaso seru jaara nocua pocuaquiaari nequeru casaja noshiyanojiniji. Na jiyaroquiaariiri puetunu nojori tohuatanijioriquianojuanaa Egipto jiyajiniji. ³⁶ Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano mijioquiaari Pueyaso cumaacata cuno jiyajinia, mariyata nojori niuutiasacari Naatunacu jyanishano caminiajuhuaj. Naa miiquiaari pueyaraaanu cariiquia jiyajiniajaariuhua. Cuarenta marijaari nojori shocojoquiaari pueyaraaanu nojori rucanejosacari tii. ³⁷ Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niquniaru, taa na jiyaroquiaari janyacuaaani. Tama nia niquniohuacuajiniojuaja supuenutaniyari. Niocua saa nojuaja tojiri cutara”.

³⁸ Nio Moisésri narta Israel pueyata quiquiaari cariiquia jiyajinia. Nojua-jaari Pueyaso seruta pocoojoquiaari Sinaí tuhuananuucua pa supuetanaa jateesacari tuhuananu cari. Moisésri Pueyaso seru rootasano na tojishano niishitiojoquiaariuhua pa supuetanaa. Cuno rootasanoori samitianijia rupaa quiquiaari pajaniyara, maninia pa quiniuria pueyaracaanu.

³⁹ 'Pa supuetanaari saa na ruuretaquiaarijia. Majaari nojori tojinu paniniu quiquiaari Moisés. Egipto jiyajinia tacatenu paniquiaariuhua saa-jaari. ⁴⁰ Naacuajitij, Moisés tarishishacari tuhuananuucua Pueyaso seru na tojishacari, pueyari socua Moisés tarajanu Aarón sequequiaari: "Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseecuaa naasucujuhuanajaj, mariqui tiuquiriohua. Nojuajaari najuhua na mashiquiquianu Egipto jiyajiniji". ⁴¹ Naacuajitij, nojoriiri na pueyasora shipiniquiaari juhua seru juunu niyanujua niquishano. Nojoriiri na seya puecooquiaari na shuquiriniutia na juaashiquiata na shipinitiushano pueyasoochuara. Nojoriiri jiyacari sacuaraatia timiquioriquiaa. ⁴² Pueyasoori socua nojoriicuaji pishiquiaari. Nojori tarinitiaquiaariiri jiya cajiniocua nunucojuua nojori jiyatenura tama nojori pueyasohuarajaaja. Seetanujuaana naa naajiotasano quiyajaariuhua tariuacuacaanu Pueyaso sequesano caminiujiuniaa naajioneejinia. Naa sequeyari:

"Israel pueyanaa, ¿canaacuara nia puecooquiaari pueyaracaanu nia seyani cariiquia jiyajinia nia camarucuneetasacari cuarenta marijia cuara nia shocoojoquiaarijiaatijia? ¿Cucuaratee? ¡Maja! ¿Canaacuara nia catijiaquiaari nia seyani? ¿Cucuaratee? ¡Maja! Niaari puetunu cuno miiquiaarijianaa tama nia jiyatesano pueyasohuacuarajaaja. ⁴³ Niaari Moloc suhuorotu pataquiaari, shoquejiniji suhuorotu, nia pueyasora nia jiyatesanoni. Cunocujaari nia sequesano, 'canaa pueyaso'. Niaari Refam pataquiaarijuhuaj, juhua rijia niquishano shipinishano. Niaari puetunu nio shipinijioquiaarijianaa nia pueyasohuara, nojori cariquimijia nia mojoquetaconura, nia shuquiritasacari nojori. Nocuaji, janiyari nia jiyaronutaniya tucuacaanuni, Babilonia jiya tamajiria".

Pueyasocujaari naa sequequiaari pa supuetanaatej nojori miiniucua sesa.

⁴⁴ Estebanri socua pohuataquiaari naatej:

—Pa supuetanaari Pueyaso secoojuua suhuorotu jiitiaquiaarijuhuaj, cariiquia jiyajinia nojori quishacari. Nojoriiri tii racataquiaari Pueyaso niqitiosano saajianeeca. Nocua naajiotasano quiquiaariiri Pueyaso rootasano na pueyara. Pueyasoori cuno suhuorotujiniji pocuaquiaari na pueyacu. Cuno suhuorotuuri shipinishaaciaari taa Moisés niqitishaaciaariicua-jani Sinaí tuhuananuucua na quishacari. Pueyasoori jiyacari naa sequequiaari Moisés: "Quia shipiniri taamueca cua niqitiquianu quia-janiyacujani". ⁴⁵ Na nuhuaji, pa supuetanaa, canapuee naatujoori quiriquiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinia paa tii quiyani. Nojori miaquetoojosacari taucuaaca, nojoriiri Pueyaso secoojuua suhuorotu patariquiaa. Pueyasoori cuno taucuaaca jataquiaari nio jiyajiniji, saniniuujiya pa supuetanaa jiya na quiniuria. Cuno suhuorotuuri pa supuetanaata quiquiaarijia, David jaara jiyaniijia quiquiaari. ⁴⁶ Jacoboori pa supuetanaa jiyaniijia David supuetana quiquiaarijuhuaj. Davidri Pueyaso tojijia quiquiaarijuhuaj. Pueyasoori na shuquiritiaquiaari. Naaratej, Davidri Pueyaso Secoojuua tiara tianu paniquiaari juucua. ⁴⁷ David niyanu Salomón

cutaraari Pueyasora tiaquiaari. ⁴⁸ Naajaa, jiyocuacaanu Quijiaari maja na quiniu pueyano tiasanojiniaaco. Tariucuacaanu Pueyaso sequesano caminiujiuniaari naa naajiotaquiaari Pueyaso sequesano nojuaja:

⁴⁹ “Jiyocuacaanuuri cua quiqiuo. Jiyari saniniuuja cua niohuaca cua niaja. ¿Taamueca tia nia tianutaniya quiriajaarani?” Jiyaniijaari naa sequeyaquij. ‘¿Taa nia sequeyani: na muuecujuara pa miiri, shuquiriaatia na quijiara? Maja. ⁵⁰ ¿Majateeri puetunu nio jiyajinia niquishanojuanaa cua juashiquiata cua miishanocujaja, jiyocuacaanujuhuj?’”

⁵¹ Estebanri socua nojori sequequiaari:

—¡Niaari tojitiaashijianucua! ¡Niaari Pueyaso sequesano ruuretaquiaa juhua nia supuetanaa! Nioojaari maja juhua Pueyaso pueya jiuujia. Nia numaacaari maja Pueyaso rupaa na tojiniu paniniu. Niaari pueyaracaanu tojiaquia Pueyaso Sohuanu niishitiojosano. Niaari Pueyaso tojiyashijianucua juhua nia supuetanaajuhuj. ⁵² Nia niishiritioj, ¿nia supuetanaate que-naa niquiriyatujua Pueyaso sequesano caminiujiuniaa miitiaaquiquiaari? Nia supuetanaari puetunu Pueyaso sequesano caminiujiuniaajanaa miqiuoquiaari naquiya. ¿Quenaaja niquiriyatu nojorijininiote miitiasoo cureequiaari? Maja. Nojoriiri tari puecooquiaari noo pueya, canapueete maninia miijia niriqianojiniji pohuatanuquiaaricujajani. Cuno maninia miijia jaara tiuquiquiaari, niaari sesa miijia pueya na niqutiocanu nojori mosocoriquiano. ¡Niaari naa mocanu Pueyaso Jiyarosantej! ¡Niaari pueyaracaanu Pueyaso ruuretaquiaa! ⁵³ Naacuajitij jiyocuacaanuji Pueyaso seya pohuatasano Pueyaso rootasano niaarani, majaari cuno nia tojiniu quiquiaajuhuj.

Jesu ruuretajaca mosacari Esteban

⁵⁴ Pueya jaara naa tojitiuquiaari Esteban sequesantej, nojoriiri jiyanohua juaaquioree. Na juaaniutia miaquenuuree na quiaaari.

⁵⁵ Jiyanohua Pueyaso Sohuanu cumaquishacari Esteban jiuujia, nojuajaari jiyocuacaanu mauquiaari. Saaja Pueyaso shacantuca niquiriiri. Jesu niquiriijaariuhua na Que Pueyaso miaquetajara nujuano. ⁵⁶ Naa na niqishacaritij, nojori sequeree juucuaari:

—¡Nia niqishuriniaja! Jiyocuacaanu niquiya riatenonijia. ¡Pueyaso Niyanu niquiyanijia na Que miaquetajara nujuano!

⁵⁷ Pueyari na numaaca mishiquiojonuuquiaari saaja, maja na tojitiuniria Esteban sequesano. Jiyanohua sariyocuatiquiaari na juaaniuti-aari. Na nuhuaji, Estebancua cocuatequiaari. ⁵⁸ Na caponeetuquiaari Jerusalén tiacajiniiri. Tiacajiniji tohuatesaaree tamamaari. Na tohuatesaanu nuhuaji, tii na jacutuquiaari saitiaari. Na jacuturiquianoori na toqueya cojuatequiaari tamonu mashaja. Nojori toqueya cojuana sesa quiquiaari Saulo. ⁵⁹ Nojori jacutusacari saitia Esteban, Estebanri Pueyaso secoriquiaa naatej:

—Jiyaniijianaa, cua sohuanu quia riri quia shuriucuaa.

⁶⁰ Na nuhuaji, mojuquetareeri. Jiyanohua nacaquiaari na nuhuajiriaari:

—¡Jiyaniijianaa, majaari nio pojori saniitionu naa nojori miiniucua janiyatej!

Naa na sequenu nuhuajitij, cusoqueeri.

8

Saulo miishacari naquiya Jesuucua tiuuniaa

¹⁻² Pueyaso panijiaa pueyari Esteban quete patuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia

quiniaa Judiocuacaari juhuacatecara miitianu coteequaari puetunu Jesuucua tiuuniaajanaa. Nocuaji, puetunu nojorijianaari tiji mashiqluaari. Saaja Jesu saquiriojosano doce pueyari tii cureequaari nojori nuhuaji. Nojoriiri na mashishacari nyaquejoqiaari puetunu Judea jiyajiniajanaa, Samaria jiyajinariano. ³ Jiyacari Sauloori socua jiyacateriquiaa miitianu Pueyaso pueya. Nojori pajeqluaari puetunu tiacajiniaqueyajanaari Jerusalén tiacajinia. Na riuriatasacari, na jayoqluaari tiacojiiri, na nujuatejosocoriquiano nujuatejojuajinia, maajipohua, canuunio.

Jesujiniji pohuatasacari Samaria jiyajinia

⁴ Mashiyocuatuno pueyari puetunu na quiasacojuanaa Jesujiniji pohuatanuquuaari pueya niqluara. ⁵ Nojorijinijinio quiquaarijuhuaj Felipe. Nojuajaari mashiqluaarijuhuaj tamonu tiacajinia Samaria jiyajinia. Cuno tiacajinia juhuacatecara pohuataqluaari Jesucristojinijiaarijuhuaj. ⁶ Puetunu pueyajanaari Felipe pohuatasano tojinuucua rerejoqluaari. Pueyari sanaa na tojtiaqluaari. Nojoriiri Felipe shootiaqluaari tacuriitia, na miishacari jiyajeneta casaa Pueyaso cumaacata. ⁷ Samaruhua tohuatanijoriqluaa pueyajinijiri. Samaruhua tohuareetasacari pueyajiniji, sariyocumaqluaari. Queraatia cumatacuruhuaa cusosuhuari naatanijosaaqluaarijuhuaj, sesacujuanucuanio. ⁸ Naaratej, puetunu cuno tiacajinia quiniaa pueyajanaari jiyanohua shuquiriquiaari.

⁹ Shimiacuuri cuno tiacajinia quijiajuhuaj. Na sesa quiquaari Simón. Cuno tiacajinia quiniaa pueyari na pueretujua. Puetunu pueyajanaa sapojojuuari jiyajeneta na miijiosanota. Naa sequeja tama na cuaqueyajaarijia: “Janiya cutaraari tojishano pueyanoni”. ¹⁰ Puetunu pueyajanaari na tojijia quiquaari, camarucua, muerasunio. Nojoriiri sequetuqluaari: “Nio pueyanoqui jiyanohua Pueyaso cumaaca jiiitia”.

¹¹ Puereeta Simón miishacari pueyaracaanu, pueyari sapojosaaqluaari. Naaratej, pueyari na sequesanoocua tiuquuaari. ¹² Na nuhuaji, nojori jaara tojiqluaari Felipe pohuatasacari Pueyaso rupaa, Jesucristojinijijiuhuaj, cuno Samaria pueyari Jesuucua tiuquuaari cutara. Canuu, maajipohuajjuhuaj, nojoriiri tiuquinijosaaqluaari moojinia. ¹³ Simónri Jesuucua tiuquuaarijuhuaj. Tiuquinishaaqluaarijaarijuhuaj. Na tiuquinishaanu nuhuaji Felipecua sacuaqluaariiri. Felipe shootiaqluaari tacuriitiaari Felipe miijiosacari jiyajeneta casaa Pueyaso cumaacata.

¹⁴ Jerusalén tiacajinia Jesu saquiriojosano pueya jaara tojiqluaari taa Samaria pueya tiurii Pueyasocuan, nojoriiri cuniquiji jiyarotuqluaari Pedro, Juannio. ¹⁵ Nojori tiuquishacari Samaria jiyajinia, cuniqui quiniaa Pueyaso pueyacuara secojotureeri nojori jiuujajinia Pueyaso tiuquitinuria na Sohuanujuhuaj. ¹⁶ Majaari Pueyaso Sohuanu tiuquinu quiquaari juhuanojuaja nojori jiuujajinia. Nojoriiri nareja moojinia tiuquinijosano quiquaari Jesuucua nojori tiushacari. ¹⁷ Pedro, Juan, cunora na juaashiquia niojoqluaari pueyacu, nojoriicuara na secojotusacari Pueyaso. Naa nojori miishacariitij, Pueyaso Sohuanuuri cuno pueya jiuujajinia tiuquiquaari cutara.

¹⁸ Simónri niquiriquiaa taa Pueyaso Sohuanu tiuquiquaari pueya jiuujajinia Jesu saquiriojosano pueya niasacari na juaashiquia nojoricuani. Naaratej nojuajaari Jesu saquiriojosano pueya niqutionu paniquaari cumaneeca juucua, cuno cumaaca na jitianurajuhuaj. ¹⁹ Simónri naa sequeqluaari nojori:

—Cua niqitiotureja cuno cumaaca. Janiyacu Pueyaso Sohuanu panijacaacua niare cua juaashiquianijia, Pueyaso Sohuanu nojori masenurajuhuaj, taa nia miyacuani.

²⁰ Pedroori na sequequiaari saaja:

—¡Quia cumaneeca cuaara shaajeera quiatajuhuaj! Quiaa naasucuaari jiyaniya Pueyaso Sohuanu cumaneecata masesano. Quia niishiri, Pueyasoori na Sohuanu niquitioquiaa nareja na tojitiyajaa pueya. ²¹ ¡Pueyaso Sohuanu cumaacaari maja quiarano! Quioojiari jiyanohua sesa quiya Pueyaso niquiara, nocuaji maja na cumaaca niquitiosaanu quiniutianiya quiajaniya. ²² Jiyanohua sesa quia niishiriojosanojiniji quia pishiriohua. Pueyaso quia secojore na jiyanooniuria quiajaniya naa quia niishiriojosanojiniji quioojiajiniatej. ²³ Niishiyacuajaniija, quiaari juhua cartesoo quiyajaa, sesa miiniucuaa jiiitnio quia quishacariija. Quioojiari puera najiquitishano quiyajaa jiyanyoshijia quia quiniucuaajuhuaaj.

²⁴ Simónri na riucuaquiaari:

—¡Pueyaso nia secojorequi cucuara, mariqui cua saniitioreeri taa nia sequeyacuajani!

²⁵ Na nuhuaji, Pedroori Juanta socua pohuataquiaari Jiyaniija Pueyaso rupaa cuno pueya niquiara. Pueya niquiara pohuatatureeri socua Samaria jiya tiacajinia, cuniqui quiniaa tiuuniuria Jesuucuaajuhuaaj. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaariuhua Juanta Jerusalén tiacajiniohua.

Jesujiniji Felipe pohuatasacari Etiópe pueyano

²⁶ Cuno nuhuaji, Pueyaso seruuri Felipeecua rosequiaari. Na sequeeseeri:

—Quia sanere Felipeana. Pananu shuucujiria nucuama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniana. Cuno nuuri cariiquia jiyacuma neteya.

²⁷ Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia naacuneetooquiaari saaja Etiopia jiyajiniinino pueyanoaari. Cuno pueyanoori riyacajajaaju quiquiaari Etiopia jiya jiyaniija naacutana na quiniucua, maaji na jiyaniija quiniucua. Na jiyaniija sesa quiquiaari Candace. Cuno maajiiri cuno pueyano jiyatequiaari Etiopia jiya casami jiiitanara, na cumaneeca cojuariquiano nera. Nio Etiópe pueyanoori Jerusalén tiacajinia quiaquiaari Pueyaso secojonuucua. Cuniquiji tacateyanoori Felipeta naacuneetooquiaari nuujinia. ²⁸ Nucucoci na tacatesacariuhua na jiyajiniohuara, caballoori na jaatiariquiohua, rucanejotajarujinia cajiyano. Pueyaso rupaa serojoriquiohuari, tariucuaaano Pueyaso sequesano caminiujunia Isaías naajioneejiniji. ²⁹ Pueyaso Sohuanuuri jiyacari Felipe sequequiaari:

—¡Ritia nocua quia catecanore! Quiocua nata quiaare.

³⁰ Jaara nocua catecanoquiaari, Felipeeri Etiópe pueyano tojiquiaari Isaías naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

³¹ Etiópe pueyanoori na riucuaquiaari:

—¿Janiyatucua taa niishirinio, tamonu jaara cua serojosano niishitioy-aquiri janiyani?

Felipe sequeereeri:

—Miji quia tacama. Cua shuriucua quia cajishii.

³² Etiópe pueyanoori nio serojoriquiaa tariucuaaano Pueyaso Rupaajinia: “Juhua borrego jaatucusaquiaariiri mosocoriquiano. Naatej, taa borregocuaani sanaa niquiyari na cajaca miatejosacari, nojuajaari naa quiquiaarijuhuaj. Majaari na sariyocuanu quiquiaari quenaaja naquiya na miishacari. ³³ Naquiya miishaquiaari cararaatiaari.

Nocua namiyaquishaaquiaariiri. Mashaja na quishacarijia, nojuajaari shaajasaquiaari nio jiyajiniji. Cunora, majaari na muetunu quiquiaari. Niquiohuajuuri mosaaquiaari”.

Etiope pueyanoori nio serojoriquiaa Pueyaso rupaajiniji.

³⁴ Na nuhuaji, Etiope pueyanoori Felipe nequesotaree:

—Cua sequere pueyanonaa, ¿canajiniji Isaias pohuataa niya na naajiosanojiniani? ¿Tama nojuajiniji pahuataatee? ¿Tamonujiniji soj?

³⁵ Felipeeri Etiope pueyano niishitiojonu coteequiaari Jesujiniji shusha na serojosano Isaias naajiosanojiniji. Felipeeri naa na sequeree:

—Isaias naajiosacari nio, nojuajaari juhuacarjia Jesujiniji pahuataquiaari, taa quiarjia Jesu miishaacanu taraatiacuajani.

Felipeeri socua na pahuataquiaari Jesu miishanojiniji. ³⁶ Nojori quiasacari nucuaco, caminiaco shuriuquico tajitariquiaari. Etiope pueyano jaara caminiaco niquiquiaari, Felipe sequereeri:

—¿Majate maninia cua tiuquinishaanura niya?

³⁷ Felipeeri na sequeree:

—Quiaa jaara seetanujuanaa tiuuri Jesuucua, quia naata tiuquinishaanu. Cuno pueyanoori na riuucuaaree:

—Jaa, janiya Jesucristoocua tiuyani. Nojuacuaajaari Pueyaso Niyanu. Na niishiyanjia.

³⁸ Etiope pueyanoori jiyamitia na seru sequeree:

—Quia nujuaretare rucuanajotaja.

Felipeta rosetamaa caminiacojiniaari. Felipeeri tii na tiuquiniquiaari Jesuucua na tiuushacari. ³⁹ Nojori tacatasacariuhua caminiacojiniji, Pueyaso Sohuanuuri Felipe riquiaari canashyaquiji cuno Etiope pueyano shuriucujaji. Nojuajaari juucua tacareecuquiaari na tiuquininiaacua. Majaari socua na niqiniu quiquiaari Felipe. Tariucua tiuquinishanoori shuquiriaatia quiaquiaariuhua na jiyajiniohua. ⁴⁰ Pueyaso Sohuanuuri Felipe jataquiaari Azoto tiacajinia. Nojuajaari cuniquiji puetunu tiacajinia poojotaquiaariuhujanaa Pueyaso rupaa Jesujiniji. Naa tiuquishuhua Cesareya tiacajiniaari.

9

Saulo jatasacari Jesu tojiniaara na quiniuria

¹ Sauloori jiyacari pueyaracaanu Jesuucua tiuuniaa miananajoriquiase. Nojori puecoonu paniquiaari puetunujuanaari. Naaratej, Sauloori pueyacura secojonaa jiyaniijiaacua quiaquiaari. ² Naa na sequeeseeri:

—Damasco tiacajinia quianu panianijia. Quiria quia naajiore cuniqui secojojua tiaca camarucuaacura Damasco tiacajiniani, cuno naajioneeta cua tiuquijionura nojori rerejojuacajinia. Jesu tojiniaa pueya morojonu pania cuniquijinjia. Janiyari cua quioosano jaatucunutaniya niyara Jerusalén tiajinianani, canuu, maajipohuanio.

³ Naacuajitij, nucuaco Saulo quiasacari, tari quenaacoturiquiaa Damasco tiacajiniaraari. Jiyacaritij, ishacantuucuaari canashyaquiji nunuquiaari jiyocuaaanuji! ⁴ Sauloori juhua jatasaaquiaari na cari. Na pojosaquiji tojiquiaari rupaa na sequeyanoori:

—¡Saulonaa, Saulonaa, cua tojiri! ¿Casaara quia miitiaa puera janiyani?

⁵ Sauloori na riuucuaaree:

—¿Cantequia Jiyaniijianaa?

Jiyocuaaanuji nocua pocuaanoori na riuucuaquiaari:

—Janiya Jesuni. Quiaari puera cua miitiaajanaajataj, cucua tiuuniaa quia miitiasacari puera. Naa quia miishacari puera quia juaaniutiotej, quiaari tama quia cuaqueya sesoyajaacujua. Quiaari juhua juaajia pueyano. Quiaari quia juaaniutiá juhua jiohuaca patiyashijiya.

⁶ Sauloori na puerenuta na tetecasacari na sequequiaari:

—Jiyaniijianaa, ¿casaa quia paniya cua miiniuriani?

Jiyaniijiaari na sequeeree:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniuria.

⁷ Saulota quiojonaari shiriituuquiaari nojori jaara tojitiuquiaari jiy-
ocuacaanuji pocuanu. Nojoriiri juucua na niqiniu paniquiaari. Saaja
shaaquiiri quiriquiaa. ⁸ Na nuhuaji, Sauloori na pojosaquiiji sanerohua
juucua. Majaari na naata niqiniu quiquiaari saaja. Nata quiniaari na
jaatucutaquiaari Damasco tiacajiniara. ⁹ Nojuajaari tii camueenujuquiaari
jiuujianaraca juuca, cariyujuaru na quishacari. Majaari na miaquenu
quiquiaari pueyaracaanu cariyujuaru na quishacari. Ratuyaquiquiaariji-
aariuhuj.

¹⁰ Tamonu Jesuucua tiuunia pueyanoori Damasco tiacajinia quijia. Na
sesa quiquiaari Ananías. Jiyaniijia Jesuuri na sequequiaari juhua na maque-
nuginia:

—¡Ananíasnaa!

Nojuajaari na riucuaquiaari:

—¿Casaate cua Jiyaniijianaa?

¹¹ Jiyaniijiaari na sequeeree:

—Quiaritia quia quiaare Saulo pajenuucua. Nojuajaari noo Saulo, Tarso
tiacajinjinio pueyanotej. Nojuajaari Judas tiajinia quiya. Judas tiaari jati
tamonu nuujinia quiya. Cuno nuu sesa, Nuu Maniniu. Sauloori cuno
tiajinia secojiya Pueyaso. ¹² Nojuajaari juhua na maquenuginia tari niquirii
quiajaniya nocua tiuquiyano. Tari quia sesa niishiyajaariuhuj. Sauloori
tari quia niquirii na maquenuginia. Quiaari quia juaashiquia niariquiaa
nocua, na namijia jeequenuhuara, maninia na niqiniuhuara.

¹³ Ananías jaara naa tojiquiaari Jiyaniijia sequeyanotej, nojuajaari se-
queree:

—¡Cua Jiyaniijianaa, queraatia pueyari cuno pueyanojiniji cua pohuata-
canuni! ¡Quiocua tiuuniaa pueya miitiaquiaa taraatia Jerusalén tiacajiniaari!

¹⁴ Pueyacuara secojonaa jiyaniijia jiyarosanonaari cunohuj, quiaritia niya
tiuquiriini. ¡Nojuajanaari quia secojonaa pueya quioonutaniya, morojonu-
cuaca canaa na jiyatasocoriquiano Jerusalén tiacajiniara!

¹⁵ Jiyaniijiaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojoquiaari
tarijia cua jiyaramiquishocoriquianoni. Nojuajaari tamasaca jiyacajinia
poojotanutaniya janiyajiniji taucuaca niquiara. Taucuaca jiyaniijianucua
poojotanutaniya janiyajinijijaariuhuj, Israel pueyano. ¹⁶ Janiyacuajaari
Saulo niishitiojonutaniyani taa jiyanohua naquiya pueya miitianutaniya
nojuajani, janiyajiniji na pohuatasacari.

¹⁷ Naaratej, Ananíasri quiaquiaari. Judas tiajinia tiuquishiiri, tee Saulo
quiriquiaacuajani. Na tiuquishacari, Sauloocua niasee na juaashiquiaari.
Na sequeereeri:

—Cua tarajanunaa, pa Jiyaniijia Jesu, quiocua muetarucuaa nio tiaca
nucumaji niyara quia nishacarini, nojuajaari quiocua cua jiyaroreeni.
Cua jiyaroreeni quia namijia jeequenuhuara maninia, Pueyaso Sohuanu
tiuquiniuria quioojajiniajuhuaj.

¹⁸ Jiyacari ritia totequiaariiri juhua sapitiaaja cocua Saulo namijiajini. Maninia niquiquiaariuhua na nuhuajiiri. Na nuhuaji, Sauloori ritia tiuquin-ishaquiaari moojinia Jesuucua na tiuushacari. ¹⁹ Na nuhuaji, miaquereeri, raturohuajaariuhua. Noojia jatarohuari. Pasaja camueenujuquiaari Damasco tiacajiniaari Jesuucua tiuuniaa pueyata.

Jesujiniji Saulo pohuatasacari Damasco tiacajinia

²⁰ Sauloori juhuacatecara cotequiaari Jesujiniji pohuatanu narta Judiocuaca secojojuaca tiajinia Damasco tiacajinia. Nojuajaari pueya niquiara na pohuatasacari sequeja:

—Jesuuri seetanujuanaa Pueyaso Niyanu!

²¹ Naa nojori tojishacari Saulo pocuaanotej, pueyari shiriiquiquiaari. Na shiriiquitiuniutia sequetureeri:

—Nio pueyano pocuaani, ¿majate nootej, naquiya miiquiaa Jesuucua tiuuniaa pueya Jerusalén tiacajinatej? Niyara niyareejaariuhua, Jesuucua tiuuniaa pueya na morojonura. Nojuajaari nojori jiyatanu paniriquiaa juucua Jerusalén tiacajinia secojonaa jiyaniijianucua na niquitiojosocoriquiano, nojori nujuatejosaanura.

²² Sauloori socua noojia cumaquiquiaari Pueyaso Sohuanuta, jiyanhua maninia na pohuatanura puetunu juucajanaa. Nocuaji pataquiaari saaja Damasco tiacajinia quiniaa narta Judiocuacaari. Sauloori maninia pohuataquiaari tariucuacaanu Pueyaso Rupaajiniji, seetanujuanaa maatia pueya niishiniuria Jesuuri Pueyaso Jiyarosano pocuaji tacuriquiano.

Saulo mashishacari narta Judiocuacaacuaji

²³ Quiniqui Saulo camueenujusacarijia pueyaracaanu, narta Judiocuacaari nocuara roojotooquiaari na motunura juucua. ²⁴ Tamonuuri Sauloocua jiyanooquiaari. Naa na sequequiaariiri:

—¡Quiaa monu panishiya sacaj!

Judiocuacaari na sashiriquiaa tiaca tohuateyaji, na monu paniniutia juucua Saulo. Na shanacuturiquiaari juuca, niucuanio. ²⁵ Damasco tiacaari puereetuca sohuacaraca quiquiaari puetunu na shocujanaa. Jesuucua tiuuniaa pueyari saaja Saulo mashiquiquiaari niucua. Sohuacajiniji roshinitiasaquiaari jiyocuacaanuji puereetuca canaasatujiniaari. Sauloori naa mashiquiaaritij.

Saulo quishacariuhua Jerusalén tiacajinia

²⁶ Na tiuquishacariuhua Jerusalén tiacajinia, Sauloori Jesuucua tiuuniaa pueya rupuenu paniquiaari juucua. Nojoriiri saaja na puerequiaari. Na puerenuta sequetuquiaariiri:

—Pueyasooocua tiuujiaquinio naasucua jiyanotej.

²⁷ Bernabé cutaraari maja na puerenu quiquiaari Saulo. Nojuajaari Jesu saquiriojosano pueyacia na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa jiyaniijia niquiquianu Damasco tiacaacua neteja nucumaji. Jiyaniijiaari nata pocoojocanu. Sauloori cunora juhuajaniya pohuataquiaa Jesujiniji Damasco tiacajinia.

²⁸ Sauloori narta Jesuucua tiuuniaa pueyata jiyojequiaari cuniquijia Jerusalén tiacajinia. Nojoritia rucuanajojuuari, mariyata Jesujiniji pohuataja juhuajaniyari. ²⁹ Saulo pocuasacari, nojuajaari seetanujuanaa cumacata pocuaciaari jiyaniijia Jesuucua na tiuushacari. Griego rupaa

pocuaanaa Judiocuacata pocoojoquiaariiri. Noojiaqueyari Saulota juayonu-utaquiaari saaja. Nojoriiri socua na motunu paniquiaari. ³⁰ Jesuucua tiuunaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniqiji jiyarosaquiaari na raja Tarso tiacajiniaari.

³¹ Na nuhuaji, puetunu Judea jiyajinia Jesuucua tiuunaa pueyanaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquiya na miishaanu quijia. Nojoriiri socua Jiyaniijia tojtiajacara quiquiaari nojori pueretusacari nojori mariqui na tojiyashijara quiriohuari. Pueyaso Sohanu naacusacari nojori, Pueyaso pueyari socua canequiaari pueyaatiara.

Pedro naatanishacari Eneas

³² Pedroori pueyaracaanu rucuanerjojua Jesuucua tiuunaa pueyacia, nojori na niishitiojonura socua Jesujiniji. Tamonu juuca nojuajaari Pueyaso pueya niquniuucua quiaquiaari Lida tiacajiniajuhuaj. ³³ Tii quiriquiaari tamonu pueyano. Na sesa quiquiaari Eneas. Cuno pueyanoori cumat-acuruhuana cusosu quijia. Tari na shocojoquiaari ocho marijia pootia na matasacari na matujinia. ³⁴ Pedroori cuno cusosu sequequiaari:

—Eneasnaa, ¡Jesucristo tari quia naatanirii! ¡Quia sanere! Quia matu quia jecare.

Eneasri ritia sanequiaari. ³⁵ Puetunu pueyanaa Lida tiacajinia quiniaa, mariyata Sarón tiacajinijinio pueyajuhaaj, puetunu nojorijianaari nio miishano niquiquiaari. Nojoriiri cunora tama na supuetanaa niishitiushano casajaaja cartequiaari. Puetunu nojorijianaari Jesuucua tiuquiaari.

Dorcas samiitianishaanujiniji pahuatanso

³⁶ Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupaajinia sequesano “Dorcas”. Dorcasri saniniuujia pueyano rupaajinia sequeshiyacujua “nequeru”. Cuno maajiri Jesuucua tiuujia quiquiaari. Nojuajaari maninia mijia maaji quiquiaari. Casamijiuucua pueya niqutiojojua nareja na jiiitasanojinijiri. ³⁷ Na nuhuaji, Pedro quishacari Lida tiacajinia, Dorcasri cusoquiaari. Na cusonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. ³⁸ Jope tiacaari cateca quia Lida tiacajiniji. Pedroori Lida tiacajinia quiriquiaajaa Dorcas shaajesacari. Jesuucua tiuunaa pueyari tari niishiriquiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

³⁹ Pedroori nojoritia tacatequiaariuhua Jope tiacajiniohua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua rerejoquiaari na nujuquetunuta. Nojoriiri Pedro niqitijioquiaari Dorcas cusupuenusano toqueya, cacojoquiyanio. Cunoori quiquiaari na cusupuenusano saminio na quishacariija. ⁴⁰ Pedroori jiyacari puetunujanaa pueya tohuatanijioquiaari sohuacamaji. Na nuhuaji, nojuajaari mojoquetaciaquiaari Pueyaso na secojonura. Na secojonu nuhuaji, macuucua tacateereri. Na sequereeri:

—¡Dorcasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. ⁴¹ Pedroori na juashiquiajiniji na quiaquiaari. Na nujatereri. Na nuhuaji sequequiaari Jesuucua tiuunaa pueyari, mashiquiopuenio:

—Miji pueyanaa, ¡nia nimia!

Nojori tiuquitasacari, saaja maaji niqutiushii nujuaanoori, tariucua saminio. ⁴² Pedro miishanoori puetunu Jope tiacajiniajanaa niishishaaquiaari. Queraatia pueyari cunora Jesuucua tiuquuaari. ⁴³ Pedroori na nuhuaji janiya camueenujuquiaariijaara Jope tiacajinia. Nojuajaari Simón tiajinia quiriquiaa cuniqui na camueenujusacari. Nio Simónri piiquia casaata shoqueya majeetejojua quiquiaari, casaara shipinishocoriquiano shoquejiniji.

10

Pedro quiasacari Cornelio niqiniucua

¹ Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuiri sesojosaaquiaari “Italiano”. ² Cornelioori Pueyaso secojojua pueyano quiquiaari, mariyata puetunu na tiajinia quiniaatajanaanio. Nojuajaari seetanujuanaa Pueyaso shuquiritiniu panijia quiquiaari. Cornelioori queraatia na cumaneecajiniji niqutiojojua quiquiaari nareyajuhua, casamiijiuniucua Judiocuaca niqutiojosocoriquiano. Pueyaso secojojua pueyaracaanuuri. ³ Tamonu juuca, tariucua pananu piriuushacari, Cornelioori Pueyaso seru niqiquiaari juhua na maquenujinia nocua niyano na tiajinia. Na sequeeseeri:

—Cornelionaa.

⁴ Cornelioori saaja Pueyaso seru shootiaquiaari na shiriiquiniutia. Na nuhuaji na riucuaereeri:

—¿Casaate jiyaniijianaa?

Pueyaso seruuri na sequeere:

—Pueyasoori quia secojosano tojiquiaa. Quia timitiaari capora quia quiniucua, quia jiitiasanojiniji quia niqutiojosacari nareja casamiijiuniucua pueyara. ⁵ Naaratej, quia seya quia jiyaramiquiri Jope tiacajinia. Nojori cuara Simón masuunuucua quiaara. Na sesaari Pedrojuhuaj. ⁶ Nojuajaari na sesaanucua pueyano tiajinia quiya. Tia camaruuri shoque majeetejojua piiquiajinia. Cunoori na poonijiosano. Na tiaari shoniniacu caminia casaqueyaji naniya. Simón Pedroori quia sequenutaniya casaa quia miiniutianiyani Pueyaso jiyanooniuria quiajaniya.

⁷ Pueyaso seru jaara quiaquiaariuhua, Cornelioori caapiqui na seyajinijinio piiquiaari, niquiriyatu na soldadonio. Cuno soldadoori Pueyaso secojona quiquiaarijuhuaj. Maninia na jiyaniijia naacujua quiquiaariijaariuhua. ⁸ Cornelio jiyarosaacarijia na seya, nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquirii Jope tiacajiniaari.

⁹ Tariqui, Cornelio seya quiasacari nucuaco, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasuhuojuajinia quiquiaari jiyacari. ¹⁰ Nojuajaari jiyacari miaajeriquiaa. Neraari juuca sumatuaariquiaacujaja. Nera sumatusacarijia, Pueyasoori casaa na niqutiuaari juhua na maquenujinia, na quishacari tia cacojiria. ¹¹ Pedro niquishacari jiyocuacaanu, saaja jiya cajiniocua niquirii riateyanoori. Sonaque queraque niquirii tiji roshinitiashiyanoori, na nacatucujiniji morojotasano. Pedroocua roshinitiasaareejanaari. ¹² Sonaque jiniacuma quiriquiaari puetunu casaajanaa: sacocua, jiyacua rucoojuacanio, jiyocua caanu jaacuatujucajuhua. Cuno casamiiri quiquiaari Judiocuaca puere-sano casaa puetunujuanaa. Maja nojori miaquesano. ¹³ Jiyacaritij, Pedroori rupaa tojirri jiyocuacaanuji na sequeyano. Naa sequeriquiaari:

—¡Pedronaa, nocua quia sanere! Quia puecoore quia miaquesocoriquiano.

¹⁴ Pedroori na riuquaree:

—¡Maja cua Jiyaniijianaa! ¿Janiyatucua taa miaquere sacuaratía cua mi-
aquesooni? ¡Cunocujaaari tarijía quia sequesano canaa pueresocoriquiano!

¹⁵ Jiyocuaaanuji rupaari socua na sequerohua:

—Pedronaa, majaari miaquesocoriquiano Pueyaso jiyatesano soonu.

¹⁶ Pueyasoori naa pacutejoquiaari sequenu Pedrotej. Na nuhuaji, son-
aqueeri tacanitiasaaquiaariuhua jiyocuaaanu. ¹⁷ Pedro tacaashacari naa
na niquniuucua juhua na maquenujinatej, jiyacari Cornelio jiyaramiquis-
hano pueyari tia tohuateyaji tiuquijioquiaari, Simón tia na pajetunura.
Cornelio pueyari nequesoreetariquiaa nucuacoji nojori tiuquiniuria Simón
tiajinia. ¹⁸ Nojoriiri tohuateyaji nacaquiaari:

—¿Niyá quiyate Simón jiyaniishano pueyano? Na sesaari Pedrojuhuaj.

¹⁹ Pedroori juhuanojuaja niishiriojoriquiaa na niquishanojiniji juhua na
maquenujinia tia cacojiria. Pueyaso Sohuanuuri jiyacari na sequeree:

—Pedronaa, jiuujianaraca pueya quia pajeya. ²⁰ Tariucuaaja. Quia sanero-
hua. Nojoriicua quia roseyarohua. Quiocua nojoritía quiaarohuajuhuj.
Majaari taacanuuu. Janiyacuajaari nojori jiyaramiquiriucuaa quiocuaní.

²¹ Pedroori Cornelio jiyarosano pueyacia rosequiaari. Nojori sequeseeri:

—Janiyacuaaja nia pajesano pueyanoni. ¿Casaacua nia niyareecuarani?

²² Nojoriiri na riuquaree:

—Canaa jiyaniijiaari Romano soldadohua jiyaniijia. Na sesa Cornelio.
Nojuajaari canaa jiyarorucuaa quiocuaní. Maninia mijia pueyanoori.
Jiyaniijia Pueyaso tojjijiaariuhuj. Puetunu Judiocuacajanaari maninia
na miiniuucua na panitiuya. Pueyaso seruuri na sequerucuaa, nojuaja
masuunura quiajaníya na tiajinia quia quianura, na tojiniuria puetunu quia
sequesanojuanaa.

²³ Pedroori Cornelio pueya tiuquinitiaquiaari na quijia tiajinia. Nojori
sequereeri:

—Niyaja nia maqueseejaara. Pocua tariqui quiaariquiani.

Jaara juhuaquequiaari, Pedroori nojoritía quiaquiaari. Nata quiojo-
quiaariijaariuhua Jope tiacajinijinio Jesuucua tiuuniáa pueya.

²⁴ Tama tariqui saniniuujia, nojoriiri Cesareya tiacajinia tiuquijio-
quiaari. Cornelioori na tiajinia sashiriquiaa Pedro, puetunu na tiajinia
quijiacatajanaa, queraatia na rupuenatano. Cornelioori puetunu nio
pueyajanaa masuuquiaari, nojori rerejonura juhuacarijia na tiajinia Pe-
dro tiuquiyaquishacarijia. ²⁵ Pedro tiuquishacari, Cornelioori nocua tohu-
ataquiaari. Carijiniacuma na naacuseeri. Pedroocuara mojoquetaquiaariiri
juhua Pueyasoocuara. ²⁶ Pedroori saaja na sanaquiaari. Na sequereeri:

—¡Quia nujuare! Janiyari cayajuhuj, juhua quiajaníya.

²⁷ Tiaco na tiuquitasacari, pocoojoriquiaa Pedrotaari. Pedro
tiuquishacari, saaja queraatia pueya niquishiiri. ²⁸ Pedroori nojori
sequeree:

—Taucuacanaa, niaacuajaari niishiya canaari Judiocuacani. Judiocua-
caari rootasaaquiaari maja canaa rupuenura taucuaca, maja quenaaja
tahue tiajinia canaa tiuquiniuriajuhuj. Saniniuujia, Pueyasoori quiarijia
cua niishitiorucuaa cutara maja cua soonura tamasaca. Taucuacaari maja
sacuaratía quiarijia quiria. ²⁹ Naaratej, cua niishishacari niaari cua ma-
surucuaa niyara, janiyari ritia canujyarucuaani cua taacanuyaquiniutia.
Cua totureja, ¿casaara nia masuurucuaa janiyani?

³⁰ Cornelioori na riuquaree:

—Cuatro juucaari tari shoconujiya. Janiyari jiyacari Pueyaso secoriquiaa juucua cua tiajiniani, pananu mueecosacari. Jiyacaritij, pueyanoori cucua muetarucuaa. Jiyacaricuajaari quiriquiaa, tee pananu tiuayanija. Cuno pueyano toqueeri shacantuque quiriquiaa. ³¹ Cua sequereeri: “Cornelionaa, Pueyasoori quia secijosano tojirii. Naajuhuj, niishiyari taa quia niqutiojoquiaa quia casami casamiijiuniucuan. ³² Naaratej, quia seya quia jiyaramiquiri Jope tiacajinia, cuara Simón masuunuucua quiatuura. Na sesaari Pedrojuhuaj. Nojuajaari na sesaanucua tiajinia quiya, shoniniacu caminia casaqueyaji. Tia camaruuri piiquajinia shoqueya majeetejonu poonijiojua. Simón Pedro jaara nimia quia tiajinia, quiata pocoojonutaniyari”. Pueyaso seruuri naa cua sequerucuaaqui Simónnaa. ³³ Janiyari jiyamitia ritia jiyarorucuaa cua seya Jope tiacajiniani, nojori pajenura ti quiajaniya. Quiaacuaajaari maninia miiri cucua quia nishacari. Quiarijiani, puetunu pajaniyajanaari niya Pueyaso niquiara quiyani. Naa quia pohuatate canaa tojishocoriquiano quiarija, taa Pueyaso niishitiojorucuaa quiajaniya canaa quia pohuatanuracuajani.

Pedro pohuatasacari Cornelio tiajinia

³⁴ Pedroori juhuacatecara pohuatanu coteequiaari. Sequereeri:

—Quiarijia niishiya seetanujuanaa cutaranija, Pueyasoori maja rimi-jata na niqiniu pajaniya. Majaari nia jiyaniniu Pueyasoori saaja Judiocuacaacua jiaatiaa, Israel pueya nojori quiniuucua. Maja. Nojuajaari tamasaacua jiaatiaajuhuj. ³⁵ Tiquiyocua jiyacajinia Pueyaso secojua pueya quishacari, nojoriiri Pueyaso jiyanooshano pueya quiyajuhuj, maninia miijia nojori quishacari. ³⁶ Pueyasoori na rupaa pohuatiqiaari puetunu canaa Israel pueyarajanaa, jiyanooshano canaa quiniuria Jesucristoocua canaa tiuushacari. Nio Jesucristoori puetunu mijiria quiniaa Camarnujuanaa. ³⁷ Tiuquinijiona Juanri Pueyaso rupaa pohuataqiaari pueya tiuquinijiosaanura. Na nuhuaji, Jesuuri cutara miishano miiniu coteequiaari Pueyaso cumaacata. Niaari tari niishiyacuaja na miishano canaa Galilea jiyajinia, na nuhuaji na miishano puetunu Judea jiyajinia-janaanio. ³⁸ Niaari niishiyajuhuj, Pueyasoori na Sohanu niqutioquiaari Jesu, na cumaaca na jitianura. Nojuajaari maninia miiquiaari pueya, tiqiyocua na rucuanesacari. Cusosuhua naatanijiojuaari. Samaruhua camarnu sesosano jeecaquiaarijiaariuhuj. Puetunu naa miijia maninijanaari na Que Pueyaso quiniuucua nata. ³⁹ Canaari puetunu na miishanojuanaa niqiuqiaariini, puetunu canaa Judiocuaca jiyajiniajanaa, Jerusalén tiacajiniajuhuj. Janiyari seetanujuanaa canaa niquishano pohuataani. Na nuhuaji, pueyari na teetequiaari niyacutesanojinia. Tii na cusojuatiquiaariiri. ⁴⁰ Jiuujianaraca juucajinia, Pueyasoori na samiitan-iquiaariuhua. Jiyacaritij, na saquirojosano pueyacua na mueratereeri. ⁴¹ Majaari na muetanu quiquiaari puetunu pueyacuajanaa. Saaja canaacua muetaqiaariiri, teyano Pueyaso saquirojoquiaari coteenu tariucuaaanucujani, Jesujiniji pohuatanuuriquiano. Na samiitiasacariuhua, canaari nata miaquenuquiaari mariyatani. Canaari nata raruquiaarijiuhuj. ⁴² Jesu jaara canaa jiyaramiquiquiaari, nojuajaari canaa sequequiaari: “Naa nia pohuatate pueya niqiuara: ‘Pueyasoori Jesu jiyatequiaari puetunu mijiria quiniaa nequesoreenarajanaa, macunucua nequesoreeriquianojuhuaj’”. ⁴³ Tariucuaaanu pueyara Pueyaso sequesano caminiuuniiaari naa juhuacarija sequetuquiaari Jesujinijiuuhuj: “Cante nocua tiuyani, nojuajaari jiyanooshaanutaniya sesa na miishanojiniji”.

Pueyaso Sohuanu tiuquishacari taucuaca jiuujijajiniajuhuaj

⁴⁴ Pedro pahuatasacarijia taucuaca niquiara, Pueyaso Sohuanuuri Pedro tojtianaa taucuacaacia niquiari, nojori jiuujijajinia na tiuquiniuria. ⁴⁵ Pueyasocua tiuuniaa Judiocuacani, Pedrotia nijioquiaari Jope tiacajinjini, nojoriiri shiriquiquiaari Pueyaso niquitiosacari cuno taucuaca na Sohuanu. ⁴⁶ Cuno taucuacaari nojori niquiara pocooriquiaa tamaatia rupaacijinia. Pueyaso maninihuaqueetaturiquiaari. ⁴⁷ Naaratej, Pedroori sequequiaari:

—Nio pueyari tari jitiia Pueyaso Sohuanu noojijajinia, taa pa jiti-aacuaani. Naaratej, nojori cuara tiuquinijiosaaria quiarjia. ¿Cantucua nojori tenujura maja na tiuquinijiosaanurani?

⁴⁸ Pedroori na nuhuaji sequequiaari cuno taucuaca tiuquinijiosaanura Jesucristo sesajinia, nojori tiushacari nocua. Na nuhuaji, Cornelioori Pedro sequequiaari:

—Niyaja quia camueenujrejaara canaata. Maja senota quianuhua.

11

Taucuacajinjiji Pedro pahuatasacari Jerusalén tiacajinia

¹ Jesu jiyaramiquishano pueya, mariyata puetunu Jesucua tiuunia pueyajanaa Judea jiyajinia, nojoriiri naa pahuatasaaquiaariti: “Taucuacanaari Pueyaso rupaacia tiuuriucuaajuhua”. ² Nocuaji, Pedro jaara tacatequiaarihua Jerusalén tiacajiniohua, narta Pueyaso pueyari na juaaquiarihua. Na juaanaari taucuaca cararaatiuuquia co miatejonu panijiaa quiquiaari, taucuaca quiniuria seetanujanaa Pueyaso pueya nojoriria. ³ Nojoriiri naa juaaquiari Pedro:

—¿Casaara quia quiaarucuaa cuno taucuacaacuani? Nojoriiri maja Judiocuaca juhua pajaniya. ¡Quiaanaari nojoritia miaquejocanujuhua! Quia miishanoori maja maninia taa Pueyaso rootaquiaari tariucuaaanucujani.

⁴ Pedroori suraatiaja nojori pahuataquiaari puetunujanaa tahuajinjiji. Coteenu pahuataree na niquishano juhua na maquenujiniaari. Naa sequereeri:

⁵ —Jope tiacajinia cua quishacari, janiyari panacari secojoriquiaani. Janiyari jiyacari juhua cua maquenujinia sonaque na nacatucujinjiji mo-rojotasano niquiriini. Jiyareta cucujanaa roshinitiasaareeri. ⁶ Cua niquishacari sonaquejinia cua niishiniuria casaate mii quiriqiaani, janiyari saa puereeta casami niquiriijiaani. Janiyari niquiriini jiyacua rucoojuaca, sacocujuhua, jiyocuaaanu jaacuatujacanio. Puetunujanaari pa miaquesocoriquiano pa pueresano casaa quiriqiaa. ⁷ Janiyari jiyacari jiyocuaaanuji rupaaj tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. ⁸ Janiyari saaja na riucuaareni: “¡Maja cua Jiyaniijiana! ¿Janiyatucua taa miaquere sacuraatia cua miaque-sooni?” ⁹ Jiyocuaaanuji rupaari socua cua sequerohuani: “Pedronaa, majaari miaquesocoriquiano Pueyaso jiyatesano soonu”. ¹⁰ Pueyasoori naa pacutejocanu sequenu juucua janiyatej. Na nuhuaji, sonaque tacanitarihua jiyocuaaanuuri. ¹¹ Jiyacariti, jiuujianaraca canuuri cua quijia tijajinia tiuquishii. Nojoriiri Cesareya tiacajinjiji jiyaramiquishano quiquianu, na pajenuunura janiya. ¹² Nojori tiuquiquishacarijia, Pueyaso Sohuanuuri cua sequere: “Quiocua nojoritia quiaare. Majaari taacaanunu. Majaari tahuu soonu nojori quia rupesacari”. Naa cua tojiniucuatej, janiyari cunora juhujaniya nojoritia quiaarucuaani. Nio seis parta Jesucua tiuunia pueyari cuata quiojyarucuaajuhua. Canaari mariyata cuno tahuu tijajinia

tiuquishiini. ¹³ Tia camaruuri canaa pohuatarucuaa taa na niquiquianu Pueyaso seru na tiajinia nocua nujuaanoni. Pueyaso serunaari na sequeree: “Jope tiacajinia quia jiyarore quia seya, nojori cuaara quiaara Simón ma-suunuucua. Na sesaari Pedrojuhuaj. ¹⁴ Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiajinia quiniaajuhuj”. ¹⁵ Saaja cua coteesacari Pueyaso rupaa pohuatanu nojori niquiara, Pueyaso Sohuanuuri nojoriicua niquianu, taa pocua coteenujuanaa na niquianucujani. ¹⁶ Janiyari jiyacari niishiquii pa Jiyaniijia sequesanonni. Naa na sequesanotej: “Juanri moojinia tiuquini-jiya pueya. Pueyaso cutaraari na Sohuanu jiyaronutaniya niaacua, nioojia-jinia na tiuquiniuria”. ¹⁷ Naacujitij, taucuaca tiuushacari pa Jiyaniijiaacua, Pueyasoori na Sohuanu niquitiorucuaa nojorijihuj, taa na niquitio-canu pajaniyacuaani. Cante Jesucristoocua tiuyani, Pueyasoori na Sohuanu na niquitioya. ¿Janiyatucua taa Pueyaso sequereruhuarini: “Maja cuno pojori niquitionu quia Sohuanu”?

¹⁸ Jerusalén tiacajinia quiniaa Pueyaso pueya jaara tojiquiaari naa Pedro sequesanotej, nojoriiri sanaajetaquiaari. Tama nojoriijaarijia Pueyaso maninuhuaqueetaquiaari. Naa sequetuquiaariiri:

—¡Pueyasojuhanaja jyanohua maninia! Nojuajaari taucuaca paniya-juhuaj nojori tacatonura noojia sesa nojori miishanojiniji, jiyanooshano nojori quiniuriajuhuaj, pueyaracaanu nojori rishiniuria Pueyasota.

Antioquiya tiacajinia Jesu pueyajiniji pohuatasano

¹⁹ Esteban jaara mosaaquiaaricuaa, Judiocuacaari juhuacatecara Jesu-ucua tiuunaa miiquiaari naquiyajuhuj. Queraatia Jesuucua tiuunaa pueyari nocuaji mashiyocuatiquiaari. Nojoriiri tiquiyocua niyaquejo-quiaari. Noojiaqueyari na mashiyocuatiasacari tiuquiijoquiaari Fenicia jiyajinia. Tamasacaari tiuquiijoquiaari Chipre jiyajinia. Noojiaqueyari Antioquiya tiacajinia tiuquiijoquiaarijuhuaj. Nojoriiri tii pohuatanu-ucuaari Pueyaso rupaa Jesujiniji saa Judiocuaraja, maja taucuacaa.

²⁰ Mashiyocuatunaa tajinia quiquiaariiri Chipre jiyajinijinio pueya, Cirene tiacajinijinio pueyajuhuj. Nio pueya jaara tiuquiijoquiaari Antioquiya tiacajinia, nojoriiri Jesujiniji pohuataquiaari Griegohua niquiarajuhuj.

²¹ Jiyaniijia Jesu cumaacari nojoritia quiquiaarijuhuaj. Naacujitij, queraatia Griegohuari tariucuaaanu tama nojori niishishanojuaja cartea-riaari, Jiyaniijia Jesu tojiijia nojori quiniuria.

²² Jerusalén tiacajinia quiniaa Pueyaso pueya jaara nio niishiquiaari, nojoriiri Bernabé jiyarotuquiaari Antioquiya tiacajinia. ²³ Bernabé jaara tiuquiquiaari nojoriicua, nojuajaari jyanohua shuquiriquiaari na niquishacari taa Pueyaso miiriucuaa maninia cuno Griegohuani, nocua nojori tiuushacari. Naaratej, nojuajaari naa rootaquiaari nojori:

—Pa Jiyaniijiaacua nia tiuuri pueyaracaanu. Majaari nocua tiuuniu nia cartenu. Suraatia na tojiijia nia quiri.

²⁴ Bernabeeri jyanohua maninia pueyano quiquiaari. Pueyaso Sohuanu-ri noojia cumaquiquiaari jyanohua. Naacujitij, na pohuatasacari Jesu-jiniji, queraatia pueyari Jiyaniijiaacua tiuquiquiaari.

²⁵ Na nuhuaji, Bernabeeri Tarso tiacajinia quiquiaari Saulo pajenuu-cua. Jaara na riuriataquiaari, na jiyataquiaari Antioquiya tiacajiniaari.

²⁶ Nojori quishacari Pueyaso pueyata cuno tiacajinia, nojoriiri tii shocote-jonuuquiaari. Tii Antioquiya tiacajiniani, Jesuucua tiuunaa pueyari co-teenu sesojosaaquiaari “Cristiano”. Nioori pueyano rupaaajinia sequeshiya “Cristo tojiniaa pueya”.

²⁷ Cuno quishacari, Jerusalén tiacajiniji Pueyaso sequenu panishano caminiujuunaa pueyari tiuquiiioquiaari Antioquiya tiacajinia. ²⁸ Tamonu nojorijinijinioni, na sesa quiquiaari Ágabo. Nojuajaari Jesuucua tiuunaa pueya rerejonaa tajiniji nujaquiaari pocuanura. Naa caminiujuquiaari Pueyaso Sohuanu niishtiosano nojuajaari:

—¡Pueyanaa, puetunu pa jiyacajiniajanaani, miaajenuuri quiniutianiya!

Seetanujuanaa sequequiaariiri Ágabo. Cuno miaajenuuri quiquiaari Claudio quishacari jiyaniijajanaa, Césartuhuj. Nojuajaari Roma tiacajiniji jitiaquiaari puetunu jiyacajanaa. ²⁹ Antioquiya tiacajinia quiniaa Pueyaso pueya tojishacari naa Ágabo sequesantej, nojoriiri sequequiaari:

—¡Judea jiyajinia quiniaa parta Pueyaso pueya pa naacure!

Nojoriiri naa miiquiaari. Naaratej, cante queraatia cumaneeca jiitiquiaarini, nojoriiri queraatia niqutioquiaari. Saniniuujia, cante maja puera cumaneecaraca quiquiaarini, nojoriiri secaja niqutioquiaari na jitianojiniji. ³⁰ Na nuhuaji, nojoriiri nareja na niqutiojosano cumaneeca jiyarotaquiaari Bernabeeta, Saulotanio. Nojoriiri Pueyaso pueya jitianaa niqutioquiaari saniniuujia Judea jiyajinia.

12

Jacobo nacatasaanujiniji pohuatasano, Pedro nujuatesaanujinijinio

¹ Jiyacaritij, Herodesri jiyaniijia quiquiaari Judea jiyajinia. Nojuajaari Jesuucua tiuunaa miiquiaari naquiya. Noojiaqueya quiootequiaari na saniitiosocoriquiano nujuatejojuajiniaari. ² Naa Juan tarajanu Santiago motequiaaricuajaari nijiniaquetucujia mueruuta. ³ Judiocuacaari shuquiriquiaari naa nojori jiyaniijia motesacari Santiagotej. Naaratej, Herodesri Pedro quiatequiaari na soldadohuajuhuj, Judiocuaca timitianura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poreetajaaju majeetesano. ⁴ Pedro quiasaanu nuhuaji, Herodesri na nujuatequiaari nujuatejojuajinia. Na tohuatenu paniriquiohua juucua Pascua nuhuajiiri, na nequesoreesocoriquiano puetunu quiniqii quiniaa Judiocuaca niquiarajanaa. Dieciséis soldadohuari Pedro cojuariquiaa pueyaracaanu. Nocua sanitijiootiquiaariiri; coteenu cuatro, na nuhuaji socua cuatro. Nojoriiri naa sanitijiootiquiaaritij. ⁵ Pedroori maninia cojuasaaquiaari nujuatejojuajinia. Jiyacaritij, Jesuucua tiuunaa pueyari saniniuujia nocuara secojonuuriquiaa jianohua, Pueyaso naacunura Pedro.

Pueyaso mashiquishacari Pedro nujuatejojuajiniji

⁶ Cuno niucujani, na juhuaqueyaquishacarijia, quera Herodes tohuatesee tariquicuaji Pedroni, na nequesoreesocoriquiano puetunu pueya niquiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuata na numatucua cajiniocua. Tamasaca soldadohuari nujuatejojuaja tohuateyajii cojuariquiaacujia. ⁷ Jiyacaritij, Pueyaso seruuri canashyaquiji coretaquiaari jiyareta Pedro shuriucujajanaa nujuatejojuaja jiniocua. Na shacantuucaari jiyanohua cuhuataquiaari nujuatejojuaja. Pueyaso seruuri Pedro jiuuquirii na shuucujia. Na niucujareeri. Na niucuasacari, na sequereeri:

—¡Ritia quia sanere!

Cumayocuaari tamajaaja saacarejetaquiaari Pedro numatucuaacujia.

⁸ Pueyaso seruuri na sequereehujahuj:

—¡Quia cajiniocua camarucujua quia saatiri socua! ¡Quia sapatu quia cushirijihuhuj!

Pedro jaara naa miiquiaari puetunu na sequesanojuanaa, Pueyaso seru-
uri socua na sequerohua:

—¡Quia toque quia cushiri ritia! Majaari tarishiniu. ¡Quiocua cua nuhuaji
rupaashijia!

⁹ Pedroori ritia Pueyaso seru nuhuaji sacuariquiaajaa. Jiyanhua jiya-
jeneriquiaari. Majaari na niishiniu quiriquiaa puetunu na niquishano-
juanaa. Nojuajaari jyaniriquiaa na maquenujina niquiya naasucua.
¹⁰ Nojoriiri coteenu shocomaa na tacoji cojuanaa soldadohua. Socua na
tacoji cojuanaa tajitiumiaajaariuhuj. Naa quenaacoturee nujuatejojua
tohuateyajiri. Nojuajaari Pueyaso seruta nujuatusee jiyareta tohuateyaji.
Tohuateyari cumueeca casaata shipinishano quiquiaari. Jiyacaritij, to-
huateyari tamajaaja riatequee. Nojoriiri tohuareetamaa carijiniacuma.
Pueyaso seruuri Pedro jiyatariquiaa sapuenujaara tiaca jiuujiaaco. Na
nuhuaji, na shuriucujaji shaajequeeri. ¹¹ Pedroori jiyacari shusha niishiquii.
Naa sequereeri:

—¡Seetanujuanaaqui quiriquiaa! ¡Cua Jiyaniijiaquiiri na seru jiyaroree
cucua, na mashiquiniuria janiya Herodescujaji, cuarta Judiocuacaacujaji-
jihuhuj! Naa na jiyaroreeri maja cua miishaanura taa nojori niishirio-
joriquiaa na miiniuria juucua janiyani.

¹² Nojuajaari naa na niishiriojonuta María tiajinia quiaquiaari. Nio
Mariacuajaari tamonu Juan nucua. Cuno Juan sesaari Marcojuhuj. Cuno tia-
jinia, queraatia Pueyaso pueyari Pedroocuara tii secojonuuriquiaa jiyacari.
¹³ Pedroori jiyacari piquiquiaari carijiniacuma mataca tohuateyaji. Tiaco
seruuri na tojiquiaari piquiyano. Nio seru sesaari quiquiaari Rode, niya-
coo. Nojuajaari juucua catecanoquiaari tohuateyaji, na niquiniuria cante
quiriquiaani. ¹⁴ Nojuajaari saaja Pedro tojishii tia camaru jyaniquiyano,
na tiootiu na riatanura nocujaji. Niyacoo tojishacari seetanujuanaa Pedro
rupaa, majaari tiootiu na riatanu quiquiaari na shuquiriniutia. Saaja
netequiaariuhua tiaco quiniaa numootenuraari. Nojori sequesuhuari:

—¡Pedrocuajaqui nooj, tohuateyaji nujuaatej!

¹⁵ Pueyari saa niyacoo riucuaquiaarijia:

—¿Quiaate paateya? Teyano Pedrote nujuatesaarucuaacujani.

Niyacoori nojori sequenu pacutequiaariuhua:

—¡Taaquiriirinij! ¡Pedrocuaaquinatejaj, nooj nujuaatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuaajaja.

¹⁶ Nojori nacojosacari tiaco, Pedroori tohuateyaji piquijioriquiaajaa.
Tiootiu jaara socua riatasaaquiaari, nojuacuajaari quiriquiaa. Pueyari na
niquishacari shiriiquitiuquiaari. ¹⁷ Pedroori nojori sanaajaree jiyacari na
juashiquiata. Cuniqiu quiniaa pohuatareeri taa Pueyaso tohuaterohua
nojuaja nujuatejojuaajiniini. Pedroori naa sequequiaari nojoritij:

—Niocua naa pohuatare Santiagojuhuj, parta Jesucua tiunuaanio.

Na nuhuaji, Pedroori tiji tohuatacuhua. Tamaqui quiaareeri.

¹⁸ Jaara juhuaquequiaari, nujuatejojuaajinia cojuanaa soldadohuari
jiyanohua shiriiquitiuquiaari. Majaari nojori niishiniu quiquiaari taa
Pedro miirii nujuatejojuaajini nojori tajiniini. Tama nojoriijaarijia naa
sequetuquiaari na puerenuta:

—¡Pa jiyaniijia Herodesri quiarijia pa puecoonutaniya, maninia pa co-
juaaquiniucua Pedro!

¹⁹ Herodes niishishacari, na shuriucua nujuatunaa soldadohua jiyaroquiaari nujuatejojuajinia nojori pajenura Pedro. Nojori jaara na riurita-aqequoquiaari, Herodesri nujuatejojuajinia Pedro cojuanaa soldadohua neqesoreequiaari na juaaniutia, na niishiniuria juucua taa Pedro juureqeree nojori shuriucujini. Na nuhuaji, Herodesri jiyanoehua na juaaniutia na shuriucua nujuatunaa soldadohua sequequiaari, nojori puecoonura narta soldadohua, nojori cojuaaquiniucua maninia Pedro nujuatejojuajinia. Naa na miiniu nuhuajitij, Herodesri Judea jiyajiniji pacuquiaari. Cesareya tiacajinia quishiiri.

Herodes shaajenujiniji pohuatasano

²⁰ Jiyacaritij, Herodesri jiyanoehua juariquiaa Tiro tiacajinia quiniaa pueyata, Sidón tiacajinia quiniaatanio. Nio caapiqui tiacajinijinio pueyari jiyaniijia Herodes tiacajinia quiojoquiaari nata nojori pocoojonura juucua. Majaari cuno juuca nojori pocoojonu quiri jiyaniijia Herodesta. Nocujaji, nojoriiri Herodes seru sequeere:

—Quiocua quia jiyaniijia sequeere, canaa nata jyanootioonu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia maqueja cojuana quiquiaarijiaariuhuj. Tiro tiacajiniji pueya, mariyata Sidón tiacajinijinio, nojoriiri na cumaneecata masetujua na miaquesocoriquiano jiyaniijia Herodes jiti-asano pueyajiniji. Nojoriiri jiyamitia jecatooonu paniriquiaa cuno jiyani-ijjata, maninia nojori quiniuhua nata, Herodes niqutiojotenuhuara na jiti-tiasano pueya na miajajaura Sidón tiacajinijinio pueya, Tiro tiacajinijinio pueyano. ²¹ Herodes seruuri nojori sequequiaariuhua:

—Niocuana tamonu juuca nimia, jiyaniijjata nia pocoojonura.

Na nuhuaji, cuno pueyari na sequesano juucajinia niqiaariuhua. Jiyani-ijia Herodesri nojoriicujaji maniniushiquiaari. Na maniniuqui toque cushiquiaariiri. Jiyaniijiaacuajinio shipinishano cajituijina cajiriohuari. Tiji pocuquiaari cuno pueyacuari. ²² Puetunu cuniqui quiniaa pueya tojishacari naa maninia Herodes pocuaano nojori niqiaratej, nojoriiri nacoonu coteequiaari. Naa sequetuquiaari na nacoosacariiri:

—¡Nio pueyano pocuaani, majaari nareja pueyano! ¡Nojuajaqui Pueyaso!

²³ Pueya sequesacari naa Herodestej, nojuajaari juhua shuquiu-riosaaquiaari sajaruhua. Majaari quenaaja cuno pueya na sequenu quiri: “Maja naa cua sequetunutej. Janiya maja Pueyasoni”. Nocujaji, Pueyaso seruuri canashyaquiji na tojetequiaari. Na pocuasacarijia cusomaari. Na sarapiyari na jiniacuma miaquequiaari. Naa cusotaquiaari tama na sarapiyarijia.

²⁴ Pueyaso rupaaari saniniuujia socua niyacasaquiaari, tiqiyocua pohuatasacari puetunu pueya niqiarajanaa. Naacuajitij, Pueyasocua tiu-uniaa pueyari socua queraatiara canequiaarijuhuaj. ²⁵ Bernabé, Saulo-nio, nojori jaara niqutioquiaari cumaneeca Jerusalén tiacajinia Pueyaso pueya jütianaa, nojoriiri ritia quiojoquiaariuhua Antioquiya tiacajiniohua. Nojoriiri jiyacari Jerusalén tiacajiniji riquiaariuhua Juan. Juan sesaari quiquiaarijuhuaj Marco.

13

Saulo Bernabeeta rucuanefonu coteesacari Jesujiniji pohuatanura tiqiy-ocua

¹ Antioquiya tiacajinia Jesuucua tiuunaa pueyajinijinioni, nojiaqueyari quiquiaari Pueyaso sequenu panishano Pueyaso pueyara caminiuujunaa. Quiquiaarijiaariuhua Pueyaso Rupaa nishitiojanaa. Nioori nojori sesaca:

Bernabé, Simónnio, na sesa tarajanu quiquiaari Negro; Lucionio. Nojuajaari Cirene tiacajinijinio pueyano. Quiquiaarijiaariuhua Manaén. Nojuajaari mariyata Galilea jiyajinia jiyaniijiarano Herodesta canashitijosaaquiaari. Quiquiaarijiaariuhua Saulo. ² Tamonu juuca, puetunu nojorijianaari Pueyaso secojonuuriquiaa. Cuno juucajuhua, majaari nojori miaquenuunu quiriquiaa socua na secojonuunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuacaanucujani.

³ Nojoriiri jiyacari socua maja na miaquenuunu quiquiaari. Saaja Pueyaso secojonuuriquiaa socua jiyanoahuari. Na secojonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaca. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jiyanohua Pueyaso Sohuanu cumaacata.

Jesujiniji pohuatasacari Chipre jiyajinia

⁴ Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijiaara nucuaco Seleucia tiacajiniara, shoniniacu caminia casaqueyaji. Nojoriiri cuniquiji quiaquiaari puereetuaca buquejina Chipre jiyaniishano jiyajiniara. Chipre jiyari jiya tucuaatija, shoniniacu caminia jiuujajinia. ⁵ Nojori tiuquijiosacari Salamina tiaca tacatajajiniji, tii Pueyaso rupaa pohuatanuunu coteeqiaari puetunu cuniqui quiniaa Judiucuaa tianjiaaqueyajanaari. Juanri nojoritia quiriquiaajuhua, nojori naacuriquiano. ⁶ Naa nojori rucojosacari Pueyaso rupaa pohuatanura Chipre jiya tucuaatijaacuatej, socua tiuquijioseequiaari Pafos tiacajiniaari Chipre tamajiria. Nojoriiri tii riuriataquiaari shimiacu, narta Judio pueyano. Na sesa quiquiaari Barjesús. Nojuajaari cuniqui quiniaa sapojoquiaari naatej: “Janiyacuja Pueyaso sequenu panishano caminiujunia pajaniyarani”.

⁷ Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniijia quiquiaari. Cuno jiyaniijiaari jiyanohua niishijia quiquiaari. Nojuajaari Bernabé masuuquiaari Saulonio, nojori pohuatanura Pueyaso rupaa nojuaja. ⁸ Cuno shimiacu sesaari Griego rupajinia sequesaaquiaari Elimas. Nojuajaari saaja cuno jiyaniijia niqiuara cuaracashitiquiaari Pueyaso rupaa. Naa sequeree cuno jiyaniijiaari:

—Maja cuno pojori tojinu. Jiyanohua sesaari nojori pohuatasano. Quia sapojotiuyano.

⁹ Saulo sesaari Pablo quiquiaarijuhuaj. Jiyacari, Pueyaso Sohuanu cumaquishacari nojuaja, Pabloori jiyanohua shitimia shimiacu jiquioco shootiaree naa na sequesacari nojuaja:

¹⁰ —¡Sesaaca niyanu sequenaa! ¡Maninia miijiaa paracaajianaa! ¿Casaara pueya quia tenujiya Pueyasooajini? ¹¹ ¡Cua Jiyaniijiaari quiarijia quia saniitionutaniya! ¡Quiaari cariojuarura quiniutianiya seetanujuaanaa! ¡Quiaari pasaja tarishiniutianiya cariojuaru quia quishacari!

Jiyacaritij, juhua niniquiaari na namijajinia cajimias. Cariojuarura quiqiuiri. Juhua ninishiqui quiaquejoquiaari puetunu cunocojuanaari, na juaashiquiaajiniji na jaatucusaanura juucua. ¹² Cuno jiyaniijia jaara naa niqiuiaaritij, Pueyasooaja tiuuriiri na niqiuara nojori pohuatasacari shanohua Jiyaniijia Jesujiniji.

Pablo, Bernabé quishacari Antioquia tiacajinia, Pisidia jiyajinia

¹³ Pabloori na cojiniaata Pafos tiacajiniji quiaquiaari buquejinia Perge tiacajiniara, Panfilia jiyajinia. Juanri Perge tiacajinia cateseequiaari nojoriicuaji. Tiji riujiuquaiariuhua Jerusalén tiacajiniohuari. ¹⁴ Na nuhuaji, Pabloori Bernabeeta Perge tiacajiniji quiaquiaari Antioquiya tiacajinia. Antioquiya tiacaari Pisia jiyajinia. Tii nojori quishacari, nojoriiri samaatenu juuca quiaquiaari narta Judiocuaca secojonuujua tiajinia. Na tiuquishacari, cajitiushiiri. ¹⁵ Jiyacaritij, tariucuacaanu Moisés Rootasanoori serojosaaquiaari. Tariucuacaanu Pueyaso sequesano caminiujunia naajiotasanoori serojosaaquiaarijuhuaj. Na nuhuaji, rerejowa tia camarnuuri naa sequequiaari Pablo, Bernabeenio:

—Cuarta Judiocuacanaa, niaa jaara Pueyasojiniji nia niishishano casaa sequenu paniri, nia niishitiojore quiarjia niya quiniaa niquiara.

¹⁶ Pabloori sanequiaari. Na juashiquiata sanaajaree pueyari. Naa nojori sequeereeri:

—Nia tojitiare cuarta Israel pueyanaa, nijaniyajuhuj, canapuate Pueyaso tojtiajacuajani tamasaca pueyapuejinijino. ¹⁷ Paari sequequiaani: “Pueyasoori pa Jiyaniija, Israel pueya pa quiniuucua”. Seetanujanaa, paacujaari Pueyaso saquiriojosano pueyacuajinioni. Tariucuacaanu, Pueyasoori maniniushiquari pa supuetanaa saquiriojuaari na pueyara quiriquiano. Na nuhuaji, jyanohua pa supuetanaa canetequiaariiri Egipto jiyajinia nojori quishacari. Na nuhuaji, Pueyasoori nojori mashiquiuaari cuno jiyajiniji na cumaacata. ¹⁸ Cuarenta marijiaari pa supuetanaa shoconujuquiaari pueyaracaanu nojori rucojosacari najuhuaa cariquia jiyajinia. Pueyasoori jiyacari nojori rejeretaquiaari na tojtiaaquishacari nojuaja. ¹⁹ Na nuhuaji, Pueyaso cumaacata, siete tamaatiuucua rupaa pocuajaca taucuacari puecoosaaquiaari Canaán jiyajiniji, saniniuujia cuno jiya na niqitiosocoriquiano pa supuetanaa. ²⁰ Pa supuetanaa jaara Canaán jiya camaruhua quiquiaari tari, socua cuatrociento cincuenta marijiaari nojori shoconujuquiaari saaja nequesorenaa jittiasacari nojori. Na nuhuaji Samuelri nojori nequesoreenara jiyatesaaquiaarijuhuaj. Nojuajaari Pueyaso sequesano caminiujunia quiquiaarijuhuaj. ²¹ Samuel quishacarjia, pa supuetanaari Pueyaso secojonuujuaari na panitiushacari jiyaniija, nojori jitiariquiano nequesorenaa niti. Naacuajitij, Pueyasoori nojori jiyaniijiaari jiyatequiaari Saúl, Cis niyanu, supuetana Benjamín niquihuacuajinio supueno pueyano. Saúlri nareja cuarenta marijia shocotejoquiaari pa supuetanaa jiyaniija na quishacari. ²² Na nuhuaji, Pueyasoori Saúl sojotaquiaariuhua Saúl tojyaquiniuucua nojuaja. Saúl niti David jiyatequiaariuhua Israel pueya jiyaniijiaari saniniuuriija. Pueyasoori naa sequequiaari Davidjiniji, na timitiasacari nojuaja:

“Isaí niyanu Davidcuajari cua shuquiuriohua. Nojuajaari cua panishano pueyano. Nojuajaari puetunu cua panishano miiniutianiyajanaa”.

²³ Quiari naataja, Pueyasoori na sequesano tohuatequiaari na mueratesacari pocuaji Tacuna. Nojuajaari Jesu, David niquihuacuajinio supuenoni. Pueyasoori na seerataquiaari Israel pueyacuajia Tacuna quiriquiano, taa na sequequiaari tariucuacaanucujani. ²⁴ Jesu coteyaquishacarjia rucuanenu na Quejiniji pohuatanura, Tiuquinijona Juanri coteenu nocuaji pohuataquiaari Pueyasojiniji puetunu Israel pueya niquiarajanaa. Tiuquinijona Juanri nojori sequesquiaari nojia nojori tacatonuhuaa Pueyasoocua, naajuhuj, moojinia nojori tiuquinijosaanura, Pueyaso tojjiara nojori quiniuria. ²⁵ Quera Tiuquinijona Juan shaajesacari, nojuajaari naa sequequiaari: “Janiyari

maja Pueyaso Jiyarosaroni taa nia jiyaniquiaa najuhuana janiyacujani. Na Jiyarosano cutaraari cua nuhuaji niniutianiya. Nojuajaari seetanujuanaa Jiyaniijijanaa cutara. Janiya maara jiyanohua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia miijia”.

²⁶ 'Cuarta pueyanaa, niajaniya cante Abraham niqiuohuacuajinio pueyacujani, cua tojitiare, niajanijahuaj taucucanaa, canapueete Pueyaso tojijiacuajani. Niaaranoori nio maninia rupaa Pueyasojiniji, nia jiyanooshaanura sesa nia miishanojiniji. ²⁷ Jerusalén tiacajinia quiniaa, mariyata na camarucuanio, nojoriiri maja na niishiniu quijia cante Jesu quiquiaarini. Majaari nojori niishitiuniu quiquiaarijihuaj Pueyaso sequesano caminiujiunaa naajiotasano tariucuacaanu. Cunoori najuhuana nojori serojonusano puetunu samaatenu juucajanaa. Naacujitij, nojori jaara moquiaari Jesu, maninia tohuateequiaariiri Pueyaso sequesano caminiujiunaa naajiotasano, taa Jesujiniji sequesaaquiaari tariucuacaanucujani. ²⁸ Jesuuri seetanujuanaa maja na miiniu quiquiaari sesa. Tama nojoriiaarijia juhua sesa miijara na jiyatequiaari cutara. Naacujitij, Pilato sequetuquiaariiri cuaara na moteraanoj. ²⁹ Nojori jaara tari miiquiaari taa nojuajiniji naajiotasano quiya tariucuacaanu Pueyaso Rupaajiniacuajani, na roshinituquiaari niyacutesanojinijiiri. Raaco na niatureeri. ³⁰ Naajaa, macu na quishacari, Pueyasoori saaja na samiitianiquiaariuhua. ³¹ Na samiitianu nuhuaji, Jesuuri sequeyarucua na pueyacu mueranacujuquiaari, noo pojoriicua canapueete na tarajaquiaari na quiasacari Galilea jiyajiniji Jerusalén tiacajiniacuajani. Nojoricuajaari quiarijia nojuajiniji poojotaniuhua puetunu pueya niqiarajanaa.

³² 'Canaari timiyani canaa pohuatasacari niajaniya, ¡Pueyaso pohuatasano pa supuetanaari tari tohuateecanu! ¡Pocuaji Tacunacuajaari tari miiquianu puetunu pa jiyanooshaanurajanaa! ³³ Seetanujuanaa, Pueyaso sequesano pa supuetanaa Israel pueyarani, cunoori shusha pajaniyara tohuateecanu, pa supuetanaa Israel pueyacujinio pa quiniucua. Pueyasoori tari tohuateecanu na sequesano pajaniyara, na samiitianishacariuhua Jesu, naatej, taa David jaaquequejonee Salmojinia na sequesano quiyacuajani. Naa naajiotasano quiyari segundo Salmojinia:

“Quiaari cua Nyanucujaja. Janiyari quiarijia quia samiitianiriini”.

³⁴ Pueyasocujajaari sequequiaari, nojuacuajaari na samiitianiniutianiuhua na moqueyaquiniucujaji na raaco. Nioori naajiotasano quiyajuhuaj tariucuacaanu Pueyaso Rupaajinia. Naa sequeyari:

“Janiyari maninia niaara miiniutianiyani taa cua sequequiaari Davidcujani”.

³⁵ Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na moquenura”.

³⁶ Pueyanaa, paari seetanujuanaa niishiyani Davidri puetunu Pueyaso panishano na miiniu nuhuajijanaa shaajequiaari. Nojuajaari na supuetanaa rupuequiaari macunucua quiquiojinia. Na cuaqueyari seetanujuanaa moquequiaari cutara. ³⁷ Noo Jesu saniniujia, Pueyaso cutaraari na samiitianiquiaariuhua. Majaari na moquenu quiquiaari cutara. ³⁸ Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua tiuuri, niaari sesa nia miishanojiniji

jiyanooshaanutaniya. ³⁹ Moisés Rootasanojinia, paari tariucuaaanu niishitiojosaaquiaarini pa seya pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniuuja. Majaari seetanujuanaa pa jiyanooshaanu quiquiaari naa pa miishacaritij. Quiarijia cutara, canapueete Jesuucua tiuya saniniunijia, nojoriiri puetunu sesa na miishanojinijianaa jiyanooshiya. ⁴⁰ Niaa cutaraari cocuaatia miiniutianiya pueyanaa, nia jaara cua pohuatasano ruoretare. Pueyasoori na tojiyashijica saniitionutaniya taa tariucuaaanu Pueyaso sequesano caminiujiuniana sequequiaaricujani. Naa sequetuquiaariiri:

⁴¹ “Nia tojitiare, rerequetejacanaa. Niaari jiuujiatenutaniya najuhuanaj. Na nuhuaji, niaari shaajasaanutaniyajuhuj. Janiyari Pueyasoni. Janiyari tarijia nia niquishoo casaa miiniutianiyan. Tamasaca jaara nia pohuatate, niaari saaja na cuaracashitiniutianiya”.

⁴² Na nuhuaji, Pabloori narta Judiocuaca rerejojua tiajiniji tohuareetaquiaariuhua na cojiniaata. Taucuacaari tii quiriquiaajuhuj. Nio taucuaari Judiocuacaacua pacunaa quiquiaari, Judiocuaca nojori quiniurijuhuj, Pueyaso sequesano tojtianaara na quiniuria. Nojoriiri Pablo sequequiaari, Bernabeenio:

—Niocua tamonu sábado canaa pohuatareeruhuj, socua canaa tojiniuria Jesujiniji.

⁴³ Nojori quiojosacariuhua Judiocuaca rerejojua tiajiniji, queraatia narta Judiocuacaari nojori nuhuajiquiaari, queraatia taucuaajinijinio Judiocuacaacua pacunaanio. Cuno pojoriiri maninia Moisés niishitiojosano tojtianaara quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta naa rootaquiaari nojori:

—Saaja Pueyasocua tiuujiaca nia quiri. Majaari nocuaji taacanuunu. Nojuacuajaari pa cumaquijia.

⁴⁴ Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniucua rerejojuaari.

⁴⁵ Judiocuaca secojojua tia camarucua jaara niquiquiaari queraatia pueya na rerejojuaajinia mishiyano, Pablo pohuatasano na tojtianura, nojoriiri juaaquiouquiaari. Nojoriiri tama sequetooquiaarijiaaja:

—Puetunu pueyajanaari cuno pojori tojtiajacara quiniutianiya. Pa tojiyaquiniutianiya saniniuurijia.

Naa sequeturiquiaa pueya niquiara Pablojinijiaariuhuj:

—¡Pabloori maja maninia na niishiniu Pueyaso rupaa! ¡Najuhuaana sesa pohuataano! ¡Nojuajaari niishiyashijia!

⁴⁶ Pabloori saaja Bernabeeta sequequiaari na puereyaquiniutia:

—Maniniacuajaqui, cuarta Judiocuacanaa. Canaacuajaari naa panitija niajanijatej, Pueyaso rupaa canaa coteetanura pohuatanu niajanija, Pueyaso saquiriojosano Judiocuaca nia quiniucua. Niaacuajaari saa na ruuretareejaa. ¡Majaquiiri nia rishiniu paniniu, pueyaracaanu nia quiniuria Pueyasa! Quiarijiani, canaari saniniuuja taucuaacua quianutianiyan, Pueyaso rupaa canaa pohuatanura nojori niquiara. ⁴⁷ Canaa Jiyaniijia jaara canaa jiyaramiquiquiaari, nojuajaari naa canaa sequequiaaritij: “Quia jiyatequiaari mijirica cuhuatariquianonijia. Quia pohuatasano janiyajinijiri caminiujiushaanutaniya taucuaa niquiara puetunu jiya puequeetujiniana, Pueyaso jiyanooniuria nojorijuhuj”.

⁴⁸ Cuniqiu quiniaa taucuaa jaara naa tojiquiaari sequeshyanotej, nojoriiri shuquiriquiaari. Pueyaso rupaa maniniuhuaqueetareeri. Sequetureeri:

—¡jihanohua maninia pa Jiyaniijia Pueyaso rupaa!

Teyano pueya Pueyaso saquirojoquiaari tariucuacaanu na pueyara quiriquianocujani, pueyaracaanu nata rishiniuriacuajani, jiyacaritij, nojoriiri Jesuucua tiuququiaari. ⁴⁹ Jiyaniijia rupaari pohuatasaaquiaari puetunu cuno jiyajiniajanaa. ⁵⁰ Judiocuacaari na juaaniutia Pueyaso panijia maajipohua shiniujuquiaari na kojitiuniuria nojori, nojori miiniuria naquiya Pablo, Bernabeenio. Naa rootatuquiaari cuno tiacajiniji camarucujarihuaj, mariyata cuno jiyajiniji nojori taanuunura Pablo, Bernabeenio. ⁵¹ Naaratej, na nuhuajiria, Pablo, Bernabeenio, nojoriiri na niohuacajiniji seseeca rapijionuutaquiaari. Naacuajitij, Antioquiya tiacajinia quiniaa pueyari niishiquiaari, Pueyaso saniitiosacari nojori, majaari nojori Pabloocua, Bernabeecua na tiutianu quiniutianiya Pueyaso jiyanoyaquishacari nojori. Na nuhuaji, Pabloori Bernabeeta cuno tiacajiniji quiaquiaari Iconio tiacajinia. ⁵² Jesuucua tiuuniaa pueyari saniniuujia shuquiriaatia jateequiaari Antioquiya tiacajinia, nojori jiiitiasacari Pueyaso Sohanu.

14

Pablo, Bernabé quishacari Iconio tiacajinia

¹ Pablo, Bernabeeta naa miiquiaarijuhua Iconio tiacajinia. Nojoriiri narta Judiocuaca rerejovia tiajinia tiuquitiaquiaari. Nojoriiri tii pohuataquiaari Jesujiniji puetunu nojori niquiarajanaa. Queraatia pueyari Jesuucua tiuququiaari, Judiocuaca, taucuacanio. ² Noojiaqueya Judiocuacajinijinoori maja na tojinu paniniu quiquiaari Jesujiniji pohuatasano. Cuno pojoriiri taucuaca shiniujuquiaari nojori juaaniuria Jesuucua tiuuniaa pueya. ³ Pabloori, Bernabeeta cunora socua jijojequiaari pueyaraaanu cuniqui, Jesuucua tiuuniaa nojori cumaquiniuria. Nojoriiri maja na puerenu quiquiaari Jiyaniijajiniji nojori pohuatasacari. Seetanujanaa, Jiyaniijiaari nojori naacuquiaari jyanohua cutara maninia miishano nojori miiniuria, pueya naatanijonurajuhuj. Jiyaniijiaari nojori naacuquiaari cuno pueya niishiniuria, seetanujanaaari quiquiaari Pablo, Bernabé pohuatasano. ⁴ Cuno tiacajinia quiniaa pueyari raquitiquiaari. Noojiaqueyari tama narta Judiocuaca tojiquiaarijiaaja. Saniniuujia, tamasaacari Jesu jiyaramiquishano pueya tojijlara quiquiaari. Nojoriiri naa quiquiaari cuno tiacajinia. ⁵ Naa nojori quishacaritij, Judiocuacaari taucuacata roojotooquiaari cuno tiacajinia jiyaniijianucata. Naa roojotooquiaariiri nojori sesacanura Pablo, Bernabeenio, na jacutunura saitiajuhuj. ⁶ Pablo, Bernabé jaara niishiquiaari naa cuno pueya miiniu panishacari nojoritij, tiji mashiyocuatuhuaariiri Licaonia jiyajiniara. Nojoriiri Listra tiacajinia quiojoquiaari, Derbe tiacajiniaranio, cuno caapiqui tiaca shocua quijiaa tiacajiniajuhuj. ⁷ Nojoriiri tii poojotaquiaari Jesujiniji nojori niishishano.

Listra tiacajinia pueya jacutusacari Pablo saitia

⁸ Listra tiacajinia quiquiaariiri sesarunocua pueyano. Majaari na rucuanenu quijia. Nojuajaari naa rasaanuquiarijuhuanajaj. Majaari na pooniniu quijia na cajitujiniji. ⁹ Cuno pueyanoori Pablo tojiriqiaa na pohuatasacari Jesujiniji. Pablo jaara na niquiquiaari, na niishiriiri nojuajaari seetanujanaa tiuuriquiaa na pohuatasanoocua. Naa Jesuucua na tiuuniucuatej, Pabloori niishirii cuno pueyano na naata na cashacu jeequenuhua. ¹⁰ Pabloori jiyamitia jyanohua na sequeree:

—¡Maninia quia nujuare! ¡Maja porequetanu!

Cuno pueyanoori ritia sanequee. Rucuanenu saniriiri. ¹¹ Cuno Licaonia pueya jaara niquitiuquiaari naa Pablo miishanotej, nojoriiri tama na rupaa-jiniijaaja sequetuquiaari:

—¡Cumaacaraca quijiacaari juhua pueyasohua pocua rosetareeni, juhua pueya niquishano!

¹² Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupaajiniijaaja. Cuno pueyari Bernabé sesojoree Júpiterta, juhua nojori pueyaso sesa. Pabloori sesojosaareecujua Mercurio, jiyanoehua pocuanu niishijia na quiniucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiiitiasano juhua na pueyasohuara cuno jiyajinia. ¹³ Júpiter secojo-jua tiiari Lистра tiaca tohuateya shuriucua quiquiaari. Jiyacaritij, Júpiter secojo-jua tia cojuanaari juyaca jaatucunuquiaari, Pabloocuara nojori puecoosocoriquiiano Bernabeecuaranio, juhua nojori pueyasohuacuara. Maniniushitijara naana shuucuaca shiyosano patootaquiarijiaariuhuj. Cuno pueyanoori puetunu pueyatjanaa Pablo, Bernabé shuquiritianu paniriquiaa juucua, juyaca na puecoosacari nojoriicuara juhua Pueya-soocuara. ¹⁴ Pablo, Bernabé jaara niquiquiaari naa cuno pueya miiniu paniyano nojoritij, nojoriiri na toqueya sutaquiaari nojori tacaaniutia. Pueya tajiniaaco netecuatuquiaariiri nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquiiano juanaa:

¹⁵ —¡Pueyanaa! ¿Casaara naa nia miya canaani? ¡Canaari nareja pueyani taa nijaniyacuaani! ¡Canaari naacua niyarucuaa niaacuatej canaa sequenura nijaniya, puetunu nio najuhuaana nia miishanojuanaa nia cartenura! ¡Saaja nia shuquiritiare cutara pueyaracaanu rishijia Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu na niquishanojuanaari na shipinishano. ¹⁶ Pueyasoori tarijia puetunu pueyajanaa tarinitiaquiaari nojori miiniuria tama nojori panishanojuaja. ¹⁷ Naajaa, nojuajaari pa supuetanaa niishitiquiaari cante nojuajani, maninia na miishacari nojoriria. Nojuajaari maru nitiquiaa pajaniyara, pa nataacuaca moritianura, pa miasocoriquiiano pa jiiitianura queraatia, shuquiriaatia pa quiniuriajuhuaj.

¹⁸ Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriicuara na puecoonu panishano juyaca.

¹⁹ Jiyacaritij, Antioquiya tiacajinijinio Judiocuacaari tii tiuquijioseequiaari, Iconio tiacajinijinionio. Nojoriiri cuniqui quiniaa nasojosee Pabloocuara, Bernabeecuaranio. Cuniqui jacaturee saitia Pabloori. Nojori jaara jiyaniquiaari Pablo naasucuaari tari cusoyaree saitia jacusano, na jaatiuquiaari tiacajiniji tamamaari. ²⁰ Jesuucua tiuuniaa pueya jaara rerejoquiaari Pablo shocua, macu na quishacari, nojuajaari saaja sanequiariuhua, saitia jacusano juucua. Na jacunaa tiacajinia tiuquiquiaariuhua saajari. Tariqui cuno tiacajiniji quiaquiaari Bernabeeta Derbe tiacajiniaari.

²¹ Jaara Jesujiniji pohuataquiaari tii, queraatia pueyari Jesuucua tiuquiaari. Na nuhuaji, nojoriiri Derbe tiacajiniji riujiuutiaquiariuhua. Tiuquijioquiariuhuari Lистра tiacajinia, Iconio tiacajinia, Antioquiya tiacajiniano. ²² Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapuete Pueyaso shuriucua quiriqianoni, nojoriiri naquiya miiniutianiya mijiria.

²³ Nojoriiri maninia Pueyaso tojjiaa pueya saquirojotuaaari, nojori jiyatesocoriquiano Pueyaso pueya jitiariquiano. Naa miituaaari puetunu cuno tiacajinijanaari, Pueyaso pueya jitianura tama nojori nacasunaajaaja. Jesu saquirojosano pueyari maja na miaquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jitiariquianoocuaa:

—Canaa Jiyaniijanaa, nio pueya quiocua tiuujiacani, nojori quia naacure quiocua tiuuniaa narta pueya nojori jitianura maninia.

Pablo tacatesacariuhua Bernabeeta Siria jiyajinia Antioquiya tiacajiniara

²⁴ Nojori riujuuniuhua Antioquiya tiacajiniuhua, Pisidia jiya shocotumohuari. Na nuhuaji, tiuquijioquiaariuhua Panfilia jiyajiniaari. ²⁵ Tii Pueyaso rupaa pohuatatuquiaari Perge tiacajiniaari cuno pueya niqiara. Nojori pohuatanu nuhuaji, Atalia tiacajinia quiojoquiaarijiariuhua. ²⁶ Cuniqiji, buquejina jaaretatuquiaari Antioquiya tiacajiniaraari. Cuno Antioquiya tiacaari quiquiaari tee cuniqui narta Pueyaso pueya niaquiaari nojoriicua na juaashiquiacuajani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucuaaanu nojori quiojonura Pueyaso rupaa nojori pohuatanura taucuaa. Cunoori quiquiaari shushajanaa nojori coteenu panishacari rucuanajonu tamaquicua. Naacuajitij, nojori tohuateenu nuhuaji puetunu Pueyaso panishanojuanaa, jiyacari shusha tiuquijioriquiohuari. ²⁷ Antioquiya tiacajinia nojori quishacari tari, nojoriiri puetunu Jesuucua tiuunia pueya masuunujuquiaarijianaa. Cuniqiu pohuataturee puetunu nojori niquiarajanaari, taa Pueyaso naacucanu maninia nojori pohuatasacari Jesujinijini. Pohuatanuquiaarijiariuhua taa Pueyaso taraajetequiaari taucuaa jiuujiani, Jesuucua nojori tiuuniurajuhua. ²⁸ Pabloori, Bernabeeta cuniqui tarishiquiaarijiaara narta Jesuucua tiuuniaata.

15

Jesuucua tiuuniaa jitianaa nacoosacari Jerusalén tiacajinia

¹ Jiyacaritij, Judea jiyajinijinio pueyari Antioquiya tiacajinia quiojoquiaari. Nojoriiri tii sesa niishitiojonu coteequiaari cuniqui quiniaa Jesuucua tiuuniaa pueya. Nojoriiri naa sequeriquiaa Antioquiya tiacajinia quiniaa narta Pueyaso pueyatej:

—¡Pueyanaa, Jesuucua tiuuniaa pueya cuara na cararaatiuuquia co miatejoteera, taa Moisés niishitiojoquiaaricuajani! ¡Jaara miatesoo quiri, majaari Pueyaso jiyanoonu quiniutianiya jiyanotej, na pueya nojori quiniuria!

² Pablo, Bernabeenio, nojori jaara tojiquiaari naa cuno pojori niishitiojotanotej, nojoriiri cuno pojoritia nacojoquiaari jiyanohua. Naacuajitij, Antioquiya tiacajinia quiniaa Pueyaso pueyari Pablo, Bernabé sequequiaari nojori quianura noojiaqueya cuniquijinio pueyata Jerusalén tiacajinia. Nojori jiyaroreeri na nequesotanura Jesu jiyaramiquishano pueya Jerusalén tiacajinia, mariyata Jesuucua tiuuniaa pueya jitianaa. Nojoriiri jiyaramiquishaaree cuno pojori nequesotasanaa, ¿seetanutejanaa naa miishiyatena, taa cuno Judea jiyajinijinio nijiono pueya niishitiojiya canacuajani?

³ Naacuajitij, Pabloori Bernabeeta jiyarosaquiaari Jerusalén tiacajiniara. Nojori quiasacari Jerusalén tiacajiniara, Fenicia jiyacuma quiojomaquiaari-iri, Samaria jiyacumanio. Nojoriiri cuno jiyacajinia Pueyaso pueya pohuatanuamaquiaari taa taucuaca cartequiaari tama sesa nojori miishanojuaa-jani, Pueyaso tojjijara nojori quiniuria. Jesuucua tiuunaa pueya jaara naa tojiquiaaritij, nojoriiri jiyanoahua shuquiriquiaari.

⁴ Nojori tiuquiijosacari Jerusalén tiacajinia, puetunu Jesuucua tiuunaa pueyajanaari nojori rerejotaquiaari, mariyata puetunu Jesu jiyaramiquishano pueyajanaano. Pablo, Bernabeeri jiyacari nojori pohuataquiaari puetunujuanaa, naajuhuj, taa Pueyaso naacuquiaari maninia nojorini, nojori pohuatasacari taucuaca Jesujiniji. ⁵ Cuniqui quiriquiaajaariuhua Fariseocuaca, tariucua Jesuucua tiuujiaca. Cuno pojoriiri rerejonaa tajiniji nujuatuquiaari. Naa sequetureeri:

—Cuno taucuaca Jesuucua tiuunaa, na cararaatiuuquia co cuara mi-atejosaaria Judiocuaca nojori quiaquishacari. Na nuhuaji, nojori cuara Moisés niishitiojosano tojjijara quiiria, taa Moisés rootaquiaari tariucua-caanucujani.

⁶ Naa nojori nacojonu nuhuajitij, saa Jesu jiyaramiquishano pueyajaari rerejoquiaari jiyareta Jesuucua tiuunaa narta pueya jiiianaata. Nojoriiri maninia niishiriojonuuquiaari taa na miiniutianiyani. ⁷ Naa pueyaracaanu nojori pocoojosacaritij, Pedroori socua nojori tajiniji nujuaquiaari. Naa nojori sequereeri:

—Pueyanaa cua tojitiare. Niaacuajaari niishiya, pa Jiyaniijaari cua saquirioquiaari na rupaa pohuatariquiano taucuaca tojishocoriquiano, nojori tiuuniuria Pueyasocujuhuj. ⁸ Pueyasocujajaari poojia niishijia. Nojuajaari cuno taucuaca niishitiquiaari, nojuajaari nojori jiyateree na pueyarajuhuj, na Sohuanu na niqutiosacari nojori, taa na niqutioquiaari pajaniyacuaani. ⁹ Majaari nia jiyaniinu Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya paniyanaa. Cuno taucuaca jaara nocua tiuquiaari, nojuajaari nojori jiuujia jeequereejuhuj saaja Jesuucua nojori tiuushacari. ¹⁰ Naa nia tamacasacari taucacajinijinio parta Pueyaso pueyatej, niaari Pueyaso miishano soojotaaruhua. ¿Casaara nia tamacaa Pueyaso miishanoni? Niaari quiarijia Moisés niishitiojosano tojitiniu paniya Jesuucua tiuunaa pueya, juhua pa tojishanocuaa. Saniniuujia, majaari quenaaja pa supuetanaa na naata na miiniu quiquiaari puetunujuanaa, taa Moisés niishitiojoquiaaricujani. ¹¹ Paari niishiyani pa Jiyaniija Jesuuri pa jiyanoojia. Naaratej, pa jiyanooquiaari, na pueya pa quiniuria. Mariyata naa miiquianu cuno taucacajaariuhuj. Majaari seetanujuanaa maninia pa miiniu quiquiaari pa jiyanooshaanura.

¹² Naa Pedro sequesacaritij, puetunu pueyajanaari socua sanaajetaquiaari. Bernabeeri Pablota jiyacari pohuataquiaari taa Pueyaso na cumacata miitiquiaari maninia taucuaca niquiarani, naajuhuj, taa nojori naatanijioquiaari cusosuhujaniuhua. ¹³ Naa nojori pohuatanu nuhuajitij, Santiagoori sequesaaarijuhuaj:

—Cuarta Pueyaso muerasunaa, cua tojitiare. ¹⁴ Simón Pedrocuajaari tari pa pohuataree taa Pueyaso coteecanu shusha na Sohuanuta poonijionura cuno taucuaca jiuujiajiniani. Pueyasocujajaari nojorijinijinio jiyateya seetanujuanaa na pueyara, nojori manihuuaqueetanura nojuaja. ¹⁵ Seetanujuanaari nio. Naajuhuj, tariucuaanu Pueyaso sequenu panishano caminiujuuniaacuajaari naa naajionuataquiaari Pueyaso sequesantej:

16 “Janiyari David niqiuohuacuajinio mueratenutaniya tamonu pueyanoni. Davidcuajaari na supuetanarano. Nojuajaari Jiyaniijijanaa quiriquiano puetunu pueyapuerajanaa, taa David quiquiaari Israel pueya jiyaniijiacuaani. 17 Naacuajitij, puetunu taucuaajanaari cua pajenuunutaniya, noo pojori teyano cua saquiriojoquiaari tariucuaaanucujani, nojori jiyatesocoriquiano na Jiyaniijiaara janiya’. 18 Jiyaniijiaari naa sequeyaquij. Nojuajaari tariucuaaanu pueya toquiaari nio”.

19 ‘Naaratej pueyanaa, janiyari nia sequeyani, nareja nia niqiri cuno taucuaa, Jiyaniijia Jesuucua tiunuaani. Majaari nojori najiquitiniu Pueya-soocuaaji, nia tojitiniu panishacari nojori tariucuaaanu Moisés niishitiojosano. 20 Nareja nojoriucuaa pa naajiore. Pocua pa naajioneeginia sequere nojorini, maja tari nojori miaquenuunura shipinishano pueyasocuaa na puecootusanu casaa, juunu, borregonio. Cuaara quitiuuria saa necocuataja, maja tamonu na numetucunura socua. Jaara shu miaquetunu paniri, cuaara na miaqueera puetunu na nanaca caatinijiasanojuanaa, naajuhuj, maja na miaquenuunura casami nanaca. 21 Puetunu nio cua sequesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tiajiniaqueya naa serojosaaquiaa Moisés naajioneeginiji puetunu samaatenu juucajanaa, puetunu tiqiyocua tiacajinijanaa.

22 Naa nojori pocoojonu nuhujitij, Jesu jiyaramiquishano pueya, puetunu tii quiniaa Jesuucua tiunuaa pueyajanaanio, nojori jiiitianaajuhuj, puetunu nojorijianaari mariyata niishiriojonuquiaari. Naacuajitij, nojoriiri narta Pueyaso pueya saquiriojotuguiaari na jiyarotusocoriquiano Antioquia tiacajinia Pablota, Bernabeetanio. Jiyacari saquiriojosaareeri Judas, Silasnio. Judas sesaari Barsabás quiquiaarijuhuaj. Cuno pojoriri Jesuucua tiunuaa pueya tojishano quijia cutara, cuniqui Jerusalén tiacajiniani. 23 Nojoritia jiyarotasaquiaariiri naajione. Cuno naajioneeginiaari niaa sequequiaari:

“Niaacuara naajionaani, canaari Jesu jiyaramiquishano pueyani, Jesuucua tiunuaa jiiitianaanio, Jerusalén tiacajinia niarta Jesuucua tiunuaa pueyajujuhuaj. Canaari nia saruhuataani pueyanaa. Taucuaa nia quishacari, naajaa. Jesuucua tiunuaa nia quishacari, niari canaa tapueyocuaajuhuj, tiqiyocua Antioquia tiacajinia quijiaa, Siria jiyajinia quiniaanio, Cilicia jiyajinia quiniaajuhuj. 24 Canaari najaniyajiniji pahuatasarucuaani, niqijij pueyanaari niaacua quiacanu. Canaa nia jiyanoori. Majaari canaa jiyaronu quiqianu nojori. Cuno pojoriniaari nia taajetecanu tamaatia nojori niishitiojosacari najaniya. Naajuhuj, nia cushitioceanuuri nojori sequesacari nia cararaatiuquua co nia miatejonura taa Moisés niishitiojoquiaaricujani. Nojoriniaari nia shiniujuquianu nia tojitanura socua Moisés Rootasanojuhuaj. Quiarijia maja naate pueyanaa. 25 Naaratej, saa jiyareta canaajaari niya rerejoreeni canaa niishiriojonura canapue canaa saquiriojonutaniyani niaacua jiyaramiquishocoriquiano. Canaari nojori saquiriojoree tarini canaa jiyarosocoriquiano Pablota, Bernabeetanio, nojori pocoojoriquiano maninia niaata. 26 Canaa panishano pueya Pablo, Bernabeenio, nojoriiri tama na cuaqueya panitiaquiaarijiaaja Jesujiniji nojori pahuatasacari tiqiyocua. 27 Quiarijiani, canaari niaacua jiyaroya canaajinijinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miniutaniyani, naatej, taa canaa pocoojoree canaa rerejosacaricujani. 28 Canaa niishiriojosanoori maninia quiya Pueyaso Sohuanura. Canaari na shuqiritiaajuhuj. Majaari canaa

cushitionu paniniu niajaniya puera canaa supuetanaa niishitiojosanota najuhanaj. ²⁹ Canaari saaja nio nia sequenu paniyani pueyanaa. Nia tojitiare. Majaari socua nia miaquenu shipinijosano pueyasohuacuara pucoosano casaa. Majaari nanaca miaquenu. Naajuhua, niaa jaara shu miaquenu paniri, nia miaquere maninia na nanaca caatinijasano. Naajuhua, saaja nia niquiocoahuata nia quiriquia. Majaari socua tamonu numuetucunu. Niaa jaara nio tojijia quiri, niaari maninia miyacuaja. Tariucuaja pueyanaa”.

³⁰ Naacuajitij, cuno cuatro pueyari jiyarosaaquiaari Jerusalén tiacajiniji. Jaara tiuquijioquiaari Antioquiya tiacajinia, nojoriiri puetunu Jesuucua tiuunaa pueyajanaa numootejoquiaari na rerejonura. Puetunu nojorijanaa jaara tari rerejoquiaari, jiyacari niquitiosaaquiaariirri cuno naajionee puetunu nojori niquiarajanaa serojosocoriquiano. ³¹ Naajionee jaara serojosaquiaari, puetunu Jesuucua tiuunaa taucacajanaari shuquiriquiaari jiyanohua. Naacuajitij, nojoriiri noojia cajitiquiaariuhua tacaquioyano juucua. ³² Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohanu cumaaca jitiaquiaari, Pueyaso sequenu panishano nojori caminiujiuniuria. Naacuajitij, nojoriiri Jesuucua tiuunaa pueya cumanijiaquiaari jiyanohua. Na rootatuquiaariiri maja nojori tarinitianura Jesuucua tiuuniu. ³³ Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajiniohua na jiyaronaacua, Antioquiya tiacajinia quiniaa Pueyaso pueyari nojori sequequiaari:

—Maniniacuaja. Juhuaaniya nia quiaarohuaqui.

³⁴ Silasri saaja na cojiniaacuaji jatequiaari cuniquijia Antioquiya tiacajinia. Naacuajitij, Judasri tamajaaja tacatequiaariuhua Jerusalén tiacajiniohua. ³⁵ Pablo, Bernabeeri Antioquiya tiacajinia camueenujuquiaarijuhua. Nojoriiri cuniqui Jesuucua tiuunaa pueya niishitiojoquiaari. Queraatia cuniquijinio pueyari nojori rupuequiaari niishitiojonurajuhua. Puetunu nojorijianaari Jiyaniijia Jesujiniji pohuataquiaari tamasaca niquiarajuhua.

Pablo pacutenu panishacariuhua quianu Pueyaso pueya na niqiniuhua

³⁶ Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocua socua niqiniuhua, paa tii pohuatcanu Jiyaniijia rupaatej. Naa pa miiri pa niishiniuria taa parta Jesuucua tiuunaa pueya quiyani.

³⁷ Bernabeeri na riucaaree:

—Jajaa. Juan pa riyarecurajaj, pa tarajariquiano.

Juan sesaari Marco quiquiaarijuhua. ³⁸ Majaari Pablo paniniu quiquiaari Juan quianura nojoritia. Nocuaji Bernabé sequequiaariiri:

—¿Paatucua casaara rupoyare pocua Marco saajaraniuhua? Nojuacuajaari pa tiujiaquiaariuhua Panfilia jiyajinia pa quishacari. ¿Pueyaso rupaa pa pohuatasacari pa tarajacanu maniniatucuaa? Naacuajaa.

³⁹ Saa nojorijiaari socua juayonuutaquiaari Juan Marcoocua. Nocuaji Bernabeeri jiyacari Pablocuaji rupatequiaari. Na rupatesacari na rupeua Pablojiniji, nojuajaari Juan riquiaari cutara na tarajariquiano. Jiyacaritij, tama nojorijiaarijia buquejinia quiaquiaari Chipre jiyajiniara.

⁴⁰ Pabloori saniniujia Silas saquiriojoquiaari na tarajariquiano. Nojori quiaaquishacarijia, Jesuucua tiuunaa pueyari nocuara Pueyaso secojotuguiaari. Naa na miitiuniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pohuatanura. ⁴¹ Nojori quiasacari Jesuucua tiuunaa pueya shiniujiuniucua, Siria jiyacuma tajitiumiaquiaariiri,

Cilicia jiyacumano. Pabloori cuno jiyaca tiacajinia socua poojotaquiaari Jesujiniji. Naa cumaquiquiaari Jesuucua tiuunaa pueyari.

16

Timoteo cojishacari Pablo, Silasno

¹ Pabloori Silasta tiuquijioquiaari Derbe tiacajinia, Listra tiacajinianio. Tii riuriatatuquiaari Timoteo jiyanihano pueyanoori. Cuno mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiuunajuhuj. Timoteo queeri tahue quiquiaari cutara. ² Listra tiacajinia Jesuucua tiuunaa pueyari Timoteo maniniucuatujua. Naa sequetujuaari nojori: “Timoteori jyanohua maninia pueyano”. Iconio tiacajinijinio Jesuucua tiuunaa pueyari naa sequetujujuhuj. ³ Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuquua co miatetequiaariiri, cuno jiyajinia quiniaa Judiocuaca sojotanucuaaji nojuaja. Puetunu pueyajanaari na niishijia, na queeri seetanujuaanaa tahue quijia. Nocuaji naa miishaareeri. Na nuhuaji, Timoteo cutaraari Pablo cojiquiaari. ⁴ Pabloori Jesuucua tiuunaa taucuaca niquiquiaari puetunu tiacajinijanaa. Nojori niquiara caminiujuquiaari Jerusalén tiacajiniji Jesu jiyaramiquishano pueya sequesano nojoririari, mariyata Jesuucua tiuunaa pueya jiiitanaa sequesanojuhuaj. ⁵ Naa Pablo caminiujuhacariiti, puetunu Jesuucua tiuunaa pueyajanaari socua noojia cumaquiquiaari jyanohua. Tamasacaari socua Jesuucua tiuqujaarjihuaj. Jesuucua tiuunaa pueyari naa canequiaari socua. Naa caneriquiaa puetunu juucajanaari.

Pueyaso Sohuanu tosacari Pablo, Macedonia jiyajiniara na quianura

⁶ Na nuhuaji, Pueyaso Sohuanuuri Pablo tenujuquiaari maja nojori pohanatunura Jesujiniji Asia jiyajinia. Naacuajitij, nojoriiri Frigia jiyacuma quiojquiaari, Galacia jiyacumano. ⁷ Naa tiuquijioseequiaari Misia jiya shurucuaari. Nojoriiri cuniquiji quianu paniquiaari Bitinia jiyajinia juucua. Naajuhuj, majaari Pueyaso Sohuanu paniniu quiquiaari tii nojori quianura. ⁸ Cunora, Pabloori na cojiniaata cuaniquiaari Misia jiyacuma. Troas tiacajinia tiuquijioseeri. Nio Troas tiacaari shoniniacu caminia casaqueyaji quia. Tiiri buque tiutiacojua. ⁹ Pabloori cuno niucua juhua na maquenujina niquiquiaari Macedonia jiyajinijinio pueyano nocua nujuaano. Cuno pueyanoori Pablo sequequiaari: “¡Miji! Canaa quia naacutaquee Macedonia jiyajinia”. Cuno Macedonia jiyari quiquiaari shoniniacu caminia taquijiria. ¹⁰ Naa Pablo niqiniu nuhuaji juhua na maquenujinatej, canaari jiyacari ritia pajequiaarini taa canaa quianutaniya cuniquijini. Canaari sequeereni: —¡Pa quiaarequi! Pueyasocuaajari pa panitiaa Jesujiniji pa pohanatunura cuno pueya niquiarajuhuj.

Pablo quishacari Filipo tiacajinia Silasta

¹¹ Canaari Troas tiacajiniji quiaquiaari buquejiniani. Canaari Samotracia jiya tucuaatijaacua tiuquishiini. Canaari cuniquiji sanequiaari tariquiniuhuj, tiuquishiiri Neápolis tiacajinia. ¹² Canaari cuniquiji quia-maa Filipo tiacajiniani. Filipo tiacaari socua panishano tiaca quiquiaari tamasa tiacajiniji Macedonia jiyajinia. Roma tiacajinijinio pueyari tii pacuquiaari tarijia. Nojoriiri cuno Filipo tiaca jiyatequiaari nojori quiquiora. Canaari tii camueenujuquiaari rupaquijiani. ¹³ Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jiiitiquiaari Pueyaso secojonura. Canaari tii narejashiquijia cajitiquiaari mariyatani.

Jiyacaritij, maajipohuari cuniqui rerejoquiaari na secojonuunura juucua. Canaari saaja nojori niquiara pohuataree Jesujiniini. ¹⁴ Cuniqui maa-jipohua rerejosaquini, nojori tajinia quiquiaariijaariuhua tamonu maaji. Na sesa quiquiaari Lidia. Nojuajaari Tiyatira tiacajiniini quiquiaari. Shanohua quenaaruqueya naatuque toqueya niqutiojojua quiquiaari na cumaneecaraari. Nio maajiiri tarijia Pueyaso secojojua quiquiaari. Tii na quishacari, Pablo pohuatasano tojiriquiaari. Pueyasoori jiyacari na tojeferee. Juhua noojia riatareeri seetanujanaa Pablo pohuatasano na tojiniuria maninia. Jesuucua tiuuriiri. ¹⁵ Na nuhuaji, Lidiaari puetunu na tiajinia quiniaatajanaa tiuquinijosaaquiaari moojinia. Canaa tiuquinijionu nuhuaji puetunu nojorijianaa, Lidiaari canaa sequequiaari:

—Niaa jaara cucuaji taacanuyaquiri, mihi, nia quishii cua tiajinia. Janiyari pa Jiyaniijia tojijiajuhuaj.

Nojuajaari seetanujanaa canaa panitiaquiaari na tiajinia canaa quini-uria. Naacujitij, canaari na tiajinia camueenujuquiaarini.

¹⁶ Tamonu juuca, socua canaa pacutesacari quianu pueya secojonuu-juajiniara, canaari samaruraca niyacoo niquiquiaarini. Cuno niyacoori camaruharaca quiquiaari. Niyacoori “niishijia samaru” jiitiaja. Naaratej, cuno niyacoori puetunu pueya niishiniu panishanojuanaa pohuataja no-joriria. Naa na miishacaritij, na camaruhuara maseja queraatia cumaneecaraari. ¹⁷ Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—iNio canuu cutaraari jiyocuacaanuji Jiyaniijajinihi pohuataana! Nia ni-shitiojiyari Pueyaso jiyanooshano nia quiniuria, pueyaracaanu nia rishini-uria nata.

¹⁸ Saa naa canaa nuhuaji nacajaari, cuno tiacajinia canaa camueenu-jusacari. Pabloori socua na juaatiaquiaari. Nocua tacatequiaariiri. Cuno niyacoojinia quijia samaru sequereeri:

—janiyari Jesucristo sesajinia quia jiyaroyani! ¡Cuno maajijinihi quia tohuatare!

Naa Pablo sequesacaritij, samaruuri na tojiquiaari. Ritia tohuataquiaari cuno niyacoojinijiri.

¹⁹ Cuno niyacoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyacoo pohuatasano-jinihi. Naaratej, nojoriiri Pablo, Silas quiooquiaari na juaaniutia. Nojori jaatucunuquiaari tiaca jiuujiajinia curotasano pueya cajitiucujiniaraari. Tiaca jiyaniijianucuaari tii quijitaca pueyaracaanu, nojori jiitianura pueya.

²⁰ Niyacoo camaruhuari Pablo, Silas nujuatejoquiaari tiaca jiyaniijianucua tacoji, cuniqui na nequesoreesaanura. Jiyaniijianucua sequetureeri:

—iNio canuuri Judiocuaca! Nojoriiri niya pa tiacajinia quiniaa pueya juaatijiosee. ²¹ Nojoriiri tamaatia niishishano niishitiojonuya. Maja cumaati pa tojiniunioj. ¡Paari Romano pueyani!

²² Naacujitij, puetunu cuno pueyajanaari na juaaniutia, Pablo, Silas cose-quiaari ritia. Jiyaniijianucuaari nojori toqueya jaamitiquiaari jiyano-hua, na jocojosacari nojorijinihi. Na nuhuaji, tamasaari seerataasaaree no-jori na mojonura macata. ²³ Jiyano-hua na mojoosaanu nuhuaji, no-joriiri socua na tiuquinioquiaari nujuatejojuajinia. Na nuhuaji, nuju-atejojua tia camarnu seerataasaareeri maninia na cojuatenura nojori nu-juatejojuajinia. ²⁴ Naacujitij, cuno nujuatejojua tia camarnuuri Pablo, Silas nujuatejoquiaari socua mij, nujuatejojua cariquimiatej. Cuniqui nu-juatejosaquiaariiri tii na cojuasaanura maninia, na mashiyocuatunuu-cuaji. Nojori cashacuaari suruhuatuneece quejasano tajiniocoma saati-jiosaquiaarijuhuaj.

²⁵ Cuno niucua shiyaqueya, Pabloori Silasta Pueyaso secojonuuriquiajaa. Pueyaso maninihuaqueetaturiquiaari na jaaquequejosanota. Cuniquri nujuatejosano pueyari nojori tojitiariquiaa. ²⁶ Jiyacaritij, rijiaari canashyaquiji jiuuquiutiaquiaari jiyanhua cuno nujuatejojua tia. Puetunu na tootiuhuajanaari riatequequiaari. Puetunu pueya numatucuaacua morojotasano casaajanaari tamajaaja saacarejetaquiaari. ²⁷ Nujuatejojua camarnuuri ritia niucuaquiaari. Saaja niqiriiri puetunu tohuateya riatequenोजनाari. Cunora, na nijiniaquetucujaja mueruu shitiaree ritia na shuucuaajiiri tama na cuaqueya na miaquenurajaaja. Naa miiriiri na jiyanishacari puetunu nujuatejosano pueyajanaa naasucuaari tari mashiyocaturee. ²⁸ Pablo jaara na niqiquiaari, nocua nacareeri:

—¡Maja najuhuana naa miiniutij! ¡Canaacuajari puetunujuanaa niya quiyani!

²⁹ Nujuatejojua camarnuuri na shiriinquiniutia tetecariquiaa. Tamonu sequereeri ritia samaritiu na patanura nocua. Samaritiu caaniuji netequee cutaraeri nujuatejojua jiniacumara. Pablo, Silas cariquimiaji mojuquetaseeri.

³⁰ Jiyacari nojori tohuatejoree carijiniacumaari. Nojori nequesotareeri:

—¡Pueyanaa! ¿Taa cua miyarinijia, Pueyaso jiyanooshano cua quiniuria-juhuaj?

³¹ Nojoriiri na riucuree:

—Jiyaniijia Jesucristoocua quia tiuuri jiyanooshano quia quiniuria, puetunu quia tiajinia quiniaa quiniuria jiyanooshanojuhuaj.

³² Naaratej, Pabloori Silasta na niquiara pohuataree Pueyaso rupaa Jesu-jiniji, mariyata puetunu na tiajinia quiniaajanaa niquiaranio. ³³ Jiyacaritij, nujuatejojua camarnuuri cuno niucujaja Pabloocua jiyanoocuaiaari, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno pueyajanaari ritia tiuquiniijosaaquiaari moojinia Jesucua nojori tiuushacari. ³⁴ Jiyacari na tiajinia nojori jiyataquiaariiri. Tii Pablo, Silas mianuutereeri. Cuno nujuatejojua camarnuuri jiyanhua shuquiriaatia quiriquiaa puetunu na tiajinia quiniaatajanaa, Pueyasocua tiuuniaa nojori quishacari.

³⁵ Cuno tariqui, Filipino tiaca jiyaniijianucuaari na seya jiyaroquiaari nujuatejojua tia camarnucua, na sequenura nojuaja cuaara Pablo, Silas tohuatanijioora tari. ³⁶ Nujuatejojua camarnuuri Pablo sequeese:

—Tiaca jiyaniijianucua cucua jiyaroree na rupaani, cua cartenura quiar-ijia nijaniya. ¡Juhuajaniya nia quiaarohuaqui!

³⁷ Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano pueyajuhuaj? Canaa mojuoturiquiaacuaa puetunu pueya niquiarajanaari. Majaari co-teenu canaa nequesoreesaanu quiriucuaa. Canaari jiyanojuuaa nujatejosaarucuaani. ¿Taa na miitiuniu paniya quiarijia canaariini, jiyasohuaja tohuatejonu paniniu? ¿Jiyasohuaja mojuoturiquiaacuaa canaatucuaa? ¡Nojorijianaa cuaara niiria quiarijia, niiquiji nojori tohuatejonura canaa!

³⁸ Jiyaniijianucua seya jaara tacatequiaariuhua, puetunu Pablo sequesanojuanaa pohuataquiaari Filipino tiaca jiyaniijianucua niquiarari. Nocuaaji jiyaniijianucuaari pueretuquiaari nojori niishishacari Pablo, Silas Romano pueya quiquiaarijuhuaj. ³⁹ Naaratej, cuno jiyaniijianucuaari ritia quiaquiaari nujatejojuajinia Pabloocua, Silascuanio, nojori jiyanoootionura. Jiyaniijianucuaari nojori tohuatejosee. Nojori sequereeri cuaara quiojoora quenaaja nojori tiacajiniji. ⁴⁰ Naacuajitij, Pablo, Silas jaara tohuareetaquiaari nujatejojuajiniji, Lidia tiajinia quiojoquiaariiri.

Tii rootatuquiaari socua Jesuucua tiuuniaa pueyari, socua Pueyasocua nojori tiuuniuria. Na nuhuaji, tiji quiojoquiaariuhuari.

17

Tesalónica pueya juaashacari Pueyaso pueya

¹ Pablo rucuanijosacari Silasta Jesujiniji nojori pahuatasacari, nojoriiri jiyacari shoconujutuquiaari Anfipolis tiaca, Apolonia tiacanio. Naa tiuquijioseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejojua tia. ² Taate Pablo quijiacuajani, nojuajaari narta Judiocuaca rerejojua tiajinia quiaquiaari. Cuno tiacajinia na quishacari, jiuujanaraca semaana shocotejoquiaariiri. Puetunu semaana shocojosacarijanaa, samaatenu juuca, cuno pueya niquiara pahuataquiaari Pueyaso rupaari. ³ Pabloori nojori niishitiojoquiaari taa tariucuacaanu Pueyaso sequesano caminiujiuniaa naajiotaquiaari Pueyaso Jiyarosocoriquianojinijicuajani. Niishitiojoquiaariiri cuno naajiotasanoori tari tohuateequiaari Jesu jaara naquiya miishaaquiaari, naajuhua, Jesu jaara na cusonu nuhuaji samititiquiaariuhua. Naa nojori sequereeri:

—Nio Jesucujani, janiya nia pahuataani, nojuajaari Pueyaso Jiyarosano pocua.

⁴ Jiyacaritij, nojiaqueya Judiocuacaari Jesuucua tiuquiaari. Queraatia taucuaacari Jesuucua tiuquiaarijuhuaj, canapute tari Moisés niishitiosano tojjiaaca quiquiaaricuajani. Queraatia cuno tiacajinia quiniaa pueya tojishano maajipohuari Jesuucua tiuquiaarijuhuaj. ⁵ Pueyasocua tiuyashijaca Judiocuacatej, nojoriiri juaaquoquiaari juhua shocotasano nojori quiniucua. Nocujaji, nojoriiri sesa miijiaaca tajejori masuunujuquiaari. Nooj, nareja rucoojuaca tiacaacotej. Cuno pojoriiri masuusaquiaari nojori na cojiniuria, tamasaca nojori nasojonura. Na nuhuaji, puetunu cuno pojorijianaa jaara tonujutooquiaari taa na miitniutianiyani, nojoriiri puetunu cuno tiacajinia quiniaajanaa juaatiquiaari Pueyaso pueyacuara. Nocujaji, puetunu cuno pojorijianaari Jasón tiaco tiuquitiaquiaari, Pablo, Silas nojori quioonura juucua, juaaquiyoano pueya nojori niqutiosocoriquiano. ⁶ Nojori jaara na riuriataaquiquiaari, nojiaqueya Jesuucua tiuuniaa pueyari Jasóna cojiritiasaquiaari quioonu. Cuno tiacajinia jiyaniijiaacua na jayotuquiaariiri. Naa nacatureeri:

—iNio canuuri puetunu jiyacajinia pueya sesojijajanaa! iNiya tiuquijioreejaariuhua naa na miiniuriajuhuaj! ⁷ iJasónri nojori masecanu maninia na tiajinia! iPuetunu nojorijianaari pa jiyaniijia César sequesano tojtiaashijaca! iNojoriiri saaja sequequiaa socua tamonu jiyaniijianaari quiya! iNa sesanaari “Jesu”! Naa sequetuquiaaqui nio pojori.

⁸ Puetunu pueyajanaa, mariyata tiaca jiyaniijianucuanio, nojori jaara na tojiquiaari sequeshyanotej, nojoriiri juaaquoquiaari. ⁹ Jiyacaritij, tiaca jiyaniijianucuaari queraatia cumaneeca masequiaari Jasónjiniji, narta Jesuucua tiuuniaa pueyajinjinio. Naa sequeturee nojoriiri:

—iPablo jaara niquiji quiaaquiri, majaari canaa niqutionu quiniutianihua nia cumaneeca!

Naa na miishaanu nuhuajitij, Jasónri nata quioosano pueyata cartequesaquiaariuhua.

Berea tiacajinia Pablo quishacari Silasta

¹⁰ Cuno niucujaja, cuno tiacajinia quiniaa Jesuucua tiuuniaa pueyari Berea tiacajiniara mashiquiquiaari Pablo, Silasnio. Berea tiacajinia na tiuquijosacari, cuniqui quiniaa Judiocuaca rerejojua tiajinia quiojoquiaariiri.

¹¹ Cuniqúi quijiaca Judiocuaca cutaraari maninia pueya quiquiaari, maja juhua Tesalónica tiacajinia quiniaa. Naacuajitij, Pablo jaara Jesujiniji pohuataquiaari nojori niqúiaara, nojoriiri maninia tojtiaquiaari na pohuatasano. Na nuhuaji, puetunu juucajanaa, tama nojoriijaarijia tariucuaacaanu Pueyaso Rupaajinia naajiotasano pajenuuquiaari, nojori niishiniuria seetanujanaa quiriquiaate Pablo niishitiojosano. ¹² Naacuajitij, queraatia Judiocuacaari Jesuucua tiuuquiaari, queraatia taucucanio, canuu, mariyata queraatia tojishano maajipohuanio. ¹³ Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa pohuatasecuhuj, nojoriiri nocua quiojoquiaari nojori taanuunura nojuaja cuniquijijuhuj. Na tiuquijiosacari Berea tiacajinia, cuniqui pueya nasojooseeri, Pablo na juaatiuniuria. ¹⁴ Nocujaji, Jesuucua tiuuniaa pueyari cuniquiji ritia mashiquiaari Pablo shoniniera caminiajiniara. Silasri Timoteota Berea tiacajinia jateequiaari saaja. ¹⁵ Berea tiacajinijinio pueyari Pablo mashitiquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaariuhua cuniquiji Berea tiacajinihuara, Pabloori nojori sequequiaari:

—Niocua ritia jiyarosuhua Silas, Timoteonio. Nojoricua niyaja cua coqueese.

Pablo quishacari Atenas tiacajinia

¹⁶ Pabloori Silas, Timoteo sashiquiaari Atenas tiacajinia. Cuno tiacajinia na rucanejosacari pueya na sashishacari, Pabloori niqúiquiaari tama cuno pueya shipinijosanojuaja na pueyasohuara. Nojori shipinijosanoori puetunu cuno tiacajinijanaa quiriquiaa. Pabloori cunora jiyanhua tacaquiaari. ¹⁷ Pabloori Jesujiniji Judiocuaca poojotaquiaari nojori rerejonuujua tijinia, noo pojori taucucajuhuj, canapúete Pueyaso tojtiajaca quiquiaaricujani. Naajuhuj, Pabloori cuno tiaca jiuujiajia pueya cajitucuaa curotasanojia pohuataquiaari Jesujiniji cuniqui quiniaa niqúiaara. ¹⁸ Tamasaca niishijiaacari Pablo pohuatasacari Jesujiniji tojtiaarquiaa. Nojoriiri caapiqui maapuejinijinio quiquiaari. Tamonu maanuuri sesojosaaquiaari “Epicureohua”, Epicuro jiyanihano niishijia niishitiojosano tojtiajaca nojori quiniuucua. Tamonu maanuuri saniniujia sesojosaaquiaari “Rejeretajaca”. Naa sesojosaaquiaari Zenón jiyanihano niishijia niishitiojosano nojori tojiniuucua. Pablo pohuatasacari nojori niqúiaara, nojoriiri maja na niishitiniuu quiquiaari casaa na pohuatariquiaani. Nocujaji tama nojoriijaarijia sequetooquiaari:

—¿Casaariquitijia cuno paateca pohuataa pajaniyatejaj? Najuhua pocuaa pueyaracaanuuri.

Tamasacaari saniniujia sequetuquiaari:

—Tamasaca pueyasohujiniji poojotana juhuanaruhua.

Nojoriiri naa sequeriquiaa Pablo pohuatanuucua Pueyaso rupaa Jesujiniji, mariyata taa cusonuuno samiitiaconutaniuhuanu. ¹⁹ Na nuhuaji, nojoriiri Pablo jiyataquiaari tuhuananujiniji, tee nojori jitiqúiaari rerejonuunucujani. Cuno tuhuananu sesaari quiquiaari Areópago. Nojoriiri naa sequetuquiaari Pablo:

—Miji. Socua canaa tojishocoriquiano quia pohuataqueeruhuj. Canaari quia pohuatasanojiniji socua maninia niishiniuu paniyani. ²⁰ Quiaari jiya-jeneta sequeriquiaa canaa niqúiaara quia pohuatasacari. Quiarijia canaa quia tore maninia.

²¹ Puetunu Atenas tiacajinia quiniaa pueyajanaa, mariyata tamonu jiyacajinjini cuniqui quiniaajuhua, nojoriiri maja socua tamonu casaa na miitiuniu quijia. Saaja quiarinio sequesanojiniji niishitiuniu panijiaaari.

²² Jiyacaritij, Pabloori Areópagojiniji nujaquaiaari na pohuatanura na tojtianu panijiaa niqiara. Naa coteereeri:

—Atenas tiacajinia quiniaa pueyanaa, janiyari quiarijia niishiyani, naaqui pueyasohuacua jiaatiajaca jyanohua. ²³ Janiyari naa nia sequeyani pueyanaa, cua niqiniuucua queraatia nia shipinijosano pueyasohua, cua rucuanesocari nia tiacajinia. Naajuhua, janiyari saajajinjiji nia shipinishano juhua juhuacutura niqiriucuaajuhua. Nocua naajoori sequeya, “Nishishoo Pueyasora”. Cuno Pueyaso niaa na tojtiaquiaa na niishyaquiniutiani, nojuajaari nio Pueyasocuaa janiya nia pohuataani.

²⁴ Cuno Pueyasoori nio jiya shipiniquiaaricuaa, puetunu pa niqishanojuanaanio. Nojuajaari jiyocuacaanu camarnujuhua. Nojuajaari puetunu tiqiyocujanaa Quijia. Majaari pueya tiajosano secojowa tiajinia na quiniu. ²⁵ ¿Taa nia jiyaniyani pueyanaa, cutara Pueyasojuaanaate pa jitasano casamijinjiji paniyajuhua? Maja. Nojuacuajaari puetunu pa jitasanojuanaa shipiniquiaari puera. Pa rishiniuria, na Sohanujinjiji pa niqitioquiaarijuhua, pa rijiosocoriqiano paratunio.

²⁶ Pueyasoori niqiriyatu pueyano shipiniquiaari juhuacatecara. Paari cuniquiji canequiaarini, puetunu jiyacajinijanaa pa quiniuria. Pueyasoori tarijia sequequiaari tee pueya quiniutianiyani. Sequequiaarijuhua taacari ti pa quiniutianiyani. ²⁷ Pueyasoori naa panitiquiaaricuaa puetunu jiyacajinia quiniaa pueyajanaa pajenura nojuaja. Pueyasoori pa saniya, na niishiniuria, ¿pueyate na pajenutaniyani pa riuritanura nojuaja? Pueyasocuaaari maja na quiniu tucuaaanu pajaniyajinjiji. ²⁸ Pueyasoori pa samiitianiya. Pa cumaquiquiaaariuhua pa poonijionura. Pa rishitiquiaaarijuhua. Naatej, taa nia pohuatajaca sequequiaaricuaajani: “Paari Pueyaso muerasuni”. ²⁹ Paa jaara seetanujanaa Pueyaso muerasu quirini, majaari socua pa jyaniniu Pueyaso naasucuaari juhua orojinjiji pa shipinijosano niqishano. Majaari juhua platajiniji shipinishano, juhua saajajinjiji shipinishanonio. Pueyaso cutaraari maja na niqishaanu juhua tama pa niishiriojanojuaja. Majaari na niqishaanu taa pueya shipinijioquiaacuajani, nojori jyanishacari Pueyaso naasucuaari naa niqishanotej. ³⁰ Pueyasocuaaari pueya miiniu sesa rejeretariquiaa pueyacaanu. Saniniuujia, nojuajaari quiarijia puetunu tiqiyocua quijiaa pueyanaa sequeya, nojori cartenura puetunu sesa na miiquosanojuanaa, saaja nojuaja nojori tojtianura. ³¹ Pueyasocuaaari tari saqiriojoquiaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujanaari. Pueyasoori tari na saqiriojosano pueyano jitiaa pa nequesoreeriquanojuhua. Na samiitinishacari cuno pueyano macujinjiji, nojuajaari naa pa niishitiquiaari, cunocuaaari na saqiriojosano pueyano.

³² Nojori jaara tojiquiaari Pablo pohuatasacari taa macunucua samiitiaconutaniuhua, cuno niishijiaaari na saroojotaquiaari na rerequetenuta. Tamasacaari saniniuujia Pablo sequequiaari:

—Canaacua tamacari quia tojiriirianiuhua.

³³ Na nuhuaji, Pabloori cuno pueya tajinjiji quiacuhua. ³⁴ Noojiaqueya cuno pueyajinjinioori Jesuucua tiuquuaari, Pablo pohuatasano nojori tojtiasacari. Nojorinjinioori quiquiaari Dionisio jyanishano pueyano. Nojuajaari Areópago niishijiaa pueya maanujinjini quiquiaari. Jesuucua tiuquuaarijuhua tamonu maaji. Dámaris na sesa. Socua tamasaca pueyari Jesuucua tiuquuaarijuhua.

18

Pablo quishacari Corinto tiacajinia

¹ Na nuhuaji, Ploori Atenas tiacajiniji quiaquiaari Corinto tiacajinia.
² Cuniqwi riuriatasequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaquiaari. Aquilaari necocua Priscilata shusha Italia jiyajiniji tiuquijiono quiriqviaa Corinto tiacajinia, tii Pablo tiuquishacari. Jiyacaritij, Claudioori jiyaniijiajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujuanaa quiquiaari puetunu jiyacajiniajanaa. Nojori jiitiaquiaari Roma tiacajinijiiri. Nojuajaari tama na tiacajinia pueyajaaja sequequiaari puetunu Judiocuacajanaa nojori taanuunura Roma tiacajiniji. Naaratej, Aquilaari necocuatata quiaquiaari Roma tiacajiniji. Corinto tiacajinia quishiiri. Ploori nojoriicua quiaquiaari nojoritia na pocoojonura. ³ Aquilaari necocuatata suhuoronuutaja toqueya cusupuenuuja quiquiaari juhua Pablojuhuaj. Naaratej, Ploori nojoritia quishii, mariyata na poonijionuunura tii. ⁴ Ploori maja nareja na shocotenu quijia samaatenu juuca. Nojuajaari Judiocuaca rerejojua tiajinia rucanejojua. Tii nojori pahuataquiaari Jesujinijiiri, taucuaa niquiarano, noo pojori canapute Judiocuacaa jiyatesaaquiaaricujani, tariucuaaanu Moisés niishitiojosano nojori tojishacari.

⁵ Silas jaara Timoteota Ploori tiuquijioquiaari Macedonia jiyajiniji, Ploori jiyacari coteeqviaari puetunu juucajanaa Jesujiniji pahuatanura Judiocuaca niqiara. Nojori sequequiaariiri:

—Jesucuaajaari nia sashishano, Pueyaso Jiyarosano seetanujuanaa pocua!

⁶ Judiocuaca jaara tojiquiaari naa Pablo sequesantej, na tojitiaquirii saajaari nojori cuaracashitiniutia Pablo sequesano. Saaja juaaquioreeri. Sesa pocoojeejaariuhuj. Naaratej, Ploori nojori niqiara na toque nuutojoquiaari, nojori niishiniuria Pablo tari nojori tiujaarohua. Ploori nojori sequequiaari:

—Majaari cucua nia tiutianu, Pueyaso jaara mijiria quiniaa saniitiore. Niaacuajaari Pueyaso rupaa ruuretaquiaa saaja. Quiarijia taucuaacua quiaa cutaranijia, nojori cua pahuatanura Pueyaso rupaa Jesucristojiniji.

⁷ Na nuhuaji, Ploori cuno Judiocuaca rerejojua tiajiniji tohuataquiaaruhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na tiaari jiyareta Judiocuaca rerejojua tia shuriucua quiriqviae. ⁸ Crispoori jiyacari cuno Judiocuaca rerejojua tia camarnu quijia. Nojuajaari puetunu na tiajinia quiniaa pueyatajanaa Jesuucua tiuquiaari. Naajuahuaj, queraatia Corinto pueyari Jesuucua tiuquiaari Pueyaso rupaa nojori tojishacari. Naaratej, puetunu Jesuucua tiuuniaajanaari moojinia tiuquiniiosaaquiaari. ⁹ Jiyacari tamonu niucua, Jiyaniijia Jesuuri Pablo sequequiaari na maquenujinia:

—Maja quia puerenu Pablonaa. Socua quia pahuatare cuno pueya tojishocoriqviaano. Majaari sanaajenu. ¹⁰ Janiyacuajaari quiata quiyani. Majaari quenaaja tamonu pueyano jiyashiniu quiniutianiya taa na miiniu paniniuria quiajaniya. Janiyari queraatia pueya nio tiacajinia jiitia cucua tiuuriqviaanoni.

¹¹ Naaratej, Ploori Corinto tiacajinia jiyojequiaari. Tii na quishacari, quera shocojotequiaari caapiqui marijiaari. Cuniqwi na quishacari, Pueyaso rupaa niishitiojoriquiaa cuno pueyari.

¹² Jiyacaritij, Galión jiyanihano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiiriquiasejuhuaj. Jiyacari, Judiocuacaari tii Pablocuaca roojotooquiaari. Na nuhuaji, na quiatuquiaari-iri. Naa na jaatucutuquiaari cuno jiya camarnuucuaari, Pablo nequesoreesaanura. ¹³ Naa sequetusee camarnuuri:

—¡Canaa camarnunaa, nio pueyanoori pueya shiniujiya Pueyaso nojori shuquiritianura tamaatia canaa supuetana Moisés Rootasanojiniji!

¹⁴ Pabloori jiyacari juucua pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocuacanaa, niaa jaara maninia miyashijiaca cucua jaatucure cutara, sesa miijiaca sequenio, janiya maara jiyano pueyanooacara nia tonujusacari tojiri cutarani. ¹⁵ Niaari saaja tama nia niishishanojiniji juayonuu-taajaacujua. Maja cua nequesoreenu quiniutianiya tama nia juayonuu-tasacarijiaaja nia sequesano tamasaca shaajecono pueya sesacajiniji, tama nia supuetanaa rootasanojinijiaajanio. ¡Tama nia jeecatoorejaaja!

¹⁶ Na nuhuaji, cuno camarnuuri nojori juarii. Na shuriucuai na jiyaramiquiriohuari. ¹⁷ Naa Galión miishacari nojoritij, narta taucuaacaari cuniquijia quiatuquiaari Sóstenes, Judiocuaca rerejojua tia cojuana. Na piqutiurii camarnu Galión niqiuara cuniquijiaari. Majaari Galión tenujunu quirii nojori. Nareja na niquiriquiaari.

Pablo riuujiushacariuhua Antioquiya tiacajiniohua. Na nuhuaji jiuujia-naraca pacutequiaariuhua quiannuuri

¹⁸ Pabloori cuniqui queraatia camueenujuquiaarijiaara Corinto tiacajinia. Tari na riuujiushacariuhua cuniquiji, na nuhuajiria saruhuataarohua narta Jesucua tiunuaa pueyari. Buquejinia quiaarohua Siria jiyajiniohuari. Na cojiriquiaajaari Priscila, neyaca Aquilano. Nojori tacataaquishacarijia buquejiniaacuma, Cencrea tiacajiniji na quiojonura, Pabloori jiyacari na naca riuujiuquiaari caritianajara. Nojuajaari Pueyaso sequequiaari tari, maja na naca na riuujiutiniu quiniutianiya nojuaja jaara na sequesano Pueyaso tucuaaquiri.

Cunora, na quiarjia riuujiutirii na nacaari. ¹⁹ Nojori tiuquiiiosacari Éfeso tiacajinia, Pabloori tii jatamaquiaari Priscila, Aquilano. Nojuajaari tajimiaa Judiocuaca rerejojua tiajinia. Cuniqui rerejono Judiocuaca pohu-atasee Jesujinijiiri. ²⁰ Nojoriiri Pablo nenecojoquiaari juucua cuniqui na camueenujunurajara nojoritia. Majaari Pablo paniniu quiquiaari. ²¹ Cuniqui quiniaa sequereeri:

—Quiohuanijia pueyanaa. Jerusalén tiacajiniara sechuanijia. Canaari tii rerejonutaniya Jesucua tiunuaa pueyatani. Pueyaso jaara paniri, janiy-acua nia niqiniuria tacatemohuaraniuhuj.

Cuniquiji tacaquiaariuhua buquejiniaari. Éfeso tiacajiniji quiaarohuari. ²² Pablo tiuquishacariuhua Cesareya tiacajiniohua, cuniquiji quiamaa Jerusalén tiacajiniaari, puetunu Jesucua tiunuaa na saruhuatanurajanaa. Na nuhuaji, quiaarohua Antioquiya tiacajiniaari. ²³ Cuniqui tarishiquiaari pasajaari. Na nuhuaji, socua quiaquiaariuhua cuniquijiiri puetunu jiyacajinarajanaa. Quiariquiaari na niqiniuhua Jesucua tiunuaa pueya Galacia jiyajinia, Frigia jiyajiniano. Pabloori nojori niqiuara pohu-ataquiaari socua Pueyaso rupaaajiniji. Jesucua tiunuaa nacasuquiaariiri maja nojori tarinitianura Jesucua tiunui.

Éfeso tiacajinia Apolo pohuatasacari Pueyaso rupaa

²⁴ Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajinijinio pueyano. Na sesaari Apolo quijia. Nojuajaari maninia Pueyaso rupaa pohuatana quiriquiase. Tariucuacaanu Pueyaso Rupaa naajosano niishijia quiquiaariijaariuhuj. ²⁵ Nojuajaari maninia niishitiojosaaquiaari Jiyaniijia Jesu niishitiojosanojiniji. Shitimia pohuataja pueya niqiuaraari. Maninia niishitiojojua Jesujiniji na pohuatasacariijaariuhuj. Seetanujuanaa sequeja Jesujiniji puetunujuanaari. Maja cutaraari na niishiniu quijia Pueyaso Sohuanute pueyano jiuujiajinia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojoquiaaricuani. ²⁶ Apoloori na puerenu jataquiaari tii na pohuatasacari Pueyaso rupaa narta Judiocuaca rerejojua tiajinia. Aquilaari Priscilata tii quiriquiaajuhuj. Apolo pohuatasano tojtiri quiquiaari. Apolo jaara puecaquiaari pohuatanu, nojoriiri tamocora na jaatucuguaiaari na niishitiojonura taa pa jatanishaaquiaa Pueyaso Sohuanutani, Pueyaso muerasu pa quiniuria cutara. ²⁷ Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuunaa pueyari na cumaquiquiaari. Naajuhuj, nojoriiri Acaya jiyajinia Jesuucua tiuunaa pueyacuara naajioquiaari Apolo patasocoriguano, maninia cuno pueya tojniuria nojuaja na tiuquishacari tii. Jaara tiuquishi quiquiaari Acaya jiyajinia, Apoloori Jesuucua tiuujiaa cumaquiquiaari jiyano hua, nojori na niishitiojosacari. ²⁸ Apoloori nojori niqiuara niishitiojoquiaari tariucuacaanu Pueyaso Rupaa jiniji naajiotasano. Jiyano hua maninia na niishitiojosacari Jesuuri seetanujuanaa nojori sashishano quiquiaari, naacujitij Judiocuaca niishishano pataquiaariiri.

19

Pablo quishacari Éfeso tiacajinia

¹ Apolo quishacari Corinto tiacajinia, Pabloori saniniuujia Antioquiya tiacajiniji quiaquiaari nucuaco Éfeso tiacajiniara. Na quiasacari, tuhuanuhua shoconujuquiaariiri. Naa tiuquishi quiquiaari Éfeso tiacajiniaari. Tii riuriataquiaari Pueyaso pueya maanuuri. ² Pabloori jiyacari nojori nequesotaquiaari:

—¿Niaate Pueyaso Sohuanu tiuquiniquianu nioojiajinia, Pueyaso ru-paacua nia tiuushacari?

Pablo riuucatureeri:

—Majaari quenaaja canaa niishiniu quijia Pueyaso Sohuanute quiyaju-huj.

³ Pabloori nojori sequequiaari:

—¿Casaara nia tiuquinijiosaacanuaraarini?

Nojoriiri na riuucaquiaari:

—Canaari tiuquinijiosaaquiaarini taa Tiuquinijiona Juan niishitiojoquiaaricuajani.

⁴ Pabloori nojori riuucaree:

—Taaquiriirinij. Tiuquinijiona Juancuaaquiniateja pueya tiuquinijio-quiariijiaj, nojori jaara noojia tacatoquiaari sesa na miifiushanojiniji. Nojori sequequiaariijaariuhuj: “Cua nuhuaji Niriquianoocua nia tiuuri”. Naa Tiuquinijiona Juan sequesacariitij, nojuajaari Jesucristojiniji sequeriquiaa.

⁵ Cuno pojori jaara Pablo pohuatasano Jesucristojiniji tojiquiaari, nojoriiri socua tiuquinijiosaaquiaariuhua Jesuucua nojori tiuushacari seetanujuanaa. ⁶ Naacujitij, Pablo niasacari na juashiquia nojori nacaacua Pueyaso na secojosacari, Pueyaso Sohuanuuri cuno pojori jiuujiajinia tiuquiquiaari. Naacujitij, nojoriiri niishishoo rupaacajinia pocooree. Naajuhuj, Pueyaso

Sohuanu niishitiojosano Pueyasojiniji pohuatanuuquiaariiri. ⁷ Cuno pojori-iri doce canuu quiquiaari.

⁸ Pablo quishacari cuno tiacajinia, nojuajaari tii shocotejoquiaari jiuujianaraca raza. Jiyacari, puetunu samaatenu juucajanaa quiaja Judiocuaca rerejojua tiajiniaari. Tii pohuataja Pueyaso rupaa pueya niqiuaraari. Naajuhuj, nojori niishitiojuaari taa Pueyaso jitianutaniya pueyaraaanu Jesuucua tiuninia pueyani. Pueyari na tojtiaquiaari maninia, na puereyaquiniutia na niishitiojosacari. ⁹ Noojiaqueya cuno pueyajiniinioori saaja ruuretaquiaari Pueyaso rupaa. Na rerequetequiaari saajaari. Sacuaraatia pocooquiaari Jesu rupaa jiniji pueya niqiuaraari, Jesuucua nojori tiuuniu paniyaquishacari. Nocuaji, Pabloori saa jiyareta Jesuucua tiuninia pueya jiyataquiaari cuniquiji, tamaquiria serojonuujua tiajinia. Tirano jiyanishano pueyanoori cuno serojonuujua tia camaru quiquiaari. Pabloori cuniqui puetunu juucajanaa niishitiojua Pueyaso rupaa Jesuucua tiuninia pueya. ¹⁰ Caapiqui marijaari socua Pablo shocotejoquiaari tii na poojotasacari Pueyaso rupaa Tirano serojonuujua tiajinia. Naacuajitij, puetunu Asia jiyajinia quinia pueyajanaari Pueyaso rupaa jiniji caminiujiushaaquiaari, Judiocuaca, taucacajuhuj. ¹¹ Pueyasoori jiyacari Pablo cumaquiquiaari jiyajeneta casaa na miiniuria Pueyaso cumaacata. ¹² Naacuajitij, pueyari Pablo paneyaca tuujutaqueya rijioquiaari, Pablo cooshano toqueraacuanio. Cuno pueya jaara na cusosuhucua niojoquiaariuhua cuno toqueraacua, ¡cusosuhuari naatacoquiaariuhua! Naajuhuj, samaruhuari tohuareetaquiaarijuhuaj, samaruhua jiiitaja pueyacuaji.

¹³ Tamasaca Judiocuacajiniinioori quiriquiaajuhuj, pueyajiniiji samaruhua tohuatanijiojua. Nojoriiri puetunu tiacajiniajanaa rucoojojuaca quiquiaari. Jiyacaritij, nojoriiri juhua Pablo miiniu paniquiaarijuhuaj. Juucua naa sequetuquiaari samaruhuari:

—Pablo pohuatasano Jesu sesajinia nia sequeyanijia: “¡Nio pueyanojiniji nia tohuareetare!”

¹⁴ Naa miijicaari siete canuu quijia. Nojoriiri Esceva jiyanishano pueyano niqiuohua quiriquiaa. Escevaari pueyacuara secojonaa camarnu quiriquiasejuhuaj, Judio pueyanotuhuj. ¹⁵ Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja nojori riucuaquiaari:

—Jesu niishiyacuajaniija. Janiyari Pablo niishiyajaniuhuj. ¿Canteerini niajanianijia, naa nia sequenura janiyatej?

¹⁶ Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiri juhuasunucua, jiyareta naatiquishanojuhuaj.

¹⁷ Puetunu Éfeso tiacajinia quinia Judiocuacajanaa, mariyata tii quinia taucacuanio, nojori jaara niishiquiaari naa miishanojinijitij, jiyanohua pueretuquiaariiri. Naacuajitij, puetunu Éfeso tiacajinia quinia pueyanaari sequequiaari:

—¡Jesuqui seetanujuanaa Jiyaniijiajanaa cutara!

¹⁸ Naajuhuj, queraatia Jesuucua tiuninia pueyari nijioquiaari, tarijia sesa na miitushano pohuatanura puetunu pueya niqiuarajanaa.

¹⁹ Naajuhuj, queraatia pueyari juhua shimiacuri miijiojuaca quiquiaari. Nojoriiri na nequesoreetuneece mueratejotaquiaari. Cuno nequesoreetuneeceajiniaari serojosano quijia taate pueyano cumueeca shimiadura quiniuni. Na camaruhuari jiyacari puetunu cuno nequesoreetuneecejanaa patootaquiaari. Na catijiaquiaari puetunu pueya niqiuarajanaari. Puetunu cuno nequesoreetuneecejanaa catijiasaquiaari, cunoori cincuenta mil

platajiniji shipinijiosano cumaneecata masesano quiquiaari. ²⁰ Naacujitij, Pueyaso rupaari socua cuno jiyajinia paaquequiaari, na cumaaca poonijosacari pueya jiuujiajinia.

²¹ Na nuhuaji, Pabloori cuniquiji naquerejoquiaari Macedonia jiyajiniara-juhuj, Acaya jiyajiniaranio. Cuniquiji riujiuuniu paniriquiohua Jerusalén tiacajiniohuaraari. Sequequiaarijiaarihuaj:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

²² Jiyacaritij, Pabloori na naacunaa jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jiyoequiaarijaara.

Éfeso pueya cushitiishacari na juaaquionuta najuhanaj

²³ Pablo quishacari Éfeso tiacajiniaja, Éfeso tiacajinia quiniaa pueyari jiyanohua juaaquioquiaari Pablo niishitiojonuucua Jesucristojiniji. ²⁴ Naa quiquiaari. Demetrio jiyanishano pueyanocujiaari juhuacatecara narta pueya nasojoquiaari. Cuno pueyano, Demetrio, nojuajaari shiirijiaa tia platajiniji shipinijiojua quiquiaari. Cuno shiirijiaa tiacaari juhua nojori jiyanishano pueyaso secojojua tia niquishano quiquiaari. Nojori pueya-soori maaji sesaanucua quijia, “Artemisa”. Na shipinijiosano niqitiojua na cumaneecaraari. Naacujitij, Demetrioori nata poonijionaa pueyata queraatia cumaneecaraca quijia. ²⁵ Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoquiaari tamasaca pueya, casaa shipinijionaa platajiniji juhua nojorijuhuj. Puetunu cuno pueyajanaa jaara tari rerejoquiaari, Demetrioori nojori sequequiaari:

—Pueyanaa, niaacujiaari niishiya, paari puetunu pa panishanojuanaa jiitiaani pa niqitiojosacari pa cumaneecara pa shipinijiosano. ²⁶ Quiarijia cuno Pablo jiyanishano pueyanoni, nojuajaari queraatia pueya niishitio-joquiaa, pueyano shipinijiosano pueyasohuanaari maja seetanu pueyasohuajanaa. Niaari na niqiriqiaacuaja naa na niishitiojosacari. Niaari na tojiriqiaajuhuj. Naacujitij, majaari tari pueya masenu quiniutianiya pa shipinijiosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojitiaajuhuj. ²⁷ Taa cua sequeyacujani, pa shipinijiosano jaara shocotesaare saaja, paari pa poonijiosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyaaariuhuj. Nocuaji, majaari pueya nijionu quiniutianiya tari pa pueyaso Artemisa secojojua tiajiniara, tii nojori secojonura, naa cuno Pablo niishitiojonuucua pueyaracaanu pueyatej. ¡Naacujitij, puetunu pa Asia jiyajinijinio pueya, mariyata puetunu jiyacajinijinio pueya-puejanaari pa pueyaso Artemisa rerequetejacara jatanutaniya! ¡Puetunu pueyapuejanaari naa niyajetanutaniya socua pa pueyaso Artemisatej!

²⁸ Cuniqui quiniaa pueya jaara tojiqiaari naa Demetrio sequesantej, nojoriiri jiyanohua juaaquioquiaari. Naa nacoquiaariiri:

—¡Pa timitiasano Artemisa cuara pueyaracaanu quiiria Éfeso tiacajinia quiniaa pueyaso!

²⁹ Naa nojori juaaquiosacaritij, puetunu cuno tiacajiniajanaa pueyari cushitiiquiaari. Nojoriiri jiyacari quilootee caapiqui Pablo cojiniaa pueya, Macedonia jiyajinijinio pueya. Nojoriiri quiquiaari Gayo, Aristarconio. Na jayoturee Éfeso tiacajinijinio pueya rerejojua tiajiniaraari. ³⁰ Pabloori cuno pueya nacoosaqui tiajinia tiuquiniu paniquiaari juucujuhuj. Quera

na pocuasee cuno pueya tajiniani. Jesuucua tiuunaa pueyari saa na cosequiaarijia na tiuquiaquiniucuaaji. ³¹ Asia jiya camarucuaari na seya jiyaroquiaari Pabloocujuhuaaj. Camarucuaari coteenu naa sequequiaari na seya:

—Niocua Pablo sequesee, maja cumaati jaarajaaja na tiuquiniu pueya nacoosajaqui, mariqui mosaareeri.

Cuno camarucua na seya jiyaroquiaari nocuani, nojoriiri Pablo rupuenaa quijia. ³² Cuno nasojosano rerejono pueyari saaja cushitiquiaari na juaaquionuta. Jiyanhua nacooreeri. Tamasacaari saniniuujia tamaatia nacooriguaajuhuaaj. Jiyacaritij, tama cuno nojorijinijinio pueyari maja na niishiniu quiquiaari casaajiniji na nacooriguaani. Secaja nojorijinijinioori na niishiquiaari cutara. ³³ Jiyacaritij, Judiocuacaari Alejandro jiyaniushano pueyano caponeequiaari pueya nacoyano tacoji na nuuatesocoriguiano. Cuniquijinio pueyajaari tii toquiaari Alejandro casaara pueyari nacoyani. Alejandroori Judio pueyano quiquiaarijuhuaaj. Naaratej, Judiocuacaacuaji tacunu paniriquiaa juucuaari. Alejandro jaara nujaquiaari pocuajajiniji, na juaashiquia shiitioquiaariiri pueya sanaajetanura. ³⁴ Saniniuujia, cuno pueya jaara niishiquiaari Alejandroori Judio pueyano, puetunu pueyajanaari socua jiyacatequiaari nacoonura. Nojoriiri caapiqui hora shocoteree pueyaracaanu naa na nacoosacari najuhuanaj. Naa seque-turiquiaa na nacoosacariiri:

—¡Pa timitiasano Artemisa cuara pueyaracaanu quiiria Efesio tiacajinia quiniaa pueyaso!

Naa pueyaracaanu nacooriguaari. ³⁵ Cuno tiaca camarucua najaajona pueyano jaara na naata quiriquiaa nojori na sanaajanura, nojori sequeereeri:

—Cuarta Éfeso pueyanaa, puetunu jiyacajinia quiniaajanaari niishiya, pajaniya Éfeso tiacajinia quiniaari pa pueyaso Artemisa secojojua tia cojuanaani. Niishituyajaarijuhuaaj paacuajaari cuno casa juhua pa pueyaso Artemisa niquishano cojuaquiaani, jiya cajiniocuaji tinio pa riuriatasoni. ³⁶ ¡Canteeri nio niishiyaquiyaniija! Shaaqui. Cunora tariucuaaja. ¡Nia sanaajetarohua! Majaari najuhuaana sesa nia miituniu, maninia nia niishiriojiyaquishacari. ³⁷ Nio canuu niaa niyara na jayoreeni, nojoriiri maja na nohuasenu quirii casa pa pueyaso secojojua tiajiniji. Majaari na sesacatunu quiquiaa pa pueyasojuhuaaj. ³⁸ Demetrio jaara nata poonijion-aata cuno pueyacuaara tonujunu paniri, ¿casaara na quiaaquia pa nequesoreenaa niqiuara tonujunuraarini? ¿Casaara pa jiitiaa nequesoreenaa pa tiacajiniaarini? ¿Najuhuanaj? Pa nequesoreenaari pa paraa tacujua pocuaji. ³⁹ Niaa jaara tamonu casaacua juaaquioreja, pocua tamonu juuca na rerejotariquiani pa jiyaniijnianucuaa pa jeeanura puetunu nia sequesanojuanaa. ⁴⁰ Pueyanaa, ¿majate nia puerenu, Roma tiacajinia quijia pa jiyaniijniajanaa jaara pocuara tosaare pa nacojonujiniji? Paa jaara sequesaaare nocua quiojonurani, ¿paatucua taa pocuaji tacureni jaara pa nequesoreere pa nacojonujiniji?

⁴¹ Tiaca camarucua najaajona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacuajitij, puetunu pueyajanaari cuniquiji niyaquejoquiaariuhua.

¹ Pueya jaara na juaaniutia na nacojonu nuhuaji sanaajetaquiaari-uhua, Pabloori jiyacari Jesuucua tiuuniaa pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniquiji, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri. ² Nojuajaari puetunu cuno jiyajinia rucuaneguaarijianaa. Jesuucua tiuuniaa pueya cumashitiquiaari socuaari, maja nojori tarinitianura Jesuucua tiuuniu. Naa na rucuanesacari cuno jiyajinatej, socua tiuquishiiquiaari Grecia jiyajiniaari. ³ Pabloori tii na quishacari shocotejoquiaari jiuujianaraca raca. Juucua cuniquiji quianu paniriquiaa buquejinia Siria jiyajiniaraari. Judiocuacaari na nishiquiaari saaja. Nojoriiri jiyacari na monu paniquiaari. Naa Pablo nishishacaritij, nojuajaari nocuaji Macedonia jiyajiniara neteja nucuacohua tacatequiaariuhua saaja. ⁴ Nucuaco na quiasacariuhua, na tarajaquiaariiri Sópater jiyaniushano pueyano Berea tiacajinijinio, Pirro niyanu. Na tarajaquiaariijaariuhua Aristarco, Segundonio. Nojoriiri Tesalónica tiacajinijinio pueya quiquiaari. Nata quiaquiaariijaariuhua Gayo, Derbe tiacajinijinio. Timoteori nojoritia quiriquiaajaacuhuj, Tiquiconio, Trófimojuhuaj. Nojoriiri Asia jiyajinijinio quiquiaari. ⁵ Puetunu nio canaa tapueyocucajanaari canaa puetaquiaari. Canaacuaji tiuquijioseequiaari coteenu Troas tiacajiniaari. Cuniqui sashitiquiaari canaari. ⁶ Jiyacariiri queranacunuusacari quiquiaari, poreetajaaju shipinijiosano pan miaquesacari. Queranacunuunu nuhuaji, canaari Filipo tiacajiniji jaaretaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

Pablo niishitijosacari Troas tiacajinia

⁷ Shusha semaana coteejajinia domingo juuca, canaari rerejoquiaarini pan neecasura pa jiyaniijia cusosacari niishiriojonura. Pabloori jiyacari Jesuucua tiuuniaa pueya rootariquiaa niucua. Nojuajaari cuno tariquiquiari quiriquiaa cuniquiji. Naaratej, na nuhuajiria pocoojoriquiaa pueyataari. Pueyaracaanu na pahuatasacari, shiyaqueyari tari quiquiaari. ⁸ Cuno tiajinia canaa tii quiriquiaani, canaari jiyocuaaanu terceru na natacojina rerejoriquiaani. Queraatia samariiri canaa caaniuji noshiquioriquiaa. Pabloori shitimia pahuatariquiaa pueya niqiuara. ⁹ Jiyacaritij, tamonu mashajaari tia shuucujia tacuhajiniji cajiriquiaa. Na sesaari Eutico quijia. Pablo pahuatasacari pueyaracaanu, socua maquequiaari na cajishajuiiri. Jiyanohua na maquesacari, jiyocua tiquii socuaari. Cusoseejanaari. ¹⁰ Pabloori nata quiniaata ritia nocua netecuatuquiaari jiyocua. Pabloori nocua jacamasee na cacatanura. Narta Jesuucua tiuuniaa pueya sequereeri:

—Maja najuhuana shiriqitiuniu. Saminiocuaja.

¹¹ Na nuhuaji, puetunu nojorijianaari tiniota shuquiriaatia tacataquiaariuhua. Pabloori neecaruu neecasequiaari canaa miaquenuusocoriquiano. Pabloori socua pahuataquiaari pueya na niishitiojonura. Naa juhuaque-
maajaa socuaari. Tariucua juuca quiaqueeri. Nojuajaari nucuaco quianu paniquiaari cuniquiji Asón tiacajiniara. ¹² Cuno mashajaari saminiio jaatucusaquiaariuhua na tiajiniohua. Puetunu pueyajanaari noojia caji-
tiquiaariuhua, saminiio mashaja tacatesacariuhua.

Pablo quiasacari Mileto tiacajiniara

¹³ Pabloori na quiaaquishacaritia tari canaa sequequiaari:

—Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

¹⁴ Naacujitij, canaari coquetoquiaari Asón tiacajiniani. Canaari cuniquiji Pablo tacanimaquiaarini. Canaari mariyata tiji quiaaree Mitilene tiacajiniani. ¹⁵ Canaari tariqui shocoma Quío jiya tucuaatijani. Canaari tama tariqui tiuquishii Samos tiaca tacatajajinijini. Canaari rupaquijia samaatemaacuara Trogilio tiacajiniani. Canaari cuniquiji sanetaaree tariquiniuhuj. Canaari Mileto tiacajinia tiuquishiini. ¹⁶ Canaari naa secooriquiohua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajiniajuhuaj. Ritia tiuquiniu paniquiaarihua Jerusalén tiacajiniaari. Pentecostés juucara quiniu paniriquiaa tiiri.

Pablo cumashitishacari Éfeso tiacajinijinio Jesuucua tiuuniaa jiitanaa pueya

¹⁷ Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuuniaa pueya jiitanaa. ¹⁸ Nojori jaara canaacua tiuquijioquiaari, Pabloori nojori sequeree:

—Niaacuajaari maninia niishiya taa cua quishiiquiaari niaatani, cua tiuquishacari Asia jiyajinia niaacua. ¹⁹ Niaata cua quishacari, janiyari pueyaracaanu nia niishitiojuani, pueyaracaanu pa Jiyaniijlara cua poonijiosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacua cua tacaashacari nujuquejuani. Janiyari pueyaracaanu naquiya miishanoni, cuarta Judiocuaca paracaashacari janiya. ²⁰ Naajaa, majaari cua pishiniu quijia nia niquiara cua pohuatanura Pueyaso rupaa. Janiyari nia niishitiojuani puetunujuanaa maninia nia quiniuria, maninia miijia nia quiniurijahuaj. Majaari cua niishitiojonu quijia jiyasohuaja. Janiyari puetunu pueya niquiarajanaa nia niishitiojuani, tama nia tiacajiniaqueyajaajanio. ²¹ Janiyari Judiocuaca sequejani taucucanio, nojori tacatonuhuaa noojia Pueyasooocua, sesa nojori miishanoinijii, pa Jiyaniijiaacua nojori tiuuniuria cutara. ²² Quiarijiani, Pueyaso Sohuanuuri cua jiyaroja Jerusalén tiacajinia. Majaari cua niishiniu taa cua miishaanutaniya cuno tiacajiniani. ²³ Janiyari saaja niishiya cutarani, puetunu tiacajiniajanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhuaj”. ²⁴ Janiya jaara naa niishirini, majaari cua tacaaniu quiquiaa. Cuaara cua motuuraqui jaara monu panitiuri. Janiyari saaja pa Jiyaniijia sequesano tucuatani paniya cutarani. Pa Jiyaniijia Jesuuri cua jiyaroquiaari cua pohuatanura pueya niquiara, taa Pueyaso jiyanooni paniya pueyani.

²⁵ Janiyari seetanujuanaa nia sequeyani pueyanaa. Puetunu nijaniyanaa, cana niquiara cua pohuataquiaari Pueyaso rupaacuajani, majaari socua nia niquiniu quiniutianiya mijiria janiya. ²⁶ Naaratej, janiyari nia sequeyani, majaari na nuhuaji nia sequenu: “Maja canaa pohuatasaanu quiquiaari Pueyaso rupaani”. ²⁷ Janiyacuajaari tari nia pohuataquiaari puetunu Pueyaso sequesanojuanaa pajaniyarani. ²⁸ Quiarijiani, tama nia cuaqueyajaaja nia cojuare. Maninia nia cojuare Jesuucua tiuuniaa pueyajuhuaj. Pueyaso Sohuanucuaajari nia jiyatequiaari Jesuucua tiuuniaa pueya jiitanaa nia quiniuria. Nojuajaari nojori masequiaari na nanacata tama nerajaaja, pocuara na cusosacari. ²⁹ Janiyari seetanujuaanaa niishiyani, janiya jaara niiquiji quiaqueeni, tamasaacari cua nuhuaji

nijionutaniya. Jesuucua tiuuniaa pueya sesonutaniyari, sacuaraatia nojori niishitiojosanota. Nojoriiri juhua marucuatouque sareya tiuquitianutaniya Jesuucua tiuuniaa pueya tajinia. Taa marucuatouque sare tiuquiyua borregohua tajiniacuani, puetunu na sooseejanaari, cuno pojoriiri naa miiniutianiya Pueyaso muerasutej. ³⁰ Naajuhua, tama niajanijajiniujiojuaarijia najuhuaana tamaatia niishitiojonu coteenutaniya na sapojonuta. Majaari Pueyaso panishano na niishitiojonuunu quiniutianiya fari. Naa sapojotunutaniya Jesuucua tiuuniaa pueyari, pueya tojiniuria nojori saniniujia. ³¹ Janiyacuajaari nia sequeyani, jiyanhua nia cojuare tama nia cuaqueyajaaja. Nia niishirijihua, jiuujianaraca marijjaari tari cua shocorejoree pueyaracaanu cua niishitiojosacari niajanijia. Majaari cua tarinitianu quijia rootanu niajanijia, juuca, niucuanio. Janiyari naajaa cua namijiaacatenuta niishitiojoju puetunu niajanijajanaani. Majaari naa cua miishano nia niyajetanu pueyanaa.

³² Nia tiujianutaniya tarinjia. Janiyacuajaari pa Jiyaniijia juaashiquiajinia nia jataani. Na rupaa nia tojiriquia pueyaracaanu, juhua rishimiaca pueyano nia quiniuria, cumuecara. Nia jaara naa miiritij, Pueyasoori nia rijionutaniya na shuriucua, na saquirojosano pueyata nia quiniuria. ³³ Niaata cua quishacari, majaari tama quiriajaaja cua paniniu quijia cumaneeca, toquenio. ³⁴ Niaari naa quiyano cua niquijiajuhuaj. Janiyari tama cua juaashiquiatajaaja poonijiojuani, cua panishano cua masetajara, cua cojiniaa panishano masetajarajuhua. ³⁵ Janiyari nia niishitiojuani, naa poonijiosanotej casamijjiuucua pa naacunura pa jiiitiasanota. Majaari pa Jiyaniijia Jesu sequesano nia niyajetanujuhua. Naa sequequiaariiri: “Maninia pueyano jaara na jiiitiasanojiniji niqutiore nareja tamonu pueyano, na niqutiosacari tamonu, nojuajaari socua shuquiriaatia quiya, niqutiosano masejajiniji”.

³⁶ Naa nojori na sequenu nuhuajitij, Pabloori mojuquetaree. Puetunu nojoritijanaa secorejoree. ³⁷ Puetunu pueyajanaari nujuqueturee. Pablo cacanuutiree. Na nujuuquetureejaariuhua. ³⁸ Pueyari jiyanhua taraajeriquiaa Pablo sequenuucua nojori, maja tari socua na niqutiuniu quiniutianiya nojuaja. Nojoriiri caminiajiniaara rosetaquiaarijuhuaj, Pablo na niqutiuniuria buquejinia na tacasacari.

21

Pablo quiasacari Jerusalén tiacajinara

¹ Éfeso tiacajiniji canaa ruparetasacari, canaari shoniniacu caminia jiuujiaaco quiaareeni. Canaari Cos tiacajinia tiuquishiini. Cuniqijii canaa quiasacari tariqui, canaari Rodas tiacajinia tiuquishiiniuhua. Tama tariqui canaa quiasacari Rodas tiacajiniji, canaari Pátara tiacajinia tiuquishiini.

² Pátara tiacajinia canaa tiuquishacari, canaari tii riuriatasee tamonu buque quera Fenicia jiyajiniara ruparetaanoni. Canaari tii tacataareeni.

³ Canaa jaaretasacari, canaari canaa muenecara niquimiohua Chipre jiya tucuaatijani. Canaari Siria jiyajinia tiuquishiini. Cuno buquejinia canaa tii quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniji tiutiaseeni, casami jatanura tii.

⁴ Jesuucua tiuuniaa pueyari tii quijiajuhuaj. Canaari nojortia quishiini. Canaari siete juuca camuenujusee cuniqui nojoritiani. Pueyaso Sohuanuri cuniqijinio Jesuucua tiuuniaa pueya niishitioquiaari taa Pablo miishaanutaniyani. Nocuaji nojoriiri Pablo sequetiquiaari maja na quianura Jerusalén tiacajinia. ⁵ Naajaa, siete juuca jaara tari shocojoquiaari cuniqui canaa quishacari, canaari tiji quiaquiaarini. Jiyacaritij, puetunu

Jesuucua tiuuníaa pueyajanaari necocohuata, mariyata necohuata canaata quíaquiaari canaa na jatanura buquejinia. Canaari rosetaquiaari tiacajiniji tacatajajiniiriani, Pueyaso canaa secojonura jaaquiajinia. Puetunu canaajanaari mojuquetacoquiaarini shoniacu caminia casaqueyaji. ⁶ Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniji quiojoquiaariuhua na tiajiniohua.

⁷ Canaari Tiro tiacajiniji jaaretaareeni. Canaari Tolemaida tiacajinia tiuutiaseeni. Canaari cuniqui tacatasee puetunujuanaani. Canaari tii quijiaa Jesuucua tiuuníaa pueya saruhuataseeni. Canaari nojoritia quishii niquiriyatu juucani. ⁸ Tariqui saniniuujia, puetunu canaajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriqúiaa. Canaari na tiajinia quishiini. Felipeeri Jesujiniji pohuatana quijia. Nojuacuajaari Jerusalén tiacajinia coteenujanaa tamacacata jiyatesaaquiaari mashiquiopue mianuuteriquiano. ⁹ Felipeeri necojori jiiitaja, saa caqueetacaneja, niyacoojori. Cuno niyacoojoriiri Pueyaso Sohuanu jiiitajaca. Naacuajitij, Pueyaso Sohuanu niishitiojosano nojori jiuujiajinia Pueyasojiniji pohuatanuujuaari. ¹⁰ Canaa camueenujusacari cuniqui, jiyacari tiuquishiiquiaariiri Judea jiyajiniiníio pueyano. Nojuajaari Pueyaso sequenu panishano caminiuujia quijiajuhuaj. Ágabo jyanishano pueyano. ¹¹ Nojuajaari canaaca níquiaari Felipe tiajinia. Jiyacaritij, Pablo cajiniocua camarucujua samaacataseeri. Nata morojoree tama na cashacucuaajaarijia, na numatucuanio. Na nuhuaji sequerohuari:

—Jerusalén tiacajinia parta Judiocuaacari naa morojonutaniya nio cajiniocuaque camarutej. Na nuhuaji, taucuaa níquitiosaanutaniyari. Pueyaso Sohuanuuri naa cua sequereequij.

¹² Naa Cesareya tiacajinia quiniíaa Jesuucua tiuuníaa pueya tojishacaritij, canaajuhuj, puetunu canaajanaari juucua Pablo nenecojoquiaarini maja na quianura Jerusalén tiacajinia. ¹³ Saa canaa sequereejari:

—¿Casaara nia nujuquetiuyajaarani? ¿Niaateeri cua taraajonu paniyaruhua? Majaari saaja cua paniniu pueya morojonura janiya Jerusalén tiacajinia; janiyari tama cua cuaqueyajaaja panitiaacujua. Cuaara cua motuuraqui, cua pohuatanuucua cua jiyaniijia Jesujiniji.

¹⁴ Maja canaa naata na tarinitiniu quishacari, canaari socua na tarinitiareeni.

—Cuaajauij. Pueyaso cuaara miiria taa na miiniu paniyacuajani.

¹⁵ Naa canaa sequenu nuhuaji nojuaja juucuatej, canaari canaa jiiitasano casaa jeenucuareeni. Canaari Jerusalén tiacajinia quiaareejaniuhuj. ¹⁶ Canaata quiojoquiaariiri Cesareya tiacajiniji Jesuucua tiuuníaa pueyajuhuj. Canaata quiriqúiaajaariuhua Mnasón jyanishano pueyano. Nojuajaari Chipre jiya tucuaatiajiniiníio pueyano quiquiaari. Nojuajaari tarijia Jesuucua tiujia quijia. Nojuajaari canaa sequerequiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

Pablo poccojosacari Santiagota

¹⁷ Canaa tiuquijiosacari Jerusalén tiacajinia, cuniquijinio Jesuucua tiuuníaa pueyari canaa timitiaree canaa tiuquijiosacari. ¹⁸ Pabloori tariqui canaata quiaquiaari Santiago níquiniuucua. Tii quiriqúiaajaariuhua puetunujuanaa Jesuucua tiuuníaa jiiitanaa pueya. ¹⁹ Canaa tiuquishacari, canaari nojori saruhuataquiaarini. Na nuhuaji, Pabloori nojori pohuataquiaari puetunu Pueyaso miishanojuanaa na pohuatanuucua Jesujiniji, na rucuanijosacari tucuaaanu taucuaa quijia jiyacajinia. ²⁰ Pueya jaara

naa tojiquiaari Pablo pohuatasantej, puetunu tii quiniaajanaari Pueyaso maniniuhuaqueetaquiaari nojori shuquiritiasacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niquiquiaacuajani, jiyanoehua queraatia parta Judiocuacaari Jesuucua tiuya. Puetunu nojorijianaari tariucuacaanu Moisés niishitiojosano tojtiajacajuhuj, nocua nojori jiaatianuta jiyanoehua. ²¹ Nio Jerusalén tiacajinia quiniaa Jesuucua tiuuniaa pueyari quiocuaji tojiquianujuhuj. Quiaanaari tamonu jiyacajinia quijiaa parta Judiocuaca niishitiojoquiaa maja nojori miiniuria tari tariucuacaanu Moisés niishitiojosano. Quiaanaari niishitiojoquiaajuhuj maja nojori necohua cararaatiuquia co nojori miatejonura, taa pa supuetanaa niishitiojosaquiaaricuaani. ²² Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? ²³ Canaari naa niishiri-oyiani, naa quia miiri juhuari. Niya qiyari cuatro pueya na naca tuquenu-uterigiano, tarijia na sequetusano Pueyaso na tohuateenura. ²⁴ Nojori quia jiyataare Pueyaso Secojoua tiajinia. Niocua nia cuaqueya jeequejosee taa pa supuetanaa sequequiaaricujani. Naajuhuj, quiocua nojoriria cumaneeca niquitiore nojori naca riuujiushaanura. Quiaa jaara naa miiritij, puetunu pueyajanaari niishiniutianiya majaqui seetanujuanaa quiquianu pueya sequesano quiajanijajiniji. Niishitiuniutianiyaariuhuj, quiaaqui tariucuacaanu Moisés niishitiojosano miyajaa. ²⁵ Majaari Jesuucua tiuunio taucuacaqua quia tacaani. Canaacuajaari tari nojori nacasuquiaari canaa naajioneenjini, nojoriicuara canaa naajiosacari. Canaari nojori sequequiaari cutarani maja tari nojori tojinuria Moisés niishitiojosano. Canaari nojori sequequiaarijiuhuj, maja na miaquenuunura shipinishano pueyasohuacuara puecoosano casaa, naajuhuj, maja na miaquenuunura nanaca. Canaari nojori sequequiaarijiuhuj maja na miaquenuunura shu na nanacataja, naajuhuj, maja na numuetucunura na camishoo maaji. Puetunu pa supuetanaa rootasanojinijianaani, saa niojuaari taucuaca tojishocorigiano rootasano.

Na cojiniaata Pablo quioosacari Pueyaso Secojoua tiajinia

²⁶ Pabloori narta Pueyaso pueya sequesano tojiquiaari jaarajaaja. Naaratej, nojuajaari cuno cuatro pueya jiyataquiaari tariqui. Nojoritia jeequejoquiaari na cuaqueyari taa Moisés niishitiojoquiaaricujani. Naa na miini nuhuajitij, Pueyaso Secojoua tiajinia tiuquitiaquiaari pueyacuara secोजनाacua. Na sequetuquiaariiri casaa juuca na tucuatatunutaniya na cuaqueya na jeequejonuununi, naajuhuj, casaa juuca nojori panutaniya Pueyasora na niquitiosocorigianoni.

²⁷ Quera nojori tucuatiasacari puetunu cuno semaana juucajanaa, Asia jiyajinijinio narta Judiocuacaari Pablo niquiquiaari Pueyaso Secojoua tiajinia. Nojoriiri puetunu pueyajanaa nasojoquiaari ritia. Jiyacari Pablo quiatureeri. ²⁸ Na quiatusacari Pablo, pueya na jiiquioonutareeri:

—¡Israel pueyanaa, miji! ¡Canaa nia naacuseeja! Nioori noo pueyanocujaja tiqiyocua na rucuanesaqui pueya niishitiojoquiaa sacuraafia pocuaratej, nio Pueyaso Secojoua tiacuarajuhuj. Naajuhuj, tariucuacaanu Moisés Rootasano sesacatequiaa pueyajaariuhuj. ¡Quiarijiani, pa Secojoua tiajinia sacuraatia tiuquinitiaree taucuacaari!

²⁹ Cuno Judiocuacaari naa sequetuquiaari Pablotej, Tróximo jiyanihano pueyanota nojori niqiniuucua nojuaja tarijia na rucuanajosacari cuno tiacajinijaja. Tróximoari Jesuucua tiuunia tahue quijia, Éfeso tiacajinijinio pueyano. Naaratej, cuno Judiocuacaari jiyaniquiaari Pablo naasucuaari cuno tahue tiuquiniiri Pueyaso Secojoua tiajinia.

³⁰ Puetunu Jerusalén tiacajinia quiniaa pueyajanaari juaaquoiquaari. Pabloocua netecuatuquiaariiri. Na quiatuereeri. Pueyaso Secojoua tiacoji na jaatiuquiaari carijiniacumaari. Pueyaso Secojoua tia tohuateryari ritia tionujusaquiaari na nuhuaji. ³¹ Pueyari tari monu paniriquiaa Pablo. Jiyacaritij, tii Jerusalén tiacajinia quijia Romano soldadohua comandanteeri numootesaaquiaari: “Judocuaca na juaaniutia nacoya!” Cuno comandanteni, nojuajaari soldadohua capitáncuaca jiyaniijia. ³² Jiyacaritij, comandanteeri na soldadohua rerejotequiaari ritia, na capitáncuacanio. Tee pueya nacooriguiaani, nocua netecuatuquiaariiri. Judocuaca jaara niquiquiaari comandante na soldadohua neretaano nojoriicua, jiyacari shusha cartetuquiaari Pablo piquitiuniuuri. ³³ Comandante tiuquishacari nojoriicua, Pablo quiaseejanaari. Na soldadohua sequereeri:

—Caapiqui cumayocua casaa nia saatijiore na numatucua cajiniocua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

³⁴ Pueyari saaja jiyajeneta nacooriguiaa. Nioori tamaatia nacooriguiaacujua. Tamasacaari socua tamaatia nacooriguiaajanaajataj. Comandanteeri cunora maja na niishiniu quiquiaari casaa Pablo miirijiaarani, puera nojori cojutatenuucua na nacoosacari. Cunora na soldadohua sequereeri:

—¡Pa quijia tiajinia nia jaatucuyarohua!

³⁵ Soldadohua tacatasacari tari nojori quijia tia tacatuhuoco Pablo nojori jaatucusacari, Judocuacaari jiyacari quera na macaaniutia socua shiiniuquitiaquiaari Pabloocua, na monu paniniuria juucua. Soldadohuari nojoriicujaji Pablo shiitioquiaari jiyocuaaanu. ³⁶ Pueyari soldadohua nuhuaji na cocuatasacari jiiquioonuuriquiaa:

—¡Nia more cuno sesaaca! ¡Nia more!

Tama nocuaji Pablo tacusacarijiaaja

³⁷ Quera soldadohua tiuquinishacari Pablo nojori quijia tiaco, Pabloori soldadohua comandante sequereeri:

—Quenaaja niquiriyatu rupaa sequereera cuno pueya.

Comandanteeri na riucuaaree:

—¿Quiaaquiiri Griego rupaa pocuaja? Janiya juucua quia jyaniriquiaa Egipto jiyajiniinio pueyanoni. ³⁸ ¿Majateeri noo quiajaninya quiquianucuaaja, cariiquia jiyajinia jiyatacanu cuatro mil puecojuaca pueyatej?

³⁹ Pabloori saaja na sequereeri:

—Janiyari Judio pueyanoni, Tarso tiacajinia rasanotuhuj. Naacuajitij, janiyari Tarso tiacajiniinio pueyanoni, teyano tiacatucuaaja socua panishano tiaca Cilicia jiyajiniani. Quenaaja rupaquijia cua tarishitiricuarajaj. Cuno pueya sequenu pania niquiriyatu rupaa quenaajanijia.

⁴⁰ Comandanteeri socua na sequereeri:

—Quia pocuare.

Pabloori jiyacari tacatujiniji nujaquiaari. Na juaashiquia shiitioquiaari pueya na sanaajanuraari. Puetunujuanaa jaara sanaajetaquiaari, nojoriicua pocuaree tama nojori Hebreo rupaajiniaari. Naa nojori sequereeri:

22

¹—Cua tapueyocuaacanaa, cua jyaniijanucuaanaa, nia tojitiare cua sequesano nijaninya tama cua tacusacarijiaaja cucuaji.

² Cuno pueya jaara tojiquiaari Pablo pocuasacari nojoriicua Hebreo rupaajinia, pueyari maninia sanaajetaquiaarijianaa. Pabloori nojori sequereeri:

³—Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalielri cua niishitiojona quijia. Jiyanohua rootasaaquiaari pa supuetanaa niishitiojosanoni. Janiyari pueyaracaanu Pueyaso panishano miiniuucua jiaatiaquiaani, taa quiarijia nia miiniu panianijia. ⁴ Janiyari tarijia Jesuucua tiuunaa pajejani naquiya cua mitiasocoriquiano. Janiyari na mooquiaarijuhuaj. Janiyari canuu cojiritiaquiaari quioonu maajipohuatajani, cua nujuatejosocoriquiano nujuatejojuajinia. ⁵ Pueyacuara secojonaa camarnuuri cua miijiosano niishiyajuhua, puetunu pa jiyaniijianucuajanaano. Nojoricuaari cua niqutioquiaari nojori naajione Damasco tiacajinia quiniaa parta Judiocuacaacuara. Janiyari juucua quiariquiaa Jesuucua tiuunaa pueya cua pajenura Damasco tiacajiniani. Quera cua quioosano cua nitiamohua nia Jerusalén tiacajiniani, saniitiojosocoriquiano.

Pablo pohuatasacari Jesuucua na tiuuniujiniji

⁶ Janiyari juucua nucuaco quiariquiaani. Quera cua tiuquishacari Damasco tiacajinia, panacariiri quiriquiaa. Canashyaquiji jiyanohua shacantuucua juhua miacanaari cua nunuquiaari. ⁷ Janiyari juhua jatasaareeni. Jiyacaritij, janiyari rupaa tojirii cua sequayanoni: “Saulo, Saulonaa, ¿casaara quia miitiaa puera janiyani?” ⁸ Janiyari na nequesotareeni: “¿Cantegua Jiyaniijianaa?” Cua sequereeri: “Janiyacuaaari Jesuni, Nazaret tiacajinijinio pueyano. Cunocuaaari quiaa na miitiaani”. ⁹ Cua cojiniaa pueyari cuno shacantuucua na niquishacari shiriiquitiuquiaari. Majaari na tojitiuuniu quiquiaari cutara jiyocuacaanuji rupaa cucua pocuaano. ¹⁰ Janiyari socua na sequereeni: “¿Casaa cua miyarini Jiyaniijianaa?” Jiyaniijiaari cua sequereeni: “Quia sanerohua. Naajaa quia quiaare Damasco tiacajinia. Quiaari tii sequesaanutaniya puetunu cua panishanojuanaa quia miiniuria”. ¹¹ Cuno shacantuucua cua nunuquiaari jiyocuacaanujini, cua namijia sesoquiaariiri. Janiyari cariojuaru quiriquiaani. Naacujitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

¹² Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetanujuanaa tariucuacaanu Moisés niishitiojosano tojijia cutara. Puetunu Damasco tiacajinia quiniaa Judiocuacaari na panijia. Nojoriiri na sequetujua: “Ananías cutaraari maninia pueyano”. ¹³ Ananíasri jiyacari cua niqiniuucua niquiaari. Jaara tiuquiquiaari cucua, cua sequeseeri: “Cua tarajanu Saulonaa, maninia niqijijara quia quiriohua”. Jiyacaritij, cua namijiaari ritia jeequequee. Janiyari maninia niqiquii Ananíasni. ¹⁴ Cua sequereeariuhua: “Pa supuetanaa Jiyaniijia Pueyasocuaaari quia saquiritioquiaari tariucuacaanujiniji, na niishitiojura quiajanija na panishano quia miiniuria. Quia saquiritioquiaariuhua quia niqiniuria taquiya pocujinio sesa miyashijia cutara, tama na camaru rupaajiniji quia tojiniuria na sequesanojuhuaj. Nojuacuajaari pa Jiyaniijia Jesucristo. ¹⁵ Quiaari puetunu pueyapue niquiarajanaa pohuatanutaniya nojuajiniji quia niquishano, quia tojishanonio”.

¹⁶ Ananíasri socua cua sequequiaari: “¿Casaara quia tarishiyarini? Quiarijiani, quiaa cuaara tiuquinishaaria. Jiyaniijia Jesu quia sequere: ‘Cua jiyanoori sesa cua miishanojiniji’. Nocua quia tiushacari, quia sesa miishanoori jeequesaanutaniya”.

Pablo pohuatasano taa Jesu jiyaroquiaari nojuaja taucuacaacuanu

¹⁷ 'Janiya jaara riujjuuquiaariuhua Jerusalén tiacajiniohuani, janiyari Pueyaso Secojonuujua tiajinia secojoriquiaani. ¹⁸ Cua secojosacari, janiyari Jesu niqiuquiaari juhua cua maquenujiniani. Cua sequereeri: "Ritia quia quiaare niiquiji. Nio pueyari maja na tojitianu quiniutianiya quiajaniya, nojori quia pohuatasacari janiyajiniiji". ¹⁹ Janiyari saaja na sequereeni: "Cua Jiyaniijianaa, nojoricuajaruhua niishiya janiyari quiocua tiuuniaa pueya quioojuani puetunu rerejovia tiajinijijianaa cua nujuatejosocoriquiano nojori. Janiyari nojori mojuuajuuhuj. ²⁰ Naajuuhuj, quia rupaa pohuatana Esteban jaara mosaaquiaaritij, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaajaaniuhuj, nojori mosacari Esteban. Janiyari jaarajaaja sequequiaarini: 'Cuaara mosaaria' ". ²¹ Naa cua sequesacaritij, Jiyaniijaari saaja cua sequereeni: "¡Niiquiji quia quiaarejaj! Janiyacuajaari tucuacaanu quia jiyaronutaniya tucuacaacuani".

Comandante jittiasacari Pablo

²² Pueyari sanaa tojitiariquiaa Pablo pohuatasacari. Saniniuujia, Pablo jaara jiyaniquiquiaari taucuaca, pueyari jiyacari coteequiaari nacoonu, taucuaca soojeaca nojori quiniuucua:

—¡Cuaara mosaaria cuno pueyano! ¡Majaari maninia jiyano pueyano rishiniuria socuatej!

Cuno pueyari naa nacooriguiaa.

²³ Na juaaquionuta na nacoosacariija, na toqueya quejootuquiaari jiyocuaaanuuri quera na macaaniutia. Naa quejootuquiaari jiyajuajaariuhuj. ²⁴ Comandanteeri na capitán cuaca sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacunono, cuaara sequeera casaara naa pueya nacoyani.

²⁵ Soldadohua jaara tari Pablo morojotuquiaari tiaacuara na majacutusocoriquiano juucua, Pabloori capitán sequequiaari:

—¿Jiyaniija César rootasanotee, naa nequesoreesoojua nia majacunura narta Romano pueyanotej?

²⁶ Capitán jaara tojiquiaari naa Pablo sequesantej, ritia netequiaariiri. Na comandante sequesereeri:

—¡Quiaa cocuaatia miya! ¡Cuno pueyanona Romano!

²⁷ Comandanteeri ritia Pabloocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucaree:

—Taaquiriirinij.

²⁸ Comandanteeri na sequerohuacuuhuj:

—Romano pueyano cua quiniuria, janiyari queraatia cua cumaneeca niqutioquiaarini.

Pabloori saaja na sequeree:

—Janiyari Romano cutarani, nojori tiacajinia cua rasaanuucua.

²⁹ Cuno pojori, Pablo majacunura seerataaquiaari juucuan, naa nojori tojitiacacariitij, Pablo shuriucuaji ritia shiriqutiaquiaariiri. Comandante niishishacari Pablo seetanujuanaa Romano quiquiaari, puerereejaariuhuj, Pablo na morojotenuucua.

Tama nocuaji Pablo tacusacariijaaja Judiocuaca jiyaniijianucua niqiuara

³⁰ Tariqui saniniuujia, comandanteeri maninia niishiniu paniquiaari casaara Judiocuaca nacoariquiaacuua naa Pabloni. Naaratej, comandanteeri Judiocuacaacuara secojonaa jiyaniijianucua rerejotequiaari. Puetunu Judiocuaca camarucua nacasunaa maanujuanaa

rerejotequiaariijaariuhua. Nojoricuajaari Sanedrín maanu. Jiyacari Pablo numatucujiniji ruparetaquiaari cumayocua saatijiotasanoori. Puetunu nojorijianaa jaara tari rerejoquiaari, jiyacari Pablo tohuatequiaariiri. Nojori tacoji na nujuatereeri.

23

¹ Pabloori juhuacatecara pohuatanu coteequiaari camarucua niQUIARA. Nojori sequereeri:

—Cua tapueyocuaanaa, janyari pueyaracaanu juhuajaniya quiquiaani, Pueyaso tojijia cua quishacari pueyaracaanu.

² Naa Pablo sequesacaritij, pueyacuara secojonaa jiyaniijajanaari juaarii. Ananías na sesa. Nojuajaari Pablo jiyaniquiaari najuhuaa pocuaa naasucua. Nocuaji, Ananíasri Pablo shuriucua nujuatunaa sequequiaari ritia:

—¡Na rupaajinia nia piri naa pocuaaniquitij!

Pablo shuriucua nujuanaari jaarajaaja na piQUI. ³ Majaari Pablo niishiniu quiquiaari casaate Ananías quiquiaarini. Naacujitij, Pabloori juhuajaniya Ananías sequequiaari:

—¡Pueyasoori saniniuujia cucua quia naminiutianiyacujua, Moisés Rootasano tojiyashijianaa! Nia jyanishacari janyari Moisés Rootasano tojiyashijiani, niaari coteenu cua nequesoreya maninia taa Moisés rootaquiaaricujani. ¡Quiaa sajara Moisés Rootasano tojiyashijia cutara, quia sequesacari cua pishaanura nia nequesoreyaquishacarijia maninia janiya!

⁴ Pablo shuriucua nujuatunaari Pablo sequequiaari:

—¿Quiaateeri saa rerequeteyajaa pueyacuara secojonaa jiyaniijiaruhua?

⁵ Pabloori nojori riucaaree:

—Cua tapueyocuaanaa, cua jiyanoori. Paacujajaari naa rootasaaquiaari Moisés nequesoreetuneejiniani:

“Majaari sacuaraatia rimiaaquenu nia camarnuucuaa”.

Cua pueyanaa, maja cutaraari cua niishiniu quiriquiaa nojuajate pueyacuara secojonaa jiyaniijia.

⁶ Pabloori niishiquii cuno Judiocuaca camarucua nacasunaa cuniqui quiriquiaani, noojiaqueya nojorijinijinioori Saduceocuaca maanujiniji quiriquiaa. Tamasacaari saniniuujia narta Fariseocuaca maanujiniji quiriquiaacujua. Naaratej, Pabloori jyanohua na rupaa paaretaquiaari naa na sequenura nojori:

—¡Cua tapueyocuaanaa, janyari Fariseo pueyanoni! Cua shipininioori Fariseo pueyano quiquiaarijuhuaj. Canaari Pueyaso Rupaacua tuuujacani. Naacujitij canaari niishiyani Pueyasoori macunucua samiitianijionutanihua taa puetunu cuarta Fariseocuaca niya quiniaa tiuyanijia. ¡Niaaquiiri jiyamitia cua nequesoreya!

⁷ Pablo jaara naa sequequiaaritij, Fariseocuacaari Saduceocuacata juhuacatecara juayonuutaquiaari tama nojorijiaaja. Naacujitij, nojoriiri caapiqui maapuera raquitiiquiaari. ⁸ Saduceocuacaari jyaninya maja macunucua samiitiaconu quiniutianihua. Nojoriiri sequeyajuahuaj: “Maja Pueyaso seya quiniu”. Pueyapuenaaari sohuanuujujuhuaj. Fariseocuaca cutaraari nojori cuarachashitishanoocua tiuya. ⁹ Naacujitij, puetunu pueyajanaari nacooriquiaa na juayonuutasacari. Jiyacaritij, tariucuacaanu Moisés Naajiotasanojiniji niishitiojonaa pueyari sanetaquiaari. Nojoriiri Fariseocuaca quijiajuhuaj. Nojoriiri naa sequetuquiaari Pablojiniji:

—¡Nio pueyanoori maja sesa na miiniu quiquianu! Maninia sohanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenujure Pueyaso panishano na miishacarini?

¹⁰ Pueyari socua jiyacatequiaari nacoonu. Comandanteeri puerequiaari, na jiyanishacari Pablo naasucua socua sureesaanutaniyaquij. Naa jiyaniquiaariiri, puerajanaa pueya juaaquiosacari. Nocuaji, comandanteeri ritia na soldadohua jiyaramiquiquiaari, na tiajinia nojori tiuquininiuhua Pablo pueya tajiniji. Naa miituquiaariiri.

¹¹ Cuno niucujani, Jiyaniijia Jesuuri Pabloocua muetaquiaari. Na sequereeri:

—Quioojia quia cumaquiri Pablonaa. Naatej, taa quia pohuatarucuaa janiyajiniji niya Jerusalén tiacajiniacuaani, quiaari naa pohuatanutaniya janiyajiniji Roma tiacajinia quiniaajuhua, Césarjanaa niqiarajuhua.

Judiocuaca roojotoosacari Pablo na motunura juucua

¹² Tariqui saniniuujia, noojiaqueya Judiocuacajinijinoori Pabloocua roojotooquiaari na monura. Nojoriiri naa sequetuquiaariti:

—Paa jaara Pablo moyaquirini, pocua miaqueyaquirini, pocua ratuyaquirijianihua.

¹³ Nojoriiri cuarenta canuu quiquiaari, naa sequetuquiaarini. ¹⁴ Na nuhuaji, cuno pojoriiri pueyacuara secojona jiyaniijianucuaacua quiaquiaari, Sanedrín maanuucuanio. Nojoriiri naa sequetuquiaari:

—Majaari canaa miaquenu quiniutianiya quenaaja casa, canaa cuaraa more Pablojaatijia. ¹⁵ Nijaniya, pueyacuara secojona jiyaniijianucuaanaa, puetunu Sanedrín maanujanaano, nia sequere comandante cuaraa nitaara tariqui Pablo niaacua. Niocua naa na sequerenoj: “Miji Pablo quia nitaare. Canaari socua maninia na nequesoreenu paniyani”. Canaacia jiyacari niaacua na tiuquiyaquishacarijia nuu cajiniocua na moreni.

¹⁶ Tamonu pueyanoori Pablo raaquia caminiujuquiaari naa cuno pojori sequesano camarucatej. Pablo raaquiaari nocuaji ritia soldadohua quijia tiajinia quiaquiaari na cama Pablo na pohuatanura. ¹⁷ Jaara tari na pohuataquiaari, Pabloori jiyacari cuniqui cojuanaajinijinio capitán piiquiaari. Na sequereeri:

—Nio caya samijia quia jiyataare comandantecua. Nojuajaari comandante numootenu paniya.

¹⁸ Jiyacariti, capitánri Pablo raaquia jiyataquiaari. Na tiuquishacari, comandante sequetiaariiri:

—Pa quiasano Pabloori cua piiriini. Cua sequereeri cua nitianura quiocua nio caya samijia. Nojuajanaari casa quia sequenu paniya.

¹⁹ Jiyacariti, comandanteeri caya samijia numatujiniji quiaquiaari. Tamocora na jaatucureeri. Tii na nequesotaseeri:

—¿Casa quia sequenu paniya janiyani?

²⁰ Caya samijiaari na sequeree:

—Noojiaqueya Judiocuacajinijinoori Pabloocua roojotoorucuaa. Quiaari sapojonu sequesaanutaniya tariqui quia jiyatanura Pablo, puetunu Sanedrín maanujanaa niqiaara nequesoreesocoriquiano. ²¹ Quiaa jaara sequesaare, majaari nojori tojinu. Cuarenta canuuri tari nuu cajiniocua nocuaji jamaatiuya. Cuno pojoriniaari maja na miaquenuunu quiniutianiya, majanaari na raruunu quiniutianiyajuhua, cuaraa moture Pablojaatijia.

²² Comandanteeri caya samijia sequetiaari:

—Maniniacuaaja. Majaari tamasa pohuatanu quia sequesano janiya. Tariucuaaja. Quia quiaarohua.

Soldadohua jiyatasacari Pablo camarnu Félix

²³ Comandanteeri caapiqui capitán piiquiaari. Nojori sequereeri na numootejonura dosciento soldadohua, Cesareya tiacajinia quiojoriqiano cuno niucuaaja. Mariyata cuara quiojoora setenta soldadohua caballohua nijinia cajitiujiacajuhuaaj, suaara dosciento soldadohua saa cashiriacajano.

²⁴ Comandanteeri na capitán cuara sequequiaarijihuaj, nojori niojotanura cajitiucua tamasaca caballohua nijinia Pablo cajijiara. Nojori sequequiaari-jaarihuaj:

—Niocua maninia cojuuare Pablo, cuara tiuquiria camarnu Félix nequesoresocoriquiano.

²⁵ Comandanteeri na naajionee niqutioquiaari Pablo jiyatanaa. Naa naajiosanoori quiquiaari camarnu Félix cuara:

²⁶ “Camarnu Félix naa. Nio Claudio Lisias naajionee. ¿Taa quia quiyani cua panishano camarnunaa? ²⁷ Cua jiyarotasano pueyanonijini quia pohuatareeraj. Na sesa Pablo. Narta Judiocuacaari na motunu paniquianu. Janiyari jiyacari cua soldadohuata nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequereeni: ‘Judiocuacaacuaji nia quiare ritia cuno pueyano, mariqui na motureeri’. ²⁸ Maninia cua niishinuria casaara naa pueya nacootariquiaa Pablóni, janiyari puetunu Judiocuaca camarucua nacasunaa rerejotecanuni. Janiyari nojoricua tohuatecanu Pablóni, nojori nequesoreenura nojuajanaa cua tojishocoriquiano. Janiyajanaa jaara Pablo tojiqianuni, casaara pueya monu paniriquiaanoj, janiyari jiyacari shusha niishiriini. ²⁹ Nojori quiri na nacootacanu Pablo tojiyaquiniucua tariucuaaanu tama nojori supuetanaa rootasanojuaja. Cunora na motunu paniriquiaari. Janiyari quia sequeyani, ¿maatucua cunora mosaa-reeri? Majaari quenaaja sesa na miiniu quiquianu, pueyaracaanu na nujuatesaanura. ³⁰ Janiyari sequesaarucuaajuhuaaj, nojiaqueya Judiocacajinijionaa na monu paniya. Janiyari jiyamitia quocua cua soldadohua na jiyarotareeni. Janiyari nocuara saquiriojotanaa sequerucuaajuhuaaj, cuara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuaaja”.

³¹ Soldadohuari naa miiquiaari taa comandante sequequiaari nojoricua-jani. Nojoriiri cuno niucuaaja Pablo jiyataquiaari. Antipatris tiacajinia tiuquijioseeri. ³² Na niocuacata quiojona soldadohuari Antipatris tiacajini tariquicuaji riujuutiaquiaarihua Jerusalén tiacajinihua. Caballohua nijinia cajitiunaa soldadohua cutaraari Pablo jiyataquiaari. ³³ Pablo jiyatanaa jaara tiuquijioseequiaari Cesareya tiacajinia, nojoriiri comandante naajionee niqutiosee camarnu Félix. Pablo na niqutiojotureejaarihuaj. ³⁴ Camarnu serojonu nuhuaji comandante naajionee, Pablo nequesoquiaariiri:

—¿Tee quia rasaaquiaarini?

Pabloori na riucuaree:

—Cilicia jiyajinia rasanonijia.

³⁵ Camarnuuri na sequeree:

—Janiyacua quia nequesoreeriquiani quiocuara saquiriojotanaa jaara tiuquijiore.

Jiyacaritij, camarnuuri na soldadohua sequequiaari cuara maninia cojuatuura Pablo tariucuaaanu jiyaniijia Heródes tiaco. Herodes quishacari jiyaniijia, cuno tiaari nocuaji tiasaaquiaari na quijiara.

24

Tama Pablo tacusacari nocuajijiaaja camarnu Félix niquiara

¹ Pabloori cinco juuca camueequiaari tari Cesareya tiacajinia. Jiyacari tiuquijioquiaariiri nocuara saquiriojotanuuriqiano pueya. Nojoriiri quiquiaari pueyacuara secojonaa jiyaniijia Ananías, mariyata secaja Judiocuaca camarucuanio. Nojoritia tiuquiquiaariiri Tértulo jiyaniishano pueyanojuhua. Jiyanoehua pocuanu niishijia. Puetunu nio pojorijianaari camarnu Félix^{cua} tiuquitiaquiaari Pabloocuara na saquiriojotanura. ² Pablo jaara tohuatesaaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jiyanoehua niishijia. Naa niishijia quia quishacaritj, quiaari maninia quia pueya jiitiaa. Canaari naacua juhuanijaniya quiyani, maninia canaa quia jiitiasacari. ³ Canaari cunora quia timitiaani camarnunaa, maninia quia jiitianuucua canaa pueyaracaanu, puetunu canaa jiyajiniajanaa. ⁴ Maja puera cua tarishitiniu paniniu quiajaniya. Quenaaja rupaquijia canaa quia tojiricuara. ⁵ Nio pueyanoori tariucuaaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quiníaa Judiocuacajuhua. Naa sesa na niishitiojonuucua pueyatej, tamasaari maja tari na rupenu paniniu narta pueyano. Nio pueyano tojitiajacaari sesojosaaquiaari Nazarenocua tiuníaa maapue. Nio pueyanocuaajaari cuno pojori jiyaniijia. ⁶ Juucua Pueyaso juaatiniu paniquianujaariuhua, tahue na tiuquininiu panishacari Pueyaso Secojoua tiajinia. Canaari jiyamitia na quiarucuaani, canaa nequesoreesoriquiano taa tariucuaaanu canaa supuetanaa rootasaaquiaaricuaajani. ⁷ Comandante Lisiasri canaa na jaariutiarcuaa saajani. ⁸ Canaa sequerucuaajaariuhua: “Cante nio pueyanocuaara saquiriojotanu paniyani, cuara quiaara camarnu Félix^{cua}”. Naa canaa sequerucuaari. Nio pueyano quia nequesotasure, quia niishiniuria maninia. Seetanujuanaacua, canaari cunora nocuara quia saquiriojotaani.

⁹ Cuniqi quiníaa Judiocuacaari jaarajaaja sequeturee:

—Taaquiriirinij, camarnu Félixnaa. Naacuaaquinatejaj, taa Tértulo sequeyacuajani.

¹⁰ Camarnuuri na juashiquia shiitioquiaari Pablo pocuanura saniniujia. Pabloori jiyacari coteeree. Naa sequereeri:

—Taaquiriirinij, pocuashiyacuaaquinatejaj. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia quishacari. Naaratej, janiyari juhuanijaniya quia niquiara tama cucuaji tacunu paniyani, cuarta Judiocuaca saquiriojotasacari cucuara quiajaniya. ¹¹ Janiyari shusha tiuquiriohuacuaa Jerusalén tiacajiniani, Pueyaso cua secojonura Secojonuujua tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj. ¹² Nojoriiri maja quenaaja na riuriatantu quiqianu janiya tamonu pueyanota juayonuutaano. Majaari na riuriatatunu quiqianu janiya pueya ruutaqueyano quenaaja Pueyaso Secojoua tiajinia. Majaari quenaaja nojori riuriatantu quiqianu janiya canaa Secojoua tiajinia juayonuutaano pueyata. Majaari quenaaja naa cua miiniu quiquiaari puetunu tiacajiniajanaa cua rucuanajosacari. ¹³ Nio pojori cucuara quia saquiriojotaani, nojoriiri maja na naata sequenu seetanujuanaa janiya sesa miijiani.

¹⁴ Nojori sequesacari janiyanaari Pueyaso tojjia tamaatia nojorijinijini,

cua tojiniuucua cuno Nazareno pueyano, taaquiriirini. Saaja cuno nojori sequesano cutaraari seetanujuanaa. Janiyari Nazareno tojijiani seetanujuanaa cua tiuushacari puetunu Moisés naajiotasanoocuajanaa, naajuhujaj, cua tiuushacari puetunu canaa supuetanaa caminiujuishano Pueyasojiniji naajionuutasanoocuajanaano. ¹⁵ Janiyari juhua cucuara saquiritototanaa pueya tiuya Pueyasocuajuhujaj, taa Pueyaso samiitianijionutaniuhua macunucuan; maninia miijiacaa, sesa miijiacano. ¹⁶ Naaratej, janiyari pueyaracaanu sesa miyaquini saniniujuquiaani, maninia cua quiniuria Pueyaso niqiara, pueya niqiarano. Naacuajitij, janiya jaara samiitiaro-huani, majaari cua macuhajenu quiniutianiya.

¹⁷ 'Queraatia marijia cua shocotejonu nuhuaji cua rucanejosacari tamonu jiyacajinia, janiyari shusha tiuquiriohuacuaa cua jiyajiniani. Tamonu jiyacajiniji Jesuucua tiunnaa niqutiojosano cumaneeca tiuquitiarohuacuaanijia. Janiyari na tiuquitiarohuani na jatanuhuaa Jerusalén tiacajinia, Jesuucua tiunnaa casamiijiuucua niqutiojosocoriquiano, mariyata cua jiiitiasanojiniji cua niqutionuhuaa Pueyasora. ¹⁸ Naa cua miini nuhuaji Pueyaso Secojojua tiajiniatej, Asia jiyajinijinio Judiocuacari cua naacutcanu tohuataano juucua Pueyaso Secojojua tiajiniji. Janiyari juucua tohuatariquihuani cua cuaqueya cua jeequenu nuhuaji, taa canaa supuetanaa niishitiojosaaquiaaricujani. Cuno juuca, majaari queraatia pueya quini quiriqiaa Pueyaso Secojonuuajinia. Majaari quenaaja pueyata cua juayonuutatu quiriqiaajuhujaj. ¹⁹ ¿Teete cuno pojoricuarani? Mariqui niya nimiaacara cucuara na saquiritototanaa, janiya jaara sesa miiquianuni. ²⁰ Cucuara saquiritototanaa jaara nijiaquimia, naajaa, nio pojori niya quiyani, nojori Judiocuaca camarucua nacasunaa nequesoresacari janiya tii quitiuquianu jiyacarijuhuaj. Nojori cuaara sequeera, ¿cuno camarucuate cua sequecanu janiya sesa miiquianuni? ²¹ ¿Pueyateeri cucuara saquiritototaa soj, nio cua sequenuuca Judiocuaca camarucua: "Niaari cua nequesoreya quiarijia, cua niishishacari macunucuaari samiitianijiosaanutaniuhua"? Janiyacuajaari naa nacacanu camarucua nequesoresacari janiyani.

²² Camarnu Félix jaara naa tojiqiaari Pablo sequesanootej, nojuajaari pueya sequequiaari:

—Comandante Lisias cuaara tiuquiritototanaa, janiyacua Pablo nequesoreseriquiani.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pablocuara saquiritototanaa pueya tarinitiaquiarijiaara. ²³ Na nuhuaji, camarnu Félixri soldadohua capitán sequequiaari:

—Pablo nia tiuquiritototanaa. Niocua maninia na cojuarenoj. Na rupuenaa, tapueyocuacono, nojori jaara Pablocuara nimiaquia, majaari nocuaji na tenujununoj. Nojori cuaara na niqutiojuuca na panishano.

²⁴ Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiritototanaa necocuataari. Necocua Drusilaari Judiocuaacajinijinio maaji quijia. Camarnu Félixri na soldadohua sequequiaari:

—¡Pablo nia tohuatere! Janiyari cua niqiuocuaa na tojiniu paniyani. Cuaara canaa niqiara pohuataara taate Jesuucua tiuushanojuaarani.

²⁵ Naacuajitij, Pabloori Félix pohuataquiaari nojori niqiara taate pa naata maninia miijiaa pa quiniuni. Pohuataquiaarijuhuaj taate pa naata tama pa cuaqueyajaaja pa cojuanu maniniani, sesa pa miyaquiniucujaj. Naajuhujaj, Pabloori na numotequiaari Pueyasoori sesa miijiacaa samiitianutaniya.

Camarnu Félix jaara naa tojiqiaariti, jiyano hua shiri quiquiaariiri. Pablo sequereeri:

—Tariucua! Quia quiaarohuacuarajaara. Janiya jaara jeya quiri quiani, janiyacua quia sequereeraniuhua.

²⁶ Camarnu Félixri naa sequeyarucua na soldado hua sequequiaari Pablo na jiyatanura nocua, nata na pocoojonura. Nojuajaari juucua jiyani quiaari Pablo naasucuaari cumaneeca na niqutionutaniya na cartesaanura. ²⁷ Pablo shocojo quiaariiri caapiqui marijia, nujuatesano na quishacari Cesareya tiacajinia. Jiyacariti, Porcio Festoori saniniuuja camarnu jiyatesa quiaari Félix niti. Majaari Félix tohuatenu quiquiaari na nuhuajiria Pablo. Naajaa na tiuja quiaari nujuatesanoori. Naa mi quiaariiri Judiocuaca timitianura nojuaja.

25

Pablo pohuatasacari Festo ni quiaari Jesujiniji

¹ Jiyacariti, Festoori tiu quiquiaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quia quiaari Jerusalén tiacajiniaari. ² Jerusalén tiacajinia na quishacari, pueyacuaa secोजना jiyani jianucuaari tii Judiocuacajinijinio socua tojishano camarucua Pablo cuara saquiriojota quiaari camarnu Festo. ³ Nojoriiri camarnu Festo sequequiaari cuara na soldado hua jiyaroora, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nucuamaji na nishacari. ⁴ Camarnu Festoori saaja nojori riuca quiaari:

—Nujuatesano quiya Cesareya tiacajiniacuaruhua. ¿Maatucua casaara niyara rishaareni? Janiyacuajaari nocua tacatenutaniuhua.

⁵ Camarnuuri nojori sequequiaari juhuaj:

—Niajanijajinijinio socua tojishano pueya cuara quiojohuara cuata Cesareya tiacajinia. Nojoriiri na naata Pablo cuara saquiriojotanu cua ni quiaari tii, cua niishiniuria maninia, Pablote seetanujuanaa sesa miqianujuuara.

⁶ Camarnu Festoori camueenuju quiaari Jerusalén tiacajinia ocho juuca, diez juucaruhua. Na nuhuaji, quia quiaari hua Cesareya tiacajiniuhua. Na tiuquiniu nuhuaji, saniniuuja tariqui cajiquiaari nequesoreesaqui camarnu cajituijiniari, camarnu na quishacari. Jiyacari na soldado sequequiaariiri cuara Pablo tohuateera na nequesoreesoriquiano. ⁷ Judiocuacaari tari tiuquii quiaari Jerusalén tiacajinijijiuhuaj, Pablo cuara na saquiriojotanuunura. Pablo jaara nujuatesa quiaari camarnu tajoji, cuno pojoriiri jaarajaaja catecano quiaari Pablo cuara. Nojoriiri jiyano hua sesa nocuara saquiriojotanu quiaari najuhuana queraatia casa. ⁸ Jiyacariti, Pabloori tama nocuaji na tacusacarijiaaja naa sequequiaari:

—Maja sesa cua miiniu quiquianu. Janiyari tariucuaaanu Moisés Rootasano toji quiaajaaniuhua. Majaari sesa cua miiniu quiquianu Pueyaso Secojojuu tajuahuaj. Majaari Roma tiacajinia quijia pa jiyani jia tojiyashijia cua quiniu.

⁹ Camarnu Festoori jaarajaaja Judiocuaca panishano mi quiaari, cuno pueya paniniuria nojuaja. Naaratej, Pablo nequesota quiaariiri:

—¿Quiaate Jerusalén tiacajinia quianu paniya, tii cua nequesoreenura quiajaniya?

¹⁰ Pabloori na riuca quiaari:

—¿Majateeri Roma tiacajiniji pa jiyaniijijanaa quia jiyatecanu niya camarnura quia quiniuriacuaja? ¿Casaara niyaja quia nequesoreyaquiya janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiyajuhua, majaari sesa cua miiniu quiquianu Judiocuaca. ¹¹ Janiya jaara sesa miirii seetanujuaanaani, cuaara cua motuuraqui. Cucuara cuno pojori saquirojotasano jaara coriaa quiri, majaari quenaaja tamonu pueyano naata niqutionu janiya cua mosaanura. ¿Janiyatucua casaara mosaare najuhuanani? Naaratej, janiyari quia sequeyani camarnunaa: jiyaniijia Césarjanaa cuaara cua nequesoreeraqui.

¹² Camarnu Festo pocoojonu nuhuaji na nacasunaata, Pablo sequequiaariiri:

—Quiaacuajaari cua sequeree cua jiyaronura quiajaniya pa jiyaniijia Césarqua, nojuajanaa nequesoreenura quiajaniya. Janiyari nocua quia jiyaronutaniya cua soldadohuatani.

Jiyaniijia Herodes Agripa niquiara Pablo pahuatasacari Jesujiniji

¹³ Naa Pablo sequesaaunu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuatanaa nojuaja. Agripaari tiuquiquiaari na rimiatu Bereniceta.

¹⁴ Nojori camueenujusacari camarnu Festo tiajinia, Festoori socua jiyaniijia Agripa pahuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano nujuatesano.

¹⁵ Jerusalén tiacajinia cua quishacari, Judiocuacaacuara secojonaa jiyaniijianucuaari nocuara cua saquirojotacanu, Judiocuaca camarucuata. Nojoriiri cua sequetucanu Pablo cua motenura. ¹⁶ Janiyari saaja nojori riucuaanuni: “Roma tiacajiniji jiyaniijiaari maja ritia na monu pueyano. Nocuara saquirojotanaa cuaara nijjoma niya nocuara saquirojotanuunurajaatijia. Monu panishano cuaara riuhuaneera tamajaaja quenaaja nocuaji, jaara seetanujuaanaa quiaquiri nocuara saquirojotasano”.

¹⁷ Naacuajitij, Jerusalén tiacajinijinio pueya nocuara saquirojotanuuriquiano jaara cucua tiuquijiocanu, majaari socua cua tarishiniu quiquianu. Janiyari tariquicuaji nequesoreja cajitujinia cajiquianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano.

¹⁸ Cuno pojori Pablocuara saquirojotanuucanuni, nojoriiri maja quenaaja na saquirojotanuunu quiriucuaa juhua cua niishiriojosano.

¹⁹ Saaja tamaatia nocuara cua saquirojotanuureeri. Pablonaari nojori supetanaa Pueyasojiniji rootasano tamacaquiaa saaja. Cua sequetureejaarihuaj, Jesu jiyaniishano pueyanonaari mosaaquiaari.

Pablonaari saaja pueya niishitiojiyacujua, cuno Jesu jiyaniishanonaari samititiaquiaariuhua. Saminionaari quiari quiyajaa. ²⁰ Naa cua tojishacari nocuara pueya saquirojotasano teje, majaari cua niishiniu quiquianu taa cua miiniutianiyani.

Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?” ²¹ Nojuajaari saaja cua sequecanu: “Jiyaniijia César Augustojanaa cuaara cua nequesoreera juhuari”. Janiyari cunora niyaja nujuatesano na jiiitiaani, janiya cuaara na jiyarore jiyaniijia César Augusto cuajaatijia.

²² Jiyaniijia Agripaari camarnu Festo sequequiaari:

—Janiyari cuno pueyano tojinu paniyajaacuhua.

Festoori na riucuaquiaari:

—Quiaacuajaari tariqui na tojiniutianiya.

²³ Tariqui, jiyaniijia Herodes Agripaari niqúiaariuhua Bereniceta. Nojoriiri tiuquítiaquiaari nequesoreeja sohuacajinia, shanohua jacaria na rucanenuta, shanohua na toqueya maniniuquiyatajuhuaj. Puereeta niqúishano. Nojori tiuquítiasacari, nojori cojiqúiaariiri soldadohua camarucua, mariyata tama cuno tiacajinijinio camarucuaajaanio. Camarnu Festoori jiyacari na soldadohua seerataquiaari Pablo na riniuria, nojori tacoji na njuatesocoriquiano. ²⁴ Pablo tiuquishacari, Festoori sequequiaari:

—Jiyaniijia Agripánaa, puetunu niya canaata rerejono pueyajanaanaa, cua tojitiare. Cuno pueyano niaa na niqúiyani, queraatia Judiocuacaari nocuara cua saquiriojotanuuquiaa, Jerusalén tiacajinia cua quishacari, niya Cesareya tiacajiniajuhuaj. Nojoriiri pueyaracaanu cua taajetequiaa. Cua sequetuquiaari: “Cuno pueyano cuara mosaaria camarnúaa”.

²⁵ Janiyacuajaari tari niishiyani, nio pueyanoori maja sesa na miiniu quiquianu. Naacuajitij, janiyari niishiriojiyani, ¿pueyanotucua casaara najuhuana mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa Jiyaniijiajanaa nequesoreenura nojuaja. Janiyari cunora na jiyaronutaniyani. ²⁶ Saniniuujia majaari cua niishiniu taa cua pohuatanutaniya cua jiyaniijia cua naajiojiniani. Cunora, nio pueyano nitirii niya nia nequesoreesocoriquianonijia, pueyanaa. Janiyari quia panitiaa cutara nojuajanaa quia nequesoreenurani, jiyaniijia Agripánaa. Quia nequesoreere, cua naajionura pa jiyaniijia Augustoocua casaara nio pueyano cua jiyaroree nocuani. ²⁷ Majaari cua naata naajaa jiyaronu quiasano pueyano, maninia nequesoreyaquishoojua.

26

Pablo rihuuanesacari jiyaniijia Agripa

¹ Jiyacartij, Jiyaniijia Agripaari Pablo sequequiaari:

—Quiocuaji quia rihuuanereja, jaara seetanujuanaa quiyaquiri quiocuara pueya saquiriojotanasano.

Pabloori na juaashiquia sanaquiaari. Naa coteequiaari pocuanuuri:

²—Timiyaniijia jiyaniijia Agripánaa, quia sequesacari cua pocuanura quia niquiara, tama cua tacunura cucuajijiaaja, Judiocuaca saquiriojotasanojiniji cucuara. ³ Quiaari puetunu cuarta Judiocuaca miijosanojuanaa niishijiajuhuaj, puetunu canaa nacojotasanojuanaanio. Janiyari cunora quia sequeyani, nareja cua tojiri cua pohuatasacari quiajaniya.

Pablo pohuatasacari taa na quiquiaari Jesuucua na tiuyaquishacarijiani

⁴ Puetunu Judiocuacajanaari niishiyajuahuaj taa quijia cua quiquiaari cua naatujuajiniji nojoritia cua quishacari cua jiyajiniani, Jerusalén tiacajiniano. ⁵ Cuno Judiocuaca quia nequesotasureeraj. Nojori cuara quia pohuataara jaara paniri pohuatanu. Cua mashajajiniji, janiyari seetanujuanaa Fariseo quijiani. Fariseocuacaari puetunu canaa supuetanaa rootasano Pueyasojinijijianaa tojitiaja cutara, socua tamasaca cuarta Judiocuacajiniji. ⁶ Nojoriijaari cucuara saquiriojotacanu cua tiushacari Pueyasocua, taa na samiitianijionutaniuhua macanuucuanu. Pueyasoori nojori samiitianijionutaniuhua taa na sequequiaari tariucuaaanu canaa supuetanaacuajani. ⁷ Quiarijiani, canaa supuetana Israel doce niquihuacuajinio caneno pueyari naa seetanujuanaa Pueyaso sequesano niqúinuria sashiyajaa. Naaratej, nojoriiri pueyaracaanu Pueyaso secjonuuquiaa, juuca, niucuanio, Pueyaso na tojitasacari. Naa cua sashishacari Pueyaso sequesanojuhuaj Jiyaniijia Agripánaa, nio cuarta Judiocuacaari quiarijia

cucuaru saquiriojotanuquiaa. ⁸ ¿Niaateeri jiyaniya Pueyasoori maja na naata macunucua samiitianijionuhua?

Taa Pablo miitiaquiaari Jesuucua tiuuniaa tarijiani

⁹ 'Janiyari tarijia sequequiaari tamajaajani sesa cua niishiriojosacari Jesujiniji: "Nazaret tiacajinijinio pueyanoocua tiuuniaa pueya paracaari-iriah". ¹⁰ Janiyari seetanujuanaa taraatia nojori miitiaquiaari Jerusalén tiacajiniani. Pueyacuara secojonaa jiyaniijianucuaari cua jiyatequiaari nojori cua miitianura. Naacuaajitij, janiyari queraatia Jesuucua tiuuniaa ri-uniujuquiaari nujuatejojuajiniani. Nojori jaara puecoosaaquiaarijuhuaj, janiyari jaarajaaja sequequiaarini: "Maniniacuaja, cuara puecoosaria". ¹¹ Janiyari sequeyarucua naa miitiaquiaari Jesuucua tiuuniaa pueyani, nojori cua pishojonura Jesuucua nojori tiuuniu.

'Janiyari naa miiquiaari nojorini puetunu cuarta Judiocuaca rerejojua tiacajiniaqueyajanaa canaa jiyajinia. Janiyari jiyanoehua nojori juajia quiquiaarini. Majaari quenaaja nojori cua niqiniu paniniu quijia. Naa cua miitiasocoriquiano nojoritij, janiyari nojori pajequiaari tucuaaanu tamonu jiyaca tiacajiniani.

Pablo pohuatasacari taa Jesuucua tiuujiara na quiquiaarini

¹² 'Naacuaajitij, janiyari juucua quiariquiaa Damasco tiacajiniani, pueyacuara secojonaa jiyaniijianucua jiyarosano. Janiyari tiriara quiariquiaani cua pajenura socua Jesuucua tiuuniaa pueya cua miitiasocoriquiano. ¹³ Nucuaaco cua quiasacari jiyaniijia Agripanaa, janiyari jiyocuaaanuji nunusaquiaarini, cuata quiojonaajuhua. Cuno shacantucaari socua jiyanoehua shacantuca quiquiaari pananujiniji. Panacariiri jiyacari quiariquiaa. ¹⁴ Cuno shacantuca jaara canaa nunuquiaari, canaari juhua quejooosaaquiaarini. Janiyari jiyacari tojiquiaari rupaani. Hebreo ru-paajinia cua sequeriquiaari: "¡Saulo, Saulona! ¿Casaara puera quia miitiaa janiyani? Naa quia miishacaritij, quiaari tama quia cuaqueya miitiaajaacujua. Juhua juajia pueyano, na juaashacari saaja mocoshoco patiyashiyari". ¹⁵ Janiyari na sequereeni: "¿Cantequia Jiyaniijianaa?" Cua riucuaareeri: "Janiyacuaajaari Jesuni, quiaa na miitiaquiaani. ¹⁶ Quia sanero-hua. Janiyacuajaari quiocua muetareeni puetunu cua panishanojuanaa miijiara cua jiyatenura quiajaniya, quiarijia janiyajiniji quia niquishano quia pohuatanurajuhua. Naajuhua, na nuhuaji janiyari quiocua mue-tanutaniuhuanu janiyajiniji quia niquishanorano pohuatana quia quiniuria. ¹⁷ Cua jiyarosacari quiajaniya, janiyari quarta Judiocuacaacuaji quia co-juanutaniyacujani, tamonu jiyacajinijinio taucuacaacujinijo, tiqiyocua quia rucuanajosacari janiyajiniji quia poojotasacari. ¹⁸ Nojoriicua quia jiyaroyanjia, janiyajiniji nojori quia pohuatanura, maja juhua nimishitiu nojori quiniuria pueyaracaanu. Quia pohuatasacari janiyajiniji nojori, nojori jiuujiaari juhua cuhuatasaanutaniya cucua nojori tiuushacari. Nojori jaara naa miiri, Sesaacari maja tari nojori jiyaniijia na quiniu quiniutaniya. Naa nojori tiuushacari cucuatej, Pueyasoori puetunu sesa nojori miishanojuanaa jiyanooniutaniya. Pueyasoori puetunu na saquiriojosano pueyatajanaa nojori rapuheetenutaniya, puetunu Pueyaso jiiitasanojiniji-jianaa nojori jiiitanurajuhua".

Pablo pohuatasano Jesu tojijara na jatanujiniji

¹⁹ 'Naacuaajitij jiyaniijia Agripanaa, janiya jaara naa tojiquiaari sequeshiyano jiyocuaaanujini, majaari cua tarijionu quiquiaarinioj. ²⁰ Janiyari jiyacari juhuacatecara Damasco tiacajinia Pueyaso rupaa Jesujiniji pohuatanu coteequiaarini, na nuhuaji Jerusalén tiacajinia,

mariyata puetunu cuno Judea jiyajiniajanaano. Maja saaja cuarta Judiocuaca cua pohuatanu quiquiaari Jesujiniji, janiyari taucuaca pohuataquiaarijuhuaj. Nojori nacasuquiaarinijia cuaara sesa nojori miishano carteera, Pueyasocua nojori tacatonuhuaa nojori jiuujia. Janiyari nojori sequequiaarijuhuaj, cuaara saaja maninia miijiaa quiiria, na niishishaanura Pueyasoori seetanujuanaa nojori jataniquianu. ²¹ Naa cua pohuatanuucuatej jiyaniijianaa, cuarta Judiocuacaari cua quiatucanu Pueyaso Secojonuujua tiajinia. Cua motunu paniquianuuri. ²²⁻²³ Naajaa, Pueyaso cumaquishacari janiya, majaari cua tarinifianu quiquiaa puetunu pueyajanaa cua pohuatanu Pueyasojiniji; poonijionuutesano pueya, tojishano pueyano. Majaari tama cua niishishanojuaja cua pohuatanu quiquiaa. Janiyari pueya niishitiojoquiaani ta tariucuacaanu Pueyaso sequesano caminiujuniaa naajionuutaquiaaricuaajani, naajuhuaaj, ta Moisés naajiotasano quiya tariucuacaanu Pueyaso Rupaajiniacuajani. Nojori naajionuutasanoori seetanujuanaa. Naa sequeyari:

“Pueyaso Jiyaroscoriquianoori naquiya miishaanutaniya. Na cusonu nuhuaji, nojuajaari coteenu samiitariquianohua. Jaara samiitarihuhua, nojuajiniji pohuatasanoori puetunu pueyapuejanaa cuhuatanutaniya. Naacuajitij, nojoriiri niishiniutianiya nojori jaara nocua tiuuri, nojoriiri samiitiaconutaniuhuaajuahuaj; Judiocuaca, taucuacanio”.

Pablo tiuutiniu panishacari jiyaniijia Agripa Jesuucua juucua

²⁴ Pablo jaara naa sequequiaari tama nocuaji na tacusacaritij, camarnu Festoori nacaquiaari:

—¿Taa quia miyani Pablonaa? ¡Quia mueyocuaquui seseree puera quia niishiniuucua!

²⁵ Pabloori na riucuaquiaari saaja:

—Maja cua paatenu, camarnu Festonaa. Cua sequesanoori seetanujuaanaa, maja cuaracashiniu. ²⁶ Jiyaniijia Agripaari puetunu cua sequesanojiniji niishiyajuahuaj. Cunora majaari cua puerenu na niquiara pocuanu. Nojuaja naasucuaari tarijia tosaquiaaricuaaja Jesujiniji, Jesuucua tiuuniaa pueya miishanojinijijuahuaj. Puetunu canaa miishanojuanaari maja jiyasohuaja na miishaanu quiquiaa. ²⁷ Jiyaniijia Agripanaa, ¿quiaate tariucuacaanu Pueyaso sequesano caminiujuniaa naajionuutasanoocua tiyajuahuaj? Quiaacuajaari nocua tiuya. ¿Naatejaaratej?

²⁸ Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

²⁹ Pabloori na riucuaquiaari:

—Naajaa, ritia, na nuhuaji soj, ta quia paniyacuajani. Pueyaso maara seetanujuanaa naara quia jiyatere ta quia sequeyacuajani; maja saaja quiajaniya, mariyata puetunu pueyajanaa niya cua tojitiaani, juhua janiya nia quiniuriajuhuaj. Maja naatej, ta cumayocuata moronucua cua nujuatashuyanijia.

³⁰ Jiyacaritij, jiyaniijia Agripaari sanequee, camarnu Festojuhuaaj, Berenicenio, puetunu cuniqui nojoritia cajituniaa pueyano. ³¹ Nojoriiri cuniquiji tamaqui pacutaquiaari jiyareta nojori pocoojonura Pablojiniji. Tama nojoriiri sequetooquiaari:

—Cuno pueyanoqui seetanujuanaa maja sesa na miiniu quiquianu na mosaanura, maja quenaaja na nujuatesaanurajuahuaj.

³² Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiquianu pa jiyaniijiaacua quia jiyaronura nojuaja.

27

Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa na cojiriquiano

¹ Camarucua jaara sequequiaari canaa buquejinia jiyarosaanutaniya Italia jiyajiniani, Pabloori jiyacari narta quioosano pueyata cojiritiasaaguaari niqutionu soldadohua capitán. Cuno capitán sesaari quiquiaari Julio. Na soldadohua maanuuri sesojosaaquiaari “Augusto”.

² Jiyacaritij, Adramitio tiacajiniji buqueeri quera ruparetariquiaa, Asia jiya tiacajinia shiiniuquitiariquiano. Canaari cuno buquejinia jaaretaquiaarini. Canaata quiriquiaajaariuhua Aristarco. Nojuajaari Macedonia jiyajinia Tesalónica tiacajinijinio pueyano quijia. ³ Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Julioori jiyacari cuniqui maninia miiquiaari Pablo. Nojuajaari Pablo tarinitiaquiaari cuaara tacaara na rupuenaa pueyacua, nojori na saruhatanura Sidón tiacajinia, naajuhuj, na rupuenaa niqutionura puetunu Pablo panishanojuanaanio. ⁴ Canaa jaara jaaretaquiaari Sidón tiacajinijini, canaari canaa muenecara niqumiaa Chipre jiya tucuaatiajani. Paratuuri buque nacaacoji piyarojoriquiaa saaja. ⁵ Canaari Sidón tiacajiniji niutiaquiaari Cilicia jiyacuani, Panfilia jiyacuano. Canaari na shuriuquiumia jaaretamaani. Canaari Mira tiacajinia tiuutiaseeni, Licia jiyajinia.

⁶ Capitánri cuniqui riuriataquiaari Alejandría tiacajinijino buque. Italia jiyajinia quiariquiaari. Naaratej, canaa tacanitiaquiaari cuno buquejinaari, tii canaa quianura saniniujia. ⁷ Canaari camuenujuquiaarini, puera jacaria canaa jaaretanuucua. Naa canaa tarishiniuucuatej, canaari socua tiuquishiiquiaari Gnido tiaca taquijiriani. Paratuuri saa canaa patariquiaa-jaa. Naacujitij, canaari Salmón jiya tucuaatiajaniojua shuriucuaratamaani. Canaari Creta jiya tucuaatiaja camarucutamaajaaniuhua. ⁸ Naa puera canaa tarishiniuucua canaa jaaretasacari Creta jiya shuriuquiumiatej, canaari socua tiuquishiiquiaari pueya jiyaniquishano “Tacataja Maninujiniani”. Cunoori Lasea tiaca shuriucua quiaa.

⁹ Canaari puera tarishiiquiaari tarini. Judiocuaca miaquenuyaquini juucaari tari shocoquiaari. Jiyacaritij, shoniacu caminajiniani puereeta quijia tari buqueta jaaretanura. Pabloori juucua sequequiaari:

¹⁰ —Camarucuaanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiiniutianiya. Paa naasucuaari cusonuunutaniya-juhuj. ¿Casaatejaj pa toyani?

¹¹ Pablo jaara na sequequiaaritij, majaari buque jiyatana capitán tojini quiquiaarinioj. Saaja buque camarucuaanaa tojiquiaariiri, buque capitánnio. ¹² Cuno tacatajajiniji canaa tii tiuutiariquiaani, majaari maninia quiquiaari shuniya canaa tajitiniuria tii. Nocujaj, puetunu pueyajanaari sequetuaquiaari:

—iNiiquiji pa quiaarej! Fenice tiacajinia pa quishii shuniyacuaji.

Cuno Fenice tiaca tacatajaari pananu metasamaji quiquiaari, cuno Creta jiya tucuaatiajaacuaa.

Shoniacu caminajinia paratu piyarojosacari jiyanohua nojori

¹³ Jiyacaritij, paratuuri jacaria piyarojonu coteequiaari pananu shuucujaj, canaa muenecarajiniji. Naaratej, nojoriiri sequetuaquiaari:

—iPa naatacuajaqui niiquiji quianu!

Canaari cuniquiji ruparetaquiaarini. Creta jiya tucuaatiaja shuri-uquiumia jaaretaareeri. ¹⁴ Na jaaretasacari shiitianiyojua, paratuuri canashiyaquiji jiyanojua piyarojoquiaari buque. Cuno paratu sesaari quijia “Noreste”. ¹⁵ Paratuuri buque capotariquiaa na shuucujiria saaja. Naaratej, majaari canaa naata jaaretanu quiriquiaa paratu piyarojosacoji. Paratuuri saa canaa patariquiaajaa. Nocuaji, canaari buque tariniti-aquiaarini paratu cuaara na capotaara tamajaaja. ¹⁶ Paratuuri canaa capotaquiaari tamonu jiya tucuaatiaja tamajiria. Cuno jiya tucuaatiaja sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanojuaa poonijioquiaari cuniquini, canaa tacaninihuara buque cacojiria cuno boteniyojua. ¹⁷ Bote tacanishaanu nuhuaji, canaari buque cuaqueya morojoquiaarini na cumaguiniuria na jiaqueyaquiniuucujaji. Pueyari na puereñuta sequetuquiaari:

—¡Paratuuri pa capotanutaniya jaaquiajiniara! ¡Paari tii riitianutaniyani!

Cuno canaa pueresano jaaquiani, na sesa quiquiaari Sirte. Nocuaji, nojori-iri buque toqueya roshinitiaquiaari. Paratuuri saaja capotaquiaari buque. ¹⁸ Jaara juhuaquequiaari, paratuuri saaja jiyanojua piyarojoriquiaajaa. Naaratej, nojoriiri buque pasan casami quejoonu cotegequiaari moonjia. ¹⁹ Canaa camueenujusacari jiuujianaraca juuca naquiya canaa mi-ishacari, canaari buque casamijianaa quejoquiaari socuani, buque nauenura quenaaja. ²⁰ Tari canaa shocojoquiaari queraatia juuca. Majaari quenaaja canaa niquiniu quiquiaari pananu, riyanio. Paratu piyarojosacari canaacua, mohuacaari socua jiyanojua cajiniuucuaquiaari canaacua. Nocuaji, canaari niishiriojoriquiaani canaari quiarijia cusonunutaniyani.

²¹ Majaari tojetaarucujanaa quenaaja canaa miaquenu quiquiaari pueyaracaanu. Pabloori jiyacari nujuaquiaari canaata quiniaa tajiniji. Naa nojori sequequiaariiri:

—Camarucuaanaa, niaa jaara tojiqianu quenaaja cua sequesano, maja pa ruparetanura Creta jiya tucuaatiajajiniji, paatuma naa miya naquiyani. ²² Naajaa, nioojia nia cumaquiri. Maja quenaaja niquiriyatu pajaniyajinijinio cusonu niiniutianiya. Pa buque cutaraari juhua rapitiasaanutaniya puetunujuanaa. ²³ Janiyari quiarijia cua maquenujinia cua Jiyaniijia Pueyaso seru niquirii cua shuriucua nujuaanoni. Janiyari cuno Pueyaso tojjiani. Janiyacuajaari na pueyanoni. ²⁴ Pueyaso seruuri cua sequeree: “Majaari puereñu Pablonaa. Quiaacuajaari jiyaniijajanaa Augustocua tiuquiniutianiya Roma tiacajinia. Quiaari na tacoji njuanutaniya quia pocuanura. Naajuhuj, Pueyasoori quia secijosano tojiriucuaa. Naaratej, puetunu quiata quiniaajanaari quiata rishiniutianiyajuhuj”.

²⁵ Naacuajitij camarucuaanaa, nioojia nia cumaquiri. Janiyacuajaari seetanujuanaa niishiyani, naa quiniutianiyari taa Pueyaso seru sequeree janiyacujani. ²⁶ Naajaa, paari tamonu jiya tucuaatiajaacua juhua nio-joaanutaniyani.

Pabloori naa canaa cumanijiaquiaari.

²⁷ Pueyaracaanu canaa jaaretasacari shoniniacu caminiajinia, caapiqui samaanaari tari canaa shocoquiaari. Tamonu niucua canaa jaaretasacari, canaari Adriaajinia quiriquiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetariquiaa jiyareta. Jaara shiyaqueya quiriquiaa cuno niucua, buque jiniacuma poonijonaari niishiquiaari canaari tari jiyacua catecanoyani. ²⁸ Buque jiniacuma poonijonaari jiya shanacuquiaari, na niishiniuria queroniti quiriquiaajaa. Na shanacutusacari, saaja treinta y seis metro queroni

quiriquiaari. Jaara socua na taccoji shanacutuquiaariuhua, saaja veintise-ete metro queroni quiriquiaari. ²⁹ Nojoriiri puerequiaari buque naasucuaari shoniniacu caminia casaqueyaji pojotujua saicua cutetanutaniya. Nocuaaji, buque pajamaji sohaneyocuaata morojotasano cuatro niajaaca casaa quejootuquiaariiri, buque nujuatanura pootia. Nojoriiri cuniquijia na puerenuta sashiquiaari cuaara juhuaqueera. ³⁰ Jiyacaritij, buquejinia poonijionaa pueyari juucua cuno niucuaaja jiyasohuaja mashiyocuatunu paniriquiaa buquejiniji. Naaratej, nojoriiri buque nacaacoji sapojonu tinti-jotariquiaa niajaaca casaa moojinia. Jiyasohuaja roshinituriquiaa jiyocua-caanu tacanishano boteeri, tii na mashiyocuatunura. ³¹ Pabloori jiyacari na jiyatana capitán toquiaari, na soldadohuanio. Naa nojori sequequiaariiri:

—Cuno pojori jaara niya juhuaqueyaquimia pata, niaari cusonuiriqiano.

³² Soldadohuari ritia jiyocuaaanu tunusano bote neyocua jiyatajotaquiaari. Moojinia na tintiuriiri. Paratuuri na piyarojoquiaari tamoco nojorijiniji.

³³ Juhuaquenu panishacari, Pabloori puetunu buquejinia quiniaajanaa sequequiaari cuaara quenaaja miaquenuura. Naa nojori sequequiaariiri:

—Tari nia shocojiyari catorce juuca pueyaracaanu nia sutesacari. Majaari nia miaquenu quiquiaajuhuj. ³⁴ Quiarijia nia miaquerecuara, nia cuaqueya nia cumaquitajara quenaaja. Majaari quenaaja niqiri-yatu niajanijajinijinio cusonu quiniutianiya quiarijia.

³⁵ Naa na sequenu nuhuajitij, Pabloori pan riquiaari. Na miaqueyaquishacarijia, coteenu Pueyaso secojoree puetunu nata quiniaa niqiarajanaari. Na nuhuaji miaquerohuari. ³⁶ Tamasaca jaara na niqiquiaari Pablotej, puetunu nojorijianaari noojia cajitiquiaari. Pan saturejaari-uhuj. ³⁷ Cuno buquejinia, puetunu canaajanaari quiquiaarini dosciento setenta y seis pueya. ³⁸ Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

Buque coquesacari caminijinia

³⁹ Jaara juhuaquequiaari, buquejinia poonijionaa pueyari maja na niishiniu quiquiaari teyano jiya tucuaatijatejaara cunoni, nojori na niqiriqiaani. Nojoriiri cuno jiya tucuaatijaacua niqiquiaari puere-tuca surocohua. Jaaquiaari puetunu na shocujanaa quiriquiaa. Naacujitij, nojoriiri sequetuquiaari:

—Buque pa saniri shiitianiniu cuno surocohuama.

⁴⁰ Buquejinia poonijionaa pueyari niajaaca sohaneyocua jiyatajotaquiaari. Cuno niajaacaari caminia jiuujiajinia jateequiaari cuniquijia. Nojoriiri buque niqiniijiotetajaa roshinitiaquiaarijiuhuj, buque tacutajara. Buque nacaacuaji teeja toque tacanitiaturejaariuhuj. Buqueeri canujutaaree jaaquiajiniara, paratu piyarojosano. ⁴¹ Buqueeri saacariji jaaquiajinia riitiseequiaari, caminia cajiniuucasacari mohuaca paatishano jaaquiajinia. Buque nacaari jiyanohua tiuquishii cumaatia jaaquiajinia. Majaari quenaaja na naata pooniu quiriquiaa na matasaqiji. Na pajaari maa rapuequiaarijia moo cajiniuucasacari jiyanohua nocua. ⁴² Soldadohuari nojori jiyatasano quioosano pueya puecoonu paniquiaari cuniquijia, nojori jyanishacari cuaconutaniya naasucua, mashiyocuatumaari. ⁴³ Capitán cutaraari Pablo tiuquitiniu paniquiaari jyanijia Augustocua. Naaratej, na soldadohua sequequiaariiri:

—¡Maja quioosano pueya puecootunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuaara cuacoora coteenu, jaaquiajinia rupaatiushiicuaari. ⁴⁴ Cuaashijianucua saniniuuja cuaara buque jini-acumaji suruhuatumeeacaacia jacamatuura na cuatajara. Tamasaca cuaara buque neecaacia jacamatuurajuhuj.

Naa miituuquiaariiri. Puetunu pueyajanaari jaaquiajinia rupaatiushi-iquiaari.

28

Pablo quishacari Malta jiya tucuaatiajajinia

¹ Puereeta canaa cuaconu nuhuaji shoniniacu caminiajinia, canaari nami-tia puetunujuanaa maninia tacataseequiaari cuno jiya tucuaatiajaacuani. Canaari jiyacari shusha niishiquiaarini, cuno jiya tucuaatiaja sesaari quiquiaari Malta. ² Cuno jiya tucuaatiajaacua quijia tucuaacaari maninia canaacua jiyanooquiaari. Shiniquiaari quiriquiaa. Maruuri niriquiaa-juhuaj. Naa canaa shiniquiosacaritij, tucuaacaari canaara noshitiquiaari puereetuca mani. Na nuhuaji canaa sequetureeri:

—Miji. Nia jitiushii.

³ Pabloori naanacuaa reratejoriquiaajuhuj. Manijinia na quejooriquiaari. Jiyacaritij, soconuquiiri maniicuaaji mashiriquiaa juucua. Pablo juaashiquia saariiri. ⁴ Cuno jiya tucuaatiajaacua quijia pueyari soconu niquiquiaari Pablo juaashiquiaacuaji sohuataano. Jaara naa niqutiuguiaaritij, tama nojorijiaarijia sequetooquiaari:

—¡Nio pueyano naasucuaari pueyano moju! Cocuaatia miirii juucua shoniniacu caminiajinia na cuasacari buquejinijiri. Pueyasoori quiarijia saniniuuja cunora soconu na sajitiiri na cusonura.

⁵ Pabloori saaja manijinia majiriataree soconu. Majaari quenaaja na sajiyashi noonu quirii. ⁶ Puetunu pueyajanaari na sashiriquiaa, taacari na poreenutaniyani. Na sashituriquiaajaariuhuj na jiyani-tiushacari canashiyaquiji cusonutaniya naasucua. Naa pueyaracaanu na sashitushacari juucuatej, nojoriiri socua tamaatia niishiriojonuuquiaari. Nojoriiri Pablojiniji sequetooquiaari:

—¡Cuno pueyano naasucuaari pueyasojuhuanaj!

⁷ Cuniqii canaa quishaquini, canaari tamonu pueyano cuhuariquia shuri-ucua quiriquiaani. Na camaruuri cuno Malta jiya tucuaatiaja camarnu quiquiaari. Na sesaari Publio quijia, maninia pueyano. Nojuajaari canaa masuuquiaari na tiacora. Canaa mianuutequiaari maninia tiiri. Canaari jiuujianaraca juuca na tiajinia camueequiaarini. ⁸ Cuno camarnu queeri jiyacari cusosu matariquiaa. Jiyanohua naseecaari quiriquiaa. Coriya-cau rurequeriquiaajaariuhuj, na jiniacuma noonunio. Pabloori nocua tiuquiquiaari na matasaqui. Pueyaso secojoree nocuaraari. Na secijosacari, nocua niaquiaari na juaashiquiaari. Pueyanoori naatarohua. ⁹ Cuno jiya tucuaatiajaacua cusosuhua jaara niishiquiaari naa Pablo naatanishanocuaa cuno pueyanotej, nojoriiri nijioquiaarijuhuaj. Pabloori puetunujuanaa na naatanijioquiaari. ¹⁰ Naa Pablo miiniucuatej, cuno pueyari na jiiti-asano casamijniji canaa niqutiojoquiaari nareja. Na nuhuaji, canaa jaara quiaquiaari cuniqiji tamonu buquejiniani, nojoriiri canaa jiyatajara canaa panishano niqutiojotujuiaari narejajuhuj.

Pablo tiuquishacari Roma tiacajinia

¹¹ Canaa sashishacari shuniya cuaara tajiiria, jiuujianaraca racaari canaa shocojoquiaari Malta jiya tucuaatiajaacua canaa quishacari. Alejandria tia-cajininio buqueeri ti nujuatariquiaajuhuj. Shuniyacuaji tiutiaquiaari tiiquiri. Cuno buque nacatuuri juhua nojori pueyasohua Cástor nacara

quejasano quiquiaari, juhua Pólux nacanio. Canaari cuno buquejinia quiojoquiaari cuniquijini. ¹² Canaari Siracusa tiaca tacatajajiniji tiuutiaseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatiajaacua. ¹³ Cuniquiji canaa quiasacari, canaari cuno jiya tucuaatiaja shuriucuataareeni. Canaari Regio tiacajinia tiuquishini. Tariqui, paratuuri maninia piyarojoriquiaa buque nijiniji. Canaari cunora tama tariqui tiuquishii Puteoli tiacajiniani. Canaari quinquiatatasee puetunujuanaani. ¹⁴ Puteoli tiacajinia Jesuucua tiuuniaa pueyari canaa masuuquiaari na tiajinia. Canaa sequetuquiaariiri:

—¡Maja canaa shoconu pueyanaa! Canaa tiajinia nia camueenujumajaara.

Naaratej, canaari siete juuca nojoritia camueenujuquiaarini. Na nuhuaji, canaari cuniquiji Roma tiacajiniara neteja nucuaco quiaquiaarini. ¹⁵ Roma tiacajinijinio Jesuucua tiuuniaa pueya jaara niishiquiaari canaa tari nucumaji niyani, nojoriiri nucuacoci canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacari saniniuujia canaa naacuquiaari Tres Tabernas jiyanishano tiacajinia. Pablo jaara narta Jesuucua tiuuniaa niquiquiaari, noojia cumaquiquiaariiri. Naaratej, Pueyaso sequequiaariiri:

—¡Paacarasho cua Pueyasonaa!

¹⁶ Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyjanaa niqutioquiaari Roma tiacajinia quioosano cojuanaa camarnu. Pabloori saniniuujia tarinitiasaquiaari tamonu tiajinia na quiniuria tamajaja, tamonu soldadota na cojuariquiano.

Pablo pahuatasacari Jesujiniji Roma tiacajinia

¹⁷ Jiuujianaraca juuca na quishacari tari Roma tiacajinia, Pabloori puetunu tii quijaca narta Judiocuaca camarucujanaa masuuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocuaacanaa, majaari cua miiniu quiquiaari sesa parta Judiocuacani. Majaari cua numueejushiniu quiquiaa pa supuetanaa niishitiosanojuhuj. Naajaa, pueyari cua quiatucanu Jerusalén tiacajinia. Cua niqutiotucanu Romano pueyari, cua morosaanura. ¹⁸ Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. ¹⁹ Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuara cua jiyarotuura jiyaniijajanaacua niya Roma tiacajiniani, Césarjanaa nequesoreenura janiya. Naajaa, majaari cua saquiriojotanu quiniutianiya saniniuujia nojoriicuaa, cuarta Judiocuaca nojori quiniucua. ²⁰ Janiyari cunora nia niqiniu paniriquiaani, cua pahuatanura niyajaniya taa puetunujuanaa parta Israel pueya niishiyacujani, niyajaniyahuaj; macunucuaari samitianiijosaanutaniuhua. Janiyari cunora cumayocuaa moronucua niya quiyani.

²¹ Judiocuaca camarucuaari Pablo riucuaquiaari:

—Maja quenaaja canaa masetanu quiquianu Judea jiyajiniji naajionea, canaa pahuatasaanura quiajanijajiniji. Cuniquijinio parta Judiocuacaari niya tiuquijiocanujuhuj. Naajaa, nojoriiri maja quenaaja sesa na pahuatanuunuu quiquianu canaa quiajanijajiniji. ²² Canaari saaja niishiyani, puetunu tiqiyocujanaa sesacasaquiaaquiniari Jesujiniji pahuatano. Quiaa mariqui cunojiniji canaa pahuatara, canaa niishiniuria socua.

²³ Jiyacaritij, Judiocuacaari Pablo sequetuquiaari:

—Canaacua tamonu juuca quia tojiquiquiani.

Na nuhuaji, nojoriiri na sequetusano juuca nijioquiaari. Pablo quijia tiajinia mishitiuquiaariiri. Pabloori nojori niqiuara pohuatanu cofeequiaari tariquicuaji. Naa niniyareejaari. Juucua nojori niishitiojoquiaariiri, Jesuuri seetanujuanaa Pueyaso Jiyarosano quiquiaari. Nojori sequequiaariijaariuhuj taa Pueyaso jitiaa na jiyanooshano pueyani. Naajuhuj, tariucuacaanu Moisés naajiotasano Jesujiniji niishitiojoquiaariiri, Pueyaso sequesano caminiujiuniaa naajionuutasanonio. ²⁴ Noojiaqueya nojorijini-jinioori Pablo sequesano tojiquiaari cutara. Tamasacaari saaja na cuarachitiquiaari saniniuujia. ²⁵ Nojorijinijinio jaara Pablo niishitiojosano tojiquiaari cutara, tamasaari nojoritia juayonuutanu coteequiaari. Naa na juayonuutasaciritij, tohareetaquiaariiri na quiojonuhuaa. Pabloori jiyacari nojori sequequiaari:

—Pueyaso Sohanuquiri seetanujuanaa tariucuacaanu Pueyaso sequenu panishano caminiujiunia Isaiás pohuataniquiaari parta Israel pueya niqiuara, jaara na sequequiaari:

²⁶ “Quia quiaare cuno pueyacia. Quiocua nojori sequesee: ‘Niaari cua rupaa tojiniutianiya. Majaari nia niishiniu quiniutianiya casaa nia tojyani. Niaari cua cumacata cua miishano niquiniutianiyajuhuj. Majaari quenaaja nia niishiniu quiniutianiya’. ²⁷ Cuno pueyari noojia cumantaree maja na tojitianura cua rupaa. Naaratej, saaja sesa tojitiaquiaari. Nojori namijaari mishiquiojosanojuhuj, na niquti-aquiniuucujia, maja na numaata na tojitianura, noojiata na niishi-tiuyaquiniurianio. Naa jiyatecanu nojorinjia, maja na niishitiun-uria janiya, mariqui cucua tacateturohuari, nojori cua naarajonura”.

²⁸ Pueyanaa, nia niishiri. Naa jaara ruuretare cua pohuatasano Jesujiniji, taucuacaari saniniuujia pohuatasaanutaniyacujua, taa Pueyaso jiyanoonu pania pueyani, maninia na jitianura nojori. Taucuacaari na tojitianu-taniya cutara.

²⁹ Pablo jaara naa sequequiaari nojoritij, Judiocuacaari quiojijiarohua. Tama nojorijiaarijia juayonuutaarohua na quiojosacariuhua.

³⁰ Caapiqui marijaari Pablo shocojoquiaari rupaquijia na masesano tia-jinia moronucua na quishacari Roma tiacajinia. Puetunu pueyajanaa jaara nocua niqiuiaari na niquiniuria, nojuajaari maninia na masequiaari na quijia tiajinia. ³¹ Majaari jiyasohujia na pohuatanu quijia taa Pueyaso jitiaa na jiyanooshano pueyani. Jiyaniijia Jesujiniji niishitiojojuajaariuhuj. Majaari na sanaajasaanu quijia.

PABLO NAAJIONEE ROMA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pabloni, Jesucristo seru. Nojuajaari cua saquiriojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupaajanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

² Pueyasocuajaari tariucuaaanu na sequenu panishano caminiujiuniaa pueya niishitiquiaari, nojori naajiotanura Pueyaso Rupaa, pa niishinuria taa Neyanu na miiniutianiya pocuarani. ³ Pueyano na quiniuria mijiria, Neyanu Jesucristoori rasaaquiaari. Na supuetanaari quiquiaari Israel pueya jiyaniijia David. ⁴ Jesu sohuanuuri saniniuuja pueyacaanu Pueyaso Niyanujuhuanajaj. Paa cutaraari quiari naataja niishitishaaquiara, nojuajaari seetanujuanaa Pueyaso Niyanu. Paari quiarijia na niishiya seetanujuanaa cutarani, Pueyaso Sohuanu samitianiiniucua nojuaja macujiniji. Nojuajaari tari jiyatesaaquiaari jiyaniijiajanaa na quiniuria, puetunu cumaacajanaa na jitianurajuhuj. Nojuajaari pa jiyaniijia Jesucristo.

⁵ Nocua canaa tiuuniucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriiri puetunu jiyacajinijinio pueyajanaa canaa tiutiniuria Neyanuucua, na tojitiajaca nojori quiniuria. ⁶ Niajanijajuhuj, Roma tiacajinia quiniaa Pueyaso pueyanaa, Pueyasoori nia saquiriojoquiaari Jesucristo pueya nia quiniurajuhuj. ⁷ Puetunu Pueyaso panishano pueyajanaa, canapue Pueyaso saquiriojoquiaari saa maninia nojori quiniuriacuajani, janiyari niaacuara naajioteyani. Pa Que Pueyaso, pa jiyaniijia Jesucristojuhuj, nojori cuara cumaquiiria niajaniya, maninia na tojijia nia quiniuria. Naajuhuj, nojori cuara nioojiaca cajitiiria shuquiriaatia nia quiniuria pueyaracaanu.

Pablo naquerejosacari Roma tiacajiniara

⁸ Coteenu nia sequenu panianijia, janiyari nia timitiaquiaani, maninia niajanijiniji pueya pohuatanuucua puetunu jiyacajinijiajanaa. Nojoriiri pohuataquiaa, niaanaari maninia tiuujia pa jiyaniijia Jesucristoocua. Naa Jesucristo miiniucua niajanijatej, janiyari cua Pueyaso sequequiaani: “¡Paacarasho! Quiaari jiyano hua maninia”. ⁹ Janiyari pueyaracaanu cua Pueyasora poonijioquiaani puetunu cua cumaacatajanaa, Neyanujiniji cua pohuatanura. Pueyasocuajaari niishiya, pueyaracaanu cua secojosacari nojuaja, janiyari niaacuara secojoquiaajuhuj. ¹⁰ Naa cua secojosacari nojuajatej, janiyari na sequequiaani cuara cua tiuquitiiria niaacua, rupaquiija cua quiniuria niaata, nojuaja jaara naa paniri. ¹¹ Janiyari nia niquiniucua jiaatiaani, cua cumaquiniuria socua niajanijia na Sohuanu cumaacata, socua jiyano hua Pueyasocua tiuujia nia quiniuria. ¹² Majaari cua cumaquini paniniu saa niajanijaja. Janiyari paniani nia cumaquiniuria jianijuhuj. Naacuajitij, mariyata pa tuushacari Jesucristoocua, paari mariyata cumaquitiiojonutaniyani.

¹³ Cuarta Pueyaso muerasunaa, janiyari nia sequenu paniyani nia ni-shiniuria, janiyari sequeyarucua niaacua naquerejoquiaa juucuan. Majaari juhuanojuaja cua naata quianu niaacua. Janiyari Jesucristojiniji pohu-atanu paniya tii Roma tiacajiniani, tee nia quiyacuajani, cuno taucuaa tiu-niuria Jesuucujahuaj. Tamonu jiyacajinia taucuaacari tari Jesucristoocua tiuujiaa quiyacuaa, cua pohuatanuucua Jesucristojiniji nojori niqiuara. Janiyari naa miiniu paniya nia tajinajuhuj. ¹⁴ Cua Jiyaniijaari cua jiyate-quiara na rupaa pohuatanara. Janiyari cunora na rupaa pohuataquiaani. Majaari na tojiyashijia cua quiniu paniniu. Naaratej, janiya cuara pohu-ataara na rupaa puereetuua tiacajinia pueya niqiuara, mariyata tiquiy-ocua quijiaa pueya niquiarajuhuj. Janiya cuara na rupaa pohuataara niishijiaa pueya, niishiyashijiaa pueyano. ¹⁵ Janiyari cunora quianu paniya Roma tiacajiniani, cua pohuatanura Jesucristojiniji nijaniya.

Pueyaso Rupaari cumaacaraca na jataniniuria pajaniya

¹⁶ Maja cutaraari cua caririquiniu Jesucristojiniji cua pohuatanura. Jesu-cristo rupaacuajaari Pueyaso cumaacaraca, pueya na jataniniuria Pueyaso mueras nojori quiniuria, nocua nojori tiushacari. Puetunu Jesuucua tiu-niaa pueyapuejanaari Pueyaso pueyara jatanishaanutaniya, taa Judiocuaa jatanishaquiaa Pueyaso pueyaracuaani. ¹⁷ Jesucristo pohuatasanojiniji paari niishiyani, Pueyasoori pa jiyanooquiaa sesa pa miishanojiniji, saaja Jesucristoocua pa tiushacari. Saaja nocua pa tiuuniuucua, paari Pueyaso pueyara jatanishaquiaani. Cunora, naa naajiotasano quiyacuajaari tariu-cuaaanu Pueyaso Rupaajinia:

“Pueyaso jiyanooshano pueyanoori pueyaracaanu shuquiriaatia quijia quiniutianiya, saaja Pueyasoocua na tiushacari”.

Pueyasora, puetunu pueyajanaari sesa miijiaa

¹⁸ Pueyasoori jiyocuacaanuji na tojiyashijiaa pueya saniitioquiaa. Naa nojori na saniitiosacaritij, Pueyasoori nojori numootequiaa, nojuajaari puetunu na tojiyashijiaa pueyajanaa saniitionutaniya jiyano-hua na juaa-niutia. Naa saniitiosaanutaniyajaariuhuj, puetunu sesa miijiaa pueya-janaa. Naa sesa miijiaa pueya quishacaritij, nojoriiri Pueyasojiniji ni-ishishano ruuretaquiaa saaja. ¹⁹ Nojori jaara Pueyaso niishiniuucua ji-aatiariquia, nojori maara na niishirij. Pueyasocuaajari tari nojori ni-ishitiquiaari taamuecate nojuajani. Nojoricuajaari tari maninia nojuaj-iniji niishiya. ²⁰ Majaari pa naata Pueyaso niquiniu pa namijiaa, pa niishiniuria taamuecate nojuajani. Naajaa, Pueyaso shipininiuucua jiya, maatia niishishiyacuajaari nojuajaari Pueyaso, pa niquishacari puetunu na shipinishanojuanaa. Na shipinishanojiniji niishishiyajaariuhuj, ma-jaari na cumaaca puequenu quiniutianiya. Pueyaracaanu quiriquianoori. Naacuajitij, Pueyaso saniitionu panishacari na tojiyashijiaa pueya, nojori-iri maja na naata sequenu quiniutianiya Pueyaso: “Maja canaa niishiniu quijia quiajanijajiniji”. ²¹ Nojoricuajaari Pueyaso niishijia najuhuanaj. Na niishijiaa nojori quishacari, nojoriiri saaja na rerequeteja. Nojoriiri na tojtiaaquiquiaajuhuj. Pueyaso miiniuucua maninia pueyaracaanu nojori, nojoriiri maja quenaaja na sequetunu quijia: “Paacarasho Pueya-sonaa”. Tama nojoriijaarijia jiyano-hua cushitiquiaa sesa nojori niishiri-ONUUSACARI najuhuanaj. Naa mosanucua nojori quishacaritij, nojori ji-uujaari juhua ninishiquiria quiquiaa. ²² Nojori jiyaniishacari nojori cu-taraari setanujanaa niishijiaa, naacuajitij nojoriiri socua niishiyashiji-acara quiquiaa. ²³ Nojoriiri Pueyaso shuquiritiaquiquiaa tama nojori ship-inishano casaajaaja nojori shuquiritianura. Pa shipiniania Pueyaso cutaraari jiyano-hua cumaacaraca, pueyaracaanu quijiajuhuanajaj. Nojoriiri Pueyaso

niti shuquiritiaquiaa tama nojori shipinijosanojuuaaja. Cuno, nojori shipinijosano Pueyaso niti na shuquiritiasocoriquianoni, cunoori quiquiaa juhua shaajeja pueya niquishano, juhua jaacuatujuaca niquishanojuhuaj, juhua nacujiniaaco canujuucuatujuaca niquishanojuhuaj, juhua roshiyocuatujuaca niquishanonio.

²⁴ Naaratej, Pueyasoori nojori tarinitiaquiaa sacuaraatia casaa nojori miiniuria tama na cuaqueyatajaaja, taa nojori miiniu paniquiaacuajani. Nojoriiri socua jiyacatequiaa sesa miiniuria. Naacuajitij, pueyari tama na cuaqueyajaaja miiquiaa sesa, cararaatia nojori miitiosacari narta pueyanota. ²⁵ Naa sesa miijiaca nojori quishacaritij, pueyari seetanu casaa-janaa Pueyasojiniji niishishano ruuretaquiaa, sapojonuunu nojori tojinuria saniniuujia. Naaratej, pueyari Pueyaso shipinijosano casami shuquiritiaquiaa, canaari na Shipinia niti. Nojuajaari pa Pueyasojuaanaa cutara. Nojuaja cuaara shuquiritiasaaria pueyaracaanu cutara.

²⁶ Pueya jaara Pueyaso cartequiaa, Pueyasoori nojori tarinitiaquiaa-juhuaj, cararaatia casaa nojori miiniuria, taa nojori jiaatiaquiaa miiniuriacuajani. Naacuajitij, maajipohuari maja na caminiu paniniu quiquiaa. Saaja narta maajipohuata cararaatia casaa miiquiaari juhua canuu. ²⁷ Naajuhuaaj, canuuri maajitia quiniu paniyaquiquiaa, sacuaraatia na jiaatiasacari narta canuucua. Canuuri jiyanohua cararaatia mitioquiaa. Naa nojori miiniuucuatej, nojoriiri tama na cuaqueyajaaja miitiaquiaa naquiya na miishaanura.

²⁸ Nojori niishiniu paniyaquiniuucua Pueyaso, Pueyasoori nojori tarinitiaquiaa nojori miiniuria tama nojori niishiriojosano sesajaaja. Nojoricuaajaari niishiya, nojori miishanoori sesa. Naajaa, nojoriiri saaja na miijiaca quiquiaa, cararaatia miiniu niishiriojonuujuaca nojori quiniuucua. ²⁹ Naacuajitij, nojoriiri puetunu tamaatia sesa miishanojuanaa miiniu niishijiaca. Jaara sesa miiri, timiquioyari. Nojoriiri nio miijiaca: puera casamiriaca quiniuucua jiaatiajaca. Sesa miiquiaari na panishano nojori jitianura. Nojoriiri tamasaca pueya jitianasano casamiicua jiaatiajaca. Nojoriiri pueya puecojuaca. Nojoriiri pueya ruutaqueja. Nojoriiri na panishano casami nohuasenuujuaca jiyasohua. Nojoriiri narta pueya miitianu panijiaca. Rimiaacaturijiaariuhuaaj. ³⁰ Nojoriiri sacuaraatia sequejojuua narta pueya. Nojoriiri Pueyaso niquiniu paniyashijiaca. Nojoriiri tamasaca soojeaca. Nojoriiri tama na cuaqueyajaaja jiyatequiaa juhua socua maninia pueyara tamasacajiniji. Nojoriiri najuhuana sequeja: "Janiya maninia miijiani". Nojoriiri jiyanohua niishijiaca, niishishoo sesa casaa na miiniuria. Nojoriiri na queya tojiyashijiaca. ³¹ Nojoriiri seetanujuanaa mosanucua Pueyaso na tojitiaaquiniuucua. Nojoriiri saaja tama na rupaaajaaja jataja. Majaari na sequesano na miiniu. Nojoriiri narta pueya paniyashijiaca. Majaari nojori niishiniu jiyanooniu. Majaari nojori niishiniu taraajenu narta pueyacia. ³² Nojoricuaajaari tariucuaacaanu naa Pueyaso sequesano niishiya: "Cante naa sesa miijiacani, cuaara puecoosaaria". Naajaa, nojoriiri saaja sesa miiquiaa juhuajaniya. Majaari nojori quiniu shuquiriaatia saaja tama nojori miishacarijaaja sesa, nojoriiri shuquiriaaajuhuaaj tamasaca jaara sesa miiri juhua nojori.

2

Pueyasoori sesa miijiaca saniitonutaniya sesa nojori miiniuucua

¹ Naacuajitij pueyanaa, niaa jaara tamonuucara tonujujua quiriquia, majaari nia jyaniniu niaari sesa miyashijiaca cutara. Niaa jaara tamonuucara tonujure sesa na miishano, niaari tama niaacuarajaaja tonujiya naa sesa miiniu niishijiaca nia quishacarijuhuaj. ² Paacuajaari niishiyani,

Pueyasoori puetunu sesa miijiacajanaa saniitionutaniya, maninia na niishishacari nojori miijosano. ³ Quiajaniya saniniuujia, quiarta pueyacuara tonujujuanaa, majaan quenaaja quia jiyaniuni quiaa saniitioyaquishaanutaniya. Quiaari saniitiosaanutaniyajuhaaj. Quiaacuajaari juhua nojori, sesa miijiajuhuaj. ⁴ ;Majateeri quia niishiniu, Pueyasocujaari pueyaracaanu quia sashiquiaa juucua, quioojia quia tacatonuhuaa nocua? Naaratej, nojuajaari pueyaracaanu maninia quia miiquiaa. Quia rejeretaquiaajaarijuhuaj. ¿Quiaateeri jiyaniquiaa Pueyasoori naa maninia quia miiquiaa, maninia quia quiniucua na niquiaa? ¡Maja! ⁵ Quiaari quioojia tacatonu paniaquiquiaa, sesa quia miishanojiniji quia taraajeyacuishacari. Cunora, quiaari puetunu sesa quia miishanojinijijianaa saniitiosaanutaniya jiya puequesacari. Jiyacaritij niishishaanutaniyari, Pueyasoori seetanujuanaa maninia saniitiojua. ⁶ Pueyasoori puetunu pueyajanaa miiniutianiya taa nojori miishano quiquiaari mijiriacuajani. ⁷ Naacuajitij, Pueyasoori maninia miijiaa jiyatenutaniya pueyaracaanu rishijiacara. Nojoriiri pueyaracaanu maninia miijiaa quiquiaari mijiria, Pueyaso timitiasano nojori quiniuria, shaajeyashijiaca nojori quiniuriajuhuaj. ⁸ Saniniuujia, Pueyasoori na tojiyashijiaca saniitionutaniya jiyanohua na juaaniutia. Naa saniitiosaanutaniyaariuhua noo pojori, canapuate saaja sesa miiniu panijiaa quiquiaarini. ⁹ Puetunu sesa miijiaa pueyapuejanaari naquiya miishaanutaniya, taa Pueyaso tojiyashijiaca cuarta Judiocuaca miishaanutaniyacuaani. ¹⁰ Saniniuujia, Pueyasoori puetunu maninia miijiaa pueyapuejanaa miiniutianiya maninia, taa maninia miijiaa Judiocuaca miishaanutaniyacuaani. Pueyaso timitiasano pueya nojori quiniucua, nojoriiri jiyanohua shuquiriaatia quijiaa quiniutianiya pueyaracaanu. Naacuajitij, nojoriiri juhuajaniya quiniutianiya Pueyasota pueyaracaanu.

¹¹ Pueyasoori maja rimiajata na miiniu quiniutianiya taucuaca, Judiocuacano. Puetunu maninia pueyajanaari maninia miishaanutaniya. Sesa pueyari saniitiosaanutaniyacujua. ¹² Naacuajitij, pueya jaara Pueyaso rootasano Moisés niishiyashijiaca quiriquia, naajaa, nojori jaara sesa miijiaa quiri, nojoriiri saniitiosocoriguiano. Naajuhuaaj, pueya jaara Pueyaso rootasano Moisés niishijiaca quiriquia, nojori jaara na tojiyashijiaca quiquiaarijuhuaj, nojoriiri cuno Moisés Naajionejiniji nequesoreesaanutaniya na tojtiaaquiniucua. ¹³ Majaari nia jiyaniuni naari jiyanooshaanutaniya sesa nia miishanojiniji nareja najuhuaa nia tojishacari Moisés Rootasano. Niaari jiyanoyaquishaanutaniya maja seetanujuanaa na tojijiaa nia quiniucua. Noo pojori cutaraari jiyanooshaanutaniya, canapuate seetanujuanaa na tojjiaacuajani. ¹⁴ Moisés Rootasano jitiaashijiaca pueya jaara tamajaaja maninia miiniu niishijiaca quiriquia, naacuajitij, niishishiyari, nojoriiri tamajaaja maninia miiniu niishijiaca cutara. ¹⁵ Naa maninia miiniu niishijiaca nojori quiniucuatej, niishishiyari, Pueyaso rootasano Moisésri juhua nojori jiuujiajnia naajiotasano quiya. Naaratej, nojori jaara sesa miiri, tama nojori jiuujiajaarijia nojori niishitiya: “Sesa miiriinjia”. Naajuhuaaj, nojori jaara maninia miiri, tama nojori jiuujiajaarijia nojori niishitiya: “Maninia miiriinjia”. ¹⁶ Naacuajitij, cuno juuca, Pueyaso nequesoreetesacari Neyanu Jesucristo puetunu mijiria quiniaa pueyajanaani, jiyacaritij, tama pueya jiuujiaari nojoriicuara tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numootequiaacuajani cua pohuatasacari Pueyaso rupaa Jesucristojiniji.

Pablo nacasusacari Judiocuaca nojori tojtiaaquiniucua Moisés Rootasano

¹⁷ Cuarta Judio pueyanonaa, quiaari jiyaniya quiaa Pueyaso pueyano cutara, na saquiriojosano Israel pueyajinijinio quia quishacari, Moisés Rootasano niishijia quia quishacarijuhuaj. Cunora, quiaari sequequiaa: “Janiya cutaraari Pueyaso pueyanoni. ¹⁸ Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriguano rootasanoni Pueyaso cua shuquiritiniuria”. ¹⁹ Quiaari sequequiaajuhua: “Janiyacuaajaari seetanu rupaajanana niishiyashijiaca pueya niishitiojonani. Janiyari juhua ninishiqui quijiaca pueya cuhuatanani. ²⁰ Janiyari niishiyashijiaca niishitiojuani, naatujoorinio, maninia cua niishishacari seetanu rupaajanana Moisés Naajioneejiniji”. ²¹ Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia miijia quia quiniuria. Quiaa jaara tamasaca niishitiojoquiaa maja na nohuasenuunura, ¿casaara nohuasejoja quia quiyacuaraarini? ²² Quia rootasacari tamasaca, maja nojori numuetucunura niyacarca maaji, ¿casaara saniniuuja naa quia miiquiaacuaraarini? Quiaacuajaari sequeja: “Janiyari pueya shipinijosano casaa sojeani, nojori shipinijosano na secojonuu-socoriguano juhua Pueyasoni”. Naa quia soosacari nojori shipinijosano casaatej, ¿casaara quia nohuasejoquiaa cuno casaa nojori secojonuuja tiacajinijicuaraarini? ²³ Quiaari sequequiaajuhua: “Moisés Rootasanoori jiyanohua maninia. Na timitiaanijia”. Naajaa, quiaari Pueyaso rerequetequiaa quia tojiyaquishacari Moisés Rootasano. ²⁴ Cunora, tariucuacaanu Pueyaso Rupaajinia naajiotasanoori seetanujuanaa naa sequeya: “Pueyaso niishiyashijiaca taucuaacari Pueyasocuaaria rimiaaquequiaa sacuaratia, Pueyaso tojiyashijiaca nia quiniucua nojori niquiara”.

²⁵ Cuarta Judiocuacanaa, Pueyasocuaajaari pa supuetanaa rootaquiaari pa cararaatiuuquia co cuaara miatesano quiri, na saquiriojosano pueya pa quiniucua. Naacuajitij, nia cararaatiuuquia co jaara miatesano quiri, cunoori maniniacuaja, niaa jaara seetanujuanaa Moisés Rootasano tojiijia quiri. Saniniuuja, niaa jaara Moisés Rootasano tojiyashijiaca quiri quia, ni-aari juhua miatesoo quiyajaa Pueyaso niquiara. Nia cararaatiuuquia coori najuhua miatesano quiya. ²⁶ Saniniuuja, taucuaa jaara maninia miijia quiri taa Moisés rootasano sequeyacuajani, miatesoo nojori cararaatiuuquia co quishacari, naajaa. Pueyasora, nojoriiri juhua miatesano quiya, na muerasu nojori quiniuria. ²⁷ Naacuajitij, na cararaatiuuquia co miatesoo tahue jaara maninia miijia quiri, taa Moisés Rootasano sequeyacuajani, nojuajaari jiyanooshaanutaniya, Pueyaso muerasu na quiniuria. Quiajaniya saniniuuja Judio pueyanonaa, quiaari Moisés Rootasano niishijiacuaja. Quiaacuajaari quia cararaatiuuquia co miatesanoraca. Naajaa, quiaa cutaraari saniitosaanutaniya quia tojiyaquiniucua Moisés Rootasano. Naacuajitij, cuno tahueri quiocuara tonujuriquiano saniya, Judio pueyanonaa. ²⁸ Pueyasocuaajaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani? ¿Na cararaatiuuquia co miatesano pueyanotee, Judio pueyacuajinio supueno pueyanotejuhuaj? Maja. ²⁹ Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyano Sohanu jaara pueyano jiuujia jataniri Pueyaso tojiijia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohanu cutaraari na naata.

3

¹ Naa cua sequesacari niajaniatej, niaa naasucuaari sequeya: “Taucuaca jaara naa maninia miishaanutaniya nojori quiyaquishacari Pueyaso saquiriojosano Judiocuaca, naatej, taa pajaniyacuanaani, ¿casaara pa cararaatiuuquia co miatejosaaquiaaricuaaraarini? ¿Paateeri najuhuana Pueyaso saquiriojosano Judiocuacani?” ² Maja, Judiocuacanaa. Maniniacuajaari pa quishacari Judiocuaca. Pueyasocuaajaari Judiocuacaacua tiuquuaari nojori jiitanura na rupaa. ³ Noojiaqueya Judiocuacajinijinio jaara Pueyaso Rupaacua tiuyashijiaa quiya, ¿Pueyasoteeri cunora na rupaa jatanutaniyajuhaaj? ¡Maja! ⁴ Puetunu pueyajanaa jaara sapojonuujuaa quiriqia, naajaa, Pueyaso cutaraari tojetaarucujanaa sapojiyashijia. Naaratej, nojuajiniijiiri naa naajiotasano quiya tariucuacaanu na Rupaajinia: “Puetunu pueyajanaari niishiniutaniya puetunu quia sequesanojuanaari seetanujanaa cutara. Naajuhuaaj, pueya jaara quiocuara tonujure juucua, puetunu nojorijianaari sanaajasaanutaniya, saa maniniaja quia miiniuucua pueyaracaanu”.

⁵ Pa supuetanaa tiuyaquiniuucua seetanu Pueyaso rupaacujanaa, naacujitij, mijiria quiniaa pueyari niishiya, Pueyasoori socua jiyanohua maninia pueyajiniji. Sesa pa miiniujiniji, paari niishiyani Pueyaso cutaraari jiyanohua maninia. Naacujitij, nojuaja jaara pa saniitiore sesa pa miiniuucua, ¿taa nia sequeyani? ¿Nojuajate sesa, jaara pa saniitiore sesa pa miiniuucua? ¡Juaaj! Juhua niishiyashijia pocuareenijia. ⁶ ¡Seetanujanaa, Pueyasoori sesa miyashijia! Nojuaja jaara sesa miijia quiriqiajuhuaj, ¿maatucua taa mijiria quiniaa nequesoreereni?

⁷ Tamasaca naasucuaari sequequiaa: “Sapojoua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaajanaa jiitaja. Naaratej, ¿Pueyasotucua casaara cua saniitioreni?” ⁸ Teyano pueyanote naa sequejani, nojuaja naasucuaari naa sequejajuhaaj: “Socua sesa pa miiri, Pueyaso jiyanooniuria pajaniya. Naacujitij, pocua Pueyaso shuquiritiare socuani, nojuaja jaara pa jiyanoori”. Tamasacaari canaacuaa tonujuquiaa najuhuanaj, canaanaari naa niishitiojuuaani. Canapueete naa sapojonuujuaa canaacuarani, nojoriiri saniitiosaanutaniya, nojori sesacanuucua canaa.

Pueyasora, puetunu pajaniyajanaari sesa miijiacani

⁹ Quiarijia, jaara naa quiriritij cuarta Judiocuacanaa, ¿paateeri socua maninia miijiaa taucacajiniji Pueyasorani? Maja. Janiyacuajaari shusha nia pohuatariquiaani, puetunu mijiria quiniaa pueyajanaari sesa miijiaa; Judiocuaca, taucacanio. ¹⁰ Tariucuacaanu Pueyaso Rupaajiniacuajaari naa naajiotasano quiya:

“Majaari quenaaja niquiriyatu maninia miijia quiniu. Shaaqui tojetaarucujanaa. ¹¹ Majaari quenaaja maninia niishiriojojua pueyano quiniu. Majaari quenaaja Pueyasocua jiaatija pueyano quiniujihuaj. ¹² Puetunu pueyajanaari Pueyasocuaaji tashuquioorucuaa. Puetunu nojorijianaari seserucuaa. ¿Cante maninia miijiani? Shaaqui. Shaaqui tojetaarucujanaa. ¹³ Nojoriiri miananajonu maniniu. Nojori rupaari saa monujua. Nojoriiri na niti taquiri-ocuateja saa sapojonuraja. Cuno pojoriiri juhua soconu noonacu jiitiaa na rupaama, rimiaacaturiji nojori quiniuucua. ¹⁴ Nojori jaara pocuare, saaja tamasaca sesacaquiaari, puera juaajia nojori quishacari. ¹⁵ Nojoriiri puecojuaca. Puereeta nanaca shootejaca. ¹⁶ Puetunu mijiria nojori miishanojuanaari casaa sesojua, narta

pueya taraajetejajuhujaj. ¹⁷ Majaari nojori niishiniu jiyanooni.

¹⁸ Nojoriiri juhuajaniya miiquiaa sesa saaja. Majaari na pueretunu Pueyaso”.

¹⁹ Paacuaajari niishiyani, puetunu Pueyaso Rupaajinia naajiotasanojuanaari Pueyaso saquirojosano Judiocuacara quiquiaari, nojori niishiniuria, puetunu pueyajanaari sesa miijiaca. Naacujitij, puetunu mijiria quiniaa-janaari sanaajetanutaniya, nojori niishishacari puetunu nojorijianaari sesa miijiaca; Judiocuaca, taucucanio. ²⁰ Naacujitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijara. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

Paari Pueyaso jiyanooshano cutarani, Jesuucua pa tiuushacari

²¹ Pueyasoori quiari naataja pa niishitiquianu cutara, taate pa naata maninia miijijara pa jatanishaanuni. Moisés Rootasanojinia, tariucua-caanu Pueyaso sequenu panishano caminiujituniaa naajionuutasanojiniaari naa sequeyajuhujaj. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijiaa quiri. ²² Quiarijiani, Pueyasoori pa jiyanooquiaa cutara, saaja Neyanu Jesucristoocua pa tiuushacari. Judiocuaca, taucucacajuhujaj, Pueyasoori puetunujanaa jiyanooquiaa Neyanuucua nojori tiuushacari. Majaari rimiajata na jiyanooni. ²³ Puetunu pueyajanaari sesa miijiaca; Judiocuaca, taucucanio. Naacujitij, nojoriiri juhua tucuaaanu quiya Pueyasojiniji. Sesa miijiaca pueya quiniuucua, nojoriiri soosano pueyara jataquiaari. Naacujitij, pueyari Pueyaso timitiasoo quiquiaari. ²⁴ Naajaa, jiyanoohua panijia Pueyaso quiniuucua, nojuajaari pa jiyanooquiaari Jesucristo cusonuucua pocuara. Naacujitij, Pueyasoori pa jiyatequiaari juhua sesa miyashijara. ²⁵ Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacujitij, pueya jaara niishiriqia Jesucristo nojori niti cusoqianari, saaja naa nojori tiuushacari nocuatej, nojuajaari na Que Pueyaso jiyanooquiaa pueya. Naajuhujaj, Pueyaso saniitioyaquishacari tariucuaaanu nocua tiuujiaa pueya Jesu cusoyaquishacarijia, majaari najuhuaana puera jiuujiaajia na quiniu quiquiaari. ²⁶ Pueyasoori niishiquiaari Neyanu Jesucristoori nojoriucua mosocoriquiano, sesa nojori miijiosano tuujusaanura seetanujanaa. Naaratej, nojuajaari pueyaracaanu sesa nojori miijiosano rejeretaquiaari saaja. Jesucristo cusonuucua quiari naataja pocuara, paari niishiyani, Pueyasoori seetanujanaa maninia miijia. Nojuajaari maja najuhuaana na jiyanooni pajaniya. ¡Neyanu motequiaari pocuaraari!

²⁷ ¿Teyano nijaniyajinijiniote tojetaarucuaajanaa saaja maninia miijiani? Shaaqui. Naacujitij, maninia miyashijiaa pa quishacari, puetunu pueyajanaari sanaajasaanutaniya Pueyaso nequesoreesacari pueya. Saniniuujia, paa jaara puetunu Moisés Rootasanojuanaa tojitiajaca quiriqia maniniani, paa maara tama pa cuaqueyajaaja shuquiritiajaca quiriqia cutarani. Saniniuujia, Pueyasoori pa jiyanooquiaa saaja pa tiuushacari Jesucristoocua. Naacujitij, majaari pa jitianu tama pa miishanojuaja pa shuquiritiasocoriquiano. ²⁸ Naacujiti paari niishiyani, Pueyasoori pa jiyanoojia puetunu sesa pa miishanojinijianaa saaja Jesucristoocua pa tiuushacari. Majaari na jiyanooni pajaniya, Moisés Rootasano pa tojishacari.

²⁹ ¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocuaajari puetunu mijiria quiniaa pueyapuejanaa Jiyano.

³⁰ Pueyasoori maja caapiqui. Nojuajaari saaja niquiriyatu. Naacujitij,

majaari niquiriyatu Pueyaso quiniu Judiocuacara, socua tamonu Pueyaso taucuacara. Naaratej, puetunu pueyapuejanaari jiyanooshaaquiaa saaja Jesucristoocua nojori tiushacari; tariucuacaanu na saquiriojosano Judiocuaca, taucacano. ³¹ Pueyaso muerasu pa quishacari saaja Jesuucua pa tiushacari, ¿paateeri Moisés Rootasano shocoteyani? Maja. Paacuaajaari Moisés Rootasanojiniji niishiyani, paari sesa miijiicani. Naacuaajitij, Moisés Rootasanoori panishiya, pa niishiniuria paa cuara Jesucristoocua tiuria, jiyanooshano pa quiniuria.

4

Pueyaso jiyatesacari Abraham juhua sesa miyashijara

¹ Naaratej cuarta Judiocuacanaa, ¿taa nia sequeya pa supuetana Abrahamjinijini? ² ¿Casaara Pueyaso jiyatequiaari nojuaja juhua sesa miyashijarani? Abrahamri maja na jiyanooshaanu quiquiaari maninia na miiniuucua. Pueyaso jaara nojuaja jiyanoocuaari maninia na miiniuucua, nojuaja maara tama na cuaqueyajaaja timitiaja quiquiaari. ³ Saniniuujia, tariucuacaanu Pueyaso Rupaajinia naa naajiotasano quiyari Abrahamjiniji: “Abrahamri Pueyasocua tiuquuaari. Naaratej, Pueyasoori na jiyatequiaari juhua sesa miyashijara”.

⁴ Cua tojiri pueyanaa. Pueyano jaara poonijiore tamonura, na poonijiotenaari na poonijionujiniji na cumaneeca niqutiojua. Jaara niqutiosaare, cuno cumaneecaari maja nareja niqutiosano. Cunoori seetanujuanaa na poonijosanojiniji. ⁵ Saniniuujia, maninia miyashijia jaara Pueyasocua tiuri, Pueyasoori na jiyatenutaniya juhua sesa miyashijara saaja nocua na tiuniuucua. ⁶ Pa supuetanaa jiyaniijia Davidcuaajari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijia pa quiniuria na niquiara, maninia miyashijia pa quishacarija. Naa naajiotasaaquiaariiri David sequesano:

⁷ “Shuquiriaatia quijiaca cutaraari noo pueya, canapue Pueyaso jiyanooya sesa na miijosanojinijicuaajani, Pueyaso jaara tuujure sesa nojori miijosanojuhuaj. ⁸ Shuquiriaatia quijiacaari noo pueyajuhuj, puetunu sesa nojori miishanojuanaa Pueyaso saneyaquishootej”.

⁹ Janiyacuaajaari tari sequereeni, Pueyasoori Abraham jiyatequiaari juhua sesa miyashijia na quiniuria, saaja nocua na tiushacari. Pueyaso jaara naa jiyanoocuaaricuaa Abrahamtej, ¿Pueyasote saaja Judiocuaca jiyanooniu panijia, noo pojori canapue na cararaatiuuquia co miatesano jiitiaani, taa nojori supuetana Abrahamcuaani? ¿Taa nia sequeyani? ¿Taucuacaarijiataj? ¿Nojoriti jiyanooshijajuhuj? ¡Taaquiriirinij! ¹⁰ ¿Taa nia sequeyani? ¿Abrahamte tari na cararaatiuuquia co miatesano quiquiaari Pueyaso jiyanooshacari nojuaja? Maja. Pueyasocuaajari na jiyanoocuaari miatesoojua na quishacari. ¹¹ Na tiuniu nuhuaji Pueyasocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasocua na tiushacari, Pueyasoori na jiyatequiaari juhua sesa miyashijia, miatesoojua na quishacari. Naacuaajitij, miatesoo taucuaca tiushacari Jesucristoocua, taa Abraham tiuquuaaricuaani, Pueyasoori nojori jiyateya juhua sesa miyashijia nojori quiniuriajuhuj, mariyata juhua Abraham niqiohua nojori quiniuria. Naacuaajitij, puetunu Pueyaso sequesano Abrahamjanaani, cunoori nojoririjuhuj. ¹² Naajuhuj, pueya jaara na cararaatiuuquia co miatesano qui Judiocuaca nojori quiniuria, naajaa. Nojori jaara Jesucristoocua tiuri taa Abraham tiuquuaaricuaani miatesoo na

quishacarijia, Pueyasoori nojori jiyateya juhua Abraham niqiuohua nojori quiniuriajuhuaj.

Pueyasosequesano Abrahamni, cunoori Jesucristoocua tiuujiacarajuhua

¹³ Pueyasocuaajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham sequesaanu quiquiaari Moisés Rootasano tojjia na quiniucua. Jiyacaritij, Moisés Rootasanoori maja na quiniu quiquiaari juhuanujuaja. ¹⁴ Pueyasosequesano Abraham jaara saaja Moisés Rootasano tojjiiacara quiriquia, na sequesano maara najuhua quiri Pueyasooocua tiuujia pueyara. Naajuhua, pueya maara najuhua Pueyasooocua tiuujia quiriquiajuhuaj. Seetanujanaa Pueyasosequesano Abrahamni, cunoori puetunu Pueyasooocua tiuujiacarajanaa. ¹⁵ Cunoori maja saaja Moisés Rootasano tojjiiacara. Pueyasocuaajaari niishiquiaari, pueyari maja na naata Moisés Rootasano tojiniu quiniutianiya puetunujuanaa. Moisés Rootasanojiniji, paari niishiyani, paari saniitiosaanutaniyani pa tojitiaaquiniucua cunoroortasano. Saniniuujia, Moisés Rootasano jaara quiyaquiriquia, pueya maara sequeyaquishaare: “Niaari sesa miijia”.

¹⁶ Pueyasoori tariucuaaanu na sequesano Abraham nareja niqutionu paniquiaari, puetunu necohuarajanaano. Naaratej, seetanujanaa pa masenura na sequesano Abraham, Pueyasoori sequequiaari, nojuajaari nareja na niqutionutaniya nocua tiuujia. Naacuajitij, Pueyasosequesanoori maja saaja Moisés Rootasano tojjiiacara. Cuno sequesanoori puetunu pueyapuerajanaa, canapute Pueyasooocua tiuujia quiyani, taa Abraham quiquiaari Pueyasooocua tiuujia. Naa Pueyasooocua tiuujia pa quishacari taa Abraham tiuujiaari Pueyasooocuaani, paari Abraham niqiuohuani. Naaratej, Pueyasora, Abrahamni pa que. ¹⁷ Pueyasocuaajaari naa sequequiaari Abrahamtej nojuajaari queraatia niqiuohuaraca quiriquiano. Naacuajitij, Pueyasosequesanoori naa naajio-tasano quia:

“Abrahamnaa, janiyari quiarjia quia jiyateree queraatia tamaatia rupaaca pocuajaca que quiniuriani”.

Abrahamni Pueyasosequesanoocua tiuujiaari. Nojuajaari niishiquiaari Pueyasoori macunucua samiitianijia. Niishiquiaarijuhuaj, Pueyasoori cumaacaraca na panishano na shipininiuria shaaquijiniiji.

¹⁸ Abrahamni niishiquiaari, nojuajaari maja na naata necocua na muetenu, puera saaquiano na quishacari tari. Naajaa, Abrahamni saaja Pueyasosequesanoocua tiuujiaari. Naacuajitij, nojuajaari seetanujanaa queraatia tamaatia rupaaca pocuajaca pueyapue que, taa Pueyasosequequiaari nojuacuajani. Pueyasoori naa na sequequiaari:

“Quia niqiuohuari tojetaarucujanaa queraatia quiriquiano”.

¹⁹ Naa Pueyasosequesacari nojuajatej, nojuajaari tari cien marijia shocotejoquiaari. Naa saaquiano na quishacarijij, necocua Saaraajuahuaj, naajaa, majaari na tarinitianu quiquiaari Pueyasosequesanoocua tiuuniu.

²⁰ Saaja Pueyasosequesanoocua na tiuushacari, nojuajaari maja noojia na niqijiotenu quiquiaari. Majaari Pueyasosequesanojiniji na taacanunu quiquiaarijuhuaj. Saaja Pueyasooocua na tiuushacari, nojuajaari noojia cumaquiquiaari socua. Naacuajitij, nojuajaari naa maniniuhuaqueetaquiaari Pueyasose: “Paacarasho cua Pueyasonaa. Niishiyani quiaari cana muetenutaniya taa quia sequecanu janiyacuajani. ²¹ Quiaacuajaari

cumaacaraca quia miiniuria puetunu quia sequesanojuanaa”.²² Naa Abraham tiuuniucua Pueyasooatej, Pueyasoori na jiyatequiaari juhua sesa miyashijia pueyanora.

²³ Jaara naa naajiotasaaquiaari Abrahamjiniji: “Pueyasoori na jiyatequiaari juhua sesa miyashijara”, cunoori maja saaja Abrahamra sequesano. ²⁴ Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijarajuhua, nocua pa tiuushacari, pa niishishacar-ijuhua nojuacuajaari pa Jiyaniijia Jesucristo samiitianiquiaariuhua macujiniji. ²⁵ Pueyasocujaari mijiria na jiyaroquiaari sesa pa miishanoocuara mosocoriqiano. Nojuajaari na samiitianiquiaariuhua, Jesu jaatianura nocua pajaniya, juhua tariucua sesa miyashijaca.

5

Jesuucua tiuunaa pueyari jiyanooshano

¹ Naacuajitij, paa jaara tari jiyanooshano quiyani Jesucristoocua pa tiuushacari, paari juhuajaniya quiyara Pueyaso niquiarani. Jesucristoori na Que pa jiyanootiquiaari, pocuara na cusosacari. ² Jesucristoocua tiuuijaca pa quishacari, Pueyasoori pa timitiaquiaa. Pa cumaquiaajaariuhua maninia necohua pa quiniuria. Paari shuquiriyajaacuhua, pa niishishacari paari jatanishaanutaniyani, shacantuua quijijaca pa quiniuria juhua nojuajuhua. ³ Majaari saa cunojua. Paari shuquiriiaajuhua, paa jaara taraatia miishaareni. Paacuajaari niishiyani, paa jaara naquiya miishaareni, paari socua juhuajaniya rejeretajaca quiniutianiyan. ⁴ Naa rejeretajaca pa quishacaritij, paari cumueeca Pueyaso muerasu quiniutianiyan. Naa cumueeca Pueyaso muerasu pa quishacaritij, paari juhuajaniya sashijaca quiniutianiyan, pa niishishacari Pueyasoori seetanujuanaa maninia miiniutianiya pajaniya, taa na sequequiaaricujani. ⁵ Naa pa niishishacaritij, majaari sapojosano pa quiniu quiniutianiya. Pueyasocujaari tari jiyaroquiaari na Sohanu, poojiajina quiriqiano, seetanujuanaa Pueyaso paniniu pa jitianura poojiajina.

⁶ Pueyaso tojiyashijaca pa quishacarijia, majaari pa naata quiquiaari Pueyaso jiyanootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jiyanootiniuria pajaniya. ⁷ Sesa miyashijia pueyano jaara monu panishiya juucua, ¿tamonu maninia pueyanoteeri quiya na sequenura: “Janiya cuaara mosaaria juhuari cuno pueyano niti”? Majaruhua. Monu panishano pueyano jaara seetanujuanaa maninia pueyano quiri, na rupeua pueyano jaara jiyanohua na panijia quiri, nojuaja maara sequere: “Janiya cuaara na niti mosaaria juhuari”.

⁸ Saniniuujia, sesa miijijaca pa quishacarijia, Jesucristoori pa niti cusoquiaari cutara. Naacuajitij, paari niishiyani, Pueyasoori jiyanohua pa panijia. ⁹ Quiarijia, paari sesa miyashijaca quiyara Pueyaso niquiarani, Jesucristo cusonuucua pocuara. Naacuajitij, paa cutaraari niishiyani, Pueyaso sanitiosacari na tojiyashijaca pueya, Cristoori pocuaji tacunutaniya cutara, tariucua na jatanishano pueya pa quiniuucua. ¹⁰ Na paraa pa quishacarijia, Pueyasocujaari pa jiyanooquiaari, Neyanu cusunucua pocuara. Quiarijia, nata jeecatoono pa quishacari, Neyanuuri saminio quiyara pueyaracaanu pocuaji na tacunura. ¹¹ Majaari saaja cunora shuquiriaatia pa quiniu. Paari shuquiriyajuhua, pa Jiyaniijia Jesucristo rupuetootenuucua pajaniya na Que Pueyasota.

Pa supuetana Adánri maja juhua pa Jiyano Cristo

¹² ¿Casaara pa cusonuquiaani? Jhuacatecara pa supuetana Adán miiniucua sesa, naaratej puetunu pueyajanaari sesa miijiacajuhua. Pueyasocua-jaari tari sequequiaari: “Cante sesa miijiani, cuaara shaajeera”. Seetanujanaa naari. Puetunu pajaniyajanaari shaajeriquianoni, sesa miijiac pa quiniucua. ¹³ Moisés Rootasano quiyacuishacarijia, pueyari tari sesa miiniu niishijiaca quiquiaari. Jiyacaritij, pueya miishacari sesa, majaari nojoriucara saquiriojotasaanu quijia sesa nojori miishacari. ¹⁴ Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesano. Naajaa, puetunu nojorijianaari cusonuquiaarijihuaj sesa miijiac nojori quiniucua, sesa miijia Adán cuajinio nojori supuenucua. Quiarijia saniniuujia, nia pohuatareera Adán miishanojiniji, Jesucristo miishanojinijinio.

¹⁵ Adán miishanoori jiyanojua tamaatia Jesu miishanojiniji. Coteenu shipinishano pueyano miiniucua sesa, puetunu pueyajanaari shaajenu niishiya. Saniniuujia, Jesucristo miiniucua maninia, Pueyasoori queraatia pueya jiyatequiaa pueyaracaanu rishijiaca nojori quiniuria cutara.

¹⁶ Pueyaso miishano maninia pajaniyarani, cunoori sesa Adán miishano shocotaa jiyanojua cutara. Naa niquiriyatu sesa casa Adán miiniucuatej, puetunu pueyajanaari saniitosocoriquiano. Saniniuujia, maninia Jesucristo miiniucua pajaniyarani, Pueyasoori pa jiyanoquiaa puetunu sesa pa miishanojinijiana. ¹⁷ Niquiriyatu pueyano miiniucua sesa, puetunu pueyajanaari cusonujuacara quiquiaari. Saniniuujia, niquiriyatu pueyano miiniucua maninia pajaniyara, cunora, Pueyasoori pa jiyateya juhua sesa miyashijiaca pa quiniuria. Cunoori, Jesucristoocua pa tiushacari. Majaari saaja cuno, naajuhua, paari shuquiriaatia quijia jiyanijianucua quiniutianiya maniniushiquini, Jesucristo rupesano pa quishacari.

¹⁸ Naa Adán miiniucua sesatej, nojuajaari puetunu nocuajinio supueno pueyajanaa jiyatequiaari sesa miijiacara, saniitosano nojori quiniuria. Naajuhua, Jesucristo miiniucua maninia, puetunu pueyajanaari na naata jiyanooshaanu, nojori saniitioyacuishaanu cuaji, pueyaracaanu quijiac nojori quiniuria. ¹⁹ Adán tojiyaquiniucua Pueyaso sequesano, puetunu pueyajanaari sesa miijiacara jiyatesa quiaarijihuaj. Saniniuujia, Jesucristo tojiniucua Pueyaso sequesano, puetunu nocua tiuujiacajanaari juhua sesa miyashijianucara jiyatesa quiohua.

²⁰ Moisés Rootasano jaara niishishaaquiaari, pueyari socua sesa miijiacara jiyatequiaari. Naa socua sesa miijiacara pa quishacaritij, naajuhua, Pueyasoori socua jiyatequiaari pocua taraajenujuhua. ²¹ Sesa miiniu tarinitiano niishiyashijia pa quiniucua, puetunu pueyajanaari cusonuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacua-jitij, nojuajaari juhua pa samiitianijioquiaariuhua, pueyaracaanu rishijiaca pa quiniuria pa Jiyaniija Jesucristota.

6

Pablo niishitiojosano moojinia tiuquinijionujiniji

¹ Pueyaso jaara naa pa jiyanoquiaa pocua na taraajesacari, ¿taa nia sequeyani pueyanaa? ¿Paate socua pueyaracaanu sesa miijia quiniutianiyani, pueyaracaanu Pueyaso jiyanooniuria pajaniya, pueya niishiniuria, Pueyasocuaquijia jiyanojua maninia na jiyanooniuria pajaniya?

² ¡Maja pueyanaa! ¡Maja naa nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miijia quirini? Pueyasora, paacuaajaari tari cusunuuquiaari Jesutani. ³ ¿Niaateeri cuno niishiyaquiyajaa? Naa-juhuaj, paa jaara moojinia tiuquinishaare Jesucristoocua pa tiushacarini, Pueyaso niquiara, paari Jesu rupuequiaari niyacutesanojiniani. Nojuacuaajaari pa niti saniitiosaaquiaari. ⁴ Naacuaajitij, paa jaara moo cariquimia shishaareni, jiyacaritij, paari juhua Jesuta jamoshiyajuhaaj. Naa juhua macu pa quishacaritij, paari samiitianijiosanohuani, taa Jesucristo samiitianishaquiaariuhua macujiniji jiyanohua Pueyaso cumaacatacuani. Naa samiitianijiosanohua pa quishacaritij, maninia miijia pa quiri juhua quiarinio pueya.

⁵ Paa jaara Jesucristo rupuetesaaquiaari sesa pa miishanoocuara na cusosacarini, naajuhuaaj, paa cutaraari tari samiitianijiosanohua juhua nojuajani, maninia quijia pa quiniuria. ⁶ Tarijia, majaari pa naata tarinitianu quijia sesa pa miiniu, sesa jiuujaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiushacari, maja socua cumaana na jitianura, sesa na miitiniuria pajaniya. ⁷ Naacuaajitij, sesoriquia poojia seque jaara tari jatanishano quiya, majaari tari sesa miijia pa quiniu. ⁸ Paa jaara tari naa cojiritiasaaquiaari monu Jesuta nocua pa tiushacarini, paari quiarijia niishiya cutarani, paari pueyaraaanu nata quiriquiano saminioni. ⁹ Cristocuaajaari samiitiaquiaariuhua. Paari niishiyajuhaaj, majaari socua na pacutenu quiniutianihua cusonu. Nojuacuaajaari tari cusoquiaari puetunu sesa pa miishanoocuara-janaa. Naaratej, nojuajaari maja na naata socua cusujuasaanuhua. ¹⁰ Majaari socua Jesucristo pacutenu quiniutianihua cusonu, sesa pa miishanoocuara. Nojuacuaajaari tari cusoquiaari, Pueyaso jiyanoonuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. ¹¹ Naajuhuaaj pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Nia niishirijuhuaaj, niaacuaajaari Jesucristota samiitiaconohua, Pueyaso tojjijia nia quiniuria.

¹² Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyaretare tama nia cuaqueya panishanojuajaaja nia miyaquiniuria. ¹³ Majaari nia cuaqueya nia panitianu sesa nia miiniuria, taa na paniya nia miiniuria juucuacuajani. Saniniuujia, nia cuaqueya nia jiyatere cutara saaja Pueyaso panishano miijia na quiniuria. Niaacuaajaari tari samiiticoquiaariuhua juhua macunucua nia quiniujiniji. Naacuaajitij, nia cuaqueya nia jiyatere saa maninia miijia na quiniuraja. ¹⁴ Naa jaara nioojajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari nijaniya. Nia niishiri, niaari quiarijia Pueyaso tojtiajaca cutara, maja tari Moisés Rootasano tojjijia.

Pueyaso tojiyashijia pueyani, nojoriiri Sesaaca pueya

¹⁵ Cua sequesacari nijaniya, pajaniya maja tari Moisés Rootasano tojjijiacani, ¿niaateeri cunora sesa miiniutianiya, Pueyaso quishacari pa jiyanoojia? ¡Maja naa nia miiniu pueyanaa! ¹⁶ Niaacuaajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacuaajitij, paari pueyaracaanu na tojjia quiniutianiya. Naajuhuaaj, niaa jaara sesa miijia quiriohua, niaari Sesaaca tojjijia. Naa sesa miijia nia quishacaritij, niaari cusonutaniya. Saniniuujia, niaa jaara Pueyaso tojjijiacara quiri, niaari sesa miyashijia quiniutianiya. ¹⁷ Tarijia, niaari Sesaaca

tojijiaca quijia, juhua na seya, sesa miijiaca nia quishacari. Quiarijia, janiyari Pueyaso timitiaani nia tojiniuucua Jesucristo rootasano puetunu nioojiatajanaa, taa nia niishitiojosaaquiaaricujani. ¹⁸ Jesucristo rupaa nia tojishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacujitij, niaari Pueyaso tojijiacara jatanishano, saaja maninia miijiaca nia quiniuria. ¹⁹ Janiyari naa pohuataa serujiniji niajaniani, maatia nia tojiniuria cua niishitiojosano. Majaari juhuanajuaja nia naata puera jiyajeneta niishitiojosano niishiniu, cumueeca Pueyaso muerasu nia quiaquishacarijia. Tarijia, niaari tama nia cuaqueyajaaja jiyatequiaari Sesaaca panishano nia miiniuria. Naacujitij, niaari jiyanohua sesa miijiacara jiyatequiaari. Naajuhuj, quiarijia saniniuuja, tama nia cuaqueyajaaja nia jiyatere Pueyaso panishano nia miiniuria. Naa jaara naa miiri, niaari tojetaarucujanaa maninia miijiaca quiniutianiya Pueyasora.

²⁰ Naa jaara sesa miijiaca quiquiaarijia Sesaaca tojijiaca nia quishacarijia, niaari juhujaniya Pueyaso tojiyashijiaca quiquiaari. ²¹ ¿Sesaacate maninia nia miiquiaari sesa nia miiniuucua nera? ¡Maja! Naa cutaraari saaja caririquiquiaa sacuaraatia casaa nia miiniuucua tarijia. Naaari quiarijia niishiyajuhuj, cante sesa miijiaca quiquiaani, nojoriiri shaajasaariquiano. ²² Naa sesa miyashijiaca nia quishacari quiarijia saniniuuja, niaari Pueyaso tojiyacara jiyatesaaquiaari, saaja na panishano nia miiniuria cutara. Naa Pueyaso tojijiaca nia quishacarijij, nojuajaari nia jiyatenutaniya seetanujanaa maninia miijiaca nia quiniuria. Naacujitij, niaari pueyaracaanu shuquiriaatia rishijiaca quiniutianiyajuhuj. ²³ Saniniuuja, sesoriquia pueya miiniuucua sesa saaja, nojoriiri naa na miiniuucua shaajasaanutaniya. Saniniuuja, saaja Jesucristoocua tiuujiaca pa quishacari, Pueyasoori saa cunoraja pa jiyatequiaa pueyaracaanu rishijiaca pa quiniuria, pa jiyaniijia Jesucristo rupuejaca pa quishacari.

7

Paari juhua camishanoni

¹ Pueyanaa, niaacuajaari Moisés Rootasano niishijiaca. Naaari niishiya-juhuj, paa jaara shaajequeni, paari jiyacari Moisés Rootasano cartequese shushani. ² Naajuhuj, paacuajaari rootasaaquiaarini, maaji jaara camishano quiri, cuara tamonu cayata quiaquiiira, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojishocoriquiano. ³ Saniniuuja, maaji jaara tamonu pueyanota quiri quia neyaca quishacarijia saminio, cuno maajiiri sequeshiya paanatuta, naa na quiniuucua tamonu pueyanota. Saniniuuja, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojiyashijia na quiniu cunora. Nojuajaari maja paanatu, naa na miishacari.

⁴ Naaari naajuhuj pueyanaa. Jesucristo cusonuucua pa niti, niaari juhua cusonuquiarijihuj, maja Moisés Rootasano tojiijiaca nia quiniuria socua. Naacujitij, niaari tamonu tojiijaca quia cutara. Nojuajaari pa jiyaniijia Jesucristo, noj, macujiniji samitiaquiaarihuatej. Naacujitij, quiarijia pa jiyaniijia Jesucristo tojiijaca pa quishacari, paari maninia miijiaca Pueyasorani. ⁵ Tarijia, Pueyaso tojiyashijiaca pa quishacarijia, Moisés Rootasano pa niishishacari maja quenaaja pa miiniuria sesa casaa,

cuno rootasanoori saaja juhua socua pa shiniujuquiaari sesa pa miini-
 uria. Naacujitij, tama sesa pa miishacarijiaaja, paari tama pa cuaqueya-
 jaaja jiyateriquiaa saniitiosano pa quiniuria maquesaashijia mani quiquoa-
 jiniani. ⁶ Tarijia, paari juhua quioosano pueya Moisés Rootasano toji-
 tishaaquiuarini. Saniniuujia, Jesucristota pa cusuonucua, nojuaja jaara
 pocuara cusoquiaari, paari tari Moisés Rootasano tojiniu cartequiaarini.
 Moisés Rootasano pa tojiaquishacari quiarjia, naacujiti pa naata Pueya-
 sojuanaa tojiniu shitimia cutara, na Sohuanu cumaquishacari pajaniya.
 Majaari juhua tarijia pueya miishano. Tarijia, paari Moisés Rootasano
 tojtiajaca quiquiaari maniniani, pa puerenuta paa mariqui saniitiosaareeri
 pa tojiaquiniucua niquiriyatu queraatia na rootasanojiniji.

Poojiaari saa sesa miiniu niishijaja

⁷ Tamasaca naasucuaari jiyaniya janiyari Moisés Rootasano soojeani.
 Maja. Quiria, jyanohua maniniacuajaari Moisés Rootasano. Moisés
 Rootasanojiniji, paacujaari niishiyani paari sesa miijiacani. Moisés
 Rootasano jaara quiyaquiriquia, janiya maara niishiyaquiquiaarini, cua
 jiaatiasacari tamasaca jiiitasano casamiicua, cunoori sesa Pueyasora.
⁸ Saniniuujia, Moisés Rootasanojiniji cua niishishacari maja tamasaca
 casamiicua cua jiaatianura, janiyari saaja juhua shiniujiushaaquiuarini
 casamiicua jiaatiaja cua quiniuria socuani. Naacujitij, Moisés Rootasano
 cua niishiyaquishacarijia, coojaari juhuajaniya quiquiaari juhua maqueja.
 Saniniuujia, janiya jaara Moisés Rootasano niishiquiaarini, coojia
 sequeeri juhua niucuaquiaari, puetunu sesa casaajanaa na miiniu panini-
 uria. ⁹ Moisés Rootasano cua niishiyaquishacarijia, janiyari juhuajaniya
 quijia quiquiaarini. Saniniuujia, Moisés Rootasano cua niishishacari, jani-
 yari jyanohua taraajequiaarini, cua niishishacari janiyari jyanohua sesa
 miijia Pueyaso niquiarani. ¹⁰ Naa sesa miijia cua quishacaritij, janiyari
 niishiquiaarini, janiyari quera jatashya saniitiosocoriquianoni. Janiya
 jaara Moisés Rootasano tojiquiaari shushajanaani, janiyari jyaniquiaarini,
 janiya jaara cuno rootasano tojirini, janiya naasucuaari pueyaracaanu
 rishijia quiniutianiyani. Saniniuujia, Moisés Rootasanoori saaja cucuara
 tonujuquiaari puetunu sesa cua miishanojinijijianaa. ¹¹ Naacujitij, jani-
 yari jyanohua jiyajenequiaarini, cua jyanishacari cua naatacuaja Moisés
 Rootasano tojiniu maninia, Pueyaso jyanoniuria janiya. Jaara maja
 cua naata quiquiaari Moisés Rootasano cua tojiniuria maninia, janiyari
 niishiquiaarini Pueyasoori cua jyanoyaquiniutianiya.

¹² Seetanujuanaa nia sequeyanijia pueyanaa, Moisés Rootasanoori
 jyanohua maninia. Tojetaarucujanaa maninia rootasano. Cunoori
 seetanujuanaa rupaa maniniu Pueyasojiniji. ¹³ Moisés Rootasano jaara naa
 maninia quiri, ¿janiyateeri nia sequeyani cuno na rootasanoori pa cusojuaja?
 Maja. Janiyari nia sequeyani, Moisés Rootasanojiniji, paari niishiyani sesa
 pa miishano cutaraari jyanohua sesa Pueyasora. Naacujitij, paari Moisés
 Rootasanojiniji niishijani, paari puetunujuanaa jatasocoriquiano quijia
 juucuan, seetanujuanaa sesa miijia pa quiniucua.

¹⁴ Paacujaari niishiyani, Moisés Rootasano, cunoori maja
 nareja pueyano niishitiojosano. Pueyaso niishitiojosanocujaari pa
 tojishocoriquiano puetunu poojiatajanaa. Saniniuujia, coojaari Pueyaso
 tojiyashijia. Janiyari tamajaaja juhua coojia seruni, na panishano cua
 miiniuria. Naa sesa juuujaraca cua quishacaritij, majaari cua naata Moisés
 Rootasano tojiniu. ¹⁵ ¿Casaara naa sesa cua miiquiaani? Janiyari saaja cua
 niishishano sesa casaa miiquiaani. Majaari maninia cua miiniu quiquiaa,

taa cua paniyacujani. ¹⁶ Janiya jaara cua panishoo sesa casaa miirini, naacuajitij, janiyari sequequiaani, Moisés Rootasanoori seetanujuanaa maninia. ¹⁷ Naa cua panishoo sesa casaa cua miishacaritij, cunoori maja tama cua miishanojuaaja. Cuno sesa cua miishanoori coojajiniji supueno tamajaaja. ¹⁸ Quiarijia niishiya cutaranijia, coojaari tojetaarucujanaa sesa miiniu niishijia. Naacuajitij, janiyari juucua maninia miiniucua jiaatiaquiaani. Naajaa, majaari cua naata quiquiaa maninia cua miiniuria tamajaaja. ¹⁹ Naacuajitij, cua miishanoori maja maninia, taa cua miiniu paniquiaa juucucujani. Cua miishanoori saaja cua miiniu paniyaquishoo quiquiaa. ²⁰ Naacuajitij, janiya jaara cua panishoo sesa casaa miirini, janiyari niishiyani, cunoori tama coojajiniji supuenojuaaja, majaari tama cua miiniu panishanojuaaja.

²¹ Quiarijia niishiya cutaranijia, janiyari naa sesa miijiani: janiya jaara maninia casaa miiniu paniyani, janiyari saaja sesa miiquiaani. ²² Janiya cutaraari niishiyani Pueyaso rootasano Moisésri seetanujuanaa maninia cua tojishocoriquiano. Na tojiniucua jiaatiaquiaa juucuanijia. ²³ Janiyari niishiyajanihuaj, coojaari juhua cua niishitiaja paraca quiya. Naacuajitij, cua niishiriojosacari, “Maninia miiniutianiyani”, coojaari saaja sesa cua miitiquiaa. Naacuajitij, tama janiyajaarjia juhua coojia seruni, cua miishacari puetunu sesa na panishanojuaana.

²⁴ ¿Taa cua miiniutianiya socuarini? ¡Tojetaarucujanaa taraatia quijiani-jia! Pueyacaanu sesa miijianijia. Majaari cua naata tamajaaja maninia miijia cua quiniu. Naa sesa miijia cua quishacaritij, cua cuaqueyari macu quiriquiano. ¿Cante na naata cua jataniniuni, naa sesa miijia cua quishacaritij? ²⁵ ¡Pueyaso shuquiritianijia cua niishishacari, nojuacujaari cua jianijia Jesucristota cua jataniniutianiya tojetaarucujanaa maninia miijia cua quiniuria! Naacuajitij, mijiria cua quishacarijia, janiyari Pueyaso tojjia quiniu paniyani. Saniniuuja, naa coojia quiniucua sesatej, saaja sesa cua miitiniu paniquiaari.

8

Pueyaso Sohuanu pa tojishacari, paari maninia miijia quiniutianiyani

¹ Pa rupesacari Jesucristo, nocua pa tiuushacari, Pueyasoori pa jiyanooquiaa. Naacuajitij, paari tojetaarucujanaa jiyanooshano quiyani.

² Puetunu pueyajaanaari cusunuriquiano quijia, sesa miijiaa nojori quishacari. Saniniuuja, Jesucristo pa rupesacari, Pueyaso Sohuanuuri pa jiyatequiaa saaja maninia miijiaa pa quiniuria. Naacuajitij, majaari tari sesa miijiaa pa quiniu pa saniitiosaanura. ³ Moisés Rootasano pa tojishacari juucua, majaari pa naata quiniu jiyanooshano. Cunoori saaja sesa miijiaa pa quiniucua. Naaratej, Pueyasoori Neyanujanaa jiyaroquiaari mijiria, pueyano na quiniuria juhua pajaniya, pa niti na mosaanura. Naacuajitij, Jesucristo jiitiasacari juhua pa cuaqueyajuahuaj, Pueyasoori juhua sesa miijiaa na jiyatequiaari, pa niti na saniitiosocoriquiano. ⁴ Naacuajitij, Pueyaso Sohuanu pa jiitiasacari quiarijia, pa naata maninia miijiaa quiniu, taa Moisés Rootasano sequeyacuajani. Pueyaso Sohuanu tojjiaa pa quishacari, majaari tari pa quiniu sesa miijiaa, taa pa quiquiaari tarijacujani.

⁵ Canapueete tama na panishanojuaaja miiquiaani, nojoriiri tama na cuaqueyajaaja shuqiritiniuria jiaatiaquiaa. Saniniuuja, canapueete Pueyaso Sohuanu tojjiaa cutarani, nojoriiri saaja Pueyaso shuqiritiniuria jiaatiaquiaa. ⁶ Tama na cuaqueyajaaja shuqiritiniuria jiaatiajacaari

saaja shaajecoriguiano cutara. Saniniuujia, Pueyaso shuquiritiniuria jiaatiajacaari pueyaracaanu rishiriquiano cutara. Nojoriiri juhuajaniya shuquiriaatia quijiaca juhuaj. ⁷ Cante tama na cuaqueyajaaja shuquiritiniuria jiaatiaquiaani, nojuajaari Pueyaso paraca. Majaari Pueyaso tojjia na quiniu paniniu. Seetanujuanaa majaari na naata Pueyaso tojjia na quiniu juhuaj. ⁸ Naacujitij, canapuate saaja tama na cuaqueyajaaja shuquiritiniuria jiaatiaquiaani, cuno pojoriiri maja na naata Pueyaso shuquiritiniuria.

⁹ Niajaniya cutaraari maja nia quiniu juhua cuno pojoriija, tama na cuaqueyajaaja shuquiritiniuria jiaatiajacani. Naa cutaraari Pueyaso shuquiritijaca, Pueyaso Sohuanu cumaquishacari niajaniya, nojuaja jaara seetanujuanaa nioojajinia quiya. Cante Pueyaso Sohuanu jittiaaquiyani, nojuajaari maja Pueyaso pueyano. ¹⁰ Cristo quishacari poojajinia, pa sohuanuuri tari jatanishano quiya maninia miijiaca pa quiniuria, pueyaracaanu rishijia pa quiniurajujuaj. Pa cuaqueya cutaraari shaajascoriguiano, sesa miijiaca pa quiniuucua. ¹¹ Naajaa, Pueyaso Sohuanu jaara poojajinia quiya, nojuajaari pa cuaqueya samitiani jonutaniuhua, taa na samitiani quiaariuhua macujiniji Jesucuaani.

¹² Naa Pueyaso miishacari maninia pajaniyatej, maninia miijiaca pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuquiritiniuria pa jiaatianu tari, taa pa miiquiaari tarijia cuajani. ¹³ Cante naa miijiaca quiyajani, nojoriiri shaajascoriguiano. Saniniuujia, niaa jaara Pueyaso Sohuanu cumaacata rejeretariquia saaja tama sesa nia cuaqueya miiniu panishanojuajaaja, niaa cutaraari pueyaracaanu shuquiriaatia quijiaca quiniutianiya.

¹⁴ Canapuate Pueyaso Sohuanu tojtiajacani, nojoriiri Pueyaso niquiohua cutara. ¹⁵ Pueyaso Sohuanucujaari pa jiyatequiaari Pueyaso muerasuniyojua pa quiniuria. Naacujitij, cuno pa jittiasano Sohuanuuri Pueyaso pa seqetequiaa, "cua Quena". Naa Pueyaso muerasuniyojua pa quishacaritij, majaari tari pa puerenu paari saniitiosaanutaniyani, Moisés Rootasano pa tojiaquiniuucua. ¹⁶ Pueyaso Sohuanuuri pa sohuanu rupuequiaa, na niishitiniuria pajaniya, paari Pueyaso muerasuni. ¹⁷ Naa Pueyaso muerasu pa quishacaritij, puetunu Pueyaso jittiasanojuanaari pa jittiasano quiniutianiyajujuaj. Pueyasoori Neyanu Jesucristota pa cojiritianutianiya naa maninia na miiniuria pajaniya, paa jaara naquiya miiniu rejeretajaca quirini, Jesucristoocua tiuujia pa quiniuucua. Paa jaara naquiya miishaare nocuara mijiriani, paari jiyanohua maninia quijiacara jiyatesaanutaniyani juhua nojuajujuaj.

Pueyasoori maninia miiniutianiya na muerasu

¹⁸ Quiarjia mijiria naquiya pa miiniuni, cunoori saaja rupaquijia. Jani- yara, naajaa, cua niishishacari naa naquiya pa miiniu nuhuajitij, paari jiyanohua maninia miishaanutaniyani, pueyaracaanu shuquiriaatia pa quiniuria. ¹⁹ Quiarjiani, puetunu Pueyaso shipinishano casaajanaari pa niquiniuucua jiaatiaa paa jaara quiariniora jatanishaareni. Na niishiniu panyari taamueca quijiacara Pueyaso jataniniutianiya pajaniya na cumaacatani, tojetaarucujanaa maninia jeenucuasano na muerasu pa quiniuria. ²⁰ Coteenujuanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijosano casaajanaari sese- quiarijiuhua. Majaari na sesenu quiquiaari tama na panishacarijiaaja. Pueyasocujaari naa paniquiaari sesa na quiniuria, na shipinishano pueya sesenucuajujuaj. Naajaa, majaari pueyaracaanu sesa na quiniu quiniutianiya. ²¹ Pueyaso muerasu jaara jatanishaare shacantuuca quijiaca pa

quiniuria, jiyacaritij, puetunu Pueyaso shipinijosano casaajanaari pata cojiritiasaanutaniya jeeceanujuhuj. Naacuaajitij, puetunu Pueyaso shipinijosano casaajanaari maniniera quiniutianiuha, maja na sesenura socua. ²² Quiarrijani, puetunu Pueyaso shipinijosanojuanaari jiyanohua noojia niojiya taraatia na quishacari. Quiatojiyari juhua maaji noyano, cuaara quiariniora jatanishaarejaatijia. ²³ Majaari saaja puetunu Pueyaso shipinishano casaajanaa quiatojonu, poojiaari juhua quiatojiyajuhuj, na panishacari tojetaarucujanaa jatanishano quijiaca pa quiniuria. Paacuaajaari tari jiiitiaa Pueyaso Sohuanu poojiajiniani, pa niishiniuria, paari seetanujanaa Pueyaso muerasuni. Saaja pa cuaqueya cutaraari juhuanojua jatanishoojua. Paari cunora quiatojiyajaani. ²⁴ Paacuaajaari tari Pueyaso muerasu quiyani. Jesucristo cutaraari pa saquiriojoquiaari shacantuuca quijiacara pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quiriquia, paa maara na jataniniuucua jiaaataaquirini. Paa jaara tari jiiitariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhuanojua jatanishoojua. ²⁵ Naajaa, paacuaajaari niishiyani pa cuaqueyari jatanishaanutaniya, jiyocuacaanu pa rupenura pa Jiyaniijia. Cunora, paari mijiria taraatia pa quishacari juhujaniya rejeretaquiaani pueyaracaanu pa sashishacari.

²⁶ Naa rejeretajaca pa quishacari mijiria pa sashishacari pueyaracaanutej, Pueyaso Sohuanuuri pa cumaquiquiaa, cumueeca pa quiyaquishacari. Naacuaajitij, Pueyaso pa secojosacari, pa niishiyaquishacari casaacuara pa secojonutaniani, Pueyaso Sohuanucuaajaari poojiajiniji Pueyaso secojoquiaa pocuara. Jiyanohua na secojosacari pocuara, jiyasohua quiatojiya poojiajiniaari. ²⁷ Poojia niishijia Pueyasoni, nojuajaari niishiyacuaja casaa na Sohuanu secojiya nojuaja pocuarani. Na Sohuanucuaajaari maninia secojojua cutara, taa Pueyaso miiniu paniya na muerasuracujani.

Jesucristo pa shocotanijia cutara

²⁸ Paacuaajaari niishiyani, paa jaara maninia miishaareni, paa jaara sesa miishaarejuhuj, Pueyasoori puetunu cuno miishanojuanaa jiyatequiaa saaja maninia na quiniuria na panijiacara. Nojuacuajaari pa saquiriojoquiaari na muerasuniyojua pa quiniuria. ²⁹ Naajuhuj, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhuj. Naa sequequiaariiri Jesucristo quiniuria pa puerana, queraatia tapueyocuacaraca na quiniuria. ³⁰ Naacuaajitij, canapue Pueyaso saquiriojoquiaari na muerasu nojori quiniuriacuajani, juhua Jesucristo nojori quiniuriajuhuj, Pueyasoori cuno pojori niishitiquiaa nojori tiuuniuria Neyanuucua. Jesucristoocua nojori tiushacari, Pueyasoori nojori jiyatequiaa juhua sesa miyashijiacara. Jiyooshano nojori quishacari, Pueyasoori nojori niqutioquiaa na Sohuanu, na Sohuanu jataniniuria nojori shacantuuca quijiaca nojori quiniuria juhua Neyanu.

³¹ Naa Pueyaso miishacari maninia pajaniyatej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? ¡Maja!

³² Pueyasoori jiyanohua pa panijia. Nojuajaari Neyanuniyojua jiyarocuaari pocuara mosocoriquiano. Nojuaja jaara Neyanu jamueyaquiquiaaricuaa, ¿maatucua casaara quiarijia niqutioquaqiri puetunu pa panishanojuanaani? ³³ ¿Cantucua Pueyaso saquiriojosano pueyacuara saquiriojotare sesa nojori miishanoni? Pueyasojuanaacuajaari pa jiyatequiaari juhua sesa miyashijia pa quiniuria. ³⁴ Jesucristocuaajaari tari cusoquiaari pa niti. ¿Cantucua saniniuujia quiarijia Pueyaso sequeriquia pocuarani: “Cuno

pojori quia shaajare”? Pocuaji Tacunacuajaari samiitiaquiaariuhua. Quiarjia na Que Pueyaso miaquetajara cajiyari, pocuara na Que na secojonura pueyaracaanu. ³⁵Nojuajaari jiyanoehua pa panijia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nia jiyaniniu Cristo pa paniyaquiyi, paa jaara taraatia miishiyani, paa jaara casaacua tacayani, tamasa ca jaara naquiyi miya pajaniyani. Naajuhuaaj, paa jaara quera titiacoya pa miaajenutani, majaari nia jiyaniniu Cristo pa paniyaquiyani, naajuhuaaj, paa jaara toqueeju quiyani, paa jaara cocuaatia miyani, paa jaara miananajoshiya monurajaniuhuaaj. Puetunu nojuanaari maja na tarinitiniu Jesucristo, na paniyaquiniuria pajaniya. ³⁶Paacuajaari taraatia miishocoriquianoni, naatej, taa tariucuacaanu Pueyaso Rupaajinia naajio-tasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia tojitiajaca canaa quiniucua. Nojoriiri juhua miaquesocoriquiano borregohua canaa puecooquiaa juhuajaniya”.

³⁷Paari naa miishaaquiaajaaniuhuaaj. Naajaa, naa taraatia pa miishacaritij, Jesucristo panishacari pajaniya, nojuajaari shocotajacara pa jiyatequiaa. Naacuajitij, majaari saaja pa rejeretanu naquiyi pa miishacari. Jesucristoori seetanujanaa cuno naquiyi pa miiniu jiyatequiaa maninia na jecanura pajaniya, juhua nojuaja pa quiniuria socua. ³⁸Seetanujanaa miishiyaniija, Pueyaso panishacari jiyanoehua pajaniya, majaari quenaaja tamonu casaa na naata rupatanu pajaniya Nojuajiniji. Paa jaara quiri saminiujuani, macu soj, naajaa, pa panijia Pueyasocuaajaari pata quiyajaa. Naajuhuaaj, Pueyaso seya, samaruhuanio, puetunu cunojuanaari maja na naata pa rupatanu Pueyasocuaaji. Naajuhuaaj, majaari quenaaja tamonu cumaacaraca quijiaca na naata pa rupatanu Pueyasocuaaji. Pueyaso paniniu pajaniyani, cunoori maja na puequenu quiniutianiya quiarjia, tamacarinio. ³⁹Naajaariuhuaaj, tee pa quiyani, jiyocuaacaanu, jiya cariquimia soj, naajaa. Pa panijia Pueyasoori tii quiyi patajuhuaaj. Naacuajitij, pa Jiyaniijia Jesucristota rupuetootesano pa quishacari, puetunu Pueyaso shipinijiosano casaajanaari maja na naata pa rupatanu Pueyaso-jiniji.

9

Pueyasojuanaari pueya saquiriojua na pueyara

¹⁻³Naa Pueyaso pueyano cua quishacaritij, janiyari jiyanoehua cuarta Israel pueyaca taraajequiaani, nojori tiuyaquiniucua pa Jiyaniijia Jesucristoocua. Janiyari pueyaracaanu nojoriicua taraajequiaa jiyanoehuanu, maja cua naata quishacari cuarta Israel pueya tiutiniu Jesucristoocua. Seetanujanaa nia sequeyanijia, Pueyaso jaara na naata quiri mani quiquiojinia na jatanura janiya nojori niti, janiya maara sequereni, maniacuaajari naa cua miishaanura. Nojori jaara na naata quiri Jesucristoocua rupuetesaanu cua niti, janiya maara Pueyaso sequereni: “Cua rupatare cutara Jesucristojiniji, saniya cuarta Israel pueya jiyatesaanura Pueyaso muerasura cutara”. Naa cua sequesacari nijaniyatej, janiyari coojiajinia miishiyani, seetanujanaari cua sequesano. Pueyaso Sohuanuuri cua niishitijuhuaaj majaari cua sapojonu. ⁴Cuarta Judiocuaajaari pa supuetana Israel niquihuaacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiushacari. Pueyasoori nojori niquitiquiaari shacantuca na cumaaca, tariucuacaanu nojoritia na quishacari. Pueyasoori nojori sequequiaari: “Janiyacuajaari Pueyasoni. Niaari cua pueya quiniutianiya niaa jaara cucua tiuuri”. Naajuhuaaj,

Pueyasoori Moisés niquitioquiaari caapiqui saajianeecua na naajiosano, saniniuuja Moisés niishitiojonura tiji nojori. Pueyasoori nojori niishitioquiaarijuhuaj taa nojori miiniutianiyani, tariucua jiyanooshano nojori rerejonura na niqiaara. Pueyasoori nojori sequequiaarijuhuaj, nojuajaari puetunujanaa na sequesano Abraham tohuateenutaniya nojoriria. ⁵ Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niqiuohuacujinio supuequiaari. Nojuajaari tari jiyatesaaquiaari Jiyaniijijanaa na quiniuria, puetunu casamijjanaa jiiitiana na quiniuriajuhuaj. Nojuajaari Pueyasojuhanajaj, juhua na Quejuhuaj. ¡Nojuaja cuuara pueyaracaanu maniniuhuaqueetasano quiiria! ¡Cuuara naa quiiria pueyaracaanutej!

⁶ Quiariijiani, queraatia parta Israel pueyajiniijinio pueyari maja Pueyaso muerasu. Naa cua sequesacari niajanijatej, majaari nia jyaniniu tariucuaacaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocua. Jaara naa quirifij, ¿casaara puetunu Israel pueyajanaa maseyaquiniutianiya Pueyaso sequesano nojoririaarini? Cua tojitiare pueyanaa. Puetunu pa supuetana Israel niqiuohuacujinio supueno pueyajanaari maja seetanujanaa Israel pueya Pueyasora. ⁷ Naajaarihua Abraham niqiuohua. Puetunu Abraham niqiuohuajanaari maja seetanujanaa Abraham niqiuohua na quiniu quiquiaari Pueyasora. Pueyasocuaajaari naa sequequiaari Abraham:

“Cua sequesano quiajanijari saaja quia niyanu Isaaccuajinio supueno pueyarano quiniutianiya cutara”.

⁸ Naa Pueyaso sequesacari Abrahamtej, naacuajiti paari niishiyani, majaari puetunu Pueyaso saquirojosano pueyacuajinio supueno pueyajanaa seetanujanaa Pueyaso muerasu. Saniniuuja, seetanujanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuuquiaari Pueyaso sequesanoocuaaani. Pueyasora, nojori cutaraari Abrahamcuajinio supueno pueya. ⁹ Abrahamri Pueyaso sequesanoocua tiuuquiaari, Pueyaso jaara naa na sequequiaari:

“Abrahamnaa, janiyari quioocua tacatenutaniuhua tamacarini. Janiyari jiyacari quia niqiuo Saara riuriatanutaniuhua tariucua mueyaracani”. Naacuajitij, Isaac jaara rasaaquiaari, Pueyaso sequesanoori tohuatequiaari. Naacuajitij, puetunu Abraham niqiuohuajiniijiojuanaani, saaja Isaacri Pueyaso saquirojosano pueyan quiquiaari.

¹⁰ Naa quiquiaariijaariuhua Isaac niqiuohua. Isaac jaara neco Rebeca manajoquiaari, Rebecaari caapueya manajequiaari. ¹¹⁻¹³ Cuno caapueya royaquishacarijia, juhuanojuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojijiarani”. Naa Pueyaso sequesacaritij, cunoori juhua Pueyaso sequesano tariucuaacaanu. Naa sequequiaari cuno royaquishoojua caapueyajiniijiri:

“Jacoboori cua panishano quiniutianiya. Esauuri saniniuuja cua soosano quiniutianiyacujua”.

Naa Pueyaso sequesacaritij, paari niishiyani, Pueyasoori saquirojoquiaa cana na saquirojonu paniyacuajani, tama na miiniu panishanojuaja na tohuateenura. Naacuajitij, Pueyaso jaara saquirojore pueya, nojuajaari maja na niishirojonu nojori miishanojini; maninia, sesa soj.

¹⁴ Naa Pueyaso miishacari tama na panishanojuajaatej, ¿taa pa sequeyani? ¿Pueyasote sesa miya, naa rimiajata na saquirojosacari pueyatej? Maja.

¹⁵ Pueyasocuaajaari naa Moisés sequequiaari:

“Janiyari pueya jiyanooniutianiyani teyano pueyano cua jiyanooni paniyacuajani. Naajuhuj, janiyari pueyanocua taraajenutianiyani, teyano pueyanocua cua taraajenu paniyacuajani”.

¹⁶ Naacuajitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocuaajaari tama saquiriojoquiaajaaja cana na jiyanooni paniyani. ¹⁷ Naajuhuj, tariucuaaanu Pueyaso sequesano Egipto jiyaniijaaraari naa naajiotasano quiyajuhuj:

“Faraónnaa, janiyari quia jiyatequiaari Egipto pueya jiyaniija quia quiniuriani, cua cumaacata cua miijosano cua niquitiniuria quiajaniya. Naacuajitij, puetunu jiyacajinia quiniaa pueyapuejanaari niishiniutianiya, janiyari Pueyasojuaanaa cutarani”.

¹⁸ Naacuajitij, paari niishiyani, Pueyasoori taraajeja teyanocua na taraajenu paniyani. Naajaariuhuj, nojuaajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracuajani.

¹⁹ Naa cua sequesacari niajanijatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniuucua pa saniitioreni? ¿Canteeri na naata Pueyaso tarinitiniu na miiniu panishanojinijini?” ²⁰ Majaari naa sequenu pueyanonaa. ¿Canteeri quiajaniyani, naa quia juaaniuria Pueyasotej? Paacuaajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaanu: “Juaashiquiaracanaa, ¿casaara quia panirii conatura janiyani?”?

²¹ Paniyojojuacuajaari na naata paniniu maraujiniiji na panishano casaa, shanohua pataconiyojua, mashaca quiquiora manijinia cajitariquiano conatunio.

²² Naajuhuj, ¿taa pa sequenutianiyani, Pueyaso jaara niishitiniu paniya na juaanu, na cumaacani, na saniitosacari sesa miijiaa? Naajaa, Pueyasoori jiyanoohua rejeretaquiaa sesa miijiaa, cante tari saniitosocoriquiano quiyacuajani. ²³ Pueyasoori naa tarishiyajaara na saniitionura na tojiti-aashijiaa pueya. Naa na tarishishacaritij, nojuaajaari pueya niishitiquiaa na shacantuuca cumaaca, maninia na miishacari na jiyanooshano pueya, cante tari saquiriojoso quiya na shuriucua quiriqianocujani. ²⁴ Paacuaajaari cuno jiyanooshano pueyani, canapue tari Pueyaso saquiriojoquiaaricujani Judiucacajinijinio, taucacajinijinionio. ²⁵ Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiaquiquiaarini, janiyari nojori sequenutianiyani: ‘Niaari cua quiquiohuanijojua’. Naajuhuj, cante cua shuquiritiasoo pueya quiquiaarini, nojoriiri cua timitiasano pueyara quiniutianiya”.

²⁶ Naa naajiotasanoori quiyajuhuj:

“Tee cuniqui naa pueya sequesaaquiaaricujani: ‘Niaari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquiohuajanaa cutara’”.

²⁷ Saniniuujia, supuetana Isaíasri naa sequequiaari Jacobo niquiohuacujinio supueno pueyajiniji:

“Israel pueyari jiyanoohua canenutaniya, juhua shoniacu caminia shuriuquico paajia jaaquia, serojosoo. Saniniuujia, saaja secaja nojorijinijinoori Pueyaso pueyara jatanishaanutaniya. ²⁸ Pueyasoori mijiriara na sequesano tohuateenutaniya. Majaari na tarishiniu quiniutianiya”.

²⁹ Supuetana Isaíascuajaari naa sequequiaari tarijiajuhuj:

“Pa Jiyaniijia Pueyaso jaara Israel pueya niqiuohua jiyanoyaquiquiaari, Israel pueya maara quiarijia quiyaquiri. Maara tari shaajasaa-canu tojetaarucujanaa, naatej, taa Sodoma tiacajinia quiniaa pueya puecoosaaquiaaricuani, Gomorra tiacajinia quiniaa pueyano”.

Judiocuacaari Pueyaso rupaacua tiuyashjiaca saaja

³⁰ Naa cua pohuatasacari niajaninya tariucuacaanu Pueyaso Rupaajini-jitij, paari quiarijia nio niishiyani: taucuacaari maja quenaaja na tacaa-niu quijia taate nojori naata Pueyaso jiyanooshano quiniuni. Nojori-iri juhuajaniya quijia saaja. Naajaa, quiarijia, Pueyasoori nojori jiyate-quiaa juhua sesa miyashjiacara, saaja Jesucristoocua nojori tiuushacari.

³¹ Israel pueyari saniniuujia jyanohua Moisés Rootasano tojjijaca juucua, nojori jyanishacari Pueyaso naasucuaari naa nojori miishacari nojori jyanooniutianiya. Majaari Pueyaso jyanooniu quijia nojori. ³² ¿Niaate niishiya casaara Pueyaso jyanoyaquiquiaari nojorini? Pueyasoori nojori jyanoyaquiquiaari nojori tiuyaquiniucua nocua. Nojoriiri jyaniquiaari tama nojoriijaarija na naata tama nojori cuaqueyajaaja jiyatenu juhua sesa miyashjiacara, Moisés Rootasano nojori tojjishacari. Naaratej, ma-jaari nojori tiuuniu quiquiaa Jesucristoocua. Nojoriiri saaja na sooquiaa. Naacuajitij, Jesucristoori juhua saajia nojoriria, nocua nojori tiuriini-uria. ³³ Jesucristojiniji miriqui Pueyaso sequesano cuajaari naa naajio-tasaquiaari tariucuacaanu, Jesucristo niyacarijia:

“Cua tojtiiare. Janiyari Sión tuhuananucua nianutaniya saajiani, pueya tiuriiniuria nocua. Saniniuujia, cante nocua tiuyani, nojoriiri puetunu Pueyaso sequesanojuanaa na muerasurano masenutaniya”.

10

¹ Cuarta Pueyaso muerasunaa, janiyari jyanohua Pueyaso secojoquiaani parta Israel pueyacuara, Jesucristoocua nojori tiuuniuria, Pueyaso pueya nojori quiniurajuhuj. Janiyari jyanohua nojoriicua tacayani.

² Janiyacuajaari seetanujanaa niishiyani, Israel pueyari seetanujanaa Pueyaso panishano miiniu panijiacu juucua, na muerasu nojori quiniuria. Nojoriiri naa miiquiaa najuhuanaj, nojori niishiyaquishacari maninia.

³ Nojoriiri saaja sequequiaa, majana Pueyaso naata pueya jyanooniu saaja nojori tiuushacari nocua. Naaratej, nojoriiri jyanohua saniniuujia quiaa maninia nojori quiniuria Pueyaso niquiara tama nojori miishanotajaaja. Naacuajitij, nojoriiri Jesucristoocua tiuyaquiquiaa Pueyaso jyanooniuria nojori. Pueyasojuanaari Cristo jiyatequiaari pa niti mosocoriquiano.

⁴ Naacuajitij, Cristo jaara mosaaquiaari, nojuajaari Moisés Rootasano tojiniu tohuatequiaari cutara. Naacuajitij, Pueyasoori puetunu nocua tiuuniaajanaa jiyatequiaa juhua sesa miyashjiacara. ⁵ Moisés cuajaari naajioquiaari taa na rootasano tojjijaca miiniutianiyan, juhua sesa miyashjiaca nojori quiniuria. Nojuajaari naa naajioquiaari:

“Cante puetunu cua rootasanojuanaa tojjijani, nojuajaari pueyaracaanu rishijiaa jiyatesaanutaniya”.

⁶ Saniniuujia, saaja Jesucristoocua pa tiuushacari, paari juhua sesa miyashjiacara jiyatesaaquiaani, pueyaracaanu rishijiaa pa quiniuria. Naacuajitij, majaari naa nia niishiriojonu nioojajinia nia taacanuusacari: “¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” ⁷ Naajuhuj, majaari naa nia niishiriojonu: “¿Cante na naata macunucua quiquiojinia quianu, Jesucristo na tacaniniuria pocuani?” ¡Pueyanaa, majaari quenaaja naa

nia niishiriojonutej! ⁸ Pueyaso Rupaacuaajaari tari naa naajiotasaaquiaari pajaniyara:

“Niaacuaajaari cua rupaa jiitiaa. Niaari na niishiyajuhuaaj. Nioojiajinia quiyacuaajaari”.

Cuno rupaa canaa na pahuataquiaa niajaninyani, cunocuaajaari Jesucristoocua nia tiuuniuria. ⁹ Naacuaajitij, Pueyasoori pueya jiyatequiaa na pueya nojori quiniuria, Jesucristoocua tiuujia jaara pueya niquiara pahuatare: “Jesucristoori seetanujuanaa Jiyaniijajanaa cutara”, noojiajinia na niishishacarijuhuaaj Pueyasoori Jesu samiitianiquiaariuhua macujiniji. ¹⁰ Seetanujuanaa naari: poojiata pa tiuushacari Neyanuucua, Pueyasoori pa jiyateya juhua sesa miyashijia pa quiniuria. Naajuhuaaj, pa rupaata pa pahuatasacari: “Janiya Jesucristoocua tiuujiani”, jiyacaritij, Pueyasoori pa jataniquiaa na pueya pa quiniuria cutara.

¹¹ Tariucuacaanu Neyanujiniji Pueyaso sequesanoori naa naajiotasano quiyajuhuaaj:

“Puetunu nocua tiuuniaajanaari puetunu cua sequesanojuanaa cua muerasurano masenutaniya”.

¹² Naacuaajitij Judiocuaca, mariyata taucuacanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijiaari maja rimajata na jiyanooni nocua tiuujiaa pueya. Nojuajaari jiyanoohua capora. Jiyaniijajanaa cutaraari. ¹³ Tariucuacaanu Pueyaso Rupaajiniaari naa naajiotasano quiyajuhuaaj:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijianaa, cua jiyanoori’ ”.

¹⁴ Jaara naa quirritij, ¿pueyatucua taa Jiyaniijia secojonuureni, nojori jaara nocua tiuyaquiyajaa? Naajuhuaaj, ¿pueyatucua taa nocua tiuurini, nojori jaara nojuajiniji pahuataaquishoo quiyajaa? ¿Nojoritiucua taa nojuajiniji niishijia quirini, tamasaca jaara quenaaja nojori pahuataaquiri?

¹⁵ ¿Pueyaso Rupaa pahuatanaatucua taa cuno pojoriicua quiaareni, nojori jaara jiyaramiquiyaquishaare? ¿Pueyaso rupaa pahuatanaate jiyaramiquiyaquishaaquiaari? ¡Maja! Jiyaramiquishaaquiaaricuaaja. Naaratej, naa naajiotasano quiyari tariucuacaanu Pueyaso Rupaajinia:

“Jiyanoohua timitiasano pueya cutaraari, noo pojori canapute tamasacaacua quiajani, nojori na pahuatanura Pueyaso rupaa”.

¹⁶ Naajaa, majaari puetunu pueyajanaa tojiniu quiquiaa, Pueyaso Rupaa jaara nojori niquiara pahuatasaare. Naacuaajitij, supuetana Isaíasri naa sequequiaari na taraajenuta:

“Jiyaniijianaa, majaari pueya tojiniu paniniu canaa pahuatasano quiajanijajiniji”.

¹⁷ Naacuaajitij pueyanaa, paa jaara Jesucristo rupaa pahuatasaareni, paari pa numaata na tojiani. Paa jaara pa tojishanoocua tiuurini, Pueyasoori pa jiyatenutaniya na pueya pa quiniuria.

¹⁸ Pa jaara Pueyaso pueyara jiyatesaaciaa saaja pa tiuushacari Pueyaso rupaacua, jaara naa quirritij, ¿casaara puetunu Israel pueyajanaa Pueyaso pueyara jiyateyaquishaaquiaariirini? ¿Cristo rupaateeri nojori niquiara pahuataaquishaaquiaari? Maja. Nojori niquiaracuaajaari pahuatasaaciaa. Naa naajiotasano quiyacuaajaari tariucuacaanu Pueyaso Rupaajinia:

“Pueyaso Rupaacuaajaari puetunu jiyacajinijanaa pahuatasaaciaari. Na rupaari tojishaaciaari puetunu tiqiyocuajanaa, jiya puequeetujinia”.

¹⁹ Jaara naa pohuatasaaquiaariti, ¿Israel pueyateeri Pueyaso rupaa ni-shiyaquiquiaari nojori tojishacari? Maja. Nojoricuajaari na niishijia-ca quiquiaari. Nojoriiri saaja na ruuretajaca quiquiaari. Supuetana Moiséscuajaari naa naajiotaquiaari Pueyaso sequesano Israel pueyara, tariucua na tojiyashijia-ca nojori quishacari:

“Maninia cua miishacari tiquiyocua quijiaca taucua nia niti, jani-yari nia juaatiniutianiyani. Niaari jiyanohua juaaniutianiya cua jiyanooshacari mosanucua taucua”.

²⁰ Na nuhuaji, supuetana Isaíasri naa maatia sequequiaari Pueyaso niishi-tiosano nojuaja:

“Cucua jiaatiaashijia-ca taucua cutaraari cua riuriataquiaa, cua tojijia-ca nojori quiniuria cutara. Naajuhuj, janiyari cua pajeyashijia-ca tau-cuacaacua muetaquiaani”.

²¹ Saniniuuja, Isaíasri naa Pueyaso sequesano Israel pueyajiniji naajio-taquiaari:

“Janiyari puetunu juucajanaa Israel pueyacuaji masequiaa juucuni, maninia cua miiniu panishacari nojori. Nojoriiri saaja cua shocotequiaa, cua tojiyashijia-ca pueya nojori quishacari”.

11

Israel pueyajiniji cureenoori Pueyaso saquiriojosano

¹ Israel pueya jaara naa Pueyaso tojiyashijia-ca quia, ¿Pueyasote seetanu-juanaa nojori tarinitiacanu, na tojiyashijia-ca nojori quiniucua? ¡Maja pueyanaa! Janiyacuajaari Israel pueyanojaniuhuj. Abrahamri cua supuetana. Janiyari na jinianu Jacobo niyanu Benjamíncuajinio supuenoni. ² Naacuajitij, janiyari niishiyani, Pueyasoori maja na cartenu quiquianu puetunu tariucuaaanu na saquiriojosano Israel pueyajanaa. ¿Niaateeri supuetana Elíasjiniji naajiotasano niishiyaquia? Tariucuaaanu Pueyaso Rupaajinia naa naajiotasano quiyacuajaari Elías sequesano Pueyaso, na tacaashacari Israel pueya quiniucua sesa:

³ “¡Cua Jiyaniijianaa, cuarta Israel pueyari puetunu quia sequesano camini-ujuníaa pueyajanaa puecoorucuaa! ¡Saa janiyajaari cureyani! Naajuhuj, nojoriiri puetunu juhuacutucujanaa niyarequetarucua, tee quia tojtiajaca pueya catijaquiaa na seya quiocuaracuajani. ¡Nojoriiri quiarijia cua pajenuyajuhuj, na motunura janiya!”

⁴ Pueyasoori naa Elías riucuaquiaari saaja:

“Janiyari siete mil pueya jiiitiajaani. Nojoriiri cua tojtiajaca. Nojoriiri maja na mojuquetaconu quiquiaa cuno sacuaraatia shipinishano Baalcuara cua niti, taa narta Israel pueya miiquiaacuaani”.

⁵ Quiarijiaari naajuhuj, Pueyasoori seaja na saquiriojosano Israel pueya-jinijinio jiiitiaa, jiyanootio na quiniucua. ⁶ Naa Pueyaso muerasu nojori quishacari saaja Pueyaso jiyanooniucua nojori, naacuajiti paari niishiyani, majaari Pueyaso saquiriojonu quiquiaari nojori, maninia nojori quiniucua. Nojori jaara maninia miijia-ca quiriquia, nojori maara paniyaquiri na jiyanooshaanura.

⁷ Naacuajitij, paari niishiyani, Pueyasoori saaja na saquiriojosano pueya jiyatequiaa na muerasura. Israel pueya saniniuuja, nojoriiri saaja maninia quiniuria saniniujujuu juucua. Naajaa, majaari nojori naata tama na cuaqueyajaaja jiyatenu quiquiaari Pueyaso muerasu nojori quiniuria. Cuno nojori jiuujiari saaja cumajiuujiaacara quiquiaari, tojetaarucujanaa ni-shiyashijia-ca nojori quiniuria. ⁸ Tariucuaaanu Pueyaso Rupaajiniacua-jaari naa naajiotasano quia:

“Pueyasoori nojori jiyatequiaari niishiyashijiacara, maja nojori niishiniuria nojuaja. Naaratej, majaari nojori niishiniu quijia, nojori niquishacari Pueyaso miishano. Majaari nojori niishiniu quijiajuhuaj, nojori tojishacari na rupaa. Israel pueyari naa Pueyaso tojiyashijiaca quiyajaa quiarijiani”.

⁹ Supuetana David sequesanoori nojorijiniji naa naajiotasano quiyajuhuj: “Pueyasonaa, Israel pueyari puetunu nojori panishanojuanaa jiiitaa, maninia quia miishacari nojori. Saniniuujia, nojori tojiyaquiniuucua quiajaniya, nojori shuquiritiasano casaa cuaara quiriia juhua norijia tama nojoririjaaja, nojori saniitiosaanura. ¹⁰ Nojori jiuujia cuaara jataara juhua cariojuarujuriria, maja nojori niishiniuria seetanu Pueyaso rupaajanaa. Nojori cuaara porequetacoora socua, pueyaracaanu taraatia nojori miishacari”.

Pueyaso jiyanooshacari taucuaca, Israel pueya niti

¹¹ ¿Niaateeri jiyaniya Pueyasoori Israel pueya cartequiaarijanaa, tojiyashijiaca nojori quiniuucua? Maja. Pueyaso tojiyashijiaca nojori quiniuucua, taucuacaari saniniuujia Pueyaso muerasura quiquiaa, nojori tiushacari Jesucristoocua. Cunoori Israel pueya jiaatianiquiaa taucuacaacua, Pueyaso muerasu nojori quiniuriajuhuaj. ¹² Quiarijia, puetunu jiyacajiniajanaa taucuacaari shuquiriaatia quiya, Pueyaso muerasu nojori quishacari Israel pueya tiuyaquiniuucua Jesucristoocua. Saniniuujia, Israel pueya jaara Pueyaso muerasura quiriohua Jesucristoocua nojori tiushacari, jiyacaritij, socua jiyanohua maninia quiniutianiyari puetunu pueyapuerajanaa, puetunu jiyacajiniajanaa.

¹³ Taucuacajinijinio cuarta Pueyaso muerasunaa, cua tojiri. Nia sequenu panianijia. Janiyari seetanujuanaa jiyaramiquishaaquiaari Jesucristo rupaa cua pohuatanura taucuaca niquiarani. Naaratej, janiyari puetunu cua cumaacatajanaa pohuataquiaa Jesucristojiniji taucuaca niquiarani, nojori quiniuria Pueyaso muerasujuhuaj. ¹⁴ Janiyari seetanujuanaa naa miiquiaani cuarta Israel pueya jiaatianura niaacua, nojori tiuniuria Jesucristoocujuhuj, nojiaqueya nojorijinijinio Pueyaso jiyatenura na pueyara. ¹⁵ Pueyasoori juhua taanuquiaari Israel pueya nocuaji, nojori tuyaquishacari Neyanuucua. Naajaa, naacuajiti Pueyasoori puetunu mijiria quiniaa pueyapuejanaa jiyanooquiaa, na muerasu nojori quiniuria. Saniniuujia, Israel pueya jaara jiyanooshaarohua, jiyacaritij, jiyanohua maninia quiniutianiyari puetunu pueyapuerajanaa. Israel pueya tiushacari Jesucristoocua, nojori juhua macujiniji samitiaconutaniuhua. ¹⁶ Seetanujuanaa maninia nia niishiniuria nio miriqui cua pohuatasanoni, maatia nia pohuatereeraj. Nia tojiri. Coteenujuanaa pa junioncotasano neecaruu jaara maninia quiri Pueyasora pa niqutiosocoriquiano, tariquiaari puetunujuanaa maniniajuhua Pueyasora. Naajuhuj, naana nujuaca jaara maninia quiri puetunujuanaa, na cashacucuaari maniniquiuucujuhuj. Nio miriqui cua pohuatasanoori nia niishitiya cutara Israel pueyajiniji. Naacuajitij, Pueyaso jaara Abraham jiyanooquiaaricuaa nocua na tiushacari, naacuajiti paari niishiyani, Pueyasoori puetunu Israel pueyajanaa jiyanooniutianiyajuhuj, nojori jaara tiuuriquia Jesucristoocua.

¹⁷ Supuetana Abrahamri juhua Pueyaso panishano olivo naana nujuaca. Saniniuujia, na jinanuucujinijinio supueno Israel pueyari juhua na cashacucua. Cuno na cashacucujinijinio jaara Jesucristoocua tiuyaquiquiaari, Pueyasoori na piyotauquiaari. Niajaniya saniniuujia taucuacanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiushacari, Pueyasoori nia rupotauquiaari na

panishano naanaacua nia moritianura. Naa Pueyaso panishano naanaacua nia moritiasacaritij, cuno naana nujuacaari nia nujuacajuhua. Naacuajitij, niaacuajaari puetunu Pueyaso sequesanojuanaa supuetana Abrahamra masequiaa tari. ¹⁸ Naa Pueyaso rupotanuucua nijaniya na panishano naanaacuatej, majaari tama nia cuaqueyajaaja nia shuquiritianu. Majaari nia jiyaniyu niaa cutaraari socua maninia pueya, Pueyaso cartesano Israel pueyajiniji. Naa jaara jiyaniya niaari socua maninia pueya nojorijiniji, nia niishiri, niaari maja nia nujuaca rishitijia. Naa nujuaca cutaraari nia rishitiya.

¹⁹ Naa naasucuaari sequeya: “Taaquiriirinij. Cuno olivo cashacuaajaari canaacuaji piyotasaacuaari, saniniuujia canaa rupotasaanura nocua nojori niti”. ²⁰ Taaquiriirinij, seetanujuanaacuaaquinateja nia sequesanojuaj. Saniniuujia nia niishiri, nojoriiri Pueyaso panishano naanajiniji piyotasaacuaari, nojori tiyaquiniucua Jesucristoocua. Naaari saniniuujia cuno naanaacua rupotanaso quiya, saaja Jesucristoocua nia tiuuniucua. Naacuajitij, maja tama nia cuaqueyajaaja nia shuquiritianu nia jiyaniishacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucacanaa, niaa mariqui piyotasaaruahuari, niaa jaara Pueyaso tojiyashijiacara quiriohua. ²¹ Pueyaso jaara jiyanoyaquiquiaari na saquiriojosano pueyacuaa, nojori tiyaquiniucua nocua, ¿maatucua casaara jiyanoori nijaniyanijia? Naaacuajaari taucuaa. Naaacuajaari maja na saquiriojosano Israel pueyacujinijo. ²² Naacuajiti pueyanaa, nia niishiri. Pueyasoori jiyanohua maninia. Naajuhua, nojuajaari saniitionu niishijia cutara. Naaratej, nojuajaari na tojitiashijia Israel pueya jiyanoyaquiquiaari. Saniniuujia, nojuajaari jiyanohua maninia miiquiaa nijaniya na jiyanooshano pueya nia quishacari, niaa jaara pueyaracaanu nocua tiuujiaa quiriquia. Nijaniya taucacanaa, niaa jaara nocua tiyashijiacara quiriohua, niaari nocuaji rupotasaanutanihua. ²³ Saniniuujia, Israel pueya jaara Jesucristoocua tiuujiaa quiriohua, Pueyasoori nojori rupotanutanihua na panishano olivo naanaacua. Pueyasoori jiyanohua cumaacaracuaaja na rupotanuuhua na panishano naanaacua. ²⁴ Nijaniya taucacanaa, niaari maja seetanujuanaa Pueyaso saquiriojosano Israel pueya. Naaari juhua nacujiniaacoji olivo naana cashacua. Naajaa, nia tiuushacari Cristoocua, Pueyasoori nia rupotaquiaari na panishano olivo naanaacuajanaa. Naaratej, majaari jiyajeneta Pueyasora, na piyotanaso olivo cashacua na rupotanuuhua tama neyonaacuajaaja, nojori jaara Jesucristoocua tiuujiaa quiriohua.

Pueyaso jatanishacari puetunu Israel pueyajanaa na pueyara

²⁵ Taucuacajinijinio cuarta Pueyaso pueyanaa, tariucuaaanu pueyari niishiyajiniji taa Pueyaso miiniutianiya Israel pueyani. Qaiarjia cutara nia niishiri Pueyaso niishitishano janiya, maja nia jiyaniinuria Pueyasoori nia paniya socua Israel pueyajiniji. Naarate cua tojitiare. Quera puetunu Israel pueyajanaari Pueyaso tojiyashijiaa quiya. Nojoriiri naa quiniutianiya, puetunu Pueyaso saquiriojosano taucacajinijinio pueyanaa cuara Jesucristoocua tiuuriiaatijia. ²⁶ Jiyacaritij, puetunu Israel pueyajanaari jiyatesaanutaniya Pueyaso pueyarajuhua, taa tariucuaaanu Pueyaso Rupaajinia naajiotasaacuaaricuaajani. Naa sequeyari:

“Sion tiacajinia supuenutaniyari pueyacuaji Tacuriquiano. Nojuajaari puetunu sesa casaajanaa jaariutianutaniya Jacobo niquiohuacuajinijo supueno pueya jiuujajiniji. ²⁷ Naa cua jiyanooshacari puetunu sesa nojori miishanojuanaatej, janiyari jiyacari tohuateenutaniya tariucuaaanu cua sequesano nojori supuetanaani”.

²⁸ Quiarjia Israel pueya tiuyaquishacari Jesucristo rupaacua saniniuuja, nojoriiri juhua Pueyaso paraa, Pueyaso jiyanooniuria nijaniya saniniuuja, taucuacanaa. Naajaa, Pueyasoori cuno Israel pueya paniyajaa, nojori supuetanaa quiniuucua na saquiriojosano pueya. ²⁹ Pueyasoori maja na jaariutianu quijia na niqitiosano. Na saquiriojosano pueya jiyanoojaari. Majaari nojori na ruuretanu. Pueyasocuaajari Israel pueya saquiriojoquiaari na pueya nojori quiniuria, maninia na miiniuria nojori. ³⁰ Maniniushiquiari, nijaniya taucuacanaa, niaari Pueyaso tojiyashijiaca quijia. Israel pueya tojiyaquiniuucua Pueyaso quiarjia saniniuuja, Pueyasoori niaacua taraajequiaa. ³¹ Nojoriiri Pueyaso tojiyashijiaca quiya quiarjia, Pueyaso taraajenura nojoriicua taa na taraajeya niaacuacuaani. ³² Naacuajitij, Pueyasora, puetunu pueyajanaari na tojiyashijiaca quiya, Israel pueya, taucuacanio. Naacuajitij, Pueyasoori na naata jiyanooni nojoriijuhuaaj, nojori tiushacari Jesucristoocua. Pueyasoori maja rimiajata na jiyanooni.

³³ ¡Pa Pueyasoori jiyanoohua niishijia, maninia na miiniuria! ¡Nojuajaari puetunu niishijijanaa cutara! ¿Cante niishiquiaarini casaa Pueyaso miiniutianiyani? Na miishanoori jiyanoohua jiyajeneta. ¿Cante na naata na niishiniuni? Shaaqui. ³⁴ Naaratej, seetanujuanaari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? ¡Majal! ³⁵ ¿Pueyasoteeri na panishano jiiitiaaquiquiaari tamonu niqitionura nojuaja na panishano, na nuhuaji na niqitionuhua? ¡Majal!”

³⁶ Seetanujanaa puetunu casaajanaacuaajari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. ¡Pueyaracaanu pa shuquiritiare pa Que Pueyaso! ¡Nojuajaari jiyanoohua maninia! ¡Cuara naa quiiriatej!

12

Saaja Pueyasora pa quirij

¹ Cuarta Pueyaso niqiuojuanaa, jiyanoohua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucujanaa saa neraja nia quiniuria. Naacuajitij, niaari Pueyaso shuquiritiniutianiya, pueyaracaanu na tojjiaca nia quishacari. ² Majaari socua nia quiniu taa Pueyaso tojiyashijiaca quiquiaacuaani. Saniya Pueyaso Sohuanu tojjiaca nia quiri cutara, seetanujanaa quiariniora jatanishano pueya nia quiniuria. Naacuajitij, niaari niishiniutianiya casaa Pueyaso paniya nia miiniuriani. Nia niishitija jaara jatanishano quiri, naacuajiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucujanaa jiyanoohua maninia.

³ Jiyanooja Pueyaso quiniuucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu nijaniyajanaa cua tojitiare quiarjia. Naa jaara Pueyaso cumaace masequiaari nocua nia tiushacari, nojuajaari puetunu nijaniyajanaa jiyatequiaari tamaatia poonijosano miijaca nia quiniuria. Naaratej, majaari tama nia cuaqueyajaaja nia jiyatenu paniniu socua maninia quijaca nia quiniuria tamacajiniji. Saaja jacaria niishiriojuaca nia quiri, maninia nia miiniuria nia poonijosano, teyano Pueyaso sequequiaari nia miiniuracuajani. ⁴ Pa cuaqueyajiniacuma, paari queraatia tamaatia casaa jiiitiaani. Puetunu cunojuanaari tamaatia miiniu niishijia, maninia pa quiniuria. ⁵ Paari naajuhuaaj, taa pa

jiniacuma casaacuaani. Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupuetootesano pa quishacari, maninia pa miitioonura.

⁶ Naatej, taa pa cuaqueyajiniacuma casaa tamaatia poonijosano miini niishiyacuaani, naajuhuaaj, Pueyasoori puetunu na muerasujuaanaa na cumaaca niqutioquiaa, tamaatia miiniu niishijiaa pa quiniuria. Naaratej, cante Pueyaso cumaaca jiitiaani, Pueyaso niishitishano nojuaja na pohu-atanurani, nojuaja cuaara seetanujuaanaa pueya niquiara pohuataara na taacanuyaquiniutia. ⁷ Naajuhuaaj, cante Pueyaso cumaaca jiitiaa pueya na naacnurani, nojuaja cuaara maninia naacuaa pueya. Naajuhuaaj, cante Pueyaso cumaaca jiitiaa Pueyaso rupaa niishitiojona na quiniuriani, nojuaja cuaara maninia niishitiojora Pueyaso rupaa pueya niquiara. ⁸ Cante Pueyaso cumaaca jiitiaa pueya na shiniujiuniuriani, nojuaja cuaara pueya shiniujiuria, maja pueya cartenura Pueyaso rupaa. Cante na jiitiasanojiniji nareja niqutiojojua casamijiuniucua pueyani, nojuaja cuaara juhuajaniya niqutiojora nareja, nojori na paniniutia. Naajuhuaaj, cante Pueyaso pueya jiitianani, nojuaja cuaara jiitiaara Pueyaso pueya nojoriicua na tacaaniutia. Cante taraatia miishano pueya naacujuani, nojuaja cuaara shuquiriaatia na naacuuranoj.

Pueyaso tojjiaca nia quiri, taa Pablo rootaacuajani

⁹ Seetanujuaanaa panitiojuaca nia quiri. Puetunu sesa casaajanaa soojea nia quiri. Majaari maninia miiniu nia tarinitianu cutara. ¹⁰ Jiyanoehua panitiojuaca nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya niajanijajini. Majaari nojori nia rerequetenu.

¹¹ Tama nia cuaqueyajaaja nia cumaquiri maninia nia poonijionura pa jyanijiaara. Majaari taajecori nia quiniu.

¹² Shuquiriaatia nia quiri pueyaracaanu, nia niishishacari taa Pueyaso miiniutianiya jyanohua maninia na muerasuni. Saaja juhuajaniya nia rejeretare niaa jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secojonu.

¹³ Niarta Pueyaso pueya jaara na panishano jiitiaaquiri, nareja nia niq-uitiore nojori nia jiitiasanojiniji. Naacujitij, nojori jaara rucoonaa quiri, nojori nia masuure nia tiacora.

¹⁴ Niaa jaara naquiya miishaariquia, majaari nia miitianaa nia sesacanu. Saaja nia secojore Pueyaso nojoriicuaara, Pueyaso taraajenura nojoriicua.

¹⁵ Cante shuquiriaatia quiyacuaani, nojoritia nia shuquiririjihuaaj. Saniniuujia, cante nujuqueyacuani, nojoritia nia nujuquerejuhuaaj.

¹⁶ Jyanootiojuaca nia quiriqia, jatiqui nia quiniuria maninia. Majaari tama nia cuaqueyajaaja nia jiyatenu juhua socua maninia quijiaa pueya tamasacajini. Majaari pueya rerequeteja nia quiniu. Saniniuujia, tama nia cuaqueyajaaja nia mueyashitiri cutara, maninia nia rupenura paniaquishoo pueyajuhuaaj. Majaari tama nia cuaqueyajaaja nia jiyatenu juhua socua niishijiaa pueya nia quiniuria tamasacajini.

¹⁷ Niaa jaara sesa miishaariquia, majaari nia paraa nia naminiu saniniu-ujia. Puetunu nia miishanojuanaa cuaara quiiria maninia puetunu pueya niquiarajanaa. ¹⁸ Maninia nia quiri puetunu pueyatajanaa, majaari nojori ruutaquenu niaacuara. ¹⁹ Socua cua tojitiare cua panishano cuarta Pueyaso pueyanaa. Niaa jaara sesa miishaariquia, majaari nojori nia naminiu. Juhujaniya nia rejeretare saaja. Pueyasocuaajari niaacua naminiutianiya nojori. Pueyaso sequesanoajajari naa naajiotasano quiya na rupaajinia:

“Quiria nia tarinitiare puetunu sesa nojori miishanojuanaa niajaniya. Janiy-acuajaari nojori naminiutianiya niaacuani”.

Cua tojiri. Pueyasojuanaacuajaari naa sequequiaari. ²⁰ Naaratej pueyanaa, majaari nia paraca nia naminiu. Saaja maninia nia miiri nojori taa tariucuaa-anu Pueyaso Rupaajinia naajiotasaaquiaaricujani. Naa sequeyari:

“Quia paraca jaara miaajeya, quia miaqueterenoj. Jaara jiyamueyajuhuaaj, quia raatorenoj. Quiaa jaara naa na miiritij, tama nojuajaarijia jiyanohua caririquiniutianiya noojajinia”.

²¹ Naacuajitij, niaa jaara sesa miishaarigua, majaari nia juaaniu, niaa mariqui sesa miijara quirijaariuhuaaj. Saaja maninia nia miiriquia nia paraca. Naacuajitij, niaari Sesaaca shocotanutaniya.

13

Pa jiya jiyaniijianucua tojjiaca pa quirij

¹ Pueyanaa, mijiria nia jiyaniijianucua tojtiajaca nia quiri. Nojoricua-jaari Pueyaso jiyatesano, nia jiya jiyaniijianucua nojori quiniuria. Ma-jaari pueyano na naata jiyatesaanu jiyaniijia na quiniuria, Pueyaso jaara panijaquiri. ² Naacuajitij, cante mijiria jiyaniijianucua tojiyashijiani, no-juajaari jiyaniijia Pueyaso jiyatesano tojiyashijia. Cante naa mijiria jiyani-ijianucua tojiyashijiani, nojuajaari saniitiosaanutaniya. ³ Paa jaara maninia miijiac quirini, ¿paatucua casaara pa jiyaniijianucua puereriquiani? Jiyani-ijianucuaari maja na pueretenu maninia miijiac. Sesa miijiac cuaara na puereera cutara, sesa miijiac nojori quiniucua. Saaja maninia miijia-aca nia quiri. Naacuajitij, nia jiyaniijianucuaari maninia poojotanutaniya niajanijajiniji. ⁴ Nojoricuaajaari Pueyasora poonijionaa, maninia nojori jiiitianura niajaniya. Saniniuujia, niaa jaara sesa miiri, nia puere cutara. Jiyaniijianucua pueyari maja najuhuanaj. Nojoricuaajaari jiyaniijianucua cumaacaraca, sesa miijiac nojori saniitionura. ⁵ Naacuajitij, nia jiyani-ijianucua tojjiaca nia quiri maja nia saniitiosaanura, naajuhuaaj, maja Pueyaso tojiyashijiac nia quiniuria. ⁶ Naajuhuaaj, nia cumaneecajiniji nia niqutiore nia jiyaniijianucua, taa nojori sequequiaa nia niqutionu-racuajani. Nojoricuaajaari Pueyasora poonijioquiaa pueyaracaanu, maninia nojori jiiitianura niajaniya. Naaratej, nojoriiri cumaneeca masequiaa nia-janijajiniji.

⁷ Naaratej, puetunu nojorijianaa nia niqutiore, taa nojori sequequiaa nia niqutionuracuajani. Naacuajitij, niaa jaara sequesaa nia cumaneeca-jiniji nia niqutionura nia jiya jiyaniijia, nareja nia niqutiore. Naa-juhuaaj, cumaneeca jaara jiya jiyaniijia masenu cojiritiasaa, casami nia masescari, majaari nia juaaniu. Naajuhuaaj, majaari nia jiyaniijia nia sesacan, jiyaniijianucua nia jiyatesano pueyano. Majaari nojori nia rerequetenu. Naajuhuaaj, nia jiyaniijianucua tojjiaca nia quiri, nojori quiniucua Pueyaso jiyatesano nia jiyaniijianucua.

⁸ Pueyanaa, majaari najuhuaana casami nia poonu, niaa jaara cumaneecaaj quiri. Saniniuujia pueyanaa, maja cutaraari niarta pueya paniniu nia puecanu. Pueyaracaanu nojori panijiac nia quiri cutara. Naacuajitij, cante narta pueya panijiani, nojuajaari Moisés Rootasano tojijia cutara. ⁹ Supuetana Moisés cuajaari nia naajiotacuaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja no-huasejonu. Maja tamasaca jiiitasano casamiicua jiaatiaja nia quiniu”. Socua queraatia na rootasanoori quia. Niocuaajaari socua pa tojshocoriquiano na rootasano:

“Quiarta pueyano panijia quia quiri, taa quia paniya tama quia cuaquey-acuaani”.

Paa jaara saaja nio Moisés rootasano tojijia quirini, paari tari puetunu na rootasanojuanaa tojijia quiyani. ¹⁰ Cante seetanujuanaa pueyano panijiani, nojuajaari maja sesa na miiniu narta pueyano. Naaratej, paa jaara panijia quiriquiani, paari puetunu Moisés Rootasano tojijia cutarani.

¹¹ Pueyanaa, nio nia niishiri. Pa Jiyaniijia rijionu juuca pajaniyari tari quenaacoya. Cuno juucaari quiarjia socua cateca quiya paa jaara nocua tiuquiarini. Naaratej, cante juhua maqueyajaani, nojuaja cuara niucuaara, pa Jiyaniijia na poonijionura. ¹² Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijia quera tiuquihua. Nojuaja cutaraari na cumaacata pa cuhuatanutaniya. Naaratej, puetunu sesa pa miiniujianaa pa cartere. Majaari juhua ninishiqui quiijaca pa quiniu socua. Taa pueya cushiquiaa na toque tariquicuaaji na poonijionuracuani, naa nia cushiri Pueyaso cumaacajuhua. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniurajuhua. ¹³ Seetanujuanaa juhua Pueyaso pueya nia quiri. Majaari juhua ninishiqui quiijaca pueya nia quiniu. Niaacuajaari cuhuashiqui quiijaca. Naaratej, majaari mashaase-quenujuaca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatiajaca nia quiniu. Majaari sacuraatia casaa miiniuucua nia jiihiniu. Majaari juayonuujutajaca nia quiniujuhua. Naajuhua, majaari tamonu pueyaso jiiitasano casaacua nia jiaatianu. Naajuhua, majaari nia juaaniu tamonu jaara nia shocotare. ¹⁴ Naacuajiti pueyanaa, majaari nia niishiriojonu nia cuaqueya nia shuquiritiniuria taa nia paniya sacuraatia nia miiniuriacua-jani. Saniniuujia, maninia cutaraari Jiyaniijia Jesucristo niishitajaa nia jiiitanura, na cumaacanio. Naa nia miishacaritij, niaari juhua soldadodia miaquetojotaja toque cushiyojua, maja Sesaaca miitiniuria sesa niajanija.

14

Maja quiarta Pueyaso pueyacuara nia rimiaaquenu sacuraatia

¹ Pueyaso pueyajiniinjio pueyano jaara Pueyaso rootasanojiniji taacanujua quiriquia pueyaracaanu, naajaa, na rupuejaca nia quiri. Majaari nata nia juayonuujutanu tamaatia na niishiriojosacari Pueyaso rootasanojiniji.

² Naacuajitij, Pueyaso rootasano niishijia nia quishacari cutara, nia naacuaari niishiya nia naata puetunu miaquesanojuanaa miaquenu cutara. Saniniuujia, cante Pueyaso rootasanojiniji taacanuujuani, nojuaja naacuaari jiyaniya na naata saaja na natau miaquenu, na shuquiritiniuria Pueyaso. ³ Cante puetunu casaajanaa miaqueja cutarani, nojuaja cuara soyaquiiiriria narta Pueyaso pueyano, cante na miaquesano miaqueyashijia saniniunijia. Naajuhua, cante puetunu casaajanaa miaqueyashijiani, nojuaja cuara sesacaquiiiria puetunu casaa miaquejacajanaa. Cuno pojori, shu miaquejaca cutarani, nojoricuajaari Pueyaso jiyatesano na muerasu nojori quiniurajuhua. ⁴ ¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuaajaari nojori sequenutaniya, nojori miishanote maninia, sesa soj. Naajuhua, pa Jiyaniijia Jesucristocuaajaari cumaacaraca, na muerasu na jiyatenura maninia quiijaca nojori quiniuria.

⁵ Cua tojiri pueyanaa, noojiaqueya Pueyaso muerasujiniinjioori niquiriyatu juuca semeanajiniiji jiyatequiaa nojori maniniuhuaqueetanura Pueyaso. Tamasacaari saniniuujia sequequiaa, puetunu juucajanaanaari maninia,

Pueyaso pa maniniuhuaqueetanura. Puetunu nijaniyajanaa cuaara taanuyaquiiria tama nia miishanojinijijiaaja, maja nia macuhajetenura nioojia. ⁶ Cante niquiriyatu juuca seamaanajinia jiyatequiaa samaatenu juucara Pueyaso na maniniuhuaqueetanurani, maniniacuaajaari. Nojuajaari naa miiguiiaa Pueyaso na shuquiritiniuria. Naajuhuaaj, cante puetunu casaa miaquejajanaani, maniniacuaajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuaaj, cante shu mi-queyajiia Pueyaso na shuquiritiniuriani, cuaara naa miiria. Nojuajaari Pueyaso shuquiritijuhuaaj na secojosacari Pueyaso, na natau na miaque-nura.

⁷ Seetanujuanaa pueyanaa, majaari pa quiniu tama pajaniyarajaaja. Naajuhuaaj, majaari quenaaja pa shaajenu tama pajaniyarajaaja. ⁸ Paa jaara mijiria quiyani, paari pa Jiyaniijia rishiquiaani. Paa jaara cusoyareni, paari pa Jiyaniijia cusoqeeni. Naaratej, paa jaara saminiu quiyajaani, naajuhuaaj, paa jaara tariucua macu quiyani, paari pa Jiyaniijia jittiasanoni. ⁹ Jesucristocuaajaari cunora cusoquiaari, macunucua Jiyaniijia na quiniuria. Nojuajaari samiitiaquiaariuhua saminiucua Jiyaniijia na quiniurijuhuaaj. Naacuajitij, nojuajaari pa Jiyaniijiaanaa cutara.

¹⁰ Naaratej, saaja niquiriyatu Jiyaniijia pa jittiasacari, ¿paatucua casaara parta Pueyaso muerasu soojeaca quirini, nojori miaqueyaguiniucua shuni? Naajuhuaaj, ¿paatucua casaara parta Pueyaso pueya sesacajaca quirini, nojori miaguenuucua puetunu casaajanaani? Nia niishiri pueyanaa. Puetunu pajaniyajanaari nujuatejosaanutaniya Pueyaso tacojini, Pueyaso nequesoreenura pajaniya. ¹¹ Tariucuaaanu pa Jiyaniijia sequesanoori naa naajiotasano quiya na rupaajinia:

“Seetanujuanaa sequeyanijia, puetunu pueyajanaari cucuara mojoquetaconutaniya, nojori niishishacari janiyari seetanujuanaa Jiyaniijiaanaa cutarani. Puetunu nojorijianaari sequenutaniya: ‘Jiyaniijianaa, quiaari Pueyasojuanaa cutara! Puetunu quia miishanojuanaari maninia’ ”.

¹² Naacuajitij, paari niishiyani, puetunu pajaniyajanaari Pueyaso riuhua-nenutaniya tamajaajani, na nequesoreesacari pajaniya.

Maja sesa pa miitiniu parta Pueyaso pueya

¹³ Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijiaa quiri parta Pueyaso pueyajiniji saniniunijia. Tama nia cuaqueyajaaja nia cojuare maja niarta Pueyaso pueya niquiara nia miiniuria nojori jiyaniishano sesa casaa. Nojori jaara saniri miiniu nia miishanocuaa, naacuajitij, niaari tari sesa miitiri nojori Pueyaso niquiara. ¹⁴ Janiyacuaajaari niishiyani, majaari quenaaja tamonu sumatuu quiniu pa miaquesacari sesa miijiacara na jiyatenura pajaniya Pueyaso niquiara. Janiyari naa niishiyani cua Jiyaniijia Jesu rupaacua tiuujia cua quiniucua. Saniniuujia, cante jiyaniyanijia tamonu sumatuu na naata na jiyatenu sesa miijiaara nojuaja jaara na miaquere, nojuaja cuaara mi-queyajiirianoj. Jaara na pueresano saniri miaguenu, nojuajaari tama noojiaaja macuhajetanutaniya. ¹⁵ Naacuajitij, paa jaara parta Pueyaso pueyano macuhajetere pa miaguenuucua na miaqueyaguishoo casaani, majaari seetanujuanaa parta Pueyaso pueyano panijia pa quiniu. Jesucristocuaajaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casaa pa miaquesacari na niquiaran? ¹⁶ Naacuajitij, majaari nia shanacunu Pueyaso tojiyashijiaa pueya sesacanura Pueyaso rupaa, nia miaquesano casaacua nia juayonuujutanucua niarta Pueyaso pueyata. ¹⁷ Seetanujuanaa nia

sequeyanijia, majaari Pueyaso muerasu pa quiniu casaa pa miaqueyaquini-uucua, casaa pa ratuyaquiniuucuanio. Pueyaso muerasu pa quishacari, nojuaja cutaraari pania maninia miijiaca pa quiniuria, jatiqui pa quiniuria juhuajaniya. Pa panitiaajaariuhua shuquiriaatia quijiaca pa quiniuria. Paacuajaari na Sohanu jiitiaani, naa maninia pa quiniuria. ¹⁸ Paa jaara naa quijiaca quiriquiani Cristora pa poonijosacari, Pueyasoori pa shuqiritiaa. Naacuajitij, Pueyaso tojiyashijiaca pueyari maja na rerequetenu quiniutianiya pajaniya.

¹⁹ Naarate cuarta Pueyaso pueyanaa, jiyanoehua nia saniniujiuri taate nia naata maninia rupueetoosano quiniu puetunu niarta Pueyaso pueyata-janaani. Naacuajiti nia naata tama cumaquitooonujuaaja maninia Pueyaso muerasu nia quiniuria. ²⁰ Majaari nia sesonu Pueyaso miishano niarta Pueyaso pueya jiuujiajinia, saaja nia miaquenuucua nojori niquiara nojori pueresano casaa. Seetanujuanaa, Pueyasora, puetunu miaquesano casaa-janaari maninia pa miaquesocoriquiano. Saniniuujia, tama nia cuaqueyajaaja nia cojuare cutara, maja niarta Pueyaso pueya niquiara nia miaquenura nojori miaquesoo casaa, niaa mariqui nojori cushitioreeri. Naacuajitij, majaari nia naata maninia rupueetoosano quiniu niaa jaara nia miishanota taraajoriquia niarta Pueyaso pueya. ²¹ Naacuajitij, socua maninia juhuari maja pa miaquenura parta Pueyaso pueya pueresano casaa. Naajuhuaaj, majaari pa ratunu jereeca mashaca nojori niquiara, cuno naa pa miishano jaara qiri nojori shiniujiuniuria sesa nojori miiniuria. Naajuhuaaj, pa cartere puetunu parta Pueyaso pueya jiyaniishano sesa miiniu casaa-janaa, maja nojori pa taraajonura nojori ruparetanura pocuaji. ²² Naacuajitij, Pueyaso Rupaacua nia tiuushacari seetanujuanaa, niaa jaara niishiya nia miishanoori maja sesa, tamajaari nia miirinoj saaja Pueyaso niquiara. Shuquiriaatia quijia cutaraari noo pueyano, cante niishiyani na miishocoriquiano casaari maninia Pueyasora, maja noojia na macuhuaajetenura na miiniu nuhuaji. ²³ Saniniuujia, cante niishirojijiyani na miaquenu panishano casaa naasucuaari sesa quiniutianiya Pueyasora, jaara naa niishirojija, seetanujuanaa naa sesa quiniutianiyari taa na niishirojijiyacuajani. Paa jaara casaa mi-aquere seetanujuanaa pa tiuyaquiniutia Pueyasoo cuani, pa miaquesacari, paari tari sesa miirii Pueyaso niquiarani. Seetanujuanaa, puetunu pa miishanojuanaari sesa, paa jaara pa taacanuunuta na miiriquiani. Naaratej poojaari macuhuaajenutaniya.

15

Parta Pueyaso pueya pa shuqiritiri, maja tama pa cuaqueyajaaja

¹ Noojiaqueya parta Pueyaso muerasuuri juhuanojuaja seetanujuanaa Pueyaso Rupaacua tiuyashijiaca. Naacuajitij cuarta Pueyaso pueyanaa, pajaniya, cante tari seetanujuanaa Pueyaso Rupaaj tojiijiacacuaani, pajaniya cuuara nojori rejeretaara juhuajaniya. Paa jaara socua Pueyaso Rupaaj niishijiacacuaani, nojori pa cumaquiri. Majaari pa niishirojonu tama pa cuaqueyajaaja pa shuqiritiniuria tamajaaja. ² Puetunu pajaniyajanaa cuuara niishirojjoora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojiija na quiniurajuhuaaj. ³ Paacuajaari niishiyani, majaari quenaaja pa Jiyaniijia Jesucristo niishirojonu quijia tama na cuaqueyajaaja na shuqiritiniuria. Saniniuujia, nojuaja cutaraari taraatia miiniu rejeretaquiaari na rupenura mijiria quiniaa pueya, nojori na jaariuutianura Sesaaca. Naacuajitij, nojuajaari niõ tariu-cuaaanu tama nojuajiniijijaaja naajiotasano tohuateequiaari: “Cua Quena, cuno pojori, canapuete quia sesacajacani, nojoriiri cua sesacajuhuaaj, cua miiniuucua quia panishano”.

4 Seetanujuanaari pueyanaa, puetunu tariucuacaanu Pueyaso Rupaajinia naajiotasajuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumaniijaajaariuhuj. Naacujitij, paari juhuajaniya sashiya pa Jiyaniijiani. 5 Pueyasocuaajari pa cumaquinia, maninia rejeretajaca pa quiniuria, cumaniijasano pa quiniuriajuhuaj. Nojuaja cuara nia jiyateera jiyanoojiaca nia quiniuria taa Cristo quiquiaari jiyanoojiacuani, rupuetoojuaca nia quiniuria niarta Pueyaso pueyata. 6 Naacujitij nia naata pa Que Pueyaso, mariyata pa Jiyaniijia Jesucristo maniniuhuaqueetanu, juhua niquiriyatu pueyano, maninia rupuetoojuaca nia quishacari.

Pueyaso rupaari maja saaja Judiocuacara

7 Pueyanaa, jiyanoootoojuaca nia quiriquia, taa Jesucristo jiyanooquiaa pajaniyacuani, maninia rupuetoosano nia quiniuria. Naacujitij, pueyari Pueyaso timitianutaniya nojori niqishacari Judiocuaca taucuacata Pueyaso maniniuhuaqueetaano jatiqui. 8 Janiyari seetanujuanaa nia sequeyani, Cristoori mijiria niqiaari Judiocuacaacia, na tohuateenura Pueyaso sequesano nojori supuetanaa. Tariucuacaanu Pueyaso sequesanoori seetanujuanaa. Nojuajaari maja na sequesano na jatanu. 9 Judiocuacara Cristo miishanoori taucuacara quiquiaarijuhuaj, nojori maniniuhuaqueetanura Pueyaso, na jiyanooniucua nojorijuhuj. Tariucuacaanu Pueyaso Rupaajinia supuetana David naajiotasanoori naa quiyajujuaj:

“Maninia quia miiniucua janiya Pueyasonaa, janiyari quiajanijiniiji pootanutaniya maniniani taucuaca jiyacajinia. Maninia quia miiniucua janiya, janiyari quia timitianutaniya cua jaaquequejosanotani”.

10 Tamaqui Pueyaso Rupaajinia naa naajiotasanoori quiyajujuaj:

“Pueyaso niishiyashijaca taucacanaa, Pueyaso saquiriojosano pueya nia cojiri, mariyata jatiqui nia shuquiritianura pa Pueyaso”.

11 Pueyaso Rupaajinia, supuetana David naajiotasanoori naa sequeyajujuaj:

“Pa Jiyaniijia Pueyaso nia maniniuhuaqueetare, puetunu nijaniyajanaa, tamaatia rupaaca pocujaca taucacanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniucua pajaniya”.

12 Supuetana Isaías naajiotasanojinijijihuaj, paari niishiyani Pueyasoori taucuaca jitianu panijia pueyaracaanu, maja saaja Judiocuaca. Naaratej, Isaíasri naa naajiotaqueaari:

“Supuetana Isaí niyanujiniji supuenutaniyari pueya Jitiana. Nojuajaari puetunu mijiria quiniaajanaa jiyaniijia quiriquiano. Puetunu jiyacajinijinio taucacajanaari nocua tiuujiaa quiniutianiya”.

13 Pueyasocuaajari poojajinia poonijiojua, juhuajaniya pa sashiniuria pueyaracaanu, nojuaja cuara miirijaatijia puetunu na sequesanojuanaa pajaniyara. Pueyanaa, Pueyaso cuara nia timitiiria jyanohua. Naajuhuj, nojuaja cuara nia jitiiaara juhuajaniya, canapueete nocua tiuujiacacujani. Naacujitij, mijiria nia sashishacari, niari shuquiriaatia rejeretajaca quiniutianiya Pueyaso Sohuana cumaquishacari nijaniya, seetanujuanaa nia niishishacari pa Jiyaniijaari pa rijionuucua tacatenutaniuhua.

14 Cua panishano Pueyaso niqiuohanaa, naa cua naajiojinia cua nacasacari jyanohua nijaniyatej, majaari nia jyaniniu janiyari niaacujaji taacanuyajaani. Maja. Janiyacuajari niaacua tiyuni niaacuajari seetanujuanaa maninia quijiaca. Niacuajari Pueyaso rupaa niishijiacajujuaj. Naacujitij, nia naata tama nacasutoojonujuaja maninia, maninia

rupuetoojuaca nia quiniuria Pueyaso niquiara. ¹⁵ Naajaa, quiarijia janiyari niaacuara naajiyani cua niishitinihuara niajaniya tarijia nia niishishano. Cua jiyanootiuri, nio cua naajiojinia jiyanohua cua nacasuunucua niajaniya. Naa nia rootaanjia Pueyaso jiyatenuucua janiya Neyanu Jesucristo jiyaramiquishano, taucuaa cua pohuatunura na rupaa. ¹⁶ Pueyaso jiyatenuucua janiya nera poonijionara, janiyari cunora Jesucristo rupaa pohuataquiaa taucuaani. Naacuajitij, Pueyaso Sohuanu poonijionuucua nojori jiuujiajinia, nojoriiri Pueyaso shuquiritiasano muerasu quiniutianiya-juhuaj.

¹⁷ Pueyasora cua poonijosacari, janiyari jiyanohua timitiaa Jesucristoni, cua niquishacari taa taucuaa tiuquiaa na rupaacuani. ¹⁸ Majaari cua timitianu tama cua miishanojuaja. Janiya cutaraari Jesucristo miishano timitiaani. Nojuacuajaari taucuaa tiuutiquiaa na rupaacua. Nojoriiri nocua tiuquiaa nojori niquiara cua pohuatasacari na rupaa, naajuhuj, Pueyaso Sohuanu cumaacata cua miiniuucua nojori niquiara. ¹⁹ Nojori niquishacari Pueyaso Sohuanu cumaacata cua mijiosano, nojoriiri niishiquiaa cua pohuatasanoori seetanu rupaajanaa. Janiyari pocuaji Tacuna Jesucristojiniji tari pohuataquiaari puetunu tiqiyocujanaani, Jerusalén tiacajiniji, puetunu Iliria jiyajiniarajanaano. ²⁰ Naa cua pohuatasacari pa jiyano Jesucristojiniji puetunu cuno jiyacajiniajanaatej, janiyari pueyaracaanu pohuataquiaari cuniquini, tee Jesucristojiniji tojiyaquishaaquiaari juhuanujuajacuajani. Majaari cua pohuatanu paniniu quiquiaari tee tamasaca pohuataquiaari tari Jesucristojinijini. ²¹ Naa cua pohuatasacari Jesucristojiniji cuno pueya niquiaratej, janiyari nio tariucuaacaanu Pueyaso Rupaajinia naajiotasano tohuateeriquiaani. Naa sequeya Jesucristojinijiiri:
 “Nojuajiniji pohuatasoojua pueyari nojuajiniji pohuatasaanutaniya. Nojoriiri jiyacari niishiniutianiya cante nojuajani”.

Pablo naquerejosacari Roma tiacajiniara

²² Pueyaracaanu nio jiyacajinia cua pohuatasacari Jesucristojiniji, majaari jeya cua quiniu quiriquiaa nia niquiniuucua cua quianura. ²³ Quiarijia cutara, janiyari Jesucristojiniji pohuatanu tucatarucuaa tarini, tee Jesucristo rupaa tojiyaquishaaquiaari juhuanujuajacuajani. Janiyari Espania jiyajinia pohuatanu paniya Jesucristojinijiiuhuj. Queraatia marijaari tari cua shocojocanu pueyaracaanu cua naquerejosacari niaacua cua quianura. ²⁴ Naacuajitij, Espania jiyajiniara cua quiasacari, janiyacu nia tiacajinia jateemani. Janiya jaara pasaja camueenujusee niaata shuquiriaatiani, na nuhuaji, janiyari paniniutianiyani nia naacunura janiya, cua quianura Espania jiyajiniara. ²⁵ Janiyari coteenu Jerusalén tiacajinia tacatenutaniuhuaa tii quiniaa parta Pueyaso muerasu cua niqutionuhuaa cumaneecani, niya quiniaa parta Pueyaso pueya niquitiojosano nojoriiri. ²⁶ Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanohua maninia miya. Nojoriiri tama niishiriojonuucanujuaaja nareja na cumaneeca niqutiononura Jerusalén tiacajinia quiniaa casamijiuniucua Pueyaso pueyara. Cunora, nojoriiri quiarijia na rereata cuata na jiyarosocoriquiano. ²⁷ Nojoriiri naa miya nojori niishiriojosacari, maniniacuajaari nojori naacunura narta Pueyaso pueya. Seetanujanaa maniniacuajaari nojori miishano. Judiocuacaari maja na jamuurej quiquiaari Pueyaso rupaa pohuatasaanura taucuaa niquiara. Naaratej, taucuaa cuaara saniniujia quiarijia naacuura casamijiuniucua Judiocuaca, nojori jitiasano cumaneecata. ²⁸ Naacuajitij pueyanaa, janiyari nojori jiyarosocoriquiano cumaneeca niqutionutaniya Jerusalén tiacajinia parta Pueyaso pueya jitianani. Na nuhuaji, janiyari Espania jiyajiniara

quianutaniya cutarani. Cua quiasacari, janiyari nia tiacajinia tacanutanianiyani cua niquniuria niajaniya. ²⁹ Janiyari seetanjuanaa niishiyani, Cristoori cua naacunutaniya maninia pa shuquiriniuria jatiqui, niaacua cua tiuquishacari.

³⁰ Cuarta Pueyaso pueyanaa, cua Jiyaniijia Jesucristo nia jiitianuucua-juhuaj, mariyata Pueyaso Sohuanu panitiootesacari pajaniya, janiyari jiyanoehua paniyani nia cojiniuria janiya, Pueyaso nia secojonuta cucuara. ³¹ Cucuara nia secojore Pueyaso, na cojuanura janiya Jesucristo rupaa paraa Judiocuacaacuaji, Jerusalén tiacajinia cua quiasacari. Naajuhuj, nia secojore Pueyaso, Jerusalén tiacajinia quiniaa Pueyaso pueyacuara. Nojoriicuara nia secojore, nojori masenura shuquiriaatia narta Pueyaso pueya taucuaca jiyarosocoriquiano cumaneeca nojoriria. ³² Naajuhuj, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucuan. ³³ Pa jiyanoohia Pueyaso cuara maninia jiitiaara puetunu niajanijajanaa. Cuaara naa quiriitej.

16

Nata quiniaata Pablo saruhuatasacari nojori niishishano pueya

¹ Cuarta Pueyaso pueyanaa, nio maaji niaacua tiuquiniutianiyani, nojuajaari maninia maaji, Pueyaso tojjia. Na sesaari Febe. Nojuajaari Cnecrea tiacajinia Pueyaso pueya maanu naacujua maninia. ² Pa Jiyaniijia panijiaa nia quishacari, nia paniniutia nia masuure nia tiacora nio parta Pueyaso muerasu naacuna maaji. Niocua nia tiaco jiitiarenoj, taa nia jiitiaquiaacuaa parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuacuaa. Cua naacujua-jaariuhuj.

³ Quiria nia saruhuatate Priscila, neyaca Aquilano. Nojoriiri cua cojiniaa pa Jiyaniijia Jesucristora poonijionura. ⁴ Nojoriiri tama nojori cuaqueyajaaja panitiaquiaari cucuara, nojori tacunura cucuaji cua moyaquishaanura. Janiyari cunora jiyanoehua nojori timitiaani, naa nojori jiyanootiuniucua cucuatej. Majaari saa janiyaja nojori cua timitianu. Seetanjuanaa puetunu parta Pueyaso muerasu taucuacajinjiojuanaari nojori timitiaajuhuj, naa nojori miiniucua. ⁵ Quiria nia saruhuatatejuhua parta Pueyaso pueya, noo pojori Priscila, Aquila tiajinia rerejoquiaa Pueyaso secojonuunuratej. Quiria nia saruhuatatejuhua cua rupuenta Epéneto. Nojuajaari coteenujanaa Jesucristoocua tiuquiaari Asia jiyajinia. ⁶ María nia saruhuatate quiriajuhuj. Nojuajaari jiyanoehua poonijioquiaari niaara. ⁷ Quiria nia saruhuatatejuhua Andrónico, Juniasnio. Nojoriiri cuarta Judiocuaca. Nojoriiri cuata nujuatejosaquiaari nujuatejojuajinia, canaa pohuatanuucua Jesucristojiniji. Puetunu cuarta Jesucristo jiyaramiquishano pueyajanaari nojori panijiacajuhuj. Andrónico, Junias, nojoriiri socua coteenu janiyajiniji tiuquiaari Jesucristoocua.

⁸ Nia saruhuatatejuhua Ampliato. Nojuajaari cua panishano pueyano, Jesucristoocua na tiuuniucua. ⁹ Naajuhuj, quiria nia saruhuatate Urbano. Nojuajaari pa Jiyaniijia Cristora poonijionajuhuj. Cua rupuenta Estaquis nia saruhuatatejuhuj. ¹⁰ Apeles nia saruhuatate quiriajuhuj. Nojuajaari puetunu casaajanaa rejeretaja cutara, Jesucristoocua tiuujia na quiniucua. Aristóbulo tiajinia quiniaa pueya nia saruhuatate quiriajuhuj.

¹¹ Naajuhuaaj, quiria nia saruhuatare Herodión, parta Judio pueyano. Naa-juhuaaj, Narciso tiajinia quiniaa pueya nia saruhuatare quiria, noo pojori pa Jiyaniijaacua tiuujica pueyatej. ¹² Trifena nia saruhuatare quiria, Trifos-ajuhuaaj. Cuno maajipohuari pa Jiyaniijaara poonijionuujaaca. Naajuhuaaj, pa panishano maaji Pérsida nia saruhuatare quiria. Nojuajaari jiyanhuaa poonijiojua pa Jiyaniijaara. ¹³ Rufo nia saruhuatarejuhuaaj. Nojuajaari maninia tojjia pa Jiyaniija. Na nucua nia saruhuatarejuhuaaj. Nojuajaari juhua cua nucua quiquiaari quiria. ¹⁴ Nio pojori quiria nia saruhuatarejuhuaaj, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyano. ¹⁵ Naajuhuaaj, nio pojori nia saruhuatare quiria, Filólogo, necocua Julianio, Nereo, na rimiatunio, Olimpasjuhuaaj, mariyata nojoritia quiniaa parta Pueyaso muerasunio.

¹⁶ Niarta Pueyaso pueya nia saruhuatare seetanujuanaa nia paniniutia nojori. Puetunu niquijinio parta Pueyaso pueya maapuejanaari cua sequecanuni cua saruhuatanura nijaniya.

¹⁷ Cuarta Pueyaso pueyanaa, nia numooteyanijia, jiyanhua nia cojuare tama nia cuaqueyajaaja najuhuaana tamaatia niishitiojonuujaaca pueyacuaji. Nojoriiri Pueyaso pueya maapue cushitioquuaa, sesa nojori niishitiojosanota. Naacujitij, Pueyaso pueyari juaatioquuaa. Majaari nojori niishitiojonu pueya taa coteenujanaa nia niishitiojosaquuaari seetanu rupaajanaa cutarani. Naa sesa niishitiojonuujaacaacuaji nia rupatere. ¹⁸ Nojoriiri maja seetanujuanaa na poonijionu pa Jiyaniija Jesucristora. Nojoriiri poonijioquuaa tama nojori panishanojuaja nojori masenura. Najuhuaana shanhua nojori pohuatasanota, nojoriiri niishiyashijica pueya sapojoquuaa. ¹⁹ Puetunu tamonu jiyacajinijinio parta Pueyaso pueyajanaari niishiya, niaari seetanujuanaa Jesucristo rupaa tojtiajaca cutara. Naaratej, janiyari jiyanhua nia fumitaani. Naajuhuaaj, janiyari paniani niishijica nia quiniuria, saaja seetanu rupaajanaa tojjijica nia quiniuria, maninia mijica nia quiniuriahuaaj. Saniniuujia, sesa niishitiojosano niishiyashijica nia quitiriquiani, maja sesa miijica nia quiniuria. ²⁰ Naacujitij, poojia cajitijia Pueyasoori nia cumaquiniutianiya, Satanás nia shocotanura na sapojosacari nijaniya juucua. Niaari juhua na tanacunutianiya jiyocuara, Pueyaso tojjijica nia quiniucua. Pa Jiyaniija Jesu cuara nia cumaquiiria, shuquiriaatia nia quiniuria.

²¹ Timoteo, cuata poonijiona Jesucristorani, nojuajaari cua sequeya nera cua saruhuatanura nijaniya. Cuarta Judiocuaca Lucio, Jasón, Sosipater, nojoriiri nia saruhuataajuhuaaj.

²² Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriqiuani. Janiyari nia saruhuataajaniuhuaaj Cristocua tiujia cua quishacarijuhuaaj. Niojuanaa, pueyanaa.

²³ Parta Pueyaso pueyano Gayoori nia saruhuataajuhuaaj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquijiosacari nio tiacajinia. Parta Pueyaso pueyano Erastoori nia saruhuataajuhuaaj. Nojuajaari jiyatesaacanu nio tiacajinia jiyaniija cumaneeca cojuana na quiniuria. Parta Pueyaso pueyano Cuartoori nia saruhuataajuhuaaj.

²⁴ Pa Jiyaniija Jesucristo cuara cumaquiiria puetunu nijaniyajanaa.

Pablo maniniuhaqueetasacari Pueyaso, quera na tucuatasaacari na naajio

²⁵ ¡Pueyanaa, jiyanhua pa maniniuhuaqueetare pa Pueyaso! Nojuajaari na naata cumaquiniu niajaniya, seetanujuanaa na muerasu nia quiniuria na rupaacua nia tiushacari. Janiyari naa rootaquiaa niajanuyacua-jani, cua pohuatasacari Jesucristojiniji. Pueyasojuanaacuajaari tarijia cua niishitiquiaari Neyanu Jesucristojiniji cua pohuatanura. Jiya shipiniyaquishaacarijiyojua, Pueyasoori jiyasohua tamajaaja na niishishano jiiitaja Neyanu Jesucristojiniji. ²⁶ Saniniuujia, quiari naataja, paari niishiquiaarini, Jesucristocuajaari mijiria niquiaari puetunu pueyajanaa na jaariuutianura Sesaaca. Tariucuacaanu Pueyaso sequesano caminiujiuniaa naajionuutasanojiniji paari quiarjia seetanujuanaa na niishiya cutarani. Pueyaracaanu Quijia Pueyasocuajaari naa paniquiaari quiarjia pa niishiniuria Neyanujiniji. Quiarjiani, Pueyasoori Neyanujiniji pohuataniquiaa puetunu jiyacajinijinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojijiaca nojori quiniuria, Judiucuaca, taucucanio.

²⁷ Pa Pueyasoori jiyanhua niishijia cutara. ¡Pueyaracaanu pa maniniuhuaqueetare nojuaja, maninia na miiniucua pajaniya, Neyanu Jesucristoocua pa tiushacari! Cuaara naa shuquiritiasaria pueyaracaanutej.

COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Corinto pueya

¹⁻² Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pablóni, Jesucristo jiyarosano na rupaa cua pohuatanura taa Pueyaso paniquiaar-icujajani. Canaa niaacuara naajiyani, socua canaa niishitiojonura nia-janiya, Pueyaso saquiriojosano pueya nia quiniuucua. Niaari maninia quiya Pueyaso niqiuara, Jesucristo nia rupuesacari. Niaari seetanujua-naa Pueyaso muerasu, puetunu jiyacajinia pueyatjanaa, canapueete Jesu-cristoocua tiuquiacacujajani. Jesucristocujajari nojori Jiyaniijia, pa Jiyani-ijiajuhuaj. ³ Pa Que Pueyaso, pa Jiyaniijia Jesucristo cuara cumaquiiria niajaniya, juhuajaniya nia quiniuria.

Paari maninia miishaaquiaani Cristo pa rupuesacari

⁴ Maninia nia quiniuucua, janiyari pueyaracaanu Pueyaso sequequiaani "Paacarasho". Pueyasocujajari jiyanoherua maninia miiquiaari niajaniya, nia rupuesacari Jesucristo. ⁵ Nia rupuesacari Jesucristo, Pueyasoori puetunu cumaquiiaarijianaa niajaniya na cumaacata, nia poojotanura puetunu na rupaajanaa, puetunu na rupaajanaa nia niishiniuriajuhuaj. ⁶ Maninia nia tojitasacari Cristojiniji pohuatasano, niaari maninia mi-shaaquiaari taa canaa sequequiaari niajanijacuajani. ⁷ Naacuajitij, niaari tari masequiaari puetunu Pueyaso niqutionu panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyani-ijia Jesucristo tiuquishacarihua. ⁸ Pueyasoori nia cumaquiniutianiya pueyaracaanu, maja quenaaja niaacua casaa tiuutiasoo quiniuria, sesa nia miishanojiniji. Naacuajitij, pa Jiyaniijia Jesucristo jaara tiuquiriohua na ruuretajaca na saniitionura, niaa cutaraari juhuajaniya quiniutianiya. ⁹ Pueyasocujajari maninia tohuateequiaa na sequesano. Nojuacuajajari pa sequequiaari pa cojiniuria Neyanu, maninia pa miishaanura Neyanuta-juhuaj. Cuno Neyanuni, nojuacuajajari pa Jiyaniijia Jesucristo.

Pueyaso muerasu juhua tamasaca niqitiooquiaari

¹⁰ Cuarta Jesucua tiuuniaanaa, cua tojitiare. Pa Jiyaniijia Jesucristoori cua sequeteya nio. Maninia nia niishiriojore. Maja juhua tamasaca nia niqitioonu. Maja tamasaca niajaniya. Maninia nia niishiriojore, maja tamaatia. Nia juujiiaatioorejuhuaj. ¹¹ Naa nia sequeyanijia cuarta Jesucua tiuuniaanaa, Cloe niqiohua pohuatanuucua janiya niajaniya-jiniji. Nojoriiri cua sequerucuaa niaana juayonuujuataquiaa. ¹² Naa pohuataaarucuaa niajanijajiniijia: puetunu pueyajanaana tama seque-quiaajaaja: "Canaari Pablo pueyani". Tamasacanaari saniniuuja se-quequiaacujua: "Canaari Apolo pueyani". Tamasacanaari sequequiaa-jaacuhaj: "Canaari Pedro pueyani". Tamasacanaari sequequiaajujuaj: "Canaari Cristo pueyani". ¿Naatee pueyanaa? ¿Casaara tamajaaja naa nia raqitiijiqianuni? ¹³ ¿Majateeri nia niishiniu? Paari Jesucristo cuaque-yani. ¿Pa Jiyaniijia cuaqueyateeri neequeresetanocuaa? ¿Janiyateeri ni-acuara cusoquiaari niyacutesanojiniani, cua pueya nia quiniuria? ¿Ni-aateeri cua sesajinia tiuquinijosaaquiaari moojinijajuhuaj? ¡Maja, cuarta Pueyaso pueyanaa! ¹⁴ Janiyaquiiri namitia nia tiuquinijiaquiquiaari

moojiniani. Naacuaajitij, majaari nia naata sequenu niaa cua sesajinia tiuquiniijosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. ¹⁵ Naacuaajitij, majaari quenaaja tamonu na naata sequenu janiyari na tiuquiniquiaarini. ¹⁶ Quera niyajetaanjia. Janiyari Estéfanás tiuquinijoquiaarijuhua necohuatajani. Majaruhua socua pueya cua tiuquinijonu quiquiaari.

¹⁷ Jesucristoori maja na jiyaronu quiquiaari janiya pueya cua tiuquini-jionura. Cristo cutaraari cua jiyaroquiaari na rupaa cua pohuatanura. Majaari cua maniniushitiniu na rupaa cua pohuatasacari, pueya mariqui shanohua cua pohuatasanoocua tiuari najuhuaari. Cuaara tiuutiuria cutara Jesucristoocua, na miiniuucua maninia pocuara. Pueyasoori pa jiyanoocua saaja Jesucristo cusonuucua niyacutesanojinia pocuara.

Cristoori Pueyaso cumaaca jiiitaa, Pueyaso niishitajajuhuaaj

¹⁸ Canaa pohuatasano Cristo cusonujiniji niyacutesanojinia pocuarani, cunoori juhua mosanucua pohuatasano shaajecoriguiano pueyara. Naajaa, Jesucristo rupaari Pueyaso cumaacaracacua ja na tojtianaara, Pueyaso muerasura na jataniniuria pajaniya. ¹⁹ Pueyaso sequesanoocua jaari naa naajiotasaaquiaaritij:

“Janiyari niishijaa niishishano cushitionutaniyani. Mijiria pueya niishishano jiyatenutaniya najuhuanaranijia”.

Naacuaajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.

²⁰ ¿Pueyanoteeri jiyanoohua niishitajaraca Pueyaso muerasura na jataniniuria pajaniya? ¡Maja! Niishijajanaa jaara jiyanoohua niishiriojore, ¿pa naatate na sequesanoocua tiuuniu, Pueyaso na jiyanootiniuria pajaniya? Maja. ¿Niishitiojona rootasanote na naata Pueyaso pueyara jiyatenu pajaniya nocua pa tiuushacari? Maja. Naacuaajitij, puetunu mijiria niishishanojuaari najuhuaa quiya Pueyasora. ²¹ Pueyari maja na naata Pueyaso niishiniu quiquiaari tama nojori niishitajatajaaja. Pueyasoori tama sequesaaquiaarijaaja na niishitajata cutara:

“Jaaja. Maninia naatej. Pueya jiyanooriiria saaja nojori tiuushacari cua Niyanuucua”.

Pueyari saniniujia jiyaniya Jesucristo rupaari nareja sequesanojuhuanajaj, tojishoo. ²²⁻²³ Naaratej, cuarta Judiocuacaari maja Jesucristoocua tiuniaara na quiniu ritia. Nojoriiri Pueyaso cumaacata miishano niquiniu paniquiaa coteenu saaja. Cunora, nojoriiri canaa tojtiaaquiquiaa canaa pohuatasacari Jesucristo cusonujiniji niyacutesanojinia teetesano. Nojoriiri saaja sequequiaa: “¿Pa Jiyaniijiaranotucua casaara naa cararaatia mosaareni?” Griego pueyari naajuhuaaj. Majaari ritia nojori quiniu paniniu Jesucristoocua tiuniaara. Nojoriiri saaja niishiniuucua jiaatijaca. Nojoriiri jiyaniya Jesucristoori najuhuaana cusoquiaari juhua moseeca. Naacuaajitij, canaa pohuatasacari Jesucristo niyacutesanojinia mosaaquiaari, Judiocuacaari jiyaniya Jesucristoori cumaacaaju quiquiaari. Nojoriiri jiyaniyajuhuaaj Pueyaso Jiyarosocoriguianoori ritia Judiocuaca jiyaniijiaa quiniutianiya cutara. Majaari na niishitiniu quijia Cristo cuara coteenu miishaaria naquiya, jiyanooshano nojori quiniuria sesa nojori mijiosanojiniji. Griego pueyari canaa pohuatasano tojiaquiquiaa-juhuaaj. Nojoriiri jiyaniya Pueyasoori niishiyashijia quiquiaari Neyanu na motenura. ²⁴ Paa cutaraari niishiyani Cristoori pocuara cusoquiaari. Naacuaajitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griegohuanio. ¡Pueyasoori jiyanoohua niishijia cutara! ²⁵ Pueyari jiyaniya

Pueyasoori niishiyashijia quiquiaari. Cunora Neyanu cusojuaquiaari niyacutesanojiniaari. Naajaa, naacuajiti Pueyasoori pa jyanooquiaari. Pueyasoori jyanohua socua niishijia cutara mijiria niishijiacajiniji. Pueyari jyanijajuhuj, Pueyasoori cumuecaaju quiquiaari Cristo cusoacari niyacutesanojinia. Naajaa, naacuajitij, ¡Cristoori Sesaaca shocotaquiaaricuaaja! Pueyasoori jyanohua socua cumueca pajaniyajiniji.

²⁶ Cuarta Jesuucua tiunianaana, naacuajaari niishiya taamueca pueya nia quiquiaari pueya niquiarani, Pueyaso sequesacari niajaniya na muerasu nia quiniuria. Saaja secaja niajanijajinijinioori niishijiacquiriquiaa. Saaja secaja niajanijajinijinioori tojishano pueya quiriquiaajuhuj. Saaja secaja niajanijajinijinioori jyanijianucua niqiohuacuajinio supueno quiriquiaa. ²⁷ Mijiria quiniaa pueyara, Pueyasoori socua niishiyashijia pueya saquiriojoquiaari, na muerasu nojori quiniuria. Naacuajitij, mijiria niishijiaaari tamajaaja caririquiniutianiya nojori jaara saquiriojiaquishaare. Pueyasoori tojishoo pueya saquiriojoquiaarijuhuj, na muerasu nojori quiniuria, mijiria tojishano pueya caririquiniuria nojori jaara saquiriojiaquishaare. ²⁸ Pueyasoori soosano pueya saquiriojoquiaarijuhuj, tojishoo pueyano. Pueyasoori naa saquiriojoquiaari najuhuaa quijiaca. Canapuate tama na cuaqueyajaaja jyaniya cutara pueyanoni, cuno pojoriiri saniniuujia quejoosanutianiya. ²⁹ Naacuajitij, majaari quenaaja jyanohua pocuaja cureenu quiniutianiya Pueyaso niquiara. Tojetaarucujanaa shaaquiiri pocujaca quiniutianiya. ³⁰ Pueyasojuaanaacuajaari nia rupuetequiaari Jesucristo. Naacuajitij, niaari Pueyaso niishitiaja jiiitia. Nia rupuesacari Jesucristo, niaari maninia miijia quiya Pueyasora. Pueyasoori nia jataniya saa na tojjijacaraja nia quiniuria, juhua Neyanu nia quiniurajuhuj. Niajanijari puetunu jecasaanutaniyajanaa. Paari naa miishijiani Jesucristo pa rupuesacari. ³¹ Seetanujanaari nio sequesano tariucuaaanu Pueyaso Rupaaajiniji:

“Cante shuquiriaatia quiniu paniyani, nojuaja cuara shuquiritiaara pa Jiyanjia”.

2

Jesuucristo mosaanujiniji pahuatasano

¹ Cuarta Jesuucua tiuniana pueyanaa, janiya jaara niaacua tiuquiquiaarini, niaacuajaari niishiya taa cua pahuataquiaari Pueyasojiniji Jesucristo rupaa niajanijani. Majaari jiyajeneta cua pahuatanu quiquiaari niishijia niishishano rupaacata. Cua pahuatasanoori niishishaatia quiquiaaritia, maja juhua cutara pueyano pahuatasano. Janiyari jacaria pahuataquiaari Pueyaso rupaa niajanijani. ² Janiyari tari tama sequequiaaritiajanija: “Janiyari saaja Jesucristojiniji pahuatanu paniya Corinto pueya niquiarani, naajuhuj, taa na cusoquiaari pocuara niyacutesanojiniani”. ³ Cua pahuatasacari Jesucristo rupaa nia niquiara, janiyari sasaca quiriquiaa cua puerenutani. Janiyari tetecariquiaani. ⁴ Majaari cua paniniu quiquiaari cua tiutiniuria niajanija Jesucristoocua tama cua niishitijatajaaja. Naaratej, majaari cua pahuatasano quiniu quiquiaari juhua shanohua pahuataja sequesano. Naacuajitij, cua pahuatasacari Jesucristo rupaa nia niquiara, Pueyaso Sohanu cutaraari nioojiacajinia poonijioquiaari Pueyaso cumaacata cutara. ⁵ Naacuajitij, niaari Jesucristoocua tiuquiquiaari Pueyaso cumaacaa miishacari maninia nioojajinia. Maja cutaraari nia tiunuu quiquiaari saaja pueya niishishanoocua.

Pueyaso Sohuanucuaajaari pa niishitiya Pueyaso

⁶ Naajaa, canapueete Pueyasooocua tiuujia seetanujuanaa cutarani, nojori-ri niishiya canaa pohuatasano Jesucristojiniiri seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiacaari shaajeconutaniya. Nojori niishishanoori najuhuaana quiniutianiya. ⁷ Canaa pohuatasano cutaraari Pueyaso niishishano tarijia, jiya shipinishaacarijijojua. Pueyasoori jiyacari niishiriojoquiaari jyanohua maninia na miiniuria pajaniya, shuquiriaatia pa quiniuria pueyaracaanu pa Jiyaniijia Jesucristo shuriucua. Nio rupaari maja pueya niishishano tari. Pueyasoori maja nio na niishitonu quiquiaari pueya tari. ⁸ Mijiria jiyaniijianucuaari nio niishiyaquiquiaari. Nojori jaara na niishiquiaari tarijia, nojori maara pa jiyaniijia moyaquiquiaari niyacutesanojinia. ¡Na Shipinina motuquiaarijiaari, pueyaracaanu shacantuuca quijia! ⁹ Naa naajiotasano quiyacuajaari tariucuaaanu Pueyaso Rupaajinia:

“Pueyasoori jiyasohuaja casaa jeenucuasano jiitiaa na panijiaa pueyara. Cunoori maja pueya niquishano quenaaja. Majaari cunojiniiji nojori tojishano quenaajajuhuj. Majaari quenaaja pueya niishiriojonu quiquiaari jiyano casante na naata quiniu nojoriria”.

Quiarijiani, canaari saniniuujia pueya niquiarana pohuataani. ¹⁰ Pueyasocuaajaari quiarijia canaa niishitiquiaari canaa jiuujiajinia na miiniu panishano pajaniyara. Canaa niishitiquiaariiri na Sohuanuta. Na Sohuanuuri puetunu Pueyaso niishiriojosanojuanaa noojiajinia niishiya. ¹¹ ¿Cante pueyano niishiriojosano noojiajinia niishiyani? ¿Majate saa na camaru sohuanujua niishiniu? Taaquiririni. Naajuhuj, saaja Pueyaso Sohuanuuri Pueyaso niishiriojosano noojiajinia niishiya. ¹² Naaratej, Pueyasoori na Sohuanu niquitioquiaari pajaniya, pa niishiniuria Pueyaso niishishano. Naacuajitij, majaari pa jitianu saaja tama pa sohuanujuaaja Pueyaso niishishano pa niishiniuria. Paa cutaraari Pueyaso Sohuanuracajaniuhuj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niquitiosano pajaniyarajanaa niishiniu. ¡Jyanohua capora Pueyaso! ¹³ Naacuajitij, canaa pohuatasanoori maja saaja mijiria pueya niishishano. Pueyaso Sohuanujuanaari canaa niishitiojoquiaari Pueyaso rupaa canaa niishiniuria canaa jiuujiajinia. Naacuajitij, canaa naata Pueyaso Sohuanu jitianaa niishitiojonu seetanu Pueyaso rupaajanaa, mariyata taa Pueyaso Sohuanu niishitiojoquiaa canaacuaani.

¹⁴ Mijiria quiniaa pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuuaaja na jiyatequiaa. Seetanujuanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu. ¹⁵ Cante Pueyaso Sohuanu jiitiaani, nojuajaari na naata puetunu niishishanojuanaa saniniuujuniu. Saniniuujia, tamasa pueyari maja na naata Pueyaso Sohuanu jitianaa miishano niishiniu nocuara na rimiaaquenura. ¹⁶ Tariucuaaanu Pueyaso Rupaajinia naa naajiotasaaquiaarijuuhuj:

“¿Cante pa Jiyaniijia jiuujiajinia na niishiriojosano niishiyani, socua na niishitiojonura nojuajani? Shaaqui”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacuajitij, majaari pa niishiniu saa mijiria pueya niishishanojua.

3

Pueyasora poonijionaa pueya cuaara poonijionuuriquia nojori panitioonuta

¹ Cuarta Jesuucua tiuuniaanaa, cua quishacari niaata, majaari cua naata jiyajeneta Pueyaso niishishano cua niishitiojonu quiquiaari nijaniya. Niaari quera juhua Pueyaso Sohuanuuju quiriquiaajaa. Niaari juhua Cristo conaaja quiriquiaajaa, maja Pueyaso tojjijaca seetanujuanaa. Nocuaji, janiyari nia niishitiojoriquiaa jacariani, juhua Pueyaso niishiyashijiaa pueya nia quishacarijia. ² Cua niishitiojosano nijaniyari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuatanu quiquiaari nijaniya. Cuno niishishanoori cumueeca Pueyaso pueyara, naatej, taa shu quiya tariucua puereetuca pueyaracuaani. Juhua naatujoori nia quishacarijia, majaari nia naata na tojinu quiquiaari. Juhuanoujaajari maja nia naata na tojinu quiarijiani. ³ Niaari juhua Pueyaso Sohuanuuju quiyajaa, juhua Pueyaso niishiyashijiaa pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuujutaquiaa. Naa nia quishacaritij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijiaa pueya. ⁴ Niaana sequequiaa: “Canaari Pablo pueyani”. Tamasacanaari sequequiaajuhua: “Canaari Apolo pueyani”. Naacuajitij, puetunu nijaniyajanaari saaja juhua Pueyaso niishiyashijiaa pueya quiyajaa.

⁵ Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaajuhanani. Canaari saa Pueyaso panishano miiquiaajaani, Jesucristo rupaa nia tojtianura. Canaari Jesucristo panishano miiquiaarini taa na sequequiaari canaa miiniuriacuajani. ⁶ Naacuajitij, janiyari Pueyaso rupaa nia pohuataquiaarini, naatej, taa casaa jajau pueyano natojoquiaacuaani. Apoloori saniniuujia socua Pueyaso rupaa nia niishitioquiaari na cumaquiniuria nijaniya, naatej, taa pueyano na natau shiijioya mohuacatacuaani, maninia na maashiniuria. Pueyaso cutaraari na rupaa maashitiquiaari nioojiacajinia, na muerasu nia quiniuria cutara. ⁷ Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojtiniu na rupaa, seetanujuanaa na muerasu pa quiniuria. ⁸ Naacuajitij, paari niishiyani, cante natojonani, cante mohuaca shiijiotanani, canaari mariyata saaja Pueyaso poonitijosanoni. Pueyasocuaajari canaa niqutionutaniya na jiiiasano, nera canaa poonijionuucua. Cante socua poonijioreeni, Pueyasoori socua na jiiiasanojiniji na niqutionutaniya taajecori pueyajiniji. ⁹ Canaari mariyata Pueyasora poonijionaani. Niaari juhua Pueyaso natacuaca nera. Niaari na muerasu cutara, maja canaa muerasu. Naajuhua, Pueyasoori juhua nia tiaa saitia, na quiquiorano. Saitia tiasacari, sairi coteenu cumaatia niojoshiya na morijuria, maja tia matanura. ¹⁰ Pueyaso jaara jiyaroquiaari janiya, janiyari Jesucristo rupaa pohuatanu coteequiaari maninia nijaniyani, Pueyaso muerasu nia quiniuria nia tiushacari cua pohuatasanoocua. Naacuajitij, janiyari juhua Pueyaso tiara shipininiu coteequiaarini. Cua niishitiojosano nijaniyani, cunoori juhua morijiu nujuatejosano quiquiaari. Cua nuhuaji, tamasaari nia niishitiojoriquiaa socua Jesucristo rupaa, juhua Pueyaso tia tucuatasaanura. Nojori cuaara niishuiria maninia, maninia nojori niishitiojonura nijaniya, juhua maninia tiasano nia quiniuria.

¹¹ Majaari socua tamonu rupaa quiniu nocua pa tiuuniuria Pueyaso pueya pa quiniuria. Saaja Jesucristo rupaa cutaraari pa jatanijia Pueyaso pueya pa quiniuria. Janiyacuajari na rupaa pohuataquiaari nijaniyani.

Saa na rupaacuaaja nia tiuushacari, niocua maninia quiri, juhua maninia morijiucuaacua tiasano tia, maja na matanura. ¹²⁻¹³ Cante socua Jesucristo rupaa niishitiojiya nijaniyani, cuno cu meta niishitiojora jiyano hua maninia. Cuaara niyajetaaquiiria cutara, nojuajaari na niishitiojosanojiniji nequesoreesaanutaniya Jesucristo metasacariuhua pocua, pa miishano na saniniujiuniuria juhua manitia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiojosanoori juhua pueyano tiasano. Pueya jaara tiare orota, platatanio, shanohua saitianio, maniiri maja na naata na catijianu. Cante saniniuuja tiaree macacatani, tucurutajuhua, turequenacotanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¹³ pa rootasanote seetanujuanaa maninia? ¹⁴ Tamonu jaara maninia miijia quiquiaari Pueyaso cumaacata, na miishanoori maja najuhua quiniutianiya Pueyasora. Pueyasoori cuno pueyano niquisitionutaniya na jitiisanofiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. ¹⁵ Cante saniniuuja tiaquiaari cateja casaatani, na tiasanoori catenutaniya. Puetunu na jitiisanofiniji juurequenutaniya. Saaja nojuajaari Sesaaca jaariutiasaanutaniya juhua manijiniji jaashano. Naa miishaanutaniyari Jesucristo tiuninaa, canapuete maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijiniji jaashano.

¹⁶ ¹⁶ ¿Majateeri nia niishiniu pueyanaa? Niaacuaajaari Pueyaso quiquio, juhua na tia. Na Sohuanuuri nioojiacajinia quijia. ¹⁷ Tamonu jaara Pueyaso quiquio sesore, Pueyasoori cuno pueyano saniitionutaniya saniniuuja. Puetunu Pueyaso muerasujanaari juhua na tia quiya. Pueyaso quiquio cu meta quiiria tojeterucujanaa maninia, saa neraja, maja raquiriojotasano. Niaacuaajaari na quiquio.

¹⁸ Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijia niquiara. Cuno pueyano cu meta jaataa cuno na niishishano juhua niishiyashijia na quiniuria narta pueya niquiara. Na nuhuaji, cu meta maseera Pueyaso niishitiaja, seetanu niishijia na quiniurijanaa. ¹⁹ Mijiria pueya niishishanoori juhua paateca sequesano Pueyasora. Tariucuaaanu Pueyaso Rupaajinia naa naajiotasanoori quiya: “Pueyasoori mijiria quiniia pueya cushiriquitianiniutianiya, tama nojori niishitiushanoocuaajaaja nojori tiuushacari najuhuanaj”.

²⁰ Naa naajiotasanoori quiyajuhua: “Pueyasocuaajaari mijiria niishijia niishiriojosano niishiya. Naa sequesoyari: ‘Najuhuaanaari cuno pojori niishiriojonuusanu’”.

²¹ Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasaca pueya jiyaramiquiquiaa nia cumaquiniurijuhua, maja saa niquiriyatu niishitiojonaja. Puetunu casaajanaari niaara, maninia nia quiniuria. Naaratej, majaari saa niquiriyatu pueyanocuaaja nia jiaatianu. ²² Pueyasoori canaa jiyaramiquiquiaari canaa cumaquiniuria nijaniya. Naacuaajitij, janiya, Apolo, Pedro, canaari niaara quiyani, maninia canaa miiniuria nijaniya Pueyaso rupaata. Nio jiyari niaara quiyajuhua. Pueyaso shipinishanocuaajaari niaara. Naajuhua, mijiria nia quishacari, cunoori niaara quiya, socua maninia quiijara nia quiniuhua. Taa nia miishiya quiarijiacuajani, taa nia miishaanutaniyani, puetunu cunojanaari niaara, cumueeca Pueyaso muerasu nia quiniuria. Naa shaajesacariiri maninia quiniutianiya niaarajuhua. Pueyasoori nia shaajeteya na shuriucua nia quianura. Naacuaajitij, puetunu casaajanaari

niaara quiya. ²³ Niajaniyari Cristora quiya saniniuuja. Cristoori saniniuuja Pueyasora quiyacujua.

4

Jesucristo jiyaramiquishano poonijiosano

¹ Naaratej pueyanaa, niajaniya cuara niishiiria canaari saaja Jesucristo seyani. Canaari maja cutara pueyani. Pueyasoori canaa jiyatequiaari na rupaa canaa niishitiojonura niajaniya, Pueyaso niishitiojosano canaa. Cunoori tarijia pa niishishoo. ² Cante Pueyaso niishitiaja jiiitaani, cuno cuara quiriia seetanujuanaa Pueyaso miini panishano panijia, na rupaa na pohuatanura puetunu maninijanaa. ³ Niajaniya, tamasaca pueyajuhua jaa sequenu panija taamueca pohuatanate janiyani, quiria, naajaa. Mi-jiria nequesoreenaa jaa cu nequesoreere cu niishitiojonujiniji, naajaa. ¿Janiyate sesa niishitiojoquiaani? Johuaj. Maja cu niishiniu. ⁴ Janiya jaa sesa miiriquiaa cu jiyaniijia cu poonijiosacarini, majaari cu niishiniu. Majaari coojia macuhajenu quijia. Naajaa, maja cu naata tama cu cuaqueyajaaja sequenu janiya cutara maniniani. Saa cu jiyaniijia na naata sequenu taa cu quiquiaarini. ⁵ Naaratej, maja nia rimiaaquenu tamonuucua, Jesucristo tiuquiyacuishacariuhua pocua. Nia sashiri. Pa jiyaniijia jaa tiuquiriohua, puetunu jiyasohua pa miishanojuanaari niishishaanutaniya. Niishishaanutaniyajaariuhua casaara pa miiquiaari puetunu pa miishanojuanaari. Cuno quishacari, pa jiyaniijiaari maninia pohuatanutaniya cante maninia miijia quiriqiaa mijiria na quishacarini.

⁶ Cua tojitiare cuarta Jesuucua tiunuaanaa. Janiyari nareja nia pohu-atariquiaa Apolojinijini, janiyajinijiuhaaj, maninia nia niishiniuria casaa cu niishitiojia niajaniyani. Naacuajitij, nia niishitiojoriquiaanijia saa Pueyaso rupaa nia tojitianura suraatiaja. Majaari socua tamonu niishitio-josano nia tojinu. Naajuhuaaj, maja nia sequenu tamonu niishitiojonajiniji: “Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiriirij, na shuquiritiniucua janiya”. Maja naate pueyanaa. Mariyata nia tojitiare puetunu Pueyaso jiyaramiquis-hano pueyajanaa, seetanujuanaa nojori pohuatasacari Pueyaso rupaa.

⁷ ¿Niajaniyariuhuaaj? ¿Taa nia sequeya tama nia cuaqueyajinijiaajani? ¿Ni-aateeri socua maninia pueya tamasacajiniji, socua niishijiacajuhuaaj? Ma-jaruhua. Naajaa, niaa jaa seetanujuanaa socua niishijiaa quiri tamonu-jiniji, ¿taa jiyanohua niishijiacara nia quiquianuni? ¿Tamajaajatee? ¡Maja tamajaaja! Niaacuajaari Pueyaso niishitiaja jiiitaa. Naaratej, maja nia jiyaniini niaa socua maninia pueya tamasaca pueyajiniji, tama nia niishis-hanotajaaja.

⁸ Naa jiyoteeri jiyaniya niaa tari cutara niishijiacara quirii. Naa jiy-oteeri jiyaniyajuhuaaj, niaa tari jiiitaa puetunu Pueyaso niqutionu panis-hanojuanaa niajaniya. Naajuhuaaj, niaa jiyoteeri jiyaniya Pueyasoori nia jiyateree jiyaniijianucua nia quiniuria. Naa naasucuaari canaa shocota-ree tari. ¿Naatejaaratej? Seetanujuanaa naara nia jiyateriquiani, canaa quiniuria niarta jiyaniijianucujuhuaaj, shuquiriaatia pa quiniuria mariy-ata. ⁹ Janiyari cuarta Jesucristo jiyaramiquishanoocua niishitiojoriqiaani, Pueyaso naasucuaari canaa jiyatequiaari juhua najuhuaa quijiacara, saa puecoosocoriquianojua. Canaa naasucuaari naa quiya mijiriani, puetunu pueyajanaa shootianura canaa, Pueyaso seya shootianura canaajuhuaaj.

¹⁰ Canaa tojitiacacari Cristo, canaa naasucuaari niishiyashijiaa quiya tamasacarani. Niajaniyari saniniuuja niishijiaa quiya tamasacara, Je-sucristo nia rupuesacari. Canaa naasucuaari Pueyaso muerasu sasaca

quiya saajani. Niaari saniniuujia Pueyaso muerasu cumueeca quiya tama nia niquiarajaaja. Pueya jiyoteeri nia shuquiritiaa. Canaari saniniuujia saaja rerequetesano quiyani, pueya soosanojuhuaj. ¹¹ Canaari pueyaraanu miaaajequiaajaani. Canaari jiyamuequiaajaaniuhuj. Canaa cushishano toqenuyojaari jiyareta sesaruqueniyojua. Pueyari canaa miiquiaa taraatiani. Shaaquiiri canaa tia, canaa rucoojonuucua pueyaracaanu. ¹² Canaari samareequiaani pueyaracaanu canaa poonijosacari tama canaa juaashiquitataajaaja. Pueyari canaa sesacaquiaani. Canaari maninia na riucuaquiaa saajani. Canaa jaara naquiya miishaareni, canaari na rejere-taquiaa juhuajaniya saajani. Majaari canaa naminiu quiquiaa saniniuujia nojori. ¹³ Pueya jaara tamasaca niquiara rimiaaquequiaa canaajiniji, canaari nojoritia jecatoonu saniquiaa juucuan. Pueyari canaa jiyatequiaa juhua rucucuarani. Canaari naa quiyajaa nojoririani.

¹⁴ Naa cua naajiosacari niaacuaratej, majaari cua cararonu paniniu nia-janiya. Janiyari saaja nia niishitiojonu paniya cutarani. Janiyari nia rootaa juhua cua muerasuniyojuani. ¹⁵ Naa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia quen. Nia tojtiasacari Jesucristo rupaa cua pohuatasacari niajaniya, niaari Pueyaso muerasura quiquiaari. ¹⁶ Juhua nia que cua quishacari, nia nacasureenijia pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuaj, juhua janiya nia quiniuriajuhuaj.

¹⁷ Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonufaniuhua taa cua niishitiojoquiaacuaa puetunu Pueyaso maa-puejanaa puetunu jiyacajiniajanaacuaani. Naa nia rootanutaniyari nia niishiniuhara maninia cua niishitiojosano niajaniya tarijia. Nojuajaari nia pohuatanutaniyajuhuaj taa quijia cua quiyani cua tojishacari pa Jiyaniijia Jesucristo, naa maninia nia miiniuriajuhuaj.

¹⁸ Noojiaqueya niajaniyajiniinooori shuquiriaatia quiya, juhua jiyani-ijianucua nojori jiyatesacari tama na cuaqueyajaaja. Nojoriiri naa miriiriqui nojori jiyaniushacari maja naasucuaari cua tacatenu qiniutianiuhua, cua niqiniuhuara niajaniya socua. ¹⁹ Janiyacuaajaari niaacua na-querelijia tarini, cua Jiyaniijia Jesucristo jaara paniri niaacua cua quia-nura. Cua tiuquishacari niaacua, janiyari cuno niishijiaa pueya sanini-ujiniutianiyani, cua niishiniuria casaate nojorini, maja naa sacuaratia nojori qiniuriatej. ¿Cumaacarate nojori, saaja pocuajaca soj? ²⁰ ¿Canteeri seetanujuanaa Pueyaso pueyanoni? ¿Saaja pocuajatee? ¡Maja pocuaja! Cante Pueyaso Sohuanu jittiaa na cumaquiriquiano Jesucristo na tojiniuri-ani, cunoori seetanujuanaa Pueyaso pueyano cutara. ²¹ Nia niishiriojore, cuarta Jesuucua tiuuniaanaa. ¿Taa nia paniya cua miiniuria niajaniya cua quiasacari niaacuani? ¿Niaateeri paniya cua saniitonura niajaniya, jacaria cua niishitiojonura niajaniya cua paniniutia soj? ¿Taa nia paniyani?

5

Na que niquiocuata quijiajiniji pohuatasano

¹ Niajaniyajiniji pohuatasaarucuaa taraatianijia. Tamonu niajaniya-jinijionaari jijanohua sesa miya. ¡Na que niquiocuata quiyaquinaari! ¡Pueyanaa, cuno miishanoori socua jijanohua cararaatia Pueyaso niishiyashijiaa miishanojiniji! Pueyaso niishiyashijiaa pueyani, majaari quenaaja nojori naa sesa miiniu niishiniutij. ² Naa cuno pueyano miishacari sesa nia tajiniatej, ¿niaateeri saaja juhuajaniya cuniqui na jittiaaruhua?

¡Niaa cuaara na tacaatiaara! Cuno sesa miijia cuaara taanuusaaria nia tajiniji, maja na cojiniuria socua niajaninya nia rerejosacari. ³ Cua tojiri taa pa miiniutianiyani. Janiyari maja cua quiniu niaata. Naajaa, coojaari niaata quiya cua niishiriojosacari niajaninya. Naacuajitij, janiyari juhua nia tajinia quiyani. Naacuajitij, janiyari tari cuno sesa miijia saniniujiuriini.

⁴⁻⁵ Naaratej pueyanaa, cua tojitiare. Nia rerejore cuno sesa miijia nia tarinitianura Sesaacara. Coojaari niaata quiniutianinya naa nia miishacari pa Jiyaniijia Jesucristo cumaquishacari niajaninya. Naacuajitij, Sesaacaari naquiya na miiniutianinya; na cusojuanura naasucua, maja soj. Naajaa, na cuaqueyari naa naquiya miishaanutaniya noojia na tacatonuhuara, Pueyaso tojijiara na quiniuhuara. Naacuajitij, pa Jiyaniijia Jesucristo muestasacarihuua pocua, nojuajaari samiitianishaanutaniuhuajuhua puetunu Pueyaso muerasutajanaa.

⁶ Cuarta Jesuucua tiunuaanaa, ¿taate nia naata shuquiriaatia quiniu tamaajaani, naa sesa miijia quishacari nia tajiniatej? ¿Majateeri nia niishiniu? ¡Niaa jaara cojiya sesa miijia saniniujiushoojua, socua pueyari mariyata naa sesa miiniutianiyaquij! Sesa miijia niishishanoori tamasaacaacia paaquenu-taniya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashojua miniquiootasanojuanaari. Naajuhua, sesa miijia jaara sequeyaquishaare na miishano, sesa na miishanoori socua paaquenu-taniya.

⁷ Tarijia, Pueyasoori pa supuetanaa Judiocuaca rootaquiaari puetunu na pan poretejjanaa nojori jatanura puetunu marijarajanaa. Nojori-iri naa rootasaquiaari saaja poreetesoo pan nojori miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitiojoquiaari miriquitij, nojori cartenura puetunu sesa nojori miitushanojuanaa, nojori rupuenura Pueyaso. Naajuhua quiarijiani, nia taanuure cuno sesa miijia nia tajiniji, seetanujanaa sesa miyashijiaa nia quiniuria Pueyaso niquiara. Pueyaso jiyanooniuria pajaniya, Cristoori tari mosaquiaari pocuara, taa borregohua puecoosaaquiaari Pascua juucuaani. Tariucuacaanuuri naa miishano quijia, Pueyaso jiyanooni-uria pa supuetanaa Judiocuaca, sesa nojori miishanojiniji. ⁸ Naa Pueyaso pa cojishacari quiarijiatej, tojtaarucujanaa sesa miyashijiaa pa quirij, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maninijanaa, maja sesa miijiacata cojitishano. Seetanujanaa maninia pa quiri puetunu pajaniyajanaa.

⁹ Pueyanaa, janiyari tari niaacuara naajiocanuni cua sequenura niajaninya, maja nia cojiniuria sesoriquia pueya, cuno pojori canapuate na camishoo maaji numuetucuquiaani. ¹⁰ Naa cua sequesacari niajaniyatej, majaari cua sequenu nia rupueyaquiniuria puetunu sesoriquia pueya sequejanaa mijiria. Saa nia shaajesacarijia cutara nia naata puetunu sesoriquia pueyacuajijianaa rupatenu. Nio jiyaca, pueyari naa sesa miijiaa quiya: nojoriiri sesa miijiaa tama na niishiriojosanotajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuquiaa. Nojoriiri tama na panishanoocujaja jiaatiaquiaa puera, maja Pueyasoo. ¹¹ Cua tojitiare casaa cua sequecanu tari niajaniyani. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji numuetucuquiaa. Naajuhua, majaari nia cojiniu nooj cante casamiriacara quiniucua jiaatiaquiaani. Majaari nia cojiniu nooj cante tama na panishanoocujaja jiaatiaquiaajaanihuaj, maja Pueyasoo. Majaari nia cojiniu narta pueya sesacaja. Majaari nia cojiniu mashaasequejojua. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaari tari

naa nia sequecanuni maja jiyano pueyata nia cojitianura. Majaari jiyano pueyanota nia miaquenu quenaaja. ¹²⁻¹³ Naa cua sequesacari niajanijatej, majaari cua sequenu quiriquiaa tamasaca pueyajiniji, canapuetcuaja maja Pueyaso muerasuni. ¿Paate nojori nequesoreenaani? Maja. Pueyasocuaari nojori saniniujiuniatianiya. Pajaniya cumaati parta Pueyaso pueya saniniujuquiaani, nojori jaara sesa miiriquia. Naaratej, nia jatare cuno sesa miijia nia tajiniji, noo cante sacuaraatia na que niqiuocuata quiyacuajani.

6

Sesa miijia cuara nequesoreesaaria narta Pueyaso muerasu niqiuara

¹ ¿Seetanutejanaa naa niajanijajiniji pueya pohuatasanojuhuaj? Niarta Jesuucua tiunia jaara sesa miiri niajaninya, niaanaari Pueyaso niishiyashijiaca nequesoreena tonujuquiaa nocuara. ¿Casaara tamajaaja niarta Pueyaso muerasu niqiuara nia jecatoyaquiquiaani? ² ¿Niaate niishiyaquiya, Pueyaso muerasuuri Pueyaso niishiyashijiaca nequesoreeriquianocuaaja, Pueyaso saniniujiushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiarijia niarta Pueyaso muerasu nequesoreenu tamajaaja, nojori jaara sesa miiri shiitaniyojua? ³ ¿Majate nia niishiniujiuhuaaj, paari Pueyaso seya nequesoreeriquianojuhuaaj? Pueyaso jaara pa nequesoreetenutaniya na seya na tojiyashijiaca, ¿majate quiarijia nia naata maninia nequesoreenu niarta Pueyaso muerasu mijiria? ⁴ Naa jaara nia tapueyocuaacuara tonujunu paniya sesa na miishacari, ¿niaateeri Pueyaso ruuretajaca tonujunutaniya nojoriicuara? ¡Maja maninia naatej! Cuno pojoriiri maja Pueyaso muerasu jitianaa. ⁵ Naa nia sequeyanijia cua cararonura quenaaja niajaninya, cua niishiriojotenura niajanijajuhuaaj. ¿Seetanujuanaa tojetaarucuaajanaa shaaquiti niishijia niajanijajinijinio, cante na naata nia tonujutoosacari nequesoreenu niajaninya maniniani? ¡Quiya jiyotucuaajaari! ⁶ Niajanijanaari tama niarta Jesuucua tiuniaacuaraajaaja tonujutoojoquiaa Pueyaso niishiyashijiaca nequesoreena niqiuara. Naa nia miishacaritij, iniaari sesa miiquiaa pueyana!

⁷ Niaari jiyanohua jiyajeneya nia juayonuujuatasacari. Naa jaara sesa miishaare, niaa cuara jiyanoootoora saniniuujiia, nia casami jaara nohuasesaarejuhuaj. ⁸ Niajanijarijijataj, iniaari saaja sesa miiquiaacuajua! ¡Niaanaari niarta Pueyaso muerasu miiquiaa sesa! Naaanaari tama niarta Jesuucua tiuniaajaaja nohuasejoquiaa, sesa miijia nia quiniucua.

⁹⁻¹⁰ Maja tama nia cuaqueyajaaja nia sapojonu, pueyanaa. ¿Niaateeri niishiyaquiya Pueyasoori maja na rijionu quiniutianiya sesa miijia nia shuriucua nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo pojori canapuate na camishoo maajipohua numuetucujuquiaani, naajuhuaaj, noo pojori, canapuate tama na panishanoocuaajaaja jiaatiaquiaani, maja Pueyasocua. Quejoosaanutaniyajaariuhua noo pojori, canapuate narta pueyano niqiuocua numuetucujujuaani, naajuhuaaj, canapuate maajishuriutia quijia juhua maajitiani. Nohuasenujuacaari quejoosaanutaniyajuhuaaj, noo pojoriujuhuaj canapuate pueyaracaanu socia casami paniquiaa tama nerajaajani. Mashaasequenujuacaari puetunu quejoosaanutaniyajuhuaaj, tamasaca sesacajacanio, tamasacaacuara rimiaaquejajuhuaaj. Naa quejoosaanutaniyajaariuhua noo pojori, canapuate nohuasejoquiaa na sapojonutani. Puetunu jiyano pueyajanaari maja Pueyaso muerasu na quiniu quiniutianiya, Pueyasota nojori quiniuria shuquiriaatia pueyaracaanu. ¹¹ Noojiaqueya niajanijajinijioori jiyano sesa miijia pueya quiquiaari tarijia. Na

nuhuaji, sesa nia miishanoori jeequesaaquiaari Jesucristoocua nia tiu-ushacari. Pueyaso Sohuanuuri nioojiajinia tiuquiquiaari, Pueyaso na tojiti-
niuria niajaniya. Naacujitij, nia rupuesacari Jesucristo, Pueyasoori nia
jiyanooquiaari. Nia sequereeri: “Niaari saa maniniaja quiya cua niquiara”.

Pa cuaqueya cuaara quiria saa Pueyasoraja

¹² Queraatia pueyari sequequiaa: “Pueyaso jiyanooshacari pajaniya, paari tarinitiasaaree puetunu pa miiniu panishanojuanaa pa miiniuriani”. Seetanujuanaa naacuj. Saniniuujia, majaari puetunu pa miiniu panishanojuanaa maninia na quiniu pajaniyara. Seetanujuanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyatureeri. Naa pa jiyartuusacari, na nuhuaji majaari pa naata pa jiiitishano casaa pa tarinitianu. ¹³ Pueyari sequequiaa: “Pueyasoori miaquesano shipiniquiaari pa seecora. Pa seeco shipiniquiaari sumatuucujani saniniuuri, shuquiriaatia pa quiniuria”. Seetanujuanaari cuno sequesano. Naajaa, majaari nio pa niyajetanu, na nuhuaji, Pueyasoori na shaajanutaniya puetunujuanaa. ¿Pa cuaqueyarihuaj? ¿Pueyasoteeri pa cuaqueya shipiniquiaari pa numuetucunura pa camishoo maajipohua? ¡Maja! Pa cuaqueya cutaraari shipinishaaquiaari pa jiyaniijia, na panishano pa miiniuria. Naajuhuj, pa jiyaniijiaari pa cuaqueyara quiyacujua, na cumaquiniuria pajaniya, maninia pa quiniuria pueyaracaanu. ¹⁴ Naajuhuj, taa Pueyaso samitianiquiaaricuaa pa jiyaniijia Jesu na cuaqueyatani, nojuajaari macujiniji naa pa samitianiniutianihua na cumaacatajuhuaj.

¹⁵ ¿Niaateeri niishiyaquiyajuhuj, Pueyaso Sohuanu quiniucua poojiajinia, pa cuaqueyari seetanujuanaa pa jiyaniijia cuaqueya quiya? Naaratej, Jesucristo cuaqueya pa quishacari, maja cumaati pa curuushojonu pa cuaqueya, maaji paanatu pa numuetucunuta. ¡Cunoori jiyanoocua sesa!

¹⁶ Pueyasocujaaari coteenujuanaa na shipinishano pueyano sequequiaari: “Quia camishacari maaji, niaari niquiriyatu cuaqueyara quiniutianiya”. ¿Niaateeri nio niishiyaquiya, cante paanatu numuetucureeni, Pueyasora, nojoriiri niquiriyatu cuaqueyaracara quiqui? ¹⁷ Naajuhuj, paa jaara Jesucristo rupuereni, pa sohuanuuri rupuetooore na Sohuanuta, niquiriyatu sohuanuraca pa quiniuria Jesucristota.

¹⁸ Naaratej, nioojia nia tacatoree maja nia numuetucunura tamasaca, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesojua. Saniniuujia, cante na camishoo maajipohua numuetucujua, nojuaja cutaraari tama na cuaqueyajaaja sesoya.

¹⁹⁻²⁰ ¿Majateeri nia niishiniu, nia cuaqueyari Pueyaso Sohuanu quiquio? Pueyasoori na Sohuanu jiyaroquiaari poojiajinia na quiniuria. Pueyasoori nia masequiaari tama nerajaaja nia quiniuria. ¡Jiyanoocua naquiya na miiniutia nia masereeri Neyanu na motesacari pocuara! Naacujitij, Pueyasoori quiariria pa camarnu quiya. Naaratej, quiariria maja pa quiniu tama pa cuaqueya camarujuaaja. Naaratej, pa shuquiririti pa Pueyaso pa cuaqueyata, pa sohuanutajuhuj. Nojuacujaaari pa cuaqueya camaru, pa sohuanu camarujuhuj.

7

Pablo rootasano pa caminiuria, camiojua pa quiniuria soj

¹ Quiarijiani pueyanaa, cucuara nia naajiosanojinia nia nequesotasano ricuareeraj. Cante niquiriyatu quiniu pania tamajaajani, cuno pueyanoori maninia miya, maaji na camiyacquishacari. ² Saniniuujia, quiarijiani,

pueyari puera sesa miiniu niishiquiaa. Nocuaji pueya cuaara camiriia. Maa-jipohua cuaara camiriiajuhuj. ³ Pueyano jaara camiri, necocua cuaara na cuaqueya jamueyaquiiria neyaca numuetucunu panishacari. Naajuhuj, neyaca cuaara na cuaqueya jamueyaquiiria necocua panishacari na numuetucusaanura. ⁴ Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuj, neyacaari maja tama na cuaqueya camarujuaaja na quiniujuhuj. Necocuaari neyaca cuaqueya camaru cutara. ⁵ Naacuajiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu nijaniya. Naajuhua nijaniya canuunaa, maja nia niquiocua nia tarijonu na panishacari na numuetucusaanura. Saniniuuja, jiyanohua Pueyaso nia secojonu panishacari, jiyacari cutara nia naata tarinitianu numuetucunu rupaquijia, Pueyaso nia secojonura, nia jaara mariyata naa miiniu paniri. Na nuhuaji cutara, nia numuetucurohua nia niquiocua, Sesaaca mariqui sesa nia miitiriiri tamonu maaji nia paniniuria, nia camueenujusacari puera. ⁶ Nioori quiarijia maja niaara Pueyaso rootasano janiya. Janiyari nareja naa sequeya nijaniyani socua panaatia nia quiniuria. ⁷ Naaratej, nia jiyateriquiani taa cua quiyacuaani, niquiocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso paniyacuajani. Camishoo, camishano soj, naajaa. Taa pa quiyani, paari shuquiri-attia quiquiaa Pueyaso cumaquishacari pajaniyani.

⁸ Camiyojua pueyanaa, mashiquiopuena, cua tojitiare: niaa jaara juhua-janiya quiya taa camiyojua cua quiyacuaani, niaari maninia quiniutianiya. ⁹ Cante saniniuuja maja na naata tama na cuaqueya panishanojuaaja re-jetenu maninia tamajaajani, cuno cuaara camiriia. Socua maninia cutaraari nia caminiuria, maja maajicua nia jiaatianura pueyaracaanu. ¹⁰ Camiyono pueyanaa, nio nia tojitiare cutara. Nioori pa jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. ¹¹ Cante neyaca carteyani, nojori cuaara jiyanootoora, na rupuetoonuhua. Jaara maja na naata jiyanootoonu, cuaara quiiria tama-jaaja pueyaracaanu. Cuaara camiyaquiiria socua. Canuunaa, pa jiyaniijia Jesucristo sequesanoori mariyata niaarajuhuj. Naa sequeyari: “Maja nia cartenu nia niquiocua”.

¹² Quiarijiani, socua nia niishitiojoreeraj. Nioori tama cua niishitiojosano-juaaja, maja niaara Jesucristo rootasano. Pueyano jaara Pueyaso tojiyashijia niquiocuaraca quiri, cuaara jiitiaara maninianoj. Quia niquiocua jaara quiata quiniu paniyajaa, majaari na cartenu. ¹³ Naajuhuj, maaji jaara Pueyaso tojiyashijia niyacaraca quiri, cuaara maninia jiitiaara neyaca. Majaari na cartenu, quia niyaca jaara quiata quiniu panirijia. ¹⁴ Cuarta Pueyaso muerasunaa, Pueyaso tojiyashijia pueya nia jiyanoori, nojori jaara Jesuucua tiuuniaata caminio quiya. Nojoriiri seetanujuanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, nijaniya cuaara neyaca jiyanooria necocua quiniucua niarta Pueyaso pueyano. Nareja nia niquirinioj, niaata na rerejonu panishacari. Naajuhuj, nia jiyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacaritij, necocua cuaara nareja niquishaariajuhuj, na rerejosacari niaata. Naajuhuj, maja rimiajata nia niquiniu necohua. Necohuari maniniacuaja Pueyasora, maja juhua tama maaji muetusanojuaaja. ¹⁵⁻¹⁶ Pueyaso muerasunaa, canuu, maajipohuanu, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari nijaniya, niaari juhua camishoo quirohua. Majaari socua nia tojinu coteenu nia niyaca, co-tenu nia niquiocuanio. ¡Maja cutaraari nia cartenuoj! Nia niishirio-

jore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhua, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quiajaniya. Naatej, Pueyasoori paniquiaa juhuajaniya pa quiniuria, camishano, cartesano soj.

¹⁷ Cuarta Jesuucua tiuuniaanaa, taa nia quiquiaari Pueyaso sequesacari niajaniya na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiaacuaja puetunu Pueyasó pueya maapuerajanaani. Taa nia quiquiaarini, naajuhua casaate quia poonijosano quiquiaarini, cunocuaajaari Pueyaso panishano quiquiaari niaara.

¹⁸ Naacuaajitij, cante tarijia na cararaatiuuquia co miatesano quiquiaari Judio pueyano na quiniuriani, naajaa, cunó pueyano cuaara naa quiri pueyaracaanutej, Jesucristoocua na tiushacari quiarijia. Naajuhua, cante miatesoo quiquiaari Pueyaso sequesacari na pueyano na quiniuriani, cunó cuaara quiri naajuhua.

¹⁹ Cante Judio pueyano na quiniuria miatesaaquiarini, naajaa. Cante miatesoo quiyani, naajaa. Saaja maninia cutaraari pa tojitianura Pueyaso niishitijosano pajaniya. ²⁰ Naarate nia sequeyanijia, nia quiri taa nia quiquiaaricuajani shushajanaa Pueyaso sequesacari na muerasu nia quiniuria.

²¹ Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishiriojonu nocua. Juhuajaniya nia poonijiore saaja. Saniniuujia, jaara nia naata quiri quia cartesano pueyano nia camarnujiniji, maniniacuajaari. ²² Cante poonitijiotasusano pueyano quiquiaari Pueyaso sequesacari niajaniya na muerasu nia quiniuriani, naajaa, niaari seetanujanaa cartesano pueya quiya pa Jiyaniijara. Naajuhua, cante camarnuujia quijia quiquiaari Pueyaso sequeyaquishacarijia na muerasu nia quiniuriani, quiarijiani, niaari pa Jiyaniijia poonitijosano pueya quiya cutara.

²³ Pueyasoori jiyanohua naquiya miiquiaari na cusojuasacari Neyanuniyojua, na masenura niajaniya, na muerasu nia quiniuria. Nia masequiaariri tama nerajaja nia quiniuria. Naaratej, majaari juhua tamónu camarnu poonitijosano nia quiniu socua. Quiarijia saa Pueyasoraja nia quiri maninia. ²⁴ Naaratej cuarta Pueyaso muerasunaa, taa nia quiquiaari tarijia Pueyaso muerasu nia quiyaquishacarijiani, naa nia quiri quiarijia Pueyaso cumaquishacari pueyaracaanu niajaniya.

²⁵ Quiarijia nia sequereera cua niishiriojosano, taa camishoo pueya miiniutianiyani. Nioori maja pa Jiyaniijia rootasano janiya. Majaari na sequenu quiquiaari cunojiniji. Naajaa, pa Jiyaniijiaari cucua tiuquiaa na sequenu panishano cua caminiujuniuria niajaniya, na Sohuanu cumaquishacari janiya. ²⁶ Naacuaajitij, naa nia sequeyanijia: niaacuajaari niishiya, quiarijiani, jiyanohua puereeta quishacari. Nocuai niajaniya cuaara quiri taa nia quiyacuajani. ²⁷ Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaaniu paniniu. ²⁸ Naajaa, mashaja jaara camiri, cunoori maja sesa. Naajuhua, niyacoo jaara camiri, majaari sesa na miishano. Saniniuujia, camishano pueyari socua taraatua miishaanutaniya camishoo pueyajiniji, puereeta quishacari quiniucua mijiria quiarijiani. Majaari cua paniniu taraatia nia miishaanura. Nocuai janiyari naa nia niishitiojiyani puera sesa quishacari quiniucua quiarijiani.

²⁹ Cuarta Pueyaso muerasunaa, niajaniya cuaara niishiiria nio jiyari puequenutaniya. Majaari mijiria pa quiniu quiniutianiya pueyaracaanu.

¿Taariquitijia mijiria pa tarishiniutianiya socuatejaj? Maja pa niishiniu. Maruhua puera pa tarishiniu quiniutianiya. Naaratej mijiria pa quishacarijia, jiyanohua pa tojitiare pa Jiyaniijia. Naacuajitij, cante niquiocuaraca quiyani, majaari nocua nia niishiriojonu puera. ³⁰ Cante na shaajasanoocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiorejuhuaj. Cante casami niquitiojotua quiquiaani, naajaa, maja casamiicua nia niishiriojonu puera. Socua nia niishiriojore cutara Pueyasooocua. ³¹ Canapute niishijiacani, queraatia casami na masejonura mijiriani, nojori cuaara niishiiria maja casami panijiaa nojori quiniuria puera. Nio jiyari tari puequeya puetunu pa niquishano casaatajanaa. Naaratej, maja casamiicua nia niishiriojonu. Saaja Pueyaso nia tojiri cutara.

³² Janiyari paniyani mijiria casaacua tacayashijia nia quiniuria. Pueyaso nia tojitiare juhuajaniya cutara. Camishoo pueyano na naata saaja pa Jiyaniijia nia niishiriojonu na tojiniuria maninia, pa Jiyaniijia na shuquiritiniuria. ³³ Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria.

³⁴ Naacuajitij, noojia niquijioteyari. Naajuhua, camishoo maajiri pa Jiyaniijia nia niishiriojoquiaa maninia, tama na cuaqueya na cojuasacarijia Jesucristora, nera na poonijionura puetunu noojiatajanaa. Saniniuuja, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacuajitij, majaari puera jeya na quiniu Pueyaso panishano na miiniuria.

³⁵ Janiyari naa nia sequeyani socua shuquiriaatia nia quiniuria. Maja cua taajetenu paniniu niajaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniijia nia tojitianura maninia. Naa jaara cua niishitiojosano tojiri, nia naata pa Jiyaniijia tojiniu maninia. Naacuajitij, niaari nioojia niquijioteyaquiniutianiya.

³⁶ Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiyaquiniuria”, cuno pueyano cuaara miiria taa na miiniu paniyacujani. Camishocoriquiano maaraja, cuaara camitioora. Quia niyatu jaara camiri, majaari sesa. ³⁷ Cante saniniuuja maja noojia niquijioteyaquiya na niishiriojosacari neyatuu-cuani, cunoori maninia miiniutianiya na camitiyaquishacari, jaara na naata neyatu cojuanu maninia. ³⁸ Naacuajitij, cante neyatu camitiriini, maninia miyari. Cante neyatu camitiyaquiyaanihuaj, nojuajaari socua maninia miya. Naacuajitij, cuno neyatuuri na naata Pueyaso panishano miiniu socua, camishoo na quishacari.

³⁹ Camishano maaji cuaara carteyaquiiria neyaca, saminio neyaca quishacarijia. Pueyasoori naa sequequiaaritij. Neyaca jaara cusoyare, na mashiquioori maja tari na quiniu juhua camishano. Na panishacari, cuaara camiiria cana na caminiu paniyacujani. Jaara caminiu paniri, cuaara camiiria Pueyasooocua tiuuja pueyanota cutara. ⁴⁰ Naajaa, mashiquio jaara camiyaquiriohua, socua shuquiriaatia quiniutianiyari, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequetere nio.

8

¿Maniate cuno shu pa miaquenura, seya jaara puecoosano quiri nareja shipinishano casaacuara, juhua Pueyasooocarajanaa?

¹ Cuarta Jesucua tiunnaa pueyanaa, janiya quiarjia nia niishitiojonutaniyani teyano pa miaquesanoinijiti puereshiyani. Pueyaso niishiyashijiaacaari na miaquesocoriquiano seya puecoonu niishijia shipinishano casaacuaa juhua Pueyasoocua. Pueyari nequesotaquiaa, ¿maniate cuno shu, Pueyaso muerasu miaquesocoriquianojuhuaj, cuno seru jaara taucuaa jyanishano cumaacaraca quijiaacuara mosano quiri? ¡Janiya cutaraari maja cua miaquenunoj! Nia pohuatareera casaara cua miaqueyaquiquiaanoj. Cua tojtiaere. Paacuaajaari niishiyani cuno shipinishano casaari nareja pueyano shipinishano najuhuanaj, nojori jyanitiushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuaa puecoosano miaqueriquiani. Naa niishijiaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanooqua. Cante narta pueya paniquiaani, cunoori narta pueyacu niishiriojoquiaa cutara, nojori jiuujia na cumaquiniuria maninia. Jiyano pueyanoori cumueeca Pueyaso pueyano quiniutianiya. ² Naacuajitij, cante tama na cuaqueyajaaja jiyaniya niishijiani, cunoori juhuanajuaja maja niishijia seetanujuanaa. ³ Cante Pueyaso panijia saniniunijia, cunoori narta Pueyaso muerasuucua niishiriojoquiaa. Cunoori Pueyaso panishano pueyano cutara. Seetanujuanaa niishijia cutaraari cuno.

⁴ Juhuanajuajaari maja cua riucuanu nia niishiniu panishano: “¿Mani-atenaari cuno shu pa miaquenu, seru jaara pueya jyanishano pueyasooocuaa mosano quiri?” ¿Casaatejaara cuno nojori jyanishano pueyasoni? Paacuaajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jyanishano pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuaaanu Quijia. Maja socua tamonu quiniu juhua nojuaja. ⁵ Tamasaca pueyari jiyaniya queraatia cumaacaraca quijiaacaari quiya juhua Pueyaso, jiya cajiniocua, mijiriano. Nojoriiri na jiyatequiaa nojori cojuanara, nojori cumaquiriquianojuhuaj. ⁶ Naajaa, paari niishiyani saa niquiriyatu Pueyasojuaari quiya. Nojuacuajaari pa Que Pueyaso, pa shipininia. Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jiyaniijaari quiyajuhuj. Cunoori pa Jiyaniija Jesucristo. Na Queeri na shipinitiquiaari puetunu na shipinishanojuanaa. Pajaniyajuhuj, paari rishiyani saaja na cumaquishacari pajaniya.

⁷ Noojiaqueya Pueyaso pueyari saniniuujia jiyaniyajaa taucuaa shipinijosano casaari seetanujuanaa cumaacaraca quijiaa juhua Pueyasojuhuaj. Nojoriiri najuhuaana sesa niishiriojonuujuaca. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarintiano juhuanajuaja. Naacuajitij, nojori jaara shu miaquere teyanote mosaaree nojori jyanishano cumaacaraca quijiaacuarani, nojori miaquenu nuhuaji, noojia niquijioteyari. Nojoriiri tama sequeyajaaja: “¡Janiya naasucuaari sesa miirii Pueyaso niquiarani!” Naacuajitij, nojoriiri noojia macuhajetequiaa. ⁸ Pueyanaa, paacuaajaari niishiyani, casaa pa miaquequiaani, naajaa. Pa miaquesanoori maja na naata Pueyaso jyanootini pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhuj, cante na miaquequiaani, majaari socua sesa pueyanora na quiniuujuhuj. ⁹⁻¹¹ Niaacuajaari jyanohua tiuquijiaa Pueyasooocua. Naacuajitij, niaa naasucuaari na naata juhujaniya tiuquiniu cuno shu miaquenura nojori jyanishano pueyaso quiquiojinia. Niaacuajaari niishiya, cuno, nojori sequesano pueyasoni, majaari seetanujuanaa Pueyaso cuno. Naacuaji-

tij, nia naata nocuara mosano seru miaquenu juhuajaniya. Saniniuujia, nia cajishacari cuno miaquenujuajinia, niarta Pueyaso pueyanoori nia niquiniutianiya na pueresano shu miaquenyano. Na niquishacari nianianiya, tamajaaja sequenutaniyari: “¡Jaj! ¡Nojoriqui cuno shu miaquenuyacuaa! Saniriirijataj”. Naa sequejatej, nojuajaari jiyaniyajaa cuno miaguesanoori mosaaree seetanujuanaa tamonu cumaacaraca quijiaacuara. Naacuajitij, na sanishacariuhua cuno shu miaquenu, tamajaaja noojia macuhuanutaniyari. Naacuajitij, niaari niarta Pueyaso pueyano sesoya, na niqiara nia miaguesacari cuno shu. Na niquiniuucua nijaniya cuno shu miaquenyano, nojuajaari cunora na miaguereehujaj. Saniniuujia, nojuajaari juhuanojuaja maja jyanohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojiniji na jiyanooshaanura. Nijaniyari saniniuujia quiarijia na sesorohuacuhua nia niishishanota. Nocuaji janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu miagerohuariuhua, na rupesacari nijaniya. ¹² Nia miaguesacari, niaari na pueresano shu na puaqueteya. Naacuajitij, noojiaari macuhuanutaniya. Naacuajitij, niaari sesa miya niarta Pueyaso pueyano. Niaari pa Jiyaniijia Cristo miya sesajuhuj, naa nia sesosacari tama na pueyanouajaaja. ¹³ ¿Taa nia sequeyani pueyanaa? ¿Maninate shu pa miaquenu, seya jaara taucuaca jyanishano pueyasocuara pucoosano quiri? Janiya cutaraari maja socua cuno shu cuna miaguenu quiniutianiya, cuarta Pueyaso pueyano mariqui sesereeri cuna miishanojiniji. Saaja maninia miijiacara nia jiyateriquiani, taa cuna miiquiaa saaja maniacuaani.

9

Taa quijia Pablo quiquiaarini, Jesucristo jiyaramiquishano na quishacari

¹ Janiya jaara cuno shu miaquenu panyani, cuna naata miaquenu cuna panishano. Naajuhuj cuna naata puetunu cuna panishanojuanaa miiniu taa cuna Jiyaniijia sequequiaari na jiyaramiquishano pueyacujani. Janiyacuajaari Jesucristo jiyaramiquishanojaaniuhuj. Seetanujuanaa cuna namijiata Jesucristo niquiquiaarinijia. Nojuajaari cuna jiyatequiaari na jiyaramiquishano cuna quiniuria. Naajuhuj, cuna pohuatasacari Jesucristojiniji nia niqiara, niaari na muerasura quiquiaari cuna pohuatasanoocua nia tiuushacari. Naacuajitij niishishiyari janiyari Jesucristo jiyaramiquishanojaaniuhuj. ² Tamasaca jaara jiyaniya janiya maja Jesucristo jiyaramiquishanoni, naajaa. Niacuajaari na niishiya. Niacuajaari Jesucristo tiuquiquiaari nia tojishacari cuna pohuatasano nojuajiniji. Naacuajitij, niacuajaari niishiya janiyari Jesucristo jiyaramiquishanoni. Na jiyaramiquishano cuna quiniucua, cuna naata miinujujuhuaj taa cuarta Jesu jiyaramiquishano pueya miiquiaacuani.

³ Tamonu jaara cuna nequesoreere taa cuna miiquiaani, janiyari saaja naa na riucuquiaani: ⁴ “Pueyasoori sequequiaari, na jiyaramiquishano pueya cuara niquitiosaaria na miaguesocoriquiano”. Naaratej, canaa jaara naa miiniu paniriquiani, canaa maara nia sequereni canaa nia niquitijonura canaa panishano. Naajaa, majaari canaa masenu quiquiaa canaa panishano nijaniyajiniji, janiya, Bernabeenio. ⁵ Naajuhuj, canaa jaara niquiocuaraca quiriqiani, canaa maara canaa niquiocua rupojoriquia canaacuani, taa cuarta Jesucristo jiyaramiquishano pueya miiquiaacuani. Pa Jiyaniijia Jesu tapueyocuaari naa miiquiaajuhuj. Pedrojuanaari necocuata rucanejoquiaajuhuj, Jesucristo rupaa na poojatasacari. Naajaa, majaari naa canaa miiniu quiquiaaquij. ⁶ Jesucristoori sequequiaar-
ijuhuj: “Cua jiyaramiquishano pueya cuara niquitiosaaria cumaneeca,

na panishano nojori masetajara”. ¿Niaateeri jiyaniya cuno sequesano maja quiria, maja Bernabeerajuhua? ¿Cunocuaajaari naa sequesaaquiaari canaara-juhua! Naaratej, canaa jaara naa paniriquiani, canaa maara canaa panishano masere nijaniyajinijini, canaa niishitiojonuucua nijaniya. Naajaa, canaari tama canaa juaashiquiatajaaja poonijioquiaani, canaa panishano canaa masetajara.

7 ¿Soldadoteeri tamonu poonijosano jitiataja, na miaquesano na masetajara? ¡Maja! Soldadohua jiyaniijaari na niqutiojua puetunu na miaquesanojuanaa. ¿Pueyanoteeri na cuhuariquia nataja najuhuanaj? ¡Maja! Na nuhuaji na natau mianutaniyari na poonijosanojiniji. ¿Majateeri seru juunu camaru ratunu na seru quitiaaca, jaara na paniri? ¡Taaquiriirinij! Na ratuyacuaaquinatejaj. ¿Maatucua casaara najuhuaana seesaareerini? ¿Canaarijiatej? Canaa jaara naa paniriquiani, canaa naata nia masenu canaa panishano nijaniyajiniji. Naajaa, majaari canaa mashiniquijionu quiquiaa quenaaja canaa panishano nijaniyajiniji. Canaari nareja poonijioquiaa tama canaa juaashiquiatajanijia, Jesucristo rupaa canaa pohuatasacari nijaniya.

8 Nio cua pohuatasano nijaniyani, majaari tama canaa niishiriojosanojuaaja. Nio niishitiojosanoori tariucuacaanu Pueyaso Rupaa naajiosanojinia quiyajuhua, taa cua sequeriquiaacuajani. 9 Supuetana Moisés caminiujushano Pueyasojinijiiri naa naajiotasaaquiaaritij:

“Maja quia juunu rupaa quia seecutanu maja na miaquenura quia carojotansano, quiaa jaara na rapijioteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja! 10 Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na niishitiojosano pueya cuara nojori niqutiojooora na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiara? Taaquiriirinij. Na camaruri niishiya na poonijosanojiniji mianutaniya na nuhuajiiri. ¿Majateeri pueyano carojotanu shuquiriaatia na nataujuhua? Jaa. Niishiyacuajaari na mianutaniyari. 11 Naajaa, niaata cua quishacari, canaari naa poonijioriquiaa Pueyasorani, niojiaaca canaa cumaquiniuria maninia. Naacuajitij, canaa cuara niqutiojosaaria saniniuujia canaa panishano. Naajaa, majaari canaa paniniu canaa panishano nia niqutionura canaa. 12 Tamasaca pueya niishitiojosacari nijaniya, niaa cutaraari nojori niqutiojoquiaa nojori panishano. Canaari saniya coteenujuanaa pohuataquiaari Jesucristo rupaa nijaniyani. ¿Majateeri coteenu canaa niqutioasaanu canaa panishanojuhua? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jitiiaaquishacari canaa panishano, canaari sanaa rejerejata saajani. Majaari canaa taajetenu paniniu quijia nijaniya, canaa jitiiaaquishacari canaa panishano. Canaari naa miqiaaritij, niaa mariqui Jesucristo rupaa tojinuu panyaquiriiri canaa taajetesacari nijaniya, pueyaraanu canaa mashiniquijosacari canaa panishano nijaniyajiniji.

13 Niaacuajaari niishiyajuhua, Jerusalén tiacajinia Pueyaso Secojoua tiajinia, cuarta Judiocuaca miaquesocoriquianoori puecoosaaquiaa Pueyasooacara, taa Pueyaso rootaquiaari canaa supuetanaacuajani. ¿Niaateeri niishiyaquiyajuhua, shu camaruuiri secojouajinia poonijionaa niqutiojooora nojori miaquesocoriquianojuhua? Naacuajitij, Pueyaso secojoua tiajinia poonijionaa miaquesanoraca quiquiaajuhua. 14 Pa Jiyaniija Jesucristoori na rupaa pohuataanaa naa sequequiaarijuhua: “Cua rupaa pohuataanaa cuara niqutiojosaaria na panishano pueyaracaanu”. 15 Naacuajitij, cua

naata puetunu cua panishanojuanaa sequenu nia niqutiojonura janiya, juhuajaniya cua quiniuria, taa cuarta Jesucristo jiyaramiquishano pueya miiquiaacuaani. Naajaa, majaari cua masenu quijia nijaniya cua panishano cua masetajara. Naa naasucuaari jiyaniya janiyari quiarjia niaacuara naajioree nioni, cua shiniujiuniuria nijaniya nia niqutiojonura janiya cua panishano. ¡Maja! Majaari cua paniniu nia niqutiojonura janiya cua panishano. Janiya jaara titiare cua miaajenutani, naajaa. Janiyari tama cua juaashiquitataaja poonijionu paniyani, Jesucristo rupaa nia tojtianura, cua panishano cua maseyaquiniutia nijaniyajiniji. Naacuajitij, janiyari tamajaaja shuquiriaatia quiya Pueyaso niquiarani.

¹⁶ Cua tojtianaa jaara niqutiojore janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniijia mariqui cua sanitioreeri cua tojiyaquiniuucua nojuaja. Cua pohuatasacari na rupaa, janiyari saaja na tojiyani. Nojuacuajaari cua jiyaroquiaari na rupaa cua pohuatanura. Cunoori maja tama cua niishiriojosano cua miiniurijaaja.

¹⁷ Majaari cua sequenu quiquiaari cua Jiyaniijia: “Cua Jiyaniijianaa, quia rupaa pohuatareera quiajaniyara”. Janiya jaara naa na sequequiaarini, cua Jiyaniijia maara cua niqutiojore cua poonijosanojiniji nera, na shuquiriasacari janiya. Saniniuujia, tama na panishacarijiaaja cua Jiyaniijia-janaacuajaari cua jiyaroquiaari na rupaa cua pohuatanura. Cunora, majaari cua naata na tarijionu. Janiyacuajaari na seruni. ¹⁸ Naacuajitij, ¿taa cua miya socuani, cua Jiyaniijia cua shuqiritiniuria socuani? Naa miiquiaacuajanijia, nareja poonijioquiaanijia tama cua juaashiquitataaja cua panishano cua jitianura, na rupaa cua pohuatasacari. Naaratej, majaari cua sequenu quiquiaa cua tojtianaa, nojori niqutiojonura janiya cua panishano. Jesucristocuaajaari sequequiaari na rupaa pohuataanaa cuaara niqutiosaaria na panishano. Naajaa, majaari naa cua sequenu quiquiaa nijaniya. Naacuajiti cua naata pa Jiyaniijia shuqiritiniu socua, cua pohuatasacari na rupaa cua maseyaquishacari cua panishano cua tojtianaajiniji. Naacuajitij, janiyari shuquiriaatia pohuataquiaa Pueyaso rupaa pa Jiyaniijiarani.

¹⁹ Majaari pueya niqutiojonu quiquiaa janiya na jittiasanojiniji cua niishtiojonuucua nojori. Naacuajitij, janiyari maja juhua nojori seruni. Pueyanoori maja cua jiyarona. Naajaa, janiyari tama cua cuaqueyajaaja jiyatequiaari juhua puetunu pueya serujuanaa cua quiniuriani, socua pueya quiniuria pa Jiyaniijia Jesucristo tojtianaara. ²⁰ Jesucristo rupaa cua pohuatasacari cuarta Judiocuaca niquiara, janiyari juhua Judio pueyanora quiquiaani. Janiyari naa miiquiaani nojori mariqui cua tojiyaquiriiri, janiya jaara juhua tahue quiri nojori niquiarani. Naacuajitij, socua Judiocuacaari Jesucristo rupaa tojtiaa. Jesucristoocua cua tiushacari, janiyari maja socua cua quiniu juhua cua supetanaa Judiocuaca rootasano tojijia. Naajaa, na tojiquiaajaanijia cua quishacari cuarta Judiocuacata, noo pojoritiatej cante cuno rootasano tojtiaajaani. Naacuajitij, cua quishacari juhua nojori, nojoriiri socua cua tojtiaa cua pohuatasacari Jesucristojiniji. ²¹ Naajuhuj, cua quishacari tamasaca pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supetanaa rootasano tojiniu niishiniu. Naaratej, janiyari na tojiyaquiquiaajuhuj, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niquiarani. Naajaa, Pueyaso rootasano tojiquiaa pueyaracaanu cutaranijia. Naajuhuj, puetunu Jesucristo niishtiojosanojuanaa tojiquiaanijia. ²² Noojiaqueya Pueyaso muerasuuri maja na naata tarinitianu najuhuaana na supuetanaa roofasano. Cuaara tarinitiaara najuhuaana na supuetanaa

rootasano. Naajaa, janiyari mariyata cuno najuhuana rootasano tojiquiaa-juhuaj nojoritia cua quishacari. Nojori jyanishacari tamonu casaa sesa quiya, janiyari mariyata maja cua miiniu nojori pueresano casaa. Naacua-jitij, cua naata nojori cumaquiniu maninia Pueyaso rupaata, nojori tojiti-asacari janiya, juhua nojori cua quishacari. ²³ Janiyari puetunu naa mi-iquiaajanaani, socua pueya cua tojitiniuria Jesucristo rupaa. Naa maninia poonijioquiaa cua jyanuñijaranijia, cua masenura puetunu maninia na sequesanojuanaa na muerasura.

²⁴ Niaacuaajaari niishiya taa pueya tacuarishiyajoquiaacujani. Pueya netecuatusacari, puetunu pueyajanaari jyanohua netecuatujuua jaarajaaja. Cante narta netecuatunaa shocotajani, shanohua casaa niqutioshiyari. Ritiuquua pueyanoori jyanohua shuquiriaatia quijia na shocotanuñiniji na masacari casaa. Naajuhuj pueyanaa, jyanohua nia poonijiore Pueyasora mijiria, shuquiriaatia nia masenura nia poonijosanojiniji na jiiitasanojiniji jiyocuacaanu. ²⁵ Naajuhuj, pueya jaara tacuarishijionu paniri, cante shocotanu paniyani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuujia, na masesano na shocotanuucuanu, cunoori saaja shanohua nacaque jaamasujiniji shitiasano. Majaari na rishiniu. Pajaniyari saniniuujia pueyaracaanu shuquiriaatia quiniutianiyani Pueyaso niqutiosanota pajaniya, paa jaara maninia miiri mijiria pa quishacari. Naaratej, pa tarinitiare puetunu najuhuana tama pa miiniu panishanojuanaa, pa shuqiritiniuria pa Pueyaso.

²⁶ Pueya netecuatusacari, netecuatunaa cuaara niishiiria tee netenu puequeetu quiyani. Majaari najuhuana na camarucuneejonu. Naajuhuj, cua poonijosacari Pueyasora, majaari cua niqijiotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhuj, pa cartere najuhuana pa mijiosano. Saaja pa niishiriojore Pueyasocua, maninia pa tojinuria nojuaja. ²⁷ Janiyari jyanohua saniniujuquiaa maja cua miiniuria tama cua cuaqueya miiniu panishanojuajani. Janiyari cua cuaqueya jiyartutenu paniquiaani saa Pueyaso cua tojinuriaja. Janiyari tari queraatia pueya niishitiojquiaari Pueyaso rupaani. Janiya jaara tama cua niishitijosanojuaja tojiyaquirini, Pueyaso mariqui cua cartereeri, maja na rupaa cua pohuatanura socua.

10

Supuetanaa Israel pueya miishanoori pajaniyara naajiotasaaquiaari pa niishiniuria maninia

¹ Cuarta Pueyaso pueyanaa, nia niishiri taa pa supuetanaa Judiocuaca miishaaquiaaricuaani nojori rucuanijosacari pueyaracaanu cariiquia jiyajinia. Majaari nia niyjetanu niaa mariqui Pueyaso tojiyashijara quirohuajuhuj. Nojori mashishacari Egipto jiyajiniji, Pueyasoori cohuaja najaca shipiniquiaari nojori na cojuanura, nojori puetariquianojuhuaj. Pueyasoori puereetuca shoniniacu caminia raquitiaquiaari nojori nuura caminia cajiniocua. Naacuañitij, puetunu pueyajanaari niuutiaquiaari joojuashiquio. ² Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuca caminia tajini-aaco, cohuaja najaca cariquiaconio. Majaari socua na quituniu quiquiaari Egipto pueya seya. ³ Puetunu nojorijianaari jiya cajiniocuai casaa mi-aquenujuua, Pueyaso tinishano nojori miaquesocoriqiano pueyaracaanu cuno cariiquia jiyajinia nojori rucuanijosacari. ⁴ Naajuhuj, nojori jiyamuetusacari, Pueyasoori mohuaca pojuartaniquiaari saajiajiniji. Puetunu

pueyajanaari cuno mohuaca ratuquiaari. Pueyasoori cuno saajiajiniji naa raatequiaari nojoritij, na niishitiojonura cuno pueya, nojuajaari nojori nuhuajiriquiaa jiyasohuaja, pueyaracaanu nojori na cojuanura. ¡Nojuacuajaari pa Jiyaniijia Cristo quiquiaari! ⁵ Puetunu cuno supuetanaa Israel pueyajanaari naa maninia cojuasano quiquiaari cariquia jiyajinia. Naajaa, quera puetunu nojorijianaari Pueyaso tojtiaashijia quiquiaari saaja. Pueyasoori cunora nojori shuquiritiaaquiquiaari. Naaratej nojori cusojuanuuriquiaari cuno cariquia jiyajinia nojori camarucuneetasacari pueyaracaanu, cuaara puequequiaariijaatijia puetunu cuno tojiyashijiacajanaa.

⁶ Naa miishaaquiiaariti cua supuetanaa Judiocuaca, sesa casaacua nojori jiaatianuucua. Nojorijiniijiri puetunu naajiotasaaquiiaarijianaa pajaniyara, pa niishiniuria maja sesa casaacua pa jiaatianurajuhua. ⁷ Shushajanaa nojori coteesacari rucuanenu cariquia jiyaco, noojiaqueya nojorijiniijioori caapiqui casaa shipiniquiaari orojiniji juhua juunu niquishano. Nojoriiri tama nojori shipinijosano casaajaaja sequequiaari: “Niioori pa Pueyasohua, pa mashiquiniaa Egipto jiyajinia pa camarucuaacuaji”. Naacuajitij, nojoriiri na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiiaariti:

“Pueyari cajitiuri queranacunura. Na nuhuaji, nujuatuquiaariiri na shipinishano juyaca tacoji na jiareyocuatunura. Socua sacuaraatia casaa miitiuquiaariiri”.

¡Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

⁸ Na nuhuaji, tamacari, noojiaqueya nojorijiniijioori sesa miiquiaari taatujuritia, cararaatia taucuaa miishacari nojori shuquirishacari na shipinishano casaa tacoji. Pueyasoori nocuaji naa sequequiaari: “¡Cuaara puecoosaaria cuno sesa miijiaa!” Cunora, veintitrés mil Judiocuacaari puecoosaaquiiaari cuno juuca. Cunojiniji pa niishiri maja pa miiniuria sesajuhua, taa nojori miiquiaaricuaa taatujuritiani.

⁹ Na nuhuaji, noojiaqueya nojorijiniijioori Pueyasota juaaquiouquiaari, tamonu miaquesanoocua nojori jiaatiasacari, puera nojori jishacari nojori miaguesano. Nocuaji Pueyasoori sacocua satejoquiaari cuno pueya. Queraatia pueyari cusunuuquiaari. Naaratej pueyanaa, maja cumaati pa juaaniu, Pueyaso jaara pa saniniujiuri. Maja naa pa miiniutij paa mariqui Pueyaso juaatiriiri.

¹⁰ Tamacari, noojiaqueya cuno pueyajiniijioori Moisésta juayonuu-taquiaari. Moiséscaajaari nojori jitianara Pueyaso jiyatesano quiquiaari. Nocuaji Pueyasoori na seru jiyaroquiaari cuno juaajiaa na cusojuanura. Queraatia pueyari cusunuuquiaari jiyacari. Naaratej pueyanaa, majaari pa juaatianu pa jiyaniijianuucua.

¹¹ Puetunu pa supuetanaajiniji naajiotasanojuanaari tariucuaaanu naajiotasaaquiiaari, pa numootesaanura quiarijiani, quera pa Jiyaniijia muestasacariuhua. ¹² Naaratej pueyanaa, tama nia cuaqueyajaaja nia cojuare nia jiyanishacari niaari Pueyaso tojijia seetanu cutarajanaa, niaa mariqui sesa miiriiri, juhujaniya nia quishacari tamajaaja. ¹³ Naaari mariyata saniniujiushaaquiiaajuhua, taa puetunu parta Pueyaso pueyajanaa saniniujiushaaquiiaacuaani. Naajaa, nia naata Pueyasocua tiuuniu maja puera nia saniniujiushaanura. Pueyasocuaajaari niishiya taate nia naata rejeretanuni. Majaari puera pa saniniujiushaanu quiniutianiya. Pueyasocua nia niishitiojore taate nia naata cartesano quiniuhuanani taraatia nia miiniuucuaaji. Naacuajiti pa naata rejeretanu, Pueyaso jaara Sesaaca saniniujiutiri pajaniya.

Maja pa cojiniu tamasaca, na miaquenuusacari na jiyanitiushano na pueyasooocura na puecootusano

14 Cua panishano Pueyaso muerasunaa, maja nia tiuquitianu tamasaca pueya jiyanitiushano pueyaso quiquiojinia, na tojitianaa nia cojiniuria, nojori shuquiritiasacari juaashiquiata shipinishano casaa Pueyaso niti. Maja nojori cojiniu, niaa mariqui saniitiosareeri. 15 Niaacuajaari niishijiaca. Naaratej, nia niishiriojore cua sequesanoocua.

16 Paa jaara rerejore pa Jiyaniijia cusunu juuca pa niishiniuriani, pa ratunu panishacari, paari sequequiaani: “Paacarasho canaa Jiyaniijianaa, quia nanacaari puetunu canaacuarajanaa shooquiaari”. Naa pa ratusacari cuarta Pueyaso muerasunaa, puetunu pajaniyajanaari pa Jiyaniijia rupuesano quiquiaani, na nanaca shoonuucua puetunu pocuarajanaa. Naajuhuj, pa miaquesacari, paari sequequiaani: “Canaa Jiyaniijianaa, quiaari quia cuaqueya nootunequiaari puetunu canaacuarajanaa”. Naa pa miaquesacari, puetunu pajaniyajanaari jatiqui pa Jiyaniijia cojiquiaani, na cuaqueya cusunuucua pocuara. 17 Cuno pan pa miaquesacari, puetunu pajaniyajanaari niquiriyatu panjiniji neecasequiaani. Naacuajitij, paari niishiyani puetunu pajaniyajanaari rupuetoono quiya pa Jiyaniijiatani, juhua niquiriyatu cuaqueyaja.

18 Nia niishiriojoriquia taa Israel pueya miiquiaacuaani. Nojori miaquesacari Pueyasooocura na mosano Pueyaso niquiara, na niti nojori mosano seruuri juhua tama nojorijiaaja, Pueyaso jiyanooniuria nojori. Naacuajitij, nojoriiri na naata Pueyaso rupeenu, nojori secojonura nojuaja. 19 Jaara naa quiritij, ¿taateerini, pueya jaara shipinijosano casaacuara mosano shu miaquere? ¿Casaate pueya jyanishano pueyasooocura mosano shuni? Nareja shucuajaari. ¿Cumaacaraca quiijate cuno, pueya shipinishano casaa juhua Pueyasorani? ¡Maja! 20 Naajaa, nia tojitiare casaa cua sequenutaniyani. ¡Pueyaso niishiyashijiaca pueyari na miaquesocoriquiano na seya puecooquiaa samarhuacuara! Naa nojori miishanoniquitij, cunoori maja Pueyasora. Naacuajitij, nojoriiri samaruhua rupuequiaa, maja Pueyaso. ¡Majaari cua paniniu nia rupuenura samaruhua! Nocuaji, maja Pueyaso niishiyashijiaca nia cojiniu cuno shu nia miaquenura. 21 Majaari pa naata pa Jiyaniijia rupuetoonu, samarhuata pa rupuetooacarijuhuj. ¿Pueyate samarhuata cojitishiya? Pa Jiyaniijia cusunu juuca pa niishiniuria, ¿paateeri na sequesano miaquenutaniyani, samarhuacuara mosano casaajuhuj? ¿Cojitishiyate? ¡Maja pueyanaa! 22 ¿Paateeri pa Jiyaniijia paraca cojiniu paniyani, pa Jiyaniijia pa juaatiniuriani? ¿Pajaniyate socua cumueeca pa Jiyaniijiajinijini? ¿Majateeri nia puerenu pa Jiyaniijia saniitonu?

Taa pa miiniutianiyani

23 Tari sequereecuajaniijia, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya. 24 Naaratej, majaari pa niishiriojonu saaja maninia pa quiniuria tamajaaja. Pa niishiriojore parta pueyacua, maninia nojori quiniuriajuhuj. 25-26 Seetanujuanaari nio naajiosano: “Nio jiyari pa Jiyaniijia jiya, puetunu tii quijia casaajanaanio”. Naaratej, niaa jaara shu masere shu niquitiojosaquiji cumaneecata, majaari nia nequesotanu: “¿Nio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhujaniya. Pa Jiyaniijia shipinishanoocuaari. Pa miaquesanoori maja na naata na sesonu pajaniya Pueyasora.

²⁷ Pueyaso niishiyashijia jaara nia masuure nata nia miaquenura, nia quiaare, niaa jaara quianu paniri. Juhua janiya nia miaquere na rupojosano niaara. Majaari nia nequesotanunoj: “¿Nio shuti casaacuara mosaarucuaa?” Majaari naa nia nequesotanu niaa mariqui nioojia macuhua jetereeri niaa jaara niishiri nia miaquesanoori shipinishano casaacuara mosano juhua Pueyasocuara. Juhua janiya nia miaquere nareja. Puetunujuanaari pa Jiyaniijia shipinishanocuaja. ²⁸ Saniniuujia, nia cojinia jaara numootere nijaniya: “Nio shuuri mosaaree shipinishano casaacuara juhua Pueyasocuara”, majaari nia miaquenunoj, niaa jaara naa sequesaaere. Maja nia miaquenunoj, nia cojinia mariqui na miaquere jaarihuaj na cojishacari nijaniya. Nia tarajana jiyoteeri jiyaniyajaa cuno shipinishano casaari seetanujuanaa cumaacaraca quijia. Naacuajitij, na miaquesacari nocuara mosano shu, noojia macuhua janutaniyari. ²⁹ Majaari nio cua sequenu niaara. Niaacuajaari tari niishiya nia naata cuno shu miaquenu. Nia sequeya nio cutaranijia nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhua jereeri cuno shu na miaquesacari niaata.

Niaa naasucuaari cua nequesotanu paniya: “¿Paatucua pa panishano shu miaqueyaquirini saaja tamonu pueyano pueresacari pa miaquenu panishano shu? ³⁰ Paa jaara Pueyaso sequerene ‘paacarasho’ cuno sumatuurani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacari?” ³¹ Cua tojitiare quenaaja cuarta Pueyaso muerasunaa. Nia miaquesacari, nia ratusacari, casaa nia miishacarinio, pueyaracaanu puetunu maninia nia miirijianaa Pueyaso nia shuquiritiniuria. ³² Puetunu nia miishanojuanaa cuara quiria maninia Judiocuaca niquiara, taucuaca niquiarajuhua, parta Pueyaso pueya niquiaranio. Jiyano hua taraatia cutaraari, pueya jaara tojiyaquiya Pueyaso, juhua janiya pa miishacari nojori jiyani tiushano sacuraatia casaa. ³³ Naaratej, janiyari pueyaracaanu maninia miiniu paniquiaa puetunu pueya niquiarajanaani, nojori cuara tojitiaara Pueyaso, Pueyaso pueyara nojori jiyatesaanura. Majaari cua niishiriojonu tama cua panishanojuaja cua miiniuria. Janiyari socua niishiriojoquiaa tamasaacuani, maninia cua miiniuria nojori niquiara.

11

¹ Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatia quiaacuanaani, juhua nojuaja cua quiniuria. Mijiria na quishacari, nojuacuajaari pueyaracaanu maninia miiquiaari pueyacuaa.

Maajipohuatucua taa quiriquiani Pueyaso pueya rerejosacari

² Cuarta Jesuucua tiunianaanaa, janiyari nia shuquiritiaani, pueyara caanu nia niishishacari janiya, naajuhua, maninia nia tojitiyacari puetunu cua niishitiojosanojuanaa Pueyasojiniji. ³ Janiyari paniya cutarani socua nio nia niishiniuria: Cristocuajaari caya camarnu. Cayari saniniuujia necocua camarnu, taa pa Que Pueyaso pa Jiyaniijia Cristo camarnu quiyacuanaani. ⁴⁻⁵ Naaratej, nia secojosacari Pueyaso, nia caminiuujishacari Pueyaso sequenu panishano Pueyaso pueya maanu niquiarajuhua, jiyacaritij, canuu cuara jocuara na nacaque na pocuasacari. Saniniuujia, maajipohua pocuanura, nojori cuara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhua, na naca mishiquiosano. Cararaatia jaarihuaj, maaji pocuasacari Pueyasota, Pueyasorano, na naca mishiquiosoo. Maaji jaara caririquiyashijia quiri, ¿casaara na naca na tuqueteyaquiya puetunujuanaacuaraarini? ¿Maajiti

juhua cayara quiniu paniya? Maja naasucua. ⁶ Maaji jaara na naca mishiquionu paniyaquri pueya niquiara na pocuanura Pueyasora, Pueyaso na secojonurario, cuno tojiyashijia cuara tuqueteera na naca. ¿Cararaatiatee, maaji jaara na naca tuquesano quiri juhua caya? Taaquiririni. Cararaatia quiyajaarihuaj, na secojosacari Pueyaso, na caminiujiushacari Pueyaso sequenu panishano pueya niquiarajuhua, mishiquiosoo na naca quishacari. ⁷ Maajiiri neyaca shuquiritiya na tojjia na quishacari. Naacua-jitij, neyacaari narta pueya shuquiritiasano quiyajuhua. Naaratej, maaji cuara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaaquiaari juhua Pueyaso na quiniuria, Pueyaso shipinishano casami camarnura na quiniurajuhua. Cayari Pueyaso shuquiritiya Pueyaso tojjia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuaj.

⁸ Pueyaso jaara coteenujuanaa caya shipiniquiaari, majaari maajijiniiji na shipininiu quiquiaari caya. Maaji cutaraari caya riuquiocuajiniiji shipinishaaquiaari. ⁹ Naacua-jitij, maajiiri cayara shipinishaaquiaari. Majaari caya shipinishaanu quiquiaari maajiria. Naaratej, maaji cuara caya tojjia cutara. ¹⁰ Naacua-jitij, maaji secojosacari Pueyaso, na caminiujiushacari Pueyaso sequenu panishano pueya niquiara, cuno maaji cuara mishiquioora na naca. Naacua-jitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaarihuaj. ¹¹ Naajaa, puetunu pajaniyajanaari mariyata Pueyaso muerasuni, Jesucristoocua pa tiushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supueno cayaju. Naajuhua, cayari maja na naata supueno tamajaaja maajijiu. ¹² Seetanujuanaari, maajiiri coteenu shipinishaaquiaari caya cuaqueyajiniiji. Na nuhuaji, puetunu canuujuanaari saniniuujia supuequiaa maajijiniiji. Naajaa, puetunu pajaniyajanaari Pueyasojiniji supuequiaani. Naacua-jitij, caya, maajinio, nojoriiri mariyata panishano pa naacutoojonura.

¹³ ¿Taa nia sequeyani pueyanaa? ¿Maninateeri, maaji jaara Pueyaso secore na naca mishiquiosoo pueya niquiara? Maja maninia. ¹⁴ Naajuhua, quera puetunu pueyajanaari sequeja, cararaatia niquishanoori caya jaara tucamuejaru quiya juhua maaji. ¹⁵ ¿Maajiirijataj? Jaara tucamuejaru quiri, cunoori maninia niquishano cutara. Pueyasoori naa maninia shipiniquiaari maaji, tucamuejaru na quiniuria, na naca mishiquioriquiano na mucacata. ¹⁶ Tamonu jaara nacoonu paniyajaa socua pa muesujiniiji, niocua na sequere: “Pablocuajaari tari pa niishitiojoree puetunu na niishishanojuanaa. Naajuhua, puetunu Pueyaso pueya maapuejanaari tamaquicua naa miiquiaa taa Pablo pohuatatee pajaniyacuaajani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

Corinto pueyari sesa miiquiaari na miaquenujuajinia, pa Jiyaniijia cusonu nojori niishishacari

¹⁷ Cuarta Jesucua tiuniaanaa, nio, janiya niaacuara na naajiyani, nioori maja cua shuqiritianura nijaniya. Nia rerejosacari pa Jiyaniijia cusosacari nia niishiniuria, niaanaari saaja sesa miiquiaa. Nia rerejonuni, cunoori nia cumaquitioonura juucua. Nia rerejosacari saniniuujia, niaari saaja socua seseyaree. ¹⁸ Janyari naa pohuatasaarucuaa nijaniyajiniiji: “Corinto pueyari sesa na niishiriojonuta nojori jiuujiajinia raquirijitiquiaa nojori rerejosacari”. ¿Seetanutejanaa nio pohuatasano nijaniyajiniiji? Naa

naasucuaaj. ¿Casaate cua toyani? ¹⁹⁻²⁰ Seetanu naasucuaajanaa niaari nioojia-jinia naa niaaquejejoquiaaquij. Paacuaajaari tari niishiquiaarinini noojiaqueya pueyari Pueyaso pueya maapeecuaji rupatenutaniya. Naa niishishanote canapueete maja Pueyaso muerasuni. Cante seetanujuanaa Pueyasooocua tiuujiani, majaari na rupatenu quiniutianiya narta Pueyaso muerasuocua. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniijia cusonu nia niishiniuria, maja sesa nia niishiriojonu juhua niaaquejono nia quiniuria. Niaa jaara naa niaaquejoriquiatej, majaari pa Jiyaniijia cusonu nia niishiniu quiquiaa seetanujuanaa. ²¹ Niajaniyanaari tama nia patasanojuaja coteetaquiaa mi-aquenu. Niaanaari nia miaquesano serotaquiquiaa. Naacuajitij, casami-ijiuniucuaanaari miaajecoquiaacujua. ¡Saniniuujia casamiriacanaari juhua-janiya mashaasequenuuquiaacujua! ²² ¡Jiyanojua cararaatiaari naa nia miishanotej! Niaa jaara naa jamuejaca quiriquiatej, ¿majate nia naata tama nia tiajiniajaaja nia miaquenuunu, ratunonio? ¿Niaateeri niarta Pueyaso muerasu sooquiaa? Naa nia miishacari casamijiuniucuatej, niaacuajaari nojori cararoquiaa, casamijiuniucua nojori quiniucua. ¿Taa nia sequeyani pueyanaa? ¿Janiyate nia maniniuhuaqueetaani? ¡Maja! Jiyanojua tacayani-ja. Majaari cunora cua shuquiritianu niajaniya.

Pa Jiyaniijia rootasano na cusonu pa niishiniuria

²³ Janiyacuajaari nia rootacanu tari pa Jiyaniijia Jesu pohuatasano janiyani, taa na miaquequiaari na saquiriojosano pueyatani. Cuno ni-ucuaaja, Judasri pa Jiyaniijia quiateriquiano quiriquiaa taucua moso-coriquiano. Cua tojtiarohuacuara pueyanaa. ²⁴ Judas quiete yaquishacar-ijia nojuaja, pa Jiyaniijia Jesucristoori pan riquiaari. Na Que Pueyaso sequereeri: “Paacarasho cua Quenaa”. Na nuhuaji, na necaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshaanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

²⁵ Naajuhuaaj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secojoreeri. Na nuhuaji, na pueya sequerohuari: “Pueyaracaanu nia ratusacari nio, nia niishiriquia, cua Queeri cua nanaca seera nia jiyanooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshaanura juucua. Janiya cutaraari nia niti mosaanutaniyani”. Pa Jiyaniijiaari nia sequequiaari. ²⁶ Naa nia miaquesacaritij, nia ratusacar-ijihuaaj, pueyari niishiniutianiya niaari Pueyaso jiyanooshaano pueya, pa Jiyaniijia Jesu cusonuucua pa niti. Naa nia miiqueriquia pueyaracaanu na sequesano pan, pa Jiyaniijia cuaara tiuquiriohuajaatijia.

Nia niishiri taate pa naata miaquenu pa Jiyaniijia cusonu pa niishiniuriani

²⁷ Naaratej, niaa jaara sesa miiri, Pueyaso nia secojore ritia na jiyanoo-niuhuaa nijaniya, nia miaquenuhuara pa Jiyaniijia cusonu nia niishini-uria. Niaa jaara pa Jiyaniijia pan miaquere jiyanoosho nia quishacarijia, niaa jaara na cusonu mashaca rature jiyanoosho nia quishacarijihuaaj, ¡niaari na cusonu rerequeteya! Niaari juhua sequeruhua, pa Jiyaniijia najuhuaana cusoquiaari. Naa nia miishacaritij, niaa cutaraari saniitiosaanu-taniya.

²⁸ Naaratej, tama nioojiajiniajaaja nia niishiriojore taa nia quiquiaani, casaa nia miiquetanu sesani. Naa nia miiri coteenu, niaa mariqui sesa nia miishano miaquetareeri Pueyaso jiyanoaquishacarijia nijaniya. Naa nia miiniu nuhuajitij, niocua shuquiriaatia juhuaajaniya miaquerohua pa Jiyani-ijia pan. Niocua juhuaajaniya raturuhua pa Jiyaniijia raatonuquejiniji cutara.

²⁹ Cante juhuajaniya miaquereeni, cante juhuajaniya raturee najuhanani, jiyooshoo na quishacarijia, cuno pueyanoori Pueyaso saniitiotenutaniya tama na cuaqueyajaaja. ³⁰ Naacuajitij, jiyooshoo nia quishacarijia nia mi-aquesacari, queraatia nijaniyajiniinooori cunora cusuhua quiya. Noo-jaqueya nijaniyajiniinoo cutaraari tari cusunucanujuhuj, Pueyaso saniitiosacari nojori. ³¹ Nocuaji tama nia cuaqueyajaaja nia jeecare suraatia, pa Jiyaniijia mariqui saniniuuja nia saniitioreeri. ³² Pa Jiyaniijia jaara pa saniniujiuri, canapueete sesa quiyani, Pueyasoori na saniitioquiaa na muerasu nojori quiniuucua, maninia nojori quiniuhuara juhua maninia na muerasu. Naacuajitij, juhuacarijia na saniitiosacari na muerasu, majaari pa saniitiosaanu quiniutianiya na ruuretajacata jiya puequesacari, Pueyaso jaqueroosacari na tojiyashijia.

³³ Naaratej cuarta Jesuucua tiunuaanaa, niaa jaara pa Jiyaniijia pan sanu paniriqia na cusunu niishiniuria, nia sashiri niarta Pueyaso muerasu, jatiqui nia miaquenura maninia. ³⁴ Miaajeyano maaraja, cuaara miaqueera coteenu tama na tiajiniajaaja, Pueyaso mariqui nia saniitioreeri, sesa nia miiniuucua nia rerejosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari niaacua.

12

Pueyaso Sohuanu cumaquishacari puetunu Pueyaso muerasjuanaa

¹ Cuarta Pueyaso muerasunaa, niaacuajaari tari niishiya Pueyasoori na Sohuanu niqitioquiaa puetunu pajaniyajanaa, na cumaaca pa jiitanura. Quiarrijiani, socua nia niishitiojonu paniya cunojiniinjia. ² Niaacuajaari niishiya taa nia quiquiaari tarini, Pueyaso niishiyashijia nia quishacarijia. Niaari puetunu sapojosaaquiarijianaa, pueya shipinishanoocua nia tiunuiucua najuhanaj. Sesaacaari naa nia tojitiqiaari najuhua pueya shipinishano, nia jyanishano pueyasohuani. ³ Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanujanaa Pueyaso Sohuanu cumaacata pohuataa Pueyasojiniinjia? Naa nia saniniujiritij: Pueyaso Sohuanu pohuatesacari pueyano, nojuajaari maja na naata Jesucristo sesacanu. Naajuhuj, saaja Pueyaso Sohuanu cumaquishacari pueyano na naata sequenu: “Jesucuaajaari Jiyaniijianaa”. Naacuajitij, maja nia tojinu na rupaa, cante Jesucristo sesacajani.

⁴ Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso muerasjuanaa cumaquiquiaa tamaatia miishano pa miiniuria na cumaacata. ⁵ Queraatia tamaatia poonijosanoori Pueyasora quiya, puetunu pajaniyajanaari niquiriyatujua Jiyaniijia poonijioquiaani. ⁶ Puetunu pajaniyajanaari tamaatia miiquiaa pa poonijosanoni. Saniniuuja, Pueyasojanaari na panishano miiquiaa puetunu pueya jiuujiajiniajanaa. ⁷ Pueyasoori puetunu na muerasjuanaa cumaquiquiaa na Sohuanuta, maninia pa miitioonura, Pueyaso muerasu maapue cumaquishaanura puetunujanaa. ⁸ Pueyasoori pa cumaquiquiaa tamaatia miishano pa miiniuria. Naacuajitij, Pueyaso Sohuanuuri tamonu pueyano pohuataniquiaa Pueyaso niishishano na muerasura. Pueyaso Sohuanuuri tamonu pueyano niishitiquiaajuhua Pueyaso sequenu panishano pajaniya. ⁹ Pueyaso Sohuanuuri tamonu cumaquiquiaa Pueyasocua na tiunuiuria jyanohua, na shiniujiunioria Pueyaso miinu panishano pa miiniuria. Pueyaso Sohuanuuri tamonu cumaquiquiaajuhuj cusuhua na naatanijionura Pueyaso cumaacata. ¹⁰ Pueyaso Sohuanuuri tamonu

pueyano jiyajeneta miishano miitijuhuaaj Pueyaso cumaacata. Tamonu-
uri niishitishaaquiaa Pueyaso sequenu panishano na pohuatanura pueya
niquiara. Pueyaso Sohuanuuri tamonu niishitiquiaa teyano sohuanute
tamonu pueyano cumaquiyani, Pueyaso Sohuanu, sapojona samaru soj.
Pueyaso Sohuanuuri tamonu pueyano pocuatequiaa tamaatia rupaaca, na
niishishoo rupaa. Pueyaso Sohuanuuri tamonu pueyano niishitiojoquiaa
tamaatia rupaajinia sequesano na pacunura pueya rupaajiniajuhuaj, pueya
tojiniuria maninia tama nojori rupaajiniajaaja. ¹¹ Naacujitij, Pueyaso
Sohuanujuanaari puetunu pa cumaquiquiaajanaa, tamaatia pa miiniuria.
Naa pa poonitijioquiaari taa na paniyacujani, cana na paniyajaanihuaj.

Puetunu Pueyaso pueyajanaari juhua niquiriyatu cuaqueya quiya

¹² Tamaatia poonijosano puetunu pajaniyajanaa jittiasacari, paari juhua
niquiriyatu cuaqueya quiyani. Mijiria pa cuaqueyari jiyanoehua maninia
shipinishano jiyanoehua Pueyaso niishitiajata. Pa cuaqueyari maja saaja
shu na quiniu. Pa cuaqueyari queraatia tamaatia casaaraca. Puetunu
pa cuaqueya casaajanaari jatiqui poonijioquiaa pa cuaqueyajinia, maninia
pa quiniuria. Puetunu pa cuaqueya casaajanaari saa niquiriyatu cuaque-
yaja quiya. Jiyano pa cuaqueyatej, Pueyaso muerasuuri naa quiyajuhuaaj.
Naacujitij, Cristota rupuetootesano pa quishacari, puetunu pajaniya-
janaari juhua niquiriyatu cuaqueyaja quiyani, pa Jiyaniijiaa pa pooni-
jionura jatiqui. ¹³ Pueyasoori pa rupuetotequiaa na Sohuanuta, puetunu
jatiqui pa quiniurijanaa. Pueyasoori puetunu na muerasujanaa sami-
tiani quiaari na Sohuanuta. Pueyaso Sohuanu pa jittiasacari, puetunu
pajaniyajanaari rupuetootesano quiya niquiriyatu Sohuanutani. Naacua-
jitij, paari juhua niquiriyatu cuaqueya quiyani: Judiocuaca, taucucanio,
poonitijosano pueyajuhuaaj, camarnuuju pueyano.

¹⁴ Pa cuaqueyajiniji pohuatareeraj. Pa cuaqueyajinia, majaari saa
niquiriyatu casaaja quiniu. Queraatia casaari quiya pa cuaqueyajinia.
¹⁵ ¿Taa nia sequeyani pueyanaa? Pa niohuaca jaara sequere: “Janiyari maja
juaashiquiani. Naaratej, janiyari maja pueyano cuaqueyajinijini”. ¿Taa nia
sequeyani cuarta Pueyaso muerasunaa? ¿Pa niohuacate maja pa cuaqueya-
jiniji, maja juaashiquia na quiniuucua? Maja. Naajuhuaaj, majaari pa soonu
tamaatia poonijosano pa jittiasacari Pueyasora. ¹⁶ Naajuhuaaj, pa numaa
jaara sequere: “Janiyari maja namijiani. Naaratej, janiyari maja pueyano
cuaqueyajinijini”. ¿Taa nia sequeyani pueyanaa? ¿Pa numaate maja pa
cuaqueyajiniji, maja namijia na quishacari? ¿Sooshiyatee? Maja. ¹⁷ Paa jaara
saaja puereetuca namijia quirini, shaaqui pa cuaqueya, ¿paatucua tojirini?
Maja pa naata. Paa jaara saaja numaa quirini, shaaqui pa najuhua, ¿paatucua
nujuuriquiani? Maja pa naata.

¹⁸ Pueyasoori namitia pa cuaqueya shipiniquiaari puetunu pa panishano
casaatajanaa. Puetunu pa cuaqueya casaajanaari rupuetootesaquaaari
tee Pueyaso paniquiaari nianucujani. Naajuhuaaj, Pueyasoori puetunu na
muerasujanaa cumaquiquiaa mariyata, tamaatia poonijosano pa jittia-
nura taa na paniyacujani. ¹⁹ Pa cuaqueya jaara quiriquia saa namijiaja
puetunujuanaa, ¿pa cuaqueyatuma tee quiriquia socuani? ²⁰ Puetunu pa
cuaqueya casaajanaari namitia saaja niquiriyatu cuaqueya quiya.

²¹ ¿Taa nia sequeyani pueyanaa? Pa namijia jaara pa juaashiquia sequere:
“Juaashiquianaa, niaari najuhuaa quijiaca. Maja nia naata niqunuu”,
¿majate pa juaashiquia pa panishanojuhuaj? Taaquiririnij. Naajuhuaaj, pa
naa jaara pa niohuaca sequere: “Niohuacanaa, niaari najuhuaa quijiaca.
Maja cua paniniu niya niajanija”, ¿majate pa niohuaca pa panishanojuhuaj

pa rucuanajotajara? Taaquiriirini. Pueyanaa, naa pa quiri jatiqijuihua puetunu parta Pueyaso muerasutajanaa, taa puetunu pa cuaqueyajinia pa jiiitasano casaajanaa quiya jatiqicuuaani. Naaratej, puetunu parta Pueyaso muerasujanaari pa panishano quiya, pa cumaquifioonura maninia. ²² Teyano casaate pa cuaqueyajinia socua sasaca quiya pa niquiarani, cunoori socua pa panishano. Maja pa naata rishiniu cunooju. ²³ Naajuhuj, teyanote maja puera maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishanura. Paari caririqijia cutarani, juhuasu pa quishacari. ²⁴ Saniniujia, maninia niquishano casa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojanurajuhua teyanote maja maninia niquishano pa cuaqueyajiniani. ²⁵ Naacujitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitiooquiaa, puetunu maninia pa cuaqueya quiniurijanaa. Naatej, taa pa facaquiaa pa cuaqueyaracuaani, naa pa miiri parta Pueyaso muerasujuhuj. ²⁶ Pa niohuaca jaara noore, puetunu pa cuaqueyajaari na tacaatiaa. Pa niohuaca jaara shaaterohua, pa cuaqueyari jaarajaaja puetunujanaa shuquiriaatia quiriohua. Naajuhuj, parta Pueyaso muerasu jaara taraatia miishaare, naa nojori pa taraajetarejuhuaj. Naajuhuj, parta Pueyaso muerasu jaara maninia miishaare, nojoritia pa timirijuhuj.

²⁷ Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujanaa rupueteya Cristo cuaqueyajinia, saa niquriyatu cuaqueyaja pa quiniuria, pa camarnura pa poonijionura. ²⁸ Cristo cuaqueya pa quishacari, Pueyasoori coteenujanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujuniuria Pueyaso sequenu panishano pueya niquiarajuhuj. Naajuhuj, Pueyasoori tamasaca jiyatequiaari na rupaa niishitijonaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumaacata. Tamasacaari jiyatesaaquiaari cusosuhua naatanijionaa nojori quiniurijuhuj, Pueyaso Sohuanu cumaquishacari nojori. Tamasacaari jiyatesaaquiaarijuhuj Pueyaso muerasu naacunaara nojori quiniuria. Tamasacaari jiyatesaaquiaarijuhuj Pueyaso muerasu jiiitanaa nojori quiniuria. Tamasacaari pohuatesaaquiaari tamaatia rupaacajuhuj. Naacujitij, queraatia tamaatia poonijosanoori quiya. ²⁹ ¿Puetunu Pueyaso muerasujanaateeri jiyaramiquishaquiaari Jesucristojiniji nojori pohuatanaa tamasaca niqiuara? Maja. ¿Puetunu Pueyaso muerasujanaateeri Pueyaso rupaa pohuatanaa? Maja. ¿Puetunu Pueyaso muerasujanaateeri Pueyaso rupaa niishitijonaa? Maja. ¿Puetunu Pueyaso muerasujanaateeri jiyajeneta miishano miijiaa? Maja. ³⁰ ¿Puetunu Pueyaso muerasujanaateeri cusosuhua naatanijionaa? Maja. ¿Puetunu Pueyaso muerasujanaateeri tamaatia rupaaca pocujaja? Maja. Tamaatia rupajinia pohuatasano jaara quiriqia, ¿puetunu Pueyaso muerasujanaateeri na naata na pacunu tama nojori rupajiniaajaaja? Maja. ³¹ Naaratej, nianiani cuara jiaatiaara socua maninia poonijosano nia jiiitanura Pueyaso Sohuanujiniji, narta Pueyaso muerasu nia cumaquiniuria maninia.

Cuarta Jesucua tiunianaana, quiarijiani nia niishitijoreera casaate socua panishanoni, Pueyaso shuquiritianura pajaniya.

¹ Pueyaso Sohuanu jaara cua pohuatere queraatia cua niishishoo rupaaca, Pueyaso seya rupaajuhua, naajaa, janiya jaara pueya paniyashijia quirini, janiya maara saaja cojuatuneja quiri Pueyasorani. ² Naajuhua, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniyaquishacari pueya, janiya maara najuhuaana quijia quirini. Naajuhua, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaani, naajaa, janiya jaara pueya paniyashijia quirini, janiya maara najuhuaana quijia quiri Pueyasorani. Naajuhua, janiya jaara Pueyaso cumaacaraca quirini, tuhuananuhua cua jatanura tamocora Pueyasoocua cua tiuuniuucua jiyano huani, naajaa. Cua paniyaquishacari pueya, janiya maara najuhuaana quijia quiri quiri quiri Pueyasorani. ³ Naajuhua, janiya jaara puetunu cua casamijianaa nareja niquitiore casamijiuucua cua paniyaquiniutiani, cua Jiyaniija maara cua shuquiritiaaquiri. Naajuhua, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyaniija maara cua shuquiritiaaquiri, janiya jaara pueya paniyashijia quirini. Naajuhua, janiya jaara mosaare Pueyaso rupaa cua pohuatanuucua, naajaa, cua Jiyaniija maara cua shuquiritiaaquiri, janiya jaara pueya paniyashijia quirini.

⁴ Cante pueya panijiani, nojuajaari panaatia sashijia. Cante pueya panijiani, nojuajaari maninia mijia puetunu pueyarajanaa. Cante pueya panijiani, nojuajaari tamonu pueya jiiitasanoocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhua, cante pueya panijiani, majaari pueya rerequeteja na quiniu. ⁵ Cante pueya panijiani, majaari pueya na cararajonu. Cante pueya panijiani, majaari saaja nera niishiriojua tamajaaja. Cante pueya panijiani, majaari ritia juaajia. Majaari na niishiniu naminiujiuhua, tamonu jaara sesa na miiri. ⁶ Cante pueya panijiani, nojuajaari pueyacuara taraajeja, nojori miishacari sesa. Saniniuujia, nojuajaari shuquiriaatia quiya pueya miishacari Pueyaso panishano. ⁷ Cante pueya panijiani, juhua janiya pueyaracaanu rejeretaari, tamasa miishacari sesa nojuaja. Majaari na taacanuunu Pueyaso sequesanojiniji, tamonu sequesanojinijino. Naajuhua, majaari na tarinitianu maninia miiniu pueyaracaanu. Pueya panijaari naa puetunu rejeretajajanaa, taraatia na miishacari.

⁸ Panijia pa quiniuni, cunoori pueyaracaanu panishaanutaniya, maja saa mijiria pa quishacariija. Naaratej, socua cutara panijia pa quiri. Mijiria pa quishacari, Pueyaso Sohuanuuri pa cumaquia Pueyaso sequenu panishano pa caminiujiuniuria, pa niishishoo rupaaca pa pocuanurajuhua, Pueyaso niishitishano pajaniya pa pohuatanurano. Puetunu nio niishishanojuanaari puequenutaniya Jesucristo tiuquishacariuhua pocua. Paniniu cutaraari puequeyaquiniutianiya. ⁹ Mijiria pa quishacari, paari saaja shiitianiyojua Pueyaso niishishano jiiitiaani. Pa niishishano Pueyaso-jiniji pa pohuatasani, cunoori saaja shiitianiyojua Pueyaso niishishano-jiniji. ¹⁰ Naacuajitij, mijiria pa niishishanoori najuhuaana quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianajanaani.

¹¹ Janiya jaara naatujua quiquiaarini, juhua naatujua pocuaquiarinijia. Juhua naatujua niishiriojuaquiarinijia. Saaja naatujua niishitaja jiiitaquiarinijia. Saniniuujia, janiya jaara cumantumaca quiquiaarini, janiyari cua naatujua quiniu niyajetaquiarini. Naajuhua mijiria pa quishacari, paari juhua naatujoori quiyajaa Pueyaso niquiarani. Pa Jiyaniija tiuquishacariuhua, paa cutaraari cumueeca Pueyaso pueya quiniutianiyan. ¹² Mijiria pa quishacariija, paari shiitianiyojua niishiyani. Paari

juhua ninitia niquiya jariyani, juhua sesarunee niquitiujinia. Pueyaso shuriucua pa quishacari, paari maatia niishiniutianiyani. Quiarijiani, saa shiitianiyojuajaari pa niishishano. Na nuhuaji, Pueyasota pa quishacari, paari puetunu maniniajanaa niishiniutianiyani, naatej, taa Pueyaso niishiya puetunu pajaniyajanaacuaani. ¹³ Quiarijiani, paari Pueyaso rupacua tiuuniu niishiyani. Naajuhuj, paari juhuajaniya sashiniu niishiyani, maatia pa niishishacari nojuajaari maninia miiniutianiya pajaniya. Nioori maniniacuaaja. Naajaa, pa panishacari Pueyaso, pueyano, cunoori socua maninia cutara Pueyasora, puetunu tamonu casaajiniujinijuanaa.

14

Niishishoo rupaaca pocuanujiniji niishitiojosano

¹ Naarate cua panishano Pueyaso muerasunaa, nia jiaatiare socua jiyanoehua pueya panijiaa nia quiniuria, Pueyaso panijiacajuhuj. Naajuhuj, nia jiaatiare Pueyaso Sohuanu cumaaca nia jitianura maninia nia miiniuria. Panishano cutaraari Pueyaso Sohuanu niishitiaja nia jitianura, Pueyaso sequenu panishano nia caminiujiuniuria Pueyaso pueyara. ² Cante niishishoo rupaa pocuaa pueya niqiara Pueyaso Sohuanu cumaacatani, cuno pueyanoori maja na cumaquiniu narta Pueyaso pueya. Na pohuatasanoori saaja Pueyaso tojishano, maja pueya tojishano. Cuno pueyanoori jiyasohuaja Pueyaso Sohuanu niishitishano pohuataa pueya niqiara najuhuanaj. Majaari pueya niishiniu casaa na sequeyani. ³ Saniniuujia, cante Pueyaso sequenu panishano caminiujiujia pueya rupaajiniani, cunoori narta Pueyaso muerasu cumaquiya. Na numooteyari. Na cumanjiaajaariuhuj. ⁴ Na pohuatasanoori maja najuhuaana na quiniu pueyara. Pueyaso pueya maanu tojishacari na pohuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuaana pocuaari. Saa tama noojia cumaquiyajaarijia. ⁵ Puetunu nijaniyajanaa jaara niishishoo rupaaca pocuanu niishijiaaca quiriqia, janiya maara shuquiriaatia quirini. Naajaa, janiya maara socua shuquiriaatia quirini puetunu nijaniyajanaa jaara Pueyaso sequenu panishano caminiujuniaa quiriqia Pueyaso cumaacata. Cante Pueyaso rupaa pohuatanani, cuno pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuaari mariyata panishano quiya, na sequesano jaara pueya rupaajinia pacusaare pueya tojishocoriqiano. Naacujitij, Pueyaso maapueeri cumaquishaanutaniyajuhuj, maatia Pueyaso sequesano nojori tojishacari.

⁶ Cuarta Pueyaso muerasunaa, ¿niaatucua taa sequereni, janiya jaara Pueyaso rupaa pohuataasee nijaniya nia niishishoo rupaajiniani? ¿Niaatucua cumaquishaare cua pocuasacari najuhuaana naa nia niqiaratej? Maja. Niaa cutaraari cumaquishano quiniutianiya, janiya jaara nia pohuatare nia rupaajiniajanaa Pueyaso niishitiojosano janiyani. Maniniajaariuhuj janiya jaara nia niishitiojore Pueyaso rupaa nia rupaajiniani. ⁷ Nia niishiriojore. Jiuujiaaju casamiiri rupaaracajuhuj. Naaratej, paari shuquiriaatia tojitiaa naajuaa jonesacarin, jaaquequetaja taquinisacarijuhuaj. Saniniuujia, pueyano jaara naajuaa jonejonejonu saniniujiya na niishiyaquishacarijia, saaja nareja cojuatuneyari. Naacujitij, cante na tojiyani, majaari na niishiniu casaa na jonenenu pania juucuan. ⁸ Naajuhuj, trompeta jaara sesa jonesesaare, ¿soldaduate na naata niishiniu casaa na miiniutianiyani? Maja. ⁹ Mariyata naajariuhuj, niaa jaara niishishoo rupaa pocuaa pueya niqiara, ¿pueyatucua taa niishirini casaa nia sequeyani? Niaari saaja nia niti taquiriocateya najuhuaana nojori niqiara. ¹⁰ Niaacujaari niishiya

queraatia rupaacaari mijiria quiya. Puetunu maniniajanaa cutaraari na niishiniaara. ¹¹ Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuanaari tahue quiya quiriajuhuaj. ¹² Cuarta Jesuucua tiuniaanaa, niaacuajaari Pueyaso Sohuanuucua jiaatiaquiaa, na cumaaca nia jitianura. Maniniacuaja. Naajaa, niajaniya cuaara jiaatiaara Pueyaso Sohuanu cumaquiniuria niajaniya, puetunu tamaatia poonijiosanojuanaa nia miiniuriajuhuaj, maja saaja tamaatia rupaacajinia nia pocuanura. Naacuajitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquishacari niajaniya.

¹³ Naaratej, cante niishishoo rupaajinia pocuaquiaa pueya niquiara Pueyaso Sohuanu cumaacatani, cuno cuaara secojoora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaa-jiniajuhuaj. ¹⁴ Pa secojosacari Pueyaso pa niishishoo rupaajinia, Pueyaso Sohuanuuri pa sohuanu secojoteya Pueyaso. Majaari pa niishitiaja niishiniu cutara casaa pa sequeyani. ¹⁵ Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu cuaara secojoora Pueyaso pa niishishoo rupaajinia. Pueyaso pa secojorejuhua tama pa rupaa-jiniajaaja. Naajuhuj, pa sohuanu cuaara jaaquequejoora Pueyaso niquiara pa niishishoo rupaajinia. Pa jaaquequejorejuhua tama pa rupaa-jiniajaaja. ¹⁶ Pueyaso Sohuanu jaara nia sohuanu secojotere niishishoo rupaajinia, nia tojtianaari maja na naata sequenu: “Jaa, cuaara naa quiiriatej”. Majaari nojori niishiniu tamaatia rupaajinia nia secojosano. ¹⁷ Naa naasucuaari jyanohua maninia secojija Pueyaso. Naajaa, saaja najuhuana quiyari tamasacara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaca. ¹⁸ Pueyanaa, shuquiriaatia quiyanjia Pueyaso niquiara, Pueyaso Sohuanu pocuatasacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaja socua niajanijajini cutarani. ¹⁹ Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niquiarani, cuno maara najuhuana quiriquiaj. Rupaquijia pahuatasano tama pueya rupaajiniajaajani, cunoori jyanohua socua maninia tucuyocua pahuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

²⁰ Cuarta Pueyaso muerasunaa, niaari najuhuana shuquiriya niishishoo rupaajinia nia pocuasacari pueya niquiara, naatej, taa naatujoori shuquiritiaquiaa quiarinio tacuarishijotajacuaani. Naa jaara juhua naatujoori quiniu paniyajaa, sesa niishiriojyashijia nia quiri, taa naatujoori quiyacuaani. Saniniuujia, majaari seetanujuanaa naatujoori niajaniya. Naaratej, cumantumaca nia quishacari, nia niishiriojore maninia nia cumaquitionura nia rerejosacari. ²¹ Tariucuaaanu, tama Pueyaso sequesanojaarija naajiotasaaquiaari. Naa sequeyari: “Janiyari taucuaca jiyaramiquiniutianiya cua saquiriojosano Israel pueyacuani, cua sequenu panishano nojori pahuatanura cua pueya. Cua pueya niishiyaquishoo rupaacajinia pahuatanutaniyari. Naajaa, niishiyanjia, tahua pahuatasacari cua rupaa, cua pueyari saa cua ruuretanutanijajaa, taa nojori ruuretaquiaa cua rupaacuaani jaara tama nojori rupaajiniajaaja pahuatasaaquiaa”.

²² Naa Pueyaso sequesacariitij, paari niishiyani, Pueyasoori tamaatia rupaacata na tojiyashijiaa tojtiniu saniniuujia nia rupaa jucua. Paari saniniuujia tari na rupaa tojtijajaca cutarani. Naaratej, majaari socua panishano Pueyaso sequenura pajaniya pa niishishoo rupaajinia, na tojtiniuria pajaniya nojuaja. Pueyaso sequenu panishano caminiujuushano

cutaraari pajaniyara. Cunocuaajaari tama pa rupaajiniajaaja. Cunoori maja Pueyasooocua tiuyashijiacara. ²³ Naaratej, Pueyaso pueya maapue rerejosacari, saaja secaja nijaniyajinijinio cuaara pocuara niishishoo rupaacajinia. Naa pocuanu nia tariniitiare quenaaja, tamasaca Jesuucua tiuyashijiaca qishacari nia rerejojuajinia, nojori mairiqui jiyaniiri: “iNio pueyaqui puetunu paatecoorijihuanajaj!” ²⁴ Saniniuujia, puetunu nia-janiyajanaa jaara Pueyaso sequenu panishano caminiujiya tama nia rupaajiniajaaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasanojuanaari noojia tacaatiniutianiya sesa miijia na quiniucua. Tama nojuajaarijia niishiniutianiya: “iJaniyaqui sesa miijia Pueyaso niquiarani!” ²⁵ Nia pohuatasano Pueyasojinijiiri puetunu sesa na miishanojuanaa na niishitiniutianiya noojiajia. Nocuaji, nojuajaari Pueyaso tojjijara quiniutianiya. Sequenutaniyari: “iPueyasoqui seetanujuanaa nia tajinia niya quiya!”

Puetunu nia miirijianaa maninia. Majaari nia riutiocojonu tamonu pocuasacari

²⁶ Naaratej, cua tojitiare taa nia miiniutianiyani cuarta Pueyaso muerasunaa. Naa nia miiri nia rerejosacari. Puetunu nia miishanojuanaa cuaara quiiria nia cumaquitooonura, socua maninia Pueyaso tojtianaara nia quiniuria. Naacuajitij, Pueyaso Sohanu cumaacata, tamonu naasucuaari jaaquequejonutaniya. Tamonu naasucuaari Pueyaso rupaa niishitiojonutaniya. Tamonu naasucuaari Pueyaso Sohanu niishitiojosano noojiajia caminiujiuniutianiya. Tamonu naasucuaari niishishoo rupaajinia pocuanutaniya. Na nuhuaji, tamonu cuaara na pacuura nia rupaajinia, maninia nia tojiniuria. Naa nia miiri maninia. Niquiriyatujua cuaara pocuara coteenu, na nuhuaji tamonu, na nuhuaji socua tamonu. Naate nia miiri. Majaari nia riutioconu tamonu pohuatasacari. ²⁷ Naa jaara niishishoo rupaajinia pocuanu paniri, cuaara pocuara saa querajaa pueyaja, maja socua. Cuaara pocuara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuaara pacuura pueya rupaajinia, niishishoo rupaajinia nia sequesano, pueya tojiniuria maninia. ²⁸ Niishishoo rupaa pacuna quiyaquishacari, cuaara pocuaaquiiria cante tamaatia rupaajinia pocuanu paniriquiaa nia niquiarani. Na naata sanaa pocuanu noojiajia tamajaaja, saa Pueyaso niquiaraja.

²⁹ Naajuhujaj, niaa jaara Pueyaso Sohanu niishitiojosano nioojiajia pohuatanu paniri, cuaara pocuara saa querajaa pueyaja, maja socua. Na nuhuaji, Pueyaso Sohanu cumaaca jiitianaa cuaara saniniuujia nia pohuatasano, nia niishiniuria, cunote seetanujuanaa Pueyaso Sohanu niishitiojosano, maja soj. ³⁰ Nia pohuatasacari Pueyaso rupaa, tamonu jaara pohuatanu paniya shusha Pueyaso Sohanu niishitiojosano noojiajia, cante pohuataajaani cuaara sanaajeera, na tarajana pocuanura. ³¹ Naacuajitij, puetunu Pueyaso niishitiojosano jiitianaajanaari na naata na pohuatanu. Naaratej, niquiriyatujua cuaara pohuataara, na nuhuaji tamonu, na nuhuaji socua tamonu. Naacuajitij, puetunu nijaniyajanaa na naata pohuatanu nia niishishano Pueyasojiniji. Naacuajitij, puetunu Pueyaso muerasujuanaari maninia niishitiojosano quiniutianiya, maninia cumaquishanojuajaj, maninia nia miiniuria. ³² Maja timia pocuanu jaara-jaja tamonu pocuasacari. Majaari Pueyaso Sohanu pocuateni tari nijaniya, tari tamonu pocuasacari. Nia naata cutaraari sashiniu nia

pocuanura. ³³ Pa Pueyaso cutaraari maninia miijijajanaa. Maja cushitiojowa. Naarate pueyanaa, maja tamasa pocuasacari pa riutiocojonu. Saaja maninia pa miiriquia pueyaraaanu.

Cua tojitiare socua. Puetunu Pueyaso pueya maapuejanaa cuaara naa miiria na rerejosacari. ³⁴ Maajipohua cuaara sanaa tojitiaara Pueyaso rupaa pohuatasacari. Maajipohua cuaara niishitiojiyaquiiiria pueya niqiiara. Maajipohua cuaara tojijiara quiiiria, taa pa niishitiojosaaquiaari Moisés Rootasanoinijicujani. ³⁵ Maajipohua jaara niishiniu paniya socua pohuatana niishitiosanojiniji, nojori cuaara nequesotohuara neyaca tama na tiajiniajaaja, na que maaraja. Cararaatia cutaraari maaji jaara nequesoreetare caya pohuatasacari, Pueyaso muerasu rerejojuajinia. ³⁶ Nia tojiri nio cua rootasano pueyanaa. Niaacuajaari niishiya, Pueyaso rupaari supueyaquiquiaari nijaniyajiniji. Naajuhua, majaari Pueyaso rupaa pohuatanaa jiyaramiquiniu quishaaquiaari saa niaacuaja. Tamonu jiyacajinia, queraatia Pueyaso pueya maapueeri cua niishitiojosano tojitiaquiaa maninia cutara. ³⁷ Nijaniyajinijinio, noojiaqueya pueyari Pueyaso Sohuanu cumaaca jiiitaa, nia niishiniuria cana cumaacata tamonu pueyano niishitiojiyani. Naacuajitij, ¿taa nia sequeyani? ¿Majate Pueyaso Sohuanu niishitiojosano cua sequesano nijaniya? ³⁸ Cante nio niishiniu paniyaquiyani, cuno jiyoteeri maja Pueyaso Sohuanu cumaacaraca quijia. Cuno pueyano cuaara tojiyaquishaaria saniniuujia.

³⁹ Naacuajitij cuarta Pueyaso muerasunaa, nia jiaatiare Pueyaso Sohuanu cumaaca nia jiiitanura, pueya niqiiara nia pohuatanura Pueyaso Sohuanu niishitishano nijaniya. Naajuhua, majaari nia tenuityu noo pojori, canapete niishishoo rupaacajinia pocuanu paniyani, Pueyaso Sohuanu cumaquishacari nojori. ⁴⁰ Nareja maninia nia miiriquia puetunujuanaa. Naacuajitij, niquiriyatu cuaara pocuara coteenu, na nuhuaji tamonu, na nuhuaji socua tamonu.

15

Cristo samiitiasacariuhua

¹ Cuarta Jesucua tiuuniaanaa, Jesucristo rupaa nia niishiriohua, tarija cua pohuatasano nijaniya, nia jiyanooshaanurani. Niaari nocua tiu-uquiaari maninia. Niaari quarijia maninia na tojtiaajaa. ² Naacuajitij, Jesucristoori niaacuaji tacuquiaa quarijia, maninia nia tojtiasacari na rupaa, taa cua pohuataquiaari nijaniyacujani. Niaacuajaari Pueyaso pueyara jatanishano quiya niaa jaara maja najuhua na rupaa tojiyaquiquiaari. ³ Janiyari niaara caminiujuquiaari Jesucristo rupaani, taa cua tojiqiaaricuaani. Nio cutara rupaa nia coteetaquiaari pohuatanunjia: Cristoori pocuara cusoquiaari niyacutesanojinia, sesa pa miiniucua. Tariucuacaanu Pueyaso sequenu panishano caminiujiuniaari naa naajotaquiaari, taa Cristo miishaanutaniya naquiyani. Seetanujanaa naa miishaaquiaariiri. ⁴ Jesucristo cusonu nuhuaji, raaco niasaaquiaariiri. Jiuujanaraca juuca jaara na shoconujuquiaari macu na quishacari, na raaco samiitiquiaariuhuari. Naa tohuateequiaariiri puetunu tariucuacaanu Pueyaso Rupaa-janaa, taa nojuajiniji naajiotasaaquiaaricujani. ⁵ Na nuhuaji, Jesucristoori Pedroocua muetaquiaariuhua. Na nuhuaji, na jiyaramiquishocoriquiano pueyacua muetaquiaariiaariuhua. ⁶ Na nuhuaji, muetaquiaariijuhua na tojtianaa rerejosaquiiiri. Socua quiniento pueyari na niqitiquiaari jiyacari. Queraatia jiyacari na niqiniaajinijinio pueyari saminio quiyajaa. Noojiaqueyari tari shaajecocanu. ⁷ Na nuhuaji, pa Jiyaniijaari Santiagoocua

muetaquiaarijuhuaj. Na nuhuaji, muetanu pacutequiaariuhua na doce jiyaramiquishocoriquiano pueyacuuaari.

⁸ Puetunu cuno pojori nuhuaji, Jesucristoori socua cucua muetaquiaarijuhuaj, nocua tiuuja cua quiyaquishacarijia. Naa na paraca cua quishacarijiatej, Jesucristoori cucua muetaquiaari na jiyanoonuria janiya. Ritia cua jiyatequiaariiri na jiyaramiquishano cua quiniuriajuhuaj. ⁹ ¿Casaaraquitijia na saquiriojoquiaari janiyatejaj, na jiyaramiquishano cua quiniuriajuhuaj? Janiyari puera sesa mijia quiquiaarini cua niishiyaquishacari Jesucristo. Cucua na muetaquishacarijia, janiyari Pueyaso saquiriojosano pueya mitiaquiaarini. Cuarta Jesucristo jiyaramiquishano pueyari maja naa sesa mijia na qutiuniu quiquiaari. ¹⁰ ¡Pueyasoori jiyanoohua maninia! Cua jiyanooquiaariiri Jesucristo jiyaramiquishano cua quiniuriajuhuaj, taa cua quiya quiarijiacuajani. Naa quiyanjia Pueyaso jiyanooniuucua janiya. Majaari najuhua na jiyanooniu quiquiaari janiya. Na jiyanooshacari janiya, janiyari socua jyanohua nera poonijiocanu cuarta Jesucristo jiyaramiquishano pueyajinijini. Naajaa, maninia cua poonijosanoori maja tama cua miishanojuaja na quiniu. Pueyasocuajaari cua cumaquiquiaa na Sohuanuta, maninia cua miinuria na panishano.

¹¹ Naacuajitij, naa sequeriquiaa niajaniyanijia: cante nia pohuataquiaari Jesucristo rupaani, naajaa. Janiyari Jesucristo rupaa pohuataquiaajaacuhuj, mariyata taa cuarta Jesucristo jiyaramiquishano pueya pohuataquiaacuuaani. Majaari rimiajata canaa pohuatasano. Niaari cuno ru-paacua tiuuquiaari maninia.

Pueyaso muerasu macunucua samiitiasacariuhua

¹² Cuarta Jesucristo tiunianaana, canaa jaara pohuatariquiaa taa Cristo samiitiaquiaariuhua macujinijini, ¿casaara noojiaqueya niajaniyajinijinio sequequiaani: “Macunucua maja na samiitiaconu quiniutianiuhua”? ¹³ Macunucua jaara samiitianiyaquishaanutaniya taa nia sequequiaacuajani, Jesucristo jiyoteeri macu quiyajaacuhuj. ¿Cristoteeri macu quiyajaa? ¡Maja! ¹⁴ Cristo jaara macu quiriquiaja, canaa maara najuhua pohuataa na rupaani. Naajuhuj, niaa maara najuhua Jesucristoocua tiuya, na pueya nia quiniu paninuria juucua. ¹⁵ Canacuajaari pohuatanuuquiaani Pueyasoori Jesucristo samiitianiquiaariuhua. Macunucua jaara samiitianiyaquishaanutaniya taa nia jiyaniquiaacuajani, canaa jiyoteeri sapojonuujuaa Pueyaso jiyaramiquishano pueyani. Naacuajitij, nia sequesano jaara seetanujuanaa quiri, maja jiyoteeri Pueyaso samiitianiniu quiquiaariuhua Jesu. Saniniuujia, ¡niaari jiyajeneya cutara! ¡Pueyasocuajaari seetanujuanaa Jesu samiitianiquiaariuhua! ¹⁶ Macunucua jaara samiitianiyaquishaanutaniya taa nia sequequiaacuajani, Cristo maara samiitiaquiquiaariuhujahuaj. ¹⁷ Cristo jaara samiitiaquiquiaari, niaa jiyoteeri Cristoocua tiuya najuhuanaj, Pueyaso na jiyanooninuria juucua niajaniya. ¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhuj. ¿Naatejaaratej? ¹⁸ Cristo jaara macu quiriquiaja, tariucua shaajecono nocua tiuniana pueya maara taraatia quiriquiaj. Nojori maara taraatia shaajecanu puetunurajanaa, maja quenaaja nojori samiitiaconuhua. ¹⁹ Pajaniyajuhuj, canapueete saminio quiyajaani, paa maara jyanohua taraatia quiyani, pueyaracaanu najuhua naquiya pa miishacari mijiria. Jaara naa quiritij, pa jiyaniijia Jesucristo jaara macu quiriquiaja, paa maara najuhua poonijioriquia pa shuquiritiniuria nojuaja juucuan.

²⁰ ¡Namitia naa quiaquiyari! ¡Cristoori seetanujuanaa samiitian-shaaquiaariuhua! ¡Canaari na niquitiaquiaarini! Naacuajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu samiitiasacariuhua coteenu pocuajicuaatej, naacuajitij paari niishiyani puetunu shaajecono nocua tiuuniaajanaari samiitianishaanutaniuhuaacuhuj. ²¹⁻²² Paacuajaari niishiyani, pa supuetana Adánri coteenujuanaa shaajequiaari, Pueyaso na tojiaquiniucua. Naacuajitij, puetunu nojuajiniji supuenaajanaari shaajecoquiaajuhuj. Adán nuhuaji, parta pueyano Jesucristoori saniniujia Pueyaso tojijia quiquiaari cutara. Naacuajitij, nojuajaari samiitiaquiaariuhua. Naaratej, puetunu nocua tiuuniaajanaari samiitianishaanutaniuhua, pueyaracaanu saminio pa quiniuhua pa Jiyaniijata. ²³ Pa Jiyaniijia Jesucristoori coteenu samiitiaquiaariuhua. Cristo nuhuaji, puetunu nocua tiuuniaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua Pueyaso panishacarini. ²⁴⁻²⁶ Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianiuhua, na tucuatenuhara puetunu na Que panishanojuanaa. Na Queeri na jiyaronutaniya puetunu na paraajanaa na pueconura. Jesucristoori Jiyaniijajanaa quiniutianiya, na Que cuara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiacajanaano. Sesaacaari jataaanutaniyajuhuj, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojuana shaajanutaniyajaariuhuj. Majaari cusonu niishishaanu quiniutianiya socua, shaajenunio. Puetunu casaajanaa jaara maninia jittiasano quiriohua, Jesucristoori na Que na niqutionutaniuhua, na Que jitianuhua puetunujuanaa.

²⁷ Na Que Pueyasoori Jesu jiyatequiaari Jiyaniijia na quiniuria jiyanohua na cumaacata. Naacuajitij, nojuajaari na naata puetunu casaajanaa na tojitianiniu. Nojuajaari Jiyaniijajanaa. Saa na Que Pueyasojuuari socua Jiyaniijajanaa, maja tamonu. Pueyasojuanaari Neyanu jiyaroquiaari puetunu na shipinishanojuanaa na jeenucuanura na cumaacata. ²⁸ Na tucuatascari, pa Jiyaniijia Jesucristoori na Que sequenutaniya: “Cua Quena, tari tucuataree quia panishanonijia. Puetunu quia paraajanaa quejoore tarinijia. Majaari socua sesa na miiniu quiniutianiya. Saa quiajaniyajaari pueyaracaanu Jiyaniijajanaa quiniutianiya cutara, maja socua tamonu”. Naacuajitij, pa Que Pueyasoori Jiyaniijajanaa quiniutianiya pueyaracaanu, puetunu na shipinishanojuanaa na jitianura maninia.

²⁹ Socua nia niishiriojore pueyanaa. Niaa jaara jiyaniyajaa macunucuaari maja na samiitianishaanu quiniutianiuhua, ¿casaara pueya tiuquiniijosaaquiaa moojinia macu nitini, cuno macu jaara na shaajeyaquishacarijia Jesucristoocua tiuuri? Paa jaara tiuquiniijosaaquiaa Jesucristoocua pa tiushacarini, paari miriqui miyani taa pa Jiyaniijia Jesucristo miishaaquiaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhuari. Naajuhuj, paari mariyata samiitianishaanutaniuhuan. Niaari sequeya macunucuaari maja na samiitianishaanu quiniutianiuhua. ¿Naatejaaratej? Macunucua jaara samiitianijyaquishaanutaniuhua taa nia jiyaniyacujani, ¿casaara pueya tiuquiniijosaaquiaa shusha shaajeno macu niticuaarini?

³⁰ Paa jaara samiitianiyaquishaanutaniyani taa nia sequequiaacuajani, canaquiiri najuhuaana tama canaa cuaqueyajaaja panitiaquiaani, pueyara-

caanu canaa poonijiosacari pa Jiyaniijia. ³¹ Seetanujuanaa nia sequeyanijia, janiyari jiyanoehua shuquiriaatia quiyani, Jesucristoocua nia tiuushacari, cua pohuatanuucua na rupaa nijaniya. Seetanujuanaajaarihuaj, pueyari cua monu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiquiaa puetunu juucajanaani, cua niishishacari janiyari samiitianishaanutaniuhua. ³² Pa Jiyaniijia jaara macu quiya taa nia sequequiaacuajani, janiyaqui najuhuana Jesucristo rupaacuaji tacuriquiaani nio sesaaca pueya tajinia cua quishacari niya Éfeso tiacajiniani. Nojoriiri juhua puereeta sayoru quiriquiaa cucuaji. Janiyaqui najuhuana Jesucristo shuquiritiriquiaa juucua, nojuaja jaara samiitianiyaquishaaquiaariuhua. Paa jaara samiitianiyaquishaanutaniyani, pa miiriqui taa Pueyaso tojiyashijia sequequiaacuajani: “Pa shuquiriri saminiio pa quishacarijia. Pa queranacunuure. Pa mashaasequenuurejuhuaj. Naajaa, pa shaajesacari, pocua puetunu shaajequeejanaani”. Naa sesa miiquioquiaari noo pojori, canapeete jiyaniyani macunucuaari maja na samiitianishaanu quiniutianiya.

³³ Pueyanaa, tama nia cuaqueyajaaja nia cojuare, niaa mariqui sapojosareeri naa sesa nia niishiriojurajuhua. Tamonu pueyanoori naa sequequiaari seetanujuanaatej: “Maninia miijiaari sesa miijiaara jatanishaaree na cojiniuucua sesa miijiaa”. Naaratej, majaari nia cojiniu sesoriquia pueya, niaa mariqui seserejaarihuaj. ³⁴ Niishiriojojuara nia quiri. Sesa nia miiniu nia cartere. Noojaqueya nijaniyajinijinioori Pueyaso niishiyashijiaa quiyajaa. Naa nia sequereenijia pueyanaa, quenaaja nia caririqiniuria.

Taamueca pa quiniutianihuani pa samiitiasacariuhua

³⁵ Tamonu nijaniyajinijinio naasucuaari niishiriojia: “¿Taa macunucua samiitianiijiosaanutaniuhua jaarani? ¿Taamuecate na cuaqueya quiniutianiya?” ³⁶ Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquinatejaj. Saa na co moquesacarijia na naata moritiano. ³⁷ Naajuhua, niaa jaara saaco natate, tamaatia jajaujuhuaj, nia natasano jajauri maja juhua neyonarano niquishano. Nia natasanoori saaja shiitianiyojua jajau quiya. Na moritiasacari, jiyanoehua tamaatia niquishiyari. ³⁸ Pueyasoori na maashitiya puetunu na jaamasucatajanaa, taa na paniyacuajani. Pueyasoori puetunu jajaujanaa moritianijia tamaatia niquishano na quiniuria. Naa quiniutianiyajaariuhua macunucua samiitiasacariuhua. Majaari pa cuaqueya quiniutianiya taa na quiya quiarijiacuajani. ¡Pa cuaqueyari jiyanoehua maninia quiniutianihuua!

³⁹ Majaari puetunu cuaqueyaraca casaajanaa mariyata na quiniu. Naacuajitij, pueyano cuaqueyari tamaatia quiya casaa cuaqueyajiniji. Shuhua cuaqueyari tamaatia quiyajuhua. Sapitiaaja cuaqueyari tamaatia quiyajuhua, moojinia na quiniuria. ⁴⁰ Jiyocuaaanu quijiaaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajiniji. ⁴¹ Naajuhua, pananuuri jiyanoehua shacantuuca quijia. Raca shacantuucaari tamaatia niquishano pananu shacantuucujiniji. Riya shacantuucaari socua tamaatia niquishano. Naajuhua, puetunu riyajanaari tamaatia niquishano narta riyajiniji. Puetunu Pueyaso shipinishanojanaari naa tamaatia quiya.

⁴² Naajuhua, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijiaaari saniniujia samiitianishaanutaniuhua, pueyaracaanu na quiniuria. ⁴³ Jamosano

pa quete sequeeri samiitianishaanutaniuhua, jiyanoehua shanohua niquis-hano na quiniuria. Cumaacaaju jamosanoori samiitianishaanutaniuhua jiyanoehua cumaacarara na quiniuria. ⁴⁴ Pa cuaqueya jamosanoori saaja jiy-acua rucuanajaca quiquiaari. Paari samiitianishaanutaniuhuanii tamaatia cuaqueyata, jiyocuacaanu quijiaca pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucuanefonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiriirinij.

⁴⁵ Pueyasoori coteenu pa supuetana shipiniquiaari marajiniji. Na nuhuaji, na samiitianiquiaariiri. Moisés Naajioneejiniaari naa naajio-tasaaquiaariti:

“Adánri saminiora quiquiaari Pueyaso nooshacari na jiquioco”.

Jesucristoori saniniuuja jiyatesaaquiaari juhua pa supuetanara na quini-uria pa supuetana Adán niti. ¡Jesucristoori jiyanoehua socua cutara Adánjiniji! Adánri samiitianishaaquiaari saminio na quiniuria. Jesucristo cutaraari pa samiitianijajanaa na Sohuanuta. ⁴⁶ Coteenujanaa pa supuetanani, majaari na shipinishaanu quiquiaari jiyocuacaanu quijarano. Cunora, coteenu pa cuaqueyari saaja mijiria quijiara. Na nuhuaji, pa cuaque-yari jiyocuacaanu quijiara jatanishaanutaniya mariyata juhua Jesucristo cuaqueyara. ⁴⁷ Adánri saaja mijiria quiriqiano quiquiaari. Marajiniji ship-inishaaquiaariiri. Jesucristoori saniniuuja jiyocuacaanujinio. ⁴⁸ Puetunu Adáncaujinio supuenojuanaari saaja mijiria quijiaca. Naaratej, puetunu pa-janiyajanaari saaja cusunuujuacani, juhua pa supuetana Adánjuhuaj. Jesu-cristo muerasuuri saniniuuja juhua pa Jiyaniijia Jesucristo quiniutianiya, jiyocuacaanu quijiaca pa quiniuria. ⁴⁹ Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiarijia socua maninia Adán cuaqueyajiniji. Pa samiiti-asacariuhua, pa cuaqueya cutaraari quiniutianiya mariyata juhua cuno jiyocuacaanu Quijia cuaqueya. Nojuacuajaari pa samiitianinia Jesucristo.

⁵⁰ Cuarta Pueyaso muerasunaa, maja pa naata Pueyaso rupeenu nio pa cuaqueyataja. Pa rishiyashijia cuaqueyari maja na naata cuno pueyara-caanu Quijia rupeenu. ⁵¹ Naajaa, cua tojitiare. Nia pohuatereera pueya niishishoo. Majaari puetunu pajaniyajanaa cusunuuriquianoni. Puetunu pa cuaqueyajanaa cutaraari jatanishaanutaniyani, maninia cuaqueya pa ji-itianura, juhua Jesucristo cuaqueyajuhua. ⁵² Jiyocuacaanuji trompeta jone-sacari, pa cuaqueyari ritia jatanishaanutaniya, naatej, taa pa nimishini-uquiya ritiacuaani. Pa Jiyaniijia naacuneetoonu panishacari pajaniya-ta, Pueyaso trompetaari tojishaanutaniya joneshiyano, na mueras na jiiquoonura. Canapuate macu quiyani, quiarinio cuaqueyata ritia samiitianutaniuhuari. Pajaniyajuhua, canapuate saminio quiyajaani, pa cuaqueyari ritia jatanishaanutaniyajuhua, quiarinio cuaqueya pa jitianu-rajuhua, shaajeyashijiaa pa quiniuria. ⁵³ Cusunuuja cuaqueya cuara jatanishaaria, rishijia cuaqueya pa jitianura saniniuuja. Nio moqueja pa cuaqueyani, jataniniu panishiyari, maninia cuaqueya pa jitianura, pueyaracaanu pa quiniuria Pueyasota.

⁵⁴ Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacar-iti j pocua niishirini tariucuaaanu sequesanoori tari tohuateeree. Naa naajiotasaaquiaari tariucuaaanu Pueyaso Rupaaajinatej:

“¡Jee! ¡Pa Jiyaniijiaari na muerasu mashiquirii macunucua quiquojiniji!

⁵⁵ Cusojuananaa, ¡quiaaqui tari shocotasaree! ¡Quiaari shocotasaree!

Sesaacanaa, quia cusojuatajaari juhua mohuacara quiquii cumaa-caaju. ¡Shaajeconoori samiitiacoree!”

⁵⁶ Pueyanaa, puetunu pajaniyajanaari cusunuuquiaa sesa miijiaca pa quiniuucua mijiriani. Paari sesa quiquiaani pa tojiyaquishacari tariuucuaa-canu Moisés Rootasano Pueyasojiniji. Naaratej, puetunu pueyajanaari cusunu niishiya. ⁵⁷ Naajaa, pa Jiyaniijia Jesucristo miishanota pocuara, Pueyasoori pa mashiquiquiaa pa cusoyaquiniuucujaji. Naaratej, paari Pueyaso sequequiaani: “¡Paacarasho canaa Pueyasonaa! Quiaacuajaari canaa shocotaniniutianiya cusunu, quia Niyanu cusunuuca canaacuara, pueyaraaanu canaa quiniuria quia shuriucua. ¡Jiyanohua paacarasho!” Paari naa maniniuhuaqueetaa pa Que Pueyasoni.

⁵⁸ Naaratej cua panishano pueyanaa, nia numaama nia racatare cua niishitiojosano nijaniya. Saa Pueyaso rupaaja nia tojitiare, maja tamaatia niishitiojosano. Pa Jiyaniijara nia poonijiore socua jiyanohua, na panishano nia miiniuria saaja. Pa Jiyaniijara pa poonijosanoori maja najuhuana na quiniu.

16

Casamiijuniucua Pueyaso pueyara cumaneeca reratesacari

¹ Quiarrijiani, nia riuquareera taa nia miiniutianiyani, cumaneeca nia reratenura casamiijuniucua. Cuno cumaneecani, paari na jiyaronutaniya parta Pueyaso muerasura Jerusalén tiacajiniani. Niaa cuara maninia miiria, mariyata taa cua rootacanucuaa Pueyaso pueya maapre Galacia jiyajiniani. ² Naa nia miiritij. Puetunu domingo juucajanaa, puetunu pueyajanaa cuara racataara tama na niqutiosocoriquiano cumaneeca, tevano nia niqutionutianiya niarta Pueyaso muerasuracujani. Naa nia racatare juhuataja nia niqutiosocoriquiano cumaneeca puetunu seamaanajanaa, maja na reratesaanura shusha cua tiuquishacari niaacua. ³ Niocua maninia pueya saquirojore, nia niqutiojosano cumaneeca nojori patanura Jerusalén tiacajinia. Naacuajitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesuucua tiuuniaa pueyacuara Jerusalén tiacajinia, nojori cuara shuquiriaatia maseera cumaneecata nia jiyarotasano pueya. ⁴ Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuaj.

Pablo naquerejosacari

⁵ Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tiuquiniutianiyani. ⁶⁻⁷ Janiyari maja ritia cua tajiniu paniniu nijaniya. Niaata camueenujunu paniya pueyaraaanunijia, pa Jiyaniijia jaara naa panijahuaj. Janiyari shuniya shocotenu paniya niaatani. Na nuhuaji, nia naata cua naacunu cua jitianura cua panishano, cua pasocoriquiano tee Pueyaso jiyaronu paniya janiyacujani. ⁸⁻⁹ Janiyari niya Éfeso tiacajinia camueenujijajaanoni, Pentecostés juuca cua sashishacari. Queraatia pueyari Jesucristo rupaa tojitianu paniya niya. Naajuhuaj, queraatia pueyari Jesucristo rupaa ruuretaa saniniuujia. Naaratej, janiyari jiyanohua socua Jesucristo rupaa pohuatanu panijajaa Éfeso pueya niquiarani. Naajaa, janiyari niaacua quianutianiyani Pentecostés juucara queranacunuunu nuhuaji.

¹⁰ Timoteo jaara niaacua tiuquishii, niocua na cumaquiri Pueyaso rupaa na pohuatanura na puereyaquiniutia. Timoteocujajari pa Jiyaniijara poonijioquiaa mariyata taa cua poonijioquiaacuani. ¹¹ Naaratej, maja

Timoteo nia rerequetenu. Niocua na naacure saniniuujia, cucua na tiuquini-
 uhuara shuquiriaatia, maninia nia miiniuucua nera. Janiyari niya na
 sashiya parta Pueyaso muerasutani. ¹² Janiyari Apolota pocoojoriquiaani.
 Janiyacuajaari na nenecojoriquiaa juucuan, niaacua na quianura parta
 Pueyaso muerasuta quiarijiani. Nojuajaari saaja cua sequere majana na
 quianu paniniu quiarijiani. Tamacari niaacua quianutaniyaquiniaari, jaara
 na naata quiri.

Pablo sequesano, naajionu na puecasacari

¹³ Cuarta Jesucua tiuuniaanaa, niishiriojuaca nia quiri. Jesucristo ru-
 paa nia niishiri maninia, seetanujuanaa na tojtianaara nia quiniuria. Juhua
 cumueca mashaja nia quiri Pueyaso Sohuanu cumaacata, pa Jiyaniijia
 panishano nia miiniuria. ¹⁴ Puetunu nia miishanojuanaa cuaara quiriia
 seetanujuanaa nia paniniutia.

¹⁵ Pueyanaa, niari niishiya Estéfanasri necohuata coteenu Jesucristo toji-
 tianaara quiquiaari cuniqui Acaya jiyajiniani. Nojoriiri Pueyaso muerasu
 naacquiaa pueyaracaanu nojori paniniutia. ¹⁶ Naarate nia sequenu
 paniyanijia, nijaniya cuaara quiriia juhua nojori seya, nia cumaquiniuria
 nojori, maninia nojori miishacari. Naa nia cumaquiriti puetunu jiyano
 pueyajanaa, noo pojori canapuate naa maninia miiquiaa Pueyaso muera-
 sucujani.

¹⁷ Jiyanhua shuquiriucuaanijia Estéfanas tiuquishacari nijaniyanijiji
 Fortunatota, Acaicotajuhua. Nojoriiri cua shuquiritiriucuaa nia niti, cua
 jiaatiasacari cua niquiniuria nijaniya juucua. ¹⁸ Nojoriiri coojia cajitir-
 iucuaa puera cua niishiriojiaquiniucuaaji niaacua. Nojori naasucuaari
 nioojia cajitiquianujuhua, nojori pohuatasacari nijaniya janiyanijiji. Ni-
 ajaniya cuaara shuquiritiaara nojori, naa nojori miishacari maninatej.

¹⁹ Pueyaso muerasu maapue niya Asia jiyajiniaari cua sequerucuaa,
 cua saruhuatanura nijaniya. Aquila, Prisciliano, nojoriiri jiyanhua nia
 saruhuataajuhua, narta Jiyaniijia muerasu nia quiniucuaajuhua. Pueyaso
 pueya maanuuri nia saruhuataajuhua, nooj, teyanote Aquila tijinia rerejo-
 quiaacujani. ²⁰ Puetunu parta Pueyaso muerasujanaari niya nia saruhu-
 ataajuhua. Nia saruhuatatoosacari, nia saruhuatatoore seetanujuanaa
 Pueyaso paniniutia.

²¹ Quiarijiani, tama cua juaashiquiatajaaja saaja nioniyojua naajioreeraj,
 cua saruhuatanura nijaniya. Naacujitij, niocua niishiri nio naajioneeri
 seetanujuanaa janiyanijiji.

²² Cante maja pa Jiyaniijia panijia quiyani, Pueyaso cuaara jataara cuno,
 saniitiosocoriquiano.

Jiyaniijianaa, quia nimiohua!

²³ Pa Jiyaniijia Jesu cuaara cumaquiriia nijaniya na Sohuanuta.

²⁴ Janiyari puetunu nijaniyajanaa paniyani Jesucristo paniniutia.
 Tariucuja, cua panishano pueyanaa.

TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya maanu Corinto tiacajinia

¹ Janiyari Pablóni. Pueyaso panishacari, janiyari Jesucristo jiyaramiquishanora jiyatesaaquiaari na rupaa cua poojotanurani. Janiyari Timoteota naajiya nio niaacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanuucuaara naajiyani, puetunu Acaya jiyajinia Pueyaso tojtiajaca pueyacuaraanaano. ² Pa Que Pueyaso, mariyata pa Jiyaniijia Jesucristo cuaara cumaquiiria niajaninya. Nojori cuara jiyateera niajaninya juhuajaniya quijiaca nia quiniuria.

Pablo miishacari naquiya

³ Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumanijiana. ⁴ Nojuajaari pueyaracaanu pa cumanijiaquiaa naquiya pa miishacari. Naacuajiti pa naata cumanijianu tamasacajuhuj, naquiya nojori miishacari, taa Pueyaso cumanijiaquiaa pajaniyacuaani. ⁵ Seetanujuanaa, Cristo rupuejaca pa quishacari, paari naquiya miishaaquiaajuhuj, taa naquiya na miishaaquiaaricuaani. Naajaa, nojuajaari pa cumanijiaquiaa shuquiriaatia pa quiniuria. ⁶ Naacuajitij, canaa jaara naquiya miishaaquiaa Cristojiniji canaa pohuatanuucuaani, Pueyasoori canaa cumaquiquiaa saaja canaa rejeretanura. Naacuajitij, majaari canaa tarintianu Pueyaso Rupaa pohuatanu nia niqiuara, seetanujuanaa Pueyaso pueya nia quiniuria, nia cumanijiasaanurajuhuj. Naajuhuj, Pueyaso jaara canaa cumanijiarecuaa, naacuajitij, canaa naata nia cumanijanujuhuj. Canaari nia cumanijiaani, maninia rejeretajaca nia quiniuria naquiya nia miishacari, taa canaa rejeretaquiaacuaani naquiya canaa miishacari. ⁷ Canaari seetanujuanaa niaacua tiuyani, niaari cumanijiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniucuaajuhuj, taa canaa miiquiaa naquiyacuaani. Naacuajitij, Pueyasoori nia cumanijanutanijajuhuj, taa na cumanijiaquiaa canaacuaani.

⁸ Canaa panishano Pueyaso pueyanaa, canaari paniyani nia niishiniuria taa canaa tacaaquianuni, jyanohua naquiya canaa miishacari Asia jiyajinia. Canaari puera jyanohua taraatia miiquianuni. Jiyacari, majaari tari canaa jiiťianu quiriquiaa cumaaca canaa rejeretanura socua. Canaari jyaniriquiaani maja naasucua tari canaa rishiniu quiniutianiya.

⁹ Seetanujuanaa, canaari jiyaniijiani Pueyaso naasucuaari nareja canaa shanacunutaniya canaa cusonuunura. Naajaa, naacuajitij, Pueyasoori jiyacari canaa niishitiriquiaa maja canaa tiuuniuria tama canaacuaajaaja, saaja nocua canaa tiuuniuria cutara. Nojuacuajaari macunucua samiitianiijojua.

¹⁰ Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusonuunura. Nojuacuajaari socua canaa cojuanutaniya nocua canaa tiuuniucua, niaa jaara canaacuara secorejehujuhuj.

¹¹ Naacuajitij, Pueyaso miishacari maninia canaa, queraatia pueya secjonuucua canaacuarajuhuj, queraatia pueyari Pueyaso sequenutaniya, “paacarasho”.

Pablo pohuatasano casaara na quiaaquiiaari Corinto pueyacuaani

¹² Canaari shuquiriaatia quiyani canaa niishishacari canaari maninia quijiaca quiquiaari canaa quishacari niaatani, Pueyaso niishiyashijiaca

niquiaranio. Majaari canaa sapojonu quijia nijaniya. Canaari seetanujuanaa niaacua taraajejani Pueyaso jiyatenuucua canaa nia panijiaa canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitiajataaja. ¹³ Cunora, janiyari nia nequesotaani, ¿casaara nia cushitiiquianu canaa naajionee nia serojosacarini? Puetunu canaa naajioneecajinijanaa majaari canaa naajionu quiquiaa jiyajeneta casaa, nia cushitiiniuria. Puetunujuanaacuajaari maatia niishishaatia quiquiaa nia serojosocoriquiano. ¹⁴ Niaacuajaari tari secaja niishiya taa canaa paniya jiyanoehua nijaniyani. Pa Jiyaniijia Jesucristo tiuquishacariuhua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijiaa quiquiaarini. Naajuhuj, nijaniyari canaa timitiasano quiniutianiyajuhuj.

¹⁵⁻¹⁶ Cua jyanishacari niaa naasucuaari seetanujuanaa cua panijiaa, taa cua paniquiaa nijaniyacuaani, janiyari cunora naquerejocanu niaacua juucuaani. Niiquiji cua quiasacari Macedonia jiyajiniara, janiyari nia niquiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacarini. Naacuajitij, janiyari niishiriojoriquiaani cua naata naasucua nia shuquiritiniu Pueyaso rupaata, cua quiasacari Macedonia jiyajiniara, naajuhuj, cua tacatesacariuhua cunocojuhua. Janiyari niishiriojoriquiaani nia naata naasucua cua naacunu cua panishanotajuhuj, Judea jiyajinia cua quianuhuara.

¹⁷ ¿Niaateeri jyaniquianu janiyari nareya nia sequecanuni, naa cua sequesacari coteenujuanaa cua naajiojiniatej? ¿Niaateeri jyaniya, naa cua naquerejosacaritij, janiyari tama cua panishanojuaja miiniu paniquianuni, maja Pueyaso panishano? Seetanujuanaa, majaari coojia cua niqijiotenu quiquianu naa cua sequesacari nijaniyatej. ¹⁸ ¿Janiyateeri coojia niqijiotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocuaajaari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacuajaari seetanujuanaa. ¹⁹ Naajuhuj, Neyanu Jesucristoori jataashijia. Silvano, Timoteo, janiyajuhuj, canaari nojuajiniji nia niquiara pohuatanaani. Paari nojuajiniji niishiyanu puetunu Pueyaso sequesanojuanaari seetanu rupaa-janaa cutara. ²⁰ Jesucristocuaajaari tari tohuateequiaari puetunu tariucua-caanu Pueyaso sequesanojuanaa pajaniyara. Naacuajitij, pa tiuushacari Jesucristoocua, paari niishiyanu, Pueyaso sequesanoori seetanujuanaa. Naaratej, pa shuqiritiasacari Pueyaso, paari na sequequiaani: “Seetanujuanaari canaa quia sequesano, Pueyasonaa”. ²¹ Jesucristo rupiejaca pa quishacari, Pueyasocuaajaari pa cumaquiquiaa, socua maninia na tojijiaa canaa quiniuria, nijaniyajuhuj. Pueyasoori pa niqutioquiaari na Sohanu, seetanujuanaa na muerasu pa quiniuria. ²² Pueyaso Sohanu pa jiiitasacari poojajinia, naacuajitij, paari tari Pueyaso sesa jiiitia juhua naajiotasano poojajiniani, saa neraja pa quiniuria. Na Sohanu pa jiiitasacari poojajinia, paari niishiyanu, paari puetunu na sequesanojuanaa maseriquianoni.

²³ Niaari cua jyaniquianu janiyari najuhuaa coojia niqijiotejani, niaacua cua quiaaquinuucua taa cua sequecanu coteenu nijaniyacuaajani. Pueyasocuaajaari niishiya, majaari cua quianu quiquianu niaacua Corinto tiacajinia, maja cua tacaatiniuria nijaniya, janiya jaara nia nacasusee jyanohuani. ²⁴ Canaari maja nia jyanijiani canaa shiniujiuniuria puera nijaniya, Jesuucua nia tiuuniuria. Niaacuajaari tari maninia Jesuucua tiuujiaa. Canaari saaja niarta Pueyaso pueyani, canaa cumaquiniuria nijaniya, socua pa Jiyaniijia tojijiaa nia quiniuria, seetanujuanaa shuquiriatia quijiaa nia quiniuria.

2

¹ Janiyari tama sequecanujuaanijia, maja juhuari niaacua cua quianu quiniutianiya, maja cua taraajetenura niajaniya. ² Janiya jaara nia taraajetere cua nacasusacari niajaniyani, ¿cantucua cua timitiri quenaajani? ¿Cua taraajetesano pueyateri cua shuqiritiniutianiya? Maja. ³ Naaratej, janiyari niaacuara naajiocanuni, cua nacasunura juhuacarijia niajaniya, cua taraajeyaquiniuria niaacua cua tiuquishacari. Janiya jaara sashiri cua nacasunura niajaniya cua tiuquishacari niaacuani, janiya maara jiyanohua nia taraajetereni, jeecatoojua nia quishacari. Saniniuuja, niaa jaara juhuacarijia jeecare puetunu sesa nia miishanojuanaa, naacuaajitij, cua tiuquishacari niaacua, niaari cua cojiniutianiya maninia, shuquiriaatia pa quiniuria jatiqui. ⁴ Janiya jaara niaacuara naajiocanu coteenu cua naajioneeni, janiyari jiyacari jiyanohua tacaariquiaa niaacuani. Coojaari jiyanohua taraajeriquiaa. Janiyari jiyacari nujuqueriquiaajaaniuhuj. Majaari cua naajionu quiquianu cuno naajionee cua taraajonura niajaniya. Cunoori seetanujuaanaa quiquianu cutara cua niishitiniuria niajaniya, taa cua paniya jiyanohua niajaniyani.

Cuno sesa miijia cuara jiyanooshaaria jaara tari pishirii sesa na miiniu-jiniji

⁵ Cuno sesa miijiaari maja na taraajetenu quiquianu saa janiyaja. Quera puetunu niajanijajanaa naasucuaari taraajecanu cuno pueyano miiniuucua sesa. Seetanujuaanaa, majaari puetunu niajanijajanaa taraajenu quiquianu. Janiya jaara sequereni: “Puetunu niajanijajanaari taraajecanu”, janiya maara puera na maateyani. ⁶ Puetunu niajanijajanaa jiyatenuucua nojuaja saniitiosano na quiniuria, nojuajaari tari noojia tacatorohua sesa na miiniu-jiniji. Tariucuaaja. Majaari socua na saniitionu. ⁷ Qiarijiani nojuaja nia jiyanooriohua. Nia cumanijiarohua, nojuaja mariqui puera tacaariiri jiyanohua na taraajesacari. ⁸ Nocuaji janiyari jiyanohua nia rootaani, maninia nia miiriohua cuno pueyano, na niishiniuria niaaqui na paniyajaa. ⁹ Janiyacuajaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuaanaa pa Jiyaniijajiniji cua rootasano tojtiaajaca. ¹⁰ Cua tojtiaare, cana nia jiyanooriicuaani, janiyari na jiyanooyajuhuj. Naacuaajitij, pueyano jaara sesa miiriquia, janiyari Cristo niquiara na jiyanooquiaajuhuj, jatiqui nia quiniuhua. ¹¹ Naaratej, niarta Pueyaso pueya nia jiyanooriquia, Sesaaca mariqui pocua riuticoreeri, juaajiaara na jiyatenura pajaniya, pa jiyanootiyoaquinuucua. Paacuajaari maninia niishiyani taa Sesaaca niishiriojoquiaa sesa miijiacara na jiyatenura pajaniyani, paa jaara jiyanooyashijia quiriqiani.

Pablo tacaashacari Troas tiacajinia na quishacari

¹² Janiya jaara Troas tiacajinia tiuquiquianu Jesujiniji cua pohuatanurani, cuno pueyari jiyanohua tojtianu paniriquiaa Jesujiniji cua pohuatanura juucua. Jiyacaritij, seetanujuaanaa nojori niquiara pohuataasaatia quiriqiaari. Pa Jiyaniijia Jesuuri juhua tootiu riatacanu cucuaji juucua, cua pohuatanura nojuajiniji tii. ¹³ Janiyari saaja nojori tiujacanuuhani puera cua tacaashacari, cua riuriataaquinuucua pa tarajanu Tito. Janiyari juucua paniriquiaani cua pohuataasaanura niajanijajiniji. Janiyari cunora tacaariquiaa jiyanohuani. Naaratej, janiyari Macedonia jiyajinia quiaarohuani, Tito cua pajenuhuara tii.

Pa Jiyaniijia Cristoori pa paraa pa shocotanijia

¹⁴ Janiyari jiyano hua shuquiritiaa Pueyasoni. Nojuajaari pueyaraanu pa shocotaniquiaa pa paraca seque, pueyaracaanu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa. Naacuajitij, canaa niishishano Jesucristojiniijiri juhua shanohua jaanujata jaanujuquiaa pueya tajinia puetunu tiquiyocujanaa. ¹⁵ Pueyasora, canaari juhua shanohua jaanujajani, Cristo quishacari canaa jiuujiajinia. Nojuajiniji canaa pohuatanuusacari, canaari puetunu pueyarajanaa jaanujuiaani: Pueyaso muerasurano, saniitiosaariquiano pueyaranio. ¹⁶ Saniitiosaariquiano pueyara, Jesucristo rupaari mocuaatia jaanujata saniniuujia. Naa nojori soonuucua Jesucristo rupaatej, nojoriiri shaa-jasaariquiano cutara. Pueyaso jiyanooshocoriquiano pueyara saniniuujia, Jesucristo rupaari shanohua jaanujuiaa. Naa nojori paniniuucua Jesucristo rupaatej, nojori cutaraari pueyaracaanu quijiacara jiyatesaanutaniya. ¿Canaputeeri seetanujanaa Pueyaso jiyaramiquishanoni, na rupaa nojori pohuatunura, pueya na tiutiniuria Jesucristoocuan? ¹⁷ ¿Noo pojoritii, najuhua Pueyaso rupaa pohuatanuquiaa, pueyajiniji na masejonura cumaneeca na sapojonuunutatej? Maja. Majaari canaa pohuatunu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujanaa Pueyaso jiyaramiquishano pueyani, na rupaa canaa pohuatunura. Canaari seetanujanaa pa Jiyaniijia rupaa pohuataquiaa Pueyaso niquiarani, Cristo rupesano canaa quishacari.

3

Quiarinio rupaa Jesucristojiniji

¹ Naa canaa naajiosacari niaacuaratej, niaa naasucuaari jiyaniya canaari tama canaa cuaqueyajinijiaaja nia pohuatohuanihuaj, canaacua nia tiuuniuria. ¿Niaateeri pa niishishano pueyanojiniji naajione paniya, canaajiniji na pohuatunura coteenu nijaniya, canaacua nia tiuuniuria cutara? Tamasaca cutaraari naa miiquiaa. Niaacuajaari canaa niishijaca cutara. Puetunu tiquiyocujanaa quijiaca pueyari canaajiniji niishiyacuaja, canaari seetanujanaa Pueyaso jiyaramiquishano pueyani, na rupaa canaa pohuatunura. Naacuajitij, majaari quenaaja canaa paniniu, canaa nia niqutionura nia naajione, canaa patasocoriquiano, tamasa tiuuniuria canaacua. ² ¿Naajioneetucua casaara panishaareni? Puetunu pueyajanaari na naata niishiniucua canaari seetanujanaa Pueyaso jiyaramiquishano pueyani, nojori niishishacari taa canaa paniya jiyano hua nijaniyani. ³ Cristocuaajaari nioojiajinia naajiotaqueaari na rupaa, nojuajiniji canaa pohuatanuucua nia niqiaara. Majaari na rupaa na naajiotanu quiquiaari nioojiajinia minianata. Seetanujanaa na Sohuanuta na naajiotaqueaariiri. Majaari na naajiotanu quiquiaari saajianeecua. Seetanujanaa nioojiajinijanaa naajiotaqueaari na rupaari. Naa jatanishano pueya nia quishacaritij, puetunu pueyajanaari niishiya niaari seetanujanaa Pueyaso pueya, nojuajiniji canaa pohuatanuucua nijaniya.

⁴ Naacuajitij, canaari seetanujanaa niishiyani canaari Pueyaso jiyaramiquishanoni. Cristocuaajaari naa canaa niishitiquiaa maninia.

⁵ Majaari canaa niishirojonu canaa miijosanoori tama canaa cumaacata canaa miishanojuaja. Maja. Canaari saaja Pueyaso cumaacata poonijioquiaani. ⁶ Na cumaacata, nojuajaari canaa jataniquiaari quiarinio na rupaa pohuatanaa canaa quiniuria. Quiarinio na rupaari seetanujanaa Pueyaso Sohanu cumaacaraca cutara, pueya na jataniniuria seetanujanaa Pueyaso niqiohua nojori quiniuria. Tariucacaanu, Pueyaso rupaari naajiotasano quiquiaari pueya tojshocoriquiano juuca. Cuno rootasanojiniji, pueyari niishiquiaari

nojoriiri shaajeriquiano na numaa shama nojori tojiniuucua saaja. ⁷ Naajaa, cuno rootasano saajianeecaacua quejasanoni, cunoori jiyanoehua maninia quiquiaari. Naacuajitij, Moisés jaara cuno rootasano niishitiojosaariquiaa Sinaí tuhananuucua, Pueyaso shacantuucaari nocua pacuriquiaa. Naacuajitij, na rosesacariuhua Israel pueyacu, na jiquiooori puera shacantuuca quiquiaarijia. Naaratej, narta Israel pueyari maja na naata na jiquioco niqiniu quiquiaari. Na nuhuaji, cuno shacantuucaari jacaria maquesaquiariuhua. ⁸ Quiarijiani, Pueyaso Sohuanuuri poonijioquia pueya jiuujiajania saniniuujia, nojori tiuuniuucua canaa pohuatasanoocua. Cunoori socua shanohua shacantuuca cutara Moisés jiquioojiniji. ⁹ Moisés pohuatasano Pueyaso rootasano nojuajani, cunoori seetanujuanaa jiyanoehua maninia quiquiaari. Naaratej, Moisés jiquiooori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijaca quiquiaari. Saniniuujia, quiarijiaari socua jiyanoehua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuquiciaa seetanujuanaa sesa miyashijacara nojori jiyatesaanura Pueyasora. ¹⁰ Pueyaso jiyatenuucua Moisés tariucuacaanu na rupaa pohuatana na quiniuria, Moisésri shacantuucara jataquiaari. Quiari naataja saniniuujia, Pueyasoori canaa niishitiquiaari socua jiyanoehua maninia rupaa canaa pohuatanura Moisés pohuatasanojiniji. ¹¹ Moisés shacantuuca maquesaquiariuhua, cunoori maja na jataniniu quiquiaari Israel pueya. Quiarijia saniniuujia, Pueyaso Sohuanu cutaraari pa jataniquiaa seetanujuanaa pueyaracaanu shacantuuca quijiaa pa quiniuria.

¹² Quiarijiani, canaari niishiyani paari pueyaracaanu shacantuuca quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. ¹³ Majaari canaa miiniu taa Moisés miqiaaricuaani. Nojuajaari quenaaruque toqueta na jiquioco mishiquioquiaari narta Israel pueya niqiyaquiniuria na shacantuuca maquesaano. ¹⁴ Israel pueya jiuujiaaari juhua toqueta mishiquiosano quiquiaarijuhuaj. Cumajiuujiaaca nojori quiniuucua, majaari Israel pueya niishiniu quijia Moisés caminiujushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanujuaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. ¹⁵ Quiarijiaari naajuhua. Moisés naajioneeca jaara serojosaariquia Israel pueya niqiuara, nojori niishitiajiaari juhua toqueta mishiquiosano quiyajaa, maja nojori niishiniuria nojori tojishano. ¹⁶ Quiarijiani, pueyano jaara pa Jiyaniijiaacua tiuuri, cuno toqueeri juhua na niishitiajajiniji jaariutiasaaciaa, maninia na niishiniuria Pueyaso Rupaa. ¹⁷ Pa Jiyaniijiaari Pueyaso Sohuanujuhuanaajaj. Pa Jiyaniijia Sohuanu jaara poojajinia quiya, paari Sesaacajiniji jaariutiasanoni, maja pa camarnu na quiniuria socua. Naajuhua, majaari tari poojia quiniu juhua toqueta mishiquiosano. ¹⁸ Naacuajitij, puetunu pajaniyajanaari juhua niqituu nenecuaquiaani, pa Jiyaniijia shacantuuca pacusacari pocua. Cunoori pa sohuanu rupuetoosacari nata. Naacuajitij, nojuajaari pueyaracaanu pa jataniquiaa jacaria, socua shacantuuca quijiaa pa quiniuria juhua nojuaja, na Sohuanu poonijosacari poojajinia.

4

¹ Naa pa Jiyaniijia poonijosacari canaa jiuujiajinatej, majaari canaa pishiniu quiquiaa canaa poonijosacari nera. Pueyaso jiyanooniucua

canaa, nojuajaari canaa jiyatequiaari na rupaa pohuatanaa canaa quiniuria. ² Majaari canaa miiniu quiquiaa cararaatia casaa, taa tamasaca miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhuaaj, canaa pohuatasacari, majaari canaa jataniniu quiquiaa Pueyaso rupaa. Canaari seetanujuanaa maatia pohuataquiaa Pueyaso Rupaani, puetunu pueyajanaa niishiniuria nojoriiri na naata canaacua tiuuniu. ³ Teyano pueyate canaa pohuatasano Jesucristojiniji niishiyaquiyani, cuno pojoriiri shaajasaariquiano. Nojoriiri niishiyaquiya, juhua toqueta mishiquiosano nojori jiuujia quishacari. ⁴ Pueyaso rupaacua tiuyashijiaca nojori quishacari, nojori jiyaniijia Sesaacari nojori jiuujia jiyatequiaa juhua cariojuarura, Pueyaso Rupaa mariqui nojori jiuujia cuhuatareeri. Nojori jaara Pueyaso rupaacua tiuuriquia, nojori maara niishiri, Cristoori seetanujuanaa shacantuua quijia cutara, juhua na Que Pueyasojuhuaj. ⁵ Canaa pohuatasacari Pueyaso rupaa niajaniya, majaari tama canaajiniijiaaja canaa pohuatanu quiquiaa nia timitianura canaa. Canaari saaja nia pohuataquiaa cutarani, Jesucristoori seetanujuanaa Jiyaniijiajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniijia Jesu. ⁶ Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari:

“Cuhuashiqui cuaara coretaara ninishiquiji”.

Quiarijiaari naajuhuaaj, nojuajaari poojia cuhuataquiaajuhuaaj, pa niishiniuria nojuajaari tojetaarucujanaa maninia quijia. Paari cuno niishiyani, Jesucristojiniji pa niishishacari. Nojuajaari seetanujuanaa shacantuua quijia cutara, Pueyaso Niyanu na quiniuucua.

Paari maninia quijiaa quiniutianiyani saaja Pueyaso rupaacua pa tiushacari

⁷ Cuno cumaaca canaa na jiitiaani, cunoori Pueyaso cumaaca cutara. Saniniujia, canaa cuaqueyari cumaacaaju, saaja juhua maraujiniji panishano pataco. Naacuajiti niishishiyari, cuno cumaaca pueya jatanijiani, cunoori seetanujuanaa Pueyaso cumaaca, maja tama canaa cumaacajaja. ⁸ Naacuajitij, canaa paraa cosejosacari canaa, majaari canaa tarinitanu quiquiaa Pueyaso rupaa pohuatanu, cuno cumaaca canaa jitiiasacari. Jiyanojua canaa tacaashacari, naajaa, majaari canaa tarinitanu quiquiaa Pueyasora poonijionu. ⁹ Canaari naquiya miishaaquiaajaanuhuaaj. Naajaa, majaari Pueyaso cartenu quiquiaa canaa. Naajuhuaaj, canaari juhua quiaquesano jiyocuara jaqueroosaaquiaajaanuhuaaj. Naajaa, majaari canaa cusojuasaanu quiquiaani. ¹⁰ Puetunu tiqiyocujanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyaniijia Jesu panitiaquiaari tama na cuaqueyajaaja pocuaracuaani. Naacuajitij, canaa na niquitiosano cumaaca poonijiosacari canaa rishiyashijiaca cuaqueyajinia, pueyari niishiquiaa, Jesuuri seetanujuanaa saminio. ¹¹ Mijiria canaa quishacarijia, pueyari pueyaracaanu canaa puecoonu paniquaani, Jesujiniji canaa pohuatanuucua. Naacuajitij, saminio na jitiiasacari canaa, Jesu cumaacaari niquishaaquiaa rishiyashijiaca canaa cuaqueyajinia. ¹² Canaari juhua piriuquiniuuquiaani, canaa pohuatanuucua Pueyaso rupaa nia niqiuara. Niaari pueyaracaanu rishijiacara quiriquiano saniniujia, canaa pohuatasanoocua nia tiuuniuucua.

¹³ Tariucuaaanu Pueyaso Rupaajinia, supuetana David naajiotasanoori naa sequeya:

“Pueyasooocua cua tiuuniuucua, janiyari pocuareeni”.

Canaari naajuhuaaj. Pueyasoocua canaa tiuuniuucua, canaari na rupaa pohuataquiaani. ¹⁴ Canaa jaara puecoosaariquia na rupaa canaa pohuatanuucuan, naajaa. Canaacuajaari niishiyani, pa Jiyaniijia Jesu Samuítianiniacuaajaari canaa samiitianijonutaniuhuaajuhuaaj, Neyanu Jesu rupuesano canaa quiniuucua. Pueyasoori canaa rijionutaniya puetunu niäjaniyatajanaa, pueyaracaanu na shuriucua pa quiniuria. ¹⁵ Naacujitij, canaa jaara rejerefaquiaa naquiya canaa miishaanu Pueyaso rupaa canaa pohuatanuucuan, puetunu cunojuanaari niaacuara, maninia nia quiniuria Pueyasora. Naa Pueyaso jiyanooniucua niäjaniyacuaatej, socua queraatia pueyari na timiniutia na sequenutaniya, “paacarasho”. Pueyasoori jiyanoohua shuquiri-tiasaanutaniya, queraatia pueya na jiyanooniucua.

¹⁶ Naaratej, majaari canaa pishiniu na rupaa canaa pohuatanura. Canaa cuaqueyari saaquianoshiya. Naajaa, canaa jiuujiaari saniniuuja puetunu juucajanaa socua mashajashiyacujua. ¹⁷ Janiyara, puetunu naquiya canaa miishacarijanaa mijiria, cunoori secaja, rupaquijiajuhuaaj. Cuno naquiya miiniu canaa rejeretanuucua, ¡Pueyasoori cunora jiyanoohua maninia miniutianiya canaa! Cunora, canaari shacantuuca quijiacara jatanishaanutaniyani, pueyaracaanu rishijiaca canaa quiniuria. ¹⁸ Naaratej, majaari canaa jiaatianu quiquiaa canaa jiiitianura mijiria canaa niquishano casaa. Canaa cutaraari Pueyaso jiiitasano niquishoo casaacua jiaatiaquiaani. Mijiria niquishano casaari saaja shaajeja casaa. Pueyaso jiiitasano pa niquishoo casaa saniniunijia, cuno cutaraari shaajeyashijia.

5

¹ Mijiria pa quishacarijia, nio pa cuaqueyari saaja juhua suhuorotu quiya pa sohuanura, nareja juhua rucoonaa pa quishacari mijiria. Mijiria pa jiiitasano pa shoque jaara cusoquee, paacuajaari niishiyani, paari tari jiiitaa tamonu cuaqueya jiyocuacaanuni. Cuno cuaqueyari juhua shanohua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohuanu quiquiora. Cunoori maja pueyano shipinishano. ² Mijiria canaa quishacarijia nio canaa sohuanu suhuorotujiniani, canaari taraatia miishaquiaani. Cunora, canaari juhua quiatojoquiaani, canaa jiaatiasacari canaa sohuanu pacusaanura jiyocuacaanu. Tii quiyacuajaari canaa sohuanuucuaaji tiasano quiquio. ³ Canaari cuno quiarinio cuaqueya cushiyonutaniya juhua toqueni, maja juhuasu canaa sohuanu quiniuria. ⁴ Nio cuaqueyajiniaja canaa quishacari mijiria juhua suhuorotujinia, canaari quiatojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhuasunucua. Canaa cutaraari canaa quiarinio cuaqueya cushiniu paniyani, Pueyaso shipinishano canaarani. Naacujitij, nio shaajeja canaa cuaqueyari puetunu maninia jatanishaanutaniyajanaa Pueyaso cumaacata, pueyaracaanu rishijia cuaqueyaraca canaa quiniuria. ⁵ Pueyasojuanaacuajaari na muerasura pa saquirioquiaari, naa na jataniniuria pajaniyatej. Naaratej, nojuajaari na muerasu niqutioquiaa na Sohuanu, pa niishiniuria nojuajaari seetanujuanaa naa pa miniutianiya.

⁶ Naa canaa niishishacaritij, majaari canaa tacaaniu quiquiaa. Canaacuajaari niishiyani nio cuaqueyajinia canaa quishacarijia, majaari juhuanojuaja pa quiniu pa Jiyaniijia shuriucua. Naacujitij, paari tucuaaanu quiyaajani pueyaracaanu pa quijiarano quiquojiniji. ⁷ Cunora, mijiria canaa quishacarijia, majaari canaa quiniu tama canaa niishitijatajaaja. Canaa cutaraari canaa Jiyaniijiaacua canaa tiuuniutia quiquiaani. ⁸ Naacujitij,

canaari shuquiriaatia quiya mijiriani, nocua canaa tiuushacari. Naa-jaa, canaari nio canaa cuaqueya tarinitianuucua jiaatiaani, canaa pacunura pa Jiyaniija shuricuara, tii canaa quiniuria nata. ⁹ Naacuajitij, canaa jaara nio cuaqueyajinia quiyajaa mijiriani, naajuhuaaj canaa jaara na cartequeni, canaari saaja pa Jiyaniija shuqiritiniuucua jiaatiaani. ¹⁰ Puetunu pajaniyajanaacuaaari Jesucristo taccoji na nequesoreesaqui nujuatejosaariquianoni. Cuniqii, puetunu mijiria pueya miishanojuanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijaari maninia miiniutianiya maninia miijiaa. Saniniuujia, sesa miijiaaari taraatia miishaanutaniyacujua.

Pueyasoori pueya jiyanooniu panija cutara

¹¹ Naaratej, canaa niishishacari jiyanohua puereeta quiniutianiyari pa Jiyaniija samitiosacari na tojtiaashjiaca, canaari cunora saniniujuquiaa pueya tojtiniuria Pueyaso Rupaani. Pueyasocuaaari niishiya canaari seetanujuanaa nera poonijionaani. ¡Seetanujuanaa naa nia niishitiriquiajaani-uhua! ¹² Majaari nia jiyaniinu canaari tama canaajinijijiaaja nia pohuatanu coteerohuanihuahua, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniuucua. Naacuajiti nia naata cuno pueya tacunu canacuaji, cuno pojori canapueje sapuenu juhua maninia quijiaa niquishano pueya najuhuanacuajani. Majaari nojori niishiniu tacaaniu taacaaniu ueshaco jiuujiracateja nojorini. ¹³ Noojiaqueya nijaniyajinijinio naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniuujia, canaa jaara maninia niishiriojuaca quiriquiani, canaari naa quiya niaarani, maninia canaa niishitiojonura nijaniya. ¹⁴ Cristo paniniuucua canaa, cuno na paniniuuri canaa shiniujuquiaa nera canaa poonijionura. Naaratej, canaari pueyaracaanu nojuajiniji pohuataquiaani. Canacuajaari niishiyani, nojuajaari puetunu pueyacuarajanaa cusoquiaari. Naa na cusonuucua puetunu pueya nitijianaatej, Pueyasora, puetunu pueyajanaari tari cusonuuquiaari Cristota. Naacuajitij, Pueyasoori na naata jiyanooniu puetunu Neyanuucua tiuniaajanaa. ¹⁵ Cristocuaaari puetunu pueyacuarajanaa cusoquiaari, na samitianiishano pueya quiniuria saa neraja. Pocuara cusoquiaariiri. Nojuajaari pocuara samitiaquiaariuhujuhua. Naaratej, paa cuara miiria saa na panishanojua. Majaari socua pa miiniu tama pa panishanojuaaja. ¹⁶ Tariija, canaari saaja canaa panishano pueyacua taraajejani. Quiarijia saniniuujia, Pueyaso jatanishano pueya canaa quishacari, majaari rimiajata canaa paniniu pueya. Tariija, canaari Cristo jiyaniijiani nojuaja naasucuaari nareja pueyano, juhua pajaniyajuhua. Quiarijia cutara, majaari naa canaa niishiriojonu nojuajiniji. ¹⁷ Naajuhuaaj, cante Cristo rupuesanoni, nojuajaari quiariniora jatanishano pueyano. Tariucuaaanu sesa na quiniuuri tari jatanocuaaja. Saniniuujia, puetunujuanaari quiarinio quiya.

¹⁸ Puetunu cunajuanaari Pueyaso miishano. Nojuajaari Neyanu Cristo cusojuquiaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiquiaari puetunu pueyajanaa canaa pohuata-nura, nojori jiyanooshaanurajuhua. ¹⁹ Naacuajitij, Pueyasoori mijiria quiniaa jiyanooquiaa saaja Neyanu Cristoocua nojori tiuushacari. Naa na jiyanooshacari pueyatej, majaari quenaaja sesa nojori miishano na saneenu quiniutianihuahua socua. Nojuajaari canaa jiyatequiaari na rupaa pohu-ataanaa canaa quiniuria, pueya canaa tiuutiniuria Neyanu Jesucristoocua, jiyanooshano nojori quiniuriajuhua. ²⁰ Naacuajitij, canaari Jesucristo

jiyaramiquishanoni, canaa caminiujiuniuria niaara na sequesano canaa. Naa canaa caminiujiushacari Jesucristo rupaatej, Pueyasojuaanaari nia masya na muerasu nia quiniuria, Neyanuucua nia tiuushacari. Naacuaajitij, canaari Cristo niti nia secojiyani, itama nia cuaqueyajaaja nia jiyanootiri Pueyaso! ²¹ Pa Jiyaniijiarano Jesucristoni, nojuajaari tojetaarucuajanaa sesa miyashijiajuhanajaj. Naajaa, na Que Pueyasoori nocua tiuutiaquiaari puetunu sesa pa miishanojuanaa, pa niti na saniitiosocoriquiano. Naacuaajitij, Neyanuucua pa tiuushacari, Pueyasoori pa jiyatequiaa juhua sesa miyashijia pa quiniuria.

6

¹ Naa Pueyasora poonijionaa canaa quiniuucuatej, canaari jiyanoohua nia secojiyani cuarta Pueyaso muerasunaa, saa Pueyasoraja nia quiri, nia jiyanoojia na quiniuucua. Maninia na muerasu nia quiri. ² Tariucuaaanu na sequesano cuajaari naa naajiotasano quiya na rupaajinia:

“Quiaari namitia cua secojocanu, pueya cua naacunu panishacari. Pueya cua jiyanooshacari, janyari quia naacucanujuhuj”.

Cua panishano pueyanaa, quiarijiaari Pueyaso jiyanooshacari pueya. Nojuajaari quiarijia pueya jiyatequiaa na muerasu nojori quiniuria.

³ Cunora, canaari tama canaa cuaqueyajaaja cojuaquiaani, maja canaa miiniuria sesa tamasaca niqiuara. Canaari naa maninia miiquiaani, nojori mariqui Jesucristoocua tiuyaquiriri, nojori mariqui Pueyasora canaa poonijosano sesacareajuahuaj. ⁴ Canaa cutaraari saaja maninia miiquiaa pueya niqiuarani, puetunu pueya niishiniurijanaa canaari seetanujanaa Pueyasora poonijionaani. Naaratej, canaari juhuajaniya rejeretaquiaa naquiya canaa miiniuni, canaa panishano canaa jiitiaaquishacarijuhuaj. Naajuhuj, canaari rejeretaquiaani puera canaa tacaashacari, canaa niishiyaquishacari taa canaa miiniutianiya socuani. ⁵ Naajuhuj, canaari juhuajaniya rejeretaquiaa canaa jaara majacujusaaguiaani, canaa jaara nujuatejojuajinia nujuatejosaaquiaaanihuaj. Nasojosano pueya jaara miitianu paniquiaa canaani, canaari na rejeretaquiaajuhuj, pueya tiuniuria canaa pohuatasanoocua. Naa Pueyaso jiyaramiquishano pueya canaa quishacaritij, canaari jiyanoohua poonijioquiaa nerani. Canaari sequeyarucua sutequiaani. Canaari miaajequiaajuhuj. ⁶ Naajuhuj, pueyari na naata niishiniu canaari seetanujanaa Pueyaso seyani, sesa miyashijiaa canaa quiniuucua, maninia canaa niishiniuucua Pueyaso rupaajuhuj. Niishishaatiacujaari, canaari Pueyaso seyani, jacaria pocuajaca canaa quishacari juaajiaa pueyata, naajuhuj, maninia canaa miishacari puetunu pueyajanaani. Naa niishishaatiajaarihuua canaari Pueyaso seyani Pueyaso Sohuanu cumaquishacari canaa, seetanujanaa canaa panishacari pueyajuhuj. ⁷ Niishishaatiajaarihuua canaari Pueyaso seyani seetanu rupaajanaa canaa pohuatanuucua pueya, naajuhuj, casaa canaa miiniuucua Pueyaso cumaacata. Canaari Sesaa nujuataquiaa cumaatiani, Pueyaso jiyanooshano pueya canaa quiniuucua. Pueyaso rupaata, canaa cutaraari saaja Sesaa jiyatequiaa canaacuajini. ⁸ Naa Pueyasora canaa poonijosacaritij, noojiaqueya pueyari canaa shuquiritiaquiaani. Tamasacaari canaa rerequetequiaa saniniuuja. Naajuhuj, noojiaqueya pueyari maninia pohuatanuucuaa tamasaca niqiuara canaajiniji. Tamasacaari canaa sesaquiaa saniniuuja. Noojiaqueya pueyari canaa sequequiaa sapojonuujacatani. Tamasacaari saniniuuja maninia tojitiaquiaa canaa, seetanu rupaajanaa canaa pohuatasacari. ⁹ Noojiaqueya pueyari canaa niquiquiaa juhua najuhuaa quijiaa pueyani.

Tamasacara saniniuujia, canaari tojishano pueya cutarani. Canaari sequeyarucua quera puecoosaaquiaani. Naajaa, canaari saminio quiyajaani. Canaari jiyanhohua miitiasaaquiaani. Naajaa, majaari canaa puecoosaanu quiquiaani. ¹⁰ Taraatia canaa quishacari, naajaa, canaari pueyaracaanu shuquiriaatia quiquiaani, Pueyaso pueya canaa quiniuucua. Canaari seetanujuanaa casamiijiuniucujahuaj. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamiijiuniucua niquishanoni. Naajaa, canaari puetunu canaa panishanojuanaa jiitiaacuajani.

¹¹ Corinto tiacajinia quiniaa cuarta Pueyaso pueyanaa, canaa nia toji-tiare. Canaa jiaatiasacari niaacua, canaari seetanujuanaa puetunu canaa jiuujiajania canaa niishiriojosanojuanaa nia sequereeni. ¹² Majaari canaa tarinitianu canaa paniniu jiyanhohua nijaniya. Nijaniya sajaraj, majaari nia paniniu canaa, taa canaa paniya nijaniyacuaani. ¹³ Janiyari nia nenecojiyani, naatej, taa pueyano nenecojoquiaa necohuacuaani, ¡majaari canaacuaji nia taacanuunu! Seetanujuanaa canaa nia paniri, taa canaa paniquiaa nijaniyacuaani, seetanujuanaa panitiojuaca pa quiniuria.

Paari Pueyaso quiquioni

¹⁴ Saniniuujia, maja Pueyaso tojiyashijiaca pueya nia paniniu, nojori nia kojiniuria. Naajuhuj, maja cutaraari nia caminiu Pueyaso tojiyashijiata, niaa mariqui rimiajata quijiaca quiriiri. ¿Maninia miijiatucua shuquiriaatia quijia quiriquia, sesa miijata na quishacari? Maja. Cua riuquareto pueyanaa. ¿Cuhuashiqui quijiateeri na naata juhuajaniya jatiqui quiniu ninishiqui quijia? Maja na naata. ¹⁵ Seetanujuanaa pueyanaa, Cristoori maja Sesaaca rupueña. Naajuhuj, Pueyasoocua tiuujia pueyanoori maja na naata maninia rupuetoonu Pueyasoocua tiuyashijia pueyanota. ¹⁶ Paa jaara Pueyaso quiquio quirini, ¿paateeri Pueyaso quiquiojia shanacunutaniya samaruhua tiuquitianura tiini? ¡Maja! Paacuajaari pueyaracaanu Quijia Pueyaso quiquioni. Na pueyara na sequesanoacuajaari naa naajiotasano quiya:

“Janiyari nojorijinia quiriqianoni. Janiyari nojori tajinia rucuanefonutaniyani. Janiyari nojori Jiyaniijiajanaa quiniutianiyani. Nojoriiri cua pueya quiniutianiyacuaja”.

¹⁷ Cunora, pa Jiyaniijiaari na pueya sequeya:

“¡Cua tojitiaashijiaca pueya tajiniji nia pacure! Nia shiriquire tamocora nojoriicuaji. Majaari sesa casaa nia saniniu paniniu. Niaa jaara cua tojjijia quiri, janiyari nia jiyatenutaniya quirianoni. ¹⁸ Janiyari nia Que quiniutianiyani. Naacuajitij, niaari cua niquiohua quiniutianiya. Naa sequeyanijia, puetunu cumaacaracajanaa cua quiniuucua”.

7

¹ Naacuajiti canaa panishano pueyanaa, paacuajaari naa seetanujuanaa pa Jiyaniijia sequesano pajaniyarano jiitiaani. Naaratej, pueyaracaanu tama pa cuaqueyajaaja juhua jeequesano pa jiitariquia, poojjajuhuj. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucujanaa sesa miyashijiaca pa quiniuria, saa neraja pa quiniurijahuaj.

Corinto pueya tacatosacari nojori jiuujia, maninia nojori quiniuhuara

² Pueyanaa, ¿taa nia miiquianuni? ¡Canaa panijia nia quirohua! Majaari canaa miiniu quiquianu sesa nijaniya. Majaari quenaaja niquiriyatu nijaniyajinjinio canaa sesonu quiquianu canaa niishitiojosanota. Majaari canaa sapojonu quijia nijaniya. ³ Naa cua sequesacari nijaniyatej,

majaari cua sequenu cua cararonura niajaniya. Janiyacuajaari tari nia sequereeni, canaari jiyanoherua nia paniani. Naacuajitij, canaari shuquiriaatia quiniutianiani canaa jaara puecoosaare canaa cumaquiniuucua niajaniani, seetanujuanaa Pueyaso muerasu nia quiniuria. Naacuajitij, niaa jaara shaajerejuhuaj, paari pueyaracaanu jatiqui quijiaca quiniutianiya Pueyasotani. ⁴ Janiyari seetanujuanaa naa nia sequeyani cua panishacari niajaniya. Quiarijiani, janiyari jiyanoherua nia timitiaani, maninia cua tojiniuucua niajanijajini. Canaari seetanujuanaa naquiya miiquiaani. Naajaa, maninia canaa tojiniuushacari niajanijajini, cunoori cua cumanijiacanu. Cunora, janiyari jiyanoherua nia shuquiritiaani.

⁵ Canaa jaara tiuquiquianu niya Macedonia jiyajiniani, majaari quenaaja rupaquijia canaa quiniu quiquianu juhuajaniya. Canaari puetunu taraatia miishaacanjuanaani. Pueyasooocua tiuyashijiacari canaa juariquiaa. Canaa jiuujiaari niaacua tacaariquiaa saniniuujia. ⁶ Jiyacaritij, Pueyasoori canaa cumanijiacanu Tito tiuquishacariuhua canaacua. ¡Pa Pueyasocua-jaari tacaajiacua cumanijiana! ⁷ Canaa jiuujia canaa cajitishacari, cunoori maja saaja canaa niquishacari Tito canaacua tiuquihuano. Canaa cutaraari canaa jiuujia cajitiquianuni, nojuaja jaara canaa pohuatacanu niajanijajini jiyanoherua na timiniutia. Nojuajaari canaa pohuatacanu, niaanaari canaa niquiniuucua jiaatiaa. Niaanaari cucua taraajeya, jiyanoherua nia taraajetenuucua janiya. Niaanaari cucua tacaya jiyanoherua, cua rootasano tojjijaca nia quiniuria quiarijia cutara. Naa cua tojishacari niaacuajitij, janiyari jiyanoherua shuquiriquianuni.

⁸ Niaacuara cua naajioneeri nia taraajetecanu. Janiyari taraajecanujuhuaj, naa cua taraajetenuucua niajanijatej. Quiarijia cutaraari maja cua taraajenu. Cua naajioneecuaajaari saaja rupaquijia nia taraajocanu.

⁹ Quiarijiani, ¡shuquiriaatia quianijia! Majaari nia jianiniu janiyari shuquiriaatia quiani naa cua taraajonuucua niajanijatej. Shuquiriaatia quia cutaranija, cua niishishacari, naa cua taraajonuucua niajanijatej, niaari nioojia tacatorohuacua Pueyasooocua, Pueyaso tojtijajaca nia quiniuhuara. Naacuajitij, janiyari quiarijia niishiyani, majaquiri cua sesonu quiquianu niajaniya, naa cua taraajonuucua niajanijatej. Pueyasocua-jaquiri maninia poonijioriquiaa nioojiacajinia, naa nia taraajesacaritij.

¹⁰ Pueyasojuaanaa jaara pa taraajetere, cunoori maninia, poojia pa tacatonuhuara nocua, na jiyanooniuria pajaniya. Na nuhuaji, paari shuquiriaatia quia cutarani. Saniniuujia, tama pa taraajesacarijiaaja, cunoori tama poojia pa shaajanurajaaja. ¹¹ Nia taraajesacari cua nacasacari niajaniya cua naajioneeginiani, cunoori seetanujuanaa Pueyaso taraajetesano quiquianu niajanija. Naa nia taraajenuucuatej, nia niqushuriiraj, majaari nia tarishiniu quiquianu maninia nia miiniuria. Niaari ritia cua niishitiniu paniriquiaa juucua, maja niaacua na tiututiasaanura cuno pueyano miishano sesa. Niaacuajaari maninia miiquianu nia juashacari cuno sesa miijia. Niaari na naaqu puerecanujuhuaj, niaa mariqui nata cojiritiasaare saniitionuuri. Niaari cua jaqueroojocanu. Niaari ritia miiquianu cua naajiojinia cua sequesano niajaniya. Naacuajitij, niaari ritia cuno sesa miijia taanuucanu nia tajiniji, maja socua nia rupuesano na quiniuria. Naa nia miiniuucua puetunu maninijanaatej, janiyari quiarijia niishiyani, majaquiri nia maniniucuanu quiquianu naa sacuaatia cuno pueyano miishanotej. ¹² Pueyanaa, niaari maninia canaa tojjijaca. Seetanujuanaa, cua naajiosacari niaacuara, majaari cua naajionu quiquianu saaja cuno sesa miijia pueyanojiniji, sesa miishano pueyanojinijino. Janiya cutaraari niaacuara naajiocanuni tamajaaja nio nia niishiniuria Pueyaso niqiuara: niaacuajaari seetanujuanaa canaa panijiacua quijajaa, nia tojishacari canaa.

¹³ Naaratej, canaari canaa jiuujia cajitiquianuni, canaa tojishacari Tito pohuatasano nijaniyajinjiji.

Majaari saaja Tito pohuatasano cumanijianu quiquianu canaa. Canaari Tito timitiacanujuhuj, canaa niqushacari nojuajaari shuquiriaatia tiuquiriohua canaacua. Puetunu nijaniyajanaari na naacucanu, noojia na cajitiniuhua, najuhuaana na tacaaniucua niaacuajuhuj. ¹⁴ Tito quiaaquishacari niaacua, janiyacuaajaari juhuacari nia pohuatacanu nijaniyajinjiji, maja puera na taacanuunura niaacuaji. Naa maninia nia quishacari Tito tiuquishacari niaacuatej, majaari cua caririquiniu quiquianu nijaniyajinjiji. Puetunu cua pohuatasanojuanaa Tito nijaniyajinjiji seetanujanaa quiquianu Titora. Naajuhuj, puetunu cua pohuatasano nijaniyajanaari pueyaracaanu seetanu rupajanaa quijia. ¹⁵ Quiarjia Tito niishiriojosacari nijaniya, nojuajaari socua jyanohua nia panijia quiya, nia tojinuucua maninia nojuaja. Niaacuajaari tetecatucanu nia puerenuta na tiuquishacari niaacua. Majaari nia rerequetenu quiquianu nojuaja. ¹⁶ Janiyajuhuj, jyanohua shuquiriaatia quiyanijia, cua niishishacari quiarjia cutara cua naata niaacua tiuuni seetanujanaa.

8

Capora pa quiriqiaj

¹ Quiarjiani pueyanaa, canaari nia pohuatanu paniyani, taa Pueyaso cumaquiya jyanohua na muerasu maapue niya Macedonia jiyajiniani.

² Nojoriiri jyanohua taraatia miiquioquiaa. Naajaa, nojoriiri saaja jyanohua shuquiriaatia quiya. Naajuhuj, casamijiuniucua nojori quishacari, naajaa, nojoriiri caportujuri. Nojoriiri na cumaneecajinjiji nareja niqutiojquiaa queraatia, Judea jiyajinia casamijiuniucua Pueyaso pueyara. Nojori niqutiojosanoori juhua casamiriaca pueya niqutiojosano.

³ Seetanujanaa narta Pueyaso pueyacu nojori taraajenuta, nojoriiri naa na cumaneecajinjiji niqutiojocanu queraatia. Nojoriiri puetunu na jiiatasano cumaneecajanaa niqutiojonuucanu. Naacuajitij, janiyari jyaniquianuni, maja naasucuaari nojori naata niqutiojonu quiniutianiya socua. Naajaa, na nuhuaji, inojoriiri socua niqutiojocanu! Seetanujanaari cua sequesano nijaniya. Janiyacuajaari nojori miishano niqiniani.

⁴ Niya Macedonia jiyajinia quiniaa parta Pueyaso pueyani, nojoriiri nijaniyajinjiji tojiquianu. Niaanaari cumaneeca reratenu paniriquiaacuaa, nia jiyarosocoriquiano Judea jiyajinia quiniaa casamijiuniucua parta Pueyaso pueyara. Naaratej, nojoriiri jyanohua canaa nenecojojanu canaa masenura nojori niqutionu panishano cumaneecajuhuj, parta Pueyaso muerasura.

⁵ Seetanujanaa Pueyaso tojijiaa nojori quiniucua, nojoriiri maja saaja na cumaneeca na niqutiojonu quiquianu. Nojoriiri coteunu tama nojori cuaqueyajaaja jiyatecanu seetanujanaa nojori quiniuria saaja pa jyanijia, taa Pueyaso pania pa miinuriacuajani. Naajuhuj, nojoriiri tama na cuaqueyajaaja jiyatecanu canaa tojijiaa nojori quiniurijuhuj. Cunora, canaari nojoriicuaaji jiuujiatecanuni.

⁶ Naa capora niqutiojonaa nojori quiniucuatej, canaari Tito sequerucuaani, niaacua na quanuhua quiarjia. Nojuacuajaari tarijia naacucanu nijaniya, nia reratenu nia niqutionu panishano cumaneeca. Niaacuajaari maninia niqutiojocanu juhua capora pueya. Naaratej, nojuaja cuara nia naacuura, nia tucatanura reratenu puetunu nia niqutionu panishano cumaneecajanaa.

⁷ Nijaniya, Corinto tiacajinia quiniaanaa, niaacuajaari jyanohua maninia Pueyaso muerasu. Niaari Pueyasoocua tiuujiaa jyanohua. Naajuhuj, niaari jyanohua maninia Pueyaso rupaa niishitiojonuujua. Niaari Pueyaso niishitija jiiataajuhuj. Niaari

mariyata shitimia poonijionuujuaca, tamasaca nia naacunura. Naajuhuaq, niaari canaa panijiaa jiyanhua. Naatej, taa maninia miijiacatucuaa niajaniani, capora nia quirijuhuaq, nia cumaneeca nia niqutiojonura nareja parta Pueyaso pueyara.

⁸ Majaari juhua nia jiyaniijia cua sequenu niajaninya, nia cumaneeca cua niqutiojotenura niajaninya. Janiyari nareja nia pohuatariquiaa capora Macedonia pueyajinijini, tama nia niishiniurijaaja, niaate seetanujanaa canaa panijiacajuhuaq, taa Macedonia jiyajinijinio pueya paniya canaacuaani. ⁹ Niaacuaajaari pa Jiyaniijia Jesucristojiniji niishiya; na Que Pueyaso shuriucua na quishacarijia, nojuajaari puetunu maninia casaa-janaa jiiitaja quiquiaari. Naajaa, nojuajaari juhua casamiijuria quiquiaari, mijiria na rosesacari pocua. Nojuajaari naa taraatia quijia quiquiaari, saniniuuja jiyanhua shuquiriaatia quijia na jiyatenura pajaniya, juhua jiyanhua queraatia casamiriaca pueya pa quiniuria. Naa jaara seetanujanaa panijiaa quiriquia, naa nia miirijuhuaq, taa pa Jiyaniijia miiquiaar-cuaani.

¹⁰ Janiyari niishiriojoriquiaani, taate socua maninia nia naata miiniu parta casamiijuniuucua Pueyaso pueyarani, shuquiriaatia nia quiniuria-juhuaq. Cua tojiri. Niaacuaajaari niishiya, noo marijiaa pa shococanutej, niaacuaajaari juhuacatecara cumaneeca reratejonu cotecanu. Naaari naa maninia miiquianu tama nia tacaashacarijiaaja niarta Pueyaso pueyacu.

¹¹ Naaari shitimia juhuacatecara nia cumaneeca niqutiojonu cotecanucua. Naaratej, quarijia nia sequeyanijia, niaa cuara naa shitimia niqutiojonu tucuaataa puetunu nia niqutiojonu panishano cumaneecajanaa. Naa jiiitasano cumaneecajiniji nia niqutiojore, taa cumaneeca nia niqutiojonu paniyacujani. ¹² Naa tojiri. Paa jaara seetanujanaa nareja niqutiojonu paniriquia pa cumaneecajinijini, Pueyasoari pa niqutiosano shuquiriaaja, paa jaara juhua capora niqutiojore pa jiiitasanojinijini. Maja cutaraari Pueyaso paniniu pa niqutiojonura, pa jaara na jiiitaaquiyani.

¹³ Majaari Pueyaso paniniu cutara puera nia niqutiojonura nia cumaneeca, tamasaca quiniuria casamiriaca, saniniuuja nia jiiitaaquiniuria nia panishano. ¹⁴ Maninia cutaraari puetunu Pueyaso muerasujanaa jiiitanura na panishano. Naaratej, quarijiani, niaa cuara niqutiojora nia jiiitasanojiniji, nojori jiiitanura na panishanojuhuaq. Tamacari saniniuuja, nojoriiri saniniuuja nia jiiitaaquishoo casaa nia niqutiojanutaniyacujua, niaa jaara na jiiitaaquiri. Naacujitij, puetunu Pueyaso muerasujanaaari na panishano jiiitanutaniya mariyata, maja rimiajata. ¹⁵ Naajuhuaq, tariucuaaanu Pueyaso Rupajiniani, jiyocuaaanuji Pueyaso tinishano Israel pueya miaquesocoriquiano panjinijiri naa naajiotasano quiya:

“Cante queraatia reratequiaarini, majaari quenaaja na cureenu quiquiaari. Naajuhuaq, cante secaja reratequiaarini, majaari nojoriria na pueetanu quiquiaari”.

Naaratej, Pueyasoocua tiuujiaca nia quiri. Naa jiiitasanojiniji nia niqutiojore nareja, nia jamueyaquiniutia.

Pablo pohuatasano Titojiniji, Tito cojiniaajinijinio

¹⁶ Titoori jiyanhua niaacua jiaatiaja, taa cua jiaatia niaacuacuaani. Pueyasocuaajaari na jiyatequiaari nia panijia na quiniuria. Janiyari cunora Pueyaso sequequiaani: “¡Paacarasho Pueyasonaa!” ¹⁷ Naacujitij, janiya jaara Tito sequerucuaani nia niquniuucua na quianura, nojuajaari cua timitiriucuaa. Tama nojuajaarijia nia niquniuucua jiaatia. Naacujitij, nojuajaari quarijia quianutaniya niaacua.

¹⁸ Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu Pueyaso muerasu maapuejanaa

shuquiritiasano pueyano, maninia na pohuatanuucua pa Jiyaniijia Jesucristojiniji. ¹⁹ Macedonia jiyajinia quiniaa Pueyaso muerasu maapueeri tari na saquiriojocanu na tarajanura canaa, pa niquitojosano cumaneeca canaa jiyatanura nata, Judea jiyajiniara. Naa pa niquitojonuucua pa cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuj, parta Pueyaso pueya Judiocuacaari niishiniutianiya, narta Pueyaso pueya taucuacaquiri nojoriicua taraajejajuhuj. ²⁰ Maniniacuajaari parta Pueyaso pueya maapue saquiriojosano pueyano quianura canaata. Naacuajitij, majaari pueya jiyaniinu quiniutianiya canaari nio queraatia canaa reratesocoriquiano cumaneecajiniji nohuasenutaniyani. ²¹ Canaari pueyaracaanu maninia miiniu paniquiaani puetunu pueya niquiarajanaa, maja saaja Pueyaso niquiara.

²² Quiarijiani, niaacua canaa jiyarosocoriquiano pueyata, canaari niqiniio tamonu parta Pueyaso pueyano jiyaronutaniyani. Pueyaracaanu na poonijosacari pa Jiyaniijia, janiyajanaari na niquiquianuni. Nojuajaari seetanujanaa pueya panijia, Pueyaso panijia na quiniuucua. Quiarijia cutara, seetanujanaa niaacua na tiuushacari, janiyari niishiyani, nojuajaari jiyanohua maninia Pueyaso pueyano. ²³ Tamonu jaara nia nequesotare cante Titoni, niocua na riucaare: “Nojuacuajaari Pablota poonijiona, na cumaquiniuria pajaniya”. Naajuhuj, Tito cojiniaari niquiji Pueyaso muerasu maapue jiyarosano niaacuajuhuj. Pa Jiyaniijia Jesucristoori socua maninihuaqueetasano, maninia na tojtiajaca nojori quiniuucua. ²⁴ Naaratej, nio nojori jaara niaacua tiuquijiose, niocua puetunujuana maninia miiri nojoriria, nia paniniutia nojori. Naacuajitij, puetunu Pueyaso muerasu maapuejanaari niishiniutianiya niaaqui seetanujanaa panijia. Naajuhuj, puetunu Pueyaso pueyajanaari niishiniutianiya, majaari cua sapojonu quiquianu, maninia cua pohuatasacari nojori niajanijiniji.

9

Pablo shiniujiushacari pueya, cumaneeca nojori reratenura narta Pueyaso pueyara

¹ Janiyaruhua najuhua niaacuara naajiyani, cua seguenura niajaniya, nia cumaneecata nia naacunura Judea jiyajinia quiniaa parta Pueyaso pueya. ² Janiyacuajaari niishiyani, niaari tarijia na naacunu paniquianucua. Cua shuquiritiasacari cunora niajaniya, janiyari pueyaracaanu niya Macedonia jiyajinia quiniaa parta Pueyaso pueya niquiara pohuataquiaa niajanijiniji. Janiyacuajaari nojori pohuataquiaani, niajaniya Acaya jiyajinia quiniaa pueyani, niaari nia cumaneeca niqutionu paniquianu noo marijara pa shococanutej. Naaratej, queraatia niya Macedonia jiyajinia quiniaa Pueyaso pueyari cunora jaarajaaja na cumaneeca niqutionu panijajuhuj, naa nojori cua pohuatanuucua niajanijinijitij. ³ Janiyari niaacua tiuya seetanujanaani, niaacuajaari canacuaji tariucua reratesano jitianutaniya nia cumaneeca, ta cua pohuataquiaa niya niajanijinijicujani. Naajaa, janiyari nio parta Pueyaso pueya jiyaronutaniya niaacuani, seetanujanaa juhuacarijia nia reratenura nia niquitojosocoriquiano cumaneeca. Majaari cua paniniu cutara cua pohuatasano niajanijiniji cuaracashitishaanura. ⁴ Macedonia jiyajinijinio parta Pueyaso pueya naasucuaari cuata tiuquiniutianiya niaacua. Nojori jaara cuata tiuquishii niaacua, canaa jaara nia riuriatasee nia cumaneeca rerateyojuani, canaari caririquiniutianiyani. Niaari caririquiniutianijuhuj. ⁵ Naaratej, janiyari Tito sequereeni, parta Pueyaso muerasata na quianura coteenu niaacua cucuaji, nia niquitojonu panishano cumaneeca cuara tari reratesano quiri canacuaji. Naacuajitij, nia niquitojosano cumaneecaari

seetanujuanaa nareja nia niqutionu panishano quiniutianiya, maja canaa niqutiojotesano niajaniya.

⁶ Pueyanaa, nio sequesano nia niishiriquia. Naa sequeyari: “Cante seaja natajani, seaja senoanutaniyaajariuhuaaj. Saniniuujia, cante queraatia natajani, queraatia senoanutaniyaajariuhuaaj”. Naajuhuaaj, paa jaara capora quiriquiani, Pueyasoori saniniuujia socua queraatia pa niqutionutaniya pa niquticosanojiniji. ⁷ Naaratej, puetunu niajanijajanaa cuara niqutioora taa nioojiajinia nia niishiriojoree nia niqutiojonuracujani. Majaari nia cumaneeca nia niqutiojonu nia jamuenuta, nocua nia taraajenutanio. Naajuhuaaj, majaari nia niqutionu nia cumaneeca saaja tamasaca shiniuujushacari niajaniya. Pueyaso cutaraari shuquiriaatia niqutiojuaca timitiaja. ⁸ Pueyasocujajari cumaacaraca na niqutionura niajaniya puetunu nia panishanojuanaa nia jiiiasocoriquiano pueyaracaanu. Naacujitij, niaari pueyaracaanu socua queraatia jiiitajaca quiniutianiya, tamasaca nia niqutiojonurajuhuaaj, nojori jaara jiiitaaquiriquia nojori panishano. ⁹ Naa jaara naa capora quiriquiatej, niaari nio tariucuaaanu Pueyaso Rupaa naajiotasano tohuateenutaniya. Naa sequeyari:

“Maninia pueyanoori juhua capora nareja niqutiojowa na casamijinjii casamijiniucua pueya. Na miishanoori pueyaracaanu maninia quiniutianiya Pueyasora. Majaari Pueyaso niyajetanu quiniutianiya”.

¹⁰ Pueyano natasacari casaajau na cuhuariquiajinia, Pueyasoori na canijiaquia. Naacujitij, na camaruuri socua jiiitianutaniya tamacari na natasocoriquianohua, na miaquesocoriquianonio. Naajuhuaaj, juhua capora nia niqutiojosacari nia jiiitasanojiniji, niaari juhua nia cuhuariquiajinia nataa. Naacujitij, Pueyasoori nia jiyatenutaniya socua queraatia jiiitajaca nia quiniuria, pueyaracaanu maninia nia miiniuria tamasarajuhuaaj. ¹¹ Naa capora nia quiniucua nia casaatatej, Pueyasoori juhua capora nia niqutiojonutaniya puetunu na jiiitasanojinijijanaa, queraatia nia jiiitanura, tamasaca nia niqutiojonura pueyaracaanu. Naacujitij, canaa jaara nia niqutiojosano cumaneeca tiqutiasee Judea jiyajiniani, parta Pueyaso pueyari Pueyaso timitianutaniya. Capora nia quiniucua, nojoriiri Pueyaso sequenutaniya, “paacarasho”. ¹² Naacujitij, nojori jaara masere nojoririano nia jiyarosano cumaneeca, majaari saaja nojori jiiitanu quiniutianiya nojori panishano. Cunoori saniya nojori shiniuujiniutianiya nojori shuquiriniuria Pueyaso, queraatia nojori sequesacari: “Paacarasho Pueyasonaa”.

¹³ Nojori jiiitasacari puetunu nojori panishanojuanaa, nojoriiri Pueyaso maniniuhuaqueetanutaniya jiyanoohua. Nojoriiri naa maniniuhuaqueetanutaniya Pueyaso, nojori niishishacari niaaqui seetanujuanaa Jesucristo Rupaa tojitiacajuhuaaj, naajaa, taucua nia quishacari nojoriria. Nojoriiri Pueyaso maniniuhuaqueetanutaniyajuhuaaj jiyanoohua capora nia quiniucua nojoriria, tamasacaranio. ¹⁴ Nojoriiri Pueyaso secojonutaniya niaacuarajuhuaaj, jiyanoohua nojori paniniutia niajaniya, Pueyaso jiyatenucua niajaniya nojori panijia nia quiniuria. ¹⁵ Naajuhuaaj, janiyari jiyanoohua Pueyaso sequeyani, “paacarasho”, jiyanoohua maninia na miiniucua niajaniya, Neyanu Jesucristo jataniniucua nioojia.

10

Pablo cuaara tojishaaria, Jesucristo jiyatenucua nojuaja na rupaa pohanatara

¹ Janiacujajari Pabloni. Quenaaja cua tojitiare. Cua Jiyaniijia Cristoori jiyanoojia quiquiaaricuaa, jacaria pocuajajuhuaaj. Janiyari naa quiniu panijajuhuaaj. Naaratej, janiyari quiarijia nia nenecojiyani, cua tojitiare

quenaaja. Tamasacanaari cua pocuaquiaa, janiyanaari jacaria pocuaja quiquiaa juhua puerejani, nia tajiinia cua quishacari. Saniniuujia, tucaacaanu cua quishacari, janiyanaari jiyanoahua nia nacasuquiaa cua naajioneejiniani, juhua nia pueresano jiyaniijia. ² ¿Seetanutejanaa, janiyate naani? Janiya jaara naa quiya niaarani, naajaa. Quiarijia tucaacaanu cua quishacarijia, janiyari nio cua naajiojinia nia nenecojiyani, nia tojiniuria janiya. Saniniuujia, niaacua cua tiuquishacari, janiyari noo pojori nacasanutaniya jiyanoahuani, sacuaraatia cucuara rimiaaque-nuuquiaani. Janiyari naa miiniutianiya nojorini, nojori jaara tarinitiaaqueyijaa nia sacuaraatia na pocoojonutej. Cuno pojoriiri jiyaniya canaari saaja juhua mijiria quiniaa pueya miiquiaani, maninia canaa quiniuria nia niquiara. ³ Seetanujuanaacuaaquinatejaj, canaari nareja pueyani. Naajaa, majaari canaa miaquejonu quiquiaa canaa paraa, taa pueya miaquetoojoquiaacuaani. ⁴ Mijiria quiniaa pueyari miaquetoojoquiaa cutara tama nojori shipinishano casaatajaaja. Canaa miaquetoojotaja saniniuujia, cunoori Pueyaso cumaacajanaa cutara. Naacuajitij, canaa naata Sesaaca niishishano shocotanu. ⁵ Pueyaso cumaacata, canaari mijiria niishijia niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishinuria Pueyaso. Naajaa, Pueyaso cumaacata, canaari puetunujuanaa najuhua pueya niishiriojosano jataniquiaani, Cristo tojijia nojori quiniuriajuhuaj. ⁶ Canaacuajaari Pueyaso jeenucuaano pueyani, canaa nacasunura puetunu tojiyashijiacajanaa. Naacuajitij, niaa jaara puetunu Pueyasojiniji canaa niishitiojosanojuanaa tojitiajacara quiriohua, na nuhuaji cutara canaa naata puetunu cureeno tojiyashijiacajanaa saniitonu.

⁷ Niaari tama cushitiquiaajaacujua nia tiushacari cuno sapojonujuaca pohuatasanoocua. Nojoriiri sapuenu juhua Jesucristo jiyaramiquishano niquishiya najuhuanaj. Maninia nia niishiriojore pueyanaa, nia janiya cante sapojosaacanucujani. Niaa jaara niishiri niaari seetanujuanaa Cristo saquiriojosano pueya, naacuajitij, nijaniya cuara niishiria canaari Cristo saquiriojosano pueyajanihuaj. ⁸ Niaa jaara jiyaniya janiyari juhua pueya shocotaja nia sequeyani: “Canaari nia jiiitianaani”, naajaa, majaari cua caririquiniu niaa cua sequesacari nijaniyatej. Pa Jiyaniijia Cristojuanaacujaaari canaa jiyatequiaari nia jiiitianaa canaa quiniuria. Canaari naa jiyatesaaciaarini, canaa cumaquiniuria nijaniya na rupaata, seetanujuanaa Cristo pueya nia quiniuria. Majaari canaa jiiitanu najuhua na cumaaca, canaa sesonura nijaniya. ⁹ Naa cua naajiosacari niaacuaratej, majaari nia jyaniniu janiyari nia piriyojiyani nia puerenura janiya. ¹⁰ Tamasaca nijaniyajinijinio pueyanaari cua sequequiaajuahuaj: “Pabloori puera jiyanoahua pa nacasuquiaa na naajioneejinia. Naajaa, pa tajiinia na quishacari, nojuajaari juhua tojishoo pueyano niquishano quiquiaa. Naajuhuj, na pohuatasacari pa niquiara, na pohuatasanoori maja shanohua tojishano”. ¹¹ ¿Seetanutejanaa? Cante naa pocuaquiaani, nojuaja cuara niishiiria quiarijia, taa canaa naajiocanu niaacuaracujaja tucaacaanu canaa quishacarijiani, canaari naa miiniutianiyan niaacua canaa tiuquishacari.

¹² Cuniqiu niaata quiyajaariuhua tamasa pueya, canapue te nia sequequiaacujani, nojoriniari socua maninia Pueyaso rupaa pohuataanaa tamacajiniji, canaajinijihuaj. ¿Nojoritiri seetanujuanaa socua maninia Pueyaso rupaa pohuataanaa canaajiniji? Johuaj. Naajaa. Majaari canaa tacaaniu quiquiaa juhua nojori canaa quiniuria. Cuno pojoriiri tama na cuaqueya timitiacoquiaajaacujua, nojori soosacari narta Pueyaso rupaa pohuataanaa. Nojoriiri naa quijicatej, nojori jyanishacari nojori

cutaraari socua tojishano pueya tamasacajiniji. Naa nojori miishacar-itij, nojori cutaraari seetanujuanaa mosanucua. ¹³ Canaa cutara, majaari tamasaca poonijiosano canaa jiyatenu quiquiaa juhua canaa poonijosano Pueyasora. Canaa cutaraari saaja canaa miishano shuquiritaquiaani, tee Pueyaso jiyaroquiaari canaacuajani. Nojuacuajaari canaa jiyaramiquiquiaari niaacua Corinto tiacajinia, nia niquiara canaa pahuatana na rupaa. Naacuajitij, niaari na muerasura quiquiaari. ¹⁴ Majaari najuhua canaa timitianu niajaniya, Pueyaso muerasu nia quiniucua. Niaacuajaari Pueyaso muerasura quiquiaari canaa pahuatanucua nia niquiara seetanu rupaajanaa Jesucristojiniji. Canaa cutaraari seetanujuanaa Pueyaso rupaa pahuatanu coteetanaa nia niquiarani. ¹⁵ Majaari canaa shuquiritianu najuhua niajaniya. Canaa cutaraari nia tiutuquiaari Jesucristoocuanu, niaacua Pueyaso jiyaronucua canaa. Naajaa, canaari socua nia pahuatanu paniya Pueyaso rupaani, seetanujuanaa Jesucristo rupaacua tiujiaca nia quiniuria. Naacuajitij, niaa jaara seetanujuanaa Pueyaso rupaa tojijiaa quiri, niaari saniniuujia na naata canaa cumaquiniu. ¹⁶ Niocua canaa cumaquiri canaa quianura tamaqui, tee Jesucristojiniji pahuatansoojua quiyacuajani, tii canaa pahuatanura nojuajiniijijuhua. Majaari canaa quiniu paniniu pootia tamasaca poonijosaqui, taa cuno rimiaacoori quiquioya shuquiriaatia canaa poonijosaquicuaani. ¿Nojori shuquiritiasanteeri tama nojori poonijosanojuaja? Maja. Niaacuajaari Pueyaso muerasura quiquiaari canaa nia tojitianucua.

¹⁷ Pueyanaa, nio tariucuacaanu naajiotasanoori niaara, nia niishishocoriqiano. Naa sequeyari: “Cante shuquiriaatia quijia quiniu paniyani, nojuaja cuaara pa Jiyaniijia shuqiritiaara cutara”. ¹⁸ ¿Taa nia sequeyani pueyanaa? ¿Cana Pueyaso sequenutaniya socuaarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Janiya cutaraari maninia Pueyaso pueyanoni”? Maja. Pueyaso shuqiritiasano cutaraari noo pueyano, cana pa Jiyaniijiajanaa sequenutaniyacujani: “Quiaa cutaraari maninia cua pueyanoniyojua”.

11

Pablo pahuatasano na paraajiniji

¹ Pueyanaa, cua tojitiuru nareja. Juhua paateca tama cua cuaqueyajiinijiaaja nia pahuatanu paniyanijia. Naajaa, quenaaja nia rejeretare janiya. ² Janiyari jiyanohua nia tacaatiaquiaani, saaja Jesucristora nia quiniuria. Niaacuajaari niishiya, naatej, taa pueyano cojuaacuaa neyatuniojua canuucujini, saaja na camiriquiano pueyanora na quiniuria, naajuhua, janiyari nia cojuanu paniyani sesosoo nia quiniuria nia Jiyaniijia. Cristocujari juhua nia niyacarano. Nia jiitiana cua quishacari, janiyari juhua nia queni. ³ Tarijia, niaacuajaari saaja Cristo tojitiajaca quiquiaari, na panijia nia quishacari. Quiarijia saniniuujia, janiyari Sesaaca nia puere-taani, nojuaja mariqui nia sapojoreeri Cristoocujani nia rupatenura, taa cuno Susanacu sapojocujari Eva tariucuacaanucuaani. ⁴ Cuno sapojonuujaacua tiuquijosacari niaacua, tamaatia nojori pahuatanura Jesujiniji niajaniya, niaari jaarajaaja ritia na tojiquiaa. Nojori niishitiojosanoori tojetaarucua-janaa tamaatia canaa niishitiojosanojiniji niajaniya. Nojori nia tojishacari, niaari tuhujaniya samaruhua niishishano tojtiaquiaajuhua. Niaacuajaari tari tiuquijaari Jesucristoocua, Pueyaso jiyanooniuria niajaniya. Saniniuujia, cuno pojori pahuatasacari tamaatia, taa nia miiniutianiya Pueyaso pueya nia quiniuriani, niaari jaarajaaja ritia nojori tojiquiaajuhua. ⁵ ¿Cuno

sapojonuujacateeri socua tojshocoriquiano janiyajiniji, niaa na jiyatecanu juhua seetanujuanaa Pueyaso jiyaramiquishano pueyarani? ¡Janiyara maja! ⁶ Seetanujuanaa, majaari cua niishiniu maniniuuaqueenu cua pohuatasacari Pueyaso rupaa, taa cuno pojoricuaani. Naajaa, Pueyasojiniji cua niishishano cutaraari seetanu rupaajanaa, tojshocoriquiano cutara. Maja najuhanaj. Niaacuaajaari cuno niishiya, pueyaracaanu saaja maninia cua miishacari nia niquiara, cua pohuatasanojininjino.

⁷ ¿Casaara nia tojitiaa cuno pojori quarijianijia, majaari saniniuujia nia tojitianu janiya? ¿Janiyateeri sesa miiquianu niajaniyani, cua masejoyaquiniucua nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuajaari tama cua cuaqueyajaaja mueyashitiquiarini cua cumaquiniuria niajaniya. Naa cua miiniuucuatej, ¿cunoteeri sesa niaara? ⁸ Janiyari tamonu jiyacajinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niquiara cua pohuatanura Pueyaso Rupaa. ⁹ Saniniuujia, nia tajinia cua quishacari, cua jitiiaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jitiiaaquishacari cua panishanotej, Macedonia jiyajinjino parta Pueyaso pueyari namitia tiuquijioquiaari. Nojori cutaraari cumaneeca cua niquitioquiaari, cua panishano cua masetajara. Janiyari naa pueyaracaanu tama cua cuaqueyajaaja cojuaquiaani, maja cua taajetenura niajaniya cua panishano cua jitiiaaquishacari. Janiyari naa miiniutianiya pueyaracaanuni. ¹⁰ Cua Jiyaniija Cristocuaajaari niishiya, majaari quenaaja cumaneeca cua masejonu quiquiaari Acaya jiyajinia quiniaa parta Pueyaso pueyajiniji. Naacuaajitij, majaari quenaaja niquiriyatu pueyano Acaya jiyajinjino naata sequenu janiya: “Pablocuaajaari cumaneeca mashiniquijiojua canaajiniji”.

¹¹ Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquiaa Acaya jiyajinia quiniaa Pueyaso pueyajiniji? Naa cua sequesacartij, ¿janiyateeri nia paniaquiyani? ¡Majal! Pueyasocuaajaari niishiya, janiyari jiyanohua nia panijiani.

¹² Nia sequereera casaara cua mashiniquijijaquiquiaa nia cumaneecani, cua pohuatasacari Pueyaso rupaa nia niquiara. Cuno pojori, nia jiyanshano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniaari seetanujuanaa Cristo jiyaramiquishanojuhujaj, taa canaacuaani. Saniniuujia, nojori mashiniquijiosacari nia cumaneeca, nojori nia niquitiojonura nareja, naacuaajiti maatia niishishiyari, ¡nojoriiri jiyanohua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pohuatanuucua Pueyaso rupaa niajaniya. ¹³ Seetanujuanaari, ¡nojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacuaajitij, nojoriiri nia sapojiya. Nojoriiri sapuenu juhua Cristo jiyaramiquishano pueya niquishano najuhanaj. ¹⁴ Cunoori maja jiyajeneta naa nojori miiniuriatej. Satanáscuajaari tama na cuaqueyajaaja jatanijia shacantuucara, juhua Pueyaso seru na niquishaanura, pueya na sapojonura. ¹⁵ Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanujuanaa maninia miijica pueya nojori quiniuria. Nojoriiri naa miiquiaa, Satanás seya nojori quiniucua. Naajaa, ¡nojoriiri saniitiosaanutianiya sesa nojori miiniuucua!

Pablo pohuatasacari naquiya na miinujiniji, Cristo jiyaramiquishano na quiniucua

¹⁶ Socua nia sequenu pacuteyanijia, majaari nia jiyaniniu janiyari paatecani cua pohuatasacari tama janiyajinijijiaaja. Niaa jaara jiyaniya janiyari seetanujunaan paatecani, naajaa, rupaquijia cua tojtitiare quenaaja. Janiyari juhua paateca tama janiyajinijijiaaja niaara pohuatanu paniyajaanihuhuj, taa nia tojishano pueya miiquiaacuaani. ¹⁷ Naa cua pohuatasacari tama janiyajinijijiaajatej, cunoori maja cua Jiyaniijia Cristo pohuatesano janiya. Cunoori tama cua pohuatasanojuaja, juhua paateca cua quishacari. ¹⁸ Naatej, taa queraatia Pueyaso rupaa pohuatanaa tama nojorijinijijiaaja pohuatanuuquiaacuaani, janiyari quiarijia naa tama janiyajinijijiaaja pohuatanu paniyajuhuj. ¹⁹ Jiyanhua niishijiaca nia quishacari, niaari cuno paatecoori tojtiaquiaa juhuajaniya. Naatej, taa nia tojtiaquiaa cuno pororicuaani, quiarijia cua tojtitiarejuhuj. ²⁰ Naajuhuj, niaanaari juhujaniya rejeretaquiaa cuno pojori, nojori jaara nia poonijioquiaa juhua nojori seya. Naaanaari nojori rejeretaquiaa nojori jaara nia jiiitasano casami riutiocojoquiaa niaacuaji. Juhua nia jiyaniijia nojori quishacari, niaanaari nojoricua shiiniuuquiaa saaja, naajaa, nojori soosacari niajaniya. Naaanaari juhuajaniya nojori rejeretaquiaajuhuj, nojori jaara nia jiquioco maseteriquia. ²¹ ¡Nojoriquiiri jiyaniijianucujanaa cutara! Saniniuujia, janiyari nojori naaqui caririqiyani juhua nojori cua quiyaquiniucua, maja naa canaa miiniucua niajaniya, taa nojori miiquiaa sesa niajaniyacuaani.

Naajaa, quiarijia cutara, janiyari tama janiyajinijijiaaja pohuatanutaniyani, taa nojori pohuataquiaa juhua paateca tama nojorijinijijiaajacuaani. ²² ¿Taa nojori sequequiaani? ¿Nojoritiniaari Hebreo pueya, Hebreo rupaa pocujacajuhuj? Janiyajuhuj. Janiyari Hebreo pueyanojuhuj, Hebreo rupaa pocujajanio. ¿Nojoritiniaari Pueyaso saquiriojosano Israel pueyajinijinio? Janiyacuajaari Israel pueyacuajinio supuenojuhuj. ¿Abrahamtenaari nojori supuetana? Abrahamcuajaari cua supuetanajuhuj.

²³ ¿Nojoritiniaari Cristo jiyaramiquishano pueya? Janiya cutaraari seetanujunaan Cristo seruni. Janiyari jiyanhua soyani, juhua paateca naa cua pohuatasacari tama janiyajinijijiaajatej. Naajaa, janiyari seetanujunaan nia sequeyani. Janiya cutaraari socua jiyanhua nojorijinijijia poonijioquiaari Cristorani. Janiya cutaraari pueyaracaanu caminiujiushaaquiaari nujuatejojuajinia nujuatejonuni, Jesucristojini cua pohuatanuucua. Naajuhuj, janiyari pueyaracaanu caminiujiushaaquiaari majacununi. Naajuhuj, janiyari pueyaracaanu cocuaatia miiquiaarini, pueya monu panishacari janiya. ²⁴ Cuarta Judiocuacaari cua caminiujiuquiaari majacunu puetunu niquiriyatu pa juaashiquiajanaa. Cuarta Judiocuaca majacusacari, nojoriiri na majanu serojoua. Nojori majasano jaara treinta y nueve quiri, nojoriiri jiyacari carteira na majacusano pueyano. ²⁵ Naajuhuj, janiyari jiuujianaraca caminiujiushaaquiaari macata piquiniuni. Tamacari, janiyari saitia jacusaquiaarini. Shoniniacu caminijinia cua jaaretasacari buquejinia, jiuujianaraca buqueeri tiuquitiaquiaari. Naa tamacari buque tiuquiti-asacarijuhuj, janiyari na raucua cuataquiaarini puetunu niucujanaa, niquiriyatu juucanio. Cunoori quiquiaari puereeta shoniniacu caminia jiuujiajinia. ²⁶ Janiyari pueyaracaanu tiquiyocua rucuanajoju miiquiaarini. Naacuajitij, moocua cua niuuniujiushacari, janiyari cocuaatia miiquiaarini. Naa cua rucuanajosacari, janiyari pueyaracaanu puereeta nohuasenuujuaca quishaqui shocoquiaarini. Naajuhuj, tama cuarta Judiocuacajaari pueyaracaanu cua miitiano panijia, taucuanocua. Puereetaari quiquiaar-ijuhua cua rucuanijosacari tiacajinia, tiquiyocua pueya quiyaquishaqui, shoniniacu caminijinianio. Naajuhuj, puereetaari quiquiaari janiyara, cua jiyaniushacari janiyari cuarta Pueyaso muerasu tajinia quiyani, saaja cua paraa nojori quishacari. ²⁷ Jiyanhua cua poonijosacari cua Jiyaniijia

cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamuequiaarijihuhaj. Janiyari noojiaqueya miaqueyaquiciaarijihuhaj, jeya cua quiaquishacari. Janiyari naquiya miiguiaari cua rucuanajosacari shiniquiajiniajuhuaj, toqueeju cua quishacarijihuhaj.

²⁸ Janiyari naa naquiya miishaacquiaarini, mariyata tamaatia naquiya miiniujihuhaj. Naajuhuj, janiyari puetunu juucajanaa niishiriojoquiaani, taariquitijia Pueyaso muerasu maapue quiya puetunu jiyacajiniajanaatej. Janiyari jiyanohua nojoriicua tacaquiaani. ²⁹ Naacujitij, tamonu cuarta Pueyaso pueyano jaara rejeretaquiriquia Sesaaca saniniujishacari nojuaja, janiyari jiyanohua taraajeja nocuani. Tamonu jaara sesa miitishaare, janiyari na naaqui caririquiyajuhuj. ³⁰ Naa jaara paniya socua cua pohuatanura nijaniya tama janiyajiniijiaaja, nia pohuatareeraqui pueyaracaanu taraatia cua miishaanujiniji. Tama janiyajaaja, janiyari maja cumueecani. ³¹ Pa Jiyaniijia Que Pueyasocujaari niishiya janiyari seetanujuanaa sequeyani. Nojuajanaa cuara pueyaracaanu maniniuhuaqueetaaarina cutara, maja nojuajiniji pohuatanaa. ³² Tarijia, Damasco tiacajinia cua quishacari, tamonu pueyanoori Damasco tiaca jiyaniijia quiriquiaa. Nojuajari cuno jiya jiyaniijia Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadohua nujuatejoquiaari tiaca shocua sohuaca tohuateyaji, nojori quianura juucua janiya. Nojoriiri cua quietunu paniriquiaa Jesucristojiniji cua pohuatanuucua. ³³ Naajaa, cuarta Pueyaso pueyari namitia cua roshinitiaquiaari shuquiriaatia, puereetucua canaasatujinia, cuno tiaca sohuaca tacuhua shuucujaji. Janiyari naa mashiquishaaquiaari cua paraacujajini.

12

Pablo pohuatasano Pueyaso niquitishanojiniji nojuaja

¹ Paa jaara tama pajaniyajiniji pohuatariquia juhua paatecani, cunoori najuhuanaj. Naajaa, socua nia pohuatareeraj. Nia pohuatareera taa cua niquitishaaquiaari pa Jiyaniijia casaa jiyocuaaanuni. ² Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquojiniarani. Naa cua tacanishaanujinijitij, tari shocojorucuaari catorce marijia. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohanu soj. Johuj. Saaja Pueyasocujaari na niishiya. ³ Cua tojitiare, seetanujuanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohanu soj. Pueyasocujaari na niishiya. ⁴ Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuatasaanu mijiria quiniaa rupaajinia. Pueyasoori cua tenujuquiaari maja cua caminiujiniuria jiyocuaaanu cua tojishano mijiria quiniaa pueyara. ⁵ Naa Pueyaso niquitiniuucua janiyatej, janiya maara tama janiyajiniijiaaja poojotariquia cua timiniutiani, juhua tamasa shocotaja cua quishacari. Naajaa, majaari cua timitanu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. ⁶ Naajuhuj, janiya jaara tama janiyajiniijiaaja pohuatanu paniriquiani, cuno maara seetanujuanaa pohuatasano quiriquia, maja juhua paateca pohuatasano. Seetanujuanaa majaari naa cua pohuatanu paniniu, pueya mariqui cua pohuatasanojiniji cua jiyaniiriiri janiya jiyanohua maninia pueyanoni. Pueya cuara niishiiria cutara taamueca pueyanote janiyani,

saaja nojori namijiata nojori niquishacari cua miishano, tama nojori nu-
 maatajaaja nojori tojishacari cua niishitiojosanojuhuaj. ⁷ Pueyaso niq-
 tishano janiyani, na niishitishano janiyajuhua, cunoori puera jiyano-
 maninia quiquiaari. ¡Cunoori jiyano-
 hua cua timitiquiaari! Naaratej,
 janiyari cua cuaqueyajinia nootusa-
 aquiaari juhua jiohuacatani, janiya
 mariqui pueya shocotajara quiriiri.
 Cuno taajeta noonuuri Satanás mi-
 ishano quiquiaari, na tacaatiniuria
 janiya. ⁸ Janiyari jiyano-
 hua secojo-
 quiaari pa jiyaniijiani, nojuaja
 cuaara shaataara cua nootunenu.
 Janiyari
 jiuujianaraca pacutejoquiaari
 secojonuni. ⁹ Cua Jiyaniijaari
 saaja cua sequequiaari: “Janiyacuajaari
 quia cumaquiniutianiyani, cua
 panishano pueyano quia quiniuucua.
 Saaja cunocujaari quiara. Cua
 naatacujajaari socua jiyano-
 hua poonijiotenu cua cumaaca
 sasaca cua pueyajinia, tamasa-
 ca niishiniuria cunoori seetanujua-
 naa cua cumaaca, maja pueyano
 cumaaca”. Naa cua Jiyaniija
 riucuasacari janiyatej, janiyari
 shuquiriaatia quiyani cumaaca-
 aju pueyano cua quiniuucua
 pueyaracaanu. Naacuajitij,
 Cristo cumaacaari socua janiya-
 jinia niquishaaquiaa poonijiyano.
¹⁰ Naacuajitij, janiyari
 shuquiriquiaani cumaacaaju
 pueyano cua quiniuucua, Pueyaso
 cumaquiniuria janiya. Naacuajitij,
 tamasa caaara sacuaratia casaa
 sequeriquia janiya na juaashacari,
 janiyari Pueyaso cumaacata
 juhua-janiya na rejeretaquiaani.
 Naajuhua, janiya jaara cua
 panishano jiitia-
 aquiriquiani, naajaa. Pueyaso
 cumaquishacari janiya, janiyari
 juhua-janiya rejeretaquiaani.
 Naajuhua, janiya jaara naquiya
 miitiasaquiaani, taraatia cua
 miishacarijuhua Cristora cua
 poonijionuucua, naajaa. Pueyaso
 cumaacata, janiyari juhua-
 janiya rejeretaquiaa saajani.
 Naacuajitij, janiya jaara
 tojetaarucujanaa cumaacaaju
 quiquiaani, janiyari jiyacari
 socua jiyano-
 hua cumaacaraca quiquiaani,
 Pueyaso cumaquiniuucua
 janiya.

*Pablo tacaashacari Corinto tiacajinia quiniaa Pueyaso muerasu maanuu-
 cua*

¹¹ Janiyari seetanujanaa juhua paateca
 tama janiyajiniijaaja pohuata-
 reeni, juhua pueya shocotaja. Nia-
 acujaari naa cua pohuateree,
 niaacuaja naara cucuaji tacuya-
 quiquianu cua sesacaja pueyatej.
 Janiyanaari najuhuaa quijia
 pueyanoni. Naajaa, niaacuajaari
 niishiya, janiyari maja socua
 najuhuaa quijia cuno pojorijini-
 jini. Cuno pojori nia tojishano
 pueyani, nojoriiri tama na
 cuaqueyajaaja jiyatecanu juhua
 seetanujanaa Jesucristo jiyarami-
 quishano pueyara cutara. ¹² Juhua-
 janiya cua rejeretasacari naquiya
 cua miiniu nia tajinia cua quishacari,
 naajaa, janiyari pueyaracaanu
 jiyajenetata casaa miijioquiaari
 Pueyaso cumaacata nia ni-
 quiarani. Niaari nocuaji jiuujiate-
 coquiaari. Naacuajitij, niaa
 cutaraari niishiquiaari janiyari
 seetanujanaa Cristo jiyarami-
 quishano pueyano cutarani. ¹³ ¿Janiya-
 teeri sesa nia jiitiaquiaarini,
 Pueyaso rupaa cua niishitio-
 josacari niajaniya? ¡Maja!
 Janiyari nia miiquiaari maniniani,
 naajuhua, taa cua miiquiaari
 tamasa jiyacajinia quiniaa
 Pueyaso pueya maapuecuani.
 Majaari rimiajata cua miiniu
 quiquiaari niajaniya, niaata
 cua quishacari. Maja cutaraari
 cua mashiniquijionu quiquiaari
 cumaneeca niajaniyajini.
 ¡Cua jiyanoori cunora, jaara
 sesa quiquiaari niajaniyara!

¹⁴ Quiarijiani, janiyacuajaari
 quera quiaa niaacuani. Janiya
 jaara niaacua quiaareni,
 cunota quiniutianiyari jiuujianaraca
 cua pacutenu niaacua cua
 quianu. Majaari nia jiyaniinu
 janiyari nia cumaneeca
 mashiniquijionuucua
 quianutianiyani. Janiya
 cutaraari maja cua
 jiaatianu nia jiiitasano
 casamiicua. ¡Janiyari
 saaja niaacua jiaatiaa
 cutarani! Niaacuajaari
 juhua cua muerasuniyo-
 jua. Niaacuajaari
 maninia niishiya,
 muerasuuri maja
 na reratenu cumaneeca
 na quera. Na que
 cutaraari saniya
 cumaneeca rerateja
 necohuara. Naacuajitij,
 cua mashiniquijiaquishacari
 cumaneeca

niajanijajiniji, janiyari seetanujuanaa juhua nia queni. ¹⁵ Janiyari shuquiriaatia tama cua cumaneecajaaja puecanutaniyani cua quishacari niaata, socua cua niishitiojonura niajaninya. Naacujitij, janiyari tama cua cumaa-cajaaja puecanutaniyahuaj, nioojia cua cumaquiniuria. Janiyara, nioori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

¹⁶ Niaacuajaari niishiya, majaari quenaaja nia niqutionu quijia nia cumaneeca janiya. Naajaa, tamasaca niajanijajinijinionaari soquecoya, janiya naasucuaanaari jiyasohuaja nia cumaneeca nohuasejoquiaani, cua saponota niajaninya. ¹⁷ ¿Seetanutejanaa pueyanaa? ¿Janiyateeri nia sapojoquiaari niaacua cua jiyaramiquishano pueyatani? ¿Nojoritiri nia cumaneeca masequiaari? ¡Maja! ¹⁸ Janiyacuajaari Tito jiyaroquiaari niaacua na quianurani, na cumaquiniuria niajaninya. Janiyari nata jiyaroquiaari tamonu Pueyaso pueyanohuaj. ¿Titoteeri jiyacari nia cumaneeca mashiniquiquiaari? ¡Majaruhua! Niaacuajaari niishiya, Titocujaari cumaneecaacua jiaatiaashijia, juhua janiyahuaj. Janiya Titota, canaacujaari jiyanohua nia paniquiaani.

¹⁹ Sacuaraatia canaacuara nia rimiaaquenuucua pueyanaa, naajaa, majaari nia jyaniniu canaa tama canaacujijiaaja tacuyani, juhua canaa nequesoreena nia quishacari. Saniniuujia, canaari niya Pueyaso niquiara nio naajija niaacuarani, Cristo pueya canaa quiniuucua. Naajuhua, puetunu cua sequesanojuanaa niajaninya nio cua naajiojiniani, cunoori cua cumaquiniuria niajaninya cua panishano pueyanaa. Janiyari naa nia nacasuyani, seetanujuanaa Jesucristo tojijia nia quiniuria. ²⁰ Janiyari puereyani, niaacua cua tiuquishacari, janiyari niaacua taraajenutaniyani cua riuriasacari niajaninya sesa quiyanojua, maja maninia taa cua paniriquiaacuajani. Janiya jaara nia riuriasasee naa sesa quiyanojuani, jecatojua, niaari saniniuujia taraajenutaniya nia niishishacari taa cua miiniutianiya niajaninya. Janiyari puereyani niaa naasucuaari juayonuujataajaa. Niaa naasucuaari niarta pueyano jitiiasanoocua jiaatiaajaca quiyajaa. Niaa naasucuaari juaanu porocua quiyajaa. Niaa naasucuaari niarta pueyacua coriaacojuaca quiyahuaj. Naajuhua, niaa naasucuaari niarta pueyacua rimiaaquenuucua quiyajaa. Naajuhua, niaa naasucuaari tama nia cuaqueyajaaja jiyaniya niaa socua maninia pueya tamasaca pueyajiniji. Niaa naasucuaari jatiqui quiyashijiacajuhua, pueyaracaanu nia juayonuujanuucua. ²¹ Naacujitij, janiyari puereyani janiya naasucuaari Pueyaso niquiara caririqiniutianiya nia naaquini, niaa jaara naa sesa miijiaa quiyajaa. Janiyari puereyajaanihuaj, janiya naasucuaari nujuquenutaniya cua taraajenuta noo sesa miijiaa pueyacuaani, cuno pojori jaara sesa na miishano tarinitiaquiquianujua. Noojiaqueya niajanijajinijioori sacuaraatia miijiaa quiquianujua: cararaatia miijiaa sacuaraatia, na camishoo maaji numuetucunu porocujuhua, naajuhua, majaari tama nojori cuaqueya panishanojuaaja nojori rejetenu quiquiaa.

13

Socua Pablo nacasusacari Pueyaso pueya

¹ Nioori quiniutianiya jiuujianaraca cua pacutesacari quianu niaacua. Tariucuaanu Pueyaso rupaajinia, paari nio niishitiojosaaquiaarini: queraaja pueya jaara mariyata pohuatere nojori niqishanojiniji, pa naata seetanujuanaa na pohuatasanoocua tiuuni cutara. Naajuhua, niaacua cua tiuquishacari, janiyari naa miiniutianiyanian nia nequesoreesacari cuno sesa miijiaa. ² Pueyanaa, janiya jaara pacutequiaarihuua niaacua

quianutej, janiyacuaajaari puetunu niajanijajinijinio cuno sesa miijiaca-janaa piriyojoquiaarini. Quiarijiani, tucuacaanu cua quishacarijia, janiyari puetunu cuno sesa miijiacajanaa socua piriyojiyani. Naacujitij, janiya jaara niaacua tiuquishiini, cuno pojori jaara noojia tacatoyaquiyajaa, majaanori nojori cua jiuujiaaniu quiniutianiya, narta sesa miijiacanio. ³ Cua nequesoreesacari cuno sesa miijiaca, niaari jiyacari niishiniutianiya janiyari seetanujuanaa Cristo sequesano caminiujiuniani, taa nia niishiniu paniriquiaacuajani. Niaacuajaari tari niishiya, pa Jiyaniijia Cristoori maja na jitianu niajaniya juhua cumaacaaju pueyano. Niaacuajaari na cumaaca niqiquiaa tama niajanijajinijaja na saniitosacari niajaniya. ⁴ Seetanujuanaa, Cristoori juhua cumaacaaju quiquiaari jaara niyacutesanojinia teetesaaquiaari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jiiitaa. Naajuhuj, canaa, na rupaa pohuatanaani, canaari naquiya miishaaquiaajaaniuhua saaja mijiria quiniaa canaa quiniuucua, taa nojuaja quiquiaaricuaani. Saniniuujia, Cristo rupuesano canaa quishacari quiarijiani, canaa cutaraari Pueyaso cumaacaracani, maninia canaa jitianura niajaniya.

⁵ Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujiaca, maja soj? ¿Niaate maninia miijiaca taa Pueyaso muerasu miiquiaacuuaani? ¿Majateeri nia niishiniu, niaa jaara seetanujuanaa Jesucristoocua tiuujiaca quiri, nojuajaari nioojiajinia quiya? ⁶ Naajuhuj, jacaria nia niishiriojore canaajiniji. Nia niishitiriquiani, canaari seetanujuanaa Jesucristo jiyaramiquishano pueyani, maja sapojonuujuaa.

⁷ Canaari Pueyaso secojoquiaa niaacuarani, tojetaarucujanaa sesa miyashijiaca nia quiniuria, maninia Pueyaso muerasu nia quiniuria. Majaari naa canaa secojonu quiquiaa saaja pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia miijiaca nia quiniuria Pueyasora. Niaa jaara naa maninia miijiacara quiriohua, majaari canaa saniitionu quiniutianiya niajaniya Pueyaso cumaacata. Naacujitij, majaari pueya niqiniu quiniutianiya Pueyaso cumaaca canaa jiiitasano. Naajaa, pueya jaara jiyaniya canaa najuhuaa quijiaca pueyani, naajaa. ⁸ Cuaa jiiitasano cumaacaari maja canaa saniitiotajara seetanujuanaa Pueyaso rupaa tojtijajaca. Cuaa cumaaca cutaraari canaa cumaquiniuria niajaniya, socua maninia Pueyaso Rupaa tojtijajaca nia quiniuria. ⁹ Naacujitij, canaari shuquiriquiaani niaacua canaa paaretaaquishacari canaa cumaaca, canaa saniitionura niajaniya niaa jaara Pueyaso tojtiaashijiaca quiriqia. Naacujitij, canaari juhua cumaacaaju pueya niqishano quiniutianiyani, cumueeca Pueyaso muerasu nia quishacari saniniuujia. Canaari cunora Pueyaso secojoquiaani, tojetaarucujanaa maninia miijiaca Pueyaso muerasu nia quiniuria seetanujuanaa. ¹⁰ Janiyari nio cua naajioneejinia jiyanoehua nia nacasuyani tucuacaanu cua quishacarijia, maja jiyanoehua cua nacasunura niajaniya, niaacua cua tiuquishacari. Pa Jiyaniijiacuaajaari cua jiyatequiaari juhua nia jiyaniijia cua quiniuria, na cumaacata cua canashitijionura niajaniya, seetanujuanaa cumueeca na muerasu nia quiniuria. Pueyaso niqitiosano na cumaaca janiyari maja cua sesonura niajaniya.

¹¹ Cua tucuatannura nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniuucua jiaatijaca nia quiri. Nioojia nia cumaquiri, maninia cua rootasanota. Naajuhuj, nia jiyanootiooriquia maninia rupuetootesano nia quiniuria. Naa nia quishacaritij, Pueyasoori nia rupueja quiniutianiya. Nojuajaari pa panijia, pa jiyanoojiajuhuaj. ¹² Pueyanaa, Pueyaso tojijiacua nia quiniuucua,

nia saruhuaajotooriquia nujuunuta, seetanjuanaa nia paniniutia niarta Pueyaso pueya. ¹³ Puetunu niiquijinio parta Pueyaso muerasujuanaari cua sequeya cua saruhuatanura nijaniya.

¹⁴ Pa Jiyaniija Jesucristo cuaara cumaquiiria nijaniya pueyaracaanu. Nijaniya cuaara quiiria pa Que Pueyaso panishano pueyaracaanujuhuj. Naajuhuj, niaa cuaara quiiria Pueyaso Sohuanu rupuesano pueyaracaanu. Puetunu nijaniyajanaa cuaara naa quiiria.

PABLO NAAJIONEE GÁLATA JIYAJINIA QUINIAA PUEYASO PUEYACUARA

Gálata pueyacuara naajioneer

¹ ¿Niaate quiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanoni. Miriria quiniaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristojuanaacuaajaari cua jiyatequiaari na jiyaramiquishano cua quiniuria. Nojuacuajaari na Que samiitianishanohua macujiniji. ² Niya cuata quiniaa parta Pueyaso pueyatani, janiyari nio naajiyani. Nio cua naajioneer puetunu Galacia jiyajinia quiniaa Pueyaso pueya maapuerajanaa. ³ Pa Que Pueyaso, mariyata pa Jiyaniija Jesucristoni, nojori cuara cumaquiria nijaniya, nioojia cajitishano nia quiniurijahuaj. ⁴ Jesucristoori tama na cuaqueyajaaja panitiaquiaari pocuara na mosaanura. Naacujitij, nojuajaari pa jeequequiaari puetunu sesa pa miishanojinijianaa. Nojuajaari naa miiquiaari sesa miiniucua jiaatianu pa cartenura. Nojuajaari naa cusoquiaari pocuaratej, taa pa Que Pueyaso paniquiaaricujani, na muerasu pa quiniuria. ⁵ Naaratej, pa Que Pueyaso cuaara maninuhuaqueetasano quiriia. Cuaara naa quiriia pueyaraaanutej.

Maja tamonu maninia rupaa quiniu socua Jesucristo rupaaajiniji

⁶ ¿Taa nia miiquiatunni pueyanaa? Quiarijiani, janiyari jiyanoahua tacaya niaacuani. ¿Niaateeri ritia cartecanu Jesucristo rupaa, tamaatia niishitiojosano tojtiajaca nia quiniuria? Pueyasocuaajaari Neyanutaja nia cojiritiaquiaari paniniu, Jesucristo miiniucua maninia niaara, na panishano pueya nia quiniuria. ⁷ Seetanujuanaa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojoquiaa saajatejaj, najuhuana tamaatia nia niishitiojonuuquiaatej. Nojoriri Jesucristo rupaa cushitiojoquiaa niaara, nojori tacarojosacari najuhuanaj, mariyateyacato nojori quiniucua. ⁸ Cua tojiri pueyanaa, tamonu pueyano jaara pocuaji Tacuna rupaa niishitiojoriquia nijaniya tamaatia canaa niishitiojosanojiniji nijaniya, Pueyasoori na saniitionutaniya. Naajuhuj, janiya jaara tamaatia pohuatate Jesucristojiniji nijaniyani, jiyocuaaanuji roseno Pueyaso serujuhuj, Pueyasojuanaari canaa sanitionutaniya. ⁹ Janiyacuajaari naa sequeja nijaniyani. Quiarijia socua pacuterohuacuara sequenu nia niishishocoriguiano. Cua tojiri pueyanaa. Naa jaara tamaatia pohuatasaariquia Jesucristojiniji, maja naate taa tari cua pohuataquiaari nijaniyacujani, Pueyaso cuaara saniitiooranuj.

¹⁰ ¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya timitiasano quiniu paniriquiani, janiya maara pa Jiyaniija Jesucristo seru quiyquirini.

Taa Pablo jatanishaaquiaari Jesucristo jiyaramiquishano na quiniuriani

¹¹ Cuarta Pueyaso pueyanaa, nia pohuatateera cante cua niishitiojoquiaari Jesucristo rupaani, cua pohuatatano nijaniyani. Pueyanaa, nio rupaa janiya na pohuataa nijaniyani, nioori maja mijiria quiniaa pueya niishitiojosano janiya. ¹² Taa cua sequeya nijaniyacujani, majaari nio rupaa

cua niishiniu quiquiaari tamasaca pueyajiniji. Jesucristojuanaacuajaari na rupaa cua niishitiqiaari.

¹³ Níaa naasucuaari janiyajiniji tojinuujiacuaja tarijia. Seetanujuanaa cuarta Judiocuaca miishano mújia cua quishacaríjia, janiyari Pueyaso saquiriojosano pueya puecoonu panijia puetunujuanaani. Janiyari jiyanojua paracaajia nojorini. ¹⁴ Janiyari seetanujuanaa canaa supuetanaa niishitiojosano tojjia quijia cutarani, socua cuarta Judiocuaca mashiquioríjini. ¹⁵ Naajaa, jiyanojua panijia Pueyaso quiniucua, cua supueyaquishacaríjia, inojuajaquiiri tari cua saquiriojoquiaari na pueyano cua quiniuria! ¹⁶ Naacuajitij, tama na panishacaríjiaaja, nojuajanaari Neyanu cua niishitiqiaari, Neyanujiniji cua pohuatanura taucuaca. Neyanu na niishitiniu nuhuaji janiya, majaari quenaaja tamasaca nequesotanuucua cua quianu quiquiaari, cua niishiniuria seetanutejanaa na niishitishano janiya. Pueyasocuaajaari maninia cua niishitiqiaari puetunujuanaa Neyanujiniji. ¹⁷ Naajuhuj, majaari cua quianu quiquiaari Jerusalén tiacajinia, tii cua niquiniuria cuarta Jesu jiyaramiquishano pueya. Nojoriiri coteenujuanaa Jesu jiyaramiquishano pueya quijia. Jiyacaritij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiyaquishaqui Arabia jiyajiniani. Na nuhuaji, janiyari tacatequiaariuhua Damasco tiacajiniohuani.

¹⁸ Jiuujanaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shushajanaa. Nata cua quishacari, quince juucaari cua shocojoquiaari tiini. ¹⁹ Jiyacaritij, majaari socua Jesu saquiriojosano pueya cua niquiniu quiquiaari. Janiyari saaja Santiago niquiquiaari cutarani. Nojuacuajaari pa Jiyaniijia Jesu tarajanu. ²⁰ Pueyanaa, Pueyasocuaajaari niishiya, janiyari nio cua naajiojinia seetanujuanaa nia pohuataani.

²¹ Na nuhuaji, janiyari quiaquiaari Siria jiyajiniani, Cilicia jiyajiniano. ²² Saniniuuja, Judea jiyajinia Jesu tojitiajaca maapueeri juhuanujuaja maja na niishitiuniu quijia janiya. ²³ Nojoriiri saaja naa poojotasaquiaari janiyajinijitij: “Noo pueyano tarijia pa miitiaja naquiya Jesujiniji pa pohuatasacaritij, nojuajanaari quiaríjia pa Jiyaniijiajiniji pohuataa pueya niquiarajuhuj”. ²⁴ Naa nojori tojinuuushacari janiyajinijitij, nojoriiri Pueyaso maniniuuaqueetaquiaari nojori paraca na jataniniucua Jesu rupaa pohuataa na quiniuria.

2

Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanujuhuaj

¹ Catorce marijia jaara shocojoquiaari, janiyari Bernabeeta Jerusalén tiacajinia pacutequiaariuhua quianuni. Janiyari jiyacari Tito rupoquiaari cucuajuhuj. ² Pueyasocuaajaari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojitiajaca jiiñanaa pueyata rerejoquiaarini. Maja seetanu puetunu nojoritijanaa, saaja nio pojoritía: Santiago, Pedro, Juannio. Janiyari saaja cuno pojori niqiuara pohuataquiaarini taa cua pohuataquiaa Jesujiniji puetunu taucuacajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuaana sesa niishitiojiya taucuacani?” Cua sequetureeri: “Maja. Quiaacuaja seetanu rupajanaa niishitiojiya taucuaca, naa Jesucristojiniji quia pohuatasacari nojori”. ³ Naajuhuj, parta Pueyaso pueyano Titoni, cuata quiquiaari tiini, nojuajaari Grecia jiyajinino tahue. Naajaa, majaari na sequesaanu quiquiaari na cararaatiuuquia

co miatesaanura, seetanujuanaa Pueyaso pueyano na quiniuria. Nojuajaari maja naa na sequesaaanu quiquiaari. Canaa rerejosacari Pueyaso pueya jiiñanaata, nojoriiri Tito niquiquiaari nareja, nojori na rupenurajuhuaaj. Nojoriiri niishiniuria nojuajaari seetanujuanaa Pueyaso pueyanujuhuaaj, saaja Jesucristoocua na tiuuniucua. ⁴ Saniniuuja, noojiaqueya canaa Judiocuacajinijioori tama nojori cuaqueyajaaja jiyatequiaari juhua Jesu tojiiaa pueyara, nojori cojiniuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutaja nojori niishiniuria canaate seetanujuanaa Pueyaso muerasuni, saaja Jesucristoocua canaa tiuushacari. Nojoriiri juucua canaa jiyatenu paniquiaari tariucuaaanu Moisés Rootasano tojiiaa canaa quiniuhuaa. ⁵ Canaari nojori niishitiojosano pataquiaari saajani. Majaari quenaaja shiitianiyoja nojori rootasano canaa tojiniu quiquiaari. Canaari naa miiquiaarini seetanu Jesucristo rupaajanaa canaa cojuanura niaara, seetanujuanaa Pueyaso muerasuni nia quiniuria saaja Jesucristoocua nia tiuuniucua. Majaari canaa cojitiniu paniniu quiquiaari Jesucristo rupaa, tariucuaaanu niishitiojosanota.

⁶ Cuno pojori Pueyaso pueya maapue jiiñanaa Jerusalén tiacajiniani, nojoriiri jiyanohua tojishano pueya quiija. Janiyara naajaa. Pueyasocuaajaari najuhuaa quiija jiyanoocuaajuhuaaj, taa na jiyanoocuaa tojishano pueyacuani. Naajaa, cuno tojishano pueya jaara tojiquiaari taa cua pohuatquiaa Jesucristo rupaani, majaari quenaaja niquiriyatu rupaa nojori sequenu quiquiaari, nojori niishitiojonura janiya socua. ⁷ Nojori cutaraari niishiquiaari Pueyasocuaajaari seetanujuanaa cua jiyatequiaari na rupaa pohuatana cua quiniuria taucucara, taa Pedro na jiyatequiaari Judiocuaca niquiara pohuatana na quiniuriacuani. ⁸ Pedro Jiyatena Judiocuaca niquiara Jesucristojiniji pohuatariquanoni, cuno Pueyasocuaajaari cua jiyatequiaarijuhua taucucara niquiara pohuatana cua quiniuria. Naacuajitij, canaari mariyata Pueyaso jiyaramiquishano pueyani.

⁹ Santiago, Pedro, Juannio, nojoriiri socua tojishano quiija puetunu Jesucua tiuuniaa cuarta Judiocuacajinijiojuanaa. Nojoriiri seetanujuanaa puetunu Pueyaso muerasuni jiyaniujanucuaajanaa quiija. Naajaa, nojoriiri seetanujuanaa niishiquiaari Pueyasoori maninia cua jiyanoocuaari, na jiyatenura janiya Neyanujiniji pohuatana cua quiniuria taucucara niquiara. Naaratej, nojoriiri na juaashiquia niquitioquiaari canaani, janiya, Bernabeenio. Nojoriiri cunota juhua canaa sequeturiquiaa canaari seetanujuanaa nojori cojiniaani. Naa canaa sequetuquiaariiaariuhuaaj: “Maniniacuaja. Nia quiojiyare taucucaraa tii nia pohuatana Jesujiniji nojorijihuaaj. Canaari saniniuuja parta Judiocuaca tajinia poonijonutaniyanijia, nojori niquiara canaa pohuatana Jesujinijihuaaj”. ¹⁰ Nojoriiri canaa sequeturiquiaarijuhuaaj: “Canaa panishano pueyanaa, majaari nia niyjetanu casamijuniucua pueya naacunu”. Naaratej cuarta Pueyaso pueyanaa, puetunu tiqiyocuaajanaa cua rucuanesacari, janiyari naa miiquiaa seetanujuanaani.

Antioquiya tiacajinia Pedro nacasusaanujiniji pohuatasano

¹¹ Tamacari, canaa quishacari Antioquiya tiacajinia, Pedroori canacua niquiarijuhuaaj, canaata na quiniuria tii. Tii na quishacari canaata, Pedroori sesa miiquiaari cua niquiara. Cunora, janiyari jiyanohua na nacasucuaari. Cuno na miishanonni, cunoori seetanujuanaa sesa quiquiaari Pueyasora. Naa na miishacaritij, tamajaaja miiriquiaa cocuaatiari.

¹² Pedroori naa miiquiaaritij. Coteenu canaa cojiquiaari maniniari tariucua Jesucuaa tiuujiaa taucucata, canaata na miaquejonura jatiqui. Jiyacaritij, canacua tiuquijioquiaariiri socua cuarta Judiocuaca Jerusalén

tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canaacuaji rupatequiaari. Majaari tari na miaquenu paniniu quijia canaata, tariucua Jesuucua tiuujiaca taucucata. Narta Judiocuaca puerequiaariiri maja na sequesaanura: “Cunoqui sacuaraatia miaquejoja taucucata”.¹³ Tii quiniaa Jesuucua tiuujiaca Judiocuaca jaara niqiquiaari naa Pedro miishanocuaatej, nojoriiri jaara-jaaja canaacuaji rupatequiaarijiuhuj, Pedro na cojituniuria. Naajuhuj, ¡Bernabeeri jaarajaaja canaacuaji rupatequiaarijiuhuj cuno mosanucua na cojiniuria!¹⁴ Naaratej, janiya jaara naa nojori niqiquiaari tariucua Jesuucua tiuunio taucucata tamacatiuyanoni, janiyari niishiquiini, cuno pojoriiri maja maninia na miitiuniu quiriquiaa. Cunoori maja na quiniu quiriquiaa ta nojori rootasaaquiaari Pueyaso rupaacuajani. Cunora, janiyari puetunu Pueyaso pueya maanu niquiarajanaa naa sequequiaari Pedroni: “Quiaari Judio pueyano. Naajaa, majaari seetanujuanaa juhua Judio pueyano quia quiniu quiquiaa. Quiarijia saniniuujia, quiaari Jesuucua tiuunio taucucata shiniujiya nojori quiniuria seetanujuanaa juhua Judiocuaca, nojori rupenura pajaniya. ¿Casaara naa quia shiniujiya nojoriiri? ¹⁵ Paacuajaari Moisés Rootasano tojjijiaca cutarani, Judiocuaca pa quiniuucua. Paari maja tahuani, Pueyaso tojjiyashijia. ¹⁶ Naajaa, paacuajaari niishiyani, majaari Pueyaso jiyanooni pajaniya Moisés Rootasano tojjijiaca pa quiniuucua. Maja. Pueyaso cutaraari pa jiyanoojia, Neyanu Jesucristoocua pa tiuushacari. Paari cunora Jesucristoocua tiuquiaani, nojuaja jiyanooniuria pajaniya puetunu sesa pa miishanojinijijianaa. Sesa pa miishanoori maja na jiyanooshaanu quiquiaa Moisés Rootasano pa tojjishacari. Maja. Naajuhuj, majaari quenaaja niquiriyatu pueyano jiyanooshaanu quiniutianiya Moisés Rootasano tojjijia na quiniuucua. Maja.

¹⁷ Paacuajaari Jesucristoocua tiuquiaarini, jiyanooshano pa quiniuria, maja socua Moisés Rootasano tojjijiaca pa quiniuria. Na nuhuaji, paa jaara jiyaniyani paa sesa miijiaca quiriohuani Moisés Rootasano pa tojjiaquishacari tarini, saaja Jesucristoocua pa tiuushacari, paari jiyanoohua jiyajeneyani. Naa pa jiyaniishacari, paari juhua sequeyani Cristoori pa jiyaterohua sesa miijiaca pa quiniuhuara nocua pa tiuuniucua. ¿Quiaateeri naa sequenu paniya Pedronaa? ¡Maja! ¹⁸ Paacuajaari maninia miiquiaarini pa tarinitiasacari tojiniu Moisés Rootasano, jiyanooshano pa quiniuria saaja Jesucristo rupaacua pa tiuushacari. ¿Paateeri socua maninia miijiaca quiniutianiya Pueyaso niquiarani, paa jaara Moisés Rootasano tojjijiaca quiriohuani? ¡Maja! Paa jaara naa niishiriojiyani, paari jiyanoohua jiyajeneyani. Paacuajaari seetanujuanaa pohuatanuquiaa puetunu pueya niquiarajanaani, nojoriiri jiyanooshaanutianiya saaja Jesuucua nojori tiuushacari. Naa pa pohuatanuusano jaara sajojosano quiriquia, paa maara jiyanoohua sesa miijiaca quiriquiani. Saniniuujia, Pueyaso cutaraari seetanujuanaa pa jiyanooquiaa saaja Neyanuucua pa tiuushacari”.

Janiyari naa nacasuquiaari Pedroni puetunu tii quiniaa Pueyaso pueya niquiarajanaa. ¹⁹ Pueyanaa, cua niishishacari maja cua naata Moisés Rootasano tojiniu maninia puetunujuanaa, janiyari niishiquiaarini Pueyasoori cua shaajanutaniya na shuriucuaji. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano tojjijia cua quiniuria socua. Naacuajitij, janiyari quiarijia saaja Pueyasora quiya cutarani. Janiyari, janiyari tari cojiritiasaaquiaari monu Cristota niyacutesanojiniani. ²⁰ Naacuajitij, quiarijiani, majaari nio janiya quiyani. Jesucristoocujaari nio, coojajinia quiyani. Majaari tamajaaja saminio cua quiniu. Jesucristo cua rupesacari, naacuajiti janiyari saminio quiyani. Naa

saminio cua quishacari puetunu cua cuaqueyatajanaatej, janiyari rishiyani Pueyaso Niyanuucua tiuujia cua quishacari. Nojuajaari cua paniquiaari. Naaratej, tama na cuaqueyajaaja tarintiaquiaariiri cucuara na mosaanura. ²¹ Majaari cua ruuretanu Pueyaso jiyanooni panishacari janiya. Jaara pa naata quiriquia tama pa cuaqueyajaaja jiyanootini Pueyaso, Moisés Rootasano tojjijaca pa quiniuucua, Jesucristo maara najuhuana cusoquiaari pocuara.

3

¿Teyano tojjia pa quishacari pa jiyanooshaaquiaani, Moisés Rootasano, Jesucristoocua tiuuniu soj?

¹ Mosanucua Gálata pueyanaa, ¿cante nia shimiojocanuni, naa pa Jiyani-ijia Jesuucua tiuuniu nia tarinitianuratej? Canaa jaara shushajanaa nia niqiuara pohuataquiaari Jesucristojinijitij, canacuajaari maatia nia niishitiqiaarini, nojuajaari pocuara mosaaquiaari pa jiyanooshaanura. ¿Quiar-ijiaariuhua, cante tari nia sapojocanuni, Jesucristoocua tiuuniujiniji nia pishinuriani? Naa nia miishacaritij, ¿niaateeri jiyaniya niaa tama nia cuaqueyajaaja jiyanootiniutianiya Pueyaso? Maja nia naata pueyanaa.

² Quiarijiani pueyanaa, janiya saaja nio nia nequesotanu paniyani. Cua riuucature. ¿Niaateeri Pueyaso Sohuanu tiuquiniquiaari nioojiajinia Moisés Rootasano nia tojiniuucua, Jesucristo rupaacua nia tiuuniuucua soj? ¿Taa nia sequeyani? Niaacuajaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiuushacari, niaa jaara na rupaa tojjiquiaari.

³ ¡Niaaquiiri tojetaarucujanaa mosanucujuhuanajaj! Nia niqishuriiraj, niaacuajaari Pueyaso muerasura quiquiaari Pueyaso Sohuanu nia shanacunuucua nioojiajinia na tiuquiniuria, Jesucristoocua nia tiuushacari. Quiarijia saniniuujia, ¿niaateeri jiyaniya nia naata Pueyaso jiyanootiniu tama nia cuaqueyajaaja Moisés Rootasano nia tojishacar-ihua juucua, tama nia cumaacatajaaja? ¡Maja! ⁴ Pueyasocujaari jiyanoohua maninia miiriquiaa nijaniya, saaja Neyanuucua nia tiuushacari. Naa Pueyaso miishano niaarani, ¿cunoteeri najuhuana quiquiaarijuhuaj?

⁵ Pueyanaa, Pueyaso jaara na Sohuanu niqutioquiaa nijaniya, na nuhuaji na cumaacata miiquiaa nia niishishoo casaari, nia sequeretoj, ¿casaara naa na miiquiaarini? ¿Pueyasoteeri naa maninia miiquiaa nijaniyatej, Moisés Rootasano tojjijaca nia quiniuucua? Maja. Nojuajaari naa maninia mi-iquiaa nijaniyatej, saaja na rupaacua tiuujia nia quiniuucua, canaa pohuatasano nijaniyani.

⁶ ¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuajaari Pueyaso sequesanoocua tiuquiaari. Naaratej, Pueyasoori na jiyatequiaari juhua tojetaarucujanaa sesa miyashijia pueyanora. Naa na jiyatequiaariiri saaja nocua nia tiuuniuucua.

⁷ Naacuajitij pueyanaa, quiarijia nia niishiri cutara, cante Pueyasocua tiuujiani taa supuetana Abraham tiuquiaaricuaani, nojoriiri seetanujanaa canaa supuetana Abraham niquihuajanaa cutara.

⁸ Pueyaso jaara na sequenu panishano naajiotaniquiaari tariucuaaanu, nojuajaari tari niishiquiaari taa taucua na jiyanooniutianiyaanihuaj, nojori jaara nocua tiuuri. Naaratej, nojuajaari naa sequequiaari supuetana Abrahamtej: “Quiaacuajaari cua sequesanoocua tiuuri, Abrahamnaa. Naaratej, quia jinianuucujainio supueno pueyanoori jiyanoohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiyacajinijiojuanaa nocua tiuuriquiano pueyatej”. ⁹ Naaratej, cante Jesucristoocua tiuujiani, Pueyasoori na

jiyanooniutianiyajuhuaaj, taa supuetana Abraham na jiyanooquiaaricuaani, na sequesanoocua Abraham tiushacari. Cunora, Pueyasoori maninia miiquiaa Jesucristoocua tiuujiaca, taa na miiquiaari Abrahamcuaani.

¹⁰ Saniniuuja, cante jiyaniyani Pueyasoori na jiyanooniutianiya Moisés Rootasano tojjia na quiniuucua, nojuajaari pueyaracaanu saniitiosaanutaniya. Naa naajiotasano quiyacuajaari tariucuacaanu Pueyaso Rupaajinia: “Moisés Rootasano tojjia cuaara tojiiira puetunu Pueyaso naajiotanishanojuanaa. Cante niquiriyatu na sequesano tojiyaquijiani, nojuajaari pueyaracaanu sanitiosocoriquiano”.

¹¹ Naacuaajitij, niaari niishiyacuaja, majaari quenaaja niquiriyatu pueyano jiyanooshaanu quiniutianiya, Moisés Rootasano na tojiniuucua. Saniniuuja, naa naajiotasano quiyacuajaari Pueyaso Rupaajinia:

“Pueyaso jiyanooshano pueyanoori pueyaracaanu rishiriquiano cutara, Pueyasooocua na tiuniuucua”.

¹² Saniniuuja, Moisés Rootasanoni, cunoori maja na niishitiojonu Pueyasooocua pa tiuniuria, jiyanooshano pa quiniuria. Maja. Saaja naa sequeyari:

“Cante puetunu nio naajioneejinia rootasanojuanaa tojjiani, nojuajaari cuno na tojiniuucua rishiniutianiya”.

¹³ Maja maninia pa tojiyaquiniuucua Moisés Rootasano, paari Pueyaso puecosocoriquiano quiquiaarini. Naajaa, Pueyasoori pa jiyaniija Jesucristo jiyatequiaari na sesacasano pueyanora pa niti, pocuara na cusonura. Naa sequeyajaariuhua tariucuacaanu Pueyaso Rupaajinia:

“Pueyaso sesacasanoori cuno, niyacutesanojinia teetasanoni”.

¹⁴ Naa Jesucristo cusonuucua pocuaratej, saaja nocua nia tiushacari, Pueyasoori na naata shuquiritini niajaniya taucuacajuhuaaj, puetunu na sequesanojajanaa canaa supuetana Abraham. Naajuhuaaj, saaja pa tiuniuucua Jesuucua, puetunu pajaniyajanaari Pueyaso Sohuanu masequiaani, taa seetanujuanaa Pueyaso sequequiaari tariucuacaanucujani.

Moisés Rootasanoori maja na naata Pueyaso sequesano Abraham jataniniu

¹⁵ Cuarta Pueyaso pueyanaa, maatia nia pohuatareera maninia nia niishiniuria cua pohuatasano. Cua tojiri. Pueyano jaara maninia miiniu paniri narta pueyanora, naa miijiaari: na sesa naajiotajaari naajioneejinia, tee cuniqui na miishocoriquiano naajiotasano quiyacuajani. Jaara naa miiritij, majaari quenaaja tamonu na naata cuno naajioneejinia naajiotasano jataniniu, socua na maatenunio. ¹⁶ Tariucuacaanu, Pueyasoori naa sequequiaari Abrahamtej:

“Janiyari seetanujuanaa maninia quia miiniutianiyani, quia jinianuucujinio superiquiano pueyanonio”.

Nia niishiri pueyanaa, tariucuacaanu Pueyaso Rupaajinia naajiotasanoori maja na sequenu: “Abraham jinianuucujinio supueno pueyara”. Maatia sequeyacuajaari: “Abraham jinianuucujinio supueno pueyanora”. Niquiriyatu pueyano sequeyari, maja queraatia. Nojuajaari pa jiyaniija Cristocuaaja. ¹⁷ Cunora pueyanaa, janiyari seetanujuanaa nia sequeyacuajani. Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso sequesanoori maja na naata jatanishaanu. Naacuaajitij, Moisés Rootasanoori maja na naata Pueyaso sequesano Abraham jataniniuujuhuaaj. Seetanujuanaa Pueyaso sequenu nuhuaji Abraham, taa nera na miiniutianiyani, cuno nuhuaji, shocojiquiaariijaaraari cuatrociento treinta marijia. Cuatrociento treinta marijia shocojonu nuhuaji, Pueyasoori jiyacari shusha Moisés niqutioquiaari

na rootasano, saajianeecaacua na quejasano. Moisésri saniniuuja pueya na niishitiojoquiaari. Naacujitij, Moisés Rootasanoori maja na naata Pueyaso sequesano Abraham jataniniu, najuhuaana na quiniuria pajaniyara. ¹⁸ Pueyaso niqutionu panishano pajaniya jaara pa niquticosaariquia saaja pa tojiniuucua Moisés Rootasano, na niquticosocoriquiano pajaniya maara noreja niquticosoo quiri. Saniniuuja, Pueyasocuajaari seetanujuanaa naa Abraham sequequiaari: “Janiyari nareja quia niqutionutaniya cua sequesaroni”.

¹⁹ Niaa naasucuaari sequeya: “Jaara naa quiritij, ¿casaarano socuateeri Moisés Rootasaroni?” Nia sequereera pueyanaa. Jiyanhua Abraham nuhuaji, Pueyasoori Moisés caminiujiutiquiaari na rootasano, pueya niishiniuria nojoriiri seetanujuanaa Pueyaso tojiyashijiaa. Cunora quiquiaariiri Moisés Rootasano. Cuno Rootasanoori quiquiaari Abraham jiniuanucujinino supueno pueyano cuara tiuquiquiaariijaatijia, taa Pueyaso sequequiaari Abrahamcujani. Nojuajaari pa Jiyaniija Jesucristocuaaja. Naacujitij, Jesucristocuaajaari Pueyaso jiyaniquishano quiquiaari, na sequesacari Abraham, “quia jiniuanucujinino supueriquiano pueyano”. Cristocuaajaari puetunu Pueyaso sequesano Abrahamjanaa masequiaari pajaniyarajuhua, taa Pueyasojuanaa sequequiaari Abrahamcujani. Saniniuuja, Moisésri saaja pueya niishitiojoquiaari Pueyaso seya caminiujiushano nojuaja. ²⁰ Abrahamra saniniuuja, majaari quenaaja tamonu pueyano quiniu quiquiaari nera na caminiujiuriquiano. Pueyasojuanaacuaajaari nocua muetaquiaari, na sequenura seetanujuanaa taa Neyanuucua tiuujiaca na miiniutianiya maniniani. Cunora, Pueyaso rupaa Jesucristojiniji pa tojisharoni, cuno cutaraari socua pa tojishocoriquiano Moisés Rootasanojiniji.

Casaaranote Moisés Rootasaroni

²¹ Naa cua sequesacariitij, ¿niaateeri jiyaniya, Moisés Rootasano naasucuaari pajaniyarano Pueyaso sequesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiriquia Pueyaso jiyanoootiniu pajaniya, paa maara Moisés Rootasano tojitiajaca quiriquiani. Pueyaso jiyanooniuria pajaniya. ²² Saniniuuja, tariucuaaanu Pueyaso Rupaajinijini, paari niishiyani puetunu pueyapuejanaari Sesaaca pueya. Naaratej, majaari pa naata tarinitianu quiquiaari sesa miiniu. Naacujitij, paari maatia niishiyani, puetunu pueyajanaa cuara tiuria Jesucristocua, Pueyaso sequesano Abraham nojori masenura.

²³ Pa niishiyaquishacarijia Jesucristocua pa tiuuniuria, paari juhua Moisés Rootasano jiiitiasano pueya quijiani. Paari naa quijia taraatia pueyacaani, paa jaara tojiquiaari Jesucristojinijiaatijia, nocua pa tiuuniuria. ²⁴ Naacujitij, Moisés Rootasanoori juhua pa jiiitiana quiquiaari. Juhua naatujooriniyoyua pa pueratejojua Jesuucuaari. Naa na miishacari pajaniyatej, juhuacarijia Jesujiniji pa niishitiojojuuari. Naacujitij, paa jaara Jesuucua tiuquiquiaarini, paari puetunu sesa pa miishanojinijijanaa jiyanooshaaquiariini. ²⁵ Naa Jesuucua tiuujiaca pueya pa quishacari quiar-ijiatej, majaari socua pa tojiniu tariucuaaanu pa canashitijiona. Moisés Rootasanoori juhua pataaco seru quiquiaari, Pueyasora na canashitijionura pajaniya, juhua naatujoori pa quishacarijia. ²⁶ Quiarijia cutara, puetunu niajaniyajaari Pueyaso pueya, Jesuucua nia tiuuniuucua. ²⁷ Naacujiti pueyanaa, niaa jaara moojinia tiuquinishaacanu, seetanujuanaa nioojiata nia tiuushacari Jesuucua, niaari na coquetesaquiaa. Naa nia quishacari natatej, na Que niquiara, niaari juhua nojuaja niquishano, na panishano

muerasuniyojua nia quiniucuajuhuaj. ²⁸ Naa Pueyaso muerasu pa quiniucuatej, majaari Pueyaso niqiniu rimiajata pajaniya. Tamonu jaara Judio pueyano quiri, naajaa. Tamonu jaara tahue quirijiuhuj, naajaa. Poonijioteseano pueyano maaraja, camarnuuj pueyanonio, cunoori maja rimiajata Pueyasora. Naajuhuj, caya, maaji, cunoori maja rimiajata Pueyasora. Jesucristoocua tiuujia pa quishacari, Pueyasora, puetunu pajaniyajanaari juhua niquiriyatu pueyanoni. ²⁹ Naajuhuj, niaa jaara seetanujuanaa Jesucristo pueya quiri, niaari seetanujuanaa canaa supuetana Abraham jihuacuajinio supueno pueya cutara. Naacuajitij, niaari Pueyaso sequesano Abrahamrano maseriquianojuhuaj.

4

¹ Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quiri, na shaajesacari, neyanuuri camarnura jiyatesano na que niti. Shaajeno pueyano niyanu jaara naatujua quirijia, neyanuuri juhuanajuaja maja na naata na que casami jitianu. Nojuajaari saaja juhua pataaco seru, naatujua na quishacarijia. ² Naacuajitij, tamasacaari cuno mueya canashitijia, cuaara mashajara quirijiaatijia, jiyaniijara jiyatesocoriguano, taa na shipininio sequequiaaricujani. Jhuacarijia niishitiojoshiyajaariuhuj, maninia na jitianura nerano na que riuriotaca. ³ Paari naajuhuj. Pueyaso pueya pa quiyaquishacarijia, paari juhua naatujoori quiquiaarini. Paari mijiria niishishano tojitishaaquiaarini, pa supuetanaa niishishanonio. Paari naa taraatia jitiiasaaciaarini. ⁴ Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajijini-jijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti. ⁵ Naacuajitij, nojuajaari na naata Moisés Rootasano tojjijiaa jiyanooni, maja socua pa tojitishaanura Moisés Rootasano. Naaratej, Pueyasoori na naata pa jiyatenu na muerasu pa quiniuria cutara. ⁶ Seetanujuanaa na niishitiniuria pajaniya paari necohuani, nojuajaari Neyanu Sohanu jiyaroquiaari pocua, poojiajinia na quiniuria. Naa poojiajinia na quishacari, nojuajaari Pueyaso pa sequetequiaa, “cua Quena”. ⁷ Naacuajitij pueyanaa, majaari tari nia quini Moisés Rootasano tojjijiaa, juhua pataaco seru. Niaacuajaari seetanujuanaa Pueyaso niquihua cutara. Naa na muerasu nia quishacari, niaari tariucuaanu Pueyaso sequesano Abrahamrano maseriquianojuhuaj, taa na muerasurano niqutionu na sequequiaaricujani.

Pablo tacaashacari Galacia jiyajinia quiniaa Pueyaso pueyacia

⁸ Pueyaso nia niishiyaquishacarijia pueyanaa, niaari juaashiquiata shipinijosano nia pueyasohua tojjijiaa quiquiaari taraatia. Cuno casaari maja seetanujuanaa Pueyaso. ⁹ Quiarjia saniniuujia, niaari Pueyasojanaa niishiya. Pueyasojanaa cutaraari saniya nia niishiya. Naa Pueyaso panishano muerasu nia quishacari, ¿casaara najuhua supuetanaa pueya niishishano miiniuria nia paniuhua socuani? Cuno, canaa supuetanaa Judiocuca rootasanoni, cunoori maja na naata cumaquiniu nijaniya. Niaari najuhua na tojjijiaa quiniutianiya. ¹⁰ Niaanaari puetunu juucjanaa niishijiaa quiya, juhua canaa supuetanaa Judiocuca. Niaanaari sequetequiaa: “Cuno juuca, majaari pa miaquenu quiniutianiya. Cunoori pueresano juuca, Pueyaso jiyanooniuria pajaniya”. Niaanaari naa miiquiaa

puetunu shuniyarajanaa, puetunu marijijarajanaano. ¿Casaara naa miijiacara nia quiriohuacuaarini cuarta Pueyaso pueyanaa? ¹¹ Naa nia miiniuucuatej, janiyari jiyanoehua tacaya quiaririja niaacuani. Janiyari tama sequequiaajaacujua: “Cuno pueya tajinia Pueyaso rupaa cua pohuatasanoquiiri najuhuaa quiquiaari”.

¹² Cuarta Pueyaso pueyanaa, janiyari seetanujuanaa nia sequenu paniyani. Nia miiriohuarohua taa cua miiquiaaricuaani, shusha cua tiuguishacari niaacua. Moisés Rootasano niishiyashijiaca nia quishacari, janiyari na tarinitiaquiaari tojiniuni, juhua niajaniya cua quiniuriajuhuaj. Saaja Jesucristo rupaa nia tojiriohua cutara taa cua miiquiaaricuaani. Cua panishano pueyanaa, niaari maninia cua jiitiaquiaari niaata cua quishacari. ¹³ Niaacuajaari niishiya, cusosu cua quiniuucua, janiyari shushajanaa Jesucristojiniji pohuataquiaari nia niquiarani. ¹⁴ Naa cusosu cua quishacari niaatatej, naajaa, majaari nia ruuretanu quiquiaari janiya, naa sacuarraatia cusosu cua quishacaritij. Majaari quenaaja nia soonu quiquiaari janiya. Saniniuuja, niaari cua tojtiaquiaari juhua Pueyaso serujuanaa, nia niquiara cua pohuatasacari Jesucristojiniji. Naa cutaraari seetanujuanaa cua tojiquiaari juhua Jesucristojuanaa. Niaari naa timitiaquiaari janiyatej, Jesujiniji cua pohuatanuucua niajaniya.

¹⁵ Quiaririjaariuhua pueyanaa, ¿casaa nia tojetacanuni? ¿Casaara nia tarinitiarohuacuaa shuquiriaatia nia quiniuurini, taa nia quiquiaari coteenucujani? Janiyacuajaari niishiquiaarini, jiyanoehua nia paniniuucua janiya, jaara nia naata quiquiaari, niaa maara nia namijia samiriootaquiaari nia niqutiosocoriquiano janiya, cucua nia taraajesacari. ¹⁶ Quiaririja naa cua sequesacari seetanujuanaa niajaniyatej,

¿niaateeri cunora cua niquniutianiya juhua nia paraca? ¹⁷ Cuno pueya, najuhuaa tamaatia nia niishitiojoquiaa Pueyaso rupaani, quiaririja nojoriiri maninia miiquiaa niajaniya na sajonuta. Nojoriiri nia shuquiritiya, nojoriicua nia tiuuniuria. Nojoriiri naa miya, canaa nia cartenura, saniniuuja nojori tojijiaca nia quiniuria. Naacuajitij, majaari tari cua rootasano tojtiajaca nia quini quiniutianiya. Naaari cua cartenutaniyajuahuaj. ¹⁸ Quiaririjani, cuno pojoriiri nia shuquiritiyacuaa. Majaari nia jyaniniu janiya nia sequeyani, maja maninia parta pueya pa shuquiritiniuria. Taaquiriirini, maniniacuajaari parta pueya pa shuquiritiniuria, seetanujuanaa pa naacunura nojori. Naaacuajaari niishiya pueyanaa, janiyari jiyanoehua nia tojishano pueyano quiquiaarini, Jesucristojiniji cua pohuatanuucua nia niquiara. ¡Naa seetanujuanaa pueyaracaanu cua panijiacara nia jiyateriquiani, maja saaja nia shuriucua cua quishacari!

¹⁹ Quiquihuaniyojuanaa, jiyanoehua cua tacaashacari niaacua, coojiaari jiyanoehua noonu pacuterohuacuahuaj, naatej, taa maaji nooquiaacuaa na manajani, quera na ranu panishacari. Naajuhua, janiyari nia pueyaracaanu miijionutaniya naquiya niaacuani, niaa cuara jatanishaarejaatijia, quiarinio pueya nia quiniuria. Naaari naa quiniutianiyaquij, seetanujuanaa Jesucristo quishacari nioojiacajinia, juhua nojuaja nia quiniuria. ²⁰ ¡Seetanujuanaa nia shuriucua cua jatariquiani, maninia cua niishitiojonura niajaniya! Naa cua quishacari tucuaaanu niajaniyajinijitij, majaari cua niishiniu taa nia quiya seetanujuanaani. Naaanaari Moisés Rootasano tojijiacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?

Miriqui pohuatasano Agarjiniji, Saarajinijinio

²¹ Moisés Rootasano tojtiajacanaa, cua tojiri. ¿Majateeri tariucuaaanu Pueyaso Rupaajinia nia serojonu quiquiaacuaja, taa Abrahamjiniji na po-

huataani? ²² Moisés Rootasanocuajaari Abrahamjiniji sequeya, nojuajaari caapiqui niyanuraca quiquiaari, caapiqui nucuaacuajiniojuhuaj. Abrahamri neco seru muetutequiaari. Na sesojoquiaariiri Ismael. Na nuhuaji, saniya necojuanaari nera muetuquiaarijuhuaj. Na sesojoquiaariiri Isaac. ²³ Pueyanaa, Agar jaara Abrahamra muetuquiaari, cunoori tama Abraham miishanojuaja quiquiaari, mueya na panishacari. Maja cutaraari Pueyaso panishano. Saniniuuja, saniya necocujanaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijianaa muetusacari nera. Naacuajitij, Pueyasoori tarijia na sequesano Abraham tohuateequiaari. Naa na sequequiaariiri: “Abrahamnaa, quiaari niyanuraca quiniutianiya”. Naa Pueyaso sequenucuatej, necocua Saaraari muetuquiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. ²⁴ Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequesano na pueyara. Naacuajitij, Agarr miriqui juhua Moisés Rootasano, Sinaí tuhuananujinia Pueyaso niishitiojosano Moisés. Naaratej, Moisés Rootasano tojitiajaacari juhua seya quiquiaa, taa Agar quiquiaari serucuaani. ²⁵ Seetanujuanaari, Agarr miriqui juhua Sinaí tuhuananu Arabia jiyajinia. Saniniuuja, nio pa quishacarini, Jerusalén tiacaari juhua Sinaí tuhuananu, cuno tiacajinia quiniaa pueya quiniuucua Moisés Rootasano tojjijaca. Cunora, Moisés Rootasanoori juhua nojori jiitiana quiya, juhua poonijotesano seya nojori quiniuria. ²⁶ Saniniuuja, quiarinio Jerusalén tiacani, jiyocuaaanu Pueyaso racatasano pa quiquioranoni, cunoori seetanujuanaa Pueyaso muerasurano cutara. Cunoori maja Moisés Rootasano tojjijacara. Cuno tiacaari miriqui juhua Saara. Paacuajaari juhua Saara niquiohua cutarani. Majaari tari pa quiniu seru niquiohua. ²⁷ Tariucuaaanu Pueyaso sequesano cuajaari naa naajiotasano quiyajuhuj:

“Niyajaru maajiniaa, shuquiriaatia quia quiri. Quiaacuajaari mueya noonu saniyashijia. Naajaa, majaari quia taraajenu. Quia shuquiriniutia quia jaaquequejore cutara. Quiaacuajaari cartesaaquiaari niyajaru quia quiniuucua. Naajaa, quiaacuajaari socua queraatia niquiohwaraca quiri quiano cuno niyacaraca maajijiniji”.

²⁸ Cuarta Pueyaso pueyanaa, paacuajaari juhua Isaacni. Na nucarano Saara tiuniuucua Pueyaso sequesanoocua, taa na muetunutaniani, naacuajiti nojuajaari neyanu Isaac raquiaari. Quiarijiani, paari naajuhuj. Jesucristo rupaacua pa tiuushacari, Pueyasoori na cumaacata pa jataniquiaari seetanujuanaa na muerasu pa quiniuria. ²⁹ Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniuuja, saniya necocujanaa jaara nera muetuquiaari, cunoori Pueyaso Sohanu cumaacata rasaquiaari cutara. Na nuhuaji, seru niyanuuri Pueyaso Sohanu cumaacata rasano miitiaja quiquiaari. Quiarijiaari naajuhuj, Pueyaso ruuretaja pueyari Pueyaso Sohanu jatanishano pueya miitiaquiaa. ³⁰ Quiarijia nia niishiri cutara, naa naajiotasaaquiaaricuaajaari tariucuaaanu Pueyaso sequesano Abraham:

“Quia niquiocua seru quia taanuure neyanuta puetunujuanaa. Cuno, janiya seetanujuanaa quia sequequiaari niqutionuni, cunoori maja Agar niyanurano. Cunoori seetanujuanaa quia niquiocua muetusanorano, cua Sohanu cumaacata rasano mueyaranofuhuj”.

³¹ Paari naajuhuj, cuarta Pueyaso pueyanaa. Paari maja seru niquiohuani. Paari Jiyaniijia niquiohuajanaa cutarani.

5

Saaja Jesucristoocua tiuujiaca pa quiri

¹ Jesucristo cusunuucua pocuara, nojuajaari Pueyaso niqiuohuara pa jiyatequiaari, maja socua Moisés Rootasano tojjijaca pa quiniuria. Naarate pueyanaa, jiyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojjijacara nia quiniuhua. ¿Moisés Rootasano tojjijacateeri jiyanooshaanutaniya? ¡Maja! Maja pa naata tama pa cuaqueyajaaja jiyanootiniu Pueyaso, Moisés Rootasano pa tojiniuucua. ² Cua tojitiare pueyanaa. Janiyari Pablóni. Janiyajanaari seetanujuanaa nia sequeyani, niaacuajaari Jesucristoocua tiuujiaca, Gálata jiyajinia quiniaa pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanujuanaa Pueyaso pueyara quiniutianiya cutara, nia cararaatiuuquia co miatejosaanuucua? ¡Maja! Níaa jaara nia niishiriojiya, niaari Jesucristo cusonu jiyatenutaniya najuhua na quiniuria nijaniyara. ¡Pueyanaa, majaari nia tojiniu cuno Judiocuaca, canapue te nia shiniujuquiaa nia cararaatiuuquia co miatejosaanuracuajani, seetanujuanaa Pueyaso pueya nia quiniuria! ³ Janiyari socua sequenu paniya noo pojoririani, cararaatiuuquia co miatejonuujuacatej, nojori jiyaniuucua naa nojori miishacaritij, nojori cutaraari seetanujuanaa Pueyaso muerasu. Cante naa miijiani, nojuaja cuara tojiiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojiniu, Pueyaso jiyanooniuria nijaniya? ¡Maja! ⁴ Naa tama nia cuaqueyajaaja nia jiyanootiniu panishacari Pueyasotej, Moisés Rootasano nia tojiniuucua, niaari Jesucristojiniji carejerucuaa. Majaari Pueyaso naata maninia miiniu nijaniya socua, taa maninia na miiquiaacuaa na panishano muerasuni. ⁵ Pajaniya saniniuuja, paari Pueyaso Sohuanuraca cutarani, Jesucristoocua pa tiuuniuucua. Naacuajitij, paari niishiyani paari tojetaarucujanaa sesa miyashijiacara jiyatesaanutaniyani. ⁶ Quiarijiani, Jesucristo rupesano pa quishacari noca pa tiuuniuucua, paa jaara pa cararaatiuuquia co miatesano quirini, maja soj, naajaa. Cunoori najuhuanaj. Socua maninia cutaraari Jesuucua tiuuniu, Pueyaso panijiac pa quiniuria, parta pueya pa paniniurajuhua.

⁷ Cuarta Pueyaso pueyanaa, niaacuajaruhua Jesuucua tiuujiaca quijia seetanujuanaa. ¿Quiarijaariuhua, cante nia tarinitriohuacuaa seetanu ru-paacuajanaa nia tiuyaquiniuriani? ⁸ Cuno pojori niishitiojosano Jesuucua tiuuniu nia tarinitianurani, cunoori maja Pueyaso niishitishano nojori. ⁹ Cunora, seetanujanaari nio sequesano: “Shiitianiyojua jereeca mashaca jaara shoqueeca mashacajinia shuushaare, cuno shiitianiyojuuari puetunu cuno mashacajanaa jereteja”. Naajaariuhua, shiitianiyojua sesa niishitiojosanoori puetunujuanaa pa sesojuajuhua. ¹⁰ Naajaa, janiyacujaari pa jiyaniijiaacua tiuya seetanujanaani, majaari nia tojiniu quiniutianiya tamaatia cuno pojori niishitiojosano. Saniniuuja, Pueyasoori noo pojori saniitioriquiano, tamaatia na niishitiojonuusanota nia cushitioquiaani. Cante nia niishitiojiya sesani, jaara quiri cuarta Jesucristo jiyaramiquishano pueyano, tama janiyajaja soj, naajaa, nojoriiri saniitiosaariquiano.

¹¹ Cuarta Pueyaso pueyanaa, majaari cua niishitiojonu quiquiaa taucua-cajinijinio Jesucristoocua tiuujiaca, nojori miatejonura na cararaatiuuquia co, seetanujuanaa Pueyaso muerasu nojori quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaquiriquiani. Saniniuuja, Jesucristo cusunuucua niyacutesanojinia

pocuara, paari saaja naacua jiyanooshaaquiiaani. Naa cua niishitiojonuucuatej, Judiocuacaari jyanohua cua juaaquiiaani. ¹² Majaari nojori nia tojiniu, nojori niishitiojosacari nia cararaatiuuquia co miatejosaanura. Maninia juhuari cuno miatejonuunu porocua jayosaanura nia tajiniji, maja socua nojori cushitiojonura nijaniya.

¹³ Cuarta Pueyaso pueyanaa, Pueyasocuaajaari nia sequequiaari na muera-suniyojua nia quiniuria, Neyanu Jesucristoocua nia tiuuniuucua. Naacuajitij, majaari tari nia quiniu juhua poonijlotesano pueya, taa nia quiquiaar-icaaani Moisés Rootasano nia tojishacari pueyaracaanu. Naa Moisés Rootasano tojjia nia quiyaquishacari taritij, naajaa, majaari nia jyaniniu nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyata nia cumaquitiojonura, seetanujanaa nia panitioonuta. ¹⁴ Naa jaara naa miijia quiriqiatej, niari puetunu Moisés Rootasanojuanaa tojiyacuaa, taa na rootasanojinia naajio-tasano quiyacuajani. Naa sequeyari:

“Panijia quia quiriquia, taa quia paniyacuaa tama quia cuaqueyajaajani”.

¹⁵ Naarate pueyanaa, tama nia cuaqueyajaaja nia cojuare. Majaari pueyara-caanu nia juayonuujutanu, naatej, taa sareya sayonuujutaquiaacuaani. Naa jaara naa quiriqiatej, niari socua puecootoonutaniyaquij.

Taa quijiate tama na panishanojuaja miijia pueyanoni, Pueyaso Sohuanu tojjia pueyanoni

¹⁶ Janiya nia sequeya cutarani pueyanaa. Cua tojiri. Pueyaso Sohuanu tojjia nia quiri pueyaracaanu. Naacuajitij, majaari sacuaraatia tama nia panishanojuaja nia miiniu quiniutianiya. ¹⁷ Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohuanu paraca. Naajuhuj, Pueyaso Sohuanuuri poojiajinia sesa casaa pa panishano paracajuhuj. Naacuajitij, cuno pojori miaquetoojosacari poojiajinia, cunora, majaari pa naata miiniu taa pa miiniu paniyacuajani. ¹⁸ Saniniuujia, Pueyaso Sohuanu jaara nia cumaquiquiaacuaa saaja Pueyaso nia tojiniuria maninia, cunora, Moisés Rootasanoori tojiniu paniyaquishaanutaniya tari. Naacuajitij, niaacuajaari maninia miinutianiya saa Pueyaso Sohuanutaja.

¹⁹ Maatia niquishanocuaajaari taa pueya miiquiaani, noo pojori, canapete tama na panishanojuaja miijiacani. Nojoriiri juhuajaniya na camishoo maajipohua numuetucunujuaca, sacuaraatia miitioojua narta canuutajaariuhuj. Maajipohuari naa sacuaraatia miitioojua narta maajipohuatajuhuaj. Pueyari saaja naa miiniuucua jiaatijaca sacuaraatiatej. ²⁰ Naajuhuj, nojoriiri tama nojori pueyasoraaja nojori shipinishano casaa secojonuujua. Nojoriiri shimiacurijuhuj, narta pueyano shimiojonuujua. Narta pueyano niquiniu paniyashijiacajaariuhuj. Nojoriiri juaatiojuacajuhuj. Nojoriiri narta pueyano jitasanoocua jiaatijacajuhuj. Cunora, nojori niquiniu paniyaquijiaari. Nojoriiri maja na niishiniu rejetenu na juaaquiaca. Ritia juaajiaacari. Pueya nasojojua narta pueyanoocuarajaariuhuj. Naacuajitij, nojoriiri narta pueya raquiriojotaquia narta pueyajiniji. Nojoriiri saaja tama nojori panishano pueyajaaja panijia, canapete maninia miiquiaa nojoricuajani. ²¹ Cuno pojori, naa sacuaraatia miijia pueyaracaanu Pueyaso niquiarani, nojoriiri maja na niquiniu paniniu quijia narta pueyano, cante taquiya maninia miishaaree nocuajicuaani. Nojoriiri sacuaraatia mashaasequenujuacajuhuj. Nojori mashaasequenuusacari, puetunu sacuaraatia casaa miijioquiaajanaari. Jyanohua miaguenu porocua. Nojori queranacusacari, nojoriiri socua tamaatia sesa casaa miiniu niishijiacajuhuj. Nijaniya saniniuujia cuarta Pueyaso pueyanaa, cua tojiri. Cante naa sacuaraatia casaa miijiojuani,

nojuajaari maja Pueyaso jiiťiasano na quiniu quiniutianiya, pueyaracaanu rishijia na quiniuria shuquiriaatia.

²² Saniniuujia, paa jaara Pueyaso Sohuanu shanacure poojiajinia na poonijionurani, nojuajaari parta pueya panijiaara pa jiyateja. Poojia jiyateya shuquiriaatia quijiaaraari. Poojia cajitijiaariuhuaaj. Jacaria pocuajara pa jiyateyajaariuhuaaj, juhuajaniya sashijiano. Pueyaso Sohuanuuri maninia pueyanora pa jiyatequiaa, jiyanoojiano. Pa sequesano miijiaara pa jiyatejajaariuhuaaj, pueya tiuuniuria pocua. ²³ Pueyaso Sohuanuuri pa jiyateja pueya shocoteyashijiarajuhuaaj. Pa niishitiquiaajaariuhuaa tama sesa casaa pa cuaqueya panishanojuaja pa rejetenura. Paa jaara naa miijiaa quiriquia Pueyaso Sohuanu cumaacatani, majaari quenaaja niquiriyatu Moisés Rootasanojininjio sesacanu quiniutianiya pajaniya. ²⁴ Seetanujuanaari, paa jaara Jesucristo pueyanora quiquiaarini, pa rupesacari nojuaja, paari tari poojia sesoriquia seque cusojuaquiaari Cristotani, puetunu sesa pa jiaatianujuanaanio. ²⁵ Pueyaso Sohuanu jaara nia samiitianiñoquiaari Pueyaso muerasu nia quiniuria, quiarijia seetanujuanaa pueyaracaanu na tojijiaa nia quiri cutara. ²⁶ Majaari tama pa cuaqueyajaaja pa jiyaniñiu, paa socua maninia pueyano parta pueyajiniñi. Paa jaara pueya shocotejaca quiriquiani, paari parta Pueyaso pueya juaatiniutianiñi. Maja maninia, paa jaara juaatishaareni tamonu jaara socua tojishano pueyano quiri pajaniyajiniñi, naajuhuaaj, tamonu jaara socua maninia miishaare pajaniyajiniñi. Majaari naa miijiaa nia quiniu Pueyaso pueyanaa. Saaja maninia quijiaa pa quiri cutara.

6

Niarta Pueyaso pueyata nia cumaquitoojoriquia

¹ Cuarta Pueyaso pueyanaa, niaa jaara parta Pueyaso pueyano niquiriquia sesa miyano, jacaria nia nacasure. Cuno niajaniyajiniñio canapueete Pueyaso Sohuanu niishitijaraca cutarani, nojori cuaara jacaria na nacasuranoj, sesa miñiu na tariniñianuhuaa. Cante cuno sesa miijia nacasuyani, nojuaja cuaara na nacasuura seetanujuanaa na paniniutia narta pueyano. Naajuhuaaj, jiyanoñhua nia cojuare tama nia cuaqueyajaaja Sesaaca mariqui nia saniniujurijiaariuhuaaj, sesa nia miñiurijuhuaaj. ² Maninia cutaraari nia cumaquitoojonra niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa jiyaniñia Cristo rootasano pajaniyarano tohuateenutianiñi.

³ Najuhuaana quijia jaara jiyaniya nojuaja cutara niishijia pueyano, pueya tojishano pueyanotuhuaaj, naa niishiriojojuaaari tama na cuaqueya sapojiajaacujua. ⁴ Puetunu niajaniyajanaa cumaati tama niishiriojoquiaajaacujua, taamueca pueyanote niajaniñi, maninia miijia, sesa miijia soj. Niaa jaara seetanujuanaa maninia miijiaa quiriquia, tama maninia nia miishanojuaja nia timitiare. Niarta Pueyaso pueyano jaara socua maninia miijia quiri niajaniyajiniñi, socua sesa miijia soj, niaara, naajaa. Maja cunora taraajenu, maja cunora shuquiriaatia quiniujuhuaaj. Saaja shuquiriaatia nia quiri, niaa jaara maninia miiquiaa taate nia naata miñiucujani. ⁵ Puetunu pajaniyajanaari tamaatia poonijosano jiiťiaani. Tama niajaniyajaaja cumaati na miiquiaa maninia, Pueyaso shuqiritianura niajaniya, seetanujuanaa shuquiriaatia nia quiniuria.

⁶ Canapueete Pueyaso rupaa niishitiojosaquiaani, cuno pojori cuaara na niishitiojonaa niqitiojoora nojori casamijiniñi saniniuujia, nojori niishitiojona jiiťianura nojori panishanojuhuaaj.

⁷ Pueyanaa, maja tama nia cuaqueyajaaja nia sapojonu nia jiyanihacari niaari saniitioyaquishaanutaniya sesa nia miiniuucua. Majaari quenaaja tamonu pueyano na naata Pueyaso rerequetenu. Pueyasoori saniitiojua cutara. Naaratej, nio miriqui sequesano nia niishiri: “Casaa jajau pa natareeni, paari juhua cuno jajau senoonutaniyajaaniuhuaaj”. Nio miriqui sequesanoori nio niishitiojiya: cante maninia mijijiani, nojuajaari maninia miishaanutaniyajaacuhuaaj. Naajuhuaaj, cante sesa mijijiani, nojuajaari sesa miishaanutaniyajaacuhuaaj sesa na miiniuucua. Cunoori maja rimiajata. ⁸ Naacuaajitij, canapuete tama na cuaqueyajaaja shuquiritijsaa sacuaratia casaa na miishacari mijiriani, Pueyasoori cuno pojori quejoonutaniya cutara, pueyaracaanu na saniitiosocoriquiano. Saniniuuja, cante Pueyaso Sohanu tojjijiani, Pueyaso panishano na miiniuria puetunujuanaa, nojuajaari pueyaracaanu rishijara jiyatesaanutaniya cutara. Nojuajaari shuquiriaatia quiniutianiya pueyaracaanu. ⁹ Cunora pueyanaa, niaa jaara maninia mijijaa quiri, majaari maninia miiniuria nia taajenu. Pueyaracaanu maninia mijijaa nia quiri. Niaacuaajaari niishiya, pueyano jaara na cuhauriquia natara, nojuajaari na sashijia. Majaari ritia na senoону. Nio miriqui sequesanoori pa niishitiya, paa jaara Pueyaso Sohanu tojiniu tarinitiaaquirini, paa cuara sashirijuhuaaj. Na nuhuaji cutara paari jiyanohua shuquiriaatia quijiacara jiyatesaanutaniyani, maninia pa miiniuucua. ¹⁰ Naacuaajitij, jaara pa naata quiriquia, maninia pa miiriquia puetunu pueyajanaa. Saniya maninia cutaraari puetunu parta Pueyaso pueyajanaa pa miiniuria maninia.

Pablo nacasusacari pueya, quera na tucuatasaacari na naajio

¹¹ Nia niquiri cua naajio pueyanaa. Naa quera namijiaaca cua naajiosacari niaacuaratej, nia niishiri janiyajanaari nio naajiya tama cua juaashiquiatajaajani. ¹² Socua cua tojiri pueyanaa. Cuno pojori, nia shiniujuquiaa nia cararaatiuuquia co nia miatejonurani, nojoriiri naa nia miitiniu paniya saaja narta Judiocuaca timitianura nojori. Nojoriiri narta Judiocuaca puerequiaa. Nojoriiri niishiya narta Judiocuacaari nojori miiniutianiya naquiya, miatesoo nia cararaatiuuquia co quiniuucua. Majaari nojori tiuuniu quiquiaa saaja Jesucristoocua, Pueyaso pueya nojori quiniuria. Cunora, nojoriiri jiyanohua paniya nia cararaatiuuquia co miatesano pueya nia quiniurijuhuaaj, taa puetunu Judiocuacajanaacuaani. ¹³ Cuno pojori, canapuete na cararaatiuuquia co miatesanocuaani, nojorijianaari maja nojori tojiniu quiquiaa puetunu Moisés Rootasanojuanaa. Naajaa, nojoriiri nia panitiaa nia cararaatiuuquia co miatesano nia quiniurijuhuaaj. Niaa jaara miatejosaare, nojoriiri tama timiquionutaniyajaaja, nojori tojtiajaca nia quiniuucua. ¹⁴ Janiya saniniuuja, Pueyaso cuara cojuara janiya maja cua shuquiritianura tama cua miishanojuajaaj. Janiyari saaja pa Jiyanijsaa Jesucristo shuquiritianu paniquiaani, pocuara na cusonuucua jiaatiaashijara jatanishaaquaarini. Mijiria casaari maja na naata shiniujiuniu janiya, nocua cua jiaatianura socua. ¹⁵ Pueyanaa, pa cararaatiuuquia co jaara miatesano quiri, naajaa. Naajuhuaaj, pa cararaatiuuquia co jaara miatesoo quiri, naajaa. Majaari rimiajata pa quiniu Pueyaso niqiuara cunora. Saaja panishano cutaraari, quiarinio pueyanora pa jatanishaanura Pueyaso Sohanu cumaacata. ¹⁶ Puetunu nio sequesanoocua tiuujiacajanaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquiriojosano pueya.

¹⁷ Tariucuaajaari cua rootasano nio naajioneejinia. Quiarijiani, tamonu cuara socua cua taajeteyaquiiria sesa na niishitiojosanota nijajaniya.

Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiQUIAJINIJINI, cunojiniji maatia niishishiyari, janiya seetanujuanaa Jesu seruni.

¹⁸ Cua panishano cuarta Pueyaso pueyanaa, nioojia cuaara jiiitaara pa Jiyaniijia Jesucristo cumaaca, na niishitiajanio. Cuaara naa quiiriatej.

PABLO NAAJIONEE ÉFESO TIACAJINIA QUINIAA PUEYASO PUEYACUARA

Pablo saruhuatasacari Jesucristo tojtiajaca

¹ ¿Niaate quiyajaa cuarta Pueyaso pueyanaa? Janiyari Pablóni, Jesucristo jiyaramiquishano na rupaa cua pohuatanura, taa na Que Pueyaso paniquiaaricuajani. Niaacuara naajiyaniija, canapue Pueyaso saquiriojoquiaari tama neracuajani, canapueje Jesucristo tojtianaacuajani. ² Pa Que Pueyaso, mariyata pa Jiyaniija Jesucristo cuara taraajeera niaacua, maninia na miiniuria njajaniya. Nojori cuara cajitiiria nioojia pueyaraanujuhuj.

Taa Pueyaso miiquiaa pajaniyani Cristo rupuesano pa quishacari

³ Pa Jiyaniija Jesucristo Queeri Pueyaso. Nojuaja pa shuquiritiare. Neyanu Jesucristo pa rupenuucua, Pueyasoori capora pajaniyara. Nojuajaari jyanohua maninia miiquiaa pajaniya, puetunu jiyocuacaanu na jiitiasano cumacatajanaa. ⁴ Pueyaso niishishacari taa Neyanu miiniutianiya pocuarani, jiya shipiniyaquishacariija, nojuajaari tari pa saquiriojoquiaari na shuriucua quijiaca pa quiniuria. Pa saquiriojoquiaariijaariuhua na tojjiaca pa quiniuria, tojetaarucujanaa sesa miyashijia pa quiniurijuhuj. ⁵ Panijia na quiniucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuacaanu na niishiriojoquiaari na miiniuria pajaniyacuajani. ⁶ Jiyanhua maninia na panishano Niyanuniyotua miiniucua pocuara, nojuajaari pueyaracaanu jyanooquiaa pajaniya. Nojuajaari jyanohua capora. Naa maninia na miiniucua pajaniyatej, paari canora pueyaracaanu na maniniuhuaqueetaquiaani. ⁷ Niyacutesanojia Neyanu shootenuucua na nanaca pocuara, Pueyasoori pa jyanooquiaari na muerasu pa quiniuria. Naaratej, majaari Pueyaso saniifionu quiniutianiya pajaniya. Puetunu sesa pa miishanojinijijianaa pa jyanooquiaari-iri. ⁸ Pueyasoori na paniniu niishitiquiaari pajaniya, na niquitiosacari na niishitija pajaniya, puetunu casaa niishijijanaa pa quiniuria. ⁹ Nojuajaari jyanohua tariucuacaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniuujia, nojuajaari jiya-sohua na miiniu panishano niishitiquiaari pajaniya. ¹⁰ Pueyanaa, nia niishiri casaa Pueyaso miiniutianiya. Nojuajaari Cristo jiyatenutaniya Jiyaniijajanaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari na tojjiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricuajani.

¹¹ Pueyasoori tariucuacaanu pa saquiriojoquiaari Neyanutaja na cojiritianura pajaniya, maninia na miiniuria pajaniya. Pueyasojuanaari tariucuacaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricuajani, niishijia na quiniucua. ¹² Nojuajaari pa saquiriojoquiaari maninia quijiacara na jataniniurica pajaniya. Cuarta Judiocuacajinjiniio pueyani, canaari co-tenujuanaa Jesucristoocua tiuquiaarini. Naa jyanohua maninia Pueyaso miiniucua canaa, nojuaja cuara maniniuhuaqueetasaaria jyanohua.

¹³ Quiari naataja nia tojishacari Jesucristo rupaa, niaari cuno seetanu ru-paacuajanaa tiuquiaarijihuaj, Pueyaso muerasura jatanishano nia quini-uria. Naa nocua nia tiuuniuucatej, Pueyasoori Neyanu nia ru-puetequiaari. Na Sohanu niqutioquiaari niajanijahuaj taa na sequequiaaricua-jani. Naacuaji niishishaaquiaari, niaari seetanujanaa Pueyaso muerasu.

¹⁴ Pueyaso Sohanuraca pa quishacari, paacuajaari niishiyani, paari puetunu Pueyaso sequesano Neyanuranajuanaa masenutaniya Neyanuta-juhuaj. Pueyaso Sohanu pa jii-tiasacari, paari niishiyani, Pueyasoori pa ri-jionutaniya puetunu na saquirojosano pueyatajanaa, na muerasu pa quini-uria na shuriucua. Jiyacari-tij, paari tojetaarucujanaa jatanishaanutaniya juhua Neyanu pa ni-quishaanurajujuaj. Cunora, Pueyasoori jiyano-hua maninihuaqueetasano quiniutianiya, jiyano-hua maninia na miiniucua pajaniya.

Taa Pablo secojoquiaari Pueyaso pueyacuarani

¹⁵ Janyari niajanijajiniiji tojiriucuaani, taa pa Jiyaniijia Jesucua tiu-ji-aca nia quiyani, taa parta Pueyaso pueya panijaca nia quiyajanihuaj. ¹⁶ Cunora, pueyaracaanu cua secojosacari niaacuara, majaari cua tarini-tianu quiquiaa Pueyaso cua sequenura “paacarasho”, maninia na muerasu nia quiniucua. ¹⁷ Pa Jiyaniijia Jesucristo Queeri shacantushiqui quijia na cumaacajinia. Janyari niaacuara na secojoquiaani, nojuaja niq-utionura niajanija jiyocuaaanuji niishitaja. Naacuaji nia naata niishiniu na niishitiniu panishano niajanija, maninia nia niishiniuria nojuajuhuaj.

¹⁸ Janyari niaacuara secojoquiaaanihuaj, Pueyaso cuaara cuhuataara nioojia, maninia nia niishiniuria casaara Pueyaso saquirojoquiaari nia-janyani, casaa na miiniutianiya niaarajanihuaj. Janyari niaacuara seco-joquiaajuhuaj, maninia nia niishiniuria taa Pueyaso muerasu jiyatesaanu-taniya shacantuua quijica nojori quiniuriani. ¹⁹ Janyari secojoquiaa-juhuaj, Pueyaso cuaara niishitiriia na cumaaca niajanija, cuno, nioojajinia poonijiyani. Na cumaacaari jiyano-hua, puequeyashijia. ²⁰ Pueyasocuaajaari cuno na cumaaca poonitijioquiaari Cristo quetejinia, nojuaja jaara na sami-itiani-quiaarihuua macujiniiji. Jaara na samiitiani-quiaari, cuno na cuma-cata na cajitiquiaariiri Jiyaniijajanaa cajitiujinia na miaquetajara jiyocua-caanu. ²¹ Tii na cajitiquiaariiri puetunu tamasaca cumaacaraca quijica Jiyaniijajanaa na quiniuria. Majaari tamonu socua cumaacaraca quijia quiniu pa Jiyaniijajiniiji. Nojuajaari puetunu tamasaca jiyaniijianucua-janaa Jiyaniijia. Puetunu mijiria quijica jii-tiasanojuanaa na casaa. No-juajaari puetunu casaajanaa camaru. Pueyaso jaara quiarinio jiya shipiniri-ohua, Jesucristoori jiyacari Jiyaniijajanaa quiniutiani-yajuhuaj, taa quiar-ijia na quiyacuajani. ²² Naacuajitij, Pueyasoori puetunu na shipinishano-juanaa jiyatequiaari Jesucristo jii-tiasocoriquiano. Naajuhuaj, Pueyasoori Jesucristo jiyatequiaari na saquirojosano pueya jii-tiariquiano, canapue-te nocua tiuujiacacuajani. ²³ Pueyaso saquirojosano pueyari juhua Jesucristo cuaqueya. Nojuajaari juhua poojia saniniuujia, pa jii-tiana na quishacari. Puetunu Pueyaso saquirojosano pueyajanaa jaara Cristo cuaqueyajinia ru-puete-saare, Cristo cuaqueyari tucuateenutaniya seetanujanaa maninia jeecanamitishano na quiniuria. Na cuaqueya pa quishacari, nojuajaari puetunu poojiajiniajanaa quiya. Naajuhuaj, nojuajaari puetunu tiquiyocua-janaa quijiajuhanajaj.

¹ Sesa miijiacá nia quiniuucua tarijia, Pueyaso tojiyashijiacajuhua, niari macunucua quijia Pueyasora. ² Níaa jaara naa sesa miijiacá quiquiaariti, niari júhua puetunu mijiria quiniáa Pueyaso tojiyashijiacajanaa quiquiaari. Niari samárhua jiyaniia tojiijia quiquiaari, cunó, paratu piyarojosaqui quijiani. Nojuajaari Pueyaso tojiyashijiacá shiniujijia, nojori miiniuria sesa, taa Sesaaca seque paniyacujani. ³ Tarijia, puetunu pajaniyajanaari Pueyaso tojiyashijiacá quiquiaarini. Paari tama pa miiniú panishanojuaja miijiacá quiquiaarini. Naacujitij, paari puetunu pa cuaqueya miiniú panishanojuanaa miijiacá quiquiaarini, puetunu sacuraatia pa niishiriojosanojúhua. Naa sesa miijiacá pa quiniuucuatej, paari tojetaarucujanaa jiyanojúhua Pueyaso saniitosocoriquiano quiquiaari juucuaní, júhua tamasaacajuhua. ⁴ Saniniuujia, Pueyasoori pocua taraajeja cutara. Jiyanojúhua pa paniquiaariiri. ⁵ Cunora, macunucua pa quishacarijia nera, sesa miijiacá pa quiniuucua, nojuajaari Jesucristota pa cojiritiaquiaari samiitianijionu. Jiyanootiú Pueyaso quiniuucua, nojuajaari nia jiyanooquiaari. ⁶ Naa na samiitianijionuucua pajaniya Cristoocua pa tiuniuucuatej, Pueyasoori tari pa tacanijioquiaari Cristota jiyocuaaanu, tí Cristo cajitianura pajaniya. ⁷ ¡Naa Cristota na cojiritianuucua maninia miiniú pajaniyatej, cunoori jiyanojúhua maninia! Nojuajaari naa pa miijiaariti, puetunu quijiacajanaa nio pa quishacari nuhujá niishiniuria maatia, Pueyasoori jiyanojúhua pa panijia. Maatia niishishaanutaniyari Pueyasoori tojetaarucujanaa jiyanootiú cutara, na jiyanooniucua pajaniya, Neyanuucua pa tiuniuucua. ⁸ Naa Pueyaso quiniuucua jiyanootiotej, nojuajaari nia jiyanooquiaari saaja Jesuucua nia tiushacari. Majaari tama nia miishanotajaaja Pueyaso nia jiyanootiniú quiquiaari tama nijaniyajaaja. Pueyasojuanaacujajaari nia jiyanooquiaari niaacua na taraajenuucua. Naa júhua, nojuacujajaari nia tiutiquiaari Neyanuucua. ⁹ Majaari Pueyaso jiyanooniú quiquiaari pajaniya, maninia miijiacá pa quiniuucua. Paa jaara maninia pa miiniuucua Pueyaso jiyanootiquiaari tama pa cuaqueyajaajani, paa maara tama pa cuaqueyajaaja timitiareni júhua najuhuaa pocujá. ¹⁰ Shushajanaa Jesucristoocua pa tiushacari, Pueyasoori jiyacari pa jataniquiaari quiariniú pueyano pa quiniuria, maninia miijiacá pa quiniuria. Nojuacujajaari tari naa niishiriojioquiaari, maninia miijiacara na jataniniuria pajaniya.

Jesucristoori pa jiyateja jiyanootiojuacara

¹¹ Éfeso tiacajinia quiniáa pueyanaa, quiarijia nia niishiriojúhua taa nia quiquiaari tariucuaaanuni, Pueyaso muerasu nia quiaquishacarijia. Niari cuarta judiocuaa soosano taucuaa quiquiaari, nia cararaatiuquía co mialesoo quiaquiniuucua. Canaa cutaraari canaa cararaatiuquía co mialesoní. ¹² Níaa niishirijíuhua, naa nia quishacariti, niari Cristoju quiquiaari. Majaari nia naata rupeenu quijia Pueyaso saquiriojosano Israel pueya. Puetunu Pueyaso sequesanojuanaa Israel pueyaranoní, cunoori maja niarano quiquiaari. Majaari nia niishiniú quiquiaari Pueyasoori pueyacujá Tacuriquiano jiyaronutaniya mijiria. Majaari quenaaja tamonu quiniú quiquiaari nocua nia tiuniuria, Pueyaso na jiyanootiniuria nijaniya. Niari saaja taraatia shaajeriquiano quiquiaari. ¿Cantucua niaacua taraajereni? Niari seetanujanaa tojetaarucujanaa Pueyasooju quiquiaari mijiria. ¹³ Tarijia, niari seetanujanaa tucuaaanu quijia quiquiaari Pueyasojinijí. Quiarijia saniniuujia, Jesucristo shootenuucua na nanaca niyacutesanojinia, niari nata rupuetootesaquiaari, nocua nia tiushacari. Naacujitij, niari canaa rupuejacajuhua. ¹⁴ Cristocujajaari

pa jiyanoootootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupuenura canaajuhua, taucuaa nia quiniucua. Jesucristocuaajaari cunora tama na cuaqueyajaaja tarinitiaquiaari na mosaanura pa niti, cuno jiyaconaja sohuaca niyartasaanura, pa juaaquiaca tajiyatenura. Naacujitij, nojuajaari pa jiyatequiaari juhua niquiriyatu queecuajinio supueno pueya, Judiocuaca, niajaniya taucuacano. ¹⁵ Naa pa niti Jesucristo cusunucuatej, nojuajaari puetunu Moisés Rootasanojuanaa sanaajaquiaari, maja socua na sesacanura pajaniya. Tarijia, paari juhua caapiqui tiaca quiquiaarini. Paari pueyaracaanu paracaatioojua quijiani. Quiarjia saniniuujia, Jesucristo cusunucua, nojuajaari pa jiyanoootootequiaari jatiqui pa quiniuria juhua niquiriyatu tiaca, mariyata na rupuejaca pa quishacari. ¹⁶ Naaratej, janiyari socua camiya nia sequenuni. Cristo cusunucua niyacutesanojinia, nojuajaari Pueyaso jiyanootiquiaari pajaniya, na panishano muerasu pa quiniuria puetunujuanaa, niajaniya taucuaca, canaajuhua. Naacujitij, Jesucristoocua pa tiuushacari, paari juhua niquiriyatu tiaca nerani.

¹⁷ Niajaniya taucuaacanaa, niari juhua tucuacaanu quijiaa quiquiaari Pueyasojiniji. Canaa cutaraari juhua cateca quijia nojuajiniiji. Jesucristoori mijiria niquiaari, na niishitiniuria puetunu pajaniyajanaa taa Pueyaso jiyanooni paniya pajaniyani. ¹⁸ Cristo jiyanootiniucua na Que Pueyaso pajaniya, naacujitij, pa naata pa Que Pueyaso rupueno pa secojosacari nojuaja, mariyata na Sohanuraca pa quishacari, niajaniya, canaajuhua. ¹⁹ Jesuucua tiuujiaa nia quishacari quiarjia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinio rucooaa. Quiarjiani, niari seetanujuanaa Pueyaso pueya cutara. Pueyasoori maninia nia jiitiaajuhua, taa na jiitiaquiaa puetunu na saquiriojosano pueyacaani. ²⁰ Pueyaso pueya nia quiniucua, niari rupuetesano puetunu Pueyaso muerasutajanaa, juhua shanhua tia pa quiniuria Pueyaso quiqiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiuujianaa pueyani, nojoriiri juhua cuno tia pacaariana. Saniniuujia, Jesucristoori juhua cuno tia morijiuujiana cutara, cuno tia nujuatana. ²¹ Pueyasoori naa saquiriojoquiaa Neyanuucua tiuriquiano pueya, na quiqiorano na tucuatana. Cuno tia tucuateesacari, tojetaarucujanaa maninia jeenucuasano quiniutianiya pa Jiyaniijiaari. ²² Niaari naajuhua, Cristo nia rupuesacari, niarta Pueyaso pueya nia rupuesacarijuhua, Pueyasora, niari juhua rinaa, tucurunio. Nojuajaari nia morojotaquiaa na tia na tucuatana, na Sohanu quiqiorano.

3

Pabloori Pueyaso jiyaramiquishano taucuacaacua

¹ Jesucristojiniji cua pohuatanucua niarta taucuaca, janiyari cunora nujuatesano quiya nujatejojuajiniani. ² Naa naasucuaari niishiyacuaa Pueyasoori cua jiyaramiquiaari Jesucristojiniji pa pohuatanura taucuaca, jiyanooshano nojori quiniuriajuhua. ³ Tariucuacaanu, majaari pueya niishini quijia, Pueyasoori taucuaca jiyanooniutianiyajuhua, taa na jiyanooquiaacuaa Judiocuacani. Pueyasojuaanaacuaajaari naa jiyasohuaa na miiniu panishano cua niishitiquiaaritij, taa shusha nio cua naajio coteejajinia cua pohuataa niajaniyacujani. ⁴ Naa jaara cua naajionee serojore, niari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacujitij, janiyari niishiyani taa jiyanoohua maninia nia miishaanutaniyani nocua nia tiuushacari. ⁵ Tariucuacaanu, majaari

quenaaja tamonu pueyano niishiniu quijia nio jiyasohuaja Pueyaso miiniu panishano. Quiari naataja saniniuujia, Pueyasoori na jiyaramiquishano pueya niishitiquiaari cuno, jiyasohuaja na miiniu panishano taucuaacani. Na sequeno panishano caminiujunia pueya na niishitiquiaarijiaariuhuaaj. Pueyaso Sohuanucuaajaari cuno canaa niishitiquiaari. ⁶ Nijaniya taucuaacanaa, niocuajaari Pueyaso miiniu panishano jiyasohuaja nijaniya: Jesucristoocua nia tiuuniucua, Pueyasoori puetunu Judiocuacarano na sequesanojuanaa jiyatenutaniya naarajuhuaaj. Canaari Judiocuacani. Naajaa, Jesucristoocua nia tiuuniucua, Pueyasoori canaa ruquetequiaa nijaniya, juhua niquiriyatu pueyano pa quiniuria nera. Naajuhuaaj, cunora, Pueyasoori nia niqutioquiaa na Sohuanujuhuaaj, taa na sequequiaari Neyanu Jesucristoocua tiuujiacacuajani.

⁷ Janyari Jesucristo ruuretaja quiquiaarini. Naajaa, jiyanoehua cumaacaraca Pueyaso quiniucua, nojuajaari cua jataniquiaari Neyanu Jesucristojiniji pohuatana cua quiniuria. ⁸ Jesucristo paraca cua quiniucua tarijia, janiyara, janiya cuara socua rerequetesano pueyano quiiria puetunu cuarta Pueyaso pueyajiniijianaa. Saniniuujia, jiyanoehua jiyanootio Pueyaso quiniucua, nojuajaari cua jiyanoquiaari. Cua jiyatequiaariiri seetanu rupaajanaa Neyanu Jesucristojiniji pohuatana cua quiniuria taucacara. Janyari cunora Pueyaso shuquiritiaa jiyanoehua. Cristo jiiitasano pajaniyaranoni, puetunu cuno casaajanaari pa niishishoojua. ⁹ Tariucuacaanu, Pueyasoori puetunu casaajanaa shipiniquiaari. Na shipiniyaquishacarijia, Pueyasoori tari niishiriojquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitiniu quiquiaari pueya. Nio pa quishacari saniniuujia, nojuajaari cua seerataquiaari puetunu pueyajanaa cua niishitiniuria jiyasohuaja na miiniu panishano. ¹⁰ Pueyasoori tariucuacaanu pajaniyara na niishiriojosano racataquiaari pueyaracaanu tama na niishitijajiniaaja. Saniniuujia, nio pa quishacari, nojuajaari na niishitiquiaari. Quiarijiani, jiyanoehua maninia Pueyaso miishacari puetunu na saquiriojosano pueyajanaa, puetunu jiyocuacaanu cumaacaraca quijiacaajanaari niishiya, Pueyasoori seetanujanaa jiyanoehua niishijia cutara. Naacuajitij, Pueyaso seya, Satanás, samaruhuanio, nojoriiri tacuriitia shootiaquiaa pajaniya, Pueyaso miiniucua maninia pajaniya, niishijia na quiniucua. ¹¹ Quiari naataja, Pueyasoori tariucuacaanu na miishocoriguiano na niishiriojosano tohuateequiaari pa Jiyaniijia Jesucristo cusosacari niyacutesanojinia. ¹² Naacuajitij, Jesucristoocua pa tiuuniucua, pa naata juhujaniya rupeenu na Que Pueyaso pa puereyaquiniutia. ¹³ Naa Pueyaso miiniucua pajaniyatej, majaari nioojia nia niqijiotenu Pueyasooacuaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua nijaniyatej, shuquiriaatia nia quiri juhuaari. Naa naquiya cua miishacari, cuno cuara shiniujuuria nijaniya, socua pa Jiyaniijia tojijia nia quiniuria.

Pablo secojosano Éfeso tiacajinia quiniaa Pueyaso pueyacuara

¹⁴ Naa Pueyaso muerasu nia quiniucuaajuhuaaj, janyari mojqetaquiaani pa Que Pueyaso cua secojonura niaacuara. ¹⁵ Nojuacuajaari Que cutara. Puetunu queyajanaari na sesatiaacuaja. Nojuajaari puetunu parta Pueyaso muerasujanaa Que, mijiria quiniaa, tariucua jiyocuacaanu quiniaa Pueyaso muerasunio. ¹⁶ Naa nia Que na quiniucuaajuhuaaj, janyari niaacuara secojqquiaani, nojuaja cuara cumaquiria jiyanoehua nijaniya na Sohuanuta nioojiajinia. Na Sohuanuuri puetunu pa panishanojuanaa

jiitiana. ¹⁷ Naajuhuj, niaacuara secojoquiaanijia, seetanujuanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria nijaniya, nocua tiuujiaa nia quishacari. Naacujitij, niocua niishiri taa Jesucristo pania jiyanoehua nijaniyani. Naacujitij, majaari nioojia nia niquijiotenu quiniutianiya socua. ¹⁸ Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhuj, niaari seetanujuanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujuanaa, majaari pa naata shanacujunuj. Paa jaara na jamatu, na tucuaanee, na queroni, na jyaconaja shanacujunu paniriqiuani, majaari na puequeeja pa riuritanu quiniutianiya. ¹⁹ Seetanujuanaa, majaari pa naata niishiniu taa jiyanoehua na pania pajaniyani. Naajaa, janiyari niaacuara secojoquiaa Pueyasoni, seetanujuanaa nioojiaata nia niishiniuria cuno, na paniniuni. Naa jaara na paniniu niishiri, Pueyasojuanaari nioojiajinia quiniutianiya. Naacujitij, niaari tojetaarucujanaa panijiaa quiniutianiya taa Pueyasocuaani.

²⁰ Naa Pueyaso miiniuucua maninatej, nojuaja cuara shuquiritiasaaria. Naa jiyanoehua na cumaacata na poonijiosacari poojiajinatej, nojuajaari na naata miiniu socua jiyanoehua queraatia pa masesanojiniji nojuaja, pa niishiriojosanojinijinio. ²¹ Puetunu quijiacajanaa cuara niishiiria Pueyasoori jiyanoehua maninia. Nojori cuara naa niishiiria nojori niquishacari Pueyaso jatanishano na saquiriojosano pueya, Jesucristo miishanonio. ¡Cuara naa shuquiritiasaaria pueyaracaanutej!

4

Pueyaso Sohuanu pa jiiitasacari, paari rupuetootesano quijiani

¹ Janiyari niya nujuatesano quiyani pa Jiyaniijiajiniji cua poojotanuucua. Cunora, cua tojitiare. Janiyari nia sequeyani, saaja pa Jiyaniijia tojijiaa nia quiri, seetanujuanaa maninia na muerasu nia quiniuria. Pueyasocujaari nia saquiriojoquiaari naa maninia na muerasu nia quiniuria. ² Majaari niarta Pueyaso pueya rerequetajaca nia quiniu. Maninia miitoojuaca nia quiriquia. Puetunu casaajanaa rejeretajaca nia quirijihuj. Naa jiuujiaatiojuaca nia quiri nia panitiosacari. ³ Naa Pueyaso jyanootiootesacari nijaniyatej, pueyaracaanu nia jyanootioore, juhuajaniya nioojia quiniuria juhua rupuetootesano. Pueyaracaanu naa nia miiri Pueyaso Sohuanu cumaquishacari nijaniya. ⁴ Naa quijiaa nia quiri pueyanaa, niquiriyatu cuaqueyaraca pa quishacari pa Jiyaniijia, mariyata niquiriyatu Sohuanuraca pa quishacarijuhuaj. Naa Jesucristoocua tiuujiaa pa quishacartij, Pueyasoori puetunu pajaniyajanaa rijionutianiya, pueyaracaanu na shuriucua pa quiniuria. ⁵ Puetunu pajaniyajanaari niquiriyatu Jiyaniijiaracani. Nojuajaari Jesucristo. Naajuhuj, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhuj, puetunu pajaniyajanaari moojinia tiuquinijiosaaquiaarini, Jesucristo pa jiyatesacari pa Jiyaniijia. ⁶ Naajuhuj, saa niquiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojjiacajanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

⁷ Saniniuujia pueyanaa, puetunu pajaniyacujaari tari jiiitaa tamaatia poonijiosano pa miiniuriani, teyano Cristo niquitionu paniquiaari pajaniyacujani. Naacujitij, puetunu pajaniyajanaari maja pa niishiniu miiniu

saa niquiriyatu casaaja. ⁸ Tariucuacaanu Pueyaso Rupaa naajiotasanojiniji, paari niishiyani Pueyasoori na Sohuanu niqutionu paniquiaari na pueya. Cunora naa sequeya Jesucristojinijiiri:

“Na quioosano pueya tacataquiaariuhua jiyocuacaanuuri. Nareja na niqutionu panishano casaa serotaquiaari na pueyari”.

⁹ Jaara sequeya “tacaquiaariuhua”, cunojiniji paari niishiyani nojuaja jiyocuacaanuji rosequiaari coteenu, taraatia mijiria na mosaanura pocuara.

¹⁰ Nojuajani, jiyocuacaanuji rosequiaarini, nojuajaari tojetaarucujanaa jiyocuacaanu tacaquiaariuhua, Jiyaniijiajanaa na quiniuria na Que shurucua. Tacaquiaariiri puetunu jiya cajiniocujanaa na mishininiuria na cumaacata, puetunu jiyajanaanio. Naacuajitij, nojuajaari puetunu tiquiyocuajanaa quijia. ¹¹ Nojuacuajaari noojiaqueya na saquiriojosano pueyajinijinio jiyatequiaari na jiyaramiquishano pueya nojori quiniuria. Saniniuuja, tamasaca jiyatequiaariiri Pueyaso sequenu panishano caminiujuiniaa nojori quiniuria. Saniniuuja, tamasaca jiyatequiaariiri Jesucristo niishiyashijiaa niquiara poojotanaa nojori quiniuria, Pueyaso jiyanooniuria nojorijiuhuaj, Jesuucua nojori tiuushacari. Tamasaca jiyatequiaariiri na tojtiajaca pueya jiiitanaa nojori quiniuria. Tamasaca jiyatequiaariiri na rupaa niishitiojanaa nojori quiniuria narta Pueyaso pueyara. ¹² Naacuajitij, Jesucristoori na Sohuanuta cumaquiquiaa cana na paniyani, puetunu tamaatia na miiniu panishanojuanaa nojori miiniuria. Naa na pueya cumaquiquiaa na Sohuanataari na saquiriojosano pueya tiuuniuria nocua, nojori cumaquishaanurajuhuj. Naa Jesucristoocua tiuujiaca pueya canesacari socuatej, Jesucristo cuaqueyari canequiaa. ¹³ Jesucristora poonijionaa pueyari naa poonijioquiaatej, paa cuara tojetaarucujanaa pa Jiyaniijia tojijiaa quiriijaatijia, juhua rupuetootesano pa quiniuria. Cristo pueyari naa poonijioquiaa Pueyaso Sohuanu cumaacata, paa cuara seetanujuanaa Pueyaso Niyanu niishijiaa quiriijaatijia. Naacuajitij, paari tojetaarucujanaa jeenucuasano quiniutianiyani, seetanujuanaa juhua Jesucristo pa quiniuria. ¹⁴ Naacuajitij, majaari tari pa quiniu quiniutianiya juhua naatujua. Niaacuajaari niishiya naatujooriiri na niishiriojosano jataniija ritia. Noojia niqijiotejajaariuhuj. Naa juhua tariucua cumueeca mashaja pa quishacaritij, majaari quenaaja tamasaca naata saponu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jiyanoohua saponu niishijiaa, nojori tojtiajaca na tashuquootenura Pueyasojiniji. ¹⁵ Nocuaji pueyanaa, Pueyaso Rupaata pa cumaquitioojore seetanujuanaa pa panitioonuta, Cristo rupuejaca pa quiniuria socua. Nojuacuajaari juhua poojia. ¹⁶ Pueyanaa, niaacuajaari niishiya, puetunu pa cuaqueyajiniacuma casaa pa jiiitianojuanaari maninia rupuetootesano. Puetunu cunोजनाa jaara maninia poonijioquiaa jatiqiu, paari maninia quiyani. Pueyaso muerasuuri juhua pa cuaqueya jiiitiasano casaa. Naacuajitij, puetunu Pueyaso muerasujuanaa jaara tama na poonijiosanojuaja miiquiaa maninia taa pa Jiyaniijia paniyacuajani, pa Jiyaniijia cuaqueyari maninia canenutaniya, jatiqiu rupuetesano pa quishacari, seetanujuanaa panitiojuaca pa quiniuria.

Cristoocua tiuujiacaari quiarinio pueya

¹⁷ Jesucristo jiyaramiquishano pueyano cua quiniuucua, cua tojiri pueyanaa. Pueyaso saquiriojosano pueya nia quishacari, maja socua nia quiniu taa Pueyaso niishiyashijiaa pueya quiyacuani. Nojoriiri najuhuaa quijiaa, najuhuaa nojori niishiriojonuucua. Naajuhuj, nojoriiri tama na panishanojuaja miijiaca, najuhuaa casaacua nojori jiaatianuucua. ¹⁸ Nojoriiri naa quijiacatej, juhua ninishiqui

nojori niishitiaja quiniuucua. Nojoriiri seetanujuanaa niishiyashijiaca, nojori tojiyaquiniuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaraacaanu shuqiriataia quijiaca nojori quiniuria. ¹⁹Naa pueyaraacaanu sesa nojori miijionuucuatej, nojoriiri maja tari na niishiniu caririqiniu, sesa nojori miishacari. Nojoriiri puetunu tama na miiniu panishanojuaaja miijiaca. Nojoriiri puetunu sacuaraatia casaajanaa miiniuucua jiyartuucono. ²⁰Niajaniya saniniuujia, majaari naa nia niishitiojosaanu quiquiaari Cristojiniji, naa sacuaraatia miijiaca nia quiniuria. ²¹Niaa jaara Jesujiniji tojiqiaari, niaacuajaari niishiquiaari na rupaari seetanu rupaajanaa cutara. Niaacuajaari na rupaajiniji niishitiojosaquiaari maninia miijiaca nia quiniuria, sesa nia miiniu nia tarinitianurajuhua. ²²Pueyanaa, pa toque mocua jaara mocuaatia jaanure, paari ritia na jocuajani. Naa nia jatarejuhua sacuaraatia miiniu nia niishishano. Sesa nia miiniu panishanoori tama nia sapojoquiaarijiaaja naa sesa miijiaca nia quiniuriatej. ²³Quiarijia saniniuujia, sesa nia niishitiaja nia jatara, maninia niishitijaraca nia quiniuria, maninia jiuujiaracanio. ²⁴Seetanujuanaa juhua quiarinio pueyano nia quiri, quiarinio jiuujiaraca, Pueyaso niqitiosano niajaniya. Naa quiarinio jiuujiaraca nia quishacaritij, seetanujuanaa juhua Pueyaso pueya nia quiriquia, maninia miijiaca, tojetaarucuajanaa sesa miyashijiaca. Naa maninia nia quiniuni, cunoori seetanujuanaa Pueyaso Rupaa nia tojinuuucua.

²⁵Naacuajitij pueyanaa, majaari socua cuaracashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jijani-ijia cuaqueyani. Cunora, puetunu nia sequesanojuanaa niarta Pueyaso pueyano cuaara quiri seetanujuanaa.

²⁶Niaa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhua, nia jaara juaari, majaari nia juaaquiaca nia ninitianu. ²⁷Ritia nia jeecatoore, Sesaaca mariqui sesa nia miitiriiri nia jiyanoyaquishacari.

²⁸Nio nia tojirijihua. Cante nohuasejowa quiyajaani, cuaara tarinitiaara nohuasejonu. Saniniuujia cuaara poonijioora tama na numatucutaaja cutara. Naacuajitij, nojuaja na naata na jiiitiasanojiniji nareja niqitioonu tamasa, cante na panishano jiiitaaquiyani.

²⁹Naajuhua pueyanaa, majaari sacuaraatia casa nia pocuanu quenaaja. Majaari caraataia nia puenujutoonujuhua. Saaja maninia pocuajaca nia quiri cutara. Naacuajitij, nia naata niarta Pueyaso pueya niishitiojonu. Nia naata nojori cumaquiniu. Nia naata nojori nacasunujuhua. Naacuajitij, nia naata nojori shiniujuniu saaja Pueyaso tojiijaca nojori quiniuria. ³⁰Majaari sesa miijiaca nia quiniu, niaa mariqui nioojiajinia quijia Pueyaso Sohanu taraajoreeri. Pueyasocujaari juhua na sesa naajiofaquiaari poojiajinia na Sohanuta. Naacuajitij, na rijionu juuca pajaniya, nojuajaari niishiniu-tianiya paari na saquiriojosano pueyani.

³¹Pueyanaa, majaari jiyanoyashijia nia quiniu. Seetanujuanaa jiyanoojia nia quiri cutara. Majaari tamasa shanacunu niaacua, na nasojonura niajaniya. Majaari nia juayonuujatanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacuajitij, puetunu juaaniujianaa nia tarinitiare, puetunu sesa nia miiniujianaanio. ³²Saniniuujia, maninia miitiojuaca nia quiri. Taraajetoojuaca nia quiriuhua. Naajuhua, jiyanoootoojuaca nia quiriuhua, ta Pueyaso jiyanooquiaari pajaniyacuaani, Neyanuucua pa tiushacari.

5

Seetanujuanaa juhua Pueyaso pueya nia quiri

¹ Pueyanaa, niacuajaari Pueyaso panishano muerasuniyojua. Cunora, pueyaracaanu juhua nojuaja nia quiniuria nia saniniujiuri. ² Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jiyanohua na paniniuucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa na miiniuucuatej, nojuajaari Pueyaso shuquiritiquiaari jiyanohua. Na miishanoori juhua shanohua jaanutaja quiquiaari Pueyasora.

³ Pueyaso pueya maanujinijinio nia quiniuucua, majaari nia camishoo maaji nia numuetucunu, maajishuriu, casaanio. Cunoori jiyanohua sacuaraatia Pueyasora. Majaari quenaaja jiyano sacuaraatia casaajiniji nia pocoojonu. Naajuhuj, majaari tamasaca jittiasanoocua jiaatiajaca nia quiniu. ⁴ Majaari najuhuaana sacuaraatia pocuajaca nia quiniujiuhuj. Majaari najuhuaana nia niti nia taquiriocuatenu juhua maninia pocuaja. Naajuhuj, majaari sacuaraatia puenujunuujaca nia quiniu. Puetunu cuno sesa pocuanujuanaari sesa Pueyaso pueyara. Saniya nia pocoojore cutara Pueyaso miishanojiniji, socua pueya maniniuhuaqueetanura Pueyaso.

⁵ Niaacuajaari tari niishiya, cante juhuajaniya na camishoo maajipohua numuetucujujua, maajishuriuhuanio, nojoriiri jiyanohua taraatia quiniutianiya. Pueyaso jittiasano na tojjiaca pueyaranoni, majaari na quiniu quiniutianiya naa miijiaca pueyara. Naa taraatia miishaanutaniyajaariuhua puetunu tamasaca jittiasanoocua jiaatiajacajanaa. Pueyasora, jiyano pueyari jiyanohua sesa, juhua juaashiquiata shipinijosano pueyasohua seconuujaca. ⁶ Naacuajitij pueyanaa, majaari nia shanacunu tamasaca sajonjura nijaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocua-jari juaatishaare. Tari saniitioya na tojyashijiaca pueyari. ⁷ Cunora pueyanaa, majaari quenaaja naa sacuaraatia miijiaca nia cojinu.

⁸ Pueyaso niishiyashijiaca nia quishacarijia tarijia pueyanaa, niaari ninishiqui quijjiaca quiquiaari. Quiarijia saniniuujia, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijjiaca nia quiniuria. Cunora, seetanujuanaa maninia miijiaca nia quiri, juhua cuhuashiqui quijjiaca. ⁹ Paa jaara seetanujuanaa cuhuashiqui quijjiaca quirini, paari maninia miijiaca quiniutianiyani. Naajuhuj, paari tojetaarucujanaa sesa miyashijiaca quiniutianiyani. Paari seetanujuanaa Pueyaso Rupaa tojjiaca quiniutianiyajuhuj. ¹⁰ Naajuhuj pueyanaa, niaa cumaati niishiya, puetunu nia miishanojuanaate pa Jiyaniijia maniniucuasano, maja soj? ¹¹ Majaari ninishiqui quijjiaca nia cojinu, nojori jaara sesa miya. Saniya nojori nia nacasure juhuari. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa. ¹² Jiyasohua nojori mijiosano sacuaraatiaari tojetaarucujanaa jiyanohua cararaatia. Pahuataaquishoo. ¹³ Saniniuujia, pa nacasasacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. ¹⁴ Pueyaso Rupaacuaari nojori jiuujia cuhuataquiaa na cumaacata, cuhuashiqui quijjiacara nojori na jataniniuria. Cunora, naa naajiotasano quiyari tariucuaaanu Pueyaso Rupaajinia:

“¡Maqueyanonaa, quia niucuaire! ¡Macunucua tajiniji quia sanere, Pueyaso Jiyarosano cuhuatanura quiajaniya!”

¹⁵ Naacuajitij cua panishano pueyanaa, tama nia cuaqueyajaaja nia cojuare jiyanohua, seetanujuanaa maninia miijiaca nia quiniuria. Majaari juhua niishiyashijiaca nia quiniu juhuajaniya. Seetanujuanaa niishijiaca

nia quiri, maninia miijiaca nia quiniuria. ¹⁶ Nio pa quishacarini, sesa miini-uuri socua caneya puetunu juucajanaa. Majaari pa niishiniu taate tariqui quiniutianiyani. Naaratej, jaara pa naata quiriquia maninia pa miiniuria, maninia pa miiri puetunu juucajanaa. ¹⁷ Majaari moseeca nia quiniu. Maninia nia niishiri casaa pa Jiyaniijia paniya nia miiniuriani. ¹⁸ Naajuhuaaj, majaari nia mashaasequejonuunu. Niaa jaara mashaaseca quiriquia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacure niaacua cutara, nioojia na mishininiuria na cumaacata, seetanujuanaa cumaacaraca nia quiniuria, shuquiriaatia quijiaca nia quiniurijahuaj. ¹⁹ Naa Pueyaso Sohanuraca nia quishacaritij, tariucuacaanu Pueyaso Rupaajinia naajiotasanojiniji jaaquequejonu nia naminiujiutoore. Naajuhuaaj, quiari naataja Pueyaso Sohuanu niishitiojosano nia jaaquequejotoore. Naa jaaquequejosacari, pa Jiyaniijia nia shuquiritari puetunu nioojiatajanaa. ²⁰ Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujia nia quiniuucua.

Taa quijia pa quiyani Pueyaso tojijia pa quishacari

²¹ Pueyanaa, maninia tojtioojuaca nia quiri, taa pa Jiyaniijia Cristo paniyacuajani. Nojuajaari pa Jiyaniijia cutara.

²² Maajipohuanaa, nia niyaca tojijia nia quiri, taa pa tojiquiaa pa Jiyaniijiacuaani. ²³ Naa niyacaari juhua nioojia quiyaa niaara, taa Jesucristo quiyaa na saquiriojosano pueya jiuujiaacuaani. Nojuajaari pocuaji Tacuna, juhua na cuaqueya pa quiniuucua nera. ²⁴ Naacuajitij, taa Jesucristo saquiriojosano pueya na tojitiajaca quiyacuaani, maajipohua cuaara naa pueyaracaanu neyaca tojtiajaca quiriujahuaj.

²⁵ Canuunaa, nia niqiuocohua nia paniri taa Jesucristo na saquiriojosano pueyarano paniquiaaricuaa jiyanoahuani. Nojuajaari cunora tama na cuaqueyajaaja tarinitiaquiaari na mosaanura. ²⁶ Nojuajaari naa miqiiariti seetanujuanaa nerano pa quiniuria. Tojetaarucujanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. ²⁷ Paa jaara tojetaarucujanaa tari jeequejosano quirini, pa Jiyaniijiajanaari pa tiuquinitianutianiya tama nocuajaaja, tariucua jatanishano shacantuucara. Jiyacaritij, paari tojetaarucujanaa sesa miyashijia quiniutianiyani. Paari seetanujuanaa shanohua niqishano quiniutianiyani, juhua camishocoriquiano maniniushitishano niyacoo, tojetaarucujanaa jiyanoahuu cohuajaque toqueraca. ²⁸ Pueyanaa, taa nia paniyacuaa tama nia cuaqueyajaajani, naa nia paniri nia niqiuocujahuaj. Cante necocua panijiani, nojuajaari juhua tama na cuaqueyajaaja paniya.

²⁹ Majaari quenaaja tamonu pueyano quiniu tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuaani. ³⁰ Puetunu na saquiriojosano pueyajanaari juhua na cuaqueya nera. Paacuajaari na cuaqueyajinijinioni. Naaratej, nojuajaari maninia pa cojuaquiaa. ³¹ Cunora naa naajiotasano quiyari tariucuacaanu Pueyaso Rupaajinia. Naa sequeyari:

“Pueyano jaara camiri, nojuaja cuaara shiriquiiria na que, na nucua shuriucuaaji, necocuata na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

³² Pueyasojuanaacuaajaari pa niishitiojoquiaari, pueyanoori juhua niquiriyatu cuaqueyaraca quijia jaara camiri necocuara. Cunoori miriqi pa niishitiojia, puetunu Pueyaso saquiriojosano pueya maanujuanaari juhua pa Jiyaniijia niqiorano quiyaa, juhua niquiriyatu cuaqueyaraca pa quiniuria

nata. ³³ Pueyanaa, cunojuanaari cua pohuatasano pa Jiyaniijia cuaqueyajini. Saniniuuja, puetunu cuarta Pueyaso pueyanaa, nia niquiocua panijia nia quiri juhua tama nia cuaqueyajaaja. Naajuhuj, puetunu maajipohuajanaa cuaara neyaca tojjijia quiriira.

6

¹ Muerasunaa, pa Jiyaniijia tojjijia nia quishacari, nia queya tojjijia nia quirijiuhuj. Naa jaara naa miiritij, cunoori jiyanoehua maninia Pueyasora.

² Tariucuacaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojjijia nia quiri, nia nucuanio. ³ Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, niaa cuaara saaquianoshirijiaatija”.

Nio rootasanoori coteenujanaa rootasano tee Pueyaso sequeyacujani taa na tojtiajaca na miiniutianiya maniniani.

⁴ Niajaniya saniniuuja pueyanaa, majaari nia niquioehua nia juaatijionu najuhuanaj. Nojori nia canashitijiore maninia. Nia niishitiojore maninia-juhuj. Nojori nia nacasurejuhuj. Jaara nia tojtiaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacuajani.

⁵ Niajaniya poonitijosano pueyanaa, mijiria nia camaruhua tojtiajaca nia quiri. Majaari nojori nia rerequetenu. Puetunu nojori sequesanojuanaa niajaniya nia miiri nia puerenuta, niaa mariqui saniitiosaareeri nojori sequesano nia miyaquiniucua maninia. Nojori sequesano nia miiriquia maninia, juhua pa Jiyaniijia Jesucristora. ⁶ Majaari maninia nia poonijionu saaja nojori niqishacari niajaniya, nojori shuquiritianura niajaniya. Maninia nia poonijiore pueyaracaanu puetunu nioojatajanaa, seetanujanaa juhua Cristora. Naa jaara naa maninia poonijionuujuaca quiriqiatej, niaari Pueyaso panishano miyajuhuj. ⁷ Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. ⁸ Niaacuajaari tari niishiya, pa Jiyaniijia Jesucristoori puetunu pajaniyajanaa niqutionutaniya maninia pa miiniucua mijiria, poonijotesano pueya, camarnuuju pueyano.

⁹ Niajanijuhuj seya jiitiajicanaa, nio sequesano nia tojiri. Maninia nia jiitiare nia poonitijosano pueya. Majaari na miananajonu. Nia niishirijiuhuj, niaari mariyata niquiriyatu Jiyaniijiaraca, niajaniya, nojoriujiuhuj. Nojuajaari jiyocuacaanu quijia. Naaratej, tamonu pueyanoori maja rimiajata nera, niarta pueyanojini.

Taate pa naata Sesaaca nujuatanuni

¹⁰ Quiarijia cua panishano cuarta Pueyaso pueyanaa, seetanujanaa pa Jiyaniijia rupuejaca nia quiri, jiyanoehua cumueeca nioojia quiniuria jiyanoehua na cumaacata. ¹¹ Puetunu Pueyaso niqitiosano casajaanaa nia cushiyore juhua toqueya, Sesaaca sapojiyaquiniucujaji niajaniya. ¹² Pueyaso pueya pa quishacari mijiria, majaari pa quiaquetojonu quiquiaa pueyanota. Pa coopueeri maja pueya. Nojoriiri cumaacaraca quijia jia cajiniocua. Sesaacaari cuno na samaruhua jiyatequiaari jiyanijianucua nojori quiniuria mijiria. Naacuajitij, nojoriiri cumaacaraca, ninishiqui quijia pueya nojori jiitianura. Nojoriiri Pueyaso paraajuhuj. ¹³ Naaratej Pueyaso pueyanaa, puetunu Pueyaso niqitijosanojuanaa nia paracata nia miacquetojotaqueya nia cushiyore. Naacuajitij, sesashiquiri niocua na nujuatare, Sesaaca saniniujiushacari niajaniya. Naa jaara naa

nioojia jeenucuare juhuacaríjia puetunu Pueyaso casaatajanaatej, niaari nia paraa nujuatajaca quiniutianiya.

¹⁴ Pueyanaa, niaacuajaari niishiya taa miaquetoojojuate pueyani. Na mi-quetoonu panishacari, nojoriiri shoquejiniji casaa na cajiniocua morotaja. Na turtuconee cushiyonuujuaari, puetunu na jiriquiajanaa na mishiquiojonura cashiicuaji. Naajuhuaaj, na sapatuhua cushiyonuujuaariuhuaaj. Na nareenee pootuajaari, nocuaji na nujutajara cashi. Naajuhuaaj, na naca na cojuatajara, cumoco casaa cushiyonuujuaari. Na nijiniaquetucuaaja mueruu pootuajaariuhuaaj.

Pueyaso pueya pa quishacari saniniuujia, tama nia cuaqueyajaaja nia jeenucuare Pueyaso casaata. Naacuajitij, seetanujuanaa Pueyaso Rupaa niishijaca nia quiri maja nia sapojosaanura. Cunoori juhua pa cajiniocua camarucujua casaa saniniuujia. Pueyaracaanu maninia miijiacaa nia quiri, nioojia nia cojuanura Sesaacaacuaji, nojuaja mariqui nia cararoreeri niaa jaara sesa miiri. Cunoori juhua nia turtuconee nia cushishano. ¹⁵ Pueyaracaanu jeenucuasano nia quiriquia juhua tariucua sapatu cushinio. Naa tariucua pueca nia quiriquia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooni panijuhuaaj. ¹⁶ Naajuhuaaj, pueyaracaanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. ¹⁷ Naa niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niqijiotenura Pueyasocuaaji. Naajuhuaaj, Pueyaso Rupaa nia niishiri maninia. Cunocuaajaari Pueyaso Sohuanu nijiniaquetucuaaja mueruu, pueya jiuujiajinia na poonijionura. ¹⁸ Naajuhuaaj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriquia pueyaracaanu, naajuhuaaj, na Sohuanu niishitishacari nijaniya casaacuara nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuriquia puetunu niarta Pueyaso pueyacuaraajanaa. ¹⁹ Naajuhuaaj, cucuara nia secojonuure, Pueyaso niqutionura janiya na niishitijaja, maninia cua pohuatanura Jesujiniji cua puereyaquiniutia. Cucuara nia secorejuhuaaj, maatia cua niishitiniuria pueya, Pueyasoori puetunu pueyajanaa jiyanooni panija saaja Jesucristoocua nojori tiushacari. ²⁰ Pueyasojuanaari cua jiyatequijaari na jiyaramiquishano cua quiniuria, na niti cua pohuatanura na rupaa pueya niqiuara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

Pablo pohuatasano Tíquicojiniji

²¹ Pa panishano Tíquicocuaajaari niaacua quianutaniya, puetunujuanaa na pohuatanura janiyajiniji, naajuhuaaj, casaa cua miyani. Nojuacuajaari shamaatia poonijiojua pa Jiyaniijiaara. ²² Janiyacuajaari cunora niaacua na jiyaroyani, nioojia nia cumanijianura canaajiniji nia tojishacari, taa canaa quiya niyani.

²³ Pa Que Pueyaso, mariyata pa Jiyaniijia Jesucristota, nojori cuara cu-niqui quiniaa parta Pueyaso pueya jiuujia cajitiiria, juhuajaniya nia quiniuria. Nojori cuara nia jiyateera panitiojuacarajuhuaaj, seetanujuanaa Jesucristoocua tiuujia nia quiniuriajuhuaaj. ²⁴ Naajuhuaaj, Pueyaso cuara puetunu pa Jiyaniijia panijiacajanaa cumaquiiria na Sohuanuta, shuquiriaatia nojori quiniuria, cuno pojori, canapuate seetanujuanaa Jesucristo panijiacacuajani.

PABLO NAAJIONEE FILIPO TIACAJINIA QUINIAA PUEYASO PUEYACUARA

Pablo saruhatasacari Pueyaso pueya

¹ Janiyari Pablóni. Janiyari Timoteota nia saruhatanaani, Filipo tiacajinia quiniaa Pueyaso pueyanaa. Canaari Jesucristo poonitijosano pueyajuhuaaj. Canaari nio naajiyani puetunu Pueyaso jatanishano pueyacuarajanaa, nojori tiuuniuucua Neyanu Jesucua. Canaari cuniqui nia jiitianaa pueyacuara naajiyajuhuaaj, nia cumaquiniaa pueyacuaranio. ¿Niaate maninia quiyajaa pueyanaa? ² Pa Que Pueyaso, pa Jiyaniijia Jesucristonio, nojori cuara cumaquiria niajaniya na Sohuanuta. Nojori cuara cajitiria nioojajuhuaaj.

Pablo secojosano, Filipo tiacajinia quiniaa Pueyaso pueyacuara

³ Pueyaracaanu cua niishiriojosacari niajaniya, janiyari pa Pueyaso sequequiaani “paacarasho”, maninia na muerasu nia quiniuucua. ⁴ Cua secojosacari, janiyari pueyaracaanu puetunu niaacuarajanaa cua shuquiriniutia masequiaa Pueyasoni. ⁵ Níaa jaara shushajanaa Jesucristoocua tiuquiaari, niaari jiyacari coteequiaari cua naacunura, Jesucristojiniji cua poojotanura tamaquiicua. Quiarijjiani, niaari naa cua naacuyajaaquij. Janiyari cunora nia timitiaani. ⁶ Majaari cua taacanuunu niaacuaji. Naatej, taa Pueyaso coteequiaari maninia na miiniuria nioojiajiniaacuani, nojajaari naa nia jeenucuanu tucutanutaniya, Jesucristota pa naacuneetosacariuha. ⁷ Majaari cua jiyajenenu naa cua taacanuyaquishacari niaacuaji. Janiyacuajaari tari naa niishiyani, jiyanoehua cua paniniuucua niajaniya. Naajuhuaaj, niaari cua cojiritiasaaquiaa cumaaca niquitiosaanujuhuaaj. Naacuajiti cua naata Jesucristojiniji pohuatanu niya nio nujuatejojuajinia, naajuhuaaj, janiya jaara jiyaniijianucua tajoji nequesoreesaareni. Naa Pueyaso cumaquishacari janiyatej, cua naata Pueyaso Rupaacuaji tacunu na cuaracashitijiaca. Pueyaso Rupaacuajiiri naa tacusano maatia, nojori niishiniuria, Jesucristoocua nojori tiuushacari, Pueyasoori na naata nojori jiyanooniujuhuaaj. Naa nioojia rupuesacari cojiatej, cunoori jiyanoehua cua shiniujuquiaa Jesucristojiniji cua pohuatanura. ⁸ Pueyasocuaajaari niishiya taa cua paniya jiyanoehua niajaniyani, Jesucristo paniniu cua jiitiasacari cojiajinia. ⁹ Janiyari niaacuara secojoquiaa Pueyasoni, socua niishijiaca nia quiniuria, socua Pueyaso niishitiaja nia jiitianurajuhuaaj, seetanujuanaa maninia panitioojuaca nia quiniuria. ¹⁰ Naacuajitij, niaari niishiniutianiya teyano casaate seetanujuanaa maninia niaarani, saniniuuja, teyano casaate sesani. Naacuajitij, pa Jiyaniijia Cristo jaara tiuquiriohua, niaari seetanujuanaa maninia miijiaa quiniutianiya, toje-taaurucujanaa sesa miyashijiaca. ¹¹ Naacuajitij, puetunu maninia nia miishanojuanaa Jesucristo cumaquishacari niajaniyani, cunoori juhua queraatia nia senoosano quiniutianiya, Pueyaso shuquiritiasaanura. Naacuajitij, maninia nia miiniuucua, pueyari Pueyaso timifianutaniya.

Pabloori saaja Jesucristora quiniu panijia

¹² Cuarta Pueyaso pueyanaa, majaari cucua nia taraajenu nujuatejojuajinia taraatia cua miishacari. Nio nia niishiri cutara: nujuatejojuajinia nujuatesocoriquiano cua quiasaanuucua, naquiya cua miishacarijuhuaaj, cunoori seetanujuanaa pueya naacuya Jesucristojiniji tojishaanura socua. ¹³ Naacuajitij, puetunu jiyaniijia César tajinia quiniaa soldadohujanaari

niishiya, janiyari cumayocua casaata morotasano quiya niyani, Jesucristojiniji cua pohuatanuucua. Majaari saaja soldadohua niishiniu cuno, mariyata puetunu pueyajanaari na niishiyajuhua. ¹⁴ Parta Pueyaso pueyari namitia niishiyajuhua, janiyari cumayocua casaata morotasarucaani. Naacujitij, cunoori quera puetunu nojorijanaa shiniujiurucuaa Jesucristojiniji nojori pohuatanura na puereyaquiniutia, pa Jiyaniijiaacua nojori tiushacari socua.

¹⁵ Seetanujuanaa, noojiaqueya nojorijinijinioori Cristojiniji pohuatanuquia socua tojishano pueya nojori quiniuria janiyajiniji, nojori shocotanura janiya. Janiyara, naajaa. Tamasaca saniniuujia, nojori cutaraari seetanujuanaa Cristojiniji pohuatanuquia nojori shuquiritiniuria Pueyaso.

¹⁶ Nojoriiri naa pohuatanuquiaaqiij, Jesucristo panijiaa nojori quiniuucua. Nojoricuajaari niishiya, Pueyasojuanaacuajaari niya cua niacanu, cua tacunura Jesucristo rupaacuaji. ¹⁷ Tamasacari saniniuujia Jesucristojiniji pohuatanuquiaacujua nojori shocotanu paniniutia janiya. Naa nojori miishacaritij, nojoriiri socua cua tacaatinu paniya juucua. Majaari nojori pohuatanuunu quiquiaa seetanujuanaa nojori paniniutia pa Jiyaniijia Jesucristo. ¹⁸ Naa nojori pohuatanusacari seetanujuanaa nojori paniyaquiniutia pa Jiyaniijiatej, naajaa. Nojoricuajaari Jesucristojiniji pohuatanuquiaa. Janiyari cunora shuquiriaatia quiyani.

¹⁹ Socua shuquiriniutianianijia cua niishishacari Pueyasoori puetunu cuno pojori miishanojuanaa jataniniutianiya quiria saa maninaraja. Naa miiniutianiyari nia secojonunuucua cucuara, naajuhua, Jesucristo Sohuanu cumaquiniuucua janiya. ²⁰ Naacujitij, janiyacujaari Pueyasocua tiuyani, nojuajaari cua cojuanutaniya maja cua cararoyaquishaanura janiya jaara nequesoreesaareni. Janiyari Pueyasocua tiuyajaaniuhua na cumaquiniuria janiya, cua puereyaquiniutia cua pohuatanura Jesucristojiniji puetunu pueya niquiarajanaa, taa cua miiquiaacuajani. Janiya jaara rishiriquiani, janiya jaara mosaariquiajuhuaj, naajaa, janiyari jiyanohua paniyani cua Jiyaniijia Jesucristo timitiasaanura. ²¹ Mijiria cua quishacarijia, janiyari saaja Jesucristora quiyani. Saniniuujia, janiya jaara mosaareni, cunoori socua maninia janiyara, na shuriucua cua quianura, nata cua quiniuria shuquiriaatia. ²² Naajaa, janiya jaara mijiria rishiriquiajani, cua naata socua poonijionu cua Jiyaniijiaara. Naacujitij, quiarjia, majaari cua naata saquiriojonu; rishiniu, shaajenu soj. ²³ Naaratej, janiyari coojia niquijioteyajaani. Majaari cua niishiniu teyano cua saquiriojonutaniyani. Janiyara maara socua maninia quiri janiya jaara cusoqueeni, Cristo shuriucua cua quianura nata cua quiniuria. ²⁴ Saniniuujia, socua maninaruhua mijiria cua rishiniurijia, pa Jiyaniijiaacua cua shiniujiuniuria socua niajaniya. ²⁵ Naa cua niishiriojosacaritij, janiyacujaari tari seetanujuanaa niishiyani, janiyari juhanojuaja mijiria niaata rishiniutianiyani. Naacujitij, cua naata socua nia naacunu, socua pa Jiyaniijiaacua nia tiuniuria. Cua naata nia naacunujuhuaj, socua shuquiriaatia quijiaa nia quiniuria nocua nia tiushacari. ²⁶ Naa cua rishishacari mijiriatej, janiyari niaacua quianutanianiyani cua niquiniuria niajaniya. Naa cua quishacariuhua niaatej, niaari Jesucristo timitianutaniya maninia na miiniucua janiya.

²⁷ Pueyaso pueyanaa, nio nia sequenu panianijia, seetanujuanaa maninia miijiaa nia quiri taa Jesucristo rootaacuajani. Janiya jaara niaacua quiaareni, janiya jaara quiaaquiyarejuhuaj, naajaa. Saaja niajaniyajiniji pohuatasariquiani, taa jiyanohua Jesucristo tojijiaa nia quiyajani, jiyanohua panitiojuacuahuaj. Naajuhua, jatiqui Jesucristora nia poonijioteriquiani, na rupaa nia pohuatanuucua. ²⁸ Naajuhua, Jesucristo Rupaa paraa puereyashijacara nia jiyateriquiani. Nojori piriyojosacari niajaniya,

majaari nojori puerenu quenaaja. Nia jaara naa nojori puereyashijiaca quiriritij, nojoriiri cunojiniji niishiniutianiya, nojoriiri seetanujuanaa sanitiosocoriguiano taa nia pohuatanuuquiaa nojori niquiaracujani. Saniniujia, Pueyaso cajitishacari nioojia, nojori miananajosacari puecoonu niajaniya, niaari cunojiniji niishiniutianiya, niaaqui Pueyaso rijiosocoriguiano cutara. Pueyasocujajaari naa cumaquijia na pueyatej, puereyashijianucua nojori quiniuria. ²⁹ Pueyasocujajaari nia tiuutiquiaari Neyanuucua, na muerasu nia quiniuria. Naajuhua, Neyanu rupuejaca nia quishacari quiar-ijia, Pueyasoori nia jiyatequiaari Neyanuucua naquiya nia miitishaanurajuhua, taa Neyanu miiquiaari naquiya pocuaracuaani. ³⁰ Nia niishiri, janiya, nijaniyajuhua, paari mariyata naquiya miiniu rejeretaquiaani, pa Jiyaniijia pa poonijiosacari. Niaacujajaari tari niquiquiaari naquiya cua miiniu. Majaari cua tarinitianu quiquiaari Jesucristojiniji pohuatanu. Quiarijiani, niaari janiyajiniji tojiniutianiyaajuhua, taa cua tarinitiaaquiya Jesucristojiniji pohuatanuni, naajaa naquiya cua miishacari.

2

Juhua Cristo pa quirij, taa na quiquiaaricuaani

¹ Naacuajitij pueyanaa, naquiya nia miishacari, nia niishiri taa Cristo shiniujuquiaa pueyaracaanu nijaniyani, maja nia tacaaniuria. Nia niishirijuhua taa na paniniu cumanijiaquiaa nijaniyani, naajuhua, taa Pueyaso Sohuanu juujiaatooquiaa nijaniyani. Nia niishirijuhua taa Cristo taraajequiaa jiyanoahua niaacuani. Naa panitioojuaca nia quirijihua. ² Juujiaatoojuaca nia quirijihua, seetanujuanaa panitioojuaca nia quishacari. Naajuhua, nareja nia shanacure Pueyaso Sohuanu niaacua, nojuaja cuaara puetunu nijaniyajanaa ruputeera, jatiqiu nia poonijionura pa Jiyaniijia. Nia jaara naa puetunu nio cua sequesanojuanaa mijia quiriritij, niaari tojetaarucujanaa shuquiriaatia quijiaa cua jiyatenu-taniya. ³ Maninia nia miishacari, majaari na miiniu juhua tamasa nia shamocotanura, nia jyanishacari niaa naasucuaari socua maninia miijiaa tamacajiniji. Puetunu maninia nia miishanojuanaa nia miiri tamasa nia rerequeteyaquiniutia. Puetunu niarta Pueyaso pueyajanaa nia jiyatere juhua socua maninia miijiaa nijaniyajiniji. ⁴ Nia jaara maninia miijiaa quiriquiacuaa, majaari tama maninia miijiacajaja nia quiniu. Niarta Pueyaso pueyacua nia taraajerejuhua, maninia quijiaa nojori quiniuria-juhua.

⁵ Tama nia cuaqueyajaaja nia tarinitiare niarta pueyacua nia taraajesacari, taa Jesucristo tarinitiaquiaari tama na cuaqueyajaaja pocuaracuaani. ⁶ Nojuajaari naa miiquiaarritij: tariucuaaanu, nojuacuajaari Pueyaso quijiajuhanajaj, juhua na Que. Naajaa, nojuajaari maja na cuaqueya nia jiyatenu quiquiaari seetanujuanaa juhua na Que Pueyaso na quiniuria. ⁷ Nojuajaari jyanohua cumaacaraca Jiyaniijia na quiniu tarinitiaquiaari, juhua nareja poonijioteseano pueyano na quiniuria. Naaratej, mijiria rasaquiaariiri seetanujuanaa pueyano na quiniuria. ⁸ Naa pueyano na quishacari mijiriatej, nojuajaari juhua nareja pueyanora tama na cuaqueyajaaja jiyatequiaari. Pueyaracaanu na Que tojijia na quishacari, nojuajaari tama na cuaqueyajaaja tarinitiaquiaari na mosaanura. Seetanujuanaa cararaatia cusoquiaariiri niyacutesanojinia teetesano, juhua sesa miijia pueyano. ⁹ Naaratej, Pueyasoori seetanujuanaa Jiyaniijiarajanaa na jiyatequiaari puetunu jiyaniijianucujajinijianaa. Na sesojoquiaariijariuhua "Jesu". Nioori sequeya "pocujia Tacuna". Majaari socua tamonu pocujia tacuna quiniu

mijiria, jiyocuacaanunio. ¹⁰ Puetunu pueyajanaari niishiniutianiya Jesuuri Jiyaniijajanaa. Maja tamonu. Cunora, nocuara mojuquetaconutaniyari puetunu jiyocuacaanu quiijacajanaa, puetunu mijiria quiijacajanaajuhuaq, puetunu jiya cariquimia quiijacajanaanio. ¹¹ Puetunu tamaatia rupaca pocuajacajanaari niishiniutianiya Jesucristoori Jiyaniijajanaa cutara. Naa Pueyaso miiniucua Neyanutej, puetunu nojorijianaari niishiniutianiya, Pueyasoori tojetaarucujanaa maninia mijia.

Pueyaso pueyari juhua ninishiqui cuhuataja mijiria

¹² Quiarijiani cua panishano cuarta Pueyaso pueyanaa, cua rootasano tojtiajaca nia quiri. Naatej, taa pueyaracaanu cua tojtiajaca nia quiquiaar-icuajani niaata cua quishacari, quiarjia socua cua tojtiajaca nia quiri, tucuacaanu cua quishacari niajanijajiniji. Naacuajitij, seetanujuanaa pa Jiyaniijia tojtiajaca nia quiri nia niishiniuria niaari seetanujuanaa Pueyaso pueya. Majaari na rupaa ruuretano. Jiyanojua puereeta quiniutianiyaari na tojiyashijianucua. ¹³ Pueyasojuanaacuajaari nioojiajinia poonijioquiaa maninia nia miiniu paniniuria. Na cumaaca nia niquitioquiaaariuhuaq maninia nia miiniuria nera nia panishano, taa na paniyacuajani.

¹⁴ Cunora, puetunu nera nia miishanojuanaa nia miiri shitimia, maja nia ririjiotanuta. Majaari nocua juayonuujutanujuhuaq. ¹⁵ Niaa jaara naa maninia mijiaa quritij, majaari Pueyaso niishiyashijiaa pueya naata quiniutianiya sesa na saquirojotanura niaacuara. Naaratej, tojetaarucua-janaa sesa miyashijiaa Pueyaso niquiohua nia quiri, mijiria sesa mijiaa pueya niqiara. Nojoriiri seetanujuanaa sacuraatia, Pueyaso tojiyashijiaa. Cuno juhua ninishiqui quiijaca pueya tajinia nia quishacari, niaari juhua riyanojoriria, naatej, taa riyacuahuataquiaa ninishiquicuaani. ¹⁶ Pa samiitianiya rupaa Jesucristojiniji nia jiiatiansononi, niaari cunota cuhu-ataquiaa mijiria quiniaa. Naa maninia Pueyaso pueya nia quiniucuatej, Cristo jaara tiuquiriohua na rijionuhuaa pajaniya, janiyari jiyanojua nia timitianutianiari. Janiyari naa nia timifianutianiya cua niishishacari puetunu cua poonijosanojuanaari maja najuhuaana na quiniu quiquiaari. Naajuhuaq, majaari najuhuaana naquiya cua miiniu quiquiaarijijuhuaq. ¹⁷ Niaacuajaari maninia mijiaa Pueyasocua tiuujaca nia quiniucua, Jesucristojiniji cua pohuatanuucua niajanijia. Cuno maninia nia miishanoni, cunoori juhua shanohua jaanutaja Pueyasora. Janiya jaara nacatasaare Jesucristojiniji cua pohuatanuucua niajanijiani, cua nanacaari shoonutaniya juhua Pueyasora niquitiosocoriquiano. Janiya jaara naa miishaareni, janiyari cua nanacata tucuatanutianiya puetunu cua miishanojuanaa Pueyasora. Janiya jaara naa miishaareni, janiyari seetanujuanaa shuquiriaatia quiniutianiyaari. Janiyari puetunu niajanijatajanaa jiyanojua timiniutianiyaari. ¹⁸ Shuquiriaatia nia quiriujuhuaq, janiya jaara mosaareni, cua Jiyaniijia tojijia cua quiniucua. Cua cojitiuri shuquiriniujuhuaq.

Pablo pohuatasano Timoteojiniji, Epafroditojinijinio

¹⁹ Janiyari niaacuaji tojinu paniani taa nia quiyani, shuquiriaatia cua quiniuriajuhuaq janiya jaara niaacuaji tojirini. Janiyari cunora Timoteo jiyaronutaniya niaacuani. Naacuajitij, cuniquiji na tacatesacariuhua, nojuajacua cua pohuatasuhua niajanijajiniji saniniuuja. Janiyari cua Jiyaniijia Jesucua tiuyani na rishitiniuria janiya, niajanijajiniji cua tojinuria. ²⁰ Janiyari Timoteo jiyaronutaniya niaacuani. Saa nojuaja cutaraari seetanujuanaa niaacua tacaaja juhua janiyajuhuaq, na naacunura niajanijia, maninia nia quiniuria. ²¹ Tamasacaari saniniuuja saaja tama nojori panishano casaacuajaaja tacaajiacua, maja Jesucristo casaacua. ²² Niaacuajaari tari na niishiya, taamuecate Timoteoni. Nojuajaari pueyaracaanu cuata

poonijioquiaa juhua quiyanu, Jesucristojiniji mariyata canaa pohuatanura. ²³ Janiya jaara niishirini taa cua miishaanutaniyani, janiyari Timoteo jiyaronutaniya ritia niaacuani. ²⁴ Naajaa, janiyacuajaari cua Jiyaniijiaacua tiuyani cua cartesaanura niiquiji, niaacua cua quianura ritiajuhuaj.

²⁵ Cua sashishacari Timoteo cua jiyaronura niaacua, maniniacuajaruhua ritia cua jiyaronura niaacua Epafrodito, parta Pueyaso pueyano. Niaacua-jaari nojuaja jiyarotaquiaari cumaneeca quiriano, nojuaja cumaquiniuria janiyajuhua. Nojuajaari maninia cua naacuquiaa. Cuata miiquiaa naquiya jaarajaarjia Jesucristojiniji cua pohuatanura. ²⁶ Nojuajaari puetunu nijaniyajanaa niquniuucua jiaatiaa. Na niishishacari niaari jiyanohua nocua tacaquioya nia niishiniuucua nojuaja cusosu quiquianu, cunora, nojuajaari ritia nia niquniuria tacaya. ²⁷ Seetanujuanaa nojuajaari cusosu quiquianu. Quera cusocanjuanaari. Pueyaso cutaraari nocua tarajecanu. Cucua tarajecanjuariuhua, maja cua tarajenu jiyacatenura socua. ²⁸ Janiyari cunora ritia niaacua na jiyaroyani, nia shuquiriniuria nia niqushacari nojuaja niaacua tiuquihuanu. Naa shuquiriaatia nia quishacariuhuatej, janiyari coojia cajitiniutianiyajaacuhua. ²⁹ Niarta Pueyaso pueyano na quiniuucua, seetanujuanaa juhua nia tarajanu nia timitiarenoj, niaacua na tiuquishacariuhua. Puetunu jiyano pueyajanaa panijiaa nia qiri, noo pojori pa Jiyaniijiaa poonijionuujuacatej taa Epafroditocuaani. ³⁰ Nojuacuajaari quera shaajeyarucuaa Cristora na poonijosacari. Cocuaatia miijiocanjuariuhua. Nojuajaari tama na cuaqueyajaaja tarinitiacanu, na naacunura janiya nia niti. Tucuaaanu nia quiniuucua janiyajiniji, majaari nia naata naacunu janiya.

3

Nio rootasano tojjijaca pa qiri cutara

¹ Quiarjia saniniuuja, cuarta Pueyaso pueyanaa, pa Jiyaniijia nia shuquiritiare, pocuaji Tacuna na quiniuucua. Janiyara, maja taajeta cua pacutenuhuara socua cua sequenura nijaniya tari cua sequesano nijaniya. Cunoori seetanujuanaa maninia niaara. ² Tama nia cuaqueyajaaja nia cojuare cuno sacuraatia niishitiojonuujuaca pueyacuaji, cuno pojoricuaji, sesa miijiacani. Nojoriiri pueya cararaatiuuquia co miatejonuujuaca najuhanaj, nojori jyanishacari nojori miatesano pueyari seetanujuanaa Pueyaso pueya. ³ Paa cutaraari seetanujuanaa Pueyaso pueyani, Pueyaso Sohuanu jiyatenuucua pajaniya Pueyaso tojjijaca pa quiniuria. Paari timiquiaajaanihuaj Jesucristo rupuesano pa quishacari. Taa pa cararaatiuuquia casaa quiyani, naajaa. Jesucristoocua pa tiuushacari, paari seetanujuanaa Pueyaso pueyani. ⁴ Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jiyaniquiaarjiihuaj. ⁵ Naatej, janiya jaara rasaaquiaarini, ocho juuca jaara cua shocoquiaarini, cua cararaatiuuquia coori miatesaaquiaari. Janiyari naa miishaaquiaarini taa canaa rootasaaquiaari Moisés Rootasano-jinjicuaajani, seetanujuanaa Judio pueyano cua quiniuria. Naajuhua, janiyari Israel pueyanoni, cua supuetana Benjamín jinianuucuaajinio supueno pueyano. Na queeri quiquiaari Jacobo, Pueyaso saquiriojosano pueyano. Naa cua supuetanaa quiniuucua Pueyaso saquiriojosano pueyatej, janiyari naajuhua, nojoriicuaajinio cua supuenucua. Naajuhua, janiyari Hebreo rupaa pocuajani taa cua supuetanaacuaani. Cua que, cua nucaari mariyata Hebreo rupaa pocuajaca quiquiaarjiihuaj. Mashaja cua

quishacari, janiyari Fariseo pueyanora quiquiaarini. Cuarta Fariseocua-caari socua jiyanhua supuetana Moisés Rootasano tojjijaca puetunu cuarta Judiocuacajinijiojuanaa. ⁶ Jiyacaritij, janiyari cua niishitiojonaa tojjijia quiquiaari jiyanhuaani. Majaari cua taajenu quiquiaari nojori sequesano cua miiniuria. Naaratej, janiyari Jesucristo tojjitajaca mijia naquiyani, cua jiyanishacari nojori naasucuaari Pueyaso paraa. Naajuhuj, maninia cua tojjiniucua Moisés Rootasano, janiyari sesacasoo quiquiaarini Moisés Rootasano niishitiojonaara. ⁷ Puetunu nio cua sequesanojuanaani, janiyari jiyanhua na timitiaquiaarini cua jiyanishacari janiya naasucuaari naa seetanujuanaa Pueyaso pueyanoni. Quiarijia saniniujia, Jesucristoocua cua tiuushacari, tarijia cua jiyanishano maninia casaani, puetunu cuno casaajanaari quiarijia najuhua janiyara. ⁸ Quiarijiani, janiyari socua cua Jiyaniujia Jesucristo niishiniuria jiaatiaa jiyanhuaani. Naaratej, puetunu tariucuacaanu cua timitiasano casaajanaari najuhua janiyara quiarijia. Cristo pueyano cua quiniucua, janiyari juhua taanusaquiaari puetunu cuarta Judiocuacajinijianaani. Naa Cristo tojjijara cua quiniucuatej, cua shipininiojiniji cua casaarano maseyaquiaarini. Naajaa, puetunu cuno casaajanaari juhua rucua quiya janiyara. Janiyari seetanujuanaa saaja cua Jiyaniujia Jesucristo niishiniu paniya socuani, nata rupuetootesano cua quiniuria seetanujuanaa. ⁹ Majaari cua jiyaniniu janiya sesa miyashijiani, Moisés Rootasano cua tojjiniucua. Saniniujia, Jesucristoocua cua tiuushacari, Pueyasoori puetunu sesa cua miishanojuanaa tuujuquiaa. Cua niishishacari Jesucristoori mosaquiaari cua niti, Pueyasoori cua jiyanoquiaari, maja na sesacanura janiya, Neyanuucua cua tiuuniucua. ¹⁰ Janiyari Jesucristo niishiniu paniya jiyanhua socuani, seetanujuanaa nata rupuetootesano cua quiniuria. Janiyari na samiitiantiaja cumaaca panijajaanihuaj, coojiajinia na poonijionura, seetanujuanaa quiarinio pueyanora cua jatanishaanura juhua Cristora. Nojuajaari jiyanhua taraatia miishaquiaari mijiria na quishacari, na Que tojjijia na quiniucua. Janiya cuaara naa miishaariajuhuaj cua tojjiniucua nojuaja, juhua nojuaja cua quiniuria. Tama nojuajaarijia na cuaqueya tarinitiaquiaari na mosaanura. Naajuhuj, tama janiyajaarijia cua cuaqueya tarinitiaja quiniu paniyani, cua miiniuria puetunu cua Jiyaniujia sequesanojuanaa janiya. ¹¹ Janiyari tojetaarucujanaa maninia mijia quiniucua jiaatiaquiaani, juhua quiarinio pueyano cua quiniuria, juhua tariucua macujinijinio samiitianishano pueyano.

Maninia pueya pa quirij, Pueyaso muerasu pa quishacari

¹² Juhuanujuaja majaari cua quiniu tojetaarucujanaa maninia mijia. Sesa miiniu niishiyajaanijia. Jeecasoojuaanijia. Naajaa, majaari cua tacaaniu. Jesucristocuaajari cua jiyatequiaari na pueyano cua quiniuria. Naaratej, janiyari jiyanhua saniniujuquiaani maninia na pueyano cua quiniuria. ¹³ Cua panishano cuarta Pueyaso muerasunaa, janiyari niishiyacuajani, juhuanujuaja maja maninia cua quiniu taa cua Jiyaniujia quiyacuani. Naajaa, majaari cua tarininiu. Janiyari juhua ritia netena miiquiaani na shocotanura narta netecuatunaa pueya. Maninia netenaari na nijinara niqiyashijia. Naajuhuj, majaari cua niishiriojonu maninia cua miishano tariucuacua. Janiyari saaja cua tacoji niqiquiaani, socua maninia mijia cua quiniuria tari cua quiniujiniji. ¹⁴ Pueya tacuarishijosacari, netena jaara narta netecuatunaa shocotare, nojuajaari shanohua casaa niqitiosaqiaa. Majaari najuhuaana na netenu jiyanhua. Janiyaraari naajuhuj. Majaari najuhuaana jiyanhua cua saniniujini quiquiaa, maninia cua quiniuria juhua Cristojuhuj. Mijiria

cua quiniu cua tucuatascari, Pueyasoori cua jataniniutianiya juhua Cristo cua quiniuria, Cristoocua tiuujia cua quiniuucua.

¹⁵ Pueyanaa, niajaniya, cante seetanujuanaa Pueyaso tojjijaca quiyani, mariyata naa nia niishiriojore taa cua niishiriojyacuani. Naatej, jyanohua nia saniniujuri juhua Cristo nia quiniurijuhuj. Cante tama na cuaqueyajaaja jyaniya nojuaja tariucua tojetaarucujajanaa sesa miyashijiani, Pueyaso cuaara na niishitiiria maninia. ¹⁶ Paa jaara maninia miiniu niishijaca quirini, majaari pa jiyacateni saaja sesa miiniuucua. Saniya maninia miijiacara pa quiri socua.

¹⁷ Cuarta Pueyaso pueyanaa, maninia miijiacara nia quiri taa canaa nia niquiquiaari maninia miyanocuaani. Naajuhuj, maninia miijiacara nia niquiri, cante maninia miiquiaani taa canaa niishitiquiaari niajanijacuaani, maninia canaa miishacari. Nojorijiniji nia niishiriquia, maninia nia miiniurijuhuj. ¹⁸ Jesucristocuaajaari pocuara cusoquiaari niyacutesanojinia teetesano, maninia miijiacara pa jatanishaanura. Saniniujia, queraatia pueyari juhuajaniya miiquiaa sesa. Janiyacuajaari nojorijiniji pohuatanu pacutejoquiaari niajanijani, maja juhua nojori nia quiniuria. Quiarijia cua nujuquenuta, janiyari nia pohuatarohuanuhua jiyano sesa miijiacajiniji. Nojoriiri pa Jiyaniijia cusonu soojeaca. Nojoriiri maja na paniniu naquiya na miishaanura Cristo tojjijaca nojori quiniuucua. ¹⁹ Nojoriiri puetunu quejoosaanutaniyajanaa mani quiquiojinia. Nojoriiri tama nojori panishanojuaaja jiyatecanu juhua nojori pueyasora. Naa sesa miijiacara nojori quishacaritij, majaari nojori niishiniu caririquiniu. Saaja sesa na miitiushano timitiuyari. Nojoriiri saaja mijiria casaacua jiaati-ajaca. ²⁰ Pajaniya saniniujia, paa cutaraari tari jiyatesaaquiaari jiyocua- caanu quijiacaranoni. Paari cuniquiji pocuaji Tacuna niniuria sashiyani. Nojuacuajaari pa Jiyaniijia Jesucristo. ²¹ Jyanohua na cumaacata, nojuajaari pa cuaqueya segue jataniniutianiya, shacantuuca quijia pa quiniuria juhua na cuaqueyajuhuj. Nojuajaari cumaacaraca puetunu casaajanaa na tojitiniuria nojuaja. Naacuajitij, nojuajaari na naata moqueja pa cuaqueya jataniniu, pueyaracaanu rishijiacara pa quiniuria.

4

Pueyaracaanu pa Jiyaniijia pa shuquiritiare

¹ Cunora, cua panishano cuarta Pueyaso pueyanaa, pueyaracaanu pa Jiyaniijia tojjijaca nia quiri. Janiyari jyanohua nia niquiniuucua jiaatiaani. Nia niquiara cua pohuatanuucua Pueyaso rupaa, niaaquiri seetanujuanaa na tojjijaca quiquiaari. Naa jyanohua maninia Pueyaso muerasu nia quiniuucuatej, cunoori jyanohua cua timitiquiaa.

² Janiyari Evodia sequeya cutarani, narta maaji Sintiquenio, nojori cuaara jyanootioora juhua seetanujuanaa Pueyasocua tiuujiacara maajipohua.

³ Quiajaniya saniniujia Sicigonaa, quiaacuajaari cuata poonijiojua jaara-jaaja. Cunora, janiyari quia sequenu paniyani, cuno maajipohua quia jyanootiooterohua, nojori rupetoonuhua. Cuno maajipohuacuajaari jaarajaaja cuata poonijionuuquiaari, Clementejuhuj, pa Jiyaniijiajiniji cua pohuatasacari. Naa cuata poonijionuuquiaarijaariuhua tamasaca, canapete cuata quiquiaaricuaani. Nojori sesacacuajaari tari naajiotasano quiyua Pueyaso nequesoretuneejinia, tee cuniqui pueyaracaanu rishijiacarano sesaca naajiotasano quiyacuajani.

⁴ Cua panishano pueyanaa, pueyaracaanu pa Jiyaniijia nia timitiare. Nia sequerohuacuaraj, pueyaracaanu nia timiri. ⁵ Puetunu pueyajanaa

cuaara niishiiria niaari seetanujuanaa maninia pueya, maja juaajiaca. Pa Jiyaniijiacuajaari quera tiuquihua.

⁶ Majaari quenaaja nia tacaaniu. Saniniuujia, nio tacaashacari, Pueyaso nia pohuatare puetunujuanaa, nia secojosacari, nojuaja. Nia secojosacari, nojuaja nia masere nia panishano. Jiyacaritij, nojuaja nia sequerejuhuaj “paacarasho”. ⁷ Naa nia miishacaritij, Pueyasoori nioojia cajitiniutianiya. Naa Pueyaso cajitiniuucua nioojiatej, majaari socua nioojiaca tacaaniu quiniutianiya, nia niishitiajiano. Naacuajitij, niocua juhuajaniya panaatia quiri Jesucristo cojishano nia quiniuucua. Naa Pueyaso miishano panianiyani, cunoori jiyano hua jiyajeneta. Nocuaji jiuujiatesano.

Saaja maninia casaacua niishiriojuaca nia quiri quia

⁸ Naajuhua cuarta Pueyaso pueyanaa, nio tojjia nia quirijihua. Pueyaracaanu saaja seetanujuanaa rupaacua niishiriojuaca nia quiri quia. Naajuhua, saaja rerequeteyaquishoo casaacua nia niishiriojore. Saaja maninia casaacua niishiriojonuujuaca nia quiri, maja cararaatia casaacua. Naajuhua, saaja Pueyaso shuquirifiasano casaacua nia niishiriojore, maja Pueyaso sesacasano casaacua. Naacuajitij, puetunu maninia casaacujanaa nia niishiriojore, casaajinijiti pueya naata Pueyaso shuquiritianuni.

⁹ Maninia nia miiri quia pueyaracaanu, taa nia niishitiojoquiaari nijaniyacua jani. Niaacuajaari nia rootasano tojjiquiaari. Naajuhua, niaacuajaari nia niqijia taa miijia nia quiquiaarini. Naa jaara nia miijia quiri jihua, poojia cajitina Pueyasoori niaata quiniutianiyajuhua.

Pablo pohuatasano, Filipo tiacajinia quinia Pueyaso pueya jiyaronuucua cumaneeca nera

¹⁰ Jianiari jiyano hua nia Jiyaniijia timitiaani juhua shusha nia niishiniu-uquio hua janiya, cucua nia jiyaronuucua nia reratesano cumaneeca. Naa nia sequesacari nijaniyatej, majaari nia jiyaniinu janiya nia sequenyani niaari nia niyajetacanu. Maja. Janiyacuaajaari niishiyani, majaari tarijia nia naata nia naacunu quijia nia cumaneecata, nia juuretasacari niaatucua canta cucua nia jiyaroriquiani. ¹¹ Majaari nia nia sequenu nijaniyatej nia panishano nia jiiatiaquiniuucua. Maja. Janiyacuaajaari tari jiyartuunoni, juhuajaniya nia quiniuria nia jiiatiasanoniyajuata. ¹² Naajuhua, jianiari niishiyani juhuajaniya nia quiniuria nia panishano nia jiiatiaquishacari. Naajuhua, jianiari niishiyani taa quishanote puetunu nia panishanojuana nia nia jiiatiasacari. Jianiari tariucua saniniujiushanoni puetunu casaa-janaa nia rejeretanura. Juhua janiya quiniu niishiyani miaajaaraca nia quishacari, miaajeeju nia quishacari jihua. Naa naata juhuajaniya quiniu casamijiu nia quishacari jihua, maja saaja casamiriaca nia quishacari.

¹³ Cua naata rejeretanu puetunujuanaa, Cristo cumaquishacari janiya. ¹⁴ Naajaa, niaari maninia miiriucua nia cumaneeca nia jiyarosacari cucua, naquiya nia miishacari nia. Naaari niarta pueyanocua taraajeja cutara.

¹⁵ Naajuhua, Macedonia jiyajiniji nia quiasacari nia shuriucua jii Filipo tiacajiniji, tamonu jiyacajinia nia pohuatanura Pueyaso rupaa, saaja nijaniya cutaraari cucua jiyano quiaari. Cunoori quiquiaari shushajanaa Jesucristoocua tiuujia nia quishacari. Jiyacaritij, niaari nia reratesano cumaneeca jiyaroquiaari cucua, shuquiriaatia nia quishacari nia pohuatanuucua nia niqiara Jesucristojiniji. ¹⁶ Juhuanajuaja nia Macedonia jiyajinia nia quishacarijia, Tesalónica tiacajinia, niaari cucua pacutejo-quiaari jiyaronu nia cumaneeca, nia panishano nia masetajara. ¹⁷ Majaari saaja nia panini pueyaracaanu nia niqutiojonura nia cumaneecajiniji janiya. Janiya cutaraari nia panitiaani capora pueya nia quiniuria.

Naacuaajitij, Pueyasoori saniniuuujia socua queraatia nia niqutionutaniyacujua. ¹⁸ Epafroditocuaajaari puetunu nia jiyarosano cumaneecajanaa cucua tiuquitiaseecuaa. Janiyari cunota puetunu cua panishanojuanaa maserucuaa tarini. Cureyajaari nia jiyarosano cumaneecajiniji. Cuno cumaneeca cucua nia jiyarosani, cunoori juhua Pueyasora niqutiosano casaa. Nera, cunoori juhua shanohua jaanutaja catijiasano nocuara. Na shuquiritiriiri. ¹⁹ Naaratej, cua Jiyaniijia Pueyasoori puetunu nia jiiitiaquishoo casaajanaa nia niqutionutaniya. ¿Pueyasoteeri casamiijiu? ¡Maja! Nia rupuesacari Neyanu Jesucristo, puetunu na jiiitiasanojuanaari niaaranojuhuaj. ²⁰ ¡Pa Que Pueyasoori jiyanoohua maninia! Saaja nojuaja pa shuquiritiare pueyara-caanu. Cuaara naa quiiriatej.

Nata quiniaata Pablo saruhuatascari narta Pueyaso pueya

²¹ Quiria nia saruhuatate puetunu Jesucristo jiyanooshano pueyajanaa. Niya cuata quiniaa Pueyaso pueyari nia saruhuataajuhuj. ²² Naajuhuj, Jesucristoocua tiuujiaa jiyaniijia Césarra poonijionaa pueyari nia saruhu-ataajaacuhuj, puetunu niya Jesucristoocua tiuujiacajanaano.

²³ Pa Jiyaniijia Jesucristo cuaara cumaquiiria puetunu nioojijanaa. Tari-ucujaja pueyanaa.

PABLO NAAJIONEE COLOSA TIACAJINIA QUINIAA PUEYASO PUEYACUARA

Pablo Colosa tiacajinia Pueyaso pueya maanuucuaa naajioquiaari

¹ ¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pablóni, Jesucristo jiyaramiquishano na rupaa pohuatariquiano taa na Que Pueyaso paniquiaaricuaajani. Pa tarajanu Timoteota naajiya nionijia. ² Niaacuara naajiyaniija, canapue Pueyaso saquiriojoquiaaricuaajani tama nerajaaja nia quiniuria. Niajaniyacuaajaari maninia tiuquuaa Puyasoocua, Cristo rupuesano nia quishacari. Pa Que Pueyaso cuara cumaquiiira nijaniya, shuquiriaatia nia quiniuria, juhuajaniya nioojia quiniuriajuhuaj.

Pablo secosojano Jesucuaa tiuuniaa pueyacuara

³⁻⁴ Canaari pohuatasaacanuni taa nia tiuquuaa Jesucristoocuaani, naajuhuj, taa nia paniya puetunu niarta Pueyaso muerasujuanaani. Naaratej, pueyaracaanu canaa secosojasacari Pueyaso niaacuara, canaari na sequequiaani: “Paacarasho canaa Quenaa”. ⁵ Niaari naa maninia quiyatej, nia niishishacari Pueyasoori jiyanhua maninia pa miiniutianiya na niqitiosacari pajaniya jiyocuacaanu na jiiitiasanojiniji. Niaacuajaari naa pohuatasaquiaari tarijiatej, shushajanaa nia tojishacari seetanu Pueyaso rupajaanaa. ⁶ Cuno maninia rupaari puetunu jiyacajiniajaanaa paaqueyaree, mariyata taa na paaquecanucuaa na pohuatasaacari nia tiacajiniacuuaani. Pueyaso Rupaari maninia caneyaree queraatia pueya jiuujiajani, mariyata taa na caneya nioojiacajiniacuuaani. Naa caneyari nia niishishacari Pueyasoori seetanujuanaa pa paniya, taa nia pohuatasaquiaaricuaajani. ⁷ Pa panishano Epafrasri naa pohuataquiaari nijaniyatej, Nojuajaari Pueyasora poonijiona, juhua canaa. Nojuajaari canaa niti poonijioriquiaa niaara. ⁸ Nojuajaari canaa pohuatarucuaa nijaniyajiniji, naajuhuj taa Pueyaso Sohanu panitiooteya nijaniyani.

⁹ Naaratej, canaa jaara tojiquianu nijaniyajinijini, majaari canaa tarinitanu quiriquiaa Pueyaso secosojonu niaacuara. Canaari Pueyaso secosojocuaani, nojuaja cuara nia jataniiria niishijia nia quiniuria na Sohanu cumaacata. Canaari naa secosojocuaani, maninia nia niishiniuria taa Pueyaso paniya maninia nia quiniuriani, maninia nia miiniurijuhuj. ¹⁰ Naa jaara Pueyaso panishano niishijia quiri, naacuajitij, niaari maninia quiniutianiya taa pa Jiyaniija paniya na pueya quiniuracuajani, nojuaja shuquiritianura nijaniya, pueyaracaanu maninia nia quishacari. Niaari puetunu maninia casaajanaa miiniutianiya. Naajuhuj, niaari socua maninia niishiniutianiya Pueyaso. ¹¹ Canaari Pueyaso secosojocuaa niaacuara juhuaj, Pueyaso cumaquiniuria nijaniya puetunu na cumaacatajanaa. Jiyanhua maniaari na cumaaca, shuquiriaatia nia rejeretanura juhuajaniya puetunu casaajanaa. ¹² Canaari Pueyaso secosojocuaa juhuaj niaa cuara pueyaracaanu sequeera nia shuquiriniutia “paacarasho”, pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jiiitiasanojiniji pajaniyara, cuhuashiqui quiquiojinia pa quishacari. ¹³ Pueyasoori ninishiquiji pa jayoquiaari, maja Sesaaca jiiitianura socua pajaniya. Pa jiyatereeri cuhuashiqui quijiaa pa quiniuria, Neyanuniyojua jiiitiasano pa quiniuria maninia cutara. ¹⁴ Tama Neyanu

cusonutajaaja pa jiyanooriiri sesa pa miishanojiniji. Naacuajitij, paari na pueyara jatanishaareeni.

Paari maninia quiya Pueyasotani, Cristo cusunuucua pa niti

¹⁵ Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujuanaa quiquiaari Pueyaso shipiniyaquishacarijia puetunu casaajanaa. ¹⁶ Na Que Pueyasoori na shipinitiquiaari puetunu casaajanaa jiya cajiniocua, mijiriaanio; niquishano casaa, niquiyaquishoo casaanio. Naacuajitij, Cristoori puetunu tamonu cumaacaraca quijiacajanaa shipiniquiaari tama nerajaaja. Nojori shipiniquiaariiri nojori jiitianura nera jiyocuacaanu casaa, jiyocuaacaanu quijiacanio, mariyata mijiria casaa, mijiria quijiacanio. Nojuajaari puetunujuanaa shipiniquiaari. Tama nerajaaja na shipiniquiaariiri. ¹⁷ Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuanaa cojuua, maninia na quiniuria. ¹⁸ Cristoori Pueyaso muerasu jiyaniijiajuhuaj, taa poojia quiya pa cuaqueya jiyaniijiacuaani. Puetunu Pueyaso muerasujanaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samiitianijia, juhua na cuaqueya pa quishacari. Nojuajaari coteenu samiitiaquiaariuhua macujiniji, juhua Pueyaso jiyapueranu na quiniuria. Naacuajitij, Cristoori coteenu quijia. Nojuajaari jiyaniijiajuhuanajaj. ¹⁹ Pueyasoori paniquiaari Neyanu Cristo jiitianura puetunu tama na cumaacajanaa, juhua nojuaja na quiniuriajuhuaj. Naacuajitij, Cristoori maja rimiajata quenaaja na quiniu na Quejiniji. ²⁰ Naajuhua, Pueyasoori paniquiaari Cristo rupuetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanootiquiaari puetunu casaajanaa tama na cusonutajaaja niyacutesanojinia. Na Que rupetequiaariuhua puetunu casaajanaari, jiyocuacaanu casaa, mijiria casaanio.

²¹ Tarijia, niaari Pueyaso paraa quiquiaari, juhua taanuusano pueya Pueyasojiniji, sesa miijia nia quiniuucua. ²² Saniniujia quiarjiani, Pueyasoori nia rupetequiaariuhua nocua, Cristo cusunuucua pocuara, cuaqueyaraca na quishacari mijiria. Naacuajitij, Pueyasoori na naata nia tiuquininiu nocua, tojtaarucujanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianiyojua sesa nia quiniu quiniutianiya na niquiara. ²³ Niaari naa quiniutianiya maninia, niaa jaara cumaatia rupaquiaa Cristoocua, nocua nia tiuushacari, nioojia nia niquijiteyaquiniutia. Majaari nia niishiriojonu Pueyaso naasucuaari maja na miiniu quiniutianiya puetunu na sequesanojuanaa niaara, taa nia tojiqiaaricujani. Nia tojishano Pueyaso rupaacuajaari tari pohuatasaacanu puetunu jiyacajiniajanaa. Janiya, Pabloni, janiyari na pohuatanu naacutaajaniuhua.

Pablo Pueyaso pueya maanu cumaquiniara jiyatesaaquiaari

²⁴ Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa pa pohuatasacari, puetunu na saquiriojosano pueyajanaa tiuuniuria nocuajuhua. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniji cua pohuatanuucua tiquiyocuatej, janiyari Cristo naquiya miiniu tuataa tama cua cuaqueyajiniaajani. ²⁵ Pueyasocuaajaari cua jiyatequiaari na saquiriojosano pueya cua jiitianura, cua cumaquiniuria niajaniya puetunu na ru-paatajanaa. ²⁶ Cuno rupaari saaja Pueyaso jiyasohua niishishano quiquiaari

tarijia. Majaari na pohuatanu quiquiaari supuetana pueya, tariucuacaanu quijiaca. Quiari naataja cutara, Pueyasoori jiyasohua na rupaa niishitiquiaari tama na saquiriojosano pueyarajaaja. ²⁷ Pueyasoori pa niishitiniu paniquiaari taa jiyanoohua shacantuuca na cumaaca quiri nijaniyarani, canapueete maja na saquiriojosano Judiocuaca quiquiaaricuajani. Niocuaajaari jiyasohua Pueyaso miiniu panishano tarijia: ¡Cristoori nioojiajinia quiya! Nia jitiiasacari Cristo, niaari niishiya niaari shacantuuca quijiara jatanishaanutaniyajuhua.

²⁸ Naaratej, Cristocuaajaari canaa pohuatasano. Canaari puetunu pueyajananaa nacasuquiaani. Canaari nojori niishitiojoquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucujanaa maninia canashitishano pueya, Cristo rupuesano nojori quishacari. ²⁹ Naaratej, puetunu Cristo niquitiosano cumaacatajanaa jiyanoohua poonijioquiaanijia, na cumaquishacari janiya.

2

¹ Pueyanaa, janiyari paniyani nia niishiniuria taa jiyanoohua cua poonijioquiaa Pueyaso cua secojonuta niaacuarani, Pueyaso muerasuucuaara Laodicea tiacajiniajuhuaj, puetunu juhuanajuaja cua niquiyaquiniaa pueyacuaraajanaano. ² Jiyanoohua secojoquiaa niaacuaranijia, nioojiaca cumaquishaanura, nioojiaca rupuetoonura jatiquijuhua, jiyanoohua nia panitiosacari. Naajuhua, secojoquiaanijia maninia niishijiacara nia quiniuria, maninia nia niishiniuria tariucuacaanu Pueyaso niishishano tamajaaja, taa Neyanu seera maninia na miiniutianiya pajaniyani. ³ Neyanu Cristocuaajaari puetunu niishijiajanaa. Majaari tamonu niishijia quiniu juhua nojuaja. Jiyanoohua maninia mijia puetunu na niishishanotajanaari. ⁴ Janiyari nio sequeya nijaniyani, tamonu mariqui nia sapojoreeri najuhuaana tamaatia na pohuatasanota. ⁵ Majaari cua quiniu quiquiaa niaata. Naajaa, cua sohanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujuanaa maninia nia tiuushacari Cristoocua, maja jatasano nia quiniuria.

⁶ Niaacuajaari pa Jiyaniiijia Jesucristo masequiaari, nia jiyaniiijia na quiniuria. Naaratej, pueyaracaanu maninia nia rupuerenoj, maninia nia quiniuria mijiria na cumaacata. ⁷ Maninia nia rupuetooore Cristota, naatej, taa naana cumaatia nujuaacuaani, jaara tucuaamaaca nujuacaraca quiri. Naacuajitij, majaari nia naata jatasano quiniu, maninia nia tiuushacari nocua, taa nia niishitiojosaaquiaaricuajani. Cunora, pueyaracaanu nia sequeriquia Pueyaso: “Paacarasho canaa Quenaa”.

Niaari quiarinio pueya, Cristo quishacari nioojiajinia

⁸ Tama nia cuaqueyajaaja nia cojuare, tamasa mariqui nia sapojoreeri tamaatia nojori niishishanota najuhuanaj. Niaa jaara nojori niishitiojosano tojtariquia, niaari juhua nojori quioosano pueya quiniutianiya. Nojori niishishanoori maja Cristojiniji. Nojori niishishanoori saaja mijiria niishishano, supuetanaa pohuatasano najuhuanajuhua.

⁹ Nocuaji saaja Cristo nia tojiri. Tama Cristo cutarajaarijia puetunu Pueyaso cumaacajanaa jitiiaja, puetunu na niishitiajajanaano.

¹⁰ Naajuhua, niaari Pueyaso cumaaca jitiiaa, na niishitiajanio, nia rupuesacari Cristo. Naacuajitij, niaari puetunu nia panishanojuanaa jitiiaa tari, maninia quijiaca nia quiniuria. Cristojuanara Jiyaniiijiajanaa. Cristo jaara na jiyarore, puetunu tamonu cumaacaraca quijiacajanaari na tojtiaa; jiyocuacaanu camarnu, mijiria camarnunio. ¹¹ Cristo nia rupuesacari, niaari seetanujuanaa jatanishaaree maja sesa nia

quiniuria socua. Majaari nareja nia cararaatiuuquia co miatesaanu quiquiaari, taa Judiocuaca miiquiaacuaani. Nojoriiri miatesaaquiaa nojori niishiniuria nojori cuaara quiiria saa Pueyasoraja, maja sesa miijia nojori quiniuria socua. Cuno, miatenuni, majaari pueyano na jataniniu sesa na miiniujiniji. Cristo cutaraari sesa nioojia jataquiaari, seetanujanaa sesa nia quiniu jataasaanura puetunujuanaa. ¹² Puetunu sesa nia quiniujianaari juhua jamosaaquiaari Cristota, niaa jaara moojinia tiuquinijiosaare. Nia tohuatasacariuhua, niaari juhua samiitianishaarohua Cristota, Pueyaso cumaacaacia nia tiuushacari. Niaari samiitianishaarohua taa Pueyaso samiitianiquiaariuhua Cristocuaani. ¹³ Niaari juhua macu quiquiaari tarijia, sesa miijia nia quishacarijia, sesa jiuujiaraca nia quishacarijiano. Jiyacartij, Pueyasoori nia samiitianiquiaari Cristota, na jiyanooshacari nijaniya puetunu sesa nia miishanojinijijianaa. ¹⁴ Pa tojiyaquishacari tariucuacaanu Pueyaso rootasano, paari puecosocoriquiano quiquiaari juucuanu. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujuanaa. Pueyasoori puetunu sesa pa miishanojuanaa tiutiaquiaari Cristocua. Cristo teetesacari niyacutesanojinia, puetunu sesa pa miishanojuanaari cuniqui puequequiaari. Naa Cristo miishacari pocuaratej, majaari sesa pa miishano tiutiasaanu pocua. ¹⁵ Na cusosacari niyacutesanojinia, Cristoori puetunu tamasaca sesa cumaacaraca quiijacajanaa shocotaquiaari. Nojori cumaaca jaariutiareeri. Nojori rerequetereeri, naatej, taa quioosano pueya jaatucunuusaaquiaacuaani, pueya niquiara macaatishocoriquiano.

Saaja Pueyaso casaacia nia jiaatiariquia

¹⁶ Naaratej, majaari nia tojinu noo pojori, canapue te nia tojitiiniu saniniujia supuetana niishitiojosanocujani. Nojoriiri najuhuana niishitiojoquiaa casaa samatuute puereshiyani, ratusanonio. Nojoriiri niishitiojoquiaa-juhuaj teyano juucate poonijiaquishiyani, naajuhua, Pueyaso niquiara pa queranacunuunura raca macura. Nojoriiri naa niishitiojonuuquiaa nojori jiyaniharari paa jaara naa miyaquirini, Pueyaso mariqui pa sanitioreeri. ¹⁷ Puetunu cuno supuetanaa niishitiojosanojuanaari tariucuaacaanu quiquiaari, miriqui na niishitiojonura pueya taate seetanujanaa quiniutianiyani Niriqiano jaara tiuquiri. Cuno Niriqianocujaaari Cristo. Tari tiuquiariaariiri. Nojuajaari pocuaji Tacuna. Naaratej, majaari socua pa tojinu cuno miriqui niishitiojosano. Quiarijia saaja Cristo pa tojiri cutara. ¹⁸ Tama nia cuaqueyajaaja nia cojuare, tamonu niishitiojanaa mariqui nia sapojoreeri, niaa mariqui Pueyaso niqutionu panishano nijaniya maseyaquiriri. Nojoriiri tama na cuaqueyajaaja shuquiritiaquiaa na jiyaniharari nojori maja Pueyaso shocotaja na quiniu nojori secijosacari Pueyaso seya, maja Pueyasojuanaa. Nojoriiri tama na maquenujinia na niquishanoocujaja tiuujia, maja Pueyaso rupaacia. Naacuajitij, nojori tiuushacari tama na niishitiojosanoocujaja, nojoriiri seetanujanaa pueya shocotajaca quiya. ¹⁹ Nojoriiri maja na rupeenu Cristo, juhua poojia Cristo quishacari, na cuaqueya pa quishacarijuhuaj. Paa jaara maninia rupuetesano quiri poojiatani, poojiaari maninia maashitiya puetunu pa cuaqueyajanaa, paa jaara maninia rupuetoonu quiya puetunu pa nucuhatajanaani, pa cusorohuatano. Pueyasoori naa pa maashitiniu paniyajuahuaj Cristota rupeutootano pa quishacari.

²⁰ Niaari juhua tari cusoquiaari Cristota, maja socua juhua mijiria quiijia nia quiniuria. ¿Macutucua taa supuetana rootasano tojirini? Maja na naata. ¿Nijaniyariuhua? ¿Casaara nia tojtiaajaa cuno tariucuaacaanu

rootasanoni? Niaari juhua nareja mijiria quiniaa quiyajaa, nia tojishacar-
ijia cuno rootasano. ²¹ Supuetanaari naa piriyojoquiaariti: “Maja pa
quianu cuno. Maja pa miaquenu cunojuhuaj. Maja cuno pa cooniu”. Pa
supuetanaari naa sequejatej. ²² Naajaa, puetunu cuno pueresano casaa-
janaari saaja shaajeja pa seecojinia. Majaari poojia na miiniu sesa. Cuno tar-
iucuaaanu rootasanoori saaja tama pueya niishishanojuuaaja quiquiaari.
²³ Paa naasucuaari jiyaniyani cuno rootasanoori maninia quiya Pueyaso
shuquiritianura pajaniya socua. ¿Paatucua socua maninia pueya quirini paa
jaara casaa sumatuu puerereni, naajuhuj, paa jaara naquiya miiri tama
pa cuaqueyajaajani casaa pa puerenutani? Maja. Pa pueresacari casaa,
cunoori najuhuana Pueyasora. Cunoori maja na naacunu pajaniya sesa
casaacua pa jiaatiaaquiniuria.

3

¹ Naa jaara samiitianishaaquiaari Cristota, jiyocuaaanu Pueyaso jiiti-
asanooocua nia jiaatiare, tee Cristo cajiya na Que Pueyaso miaquetajaracua-
jani. ² Pueyaso casaacua nia niishiriojore saaja, maja mijiria casaacua.
³ Puetunu tarijia sesa nia quiniujianaari tari juhua jamosaquiaari, niaa
jaara Cristo cusunu jiyatere tama nia nitijiaaja. Quiarijiani, niaari saminio
quiya nia rupesacari Pueyaso, Neyanu Cristota. Nojuacuajaari pa sami-
itianijia. Saniniuuja, juhuanojuaja maja niishishano taamueca quijiaca pa
cuaqueya quiniutianiyani. ⁴ Cristo jaara muetarohua pocua mijiria, sha-
cantuuca cumaacaraca quijia na quishacari, jiyacariti, paari jatanishaanu-
taniyani shacantuuca cumaacaraca quijiaca pa quiniuria nata, juhua nojuu-
juhuaj.

Maninia rootasano Pueyaso muerasura

⁵ Naaratej, nia cuaqueya cuaara quiiria juhua macu tama nia niquiara-
jaaja, nia cuaqueya nia ruuretanura na jiaatiasacari sesa miiniucua.
Naaratej, maja nia numuetucunu nia camishoo maaji. Maja sesa nia miiniu
niarta canuuta, niarta maajitiano. Nia cartere puetunu sesa miiniucua nia
jiaatiasanojuanaa. Maja sesa casaacua nia jiaatianu. Maja puera casamiicua
nia jiaatianu. Casaacua jiaatijaari juhua Pueyaso ruuretaja quiya, tama na
jiitiasano casaacuajaaja na tiuushacari juhua Pueyasooocuaaja. ⁶ Pueyasoori
jiyanohua saniitionutaniya na tojiyashijiaca, canapute naa sesa quijia-
cacuajani. ⁷ Pueyaso tojiyashijiaca nia quishacari tarijia, niaari naa sesa
miijiaaca quiquiaari. ⁸ Quiarijiani, nia tarinitiare puetunu naa sesa nia quini-
ujianaa. Maja juuajia nia quiniu. Maja naseeca pueyano nia quiniu. Maja
jiyanoyashijia nia quiniu. Maja sesa miijia nia quiniu. Maja pueya sesacaja
nia quiniu. Maja sacuaratia najuhuana nia niti taquiriocuateja nia quiniu.
⁹ Maja nia cuaracashijiootonu. Niaari tari jatanishaaquiaari tarijia sesa
nia quiniujiniji, sesa jiuujiaraca nia quishacarijia, sesa miiniucua jiiitino
nia quishacarijuhuaj. ¹⁰ Niaari quiarinio jiuujiaraca quijiaca tari. Quiari-
jiani, tama nia cuaqueyajaarijia tari jataa juhua nia Shipininia Pueyaso nia
quiniuria, seetanujuanaa Pueyaso niishijia nia quiniuria. ¹¹ Pueyaso jatan-
ishano pueya pa quishacari quiarijiani, majaari tari rimajata pa quiniu,
paa jaara Judiocuaca quiyani, tamasaca pueyano; na cararaatiuuquia co
mialesano pueya, mialesoo pueyano. Paa jaara tahue quiyani, juhua
mococori, poonijotesano pueya, camarnuuju pueyano, naajaa. Cristo
pa rupesacari, puetunu pajaniyajaanaari mariyata na muerasu quiyani.
Nojuajaari puetunu poojiajania quiyajuhuj.

¹² Pueyasoori nia saquiriojoquiaari saa maninijia nia quiniuria nera.
Niajanijari na panishano muerasu. Naaratej, pueyacua taraajeja nia quiri.

Maninia miijia nia quiri. Majaari nia jiyaniiniu tama nia cuaqueyajaarijia socua maninia tamonujiniji. Maja juaajia nia quiniu. Jacaria pocuaja nia quiri. ¹³ Jacaria nacasutoojua nia quiri. Maninia nia jiyanoori cante sesa miiri njajaniyani. Taa pa Jiyaniijia jiyanooquiaari pajaniyacuaani, naa nia jiyanoootoorejuhuaj. ¹⁴ Seetanujuanaa pueya panijia nia quirijihuhaj. Cunoori socua jiyanoohua panishano. Panitioojuaca nia quishacari, puetunu nia miishanojuanaari jiyanoohua maninia quiniutianiya, jatiqui nia quiniuriajuhuaj. ¹⁵ Naajuhuj, Pueyaso nia shanacure nioojia na cajitiniuria pueyaracaanu. Nojuacuajaari nia saquiriojoquiaari juhuajaniya quijia nia quiniuria, maninia rupuetootesano. Pueyaso muerasu cuaara jatiqui poonijionuujuaca quiri, naatej, taa pa cuaqueyajiniacuma casa puetunujuanaa jatiqui quiyacuaani. Majaari nia juaatioojonu. Naajuhuj, Pueyaso nia shuquiritiare pueyaracaanu, puetunu maninia na miishanojinijianaa niaara.

¹⁶ Nioojia cuaara quiri mishaja Cristo rupaata, jiyanoohua na tojijia nia quiniuria. Pueyaso Rupaa nia niishitiojotoore nia jaaquequejosanota. Naa nia cumaquitiojore puetunu Cristo niishishanotajanaa. Naa jaaquequejonuure Pueyaso Rupaa naajiosanojiniji, pueya naajiosanojinijihuhaj, Pueyaso Sohuanu niishitiosano njajaniyano. Naa nia jaaquequejore Pueyasora, nia shuquiritianuta nojuaja. ¹⁷ Jesucristocuaajaari nia Jiyaniijia quiya. Naacujitij, niaari na sesaanucua. Naaratej, nia sequesano, nia miishanojuhuaj, puetunu cunojuanaa cuaara quiri maninia nera. Naa nia miiriquia pa Que Pueyaso nia sequenuta “paacarasho”, Neyanu cumaquiniucua njajaniya.

Maninia miijia pa quiri Pueyaso muerasu pa quishacari

¹⁸ Maajipohuanaa, nia niyaca tojtiajaca nia quiri. Pa Jiyaniijiaacua tiujuaca cumaati naa miiquiaquij. ¹⁹ Pueyanaa, nia niquiocua nia paniri. Majaari na juaniu. ²⁰ Mueraasapueanaa, nia queya tojijia nia quiri, nia shuqiritiniuria pa Jiyaniijia. ²¹ Pueyanaa, maja nia juaatinu nia niquiohuhua, nojori mariqui maninia miiniucuaaji pishiriiri, puera nia juaashacari nojori. ²² Poonitijosano pueyanaa, puetunu nia camarnu sequesanojuanaa nia tojiri. Maja na tojijia nia quiniu saaja na shootiasacari njajaniya, na shuqiritianura njajaniya. Majaari saaja na niquishacari nia poonijionu nia sapojonura nojuaja. Seetanujuanaa maninia nia poonijiore pueyaracaanu nia puerenuta saniya nia camarnujuanaa Pueyaso. ²³ Puetunu nia miishanojuanaa nia miiri shitimia, juhua pa Jiyaniijia Cristora. Naa nia miiritij, maja juhua nareja pueyara. ²⁴ Maja nia niyjetanu, pa Jiyaniijiaari nia niqutionutaniya jiyocuacaanu niaara na jittiasanojiniji. Mijiria camarnura nia poonijosacari, niaa cutaraari Cristora poonijiya. Nojuacuajaari nia camarnujuanaa. ²⁵ Pueyasoori sesa miijia saniitionutaniya cutara, sesa nojori miishanojiniji. Pueyasoori maja rimiajata saniniujujia. Mijiria camarucua, poonitijosano pueyano, naajaa, nojoriiri maja rimiajata Pueyasora.

4

¹ Camarucuaanaa, pueyaracaanu maninia nia miiriquia nia poonitijosano pueya. Majaari nojori nia miini sesa. Maja nia niyjetanu, niaari jiyocuaaanu Camarnuracajuahuaj.

² Pueyanaa, Pueyaso secojojua nia quiri pueyaracaanu. Naa secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, “paacarasho”. ³ Naajuhuj, canaacuara nia secojore Pueyaso, nojuaja cuaara canaa pohuataniiria pueya niqiara na rupaa Cristojiniji.

Majaari pueya niishiniu quiquiaari tarijia Pueyaso miiniu panishano panishano pa-janiyara Cristo seera. Cua pohuatanuucua Cristojiniji, cunora nujuatesano niya quiyaniija nio nujuatejojuajinia. ⁴ Pueyaso nia secojore cucuara, maninia cua pohuatanura Cristojiniji, pueya niishiniuria maninia cua pohuatasano, taa Pueyaso paniya cua pohuatanuracuajani.

⁵ Maninia nia niishiriojore taa nia miiniutianiya noo pojorini, canapuetucuaaja maja Pueyaso muerasuni. Maninia nia miri nojori, mijiria nia quishacariija. ⁶ Nia pocoojosacari nojoritia, maja najuhuana nia pocuanu. Pueya nia cumaquiri nia sequesanota. Nia niishiriojore taa nia riucuanutaniya tamasaca pueyani, nojori jaara nequesotariquia nijaniya Pueyasooocua nia tiuniujiniji.

Nata quiniaata Pablo saruhuatasacari pueya, naajionu na puecanura

⁷ Pa panishano pa tarajanu Tiquicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyaniijara canaa poonijionura. ⁸ Niaacua na jiyaroyanijia na pohuatanura nijaniya taa canaa quiyani, naajuhuaaj, na cumanijianura nijaniya. ⁹ Pa panishano Onésimoori nata quianutaniyajuhuaaj. Nojuacuajaari nijaniyajinijinio pueyano. Maninia poonijiojua Pueyasora. Nojoricuajaari nia pohuatanutaniya puetunu niiquijijianaa.

¹⁰ Aristarco, cuata nujuatesano pueyanoni, nojuajaari cua sequeya cua saruhuatanura nijaniya nera. Marcoori nia saruhuataajuhuaaj. Nojuajaari Bernabé cuna. Niaacuajaari tari rootasaacanu Marcojiniji. Nojuaja jaara niaacua quiaare, niocua maninia na tiuquiniri nia tiajinia. ¹¹ Jesu sesaanucua pueyanoori nia saruhuataajuhuaaj. Na sesaari Justojuhuaaj. Saa nio pojorijia Judiocuacajinijinoori cuata poonijioquiaa Pueyasora, canaa niishitiojonura Cristojiniji pueya niquiara. Nojoriiri cua cumanijianaa quiquiaa. ¹² Epafrasri nia saruhuataajuhuaaj. Nojuajaari Cristo seru nijaniyajinijiniojuhuaaj. Nojuajaari pueyaracaanu niaacuara secojoquiaa queraatia, jyanohua cumaatia Pueyasooocua tiuujia nia quiniuria. Secojoquiaaariuhuaa ritia Pueyaso tojjia nia quiniuria, puetunu Pueyaso panishanojuanaa nia miiniuria maninia. ¹³ Seetanujuanaa, Epafrasri jyanohua tacaquiaa niaacua, Laodicea tiacajinia quiniaa Pueyaso muerasuucua juhuaaj, Hierápolis tiacajinia Pueyaso muerasuucuanio. ¹⁴ Pa panishano naarajona Lucasri nia saruhuataa. Demas nia saruhuataajuhuaaj.

¹⁵ Canaara nia saruhuatare Laodicea tiacajinia quiniaa parta Pueyaso muerasu. Ninfas nia saruhuatarejuhuaaj, na tiajinia rerejonaa Pueyaso pueya maanujuhuaaj. ¹⁶ Naa jaara nio naajionee serojorecuaa nia reresosacari, Laodicea tiacajinia nia jiyarotarejuhuaaj, cuaara serojosaaria Pueyaso pueya maanu niquiara tiujuhuaaj. Naajuhuaaj, cua naajionee Laodicea pueyacura nia serojore, niaacua nojori jiyarotasacari Laodicea tiacajiniji. ¹⁷ Naa Arquipo nia sequere quiria: “Tama quia cuaqueyajaaja quia cojuare quia tucúatanura quia poonijiosano pa Jiyaniijara. Nojuajaari quia jiyatequiaari nera poonijioriquiano”.

¹⁸ Janiyari Pablóni. Quiarijiani, tama cua juaashiquiatajaaja naajianijia saaja cua saruhuatanura nijaniya. Nia niishiriquia, janiyari moronucua nujuatesano quiyani. Pueyaso cuaara cumaquiiri nijaniya na cumaacata jyanohua. Tariucuaaja.

COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pablóni. Janiyari nio naajiya Tesalónica tiacajinia quiníaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejacánio. Canaari mariyata nia saruhuataani, Silvano, Timoteonio. Pueyaso cuaara maninia jitiiaara na cumaacata nianjaniya, maninia nia quiniuria. Cuaara nioojia cajitiriijuhuaaj, juhuajaniya nia quiniuria.

Tesalónica pueyanaari Jesuucua tiujiaca quiquiaari seetanujuanaa

² Maninia nia quiniucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuucuaani. ³ Pa Que Pueyaso canaa secojosacari, canaari pueyaracaanu niishiquíaa nianjaniyani, taa pueyaracaanu nia poonijioquiaa Pueyasarani, Neyanuucua nia tiuniucua. Canaari niishiquiaajuhuaaj taa nia paniniutia nia naacuquiaa niarta pueyani. Naajuhuaaj, niari maninia rejeretaquiaa taraatia nia miiniu, nia niishiniucua pa Jiyaniijia Jesucristoori pocua niniutianihuaa. ⁴ Pueyaso panishano pueyanaa, canaacuaajari niishiyani, nojuajaari nia saquiriojoquiaari na panishano muerasu nia quiniuria. ⁵ Canaa jaara nia niquiaa pohuataquiaari Pueyaso rupaa Jesucristojinijini, cunoori maja najuhuaa pohuatasano quiquiaari. Canaa pohuatasanoori jyanohua Pueyaso cumaacaraca quiquiaari. Pueyaso Sohuanuuri jyanohua poonijioriquíaa nioojiacajinia. Naacuajitij, niari niishiquiaari canaa pohuatasanoori seetanu rupaajanaa. Niaacuajaari niishiya taa quijica canaa quiquiaari canaa quishacari niaatani, maninia Pueyaso muerasu nia quiniuria.

⁶ Niaari canaacua jiaatiaquiaari, juhua canaa nia quiniuriajuhuaaj, juhua pa Jiyaniijia Jesu nia quiniuriajuhuaaj. Niaari seetanujuanaa naa miijiacara quiquiaari, Pueyaso tojjijaca nia quiniuriajuhuaaj taa canaacuaani. Pueyaso rupaa nia tojishacari, niari jyanohua na timitiaquiaari. Cunora, niari jyanohua naquiya miishaaquiaari. Naajaa, Pueyaso Sohuanuuri nia cumaquiquiaari saaja, shuquiriaatia nia quiniuria. ⁷ Naa shuquiriaatia Pueyaso tojjijaca nia quiniucuatej, niari niarta Pueyaso pueya shiniujuquiaari, seetanujuanaa Pueyaso tojjijaca nojori quiniuriajuhuaaj. Niaari naa shiniujuquiaari puetunu niarta Pueyaso pueyajanaa Macedonia jiyajinia quiniaatej, Acaya jiyajinia quiniaanio. ⁸ Pa Jiyaniijia rupaari nianjaniyani jiniji tuacaanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiquiyocuaajanaa poojotasaquiaari. Naacuajitij, puetunu tiquiyocua quijica pueyajanaari tari niishiya taa Pueyasooqua tiujiaca nia quiya seetanujuanaani. Naacuajitij, ¿canaatucua casaara niishitiojore Jesujiniji socuani, tee cuniqui pueya niishiya tari nojuajinijicuaajani? ⁹ Tee cuniqui canaa tiuquiquiaani, pueyari canaajiniji poojotanuya tari, taa Jesujiniji canaa pohuataquiaaricuaaja nianjaniyani. Nojoriiri niishiyajuhuaaj taa canaa nia tiuquinitiaquiaari maninia nia tiacajiniagueyani, canaa pohuatasano nia tojinuria. Naajuhuaaj, niaanaari pueya shipinijosano nia jiyatasano nia pueyasora cartequiaari, pueyaracaanu rishijia seetanu Pueyasojuaanaa tojtiaajaca nia quiniuria. ¹⁰ Naajuhuaaj, niaanaari Neyanu sashiya, jiyocuaaanuji na tiuquiniuhuaa, teyano Pueyaso

samiitiani quiaariuhua macujini jicua jani. Pueyari nia jani yajini niishiya-jaacuhua j, Jesuuri pocuaji Tacuna, maja mani qui quiojinia pa quejoosaa-nura, Pueyaso saniitiosacari na tojitiaashijiaca.

2

Pablo niishitiosacariuhua pueya, taa na qui quiaari nojoritiani

¹ Cuarta Pueyaso pueyanaa, niaacua jaari niishiya, majaari najuhuaana canaa quiniu qui quiaari, niaata canaa quishacari. ² Niaacua jaari niishiya, Filipino tiacajinia canaa quishacari, niaacua canaa tiu quia quishacari jia, canaari cuno tiacajinia sesacasa quia arini. Canaari jiyano hua taraatia miishaa quia arijihuhua j. Naajuhua j, nia tiacajinia canaa tiu quii jiosacari, pueyari canaa pohuatasano ruureta quia arini saaja. Naajaa, Pueyasoori canaa cumaquia arini juhua jiuujiaaju canaa pohuatanura Jesucristo jini nia ni quia arajuhua j. ³ Canaacua jaari niishiquia arini canaa pohuatasanoori seetanu rupaa janaa. Majaari canaa pohuatanu qui quia arini canaa miiniuria sesa nia jani ya, canaa sapojonura nia jani yajuhua j. ⁴ Pueyasojuaanaari canaacua tiu quia arini. Cunora, canaa jiyate quia arini Neyanujini pohuatanaa canaa quiniuria. Naacua jaari taa canaa poojota quia arini pueya tiu uniuria nocuacua jani, Pueyaso jiyano niuria nojori. Canaari seetanujanaa Pueyaso timitini paniani, maja saaja pueya. Pueyasocua jaari canaa jiuujia niishijia. ⁵ Niaacua jaari niishiyajuhua j, majaari canaa sapojonu qui quia arini nia jani yashanohua canaa sequesanaota, canaa nia maniniucuanura. Naajuhua j, majaari canaa cuaracashijionu qui quia arini nia jani ya, canaa nia ni quiojinonura nia cumaneecajini. Pueyasoori na niishiyacua ja. ⁶ Majaari quenaaja canaa niishiriojonu quijia pueya timitiasano canaa quiniuria, nia timitiasano pueya canaa quiniuria juhua j. Maja. ⁷ Canaacua jaari seetanujanaa nia jiyani jianucua ni, Jesucristo jiyaramiquishano pueya canaa quiniucua. Naajaa, niaata canaa quishacari, majaari naa canaa miiniu qui quia arini nia jani ya, juhua canaa seya nia quiniuria. Saniniujia, canaari tojetaarucua janaa juhua naatujoori qui quia arini, niaata canaa quishacari. Naate j, taa maaji jitiaa maninia necohuacua ani, canaari naa nia jitia quia arini jihuhua j. ⁸ Jiyano hua canaa paniniucua nia jani ya, majaari saaja Pueyaso rupaa canaa pohuatanu qui quia arini nia jani ya. Canaa cutaraari tama canaa cuaqueyajaaja panitia quia arini nia acuarani, naajaa, canaa cuara puecoosaariaqui. Canaari naa jitia quia arini nia jani ya, jiyano hua canaa paniniucua nia jani ya. ⁹ Cuarta Pueyaso pueyanaa, niaacua jaari niishiya taa canaa poonijio quia arini jiyano huani, tama canaa panishano juaaja canaa masetajara. Canaari naa poonijionu quia arini juuca, niucua ni, canaa pohuatanura Pueyaso rupaa nia jani ya. Canaari naa mi quia arini maja canaa taajetenura nia jani ya canaa mashini quiojinonuta nia cumaneeca.

¹⁰ Naacua jiti j cuarta Pueyaso pueyanaa, nia jani ya, Pueyasojuhua j, niaacua jaari niishiya canaari saaja maninia mi quia arini, niaata canaa quishacari. Majaari quenaaja canaa miiniu qui quia arini sesa. Naacua jiti j, tamasaacari maja na naata canaacua ra saquirojotanu, canaa jaara tojetaarucua janaa sesa miya quia arini. ¹¹ Niaari niishiyajuhua j taa canaa shiniuju quia arini nia jani ya ni Pueyaso nia tojiniuria. Niaari niishiya juhua j taa canaa cumani jia quia arini puetunu nia jani yajanaani taraatia nia quishacari, naate j, taa pueyano mi quia arini na panishano ni quiohuacua ani. ¹² Naajuhua j, canaacua jaari jiyano hua nia nacasu quia arini maninia mi jiacaa nia quiniuria juhua seetanujanaa Pueyaso pueya. Pueyasocua jaari nia saquirojo quia arini pueyaracaanu nata nia quiniuria, jiyani jianucua nia

quiniuriajuhuaj, juhua nojuajuahuaj. Nojuacuajaari na shacantuuca cumaa-cajinia quijia.

¹³ Canaa jaara Pueyaso rupaa pohuataquiaari nia niquiarani, majaari nia jiyaniinu quiquiaari cunoori saaja pueyajiniji canaa tojiniuushano. Maja. Niaari seetanujuanaa na tojitiajacara quiquiaari, nia niishihacari cunoori seetanujuanaa Pueyaso rupaa cutara. Canaari cunora canaa timiniutia sequequiaa Pueyasoni, “paacarasho”. Canaa pohuatasanoori seetanujuanaa Pueyaso rupaa. Naacuajitij, na rupaari nioojiajinia pooni-jioquiaa, maninia miijiacara na jataniniuria nijaniya, Jesuucua tiuujiaca nia quiniuucua. ¹⁴ Naa Jesucristoocua tiuujiaca nia quiniuucatej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaaricuaani. Tama narta Judiocuacajaarijia nojori mi-iquiaari naquiya, Jesucristo tojijia nojori quiniuucua. ¹⁵ Nio cuarta Judiocuacani, nojori supuetanaajuahuaj, nojoricuajaari pa Jiyaniijia Jesucristo motuquiaari. Nojori supuetanaari naa tariucuacaanu puecooquiaarijihuua Pueyaso sequesano caminiujiuniaa pueyatej. Naajuhua, Jesuucua tiyashijia cuarta Judiocuacari canaa taanuuquiaari canaa Judea jiyajini. ¿Cuno pojoritiri Pueyaso timitiasano? ¡Maja! Cuno pojoricuajaari juhua puetunu mijiria quiniaa paraajanaa. ¹⁶ Naacuajitij, canaa jaara taucua pohuatanu paniriquia Jesucristojinijini, Pueyaso pueyara nojori jiyatesaanurajuhua, Judiocuacari canaa tenujuqeta juucuaani. Naacuajitij, Pueyasora, sesa Judiocuacari miiijosanoori tari tojetaarucujanaa puera. Cunora, Pueyasoori nojori saniitioquiaa jiyanhua.

Pablo naquerejosacari juucua Tesalónica tiacajinia quiniaa Pueyaso puey-acua

¹⁷ Cua panishano pueyanaa, canaacuajaari rupaquijia nia shuriucuaaji quiaquiaariuhua. Jiyacari canaa niquiyaquishacari nijaniya, naajaa, canaacuajaari juhua niaata quiquiaajaani, pueyaracaanu canaa niishiriojosacari nijaniya, niaacuara canaa secijosacari. Canaari juucua jiyanhua nia niqiniu paniriquiaani. ¹⁸ Cunora, canaari niaacua naquerejoquiaari juucuaani. Janiyari niaacua naquerejonu pacutejoquiaarini. Satanásri canaa cushitioquiaari saajani. ¹⁹ ¿Janiyatucua casaara nia niqiniu paniyaquiri-irini? Niacuajaari jiyanhua cua timitiasano pueya. Pa Jiyaniijia Jesucristo tiuquishacariuhua, janiyari niishiyani, nojuajaari canaa shuquiri-tianutaniya maninia na tojijia nia quishacari canaa niishitiojonuucua na rupaa nijaniya. Pa Jiyaniijia pa quishacari, jiyacaritij, canaari jiyanhua nia timitianutaniyani, maninia na tojitiajaca nia quiniuucua mijiria. ²⁰ Taaquiriirinj, canaacuajaari tari shuquiriaatia quiyani, maninia na tojitiajaca nia quiniuucua. Niacuajaari seefanujuanaa canaa timitiasano pueya.

3

¹ Naa jiyanhua canaa niishiniu panishacari juucua nijaniyajinijitij, majaari socua canaa sashiniu paniniu quiriquiaa. Cunora, canaari niishiriojoquiaarini, maniniacuajaari canaa jateenura tamajaaja Atenas tiacajinia. ² Naacuajitij, canaari saaja parta Pueyaso pueyano Timoteo jiyaroquiaari niaacuani. Nojuacuajaari jaarajaaja cuata poonijiona Pueyasora, Jesucristojiniji canaa pohuatanura. Janiyari niaacua na jiyaroquiaarini na cumaquiniuria nijaniya, mariyata socua na shiniujuniuria nijaniya Jesuucua nia tiuniuria saaja. ³ Na jiyaroquiaarinjia na cumaquiniuria nijaniya maja quenaaja niquiriyatu nijaniyajinijinio pishiniuria Pueyasooquaji, naquiya nia miishacari. Niacuajaari tari niishiquiaari, paari

naquiya miishiyani Jesucristoocua pa tiuuniuucua. ⁴ Canaa quishacari ni-aataja, canaacuaajaari tari nia numootequiaarini, puetunu pajaniyajanaari naquiya miishaanutaniyani Jesucristo tojtiaajaca pa quiniuucua. Niaacuaajaari niishiya, seetanujuanaa naa tohuatecanuuri cua sequesano. ⁵ Cua niishishacari nijaniyajiniji, niaanaari naquiya miishaaguiaa, janiyari puereriguiaani Sesaaca naasucua nia miitiriucuaa sesa. Jaara naa quir-itij, puefunu canaa miishanojuanaa niaara maara najuhuana quiquianu. Naa cua tacaashacaritij, majaari socua cua tarishiniu paniniu quiquianu, nijaniyajiniji cua niishiniuria. Cunora, janiyari ritia jiyarocanu niaacua Timoteoni, saniniuujia nojuaja pahuatanuhuaa janiya, niaate Jesuucua tiuyajaa.

⁶ Timoteocuaajaari tari nijaniyajiniji tiuquiriohuacuaa. Nojuajaari canaa pohuatasuhuacuaa, niaanaari Jesuucua tiuyajaa. Niaanaari panitioojuaca quiyajaa. Canaa pohuatasuhuacuaajaariuhuaaj, niaanaari canaa niishiri-jojoquiaa jiyanohua nia paniniutia canaa. Niaanaari canaa niquiniuucua jiaatiaa, naatej, taa canaa jiaatiaa canaa niquiniuria nijaniyacuaani. ⁷ Cuarta Pueyaso pueyanaa, seetanujuanaa canaari taraatia miishiya niyani. Canaari tacayajuhuaaj. Naajaa, canaa niishishacari niaanaari seetanujua-naa Jesuucua tiuyajaa, canaari canaa jiuujia cajitiriucuaani. ⁸ Naa canaa tojishacari niaacuajitij, canaari juhua samiitiacorohuani, pa Jiyaniijia tojtiaajaca nia quiniuucuaaja. ⁹ Cunora, canaari jiyanohua nia shuquiritiaa Pueyaso niquiarani. Naacuajitij, majaari canaa niishiniu taate canaa naata sequenu nojuajani "paacarasho". Naa maninia nia quiniuucuatej, canaari jiyanohua shuquiriaatia quiyani. ¹⁰ Naajuhuaaj, canaari juuca, niucua sec-ojoquiaa Pueyasoni, nojuaja cuara canaa tiuquitihuara niaacua. Canaari maninia nia niishitiojonu tucuatanu paniyani, seetanujuanaa maninia jeencuasano Pueyaso pueya nia quiniuria.

¹¹ Canaari paniyani pa Que Pueyasojuanaa, pa Jiyaniijia Jesucristonio, nojori cuara canaa naacuura niaacua canaa tiuquiniuria. ¹² Pa Jiyaniijia cuara nia jiyateera socua jiyanohua panitioojuaca nia quiniuria, tamasa panijia nia quiniurijahuaj, taa canaa paniya nijaniyacuaani. ¹³ Naa panijia na jiyatesacari nijaniyatej, niari niooja niqiijoteyashijiaa quiniutianiya cutara. Naajuhuaaj, niari tojetaarucujanaa sesa miyashijiaa quiniutianiya, pa Jiyaniijia Jesucristo tiuquishacariuhua puetunu na jiyanooshano pueyatajanaa.

4

Taate pa naata Pueyaso shuquiritiniuni

¹ Quiarijiani cuarta Pueyaso pueyanaa, pa Jiyaniijia Jesu jiyaramiquis-hano pueya canaa quiniuucua, canaa sequesano nia tojiri. Quiarijiani, canaari nia shiniujiyani socua maninia miijia nia quiniuria. Canaari nia niishitiojoquiaari maninia miijia nia quiniuriani, Pueyaso nia shuquiri-tiniuria. Niaacuajaari naa maninia miya.

² Niaacuajaari canaa rootasano pa Jiyaniijia Jesujiniji niishiya tari. ³ Canaacuaajaari nia rootaquiaarini, Pueyasoori nia panitiaa saaja nera nia quiniuria, tojetaarucujanaa maninia jeequesano nia quiniuria sesa nia miishanojiniji. Majaari nia numuetucunu nia camishoo maaji. ⁴ Puetunu mashiquiorijianaa cuara niishiiria maninia na cojuanura necocuarano, maja ritia na numuetucunura, nata na camiyaquishacarijia. Cuara na cuaqueya panishano rejetenu niishiiria. ⁵ Majaari sacuraatia nia miiniu taa Pueyaso niishiyashijiaa pueya miiquiaacuaani, jiyanohua nojori ji-aatiasacari maajicua. ⁶ Naajuhuaaj, majaari quenaaja jiyasohuaaja niarta

pueyano niquiocua nia numuetucunu, neyaca nia sapojonuta. Cuno maa-jicuajaari saa neyacaraja, maja tamonura socua. Pueyasocujaari naa mi-jiaca saniitionutaniya jiyano, taa canaa numootequiaari tari niajanicy-acuajani. ⁷ Pueyasoori maja na saquirojonu quiquiaari pajaniya sacuaraa-tia miijiaca pa quiniuria. Pa saquirojoquiaari tojetaarucujanaa sesa miyashijiaca pa quiniuria, saa neraja. ⁸ Naacuajitij, cante nio rootasano ruuretajani, nojuajaari maja saaja na rerequetenu nio rootasanojiniji po-huatana. Nojuajaari Pueyasojanaa rerequeteya cutara, cante na Sohuanu niqutioquiaari niajanicyacuajani.

⁹ Quiarijiani cuarta Pueyaso pueyanaa, janiyara, najuhanaruhua ni-aacuara cua naajionura cua niishitiniuria niajanicya, panitioojuaca nia quiniuria. Pueyasocujaari tari nioojiajinia nia niishitiquiaari panitioo-juaca nia quiniuria. ¹⁰ Niaacuajaari seetanujanaa puetunu Macedo-nia jiyajinia niarta Pueyaso pueya panijiaca quiyacuaja. Naajaa, cuarta Pueyaso pueyanaa, canaa nia tojiri. ¡Socua panijiaca nia quiri! ¹¹ Tama nia cuaqueyajaaja nia cumaquiriquia juhuajaniya quijiaca nia quiniuria. Tama nia poonijosanojiniaajaaja nia cojeriquia, tama nia juaashiquiatajaaja nia poonijosacari, taa canaa rootaquiaari niajanicyacuajani. ¹² Naacuajitij, Pueyaso niishiyashijiaca pueyari nia rerequeteyaquiniutianiya. Naajuhua-j, niaari puetunu nia panishanojanaa jiitianutaniya.

Taa pa Jiyaniijia tiuquishacariuhua quiniutianiyan

¹³ Cuarta Pueyaso pueyanaa, canaari juhuacarijia nia tonu paniyani taa Jesuucua tiuuijaca shaajecono pueya miishaanutaniyani. Canaari nia ni-ishitiniu paniyani maja nia taraajenura juhua Jesuucua tiuyashijiaca pueya. Nojoriiri maja na jiitanu nojori Jiyano, nojori na samiitianijionuhua. ¹⁴ Paacuajaari niishiyani Jesuuri cusoquiaari. Na nuhuaji samiitiaquiaar-uhua. Naajuhua, paari niishiyani, Pueyasoori Jesuucua tiuuijaca shaa-jecono pueya samiitianijionutaniuhua, nojori na rijionura Jesuta, Jesu tiuquishacariuhua.

¹⁵ Canaajanaacuajaari nia sequeyani, niocujaari pa Jiyaniijia niishit-hano canaa: pajaniya, canapueete pa Jiyaniijia tiuquishacariuhua saminiu-cua quiniutianiyajani, majaari macunucua pa puetanu quiniutianiya pa Jiyaniijia pa naacuneetonura jiya cajiniocua. ¹⁶ Naa quiniutianiyari. Pa Jiyaniijia nicanuuri tojishaanutaniya, Pueyaso seya jiyaniijia nicanu-juhuaj, Pueyaso trompeta jonenunio. Jiyacaritij, pa Jiyaniijiajanaari jiy-ocuaaanuji rosenutaniya cohuaja najacajiniara. Jiyacarijuhua, puetunu-janaa Jesuucua tiuuijaca shaajecono pueyari samiitiaconutaniuhua co-teenu. ¹⁷ Na nuhuaji pajaniya, canapueete saminiucua quiyajani, paari no-joritia ritia rijiosaanutaniya cohuaja najacajiniarani. Paari tii coquetonu-taniya pa Jiyaniijia paratujiniani. Jiyacaritij, paari tari pueyaracano nata quijiacarano quiniutianiyan. ¹⁸ Cua panishano pueyanaa, nio cua pohuatasanota nia cumanijiatooriquia.

5

¹ Majaruhua maninia cua naajionura niaacuara cua niishitiniuria nia-janiya socua, taacari pa Jiyaniijia tiuquiniutianihuani. Niaacuajaari tari na niishiya, naajuhua, taate mijiria quiniutianiyan na tiuquiyaquishacar-ijia. ² Niaacuajaari maninia niishiya, pueya jyanishacari juhanonjuaja maja pa Jiyaniijia tiuquini quiniutianihuua, nojuajaari jiyacari tiuquiniu-tianiya. Nojuajaari canashiyaquiji tiuquiniutianiya, taa nohuasejoja tiuquiquiaa niucua tiajiniaacocuaani, juhuajaniya tia camaru maquesacari. ³ Naajuhua, quera pa Jiyaniijia tiuquishacariuhua, mijiria quinaa pueyari

naa sequejaca quiniutianiya: “Paacuaaja maninia quiyani. Shaaquicuaja miaquetoojonu”. Canashyaquiji jiyacari, Pueyaso saniitiosacari na tojiyashijiacaari quiniutianiya. Naa quiniutianiyaari taa maajij nooquiaa juhuacatecara canashyaquiji na manajacuaani. Majaari quenaaja niqiriyaatu curosaanu quiniutianiya saniitiosoo. ⁴ Niajaniya saniniuuja cuarta Pueyaso pueyanaa, niaari maja juhua ninishiqui quijiaca, pa Jiyaniijia cariyatunura niajaniya. ⁵ Puetunu niajanijajanaacuajaari cuhuashiqui quijiaca. Pueyasojuanaacuajaari nioojiaca cuhuataquiaari. Majaari tari juhua ninishiqui quijiaca pueya pa quiniu. ⁶ Cunora, pa Jiyaniijia sashijiaca pa quirij, Maja juhua tamasaaja, juhuajaniya quiquioyari. Nojoriiri juhua maquetiuya. Pajaniya saniniuuja cuarta Pueyaso pueyanaa, juhua sutejaca pa quirij, maninia niishiriojojuacajuhua. ⁷ Maquetujuacaari niucua maquetuquiaa. Naajuhua, mashaasequenujuacaari niucua mashaasequenuquiaa. Naaquaja, mashaasequenujuacaari niucua mashaasequenuquiaa. Majaari na maninucuanu cuhuashiqui. ⁸ Pajaniya saniniuuja, paari cuhuashiqui quijiaca cutarani. Naaratej, pueyaracaanu maninia niishiriojojuaca pa quirij. Romano pueya miaquetoosacari, nojoriiri turtuco cushiyonuujua, nocuaji na nujutajara cashi. Cumueca casaa cushiyonuujuaariuhua, na naca na cojutajara. Naajuhua, naa poojia pa cojuare, saaja Jesuucua pa tiuniutia, seetanujanaa panijia pa quishacarijuhua. Seetanujanaa pa niishiri, Pueyasoari pa saquiriojoquiaari na muerasu pa quiniuria pueyaracaanura. Naacuajitij, pocua pa niishitajia cojuareni, maja poojia pa niqijiotenura najuhuanaj. Naacuajitij, Sesaacaari maja na naata shocotanu quiniutianiya pajaniya. ⁹ Pueyasoari maja na saquiriojonu quiquiaari pajaniya na saniitiosocoriquiano. Pa saquiriojoquiaari cutaraari na jiyanooniuria pajaniya, na muerasu pa quiniuria, Neyanu Jesucristoocua tiuujiaca pa quishacari. ¹⁰ Neyanucuaari pocuara cusoquiaari, nata rishijiaca pa quiniuria pueyaracaanu. Naacuajitij, naajaa, paa jaara cusoyareni, paa jaara samini quiyajuhua, pa Jiyaniijia tiuquishacariuhua, puetunu nocua tiuujiacajanaari pueyaracaanu samini quiniutianiya nata. ¹¹ Naaratej, pueyaracaanu nia cumaquitiojoriquia Pueyaso rupaata. Nia shiniujiutioriquiajuhua, seetanujanaa pa Jiyaniijia tojiijia nia quiniuria, taa nia miiquiaacuaja tarini.

Socua Pablo rootasacari Pueyaso pueya

¹² Cuarta Pueyaso pueyanaa, canaa nia tojiri. Cuniqiu nia jitianaa tojiijia nia quiri. Majaari nojori rerequetenu. Nojoriiri jyanohua poonijioquiaa pa Jiyaniijia nojori niishitiojonura niajaniya, na nacasunura niajanijajuhua. ¹³ Cunora, jyanohua nojori nia paniri. Majaari na rerequetenu. Nojoriiri pa Jiyaniijia poonijioquiaa na cumaquiniuria niajaniya. Maninia nia quiri pueyanaa. Majaari juayonuujutanu.

¹⁴ Nio nia tojirijuhua cuarta Pueyaso pueyanaa. Taajecori nia nacasure. Noojia niqijiotejaca nia shiniujiuri, seetanujanaa cumueca Pueyaso pueya nojori quiniuria. Noo pojori nia cumaquiriquiajuhua, Satanás saniniujishacari na cuaqueya miiniu panishano rejeretaashijiatej. Majaari cuno pojori cartenu. Nia juaaniu nia rejeteriquia, maja quenaaja nia juaaniuria tamasacata.

¹⁵ Naajuhua, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miiriquia niajaniya. Saniniuuja, pueyaracaanu maninia nia miitiooriquia niarta Pueyaso pueyata. Naa nia miiriquia puetunu pueyajuhua.

¹⁶ Pueyaracaanu nia shuquiririquia, Pueyaso pueya nia quiniucua.

¹⁷ Naajuhua, pueyaracaanu nia secojoriquia Pueyaso. ¹⁸ Naa jaara maninia

miishaare, niaa jaara sesa miishaarejuhuaj, naajaa, puetunu naa nia miishaanuucujanaa Pueyaso nia sequeriquia, “paacarasho”. Pueyasojuanaacuajaari naa paniya pa miiniuria, Jesucristo Sohuanu pa jiitianuucua poojiajinia. ¹⁹ Majaari Pueyaso Sohuanu nia ruuretano, nojuaja jaara nioojiajinia nia shiniujiya maninia nia miiniuria. ²⁰ Naajuhuj, majaari nia soonu Pueyaso sequesano caminiujiunaa pohuatasano. ²¹ Coteenu nia saniniujiuri cutara, nia niishiniuria seetanufejanaa nojori pohuatasano. Teyano nojori pohuatasanojinijiniote maniniani, cuno tojijiaca nia quiri. ²² Puetunu sesa niishishano casaaajanaa soojeaca nia quiri.

²³ Poojia cajitinia Pueyasojuanaa cuaara nia jeenucuaara juhuacarijia, tojetaarucujanaa sesa miyashijiaca nia quiniuria pa Jiyaniijiaacuaji. Nojuaja cuaara naa cojuuara nia sohuanu, nioojia, nia cuaqueyano, tojetaarucujanaa soosoo nia quiniuria pa Jiyaniijia Jesucristo cuaara tiuquiri-ohuajaatijia. ²⁴ Cante nia saquiriojoquiaaricuaja na pueya nia quiniuriani, nojuajaari puetunu shusha cua sequesanojuanaa nijaniya miiniutianiya niaara. Nojuajaari maja na niishiniu na rupaa jatanu. Nojuaja cutaraari na sequesano miijia pueyaracaanu.

Pablo sequesano na naajionee na tucuatascari

²⁵ Cuarta Pueyaso pueyanaa, Pueyaso nia secojonuuriquia canaacuara-juhuaj.

²⁶ Canaara nia saruhuatate cuniqui quiniaa parta Pueyaso pueyajuhua nojori nia nujuunuta, seetanujuanaa Pueyaso paniniutia.

²⁷ Pa Jiyaniijia jiyaramiquishano cua quiniuucua, cua tojitiare pueyanaa. Nio cua naajionee nia serojore puetunu Pueyaso pueyarajanaa.

²⁸ Pa Jiyaniijia Jesucristo cuaara cumaquiiria nioojia. Cuaara naa quiiri-atej.

TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Jesucristoocua tiuujiaa

¹ Janiyari Pablóni. Silvano, Timoteonio, canaari nio naajiya niaacuarani, puetunu Tesalónica tiacajinia quiníaa parta Pueyaso pueyarajanaa. Nio naajioneeri niaara, canapüete pa Que Pueyaso rupuejacacuajani, pa Jiyaniijia Jesucristo rupuejacanio. ² Pa Que Pueyaso, pa Jiyaniijia Jesucristojuhujaj, nojori cuaara nioojia cumaquiiria. Cuaara nia jiyateera juhuajaniya quijiacarajuhujaj.

Pueyasoori na tojitianu paniyashijiaa saniitioriquiano Jesucristo tiuquishacariuhua

³ Cuarta Pueyaso pueyanaa, canaari jiyanoohua nia timitiaani jiyanoohua Pueyasooocua tiuujiaa nia quiniuucua socua, panitioojuaca nia quiniuucua socuajuhujaj. Cunora, canaa secosacari Pueyaso, canaari pueyaracaanu na sequequiaani, “paacarasho”. ⁴ Naa maninia nia quiniuucuatej, canaari shuquiriaatia poojotaquiaa niajanijajini nia Pueyaso püeya maapue niqüiara tamaquiica canaa rucuanajosacari. Canaari nojori poojotaquiaani taa nia rejeretaquiaa juhuajaniya naquiya nia miiniuni, taraatia nia miiniujihujaj, Pueyasooocua tiuujiaa nia quiniuucua. ⁵ Pueyaso saquirojionuucua niajanijia pueyaracaanu shuquiriaatia quijiaa nia quiniuria na shuriucua, cunoori maja najuhuaa quiquiaari. Naaacuajaari seetanujuanaa na püeya. Cunoori maatia niishishiyacuaja juhuajaniya nia rejeretasacari naquiya nia miiniu, Pueyasooocua nia tiuuniuucua. Pueyaso niishiyashijiaa püeyari naa naquiya miiquiaa niajanijatej, Jesucristoocua tiuujiaa nia quiniuucua.

⁶ Naajaa, Pueyasocuaajaari tojetaarucujajanaa sesa miyashijia. Nojuajaari niaacua naminiutianiya noo pojori, naquiya miitajaca niajanijatej.

⁷ Niajanijia saniniuujia, naquiya miijiosaaquiaarini, niaari canaata sama-raatasaanutaniyajuhujaj, Jesucristo tiuquishacariuhua pocua. Jiyacari-tij, nojuajaari niqushaanutaniya mani rimianuqueyano tiuquitiohuano, jiyanoohua cumaacaraca na seyata jiyocuaaanuji. ⁸ Tiuquiniutianihuari na saniitionura noo pojori, canapüete Pueyaso niishiniu paniyaquiquiaani, noo pojorijuhujaj, pa Jiyaniijia Jesu rupaa ruuretajacatej. ⁹ Puetunu cuno pojorijianaari pueyaracaanu saniitiosocoriquiano jiyatesaanutaniya. Nojoriiri tucuaaanura quejoosaanutaniya pa Jiyaniijia shuriucujaj. Naacua-jitij, majaari nojori niqiniu quiniutianiya na jiquico, shacantuuca na cumaacanio, nojuaja jaara mijiria tiuquirohüa pa shuquiritianura nojuaja. ¹⁰ Jiyacari-tij, puetunu na jenucuasano pueyajanaari jiyanoohua jiuujiate-conutaniya, pa Jiyaniijia na shootiatusacari. Niaari na niqiniutianiya-juhujaj, nojuajini canaa pohuatasanoocua nia tiuuniuucua.

¹¹ Canaari cunora pueyaracaanu niaacuara secojoquiaa Pueyasoni, maninia na püeya nia quiniuria, maja nojuaja caririqiniuria na saquirojionuucua niajanijia. Canaari niaacuara secojoquiaaaniuhujaj, Pueyaso cuaara nia tucuataniiria na cumaacata puetunu maninia casaa nia miiniu panishanojuanaa. Cuaara nia tucuataniirajuhua puetunu nia miishanojuanaa, cuno, Pueyasooocua nia tiuuniutia nia poonijosanoni. ¹² Naacua-jitij, pa Jiyaniijia Jesuuri socua timitiasaanutaniya naa nia miiniuucua manijatej. Naajuhujaj, nojuajaari nia timitianutaniyajuhujaj.

Naa maninia quiniutianiyari pa Pueyaso pa Jiyaniijia Jesucristota na cumaquishacari niajaniya.

2

Maatia pohuatasano, taate mijiria quiniutianiyani, pa Jiyaniijia tiuquishacariuhua

¹ Quiarijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujiniji, taa pa coquetonutaniya natajaniuhuj. ² Canaa sequesano niajaniya nia tojiri, pueyanaa. Majaari nia niyjetanu taruucuaaanu canaa niishitiojosano niajaniya, nia jiyayeneyaquiniuucuaaji tamasaca sapojosacari niajaniya. Majaari nia shiriqiniuu tamasaca jaara sequere niajaniya: “Pueyaso Sohuanuuri cua niishitirii, pa Jiyaniijia tiuquishacariiri quiarijia”. Tamasaca jaara naa nia pohuatare, majaari na sequesano tojinuu. Naajuhuj, tamasaca jaara naajionuure tamajaaja, niaara na jiyatesocoriquiano juhua canaa naajione, majaari nojori tojinuu. Nojoricuaajari nia sapojiya. ³ Pueyanaa, majaari niaacua nojori nia shanacunu nojori sapojonura niajaniya. Nia niishiri, pa Jiyaniijia tiuquiyaquishacariuhua, queraatia pueyari Pueyasoo cuaji pishiniutianiya. Jiyacarijuhuaj, Pueyaso rootasano Ruuretajajanaari supenuutianiya. Nojuacuajaari tariucua Pueyaso saniitiosocoriquiano na riuriotaca. ⁴ Nojuacuajaari Pueyaso paraca. Nojuajaari puetunu pueyajanaa tenujunutaniya maja nojori tojinuria Pueyaso, pueya shipinijosano nojori pueyasohuara nojori tarinitianurajuhuj. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojoia tiajinia cajiniutianiyari, Jiyaniijiajanaa cajitiujinia. Jiyacari sequenutaniyari: “Janiyacuaajari Pueyasoni”.

⁵ Pueyanaa, ¿majateeri nio nia niishiniucuaaja? Janiyacuajaari nojuajiniji nia poojotajani niaata cua quishacari. ⁶ Niaa naasucuaari niishiyacuaja canteeri juhua na quiaajaani, maja juhuanujuaja mijiria na miiniuria tama na panishanojuajaaja, Pueyaso paniyaquishacarijia. ⁷ Seetanujuanaa, Sesaaca cumaacaari tari mijiria poonijiya jiyasohuaja. Naajaa, Pueyaso paracaari juhuanujuaja maja na naata muetanu, pueya niishiniuria nojuaja, na tenujuna cuara niiquiji rishaarejaatijiaj. ⁸ Na tenujuna jaara rishaare niiquiji, jiyacariitij cuno sesaaca sequeri muetanutaniya, jiyanohua sesa na miiniuria. Naajaa, pa Jiyaniijia tiuquishacariuhua na shacantuuca cumaacajinia, nojuajaari cuno sesaaca seque monutaniya saaja na rupaata na noonutia, na shaajanura puetunujuanaa. ⁹ Cuno sesa miijia sequeri muetanutaniya Satanás cumaquishacari nojuaja. Naacuajitij, nojuajaari jiyanohua cumaaca jiiitianutaniya jiyajeneta casaa na miiniuria, pueya jiuujiatenura nocuaji. Queraatia niishishoo casaa miiniutianiyajaariuhuj, pueya na sapojonura. ¹⁰ Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapuee saniitiosocoriquiano pueyacuajani. Nojoriiri sapojosaanutaniya, Pueyaso Rupaa ruuretajaca nojori quiniuucua. Nojoriiri maja na tojinuu paniniu quiquiaari seetanu rupaajanaa, Pueyaso jiyanooniuria nojori. ¹¹ Naaratej, Pueyasoori nojori tarinitianutaniya nojori sapojosaanura, nojori tiuuniuria seetanujuanaa sapojonuucua. ¹² Naacuajitij, puetunu noo pojorijianaari saniitiosaanutaniya, canapuee seetanu rupaacuajanaa tiuuniu paniyaquijiani, sesa miiniu maniniucuaaja nojori quiniuucua.

Pueyaso muerasuranoori tariucuaanujiniji saquiriojosano

¹³ Niajaniya saniniuujia, niaari pa Jiyaniijia panishano pueyacuaja. Jiya shipiniyaquishacarijia, niaacuajaari tariucua Pueyaso saquiriojosano pueya quiquiaari. Niaari Pueyaso pueyara quiquiaaricuaja, na Sohanu jataniniuucua niajaniya quiarinio pueya nia quiniuria, seetanu rupaacua-janaa nia tiuuniuucua. Cunora, canaari pueyaracaanu Pueyaso sequequiaa niaacuarani, “paacarasho”. ¹⁴ Canaa pohuatasacari Pueyaso rupaa nia niqiuara, niaari Jesucristoocua tiuuquiaari. Naacuajitij, Pueyasoori nia jiyatequiaari na pueya nia quiniuria, shacantuuca quijiacara nia jatanishaa-nura, taa pa Jiyaniijia Jesucristo quiyacuaani.

¹⁵ Naaratej cuarta Pueyaso pueyanaa, majaari nioojia nia niquijotenu Pueyasocuaaji. Naajuhuj, nia numaama nia racatare canaa niishitio-josano niajaniya niaata canaa quishacari, canaa naajioneecajinia canaa rootasano niajanijahuuj. ¹⁶ Jiyanoojia pa Jiyaniijia Jesucristo quiniuucua, pa Que Pueyasojuhuuj, nojoriiri pa paniquiaa. Naajuhuj, poojia cajitiquiaa pueyaracaanuraari. Na rupaacua pa tiutiquiaariiri, pa niishiniuria paari jiyanojua maninia miishaanutaniya pueyaracaanuni. ¹⁷ Naajuhuj, nojori cuara nioojia shiniujiiria, maninia nojori tojitiajaca nia quiniuria pueyara-caanu. Nojori cuara cumaquiriia niajaniya, tojetaarucujanaa maninia nia sequesano quiniuria, nia miishanonio.

3

Pueyaso rupaa pohuatanaacuara pa secojore

¹ Pueyanaa, socua nia sequerohuacuaraaj. Canaacuara nia secojore, pa Jiyaniijia rupaa paaquetesaanura puetunu tiquiyocujanaa. Nia secojorejuhuuj, cuno rupaa pueya tojshacari, nojori jatanishaanura, naatej, taa na jataniquiaari niajanijacuaani. ² Canaacuara nia secojorejuhuuj, Pueyaso cojuanura canaa na tojiyashijia pueyacuaji, maja nojori miiniuria sesa canaa. Niaacuajaari niishiya, puetunu pueyajanaari maja na tiuuniu Pueyasocua. Cuno pojoricuajaari canaa paracaajiaa. ³ Naajaa, paacuajaari niishiyani pa Jiyaniijiacuajaari na sequesano miiquiaa. Nojuacuajaari nia cumaquiniutianiya, maja nioojia nia niquijotenu nocuaji. Sesaacuaji nia cojuanutaniyajaariuhuj. ⁴ Pa Jiyaniijiaacua canaa tiuushacari, majaari canaa taacuanunu niaa naasucuaari canaa rootasano tojitiaquiniutianiya. Maja. Niaa naasucuaari na tojitiaacuaja. ⁵ Pa Jiyaniijia cuara niishitiiria nioojajinia, panijia nia quiniuria taa Pueyaso panijacuaani. Naajuhuj, cuara nia niishitiiria naquiya miiniu rejeretajaca nia quiniuria, Jesucristo cumaquishacari niajaniya.

Poonijiojuaca pa qiri

⁶ Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniuucua, canaa nia tojitiare. Majaari noo pojori nia rupeenu: taajecoritij, noo pojorijuhuj, canaa rootasano tojiyashijia-catej. ⁷ Niaacuajaari niishiya taa quijiaa canaa quiquiaari niaata canaa quishacarini. Naa quijiaa nia qiriujuhuj. Majaari canaa taajeyaca canaa matanu quijiani. ⁸ Majaari najuhuaa canaa miaquenu quijia nia miaquesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiarini canaa panishano canaa jitianura, maja quenaaja canaa taajetenura nia-janiya, maja nia tacaatianura canaajuhuj. ⁹ Pueyaso jiyaramiquishano pueya canaa quiniuucua, canaa naata quiquiaaricuajaari canaa panishano canaa mashiniquiniuria niajanijajini. Naajaa, majaari naa canaa miiniu quiquiaari. Canaari tama canaa juashiquiacatajaaja poonijio-quiaarini, canaa niishitiojonura niajaniya, poonijionuujuaca nia quiniuria

juhua canaajuhuaaj. ¹⁰ Canaa quishacari niaata jiyacarijiuhuaaj, canaari nio nia niishitiojoquiaarini: “Cante poonijionu paniyaquiyani, cuaara mi-aqueteshiyaquiiriajuhuaaj”. ¹¹ Canaari pohuataasaarucuaajaaniuhuaaj, nooji-aqueya niajaniyajinijionaaari juhuajaniya quiquiaa. Majanaari na poonijionuunu quiquiaa. Nojoriniaari noo pojori cushitiojoquiaa, poonijionuu-juaca cutaratej. ¹² Pa Jiyaniijia Jesucristo jiyaramiquishano pueya canaa quiniucua, canaari cuno taajecori sequeyani, nojori cuaara poonijionuura, nojori panishano nojori jiitianura.

¹³ Cuarta Pueyaso pueyanaa, teyano niajaniyajinijiniote maninia miiijia-cacuaani, majaari maninia miiniu nia tarinitianu. ¹⁴ Saniniuujia, cante nio naajioneejinia canaa sequesano tojiniu paniyaquiyani, nojuaja nia niishiri cantenonjoni. Majaari na rupuenunoj, na caririquiniuria quenaaja. ¹⁵ Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniucua.

Pablo sequesano na naajio na tucuatascari

¹⁶ Poojia cajitijia pa Jiyaniijiani, nojuajanaa cuaara nioojia cajitiiria pueyaracaanu, naajaa, niaa jaara taa miishaariquia. Pa Jiyaniijia cuaara pueyaracaanu jiitiaara puetunu niajaniyajanaa.

¹⁷ Janiyari Pabloni. Cua saruhuatanura niajaniya, janiyari tama cua juaashiquiatajaaja nio naajiyani. Nia niquiri cua naajiosano, taamue-catenonjoni. Janiyari naa puetunu cua naajioneecajanaa tucuatquiaani, cua sesa cua naajionuta. ¹⁸ Pa Jiyaniijia Jesucristo cuaara cumaquiiria puetunu niajaniyajanaa. Cuaara naa quiiriatej.

COTEENU PABLO NAAJIONEE TIMOTEOCUARA

Pablo saruhuatasacari Timoteo

¹ Janiyari Pabloni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojoriiri nera poonijionara cua jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniurijahuaj. ² Timoteonaa, janiyari nio naajiya quiarani. Quiaari juhua quianura quiquiaari, Pueyaso pueyanora quia jatanuucua, quia niqiuara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhuj, nojori cuaara cumaquiiria quiajaniya. Nojori cuaara quiocua taraajeerajuhuj. Nojori cuaara pueyaracaanu quioojia cajitiirijuhuj.

Pablo sequesacari sesa niishitiojonuujuaca cuaara sanaajasaaria

³ Janiya jaara Macedonia jiyajiniara quiaquiaarini, janiyacujaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhuana tamaatia niishitiojonuya pueyani. ⁴ Janiyari quia sequequiaarijuhuaj, nojori quia sequenura, maja nojori niishiriojonura najuhuana nojori supuetanaa pohuatanuusanoinia. Janiyari quia sequequiaarijuhuaj, maja nojori niishiriojonura nojori supuetanaa sesacajinia, cuno, najuhuana tucuyocuara naajionutasanoni. Pueya niishiriojonuusacari pueyaracaanu cuno najuhuana casaajinia, nojoriiri cunoocua juayonuujutaquiaa saaja. Saniniuujia, nojori cuaara Pueyaso rupaacua niishiriojora cutara. Nocua pa tiuushacari, paari cumaquishaanutaniyani Pueyasora pa poonijionura maninia.

⁵ Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitioojuaca nojori quiniuria. Nojori cuaara shitimia panitioojuaca quiriia, juhua jeequesano nojori jiuujia quishacari. Seetanujuanaa Pueyasocua nojori tiuushacari, nojori cuaara panitioora maja noojia macuhuaajenuta sesa nojori miishanojiniji. ⁶ Noojiaqueya cuno pojorijinijinoori tari tarinitiacanu tojiniu nio maninia niishitiojosano. Nojoriiri cushitiiquianu na pocojonuucua, na nacojonuucua najuhuana tama nojori niishishanojinijiaaja. ⁷ Nojoriiri Moisés Rootasanojiniji niishitiojonaara quiniu paniya juucua. Majaari que-naaja nojori niishiniu tama nojori sequesanojuaja, nojori shiniuujushacari pueya, pueya tojiniuria najuhuana capa nojori niishitiojosano.

⁸ Paacujaaari niishiyani, Pueyaso rootasano Moisésni, cunoori maniniacuja, paa jaara niishirini casaara naa Pueyaso rootaquiaari pa supuetanaani. ⁹ Paacujaaari niishiyani, Moisés Rootasanoori maja na pueretenu maninia miijia pueya cutara. Pueyasoori maja na rootasano na niishitiniu quiquiaari maninia miijiacara. Na niishitiquiaari cutaraari na tojtiaashijiacara, tama na panishanojuaja miijiacara, Pueyaso sojeacarajuhuj, sesa miijiacarano. Moisés Rootasanoori Pueyaso rerequetecara, Pueyaso casaa rerequetecarajuhuj, noo pojoririjuhuj, tama na que tacartaja monutej, na nucuanio, pueya puecojuacarajuhuj. ¹⁰ Moisés Rootasanoori na camishoo maaipohua numuetucunuujacara, maaishurihuara, na numuetucunuujacaranio. Moisés Rootasanoori pueya nohuasenuujacara juhua casami na niqitiojosocoriquiano tamasaca seyara; sapojonuujacarajuhuj; na sapojonuta na sequesano maatejacerano, nocua na tiuushaanura; puetunu

noo pojorirajanaanio, maninia niishitiojosano tojiyashijiicatej. ¹¹ Cuno maninia niishitiojosanoni, cunocuaajaari cua pohuatasano Jesucristo rupaajiniji, pueya jatanura Pueyaso pueyara. Pueyasoori jiyanohua maninia, cuno rupaa pohuatanara na jiyatenuucua janiya.

Pablo shuqiritiasacari Pueyaso, na rupaa pohuatanara na jiyatenuucua nojuaja

¹² Pa Jiyaniijia Jesucristoori cucua tiuquuaari nera cua poonijionura maninia. Cunora, na rupaa pohuatanara cua jiyatequiaariiri. Nojuajaari cua cumaquiquiaa. Cunora, janiyari na sequequiaani, “paacarasho”.

¹³ Tariucuaaanu, janiyari nocuara rimiaaqueja quiquiaari sacuaraatiani. Janiyari naquiya na miiquiaarijuhuaj, nocua tiuujiaca cua miiti-asacari. Janiyari jiyanohua na paracaajia quiquiaarijuhuaj. Naajaa, Jesucristoori saaja cucua taraajequiaarini cua niishiyaquiniuucua casaa cua miriquiaani, nocua tiuyashijia cua quishacarijia. ¹⁴ Naa cucua na taraajenuucuatej, nojuajaari seetanujuanaa cua jiyanooquuaari. Na jiyanooshacari janiya, nojuajaari cua jataniquiaari nocua tiuujiaca quiniuria, panijia cua quiniuriajuhuaj.

¹⁵ Timoteonaa, nioori seetanujuanaa. Puetunu pueyajanaa cuara niishiiria nio. Cua tojiri. Jesucristoori mijiria niquuaari na Que Pueyaso na jiyanootiniuria sesa miijiaa. Janiyacuajaari tojatarucuaajanaa cuno sesa miijiaa pueyajiniinio na jiyanooshanoni. ¹⁶ Janiyari naa jiyanooshaaquiaarini puetunu pueyajanaa niishiniuria taa jiyanohua jiyanootiote Jesucristoni, pueyaracaanu na rejeretanuucua cua juaniu. Naa Jesucristo jiyanooniucuaacuaa janiya, sesa miijia cua quishacarijiatej, Jesucristoocua tiuujiacarano cuara niishiiria, nojoriiri na naata jiyanooshaanujahuaj Jesucristoocua nojori tiuushacari. Naacuajitij, nojoricua pueyaracaanu quijiacara jiyatesarejuhuaj. ¹⁷ Naa jiyanootio pa Jiyaniijia quiniuucuatej, nojuaja pa timitiare pueyaracaanu. Nojuajaari jiyaniijiajuhanajaj. Nojuajaari Pueyasocuaa, shaajeyashijia, namijiata niquiyacquishoo. ¡Jiyanohua maniniaari pa Jiyaniijia! ¡Naa seetanujuanaari!

¹⁸ Timoteonaa, quiaacuajaari niishiya taa Pueyaso cumaquiquiaari quia-janiyacuaajani, nera quia poonijionura. Cunoori quiquiaari Pueyaso pueya jiiitanaa jaara caminiujuquuaari Pueyaso sequenu panishano quiaara, nera poonijiona quia quiniuria. Naacuajitij quianunaa, cua tojiri. Pueyaso cumaaca quia jiiitiasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. ¹⁹ Naa quia quiri Pueyaso rupaa quia pohuatasacari, seetanujuanaa na rupaacua tiuujiaca quia quishacari, seetanujuanaa na rupaa tojjia quia quishacarijuhuaj. Naa quijia quia quiriritij, quioojia mariquij quia macuhaajareeri quiaa jaara sesa miiriquia. Noojiaqueya pueyari tari Pueyasocua tiuuniu tarinitiacanu nojori ruuretanuucua Pueyaso Sohuanu numootesacari nojori jiuujiajinia, sesa nojori miishacari. ²⁰ Naa miituuquianuuri Himeneo, Alejandronio. Janiyari cunora Pueyaso secorucuaani. Pueyaso cuara nojori tarinitiaara Satanásra, Satanás miiniuria naquiya nojori. Naacuajitij, nojori cuara niishiiria maja socua sacuaraatia nojori rimiaaquenura Pueyasocuaa.

2

¹ Cua tojiri Timoteonaa, niaa jaara Pueyaso secojonuuriquia, nia secojonuure puetunu pueyacuarajanaa. Nia panishano casaacua nia secojoriquiajuhuaj. Naajuhuaaj, Pueyaso nia sequeriquia “paacarasho”, pueyara caanu maninia na miiniucua. ² Jiya jiyaniijianucuaacuara nia secojonuuriquiajuhuaj, puetunu pueya camarucuaacuarajuhuaaj. Nojoriicuara nia secojonuuriquia, juhuajaniya pa quiniuria panaatia, juhuajaniya pa tojinuria Pueyaso, maninia pa quiniuria parta pueyatajuhuaaj. ³ Pa Jiyanoojia Pueyasoori naa paniquiaa pa secojonuratej. Naa pa secojosano maniniucuaquiaari. ⁴ Nojuajaari paniya puetunu pueyajanaa tiuuniuria Neyanucua, na pueyara nojori jatanishaanura, puetunu seetanu rupajanaa nishijiaca nojori quiniurijuhuaaj. ⁵ Pa Que Pueyasoori niquiriyatujua. Majaari tamonu Pueyaso quiniu socua. Naajuhuaaj, niquiriyatujua pueyanoori quia Pueyaso Jiyanootijia pueya. Nojuajaari Jesucristocuaaja. ⁶ Puetunu pueyajanaa quishacari saniitosocoriguano, Jesucristoori tama na cuaqueyajaaja tarinitiaquiaari na mosaanura narta pueya niti. Naacuaajitij, na Que Pueyasoori na naata jiyanooni pajaniya saniniuuja. Quiarijiacaajaari Pueyaso panishacari Neyanujiniji pohuatasaanura pueya niquiara, nojori jiyanooshaanura. ⁷ Nio rupaa cua pohuatanurajuhuaaj, Pueyasojuanaari cua jiyatequiaari Jesucristojiniji pohuatana cua quiniuria. Cua jiyaramiquiaaariiri taucaca cua niishitiniuria Jesuucua nojori tiuuniuria, seetanu rupajanaa nojori niishiniurijuhuaaj. Nio cua sequesanoori seetanujanaa. Majaari cua sapojonu.

⁸ Cunora, cua tojiri. Janiyari paniyani puetunu tiquiyocujanaa pueya secjoununura Pueyaso. Jiyocuaaanu nojori shiitiosacari nojori juaashiquia nojori secojonura, nojori jiuujia cuaara quiiria jeequesano sesa nojori miishanojiniji. Naajuhuaaj, cuaara quiaquiiria najiquitishano, maja sesa niishiriojonutajuhuaaj. ⁹ Naajuhuaaj, janiyari paniyani maajipohua cuaara cushiyaquiiria puera maniniuquiya toqueya, narta maajipohua na shocotanura. Cuaara cushiyaquiiria cararaatia niquishano toqueyajuhuaaj. Maniniacuaajaari nojori maniniushiniuria. Sesa cutaraari nojori maniniushiniuria puera, pueya shootianura nojori. Nojori cuaara jiyaniyaquiiria nojoriiri seetanujanaa shanohua niquishano, nojori muecaca jeecasano quishacari puera, nojori cushishacari orojiniji shipinishano casaanio. ¿Maajitiiri seetanujanaa shanohua niquishano maaji, na cushitianuucua queraatia cumaneecata masesano noturu shipinijosano sai tiujiau, queraatia cumaneecata masesano maniniuquiya toqueyano? Maja. ¹⁰ Nojori cuaara maniniucuaaariquia cutara, maninia miijia maajipohua nojori quiniucua. Nojori cuaara quiiria juhua noo maajipohuaaja, canapuetucuaaja tama nojori cuaqueyajaaja jiyatecanu Pueyasora na quiniuria seetanujanaani. ¹¹ Pueyaso rupaa niishitiosacari, maajipohua cuaara tojitiariquia sanaa, maja Pueyaso rupaa pohuatanaa na rejetenuta. ¹² Maja cutaraari cua shanacunu maajipohua niishitiojonura Pueyaso rupaa pueya niquiara. Naajuhuaaj, majaari cua shanacunu maajipohua jiyatesaanura narta Pueyaso pueya jiihana na quiniuria. Nojori cuaara sanaa tojitiariquia cutara, narta Pueyaso pueya rerejosacari. ¹³ Quia niishiri Timoteonaa, casaara naa cua sequeyani. Pueyasocuaajaari coteenu Adán shipiniquiaari. Na nuhuaji Adán niquiorano Eva shipiniquiaariiri. ¹⁴ Quia niishirijuhuaaj, Soconurano jaara sapojoquiaari Evatej, majaari na sapojonu quiquiaari neyaca Adán. Eva cutaraari sapojosaquiaari. Naacuaajitij, na sapojosaanuucua, Evaari Pueyaso tojiyashijara quiquiaari. ¹⁵ Naaratej, maajipohua cuaara maninia canashitijjoora necohua. Cuaara panijiaa quiirijuhuaaj. Cuaara maninia miijiaa quiirijuhuaaj, maninia niishiriojojuaca nojori quishacari. Naa

maajipohua miishacaritij, Pueyasoori nojori jiitianutaniya maninia, Jesu-cristoocua tiuujiaa nojori quishacari.

3

Pueyaso pueya jiitianatucua taamueca pueyano quiriquiani

¹ Nio sequesanoori seetanujuanaa: cante Pueyaso pueya jiitianara quiniu paniyani, nojuajaari maninia poonijosano miiniuucua jiaataa. ² Naaratej, cante Pueyaso pueya jiitianani, nojuaja cuaara quiiria sesa-soo pueyano. Nojuaja cuaara quiiria saaja niquiriyatu maaji niyaca. Cuaara quiiria noojia niqijioteyashijia, maninia niishiriojojuajuhuj, pueya rerequeteyaquishoonio. Cuaara quiiria maninia pueyano, rucuu-juaca pueya tiuquinitiaja na tiajinia. Cuaara quiiria Pueyaso rupaa niishitio-joju maninia. ³ Naajuhuj, nojuaja cuaara quiyaquiiria mashaasequejoru. Cuaara quiyaquiiria ritia juaajia, pueya na piniuria. Cuaara quiiria pueya riuhaneyashijia, pueya juaashacari nojuaja. Cuaara quiiria shiniquia-juhuaj. Cuaara cumaneecaacua jiaatiaashijia quiirijuhuj. ⁴ Naajuhuj, nojuaja cuaara na tiajinia quiniaa jiitiaja quiiria maninia. Cuaara necohua niishitiojoju quiiria maniniajuhuaj, tojtiajaca nojori quiniuria, pueya rerequeteyashijiacanio. ⁵ Naacujitij, pueyano jaara maninia casaa neco-hua niishitiojiyashijia quiriquia, ¿maatucua taa maninia jiitariquia Pueyaso pueya maanuni? ⁶ Naajuhuj, Pueyaso pueya maanu jiitariquiano cuaara quiiria seetanujuanaa Pueyaso tojjia pueyano cutara. Cuaara quiyaquiiria shusha Pueyasoocua tiuunio pueyano, nojuaja mariqui jiyaniiri nojuaja tojishano pueyano cutara. Nojuaja jaara jiyaniiri nojuaja socua maninia pueyano narta Pueyaso pueyajiniji, nojuajaari cocuaatia miya taa Sa-tanás miiquiaaricuaani. Pueyaso panishano seru Satanás quishacarijia, nojuacuajaari taanuusaquiaari Pueyaso shuriucujani, na jiyaniishacari no-juaja na naata na Jiyaniijia Pueyaso shocotanu. ⁷ Naajuhuj, Pueyaso pueya maanu jiitariquiano cuaara quiiria maninia miijia pueyano, Jesu-ucua tiuyashijia pueya mariqui na sesacareeri maninia miyashijia na quishacari. Nojuaja jaara naa rerequetesano quiritij, nojuajaari juhua Sesaaca norijosano quiniutianiya. Naacujitij, pueya tojiaquishano quiniutianiari.

Narta Pueyaso pueya naacunaatucua taamueca pueya quiriquiani

⁸ Naajuhuj, parta Pueyaso pueya naacuna cuaara quiiria tojishano pueya, rerequetesoo. Cuaara quiiria na sequesano miijia. Cuaara quiyaquiiria puera mashaca jereeca ratunuucua jiitinio. Cuaara quiiria cumaneecaacua jiaatiaashijia, jiyasohujia na nohuasejonura, na sapon-jonuta na masenuranio. ⁹ Naajuhuj, nojori cuaara seetanujuanaa Pueyaso rupaa tojjiaquiiria, teyanocua tiuujiaa pa quiyacuajani. Naacujitij, nojori jaara naa miijiaquiiria quiritij, ¿nojoritiucua casaacua cararosaariquiani? ¹⁰ Cunora, pueya cuaara senota jiyateyaquishaaria Pueyaso pueya naacu-naa nojori quiniuria. Cuaara coteenu maninia niishishiiria nojoriiri seetanujuanaa Pueyaso tojtiajaca. Nojori jaara maninia miijiaquiiria pueya qui-ri, na nuhuaji cutara, nojori cuaara jiyatesaaria narta Pueyaso pueya naacu-naa nojori quiniuria. ¹¹ Naajuhuj, Pueyaso pueya naacuna niquiocohua cuaara quiiria tojishano maajipohua, maja rimiacaatujuri. Cuaara quiiria niishiriojojuaca, na sequesano miijiaquiiria pueyaracaanunio. ¹² Cante Pueyaso pueya naacunaani, nojori cuaara jiitiaara saa niquiriyatu niquiocua. Cuaara quiiria necohua niishitiojoju maninia casaa, na tojtiajaca necohua quiniuria. Naajuhuj, cuaara quiiria maninia jiitiaja na tiajinia quiniaa

pueya. ¹³ Naacuaajitij, Pueyaso pueya naacunaa jaara maninia poonijioquiaa na naacusacari narta Pueyaso pueya, nojoriiri seetanujuanaa pueya tojishano pueya quiniutianiya. Naajuhuaaj, nojoriiri socua jiyanohua Jesucristoocua tiuujiacara jatanutaniya, na puereyaquiniutia nojori poonijionura pa Jiyaniijara.

Jesucristojiniji Pueyaso niishitishano pueyani, paari nocua tiuujiacani

¹⁴⁻¹⁵ Timoteonaa, janiyari quioocua naquerejijyani. Naajaa, janiyari quiara naajiya nioni. Naacuaajitij, janiya jaara tarishirini, janiyari paniyani juhuacarijia quia niishiniuria taa quijia quia quiniutianiya, Pueyaso pueya maanujinia quia quishacari. Pueyaso pueya maanucuaajaari pueyaracaanu rishijia Pueyaso quiquo. Na saquiriojosano pueya nojori quiniuucua, nojoriiri na rupaa jitianacuaja, nocuaji tacunaajaariuhuaaj. ¹⁶ Seetanujuanaa nocuaji jiuujiatesanoori Pueyaso niishitishano Jesucristojiniji pajaniya. Paari nio sequesanoocua tiuujiacani:

Pueyaso Niyanuuri pueyanora jataquiaari, na rupenuera pajaniya. Pueyaso Sohuanuuri pa niishitiquiaari, nojuajaari tojetaarucujanaa sesa miyashijia. Naajuhuaaj, Pueyaso seyacuajaari Jesu niquiquiaari na samiitiasacariuhua. Nojuajiniijiri pohuatasaaquiaari Judiocuaca niquiara, taucuaa niquiarajuhuaaj. Pueyapueeri nocua tiuuquiaari. Na Queeri na tacaniquiaariuhua Jiyaniijajanaa na quiniuria.

4

Pueyaso Rupaa carteriquiano pueyajiniji pohuatasano

¹ Pueyaso Sohuanuuri maatia pa niishitiquiaa, nio pa quishacari nuhuaji noojiaqueya pueyari Pueyaso rupaa tarinitianutaniya tojinuu, tamaatia niishitiojosano nojori tojinuuucua. Nojoriiri seetanujuanaa sapojosaanutaniya naa nojori tojinuuucua samaruhua niishishano. ² Nojoriiri sapojonuujuaca pueya tojtiajacara quiniutianiya, noo pojori, sapuenu juhua maninia niquishano pueyatej. Cuno sapojonuujuacaari tariucua sesa miniuucua jitiqiuono. Majaari tari na niishitiuniu caririquiniu. ³ Cuno pojoriiri pueya niishitiojua maja na caminiuria. Niishitiojonuuquiaajaariuhuaaj maja pueya miaquenura noojiaqueya miaquesanojuhuaaj, teyano Pueyaso shipiniquiaari Jesuucua tiuujiacaracuajani, cante seetana ru-paajanaa niishijiacacuajani. Cuno miaquesanocuaajaari pa timitiaso-coriquiano, Pueyaso pa sequenura, "paacarasho". ⁴ Puetunu Pueyaso shipinishano casaajanaari maninia. Puetunu miaquesano casaajanaa cuara puereyaquishaaria miaquenu, paa jaara coteenu nocuara Pueyaso sequereni, "paacarasho". ⁵ Pueyaso rupaacua tiuujiaca pa quishacari, naacuaajitij, nocuara pa secojosacari, Pueyasoori na jiyatequiaa maninia na quiniuria pajaniyara.

Jesucristora poonijiona pueyanotucua taamueca pueyano quiriqiani

⁶ Pueyaracaanu parta Pueyaso pueya quia niishitiojoriquia nio cua rootasano quiajaniya. Naajuhuaaj, pueyaracaanu tama quia cuaqueyajaaja quia cumaquiriquia Jesucristojiniji pa niishishano rupaata, tama Jesucristojuaja rootasanotanio, taa quia tojiqiaacuajanoj. Quiaa jaara naa miijia quirritij, quiaari maninia poonijiona quiniutianiya Jesucristora.

⁷ Majaari najuhuaana tariucuaaanu supuetanaa pohuatanuusanu tojjia quia quiniu, najuhuaana tama pueya niishishanojuajaanoj. Majaari cuno tojinuuucua quia cojenu najuhuaanaaj. Jiyanohua quia jiaatiare cutara, saaja Pueyaso tojjia quia quiniuria. Naa miiniu quia saniniujiuri jiyanohua, seetanujuanaa Pueyaso panijia quia quiniuria. ⁸ Pueyari queraatia casaa

miiniu niishiya, cumueeca pueya nojori quiniuria. Supuetanaari pueyara-caanu nanoojoquiaari na cuaqueya na jiyartuutenura, cumueeca na quini-uria. Cunoori maniniacuaa pa cuaqueyara, mijiria pa quishacari. Sanini-ujia, socua jiyanhua maninia cutaraari Pueyaso panijia pa quiniuria see-tanujuaanaa. Cunoori jiyanhua maninia, mijiria pa quishacariria, Pueyaso shuriucua pa quishacaririjahuaj. ⁹ Nio cua sequesanoori seetanujua-naa. Puetunu pueyajanaa cuaara na tojiiria. ¹⁰ Cunora, pueya jaara pa miitiariquia, naajaa, paari jiyanhua poonijioquiaa pueya pa tojitiniuria Pueyaso rupaani. Majaari naa miiniu pa tarinitianu. Paacuaajari niishiyani, paari pueyaracaanu rishijia Pueyasoocua tiuyani. Nojuacuajaari puetunu pueyacuaji Tacunajanaa, canapue cutarate nocua tiuujiacacuajani.

¹¹ Nio cua sequesano quiajaniya quia niishitiojore pueya. Nojori quia nacasuriquia jiyanhua, na tojtianura quiajaniya. ¹² Majaari pueya shana-cunu quiocua, nojori rerequetenura quiajaniya, mashaja quia quiniucua. Saniya maninia quijia quia quiriquia cutara, pueya jiaatianura quiocua, juhua quiajaniya nojori quiniu paniniurijahuaj. Naaratej, tama quia cuaqueyajaaja quia cojuare, taa quia pocuaani, taa quia quiyani. Naajuhuaaj, seetanujuaanaa panijia quia quiri, Pueyaso rupaacua tiuujiijahuaj. Majaari rucuajeejojua quia quiniu. Naa maninia miijia quia quiri, pueya jiaatianura quiocua. ¹³ Naacuajitij, cua tiuquiyaquishacarijia quiocua, pueya niquiara maatia quia serojoriquia Pueyaso Rupaa. Parta Pueyaso pueya quia naca-suriquia jiyanhua, Pueyaso tojtiajaca nojori quiniuhara seetanujuaanaa. Seetanujuaanaa nojori quia niishitiojoriquia maninia. ¹⁴ Pueyasocuaajari na cumaaca niqitioquiaari quiajaniya. Pueyaso Sohanucuaajari naa pohuatequiaari Pueyaso pueya maanu jiitianaa pueyatej, nojori jaara nio-joquiaari na juaashiquia quiocua, quia jiyatesaanura Pueyasora poonijiona quia quiniuria. Cuno cumaaca quiaa na jiitiaani, quia poonijiotere pueyara-caanu. Majaari najuhuaana na jiitianu.

¹⁵ Puetunu niya cua rootasanojuanaa quiajaniyani, cuno tojjia quia quiriquia. Naa quia quiritij, puetunu pueyajanaa niquiniuria taa seetanu-juanaa socua maninia Pueyaso tojjiaara quia quiyareeni. ¹⁶ Naacuajitij, tama quioojiaaja quia cojuare. Naajuhuaaj, tama quia cuaqueyajaaja quia cojuare seetanu rupaajanaa quia niishitiojonura pueya. Majaari quia tarinitianu miiniu cua sequesano quiajaniya. Naacuajitij, quiaa jaara naa maninia miijia quiri, quiaari tama quia cuaqueyajaaja jiyateya maninia Pueyaso pueyanora. Quia tojtiajaca pueyari Pueyaso pueyara quiniu-tianiyajuhuaaj.

5

Paatucua taa jiitariquia parta Pueyaso pueyani

¹ Majaari quia saaquiapue quia nacasunu quia juaaniutia, Pueyaso ru-paa nojori tojiyaquiniucua. Nojori quia nacasure jacaria, juhua quia que. Mashiquiori quia nacasure jacarijahuaj, juhua quia tapueyocuaa. ² Naajuhuaaj, motajoori quia nacasure juhua quia nucua. Niyacojori quia nacasure juhua quia rimiatusuhuaaj, maja nojoriicua quia jiaatianuta.

³ Mashiquiopue jaara tojetaarucujanaa niquiohuaju quiri, jinianuhuaaju-nio, Pueyaso pueya cuaara nojori naacuura. ⁴ Saniniujia, mashiquio jaara niquiohwaraca quiriquia, jinianuhwaraca soj, cuno pojori cuaara coteenu tama na nucuaajaaja cojuatunu niishiiria, na jijiuhuaaj. Naacuajitij, necohua cuaara na queya cojuara, taa na queya cojuaquiaari nojoricuaani, naatu-joori nojori quishacari. Pueyasoori naa na queyacua taraajejaca timitiaja.

⁵ Noo mashiquio, cante seetanujuanaa jiyopueejuni, nojuajaari saaja Pueya-soocua tiuuquiaa. Majaari na tarinitianu secojonu juuca, niucuanio. ⁶ Noo mashiquio saniniuuja, tama na cuaqueyajaaja shuquiriritijatej, nojuajaari tariucua juhua macu Pueyasora, saminio na quishacarijia. ⁷ Parta Pueyaso pueya quia niishitjore nio cua rootasanojuhuaj, sesacaso nojori quiniuria. ⁸ Canapuate na queecua, na nucuaacua taraajeyaquijiani, tama na tiajinia quijiaca pueyacujuhuaaj, naa miijiacatej, nojoriiri Pueyaso Rupaa tojiyashujacara jiyaterohua tari tama nojori cuaqueyajaaja. Naacuajitij, nojoriiri socua tojetaarucujanaa sesa, Pueyasocua tiuyaquijia pueyajiniji.

⁹ Mashiquio jaara Pueyaso pueya jiitianaa naacunara jiyatenu panishaare, cuno mashiquiopue cuaara quiiria tariucua sesenta marijia shocotejono. Cuaara quiiria noo mashiquio, cante saaja na camishano pueyanota quiquiaari maninia pueyaracaanuni. ¹⁰ Cuno mashiquio cuaara niishishano maaji quiiria, maninia miijia na quiniucua. Cuaara quiirijuhuaaj, cante maninia canashitijioquiaari necohuani. Cuaara rucoojuacaacua taraajeja quiirijuhuaaj, na tiajinia na maquiojojua. Cuaara maninia miijia quiirijuhuaaj, narta Pueyaso pueya niohuaca jeequejojua. Cuaara taraatia miishano pueyacuara taraajeja quiirijuhuaaj, nojori cumanijianajuhuaaj. Cuaara puetunu maninia na miiniujianaa tarinitiaquijia quiirijuhuaaj.

¹¹ Saniniuuja, noo mashiquio, teyanote juhuanujuaja maja na shocotejonu sesenta marijiani, nojori cuaara jiyateyaquishaaria Pueyaso pueya jiitianaa naacunaara. Nojori na naata Cristo samiritianu, niyacaaniucua nojori jiaatiasacari. ¹² Naacuajitij, nojori camishacariuhua, nojoriiri tari sesa miirii, nojori jatanuucua nojori sequesano saaja Jesucristora na poonijionura. ¹³ Naajuhuaaj, niyacoo naata mashiquio nojori quishacarijia, nojoriiri saaja rucanejonu maniniucuaaja, na tiuquijionura puetunu tia-cojuanaa. Naa tama na poonijosanojuaja na jiitiaaquishacarijij, nojoriiri taajecatujuriria quijia. Majaari saaja taajecara na quiniu, juura tojiyajaa pueya sequesanoori, tariucua na caminiujiniu tamasacaraj. Naajuhuaaj, sacuaaraatia neteyocojiyari juhua paateca, na taajetenura pueya, na caminiujiushacari jiyasohuaja niishishano casaa. ¹⁴ Naaratej, janiyari cunora paniyani niyacoojori naata mashiquiopue cuaara camiyora neyacaara. Cuaara muetuurajuhuaaj. Cuaara na tia camarucua quiquioora. Nojori jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaquenura Pueyaso pueyacuaara. ¹⁵ Noojiaqueya niyacoojori naata mashiquiopeeri Pueyaso tojinu tarinitiacanu tari, Satanás tojiijia nojori quiniuria saniniuuja.

¹⁶ Pa Jiyaniijiaacua tiuujia maajipohuajinijinio jaara tama na pueyajinijiniojuaja jiitiare mashiquiopue, nojori cuaara na naacuura tamajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapuate tojetaarucujanaa jiyopueejuni.

¹⁷ Pueyaso pueya jiitianaa, noo pojori canapuate maninia jiitianaa narta Pueyaso pueyani, nojori cuaara narta Pueyaso pueya tojishano quiiria. Naajuhuaaj, nojori cuaara nareja niqitiosaaria, na panishano nojori jiitiana. Pueyaso pueya maanu jiitianaajinijinio, canapuate Pueyaso rupaa pohuatanaacuajani, Pueyaso rupaa niishitiojanaano, nojori cutara cuaara socua queraatia niqitiosaaria, maninia poonijosano nojori miiniucua.

¹⁸ Tariucuaacuanu Pueyaso Rupaajinia naajitasantanoori naa niishitiojiyajuhuaaj, naa na sequesacari miriqui:

“Majaari quia juunu rupaa mishiquionu na miaqueyaquiniuria quia casaa, quia rapijotesacari quia natau, na jocuanura na sucujajiniji”.

Naa sequeyajaariuhujaj:

“Poonijjotesano pueyano cuaara niqutiosaaria na poonijjonu sami”.

¹⁹ Pueyano jaara saquiriojotariquia Pueyaso pueya maanu jiitianaacuara, majaari na tojniu, jaara nocuara cojitiaaquiri saquiriojotanu. Querajaa pueya jaara nocuara cojitiare saquiriojotanu, cuno nojori sequesano cutaraari seetanujuanaa. ²⁰ Naacuajitij, Pueyaso pueya maanu jiitianaajini-jinio jaara sesa miiriquia, Pueyaso pueya maanu niquiara quia nacasurenoj, puetunu narta Pueyaso pueyajanaa puerenura, maja sesa nojori miiniurijahuaj. ²¹ Timoteonaa, janiyari nio quia sequeya Pueyaso niquiarani, Jesucristo niquiarajuhujaj, na saquiriojosano seya niquiaranio. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa maninia pa niishiyaquishacari na miishano. Naajuhujaj, majaari pa naata jiuujiaaniu pa panishano pueyano, nojuaja jaara sesa miiri. Naacuajitij, majaari rimiajata miijjonu sacuraatia. ²² Naajuhujaj, majaari senota quia juaashiquia quia nianu quia niishishoo pueyanocua, nojuaja quia jiyatenura Pueyaso pueya jiitianara. Maninia cutaraari coteenu quia niishiniuria taamueca pueyanotenonjoni, maja sesa miijia pueyano quia jiyatenura Pueyaso pueya jiitianara. Quiaa jaara naa Pueyaso pueya jiitianara jiyatere quia niishiyaquishoo pueyanotej, Pueyasoori quiocua tiutianutaniya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

²³ Timoteonaa, naa quia seeco noojonuucuatej, majaari saaja mohuaca ratunu. Sequeyarucua cusosu quia quiniucua, secaja vino quia raturiquiajuhuaj quia jiniacuma na jeeanura.

²⁴ Noojiaqueya pueya, sesa nojori miishanoori maatia niishishanocujaja, Pueyaso saniifionu juuca quiaquishacarijia. Tamasacara saniniuuja, sesa nojori miishanoori maja na niishishaanu quiniutianiya juhuanujuaja, Pueyaso cuaara nojori nujuatejore na tacojijiaatijia, na nequesoreesoriquiano. ²⁵ Naajaariuhujaj, maninia pa miishanoori maatia niishishano mijiria. Jiyasohujaja maninia pa miishanojuhuaj, cunoori na nuhuaji niishishaanutaniya maatiajuhuaj.

6

¹ Parta Pueyaso pueyajiniinio, canapuate poonijjotesano pueyani, nojori cuaara na camarucua tojtiaajaca quiiria. Nojori cuaara rerequeteyaquiria na camarucua, na camarucua mariqui Pueyaso sesacareeri, pa niishitiojosanonio, na tojiyashijia na seru quiniucua. ² Poonijjotesano pueyano camarnu jaara Pueyaso pueyano quiriquia, juhua na serujuhujaj, na seru cuaara na tojjijia quiiria. Cuaara na rerequeteja quiaquiria, narta Pueyaso pueyano na camarnu quiniucua. Nojuaja cuaara seetanujuanaa maninia poonijjoora nera, na niishishacari na camarnucujajaari narta panishano Pueyaso pueyano.

Cante seetanujuanaa shuquiriaatia quijiacani

Timoteonaa, nio cua sequesano quia niishitiojore pueya. Nojori quia shiniujiuri na tojtianurajuhujaj. ³ Tamonu jaara tamaatia niishitiojoriquia quia niishitiojosaninjini, nojuajaari tojetaarucujanaa moseeca. Pa Jiyaniijia Jesucristo rupaari jyanohua maninia. Na niishitiojosano pa tojishacari, cunoori pa naacuquiaa juhua Pueyaso pa quiniuria socua. ⁴ Cante cuno niishitiojosano ruuretaja tama na niishishanojuaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juaatioonu procuajuhujaj, Pueyaso rootasanojiniji na taacanusacari. Naa quijiaa pueya quishacaritij, nojoriiri juaajiacara jataquiaa,

nojoritia juayonuujutajaca shocotanuucua nojori. Nojoriiri juhuacatecara ruutaquetooquiaa na juayonuutanura. Sesacatooquiaajaarihuaj. Naa-juhuaj, nojoriiri najuhuaana soquequiaa, narta Pueyaso pueya naasucua sesa miiquiaa. ⁵ Nojoriiri juayonuujutanu tarinitiaaquijiaca. Nojoriiri maja na naata maninia niishiriojonu socua. Nojoriiri maja na niishiniu seetanu rupaajanaa Pueyasojiniji. Nojoriiri Pueyaso pueya jiitijacacara quiniu paniya, nojori jiyanihacari nojoriiri naacuaji jiyanhua casamiriacara quiniutianiya. ⁶ Taaquiriirinij, Pueyasocua tiuujiaa pa quishacari, paacuaaquinatejaj seetanujuanaa juhua queraatia casamiriaca quijiacani. Paacuaajaari shuquiriaatia quijiaca Pueyaso rupaacua tiuujiaa pa quishacari, juhujaniya quijiaca pa quishacarijuhuaj pa jiitiasano casaaniyojuata. ⁷ Paacuaajaari juhuasunucua roosaquaiari mijiriani. Naa-juhuaj, paari juhuasunucua tacateriquianohuani. ⁸ Naaratej, paa jaara pa miaguesocoriqiano jiitariquiani, paa jaara pa cushishocoriqiano jitariquiajuhuaj, saa cunotaja shuquiriaatia pa quirij. ⁹ Saniniuujia, noo pojori, jiyanhua casamiriaca quiniucua jiaatijacatej, nojoriiri maja na niishiniu rejetenu, na panishano na miyaquiniuria. Naacuajitij, nojoriiri cocuaatia miiquiaa. Nojoriiri juhua norijosaaquiaa, najuhuaana casamiicua nojori jiaatiasacari, sesa casaacuanio. Puetunu cuno sesa casaajanaari pueya sesoquiaa, nojori saniitiosaanura taraatia. ¹⁰ Cumaneeacaacua jiaatianu jiyanhuaani, cuniquiji supuejaari puetunu sesa casaa pa miiniurijanaa. Naacuajitij, noojiaqueya parta Pueyaso pueyajiniiniori Pueyaso rupaa tojinu tarinitiacanu tari. Nojoriiri tama nojori cuaqueyajaaja miitiquiaa naquiya, naa cumaneecaacua jiaatijaca nojori quishacarij. Naaratej Timofeona, majaari cumaneecaacua jiaatijaca quia quiniu.

Pablo shiniujushacari Timoteo, Pueyaso tojjia na quiniuria pueyacaanu

¹¹ Quiajaniya Timoteona, quiaacuajaari Pueyaso saquiriojosano pueyano. Naaratej, puetunu sesa casaajanaa miyashijia quia quiri. Tojetaarucujanaa saaja maninia miijia quia quiri, juhua pa jiyaniijaja. Pueyasocua tiuujia quia quiri socua. Socua panijia quia quirijjuhuaj. Puetunu casaajanaa rejeretaja quia quirijjuhuaj. Jacaria pocuja quia quirijjuhuaj, maja pueya rerequeteja. ¹² Pa paraca nujuataja quia quiri, jiyanhua quia tiuniutia Pueyaso rupaacua. Pueyasocuaajaari quia saquiriojoquiaari na pueyano quia quiniuria. Cunora, quiaari queraatia pueya niqiuara pohuataquiaari Jesucristocua quia tiuniujiniji. Naa pueyacaanu rishijiarano quia quishacarij, cunora, majaari Pueyaso niqutiojonu panishano quiajaniya jaaretenu. ¹³ Quiaacuajaari niishiya taa Jesucristo seetanujuanaa pohuataquiaari Poncio Pilato niqiuaracujani, nojuajaari seetanujuanaa Pueyaso Niyanu. Naajaa, nojuajaari niishiquaari nojuajaari cunora mosaanutaniya. Na Que Pueyasocuaajaari na samiitianiquiaarihua. Pueyasocuaajaari saminiora jiyateja puetunu saminio casaajanaa. Naa quia niishishacarij Timoteona, janiyari nio quia sequeya Pueyaso niqiuarani, pa jiyaniijia niqiuarajuhuaj. Cua tojjiri. ¹⁴ Puetunu cua rootasano quiajaniyajanaa quia tojjiri. Majaari jatanianu quenaaja, pa jiyaniijia mariqui quia niishitiojosano tamacareeri. Taa cua rootaa quiajaniyacujani, na tojjia quia quiri pueyacaanu, pa jiyaniijia Jesucristo cuara tiuquiriohuajaatijia, jiyaniijajanaa na quiniuria. ¹⁵ Na Que Pueyasoori na tiuquitiniutianiya na panishacari, taa na sequequiaricujani. Pueyasocuaajaari jiyanhua pa timitasano, saaja maninia na quiniucua. Nojuajanaari jiyaniijia. Nojuajaari puetunu tamasaca jiyaniijianucujanaa jiyaniijia. Nojuajaari camarucujiniji Camarnujuanaa cutara. ¹⁶ Saaja nojuajaari pueyacaanu quijiajuhanajaj.

Majaari na supueni quiquiaari. Majaari na shaajenu quiniutianiyajuhuaaj. Nojuajaari jiyano hua na shacantuuca cumaacajinia quijiajuhuanajaj. Cunora, majaari quenaaja tamonu pueyano na naata nocua catecanonu. ¿Canteeri na niquiquiaari quenaajani? Shaagui. Pueyanoori maja na naata na niquniu. ¡Nojuaja cuara pueyaracaanu timitiasaaria! ¡Nojuajaari namitia na cumaaca jitianajuhuanajaj! Cuaara naa quiiria pueyaracaanutej.

¹⁷ Timoteonaa, parta Pueyaso pueya quia tojitiri nio, noo pojori, queraatia casamiriacatej. Nojori cuara niishiiria maja pueya shocotejaca nojori quiniuria, casamiriaca nojori quiniuucua. Nojori cuara niishiiriajuhuaaj, maja na casamiicua nojori tiuuniuria, nojori jiyanishacari nojori iri pueyaracaanu shuquiriaatia quijiaa quiniutianiya casamiriaca nojori quiniuucua. Pa jitiiasano casamiiri shaajeriquiano. Nojori cuara Pueyasocua tiuuria cutara. Nojuajaari capora cutara, na niquitionura puetunu pa panishano casaajanaa, shuquiriaatia pa quiniuria. ¹⁸ Cunora, nojori quia niishitiojore, pueyaracaanu maninia miijlaca nojori quiniuria. Naatej, taa queraatia casamiriacatucuaa nojorini, maninia nojori miishano cuara naa queraatia quiiriajuhuaaj. Nojori cuara ritia niquitiojojuaca quiiria nojori jitiiasanojiniji, narta Pueyaso pueyano jitiiaaquishacari na panishano. ¹⁹ Naa capora nojori quishacaritij, nojoriiri juhua tari jiyocuacaanu racataa nojori casaa. Naacuajitij, nojoriiri seetanujanaa shuquiriaatia quijiaa quiniutianiya pueyaracaanu, mijiria, jiyocuacaanunio.

Pablo rootasano Timoteo, naajionu na tucuatasaari

²⁰ Timoteonaa, Pueyasocuaajaari quia jiyatequiaari na rupaajiniji pohuatana quia quiniuria. Maninia quia cojuare seetanu Pueyaso rupaajanaa. Majaari najuhuaana tama pueya niishitiojosanojuaja tojijia quia quiniu. Noo niishishanojuhuaaj, pueya sequesano: “Seetanu niishijiajanaa niishishano cutaratej”, majaari cuno tojiniu. Cuno niishishanoori seetanu niishishanojuanaa paraca, najuhuaanaari. ²¹ Noojiaqueya parta Pueyaso pueyari Pueyaso rupaa tojiniu tarinitiacanu tari, cuno najuhuaana niishishanoocua nojori tiuuniuucua. Niojuanaa Timoteonaa.

Pa jiyaniijia cuara quia cumaquiiria.

TANEE PABLO NAAJIONEE TIMOTEOCUARA

Pablo saruhuatasacari Timoteo

¹ Janiyari Pabloni, Jesucristo jiyaramiquishano, taa Pueyaso paniquiaaricuajani. Naacuajitij, janiyari Jesucristojiniji pohuatanaa jiyatesaaquiaarini, pueya niishiniuria seetanujuanaa, nojoriiri pueyaracaanu rishijacara jiyatesaanutaniya Jesucristoocua nojori tiuushacari. ² Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhua, nojori cuara cumaquiiria quiajaniya. Naajuhua, nojori cuara taraajeera quioocua, nojori cuara pueyaracaanu quioojia cajitiiriajuhua shuquiriaatia quia quiniuria.

Jesucristojiniji quia pohuatariquia tamasaca

³ Pueyaso cua secosacari pueyaracaanu, juuca, niucuanio, janiyari quiocuara secujoquiaani. Cua niishiriojosacari quiajaniya, maninia Pueyaso tojjia quia quiniuucua, janiyari Pueyaso sequequiaani, “paacarasho”. Janiyari nera shitimia poonijioquiaa coojia najiquitishooni, taa pa supuetanaa tojtiaquiaari Pueyasocuaani. ⁴ Majaari cua niyajetanu quiquiaa quia nujuquenu cucua, janiya jaara quia shuriucuaji quiaquiaarini. Janiyari cunora jiyanhua jiaatiaa cua niquiniuria quiajaniyani, shuquiriaatia cua quiniuria quia shuriucua. ⁵ Janiyacuajaari niishiyani quiaari seetanujuanaa pa Jiyaniijiaacua tiuujiaacua. Quia ji Loida, quia nucua Eunicienio, nojoriiri coteenujanaa quiocuaji Pueyasocua tiuujia quiaquiaari. Majaari cua taacanuunu quiaari seetanujuanaa Jesucristoocua tiuujia quiquiaajuhua, taa nojori quiquiaaricuaani.

⁶ Pueyasocuaajaari na cumaaca niqutioquiaari quiajaniya, cua secosacari quiocuara, cua juaashiquiaa cua niasacari quioocua. Naacuajitij, quiaacuajaari Pueyaso Sohanu cumaacaraca quioojiajinia. Naaratej, Pueyaso Sohanu quia shanacure quioocua, na cumaaca na poonijiotenura socua quioojiajinia. ⁷ Pueyasoori maja na niqutionu quiquiaari na Sohanu, puereja pa quiniuria. Na Sohanu niqutioquiaari pajaniya cutaraari, cumaacaraca pa quiniuria, panijiaa pa quiniurajuhua, maninia niishiriojojuacarano. ⁸ Naacuajitij, majaari quia caririqiniu pa Jiyaniijia Jesucristojiniji quia poojotanura. Naajuhua, majaari cua naaqui quia caririqiniu, nujuatejojuajinia cua nujuatesaanuucua Jesucristojiniji cua pohuatanuucua. Pueyaso cumaquishacari quiajaniya, juhuajaniya quia rejeretare, quiaa jaara naquiya miishaariquiajuhua, Jesucristojiniji quia pohuatasacari. ⁹ Pueyasocuaajaari pa jiyatequiaari na pueyara. Nojuajaari pa saquiriojoquiaari saa neraja pa quiniuria. Na jiyanooni pajaniyani, majaari na quini quiquiaari maninia miijiaa pa quiniuucua juucua. Maja. Nojuacuajaari naa pa jiyanooquiaari saaja naa na miini paniniuucua, jiyanoojia na quiniuucujuhua. Jiya shipiniyaquishacarijia, Pueyasoori jiyacari niishiriojoquiaari taa na jiyanooniutianiya pajaniyani, Jesucristo cusosacari pa niti. ¹⁰ Quiari naataja pocuaji Tacuna Jesucristo niniuucua, Pueyasoori pa niishitiquiaari taate na naata jiyanooni pajaniyani. Cunora, Jesucristoori pa niti cusoquiaari. Na samiitasacarihua, nojuajaari cusonu shocotaquiaari. Naacuajitij, nocua pa tiuushacari, paari pueyaracaanu rishijiaa jiyatesaanutaniyani.

¹¹ Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji.

¹² Naacuaajitij, janiyari niya naquiya miya nujuatejojuajiniani. Naajaa, majaari cua caririqiniu. Janiyacuajaari niishiyani canaacua cua tiuquiquiaarini. Nojuacuajaari pocuaji Tacuna Jesucristo. Cunora, janiyari seetanujuanaa niishiyani, nojuajaari cumaacaraca na cojuanura janiya, nojuaja cuara tiuquiriouhuaatijia. Naajuhuj, nojuacuajaari cumaacaraca na jataniniuria pajaniya, tojetaarucujanaa quiarinio pueya pa quiniuria na tiuquishacariuhua pocua.

¹³ Timoteonaa, maninia niishitiojosano tojjijia quia quiriquia taa cua niishitiojoquiaari quiajanuyacuajani. Naa quia miiriquia Pueyaso rupaacua tiuujia quia quishacari, pueya panijia quia quiniuucujuhuj, Jesucristo rupesano pa quiniuucua. ¹⁴ Pueyasocujajaari quia niishitiquiaari seetanu rupaajanaa. Pueyaso Sohuanu quiniuucua poojjajinia na cumaquiniuria pajaniya, cuno niishitiojosano quia jiitiare maninia, maja tamaatiara na jatanishaanura.

¹⁵ Quiaacuajaari tari niishiya, puetunu Asia jiyajinjiniu parta Pueyaso pueyari cua tiujiatuquiaari tamajaaja. Majaari na naacutunu paniniu quiquianu janiya. Nojorijinjiniuoori quiquianujuhua Figelo, Hermogenesio. ¹⁶⁻¹⁷ Saniniuujia, Onesiforo cutaraari cucua tiuquitasucanu. Cunora, pa Jiyaniijia cuara nocua taraajeera, puetunu na tijajinia quijiacuacujuhuj. Nojuaja jaara Roma tiacajinia tiuquiquianu, nojuajaari ritia coteecanu na pajenura janiya, cuara cua riariatarejaatijia. Jaara cua riariatacanu, nojuajaari coojia cajitiquianu. Nojuajaari pueyaracaanu cucua tiuquijiocanu niya nujuatejojuajinia, na naacunura janiya. Majaari cucuaji na caririqiniu quiquianu nujuatesano cua quishacari. ¹⁸ Quiaacuajaari niishiyajuhuj taa nojuaja naacuquiaari pajaniyacuajani, Éfeso tiacajinia pa quishacari. Naa maninia na miiniuucua pajaniyacuatej, pa Jiyaniijia tiuquishacariuhua pocua, nojuaja cuara maninia miiria Onesiforo saniniuujia.

2

Jesucristora poonijojua quia qiri quia puereyaquiniutia

¹ Quiajaniya saniniuujia quiyannuaa, quioojia quia cumaquiriquia Jesucristo niquitiosano cumaacata. ² Nocua tiushano pueya qiarata Pueyaso pueyajinjiniu quia niishitiojore Pueyaso rupaa, nojori niishitiojonura tamasaca saniniuujia. Cuno maninia pueya quia niishitiojore puetunu Pueyaso rupaajanaa, taa quia tojjiquiaari queraatia pueya niqiara cua pohuatasacariacuajani.

³ Juhujajaniya naquiya miiniu rejeretaja quia quiriquia juhua pa Jiyaniijia Jesucristo soldado, puereyashijia. ⁴ Pueyano jaara soldadora saquiriojosaare, cuno pueyanoori maja na naata tama na panishanojuaja miiniu socua. Nojuajaari pueyaracaanu na camarnu tojjijia, na camarnu timitianura nojuaja. Naa pa Jiyaniijia tojjijia quia quiriquiajuhuaj Timoteonaa. ⁵ Naajuhuj, pueya tacuarishijosacari, nojori cuara quiriia tacuarishijionu camarnu, cuno jaara shocotare na tojjiaquiniutia camarnu, cuno na shocotanuuri najuhuanaj. Naacuaajitij, majaari na niquitiosaanu casaa, sesa na miiniutia na shocotasacari. ⁶ Nio quia niishirijuhuj: cante cuhariquia cuhatajani, nojuaja cuara coteenu na senoosanoiniji racataara na panishano. Na nuhuaji cutara, nojuaja na naata tamasaca niqutiojonu na senoosanoiniji. ⁷ Nio miriqui cua sequesanoocua quia niishiriojore. Pa Jiyaniijiacujajaari quia niishitiniutianiya puetunujuanaa.

⁸ Majaari nio niyajetanu: Jesucristoori macujiniji samiitianishaaquiuar-
 iuhua, Pueyaso Niyanu na quiniucua. Pueyano quiquiaariijaariuhua.
 Nojuacuajaari pa supuetanaa jiyaniijia David niquiohuacuajinio supueno
 pueyano quiquiaari. Naacuajitij, nojuajaari Pueyaso Jiyarosano quiquiaari
 mijiria quinia pueya niti na mosaanura. Cunocujajaari cua pohuatasano
 Pueyaso Rupaa. ⁹ Naa cua poojotanuucuatej, janiyari naquiya miyani.
 Janiyari cumayocuata moronucua quiyajaniuhua, juhua sesa miijia. Naa-
 jaa, Pueyaso rupaa cutaraari maja na naata sanaajasaanu. ¹⁰ Cunora,
 janiyari puetunu naquiya miitiasaariana rejeretaquiiaani, Pueyaso saquiro-
 josano pueya tojiniuria Jesucristojiniji. Naacuajitij, nojoriiri na naata nocua
 tiunui, Pueyaso pueyara nojori jiyatesaanurajuhua, taa na jatanishano
 pueya pa quiyacuaani. Naacuajitij, paari mariyata shacantuuca quijacara
 jatanishaanutaniyani, Jesucristota pa quiniuria pueyaracaanu.

¹¹ Nio sequesanoori seetanujuanaa:

Jesucristoocua pa tiushacari, Pueyasoori Neyanu mosaanu jiyateya pa
 niti na quiniuria sesa pa miishanojiniji. Naacuajitij, Jesucristo
 mosaanu jaara pocuara quiquiaari, na samiitianuhuari pajaniyara
 quiyajuhua, pueyaracaanu rishiriquiano pa quiniuria. ¹² Naajuhua,
 paa jaara naquiya miitiasaariquia nocua pa tiunuiucuan, noju-
 jaari camarucua pa jiyatenutaniya narta jiyaniijianucua pa quini-
 uria. Saniniujia, pa jaara pa Jiyaniijia tamacariquia Pueyaso
 niishiyashijiaca pueya niquiarani, nojuajaari pa tamacanutaniya-
 juhua. ¹³ Paa jaara na sequesano tojiyashijiaca quiriquiani, naajaa,
 nojuajaari pueyaracaanu na sequesano miijia. Pueyasoora na seque-
 sano jataniyashijia cutara.

Taamueca quijate Pueyaso shuquiritiasano nera poonijonani

¹⁴ Parta Pueyaso pueya quia niishitiojorohuarohua maja najuhua na no-
 jori juayonuujutanura tamaatia niishitiojosanoocua. Jiyanhua quia naca-
 sure nojori Pueyaso niquiara, maja naa nojori nacojonura najuhua na
 supuetanaa niishitiojosanoocua. Naa tamaatia niishitiojosanoocua juay-
 onuujutanuni, cunoori maja na cumaquiniu na tojiniaa. Socua nojori
 sesoya cutaraari. ¹⁵ Tama quia cuaqueyajaaja quia cojuare, saa maninaja
 quia niishitiojonura Pueyasojiniji cuno seetanu rupajaanaa. Naacuajitij,
 Pueyasoori quia timitianutaniya nera poonijona maniniu quia quiniucua.
 Majaari capa quia niishitiojonu, quiaa mariqui tamajaaja caririquiri.
¹⁶ Naaratej, majaari najuhua tama mijiria pueya niishishanojuaja quia
 tojinu. Pueya tojishacari cuno, nojoriiri socua jiyatenutaniya Pueyaso
 tojiyashijiaca nojori quiniuria. ¹⁷ Cuno najuhua na niishitiojosanoori
 jiyanhua puereeta. Cunoori Pueyaso pueya tajinia paaqueja, na sesonura
 puetunu Pueyaso pueya maanujuanaa. Naa nojori tajinia paaqueyari taa
 pueyano cusojuaja sapueja pueyano cuaqueya moquijiaquiacaacuaani, na
 camaru na cusojuanura. Himeneo, Filetonio, nojoriiri naa miiquioya quiar-
 iijia. ¹⁸ Nojoriiri seetanu rupaajaanaa jataniquianu tamaatiara. Nojoriiri
 pueya niishitiojija, paanaari tari tojetaarucujananaa samiitianishanocua-
 jani. Naacuajitij, majanaari pa cuaqueya jatanishaanu quiniutaniya, sha-
 cantuuca cuaqueyaraca pa quiniuria taa pa Jiyaniijiacuaani. Naa nojori
 niishitiojosacari najuhuanatej, nojoriiri noojiaqueya Pueyaso pueya cushi-
 tiojija, nojori tiuyaquiniuria pa Jiyaniijia sequesanoocua. ¹⁹ Naajaa, Pueya-
 sojuanaacuajaari pa niishitiquiaari na rupaari seetanujuanaa. Majaari na
 naata jatanishaanu. Naa naajiotasano quiyacuajaari:
 “Pa Jiyaniijaari na saquirojosano pueya niishiyacuaaja”.
 Naa naajiotasanoori quiyajuhua:

“Canapujete pa Jiyaniijia Jesucrstoocua tiuuiacani, nojori cuaara sesa na miijionu tarinitiaara”.

²⁰ Sanajanaa, cua tojiri. Jiyanoehua queraatia casamiriaca pueyano tiajina, cuno tiajiniaari maja saaja orojiniji shipinijosano coshiquia quiniu, miacojuanaanio, platajiniji casaanio. Puetunu tamaatia casaajiniji shipinijosano casamijianaari quijia. Quijijaariuhua mati, suruhuatu numajiniji quejasano. Quijijaariuhua maraujiniji panishano patacocua, conaanio. Puetunu cuno casamijinijiojuanaanio, nooijaqueyari racatasano saaja masu miaquetejarano quiya, na raatojotajaranonio. Quiyajaariuhua rucucuaacuaji casaa, rucucua cajitiaja. ²¹ Paari naajuhua. Paa jaara tama pa cuaqueyajaaja cojuariquia tojetaarucujanaa sesa pa miiniuucujini, saaja pa Jiyaniijia pa quiniuriajuhuaj, naacuajitij, pa naata juhua pa Jiyaniijia timifiasano tohuatashiniyojuua quiniu. Naacuajitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

²² Sanajanaa, quiaacuajaari niishiya, casaa miiniuucua jiaatiajacate mashiquiorini. Puetunu cuno sesa niishiriojosanojuanaa quia tariniriqia. Saniniuujia, saaja maninia miijia quia quiriqia. Saaja Pueyaso rupaacua tiuujia quia quiriqia, pueya panijiajuhuaj. Jiyanoojia quia quiriqiajuhuaj. Naa quia quiriqia, taa puetunu Pueyaso jiyatesano sesa miyashijia pueyajanaa miiquiaacuanaa, pa Jiyaniijiaacua nojori tiunuucua. ²³ Pueya jaara nacojoriqia nojori niishiyaquishoo casaajiniji najuhuanaj, nojori quia ruuretare saaja, nojori jaara quia nequesoretare cuno casaajiniji. Quiaacuajaari niishiya, pueyari jiyano casaacua para-caatiojua. ²⁴ Pueyasora poonijiojua pueyano cuaara quiaquiria pueya paracaajia. Saniya cuaara quiri cutara puetunu pueya panijiajanaa. Cuaara quiriujuhua maninia niishitiojua. Cuaara juhuajaniya rejeretaja quiriia, tamasaca jaara na taajetere. ²⁵ Cuaara Pueyaso rupaa tojiyashijia nacasuura jacaria, nojori na paniniutia, maja nojori na juaaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaajanaa niishijiaacua nojori quiniuria. ²⁶ Naacuajitij, nojori maninia niishiriojuuaca quiniutianiya, nojori jaaretenura Sesaacuaji, maja Sesaca miitiniuria nojori taa na paniyacujani.

3

Taa quijiaacua mijiria quiniaa quiniutianiya quera jiya puequesacari

¹ Quia niishirijuhua Timoteonaa, jiya puequenu panishacari, pueyari socua jiyacatenutaniya sesa miijiacara. ² Pueyari saa tama nerajaaja niishiriojuuaca quiniutianiya. Majaari tamonura na niishiriojonu quiniutianiya. Pueyari queraatia cumaneeca jitianuucua jiaatiajacua quiniutianiyajuhua. Naajuhua, pueyari najuhuaana narta pueya niqiaara pocuajaca quiniutianiya, na jyanishacari nojori cutara socua niishijiaacua narta pueyajiniji, socua shanohua niquishano tamasacajinijinio. Pueyari Pueyaso sesacajaca quiniutianiya, narta pueya sesacajajuhua. Pueyari na quera tojiyashijiaacua quiniutianiya. Majaari quenaaja pueya timitianu quiniutianiya maninia na miijiaacua. Pueyari maninia miyashijiaacua quiniutianiya, Pueyasojiniji maninia casaa rerequetejaca nojori quiniuucua. ³ Naajuhua, majaari quenaaja na quera panijiaacua pueya quiniu quiniutianiya, tapeyocuaca, tama necohuajaajanio. Pueyari tojetaarucujanaa jyanoyashijiaacua quiniutianiya. Sacuaraatia rimiaacatujuri quiniutianiyajaariuhua. Naajuhua, majaari quenaaja tama nojori cuaqueya panishanojuuaja re-jetejaca pueya quiniu quiniutianiya. Pueyari naquiya narta pueya miijiaacua quiniutianiya, nojoriicua na taraajeyaquiniutia. Pueyari puetunu maninia miijiacajanaa soojeaca quiniutianiyajuhua. ⁴ Pueyari tama na

cojiniaajaaja tacartajaca quiniutianiya. Pueyari cocuaatia casaa miijia quiniutianiya, mosanucua nojori quiniucua. Pueyari juhuajaniya quijiaa quiniutianiya, tama nojori cuaqueyajaaja shuquiritiajaca nojori quishacari. Shuquiriaatia pueya miishacari tama na panishanojuaaja pueyaracaanu, majaari jeya nojori quiniu quiniutianiya nojori shuquiritianura Pueyaso. ⁵ Pueyari sapuenu juhua Pueyaso pueya niquishaanutaniya. Naajaa, nojori miishanojiniji, maatia niishishaanutaniyari, nojori-iri Pueyaso cumaaca maseyaquiquaari seetanujuanaa jatanishano pueya nojori quiniuria. Cunora cua tojiri Timoteonaa. Majaari jiyano pueya quia rupenutej.

⁶ Tamasaca cuno pueyajinijinioni, nojoriiri tiaco tiuquitiajaca, noo maajipohua na sapojonura, najuhuana pueya pohuatasanoocua ritia tiuujiacatej. Cuno maajipohuari tama na cuaqueya miiniu panishanojuaaja re-jeteyashijiaa. Naa sesa miijiaa nojori quiniucuatej, nojoriiri najuhuana tacaquiquiaa. Cunora, nojoriiri cuno sapojonuujuaca tojitiaquiaa. ⁷ Cuno maajipohuari najuhuana pueyaracaanu tojitiaquiaa cuno sapojonuujuaca niishitiojosano. Saniniuujia, majaari Jesucristojiniji seetanu rupaaajanaa niishijiaara nojori quiniu quiquiaa, Pueyaso jiyanooniuria nojori. ⁸ Cuno sapuenu juhua Pueyaso rupaa niishitiojonaari seetanu rupaaajanaa ruretaquiaa, taa nio shimiacuri, Janes, Jambres ruuretaquiaari supuetana Moisésuaani. Naacuajitij, nojori niishitiajaari juhua ninishiqui, sesa nojori miishano timitiajaca nojori quiniucua. Seetanu rupaaajanaa nojori tojiaquiniucua, pueya cuaara tojiaquiria nojori saniniuujia. Nojoricuaajari Jesucristoocua tiuyashijiaa. ⁹ Naajaa, majaari queraatia pueya tiuniu quiniutianiya nojoriicua. Ritia niishishaanutaniyacuajaari, nojori-iri seetanujuanaa niishiyashijiaa, taa pa supuetanaa niishiquiaaricuaani cuno shimiacuriiri sapojonuujuaca.

Pablo tucuatasaari naajionu, socua rootaa Timoteori

¹⁰ Timoteonaa, quiaacuajaari pueyaracaanu cua cojiqiaari maninia quia niishiniuria puetunu cua niishitiojosanojuanaa. Quiaacuajaari niishiya taa miijia cua quiquiaarini, pa Jiyaniijia cua shuquiritiniuria. Quiaari niishiyajuhuaaj taa seetanujuanaa pa Jiyaniijiaacua tiuujiacua quiquiaarini, jacaria pocuajajuhuaaj, pueya panijiano. Quiaari niishiyajuhuaaj, majaari coojia cua najiqutiniu quijiani, pueya miishacari naquiya janiya. ¹¹ Quiaari niishiyajuhuaaj taa cua miitiasaaquiquaari Antioquiya tiacajiniani, Iconio tiacajinijuhuaaj, Lистра tiacajiniano. Seetanujuanaa, janiyari naquiya miishaaquiaarini. Naajaa, pa Jiyaniijiaari cucua taraajequiquaari maninia na rishitiniuria janiya. ¹² Seetanujuanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca saaja Jesucristo tojjiaa nojori quiniuriatej. ¹³ Saniniuujia, sesa miijiaa pueya, sapojonuujuacano, nojoriiri socua sesa miiniuria jiyacatenutaniya. Nojori sapojonuuusacari tamasa, nojoriiri naa tama na cuaqueyajaaja sapojonutaniyajaacujua.

¹⁴ Quiajaniya saniniuujia Timoteonaa, majaari quia cartenu puetunu maninia niishitiojosanojuanaa, taa quia niishitiojosaaquiaaricuaajani. Quiaacuajaari niishiya, cuno niishitiojosanoori seetanu rupaaajanaa. Quiaari niishiyajaacuhuaaj canapute quia niishitiojoquiaarini. ¹⁵ Quiaacuajaari quia naatujuajiniji tariucuaaanu Pueyaso Rupaa niishijia. Cunoori quia nishitiquiaari Jesucristoocua quia tiuniuria, Pueyaso jiyanooshano pueyano quia quiniuria. ¹⁶ Puetunu Pueyaso Rupaajanaacuajaari Pueyaso naajiotanishano na pueya. Cunora, puetunu cuno rupaaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyajuhuaaj pa miishanoori

sesa, na nacasunura pajaniya maninia miijiaca pa quiniuhua. Pa rootaajaariuhuj tojetaarucujanaa maninia miijiaca pa quiniuria. ¹⁷ Naacujitij, Pueyaso Rupaari Pueyasora poonijionaa pueya jeenucuaja tojetaarucujanaa, puetunu maninia casaa miijiacajanaa nojori quiniuria.

4

¹ Quiaacuajaari niishiya, Jesucristo tiuquishacariuhua mijiria, Jiyaniijiajanaa na quiniuria, nojuajaari puetunu na tojtiajacajanaa nequesoreenutaniya mijiria pa miishanojiniji, saminiucua, macunucuanio. Cunora, janiyari na niquiara, pa Que Pueyaso niquiara quia sequeya seetanujuaanaani. Cua tojiri. ² Majaari pueya niquiara Pueyaso rupaa pohuatano quia tarinitiano. Pueyaracaanu quia pohuatariquia, naajaa, quia jyanishacari jiyacari naasucuaari maja maninia quia pohuatanura. Pueyaso rupaata quia niishitiri sesa miijiaca nojori miishanoori sesa Pueyasora. Pueyaso rupaa tojyashijiaca quia nacasuriquia. Pueya quia shiniujiuriquia Pueyaso rupaacua nojori tiuuniuria seetanujuaana. Puetunu cunojuanaa quia miriquia jacaria quia pocuanuta, maja juaaniutia. ³ Naa quia poojotariquia pueya niquiara, nojori tojiniu panishacarijia Pueyaso rupaa. Na nuhuaji, pueyari seetanu rupaajiniji niishitiojosano tojiniu paniaquiniutianiya. Saaja na ruuretanutanijaariuhuj. Naa Pueyaso rupaa nojori tojiniu paniaquishacaritij, nojoriiri queraatia tamaatia niishitiojonuujuaca reretotenutaniya, cuno pojori shuquiritiniuria nojori najuhua pohuatasano. ⁴ Nojoriiri seetanu Pueyaso rupaajanaa tarinitianutaniya, najuhua sapojonuuosano tojtiajaca nojori quiniuria saniniuujia. ⁵ Quiajaniya saniniuujia, maninia niishiriojua quia quiriquia, maja quia sapojosaanurajuhuj. Naquiya miiniu rejeretaja quia quiriquia. Pueyaso rupaa Jesucristojiniji pohuatanucua cojeja quia quiriquia, pueya tiuuniuria Jesucristoocua. Puetunu quia poonijosanojuanaa Pueyasora quia tucutare maninia, taa pa Jiyaniijia sequequiaari quiajanuyacuajani.

⁶ Janiya saniniuujia, janiyari quera quianutaniya jiyocuaaanu cua quiniuria pa Jiyaniijiatani. Cua nanaca jaara shootesaare, janiyara, cunoori juhua Pueyasora cua niquitosano quiniutianiya. ⁷ Majaari cua taajenu qijia, pueyaracaanu cua poonijosacari cua Jiyaniijara. Janiyari tari tucatacanu miiniu puetunu na sequesanojuanaani. Pueyaracaanu cua poojotasacari Pueyaso rupaa, majaari cua jataniniu quiquiaari quenaaja. ⁸ Naacujitij, shanohua tuhuajaari quiriano jiyocuaaanu racatasano quiya tari, maninia miijia quia quiniucua. Cua Jiyaniijiaari cuno tuhuaja quia niquitionutaniya na samiitianishacariuhua janiya. Pa Jiyaniijiaari jyanohua maninia. Na jiyanooshano pueya pa quiniucua, majaari socua na saneenu quiniutianiya sesa pa miishano. Majaari saaja janiya na niquitionu quiniutianiya cuno tuhuaja. Puetunu noo pojorijianaa niquitionutaniyaariuhuj, canapuate nojuaja na paniniutia sashiyajaani, cuara tiuquihuara shacantuuca na cumaacatajaitia.

Pablo sequesano Timoteo miishocoriquiano

⁹ Majaari puera tarishiniu. Quia secoore, cucua quia tiuquiniuria ritia. ¹⁰ Demasri cua tiujiaarucuaani. Tesalónica tiacajinia quiaarucuaari. Nojuacuajaari tama na panishanojuaja miiniu panijara jatarohuacuaa. Crecenteeri saniniuujia Galacia jiyajinia quiaarucuaa. Titoori Dalmacia jiyajinia quiaarucuaajaacuhuj. ¹¹ Saaja Lucasri niya cuata quiya. Quiaa jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijiaari quia poonijosacari. ¹² Janiyari saniniuujia Tíquico jiyarorucuaa Éfeso tiacajiniani. ¹³ Taa quia sequeya

quiajaniyacuaiani, quiaa jaara cumaji niyare, quiocua cua tucuaque toque paare quiria, Carpo tiajinia cua tiujiasano, Troas tiacajinia. Quiocua quiria patootaare cua nequesoreetuneecajuhua. Janiyari socua noo panya quia patootanurani, shoqueecua naajionuutasano Pueyaso Rupaatej.

¹⁴ Noo Alejandro, cumueeca casaajiniji shipinijiojua casamitij, nojuajaari jiyanojua cua paracaajara quiquianu. Naajaa, pa Jiyaniijiacuaajaari sanini-uujia cucua na naminiutianiyacujua, naa na miiniucua janiyatej. ¹⁵ Tama quia cuaqueyajaaja quia cojuare maja na miiniuria sesa quiajaniyajuhua. Nojuajaari pa pohuatasano cuaracashitiya saaja, Pueyaso rupaa ruuretaja na quiniucua.

¹⁶ Janiya jaara shushajanaa nujuatesaacanu jiyaniijianucua tacobitij, nojori nequesoreenura janiya, majaari quenaaja tamonu Pueyaso pueyajini-jinio quiniu quiriquiaa tii, cucuaji na tacunura quenaaja. Puetunu cua cojiniaajanaari cua cartecanu tamajaaja. Naa nojori tarinitianuucua tama-jaaja janiyatej, Pueyaso cuara jiyanooria nojori. ¹⁷ Naajaa, pa Jiyaniijaari cua cojiqianuni. Cua cumaquiquianujaariuhua, nojuajiniji cua pohuata-nura puetunu cuniqui quiniaa Pueyaso niishiyashijiaca pueyajanaa. Pa Jiyaniijaari cocuaatia cua miiniujiniji juhua nojori juaashiquiajiniji cua jaaquianu, maja nojori monura janiya. ¹⁸ Janiyari nocua tiyani, nojuajaari cua mashiquiniutianiya puetunu sesa casaacuajijianaa. Cua cojuanutaniya-jaariuhua, pueyaracaanu rishijia cua quiniuria na shuriucua jiyocuacaanu, Jiyaniijajanaa na quishacari. ¡Jiyanojua maniniaari pa Jiyaniija! ¡Nojuaja cuara shuquiritiasaaria pueyaracaanu! Cuara naa quiiriatej.

Pablo sequesano na naajione na tucuatascari

¹⁹ Quiria quia sarhuatate Prisca, neyaca Aquilano, puetunu Onesiforo pueyajanaajuhua, na tiajinia quiniaani. ²⁰ Erastoori Corinto tiacajinia jateecanu. Janiyari saniniuujia Trófimo tiujiacanu Mileto tiacajiniani, cusosu na quiniucua. ²¹ Cucua quia niniuria quia secoore, shuniya coteyaquishacarijia quia tuquiniuria cucua. Niyá cuata quiniaa parta Pueyaso pueyari cua sequereeni, nojoriria cua sarhuatanura quiajaniya. Nojoriiri Eubulo, Pudente, Lino, Claudiano, puetunu parta Pueyaso pueya maanujanaano.

²² Pa Jiyaniija cuara quioojajinia quijia quiiria pueyaracaanu. Pueyaso cuara cumaquiiria puetunu niajanijajanaa.

PABLO NAAJIONEE TITOOCUARA

Pablo naajiosacari Titooacara

¹ Janiyari Pablno, Pueyaso seru. Jesucristoori cua jiyaroquiaari na Que Pueyaso saquirojosano pueya cua tiutiniuria Jesuucua, Pueyaso pueya nojori quiniuria. Cua jiyaroquiaarijiaariuhua Jesuucua tiuuniaa cua niishitiniuria seetanu rupaajanaa Pueyasojiniji, nojori jatanishaanura maninia quijiacara. ² Nojori tojishacari cuno rupaa, nojoriiri niishiquiaa nojori cutaraari samiitianishaanutaniuuhua Pueyaso muerasu nojori quiniuucua, pueyaracaanu quijiacua nojori quiniuria Pueyasota. Cunocuajaari tariucuaaanu Pueyaso sequesano, jiyanoehua tarijiatej, jiya shipinishaacarijiyojua. Nojuajaari maja na naata sapojonu. ³ Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucuaaanucujani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiutiniuria nocua. ⁴ Quiarijiani, quioacara naajiyanihia Titonaa, juhua cua niyanuniyojua quia quishacari. Quiaari Pueyaso pueyanora quiquiaari quia tiuushacari Cristojiniji cua pohuatasanoocua, taa cua tiuquiaaricuaani. Naacuajitij, paari mariyata nocua tiuujiacani. Pa Que Pueyaso, pocuaji Tacuna Jesucristonio, nojori cuaara cumaquiria quiajaniya. Nojori cuaara jiiitaara quioojia maninia, shuquiriaatia quia quiniuria pueyaracaanu.

Titora Pablo sequesano, Creta jiya tucuaatiajajinia na miishocoriquiano

⁵ Janiyari quia tiujiaquiaari Creta jiya tucuaatiajajiniani, quia tucuatanaa cua poonijosano cureeno. Naaratej, quia sequecanunijia quia jiyatenura jiyaniijianucua, Pueyaso muerasu maapue jiiitanaa quiniuria puetunu cuno jiya tiacajiniajanaa, taa cua sequequiaari quiajaniyacujani. ⁶ Pueyaso pueya jiiitariquiano cuaara quiria maninia pueyano, sesa miyashijia, maja pueya pocuanura sesa nojuajiniji. Cuaara jiiitaara niquiriyatujua niquiocua. Necohua cuaara quiria Pueyaso muerasujuhua, maja sesa miijiacua, maja tojiyashijiacajuhua. ⁷ Cante Pueyaso muerasu jiiitanani, nojuajaari Pueyasora poonijiojua. Naaratej, nojuaja cuaara quiria maninia quijia, sesacasoo, maja tojiyashijia. Cuaara quiaquiiiria ritia juaajia, mashaasequejojua, piyojotaja. Cuaara quiaquiiiria cumaneeca panijia sesa na miishanota na masenura. ⁸ Naajuhua, Pueyaso pueya jiiitanaa cuaara quiria rucoonaacua taraajeja. Cuaara quiria maninia miijia, maninia niishiriojojua. Cuaara quiriirajuhua seetanujanaa Pueyaso rootasano tojjia, maja rimiajata maninia miijia. Cuaara quiriirajuhua Pueyaso panijia cutara, tama na cuaqueyajaaja jiiitaja maninia, maja sacuaaatia casaa porocua. ⁹ Cuaara quiria Pueyaso rupaa tojjia cutara, taa na niishitiojosaaquiaricujani. Naacuajitij, nojuaja na naata pueya cumaquiniu, maninia na niishitiojosanota Pueyaso Rupaajiniji. Naacuajijihua, nojuaja na naata pueya tacatonuhua Pueyasooocua sesa nojori niishihanoniniji, noo pojori canapuate Pueyaso Rupaa ruuretajaca quiaacuajani.

¹⁰ Naa quia sequereenijia, queraatia tojiyashijia pueya quiniuucua, canapuate juhua niishiyashijia niishitiojoquiaa najuhuaa niishitiojosanocujani. Nojoriiri Pueyaso muerasu sapojija. Queraatia cuno pojoriiri cuarta Judioacua. Nojoriiri pueya niishitiojia pueya cararaatiuquua co miatesaanura, taa Moisés niishitiojoquiaari tarijiacuajani, seetanujanaa Pueyaso muerasu nojori quiniuria juucua. ¹¹ Nojoriiri queraatia niquiohwaraca pueya jiyajeneteya sesa na

niishitiojosanota, puetunu tapueyocucatajanaa nojori juayonuujutanura. Cuno niishitiojonaa cuaara sanaajasaaria. Nojoriiri niishitiojoquiaa saaja cumaneeca nojori masenura sesa na niishitiojonuunujiniji.

¹² Creta jiya tucuaatiaja pueyajinijinio tamonu shimiacuuri tama na pueyajinijiaaja naa sequequiaariti: “Creta pueyari pueyaracaanu saaja sapojonuujuaa. Nojoriiri jiyanoehua juaajiaca juhua sayoru. Nojoriiri puera miaquenuujuaa. Nojoriiri taajecorijihuhaj”. ¹³ Seetanujuanaari cuno shimiacu sequesano. Nocuaji, jiyanoehua quia nacasure nojori, nojori cuaara Pueyaso tojjiaaca quiiria, maninia quiijaaca nojori quiniuria.

¹⁴ Quia rootare nojori maja na tojtianura Judiocuaca nareja najuhuaana pohuatasano, naajuhuj, maja nojori tojiniuria pueya rootasano, canapueete Pueyaso seetanu rupaaajanaa tojiyashijiaaca quiyacuajani.

¹⁵ Pueyano jaara maninia jiuujiaraca quiri, puetunu casaajanaari maninia quiya nera. Saniniuujia, pueyano jaara sesa jiuujiaraca quiri Pueyaso rupaacua tiuyashijia na quiniuucua, majaari quenaaja niquiriyatu casaa maninia quiniu nera. Na niishitiajaari juhua curuutuua, noojiano.

¹⁶ Nojoriiri tama na cuaqueyajaaja sequeya: “Pueyaso niishianijia”. Naa nojori sequesacariti, najuhuaana sequeyari. Nojori miishanojiniji, paari niishiyani nojori maja seetanujuanaa Pueyaso muerasu. Nojoriiri jiyanoehua soosano pueya, puera sesa na quiniuucua. Nojoriiri jiyanoehua sesa, tojiyashijiaacajuhuj. Majaari na naata quenaaja maninia miiniu.

2

Maninia niishitiojosano cutara

¹ Nocuaji, pueya quia niishitiojore maninia nojori quiniuria taa pa niishitiojosaaquiaaricujani. ² Naaratej, socua saaquiapue quia niishitiojore nojori cuaara quiaquiiira miaquejoru, mashaasequejorunio. Nojori cuaara quiiria tojishano pueya cutara, maja rerequetesano. Nojori cuaara quiiria maninia niishiriojojuaca. Cuaara quiiria maninia quiijaacajuhuj, na tojishacari puetunu Pueyaso niishitiojosanojuanaa, na panishacari pueyano. Nojori cuaara quiirijuhua maninia rejeretajaca taraatia na miishacari, juhujaniya nojori sashishacari pa jiyaniija. ³ Naajuhuj, socua motaja maajipohua quia niishitiojore nojori quiniuria maninia Pueyaso niquiara pueyaracaanu, maja rimiaacaturu, maja mashaasequenuujuaa. Nojori cuaara pueyaracaanu miiria maninia tamasaca niquiara, tamasaca miiniuria juhua nojori miishanojuhaj. ⁴ Nojori cuaara niishitiojoora niyacaraca maajipohua, maninia na paniniuria neyaca, necojuanio. ⁵ Cuno jiyaniyacuaca cuaara niishitiojoora narta maajipohua, maninia niishiriojojuaca nojori quiniuria, saaja neyaca panijiaaca nojori quiniuria, maja tamonu caya panijiacara. Nojori cuaara niishitiojosariajuhuj, maninia poonijiojuaca na tiania nojori quiniuria, caporatujuri nojori quiniuria, neyaca tojtiajacanio. Nojori cuaara naa miiria, Pueyaso Rupaa mariqui rerequetesaareeri.

⁶ Naajuhuj, mashiquiori quia niishitiojore maninia niishiriojojuaca nojori quiniuria. ⁷ Puetunu quia miishanojuanaa cuaara quiiria maninia nojori niquiara, nojori jiaatianura quiocua, juhua quiajaniya nojori quiniuriajuhuj. Quia niishitiojosacari nojori, tama quia cuaqueyajaaja quia cojuare, tama quia niishitiojosanojuaja tojjia quia quiniuria. Majaari puenujua quia quiniu quia niishitiojosacari. ⁸ Maninia quia niishitiojore Pueyaso Rupaa, taa quia niishitiojosaaquiaaricujani. Naacujitij, tamasacaari maja na naata ruuretanu quiniutianiya quia niishitiojosano pueya niquiara. Naa maninia quia niishitiojosacariti, quia niishitiojosano rerequetajacari

caririqiniutianiya. Naacuaajitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanutaniya.

⁹ Poonitijosano pueya quia rootare, puetunu na camarucua sequesano-juanaa nojori tojiniuria, na camarucua shuqiritianura nojori. Cuaara quiri na camarucua panijaca, maja rihuanejaca. ¹⁰ Cuaara nohuaseyaquiria na camarucua casami. Cuaara quiiria seetanujuanaa maninia mijijaca, pueya niishiniuria pa Jiyanoojia Pueyaso rootasanoori jiyanohua maninia cutara. Poonitijosano pueya jaara maninia quiriqia, Pueyaso Rupaari juhua maniniushitishano quia tamasa niquiara.

¹¹ Paacuaajaari niishiyani Pueyasoori jiyanohua jiyanoojia seetanujuaana, Jesu cusuucua puetunu pueyacuarajanaa, sesa pa miishanojiniji pa jiyanooshaanura. ¹² Pueyaso jiyanooshacari pajaniya, cunoori pa niishitiojiya pa cartenura puetunu sesa pa miishanojuanaa, maja mijiria casaacua pa jiaatianura sacuaratiajuhuaj. Naajuhuaaj, Pueyaso jiyanooniucua pajaniya, cunoori pa shiniujiya maninia niishiriojuaca pa quiniuria mijiria pa quishacarijia, maninia mijiacajuhuaaj, Pueyaso tojjianio pa paniniutia nojuaja. ¹³ Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuquiaajuhuaaj. Nojuacuaajaari pa sequequiaari pa Pueyaso Cristoori pocua muetanutanihua, shacantuuca na cumaacajinia. Naacuaajitij, paari shuquiriaatia sashiya pa Jiyanoni. ¹⁴ Nojuajaari tama na cuaqueyajaaja panitiaquiaari pocuara, sesa pa jiiitishano casaacua na tarinitiniuria pajaniya. Pocuara cusoquiaariiri poojia seque jeequesano quiniuria puetunu sesa pa quiniujinijijianaa. Naa miiquiaariiri saaja tama na pueyarajaaja pa quiniuria, jiyanohua maninia miiniucua jiaatiajaca pa quiniuriajuhuaj.

¹⁵ Naa quia niishitiojore pueya Titonaa. Pueyaso pueya quia niishitiojore, quia shiniujiuri, quia nacasure. Naa quia cumaquiniuria nojoritij, quia cumaaca quia paaretare juhua cutara jiyaniijia, tojishano pueyano quia quiniuria. Saaja maninia quia miiriqia pueyaracaanu, tamonu mariqui quia rerequetereri.

3

Maninia rootasano Pueyaso pueyara

¹ Quia pueya quia niishitiojorohua jiya jiyaniijia tojjijaca nojori quiniuria, jiyaniijianucua na jiyatesano pueya nojori tojiniuriajuhuaj. Nojori cuaara cuno pojori naacutaara jaara sequesaaere maninia casa nojori miiniuria.

² Pueya quia niishitiojore nojori cuaara pueya sesacaashijiacua quiriiajuhuaj. Nojori cuaara quiriia juhuajaniya quijiacua, maja juaajiacua. Cuaara quiriia jiyanoojiacua. Cuaara maninia niquiria puetunu pueyajanaa, juhua socua maninia pueya nojorijiniji, maja rimiajata na miiniuria tamasa.

³ Tarijia, paari mariyata mosanucua quiquiaarini, Pueyaso tojjishijianio. Paari juhua tashucuanu quiquiaarini, sapojosano pa quishacari. Paari sesa miiniucua jiiitiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniucua jiaatiajaca quiquiaarini sesa pa niishishanota. Paari sesa mijijaca quiquiaarini. Paari tamasa jiiitiasanoocua jiaatiajaca quiquiaarini, juhua nojori pa quiniuriajuhuaj. Paari pueya soosano quijiacua quiquiaarini. Paari niquitiojuaca quiaquiquiaarini. ⁴ Naajaa, pa Jiyanoojia Pueyaso cutaraari maninia miiquiaari pajaniya. Naacuaajitij, paari niishitishaaquiarini taa Pueyaso paniya puetunu pueyajanaani, na jiyaronucua Neyanuniyojua pocuara na cusonura. ⁵ Na muerasura pa jiyatequiaariiri saaja pocua na taraajesacari, maninia miyashijia pa quishacarijia. Sesa miyashijiacara na Sohuanuta

pa jataniquiaariiri, na Sohuanu jeequesacari poojia, maninia jiuujiaraca pa quiniuria. Pueyaso Sohuanuuri pa jataniquiaa juhua quiarinio pueya pa quiniuria. ⁶ Pocuaji Tacuna Jesucristo miiniuucua maninia, Pueyasoori jitanohua queraatia na Sohuanu niquitioquiaari pajaniya. Juhua pocua totasaareeri na Sohuanu. Maja shiitianiyojua quenaaja. ⁷ Naacujitij, pa jiyatereeri maninia quijiaca pa quiniuria na jiyanooshacari pajaniya. Naa pa jiyatequiaariiri na muerasu pa quiniuria, pa masenura puetunu na jitiiasanojuanaa puera, jiyocuacaanu na racatasano. Naaratej, paari juhuajaniya sashiquiaani, pa niishishacari paari pueyaracaanu quijiaca quiniutianiya natani.

⁸ Nio cua sequesanoori seetanu rupaajanaa. Nio rupaata quia nacasure Pueyaso tojtiajaca puetunu quioojatajananaa, nojori cuaara niishiriojora, maninia nojori miiniuria pueyaracaanu. Nio rootasanoori jitanohua maninia. Maninia cutaraari puetunu pueya cumaquitiajarajanaa. ⁹ Maja cutaraari quia rupuenu cuno pueya, noo pojori canapuate najuhuaanacojoquiaani, naajuhuj, noo pojori canapuate pueyaracaanu na supuetanaa sesaca serojoquiaa najuhuanani, juhua pueya shocotajaca nojori quiniuria. Naajuhuj, maja quia rupuenu noo pojori canapuate juaatooquiaani, canapuate tariucuacaanu Moisés Rootasanoocua juayonuutaquiaacuajani. Puetunu cuno nojori niishishanojuanaari najuhuanaj. Majaari na naacunu nojori.

¹⁰ Quia piriyojore cuno, cante Pueyaso muerasu maanu raquirijitiaani, capa na niishitiojanota najuhuanaj. Nojuaja jaara quia tojiyaquiri co-teenu quia sequesacari nojuaja, quiocua socua na camiriohua piriyojonu. Jaara tojiyaquiri quiajaniya jiyacaritij, nojuaja cuaara quiiriaqui juhua taanusano. ¹¹ Naa na tojiyaquishacari quiajaniyatej, quiocua niishiri cuno pueyano tari seseree. Tama sesa na miishanojuaarjia juhua nocuara saquiriojotaa.

Pablo sequesano Titora

¹² Janiya jaara Artemas jiyarore quiocuani, jitanohua quia saniniujiuri cucua quia niniuria Nicópolis tiacajinia. Janiyari quiniqui shuniya tajitiniu paniani. Janiya jaara Artemas jiyaroyaquiri quiocuani, janiyari Tíquico jiyaronutaniya quiocuani. ¹³ Zenas, Apoloori quiocua tiuquiniutianiya. Nojori quia naacutare quia jitiisanota, nojori jitianura puetunu na panishanojuanaa nojori quianu panishacari quia quijajiniji. Zenasri pueyacuaji tacuna pueya nequesoreenaa.

¹⁴ Parta Pueyaso muerasu cuaara niishiiria maninia miijiaca nojori quiniuriajuhuaj, maja najuhuaanaj quijiaca na quiniuria. Maninia cutaraari nojori naacutanura na panishano jitiiaashijiaca.

Naajionee puequesacari saruhuatansano

¹⁵ Puetunu cuata quiniaajanaari cua sequeya cua saruhuatannura quiajaniya. Canaara quia saruhuatannura parta Pueyaso muerasujuhuj, canapuate canaa panijiacacuajani. Pueyaso cuaara cumaquiiria puetunu niajaniyanaa. Cuaara na quiiriatej. Tariucuaja Titonaa.

PABLO NAAJIONEE FILEMÓN CUARA

Pablo saruhuatascari Filemón

¹ ¿Quiaate quiyajaa canaa panishano Filemónnaa? Janiyari Pablóni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajiya quiarani, jaarajaaja pa Jiyaniijiaara poonijiona quia quiniuucua. ² Canaara quia saruhuatatare pa rimiatucua Apia, Arquiponio, jaarajaaja pa Jiyaniijiajiniji pohuatananani. Canaara quia saruhuatatarehua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. ³ Pa Que Pueyaso, pa Jiyaniijia Jesucristonio, nojori cuara cumaguiiria niajaninya, jiyanoojiaca nojori quiniuucua. Nojori cuara cajitiiria nioojiajuhuaj, juhuajaniya nia quiniuria.

Filemón paniniujiniji pohuatasano, Pueyasooocua na tiuuniujinijino

⁴ Pueyaso cua secojosacari, janiyari quia seera pueyaracaanu Pueyaso sequequiaani, “paacarasho”. ⁵ Janiyari naa sequequiaa Pueyasoni, quia-janiyajiniji cua tojinuuucua taa quia paniquiaa pa Jiyaniijia Jesuni, puetunu na pueyajanaano. Quiaanaari seetanujuanaa pa Jiyaniijiaacua tiuuja. Janiyari cunora quia timitiaani. ⁶ Janiyari quiocuara secojoquiaani, seetanujuanaa quiarta Pueyaso pueya jiyanoojia quia quiniuria, nojoriicua quia taraajenura. Naacuajitij, nojori quia cumaguishacari, quiaari maatia niishiniutianiya puetunu quioojiajinia quia jiiitiasanojuanaa Jesucristojiniji, Jesucristooocua tiuuja quia quiniuucua. ⁷ Parta Pueyaso pueya panijia quia quiniuucua, quiaanaari nojori cumanijiacanu, nojoriicua quia taraajesacari. Naa cua niishishacari quia miishanojinijitij, janiyari coojia cumani-jacanujuhuaj. Cunora, shuquiriaatia quiyaniija.

Pablo sequesacari Filemón, nojuaja jiyanooniuhuara tama na seru Onésimojuaja

⁸ Jesucristo jiyaramiquishano pueyano cua quiniuucua, cua naata sequenu quiajaninya quia miiniuria cua sequesano. ⁹ Naajaa, majaari cua sequenu panini quiajaninya juhua quia jiyaniijia. Saniniuuja, panijia quia quiniuucua, janiyari quia sequenu paniyani quia miiniuria nio cua sequesano quiarijia. Jesucristojiniji cua pohuatanuucua, janiyari quiarijia moronucua quiyani tariucua saaquiano. Naajaa, quia rupuenta Pablo cua quiniuucua, cua tojiri Filemónnaa. ¹⁰ Cucua quia taraajere quenaaja. Quia nececojianijia cua niyanuniyojua Onésimoocua. Nojuajaari seetanujuanaa juhua quianura quiuriucuaa Jesucristooocua na tiuuniuucua, na tojishacari cua pohuatasano Jesucristojiniji, moronucua cua quishacari.

¹¹ Tariija, Onésimoori sesa seru quiquiaari quia. Quiarijia saniniuuja, nojuajaari na naata maninia quini quia, taa quia na quiyacuaani. ¹² Janiyari quiarijia quiocua jiyaroya quianuni. Quiocua na maserohua quia timiniutia, taa quia masequiaa janiyacuaani. ¹³ Moronucua cua quishacari Jesucristo rupaa cua pohuatanuucua, janiyari niyaja na jiyojetenu paniriquiaa juucuani, na naacunura janiya quia niti. ¹⁴ Naajaa, majaari naa cua miini panini quiriquiaa jiyasohuaja, coteenu cua nequesotaaquishacari quiajaninya. Janiya jaara quia sequereni janiya niya na jiiitanutianiya na naacunura janiyani, quiaa maara cua ruuretaaquiri. Naajaa, janiyari seetanujuanaa saaja quia panishano miini paniyani. Cunora,

janiyari na jiyaroya quiocuani. ¹⁵ Onésimo jiyoteeri quiocuaji rupatecanu rupaquiriaja, quiaríjia quiara na quiniuhua pueyaracaanu cutara. ¹⁶ Quiaríjiani, nojuaja naasucuaari socua quia panishano pueyano quiniutianiya serujiniji, seetanujuanaa quia tarajanu na quiniuucua quiaríjiani, Jesuucua tiuujia na quishacarijuhuaj. Nojuajaari jiyano hua cua panishano parta Pueyaso pueyano. Naajaa, quíaa cuaara jiyano hua na paníjia quiiria socua janiyajiniji, maja juhua nareja quia panishano seru. Seetanujuanaa nojuaja quia paniri cutara, quiarta Pueyaso pueyano na quiniuucua.

¹⁷ Naacujitij, janiya jaara seetanujuanaa quiarta Pueyaso pueyano quiiri quiarani, Onésimo tiuquishacari quiocua, nojuaja quia miiri maninia, taa quia miiquiaacuaa janiyani. ¹⁸ Onésimo jaara sesa miiquiaari quiajaniya, jaara quia casaa nohuasequiaaríjuhuaj, nojuaja quia jiyanoori. Saníni-uujia cucua quia tiuutiare puetunu sesa na miishanojuanaa quiajaniya. ¹⁹ Janiyacua saníni-uujia cua cumaneecajiniji quia níquitioreni puetunu sesa na miishanojiníjianaa quiajaniya. Janiyari Pablóni. Janiyari tama cua juaashiquiatajaaja nio naajiyani, cua sequesanoocua quia tiuuniuria. Janiyari quia niishitiniu panijajuhua, Jesucristojiniji cua pohuatasanoocua quia tiuushacari, quiaacuaajaari pueyaracaanu quiijara jatanishaaquiaari. Naacujitij, cua naata sequenu quiajaniya, cua serura quia quiniuríjuhuaj. Naajaa, janiyari saaja quia sequeyani Onésimoocua quia taraajenura. ²⁰ Naa quiiria quia miiri quenaaja, mariyata Jesuucua tiuujia pa quiniuucua, cua panishano Filemónnaa. Quíaa jaara Onésimo jiyanoori, Cristo paníjia quia quiniuucua, quiaari seetanujuanaa coojia cumánianutaniya.

²¹ Janiyari naa quiocua naajiyani, cua niishishacari quiaacuaajaari cua sequesano miiniutianiya. Janiyari niishiyajanihuaj, quiaari socua maninia na miiniutianiya cua sequesanojiniji. ²² Naajuhua, janiyari juhuacarijia quia sequeyani, cua maquejara quia jeenucuare cucuaji quia tiajinia. Naa pueyaracaanu cucua nia secojosacari Pueyaso níquiji cua cartesaanuratej, nojuajaruhua niaacua cua tiuquitiniutianiya, niaata cua quiniuria.

Pablo sequesano na naajio na tucuatascari

²³ Epafraasi cua sequeree cua saruhuanura niajaniya. Nojuajaari cuarta moronucujuhua, Jesucristojiniji canaa pohuatanuucua. ²⁴ Jaarajaaja cuta Jesucristojiniji pohuataanaa pueyari nia saruhuaatájuhua. Nojóriiri Marco, Aristarco, Demas, Lucasno.

²⁵ Pa Jiyaniija Jesucristo cuaara cumaquiiria niajaniya.

HEBREO PUEYACUARA NAAJIONEE

Pueyasoori pajaniyara na rupaa pohuataniquiaari Neyanujiniji

¹ Tariucuacaanu, Pueyasoori pueyaracaanu na sequenu panishano caminiujuuniaa pueya poojotaniquiaari pa supuetanaara. Nojuajaari nojuajiniji caminiujuuniaa miijiotequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini. ² Quiari naataja saniniuuja, Pueyasoori tama Neyanujuaaja pohuataniquiaari na sequenu panishano pajaniyara. Nio Neyanu shipinitiquiaari puetunu casaajanaacuaajaari; nio jiya, jiya cajiniocuajuhuaj, puetunu pa niquiyaquishoo casaajanaanio. Naajuhuaaj, Pueyasoori Neyanu jiyatequiaari puetunu tama na shipinishanojuanaa jiitiana quiriquiano.

³ Neyanuuri tojetaarucuajanaa maninia, juhua na Quejuhuaj, juhua na Que niquishanojuhuaj. Naacuajitij, nojuajaari jiyanohua shacantuuca cumaacaracajuhuaaj. Naacuajitij, nojuajaari puetunu na shipinijosano casaajanaa rucuanetequiaa maninia, saa na rupaa cumaacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaj, jiyocuaacaanu tacaquiaarihuari, na Que Pueyaso miaquetajara na cajiniuria Jiyaniijajanaa quiquojinia.

Pueyaso Niyanuuri Jiyaniijajanaa cutara Pueyaso seyajiniji

⁴ Naacuajitij, Pueyaso Niyanuuri Jiyaniijarajanaa quiquiaari Pueyaso seyajiniji. Nojuajaari na Que sesaanucua. ⁵ ¿Pueyasoteeri quenaaja tamonu na seyajinjinio sequequiaari: “Nioori cua Niyanu”? ¡Maja! Neyanu sequequiaari cutaraari:

“Quiaari quiyanu. Janiyari pueyanora quia muerateree jiyacuan, cua saquiriojosano pueya Jiyaniijia quia quiniuria”.

Neyanujiniji sequequiaarijiaarihuaj:

“Nera, janiyari na Queni. Quiria saniniuuja, nojuajaari quiyanu”. Pueyasoori maja quenaaja niquiriyatu na seyajinjinio naa na sequenu quiquiaari. ⁶ Tariucuacaanu Pueyaso Rupaajinia, naa naajiotasaaquiaariiri casaa Pueyaso sequenutaniyani, Neyanu na tiuquitishacariuhua mijiria, Jiyaniijajanaa na quiniuria:

“Puetunu cua seyajanaa cuara Quiyanu tojtiaara, Jiyaniijajanaa na quini-uuca”.

⁷ Pueyaso seyajiniji saniniuuja, naa naajiotasano quiyari tariucuacaanu Pueyaso Rupaajinia:

“Pueyasoori na seya jataniquiaa juhua paratura, juhua maniriano, na panishano nojori miiniuria”.

⁸ Neyanu sequeya saniniuuriija:

“Quiyanunaa, quiaacuaajaari Pueyasojuhanajaj. Quiaari Jiyaniijia. Quiaari naa quiniutianiya pueyaracaanutej. Quiaari cumaacaracajuhuaaj, maninia quia jiitianura puetunu pueyajanaa. ⁹ Quiaari maninia miiniu porocua. Quiaari sesa miiniu soojea saniniuuja. Cunora, Pueyasonaa, janiyari quia jiyatequiaari Jiyaniijajanaa quia quiniuriani, quia Jiyaniijia cua quiniuucua. Janiyari quia jiyatequiaarijuhua socua shuquiriaatia quijia quia quiniuria puetunu quia cojiniaajinijijanaa”.

¹⁰ Pueyasoori naa sequequiaari Neyanujuhuaaj:

“Jiyaniijajanaa, quiaacuaajaari coteenujanaa casaa shipinijia. Quiaari jiya shipiniquiaari, puetunu jiya cajiniocua niquishano casaajanaanio.

11 Puetunu quia shipinishanojuanaari shaajeriquianohua. Quiajaniya saniniuujia, quiaari pueyaracaanu quiriquiano cutara. Puetunu quia shipinishano casaajanaari tariucuashiriquiano juhua toqueja. 12 Naa na tariucuashishacaritij, quiaari juhua toque mocua na jiunioriquiano, quia jatasocoriquiano. Quiaari naa miiniutianiyaquij taa pueyano jocaquiaacuaa na toque mocuacuaani, quiariqui toque na cushiniuria saniniuujia. Quiajaniya saniniuujia, majaari quia jatanu quiniutianiya tamaatiara. Quia quiniuuri maja puequeriquiano”.

13 Pueyasoori Neyanu sequequiaarijiuhuj:

“Miji, cua miaquetajara quia cajishii, janiya jaara quia paraa shocojotare puetunujuanaajaatijia, maja quenaaja niquiriyatu cureenura na mi-ananajonura quiajaniya”.

Majaari naa Pueyaso sequenu quiquiaari quenaaja niquiriyatu na seyajini-jinio. 14 Puetunu nojorijianaacuaajaari Pueyasora poonijionaa. Pueyasoori nojori jiyaramiquiquiaa Jesuucua tiuuriquiano pueya nojori cojuanura.

2

Maja cumaati Jesucristo tojiyashijiacara pa quiniu

1 Naaratej, Jesucristojiniji pa tojishano tojijiaa pa quiriquia socua, paa mariqui Pueyasocuaaji rupatereeri. 2 Tariucuaaanu, Pueyaso seya caminiu-jiushano Pueyaso rootasano pueyarani, cuno rootasoori seetanujuanaa pueya tojishocoriquiano cutara. Cuno rootasano ruuretajaca, na miyashiji-acajuhuj, nojoriiri saniitiosaaquiaari. 3 Pueyaso seya caminiujiushano tojiyashijiaa jaara saniitiosaaquiaaricuaa, ¿paateeri jiyaniyani Pueyaso pa jiyanoonutianiya juhuajaniya Neyanu rupaa tojiyashijiaa pa quishacari? ¡Maja! Cuno rupaa nocua pa tiuushano pa jiyanooshaanurani, cunoori pa Jiyaniijajanaa pohuatasano. Pa Jiyaniijia nuhuaji, cuno pojori, cana-puete pa Jiyaniijajanaa tojiquiaari pueyaracaanuni, nojoriiri saniniuujia cuno rupaa caminiujuquiaari pajaniyara. Canaa sequetuquiaariiri nojori tojishanoori seetanu rupaajanaa. 4 Naajuhuj, nojori pohuatasacari Jesucristojiniji, Pueyasoori nojori miitiquiaari jiyajeneta casaa jiyanohua na cumaacata, maatia pueya niishiniuria nojori pohuatasanoori seetanujanaa. Pueyari cunora jiyanohua shiriiquitiquiaari queraatia Pueyaso cumaacata miishano nojori niquishacari. Naajuhuj, Pueyasoori Jesuucua tiuujiaa niqutioquiaa na Sohuanu, tamaatia pa miiniuria na cumaacata, taa na paniyacujani. Cunora, paa cumaati seetanujuanaa Pueyaso rupaa Jesucristojiniji tojtiaajaca quiyani.

Jesucristo mijiria rasaanquiaari pa puerana na quiniuria

5 Cuno quiarinio jiyaranojiniji teyano pa sequeriquiaacujani, Pueyasoori maja na seya na jiyatenu quiquiaari cuno quiarinio jiya jiyaniijianucuarano nojori quiniuria. 6 Naajaa, tariucuaaanu Pueyaso Rupaajinia naa naajio-tasaaquiaariiri pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishiriojonurani? ¿Casaara quia taraajeya pueyacuani? 7 Quiaacuaajaari na shipiniquiaari ru-paquijiara socua cumaacaju na quiniuria quia seyajiniji. Naajaa, quiaari na jiyatequiaari jiyaniijia na quiniuria, cumaacaraca quijia na quiniuriajuhuaj. 8 Quiaari na sequequiaari puetunu quia shipinis-hano casaajanaa jiyaniijia na quiniuria”.

Naa Pueyaso sequesacari pueyanotej, puetunu na shipinishano casaa-janaa jiyaniijia na quiniuriatej, naacujitij, majaari quenaaja niquiriyatu

casaa cureenu quiniutianiya na jiiťiasoo. Saniniuujia, paacuaajaari ni-
ishiyani, pueyanoori juhuanojuaja maja seetanujuanaa cumaacaraca na
quiniu puetunu casaajanaa na tojtiniuria tama nojuajaaja. ⁹ ¿Jesuuriťiataj?
Pueyano na quiniuria, na Que Pueyasoori rupaquijiaari na miiquiaari socua
cumaacaaju na quiniuria na seyajiniji. Naacuajitij, pueyano na quishacari,
Pueyaso taraajenuucua puetunu pueyacuajanaa, Neyanuuri mosaaquiaari
pocudara. Naa na cusunuucua pocuaratej, Pueyasoori na jiyatequiaari Jiyani-
jiajanaa na quiniuria, jiyanoohua cumaacaraca na quiniurijahuaj.

¹⁰ Jamueyashijia Pueyaso quiniuucua, nojuajaari puetunu na muera-
suranojuanaa panitiaquiaari na cojiniaa nojori quiniuria. Paniquiaari-
iri jatiqúi nata shuqúriaatia pa quiniuria, puetunu tama nerajaaja na
shipinishano casaatajanaajuhuj. Jeenucuasano pa quiniuria pa cojini-
uria Pueyaso, nojuajaari jiyanoohua maninia miiquiaari pocudara, Neyanu
na miitshacari naquiya pa niti. Naacuajitij, Neyanuuri tojetaarucua-
janaa maninia quiquiaari Pueyaso muerasuranoo cuaji Tacuna na quini-
uria. ¹¹ Jesucristo jeequenuucua pajaniya sesa pa miishanojiniji, jatanis-
hano pueya pa quiniuria, paari cunora seetanujuanaa Pueyaso muerasuni.
Naacuajitij, Pueyasoori pa Que, taa pocuaji Tacuna Que na quiyacuani.
Cunora, Jesucristoori maja na caririqúiniu na Que na sequenura pajaniya-
jiniji, “cua tapueyocuacata”. ¹² Tariucuacaanu Pueyaso Rupaajinia naa
naajiotasano quiyacuajaari na sequesano na Que:

“Cua Quena, janiyari cua tapueyocuaca pohuatanutaniyani taamuecate
quiajaniyani. Janiyari quia saquiriojosano pueya niqúiaara quia
jaaquequejotanutaniyani cua shuquiritiasacari quiajaniya”.

¹³ Tamaqui, Jesu sequesanoori naa naajiotasano quiyajuhuj:

“Janiyari cua Queecua tiuujia quiniutianiyan”.

Naacuajitij, mijiria na quishacari, Jesuuri na Que Pueyasoo cua tiuquiar-
icuaa taa pa tiuquiaaa nocuanijia. Socua naa naajiotasano quiyari tamaqui
taa Jesu sequenutaniyani, jiyocuacaanu na tiuquitasacari pajaniya na
shuquiriniutia:

“Nio pojoriiri cua Que jiyatesano cua tapueyocuacara, nojori tojtianuucua
janiya”.

¹⁴ Cuaqueyaraca pa quiniuucua, Sesaacaari cumaacaraca quiquiaari na
shaajanura pajaniya, Pueyaso tojtiaashijia pa quiniuucua. Naaratej,
Jesuuri cuaqueyaraca na quiniuria jataquiaarijuhuaj, taa pajaniyacuaani.
Naacuajitij, nojuajaari na naata mosaanu quiquiaari pa niti. Naacuaji-
tij, nojuajaari Sesaaca jaariuutiaquiaari pajaniya. ¹⁵ Naacuajitij, noju-
ajaari juhuajaniya quijiacara jiyatequiaari pajaniya, nocua pa tiuuniuucua.
Paari niishiyacuajani, pa cusosacari, paari pa Jiyaniťiata quiniuria quianu-
taniyani. Cunora, majaari tari pa puerenu pa cusonura. Nocua tiuyashijia
pueyari seetanujuanaa cusonu puerejaca cutara. ¹⁶ Seetanujuanaa, ma-
jaari Jesucristo ninu quiquiaari Pueyaso seya na naacunura. Niquiaari
cutaraari pueyacuaji na tacunura, noo pojoriicua, nocua tiuujiacate taa
supuetana Abraham quiquiaari Pueyasoo cua tiuujiacuaani. ¹⁷ Maninia
pa naacuna na quiniuria, Jesucristoori puetunu naquiya miiniujanaa re-
jeretaquiaari mariyata taa narta pueya miishaaquiaacuaani. Naacuajitij,
nojuajaari pocua taraajeja, pocuaji na tacunura Pueyaso. Taraatia pa miiniu
niishijia na quiniuucua, pa naata nocua tiuuniu pueyaracaanu na Que
Pueyaso na jyanootiniuria pajaniya, sesa pa miishanojiniji. Na cusonu-
cua, naacuajiti Pueyasoori na naata pa jyanooniu puetunu sesa pa miis-
hanojinijijanaa. ¹⁸ Mijiria na quishacari, nojuajaari pueyaracaanu taraa-
tia miishaaquiaari. Nojuajaari jyanohua saniniujiushaaquiaari sesa na
miiniuria juucuajuhuj. Naacuajitij, nojuacuajaari jyanohua niishijia na

cumaquiniuria pajaniya, paa jaara sesa miiniuria saniniujiushaariquiani, paa jaara taraatia miishaariquiajuhuaj.

3

Jesucristo cutaraari Jiyaniijajanaa Moisésjini

¹ Cuarta Pueyaso pueyanaa, niaacujaari Pueyaso saquiriojosano tama na pueyajaaja nia quiniuria. Nojuajaari Neyanu Jesu jiyaroquiaari na rupaa na niishitiniuria pajaniya, Pueyaso pueyara pa jatanishaanura. Neyanuri na jiyanootijia pajaniya, nocua pa tiushacari. Cunora, jacaria pa niishiriojore socua Jesucristojini. ² Mijiria na quishacari, Jesuuri na Jiyarona tojjia quiquiaari pueyaracaanu, taa Moisés quiquiaari Pueyaso tojjiacuaani, Israel pueya jiiitiana na quishacari. ³ Naajaa, Jesucristo cutaraari Jiyaniijajanaa Moisésjini. Moisésri saaja narta Pueyaso pueyajiniinio pueyano quiquiaari. Saniniujia, Jesucristoori puetunu Pueyaso pueyajanaa shipininia cutara. Naaratej, Jesucristo cuara tojishaaria socua cutara. ⁴ Puetunu pueyapuejanaari supuetanaaraca. Naajaa, Pueyasojuanaari nojori shipininia seetanujanaa. ⁵ Naacujitij, Moisésri pueyaracaanu Pueyaso sequesano caminiujuquiaari Pueyaso saquiriojosano narta Pueyaso pueyara, maninia Pueyaso seru na quiniuucua. ⁶ Saniniujia, Jesucristoori Pueyaso Niyanujanaa cutara. Nojuajaari Pueyaso saquiriojosano pueya jiyaniijajanaa. Nojuajaari nojori jiiitaa saa maninijaa, taa na Que paniyacuajani. Naaratej, majaari pa cartenu Jesucristo rupaa. Paa jaara Jesucristoocua tiuquuaani, naajuhuj, paa jaara shuquiriaatia na sashiquiaa na rijionura pajaniyani, naacujitij, paari niishiyani paari seetanujanaa Pueyaso muerasuni.

Pueyasoori na pueya samaraataja

⁷ Pueyaso pueya pa quishacari, Pueyaso Sohuanu sequesano pa tojiri, maja pa rupatenura Pueyaso Rupaacuaji. Na sequesanoori naa naajio-tasano quiya tariucuaaanu Pueyaso Rupaajinia pajaniyarajuhuj:

“Pueyanaa, niaa jaara quiarijia tojiriquia Pueyaso sequesano nijaniya, majaari na sequesano ruuretajaca nia quiniu. ⁸ Majaari naa nia quiniu taa nia supuetanaa quiquiaaricuaani, cariiquia jiyajinia nojori camarucuneejotasacari pueyaracaanu. Nojoriiri Pueyaso juaatijiojuaca quiquiaari, pueyaracaanu na tojiyashijia nojori quishacari.

⁹ Nojoricujaari pueyaracaanu cua cumaacata cua miiijosano niquitiquiaari. Cuarenta marijaari shocojoquiaari, pueyaracaanu jiya-jeneta casaa cua miijosacari cua cumaacata, maninia cua jiiitasacari nojori. Naajaa, nia supuetanaari na juaatijioquiaari, pueyaracaanu nojori taacanusacari cucuaji. ¹⁰ Janiyari cunora seetanujanaa juaaquiaari puetunu cuno pojoritijanaani. Naaratej, janiyari sequequiaarini: ‘Nojoriiri juhua cucuaji tashuquioono rucoojia tama-jaaja. Nojoriiri cua niishitiojosano ruuretaquiaa saaja’. ¹¹ Janiyari cunora jiyanojuaa cua juaaniutia naa sequequiaarini: ‘Majaari nojori rupuenu quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quijia nojori quiniuria cuata’ ”.

¹² Naarate cuarta Pueyaso pueyanaa, tama nia cuaqueyajaaja nia cojuare jiyanojuaa, niaa mariqui Pueyaso Rupaacua tiyashijiacara quirohuari, Pueyasocua nia rupatenura puetunujanaa. Pa Pueyasocua-jaari quijiajuhanajaj. Nojuajaari na tojiyashijia saniitiojua. ¹³ Cunora,

seetanujuanaa Pueyaso Rupaa tojtiaajaca nia quiniuria, puetunu juucanjanaa nia shiniujiutooriquia pueyaracaanu. Naa nia miiriquia nio pa quishacari Pueyaso jiyanooni puequeyaquishacarija taa na Rupaa sequeyacuajani. Naa nia shiniujiutooriquiatej nia jiitiyaquiniuucuaaji sesa miiniuria. Saniniuujia, niaa jaara sesa miijica quiriqia, tama sesa nia miiniujiaarija nia sajonnutaniya Pueyaso tojiyashijiacara nia jatanuhuaa.

¹⁴ Jesucristoocua pa tiuuniuucua, paari na cojiniaara jiyatesanoni. Naacujitij, puetunu na jitiiasanojuanaari puera quiriqianojuhuaj, paa jaara nocua tiuquuaa pueyaracaanuni, taa shushajanaa seetanujuanaa nocua tiuujica pa quiriqiaacuajani.

¹⁵ Cunora, naa naajiotasano quiyari tariucuacaanu Pueyaso Rupaajinia: “Pueyanaa, niaa jaara quiarija tojiriquia Pueyaso sequesano niajaniya, majaari na sequesano rejetejaca nia quini, taa nia supuetanaa quiqiaaricuaani. Nojoriiri Pueyaso juaatijiojuaca quiqiaari, pueyaracaanu na tojtiaashijiacara nojori quishacari”.

¹⁶ ¿Canaputeeri cuno pojorini, Pueyaso tojtiaashijiacani? ¿Secaja pueyatee? Maja. Puetunu noo pojoricuajaari Egipto jiyajiniji Moisés mashiquishano pueyatej. Nojorijianaacuajaari Pueyaso tojiqiaari pocuaano. Naajaa, nojoriiri saaja na ruuretajaca quiqiaari. ¹⁷ Nia niishiritioj, ¿canapute cuno pojorini, Pueyaso juaatijioquiarini, pueyaracaanu nojori camarucuneejotasacari cariiquia jiyajiniani? Noo pojoricuajani sesa miijiacatej. Nojoriiri cunora cusunuuqiaari nojori quiojosacari nucuaco cariiquia jiyaco. Na cusunuuqiaari jamojosaquiaariiri. ¹⁸ Nia niishirijihuaj, ¿canapue naa Pueyaso sequeqiaari seetanujuanaa na juaaniutiani: “Majaari nia tiuquitianu quiniutianiya niaarano cua niqutionu panishano jiyajinia, tii juhuajaniya shuquiriaatia nia quiniuria cuata”? Puetunu Pueyaso tojtiaashijiacajanaacuajaari naa sequesaaquiaritij. ¹⁹ Naacujitij, paacuajaari quiarija maatia niishiyani, Pueyasooocua tiuyashijiacara nojori quiniuucua, majaari nojori tiuquitianu quiqiaari Pueyaso niqutionu panishano jiyajinia.

4

¹ Pueyasocuaajaari pa masuyajaa panaatia pa quiniuria nata. Cunora, jiyanoohua pa cojuare tama pa cuaqueyajaaja Pueyaso sequesanoocua pa tiuuniuria, tamonu pajaniyajinijinio mariqui jiyanoyaquishaareeri. Na sequesanoocua tiuyashijiacara maja na rupuenu quiniutianiya Pueyaso, shuquiriaatia na quiniuria Pueyasota. ² Pueyaso rupaacuajaari tari pa niqiaara pohuatasaaquiarijihuaj, nocua pa tiuuniuria, taa pa supuetanaa niqiaara na pohuatasaaquiaricuaani. Nojoriiri Pueyaso rupaa tojiqiaari najuhuanaj. Majaari nocua na tiuutiunu quiqiaari. ³ Cunora, Pueyasoori pa supuetanaajiniji naa sequeqiaari:

“Cua sequesanoocua nojori tiuyaquiniuucua, janiyari cunora seetanujuaanaa naa sequeqiaari cua juaaniutiani: ‘Majaari nojori tiuquitianu quiniutianiya cua niqutionu panishano jiyajinia, cuata nojori quiniuria shuquiriaatia’”.

Pajaniya saniniuujia, Jesuucua tiuujica pa quiniuucua, paa cutaraari panaatia quijacara jatanishanoni, pueyaracaanu Pueyaso rupuejaca pa quiniuria. Pueyasoori najuhuj: jiya shipininiu na tucatanu nuhuaji, nojuajaari panaatia quia. ⁴ Cunora, tamaqui tariucuacaanu Pueyaso Rupaajinia, naa naajiotasaaquiariri:

“Seis juucajinia Pueyaso tucatasacari puetunu na poonijosanojuanaa, na nuhuaji nojuajaari séptimo juucajinia samaateqiaari”.

5 Pueyaso sequesanoori tariucuacaanu na Rupaajinia naa pacutejosaaquiaari naajiotanu:

“Majaari cua tojtiaaashijiaca rupueni quiniutianiya janiya, panaatia nojori quiniuria cuata”.

6 Naa sequesanojinijitij, maatia niishishiyari Pueyasoori pueya masuyajaa, nojori rupuenura nojuaja, panaatia nojori quiniuria nata. Noo pojori, co-teenujuanaa Pueyaso Rupaa pohuatasaaquiaaritij, nojoriiri maja panaatia quijiacara na jatanishaanu quiquiaari, Pueyaso tojtiaaashijiaca nojori quini-uucua. 7 Naa Pueyaso panitianuucua pueya, shuquiriaatia nojori quini-uria natajuhuaj, nojuajaari quiarijia masuyajaa pueya. Cunora, jiyanoohua Moisés nuhuaji, Pueyasoori supuetana David naajiotaniquiaari pajaniyara saniniuujia. Naa sequeyari:

“Niaa jaara quiarijia tojiri Pueyaso rupaa, Pueyaso sequesano niaarano, majaari na ruuretanu”.

8 Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqutionu panishano jiyajinia. Naajaa, nojori tiuquitasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasoocua tiuyashijiaca nojori quiniuucujahuaj, taa nojori supuetanaa quiquiaaricuaani. Naacujitij, cuno jiyajinia Josué tiuquitasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriqquia, ¿Pueyasotucua casaara quiar-jia pa masuuriqiaja Jesuucua pa tiuuniuriani, seetanujuanaa panaatia quijiacara pa quiniuria natani? 9 Naacujitij, paacujajari niishiyani, Pueyaso pueyanoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu. 10 Naacujitij, cante Jesucristoocua tiuujiani, nojuajaari panaatia quijiaara jatanishaanutaniya. Majaari socua na tacaaniu quiniutianiya taa tama na cuaqueyajaaja na jyanootiniutianiya Pueyasoni. Naacujitij, nojuajaari juhuajaniya quijia quiniutianiya, tarijia najuhuaana na poonijiosanojiniji, naatej, taa Pueyasojuanaa samaatequiaari na poonijionu nuhuajicuaani. 11 Naaratej, panaatia pa quiniuria Pueyasota, seetanujuanaa na Rupaa tojjiacara pa quiriqquia quiarijia. Naa na rupaa tojjiacara pa quiri paa mariqui saniitiosaareeri taa pa supuetanaa Israel pueya saniitiosaaquiaaricuaani, Pueyaso sequesano tojijashijiaca nojori quiniuucua.

12 Pueyaso Rupaari samiitianijia, cumaacaracajaariuhua pueya jiuujia-jinia na poonijionura. Pueyaso Rupaari jiyanoohua socua shamaticuaja nijiniaquetucuaaja mueruujiniji. Nijiniaquetucuaaja mueruuri saaja na naata pa cuaqueya jiyatanu. Pueyaso Rupaa cutaraari pa sohuanu tohuariquijia, pa niishitijia tohuariquijianio. Na naata cuhuatanu poojiajinia jiyasohuaja pa niishiriojosano casaa, poojiajinia pa niishishoo casaanio. Naacujitij, Pueyaso Rupaari poojiajinia sesa casaa pa niishiriojosano nequesoreeja, jiyasohuaja pa miiniu panishano poojiajinia pa niishiriojosanonio.

13 Puetunu Pueyaso shipinishano casaajanaani, majaari na cureenu quiniutianiya na nequesoreyaquishoo. Majaari quenaaja niquiriyatu jamaaniu quiniutianiya nocuaji, nequesoreeso na cureenu. Nojuacuajaari maatia niishiya puetunu pa miishanojuanaa, puetunu na niishiriojosanojuanaa.

Jesujuanaari Pueyaso jyanootijia pueya

14 Pueyaso Niyanu Jesuni, nojuajaari na Que jyanootijia pajaniya. Nojuajaari jiya cajiniocua tohuariquiquiaari na Queecua na tiuquiniuria. Nojuajaari quiarijia tii pocuara secojija na Que. Naacujitij, Jesucristoocua tiuujia pa quiniuucua, maja cumaati pa pishiniu nocuaji. Paacujajari na

muerasuniyojuani. ¹⁵ Jesu, Pueyaso pa jiyanootijiani, nojuacuajaari pocua taraajenu niishijia paa jaara saniniujiushaariquia sesa pa miiniuriani. Nojuacuajaari naa saniniujiushaarquiaaarijuhua sesa na miiniuria juucua, naate taa pa saniniujiushaarquiaaacuaani. Maja cutaraari sesa na miiniu quiquiaari quenaaja. ¹⁶ Cunora, pa jiyanooja Pueyaso pa rupueriquia pa puereyaquiniutia. Nojuacuajaari pa tojiquiaa pa secosacari nojuaja, na jiyanooniuria pajaniya sesa pa miishanojiniji. Ritia pa cumaquiquiaaar-
 iuhuj, pa rejeretanura paa jaara sesa miiniuria saniniujiushaariquiani.

5

¹ Puetunu pueyacuara secोजना jiyaniijajanaari pueyaracaanu narta pueyajiniinio saquiriojosano pueyano quiquiaa, taa Pueyaso niishitiquiaari supuetana Moiséscaujani. Nojuajaari jiyatesaquiiaa pueyacujari na tacunara Pueyaso. Naacujitij, nojuajaari nareja pueya niquitiojosano Pueyasorano masejojua. Naajuhuj, pueya jaara sesa miiri, pueyacuara secोजनाari pueya seya nanaca shootequiaa, Pueyaso jiyanooniuria nojori, sesa nojori miishanojiniji. ² Pueyacuara secोजना quiniuucua pueyanohuj, nojuajaari sesa miijiajuhuaj. Naacujitij, nojuajaari na naata narta pueyacuara taraajenu, sesa nojori miishacari, nojori niishiyaquishacari maninia miiniujiuhuj. ³ Naacujitij, nojuajaari tama nocuarajaaja seya nanaca shootequiaa sesa na miiniuucua, taa na miiquiaacuaa narta pueyacularani, sesa nojori miishacari. ⁴ Niaacuajaari niishiya, majaari quenaaja tamonu pueyano na naata tama na cuaqueyajaaja jiyatenu pueyacuara secोजना na quiniuria. Pueyasojuaacuajaari tamajaaja saquiriojojua na panishano pueyano, cuno pueyano quiniuria pueyacuara secोजना. Pueyasocujajari naa saquiriojoquiaaricuaa Moisés tarajanu Aarón, pueyacuara secोजना jiyaniijia na quiniuria. ⁵ Naajuhuj, Jesucristoori maja tama na cuaqueyajaaja na jiyatenu quiquiaari pueyacuara secोजना na quiniuria, Pueyaso na jiyanootiniuria pajaniya. Tama Pueyasocujajari na jiyatequiaari pueyacuara secोजना na quiniuria. Nojuajanaacuajaari naa sequequiaari Jesu:

“Quiaari quiyanu. Janiyari pueyanora quia muerateree jiyacuani cua saquiriojosano pueya Jiyaniijia quia quiniuria”.

⁶ Pueyaso sequesanoori tamaqui tariucuaaanu na Rupaajinia naa naajio-
 tasano quiyajuhuj:

“Pueyaracaanu rishijia quia quiniuucua, quiaari pueyaracaanu pueyacuara secoloriquiano cutara, taa Melquisedecuaani”.

⁷ Naa pueyano na quishacari mijriatej, Jesucristoori jiyanoohua saniniu-
 jiushaarquiaaari. Naquiya na miyaquishaanucujaj juucua, nojuajaari na Que Pueyaso secोजना quiaari jiyanoohua na nujuquenuta. Jiyanoohua marte-
 quiaari na Que na secosacari, maja na mosaanura. Nojuajaari ni-
 ishiquiaari na Que na naata nocua taraajenu, maja na mosaanura. Naajaa,
 na Que tojijia na quiniuucua, na Que sequequiaariiri: “Naajaa, quia miiri
 quia panishano cua Quena, taa quia panitiaquiaari miiniu janiyacujani”.
 Na Queeri na tojiquiaari. ⁸ Jesucristoori seetanujuaana Pueyaso Niyan
 quiquiaari mijiria na quishacarijuhuaj. Naajaa, na niishishacari nojuajaari
 jiyanoohua naquiya miishaanutaniya nojuaja jaara na Que tojiri, naajaa,
 nojuajaari saaja na tojiquiaari. ⁹ Naacujitij, tojetaarucujajanaa maninia
 mijia na quiniuucua, nojuajaari pueyacujaj Tacunara quiquiaari, puetunu
 na tojitiajacajanaa na jiyatenura pueyaracaanu rishijiacara. ¹⁰ Cunora,
 na Que Pueyasoori na jiyatequiaari pueyacuara secोजना na quiniuria
 pueyaracaanu, juhua Melquisedec.

Jiyanohua puereetaari Jesu tojinu tarinitianu

¹¹ Janiyari queraatia socua nia niishitiojonu paniya Jesucristojinijini, nia niishiniuria nojuajaari seetanujuanaa juhua Melquisedec. Cunoori puera jiyajeneta, maatia cua niishitiojonura nijaniya, juhua niishiyashijiacara nia quiniuuquiohua. Niaacuaajaari tari niyajetarucuaa tariucuaaanu nia tojishano. ¹² Tariucuaaanujiniji Pueyaso rupaa tojijiaca nia quiniuucua, ¿taateni? Naa mariqui na niishitiojonuujuaca quiriquia tari. Saniniuujia, niaari quiarijia paniya socua nia niishitiojosaanuhua maatia niishishaa-tia casaa Pueyasojiniji. Naaari juhua naatujooriria quiriohuacuaa, juhua shipiyataaquishoojua. Naacuajitij, majaari nia naata jiyajeneta niishitiojosano casaa niishiniu. ¹³ Naa maatia niishitiojosano niishijiaca nia quishacari saajatej, niaari juhua conaaja quiyajaa, saaja quitiaacaacua naataja. Majaari Jesucristo niishitiojosano tojitijaca nia quiniu, maninia miijia nia quiniuria. ¹⁴ Juhua tariucua mashiquioriria nia jiyateriquiani. Mashiquiori cutaraari puetunu casaajanaa miaquenuujuaca. Naajuhua, puetunu Jesucristo niishitiojosanojuanaa niishijiaca nia quiriquia. Naa jaara na niishitiojosano tojijiaca quiriquia, saaja maninia miijia nia quini-uria, niaari maninia niishiniutianiya teyano casaate maniniani, teyano casaate sesa saniniujia.

6

¹ Naacuajitij, majaari juhua naatujoori nia quiniu pueyaracaanu. Seetanujuanaa socua Pueyaso rupaa tojitijaca nia quiriquia, juhua tariucua cumantumaca mashaja nia quiniuria, cumueca. Niaacuaajaari tari co-teenujuanaa Jesucristojiniji niishitiojosano niishijiaca. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhuanani? Niaacuaajaari tari niishiya, majaari nia naata maninia nia miishanota tama nia cuaqueyajaaja jiyanoo-tiniu Pueyaso. Cunora, niaari Jesucristoocua tiuujiacara quiquiaari tari, Pueyaso jiyanooniuria nijaniya. ² Naajuhua, niaacuaajaari tari niishitiojosaquiaari moojinia nia tiuquinishaanura Pueyaso pueya nia quiniuu-cua. Naaari niishitiojosaquiaarijuhua Pueyaso pueyacia nia nianura nia juashiquia nojoriicua nia secojosacari, Pueyaso cumaquiniuria nojori. Naaari niishiyajuhua, macunucuaari samiitiaconutaniuhua. Nojorijinijinio saniniuujia, Pueyaso tojiyashijiacaari pueyaracaanu sanitiosocoriquiano jiyatesaanutaniya. ³ Quiarijiani, majaari socua cua niishitiojonu quiniutianiya nijaniya nio shusha cua sequesanojiniji nijaniyani. Pueyaso cumaquishacari janiya, janiyari socua jiyajeneta casaa Jesucristojiniji niishitiojonutaniya nijaniyani.

⁴⁻⁵ Pueyano jaara Pueyaso Rupaa tojiyashijiara quiriohua, najuhua-naari na niishitiojonu pacutenuhua, nojuaja jaara tari Pueyaso Sohanu cuhuatasano jiuujiaraca quiquiaari. Najuhuaari nojuaja jaara tari jiyanooshano quiquiaari, nojuaja jaara tari Pueyaso Sohanu cumaaca niishijia quiquiaari. Najuhuanajaarijuhua nojuaja jaara tari Pueyaso Rupaa shuquiriritaja quiquiaari, nojuaja jaara tari Pueyaso cumaacaraca quijia quiquiaarijuhua. ⁶ Jiyano pueyanotej, majaari tari na naata sesa miijia na quiniuucua taraajetesaanuhua, Jesucristoocua na tiuuniuhua seetanujuanaa. Nojuajaari juhua Pueyaso Niyanu teetenu pacuteya niyacute-sanojinia, naa na ruuretajaca na quiniuucua. Naa Jesucristo tacartaja na quiniuucuatej, tamasaacari Jesu rerequetequiaajuhua. ⁷⁻⁸ Naacuajitij, cuno pueyanoori juhua noo cuhuariquia tee cuniqui sesa jiyasocua maniniucuaa moritianucujani, riyocuaanio. Pueyasoari najuhuaana maru niyotequiaa. Majaari cuno cuhuariquiajinia nataacuaca muetunu. Jiyano

cuhuariquiatej, na camaru cuaara catijiataaranoj. Pueyasoori naa sanitationaniya nocuaji ruparequeno pueyajuhaaj. Saniniuuja, Jesucristo rupaa tojjiacani, nojoriiri juhua maninia cuhariaquia. Pueyasoori maru niyojotequiaa nocua, maninia na muetutenura tii natoosano casaa. Naacuaajitij, na camaruuri queraatia miajajauraca quiniutianiya. Naajuhuaaj, Pueyasoori na tojtianu tarinitiaashijiaca shuquiritiniutianiya pueyaracaanura.

Pa niishishacari Pueyasoori maninia pa miiniutianiya, paari cunora na tojiniu tarinitiaaquiquiaani

⁹ Miriqui cua pohuatasano sesa cuhariaquijajini, cunoori maja nianianiya cua panishano pueyanaa. Majaari cua taacanuunu nijaniyajiniji. Niaacuajaari pa Jiyaniijia tojtiaajaca quiquiaa. ¹⁰ Pueyasocuaajaari jijanohua maninia. Nojuajaari maja na niyjetanu quiniutianiya maninia nia miishano niarta Pueyaso pueya, Pueyaso panijaca nia quiniuuca, taa quiarijia nia miyajaacuajani. ¹¹ Naatej, taa shitimia niarta Pueyaso pueya naacujuacatucaaja nijaniyani, naajuhuaaj, janiyari nia panitiaani pa Jiyaniijia nia sashiniuria nia timiniutiajuhuaaj, nojuaja jaara pa rijionuucua tiuquiri-ohuaajitija. Nia niishitiriqiajaaniuhuaaj, Pueyasoori jijanohua maninia miiniutianiya pajaniya. ¹² Majaari nia macuhuaajconu juhua taajecori nia quiniuria pa Jiyaniijia. Saniya nia quiriquia cutara juhua tariucuaaanu parta Pueyaso pueya. Nojoriiri shamaatia Pueyasocua tiuujiaca quiquiaari pueyaracaanu. Naquiya miiniu rejeretajacaari quiquiaarijuhuaaj. Naaratej, Pueyasocuaajaari tari maninia miiquiaa nojori, taa seetanujuanaa na sequequiaari na pueyarano na miiniuriacuajani.

¹³ Pueyasoori seetanujuanaa saaquiano Abraham sequequiaari taa na miiniutianiya maninia nojuajani. Majaari na naata sequenu, tamonu cuaara na saniitioranoj, nojuaja jaara miyaquiri na sequesano saaquiano Abraham. ¿Cantucuaa cumaacaraca Pueyaso na saniitionurani? Shaaqui. Nojuajanaacuajaari Jiyaniijiajanaa. ¹⁴ Naaratej, Pueyasoori naa sequequiaari saaquiano Abraham:

“Janiyari seetanujuanaa maninia miiniutianiya quiajaniyani. Janiyari quia jiuhua muetutenutaniya jijanohua queraatiani”.

¹⁵ Naa Pueyaso sequenu nuhuaji saaquiano Abrahamtej, Abrahamri juhuajaniya sashiquiaari Pueyaso cuaara na sequesano miiquiaarijaatija.

¹⁶ Pueyanaa, niaacuajaari niishiya taa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuaara saniitioora janiya, janiya jaara cua sequesano miyaquirini”. Naa pa sequesacarij, parta pueyanoori juhuajaniya pocua tiuuja. Majaari tari na taacanuunu pocuaji. ¹⁷ Naajuhuaaj, Pueyaso sequesacari taa seetanujuanaa na miiniutianiya na pueyarani, nojuajaari jijanohua panitiquiaari pajaniya, na sequesanoocua pa tiuniuria seetanujuanaa. Majaari na paniniu quiquiaari pa taacanuunura quenaaja na sequesanojiniji. Cunora, nojuajaari naa sequequiaari: “Janiyacuajaari Pueyasoni. Majaari cua niishiniu sapojonu. Cua sequesanoori seetanujuanaa”.

¹⁸ Naacuaajitij, Pueyasoori maatia sequequiaari taa na miiniutianiya nocua tiuujiacarano pueyarani. Majaari saaja cunora na sequenu quiquiaari. Nojuajaari sequequiaarijuhuaaj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacuaajitij, pajaniya, nocua tiuujiaca pueyani, paari poojia cajitiquiaani maatia pa niishishacari, pocuaji Tacunaari puetunu na sequesanojuanaa miiniutianiya pajaniyara. Naacuaajitij, majaari pa taacanuunu quenaaja.

¹⁹ Naa Pueyaso sequesanoocua tiuujiaca pa quishacarij, paari juhuajaniya

naquiya miiniu rejeretajaca quiquiaani. Sesaacaari maja na naata Pueyaso jaariutianu pajaniya. Naacuaajitij, paari juhua buqueni, pootioyaquishoo, niiquia casaacuaji na jaasutanuucua. Cuno niiquia casaari niquishoo, moo cariquimia pojiyari. Naajuhuj, nocua pa fuushanoni, nojuajaari jiyocuacaanu quiya, niquishoojaariuhua na Que Pueyaso shuriucua na quiniuucua. ²⁰ Nojuajaari na Queecua quianu pa puetaquiaari. Nojuajaari tii pueyaracaanu secojoquiaa na Que pocuara, na Que jiyanooniuria pajaniya. Naacuaajitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

7

Jesuuri pueyacuara secojona, taa Melquisedec quiquiaaricuaani

¹ Cuno Melquisedecni, nojuajaari Salem tiaca jiyaniijia quijia. Nojuajaari Pueyasojunaan secojona pueyacuara. Pa supuetana Abraham tacate-sacariuhua na naminiu nuhuaji na paraa, tamasa tiacajinijinio jiyani-ijanucuan, Melquisedecri nocua tohuataquiaari Salem tiacajiniji. Naa na sequequiaariiri: “Abrahamnaa, quiaari Pueyaso timitiasano. Pueya-soori quia miiniutianiya jiyanohua maninia”. ² Jiyacaritij, Abrahamri na paraa casami nitariquiohua na quiquiojiniohuara. Naacuaajitij, nojuajaari puetunu cuno casamijinijuanaa Pueyasora na riuriosano niq-uitioquiaari Melquisedec. Abrahamri naa miiquiaari na niishishacari Melquisedecri Pueyaso secojona pueyacuara quiquiaari. Pueyanaa, nio Melquisedecjiniji nia niishiri. Pueyano rupaajinia, na sesaari sequeya, “Saaja maninia miijia jiyaniijia”. Naajuhuj, na tiaca sesa Salemni, cunoori pueyano rupaajinia sequeya, “Juhujaniya quijia pueya tiaca”. Na sesaari naa quiquiaari na pueya jiuujia cajitijia na quiniuucua. ³ Majaari toje-taarucujanaa na niishishaanu, ¿queraca quiquiaaritii, nucuaracajuhuj, supuetanaaracanio? Majaari quenaaja na pohuatasaanujuhua na rasaanu-jiniji, na shaajenujinijinio. Naacuaajitij, pajaniyara, Melquisedecri juhua pueyaracaanu quijiajuhuanajaj. Majaari na niishishaanujuhuj, tamonute na niti jiyatesaaquiaari pueyacuara secojona na quiniuria. Maja. Naacua-jitij, nojuajaari juhua Pueyaso Niyanu, pueyacuara secojona na quiniuria pueyaracaanura.

⁴ Pueyanaa nia niishiri, Melquisedecquiiri seetanujanaa tojishano pueyano quiquiaari socua pa supuetana Abrahamjiniji. Naaratej, pa supuetana Abrahamri nareja na niqutioquiaari na paraa na shocotasano casamijinijinio. Secaja niqutioquiaariiri taa Pueyaso rootaquiaari pa supuetanaacuajani, nojori niqutiojonura nera. Tariucuacaanu, Pueyasoori pa supuetanaa niishitiojoquiaari nojori niqutiojonura secaja, puetunu nojori jiiitasano casaajinijijianaa. Naacuaajitij, pueyano jaara diez casaa jiiitare, cuaara Pueyasora niqutioora niquiriyatujua.

⁵ Pueyasocuaajari supuetana Leví niqiuoacuajinio supueno pueya jiyatequiaari narta Israel pueyacuara secojona nojori quiniuria. Nojoriiri jiyatesaaquiaari Pueyasorano pueya niqutiojosano masejoja nojori quiniuriajuhuj. Naa Pueyaso sequesnocuaajari Moisés Rootasanojinia naajiotasaaquiaari. Abrahamcuaajari puetunu Israel niqiuojujanaa supuetana quiquiaari, maja saaja Leví supuetana. Naajaa, Leví niqiuoacuajinio supueno pueyari Pueyasora narta Israel pueya niqutiojosano masejoja. ⁶ Melquisedecri pueyacuara secojona quiquiaarijuhuj. Maja cutaraari Leví niqiuoacuajinio na supueno quiquiaari. Naajaa, seetanujanaa pueyacuara secojona na quiniuucua, Abrahamri Pueyasorano na riuriotaca na niqutioquiaari. Abrahamri seetanujanaa Pueyaso timitiasano pueyano quiquiaari. Naaratej,

Pueyasojuaanaacuaajaari tari Abraham sequequiaari, nojuajaari maninia na miinitianiya. Naajuhua, Melquisedecri pa supuetana Abraham sequequiaari Pueyasoori jiyano hua maninia miinitianiya nojuaja. ⁷ Paacuaajaari niishiyani, Pueyaso jaara maninia miinitianiya tamonu pueyano, na sequesano caminiujiunia pueyanoori socua tojishano pueyano maninia na miishocoriquiano pueyanonijini. Naacuajitij, paari niishiyani Melquisedecri socua tojishano pueyano quiquiaari Abrahamjiniji. ⁸ Quiarijiani, Pueyasorano pueya niquitiojosano masejojacani, puetunu nojorijianaari shaajajaca pueya. Saniniuujia, tariucuacaanu Pueyaso Rupaajinia pa serojosacari Melquisedecjiniji, juhua saminiojiniji pohuatashiyari. ⁹⁻¹⁰ Nia niishirijuhua, Levi niquiohuacuajinio pueyacuajaari Pueyasorano pueya niquitiojosano masejojuaca, pueyacuara secojona nojori quiniuucua. Cua tojiri pueyanaa, Melquisedec naacuneetosacari Abrahamta, Abrahamri jiyacari tari na cuaqueyajinia jiitariquiaa puetunu nocuajinio supueriquiano pueyajanaa. Naacuajitij, Abraham niquitiosacari Pueyasorano na riuriotaca Melquisedec, pa naata sequenu Levi quiriqianojuanaari jiyacari Melquisedec niquitioquiaari, Abraham quiniuucua na jiyasorano tari.

¹¹ Leviucuajinio supueno pueyari pueyacuara secojona quiquiaari, nojori miiniuria taa Moisés Rootasanojinia sequequiaaricuajani. Naacuajitij, narta Israel pueya jaara sesa miiquiaari, nojoriiri sesa miijiaca seya puecooquiaari pueyaracaanu tama na camaruhuacuarajaaja, nojori na jiyanootiuria Pueyaso. Naa nojori miishano jaara pueya jiyateriquia tojetaarucuajanaa sesa miyashijacara, paa maara tamonu pocuara secojoriquiano paniyaquiriquiani. ¡Tamonu pocuara secojoriquiano cutaraari panishaaquiaari! Juhua pueyaracaanu rishijia Melquisedec panishaaquiaari cutaraari, maja juhua Aarón saniniuujia, nocuajinio supueno pueyano. Nojoriiri shaajajaca cutara. ¹² Aaróncuajaari narta pueyacuara secojona jiyaniijaari jiyatesano quiquiaari, taa Moisés Rootasanojinia sequeyacuajani. Naacuajitij, tamonu pueyano jaara jiyatesaarecuua pueyacuara secojona na quiniuria, tamonu rootasanoori panishiyajuhua, Moisés Rootasano niti na quiniuria. ¹³ Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutaniya pocuara secojoriquiano. Nojuacuajaari pa Jiyaniija Jesu. Nojuajaari maja Levi niquiohuacuajinio supueno. Nojuajaari supuetana Israel niyanuucujiniocuaja, saniniuujia tamonu neyanuucujiniojaarohua, teyanooacuajinio quenaaja niquiriya pueyacuara secojona supueyaquiriquiaaricuajani. ¹⁴ Maatia niishishiyacuajaari, pa Jiyaniijaari Judá niquiohuacuajinio supueno quiquiaari. Judaari Levi tarajanucuaja. Moisés pohuatasacari pueyacuara secojonaajinijini, majaari quenaaja Judá na jiyaniquinu quiquiaari.

¹⁵ Quiarijiani, quiarinio pocuara Secojona quishacari juhua Melquisedec, paari maatia niishiyani Levi niquiohuacuajinio supueno pueyacuara secojonaari sanitishaaquiaari. ¹⁶ Nojoriiri pueyacuara secojona quiquiaari saaja Levi niquiohuacuajinio supueno pueya nojori quiniuucua. Jesucristo cutaraari pocuara secojonara jiyatesaaquiaari pueyaracaanu rishijia na quiniuucua. ¹⁷ Cunora, Pueyasoori naa sequequiaari nojuajiniji: “Quiaari pueyacuara secojona quiniutianiya pueyaracaanura, juhua Melquisedec”.

¹⁸ Naacuajitij, puetunu Moisés rootasanojuanaa pueyacuara secojona pueya miishocoriquianoori tari jatasaquiaari, najuhua na quiniuucua. Cuno miishanoori cumacaaju quiquiaari pueya na jataniniuria.

¹⁹ Seetanujuanaari, Moisés Rootasanoori maja na naata quiquiaari saaja maninia miijiacara na jataniniuria na tojitiajaca. Quiaritia saniniuuja, paari Pueyaso rupaa Jesucristojiniji jitiaani. Nocua pa tiuushacari, Jesucristoori pueyaracaanu pa jyanootiquiaa na Que, juhuajaniya pa rupuenura nojuaja.

²⁰ Na Que sequesacari Neyanu quiniuria pocuara secojona pueyaraacaanura, nojuajaari naa sequequiaari seetanujuanaa. Naacuajitij, paari panaatia quiquiaani pa niishishacari Jesucristoori na Que shuriucua quiya, pueyaracaanu pocuara na secojonura na Que. Saniniuuja, majaari naa Pueyaso sequenu quiquiaari Leví niquiohuacuajinio supueno pueya, seetanujuanaa pueyaracaanu pueyacuara secojona nojori quiniuria. ²¹ Saniniuuja, Neyanujiniji na sequesano, cunoori seetanujuanaa. Majaari na sequesano jatanishaanu quiniutianiya. Naacuajitij, naa naajiotasano quiyari tariucuacaanu Pueyaso Rupaaajinia:

“Jyaniijia Pueyasoori seetanujuanaa sequeree na miishocoriguano. Majaari na sequesano na jatanini quiniutianiya. Neyanu sequerecuajaari: ‘Quiaari pueyacuara secojoriqiano pueyaracaanu’ ”.

²² Naacuajitij, pueyaracaanu na Que shuriucua Jesu quiniucua pocuara na secojonura, paari seetanujuanaa niishiyani paari Pueyaso pueyani, Neyanuucua pa tiuuniucua. Naacuajitij, Pueyaso rupaa Jesujinijiiri socua jyanohua maninia Moisés Rootasanojiniji. Cunoori pueyaracaanu rishijia Jesu quiniucua. ²³ Saniniuuja, Leví niquiohuacuajinio supuenoni, queraatia pueyacuara secojonaari quiquiaari pueyaracaanu rishiyashijia nojori quiniucua. ²⁴ Jesu cutaraari shaajeyashijia. Naa pocuara secojona na quishacaritij, majaari quenaaja tamonu sanitiniu quiniutianiya nojuaja. ²⁵ Naacuajitij, nocua pa tiuushacari, nojuajaari pueyaracaanu pocuara secojoquiaa, tojetaarucujanaa maninia miijiacara pa jatanishaanura, Pueyaso pa rupuenura. Majaari pocuara na Que na secojonu na tarinitianu quiniutianiya, shaajeyashijia na quiniucua.

²⁶ Jesuuri namitia pocuara secojona na Que. Majaari tamonu quiniu juhua nojuaja. Nojuajaari tojetaarucujanaa maninia miijiajuhuanajaj, juhua na Que Pueyaso. Majaari quenaaja sesa miiniu na niishiniu. Sesa miijiaa tajinia na quishacari mijiria, naajaa, majaari sesa na miiniu quiquiaari quenaaja. Saaja maninia miijia na quiniucua, nojuajaari tojetaarucujanaa tamaatia quijia mijiria quiniaa pueyajiniji. Naaratej, Pueyasoori jiyocuaacaanu quijara na jiyatequiaari, Jyaniijiajanaa na quiniuria na shuriucua, tii na secojonura na Que pocuara. ²⁷ Leví niquiohuacuajinio supueno pueyacuara secojonaa jyaniijianucuaari pueyaracaanu tama sesa nojori miishanoocuarajaaja seya puecootujua coteenu, Pueyaso jyanooniuria nojori. Naa nojori miiniu nuhuajitij, nojoriiri jiyacari narta Israel pueya seya puecoquiaari sesa cuno pojori miishanoocuaru saniniuuja. Maja cutaraari naa Jesu miiniu quiquiaari. Nojuaja jaara tama na cuaqueyajaaja tarinitiaquiaari pocuara na mosaanura juhua borregoniyojua sesa pa miishanoocuaru, cunojuanaari na cusunu quiquiaari. Majaari socua na caminiu quiniutianihua casonu. Naa na cusunucua pocuaratej, puetunu sesa miijiacajanaari na naata jyanoooshaanu puetunu sesa na miishanojinijijianaa. ²⁸ Moisés Rootasanojinia, Pueyasoori tii sequeyacuaja canapete pueyacuara secojonaa jyaniijiaara jiyateshiyani. Puetunu cuno pueyacuara secojonaa jyaniijianucujanaari sesa miijiaa quiquiaari, juhua puetunu pueyajuhujaj. Jyanohua Moisés nuhuajaj, Pueyasoori saniniuuja tama Neyanujuaaja jiyatequiaari pocuara secojonaanaa na quiniuria pueyaracaanu. Na Que tojjia na quiniucua pueyaracaanu, naquiya miiniu

rejeretaja na quiniuucuajuhuj, naacujitij, nojuajaari tojetaarucujanaa maninia, pocuara secojonara na jiyatesaanura.

8

Quiarinio Pueyaso Rupaacua pa tiuushacari, Jesuuri pa jiyanootiquiaa na Que

¹ Nio, janiya na pacutenutaniuhua sequenuni, cunoori socua panishano nia niishiniuria. Cua tojiri. Pueyaso Niyanu quiniuucua pocuara secojona, nojuajaari na Que miaquetajara cajiquiaari jiyocuacaanu. ² Nojuajaari tii na Que secojoquiaa pocuara Pueyaso Quishaquijianaa. Cunoori Pueyasojanaa shipinishano quiquio, maja pueyano tiasano.

³ Puetunu pueyacuara secojonaajanaari jiyatesaaquiaari nojori masejonura narta pueya poosano casaa, Pueyasora nojori niqutiojosano. Naajuhuj, nojoriiri seya puecojuaca, Pueyaso nojori jiyanootiniuria. Naacujitij, Jesucristo quiniuucua pueyacuara secojonajuhuj, nojuaja cuara casaa jiiitaara, Pueyaso na niqutiosocoriguanojuhuj. Cuno casaacuaajari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya. ⁴ Levi niqiuohuacuajinio supueno pueyacuara secojonaacuaajari pueya nitiasano nojoriicua masejoquiaajaa, Pueyasora nojori niqutiojosocoriguano taa Moisés Rootasanojinia sequeyacuajani. Naacujitij, Jesucristo jaara mijiria quiriquiaja, nojuaja maara pueyacuara secojona quiaquiriquiaj. Pueyacuara secojonaacuaajari queraatia quiya.

⁵ Pueyacuara secojonaa jecajosano casaa Pueyaso Secojojua tiajinia nojori jiiitiasanoni, nojori miishanonio, puetunu cunojuanaari saaja juhua jiyocuaacaanu casaa naaqui. Cunora, Moisés jaara tari shipiniriquiaa Pueyaso Secojouara suhuorotu, puetunu na casamitiajanaanio, jiyacaritij, Pueyasoori naa Moisés sequenu pacutequiaari:

“Moisésnaa, cua tojiri. Maninia quia miiri jacaria puetunujuanaa, naatej, taa cua niqutiquianucuaaja quiajaniyani, Sinaí tuhuananuucua quia quishacari”.

⁶ Pocuara Secojonajanaa miishanoori jiyanohua maninia socua pueyacuara secojona Levi niqiuohuacuajinio supueno miiijosanojiniji. Pocuara Secojona cutaraari tama na cusonutajaaja pa jiyanootiquiaari Pueyaso. Naacujitij, Pueyaso rupaa Jesucristojinijiiri jiyanohua socua maninia Moisés Rootasanojiniji.

⁷ Pueya jiuujia jaara na naata quiriquia seetanujanaa sesa miyashjiacara jatanishano Moisés Rootasano tojijiaca nojori quiniuucua, Pueyaso maara quiarinio rupaa niishitiyaquiquiaari pajaniya. ⁸ Saniniuujia, Pueyasoori niishiquiaari Israel pueyari maja na naata quiquiaari puetunu Moisés Rootasanojuanaa tojinii. Cunora, tariucuaacaanu pueyara Pueyaso sequesano caminiujunia sequesanoori naa naajiotasano quiya:

“Jiyaniija Pueyasoori sequeya: ‘Tamacari, janiyari quiarinio rupaa niishitiniutianiya Israel jiyajinijinio pueyani, Judá jiyajinijinio pueyanio. Teyano pojoriti nocua tiyani, nojoriiri seetanujanaa cua pueya quiniutianiya. ⁹ Quiarinio cua rupaari tamaatia quiniutianiya Moisés cua niishitijosano rupaajiniji puetunu Israel pueyarajanaa. Jiyacaritij, janiyari nojori mashiquiquiaari Egipto jiyajinijini. Juhua nojori que, janiyari nojori jaafucunuuriquiaa juucuanii nojori cua niqutiosocoriguano jiyajiniara. Saniniuujia, nojoriiri Moisés cua rootasano nojoriria tojinii paniyaquiquiaari saaja. Janiyari cunora nojori cartequiaarini’. Jiyaniija Pueyasoori naa sequeree. ¹⁰ Socua

sequeyari: ‘Nio pa quishacari nuhuaji, janiyari naa miiniutianiya cua saquiriojosano pueyarani: janiyari coojia nianutianiya nojori jiuuj-ajiniani. Naacuajitij, cua rootasanoori juhua naajiotasano quiniutianiya nojori niishitiajajinia, seetanujuanaa cua tojitiajaca nojori quiniuria. Naacuajitij, janiyari nojori Jiyaniijiajanaa quiniutianiyan. Nojoriiri saniniuujia cua pueya quiniutianiyacujua. ¹¹ Jiyacaritij, pueyano jaara janiyajiniji pohuatanu paniri narta pueyano, na cojiniajuhuj, tapueyocucanio, cunoori najuhua quiniutianiya. Puetunu pueyapuejanaacujaaari tariucua cua niishijaca quiniutianiya; jiyaniijianucua, poonijjotesano pueyano. ¹² Janiyari nojoricua taraajeja quiniutianiyan. Majaari cua saniitionu quiniutianiya nojori, sesa nojori miishanojiniji. Naa cua jiyanooshacari nojoritij, majaari socua cua saneejonu quiniutianiya sesa nojori miishano. Janiyari puetunujuanaa na niyajetanutianiyan’ ”.

¹³ Naa Pueyaso sequesacaritij, taa nojuaja quiarinio na rupaa niishitiniutianiya pajaniyan, nojuajaari tariucuaaanu Moisés na rootasano jiyatequiaari tariucuaanera. Naacuajitij, Moisés Rootasanoori quera shaa-jasaanutianiya puetunujuanaa.

9

Tariucuaaanu Moisés suhuorotesano Pueyaso quiquioranoni, cunoori juhua jiyocuaaanu Pueyaso quiquiojuhuj

¹ Tariucuaaanu, Pueyasoori Moisés sequequiaari mijiria na quiquiorano na suhuorotenura. Na niishitiojoquiaarijiaariuhua taa pueyacuara secojonaa poonijjonutianiya cuno na quiquiojiniani. ² Pueyaso Secojoua suhuorotuuri caapiqui sohuacaraca quiquiaari. Samari nujuatacojuaari coteenu sohuacajinia quiquiaari, miaquejanio, tee Pueyaso tacoji pan niojosaquiaari pueyaracaanucujani. Cuno sohuaca sesa quiquiaari “Pueyaso Shuriucua Quiquio”. ³ Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiquiojuanaa cutara. Naaratej, na sesa quiquiaari “Pueyaso Quishaquijianaa”. ⁴ Pueyaso Quishaqui tacoji nujuatajaari juhua-cutu, orojiniji shipinishano. Cuniqui catejaari shanohua jaanutaja Pueyasora. Pueyaso Quishaquijianaa cutarani, tii nujuatajaari puereetuca casaa, juhua caaja niquishano. Naananeecajiniji shipinishaquiaariiri. Puetunu na cuaqueyajanaari orota mishiquiosano quiquiaari. Na jiniacuma, casamiri mii racatasano quiquiaari. Pataconiyojua orojiniji shipinishanoori tii cajitiaquiaari “maná”. Manaari quiquiaari Pueyaso tinishano casaa, Israel pueya miaquesocoriquiano cariiquia jiyajinia nojori camarucuneejotasacari. Mii matariquiaajaariuhua Aarón nataca catuutianohua, puetunu na jajautajanaa. Mii maturiquiaajaariuhua sai neeca quejasano, nocua Pueyaso naajiotasano na rootasano, Moisés na niquitiojosano. ⁵ Cuno caaja tootiu caco nujuatejosano quiquiaariiri caapiqui shipinishano casaa, nesuhuaraca, juhua Pueyaso seya niquishano. Nojori nesuhuari coqueetasano quiquiaari. Teecojuuari, teje Pueyaso shacantuca mueranacujuquiaari Moisésacuajani. Cuno caaja tootiuuri seya nanaca majiriuutiasaqui-juhuj, Pueyaso jiyanooniuria puetunu Israel pueyajanaa. Tariucujaja puetunu cuno casaajiniijianaa cua pohuatasano niajaninya.

⁶ Pueyaso Secojoua tia jaara tari naa maninia tiasano quiquiaari puetunu na casamitajanaa, na nuhuaji, pueyacuara secojonaari pueyaracaanu tiuquijioquiaari Pueyaso Shuriucua quiquiojinia. Nojoriiri tii tiuquijioquiaari nojori miiniuria taa Moisés Rootasanojinia sequeyacuajani. Maja

cutaraari nojori tiuquitianu quiquiaari Pueyaso Quishaquijianaa sohucamara. ⁷ Saaja nojori jiyaniijia cutaraari tii tiuquiquiaari saaja ru-paquijia puetunu marijarajanaa. Na tiuquishacari Pueyaso Quishaquai, seya nanaca pataquiaariiri Pueyaso jiyanooniuria nojuaja, narta Israel pueyano, sesa nojori miishanojiniji. ⁸ Naa Pueyaso Quishaquai quiniucua mishiquionucua pueyacuajitij, Pueyaso Sohuanuuri pa niishitiya, pueyari juhuanajuaja maja na naata ru-puenu quiquiaari Pueyaso. ⁹ Naacuajitij, puetunu cunujuanaari quiquiaari juhua miriqui miishano, saniniuujia nio pa quishacari pa niishiniuria pocuara Secojonajanaa miishano pocuara. Puetunu pueyacuara secojonaa catijasano casaajanaari miriqui miishano quiquiaari saaja. Naajuhua, pa supuetanaa niqutiojosano casaa Pueyaso jiyanooniuria nojorini, puetunu naa miishanojuanaari miriqui miishano quiquiaari. Naacuajitij, cunoori maja na naata cuno pueya jiuujia jee-canu seetanujanaa, juhujaniya nojori ru-puenu Pueyaso. ¹⁰ Naaratej, cuno tariucuaacaanu rootasanoori saaja panishaaquiaari Pueyaso cuaara na santiquiaarijiaatijia quiarinio rupaata. Cuno tariucuaacaanu rootasanoori pueya niishitiquiaari teyano sumatuuteja miagueshiyani, teyano masha-cateja ratushiyani. Naajuhua, nojoriiri niishitishaaquiaari taacari pueya jeequeya na cuaqueyani, nojori casaanio, juhua maninia jeequejosano nojori quiniuria Pueyaso niqiuara. Puetunu naa pueya miishanojuanaari maja na naata pueya jiuujia jee-canu sesa nojori miishanojiniji.

¹¹ Quiari naataja saniniuujia, Jesucristoori pocuara Secojonajanaara jiy-atesaaquiaari, Pueyasojiniji na masenura Pueyaso jii-tiasano pajaniyarano. Cuno quiquio, tee na secojoquiaa na Que pocuaracuajani, cunoori seetanujanaa Pueyaso quiquio jiyocuaacaanu, maja pueyano tiasano. ¹² Naa Cristo tiuquishacari na Que quiquiojinia Pueyaso na jiyanoootiniuria pajaniyatej, nojuajaari maja na tiuquitianu quiquiaari cabra nanaca, juunu niqiuohua nanacanio. Nojuaja cutaraari tama na nanacatajaaja Pueyaso jiyanoootiquiaari pajaniya. Nojuajaari maja pueyaracaanu na tiuquijionu na Queecua, taa mijiria pueyacuara secojonaa jiyaniijianucua miiquiaaricuaani. Maja. Nojuajaari na Queecua tiuquiquiaari puetunujanaa. Naa pocuara na cusuucuatej, na Queeri Neyanuucua tiuujia jiyanooquiaa puetunujanaa. Naacuajitij, majaari Pueyaso shuricuaji pa taanuusaanu quiniutianiya. ¹³ Pueyasoori Moisés niishitiquiaari, pueyano jaara macu masaqui tiuquimia, jaara na quiarejuhuaj, jiyacaritij, nojuajaari juhua curuutuua Pueyasora. Naacuajitij, cuno pueyanoori maja na naata narta pueya ru-puenu. Majaari na naata Pueyaso Secojoua tiajinia tiuquiniujuhuaj. Naajaa, nojuajaari na naata jeequesano quiniuhua, seru nanaca jaara nocua majiriuutiasaaquiaari. Cabra nanaca, juunu nanaca, niyaco juunu catijasano juacani, puetunu cunujuanaari maninia quiquiaari pueyara, juhua jeequesano nojori quiniuhua Pueyasora. ¹⁴ Naa pueya cuaqueya quiniucua juhua jeequesano saaja seya nanacatacuatej, Cristo nanaca cutaraari seetanujanaa cumaacaraca pueya jiuujia na jeequenura seetanujanaa, puetunu sesa casaajiniijianaa. Naatej, taa pueyacuara secojonaa jiyaniijianucua tiuquitiaguaari seru nanaca Pueyaso Quishaquicuaani, pueya jiyanooshaanura, Jesucristoori naa miiquiaarijuhuaj. Pueyaracaanu quijia na quiniucua, Jesucristojuanaari tama na nanacajaaja tiuquitiaguaari Pueyasocua, pa jiyanooshaanura puetunu sesa pa miishanojinijianaa. Nojuajaari tojetaarucujanaa sesa miyashijia quiquiaari. Naacuajitij, na nanacaari poojia cajitiquiaa, nocua pa tiuushacari. Majaari socua pa jyaniniu pa naata tama pa cuaqueyajaaja jiyanoootiniu Pueyaso tama pa miishanotajaaja. Naacuajitij, quiar-ijia cutaraari pa naata pa Pueyasora poonijionu shitimia, seetanujanaa jiyanooshano pa quishacari.

¹⁵ Jesucristo cusunuucua pocuara, nocua pa tiuushacari, nojuajaari pa jiyanootiniara quiquiaari taa quiarinio Pueyaso rupaa sequeyacuajani. Naajuhuj, noo pojori, Pueyasocua tiuuijaca mijiria Jesu niyacarijiani, sesa nojori miishanoori jiyanooshaaquiiaari Jesu cusunota quiari quiri naata-jajuhuj. Naacuajitij, puetunu Pueyaso saquiriojosano pueyapuejanaari na naata puetunu Pueyaso niqutiojonu panishanojuanaa masenu, taa na sequequiaari niqutionu seetanujuanaacuajani, pueyaracaanu shuquiriaatia jatiqui pa quiniuria nata. ¹⁶ Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa miijiani pa casami serotasaanura maninia, teyano pueya pa panitiaa nojori jitianura pa casamicuajani pa shaajenu nuhuaji. Naacuajitij, paa jaara tari jamosaareni, pueyari maninia miiquiaa taa pa naajiotaqueaarucajani, saminio pa quishacarijia. ¹⁷ Naacuajitij, saminio pa quishacarijia, najuhuaari pa naajiotasano. Pa shaajesacari, jiyacari cutara pa casami-iri niqutiojosano. ¹⁸ Tariucuacaanu naajuhuj, seya nanacaari shootesaaquiiaari, Israel pueya niishiniuria Moisés Rootasanoori seetanujuanaa, nojori tojishocoriquiano. ¹⁹ Naa quiquiaariiri: Moisésri puetunu Pueyaso rootasanojuanaa nojuaja caminiujuquiaari puetunu Israel pueya niquiarajanaa. Na nuhuaji, Moisésri juunu niquiohua nanaca, cabra nanaca cojitiqiaari mohuacata. Cunojinia shitiaquiaari borrego cajaca naatusu hisopo cashacucuataari. Cunota, mohuacanacu majiriuutiaquiaari Pueyaso Rupaa na naajiotasanoocuaari, puetunu Israel pueyacuajanaano. ²⁰ Jiyacaritij, nojori sequequiaariiri: “Nio nanacaari pa niishitiya Pueyasoori seetanujuanaa pajaniyara miiniutianiya puetunu na sequesanojuanaa, paa jaara na rootasano tojijica quirini”. ²¹ Moisésri Pueyaso Secojoua tiaacua majiriuutiaquiaari nanacajuhuj, puetunu Pueyasora poonijotajara shipinjiosano casamiucujanaano. ²² Moisés Rootasanojiniji niishishiyacuajaari, quera puetunu casaajanaari saaja nanacata juhua jeequesano quiya Pueyasora. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

Sesa pa miiniuuri jiyanooshaaquiiaa Cristo cusunuucua pocuara

²³ Mijiria Pueyaso Secojoua tia, puetunu na casaatajanaa quiinuucua juhua jiyocuacaanu casaa naaqui, seya nanacaari maninia quiquiaaricujaja cuno mijiria casami quiniuria jeequesano. Saniniuuja, jiyocuacaanu casaa quiniuria jeequesano, socua maninia nanacaari panishaaquiiaari seya nanacajiniji. ²⁴ Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquiijanaa. Cuno quiquoori saaja juhua jiyocuacaanu Pueyaso quiquio naaqui. Cristo cutaraari seetanujuanaa Pueyaso Quishaquiijanaa tiuquiquiaari. Nojuajaari tii na Que Pueyaso secojoquiaa pocuara. ²⁵ Mijiria pueyacuara secojonaa jiyaniijianucuaari puetunu marijiarajanaa pueyaracaanu tiuquiijioquiaari Pueyaso Quishaqui saaja seya nanacata, pueya na jiyanootiniuria Pueyaso. Jesucristo cutaraari maja naa na miiniu quiquiaari. ²⁶ Jesu jaara Pueyaso pa jiyanootiriqia puetunu marijiarajanaa taa pueyacuara secojonaa jiyaniijianucua miiquiaaricuaani, nojuaja maara jiya shipinishaanujiniji mosaariquia puetunu marijiarajanaa. Quiari naataja saniniuuja, Jesucristoori mijiria rasaaquiiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijijanaa. Majaari socua na pacutesaanu quiniutianuhua monu. Naa na mosaanuucuatej, cunoori tariucujaja puetunu nocua tiuuijaca pueyajanaa jiyanooshaanura. ²⁷ Naatej, taatucuaa pueyani, nojoriiri shaajecoriquiano. Majaari nojori samiitiaconuhua mijiria nojori quiniuhua,

socua na cusonuhuaa juhua coteenu na cusunu. Nojori shaajenu nuhuaji, nojoriiri saaja sashiya Pueyaso nequesoreenura nojori. ²⁸ Naajuhuaaj, naa Jesucristo mosaanuucua jiyacaritij, saaja cunojuanaari na mosaanu quiquiaari, queraatia pueya jiyanooshaanura sesa nojori miishanojiniji. Naacuaajitij, pocua na muetasacariuhua, majaari jiyacari socua na mosaanu quiniutianihua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuujica rijionuucua tiuquiniutianihua, noo pojoriria canapue te na sashiyacuajani.

10

¹ Moisés Rootasano pueya miishocoriqianoni, pueyacuara secojonaa miishocoriqianojuhuaaj, puetunu cunojuanaari juhua seetanujanaa Pueyaso jiyocuacaanu casaa naaqui, Pueyaso racatasano Jesucristoocua tiuujica pueyarano. Moisés Rootasano tojitiajaca pueya cutaraari puetunu marijjarajanaa na seya puecootequiaari, Pueyaso jiyanooniuria nojori juucua. Naajaa, majaari na naata seetanujanaa maninia miijijaca pueyara na jatanishaanu seya nanacata. ² Naajuhuaaj, pueya miishacari puetunu Moisés Rootasanojuanaa, naajaa, nojoriiri maja seetanujanaa tama nojori jiuujiajaaja na cajitini quiquiaari. Cunora, majaari nojori tarinitianu quiquiaari nojori seya puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujanaa juhuajaniya nojori quiniuria. ³ Naa seya puecoosacari puetunu marijjarajanaa Pueyaso jiyanooniuria pueyatej, cunoori saaja nojori niishitiquiaariuhua tarijia nojori miishano sesa. ⁴ Paari seetanujanaa niishiyacuajani, juunu nanaca, cabra nanacanio, cunoori maja sesa pa miishano tuujujua seetanujanaa.

⁵ Cunora, tariucuacaanu Pueyaso Rupaajinia, mijiria Jesucristo nishacari na sequesocoriqianoori juhuacarijia naajiotasano quiquiaari. Naa sequeyari:

“Cua Pueyasonaa, janiyacuajaari niishiyani, majaari quioojia quia cajitini quiquiaa seya puecoosacari quiocuara, puetunu nataacuacajinijinojori pueya niqutiojosacari quiarajuhuaaj. Saniniujia, quiaari cuaqueyaraca cua quiniuria cua jiyateree, quiocuara cua mosaanura.

⁶ Majaari quia timiniu quiquiaa seya catijiasacari quiocuara, naajuhuaaj pueya shootesacari na seya nanaca, quia jiyanooniuria nojori sesa nojori miishanojiniji. ⁷ Naaratej, janiyari quia sequeyani: ‘Niya quiyacuajanjia cua miiniuria quia panishano cua Que Pueyasonaa, taa janiyajiniji tariucuacaanu naajiotasaaquiaricujani’ ”.

⁸ Moisés Rootasanojiniji pueyari maatia niishitiojosaquiaari nojori puecootenura tama na seyajaaja Pueyasoochuara, na nataacuacajinijinojori niqutiojonura nerajuhuaaj. Nojoriiri niishitiojosaquiarijuhuaaj nojori catijianura na seya Pueyasoochuara, tama nojori seya nanacajaaja shootesaanurajuhuaaj, sesa nojori miiniucua. Naajaa, Jesucristo sequesanojiniji, paari quiarijia niishiyani, puetunu naa pueya miishanojuanaari maja na timitini quiquiaari Pueyaso. ⁹ Nocuaaji, Jesucristoori naa sequequiaari na Que: “Niya quiyacuajanjia, cua miiniuria quia panishano”. Naacuaajitij, Jesucristojuanaari mijiria niqiaari pocuara na mosaanura, seetanujanaa jiyanooshano pa quiniuria cutara, maja najuhuaana seya puecoosaanura socua. ¹⁰ Pueyaso tojijia na quiniucua, Jesucristoori tama na cuaqueyajaaja tarinitiaquianu pocuara na mosaanura, tojetaarucujanaa jiyanooshano pa quiniuria pueyaracaanu. Naacuaajitij, na Que Pueyasoori juhua tojetaarucujanaa

sesa miyashijiacara pa jiyatequiaari, seetanujuanaa na pueya pa quiniuria tama nerajaaja.

¹¹ Israel pueyacuara secojonaa pueya poonijiosacari Pueyaso Secojoua tiajinia, nojoriiri pueyaracaanu seya puecooquiaa narta pueya miishanoocuaa sesa. Naajaa, naa nojori miishanoori maja seetanujuanaa na tuujunu pueya miishano sesa. ¹² Saniniuuja, Jesucristoori tama na cuaqueyajaaja tarinitiaquiaari pocuara na mosaanura niyacutesanojinia. Cunojuanaari na mosaanu quiquiaari. Majaari socua na pacutesaanu quiniutianihua monu. Na cusuucua pa niti, puetunu nocua tiuujiaca pueya sesa miishanojuanaari tojetaarucujanaa jiyanooshaaquiaa. Naa na tucuatunu nuhuaji Pueyaso miiniu panishano pueratej, nojuajaari na Que miaquetajara cajiquiaari. ¹³ Quiarijia tii sashiyari, Pueyaso cuaara na paraa shocotare puetunujuanaajaatijaj. ¹⁴ Naa niquiriyatu pueyano mosaanuucuatej, puetunu nocua tiuujiaca pueyajanaari maninia miijiacara jatanishaaquiaa, tojetaarucujanaa maninia pa quiniuria, Pueyaso rupuejaca pa quiniuria pueyaracaanu. ¹⁵ Pueyaso Sohuanucujajaari naa pa niishitiyajuhaaj naa Pueyaso sequesacari tariucuaaanu na rupaajinia:

¹⁶ “Pa Jiyaniijia Pueyasoori naa sequeya: ‘Nio pa quishacari nuhuaji, janiyari tamaatia miiniutianiya cua saquiriojosano pueyani, quiarinio cua rupaacua nojori tiuushacari. Janiyari quiarinio cua rupaa nianutaniya nojori jiuujiajiniani, na tojjijaca nojori quiniuria. Naajuhaaj, janiyari juhua na naajiotanutaniya nojori niishitiajajiniani. ¹⁷ Janiyari puetunu sesa nojori miishanojuanaa niyajetanutaniya seetanujuanaani’”.

¹⁸ Naacuajitij, sesa pa miishano jaara tari seetanujuanaa jiyanooshano quiya, cunora, majaari tari na panishaanu seya puecoosaanura, sesa pa miishanojiniji pa jiyanooshaanura.

Pueyaso pa ruppure jeequesano poojiata

¹⁹ Naacuajiti cua panishano cuarta Pueyaso pueyanaa, quiarijia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenuuca na nanaca pocuara. ²⁰ Nojuajaari quiarinio nuucua pa jaatiaquiaa na Queecua. Nojuajaari juhua pocuaji nuunuquiaari Pueyasooocua. Mijiria Pueyaso Secojoua tiajiniani, Pueyaso Quishaquiiri shiquiaruque toqueta mishiquionucua quiquiaari, pueya tiuquitiaquiniuria Pueyasooocua. Cuno shiquiaruque toque cutaraari sutequiaari Jesu cusosacari. Cunocujajaari pa niishitiya, pocuajiiri juhua nuunusano quiya Pueyasooocua. Neyanu Jesucristocujajaari cuno quiarinio nuu. Nocua pa tiuushacari, paari pueyaracaanu rishijiacara jatanishaaquiaani juhua nojuajuhaaj. ²¹ Nojuacuajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa. ²² Cunora, Pueyasooocua pa catecanoriquia seetanujuanaa pa paniniutia nojuaja. Nojuaja pa secojoriquia, seetanujuanaa nocua pa tiuuniutia, maja quenaaja nocuaji pa taacanuunuta. Naa pa rupueriquia nojuaja, jatanishano jiuujiata, juhua poojiacua Jesu nanaca majiriutiasano quishacari. Naajuhaaj, puetunu sesa pa miishanojuanaa cuaara jiyanooshano quiiria, naatej, taa pa cuaqueyacaani, pa nanasacari maniniuniacu mohuacata. ²³ Niaa jaara moojinia tiuquinijosaaquiaari, niaari maninia pohuataquiaari pueya niqiara Jesuucua nia tiuuniujiniji. Nocua nia tiuushacari, niaacuajaari niishiya puetunu Pueyaso sequesanojuanaari pajaniyara tohuatenutaniya, pueyaracaanu shuquiriaatia pa quiniuria nata. Majaari nia taacanuunu nocuaji. ²⁴ Parta Pueyaso pueyacuata tacaajiacua pa quiriqia. Panijiacua pa quiniuria pa shiniujutiooriquia, maninia miijiacua pa quiniuriajuhaaj. ²⁵ Noojiaqueya

parta Pueyaso pueyari tari jiiitiquiocanu maja na rerejonura narta Pueyaso pueyata. Majaari naa nia miiniujuhuaj. Maninia cutaraari pueyaracaanu pa rerejonura parta Pueyaso pueyata, pa shiniujuitionura. Naa pa miriquia pueyaracaanu cutara, pa niishishacari pa Jiyaniijia tiuquiniuuri tari catecanoya.

²⁶ Nia niishiri pueyanaa, maatia pa niishiniu nuhuaji seetanu Pueyaso rupaajanaa, paa jaara saaja sesa mijioquiaa tama pa panishacarijiaajani, ¿cancucua socua pocuara cusonu pacuterohua saajaniuhuj? Shaaqui. ²⁷ Naa sacuaraatia miijiacani, nojori cuaara niishiiria, nojoriiri cocuaatia miya. Nojori jaara nojori jiuujia tacatoyaquiri sesa nojori miiniujiniji, nojoriiri jyanohua saniitiosaanutaniya. Narta Pueyaso paraata cojiritiasaanutaniya quejoonu mani quiquiojiniaari pueyaracaanura. ²⁸ Pueyano jaara Moisés Rootasano tojiyaquiquiaari, querajaa pueya jaara nocuara saquiriojotaquiaari, nojori sequesanoori seetanujuanaa quiquiaari. Naacuaajitij, majaari nocua na taraajenu quishaaquiaari na mosaanura. ²⁹ Moisés Rootasano tojiyashijiaa jaara naa miishaaquiaaricuaa, ¿paateeri jiyaniyanijia Pueyaso Niyanu soojeaca jyanooshaanutaniya, na nanaca shootesaanu jiyatejaca juhua najuhuanaratej? ¿Noo pojoritiiri jyanooshaanutaniyajuhaaj, Pueyaso Sohuanuucuaa rimiaaquejaca sacuaraatiej? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacacuaajaari Pueyaso jyanootiquiaari nojori, Pueyaso pueya nojori quiniuria juucua. Naacuaajitij, Pueyaso Niyanu soojeaca pueyari socua jyanohua saniitiosaanutaniya Moisés Rootasano tojiyashijiaa pueyajiniji. ³⁰ Paacuaajaari tari tojiquiaari naa Pueyaso sequesanooni: “Janiyacuaajaari naminiani. Janiyari sesa mijiaa saniitionutaniyani”. Naa naajiotasaaquiaarijiaariuhuj: “Pa Jiyaniijia Pueyasoori na pueya nequesoreenutaniya”. ³¹ ¡Jyanohua puereeta quiniutianiya cutaraari Pueyaso jyanooniu ruuretajaca pueyara, Pueyaso nequesoreesacari nojori!

³² Pueyanaa, tariucuaaanu naquiya nia miishaanu nia niishiriquia, niaa jaara shushajanaa Jesuucua tiuquiaari. Naa pueya miitiasacari naquiya nijaniyatej, niaari juhuajaniya rejeretaquiaari saaja. ³³ Noojiaqueya nijaniyajinijioori cararaatia macaatishaaquiaari. Niaari pueya niquiara naquiya miishaaquiaarijuhuaj. Niarta Pueyaso pueya niquishacari naa nia miishaanutej, nojoriiri na puereyaquiniutia nia cojiquiaari saaja, niaacua nojori taraajesacari. ³⁴ Naajuhuj, niarta Pueyaso pueyajinijinio jaara nujuatejosano quiquiaari nujuatejojuajinia, Jesu tojtiajaca nojori quiniuucua, niaari nojoriicua tiuquijioquiaari, nojori nia cumanjianura nocua nia taraajenuucua. Naajuhuj, nia paraa jaara nia jiiitiasano casami riutiocojoquiaari tama nojoririjaaja, nojori soosano Jesu pueya nia quiniuucua, niaari juhuajaniya nojoriria tarinitiaquiaari saaja. Niaari saaja shuquiriaatia quiquiaari nia niishishacari niaari jiyocuaaanu jiiitiaa socua maninia casaa cuno casamijiniji, pueya jaariuutiasano nijaniyajinijini. Cuno, Pueyaso jiiitiasano niaaranoni, cunoori shaajeyashijia casami cutara. ³⁵ Naatej, taa juhuajaniya naquiya miiniu rejeretajaca nia quiquiaaricuaajani, Pueyaso sequesanoocua tiuujiaa nia quiniuucua, naa Pueyaso sequesanoocua tiujiaa nia quiriquia pueyaracaanu. Pueyasocuaajaari jyanohua maninia miiniutianiya nocua tiuuniu tarinitiaashijiaa. ³⁶ Naquiya nia miishacari pueyaracaanu, juhuajaniya nia rejeretariquia saaja, maninia nia tucuatana puetunu Pueyaso panishano nia miiniurijanaa. Naacuaajitij, niaari puetunu Pueyaso sequesanojuanaa masenutaniya, pueyaracaanu shuquiriaatia nia quiniuria. ³⁷ Tariucuaaanu Pueyaso sequesanoacuaajaari naa naajiotasano quiya:

“¡Niaaj! ¡Quera tiuquiya pueyacia Niriquiano! Maja na tarishiniu. ³⁸ Cua jiyanooshano pueyari pueyaracaanu rishijiacara jatanishaanutaniya saaja Quiyanuucua nojori tiuushacari. Saniniuujia, tamonu pueyano jaara nocua tiuuniu tarinitiare, nojuajaari cua soosano pueyano quiniutianiya”.

³⁹ Cuno pojoriiri saniitiosocoriquiano seetanujuanaa. Pajaniya saniniuujia, paa cutaraari maja jiyano pueyajinijini. Paacujaari pa Jiyaniijiacua tiuujiacani, pueyaracaanu nata pa quiniuria shuquiriaatia.

11

Pueyasocua tiuuniujiniji pahuatasano

¹ Pueyaso sequesanoocua pa tiuushacari, paari niishiyani paari puetunu Pueyaso sequesanojuanaa masenutaniyani. Nocua pa tiuushacari, paari maatia niishiyani puetunu na sequesanojuanaa pajaniyarano pa niquishoo casaani, cunoori seetanujuanaa quiya. ² Noojiaqueya pa supuetanaajinijini-oori seetanujuanaa Pueyaso sequesanoocua tiuujiaa quiquiaari. Naaratej, Pueyasoori nojorijiniji naa sequequiaari: “Cuno pojorini, nojoriiri maninia cua pueya, cua sequesanoocua nojori tiuuniuucua seetanujuanaa”.

³ Pajaniyara naajuhua. Tariucuacaanu Pueyaso Rupaacua pa tiuushacari, paari niishiyani Pueyasoori jiya shipiniquiaari saaja na pocuanuta. Naacuajitij, puetunu pa niquishano casaajanaari shipinishaaquiaari niquishoo casaajiniji.

⁴ Supuetana Abel tiuuniuucua Pueyasocua, Pueyasocuaara na catijiasanoori socua maninia quiquiaari Pueyasora tarajanu Cain catijiasanojiniji. Naa Abel tiuuniuucua Pueyasocuatej, Pueyasoori na jiyatequiaari maninia na pueyano na quiniuria. Pueyasoori Abel catijiasano timitiaquiaari, nocua Abel tiuuniuucua. Cunora, tarajanu Cainri Abel moquiaari. Naajaa, naa macu na quishacaritij, nojuajaari pa niishitiojiyajaa Pueyasocua pa tiuuniuria taa nojuaja tiuujiaaricuaani.

⁵ Supuetana Enoc quiniuucua Pueyasocua tiuujia, Pueyasoori puetunujuanaa na riquiaari jiyocuacaanu, mijiria na shaajeyaquiniuucua. Narta pueya pajesacari nojuaja, majaari tari na quiniu quiquiaari. Pueyasoori tari na riquiaari. Tariucuacaanu Pueyaso Rupaajinia, nojuajinijiiri pohuatashiyacuaja, Enocnaari Pueyaso timitijia pueyano quiquiaari mijiria na quishacarijia. ⁶ Seetanujuanaari, paa jaara Pueyasocua tiuyashijia quirini, majaari pa naata timitini Pueyaso. Naacuajitij, cante Pueyaso niishiniuucua jiaatiaani, nojuaja cuara tiuuria Pueyasoori seetanujuanaa quijia. Nojuaja cuara tiuriajuhuaj, Pueyasoori na seconuujuaca tojiquiaa. Nojori panishano miiquiaa nojoririjaarihuaj.

⁷ Pueyasoori supuetana Noé numootequiaari nojuajaari nio jiya pa-jaashitianiutianiya, puetunu mijiria sesa miijiacajanaa na shaajanura. Pueyasoori na sequequiaarijuhuaj puereetuuca buque na shipininiuria tii na tacatajara pajaacujia. Jiyacaritij, Noeri maja na niishiniu quijia pajaa. Naajaa, Pueyaso sequesanoocua na tiuuniuucua, nojuajaari Pueyaso tojiquiaari. Naacuajitij, nojuajaari necocua, puetunu necohuatajanaa cureequiaari, necohua niquicohuatajuhuaj. Puetunu narta mijiria quijia pueyajanaari csonuuquiaari pajaajinia, nojori tiuyaquiniuucua Noé pohuatasanoocua Pueyasojiniji. Noé cutaraari juhua sesa miyashijiaari jiyatesaquiari pueyaracaanu Pueyasota rishijiaara na quiniuria, Pueyasocua tiuujia na quiniuucua.

⁸ Abrahamri Pueyasocua tiuujiaarijuhuaj. Pueyaso sequesacari nojuaja tamonu jiyajiniara na pacunura, Abrahamri na tojiquiaari. Tama na

jiyajinjijiaaja na quiasacari, majaari na niishiniu quiquiaari tee cuniquiria na quiaani. Nojuajaari saaja niishiquiaari Pueyasoori na quijara na niquitionutaniya tama na jiyaranojuaja. ⁹ Pueyaso niquitiosocoriguiano jiyajinia na tiuquishacari, Abrahamri cuno jiyajinia quiquiaari juhua ru-cuanejojua pueyano. Abrahamri juhuanujuaja maja cuno jiya camaru na quiniu quiquiaari. Naajaa, Pueyaso sequesanoocua tiuuja quiquiaari pueyaracaanuuri. Nojuajaari saaja seya cajacajinjij shitasano suhuorotujinia quijia quiquiaari pueyaracaanu. Abraham niyanu Isaacri naa quijia quiquiaarijuhuaj, Isaac niyanu Jacobonio. Pueyasoori cuno nojori sequenu pacutequiaarijuhua coteenujuanaa na sequesano Abraham. Naacuajitij, nojoriiri Pueyaso sequesanoocua tiuujiaca quiquiaari pueyaracaanujuhuaj. ¹⁰ Pueyaso jaara Abraham sequequiaari, nojuajaari pueyaracaanu na quijiarano quiquio na niquitionutaniya, Abrahamri niishiquiaari Pueyasoori miriqui sequeriquiaa tama na shipinishano tiacajinjijiaaja. Cuno pueyaracaanu rishijia tiacaari Pueyaso niishiriojosano tiaca na saquiriojosano pueyarano. Abrahamri cuno tiacara sashijia quiquiaari pueyaracaanu, Pueyaso sequesanoocua na tiuuniucua.

¹¹ Naajuhuj, seetanujuanaa Pueyaso sequesacari Abraham, nojuaja na muetutenutaniya, Abrahamri jiyacari tariucua saaquiano quiquiaari. Neco Saaraari puera motaja quiquiaarijuhua na manajenura. Naajaa, Abrahamri niishiquiaari Pueyasoori cumaacaraca quijia na sequesano na tohuateenura. Naa Pueyasocua na tiuuniucuatej, Pueyasoori na cumaquiquiaari neco na manajonura. ¹² Naacuajitij, mueya shipiniyashijia saaquianoori mueya mueratequiaari. Cuno neyanuucujajinio supueno pueyari queraatiara canequiaari, queraatiata juhua riya, serojiyaquishoo, juhua shoniniacu caminia shuriuquioco paajia jaaquia.

¹³ Puetunu cuno pa supuetanaajanaari Pueyasocua tiuujiacaja shaajecoquiaari. Nojoriiri juhuanujuaja maja na jitianu quiquiaari seetanujuanaa Pueyaso sequesano nojori na niquitiosocoriguiano. Naajaa, seetanujuanaa nojori tiuushacari Pueyasocua, nojoriria, Pueyaso sequesanoori juhua tariucua tucuaaanuji nojori niquishano quiquiaari. Nojoriiri na timitiaquiaari juhua tariucua nojori jiiitasano. Naacuajitij, nojoriiri juhujaniya quiquiaari juhua rucojuaca nojori quishacari mijiria. Nojoriiri niishiquiaari, mijiria nio jiyani, majaari seetanujuanaa nojori quiquiorano. ¹⁴ Naacuajitij, paari niishiyani nojoriiri tamonu jiya jitianuucua jiaatiariquiaa, pueyaracaanu nojori quiquiorano cutara. ¹⁵ Nojori jaara saaja mijiria jiya camaruhua quiniuria panijiaa quiquiaari, nojori maara na supuetujua jiyajiniara riujuuquiaariuhua. ¹⁶ Saniniuujia, nojori cutaraari socua maninia jiya jitianuucua jiaatiaquiaari, pueyaracaanu nojori quiquiorano cutara. Cunoori jiyocuacaanu quiquio, Pueyaso jeenucuasano nojoriria. Naaratej, majaari Pueyaso caririquiniu quiquiaari nojori sequesacari: "Pueyasoori canaa jiyanjia". Nojuacuajaari tari jeenucuasano tiaca jiiitia nojoririano jiyocuacaanu.

¹⁷⁻¹⁸ Pueyaso sequesano Abraham na mueratesano mueya jaara tari mashajaniyojua quiquiaari, Pueyasoori Abraham saniquiaari, na niishinuria nojuajate seetanujuanaa na tojjia. Naacuajitij, na sequequiaariiri cuara na panishano niyanu moora, nocuara na catijasocoriguiano. Cuno neyanu Isaaccuajaari Pueyaso sequesano quiquiaari, nojuajinjij canenu-taniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruuretano quiquiaari Pueyaso. Nojuajaari tari Pueyaso sequesanoocua tiuuriquiaa saaja. ¹⁹ Seetanujuanaa Abraham tiuuniucua Pueyasocua, nojuajaari niishiquiaari Pueyaso na naata neyanu Isaac samiitianiniuhua, nojuaja jaara na more. Naacuajitij, quera

Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojijia. Naacuajitij, Abrahamri neyanuniyojua jaatucuquiaariuhua shuquiriaatia na quiquio-jinihuara, juhua macu samiitianishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiari naatajacuaani.

²⁰ Isaac tiuuniuucua Pueyasooacajuhujaj, nojuaja jaara saaquiano quiquiaarijuhuaj, nojuajaari necohua sequequiaari, Jacobo, Esaúno: “Pueyasoori jiyanoehua maninia miiniutianiya niaara, niaacuajinio supueno pueyano, taa na sequequiaari janiyacujani”.

²¹ Jacoboori Pueyaso sequesanoocua tiuujia quiquiaarijuhuaj. Naacuajitij, quera na cusun panishacari, nojuajaari neyanu José niquiohwa sequequiaari: “Pueyasoori jiyanoehua maninia miiniutianiya niaara, niaacuajinio supueno pueyano”. Naa na sequenu nuhuaji na juhuatej, nojuajaari na natacaacua tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequesanojuanaa.

²² Jacobo niyanu Joseeri Pueyaso sequesanoocua tiuujia quiquiaarijuhuaj. Naacuajitij, quera na cusosacari, nojuajaari niishiquiaari Pueyasoori tamacari Israel pueya mashiquiniutianiuhua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujanura na nucuhua Egipto jiyajinia, nojori jaara quiojorohua Pueyaso niquitiosocoriquiano jiyajiniara.

²³ Moisés queya quiniuucua Pueyasooocua tiuujia, nojoriiri Moisés jamoquiaari jaara shusha rasaquiaari, mueya maniniuniyojua na quiniuucua. Naa na shocojoquiaariiri jiuujianaraca raca, pueyaracaanu jamosano na quishacari. Egipto jiyaniijia Faraónri tarijia sequequiaari, puetunu Israel pueya niquiocohua shusha roosano canuujuanaa cuara moojinia quejoosaria. Naajaa, nojoriiri cuno sequesano tojiyaquiquiaari nojori puereyaquiniutia saaja, Pueyasooocua tiuujia nojori quiniuucua.

²⁴ Naajuhujaj, Moisés quishacari tariucua cumantumaca, Pueyasooocua tiuujia na quiniuucua, nojuajaari na canashitinia Faraón niyatu tamacaquiaari. Nojuajaari tama sequequiaarijaaja: “Majaari Faraón jinianu cua quini paniniu. Janiyacujari Israel pueyanoni”. ²⁵ Egipto jiyaniijia jinianu na quiniuucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaari cuno shuquiriaatia quiniuuri saaja rapaquijia mijiria. Nocujaj, majaari na tamacan quiquiaari narta Israel pueya, shuquiriaatia na quiniuria tamajaaja. Nojuaja cutaraari narta Israel pueyacia taraajequiaari, Egipto jiya jiyaniijia poonijitenuucua nojori puera. Cunora, nojuajaari niishiriojoquiaari nojuaja cuara cojiritiasaaria naquiya miishaanu narta Israel pueyatajuhujaj. ²⁶ Pueyaso sequesanoocua tiuujia na quiniuucua, nojuajaari niishiquiaari Pueyasoori na tojitajaca miiniutianiya maninia pueyaracaanu cutara. Nocujaj nojuajaari saquiriojoquiaari narta Israel pueyata soosano na quiniuria mijiria, maja puetunu Egipto casami jiiitaja na quiniuria mijiria, Faraón jinianu na quiniuucua.

²⁷ Pueyaso sequesanoocua tiuujia Moisés quiniuucua, na nuhuaji, nojuajaari Israel pueya jaatiaquiaari Egipto jiyajiniji. Majaari na puerenu quiquiaari Egipto jiya jiyaniijia juaashacari jiyanoehua. Seetanujuanaa Moisés tiushacari na niquiyaquishoo Pueyasooocua, nojuajaari Pueyaso

niquiquiaari noojiata, juhua na shuriucua quiyano pueyaracaanu. Naacua-jitij, Moisésri tama na cuaqueyajaaja cumaquiquiaari maja na tarinitianura miiniu Pueyaso sequesano nojuaja. ²⁸ Quera Israel pueya mashishacari Egipto jiyajiniji, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashijiaca jiyapueranuhua na puecoonura puetunujuanaa. Nocuaji Israel pueya quia numootere, borrego nanaca nojori shuquiujitianura na tia tohuateyaji, maja nia jiyapueranuhua cusojuaaanurajuhuaaj”. Moisésri Pueyaso sequesanoocua tiuquiquiaari. Naacua-jitij, puetunu Israel pueya jiyapueranuhuaajiniinijiojuanaani, majaari que-naaja niquiriyatu niyanu mosaanu quiquiaari cutara.

²⁹ Israel pueya mashishacari Egipto pueyacuaaji juucua, Naatunacu jiyani-shano caminiaari nojori ritiaquiaari saaja. Nocuaji, Pueyasoori caminia raquitiaquiaari nojori nuura. Na nuhuaaji, Pueyasoori Moisés sequequiaari puetunu nojorijanaa cuaara niuutiaara caminia taquijiria. Israel pueya tiuuniucua Pueyaso sequesanoocua, nojoriiri joojuashiquio niuutiaquiaari juhua puereetunu nucuaco. Egipto jiya jiyaniijia soldadohua jaara juhua nojori niuutianu paniquiaarijuhuaaj, nojoriiri saaja shushiniuuquiaari.

³⁰ Israel pueya tiuquishacari Pueyaso niquitiosocoriquiano jiyajinia, nojoriiri na paraa Jericó tiaca shocua camarucuneetaquiaari siete juuca, naatej, taa Pueyaso rootaquiaari nojori miiniuracuajani. Naa nojori tiuuniucua Pueyaso sequesanoocuatej, Jericó tiaca shocua sohuacaari puetunu pojotaquiaarijanaa. ³¹ Puetunu Pueyaso tojitiashijiacajanaari puecoosaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajiniinio namuenujuanaa na jamojonuucua tarijia narta pueyacuaaji. Rahabri naa maninia miiquiaari Pueyasooocua tiuujia na quiniucua. Naaratej, Israel pueyari cuno paanatu jiyanooquiaari.

³² ¿Teyano pa supuetanaajiniji cua pohuatanutaniya nijaniya socuani? Socua queraatia pa supuetanaari Pueyasooocua tiuujia quiquiaari. Tarcuajua cua pohuatasano, maninia nia niishiniuria Pueyasooocua tiuujia pueyari Pueyaso jiyanooshano. Naajuhuaaj, majaari jeya cua quiniu cua pohuatanura maninia nio pojorijiniji: Gedeón, Barac, Sansón, Jefe, David, Samueljinijinio, socua narta Pueyaso sequesano caminiujunaa pueyajini-jinio. ³³ Pueyasooocua tiuujia nojori quiniucua, nojoriiri tamasa jiyani-ijianucua miaquejoquiaari na jiyajiniji. Pueyasooocua tiuujia nojori quiniucua, nojoriiri maninia jiyanijianucua quiquiaari, maninia na jitianura narta Israel pueya. Pueyaso sequesanoocua tiuujia nojori quiniucua, nojoriiri Pueyaso sequesano nojori na niquitiosocoriquiano masequiaari. Pueyasooocua tiuujia nojori quiniucua, juurunu sareya rupaari juhua seecujutasaquiaari saaja, maja na soonura nojori. ³⁴ Pueyasooocua nojori tiuuniucua, nojori jaara manijinia quejoosaaquiaari, nojoriiri maja na catenu quiquiaari. Pueyasooocua tiuujia nojori quiniucua, nojoriiri na paraacuaaji mashiquiaari saaja, maja na puecoosanura nijiniaquetucua mueruuta. Pueyasooocua tiuujia nojori quiniucua, sasaca pueyari jiyanohua cumaacaraca quijiacara quiquiaari. Pueyasooocua tiuujia nojori quiniucua, nojoriiri jiyanohua cumaquishaaquiaari na paraa nojori miaquejonura, na paraa nojori mashiquiniuria nojori jiyajinijijuhuaaj. ³⁵ Naajuhuaaj, Pueyasooocua tiuujia maajipohua quiniucua, nojori macu-ri samiitiacoquiaariuhua nojoriira.

Tamasacaari jiyanohua taraatia miishaaquiaari Pueyasooocua tiuujia nojori quiniucua. Cunora, nojori paraa jaara nojori quiooquiaari, nojori-iri puecoonura miananajosaquiaari nojori jaara Pueyaso tojinu tarinitiaaquiri. Nojori jaara na paraa sequesano tojiquiaari, nojori maara cartesaaquiaariuhua. Pueyasooocua tiuujia nojori quiniucua, nojoriiri saaja

paniguaari nojori cuaara puecoosaariaqui, naajaa, jiyanoehua naquiya na miiniutia. Nojoricuajaari niishiquiaari, Pueyasoori nojori samitiianijionutaniuhua, jiyanoehua shuquiriaatia nojori quiniuria pueyaracaanura cutara. ³⁶ Tamasaca quiniucua Pueyasooqua tiuujiacajuhua, nojoriiri cararaatia macaatishaaquiiaari, jiyanoehua majacusaquaiaarijiiaariuhua. Naajuhua, tamasaacari cumayocua shipinishano casaata morojosaaquiiaari. Nujuatejojuajinia nujuatejosaaquiiaariiri. ³⁷ Tamasacaari saitia jacusaquaiaari na puecoosaanura. Tamasacaari na cajiniocua rashiquiojosaaquiiaari jacaria jiyaratajata juhua juhuana, socua jiyanoehua naquiya na miishaanura. Naajuhua, tamasaacari nijiniaquetucua mueruuta puetujusaaquiiaarijianaa piyonu. Naajuhua, tamasaaca quiniucua Pueyasooqua tiuujiacajuhua, nojoriiri juhua taanusano rucoojoquiiaari puetunu tiqiyocujanaa. Casamijiuniucua nojori quiniucua, nojoriiri saaja borrego shoque, cabra shoque cusupuequiiaari nojori cushishocoriquiano. Nojoriiri taraatia miitiasano quiquiaari, naquiya miishanojuhua. ³⁸ Juhua taanusano nojori quiniucua, nojoriiri juhua tashuquioono rucoojoquiiaari cariiquia jiyajinia, tuhuanuhuaajiniano. Tiaajunucua nojori quiniucua, nojoriiri saaja raaco maquiayonuucua quiquiaari. Mijiria quijiaca pueyari nojori jiyatequiiaari juhua najuhua quijiaca pueyara. Naajaa, nojori cutaraari seetanujanaa Pueyaso timitiasano pueya quiquiaari, nocua tiuujiaaca nojori quiniucua.

³⁹ Pueyasocuaajaari nojori jiyanoocuaiaari, seetanujanaa nojori tiuuniucua nocua. Naajaa, nojoriiri juhanoujaaja maja nojori masenu quiquiaari seetanujanaa Pueyaso sequesano nojori na niquitiosocoriquiano. ⁴⁰ Pueyasoori nio pa quishacari nojori sashitijajaa, jiyanoehua maninia na miishacari pajaniya na Sohuanuta, Neyanu Jesucristoocua pa tiuuniucua. Na nuhuaji, Pueyasoori puetunu nojoritiajanaa pa cojiritianutaniya jataniniyo tojetaarucujanaa maninia miijiaca pa quiniuria, na shuriucua na rijiosacari puetunu pajaniyajanaa.

12

Jesu miishano pa niishiriojoriquia, naquiya rejeretajaca pa quiniuriajuhuaj

¹ Naa pa niishishacari taa queraatia pueya maninia miiquiaari Pueyasooqua tiuujiaaca nojori quiniucuaacuaani, cunora, tama pa cojetasano najuhuaana casaa pa tarinitiariquia. Tarinitiahiyari puetunu najuhuaana casaajanaa, teyanoocua pa cojequiaa Pueyaso panishano pa miyaquiniuriacuajani. Naajuhua, puetunu sesa miiniujanaa pa tarinitiare, puetunu pa macaajanaa pa jiitianura, juhuajaniya rejeretajaca pa quiniuria. Naacuaajiti pa naata maninia tucuatano puetunu Pueyaso panishanojuanaa pa miiniuria. ² Jesu miishano pa niishiriojoriquia pueyaracaanu. Nojuajaari tojetaarucujanaa na Que Pueyasooqua tiuujia quiquiaari. Nojuajaari niishiquiaari, naquiya na miiniu nuhuaji, na Queeri jiyanoehua shuquiriaatia quijiara na jiyatenutaniya. Naaratej, nojuajaari juhuajaniya rejere-taquiiaari naquiya na miiniu niyacutesanojinia, cararaatia na miishaanujuhua. Cunora, nojuajaari na Que miaquetajara cajiya, Jiyaniijijanaa na quishacari.

³ Majaari nia niyajetanu taa Jesu rejeretaquiiaari juhuajaniyacuaani, pueyaracaanu sesa miijiaca paracaashacari nojuaja. Nocua nia niishiriojoriquia, niaa mariqui Pueyaso tojiniyo tarinitianu paniriiri nia tarajenuta naquiya nia miishacari. ⁴ Niacuaajaari naquiya miishaaquiiaa, Jesucristoocua tiuujiaaca nia quiniucua. Naajaa, majaari pa Jiyaniijia nia tacaratanu, naquiya nia miyaquishaanuucua. Naa rejeretariquia saaja. Majaari juhanoujaaja nia puecoosaanu quiquianu na tojitiajaca nia quiniucua.

⁵ ¿Niaateeri Pueyaso rootasano niyajetarucuaa tari, na rootasano pajaniya juhua necohuaja? Naa sequeyari:

“Quiyanunaa, majaari cua rootasano quia soonu, janiya jaara quia niishitiojiya naquiya cua miitishacari quiajaniyani. Janiya jaara quia nacasure socua maninia miijia quia quiniuriani, majaari cucuaji pishiniu. ⁶ Quia Jiyaniijia cua quiniuucua, janiyacuaajaari cua panishano pueyano jiuujiyashijiani sesa na miishacari. Naajuhuaaj, janiyari cua niyanura cua jiyatesano pueyano saniitiojuani jaara sesa miiriquia”.

⁷ Naaratej, juhuajaniya na rejeretajaca nia quiriquia. Pueyasoori juhua necohua nia niishitiojiya, maninia na canashitiniuria nijaniya, seetanujuaanaa necohua nia quiniuucua. ¿Pueyanoteeri nareja niqijia neyanu, neyanu jaara na tojiyashijia quiriquia? ¡Maja! ⁸ Naajuhuaaj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacuajitij, Pueyaso jaara nareja niquiriquia nijaniya sesa nia miishacari, cuno maara quiri maja seetanujuaanaa necohua nia quiniuucua, juhua tamonu queecuajinio nia quishacari. ⁹ Naajuhuaaj, naatujoori pa quishacari, pa queyari pa majacujua, nojori pa tojiyaquishacari. Majaari cunora nojori rerequetejaca pa quiniu quiquiaari. Naacuajitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuaanaa pa sohuanu Que, pueyaracaanu rishijia pa quiniuria.

¹⁰ Pa queyari pa canashitioquiaari taa nojori paniquiaaricuaajani. Nojori rootasacari pajaniya, nojori saniitosacari pajaniya, cunoori quiquiaari saaja mijiria pa quiniuria maninia. Pa Que Pueyaso saniniujia, nojuajaari pa saniitioquiaa seetanujuaanaa maninia miijia pa quiniuria, juhua nojuaja pa quiniuriajuhuaj. ¹¹ Seetanujuaanaa, puetunu saniitionujuaanari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaaquirini, paari socua maninia miijia jatanishaaquiaani, socua Pueyaso tojiijara pa quiniuria juhuajaniyajuhuaaj.

Jiyanohua cocuaatiaari Pueyaso pa tojiyaquishacari

¹² Naacuajitij, majaari nia pishiniu pueyanaa, Pueyaso saniitosacari nianiani. Nocua nia tiuri saaja. Nioojiaca nia cumaquiriohua. ¹³ Saaja Jesucristo rupaa tojiijaca nia quiri, jatarinitiaja Pueyasocua tuujiaca mariqui noojia niqijiotereeri. Nojori cuaara saniya cumaquishano quiri cutara.

¹⁴ Tama nia cuaqueyajaaja nia cumaquiriquia, juhuajaniya quijia nia quiniuria puetunu pueyatajanaa. Majaari juayonuujutanu. Nia saniriquia seetanujuaanaa sesa miyashijia nia quiniuria. Saaja noo pojori cutaraari pa Jiyaniijia niqiniutianiya, seetanujuaanaa maninia miijiacara jatanishano pueyatej. ¹⁵ Pueyasocuaajaari pa jiyanoojia. Tama nia cuaqueyajaaja nia cojuare niaa mariqui Pueyaso ruuretareeri na naacunu panishacari nijaniya. Nojuajaari cumaacaracuaaja na cumaquiniuria nijaniya nia panishacari. Naacuajitij, niarta Pueyaso pueyano jaara juaatishaare tamonu miiniuucua sesa nojuaja, nojuaja nia naacure na jiyanooniuria sesa na minia. Jaara naa miyaquiritij, cuno pueyano juaaquiaacari narta pueyaca paaquenutaniya na sesonura queraatia pueya. ¹⁶ Naajuhuaaj, tama nia cojuatooriquiaajaaja. Naa nia miitiooriquia tamonu nijaniyajinijinio mariqui Pueyaso sequesano na niquitiosocoriquiano pajaniya soojeara quiriri, saniya tama na cuaqueyajaaja na shuquiritiniuria mijiria. Supuetana Jacobo puerana Esauucuaajaari naa miiquiaaritij. Tamacari na miaajesacari, nojuajaari Jacobo sequequiaari: “Cua tarajanunaa, pa que niquitiosocoriquiano janiya, na jiyapueranu cua quiniuucuanu, cuno cuaara quiri quia, quiaa jaara quia sumatuujiniji rupore quiri. Jiyanohua

miaajeyanijia”. ¹⁷ Niaacuaajaari niishiya, na nuhuaji, Esauuri paniquiaari na que secojonura nocuara, jiyanoehua maninia Pueyaso miiniuria nojuaja, na que jiyapueranu na quiniuucua. Na queeri na ruuretaquiaari saaja. Esauuri jiyanoehua na que nenecoquiaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso niquiaara.

¹⁸ Nio pa quishacari, pajaniyara, Pueyasoori maja juhua tariucuaaanu na quishacari pa supuetanaa Israel pueyata. Jiyacaritij, Pueyaso jaara Moisés tacaniquiaari Sinai tuhuananuucua, Moisés na niishitiojonura na rootasano na pueyara, tuhuananuuri jiyanoehua puereeta niquishano quiquiaari. Tuhuananuuri puereeta noshiriquiaa. Na najacaari tacariquiaa mueruucatej. Jiyanoehua ninishiquiiri quiriquiaajuhua. Paratuuri jiyanoehua piyarojoriquiaa puereetajuhua. ¹⁹ Trompeta jonenenuunuuri jiyanoehua tojishaariquiaa. Pueyaso pocuanuuri jiyanoehua tojishaariquiaajuhua. Israel pueya tojishacari Pueyaso pocuaano, nojoriiri jiyanoehua puereetajuhua. Naaratej, nojoriiri Moisés sequetuquiaari maja socua Pueyasojuanaa pocuanura nojoriicua. ²⁰ Nojoriiri maja socua na rejeretanu quiquiaari puera puereeta Pueyaso sequesacari nojori. Pueyasoori jiyacari naa sequeriquiaa nojoritij, cuno tuhuananuucua nojuajanaa quiniuucua:

“Cante nio tuhuananu rupueyani, cuno pueyano cuara mosaaria saitia jacusano, cashanata soj. Naa miijia seru cuara naa puecoosaaria-juhua”.

²¹ Puetunu Israel pueya niquishanojuanaari jiyanoehua puereeta quiquiaari seetanujanaa. Moisésjanaari na puerequiaarijuhua. Nojuajaari na puerenuta sequequiaari: “Cua puerenuta teteaanijia”.

²² Nio pa quishacari saniniuujia, majaari pa catecanonu quiquiaa cuno tariucuaaanu pueya pueresano tuhuananuucua. Jesucristo cusonuucua pocuara, paari Pueyaso quiquiojiniajanaa tiuquitiaquiaani. Cuno na quiquio sesaari miriqui sequeshiya “Sión tuhuananu”. Na pueya pa quiniuucua, nojuajaari jiyocuaaanu pueyaracaanu pa quijiarano tiaca jitiaa. Cunoori seetanujanaa jiyocuaaanujinio Jerusalén tiaca. Naacujitij, paari jiyanoehua queraatia Pueyaso seya rupuequiaani, Pueyaso pa maninihuaqueetanura nojoritiajuhua. ²³ Paari tii rerejonutaniya puetonu parta Pueyaso pueyatajanaani. Pueyaso saquiriojosano pueya pa quiniuucua, pa sesacaari jiyocuaaanu Pueyaso nequesoretuneejinia naajiotasano quiya. Paari Pueyasoocua catecanoquiaani. Nojuajaari puetonu pueya nequesoreenajanaa. Jesucristo niyacarijia Pueyasoocua tiuujiaa sohuanuhuari tii quiyajuhua, canapue Pueyaso jiyatequiaari tojetaarucujanaa sesa miyashijiacaracujani. ²⁴ Jesucristoori tii quiyajuhua. Nojuajaari tama na cusonutajaaja Pueyaso jyanootiquiaari nocua tiuujiaa. Tama na nanacajaja na shootenuucua pocuarajuhua, paari cunota jeequejosaquiaari tojetaarucujanaani. Naacujitij, Jesu nanacaari jiyanoehua socua maninia Abel nanacajiniji. Cain monuucua tarajanu Abel, Abel nanacaari Pueyaso shiniujia na mona cuara mosaariajuhua. Jesucristo nanaca saniniuujia, cunoori Pueyaso pa jyanootiquiaacujia.

²⁵ Cunora pueyanaa, tama nia cuaqueyajaaja nia cojuare maja nia ruuretanura Jesucristo Rupaa. Tariucuaaanu, pueyari jyanoyaquishaaquiaari nojori ruuretasacari Pueyaso sequesano, nojuaja jaara nojori piriyojouquiaari Sinai tuhuananujiniji. Nojoriiri jyanoyaquishaaquiaari nojori tojiyaquiniuucua mijiria Pueyaso quishacari na sequesano. Nojori jaara naa jyanoyaquishaaquiaaricuaa, nio pa quishacari saniniuujia, ¿paatucua taa jyanooshaariquia pa ruuretasacari Pueyaso quiarijiani, jiyocuaaanuji

na piriyojosacari pajaniyani? ²⁶ Pueyaso pocuasacari Sinaí tuhuananu-jiniji, jiyari na pocuasacari tetecaquiaari. Quiarijia saniniuuja, Pueyasoori seetanujuanaa sequeya: “Janiyari socua caminiutianihua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miiniu”. ²⁷ Naa na sequesacari taa socua na caminiutianihua jiya jiuuquiutianuni, naacuajiti paari niishiyani, puetunu na shipinishano casaajanaari shaajeyaquisshaquiji shaajenutaniya. Saaja noo casaari cureenutaniya, maja na naata pootiosano casaatej. ²⁸ Quiarinio quiquio, Pueyaso shipinishano na niqutiosocoriquiano pajaniyani, cunoori maja na naata shaajasaanu quiniutianiya cutara. Paari jiyaniijianucua quiniutianiya tii pueyaracaanuni. Pa Pueyasoori jiyanoehua maninia miiniutianiya pajaniya. Cunora pa shuquiritiare nojuaja. Paari na shuquiritiyani pa timitiasacari nojuaja. Naacuajitij, nojuaja pa timiteare jiyanoehua pa paniniutia nojuaja, pa puerenutatio. ²⁹ Nojuajaari puereeta mani, Neyanu ruuretajaca shaajaja, sesa pa miishano catijajajuhuj.

13

Taa pa miyani Pueyaso pa timitiniuria

¹ Majaari panitioonu nia tarinitianu. Naa Pueyaso pueya nia quiniuu-cuatej, pueyaracaanu panitiojuaca nia quiriquia. ² Naajuhuj, majaari rucojuaca ruoretanu, niaacua nojori tiuquishacari. Nojori panijia nia quiriquia. Noojiaqueya pa supuetanaajiniiniocuajaari Pueyaso seya masuquiaari na tiacora, nojori jiyaniishacari nareja pueyano naasucua.

³ Nujuatejosano pueyacuara taaajajaca nia quiriquia. Tama nia cuaqueyajaaja nia jiyatere juhua nojoritia nujuatejosanojuhuaj, nojoriicua nia taraajenura seetanujuanaa. Naquiya miitiasano pueyacuara taaajaja nia quiriquiajuhuaj. Nia niishiriquia, niaari na naata naa miitiasaanujuhuj.

⁴ Pueyasojuaanaacuajaari pa niishitioquiaari pa camitioonura. Cunora, camitioonu pueya cuaara saaja neyacata, necocuata quijia quiiria. Cante camiyojuanu, nojuaja cuaara tama na cuaqueyajaaja cojuaaara maja narta pueyano niqiuocua na numuetucunura, na camishoo maajinio. Nia niishiri, Pueyasocujaari naa sacuaraatia miijia saniitionutaniya.

⁵ Majaari cumaneeca porocua nia quiniu tama niaarajaaja nia jiitianura. Juhujaniya quijia nia quiriquia nia jiitiasanota. Nia niishiri, Pueyasocujaari sequequiaari: “Majaari cua cartenu quiniutianiya nijaniya juhua japueyojua nia quiniuria. Majaari quenaaja cua tiujianu quiniutianiya nijaniya”. Cunora pueyanaa, maja nia tacaaniu. ⁶ Naa seetanujuanaa na sequesanoocua pa tiuushacaritij, pa naata sequenu taa supuetana David naajiotaqueiaari na sequesanoajani. Naa sequequiaariiri: “Jiyaniijia Pueyasocujaari cua naacuna. Naacuajitij, majaari cua puerenu quiniutianiya. Majaari pueyano na naata taa miiniu janiya”.

⁷ Coteenujuanaa nia jiitianaa pueya nia niishiriojoriquia, noo pojori canapete shushajanaa nia tojitioquiaari Pueyaso rupaacuajani. Nojoriiri seetanujuanaa Pueyaso tojijia quiquiaari, Jesucristoocua tiuujiaca nojori quiniucua. Juhua nojori quiniucua jiaatijaca nia quiriquiajuhuaj, taa nojori quiquiaaricuaani.

⁸ Taa quijia Jesucristo quiquiaari tariucuaaanuni, nojuajaari naa quiyajaa. Naa quiniutianiya pueyaracaanuuri. Majaari na jatanu. ⁹ Naaratej, majaari tamaatia niishitiojosano nia tojinu. Miaquenu pueresanojiniji niishitiojosano cutaraari najuhuanaj. Cunoori maja quenaaja na cumaguiniu quiquiaari na tojitijaca. Naajuhuj, majaari pueyacuara secोजना jiuujia cumaquishaanu quiquiaari nojori miaquesacari Pueyasorano puecoosano

seya shujiniji. Pueyaso Sohuanu cutaraari poojia cumaquiquiaa, panijiaa pa quiniuria. ¹⁰⁻¹¹ Saniniuujia, pueyacuara secojonaa jiyaniijaari maja noo shu na miaquenu quiquiaari cutara, Israel pueya jiyanooshaanura puecoosaaquiaariti. Pueyacuara secojonaa jiyaniijaari cuno seya nanaca tiuqutiaquiaari Pueyaso Quishaquijianaa puetunu marijitarajanaa, cuno nanaca na majiriuutianura tii. Na nanaca shootesano seruuri saniniuujia tiacajiniji jiyatasaaquiaari mij, tii na catijiasaanura puetunjuanaa. Pueyacuara secojonaa jiyaniijaari tojetaarucujanaa tenujusaquiaari maja na miaquenura cuno shu. Nio pa quishacari saniniuujia, paari jiyanoohua cumaquishaquiaani Jesucristo cusunuucua pocuara. Cunojiniji, paari seetanujanaa Pueyaso rupesano quiyacuajani. ¹² Naajuhua, Jesucristo mosaanura pocuara, nojuajaari Jerusalén tiacajiniji jiyatasaaquiaari-juhuaj, naatej, taa na nanaca shootesano seya jiyatasaaquiaari tamaquiriacuaani. Nojuajaari naa tama na cuaqueyajaaja tarinitiaquiaari na mosaanura, tojetaarucujanaa jeequesano pa quiniuria puetunu sesa pa miishanojinijijianaa. ¹³ Nojuajaari jiyanoohua cararaatia teetesaquiaari niyacutesanojinia pa niti. Naa Jesu miiniuucua pocuaracuaatej, Pueyaso niishiyashijiaa jaara cararaatia miiriquia pajaniya Jesuucua pa tiuniuucuaani, juhuajaniya na rejeretajaca pa quiriquiajuhuaj. ¹⁴ Pajaniyara, Jesuucua tiuujiacani, nio jiyari maja pa quiquio. Mijiria, shaaquiiri pueyaracaanu rishijia quiquio pajaniyarano. Cunora, paari jiyocuacaanu pajaniyarano Pueyaso shipinishano tiacaacua jiaatiaani. ¹⁵ Naa Pueyaso jitianuucua pueyaracaanu rishijia quiquio pajaniyarantej, nojuaja pa timitiariquia pueyaracaanu. Neyanu Jesucristo quiniuucua pocuara Secojona, nojuajaari pa tiuqutiaquiaa na Queecua. Nio pa quishacari quiarijiani, majaari Pueyaso paniniu pa seya nanaca. Nojuacuajaari paniquiaa pa shuquiritianura nojuaja cutara. Naacuajitij, pa rupaa pa jiyatere Pueyasora na quiniuria saaja, pueyaracaanu nata pa maniniuhuaqueetanura nojuaja. Cunocujaari na panishano. ¹⁶ Naajuhua, majaari nia niyajetanu maninia nia miiniuria niarta Pueyaso pueya. Nojori jitiaaquishacari nojori panishano, nia jitianasano casaajiniji nia niqutiojoriquia nareja nojori. Paa jaara naa miijaca quirini, paari juhua Pueyasora pa casaa niqutioyani. Cuno cutaraari na timitiquiaa.

¹⁷ Cuarta Pueyaso pueyanaa, nia jitianaa tojtiajaca nia quiriquia. Majaari nojori niishitiojosano nia ruuretanu. Nojoricuajaari nioojiaca cojuaquiaa pueyaracaanu, nojori niishishacari Pueyasoori nojori nequesoreenutaniya nia jitiajaca nojori quiniuucua. Naaratej, shamaatia nojori tojtiajaca nia quiriquia maninia, Pueyaso nojori pohuatanura shitimia nijaniyajiniji. Niaa jaara nojori tojtiaashijiaa quiri, nojoriiri Pueyaso pohuatanutaniya na taraajenuta nijaniyajiniji. Jaara naa quiritij, niaa cutaraari taraatia quiniutianiyajuhua.

¹⁸ Canaacuara nia secojonuuriquia. Canaacujaari saaja maninia miiniuria saniniujuquiaa pueyaracaanuni. Naacuajitij, canaa jiuujiaari panatia quiya Pueyaso niquiara. ¹⁹ Janiyari jiyanoohua paniani cucuara nia secojonura, Pueyaso tiuqutiniuhuaa ritia janiya niaacua.

Nio naajiona panishacari maninia Pueyaso miiniuria pueya, na saruhu-atasacari pueyajuhua

²⁰ Jesucristo shootenuucua na nanaca pocuara, paari niishiyani puetunu Pueyaso sequesanojuanaari seetanujanaa pajaniyarano quiniutianiya pueyaracaanu. Naa Jesucristo miishanoocua pa tiuushacaritij, na Que Pueyasoori pa jiyanooquiaa, juhuajaniya pa rupenuura nojuaja. Pueyasojuaacuajaari pa Jiyaniija Jesucristo samiitianiquiaariuhua macujiniji.

Nojuacuajaari pa cojuana, na panishano pueya pa quiniuucua. ¡Jiyanhua maninia pa Pueyaso! ²¹ Neyanu Jesucristoocua nia tiuuniuucua, nojuaja cuaara jataniiria nijaniya tojetaarucujanaa jeenucuasano nia quiniuria, taa na paniyacuajani. Nojuaja cuaara naa miiria nijaniyatej, maninia nia tucuatánura puetunu na panishanojuanaa. ¡Pa Jiyaniijia Pueyaso cuaara pueyaracaanu shuquiritiasaaria jiyanhua maninia na quiniuucua! Cuaara naa quiiriatej.

²² Cuarta Pueyaso pueyanaa, jiyanhua nia secojiyanijia maja nia ru-
uretanura secaja rupaata cua shiniujiushacari nijaniya nio cua naajio-
jinia. ²³ Nia niishiri pueyanaa, parta Pueyaso pueyano Timoteori nujuate-
jojuajiniji tari tohuatesaaroahuacuaa. Nojuaja jaara tarishiyaquiri cucua
na tiuquiniuria, janiyari cucua na ruponutaniyani nia niquiniuucua cua
quiasacari.

²⁴ Naajuhua, quiria nia saruhuatare puetunu nia jitianaa pueyajanaa,
puetunu cuniqui quiniaa parta Pueyaso pueyajanaanio. Italia jiyajinijinio
parta Pueyaso pueyari nia saruhuataajuhua.

²⁵ Pueyaso cuaara na Sohuanuta cumaquiiria puetunu nijaniyajanaa.

SANTIAGO NAAJIONEE

Santiago naajiosano niyaquejeno pueyacuara

¹ Janiyari Santiagoni, Pueyaso seru, Neyanu Jesucristo serujuhuj. Nia saruhuataanija puetunu tiqiyocua jiyacajiniajanaa niyaquejeno Israel doce niqiuohuacujinio caneno pueyanaa.

Niishitiaja Pueyasojiniji masesano

² Cuarta Pueyaso pueyanaa, shuquiriaatia nia quiriquia niaa jaara taraatia miishaare, niaa jaara naquiya miishaarejuhuj. ³ Niaacuajaari niishiya, niaa jaara Pueyasocua nia tiuuniucua saniniujiushaare, niaari socua juhuajaniya sashijacara quiniutianiya. Niaaraari naa miishaanutaniyaqui nia sashishacari Pueyaso cuara puetunu maniniajanaa miiria niaarajaatia. ⁴ Nia rejeretare seetanujanaa maninia sashijaca nia quiniuria, majaari quenaaja nia taacanuunu. Niaa jaara naa miijia quiriti, niaari maninia jeenucuasano quiniutianiya, pueyaracaanu maninia miijia nia quiniuria.

⁵ Tamonu nijaniyajinijinio jaara niishiyaqui taa na miiniutianiya, nojuaja cuara Pueyaso maseera, Pueyaso na secjosacari. Pueyasoori na niishitiaja niqutionutaniya. Nojuajaari puetunu pueyajanaa niqutionuquia, capora na quiniucua. Majaari na juaani niaa jaara na masere.

⁶ Nia masesacari, seetanujanaa nia tiuuri Pueyasocua, majaari quenaaja nia taacanuunu. Cante na masesacari taacanuujani, nojuajaari juhua paratu piyarojosano mohuaca, naatej, taa paratu tacaroiya mohuaca na piyarojosacaricuaani. ⁷ Jiyano pueyanotej, Pueyasoori maja na masesano na niqutionu quiniutianiya, noojia niquijoteja na quiniucua. ⁸ Noojia niquijoteja pueyanoori quiarijia maseya na panishano. Tariqui na secjosacari saniniujia, tamonu casa maseyari, na paniyaquishacari coteenu na masesanocua. Jiyano pueyanoori noojia niquijoteja pueyaracaanu. Majaari quenaaja na miiniu panishano na tucuanu quiniutianiya.

⁹ Cua panishano Pueyaso muerasunaa, niaa jaara casamijiu quiri, naajaa, shuquiriaatia nia quiriquia. Pueyasocuaari nia jiyatequiaari na muerasura, na jitiiasanojiniji nia jitianurajuhuj. ¹⁰ Saniniujia, niaa jaara casamiriaca pueyano quiri, shuquiriaatia nia quiriquia Pueyaso jiyanooshano nia quishacari. Niaacuajaari niishiya niaari tojetaarucujanaa saniitiosoricuiano quiquiaari juucua sesa miijia nia quiniucua tarijia. Casamiriaca pueyanoori seetanujanaa juhua naana shuu, majaari na rishiniu. Saaja rupaquijia niquishiya shanohuari. ¹¹ Pananu jaara nasaaatia jama, neyonaari sorequee. Na shuuri tiqii. Shanohua niquishanoori shaajeequjuhuj. Casamiriaca pueyanoori naajuhuj. Na casami na niqutionosacarijia na canijanura juucua, canashiyaquiji shaajenutaniya-jaariuhuj.

Naquiya pa miishacari

¹² Shuquiriaatia quijia cutaraari Pueyasocua tiuujia, cante taraatia na miishacari rejeretaja saajani. Naa taraatia na saniniujiushaanuucatej, nojuajaari juhua cutara jiyaniijia tuhuaja niqutionaanutaniya, pueyaracaanu rishijia na quiniuria. Cunoori Pueyaso niqutionu panishano na panijia, taa na sequequiaaricujani. ¹³ Niaa jaara sesa miiniucua jiaatia, majaari sequenu: "Pueyasocui sesa cua miitini pania". Pueyasoori maja sesa miijia. ¿Pa Jiyaniijatucua casaara sesa miitiri pajaniyani? ¹⁴ Saniniujia, tama poojia sequejaarijia pa shiniujuquia sesa pa miiniuria. Naajuhuj,

tama pa niishitiajajaarijia pa sapojoquiaa sesa pa panishano pa miiniuria. ¹⁵ Naa sesa miiniuucua pa jiaatiasacaritij, cunora paari sesa miiquiaani. Naa sesa miijia pa quishacaritij, paari cunora shaajasaanutaniyani.

¹⁶ Cuarta Pueyaso pueyanaa, maja tama nia cuaqueyajaaja nia saponu. ¹⁷ Puetunu maninia casaajanaa pa masesanoni, cunoori Pueyaso niquitiosano jiyocuacaanuji. Nojuajaari puetunu jiyocuacaanu pa niquishano casaajanaa shipinijioquiaari, mijiria pa cuhuatariquiano. Pueyasoori pueyaracaanu maninia quijia. Majaari na jatanu tamaatia na quiniuria, na cojuaaquiniuria pajaniya. ¹⁸ Pueyasocujaari pa sohanu samiitiani-jioquiaariuhua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacujitij, taa pueyano tutaacuaa na shuquiriniutia na saaco rishishacaricuaani, Pueyasoori naa juhua pa tutaquiaari na shuquiriniutiajuhuj, coteenujanaa na jiyapueranuhua pa quiniuucua. Nojuajaari tariucuacaanujiniji naa pa riurioquiaaritij.

Seetanujanaa Pueyaso tojtijajaca

¹⁹ Naacujiti cua panishano cuarta Pueyaso pueyanaa, cua tojtitiare. Puetunu nijaniyajanaa cuaara quiiria ritia tojtijia, jacaria pocuaja. Cuaara quiiria shiniquiajuhuj, maja ritia juajia. ²⁰ Pueyanoori maja na naata Pueyaso panishano miiniu na juaaniutia. ²¹ Naaratej, nia cartere puetunu sacuaraatia nia miiniujianaa, puetunu sesa nia niishiriojosano-juaanaano. Nio pa quishacarini, puera sesa miiniuuri quiquiaa. Naa-juhuj pueyanaa, juhua maninia naatujua nia tojiri Pueyaso rupaa, taa nia niishitiojosaacquiaaricujani. Majaari na ruuretano. Pueyaso rupaacua-jari cumaacaraca tojetaarucujanaa sesa miyashijiacara na jiyatenura pajaniya.

²² Pueyaso rupaa tojijijaca nia quiri seetanujanaa. Majaari nia numaa shama nia tojtianunoj. Naa jaara Pueyaso rupaa tojijiaquiri, niaari tama nia cuaqueyajaaja sapojiya. ²³ Pueyano jaara Pueyaso rupaa tojijia saaja na numaa shama, nojuajaari juhua noo pueyanojua, na jiquioco niquirii niqutiujinia narejaari. ²⁴ Jaara tacateyarohua, na jiquioco niyajetasequihuari taamuecate na jiquioco quiriqiaani. ²⁵ Pueyaso rootasanoori jiyanohua maninia, maja quenaaja sesa. Sesa miiniuucua jiiitino pueyano jaara na tojijijara quiri, nojuajaari na naata sesa na miiniu tarinitianu. Cante na numaama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyara-caanujuhuj.

²⁶ Cante na niti rejeteyashijiani, nojuaja jaara tama na cuaqueyajaaja jiyaniya: “Janiya cutaraari Pueyaso tojijiani”, cunoori tama na cuaqueya sapojijajaacujua. Saaja sacuaraatia pocuaja quiya pueyaracaanuari. Nojuajaari najuhuaana Pueyaso rupaa tojijia. ²⁷ Cante seetanujanaa pa Que Pueyaso rupaa tojijiani, nojuaja cuaara japueyojuaca niqiniuucua rucua-neera, nojori na naacunura. Cuaara naa miiria mashiquiopuerajuhuj, nojori taraajenucujusacari nojori na cumanijianura. Naajuhuj, cuaara tama na cuaqueyajaaja cojuara, narta pueya na miyaquiniuucujaji sesa. Naa miijia pueyanotej, nojuajaari Pueyaso pueyano cutara.

2

Maja cumaati rimiajata pa paniniu pueya

¹ Cuarta Pueyaso pueyanaa, pa Jiyaniijia Jesucristoori shacantuuca cumaacajinia quijia. Nojuacuajaari tojetaarucujanaa maninia quijia. Nocua tiuujijaca nia quishacari, majaari rimiajata nia niqiniu tamasaca.

¿Pa Jiyaniijiateeri pa sooquiaaricuaa, ninishiqui quijiaca pa quishacarijiani? Maja. ² Cunora cua sequesanojinia nia niishiriojore: casamiriaca pueyano jaara na secjonuuja tajiinia tiuquimia, maniniuqui toqueraca, jaaniishoracajuhua, ¿taa nia miiniutianiyani? ³ Niaari naa sequeja: “Niya quia cajishii pueyanonaa, cajitii maniniuujiniani”. Saniniuujia, toqueeju pueyano jaara jiyacari tiuquimijuhua, jiyareta curuutuquenaniyojua, niaari na sequereecujua: “Cuniquijia quia nujuare”. Casaa maaraja: “Cuniquijia quia cajiri quiaa tii nujuani”. ⁴ Naa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Niaari casamiriaca pueyano jiyaniya nojuaja naasocua socua maninia pueyano casamiiju pueyanojiniji. Naaratej, niaari casamiriaca pueyano shuquiritini panijia.

⁵ Cua tojitiare cuarta Pueyaso pueyanaa, ¿majateeri nia niishiniu, Pueyasocuajaari casamiijuiniucua pueya saquiriojoquiaari nocua tiuujiaca nojori quiniuria? Nocua tiuujiaca nojori quishacari, nojoriiri juhua jiyanojua casamiriaca Pueyasora. Naajuhua, Pueyasoori nojori jiyatenutaniya jiyaniijianucua nojori quiniuria, puetunu Pueyaso jiiitasanojuanaa nojori jiiitanura. Naa miiniutianiya na panijiaaari taa na sequequiaari seetanujuanaacuajani. ⁶ Niajanijarijiaataj, niaari nojori cararojoquiaacujua. ¿Majateeri nia niishiniuujuhua, cuno casamiriaca pueyacuajaari nia nohuasejoquiaa na sajononuta? Nojoriiri nia jaamitiquiaa nequesoreenaacua, niaacuara na saquiriojotanura. Nojoriiri naa miituuquiaaqui nia jiiitasano casaaniyojua na jaariutianura puetunujuanaa. ⁷ ¿Majateeri nia niishiniu, nojoricuajaari pa shuquiritiasano jiyaniija sesacaquiaajuhua? Pa Jiyaniijia sesa jiyaniquituuquiaa na soonutaari.

⁸ Puetunu Pueyaso rootasanojinijijianaani, nioori socua tojishocoriquiano. Naa naajiotasano quiyari:

“Pueya nia paniri taa nia paniya tama nia cuaqueyacuani”.

Pueyanaa, niaa jaara cuno rootasano miiija quiriquia, niaacuajaari maninia miiija. ⁹ Saniniuujia, niaa jaara rimiajata paniri pueya, niaari sesa miya. Niaari saniitosocoriquiano, Pueyaso niishitiojosano tojiyashijia nia quiniucua. ¹⁰ Pueyano jaara puetunu Pueyaso rootasanojuanaa tojiquiaa maninia, saniniuujia, jaara niquiriyatu cuno rootasanojiniji tojiyashijia quiri, cuno pueyanocuajaari Pueyaso tojiyashijia. ¹¹ Pueyasojuanaacuajaari sequequiaari: “Maja nia camishoo maaji nia numuetucunu”. Sequequiaarijiaarihuaj: “Maja monu”. Naacuajitij, pueyano jaara na camishoo maaji numuetuqueyauquijia quiri, saniniuujia narta pueyano moyari, cuno pueyanoori Pueyaso rootasano tojiyashijiajuhua. ¹² Naa cumaati niishiya, Pueyasoori na muerasu nequesoreenutaniya taa nojori tojitiaquiaari na rootasocujani. Nocuaji tama pa cuaqueyajaaja pa cojuare taa pa miiquiaani, taa pa pocuaciaani. Nia niishiri, paari nequesoreesaanutaniya pa miishanojinijini, taa pa miiquiaari parta pueyani. Cante pueya panijia quiyani taa Pueyaso rootaquiaaricuaajani, nojoriiri jiyanooshaanutaniya taa nojori jiyanoquiaaricuaa tamasaani. ¹³ Saniniuujia, canapuate narta pueyano jiyanojashijia quiquiaarini, Pueyaso nequesoreenu juuca puetunu pueyajanaa, nojoriiri jiyanojashijiaaanutaniyajuhua. Canapuate jiyanojia cutarani, nojoriiri jiyanooshaanutaniya cutara, taa tamasa nojori jiyanoquiaacuani. Nojoriiri shuquiriaatia quiriqiano cuno juuca, Pueyaso nequesoreesacari nojori.

Pueyasocua tiuujiacaari maninia miiijaca

¹⁴ Cuarta Pueyaso pueyanaa, ¿maniate pueyano jaara sequere: “Janiy-acuajaari Pueyasocua tiuujiani”, nojuaja jaara maninia miyashijia quiyaa? Nojuaja jaara maninia miijara jatanishoo quiyajaa, najuhuaana sequere: “Pueyasocua tiuujianijia”. ¹⁵ Naacuajiti, tamonu parta Pueyaso pueyano jaara pa sequere: “Maja cua jiitianu toque. Maja quenaaja cua miaquesocoriquiano cua jiitianujuhua”, ¿taa pa miyani? ¹⁶ ¿Maniateeri paa jaara na sequereni: “Juhujaniya quia quiaarohua. Quia miaquesuhua. Toque quia cushishuhujuhua”? Maja. Paa jaara quenaaja na niquitioyaquiri na panishanoni, pa sequesanoori najuhuanaj. ¹⁷ Naajuhuaaj, pueyano jaara sequere: “Jesucristoocua tiuujianijia”, jaara seetanujanaa Pueyaso rootasano tojiyaquiri, na sequesanoori najuhuanajuhuaaj. Jiyano pueyanoori maja seetanujanaa Jesuucua tiuujia. Paa jaara seetanujanaa Jesuucua tiuujia quirini, pocua maninia miijiaa quiriujuhuaaj. Maninia miyashijaari maja seetanujanaa Pueyasocua tiuujia.

¹⁸ Pueyano jaara tamonu sequeriquia: “Quiaari sequeya quiaa Jesuucua tiuujia cutara. Janiyari saniniuujia maninia miijiani. ¿Taa cua niishiniutianiyani quiaari seetanujanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishitiniutianiyani janiyari seetanujanaa Jesuucua tiuujia cutarani, maninia cua miishacari”. ¹⁹ Pueyaso Rupaacua quia tiuuniucua, quiaari niishiyacuaja Pueyasoori Jiyaniijajanaa. Cuno quia tiuuniuuri maniniacuaja. Naajaa, nia niishiri, samaruhuari cuno niishiyajuhuaaj. Na puerenuta nocuaji tetcatiuyari. ²⁰ Mosanucuaanaa, ¿majateeri nia niishiniu? Jesuucua tiuujiaa nia quishacari, niaa jaara maninia miyashijiaa quiyajaa, Jesuucua nia tiuuniuuri najuhuanaj, nia tojiyaquishacari Pueyaso. ²¹ Niaacuajaari niishiya taa Pueyaso saniquiaari pa supuetana Abrahamni, na niishiniuria seetanujanaa nocua tiuujiatee. Pueyasoori naa na saniquiaari: na sequequiaariiri: “Abrahamnaa, quia niyanuniyojua quia more cucuara quia catijasocoriquiano”. Majaari Abraham ruuretanu quiquiaari Pueyaso sequesano nojuaja. Naaratej, Pueyasoori naa sequequiaari: “Jiyanohua maninia Abraham, cua tojjia cutara”. ²² Naacuajiti cuarta Pueyaso pueyanaa, naa Abraham tojinuucua Pueyasotej, paari maatia niishiyani nojuajaari seetanujanaa Pueyasocua tiuujia quiquiaari. Naajuhuaaj, Pueyaso sequesano na miishacari, nojuajaari Pueyasocua tiuujia quiquiaari tojetaarucua-janaa. ²³ Naa Abraham miiniucuatej, nojuajaari tariucuaaanu Pueyaso rupaajinia nojuajiniji naajiotasano tohuateequiaari. Naa sequere:

“Abrahamri Pueyasocua tiuquiaari. Naa na tiuuniucua Pueyasocuatej, Pueyasoori na jiyatequiaari juhua tojetaarucuaajanaa sesa miyashijia na quiniuria”.

Naa Abraham quiniucua Pueyaso tojjiatej, nojuajaari sequesaaquiaari Pueyaso rupuenata.

²⁴ Naacuajiti pueyanaa, Pueyasocuaajaari na sequesano miijia jiyanooquiaa. Maja cutaraari na jiyanooni noo pojori, nocua tiuuniu sequeja najuhuanatej. ²⁵ ¿Niaate niishiyajuhuaaj taa Pueyaso jiyanooquiaari Jeric tiacajinijinio paanaticuaani, nooj, Rahab jiyanishanotej? Pueyasoori na jiyanooquiaari neyatu na quiniuriajuhuaaj. Na jiyanooquiaariiri maninia na miiniucua caapiqui pueyano Israel pueyajinijinio. Rahabri cuno pueya jamojoquiaari na tiaco. Na nuhuaji, nojori mashiquiquiaariuhua tamocoori, narta Jeric tiacajinijinio pueya puecyaquiniucuaaji cuno pojori. Rahabri naa maninia miiquiaariti Pueyasojiniji na tojishanoocua na tiuushacari. Niishiquiaariiri Pueyasoori Israel pueya cumaquinia quiquiaari. ²⁶ Nio pohuatasanoori pa niishitiojiya, naatej, taa pa cuaqueya

macu quiya sohuanuujucuaani, naajuhuaaj, paa jaara Pueyaso sequesano miyashijia quirini, paari najuhuaana sequeyani: “Jesuucua tiuujianijia”.

3

Pa niti juhua mani

¹ Cuarta Pueyaso pueyanaa, maja cumaati puera niajanijajiniinio jiaatianu Pueyaso rupaa niishitiojona nia quiniuria. Niaacuajaari nishiya, Pueyaso rupaa niishitiojonaari socua jiyanohua saniitiosaanutaniya tamasaajiniji, nojori tojitiaaquiniucua tama nojori niishitiojosanojuaja.

² Puetunu pajaniyajanaari sequeyarucua miiquiaa sesani. ¿Teyano pueyanote tojetaarucujanaa narta pueyano najiquitiyaquijia na pocuasacari? Shaaqui. Pueyano sequesano jaara puetunu maniniajanaa quiri pueyaraanu, cuno pueyano maara seetanujanaa maninia pueyano quiri cutara. Cuno pueyano maara na naata puetunu tama na cuaqueyajaaja jiiitanu niishiriquiajuhua sesa na miyaquiniucuaaji.

³ Niaacuajaari nishiya, caballo rupaama jaara niasaare na niqitijiotaja, na camaru na tojiniuria, na netesacari, na camaruuri puetunu na caballo cuaqueyajanaa niqitijiotaa na panishaco.

⁴ Puereetuca buqueeri naajuhuaaj. Shiitaniyojua na niqitijiotaja jiiitaaariuhuaaj. Jiyanohua paratu piyarojosacari, naajaa, na camaruuri saa cunotaja na niqitijiotaa na panishaco.

⁵ Pa nitiiri naajuhuaaj, shiitaniyojua casaaniyojuaari pa cuaqueyajinia shipinishano. Naajaa, jiyanohua pocuanu niishijiaari. Sesa pa miitiyari. Nojuajaari juhua maniyashi. Maniyashi jaara jaare puereetuca cuhuariquiajinia, cuno maniyashiiri puereetuca maniria pacusee. Cuhuariquiaari puetunu catemaajanaa. Pa nitiiri naajuhuaaj.

⁶ Pa nitiiri seetanujanaa juhua mani quiya pa cuaqueyajinia. Paa jaara sesa pocuareni, paari puetunu pa cuaqueyajanaa sesoyani. Pa nitiiri puetunu sesa niishijiajanaa. Paa jaara sesa pocuare pueya niqiarani, puetunu pueyajanaari pa sequesano caminiuquiquiaa tamasa niqiarana. Pa nitiiri Sesaaca poonijiotasano. Naacuajitij, sesa pa pocuasacari, paari puetunu mijiria pa quiniujanaa sesoquiaani.

⁷ Pueyanoori na naata jiyartuutenu puetunu casaajanaa: jaacuatujuaa, roshiyocuatujuaajuhuaaj, moojiniinio casaanio. Seetanujanaari, pueyari tari naa na jiyartuutejoquiaa.

⁸ Maja cutaraari pa naata jiyartuutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura.

⁹ Paari jiyano pa nititaja pa Que Pueyaso maninihuaqueetaquiaani. Naajuhuaaj, paari Pueyaso shipinishano parta pueya sesacaquia natajuhuaaj.

¹⁰ Naacuajitij, pa rupaamaji tohuataari maninia sequesano, sacuraatia sequesanojuhuaaj. Cuarta Pueyaso pueyanaa, maja cumaati naa pa quiniutij! Maja maninia naatej.

¹¹ Samo nacajiniji pueyaracaanu pacaretajaari shocuanacu mohuaca. ¿Jataquiaate soj? ¿Pianacute saniniujia pacaretaquiaacujua? Maja. Samo nacaari pueyaracaanu maniniuniacu quijia.

¹² Cuarta Pueyaso pueyanaa, ¿mariyajate na naata muetunu shucue-najara? ¿Natecate sacamanajara muetujuajuhuaaj? Maja. Naajuhuaaj, maja pa naata pianacu mohuaca taquitianu cuari maniniujiniji. ¿Mohuacatucua casaara jatara tamaatiuniacurani? Naajuhuaaj, paa cuaara pueyaracaanu maninia pocuara saaja. Maja cumaati pa pocuasano pa cojitiniu sesa pocuasanota.

Niishijia pueyano

¹³ Tamonu niajanijajiniinio jaara niishijia quiri, nojuaja cuaara juhua-janiya maninia miiijia quiri nareja, maja pueya shocoteja. Jaara naa

maninia quijia quiri, pueyari niishiniutianiya nojuaja seetanujuanaa niishijia. ¹⁴ Saniniuujia, nioojia jaara najiqaquitishano quiri, niishijia nia quiyaquiniucua juhua niarta Pueyaso pueyano, niaari seetanujuanaa mosanucua. Naajuhua, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamajaaja, majaari nia jiyaniinu niaari niishijia. Naa miijia nia quishacaritij, niaa jaara tama nia niishitiajaaja shuquiritiare, niaari mosanucua saaja. Nia sequesacari: “Niishijia cutaranijia”, niaari sapojiya. ¹⁵ Cuno nia niishitijaari maja jiyocacaanuji Pueyaso niishitija. Cuno niishitijaari tama nia niishishanojuaja, mijiria niishishanojuhuaj, Sesaacajanaa niishishanonio. ¹⁶ Pueyanaa, tee Pueyaso pueya juaatishano quiya tamasaca jaara na shocotare, naajuhua, pueya miishacari saaja tama na panishanojuaja, tii quiyari juayonuujutano, puetunu sesa miiniujianaanio. ¹⁷ Saniniuujia, cante Pueyaso niishitija jitiiaa cutarani, nojuajaari maninia mijia pueyano cutara. Jiyano pueyanoori maninia quijia puetunu pueya niquiarajanaa, jiyanootio, jacaria pocuaja. Majaari na niishiniu ritia juani. Pueyacu taraajejaari. Majaari na niishiniu cuaracashijionu pueyacuara. Pueyaracaanu seetanujuanaa sequeyari. ¹⁸ Naajuhua, cante juaatoyano jiyanootiootejani, nojuajaari jiyanoohua shuquiriaatia quiniutianiya Pueyaso shuquiritishacari nojuaja maninia na miiniucua.

4

Mijiria casaacua jiaatijacajiniji pohuatasano

¹ ¿Niaate niishiya casaara nia juayonuujutaquiaa tamajaaja pueyaracaanuni? Niaari naa quiyaquij sesa miiniucua nia jiaatiasacari. Nioojaari najiqaquitishano quiquiaa nia panishanoocua nia jiaatiasacari sacuraatia. ² Naaratej, nia panishano nia maseyaquishacari, niaari na casamiicuaaji pueyano moquiaa. Niaari naa miiquiaa puera nia jiaatiasacari nia panishanoocuatej. Nia panishanoocua nia jiaatiasacari jiyanoohua, niaari cunora miriyojotaquiaa. ¡Niaari socua piyotaariquiaaqui! Niaari naa quiyaquij Pueyaso nia secojiyaquiniucua nojuaja niqutionura nijaniya nia panishano. ³ Naajuhua, niaa jaara na secojore, majaari nia masenu quiquiaa nia masesano. ¿Casaara nia maseyaquiquiaanoj? Nia sequeereraj. Niaari sesa nia jiaatianuta na masequiaajuhuanajaj. Niaari nia jiaatiasanoocua masequiaa juucua, tama nia cuaqueyajaaja nia shuquiritiniuria. ⁴ ¡Pueyanaa, niaaqui Pueyaso rootasano ruuretajacajuhuanajaj! ¿Majateeri nia niishiniu? Cante mijiria sesa miijia miishano timitiajacani, nojuajaari Pueyaso paracara quirii. Niaa jaara naa miijia quiniu panijahuaj, niaari tari Pueyaso paracara quirii. ⁵ Tariucacaanu Pueyaso Rupaajinia naa naajiotasanoori quiyaquij: “Pueyasoori na Sohanu niaquiaari poojiajinia, nera na cojuanura pajaniya. Jiyanoohua na paniniutia pajaniya, Pueyaso Sohanuuri pa jamuequiaa juucua saaja Pueyasora pa quiniuria”. ⁶ Naajuhua, Pueyasojuanaari jiyanoohua maninia naacuquiaa pajaniya, jiyanootio na quiniucua. Na Rupaajiniaari naa naajiotasano quiyajuahuaj: “Pueyasoori noo pueya paracaajia, narta pueyajiniji juhua socua cutara pueyano quiniu panijiatej. Saniniuujia noo pojori maniniucuaarijia, naa sequejacatej: ‘Maja cua naata miiniu maninia tamajaaja. Pueyaso cuara cua naacuura’”. ⁷ Naarate pueyanaa, seetanujuanaa Pueyaso tojitiajacara nia quiriquia. Cumaatia nia nujuatare Sesaaca, maja na shocotanura nijaniya. Niaa jaara naa miiritij, niaacuaji mashiniutianiyari. ⁸ Niaa jaara Pueyaso rupere,

Pueyasoori nia rupenutaniyajuhua. Sesa miijiacanaa, cua tojitiare. Taa curuutucojuanucua shuquirioyacuani, naa tama nia cuaqueyajaaja nia jeequejorejuhua sesa nia miishanojiniji. Noojiaqueya Pueyaso panijiacari mijiria sesa miishano paniquiaajuhua. Cuno pueya cuara noojia jeequejoora maja socua noojia na niquijiotenura najuhuanaj. Cuaara saaja Pueyaso panijiacara quiiria cutara. ⁹ Sesa nia miiniuucua nia nujuquette, nia taraajerejuhua. Nia sapiyonuure. Sesa miishano nia saroototanu nia jataniri namijiaacatenuucua. Sesa miiniuujiniji nia shuquiriniu nia jataniri taraajenuucujuhua. ¹⁰ Naa jaara nioojiajinia sequeriquia Pueyaso niquiara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jiyaniijianucua nia quiniuria.

Parta Pueyaso pueyacuara rimiaaqueyashijiaca pa quiriquiaq

¹¹ Pueyanaa, maja sacuaraatia nia rimiaaquenu niarta Pueyaso pueyacuara. Maja maninia naatej. Cante narta Pueyaso pueya sesacaani, Pueyaso Rupaajinia naajiotasano tojiyashijiacaari jiyanotej. Naa jaara naa miiritij, niaari Pueyaso Rupaajinia naajiotasano sesaca. Naajuhua, niaari tama nia cuaqueyajaaja jiyateya juhua jiyaniijiaara, niarta pueya nequesoreena nia quiniuria. Naa nia miishacaritij, niaari Pueyaso rupaa tojiyashijiacara quiqui. ¹² Pueyasojuanaari tamajaaja Jiyaniijiajanaa. Nojuacajaari na rootasano niishitijia pajaniya. Nojuajaari niquiriyatujua pa nequesoreena, pa saniniujiuriquianojuhua. Nojuajaari cumaacaraca pocuaji na tacunura, na shaajanura pajaniyajuhua. ¿Canteeri quiajanianiya, quia saniniujiunuria tamasaca, juhua nojori jiyaniijiani?

Majaari pa niishiniu tariquiria

¹³ Pueyari naa sequejaca: “Canaari tariqui quianutaniya tamonu tiacajiniani. Canaari cuniqui shocotenutaniya niquiriyatu marijiani canaa niquitiojosacari tii canaa casami. Canaari queraatia cumaneeca masenutaniya canaa casami samini”. Cua tojitiare naa sequejacanaa. ¹⁴ Majaari nia niishiniu taa nia juhuaquenutaniyani. ¿Niaatucua taa sequerene niaa jaara macu juhuaquema saaja? Nocuaji majaari naa sequenute pueyanaa. Pa quiniuuri juhua shushiquiani. Naatej, taa shushiquiacuaani rupaquijia niquishiyari, na nuhuaji tajimiohuari, paari naajuhua. ¹⁵ Naaratej, naa nia sequere cutara: “Pueyaso jaara paniri, canaari tariqui quianutaniya poonijionuucuaani”. Naa cutarate maninia sequenu. ¹⁶ Niaari saniniuujia sequequiaacujua: “Janiyari tariqui quianutaniyani cua miiniu panishano cua miiniuria”. Naa nia sequesacaritij, niaari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, niaari najuhuaana nia rupaa riutioconeetequiaa puera, juhua niishijia pueyano. Naa jaara tama nia cuaqueyajaaja naa jiyateya juhua tariqui miishocoriquiano niishijiatej, cunoori jiyanhua sesa. ¹⁷ Naajuhua pueyanaa, niaa jaara maninia miyaquiri, maninia miiniu niishijia nia quishacari, niaari tari sesa miijiaa.

5

Casamiriaca pueya nacasusaanu

¹ Nia tojitiare, casamiriaca pueyanaa. ¡Juhuaarijia nia sapuere! ¡Nia sariyocuatere! ¡Niaari naquiya miiniutaniya taraatia! ² Niaari jiyanhua casamiriaca. Cuno nia jiiitasano casamini, najuhuaana moqueyari. Surequeyari nia maniniuquiya toqueya miaqueyajuhua. Naacuajitij, puetunu

nia jiiitiasanojuanaari moquenutaniya. ³ Nia paatijosano oroni, nia cumaneecanio, najuhuana tiyarashiyari. Naacuajitij, pa Nequesoreenaari maatia niishiniutianiya niaari sacuaraatia jamuejaca quiquiaari. Naa miijiaca nia quiniucuatej, niaari saniitosaanutaniya. Niaari socua shaajasaanutaniyaquij. Niaari najuhuana queraatia casami paatijiya shuquiriaatia nia quiniuria tamajaaja mijiria. Saniniuujia, nio pa quishacariiri quera pa Jiyaniijia tiuquishacariuhua na saniniuujuniuria pajaniya. ⁴ Jiyaniijiajanaari nia poonijitotesano pueya tojiquiaa! Nojoriiri sariyocuatuiya nia cumaneecajiniji nia niquitioyaquiniucua nojori poonijionuunujiniji, niaara na senoonuucua nataacuaca nia cuhuariquijajiniji. ⁵ Mijiria nia quishacariija, niaari shuquiriaatia quiquiaa puetunu nia panishanojuanaa nia jiiitiasacari. Naa shuquiriaatia nia quishacaritij, niaari juhuajaniya shiyoshiya juhua puecoosocoriguiano cushiya. Niaari naa miishaanutaniyajuhuj. ⁶ Niaari maninia miijiaca puecoquiaa. Majaari nojori nujatanu quiquiaa niajaniya, nocuara nia tonujusacari nia cuaracashiniutia najuhanaj. Naacuajiti casamiriaca pueyanaa, niaa cumaati puetunu nio niaara sequesanojuanaa tojitiaa.

Juhujaniya pa sashiri pa Jiyaniijia

⁷ Naacuajiti cuarta Pueyaso pueyanaa, juhuajaniya nia sashiri pa Jiyaniijia cuara tiuquihuua. Cuhuariquia camaruuri na natanu nuhuaji naa sashiquiaa marujuhuj, maninia na natau moritianura. Maru sashiya-jariuhua cuara niiria, na natau jajau na querajacaatiniuria. ⁸ Naa nia sashirijuhuj. Majaari pa Jiyaniijiaacuaji nia pishiniu. Nojuacuajaari quera tiuquiniutianuhua. ⁹ Cuarta Pueyaso pueyanaa, majaari niarta pueyacuara nia rimiacaquenu nojori nia soonuta, niaa mariqui saniitosaareeri. Nia niishiri, pa saniniuujunia Pueyasoori pocua catecanoya. Tari juhua pa tohuateyaji nujuaari. Nojuajaari seetanujanaa pa saniniuujunia cutara. Nocuaji maninia pa quirij. ¹⁰ Pueyanaa, juhuajaniya pa rejeretarejuhuj, paa jaara naquiya miishaareni. Naatej, taa tariucuacaanu Pueyaso sequesano caminiuujuniaa rejeretacoquiaari taraatia nojori miishacaricaaani, naa nia rejeretarejuhuj. ¹¹ Paari niishiyacuajani, Pueyasoori naquiya miiniu rejeretajaca pueya shuquiritiaja. Maninia na miiniutianiyari. Niacuajaari tari pohuatasaaquiarijiuhuj taa supuetana Job rejeretaquiaari naquiya na miishacaricaaani. Na nuhuaji cutara, Pueyasoori jiyanohua maninia na miiquiaariuhua, jiyanohua pueyacuara taraajeja na quiniucua, jiyanojiaariuhuj.

¹² Cuarta Pueyaso pueyanaa, nia tojitiare. Nia pocojosacari, tamonu jaara quia sequesanoocua tiuyaquiri, naajaa, majaari najuhuaana sesa pocuanu. Maja cutaraari sequenu: “Cua sequesanoori seetanujanaa juhua jiya cajiniocuaja. Majaari na shaajenu quiniutianiya”. Majaari sequenujuhuj: “Cua sequesanoori juhua nio jiya. Majaari na shaajenu quiniutianiya”. Majaari naa pocuanu sacuaraatiatej. Nia sequesano jaara seetanujanaa quiri, nareja nia sequere: “Taaquiririinj”. Naajuhuj, nia sequesano jaara quiri “maja”, cuara naa quiiri seetanujanaa. Majaari nia sequesano nia maateni socua, Pueyaso mariqui nia saniitioreeri.

¹³ Tamonu niajanijajinijinio jaara naquiya miishiya, nojuaja cuara Pueyaso secojoora. Shuquiriaatia nia quishacari saniniuujia, Pueyasora nia jaaquequejore. ¹⁴ Cusoso nia quishacari, Pueyaso pueya jiiitianaa nia sequere nojori cuara secojoora niaacuara. Nojori cuara shiyocua cojuata cusoso quiaara, pa Jiyaniijia sesajinia nojori secojosacari. ¹⁵ Nia secojosacari Pueyaso seetanujanaa nocua nia tiuuniutia, cusosuuri naatanutaniuhua.

Nojuaja jaara sesa miiquianu, Pueyasoori na jiyanooniutianiya sesa na miishanojiniji. ¹⁶Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secjore tama niaacuarajaaja. Pueyasocua nia naatanijiorohua. Maninia pueyano secjosacari jiyanoohua, cunoori jiyanoohua cumaacaraca. Pueyasoori na secjosano tojjijia. ¹⁷Tariucuacaanu pueyara Pueyaso sequesano caminiujiunia Elíasni, nojuajaari nareja pueyano quiquiaarijiuhuaaj taa pajaniyacuaani. Naajaa, nojuaja jaara Pueyaso secjoquiaari maja maru niniuria, majaari maru niniu quiquiaari jiuujianaraca marijia cuaara shocojoquiaarijiaatijia, socua seis racanio. Majaari maru niniu quiquiaari tojetaarucujanaa. ¹⁸Elías jaara pacutequiaariuhua secjonu maru na panishacari, maruuri shusha niquiaariuhua. Pueya nataacuacaari jiyacari shusha moritiaquiaariuhua.

¹⁹Cuarta Pueyaso pueyanaa, tamonu niajaniyajinijinio jaara Pueyaso rootasano tojjiyashijiara quiriohua, tamasaca jaara na niquiri, cuaara na rootaaranon, maninia miijia na quiniuhua. ²⁰Nia niishiri, cante sesa miijia tacatorohua Pueyasocua sesa na miinujinijini, nojuajaari cuno sesa miijiaacuaji tacuya maja senota na shaajasaanura. Pueyaso na jiyanootiya-jariuhua puetunu sesa na miishanojinijianaa. Tariucuaja cua panishano pueyanaa.

COTEENU PEDRO NAAJIONEE

Pedro saruhuatascari narta Pueyaso pueya

¹ ¿Niaate quiyajaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatana cua quiniuria. Janiyari nio naajiya niaacuarani, noo pojoriicuara canapueete tiqiyocua niaaquecojoquiaaricuajani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajinianio. ² Tariucuacaanu, pa Que Pueyasocujaaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuuniuria. Naacujitij, Jesucristo shootenuucua na nanaca, Pueyasoori nia jiyanoocujaa, juhua tojetaarucujanaa jeequesano nioojia quiniuria. Na Sohuanuuri nia jataniquiaa tojetaarucujanaa maninia miijia nia quiniuria, seetanujanaa Jesucristo tojjia nia quiniurijuhua. Naa Pueyaso panishano pueya nia quiniucua, nojuaja cuara cumaquira jiyanohua nijaniya. Cuara nioojia cajitiiria pueyaracaanujuhua.

Pa niishiri, paari jiyanohua maninia miishaariquanoni

³ Pa Jiyaniija Jesucristo Que Pueyaso pa maniniuhuaqueetare, jiyanohua maninia na miiniucua pajaniya. Jiyanohua na taraajenuucua pocua, na pueya pa quiniucujuhua, nojuajaari pa niishitiquiaari paari juhua quiariniora samiitianijiosaanutaniuhua. Paari naa samiitianijiosaanutaniuhua, naatej, taa Jesucristo samiitiaquiaariuhuaaani. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miini paniya pajaniyacujani. ⁴ Naacujitij, niaari niishiya niaari seetanujanaa masenutaniya puetunujuanaa niaarano Pueyaso jitiiasano jiyocuaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesasaanu. Maja na naata tariucushiniujuhua. ⁵ Pueyasocua nia tiuuniucua, nojuajaari na cumaacata nia cojuaquiaa. Pueyaracaanu nia cojuanutaniyani nojuaja cuara nia rijiorejaatijia mijiria taraatia nia quiniujini, tojetaarucujanaa jatanishano quijia nia quiniuria. Jiyanohua maninia Pueyaso miini panishano na pueyarano, shusha jiyacari niquishaanutaniyani.

⁶ Cunora niaari shuquiriaatia quiya. Saniniujia, niaa naasucuaari taraajeya rupaquija nia miijiosacari naquiya mijiria. Naajaa, niaa jaara naquiya miishaare, cunoori maja najuhanaj. ⁷ Naquiya pa miiniuni, cunoori pa saniniujushaanura paate seetanujanaa Pueyasocua tiujia-cani. Niaacujaaari niishiya, pueyari jiyanohua oro panijia. Saniniujia, Pueyasocua pa tiuuniuni, cunoori jiyanohua socua panishano orojiniji. Niaacujaaari niishiya, pueyari oro catijia, na sanishaanura maninia oro seetanujanaa. Naajaa, seetanujanaa maninia oroori shaajejajuhua. Saniniujia, paa jaara mijiria naquiya pa miini rejeretajaca quirini, Pueyasocua tiujia pa quiniucua, cunoori socua jiyanohua maninia cuno shaajeya orojiniji. Pueyasocua nia tiuuni jaara saniniujushaare juhua orojuhua, jaara seetanujanaa maninia quiri, Pueyasoori nia timitianutaniya. Naacujitij, Jesucristo muetasacari pocua, Pueyasoori jiyanohua maninia miiniutaniya nijaniya. Jiyanijianucua nia jiyatenutaniyani.

⁸ Majaari juhanajuaja Jesucristo nia niqiniuni. Naajaa, niaacujaaari na panijia. Nia niquishoo na quishacarija, naajaa, niaari nocua tiuquiaa. Niaari na timitiaquiaa jiyanohua. Tojetaarucujanaa jiyanohua nia timiniuni quiniucua nioojiajinia, majaari nia naata na pohuatana nia

rupaata. ⁹ Niaari naa timiquiaa, tariucua jatanishano nioojia quiniucua, Jesucristoocua nia tiushacari.

¹⁰ Tariucuaaanu, pueyara Pueyaso sequesano caminiujuuniaa pueyari poojotaquiaari taa Pueyaso jiyanooniutianiya nio pa quishacari pueyani, na pueya nojori quiniuria. Nojoriiri tama nojori naajiotasanojuaaja suraatia serojojuaca quiquiaari, Pueyaso Sohuanu niishitishano nojori naajiotasanoni. Nojoriiri jiyanoohua niishiniu paniquiaari taa Pueyaso jiyanooniutianiya pueyani. ¹¹ Jesucristo Sohuanucuaajaari juhuacarjija nojori niishitiquiaari taa Pueyaso jiyarosocoriquianu Pueyano miishaanutaninya naquiya coteenuni. Nojori niishitiquiaarijaarihuuaj, naquiya na miiniu nuhuaji saniniuuja, nojuajaari Jiyaniijiarajanaa jiyatesaanutaninya, shacantuuca quijia na quiniuria. Naaratej, nojoriiri maninia na niishiniuria saniniujuquiaari juucua, cantejaara cuno quiniutianiyani, Pueyaso Jiyarosocoriquianoni, naajuhuaj, taacari na muetanutianiyani. ¹² Pueyasoori saaja nojori niishitiquiaari, na Sohuanu poojotanishano nojorini, cunoori maja tama nojoririjaaja na quiniu quiquiaari. Cuarta Pueyaso pueyanaa, ¡cunoori niaarano quiquiaari seetanujuanaa! ¡Tariucuaaanu poojotasano Pueyaso Jiyarosocoriquianojiniiri tari tohuateequiaari! Jiyocuaaanuji jiyarosano Pueyaso Sohuanuuri Pueyaso rupaa pohuatanaa cumaquiquiaa, taa na cumaquiquiaari Pueyaso Jiyarosocoriquianojiniji pohuatanaacuaani. Naacuaajitij, quiri naataja nia tojishano Jesucristojinijini, cunoori supuetanaa pohuatanao quiquiaaricuaaja. Pueyaso seyajanaacuaajaari pueyarano Pueyaso miishocoriquianoocua maatia niishiniucua jiaatiaajuhuaj.

Pueyasoori paniya saaja maninia miijiac pa quiniuria

¹³ Cunora, cuarta Pueyaso pueyanaa, jeenucuasano nia quiriquia. Jesucristo muetasacari pocua, Pueyasoori jiyanoohua maninia miiniutianiya pajaniya. Cunora, saaja naa nia miiniu panishaanucua jiaatiajaca nia quiri. Majaari nioojia niquijjotejaca nia quiniu. Maninia niishiriojojuaca nia quiriquia. ¹⁴ Tarijija, niaari tama nia cuaqueya panishanojuaaja miijiac quiquiaari, Pueyaso niishiyashijiac nia quishacarjija. Quiriija saniniuuja, niaari na tojjiac cutara. Naaratej, na muerasu nia quiniucua, majaari naa quijiac nia quiniu socua. ¹⁵ Saniniuuja, saa maninia miijiac nia quiriquia. Pueyasocuaajaari nia saquiriojoquiaari naa tojetaarucujanaa maninia miijiac nia quiniuria, juhua nojuajuhuaj. ¹⁶ Tariucuaaanu Pueyaso sequesanoori naa naajiotasano quiyajuhuaj: “Tojetaarucujanaa sesa miyashijiac nia quiri, taa janiyacuaani”.

¹⁷ Nia secosacari, niaari Pueyaso sequequiaa, “cua Quenaa”. Cunoori maniniacuaaja. Naajaa, majaari nia niyjetanu cutara, nojuajaari puetunu pueyajanaa nequesoreenutaninya sesa pa miishanojiniji, maninia pa miishanojinijinio. Majaari rimiajata na saniitoun quiniutianiya. Cunora, mijiria nia quishacarjija, nia puerenuta tama nia cuaqueyajaaja nia cojure, niaa mariqui na tojjiyashijiacara quiriohuari. ¹⁸ Pa supuetanaa quiniucua sesa miijiac, paari naa miijiacara quiquiaarijuhuaj. Pueyaso cutaraari naa sesa pa quiniujiniji pa jataniquiaari maninia na muerasu pa quiniuria. Niacuaajaari niishiya, majaari Pueyaso masenu quiquiaari pajaniya orota, platanio, shaajeja casaata. ¹⁹ Nojuajaari pa masequiaru tama Neyanuniyopua nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonucua pa jiyanooshaanura. Tariucuaaanu, borrego jaara Pueyaso niquiara mosaquiaari na camaru niti, cuno borregoori tojetaarucujanaa borrego maniniu quiquiaari. Naajuhuaj, Jesucristoori tojetaarucujanaa maninia miijia quiquiaari. Naacuaajitij, nojuajaari tojetaarucujanaa maninia pueyano quiquiaari pa niti na

mosaanura. ²⁰ Jiya shipiniyaquishacarjia, Jesucristoori tariucua pueya niti mosocoriquiano sequesaaquiaari, sesa miijiaa jiyanooshaanura. Saniniuujia quiari naataja, nojuajaari shusha mijiria muetaquiaari pocuara na mosaanura, taa Pueyaso miiniu paniquiaari pajaniyaracuajani. ²¹ Naa Jesucristo miiniuucua pocuaratej, niaari Pueyasooocua tiuquuaa. Pueyasocua-jaari Neyanu samiitianiquiaariuhua. Na jiyatequiaariiri Jiyaniijijanaa na quiniuria, shacantuuca cumaacaraca quijia na quiniuria. Naacuajitij, niaari quiarjia Pueyasooocua tiuya, na samiitianiniuria niajanijuhua. Naaratej, niaari juhuajaniya sashiya, shacantuuca quijiacara nia jatanishaanurajuhua.

²² Seetanu rupaajanaa tojitiajaca nia quiniuucua, nioojiaari tari jeequesaaquiaari, niarta Pueyaso pueya panijaca nia quiniuria seetanujanaa. Naaratej, seetanujanaa panitioojuaca nia quiriquia puetunu nioojiatjanaa, maja sesa nia niishiriojonuta quenaaja. ²³ Naa panijaca nia quiri, jatanishano pueya nia quiniuucua. Pueyaso rupaacua nia tiushacari, niaari juhua roosaaquiaariuhua, pueyaracaanu quijaca nia quiniuria seetanujanaa. Pueyaso Rupaacuajaari pueyano samiitianijia, saminio na quiniuucua. Naacuajitij, niaari shaajeyashijacara jatanishaquiaari pueyaracaanu Quijia rupaacua nia tiuniucua. ²⁴ Tariucuaanu Pueyaso Rupaajinia naajiotasanocuaajaari naa sequeya:

“Puetunu pueyajanaari rishiyashijaca juhua jiyasocua. Na cumaaca, puetunu na jiiitasanojuanaajuhua, cunoori soreja, juhua naana shuu. Jiyasocuaari soreja. Naana shuuri tijia. ²⁵ Saniniuujia, Pueyaso Rupaacutaraari pueyaracaanu quijia”.

Cuno rupaacuajaari nia niqiuara pohuatasaaquiaari pueyaracaanu quijiacara na jataniniuria niajanija.

2

¹ Naaratej, nia tarinitiare puetunu sesa nia miiniuujanaa. Seetanujanaa nia tarinitiare cuaracashijionu. Naajuhua, majaari sapuenu juhua maninia pueyano niqishano nia quiniu najuhuanaj. Majaari tamasaca jiiitasanoocua jiaatiajaca nia quiniuujuhua. Majaari coriaacojuaca nia quiniu socua. ²⁻³ Naa jaara tari niishiyacua pa Jiyaniijiaari seetanujanaa maninia, na rupaacua jiaatiajaca nia quiriuarajaj. Naatej, taa shusha rasano conaaja jiaatiaa supuenucuacuaani, naa Pueyaso Rupaacua jiaatiajaca nia quiriqiaajuhua, cumueeca Pueyaso muerasu nia quiniuria seetanujanaa. Naacuajitij, niocua tojetaarucuaajanaa jatanishano pueya quiri.

Cristoori juhua saminio saajia, Pueyaso quiquiorano tiataja

⁴ Saijiniji shipinishano tiaari pueyaracaanu rishijia. Naaratej, pa Jiyaniijiaari miriqui sequeshiya juhua saminio saajiaa Pueyaso quiquiora. Mijiria Pueyasora tiajonaari jyaniquiaari cuno saajiaari sesarujuajau. Naaratej, nojori jiyajenetasacari cuno saajia, nojoriiri na jataquiaari na ruuretasacari. Nojuaja cutaraari Pueyaso saajia maniniu, tama na saquiriojosojuaja. Naaratej, nocua pa tiuuri. ⁵ Naajuhua, puetunu Jesuucua tiuujaca pueyaranojuanaari pueyaracaanu rishijia quiquiorano Pueyasora. Naacuajitij, Jesuucua pa tiushacari, paari juhua maniniuujiaaca sai Pueyasorani, na quiquiora na tiatajara. Naajuhua, Pueyaso quiquio pa quishacari Neyanuucua pa tiuniucua, Pueyasoori pa jiyateya pueyacuara seccionaa pa quiniuria na tacji. Majaari seya pa niqitiojonu quiquiaa Pueyasoni, taa tariucuaanu pueyacuara seccionaa pueya miiquiaaricuaani. Paa cutaraari tama pa cuaqueyajaaja jiyatequiaa Pueyasora pa quiniuriani,

puetunu pa miishanojuanaanio. Puetunu naa pa miishanojuanaa Jesucristoocua pa tiuuniuucuaní, cunoori Pueyaso timitiquiaa. ⁶ Cunora, tariucuacaanu Pueyaso Rupaajinia, miriqui Pueyaso sequesano Jesucristojiniijiiri naa naajiotasano quíya:

“Janíyari Sión tuhananuucua jíyanohua cua panishano saajia nianutaníyáni. Cuno saajiaari tama cua saquírojosanojuaja. Maníniujíajau saajia seetanujuanaari. Cante nocua tiuyani, nojuajaari maja na cararosaanu quíniutianíya”.

⁷ Cua panishano pueyanaa, cuno saajiaacua tiuujíaca nia quíniuuucua, cuno saajiaari jíyanohua nia timitiasano. Nocua tiuyashíjíaaca cutaraari cararosaanutianíya. Nio tariucuacaanu Pueyaso Rupaajinia naajiotasanoori tari tohuatecanu nojoríria. Naa miriqui sequeyari:

“Tíajonaa jatasano saajia, nojori jíyaníshacari cuno saajia naasucua sesarujúajau, cuno saajiaacuaajaari socua jíyanohua panishano saajiaari jíyatesaaquíariuhua”.

⁸ Tamaquí, nojuajiniijiiri naa miriqui naajiotasano quíyajúhuaj:

“Pueyari cuno saajiaacua tíiriiniutianíya. Nocua jíriatanutianíyajaariuhua na tíiriiniuria”.

Nojoríiri nocua tíiriíquíaa, nojori tojíyacquíniuuucua Pueyaso rupaa Jesucristojiníji. Pueyasocuaajaari tariucuacaanu sequequiaari Neyanuucua tiuyashíjíaacaari tíiriiniutianíya pueturajanaa.

⁹ Níajaniya saníniuuujía, níaari tama Pueyaso saquírojosano pueyajaaja. Nojuajaari puetunu níajaniyájanaa jíyatequíaaari nojuaja secojonaa nia quíniuria pueyacuara, pueyaracaanu na panishano míjíaaca nia quíniuríajuhua. Puetunu níajaniyájanaari tamasaca pueyapuejíníjínio saquírojosaaquíaaari saaja Pueyaso pueya nia quíniuria. Neyanu cusonuta, Pueyasoori naa pa masequíaaari tama nerajaaja, manínia Pueyaso miishano pa pohuatánura tamasaca níquiara. Taríjía, níaacuaajaari júhua níniquí quíjíaaca quíquiiaari. Pueyaso cutaraari níoojía cuhuataquíaaari, seetanujuanaa shacantuuca cumaacajínía quíjíaaca nia quíniuria nata. ¹⁰ Tariucuacaanu, Jesucristoocua tiuyashíjíaaca nia quíshacaríjía, níaari júhua soosano taucuaca quíquiiaari Pueyasora. Quíaríjía saníniuuujía, níaari Pueyaso panishano pueya. Tariucuacaanu, májaari Pueyaso taraajenu quíjía níaacua. Quíaríjía cutara, níaacua taraajeyari. Cunora, nia jíyanooquíaaari.

Pueyaso panishano míjíaaca pa quíriquíaj

¹¹ Cua panishano cuarta Pueyaso pueyanaa, nia tojiri cua sequesano. Níaari júhua rucoonaa míjíría. Nio jíyari maja pueyaracaanu pa quíjíaari. Naaratej, májaari tama nia cuaqueya míniuu miishanojuaja míjíaaca nia quíniuu, saaja shuquíriaatia nia quíniuria míjíría. Sesa casaacua pa cuaqueya jíaatianuni, cunoori poojía sesojua. ¹² Saaja manínia míjíaaca nia quíriquía Pueyaso níshiyashíjíaaca níquiara. Naacuajítíj, nojori jaara níaacuara rímíaaqueríquia júhua sesa míjíaacara nojori jíyatesacari níajaniya, naajaa. Jíya puequesacari, Pueyasoori puetunu pueyájanaa nequesoreenutianíya. Jíyacari, níaacuara rímíaaquejacaari níshíniutianíya, Pueyasoori tojetaarucujánanaa manínia míjía na saníitiosacari nojori, manínia na míshacari níajaniya saníniuuujía.

¹³ Pa Jíyaníjía tojijíaca nia quíniuuucua, puetunu míjíría pa jíitíanaa jíyaníjíanucua tojítíajaca nia quíriquíajuhua. Naacuajítíj, nia jíya jíyaníjíaanáa tojijíaca nia quíri. Nojuacuajaari jíyaníjíaanáa cutara. ¹⁴ Cunora, na jíyatesano jíyaníjíanucua tojijíaca nia quíriquíajuhua. Nojoricuaajaari na jíyaramíquíshano, sesa míjíaaca saníitiosaanura, manínia míjíaaca maníniuhuaqueetasaanura saníniuuujía. ¹⁵ Naacuajítíj, saaja manínia míjíaaca

nia quishacari, niaari niishiyashijiaca sesa miijiaca sanaajanutaniya, najuhuaana nojori sesacasacari najaniya. Cunora, Pueyasoori paniya maninia miijiaca nia quiniuria.

¹⁶ Tariucuaaanu, Moisés Rootasanoori juhua nia jiyaniijia quijia puetunu naarajanaa nia tojishocoriquiano. Quiarijia saniniuuja, Jesu cusonuucua nia niti, nojuajaari Moisés Rootasano tohuateequiaari. Naacuajitij, nojuajaari Moisés Rootasano sanaajaquiaari niaara. Naacuajitij, Moisés Rootasano tonujiyaquishacari niaacuara tari, naajaa, majaari nia jiyaniinu naacuajiti nia naata tama nia panishanojuuaaja miiniu. Pueyasajuanaacuaajaari nia jiyaniijajanaa cutara. Naaratej, seetanujuanaa na tojitiajaca seya nia quiriquia cutara. ¹⁷ Majaari quenaaja niquiriyatu pueyano rerequeteja nia quiniu. Niarta Pueyaso pueya panijia nia quiriquia cutara. Seetanujuanaa Pueyaso tojijia nia quiriquia. Majaari jiya jiyaniijajanaa rerequetejaca nia quiniu.

Naquiya pa miishacari, sanaa pa rejeretariquia juhua Cristo

¹⁸ Poonijotesano pueyanaa, seetanujuanaa maninia nia camarnu tojijiacaca nia quiriquia. Nia camarnu jaara juajia nia quiriquia, naajaa, saaja na tojijia nia quiriquia. Majaari saaja maninia nia jiiitiajaca tojijia nia quiniu, nia jiyanoojiacanio. ¹⁹ Naa jaara juhujaniya rejeretariquia najuhuaana nia camarnu saniitosacari najaniya, cunoori jiyanojia maninia Pueyasora. ²⁰ Pueyaso cutaraari maja na timiniu niaa jaara juhujaniya rejeretare nia camarnu saniitosacari najaniya seetanujuanaa sesa nia miiniuucua. Saniniuuja, nia camarnu jaara saniitiore najaniya maninia nia miiniuucua, niaa jaara na rejeretare juhujaniya, Pueyasoori cunoo timitiajaca cutara. ²¹ Pueyasocuaajaari nia saquiriojoquiaari naquiya rejeretajaca nia quiniuria maninia nia miiniuucua. Cristojuaanaacuaajaari naquiya miishaaquiaari maninia na miiniuria pajaniya. Nojuajaari naa miiquiaaritij, pa niishiniuria juhua nojuaja pa miiniurijuhua. ²² Cristoori maja quenaaja sesa na miiniu quiquiaari mijiria na quishacari. Majaari na cuaracashijionu quiquiaari quenaajuhua. ²³ Jaara sesacasaaquiaari, nojuajaari maja quenaaja nojori na rucuanu quijia na juaaniutia. Jaara miitiasaaquiaari, majaari quenaaja nojori na miananajonu quiquiaari. Nojuajaari saaja na Que Pueyasocuaa tiuquuaari, na niishishacari nojuajaari seetanujuanaa maninia nequesoreena cutara. ²⁴ Cristo jaara niyacutesanojinia cusojuaaaquiaari, nojuajaari tari puetunu sesa pa miiniujanaa cusotaquiaari. Naa pa niti Cristo cusonuucuatej, cunoori quiquiaari maninia miijiaca pa quiniuria saniniuuja, maja socua sesa miijiaca pa quiniuria. Naa-juhua, nojuajaari pa niti nootusaaquiaari, pa naatanijiosaanura saniniuuja. ²⁵ Tarijia, niaari juhua tashuquioono borregohua rucojuaca quiquiaari. Quiarijia saniniuuja, niaari nia cojuana Cristoocua tiuquijioquiaari. Nojuacuajaari nioojia jiiitiana maniniu.

3

Camiyono pueyara rootasano

¹ Camishano maajipohuanaa, nia niyaca tojitiajaca nia quiriquia maninia. Naacuajitij, nia niyaca jaara Pueyaso rupaacua tiuyashijia quiriquia, naajaa, nojori tojitiajaca nia quiniuucua nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia miijiaca nia quishacari, nojori nia pohuataaquishacarijia Pueyaso Rupaa. ² Nojori niquishacari tojetaarucujanaa maninia miijiaca nia quishacari, nojori tojijiacajuhua, saa cunotaja nojoriiri maatia niishiniutianiya Pueyaso

Rupaari seetanujuanaa. ³ Maajipohuanaa, majaari nia tacaaniu saaja nia maniniushiniuria, maninia nia niqushaanura. ¿Maajitiiri maniniucuasano, saaja na muecaca na canuusacari maninia, na cushitiasacari orojiniji shipinishano tuhuajashiquia, na cushishacari shanohua toquejuhuaj? ¿Jiyano maajitiiri maniniucuasano jaara juaaniu maniniu quiriquiajuhuaj? Maja. ⁴ Naaratej, maninia cutaraari nia tacaaniuria nioojia nia maniniushitiniuria. Cunora, saaja maninia maaji quiniucua jiaatiajaca nia quiriquia cutara, jacaria pocuajajuhuaaj, maja juaajia. Jiyano maajitij, cunoori seetanujuanaa maninia niqushano Pueyasora cutara. Niaa jaara nioojia maniniushitiri cutara, cunoori seetanujuanaa shaajeyaquiriquiano. ⁵ Naajuhuaaj, Pueyasocua tiuujiaca tariucuaaanu maajipohuari neyaca tojjiaca quiquiaari. Naa nojori miiniucuatej, nojori jiuujiari seetanujuanaa shanohua maniniushitishano quiquiaari Pueyasora cutara. ⁶ Supuetana Abraham niqiuocua Saaraari naa neyaca tojijia quiquiaari. Seetanujuanaa neyaca tojijia na quishacari, nojuajaari na jyaniquijia na jyaniijia. Naacuajitij, niaa jaara maninia miijiacaca quiriquia, niaa jaara nia puereyaquiniutia nia niyaca tojijia quiriquiajuhuaj, Pueyasora, niaari Saara niqiuojori.

⁷ Niajanitarijia canuunaa, nia niqiuocua nia jitiariquia maninia, nia niishishacari maajiiri maja cumueeca juhua cayaja. Majaari na rerequetenu. Maajipohuacajaari Pueyaso jyanooshanohuhuaaj, taa na jyanooquiiaari nijaniyacaani. Pueyasoori niaata nojori cojiritianutaniya samitiianijionu, pueyaracaanu rishijia nojori quiniurajuhuaaj. Naacuajitij, maninia nia jitiariquia nia niqiuocua, Pueyaso mariqui nojuaja nia secojosano tojiyaquiiri.

Paatucua taa miiriquia parta pueyani

⁸ Pueyanaa, cua sequesano quarijiani, nioori puetunu Pueyaso pueyarajanaa. Pueyaracaanu jiuujiaatoojuaca nia quiri. Majaari juayonuujutanu. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuhuaj. Seetanujuanaa panitiojuaca nia quiri juhua nia tapueyocacata. Taraajetoojuaca nia quiri juhuaj. Naajuhuaaj, majaari tama nia cuaqueyajaaja nia jiyatenu juhua socua tojishano pueyano nia quiniuria tamonu pueyanojiniji. ⁹ Niaa jaara sesa miishaariquia, majaari na naminiu. Naajuhuaaj, niaa jaara sesacasaariquia, majaari nojori nia riucuanu nojori nia sesacanurajuhuaaj. Saaja maninia nia riuhanere nojori. Tariucuaaanu, Pueyaso paraca nia quishacarijia, nojuacuajaari nia saquiriojuquiaari maninia na miiniuria nijaniya. Naaratej, saaja maninia nia miiriquia nia paracajuhuaaj. ¹⁰ Tariucuaaanu Pueyaso Rupaajiniacujaari naa naajiotasano quiyajuhuaaj:

“Cante pueyaracaanu mijiria rishiniucua jiaatiaani, shuquiriaatia na quiniurajuhuaaj, nojuaja cuaara na niti cojuuara maja sesa na pocuanura. Cuaara na rupaa cojuaarajuhuaa maja na cuaracashijionura.

¹¹ Naajuhuaaj, cuaara sesa na miijionu tarinitiaara saaja maninia na miiniuria. Nojuaja cuaara pueya jyanootiooteja quiiria. Cuaara naa maninia na miiniu tarinitiaaquiiria. ¹² Cante naa maninia miijiani, Pueyasoori na cojuaja, na secojosano tojijiajaariuhuaaj. Saniniuujia, Pueyasoori sesa miijiacaca samiritiaja saaja”.

¹³ ¿Cantucua sesa nia miiriquiani niaa jaara saaja maninia miijiacaca quiriquia? ¹⁴ Naajaa, niaa jaara saaja maninia nia miiniucua miitiasaare, nia timiquiore. Pueyasocujaari jyanohua maninia miiniutianiya nijaniya saniniuujia. Mijiria quinaa miananajosacari nijaniya, majaari puerenu, majaari nioojia nia niquijotenu. ¹⁵ Saniniuujia, nioojiajinia

Cristo nia jiyatere nia Jiyaniijijajanaara, seetanujanaa na tojjijia nia quiniuria. Juhuacarijia nia niishiriojoriqia, jeenucuasano nia quiniuria, maninia nia pohuatanura Jesucristojiniji. Naacuajitij, niaari jeenucuasano quiniutianiya, maninia nia riucuanura tamasaca jaara nequesotare nijaniya, casaara juhuajaniya naquiya miiniu rejeretajacate niajaniani. ¹⁶ Jacaria nia pohuatere nia paniniutia nojori, maja nia rerequetenuta nojori. Pueyaracaanu maninia miijia nia quiriquia, sesa nia miiniu mariqui nioojia macuhujareeri. Naacuajitij, pueyaracaanu shitimia maninia miijia nia quishacari Jesucristoocua tiuujia nia quiniuucua, niaacuara rimiaaquejacaari tama sesa na pocuanuucujaja caririquiniutianiya.

¹⁷ Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniuucua, maja sesa nia miiniuucua. ¹⁸ Cristojuanaacuajaari mosaaquiaari sesa miijia pa quiniuucua. Majaari socua na pacutenu quiniutianiya cusonu. Nojuajaari tojetaarucujanaa maninia miijia quiquiaari. Naacuajitij, nojuajaari sesa miijiaacuara cusoquiaari, Pueyasooocua na jiyatanura nijaniya. Pueyano cuaqueyaraca na quishacari, mosaaquiaariiri. Pueyaracaanu rishijia sohuanuraca na quiniuucua, nojuajaari samiitaquiaariuhua. ¹⁹ Naa sohuanu na quiniuucuatej, nojuajaari macunucua quiquiojinia rosequiaari tii tama nojuajiniijijaja na pohuatanura macunucua sohuanu. Cuno pojoriiri nujuatejojuajinia mishiquionucua quiya. ²⁰ Cuno pojoriiri, noo pojoricuaja tariucuaaanu supuetana Noé tojiyashijia quiquiaaritiij, pueyaracaanu Noé poojotasacari Pueyaso rupaa nojori niqiuara juucua. Pueyaracaanu Noé tarishishacari na puereetuca buque na shipinishacari, pajaacuaji na tacajara, Pueyasoori jiyacari cuno sesa miijia sashiquiaari juucua. Pueyaracaanu sashiquiaariiri nojori tacatonuhuaa noojiaca nocua juucua. Puetunu mijiria quijia nia pueyajiniinijiojuanaani, saaja ocho pueyari cureequiaari, buquejinia nia nioojia tiuquitanuucua. Puetunu pueya shushiniuushacari pajaajinia, cuno pajaari saniniuujia Pueyasooocua tiuujia cuataniquiaari na buquejinia. ²¹ Quiarijia pajaniyara saniniuujia, cuno pajaari miriqui pa niishitiojiya taa Pueyaso miiquiaa pajaniyani, paa jaara moojinia tiuquinishaareni Jesuucua pa tiuushacari. Naatej, taa Noé juhujaniya cuataquiaari pajaajiniacuani, Pueyasooocua tiuujia na quiniuucua, pueraari naajuhuaaj. Naacuajitij, paa jaara moojinia tiuquinishaareni, paari pa timiniutia moojiniji tohuataquiohuani, poojia cajitishano seetanujanaa na niishishacari paari tari jiyanooshanoni, pocuaji Tacuna Jesucristo samiitianuucua macujiniji. Majaari pa tiuquinishaanu quiquiaa pa seca pa jatanura. ²² Jesucristo samiitiasacariuhua, nojuajaari jiyocuaaanu tacaquiaariuhua. Quiarijia cajia Pueyaso miaquetajaraari. Jiyaniijijajanaa na quiniuucua, nojuajaari cumaacaraca, tama nojuajaaja na tojitiniuria Pueyaso seya, puetunu cumaacaraca quijiacajanaa, samaruhanio.

4

Maninia miijia pa quiriquia, Pueyaso cumaaca pa jitianuucua

¹ Naacuajiti pueyanaa, naatej, taa Cristo rejeretaquiaari naquiya miiniu mijiria na quishacaricuani, naa rejeretajaca nia quiriquiajuhuaj, niaa jaara naquiya miishaariquia. Naquiya pa miishacari, cunoori sesa pa miiniu pa tarinitijia. ² Naacuajitij, paa jaara naa naquiya miishaariquiani, na nuhuaji paari saaja Pueyasora quiniu paniani. Paari saaja na panishano miiniu paniani, maja tama pa cuaqueya panishanojuajaaja pa miiniuria

socua. ³ Tarijia, Pueyaso tojiyashijiaca nia quishacarijia pueyanaa, ni-aari jyanohua sesa miijiaca quiquiaari, taa Pueyaso niishiyashijiaca mi-iquiaacuaani. Niaari saaja nia cuaqueya miiniu panishanooocua shiini-quiijia quiquiaari. Niaari queraatia tamaatia sesa miiniuucua jiaatiajaca quiquiaari. Niaari saaja mashaasequenujuaca quiquiaari. Nia quer-anacunuusaqui, niaari tojetaarucujanaa sacuaraatia miijiaca quiquiaari. Niaari rerejojuajuhua puera nia ratunura, jyanohua nia mashaasequenu-nurajuhuj. Naajuhuj, niaari juaashiquiata shipinishano nia pueya-sora nia jiyatesano shuquiritiajaca quiquiaari. Niaari na tacoji sacuaraa-tia pueresano casaa miiquiaarijuhuaj. ⁴ Quiarijia saniniuujia, Pueyaso niishiyashijiaca nia cojiyaquishacari naa sacuaraatia nia miijionuratej, nojoriiri jiuujiatequiaa nojori shaacasacari niajaniya. Nojoriiri cunora nia sesacaquiaa. ⁵ Cuno pojori cuaara niishiiria nio, Pueyasoori nojori nequesoreenutaniya na nequesoreesacari puetunu pueyajanaa, saminiu-cua, macunucuanio. Jiyacaritij, nojori cuaara tama nojoriicujaji riucuaara-jaaja. ⁶ Cunora, pa Jiyaniijia Jesucristoori macunucua niqiuara pohu-ataquiaari Pueyaso rupaa tama nojuajiniijiaaja, nocua tiuujiacara nia jiyate-socoriqiano. Nocua tiuujiaaari pueyaracaanu rishijiacara quiriquiano, taa Pueyasocuaani. Sesa miijiaca mijiria nojori quiniuucua, nojoriiri pajaa-jinia cusunuuquiaari taa puetunu pueyajanaa shaajecoquiaacuaani. Naa-jaa, Jesuucua tiuujiaa cutaraari samiitianiijosaanutaniuhua.

⁷ Nio pa quishacarini, paari socua quenaacoya jiya puequesacariicuarani. Naaratej, niishiriojuuca nia quiriquia. Maninia nia jiitariquia tama nia cuaqueyajaaja, saaja Pueyaso secojuuca nia quiniuria pueyaracaanu.

⁸ Jyanohua panitiojuuca nia quiriquiajuhuaj. Cunoori socua panishano cutara. Paa jaara panijaca quiriquiani, paari queraatia sesa mi-ishano jyanoojia quiniutianiyani. Naaratej, seetanujuanaa panijaca nia quiriquia. ⁹ Niarta Pueyaso pueya jiitiaaquishacari na maquejara, na miaquesocoriqianojuhuaj, nojoriicua taraajeja nia quiriquia. Nojori nia tiuquintiariquia nia tijajinia nia timiniutia. Majaari nojori nia ririjiotanu nia taajenuta. ¹⁰ Pueyasocujajari na Sohanu niquitioquiaa puetunu na pueyajanaa, tamaatia maninia casaa miiniu niishijiac pa quiniuria. Naaratej, puetunu niajanijajanaa cuaara maninia miiria niarta Pueyaso pueya pueyaracaanu, taa Pueyaso cumaquiuaa niajaniya maninia nia miiniuriacujani. Maninia nia poonijoteriquia Pueyaso cumaaca, nojuaja niquitiojosano niajanianiyani. ¹¹ Naacuajitij, nia pocuasacari, Pueyasocua nia tiuuri nojuaja cumaquiniuria niajanianiya na panishano nia sequenura. Naajuhuj, niaa jaara casaa miiriquia niarta Pueyaso pueya nia naacunura, nojori nia miiriquia maninia Pueyaso niquitiosano cumaacata. Naa nia miiriquiatej, Pueyaso timitiasaanura socua, Jesucristoocua tiuujia nia quiniuucua. Nojuaja cuaara maniniuhuaqueetasaaria pueyaracaanu, toje-taarucujanaa maninia miijia na quiniuucua, puetunu cumaacaracajanaa na quiniuucujuhuj. Cuaara naa quiiratej.

Juhujaniya pa rejeretare naquiya miiniu, Pueyaso pueya pa quiniuucua

¹² Cua panishano cuarta Pueyaso pueyanaa, majaari nia shiriqiniuu niaa jaara jyanohua naquiya miishaariquia. Majaari nia jyaniniujuhuj saa niajanijaja naa miishiya. ¹³ Niaa jaara naa naquiya miishaariquiatej, nia timiri. Jesucristoocua tiuujia nia quiniuucua, niaacuajajari naa miishiya taa Jesucristo miishaaquiari naquiyacuaani. Naa naquiya miiniu nia re-jeretasacaritij, niaari jyanohua timitianutaniya Jesucristo, shacantuua na cumaacata na tiuquishacariuhua, na jataniniuria niajanianiya juhua nojuaja nia quiniurijuhuj. ¹⁴ Naajuhuj, niaa jaara sesacasaariquia Jesucristo tojjia nia quiniuucua, shuquiriaatia nia quiriquia. Pueyari naa nia

sesacaquiaa, shitimia maninia miijiaca nia quishacari, Pueyaso Sohuanuraca nia quiniuucua. ¹⁵ Niaa jaara naquiya miishaariquia pueyanaa, cuno cuaara quiiria maninia miijiaca nia quiniuucua, maja sesa miijiaca nia quiniuucua. Niaa cuaara caririquiria cutara niaa jaara mojuaquri, nohuasejojua, sesa miijia, timia niishiniu panijia tamasaca casaa. ¹⁶ Saniniuujia, maja cutaraari nia caririquiniu niaa jaara naquiya miishaariquia Jesuucua tiuujiaca nia quiniuucua. Saaja Pueyaso nia shuquiritariquia cunora.

¹⁷ Quiarijiani, Pueyasoori tama na pueyajaaja saniitioquiaa na tojiti-aacquishacari na rupaa. Paa jaara naa saniitosaaquiaacuaani, ztaariquitijia noo pojori miishaanutaniya socuatejaj, Jesucristojiniji pohuatasano ruuretajacatej? ¹⁸ Naacuajitij, Pueyaso jiyanooshano pueya jaara queraatia naquiya miiquiaacuaa, ztaariquitijia Pueyaso tojiyashijiaca miishaanutaniyatej? ¡Juhuej! Puereeta miishaanutaniyari Pueyaso ruuretajaca, sesa miijiacano. Nojoriiri jiyanoohua socua naquiya miishaanutaniya, Pueyaso saniitosacari nojori. ¹⁹ Naacuajitij, Pueyaso jaara naa naquiya nia miishaanura paniya, juhuajaniya nia rejeretariquia naquiya nia miiniu. Majaari nia tarinitianu maninia nia miiniu, naquiya nia miishacari. Saaja Pueyasocua nia tiuuriquia noojia na cojuanura maninia. Nojuacuajaari na Shipinia. Nojuacuajaari saa maninijaja. Naquiya pa miitiquiaacuajaari socua na jeenucuanura pajaniya.

5

Socua rootasano Pueyaso pueyara

¹ Quiarijia saniniuujia cuarta Pueyaso pueyanaa, janiyari nia jiitianaa nacasuyani. Niajaniya, Pueyaso pueya maapue jiitianaanaa, cua tojitiare. Janiyacuajaari Pueyaso pueya maanu jiitianajuhuj, juhua nijaniyajuhuj. Janiyacuajaari pa Jiyaniijajanaa niquiniani, nojuaja jaara naquiya mijioquiaari mijiria na quishacarijia canaata. Naajuhuj, nojuajiniji cua pohuatanuucua, janiyari naquiya miishaaquiaaaniuhuj. Naacuajitij, pa Jiyaniijia muetasacariuhua na shacantuua cumaacajinia, janiyari jaarajaaja niaata cojiritiasaanutaniya jatanishaanuni, juhua nojuaja pa quiniuria mariyata. ² Cunora Pueyaso pueya jiitianaanaa, shamaatia nia cojuare Pueyaso pueyaniojua, tevano jiitianaara Pueyaso jiyatequiaari nijaniyacuaajani. Maninia nia cojuariquia nojori, seetanujanaa nojori nia paniniutia, taa Pueyaso paniya nojori nia cojuanuracuajani. Majaari nojori nia jiitianu nia taajenuta saaja nojori jiitianaa nia quiniuucua. Naajuhuj, majaari nojori jiitianaa nia quiniu saaja cumaneecaacua nia jiaatianuta. Saniniuujia, seetanujanaa nojori nia paniniutia nia jiitariquia niarta Pueyaso pueya. ³ Majaari niarta Pueyaso pueya nia jiitianu juhua tama nia seyajaaja. Niajaniya saniya cuaara maninia miijiaca quiiria nojori niquiara, nojori niishiniuria naa quijiacate Pueyaso pueya, naa nojori miiniuriajuhuj. ⁴ Naacuajitij, pa Jiitianajanaa tiuquishacariuhua jiyocuaaanuji, niaari shacantuua quijiacara jatanishaanutaniya, pueyaracaanu rishijiaca nia quiniuriajuhuj.

⁵ Niajaniya mashiquioriniaa, Pueyaso pueya jiitianaa tojijiaca nia quiriquiajuhuj. Puetunu nijaniyajanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquiniaa nia quiniuria jaarajaaja. Tariucuaaanu Pueyaso Rupaajiniacuajaari naa naajiotasano quiaa:

“Pueyasoori na juaaniutia niquijia narta pueya shocoteja. Saniniuujia, narta pueyano shocoteyashijia naacuaja cutaraari”.

⁶ Naarate pueyanaa, puetunu niarta Pueyaso pueyajanaa nia jiyateriquia tojishano pueya nojori quiniuria niaara. Majaari quenaaja nojori nia rerequetenu. Naa juhujaniya niarta Pueyaso pueya tojijiaca nia quishacari, pa Jiyaniijia Jesucristo jaara tiuquiriohua, Pueyasoori na cumaacata nia jiyatenutaniya jiyaniijianucua nia quiniurijuhujaj. ⁷ Pueyanaa, puetunu nia tacaanijianaa nia niqutiore Pueyaso. Nojuacuajaari niaacua taraaje-quiaa.

⁸ Pueyanaa, nia Paraca sequeeri nia shanacujuquiaa, juhua sare, taa sare shanacujiya na sanura casaacuaani. Cunora, soquejaca nia quiriquia pueyaracaanu. Juhua sutejaca nia quiriquia, pueyaracaanu nia secojonura, Sesaaca mariqui juhua sare nia sareeri. ⁹ Cumaatia nia nujuatariquia nojuaja, seetanujuanaa Pueyasocua tiuujia nia quishacari. Majaari Pueyaso Rupaacuaji nia taacanuunu. Naa nia miiriquiatej, nia niishishacari niarta Pueyaso pueyari puetunu tiqiyocujanaa naa naquiya miqiuoyajuhujaj. ¹⁰ Naa jaara rupaquijia naquiya miishaariquia mijiria, Pueyasoori na nuhuaji nia jataniniutianiya tojetaarucujanaa maninia pueya nia quiniuria. Tojetaarucujanaa pa jiyanoojia na quiniucua, nojuacuajaari nia saquiriojoquiaari nata nia quiniuria shacantuua na cumaacajinia, Neyanu Jesuucua nia tiuuniucua. Naaratej, nojuacuajaari nia jiyatenutaniya seetanujuanaa nioojia niquijoteyashijia nia quiniuria, socua jiyanohua na cumaaca jitiata nia quiniuria, maja quenaaja Sesaaca pootionura niajaniya. ¹¹ ¡Jiyanohua maniniaari pa Que Pueyaso! Nojuacuajaari puetunu cumaacaracajanaa pueyaracaanura. ¡Cuaara naa quiiriatej!

Pedro sequesano quera na naajio na tucuatasacari

¹² Cuarta Pueyaso pueyanaa, janiyari parta Pueyaso pueyano Silvano naajioteree nio posunee naajioneeni. Nojuajaari shamaatia poonijiojua pa Jiyaniijia. Janiyari niaacuara naajiotereeni, cua nacasunura niajaniya, cua shiniujiuniuria niajaniyajuhujaj maja nia pishiniuria Pueyasocuaaji. Seetanujuanaa jiyanoojia na quiniucua, naarate nojuajaari nia jitiata maninia, naquiya na miitishacari niajaniyajuhujaj. Cunora, nocua nia tiuuriquia, pueyaracaanu na cumaquiniuria niajaniya.

¹³ Babilonia tiacajinia quiniaa parta Pueyaso pueyari nia saruhuataa. Nojoriiri Pueyaso saquiriojosano na pueyaranojuhuaj, taa na saquiriojosanotucuaa niajaniyani. Marcori nia saruhuataajuhujaj. Nojuajaari juhua quiyanu. ¹⁴ Naa saruhuatasacari niarta Pueyaso pueya, seetanujuanaa nia paniniutia nia nujuutoore.

Pueyaso cuaara nioojia cajitiiria, canapete Jesucristocua tiuujiacuajani.

TANEE PEDRO NAAJIONEE

Pedro saruhatasacari narta Pueyaso pueya

¹ Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiuutiqiuiaari pocuaji Tacuna Jesucristoocua, taa nocua canaa tiuquiaaricuaani. Nocua nia tiuuniuni, cunoori jiyanhua panishano. Naacujitij, Pueyasoori nia jiyanoocuaa juhua sesa miyashijiaca nia quiniuria na niqiuara, taa canaa quiyacuaani. ² Seetanujuanaa maatia nia niishitiriquia Pueyasoni, pa Jiyaniijia Jesunio. Naacujitij, niaari socua jiyanhua cumaquishaanunaniya. Nioojaari cajitishaanutaniyajuhaaj, juhuajaniya quijiaca nia quiniuria.

Pueyaso pueya cuaara nio niishitiojosano miijiaca quiria

³ Jesucristojuanaacuaajaari pa sequequiaari na pueya pa quiniuria. Paari na masuunu tojjiquiaarini, pa niishishacari nojuajaari seetanujuanaa Pueyaso Niyanu, tojetaarucujanaa maninia miijia. Seetanujuanaa maatia pa niishiniucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojjijaca pa quiniurijahuaj. ⁴ Naa jiyanhua maninia miijia Jesucristo quiniucuatej, nojuajaari pa niishitiquiaari casaa na miiniu pania pajaniyarani. Pajaniyarano na sequesanoori seetanujuanaa maninia, tojishocoriquiano. Paa jaara na sequesano tojtiajaca quiri seetanujuanaani, paari jatanishaanutaniyani juhua nojuaja pa quiniurijahuaj. Naacujitij, paari quiariniora jatanishaaquiaari na cumaacatani maja pa sesenura. Paa jaara Pueyaso tojiyashijiaca quiriquiani, paa maara tojetaarucujanaa seseriquiani, taa mijiria quinia pueya sesequiaacuaani tama nojori panishano miijiacajaaja nojori quiniucua. ⁵ Cunora, tamaajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niacuaajaari tari nocua tiuujijaca. Naa nocua tiuujijaca nia quiniucuatej, jiyanhua nia saniniujiuri maninia miijia nia quiniuria pueyaracaanu. Naa maninia miijia nia quishacaritij, jiyanhua nia saniniujiuri socua niishijiaca nia quiniuria, sesa miiniu nia ruuretanura.

⁶ Naa niishijiaca nia quishacaritij, jiyanhua nia saniniujiuriquia tama nia cuaqueya miiniu panishanojuaja rejetejaca nia quiniuria, maja nia miiniuria sacuaratia casaa nia panishano. Naa tama nia cuaqueyajaaja rejetejaca nia quishacaritij, jiyanhua nia saniniujiuriquia juhuajaniya sashijiaca nia quiniurijahuaj. Naa juhuajaniya sashijiaca nia quishacaritij, jiyanhua nia saniniujiuriquia seetanujuanaa Pueyaso panijijaca nia quiniuria. ⁷ Naa Pueyaso panijijaca nia quishacaritij, jiyanhua nia saniniujiuriquia niarta Pueyaso pueya panijijaca nia quiniuria socua. Naa niarta Pueyaso pueya panijijaca nia quishacaritij, jiyanhua nia saniniujiuriquia tojetaarucujanaa panijijaca nia quiniuria.

⁸ Naa jaara puetunu nio niishitiojosanojuanaa tojjijaca quiriquia seetanujuanaa, majaari najuhuaana pa Jiyaniijia Jesucristo niishijiaca nia quiniu quiniutianiya. Naajuhuaaj, majaari najuhuaana quijiaca nia quiniu quiniutianiya. ⁹ Nio rootasano tojiyashijiaca saniniuuja, nojoriiri juhua cariojuaru, niishiyashijiaca. Naa nojori quiniucuatej, nojoriiri niyafetaquaia nojoricuaajaari juhua jeequejosaaquiaari sesa nojori miishanoiniji. ¹⁰ Cuarta Pueyaso pueyanaa, Pueyasocuaajaari nia sequequiaari na pueya nia quiniuria. Nojuajaari nia saquirioquiaari. Cunora, puetunu nio cua rootasanojuanaa tojjijaca nia quiriquia seetanujuanaa. Naacujitij, niocua

niishiri niaari seetanujuanaa Pueyaso pueya. Majaari quenaaja nocuaji nia rupatenu quiniutianiya. ¹¹ Naa maninia quijiaca nia quiniuucuatej, niaari shuquiriaatia tiuquinitiasaanutaniya jiyocuacaanu pocuaji Tacuna Jesucristoocua, pueyaracaanu nata nia quiniuria, pueyaracaanu Jiyaniijiajanaa na quiniuucua.

¹² Niaacuajaari maatia niishitiojosaaquiaari Pueyaso rupaa Jesucristojini. Niaari cuno seetanujuanaa rupaacua tiuujia. Naajaa, janiyari pueyaracaanu nia niishitiniutianiyan, maninia nia racatanura nia numama. ¹³ Mijiria cua rishishacarijia, Jesucristo jiyaramiquishano cua quiniuucua, maniniacuajaari pueyaracaanu cua shiniujiuniuria niajaniya, maja tariucua nia niishishano Jesucristo rupaajiniji nia niyajetanura. ¹⁴ Pa Jiyaniijia Jesucristoori tari cua niishitiriucuaa janiyari quera mosaanutaniyan. ¹⁵ Cunora, janiyari nio naajiya niaarani. Naacuajitij, janiya jaara mosareni, niaari nio cua naajione jitianutaniya cua nuhuaji nia serojosocoriquiano. Maniniacuajaari nia jitianura cua naajione maja nia niyajetanura puetunujuanaa cua niishitiojosano niajaniya.

Shacantuuca Jesucristo cumaaca niquinaajiniji pohuatasano

¹⁶ Canaa niishitiojosano niajaniya pa Jiyaniijiajinijini, cunoori maja canaa tojishano tamonujiniji. Naajuhua, cunoori maja tama niishijacajaaja pohuatasano na sapojonura pueya. Jesucristo cumaacajiniji canaa pohuatasani, naajuhua, taa na tiuquiniutianihuani, puetunu cunojuanaari maja tama canaa niishishanojuaja. Canaajanaacuajaari canaa namijiatajanaa na niquiquiaarini nojuaja jaara shacantuucara jataquiaari canaa niquiara. ¹⁷ Jiyacaritij, na Que Pueyasoori jiyano hua na timitariquiaa canaa niquiara. Canaari na tojiquiaarini naa na sequesacari Neyanujinijitij: “Nojuajaari Quiyanuniyojua. Jiyano hua cua timitasano”. ¹⁸ Canaa quishacari pa Jiyaniijiaata shacantuucara na jatasaqi tuhuananuucua, canaajanaari naa Pueyaso tojiquiaari jiyocuacaanuji pocuaanoni.

¹⁹ Canaa tojinuucua Pueyaso sequesanojuanaa Neyanujiniji, canaari cunoora seetanujuanaa niishiyani, tariucuacaanu nojuajiniji pueyara Pueyaso sequesano caminiujuniaa sequesanoori seetanujuanaajuhua. Naaratej, maniniacuajaari nia tojinuria nojori naajiotasano Pueyaso Jiyarosocoriquiano Pueyanojiniji. Nojori naajiotasanoni, cunoori poojajinia cuhuataquiaa, naatej, taa samaritiu cuhuataa ninishiquicuaani, cuuara juhuaquemajaatijia. Pananuuri saniniuuja muetanutaniyacujua, seetanujuanaa na cuhuatanura pajaniya. Naa quiniutianiyajaariuhua pa Jiyaniijia muetasacariuhua pocua. ²⁰ Maninia nia niishiri nio, pueyanaa. Puetunu tariucuacaanu Pueyaso sequesano caminiujuniaa naajiotasanojuanaari maja na naata niishishaanu maatia tama pa niishitijatajaaja. ²¹ Tariucuacaanu Pueyaso sequesano caminiujuniaa naajionuutasanoni, cunoori maja tama nojori niishishanojuaja. Pueyaso Sohuanujuanaacuajaari nojori niishitiquiaari nojori pohuatanura Pueyaso sequenu panishano pueyara.

2

Sacuaraatia miijia niishitiojonaajiniji pohuatasano

¹ Tariucuacaanu, noojiaqueya Israel pueyajinijinoori tama na cuaqueyajaaja jiyatequiaari juhua Pueyaso sequenu panishano caminiujuniaa nojori quiniuria. Naacuajitij, nojoriiri narta Israel pueya sapojonuquiaari. Naajuhua cua panishano pueyanaa, sapojonuujacaari nia tajinia supuentaniyajuhaaj. Nojori niishitiojosacari sacuaraatia tama nojori niishishanojuaja, nojoriiri nia sapojonutaniya. Nojori niishitiojosanoori Pueyaso

pueya sesojua cutara. Naacujajitij, nojoriiri tama nojori Camarnujuaja tamacanutaniya, cante nojoriicuara mosaaquiaaricuajani, na pueya nojori quiniuria juucua. Cunora, nojoriiri canashiyaquiji niiquiji puetunu shaa-jasaanutaniyajanaa saniitiosocoriguiano. ² Queraatia pueyari sacuaraatia miijaca quiniutianiyajuhuj, sacuaraatia cuno pojori niishitiojosano toji-jiaca nojori quiniucua. Naa nojori miiniucuatej, Pueyaso niishiyashiji-acaari seetanu rupaajanaa sesacanutaniya. ³ Cuno sacuaraatia niishitio-jonuujuaaari jijanohua casamiriaca quiniucua jiaatijaca quiniutianiya. Naaratej, nojoriiri najuhuaa shanohua nojori niishitiojosanota nia sapon-ponutaniya, nareja nia niquitiojonura nojori nia cumaneeca, nia casaminio. Naajaa, naa sacuaraatia miijaca nojori quiniucuatej, nojoriiri tariu-cuacaanujiniji Pueyaso riuriosanocujaja na saniitiosocoriguiano. Majaari Pueyaso jiyanooni quiniutianiya nojori.

⁴ Naajuhuj, Pueyaso seya jaara sesa miiquiaari, majaari Pueyaso jiyanooni quiquiaari nojori. Pueyasoori puereeta nojori quejooquiaari ninishiqui. Tii nujuatejosano quiyari, nojori saniitiosaanu juuca cuaara quirijiaati-ji. ⁵ Naajuhuj, Pueyasoori Noé quishacari sesa miijaca pueya jiyano-ayquiquiaarijuhuaj. Cuno sesa miijaca pajaashitiani quiaariiri nojori cusoonunura puetunujanaa. Saaja Noé curoquiaariiri Pueyaso tojjia na quiniucua, socua siete pueyanio. Noeri pueyaracaanu cuno sesa miijaca pueya numootequiaari juucua, nojori tacatonura noojia Pueyasocua, sesa nojori miiniujiniji. ⁶ Naajuhuj, Sodoma tiacajinia quiniaa pueya quiniucua jijanohua sesa miijaca, Pueyasoori cuno tiaca catijiatiquiaari toje-taarucujanaa juacara. Naa catijiatiquiaari Gomorra tiacajaariuhuj. Cuno caapiqui tiaca naa catijiatasaaquiarini, cunoori quiquiaari cuno nuhuaji quiri quiano pueya na numootenura maja naa sesa miijaca nojori quini-urijuhuj, nojori mariqui saniitiosaarejaariuhuj. ⁷ Sodoma tiaca Pueyaso catijiatasacari, saaja Lot curoquiaariiri maninia pueyano na quiniucua. Sodoma tiacajinia quijia Lot quiniucua, nojuajaari jijanohua taajequiaari tari, cuno pueya mijionuucua sacuaraatia casaa, tariucua nojori jiiishano casaaca.

⁸ Puetunu juucajanaa, Lotri narta Sodoma tiacajinia quiniaa niquiquiaari cararaatia miitioojiano. Sacuaraatia nojori pocoojonu tojiquiaarijaari-uhuj. Maninia pueyano Lot quiniucua, nojuajaari jijanohua naquiya miiquiaari noojiajinia. Cunora, quera Pueyaso saniitiosacari cuno pojori, Pueyasoori Lot mashiquiquiaari cuno pueya tajiniji. ⁹ Naacujajiti pueyanaa, paari niishyani, Pueyasoori na tojtijajaca pueya cojuaja, maja nojori mi-tishaanura sesa. Saniniuujia, Pueyasoori sesa miijaca racatajajaa nua-juatejosano, nojori saniitiojosaanu juucara. ¹⁰ Pueyasoori socua jijanohua nio pojori saniitioriquiano: na camishoo maajipohua numuetucunuucua jiaatijacani, maajishuriu numuetucunuujacajuhuj, noo pojorijuhuj, pa jiyaniija rootasano ruuretajaca saajatej. Naa sacuaraatia miijacani, nojoriiri tojetaarucujanaa tojiyashijiaca. Majaari na pueretunu quiquiaa sacuaraatia tama nojori panishanojuaja nojori miiniuria. Naajuhuj, nojoriiri maja na pueretunu quiquiaa jiyocuaaanu cumaacaraca quijiaa na sesacanura. ¹¹ Saniniuujia, Pueyaso seya cutaraari jijanohua socua cumaacaraca cuno sesa miijaca pueyajiniji. Naajaa, majaari nojori riuti-ononu quiquiaa Pueyaso, cuno jiyocuaaanu cumaacaraca quijiaa nojori sesacanura.

¹² Cuno pojori, saaja sacuaraatia miiniuria niishitiojonaani, nojoriiri ni-ishiyashijiaca. Nojoriiri juhua nacujiniaaco quijiaa casami, teyanote saaja puecosocoriguiano roosaaquiaacuajani. Tojetaarucujanaa niishiyashiji-aca nojori quiniucua, nojoriiri maninia quijiaa pa quiniuria pa jiyani-

ijia rootasano sesacaquiaa. Cunora, nojoriiri juhua puecoosocoriquiano nacujiniaacoji casaa. ¹³ Naacuajitij, nojoriiri naquiya miishocoriquiano-juhuaj, naquiya nojori miitianuucua narta pueya. Nojoriiri jyanohua timiquiaa nojori jaara naata quiriquia sesa miini juucajuhuaj taa nojori miiquiaa niucuacuaani. Cuno pojoriiri sacuraatia miijiaca. Majaari na niishiniu caririquiniu. Nojori sapojonuucua niajaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajinitej, nojoriiri jyanohua timiquiaa tariucua nojori jiidishano sesa casaacua nojori niishiriojoscari. ¹⁴ Naacuajitij, nojoriiri maja nareja na niquiniu quiquiaa maajipohua. Puetunu maajipohuajanaa niquitiuquiaa nocua na jiaatianutaari. Nojoriiri maja na taajenu sesa na miiniuria pueyaracaanu. Canapuate jatarinitiaja pa Jiyaniijia tojjijani, cuno pojoriiri nojori shiniujuquiaa na sapojonuta, sesa nojori miiniuriajuhuaj. Naajuhuaaj, cuno pojoriiri tariucua jiidinio puetunu nojori panishanojuanaa nojori jiidiana, jaara na naata quiriquia. Nojoriiri tariucua Pueyaso jiyatesano na saniitosocoriquiano. ¹⁵ Pueyaso rootasano tojiyashijiaca nojori quiniuucua, nojoriiri juhua tashuquioono Pueyasooica neteja nuujiniji. Nojoriiri casamiriaca quiniuucua jiaatiajaca juhua supuetana Beor niananu Balaam. Jiyacaritij, Moab jiya jiyaniijaari Israel pueya paraca quiquiaari. Naaratej, nojuajaari Balaam sequequiaari, nojuajaari jyanohua queraatia casami na niqitionutaniya, nojuaja jaara nocua quiaare, Israel pueya na shimionjona nera. ¹⁶ Casamiicua jiaatiaja na quiniuucua, Balaamri na seru nijinia cajiquiaari. Quiaareeri. Nucuaco na quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacuajitij, pocuaashijia seruuri Balaam tarinitiquiaariuhua, juhua moseeca sesa na miini panishacari juucua.

¹⁷ Cuno pojori, pueya sapojouja na niishitiojosanotani, nojoriiri juhua cuari joojequetano. Naajuhuaaj, nojoriiri juhua niqutioocua paratu piyajosano, tamoco quiamaa saajaari. Nojori niishitiojosanoori naajuhuaaj. Majaari na tojjitajaca na naacunu. Pueyasoori jyanohua ninishiqui quiquio tari jiidiaa nojoriicuaaji, pueyaracaanu nojori quiquiorano. ¹⁸ Nojori pohu-atasanoori najuhuaana shanohua tojjishano. Saaja sapojonuuri. Naacuajitij, nojoriiri shusha Jesuucua tiuujiaca shiniujuquiaa nojori miiniuhuaa tama nojori cuaqueya panishanojuaja. Cuno Jesuucua tiuujiacacuaajaari shusha naataja sesa miijiaca pueyajinijinio jatanishaariquiaa juucua, Pueyaso tojjijia nojori quiniuria juucua. ¹⁹ Sapojonuujuaa cuno niishitiojonuu-juaca quiniuucua, nojoriiri pueya niishitiojoquiaa sacuraatia. Pueya niishitiojoquiaari, nojoriniaari seetanujuanaa juhuajaniya quijiaca quiniutianiya shuquiriaatia, nojori jaara nojori niishitiojosano tojjijia quiriquia. ¿Nojori niishitiojosano pueyatucua taa juhuajaniya quijiaca quiriquiani, tama nojorijiaaja jaara sesa miiniuucua jiidinio quiyajaa? Seetanujuanaari, pueyano jaara maja na naata quiriquia sesa casaa na miijionu tarinitianu, cuno pueyanoori seetanujuanaa juhua tama sesa na miijiosano serujuaaja. Majaari na naata na tarinitianu. ²⁰ Pueyanaa, niaacuajaari niishiya, pueyano jaara pocuaji Tacunaacua tiuujiara quiri, pa Jiyaniijia Jesucristoori na cumaquijia na tarinitianura sesa miiniuria na jiidishano. Saniniuujia, cuno pueyano jaara sesa miijiaa quiriohua, nojuaja jaara sesa miijionura jiidiriohua socua, neraari socua puereeta quiniutianiya Pueyaso niishiyashijiaca pueyajiniji. ²¹ Naacuajiti pueyanaa, pueyano jaara seetanu rupaajanaa niishijia quiriquia, nojuajaari cocuaatia miya jaara na samiritiarohua sesa miijia na quiniuhuaa. Cuno pueyanora maara socua maninia quiquiaari maja na niishiniuria Jesucristo rupaa, teyanote na niqiuara pohuatasaaquiaaricuaajani, jatanishano pueyano na quiniuria.

²² Naa pa Jiyaniijia samiritiajaca pueya quiniuucatej, sesa miijiacaa nojori quiniuhuara, nojoriiri nio tariucuacaanu Pueyaso Rupaajinia naajiotasano tohuateequiaa. Naa miriqui sequeyari: “Sareeri coteenu macayoree. Na miaquerohuari”. Naajuhuj: “Cushiiri nanatosaaree juucua. Saaja na cooquojinia neeneecuasuhuariuhuj”.

3

Pa Jiyaniijia tiuquiniuhua cuaracashitishacari

¹ Cua panishano cuarta Pueyaso pueyanaa, nioori tanee cua naajionee niaacuara. Coteenu cua naajiojinia, janiyari nia nacasuquiaarini socua cua shiniujuniuria nijaniya maja nioojia niqijiotejaca nia quiniuria Pueyaso rootasanojiniji. Janiyari naa miya quiarijia nio cua naajiojiniajuhuaj.

² Maninia nia numama nia racatariquia tariucuacaanu pueyara Pueyaso sequesano caminiujuninaa pohuatasano, pa Jiyaniijia jiyaramiquishano pueya pohuatasanonio. Cunocuaajari pocuaji Tacuna rootasano pajaniyara.

³ Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supenutaniya. Nojoriiri tama na cuaqueya miini panishano miijiacajaaja. Na macaatinuria nijaniya, nojoriiri nia nequesotanutaniya: ⁴ “¿Taa nia Jiyaniijia miiquiaarini? Nojuacuajaari nia sequequiaari: ‘Tacatenutaniuhuanijia’. Majaari na tiuquiniu. Tariucuaaanu na niquiniaa pa supetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipinishaanujiniji. Majaari quenaaja tamonu casaa jatenu quiquiaa tamaatiara”. ⁵ Majaari naate pueyanaa. Cuno pojoriiri tariucuacaanu Pueyaso miishanojiniji niishiniu paniyashijia. Jiyanohua tariucuaaanu, Pueyasoori jiya cajiniocua shipiniquiaari saaja na pocuanuta. Na sequesacarijuhuaj, jiyari mohuacajiniji muetaquiaari, mohuaca jiuujiajinia na quiniuria. ⁶ Na nuhuaji, Pueyasoori cuno mohuacaja pajaashitiquiaari puetunu mijiria quijiacajanaa na cusojuanura. ⁷ Quiarijia saniniuuja, jiya cajiniocua, nio jyanio, Pueyasoori na cumaacata nojori jiitiaajaara. Na nuhuaji cutara, puetunujuaanari catenutaniya, Pueyaso saniitosacari puetunu na ruuretajaca pueyajanaa.

⁸ Naajuhuj cua panishano cuarta Pueyaso pueyanaa, pueyaracaanu nio nia niishiriquia. Pa Jiyaniijia, niqiriyatu juucaari juhua mil marijia. Naajuhuj, mil marijiaari juhua niqiriyatu juuca nera. ⁹ Majaari nia jyaniniu maja pa Jiyaniijia tacatenu quiniutianihua. Majaari na tarishiniu najuhanaj, taa tamasaca jyaniyacuajani. Maja. Maja cutaraari na paniniu pueya quejoosaa mania quiquiojinia. Naacuajitij, nojuacuajaari pueya sashiyajaara nojori tacatonura nojori jiuujia sesa nojori miiniujiniji, Pueyaso pueya nojori quiniuria.

¹⁰ Naajaa, nojuacuajaari tiuquiniutianihua. Pueya jyanishacari Jesucristo maja na tiuquiniu quiniutianihua, jiyacaritij, canashiyacuijij tiuquiniutianihuari. Juhua nohuasejojua tiuquiniutianihuari, sesa miijiacaa na saniitonura. Na nuhuaji, jiya cajiniocuaari shaajenutaniya. Jiyanohua cojutunenutaniyari na shaajesacari. Casaajiniji jiya shipinishaaquiaarini, cunoori puetunu catenutaniyajanaa. Naacuajitij, jiyari puetunu mijiria na jitasano casaatajanaa shaajasaanutaniya jyanohua naseeca manijinia.

¹¹ Quiarijia pa niishishacari taa pa jiya shaajasaanutaniyani, cunora, seetanujuaana Pueyaso panijiacaa nia quiriquia saa maninia miijiacaja nia quiniuria. ¹² Naa maninia miijiacaa nia quiriquia, Pueyaso cuuara pa Jiyaniijia mueraterohua pocuajaatijia. Pa Jiyaniijia sequesano tojijiacaa nia

quiriquia, na tiuquiniu juuca nia secootenura. Jiyacaritij, Pueyasoori jiya cajiniocua setanutaniya. Naacuajitij, casaata na shipiniquiaari puetunu casaajanaani, cunoori manijinia mohuaquenutaniya. ¹³ Naajaa, Pueyaso cutaraari seetanujuanaa sequequiaari pajaniya, nojuajaari quiarinio jiya cajiniocua shipininiutianiya pajaniyara, quiarinio jiyanio. Cunora, paari shuquiriaatia na sashiyaani. Jiyacaritij, majaari quenaaja sesa miiniu niishishaanu quiniutianiya socua. Puetunu casaajanaari tojetaarucujanaa maninia quiniutianiya.

¹⁴ Naa nia niishishacari casaa pa sashiya nio pa quishacarini, cunora, jiyanoohua nia saniniujiuriquia saaja maninia miijiacá nia quiniuria. Tojetaarucujanaa jiyanooshano nia quiriquiajuhuaj, juhuajaniya nia quiniuria pa Jiyaniijia taccoji, na nequesoreesacari pajaniya. ¹⁵ Naacuajiti pueyanaa, nio nia niishiriquia: pa Jiyaniijiaari tarishiyajaara pueyacia na tarajenuucua, nocua nojori tiuuniuria, Pueyaso jiyanooniuria nojori. Tarishiyajaarihuaj tojetaarucujanaa jeenucuasano pa quiniuria nera. Pa panishano parta Pueyaso pueyano Pabloori naa naajioquiaari niaacuara-juhuaj, Pueyaso niishitiaja na jitianuucua. ¹⁶ Nojuacuajaari puetunu na naajioneecajiniajanaa mariyata nio cua pohuatasano pohuataa. Noo-jaqueya na pohuatasanoori seetanujuanaa jiyajeneta pueyara. Naacuajitij, mosanucua, noojia niqijiotejacanio, nojoriiri Pablo niishitijosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacuajitij, nojoriiri tama na cuaqueyajaaja jiyatequiaa Pueyaso saniitiosocoriquiano nojori quiniuria.

¹⁷ Cunora cua panishano Pueyaso pueyanaa, niaacuajaari tari niishiya cuno Pueyaso rootasano tojiyashijiacajiniji. Nocuaji jiyanoohua nia cojuariquia tama nia cuaqueyajaaja maja nia sapojosaanura sesa miijiacá nia quiniuhuara. Saaja Pueyaso rupaacua tiuujia nia quiriquia cutara, taa nocua tiuujia nia quiyacuajani, cuno pojori mariqui nioojia niqijiotereeri. ¹⁸ Naajuhua, socua pocuaji Tacuna niishiniuucua jiaatiajaca nia quiriquia. Naa maninia nia niishiri pa Jiyaniijia Jesucristo, socua na panijia nia quiniuria, socua na cumaaca nia jitianurajuhua. ¡Pa Jiyaniijiaari jiyanoohua maninia! ¡Nojuaja cuara shuquiritiasaaria quiarijia, pueyaracaanujuhua! Cuaara naa quiiriatej.

COTEENUJUANA A JUAN NAAJIONEE

Pueya samiitianijia rupaa

¹ Jiya shipinishaacarijijyooja, Jesucristoori quijiajuhuanajaj. Canaari niara naajiyani, canaa niishitiniuria nijaniya nojuajinjij canaa tojishano, canaa niquishanojuhuaj. Pueyanaa, canaari seetanujuanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquiaarijihuaj canaa rupuesacari nojuaja. Nojuajaari pueyaracaanu quijia cutara, pa Samiitianijiaarihuaj, pueyaracaanu quijia pa quiniurijahuaj, na sequesanoocua pa tiuushacari. ² Cuno pueyaracaanu Quijiani, nojuajaari pueyanora jataquiaari. Canaari na niquiquiaarini. Naaratej, canaari pueya pohuataquiaarini, nojuajaari seetanujuanaa pa Samiitianijia. Canaari quiarijia cuno pueyaracaanu Rishijiajinijia nia pohuatajaanihuaj. Coteenu na Queta quijia jiyocuacaanuuri. Na nuhuaji, canacua muetaquiaariiri. ³ Canaari seetanujuanaa nia pohuataa canaa niquishanoni, canaa tojishanojuhuaj. Canaa pohuatasanooocua nia tiuushacari, pocua rupuetooteni, taa canaa quiya pa Que Pueyaso rupuesanocuaani, Neyanu Jesucristo rupuesanonio. ⁴ Njaa jaara nio naajiojinia canaa sequesano tojiri, niaari seetanujuanaa shuquiriaatia quijiaa quiniutianiya. Canaa jaara niaacuaji tojiriqiani, canaari shuquiriniutianiyajaacuhuj.

Pueyaso pa cuhuatana

⁵ Jesucristocuaajaari nio rupaa canaa niishitioquiaari, canaa nia pohuataani. Nojuajaari naa canaa sequequiaari: “Pueyasoori Cuhuatana cutara. Nojuajaari maja ninishiqui quijia quenaaja”. ⁶ Naacuajitij, paa jaara sequereni: “Pueyaso rupueja cutaranijia”, na rupaa pa tojiaquishacari, paari saaja najuhuaana sapojiyani. Paari juhua ninishiqui quijia quijiajaani. ⁷ Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupuetootesano quiya parta Pueyaso muerasuta cutarani. Naa juhua rupuetootesano pa quishacaritij, Neyanu Jesucristo nanacaari puetunu sesa pa miishanojuanaa tuujuquiaa poojiajinijia.

⁸ Paa jaara sequereni: “Janiya sesa miyashijiani”, paari tama pa cuaqueyajaaja sapojiyani naa pa sequesacaritij. Majaari Pueyaso rupaa tojijia pa quiniu. ⁹ Paa jaara sesa pa miishano pohuatare saniniunijia, Pueyasoori jiyanootio cutara, na jiyanooniuria pajaniya, taa na sequequiaaricuaajani. Poojiajinijia jeequenutaniya puetunu sesa casaajanaari. ¹⁰ Paa jaara saniniuuja sequereni: “Maja sesa cua miiniu”, paari Pueyaso jiyateya juhua sapojuuarani. Paa jaara naa quirini, majaari seetanujuanaa na rupaa quiniu poojiajinia.

2

Jesucristo pocuaji tacuna

¹ Quiquiohuanijyoojanaa cua tojitiare. Nio naajiya niaaranijia, maja juhujaniya nia miiniuria sesa. Paa jaara sesa miirini, paacuajaari pa Que Pueyaso shuriucua jiiitaa pocuaji Tacunani, na Que Pueyaso na jiyanootiniuria pajaniya. Nojuajaari Jesucristo, pueyaracaanu maninia miijia cutarani. ² Sesa pa miishanoori jiyanooshaaquiaa Jesucristo cusunucua pocuara. Majaari saaja jiyareta pa sesa miishano jiyanooshaanu quiquiaa, mariyata puetunu mijiria quiniaa sesa miishanojuanaari jiyanooshaaquiaajuhuj.

³ Paa jaara pa Jiyaniijia rootasano tojirini, paari niishiyani paa tari Pueyaso niishirii cutarani. ⁴ Jesu rootasano tojiyashijia jaara sequeriquia: “Pueyaso niishyanijia”, jiyano pueyanoori sapojoua. Majaari na jitianu Pueyaso rupaa noojiajinia. ⁵ Cante saniniuujia pa Jiyaniijia sequesano tojijia cutarani, nojuajaari seetanujuanaa pa Que Pueyaso panijia cutara. Naacuaajitij, paari niishiyani paari jatiqúi quiya natani. ⁶ Cante sequejani: “Janiyari Pueyaso rupuejani”, nojuaja cuaara quiiria juhua Jesucristo, taa na quiqúiaari maniniacuaani, mijiria na quishacari.

Quiarinio Pueyaso rootasano pajaniyara

⁷ Cuarta Pueyaso muerasunaa, majaari quiarinio nio rootasano, janiya niaara na naajiyani. Niocuajaari tariucuacaanu nia tojishano, majaari quiarinio. Niaacuajaari tari na tojiqúiaari, Pueyaso rupaa jaara shushajanaa nia niqúiaara pohuatasaaqúiaari. ⁸ Naajaa, nio rootasano quiaríjia cua naajiosanoni, nioori seetanujuanaa juhua quiarinio niaara. Niaari tari na tojiqúiaa, pueya panijia nia quishacari, taa Jesucristo quiqúiaari pueya panijiacuaani mijiria na quishacari. Na rootasano nia tojishacari, niniqúiaari tari quiamacuaa nioojiajiniji. Pueyasoori nioojiajinia cuhuataa nia panitiosacari quiaríjia.

⁹ Naa jaara sequeriquia: “Pueyasoori coojia cuhuatarucuaani na rupaa cua niishishacari”, na nuhuaji majaari nia niqúiniu paniniu niarta Pueyaso pueyano, niaari ninishiqui quiyajaa. ¹⁰ Cante narta Pueyaso pueya panijia cutarani, nojuajaari cuhuashiqui quijia cutara. Tamasacaari maja na naata sesa na miitiniu, naajuhua, tama nojuajaaríjia maja sesa na miiniu quiniutianiya, pueya panijia na quishacari. ¹¹ Cante narta Pueyaso pueya niqúiniu paniyashijiani, cuno pueyanoori ninishiqui quiyajaa, juhua ninishiqui canujuucuaajaariuhua. Majaari na niishiniu tee na quiaani. Naa na quiniucua juhua ninishiquitij, nojuajaari juhua cariyoujaru quiya. Majaari na niishiniu Pueyaso casaa.

¹² Quiquihuaniyojuanaa, niaara naajiyani nionijia, Pueyaso jiyanooshano muerasu nia quiniucua, Neyanu Jesucristo mosaanuucua pocuara. ¹³ Queyanaa, niaara naajiyani nia niishiniucua pueyaracaanu Quijia, cante tari pocuaji quiqúiaari jiya coteyaquishacaríjiaacuani. Mashiquioriniaa, janiya niaara naajiyajaaniuhua cua timishacari nia shocotanuucua Sesaaca.

Janiyari niaara naajiocanuni quiquihuanaa, nia niishiniucua pa Que Pueyaso, Neyanu Jesucristoocua nia tiuushacari. ¹⁴ Janiyari niaara naajiocanujuhua queyanaa, nia tiuuniucua tariucua pocuaji Quijiaacua, nio jiya coteyaquishacaríjia. Janiyari niaara naajiocanujuhua mashiquioriniaa, seetanujuanaa maninia nia tojinuucua Pueyaso rupaa, naa jaara na masequaaari nioojiajinia, Sesaaca nia shocotanuucuaajuhua.

¹⁵ Majaari mijiria sesa miiniucua nia jiaatianu, mijiria casamiicuanio. Cante mijiria casaaca jiaatiajani, cunoori maja pa Que Pueyaso panijia. ¹⁶ Mijiria niishijia coretanijosano tama nojori niishishanojiníjiaajani, puetunu cunojuanaari maja pa Que Pueyaso niishitishano. Cunoori sacuaratia tama mijiria pueya niishishanojuaaja. Naacuaajitij, pueyano pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuquiritiniuríjiaaja. Paari pa niquishano pa maniniucuasano casaa paniquiaa pueyaracaanuni. Naajuhua, paari pueyaracaanu timiquiaani tamasaca timitiasacari pajaniya. Puetunu naa sacuaratia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. ¹⁷ Nio jiyari tari tariucuwashiyaree. Socua shaajasaanutianiya puetunujuanaari. Puetunu sesa pa jiaatianujuanaari

cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

Jesucristo paraa

¹⁸ Quiquiohuanaa, quiarijiaari quera jiya puequesacari tari. Niaacuajaari tari pohuatasaaquiaari Cristo Paracaari ninutianiya. Quiarijiani, queraatia na paraari tari supueee. Naacuajitij, paari niishiyani nio pa quishacariiri jiya puequesacari quera. ¹⁹ Cuno Cristo paraani, nojoriiri pajaniyajini-jinio pueya quiquianucujaja. Pocuaji rupertetucanuuri maja seetanujuaana Pueyaso muerasu nojori quishacari. Jaara seetanujuaana Pueyaso muerasu quiquianu, mariqui pata quiyacuaateni. Naa nojori miiniucuatej, paari niishiyani majaari puetunu pata rerejonaajanaa seetanujuaana parta Pueyaso muerasu.

²⁰ Saniniuujia nijaniya Pueyaso muerasunaa, Jesucristoori nia niqutioquiaari na Sohanu. Naaratej puetunu nijaniyajanaari Pueyaso niishitiajaraca. ²¹ Majaari niaacuara cua naajionuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhuj, sapojoua sequesanoori maja Pueyasojiniji.

²² Pueyano jaara sequere: “Jesuuri maja Pueyaso Jiyarosano”, cunoori sapojoua. Cante sequejani: “Pueyasoori maja Jesu Que”, cunocuajaari Cristo paraca. Jaara sequerejuhuj: “Jesuuri maja Pueyaso Niyanu”, cunoori Cristo paracajuhuj. ²³ Cante Pueyaso Niyanu Cristo tamacajani, majaari Pueyaso na jitianu na Querajuhuj. Cante Pueyaso Niyanu Cristo jitiaa cutarani, pa Que Pueyaso jitiaa na Querajariuhuj.

²⁴ Naaratej, Pueyaso rupaa nia racatare nia numaama taa nia tojiquiaari tariucuacaanucujani jaara shushajanaa pohuatasaaquiaari nia niquiara. Niaa jaara naa racatariquia na rupaa nioojajiniate, seetanujuaana nocua nia tiuushacari, niaari jatiqui quiya pa Que Pueyasota, Neyanu Jesucristotiano. ²⁵ Jesucristocujajaari na Sohanu niqutioquiaari pajaniya, pueyaracaanu pa rishiniuria. Nojuajanaari naa pa sequequiaari.

²⁶ Nio naajioree niaaranijia cua niishitiniuria nijaniya, nia niishiniuria taa Jesu paraa niishitiojonuquiaa sesa najuhuaana na cuaracashiniuuniutiani. ²⁷ ¿Casaara nojori nia tojiquiaani? Niaacuajaruhua tari Pueyaso Sohanu jitiaa, Jesucristo niqutioosano nijaniyani. Naacuajitij, majaari tari panishaanu tamasaca niishitiojonura socua nijaniya. Pueyaso Sohanucujajaari nia niishitiojoquiaa puetunu casaajanaa. Puetunu na niishitiojosanojuanaari seetanujuaana cutara, maja sapojonu. Naaratej, pueyaracaanu jatiqui nia quiuquija Jesucristota, taa Pueyaso Sohanu niishitiojoquiaa nia quiniuriacuajani.

²⁸ Quiarijiani quiquiohuaniyojuanaa, jatiqui nia quiri Cristota, seetanujuaana juhuajaniya nia quiniuria pa Jiyaniijia jaara tiuquiriohua pocua. Naa nia quiriritij maja nia caririquiniuria nojuaja jaara pa jitiiasuhua. Na rupaa tojiyashijiaacari caririquiniutianiya cutara. ²⁹ Niaacuajaari seetanujuaana niishiya, Jesucristoori tojetaarucujanaa sesa miyashijia cutara. Niaa cumaati niishiyajuhuj, puetunu maninia miijiacajanaari Pueyaso muerasu.

3

Pueyaso muerasu

¹ Pueyanaa, pa Que Pueyasoori jiyanohua pa panijia. Pa sequeyari, “cua niquiohua”. Seetanujuaana, paari necohuani. Naaratej, majaari mijiria quiniaa pueya niishiniu pajaniya. Pa niishitiyaquiyari nojori

niishiyaquiniuucua pa Que Pueyaso. ² Cua panishano Pueyaso muerasunaa, paari tari Pueyaso muerasucujani. Maja cutaraari pa niishiniu taamuecaquitijia pa quiniutiianiya na nuhuajitijiaj. Paari saaja niishiya cutarani, Jesucristo jaara nimiohua, paari juhua nojuaja quiniutiianiya. Na tiuquishacariuhua, paari na niquiniutiianiya taa na quiyacuajani. ³ Puetunu na sashijiacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucujanaa.

⁴ Cante sesa miijiani, cunoori Pueyaso rootasano na rupaajinia tojiyaquijia. Puetunu sesa miiniujianaari Pueyaso rootasano tojiyaquiniu. ⁵ Niaari niishiyajuhua, Jesuuri mijiria pocua niquiaari poojia seque na jataniniuria. Nojuajaari tojetaarucujanaa sesa miyashijia cutara. ⁶ Naacuajitij, cante jatiqui quiya pa Jiyaniijiatani, nojuajaari maja sesa na miiniu quiquiaa cutara. Cante saniniuujia sesa miijiani, majaari na niishiniu Jesu. Majaari nojuaja na niquiniu quiquiaarijuhuaj. ⁷ Quiquiohuanijoyuanaa, tama nia cuaqueyajaaja nia cojuare niaa mariqui sapojosaareeri. Cante maninia miijiani, nojuajaari maninia pueyano cutara, taa pa Jiyaniijia Jesucuaani, pueyaracaanu maninia quijia cutara. ⁸ Saniniuujia, cante sesa miijiani, nojuajaari Sesaaca pueyano. Shusha jiya coteenujiniji, Sesaacuaajaari tari sesa miijia quiquiaari. Pueyaso Niyanuuri cunora niquiaari puetunu sesa na miijosanojuanaa na shaajanura.

⁹ Puetunu Pueyaso pueyajanaari maja sesa miiniuucua na shiiniuquiniu, quiarinio pueyara Pueyaso rootesano nojori quiniuucua. Nojoriiri quiarinio pueyara jatanishano quiya Pueyaso Sohuanu nojori jitiiasacari. Naacuajitij, seetanujuanaa Pueyaso muerasu nojori quishacari, majaari na naata sesa miijiaa nojori quiniu pueyaracaanu. ¹⁰ Naacuajitij, maatia niishishanocuaajaari cante Pueyaso muerasuni. Saniniuujia, cante maninia miyashijiani, nojuajaari maja Pueyaso pueyano. Naajuhua, cante narta pueya paniyaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujanihuaj.

Panitiojuaca pa quirij

¹¹ Pueyanaa, shushajanaa Pueyaso rupaa nia tojishacari, niaacuajaari naa niishitiojosaaquiaaritij: “Panitiojuaca nia quirij”. ¹² Maja cutaraari pa quiniu juhua Caín! Nojuajaari tama tarajanujuaaja moquiaari, Sesaaca tojiija na quiniuucua. Nia niishiritio casaara Caín moquiaari tarajanuni. Nojuajaari tama tarajanujuaaja tacartaquiaari monu, tarajanu miishano quiniuucua maninia. Saniniuujia, tama na miishanojuaaribia sesa quiquiaari. Cunora tarajanu moquiaariiri.

¹³ Cuarta Pueyaso muerasunaa, majaari nia jiyajenenu Pueyaso ruuretajaca jaara niquiniu paniyaquiriquia nijaniya. ¹⁴ Paacuajaari juhua macu samiitianijiosaquiaarihuani, seetanujuanaa saminiucua pa quiniuria. Paari seetanujuanaa na niishiyani panitiojuaca pa quishacari parta Pueyaso pueyata. Cante tapueyocuaca paniyaquijiani, nojuajaari juhua macu quiyajaa. ¹⁵ Naajuhua, narta pueyano niquiniu paniyashijiacani, nojuajaari juhua pueya nojuaja Pueyasora. Niaacuajaari niishiya, pueyano mojuuari Pueyaso samiitianiyaquishoojua pueyaracaanu na rishiniuria. ¹⁶ Paacuajaari niishiyani, Cristoori jiyanoehua pa panijia na cusonuucua pocuara. Naacuajiti paari niishiyani taamuecate seetanujuanaa paniniuni. Paa cuara naa panijia quiriujuhua, tama pa cuaqueyajaaja pa tarinitianura parta Pueyaso pueyacuara, jiyanoehua pa paniniutia nojori. ¹⁷ Niaa jaara nareja niquiya niarta Pueyaso pueya casamiijuuniucua, puetunu nia panishanojuanaa nia jitiiasacariucua, niaari najuhua

sequeya: “Pueyaso panijianijia”. ¿Pueyaso panijia pueyanoteeri jiyano pueyano, narta Pueyaso muerasu niqutioyaquijia na jiiitiasanojiniji? ¡Majal!¹⁸ Quiquihuanijoyuanaa, majaari najuhuaana pa sequenu: “Cuarta Pueyaso pueya panijianijia”. Paa jaara seetanujuanaa nojori panirini, nojoriicua pa taraajere, taraatia nojori miishacari. Pueyaracaanu maninia pa miiri, seetanujuanaa pa paniniutia pueya. Majaari najuhuaana pa sequenu: “Nojori panianijia”.

Pueyaso tojjiaari juhuajaniya quijia Pueyaso niqiara

¹⁹ Naacuajitij, paa jaara pueya panijia quirini, paari niishiyani paa seetanujuanaa Pueyaso tojjiani. Paari niishiyani paa pueyaracaanu rishiriquiano Pueyasotani. Majaari pa shaajenu quiniutianiya.²⁰ Pueyaso muerasu pa quishacari, poojia jaara pa taacanuutere saaja nocuaji, naajaa, Pueyaso cutaraari jiyanohua maninia niishijia socua poojia niishishanojiniji. Nojuacuajaari pa niishiya cutara.²¹ Cua panishano Pueyaso muerasunaa, poojia jaara pa macuhuaajaquiri, paari shuquiriaatia quiya Pueyaso niqiarani.²² Nojuajaari puetunu pa masesano niqutionutianiya pajaniya, na rupaa pa tojjhacari, puetunu na panishanojuanaa pa miishacarijuhuaj.²³ Pueyaso sequesano pueraari nio: Neyanu Jesucristoocua pa tiuuniuria, pa panitioonurajuhuj taa na sequequiaaricujani.²⁴ Canapuate Pueyaso rootasano tojjiacani, nojoriiri Pueyasota ruquetootesano quijiaa. Naa-juhuaj, Pueyasoori nojorijinia quiyacujua. Nojuacuajaari na Sohuanu niqutioquiaari pajaniya. Naa na Sohuanu pa jiiitiasacariitij, paari maatia niishiyani Pueyasoori poojiajinia quiya.

4

Pueyaso Sohuanujiniji pohuatasano, Cristo Paraca sohuanujinijio

¹ Cuarta Pueyaso pueyanaa, quiarijiani, queraatia Pueyaso sequenu panishano caminiujuniaa pueyari supueya. Majaari ritia nia tiuuniu puetunu nojoriicujajanaa. Coteenu nojori nia saniniujiuri, nia niishiniuria nojori caminiujiushanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuujuaacari caneya. Nojoriiri najuhuaana cuaracashiniuya na sequesacari: “Janiyacuajaari Pueyaso sequenu panishano caminiujuniani: Pueyaso Sohuanu niishitishano janiya”.² Niaari naa niishiniutianiya cante seetanujuanaa Pueyaso Sohuanu niishitishano caminiujuniani: Pueyaso Sohuanu jiiitajaari naa sequeja: “Pueyaso jiyarosano Jesucristoori pueyanora quiquiaari, mijiria pocuara cusoriquiano”.³ Cante saniniuuja jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jiiitanu. Saaja Sesaaca sohuanu jiiitaa noojiajinia cutaraari. Nojuacuajaari Jesucristo Paraca. Niaacuajaari tari pohuataaquaiaari, Cristo Paraca sohuanuuri niniutianiya. Nojuacuajaari tari mijiria quiya.

⁴ Quiquihuanijoyuanaa, niaacuajaari Pueyaso muerasu. Naacuajitij, niaari cuno sapojonuujuaa shocotacanu Pueyaso cumaacata. Nioojiajinia Quijiaari socua cumaacaraca nojori jiiitiasano Sesaaca cumaacajiniji.⁵ Cuno sapojonuujuaacari saaja Pueyaso niishiyashijiaa, maja Pueyaso muerasu. Naacuajitij, nojoriiri saaja mijiria casaajiniji pohuatanuuquiaa. Naarate narta Pueyaso ruuretajacaari nojori tojjitiaquiaa.⁶ Paa cutaraari Pueyaso pueyani. Naacuajitij, cante Pueyaso tojjitajacani, nojoriiri pa tojjitiaquiaa. Canapuate saniniuuja maja Pueyaso pueyani, nojoriiri maja na tojjitanu quiquiaa pajaniya. Naacuajitij, pa naata niishiniu cante seetanujuanaa Pueyaso Sohuanu jiiitaa cutarani, cante saniniuuja sapojoua sohuanu jiiitaaanijia.

Pueyaso pa panijia cutara

⁷ Cua panishano Pueyaso pueyanaa, jiyanoohua panitioojuaca pa quirij. Pueyasocuaajaari pa panijia. Nojuajaari pa panitijia na Sohuanuta, jiyanoohua panijia pa quiniuriajuhuaj. Canapuete puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaariuhuj. ⁸ Canapuete pueya paniyashijiacani, nojoriiri maja na niishiniu Pueyaso. Pueyasocuaajaari panijia cutara. ⁹ Nojuajaari pa niishitiquiaari taa na paniquiaa jiyanoohua pajaniyani, Neyanuniyojua na jiyarosacari mijiria pa samiitianijioriquiano, pocuara na cusosacari. ¹⁰ Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jiyaroquiaariiri pocuara mosocoriquiano, sesa pa miishano jiyanooshaanura. Naa cutarate seetanujuanaa paniniu.

¹¹ Cua panishano Pueyaso muerasunaa, Pueyaso jaara naa pa paniquiaar-icuaa, ¿casaara pa panitioyaquiyarinijia? Naa panitioojuacara pa quiriji-uhuj. ¹² Majaari quenaaja pa niqiniuu quiquiaari Pueyaso, taamuecate-janojoni. Naajaa, paa jaara tamasaata panitioojuaca quirini, Pueyasoori poojiajinia quiyacuaja. Naacuajitij, paari tojetaarucujajanaa panijiacara quiniutianiyani, na paniniu quishacari poojiajinia. ¹³ Nojuajaari na So-huanu pa niqutioquiaari poojiajinia na quiniuria. Naacuajitij, paari ni-shiyani paacuajaari nata rupuetoojua quiyani. ¹⁴ Canaajanaari seetanuj-anaa canaa niquishano pohuataani: Pueyasoori Neyanu jiyaroquiaari mijiria, mijiria quiniaa niti mosocoriquiano, nocua tiuujiaa jiyatesaanura Pueyaso pueyara. ¹⁵ Cante pueya niquiara sequejani: “Jesuuri seetanujua-naa Pueyaso Niyanu”, Pueyasoori noojiajinia quiya. Nojuajaari Pueyasota rupuetoojua quiyajuhuj.

¹⁶ Naacuajitij, paari niishiyani Pueyasoori jiyanoohua pa panijia. Paari na niishiyajaaniuhua na rupaacua pa tiushacari. Pueyaso cutaraari panijia. Paa jaara pueyaracaanu panijia quirini, paari seetanujuanaa Pueyaso rupuejani. Naajuhuj, Pueyasoori poojiajinia quiya. ¹⁷ Naa Pueyaso quishacari poojiajinatej, paari pueya panijiaa jiyacatequiaa socuani. Naa seetanujuanaa panijia pa quishacaritij, paari juhuajaniya quiniutianiya Pueyaso nequesoresacari puetunu pueyapuejanaani. Ma-jaari pa puerenu quiniutianiya panijia pa quishacari taa panijia nojuaja quiyacuani. ¹⁸ Cante seetanujuanaa Pueyaso panijiani, majaari na ni-shiniu puerenu. Naa pa paniniuuri puetunu pa puerenu jataajanaa. Cante puereja quiya saniniunijia, majaari juhuanojuaja na paniniu Pueyaso puetunu noojiatajanaa. Puerejaari niishiriojiya: “Saniitiosaanutaniyani-jia”.

¹⁹ Niaacuajaari niishiya, Pueyasoori coteenujuanaa pa paniquiaari, naarate paari saniniuuja na paniyani. ²⁰ Saniniuuja, cante sequejani: “Janiyari Pueyaso panijiani”, narta pueya niqiniuu paniyaquiya saajaaraar-uhuj, jiyano pueyanoori sapojoua. Naa na paniyaquishacari tarajanu na niquishano na namijataa cutaratej, ¿maatucua taa Pueyaso panirini, na niquishoo socuani? ²¹ Pueyasocuaajaari naa pa rootaquiaari: “Cante cua panijiani, cuara paniiria narta pueyajuhuj”.

¹ Niaa jaara Jesuucua tiuuri nojuaja seetanujuanaa Pueyaso Jiyarosano quiquiaari, niaari Pueyaso muerasu. Mijiria, cante muerasu que panijiani, necohua paniyajaariuhuaaj. ² Naacuaajitij, pa panishacari Pueyaso, pa tojishacari na rootasanojuhuaj, jiyacariti paari niishiyani paari parta Pueyaso muerasu paniyajaacuhuaaj. ³ Paa jaara Pueyaso panijia quiri seetanujuanaani, paari na sequesano tojjiaaca quiyajaaniuhuaaj. Na rootasano pajaniyani, majaari jiyajeneta na quiniu pajaniyara. ⁴ Cante seetanujuanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasocua pa tiuushacari. ⁵ Cante Jesu jiyateya seetanujuanaa Pueyaso Niyanurani, saaja jiyano pueyano na naata mijiria niishishano shocotanu cutara.

Pueyaso Niyanujiniji pohuatasano

⁶ Pueyasoori canaa niishitiquiaari Jesuuri seetanujuanaa Neyanujuhua-najaj, Jesu jaara moojinia tiuquinishaacuaari. Canaa niishitiquiaarijiaariuhuaaj Neyanu jaara niyacutesanojinia naatequiaari. Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhuaaj, janiyajanaari na niquiquiaari na nanaca shooteyano na shuucuaajini. Naajuhuaaj, poojiajinia quijia Pueyaso Sohuanuuri pa niishitiquiaa cunoori seetanujuanaa Pueyaso Niyanu quijiajuhuanajaj. Pueyaso Sohuanu cutaraari maja na niishiniu sapojonu. ⁷ Jiuujianaraca jiyocuaaanu quijiaacari pa niishitiya Jesucristoori mijiria niquiaari pueyano na quiniuria seetanujuanaa. Cuno pojoriiri nio: Pueyasojuaanaa, na Rupaa, na Sohuanunio. Nio jiuujianaraca quijiacani, nojoriiri Pueyasojuhuanajaj. ⁸ Paari mijiria jiiitaa Jesujiniji pa niishitijiacajuhuaaj. Cunoori jiuujianaraca quiyajuhuaaj. Cuno pojoriiri nio: poojiajinia quijia Pueyaso Sohuanu, jiyocuaaanuji tojishano rupaa Jesu tiuquinishacari moojinia, naajuhuaaj, na nanaca, pueya niquishano na shuucuaaji shoyano. Puetunu cunojua-naari mariyata pa niishitiya Jesuuri seetanujuanaa Pueyaso Niyanu. ⁹ Paa jaara tojiriquia pueya pohuatanuusanoni, ¿casara sania Pueyaso sequesano pa tojiaquiyarini? Pueyaso sequesano Neyanujinijiiri socua seetanu rupaajanaa cutara pueya pohuatanuusanoinijiji. ¹⁰ Cante Pueyaso Niyanuucua tiuujiani, Pueyaso Sohuanuuri noojiajinia na niishitiya Jesuuri seetanujuanaa Pueyaso Niyanu. Saniniuujia, cante Pueyaso sequesano Neyanujiniji ruuretaja saniniunijia, nojuajaari Pueyaso jiyateya sapojuara, na tiyaaquishacari tama Pueyaso sequesanoocuaajaaja Neyanujiniji. ¹¹ Pueyasocuaajaari sequequiaari, Neyanuucua tiuujiaacari pueyaracaanu rishijiaa quiniutianiya. ¹² Cante Pueyaso Niyanu jiiitaa noojiajiniani, nojuajaari tari samiitianishaarohua pueyaracaanu rishijia na quiniuria. Pueyaso Niyanu jiiitaaashijiaari saniniuujia maja na rishiniu quiniutianiya.

Nio naajio puequenu panishacari rootasano

¹³ Nio naajiyi naaranijia nia niishiniuria, Pueyaso Niyanuucua nia tiuushacari niaari tari samiitianijiosaarohua pueyaracaanu nia rishiniuria.

¹⁴ Paari Pueyasocua tiuquuaani, pa niishishacari nojuajaari pa tojiquiaa pa secojosacari nojuaja, pa masesano jaara quiri taa na paniyacuaajani. ¹⁵ Naatej, taa pa niishiyacuaani Pueyasoori pa secojosano tojiquiaa, paari naa niishiyajuhuaaj paari nojuaja pa masesano maseree tarini.

¹⁶ Cante narta Pueyaso pueyano niquiya sesa miyanoni, cuara Pueyaso secojooa nocuara, sesa na miishano jaara na cusojuaashijia quiri. Naacuaajitij, Pueyasoori cuno sesa miijia naataniniutianihuaa, sesa na miishano jaara cusojuaashijia quiri. Quiyajaariuhuaa tamonu sesa casaa miiniu. Paa jaara cuno sesa casaa miirini, paari cusoqueeni. Naa cua sequesacari niajaniatej, majaari cua sequenu niajaninya nia secojonura jiyano

sesa miishanoocuaratej. ¹⁷ Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

¹⁸ Paacuaajaari niishiyani pueyanaa, cante Pueyaso jiitiaa juhua na Que cutarani, nojuajaari sesa miyaquiquiaa, Pueyaso Niyanu cojuasacari nojuaja. Naacujitij, Sesaacaari maja na naata sesa na miitiniu. Majaari na naata sesa na miiniujiuhuj.

¹⁹ Paari niishiyani paa cutaraari Pueyaso muerasuni. Sesaacaari sanini-uujia puetunu mijiria quiniaa Pueyaso niishiyashijiacajanaa jiitiaacujua. Nojuajaari nio jiya camarnu.

²⁰ Paari niishiyajuhuj Pueyaso Niyanuuri mijiria pocua niquiaari. Nojuajaari na niishitaja niqutioquiaari pajaniya, maninia pa niishiniuria na Que, na Que quiniuria pa Quejuhuaj. Nojuajaari Pueyasojuanaa cutara. Paari nata quiya jatiqini, Neyanu Jesucristota pa rupuetosacari. Nojuajaari Pueyasojuhuanajaj, pa Samiitianijiaariuhuj, pueyaracaanu rishijiaca pa quiniuria. ²¹ Quiquiohuaniyojuanaa, saaja Pueyaso pa paniri. Tama pa cuaqueyajaaja pa cojuare, maja tamonu casaacua pa jiaatianura socua Pueyasojiniji. Paa jaara tamonu casaacua jiaatiareni, paari Pueyaso shocoteya nocuarani. Niojuanaa pueyanaa. Tariucujaja.

TANEE JUAN NAAJIONEE

Pueyaso Rupaa seetanujuanaa panijiara pa jiyateja

¹ ¿Quiaate quiyajaa cua panishano cua rimiatucuanaa? Quiaacuajaari Pueyaso saquiriojosano, neyatu quia quiniuria. Quiocuara naajijaniija, quia panishano muerasuucuaranio.

Janiyari saaquiano Juanni, Pueyaso muerasu jiiitiana. Seetanujuanaa nia panijaniija, taa puetunu Pueyaso rupaa tojiniaa pueya paniya nijaniyacuaani. ² Pueyasojiniija seetanu rupaajanaari poojijinia quiya. Naaratej, canaari nia panijani. Cuno rupaari poojijinia quiniutianiya pueyaraaanu. ³ Nia tojishacari seetanu Pueyaso rupaajanaa, nia panitioosacarijihuaj, naacuajitij, pa Que Pueyasoori Neyanu Jesucristota nia cumaquiniutianiya. Niaacua taraajenutaniyajaarihuaj. Nioojia jiyatenutaniya juhuania quijiacarajaarihuaj.

⁴ Noojiaqueya quia niqiuohuajiniinio niqiuquianunijia. Nojori timiatiacanunijia nojori tojtianuucua maninia seetanu rupaajanaa, taa pa rootasaaquiaari pa Que Pueyasojiniicujani. ⁵ Quiocuara naajiya quiarjijaniija cua panishano cua rimiatucuanaa, cua sequenura quiajaniya: “Jiyanohua pa panitioore”. Majaari quiarinio rootasano nio, cua naajiosano quioctuarani. Nio rootasanocujaaari pa jiiitiasano pueyaracaanu Jesucristojiniija. ⁶ ¿Taate pa naata paniniuni? Paari pueya panijiaa quiyani Pueyaso rootasano pa tojishacari. Niocujaaari na rootasano: puetunu pa miishanojuanaa cuara quiriia Pueyaso pa paniniutia poojijinia.

Cristo paraari sapojonuujuaa

⁷ Quiarijiani, queraatia sapuenu juhua Pueyaso sequenu panishano caminiujiunaaari mijiria quiya. Nojoriiri pueya niishitiojoquiaa: “Majaari Jesucristo rosenu quiquiaari jiyocuaaanuji, cuaqueyaraca na quiniuria, seetanujuanaa pueyano na quiniuria”. Canaputee naa sequejacani, nojoriiri sapojonuujuaa. Nojoricujaaari Cristo paraa. ⁸ Tama nia cuaqueyajaaja nia cojuare cuno pueyacujaji, maja nia tojiniuria nojori, niaa mariquii Pueyaso niquitionu panishano pajaniya maseyaquiriiri, pa Jiyaniijia nia poonijionunijini na niquitionu panishano. Suraatiaja nia tojriohuarohua seetanu rupaajanaa, nia masenura puetunu Pueyaso jiiitiasanojuanaa niaara. ⁹ Cante tama na cuaqueyajaaja jiyateja Pueyaso casaa niishijiara socua Jesucristo jiyaramiquishano pueya niishitiojosanojinijini, cuno shocotajaari Pueyasoojura quiquii, na shocotanuucua Cristo rupaa. Cante saniniujia seetanu rupaajanaa tojtiaquiaa maninia, taa pa rootasaaquiaari Cristo rupaacujani, Pueyasocujaaari na Que, Neyanuuri nocuaji Tacunajuhua. ¹⁰ Seetanu rupaajanaa jiiitaashijia jaara niaacua tiuquiniu paniya tamaatia na niishitiojonura nijaniya, majaari niaacua na shanacununoj. Majaari quenaaja na saruhuatanujuhua nia cumaquiniuria nojuaja. ¹¹ Cante na sequeyani: “Pueyaso cuara cumaquiiria quiajaniya”, naa sequejaari cuno sapojoua cojritiasaaree tari cesa na miishanotaja.

Juan puecasacari naajionu

¹² Socua queraatia sequenu paniya nijaniyaniija. Naajaa, majaari cua naajionu paniniu. Janiyacuajaari niaacua naquerejiyani, maninia pa pocoojonura, shuquiriaatia pa quiniuria seetanujuanaa. ¹³ Quia tarajanu niqiuohuari cua sequeree nojoriiria cua saruhuatanura quiajaniya. Nojuacuajaari Pueyaso saquiriojosano maajijihuaj. Tariucuaja.

SOCUA TANEE JUAN NAAJIONEE

Juan maninia pahuatasaaquiaari Gayojiniji

¹ ¿Quiaate quiyajaa cua panishano Gayonaa? Janiyari saaquiano Juanni, Pueyaso muerasu jitianana. Seetanujuanaa quia paniyanijia, Pueyaso rupaa quiniuucua coojiajinia. ² Quiocuara secojoquiaanijia, puetunu quia miishanojuanaa cuaara quiiria maninia. Janiyari quiocuara secojoquiaajaaniuhuj, maninia quia cuaqueya quiniuria, maja cusosu, taa quioojia quiya maniacuaani, Pueyaso tojjijia quia quishacari maninia.

³ Parta Pueyaso muerasujinijinio pueyari cucua tiuquiquianu quia quijia tiacajiniji. Janiyari jiyanohua shuquiriaatia quiquianuni nojori pahuatasacari quiajanijiniji. Quiaanaari seetanujuanaa maninia miijia quiquiaa taa pa rootasaaquiaari Jesucristo rupaacuajani. Quiaacuajaari maninia tojiquiaa seetana rupaajanaa, sanajanaa. ⁴ Jiyanohua timiquiaanijia cua tojishacari cua muerasuuri maninia miya, taa cua rootaquiaari Jesucristo rupaa nojoricuajani. Naa cua tojishacaritij, cunoori jiyanohua cua timitiquiaa socua tamonu casaajiniji.

⁵ Sanajanaa, quiaacuajaari maninia miijia, maninia quia miishacari parta Pueyaso muerasu. Quiaa cutaraari maninia miiquiaa, quia tiuquitishacari quia tiajinia quia niishishoo tamaquicuajinio Pueyaso muerasu. ⁶ Pueyaso muerasu rerejosacari niya, Pueyaso rupaa pahuatanura rucoojuacaari canaa niquiara pahuatatanu maninia quia miishanojiniji nojoriria, quia paniniutia nojori. Quiarjiani, nojori quia niquitiore nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuquiritiniuria. ⁷ Nojoriiri Jesucristojiniji pahuatanura rucoojia. Majaari nojori panishano na masetunu paniniu quiquianu Pueyaso niishiyashijiacajiniji. ⁸ Naaratej, pajaniya cuaara naacuura jiyano pueya, noo pojori canapue te pa Jiyaniijia rupaa pahuatanura rucoojiaacuajani. Naa pa miiriti Pueyaso rupaa pahuatanu naacuna pa quiniuriajuhuaj.

Sesa Diótfrefes miishanojiniji pahuatasano

⁹ Janiyari quia quijia tiacajinia Pueyaso pueya maanuucua naa naajioquiaarijuhuaj. Janiyari nojori sequequiaarini nojori cuaara Pueyaso Rupaa pahuatanura rucoojuaca naacuura, cunoo pojori jitianura na panishano. Diótfrefesri saaja tama na cuaqueyajaaja shuquiritiaja, Pueyaso pueya maanu jitianana na quishacari. Nocuaji cua sequesano ruuretatanuuri. Cua rerequetequiaajaarijuhuaj. ¹⁰ Naajaa, janiya jaara niaacua quiaareni, janiyari na sacuaraatia na miiniuucua na nacasunutaniyani. Nojuajaari tamasaca niquiara canaa sesacaquiaa na sapojonuta. Naa socua sesa miiquiaajaarijuhuaj: majaari na tiuquinitianu quiquiaa Pueyaso Rupaa pahuatanaa na tiajinia. Canapue te saniniuujia nojori tiuquitiniu paniquiaa nojori tiajiniani, Diótfrefesri nojori tenujuquiaa saaja. Canapue te Pueyaso rupaa pahuatanura rucoojuaca tiuquinitianu paniquiaajaa na tiajiniani, Diótfrefesri puetunu nojori tenujuquiaajanaa, maja socua nojori rerejonura narta Pueyaso muerasuta.

¹¹ Sanajanaa, majaari quia jiaatianu cunoo sesa miijiaacua, quiaa mariquiuhua nojuaja quirijiaarijuhuaj. Saaja quia jiaatiare cutara maninia miijiaacua, juhua nojuaja quia quiniuria. Cante maninia miiquiaani, cunocuaajaari Pueyaso pueyano. Sesa miijia saniniuujia, nojuajaari Pueyaso niishiyashijia.

Maninia Demetrio miishanojiniji pohuatasano

¹² Puetunu pueyajanaari saniniuujia maninia pohuatanuuquiaa Demetriojiniji. Tama Demetrio miijosanojinijiaaja, pueyari niishiya Demetrio-oori maninia pueyano. Seetanujuanaa, nojuajaari maninia pueyano, taa tamasaca sequequiaacuajani. Niaacuajaari niishiya canaari seetanujuanaa sequequiaani, naa canaa sequesacari Demetriojiniji.

Naajio puequesacari

¹³ Janiyari queraatia sequenu panijajaa quiajaninyani. Naajaa, majaari cua sequenu paniniu saaja cua naajiojinia. ¹⁴ Janiyacuaja quiocua naque-rejiyani. Jiyacaritij, pocua maninia pocoojore cutarani.

¹⁵ Pueyaso cuaara quioojia jiitiaara maninia, juhuajaniya quia quiniuria. Niya pa rupuenaaari cua sequeturee cua saruhuatanaura quiajaninya. Puetunu cuniqui pa rupuenaaajanaa quia saruhuatatare canaarajuhua]. Tariucuaja.

JUDAS NAAJIONEE

Judas naajiosano Pueyaso saquiriojosano pueyacuara

¹ Janiyari Judasni, Jesucristo seru, Jacobo tarajanu. Niaacuara naajiyani-
jia canapue te pa Que Pueyaso panishano muerasucujani. Nojuajanaari
nia saquiriojoquiaari nera nia quiniuria. Niajaniyari Neyanu Jesucristo co-
juasano, nia rupesacari nojuaja. ² Pueyaso cuaara nia jiuujiaaria. Cuaara
nioojia cajitiiriajuhuaj. Cuaara paniiria niajanijahuaj. Pueyaso cuaara
naa miiria jiyano hua niajanijatej.

Sapojonuujuacajiniji pahuatasano

³ Cua panishano pueyanaa, janiyari niaacuara naajionu paniriquiaa
jiyanohuani, cua pahuatanura niajaninya taa maninia pa miishaanu-
taniyani, Pueyaso saquiriojosano pueya pa quiniuucua: niajaninya, canaa-
juhuaj. Saniniuuja, quiarijiani, socua maninia cutaraari cua naajionura
niaacuara, cua nacasunura niajaninya seetanujuanaa Pueyaso tojjijia nia
quiniuria. Jiyano hua nia tiuuri pueyaracaanu Pueyaso rupaacua, cu-
mueeca Pueyaso pueya nia quiniuria. Pueyasocujaaari na rupaa pahu-
ataniquiaari maninia pa nigulara. Maja cumaati na jatanishaanu. Cuaara
pueyaracaanu maninia pahuatasaaria, taa pa pahuatasaaricuaani.

⁴ Naa nia sequeyanijia Pueyaso rerequetejaca supuesacari jiyasohua nia
tajinia. Tariucacaanu Pueyaso Rupaaajiniacujaaari cuno sesoriquia pueya-
jiniji naajitasaaricuaaja. Nojoriniiaari quejoosaanutaniya pueyaraca-
aanu saniitioscoriquiano. Nojoriiri sequequiaa: “Shuquiriaatia juhua-
janinya pa miiri tama pa cuaqueya miiniu panishanojuaja, pa jiyanoojia
Pueyaso quishacari. Paa jaara sesa miirini, naajaa, majaari Pueyaso sani-
itionu quiniutianiya pajaniya”. Nojoriiri naa sequetuquiaa sesatej. Nojoriiri
pa Jiitanajanaa jiyatequiaa juhua saniitioyashijia, pa Jiyaniijijanaa Jesu-
cristoni.

⁵ Niaari niishiyacuaja, Pueyasoori Israel pueya supuetanaa
mashiquiquiaari Egipto jiyajiniji, Egipto pueya seya nojori quishacari.
Socua nia niishitiorohuaraj. Na nuhuaji, Pueyasoori na pueyajinijinio
nocua tiuyashijia puecooquiaari. ⁶ Naajuhuj, Pueyasoori tama na
seyajaaja nujuatejoquiaari na nujuatejojuajinia, noo pojori canapue te
na shuriucua quijiaa quiquiaari jiyocuaacaanucujani. Nojoriiri Pueyasora na
poonijiosano tiujiaquiaari. Nojori poonijiosaqui tiujiatuquiaariarihuaj.
Cunora, cumayocuata morojosaaricuaariiri, pueyaracaanu ninishiqui nojori
quiniuria, cuaara quirijiaatijia Pueyaso saniitiojonu juuca cutara. Cuno
juuca, Pueyasoori puetunu na tojiyashijiacajanaa saniitiojonutaniya. ⁷ Nia
niishirijihua Sodoma tiacajinia quijia pueya, Gomorra tiacajinia quijia
pueyano, nojori tiaca shocua quinia pueyajuhuj. Puetunu nojorijianaari
maninia miiniu ruuretaquiaari tama nojori cuaqueya panishanojuaja
nojori miiniuria, jiyano hua sacuaraatia. Nojoriiri maajishuriu
numuetucujuuca quiquiaari. Cayashuriuuri narta maaji numuetucujuuca
quiquiaarijuhuaj. Pueyasoori maja na shipiniuu quiquiaari naa pueya
quiniuriatej. Naa Pueyaso tojiyashijia nojori quishacaritij, mariyata taa
tama Pueyaso seyajaaja na tojiyashijia quiquiaaricuaani, Pueyasoori
nojori quejooquiaari mani quiquiojinia, tii naquiya nojori miishaanura
pueyaracaanu. Naa nojori saniitiosaanuucuaatej, cunoori quiquiaari
puetunu pueyajanaa niishiniuria maja Pueyaso tojiyashijia pa quiniuria
taa nojori quiquiaaricuaani.

⁸ Cuno pojori, sacuaraatia niishitiojonaa nia tajinia quiyani, nojoricuaa-jaari Pueyaso saniitionujiniji niishiya. Naajaa, nojoriiri juhuajaniya mi-iquiaa puetunu sesajanaa taa noojiainia nojori niishiyacuajani. Nojoriiri tama nojori jiuujiacajaaja curuushojoquiaa nojori miishacari tama nojori niquishanojuaaja na maqenujinia. Pa Jiyaniijia sootiyajaariuhuj. Nojoriiri jiyanhua cumaacaraca quijiaca sesacaquiaajuhuj, jiyocuacaanu quijiacani. ⁹ Supuetana Moisés shaajesacari, Pueyasoori na seya jiyani-ijia Miguel jiyaroquiaari Moisés quete na jamonura. Sesaacaari Moisés quete paniquiaari juucua. Nocua Miguelta juayonuutaquiaari. Miguel cutaraari seetanujanaa cumaacaraca quiija. Naajaa, majaari na saarijionu quiquiaari Sesaaca. Na sequeree saajaari: “Pueyasojanaa cuara juaria cutara quiajaniya”. ¹⁰ Saniniuujia cuno sesa niishitiojonaa nia tajinia quiyani, nojoriiri na niishishoo cumaacaraca casaa sesacaquiaa. Naajuhuj, nojoriiri tama nojori cuaqueyajaaja sesoquiaa sesa na miishanota, taa nacujiniaacoji casaa miiquiaa sesa juhuajaniyacuaani, maja na niishiniutia. Naaratej, nojoriiri saniitiosocoriquiano puetunurajanaa.

¹¹ Nojoriiri jiyanhua cocuaatia miiquioquiaa. Nojoriiri narta pueya niqiniuni paniyaquiquiaa, taa supuetana Cain niqiniuni paniyaquiquiaari tarajanucuaani. Nojoriiri sesa pueya timitiquiaa casamiriaca nojori quini-uriajuhuaj, naatej, taa supuetana Balaam miiniu paniquiaari juucucuaani. Nojoriiri mariyata puetunu quejooaanutaniyajanaa nojori ruuretenucua Pueyaso, taa supuetana Coré cusoquiaaricuaani na ruretasacari Moisés. ¹² Nia queranacusacari Pueyaso niqiara nia panitioonuta, cuno sacuaraa- tia niishitiojonuujuaacari jiyanhua cararaatia nojori miaquesacari niaata. Majaari nojori paniniu tamasa. Nojoriiri saaja tama na cuaqueyajaaja shuquiritiniu niishijia. Puera miaquenujuaca nojori quishacari, cunoori cararaatia. Jiyano pueyari maja na cumaquiniu niajaniya. Nojoriiri najuhuaana quijiaca, juhua niqitioocuaari fajimiaquiaa paratu piyarosacari. Majaari maru ninu. Nojoriiri najuhuaana quia, juhua muetuhuo naana. Nojoriiri tariucua macu Pueyasora, naatej taa naana sorenocuaani, juhua puetunu na nujacatajanaa majaratasano. ¹³ Nojori nuhuaji, pueyari saaja taraatia quiquiaa, cararaatia nojori miishanojiniji. Sesa nojori mi- ishanoori juhua jiyanhua shoniniacu caminia queyocuasacari cushau, curuutuuca. Nojoriiri shanhua niquishiya rupaquiija, juhua rijia tiyano. Na nuhuaji, nojoriiri ninishiqui quiniutianiya pueyaracaanu Pueyasooju. ¹⁴ Pa supuetana Adánri coteenujanaa shipinishano pueyano quiquiaari mijiria. Enocri séptimo jiyaniijia quiquiaari Adán nuhuaji. Enocri Pueyaso niqitishano nojuaja pohuataquiaari taa nio sesa miijiaca pueya miishaanu- taniyani. Nojuajaari naa sequequiaariti: “Janiyari Jiyaniijia niquirii cunoc- oji niyano jiyanhua queraatia na pueyatani. ¹⁵ Nijioriquiaari sesa mi- ijiaca na saniitionura. Rerequetejacaacua tiutiantuniya puetunu sesa nojori miishanojuaani. Puetunu na sojeacajanaari saniitiosaanutaniya puetunu nojori sesacanuucujanaa pa Jiyaniijia”. ¹⁶ Cuno sesa niishitiojonu- ujaacari naa miiquioquiaa nia tajinia. Nojoriiri saa juayonuutaquiaajaa. Majaari shuquiriaatia nojori quiniu quiquiaa na jitiisanota. Nojoriiri tama na cuaqueya panishanojuaaja miiquiaa. Puera pocujaca quiyajaariuhuj. Nojoriiri na sapojonuta maniniuhuaqueetaquiaa narta pueya, maninia no- jori miishaanura. Majaari naa nia quiniu pueyanaa.

Pueyaso pueyara rootasano

¹⁷ Cua panishano pueyanaa, nia niishiriohua pa Jiyaniijia Jesucristo ji- yaramiquishano pueya sequesano niajaniya. ¹⁸ Nojoricuaajaari nia pohu- ataquiaari taate quera jiya puequesacari quiniutianiyani. Nojoriiri naa

sequetuquiaaritiij: “Quera jiya puequesacari, Pueyaso sesacajaca pueyari Pueyaso casaa soojeaca quiniutianiya, na rupaa soojeacajuhua. Nojoriiri sesa miiniutianiya tama nojori cuaqueyajaaja nojori shuquiritiniuria”. ¹⁹ Naa cuno pueya miiniuucuatej, nojoriiri Pueyaso muerasu jiuujia niyaquejotequiaa maja rupuetoosano nojori quiniuria. Nojoriiri saaja tama sesa nojori niishishano miiquiaajaacujua, Pueyaso Sohuanuuju nojori quishacari.

²⁰ Cua panishano Pueyaso muerasunaa, Jesucristo rupaacua nia tiuuri jiyanohua socua, seetanujuanaa na pueya nia quiniuria maninia. Pueyaso nia secojore Pueyaso Sohuanu cumaacata. ²¹ Naacuajitij, niocua Pueyaso panishano pueya quiri pueyaracaanu. Juhujaniya nia sashiri pa Jiyaniijia Jesucristo, nojuaja cuaara pueyaracaanu quijiacara pa jiyaterajaatijia, shuquiriaatia pa quiniuria na shuriucua pueyaracaanu. Naa pa miiniutianiyari maninia jiyanoojia na quiniuucua.

²² Canapueje pa Jiyaniijiaacuaji taacanuyajaani, nojori nia niishitiojore jacaria, seetanujuanaa nojori tiuuniuria maninia pa Jiyaniijiaacua. ²³ Tamasaca nia piriyojorejuhuaj Pueyaso pueya nojori quiniuria, nojori mariqui manijinia puetunu quejoosaarejanaari. Tamasacaari jiyanohua sesa miijiaa. Naajaa, nojori nia naacure, Jesucristo nojori niishiniuriajuhuaj. Saniniuujia, tama nia cuaqueyajaaja jiyanohua nia cojuare niaa mariqui sesa miitishaarejariuhua nia cojishacari nojori. Jiyano pueyacua nia taraajere. Saniniuujia, puetunu sesa nojori miishanojuanaa nia soore cutara.

Naajio puequesacari Pueyaso maniniuhuaqueetasaanu

²⁴ Pa Que Pueyasoori pa cojuaquiaa maja pa catenura nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishanojuanaa pa quishacari, shanohua na cumaaca pa shootianura pueyaracaanu. Pa niquishacari nojuaja, paari jiyanohua na timitianutaniyani.

²⁵ Jiyanohua maniniaari pa Que Pueyaso! Nojuajaari niishijajanaa. Pa jiyatequiaari na muerasuraari pa Jiyaniijia Jesucristo cusonuucua pocuara. Jiyanohua shanohua na cumaaca! ¡Nojuajaari Jiyaniijajanaa! Jiyanohua maninia pa Jiitiana! ¡Nojuajaari puetunu cumaacaracajanaa cutara! ¡Nojuacuajaari pa Que Pueyaso! Jiya shipinishaacarijiyojua, nojuajaari quiijiajuhuanajaj. Naa quiyajaari. Naa quiniutianiya pueyaracaanuuri. Taaquiririniij, naacuaaquiniatejaj.

JESUCRISTO NIQUITISHANO JUAN

Jesucristo niquitishano pajaniyara

¹ Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniuujia nojuaja niishitiniuria na tojtiajaca, taa quiari naataja Pueyaso miiniutianiya mijiria quijiacani. Jesucristoori jiyocua-caanuji na seru jiyaroquiaari cucua, na niishitiojonura janiya taa mijiria quijiaca miishaanutaniyani. ² Janiyari puetunu na niquitishanojuanaa caminiuujia niajaniya seetanujuanaani. Niocuaaari seetanujuanaa Pueyaso rupaa, Jesucristojiniji cua caminiuujishano niaara.

³ Shuquiriaatia quijiaca cutaraari noo pojori, canapuete nio cua caminiuujishano Pueyasojinijini serojonutaniya Pueyaso pueya maapue niquiarani. Na tojtiajacaari shuquiriaatia quijiaca quiniutianiyajuhua, nojori tiuuniucua nio naajiojinia cua pohuatasanoocua. Nio pohuatasano tohuateenu-raari tari catecanoya.

Juan naajiosano siete Pueyaso pueya maapuecuara

⁴ Janiyari Juanni. Asia jiyajinia quiniaa siete Pueyaso pueya maapuecuara naajiyaniija. Pueyaso cuara cumaquiiria niajaniya, cuara nioojia cajitiirijuhua. Pocua niriquiano pa Que Pueyasoori jianohua maninia. Nojuajaari pueyaracaanu quijiacuaja. Quiaritia quiyajaariuhua. Na Sohuanuuri juhua siete saminio casaa niquishano, puetunu tiqiyocua-janaa quija na quiniucua. Nojoriiri Pueyaso cajishaqui tacoji quitiuya.

⁵ Pueyaso Niyanu Jesucristoori seetanujuanaa puera caminiuujunia puetunu na Que Pueyaso Rupaajanaa. Nojuajaari quiarinio na cuaqueyata pa coteetaquiaari samiitianuhua macujiniji. Nojuacuajaari puetunu mijiria jiyaniijianucuaajanaa jiyaniijia. Nojuacuajaari pa panijia. Tama na nanacajaaja shootequiaariiri sesa pa miiniujiniji na jayonura pajaniya, tojetaarucuaajanaa sesa miyashijiacara na jataniniuria pajaniya. ⁶ Nojuajaari pa jiyatequiaari jiyaniijianucua pa quiniuria, na Que Pueyaso secojonaa pa quiniuria pueyacuara, nojuaja pa shuquiritianurajuhua. ¡Pa Jiyaniijaari jianohua maninia! ¡Pa Jiyaniija cuara shuquiritiasaaria pueyaracaanu! ¡Nojuacuajaari puetunu cumaacaracajanaa pueyaracaanura! Cuaara naa quiriitej.

⁷ ¡Nia maure! ¡Pa Jiyaniija Cristoori cohuajajinia tari cunocojiuhua! Puetunu pueyajaanaari na niqiniutianiya, noo pojorijuhua, na mote-naatej. Puetunu mijiria quijiaca pueyapuejajaari nocuaji nujuquenutaniya nojori martenuta. Taaquiriirinij. Naa quiniutianiyacuaaquinateja na tiuquishacariuhua.

⁸ Pa Jiyaniija Pueyasoori tama nojuajinjijiaaja sequeya:

“Janiyacuaajaari puetunu casaajanaa coteetanani, na shaajariquiano-juhua. Puetunu cumaacaracajanaanijia. Janiyacuajaari pueyaracaanu quijiani. Majaari cua supueni quiquiaari. Janiyari niaacua tiuquiriquianohuani”.

Juan niquishacari Cristo puereeta na shacantuuca cumaacajinia qiyano

⁹ Janiyari niarta Pueyaso pueyano Juanni. Pa Jiyaniija Jesucuaa tiuujia cua quiniucuaajuhua, janiyari jaarajaaja niaata cojiritiashiya naquiya miiniuni. Naaratej, paari mariyata jiyaniijianucuaa jiyatesocoriqianoni. Cunora, paari juhujaniya naquiya miiniu rejeretaquiaani Jesucristo

cumaquishacari pajaniya. Pueyaso rupaa Jesucristojiniji cua poojotanucua, janiyari shoniniacu caminia jiuujiajinia jatasano quiyani jiya tucuaatiajaacua. Nio jiya tucuaatiaja sesaari Patmos. ¹⁰ Tamonu juuca, pa Jiyaniija samiitanuhua pa niishiniu juucani, Pueyaso Sohanuuri cucua niqiuani jiyanoehua na cumaacata. Janiyari jiyacari rupaa tojiri nacaano cua nijiniarani, juhua trompeta jonenenu. ¹¹ Cua sequeriquiaari:

—Casaa cua niqitiniutianiya quiajaniyani, cuno quia naajiotare nequesoreetuneerano. Quiocua na nuhuaji na jiyarore Asia jiyajinia nio siete cua saquiriojosano pueya maapueecua. Nojoriiri Éfeso tiacajinia quiniaa, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinianio.

¹² Janiyari cua nijiniara tacatequeeni cua niquniuria cante cucua pocuariquiaani. Cua tacatesacari, janiyari siete samari nujuatacojua niqiriini, orojiniji shipinijosano. ¹³ Cuno samari nujuatacojua tajiniani, janiyari pueyano niqiriini, juhua Pueyaso Niyanu niquishano. Tucuaque toque cushiriquiaari. Na nioluacaacuma puecariquiaari. Na jiriquajinia camarucuteriquiaa orojiniji shipinishano casaari. ¹⁴ Pueyaracaanu quijia na quiniuucua, na muecacaari tojetaarucujanaa jiyanoehua cohuaja quiriquiaa juhua sohanatuu. Maatia pueya jiuujia niqijia na quiniuucua, na namijiaari juhua mani rimianacuriquiaa. ¹⁵ Na nioluacaari nenecuriquiaa juhua jiyanoehua naseeca casaajinia mohuaquishano bronze. Naa shacantuua niquishano quiriquiaari puetunu sesa casaa-janaa paracaajia na quiniuucua. Cumaacaraca Jiyaniija na quiniuucua, na pocuasacari, jiyanoehua tojishaariquiaari juhua sararojua, jiyocuaaanuji mohuaca tijia. ¹⁶ Na miaquetajata siete riya muetujuriquiaari. Naajuhuj, nijiniaquetucuaaja mueruuri na rupaamaji mueranacuriquiaa, na rupaa ruretajaca na puecoonura. Na jiquiooori jiyanoehua shacantuua quiriquiaa juhua jiyanoehua pananu jasacari panacari.

¹⁷ Cua niquishacari nojuaja, janiyari cua puerenuta na pajama pojia-ree juhua macuni. Nojuajaari saaja na miaquetaja niaree cucua. Cua sequereeri:

—Maja puerenu. Janiyacuaja Jesuni. Janiyari puetunu casaajanaa coteetajani, na shaajiriquianojuhuaj. ¹⁸ Janiyari pueyaracaanu quijiani. Macu quiquiaarinijia. Naajaa, janiyari samitiaquiaariuhuanu pueyaracaanu saminio cua quiniuria. Janiyari macunucua quiquio riatataja camaruni. Naacujitij, janiyari cumaacaracani cua tojiyashijiaa cua quejoonura macunucua quiquiojinia. ¹⁹ Pueya niishishocoriquiano, quia niquishano quia naajiotare Juannaa, taa na quiyacuajani, naajuhuj taa mijiria quijiaa miishaanutaniya na nuhuajini. ²⁰ Quiarijia quia pohuata-reera maatia quia niishiniuria cua niqitishano quiajaniya. Cuno siete riya quia niquishano cua miaquetajata cua muetujusanoni, cunoori siete cua seya. Nojoriiri siete cua saquiriojosano pueya maapue jitianaa. Cuno siete samari nujuatacojua orojiniji shipinijosano quia niquishanojanihuaj, cunoori siete cua saquiriojosano pueya maapue.

2

Éfeso tiacajinia quiniaa Pueyaso pueya maanuucuaa naajione

¹ Juhucatecara naa cua sequereeri:

—Éfeso tiacajinia quijia cua seruucuaa quia naajiore, Pueyaso pueya maanu jitianani. Naa quia sequere nojuaja: “Nojuaja, cante siete riya caca na miaquetajatacuajani, cante siete samaritiu nujuatacojua tajinia

rucuanajojuacuajani, nojuajaari naa quia sequeya: ² Janiyari puetunu quia miishanojuanaa niishiyani. Quiaari jyanohua poonijioquiaa quiria. Naajuhuj, quiaari puetunu casaajanaa rejeretaquiaa juhuajani. Janiyari niishiyajuhuj, majaari quia shanacunu quiquiaa sesa miijia nia tajinia. Naajuhuj, quiaari cuno sapojonuujuaca nequesorecanu, noo pojori canapuefe tama sequeriquiaajaajani: “Canaari Jesu jiyaramiquishanoni”. Naa quia nequesoreesacari nojoritij, quiaari niishiquianu nojoriiri sapojonuujuaca seetanujuanaa. ³ Quiaari puetunujuanaa taraatia quia miiniu rejeretaquiaa, cucua tiuujia quia quiniucua. Quiaari pueyaracaanu quiria poonijiojua maninia. Quia samareesacari, naajaa, majaari quia tarinitianu quiquiaa. ⁴ Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. ⁵ Cunora, quia niishiri taa jyanohua cua panijia quia quiquiaarini. Quioojia quia tacatorohua cucua, maninia miijia quia quiniuhuara, taa quia quiquiaari coteenucuajani. Quiaa jaara quioojia tacatoyaquiri, janiyari quiocua niniutianiyani, Éfeso tiacajiniji cua patanura quia samaritiu nujuataja. ⁶ Quiaari maniniajuhuaj, sacuaratia casaa Nicolás niishitiojosano tojjijica miishano soojea quia quiniucua. Janiyari cuno pojori miishano soyajuhuj. Nio cua sequesano quiajaninyani, cunoori puetunu cua pueyarajanaa. ⁷ Cante numaracani, nojori cuaara tojiiria Pueyaso Sohuanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casaajanaa nujuataja cumaatiani, janiyari nojori jiyatenutaniya cuno naanajiniji mioojuarani, pueyaracaanu rishijica nojori quiniuria’ ”.

Esmirna tiacajinia quiniaa Pueyaso pueya maanuucua naajione

⁸ Jiyaniijia Jesucristoori naa cua sequerejuhuaj:

—Esmirna tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Naa sequeyari cante puetunu casaajanaa coteenacuajani, na tucuatjanio. Nojuacuajaari cusoquiaari, na nuhuaji samiitiaquiaarihuari. Janiyacuajaari nojuajani. ⁹ Janiyacuajaari niishiyani, quiaari naquiya miishaquiaa. Quiaari casamijijuhuj. Naajaa, quiaari jyanohua casamiriacuajaja niya cua shurucuanu. Janiyari niishiyajuhuj, cuno Judiocuacari quia sesaquiaa. Nojoriiri tama sequequiaajaacujua nojoriniaari Pueyaso pueya cutara, Judiocuaca nojori quiniucua. Maja naatej. Nojori cutaraari Satanás pueya maanu. Satanás cuajaari samaruhua jiyaniijia. ¹⁰ Quiaari naquiya miishaanutaniya. Naajaa, majaari puerenu. Satanási noojiaqueya niajanijimijinio nujuatejotenutaniya nujuatejojuajinia nia sanishaanura, niaate cucua tiuujia seetanujuanaa. Naajaa, niaari saaja rupaquijia miishaanutaniya naquiya. Quia rejeretariquia saaja. Cua tojjijia quia quiriquia pueyaracaanu, quiaa cuaara shaafeyarejaatijia. Quiaa jaara naa miiritij, janiyari quia jiyatenutaniya jyanohua shuquiriaatia quijia quia quiniuria pueyaracaanuni. Nio cua sequesano quiajaninyani, cunoori puetunu cua pueyarajanaa. ¹¹ Cante numaracani, nojori cuaara tojiiria Pueyaso Sohuanu sequesano Pueyaso pueya maapuera. Cante cucua na tiuuniucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso saniitiosacari na ruuretajaca. Na ruuretajaca cutaraari quejoosanutaniya mani noshijia caminiajini’ ”.

Pérgamo tiacajinia quiniaa Pueyaso pueya maanuucua naajione

¹² Jiyaniijia Jesucristoori socua cua sequeree:

—Pérgamo tiacajinia quijia cua seruucuaa quia naajiorejuhuaj, Pueyaso pueya maanu jiiitianani. Naa quia sequere nojuaja: “Nijiniaquetucuaaja mueruu jiiitanaari naa sequeya: ¹³ ‘Janiyari niishiyani, cuno tiaca quiaa tii quiyani, cunoori Satanás quiquiojuhuaj. Naajaa, quiaari cua tojjiaa quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaquiaari janiyajiniji pohuatanu na farinitiaaquini-uucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jiyanoohua maninia. ¹⁴ Saniniuujia, maja cutaraari nio cua maniniucuanu: tamasaca niajanijajinijinoori maja na tarinitianu paniniu sesa na miijionu. Nojoriiri supuetana Balaam niishitiojosano tojjijiaa quiyajaa. Balaamcuaajari Israel pueya paraca Balac niishitiojoquiaari na pueya cuara shiniujuuria Israel pueya, jaarajaaja Israel pueya miiniuria sesa nojortia. Naaratej, Balac pueyari Israel pueya mianuutequiaari noo shu, teyante ote juaashiquiata shipinijosano casaacuara puecoosano quiquiaaricuaajani juhua Pueyasocuaa. Naa sacuaaata niojori queranacujusacari nojori paraatatej, Israel pueyari cuniquijiaa cuno taatujuri numuetucujuquiaarijuhuaj. ¹⁵ Naajuhua, majaari nio cua maniniucuanu: noojaqueya niajanijajinijinoori maja na tarinitianu paniniu jiyanoohua sacuaaata casaa Nicolás niishitiojosano. ¹⁶ Quiaari nareja niquiquiaa sacuaaata nojori miijionu. Cunora, quioojia quia tacatorohua cucua, janiya mariqui quiocua quiaareeri cuno sacuaaata miijiaa cua miaquejonura cua rupaamaji mueranacujua mueruuta. ¹⁷ Cante numaaracani, nojori cuara tojiiria Pueyaso Sohuanu sequesano Pueyaso pueya maapuera. Cante tama na cuaqueya miiniu panishanojuaja rejetejani, janiyari na mianuutenutaniya jiyocuaaanu cua racatasano cua pueyarano cua riuriotacajinijini. Janiyari na niquitionutaniya cohuajajau saajiajuhuaj, teyanooqua quiarino sesa naajiotasano quiniutianiyacujani. Majaari tamonu niishiniu quiniutianiya cuno sesa. Saaja na camaruuri na niishiniutianiya, cana cua niquitionutaniya cuno saajiacujani’ ”.

Tiyatira tiacajinia quiniaa Pueyaso pueya maanuucuaa naajione

¹⁸ Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucuaa quia naajiore, Pueyaso pueya maanu jiiitianani. Naa quia sequere nojuaja: “Pueyaso Niyanu, juhua mani rimianacuyano namijiaaracani, juhua bronce mohuaquishano shacantucua nihuacaracajuhua, nojuajaari naa quia sequeya: ¹⁹ ‘Janiyari puetunu quia miishanojuanaa niishiyani. Nianiyacuajaari niishiyani, quiaari Pueyaso panijia, pueya panijiano. Quiaacuajaari Pueyasocuaa tiuujia. Quiaari maninia poonijiona Pueyasora, pueya quia naacunura. Naajuhua, quiaari juhuajaniya rejeretaquiaa quiaa jaara taraatia miishaariquia. Janiyari niishiyajuhua, puetunujuaanaa quia miishano quiria quiarijiani, cunoori socua queraatia coteenu quia miishanojiniji. ²⁰ Saniniuujia, nio cutaraari cua maniniucuaaquishano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujunia pueyara. Quiaari juhuajaniya na shanacujiaa saaja, sacuaaata na niishitiojosanota na sapojonura cua pueya. Naa sacuaaata na niishitiojosanotatej, cuno maajiiri cua pueya shiniujuquiaa juhuajaniya nojori numuetucujunura na camishoo maajipohua. Cua pueya shiniujuquiaajarijuhuaj nojori miaquenuunura noo shu, teyanote juaashiquiacata shipinijosano taucuaa pueyasohuacuara puecoosano quiquiaacujani. ²¹ Janiyacuajaari tari cuno maaji sashiquianu juucuanu, noojia na tacatonura cucua. Majaari na tarinitianu paniniu paanatu na quiniu. ²² Cunora, cua tojiri. Cua

saniitionura nojuaja, janiyari na cusotenutaniyani na maquetujinia na matanura. Naajuhuj, na numuetucunuujuaa jaara noojia tacatoyaquiri sesa nojori miiniujiniji, janiyari jiyano hua naquiya miiniutianiya nojorini. ²³ Noo maajipohuajuhuj, paanaturjuria quinioni, cuno paanatujuanaa niishitiojonuucua nojori juhua necojorini, janiyari puetunu nojorijanaa puecoonutaniyani. Naacuaajitij, puetunu Pueyaso pueya maapuejanaari niishiniutianiya, janiyari puetunu nojori jiuujiajiniajanaa nojori niishiriojosano niishijiani, nojori panishanoocua nojori jiaatianunio. Naacuaajitij, janiyari maninia miijiaca niajanijajinijinio maninia miiniutianiyani. Nijaniyajinijinio sesa miijiaca saniniuujia, nojoriiri saniitiosaanutaniyacujua. ²⁴ Tiyatira tiacajinia quiniaa noojiaqueya niajanijajinijinio saniniuujia, niaari sacuaraatia cuno maaji niishitiojosano ruuretaquiaa saaja. Naajuhuj, majaari nia niishiniu paniniu quijia cuno sacuaraatia casaa jiyasohujaja niishishano, sacuaraatia miijiaca jiyaniquishanoni “jijayeneta casaa, Satanásjiniji niishishano”. Naa nia ruuretunuucua puetunu cuno sesa niishitiojosanojuanaani, cunoori maniniacujaja. Cunora, majaari socua cua nacasunu quiarijia niajanijia. ²⁵ Saaja tama nia cuaqueyajaaja nia cojuare jiyano hua, maja nia tarinitianura maninia nia miiniu taa nia miiquiaacujani. Naa nia miiriquia pueyaracaanu, janiya jaara niaacua tiuquiriohuajaatijia. ²⁶ Cante cua panishano miiquiaa pueyaracaanuni cuara shaa-jeyarejaatijia, janiyari cuno pueyano jiyatenutaniya tamasa pueyapue jiyaniija na quiniuriani, taa cua Que jiyatequiaari janiya jiyaniija na quiniuracuanaani. ²⁷ Jiyaniijianucuaa cua jiyetasano pueyani, nojoriiri cumaacaraca quiniutianiya na jiiitasano pueya na tojitiniuria nojuaja. Na tojitiaashijia na saniitiosacari saniniuujia, nojori piyonutaniya jacanau-raari, juhua cumamacata pishano conatu. ²⁸ Naajuhuj, janiyari joojia na niqutionutaniyani, juhuaquetaja rijiani, shacantuca quijia na quiniuria juhua janiyajuhuj. ²⁹ Cante numaacani, nojuaja cuara tojijia Pueyaso Sohuanu sequesano puetunu Pueyaso pueya maapuerajanaa’”.

3

Sardis tiacajinia quiniaa Pueyaso pueya maanuucuaa naajione

¹ Jiyaniija Jesucristoori socua cua sequere:

—Sardis tiacajinia quijia cua seruucuaa quia naajiorejuhuj, Pueyaso pueya maanu jiiitanani. Naa quia sequere nojuaja: “Naa sequerari cante Pueyaso Sohuanu jiyaramiquiquiaa cuno siete Pueyaso pueya maapuecuacuajani, nojori jiuujiajinia na poonijionura. Nojuacuajaari cuno siete Pueyaso pueya maapue jiiitanaa Jiiitanajanaa. Janiyacuajaari cunoni. Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. ² ¡Quia maquenu quia jatate! ¡Suteja quia quiri! Quia cumaquiri noo pojori canapue te jatarinitiaja rishiyajani. Quera cusonuyari. Janiyari Pueyasora quia miishano niquiquiaani. Majaari maninia na quiniu cua Pueyasora. ³ Quiaacuajaari maninia niishitiojosaquiaari Pueyaso rupaa. Taa quia niishitiojosaquiaaricujani, cuno quia niishiriohua. Quioojia quia tacatorhua Pueyasocua, seetanujuanaa na rupaa tojijia quia quiniuria. Quiaa jaara suteja quiniu paniyaquiri, janiyari canashiyajijij quiocua niniutianiya juhua nohuasejojuani, quia jiyaniyacari maja naasucua juhuanojuaja cua tiuquiniu quiniutianihua. ⁴ Quia jiiitasano pueyajinijinio cuniqui Sardis tiacajiniani, secaja nojorijinijinoori sesa miiniu ruuretajaca saaju. Naa sesa miiniuria nojori na cojijiaquiniucuatej, nojoriiri juhua curu-shohijiaquishano janiyara. Naaratej, janiyari nojori cushiyotenutaniya

cohuajaqueya toqueni, cuata nojori rucuanenonura, cua rupuenaa nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiuujiaca nojori quishacari. ⁵ Canapuete naa sesa miiniu ruuretajacani cua tojtijajaca nojori quiniuucua, nojoriiri naa cohuajaqueya toqueya cushiyotesocoriquianojuhuaj. Cunoori quiniutianiya tojetaarucujanaa sesa miyashijiacara cua jiyatesacari nojori. Naajuhuj, majaari cua tuujunu quiniutianiya nojori sesaca cua naajioneejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhuj, janiyari nojori jaatianutianiya cua Queecuan, na seya tacojirianio, cua sequenura nojoriiri cua timitiasano pueyanioyua. ⁶ Cunora, cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera' ”.

Filadelfia tiacajinia quiniaa Pueyaso pueya maanuucuaru naajione

⁷ Jiyaniijia Jesucristoori socua cua sequere:

—Filadelfia tiacajinia quijia cua seruucuaru quia naajiorejuhuaj, Pueyaso pueya maanuucuaru. Naa quia sequere nojuaja: “Cua tojiri. Janiyacuajaari tojetaarucujanaa maninia miijiani, cua Que tojijia cua quiniuucua. Puetunu cua sequesanojuanaari seetanujuanaa. Jiyaniijiajanaa cua quiniuucua cua supuetana David niti, janiyari cua Que tiotiu riatatata jiitianani, cua saquiriojosano pueya cua tiuquinitianura cua Queecua. Janiya jaara cuno tiotiu riatareni, tamonuuri maja na naata na tionuhua. Janiya jaara na tioreni, majaari quenaaja tamonu na naata na riatanuhua. ⁸ Janiyari puetunu quia miishanojuanaa niishiyani. Naajuhuj, janiyacujajaari juhua tiotiu riatarucuaa quiocuajini, cua rupaa quia poojotanura. Naacuajitij, tamasaari maja na naata tenujunu quiajaniya. Quiaacuajaari saaja secaja cumaacaraca. Naajaa, quiaari cua rootasano tojijiacuaja. Naajuhuj, majaari cua soojeaca pueya niqiuara quia tamacanu quiquianu janiya. ⁹ Naa maninia quia miiniuucua janiyaracuaatej, janiyari naa maninia miiniutianiya quiarajuhuj. Janiyari noojiaqueya Satanás pueya maanujinijinio mojoquetanijonutianiya quiocuarani. Cuno pojoriiri tama na cuaqueyajaaja sequeja, nojoriniaari seetanujuanaa Pueyaso pueya, Judiocuaca nojori quiniuucua. Naa nojori sequesacaritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuuji quia quiniuucua. ¹⁰ Janiyari quia sequequiarini maja quia tarinitianura quiria poonijionu, quiaa jaara naquiya miishaariquia. Quiaari seetanujuanaa naa miiquianu. Naaratej, Pueyaso saniniujushacari puetunu mijiria quiniaajanaa puereeta naquiya na miiniutia nojori, janiyacujajaari jiyacari nia cojanutaniyani. ¹¹ Quia niishiri: janiyari quera tiuquihuani. Majaari quia tarinitianu cua rupaa tojiniu, quiaa mariqui sapojosaareeri cucuaji quia rupatenura. Naacuajitij, quiaa jaara cucuaji catere, majaari Pueyaso niqiuitionu quiniutianiya quiarano na racatasano. ¹² Cante sesa miiniu samiritiaja saajani, cua rupaa tojijia na quiniuucua, janiyari jiyocuacaanu Pueyaso Secojoua tiajinia na nujuatenutianiya juhua morijiuni Pueyaso quishaquijianaa, tii cua Que Pueyaso na shuquiritianura pueyaracaanu. Majaari socua cuniquiji na pootiosaanu quiniutianiya. Naajuhuj, janiyari cuno pueyanooocua naajiotanutianiya cua Que Pueyaso sesani, quiarinio cua sesajuhuj, cua Que Pueyaso tiaca sesanio. Cuno tiacacuajaari quiarinio Jerusalén tiaca, jiyocuacaanuji roshinitiasariquiano. ¹³ Cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera’ ”.

Laodicea tiacajinia quiniaa Pueyaso pueya maanuucuaru naajione

¹⁴ Jiyaniijia Jesucristoori socua naa cua sequere:

—Laodicea tiacajinia quijia cua seruucara quia naajiorejuhuaj, Pueyaso pueya maanu jitianani. Naa quia sequere nojuaja: “Cua tojiri. Naa sequerari noo pueyano cana sequesante seetanu rupaaajanaacuajani. Puetunu na caminiujtushanojuanaa Pueyasojiniji quiarani, cunoro seetanujuaana. Pueyasoori na shipinitiquiaari puetunu na shipinishano casaajanaa. Cunocuaajari janiya. Cunora, cua tojiri. ¹⁵ Janiyari puetunu quia miishanojuanaa niishiyani. Quiaari najuhuana quijia, quia miyaquiniucua cua sequesano. Seetanujuaana cua tojiyaquiniu panijia quia quishacari, maara socua maninia quiquiaari cutara maja quia niishiniuria janiya. ¹⁶ Quiaa jaara cua niishiyashijia quiriquia, janiya maara quiocua taraajereni. Saniniuujia, quiaa jaara seetanujuaana cua tojjia quiriquia, janiya maara quia timitiareni. Saniniuujia, najuhuana cua pueyano quia quiniucua, janiyari quia soyani. Naa quia quiniucuatej, janiyari quera quia saniitoyani. ¹⁷ Quiaari tama sequequiaajaacujua: ‘Janiyari casamiriacani. Janiyari puetunu cua panishanojuanaa jitianani maninia miijia cua quiniucua’. Maja cutaraari quia niishiniu quioojiaari cusosu. Janiyara, quiaari tojetaarucuaajanaa casamiiju, cariyajuaru, juhuasunio. Quiaa jaara na niishiriquia, quiaa maara tama quia cuaqueyajaaja taraajetaja quiriquia. ¹⁸ Cunora, janiyari quia numooteyani moseeca pueyanonaa, cua rupaa tojjia quia quiri, seetanujuaana casamiriaca quia quiniuria. Naajuhuaaj, maninia miijia quia quiriquia cua cushitiniuria quiajaniya cohuajaque toque, maja cararaatia quia quiniuria juhuasu. Naajuhuaaj, cua niishitaja quia masere cutara, quioojia namijia riatenura, seetanujuaana maninia niquijia quia quiniuria. ¹⁹ Janiyari puetunu cua panishano pueyajanaa nacasujuaani, nojori saniitiojuajuhuaaj. Cunora, quioojia quia facatore cucua. Tama quioojiaaja quia shiniujurijuhuaaj shamaatia cua tojjia quia quiniuria. ²⁰ Cua tojiri. Janiyari quioojia tiotitujiniji jiiquionuujiyani. Cante cua tojiyani, nojuaja cuaara na tiotiu riataara cucuaji. Janiyacua nocua tiuquiumiani, nata cua miaquenura, shuquiriaatia cua pocoojonura nata. ²¹ Janiyari cua Paraca shocotaquiaarini cua Que tojjia cua quiniucua. Naaratej, cua Queeri cua cajitiquiaari na shuriucua, Jiyaniijajanaa cajituijinia. Naajuhuaaj, janiyari Sesaaca shocotajaca cajititjonutaniya cua shuriucua, jiyaniijianucua nojori quiniurajuhuaaj. ²² Cante numaacani, nojuaja cuaara tojiria Pueyaso Sohuanu sequesano Pueyaso pueya maa-puera’ ”.

4

Juan niquishacari Jiyocuaaanu Quijiaari maniniuuaqueetasaariquiaa

¹ Na nuhuaji, janiyari mauquiaarini. Janiyari saaja jiya cajiniocua tiotiu niquiquiaari riatasanoni. Shushajanaa cua tojishano rupaa juhua trompeta jonenenuni, cunorupaajari cua pacutequiaariuhua sequenu. Naa cua sequereeri:

—Miji quia tacama. Janiyari quia niqitiniutianiyani taa nio pa quishacari nuhuaji mijiria quiniaa miishaanutaniyani.

² Jiyacaritij, Pueyaso Sohuanuuri cucua niqiaari. Cua sohanu tacaniquiaari jiyocuaaanuuri. Janiyari jiyacari Jiyaniijajanaa cajitiu niquiriini. Pueyanoori tii cajiriquiaa. ³ Nojuajaari shanohua niquishano quiriquiaa, jiyanoohua shacantuuca juhua jaspe saajia, jiyanoohua naatuucajuhua, juhua cornalina saajia. Naashiiri na cajitii cacu nujuariquiaa. Jiyanoohua shacantuuca quiriquiaari neeruucua, pocoojanaque juhua esmeralda saajia. ⁴ Janiyari socua veinticuatro cajitiuucua niquirii Jiyaniijajanaa cajitiu shocua. Tii cajituriquiaari veinticuatro niishijaca

jiyaniijianucua. Cohuajaque toqueya cushiyonuuriquiaari, orojiniji shipinijosano nacaqueyano. ⁵ Jiyaniijijanaa cajitiujiniji, miacanaari nunujuriquiaa. Jiyanoehua majacuriquiaajaariuhuj. Jiyaniijijanaa cajitituo tacoji, tii noshiquioriquiaari siete samari. Cunocuaajari siete Pueyaso Sohuanu, puetunu tiqiyocujanaa quijia na quiniucua. ⁶ Jiyaniijijanaa cajitituo tacoji, juhua jiyanoehua puereetuca caminiaari quiriquiaajuhuj, juhua cohuaja motiiguio maatia niquishiyari na tamajiria.

Jiyaniijijanaa cajishaqui, cuatro saminio casaari quiriquiaajuhuj, puetunu na shocujanaa. Nojoriiri jiyanoehua queraatia namijiaaraca quiriquiaa, na jiriquiaacumaji, na nijiniaacumajinio. ⁷ Cuno cuatro saminiucua casaari tamaatia niquishano quiriquiaa tamonujiniji. Niquiriyatuuri juhua juurunu sare niquishano quiriquiaa. Tamonuuri juhua seru juunu caya niquishano quiriquiaa. Tamonu casa jiquicoori juhua pueyano jiquicoo niquishano quiriquiaa. Tamonuuri juhua surohua miooru jaano niquishaariquiaacujua. ⁸ Puetunu cuno cuatro saminio casaajanaari seis nesuhuaraca quiriquiaa. Puetunu nojori cuaqueyacumajanaa quiriquiaari na namijiaa, nocuaji na niquitiaja, na nijinara na niquitiajano. Nojoriiri pueyaracaanu Pueyaso maniniuhuaqueetariquiaa, juuca, niucanio. Majaari nojori tarinitianu quiriquiaa naa na sequetunu:

—Jiyaniijijajanaanaa, quiaari saa maninija, jiyanoehua maninia, tojetaaru-cujanaa maninia mijia! Quiaacuaajari Pueyaso, puetunu cumaacaracajanaa. Quiaari quijiajuhuanajaj. Majaari quia supueno quiquiaari. Quiaari quia pueyacia tacateriquianohua.

⁹ Cuno cuatro saminio casaari naa pueyaracaanu maniniuhuaqueetariquiaa Jiyaniijijajanaa, na cajitiujinia cajiyano, pueyaracaanu Jiyaniijijajanaa quiriquiano na quiniucua. ¹⁰ Naa pueyaracaanu cuno cuatro saminio casaa timitiasacari Jiyaniijijajanaacuaatej, cuno veinticuatro niishijiaa jiyaniijianucuaari jaarajaaja mojoquetacoqueequiaa Jiyaniijijajanaacuara. Nojoriiri na tuhuajaa jartaqueequiaa Jiyaniijijajanaa cajitituo pajama, naa na sequenuta:

¹¹ —Nioori quiara, Jiyaniijijanaa. Quiaa cutaraari Jiyaniijijajanaa, maja canaa. Quiaacuaajari canaa Pueyaso. Quiaa cuaara timitiasaaria pueyaracaanu, jiyanoehua maninia shacantuca quijia quia quiniucua, puetunu cumaacaracajanaa quia quiniucuaajuhuj. Quiaacuaajari puetunu casaajanaa shipiniquiaari. Tama quia paniniucuaajaaja, quiaari na shipiniquiaari.

5

Rupanacujusano naajioneejiniji pohnatasano, Borrego Niquiojuajinjinio

¹ Na nuhuaji, janiyari Jiyaniijijajanaa cajitiujinia cajinia juaashiquiajinia niquirii naajioneeni. Na miaquetajara na cacariquiaari. Cuno tucanee naajioneeri jiunicosano quiriquiaa. Naajioori nocua quiriquiaa, na ninia, na jiniacumonio. Cuno naajioneejinia, siete naajioori tii naajiotasano quiriquiaa. Cuno siete naajio coteejajiniani, juhua roshitia rupanacujutanasoori quiriquiaa. ² Jiyacaritij, janiyari jiyanoehua cumaacaraca Pueyaso seru niquiriini. Naa nequesoreeriquiaari jiyanoehua na nacanuta:

—¿Cante setanujanaa maninia mijia cutarini? Cuno cuaara rupartaara rupanacutasano, na riatanura cuno naajionee.

³ Jiyacaritij, majaari quenaaja maninia mijia quiniu quiquiaari jiyocuaanu, jiyajinia, jiya cariquimianio na riatanura cuno jiunicosano

naajionee. Tojetaarucujanaa shaaqui quiquiaariiri cuno naajionee sero-joriquiano. ⁴ Naaratej, janiyari jiyanoehua nujuqueriquiaani, tojetaarucua-janaa shaaqui maninia miijia quiaquiniuucua cuno naajio na riatanura, na serojonuranio. ⁵ Cua nujuquesacari, tamonu cuno veinticuatro niishijiaa jiyaniijianucujajiniioori cua sequeree:

—Maja nujuquenu. Quia cumantare. Quia niquiri. Pa Jiyaniijia-janaacuaajari jiyanoehua cumaacaraca. Tariucuaaanu Pueyaso Rupaa-jinia, nojuacuajari miriqui sequeshiya Juurunu saretá, Judá niquiohuacua-jinio supueriquiano, Jiyaniijajanaa na quiniuria na supuetana David niti. Nojuacuajari pa paraca Satanás shocotana, tojetaarucujanaa Jiyaniijia Pueyaso tojjia na quiniuucua. Naaratej, nojuaja na naata cuno siete naajio coteeja rupanacujutasano rupareetanu na serojosocoriquiano.

⁶ Jiyacaritij, janiyari Borrego Niquiojua niquiriini Jiyaniijajanaa cajitiu tacoji nujaano, cuno cuatro saminio casaajiniano. Cuno veinticuatro niishijiaa jiyaniijianucuaari na shocua quiriquiaajuhuaaj. Borrego Niquio-juuari seetanujuanaa juhua mosano samitianoehua niquishaariquiaa. No-juajaari siete jiyaniijia tuhuaajaraca quiriquiaa, puetunu cumaacaraca-janaa na quiniuucua. Naajuhuaaj, siete namijiaaraca quiriquiaari. Cuno na siete namijiaani, cunocuaajari Pueyaso Sohuanu, Pueyaso jiyaramiquis-hano puetunu mijirijanaa. ⁷ Cua niquishacari, Borrego Niquiojuuari Jiyaniijajanaa cajitijinia cajiyano juaashiquiaajiniiji juuniososano naajionee masetaree. ⁸ Nojuaja jaara cuno naajionee cacariquiaa tari, cuno cua-tro saminio casaari nocuara mojuquetacoquiaari, cuno veinticuatro ni-shijiaa jiyaniijianucuaario. Puetunu nojorijianaari taquiniososano casaajitiriquiaa. Naajuhuaaj, orojiniiji shipiniijosano suhuococua mueeta-coriquiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniiji Pueyaso muerasu secojonuusano Pueyaso. ⁹ Nojoriiri Borrego Niquiojua jaaquequetariquiaa nio quiarinio jaaque-quejosano:

—Saaja quiajanijari seetanujuanaa maninia miijia. Naaratej, quia naata cuno naajionee patanu quia rupareetanura na rupanacujusano. Quiaari jiyanoehua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiuucua pueyapuejinijiniojuanaa, puetunu tamaatia rupaa pocuajacajiniijiniojuanaa, puetunu tiacajiniijiniojuanaajuhuaaj, puetunu jiyacajiniijiniojuanaano. ¹⁰ Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianu-cua, pueyacuara secojona, pueyaracaanu nojori maniniuhuaqueetanura pa Pueyaso. Nojoriiri jiyacua jiyaniijianucua quiriquiano-juhuaaj.

¹¹ Na nuhuaji janiyari tojetaarucujanaa jiyanoehua jiyanoehua queraatia Pueyaso seya niquiriini. Jiyaniijajanaa cajitiu shocua mariquiaari, cuno cuatro saminio casaajiniano shocuaajuhuaaj, niishijiaa jiyaniijianucua shocuanio. Nojoriiri jiyanoehua queraatia quiquiaari, juhua jaaquia, serojiaquishoo. Janiyari nojori tojirii pa Jiyaniijia Jesu maniniuhuaqueetanoni. ¹² Nojoriiri naa na sequeturiquiaa na nacanuta:

—¡Pa Jiyaniijiaari jiyanoehua maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaraa quiiria Jiyani-ijajanaa pueyaracaanu. Saaja nojuaja cuaraa jiitiaara puetunu casamijianaa. Saaja nojuajaari tojetaarucujanaa niishijia. No-juajaari puetunu cumaacaracajanaa. Cuaraa naa quiiria pueyara-caanutej. Puetunu quiijia casaajanaa cuaraa tojitiaara pa Jiyaniijia.

Saaja nojuaja cuaara quiiria jiyanoehua timitiasano. Puetunu quiijia-cajanaa cuaara na maniniuhuaqueetaara.

¹³ Naajuhua, janiyari puetunu Pueyaso shipinishano saminio casaajanaa tojiriini, jiyocuaaanu quiijiaa, jiyajinia quiijiaa, jiya cariquimia quiijia-cajuhuaj, shoniacu caminiajina quiijiacanio. Puetunu nojorijianaari jiyanoehua na timiniutia sequeturiquiaa:

—¡Cuno, na shacantuuca cumaacajinia cajiiani, Borrego Niquiojuanio, nojori cuaara maniniuhuaqueetasaaria pueyaracaanu! ¡Puetunu casaajanaa cuaara tojitiaara nojori pueyaracaanu! ¡Nojori cuaara timitiasaariajuhuaj! ¡Saa nojorijia cuaara na cumaaca jiitiaara pueyaracaanura!

¹⁴ Jiyacaritij, cuno cuatro saminio casaari nojori riuhaneriquiaa saniniuujia:

—¡Taaquiriinij! ¡Cuaara naa quiiriatej!

Cuno veinticuatro niishijiaa jiyaniijianucuaari saniniuujia mojuquetacoeecujua cuno pueyaracaanu Quiijiaacuara, nojori na shuquiritianura.

6

Jiuniosano naajioneecua seis rupanacujutasano ruparetasacari

¹ Na nuhuaji, cua shootiasacari, Borrego Niquiojuuari coteenujanaa cuno naajioneejinia rupanacutasano rupartaree. Naa miiriiri cua niqitishaanura taa mijiria quiniaa miishaanutaniya jiyanoehua naquiyani, quera nio jiya puequesacari. Jiyacaritij, janiyari tamonu cuno cuatro saminio casaajinijinio tojirii sequeyanoni: “¡Mijil!”. Na pocuanuuri juhua miacana majanu tojishano quiriquiaa. ² Naa na sequesacaritij, janiyari cohuajohuana caballo niquirii nocua canujiyanoni. Na nijinia cajiniaari balista cacariquiaa. Jiyacaritij, jiyaniijiaara shipinishano nacaque cushitishaareeri. Na nuhuaji, na caballoori na netetaaree jiyocua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

³ Na nuhuaji, Borrego Niquiojuuari segundo rupanacutasano rupartaree. Janiyari jiyacari segundo saminio casaajinijinio tojirii sequeyanoni: “¡Mijil!”

⁴ Naa na sequesacaritij, naatuhuana caballoori nocua canujumaa. Na nijinia cajiniaari cumaaca niqitiosaare. Naacujitij, nojuajaari mijiria quiijiaa tojetenutianiya tama nojori miaquetoojonurajaaja. Cunora, nojuajaari puereetunee nijiniaquetucuaaja mueruu niqitiosaaree.

⁵ Na nuhuaji, Borrego Niquiojuuari tercero rupanacutasano rupartaree. Janiyari jiyacari tercero cuno saminio casaajinijinio tojirii sequeyanoni: “¡Mijil!” Jiyacaritij, janiyari mueruhuana caballo niquirii nocua canujiyanoni. Na nijinia cajiniaari niiquia shanacujutaja jaasutetariquiaa, mijiria quiniaara miaajau shanacujusaanura nojori serotasaa-nura. ⁶ Jiyacaritij, janiyari cuno cuatro saminio casaajinijini rupaa tojirii naa sequeyanoni:

—Niquiriyatu juuca poonijionu sami, cuaara niqitiosaaria saaja niquiriyatu kilo trigo jajau. Jaara trigo jajau paniyaquiri, cuaara niqitiosaaria tres kilo cebada jajau. Saniniuujia, majaari shiyocua shanacujunu cutara, vinonio. Cunocuaajaari queraatia quiniutianiya cutara.

⁷ Na nuhuaji, Borrego Niquiojuuari cuarto rupanacutasano rupartaree. Jiyacaritij, janiyari cuarto saminio casaajinijini naa sequeyanoni: “¡Mijil!”

⁸ Janiyari jiyacari tiirihuana caballo niquirii nocua canujiyanoni. Na nijinia cajinia sesaari quiriquiaa “Cusojuana”. Macunucua Quiquioori na neteyotariquiaa, Cusojuana puecoosano na rijionura na miitiasocoriquiano. Nojoriiri cumaaca niqitiosaaree jiyanoehua queraatia pueya

na cusojuanura. Naacuajitij, jiyanoehua queraatia pueyari puecoosaanutaniya miaquetoosacari. Tamasacaari cusununutaninya jiyanoehua miaajesacari. Tamasacaari paqueja cusonu cusununutaninya. Naajuhua, tamasaacari sareya sootesaanutaniya. Sacocua satejosaanutaniyaajariuhua. Naacuajitij, jiyanoehua queraatia pueyari cusojuasaanutaniya. Na nuhuaji, puetunu macunucujanaa jaara serojosaare, puetunu nojorijianaari na cajiniocua quiniutianiya puetunu mijiria quijiaca pueya cajiniocujajiniocujanaa.

⁹ Na nuhuaji, Borrego Niquiojuaari quinto rupanacutasano rupartaree. Jiyacaritij, janiyari Pueyasoocua catijiasaqui juhuacutu cariQUIACO niQUIRII Pueyaso pueya sohuenuhuani, noo pojori canapueete puecoosaquiaricujani Pueyaso Rupaa tojjijaca nojori quiniucua, Jesucristojiniji nojori pohuatenucujuhua. ¹⁰ Jiyacaritij, nojoriiri naa jiyanoehua nacaree:

—¡Jiyaniijianaa! ¡Quiaari saa maninaja! Quiaari quia sequesano miiija seetanujanaa. ¿Taa quia tarishiniutianiyajara canaa puecoona quia nequesoreenurani, nojori quia naminiuria canacua saniniucua?

¹¹ Jiyacaritij, puetunu nojorijianaari cohuaque toqueya niqutiojosaree. Nojoriiri naa sequesaree:

—Socua rupaquijia nia samaaterejaara, Pueyaso saquiriojosano niarta Pueyaso pueyajiniocua cuara puecoosaria nia shiriajatijia, taa nia puecoosaquiaricuaani.

¹² Na nuhuaji, Borrego Niquiojuaari sexto rupanacutasano rupartaree. Jiyacaritij, rijiaari jiya jiuuquiujutiaree jiyanoehua. Janiyari na niQUIRIQUIAANI. Pananuuri mueruucara quiQUII juhua mueruque toque. Racaari naatuucara quiQUII juhua nanaca. ¹³ Riyari jiya cajiniocujajitoteree jiyocua, taa satuna toteQUIAA jiyanoehua paraticueaani. ¹⁴ Jiya cajiniocuaari shaajequejuhuaj, juhua tucuaanee naajioneeri jiniucosaaree. Shoniacua caminajinia, puetunu jiya tucuaatiajajanaa, puetunu tuhuanuhua juhuaj, puetunu cunojuanaari jiyajeetaquee na nujuatusaqui. ¹⁵ Nojori puerenuta, mijiria jiyaniijianucuaari raacajinia jamaatiushii, sai tajinia tuhuanuhua jiniocujuhua. Naa jamaatiushiiariuhua noo pojori: pueyacu paaretajaca na cumaacatej, soldadohua jiyaniijianucua, jiyanoehua casamiriaca pueya, pueya tojishano pueya, poonitijosano pueyajuhua, puetunu narta pueyajanaano. Puetunu pueyajanaari naa mashiriquiaa juucua. ¹⁶ Nojoriiri tuhuanuhua sequeriquiaa, sainio:

—¡Canaacua nia tyare canaa nia jamonura cunocujaj, na cajituijina cajiya na shacantuuca cumaacajiniiani! ¡Canaa nia jamojore maja na niQUIARA canaa quiniuria, naajuhua, maja Borrego Niquiojua saniitionura canaa, jiyanoehua na juaashacari! ¹⁷ Quiarijiacujajari Pueyaso saniitionu juuca. Jiyanoehua puereeta. ¿Cante na naata na nujuatanuni? Shaaqui.

7

Pueyaso saquiriojosano pueyajiniji pohuatasano, Israel niQUIOHUACUJINI SUPUENO PUEYAJINIJINIO

¹ Naa cua niQUINI nuhuajitij, janiyari socua cuatro Pueyaso seya niQUIRII nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara, na miaquetajarano. Nojoriiri na nujuatusaqui paratu tenujiquiaa maja na piyarojonura jiya, shoniacua caminia, nacuhanio. ² Jiyacarijuhuaj, janiyari socua tamonu Pueyaso seru niQUIRII jiya pajamaji niyanoni. Pueyaso naajio jiriataja casaa cacariquiaari. Nojuajajari narta cuatro Pueyaso seyacua nacaree jiyanoehua,

noo pojoriicua canapuate cumaacaraca quiriquiaacuajani nojori sesonura jiya, shoniniacu caminiano. Naa nojori sequereeri:

³ —¡Cuaara! ¡Maja juhuanojuaja jiya nia sesonu, shoniniacu caminia, nacuhuanio, canaa niojiyaquishacarijia Pueyaso sesa, na pueya jiniji, na niishishaanura nojoriiri Pueyaso pueya!

⁴ Janiyari jiyacari tojiriini taa pueyate na jiniji jirioosaareeni. Puetunu supuetana Israel doce niquiohuacuajinio supueno pueyapuejinijiniooori ciento cuarenta y cuatro mil pueya jirioosaaree. ⁵ Naacuajitij, supuetana Judá niquiohuacuajinio supueno pueyajinijinioni, doce mil pueyari jirioosaaree. Supuetana Rubén niquiohuacuajinio supueno pueyajinijinio, doce miljuhuaj. Supuetana Gad niquiohuacuajinio supueno pueyajinijinio, doce miljuhuaj. ⁶ Supuetana Aser niquiohuacuajinio supueno pueyajinijinio, doce miljuhuaj. Supuetana Neftalí niquiohuacuajinio supueno pueyajinijinio, doce miljuhuaj. ⁷ Supuetana Simeón niquiohuacuajinio supueno pueyajinijinio, doce miljuhuaj. Supuetana Leví niquiohuacuajinio supueno pueyajinijinio, doce miljuhuaj. Supuetana Isacar niquiohuacuajinio supueno pueyajinijinio, doce miljuhuaj. ⁸ Supuetana Zabulón niquiohuacuajinio supueno pueyajinijinio, doce miljuhuaj. Supuetana José niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

Cohuajaque toqueya cushitishano pueya maanu

⁹ Naa cua niquitishaanu nuhuajitij, janiyari jiyanojua queraatia pueya niquirri maanoni juhua tereya. Nojoriiri puetunu nio tiquiyocua jiyacajinijinojuanaa pueya quiriquiaa, puetunu tamaatiuucua pueyapuejinijinojuanaano. Quiriquiaajaariuhua puetunu tamaatia rupaaca pocajacajinijinojuanaa, puetunu tiquiyocua tiacajinijinojuanaano. Naa tojetaarucujanaa jiyanojua queraatia nojori quiniuucaatej, majaari na naata serojosaanu quiriquiaa. Nojoriiri Pueyaso shacantuuca cajititujacoji nujuaturiquiaa, Borrego Niquiojua tacojinijo. Puetunu nojorijianaari tucuaqueya cohuajaque toqueyaraca quiriquiaa. Shuquiriaatia nojori quiniuuca, nojoriiri juhua teruhuanajaquera niquishano mueetacoriquiaa. ¹⁰ Puetunu nojorijianaari naa mariyata sequeriquiaa na nacanuta:

—¡Jiyanojua maniniaari pa Que Pueyaso, na shacantuuca cajititujinia cajiyani, Borrego Niquiojua juhuaj. Nojoricujaari pa jiyanooquiaari, tojetaarucujanaa quiariniora jatanishano pa quiniuria!

¹¹ Naajuhua, puetunu Pueyaso seyajanaa, canapuate shacantuuca cajititujocua nujuaturiquiaacuajani, niishijiaa jiyaniijianucua shocujuhua, cuno cuatro saminio casaa shocuanio, nojoriiri Pueyasocuara jacamaturee nojori timitianura nojuaja. ¹² Pueyaso na timitiatuacari, naa sequetureeri: —¡Taaqiriirinij, seetanujuanaacuaj! ¡Canaari pueyaracaanu quia manihuahuaqueetanutaniyani! ¡Quiaacuajaari canaa timitiasano! ¡Saaja quiajaniyari seetanujuanaa niishijiaa cutara! ¡Paacarasho, canaa Pueyasonaa! ¡Quiaa cuaara tojishaaria pueyaracaanu! ¡Quiaari canaa Jiyaniijijanaa pueyaracaanura! ¡Quiaari puetunu cumaacaracajanaa maninia quia jitianura quia shipinishano! ¡Cuaara naa quiiria pueyaracaanu, pueyaracaanutej!

¹³ Jiyacaritij, tamonu cuno veinticuatro niishijiaa jiyaniijianucujinijinoori cua nequesotaree:

—¿Canapujete cuno pojorini, cohuajaque toqueyaracani? ¿Tejenote no-jorini?

¹⁴ Janiyari na riuquaree saajani:

—Quiaa cutara na niishiya, jiyaniijianaa.

Cua sequereeri:

—Nojoricuaajari jiyajiniinio pueya. Jiyajinia nojori quishacarijia, nojoriirino cuno jiyanoehua naquiya miishacari rejeretajaca quiquiaari. Nojori tiuuniucua Borrego Niquiojuaacua, nojoriirino puetunu sesa nojori miishanojiniji juhua nojori toqueya jeequejoquiaari Borrego Niquiojua nanacajinia. Naacuajitij, nojoriirino cohuajaqueya toqueya cushiyonuya. ¹⁵ Naa Pueyaso jiyanooshano pueya nojori quiniucuatej, nojoriirino Pueyaso cajishaqui tajoji quijiaa. Nojoriirino pueyaracaanu ti Pueyaso Secojoua tiajinia miiquiaa Pueyaso panishano, juuca, niucuanio, nojori timitiasacari nojuaja. Na shacantuca cumaacajinia cajijiani, nojuajaari na cumaca teutenutaniya nojori caco, jatiqui na quiniuria nojoritia pueyaracaanu.

¹⁶ Naacuajitij, majaari socua nojori miaajenu quiniutianiya, jiyamuenunio. Pananuuri maja socua nojori na catijianu quiniutianiya. Naajuhua, majaari socua nasaatia pananu jartanu nojori niishiniu quiniutianiya.

¹⁷ Borrego Niquiojuaacujani, Jiyaniijiajanaa cajituu jiuujiajinia cajijiani, nojuajaanaari nojori jiiitianutaniya juhua tama na borregohuaajaaja. Nojuajaari nojori rucanejotanutaniya, nojori na raatenura pueya samiitianjia mohuaca pacartajajiniiji, pueyaracaanu shuquiriaatia quijiaa nojori quiniuria. Pueyasojuanaacuaajaari nojori namijiaaca tujuunutaniya nojori namijiajiniji.

8

Séptimo rupanacutasanojiniji pohuatasano, shanohua jaanutaja patajajiniinio

¹ Borrego Niquiojua jaara séptimo rupanacutasano rupartaree, cuno naajione saacatanura puetunujuanaa, tojetaarucujanaa sanaacara quiquirino jiyocuacaanu pueyaracaanura. Maja cua niishiniu, media horaruhua.

² Na nuhuaji, Pueyaso tajoji, janiyari siete Pueyaso seya niquirino nujuatuyanoni. Nojoriirino jiyacari siete trompeta niquitiojosaaree. ³ Na nuhuaji, socua tamonu Pueyaso seruuri shanohua jaanutaja pataja pamaa, orojiniiji shipinishano. Orojiniiji shipinishano Pueyasoocuara catijiaja casaa tajoji nujuaseeri, Jiyaniijiajanaa cajituu tajoji. Queraatia shanohua jaanutaja niquitiosaareeri Pueyasoocuara na catijianura. Jaanutajaari catijiasaariquiano puetunu Pueyaso pueya secjonuusanotajanaa, Pueyasoocuara na jaanujunura cuno catijiaja casaajiniiji. ⁴ Naacuajitij, Pueyaso seruuri Pueyaso pueya secjosano tacanirino Pueyasoocuara, shanohua jaanujua najacata.

⁵ Na nuhuaji, cuno Pueyaso seruuri catijiaja casaajiniiji na shanohua jaanutaja pataja mishinirino nishiyata. Jiyanoehua na majiritaree nio jiyacuaari. Miacanaari ritia nunujuquee. Jiyanoehua majacureeri. Jiyanoehua cojutunereeri. Rijaari jiuquiujiutareejuhua.

Trompetaa jonenejosacari

⁶ Cuno siete Pueyaso seya, trompetaa cacariquiaani, nojoriirino jeeacanecoree na trompetaa na jonenenura. ⁷ Jiyacaritij, niquiriyatu cuno Pueyaso serujiniiniinooi na trompetaa jonenu coteeree. Jiyacaritij, miacanajaa shiniitujiaacaari, mariyata mani cojitishano nanacata jiyocua jartasaaree. Jiyari quera na cajiniocua cateree, puetunu na nacahuatajanaa, na jiyasocuatano.

⁸Segundo Pueyaso seruuri na trompeta jonenerree. Jiyacaritij, casaa juhua puereetuca tuhuananu noshiyanoori shoniniacu caminiajinia jataaaree. Quera shoniniacu caminia cajiniocuaari nanacara quiquii. ⁹Puetunu shoniniacu caminiajinia quijiaca casaajanaari, quera na cajiniocua cusonuuree. Naajuhuaaj, shoniniacu caminiajinia ruhuanetasano puereetuca buqueyajinijinioori, quera puetunu na cajiniocuaajanaa sesosaaree.

¹⁰Tercero Pueyaso seruuri na trompeta jonenerree. Jiyacaritij, puereetuca rijiaari jiyocuacaanuji tiquii, jiyanoohua nishitiuucua juhua shucuenaja jaamasu noshitishano. Tiyareeri quera na cajiniocua nio jiyacua moocujinia, mijiria cuariyajiniajuhuaj. ¹¹Cuno rijia sesaari quiriquiaa “Piiquia”. Cunora, tee cuno rijia tiyareeni, puetunu cuno mohuacajanaari piiquiaa quiquii. Pueya ratusacari cuno mohuaca, queraatia pueyari saaja cusonuuree.

¹²Cuarto Pueyaso seruuri na trompeta jonenerree. Jiyacaritij, casaari pananuucua pitiaaree, racaacua, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiquii. Quera na cajiniocuaari ninishiqui quiriquiaa. Cunora, pananuuri maja na cuhuatanu quiriquiaa quera juuca cajiniocua. Naajuhuaaj, riyaa, racanio, majaari na cuhuatanu quiriquiaa quera niucua cajiniocuaajuhuaaj.

¹³Na nuhuaji, janiyari juhua puereetuca surohua miooru niquirii jiya cajiniocuani. Na jaasacari naa nacariquiaa jiyanohuari:

—¡Puereeta, puereeta, puereeta! Seetanujuanaa jiyanoohua puereeta quiniutianiyari jiyacua quijiaca pueyara, jiuujianaraca cureecono Pueyaso seya jaara jonenerree, canapuete joneneyaquiyajaa juhuanojuajacujani.

9

Quinto trompeta jonesacari

¹Na nuhuaji, quinto Pueyaso seruuri na trompeta jonenerree. Jiyacaritij, janiyari jiyocuacaanuji jiyocua tinio rijia niquiriini. Cuno rijiaari tiotiu riatataja niqutiosaaree, puequeetuaju raa na riatanura. ²Na riatasacari, najacaari nojoma juhua puereetuca cuhuariquiaa sesacari. Pananu namiija tiomaari. Jiya cajiniocuaari mueruucara quiquijihuaaj. ³Sequeruuri cuno najacajiniji mueratumaa. Puetunu nio jiyacuajanaa paaquemaari. Sequeruuri cumaaca niqutiosaaree nojuaraca na quiniuria juhua turucuaniniu. ⁴Sequeruuri rootasaaree maja nojori miaquenura jiyasocua, nacuhua jaamasujuhuaaj, puetunu moritijaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapuete na jiniji jirioyaquishoo quiriquiaa Pueyaso sesatacujani. ⁵Sequeruuri rootasaareejuhuaaj, maja nojori cusojanura pueya. Cinco raca cuara nojori shocojoora cutara, pueyaracaanu sequeru saashi noosacari. Cuno sequeru saashiiri juhua turucuaniniu saashi noonutaniya.

⁶Naa pueya miishacari naquiya na noonutatej, pueyari cusonu paniniutianiya juucua. Saaja cusoyaquiniutianiyari. Jiyanoohua na shaajenu panishacari juucua, nojoriiri saaja rishiniutianiya, jiyanoohua naquiya nojori miishacari.

⁷Sequeruuri puereeta niquishano quiriquiaa juhua miaquetojonura jeenucasano caballohua. Sequeruuri casaa jitiariquiaa na nacajinia juhua jiyanijianuucara orojiniji shipinijosano nacaqueya. Nojori jiquicoori juhua pueyano jiquico niquishano quiriquiaa. ⁸Nojoriiri juhua maaji muecacaraca quiriquiaa, tucamuuejarujuri. Juhua juurunu sare quiacaraca quiriquiaajaariuhuaaj. ⁹Nojori jiriquiaqueeri cumueeca quiriquiaa juhua turtuco. Nojori jaacuatascari, na nesuhuari jiyanoohua cojuatuneriquiaa

juhua caballohua jayotasacari queraatia rucuanejotaruhua, miaquetoojonuucua na netecuatusacari. ¹⁰ Cuno sequeruuri juhua turucuaniniinu nojuacaraca quiriquiaa. Jiyanoehua noonacuracajuhuj. Jaara nojori saare, cunoori quiquiaari nojori na noonura cinco raza. ¹¹ Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuuj raa camarujaariuhuj. Hebreo rupaaajinia, na sesaari “Abadón”. Griego rupaaajinia saniniuujia “Apolión”. Pueyano rupaaajinia saniniuujia, nioori sequeya “Pueya Puecoona”.

¹² Janiyari naa niqutishaareeni taa coteenujuanaa naquiya miishaanu quiniutianiyani, cuno jiuujianaraca naquiya miishocoriquianojiniji. Socua caapiquiri cureyajaa na nuhuajiria.

Sexto trompeta jonesacari

¹³ Sexto Pueyaso seruuri na trompeta joneneree. Janiyari jiyacari rupaa tojirii pocuaanoni, shanohua jaanutaja catijiaja juhuacutu cuatro tuhuajaa tajiniji, Pueyaso taccoji nujuatajani, orojiniji shipinishanoni. ¹⁴ Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seya quia saacarojore, puereetuuca Eufartes moo shuriucua morojosano quiyani.

¹⁵ Jiyacaritij, cuno cuatro Sesaaca seyari samaacarojosaaree jiyanoehua queraatia pueya nojori pucoonura, quera na cajiniocua puetunu mijiria quijiaa pueyajinijiniojuanaa. Cuno Sesaaca seyari tariucuaaanu naa morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijiaa.

¹⁶ Janiyari tojiriini cuno cuatro Sesaaca seya soldadohuari, dosciento milones pueya quiriquiaa saa caballohuaracaja.

¹⁷ Janiyari cuno caballohua niqutishaaree juhua cua maquenujiniani, na nijinia cajitiuniaanio. Jiyanoehua tamaatia niquishano quiriquiaari. Puetunu nojori jiriquiacajanaari turtucojiniji shipinijosano casaata mishiquijosano quiriquiaa. Cuno, nojori naatiyaquishaanuucuaaji nojori cushiyosano turtuconi, cunoori puereeta niquishano quiriquiaa; naatuuca juhua mani, nentuuca juhua jacinto saajia, pocojuanaque juhua azufrehuj. Puetunu cuno caballohua nacacajanaari juhua juuruu sare nacaca niquishaariquiaa. Maniiri nojori rupaaajia rimianacuriquiaa. Najacaari nojonuucuariquiaajuhuj, azufrenio. ¹⁸ Cuno jiuujianaraca puereeta casaata quera na cajiniocua puetunu pueyajinijiniojuanaari cusojuasaaree. ¹⁹ Naacuajitij, caballohuari cumaaca jitiariquiaa na rupaama, na pitijinijuhuj, nojori pucoonura pueya. Na pitucuaari juhua sacocua niquishano quiriquiaa. Juhua sacocua nacacaraca quiriquiaajariuhuj pueya na sajitiajara.

²⁰ Cureeno pueya, canapute maja na puecoosaanu quirii cuno jiuujianaraca puereeta casaatani, nojoriiri sesa miiniu tarinitiaaquiriquiaa saaja. Nojoriiri samaruhua seconu tarinitiaaquiriquiaa. Naajuhuj, nojoriiri orojiniji shipinijosano casa shuquiritariquiaa Pueyaso niti, platajiniji shipinishano, broncejiniji, saajiajinijihuj, macajinijio. Puetunu cunोजना, nojori jiyatesano tama na pueyasohuarajaajani, cunoori maja na niqiniu. Majaari na tojinu. Majaari na rucuanenujuhuj. ²¹ Naajuhuj, majaari pueya tarinitianu quiriquiaa narta pueya monu, shimiojonuhuj. Naajuhuj, majaari nojori tarinitianu quiriquiaa na camishoo maajipohua numuetucujunu, maajishuriu numuetucujunuhuj. Nohuasejonu tarinitiatiyuquiriquiaajariuhuj.

10

Pueyaso seru mueetasano tucuanee naajioneeniyojuajiniji pohuatasano

¹ Na nuhuaji, janiyari socua tamonu jiyanoehua cumaacaraca Pueyaso seru niquirii jiyocuaaanuji roseyanoni. Cohuaja najacajinia cuhuajaa-tiariquiaari. Na nacaacua camarucuteriquiaa naashiiri. Na jiquiocoori jiyanoehua shacantuca quiriquiaa juhua pananu. Na cashacucuaari juhua mani niquishano quiriquiaa, naatej, taa mani nujuaa na noshishacaritij.

² Na miaquetajara mueetariquiaa shiitianiyojua naajioneeri, tariucua ritasano. Nio jiyacua nujuaseeri. Na miaquetajara na niohuaca niaree shoniniacu caminiaacuaari. Tacujua niaree nio jiyacua saniniuuriija. ³ Nocua na nujuasacari, jiyanoehua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu.

⁴ Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojirii jiyocuaaanuji naa cua sequeyano saajani:

—¡Maja pueya niishitiniu cuno siete miacana sequesano! ¡Maja na naajiotanu! Tama quioojiajiniajaaja quia racatare.

⁵ Jiyacaritij, Pueyaso seru cua niquishano shoniniacu caminiaacua nujuaanoni, nio jiyacuajuhua, nojuajaari na miaquetajara na juaashiquia shiitioree jiyocuaaanu, seetanujuanaa na sequenura. ⁶ Naa sequereeri:

—Cuno, pueyaracaanu Quijiani, nojuajaari jiya cajiniocua shipinia, jiya shipinia, shoniniacu caminia shipiniajuhua, puetunu tii quijiaa casaajanaa shipininiano. Nojuajaari seetanujuanaa naa cua pohuataniya: “Majaari tari na tarishiniu quiniutianiya. ⁷ Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miiniu panishanojuanaari tari tohuateesano quiniutianiya. Naa quiniutianiyari taa na pohuataquiaari na sequenu panishano caminiujiuniaa pueyacua-jani”.

⁸ Cua tojishano rupaa jiyocuaaanuji pocuaanoni, socua cua pacuterohua naa sequenuuri:

—Pueyaso seruucua quia quiaare, cuno, shoniniacu caminiaacua nujuaanu, jiyacuanio. Nojuaja quia masetasee cuno riatasano naajioneeniyua, na mueetaani.

⁹ Janiyari Pueyaso seruucua quiaareeni. Janiyari na sequeeseeni na naajioneeniyojua na niquitionura janiya. Cua riucaareeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniniuuriija. Cunoori, pueya na saniitiotaja rupaa na quiniuucua.

¹⁰ Janiyari jiyacari cuno naajioneeniyojua pataree Pueyaso seru juaashiquiajinijini. Janiyari na miaquereeni. Seetanujuanaa shoqueeca quiriquiaari juhua samiyatu. Cua miasacari, cua seecojinia jatasee piiquiaraari. ¹¹ Jiyacaritij, janiyari naa sequesareeni:

—Quiocua Pueyaso sequesano caminiujiuriahua pohuatanu queraatia pueyapue niquiara, queraatia tamaatia jiyacajinia quiniaa niquiara, queraatia tamaatia rupaaca pocuajaca niqiarajuhua, queraatia jiyaniijianucua niquiaranio.

11

Caapiqui Pueyaso sequesano caminiujiuniaa miishanojiniji pohuatasano

¹ Na nuhuaji, janiyari tia shanacujutaja naajua niquitiosareeni, juhua nataca niquishano. Janiyari naa sequesareeni:

—Quiarjia cutara quia quiaare Jerusalén tiacajinia. Tii nujuataja Pueyaso Secojojua tia quia shanacujusee quia shanacujutajata, orojiniji shipinishano shanohua jaanutaja catijajanio. Quia serojorejuhuaj puetunu Pueyaso secojonuujacajanaa tii. ² Maja cutaraari quia shanacujunu Secojojua tia carijiniacuma. Cunocuaajari taucuaa niqutiosaarucuaa tari. Pueyaso soojeaca taucuaaari Pueyaso saquiriojosano na tiacarano jitianutaniya pueyaracaanu, cuarenta y dos raca cuaara na shocojorejaatijia. ³ Janiyari caapiqui cua saquiriojosano pueya jiyaronutaniyani, janiyajiniji nojori pohuatanura pueya niqiuara. Nojoriiri janiyajiniji pohuatanutaniya cuaara shocojorejaatijia mil doscientos sesenta juuca. Nojoriiri cocuaque toqueya cushiniutaniya taa pueya cushiyocuaajani nojori taraajesacari.

⁴ Cuno caapiqui janiyajiniji pohuataanaani, nojoriiri cuno caapiqui olivo naana, tariucuaaanu Pueyaso Rupaajinia pohuatashiyacuaajani. Naa-juhuaj, nojoriiri cuno caapiqui samari nujuatacojua, Jiyaniijajanaa tacoji nujuatacojuani. Cuno, nojori Jiyaniijiani, nojuajaari jiya Jiyaniijajuhua. ⁵ Tamonu jaara sesa miiniu paniri cuno caapiqui pueya, nojoriiri na paraa catijianutaniya nojori rupaamaji mueranacujua manitia, nojori na puecoonura. Nojoriiri saaja naa cusojanutaniya noo pojori, canapueete nojori miiniu paniya sesa juucuaajani. ⁶ Nojori, janiyajiniji pohuataanaani, nojoriiri cumaaca jitianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhua, nojoriiri cumaaca jitianutaniya mohuaca na jataniniuria nanacara. Nojoriiri cumaaca jitianutaniyahuhua nojori sesonura jiya puetunu puereeta tamaatia casaatjanaa. Nojoriiri pueyaracaanu naa miijionutaniya nojori panishacari. ⁷ Nojori jaara janiyajiniji pohuatanu tucuatate, jiyacaritij, puequeetuuj raamaji tohuatariquiano pueresano sacuraatia Casaani, cunoori nojori paracaanutiianiya. Nojori shocotanutaniyani. Naacuaajitij, nojori puecoonutaniya socuaari. ⁸ Nojori queteeri cuno puereetuaa niishishano tiaca nuucuaajinia pojoconutaniya, tee nojori Jiyaniijia mosaaquiaari niyacutesanojinia teetesanocuaajani. Cuno tiacaari miriqui jiyaniquishiya Sodomata, Egiptotano. ⁹ Naacuaajitij, jiuujianaraca juuca, socua niquriyatuu juuca cajiniocuanio, queraatia tamaatiuucua pueyari nojori quete shootianutaniya. Naa nojori queteya shootianutaniyani queraatia tiqiyocua tiacajiniinjio pueya, tamaatiuucua rupaaca pocuaajaca pueyajuhua, queraatia tamonu jiyacajiniinjio pueyanio. Nojori paraari maja na shanacunu quiniutaniya nojori jamojosaanura. ¹⁰ Puetunu mijiria quiniaajanaari shuqiritiuniutaniya, macunucua cuno caapiqui Pueyaso sequesano caminiujunaa quishacari. Pueyari jiyanojua timiquionutaniya, naquiya nojori mitiajaca puecoosaanucua. Naaratej, mijiria quijiaacari tama na casaminiijiaaja nareja niqutiojotoonutaniya nojori shuquiriniutia.

¹¹ Naajaa, jiuujianaraca juuca, socua tamonu juuca cajiniocua nuhuaji, Pueyasoori nojori samiitianijiorohua. ¡Nojoriiri na matusaqui saneecuatorohua! Puetunu nojori quiniaajanaari jiyanojua shiriiquitiarii. ¹² Jiyacaritij, cuno caapiqui Jesucristojiniji pohuataanaari puereetuaa rupaa tojitiirii jiyocuaanuji pocuaano. Naa nojori sequeriquiaari:

—¡Miji nia tacatama!

Jiyacaritij, nojoriiri na paraa niqiuara tacataquee cohuajajinia jiyocuaaanura! ¹³ Na paraa shootiasacari nojori, jiyacaritij, rijiaari jiyanojua jiuuquijutiaree. Naa rijia jiuuquiutiasacari, Jerusalén tiacajinia queraatia tiacaari niyarequetaquee. Siete mil pueyari tii cusunuuree. Cureno pueyari jiyanojua jiuujiateree Pueyasocuaaj. Nojoriiri jiyacari niishirii jiyocuaaanu Quijaari seetanujanaa Pueyaso cutara.

¹⁴ Janiyari naa segundo naquiya miiniu niqutishaareejaaniuhuaaj, taa na nuhuaji na miishaanutaniyacujani. Tercero naquiya miishacariiri quera ritia cuno nuhuajijia quiniutianiya.

Séptimo trompeta jonesacari

¹⁵ Séptimo Pueyaso seruuri na trompeta jonereee. Jiyacaritij, puereetuca rupaacaari jiyocuacaanu tojishaaree. Naa sequeturiquiaari:

—¡Quiarijiani, pa Jiyaniijia Pueyasoori tari jiitanutaniya puetunu jiyacua jiyaniijianucua jiiitasanojuanaa! ¡Nojuajaari pa Jiyaniijia Cristota Jiyaniijianucujanaa quiniutianiya! ¡Nojoricujaari pueyaracaanu Jiyaniijiajanaa quiriqiano!

¹⁶ Jiyacaritij, cuno veinticuatro niishijia jiyaniijianucua, shanohua cajitujinia cajituriquiaa Pueyaso tacojini, nojoriiri Pueyasocuaa jacamaturee jiyanhua na shuquiritanuta nojuaja. ¹⁷ Naa sequeturee Pueyasoori:

—¡Paacarasho canaa jiyaniijianaa! ¡Quiaari puetunu cumaacaracajanaa! ¡Quiaari quijiajuhuanajaj! ¡Quiaari pueyaracaanu quijia! ¡Quiaari tari juhucatecara quia cumaaca poonijioteree, Jiyaniijiajanaa quia quiniuria pueyaracaanu! ¹⁸ Cunora, puetunu jiyacua jiyaniijianucujanaari juaaquioya. Naajaa, quiarijiaari quia juaashacari cutara. Quiarijiaari macunucua quia nequesoreenu juucajuhuaaj. Saniniuujia, quiaari pueyara quia sequesano caminiujuniaa pueya niqutiojonutaniya nojoririano quia riuriotaca, puetunu quia saquiriojosano pueyajanaajuhuaaj, puetunu quia timitiajaca pueyajanaano, jiyaniijianucua, narejaca pueyano. Naajuhuaaj, quiaari jiya sesojuaca pueya shaajanutaniya.

¹⁹ Jiyacarijuhuaaj, jiyocuacaanu Pueyaso Secojoua tiaari riataaaree. Janiyari Pueyaso Quishaquijianaa niqiriini. Tii matariquiaari Pueyaso caaja, seetanujanaa na Rupaajanaa na racataja. Cuno na Rupaari na pueya na jiyanootiaja, na tojiyashijia na saniitotajajuhuaaj. Jiyacaritij, miacanaari nunujuree. ¡Jiyanhua majacureeri! ¡Puereetatej, jiyanhua cojuata! ¡Rijiaari jiyacari jiuuquiutiaree! ¡Jiyanhua queraatia miacanajaa shiniituijiaacaari juhua maru totereejuhuaaj! ¡Jiyanhua puereetaari quiriquiaa!

12

Miriqui pohuatasano maajijini, puereetucua Naaquerujinijihuaaj, juhua cohuaniquia niquishano

¹ Na nuhuaji, pueya jiuujiatenura, casaari jiya cajiniocua niquishaaree. Maajiiri quiriquiaa cuno, cua niquishanoni. Juhua toqueta pananujinia cuhuajaatiariquiaari. Racaacua nujuariquiaari. Doce riyari na nacaque quiriquiaa. ² Cuno maajiiri manajaraca quiriquiaa. Nooriquiaari. Cunora na sariyotariquiaari quera na ranu panishacari. ³ Jiyacaritij, janiyari socua tamonu casaa niqutishaaree jiya cajiniocuan. ¡Puereetucua Naaqueruuri quiriquiaa, naatuhuaana! Juhua cohuaniquia niquishano quiriquiaari. Siete nacacaracaari quiriquiaa, diez tuhuajaaracano. Jiyaniijianucuaa shipinijosano nacaqueya niqutiatoriquiaari na siete nacacaacua. ⁴ Cuno naatuhuaana Naaqueruuri quera na cajiniocua riyajinjinio nocuaa rerecoree jiyocuacaanuji na pitutia. Nio jiyocua na jacutareeri. Naaqueruuri rariquiano maaji tacoji shanacuriquiaa. ¡Na sashiriquiaari cuara raara, mueya na mianura jaara rasaare! ⁵ Maajiiri cayaniyojua raree. Nojuajaari puetunu mijiria quijia pueyapuejanaa Jiyaniijiajanaa quiriqiano. Nojuajaari pueyaracaanu na maca mueturiquiano, na tojiyashijia na piyotajara. Mueyari na nucua jaariutiasaaree Naaqueruucujaj. Pueyasoori

na shuriucuara na ririi, tii na cajitiniuria, Jiyaniijia quiriquianoni. ⁶ Maajiiri saniniuujia cariiquia jiyajinia mashirii, tee Pueyaso jeenucuaciaari tari nocuaji na quijiaracuajani, tii na mianuutesaanurajuhuj, cuaara shocorejaatijia mil doscientos sesenta juuca.

⁷ Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhuaana Naaquerujuhuj puetunu na seyatajanaa. Puetunu nojorijianaari puereeta quiaquetooriquiaa jiyocuaaanu. Cuno Naaqueruuri na seyata jiyanoohua quiaqueriquiaa Pueyaso seya juucua. ⁸ Naajaa, majaari nojori naata quiriquiaa Pueyaso seya shocotanu. Pueyaso seya paracaaniucua jiyanoohua nojori, majaari quiquio quiniu quiriquiaa socua nojoriria jiyocuaaanu. ⁹ Naacuajitij, cuno Naaqueruuri jiyocuaaanuji taanuusaaree. Nojuacuajaari cuno tariucuaaanu Soconu, Eva sapojoquiaarini. Cuno Sesaaca seque sesaari “Satanás”. Nojuajaari puetunu mijiria quiniajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejoosaaree.

¹⁰ Jiyacaritij, janiyari jiyocuaaanu quijiaca queraatia pueya rupaa tojjirini. Juhua niquiriyatu rupaari tojishaariquiaa jatiqii nojori paaretasacari na rupaa. Naa sequeturiquiaari:

—¡Pueyasoori parta Pueyaso pueyacuara Saquiriojotana jatatee tari! Nojuajaari pueyaracaanu Pueyaso saquiriojotaja Pueyaso pueyacuara, juuca, niucuanio. Naa pa Paraca jatasaaanuucatej, Pueyasoori quiarijia tohuatenuantaniya puetunu na sequesanojanaa na jiyanooshano pueyara. ¡Nojuajaari maninia jitianutaniya pajaniya, jiyanoohua na cumaacata! ¡Pa Jiyaniijia Cristoori tari jiyatesaaree Jiyaniijijajanaa na quiniuria! Naa na miishaanuni, cunoori na Que saquiriojosano na quiniucua. ¹¹ ¡Pueyaso Borrego na quiniucua, nojuajaari na nanaca shootequiaari, tojetaarucujajanaa jiyanooshano pa quiniuria sesa pa miishanujiniji! Naacuajitij, Satanás saquiriojotasacari parta Pueyaso pueyacuara, nojoriiri na sanaajaquiaari nojori tiuuniucua Jesucristoocua. Nojoriiri na shocotaquiaarijijanaa, nojori pohuatanuucua Jesucristoocua nojori tiuuniujiniji. Nojoriiri maja na puerenu quijia na mosaanura. Nojoriiri seetanujanaa juhuajaniya tama na cuaqueyajaaja panitiaquiaari nojori mosaanura. ¹² ¡Naaatej, jiyocuaaanunaa, shuquiriaatia quia quiri! ¡Naa Sesaaca jatasaaanuucuatej, nia timiquiore jiyocuaaanu quijiacanaa! ¡Niajaniya saniniuujia, jiyacua quijiacanaa, shoniniacu caminijinia quijiacanio, jiyanoohua nia taraajere! ¡Sesaaca niishishacari maja puera Pueyaso tarishiniu quiniutianiya na sanitionura nojuaja, nojuajaari niaacua roseyarucuaa jiyanoohua na juaniutia!

¹³ Cuno puereeta niquishano Naaqueru niishishacari nojuaja tari jatasaaaree jiyocua, nojuajaari cuno mueya nucua neteyojotanu coteeree na mi-anura juucua. ¹⁴ Cuno maajiiri querajaa puereetuca nesu niquitosaaaree saaja, juhua jiyanoohua puereetuca surohua miooru nesu. Cuno nesuta, maajiiri na quiquojiniara jaaree cariiquia jiyajinia, tucuaaanu cuno Naaqueruucujaji. Tii mianuutesaanutaniya pueyaracaanuuri cuaara na shocorejaatijia jiuujianaraca marijia, socua seis racanio. ¹⁵ Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinianura juucua. ¹⁶ Jiyari maaji naacutaree. Jiyari juhua na rupaa riatatee. Naaqueru rupaamaji pojuaretaano moo raturee saajaari. ¹⁷ Naaqueruuri jiyamitia maajicua macaarii jiyanoohua. Quiaareeri maajicujainio supueno pueyata miaquetoojonura. Cuno pojoricuajaari Pueyaso

rootasano tojtiajaca, canapue te Jesucristocua nojori tiuuniu seetaashijiacacaujani.

¹⁸ Naaqueruuri shoniacu caminia casaqueyaji nujuasee.

13

Caapiqui puereeta niquishano Casaajiniji pohuatasano

¹ Na nuhuaji, janiyari puereeta niquishano Casaa niqiriiri shoniacu caminiajiniji tacaanoni. Siete nacacaraca quiriquiaari, diez nacajaaracanio. Puetunu na diez nacajaacua jitiariquiaa jiyaniijianucuaara shipinijosano nacaqueyari. Puetunu na nacacaacujanaa, sesacaari nocua naajiotasano quiriquiaa. Na nacacaacua naajiotasano sesacani, cunoori Pueyaso rerequeteriquiaa, juhua Pueyaso shocotaja na quiniucua. ² Janiyara, cuno cua niquishano puereeta niquishano Casaani, cunoori juhua marucatuque sare niquishano quiriquiaa. Na niohuacaari juhua oso niohuaca niquishano quiriquiaa, tucuaacua juaashococuaraca. Na rupaari juhua juuruu sare rupaa quiriquiaajuhua. Cuno tari cua pohuatasano naatuhuana juhua cohuaniquia niquishano Naaqueruuri na cumaaca na niqitioree. Tama na cajitiujiniaaja na cajitiriiri jiyaniijiajanaa na quiniuria jiyacua. ³ Cuno puereeta niquishano Casaa siete nacacaracani, niqiriiryatu na nacajini-jinioori pishano quiriquiaa na mosanura juucua. ¡Cuno puereetucua piyashi na nacaacua quiriquiaani, saaja cushiriiquiri! Puetunu mijiria quiniaa pueyajanaari jjuujiateree na cushiriishacariuhua. Cunora, puetunu nojorijianaari cuno puereeta Casaa tojjiacara quiri. ⁴ Jiyacaritij, mijiria quiniaa pueyari cuno naatuhuana Naaqueruucuaara jacamaturee juhua Pueyasoocuaara, cuno puereeta niquishano Casaa na jyatenuucua nojori jiyaniijiajanaa na quiniuria. Pueyari cuno siete nacacaraca puereeta niquishano Casaacuaara jacamatureejuhua. Nojoriiri naa sequetoree tamajaaja:

—Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetoojonura? Shaaqui.

⁵ Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojoree sacuaraatia na rimiaaquenura Pueyasoocuaara, Pueyaso na rerequetenurajuhua. Naa miiriiri na jyanishacari nojuajaari socua maninia quijia Pueyasojiniji. Naajaa, nojuajaari jiyaniijiaara jiyatesaree saaja cuarenta y dos racara. ⁶ Naacuajitij, cuno puereeta niquishano Casaari Pueyaso rerequetenu coteeree. Pueyasoocuaara rimiaaquereeri. Jesuucua tiuujiaca pueya sesacareejaariuhua, jiyocuaaanu Pueyaso quiquionio. ⁷ Mijiria quijiaa Pueyaso saquiriojosano pueya paracaatishaareejaariuhua. Cumaquishaareejaariuhua Pueyaso pueya na shocotanura. Cumaaca niqitiosaareejaariuhua jiyaniijiajanaa na quiniuria, puetunu tamaatiuucua pueyapuejanaa na jitiannura, puetunu tiquiyocua tiacajinijinio pueyajanaa, puetunu tamaatia rupaca pocuajaca pueyajuhua, puetunu tamonu jiyacajiniajanaa quijiacanio. ⁸ Naacuajitij, puetunu mijiria quijiaa pueyajanaari cuno puereeta niquishano Casaacuaara jacamaturee na shuquiritianura nojuaja, nojori pueyaso na quiniucua. Cuno pojoriiri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jitiiasano naajioneejinia, cante pocuara mosaaquiaaricaujani. Pueyaso muerasu sesaca cutaraari cuno naajioneejinia naajiotasaquiaari jiya shipinishaacarijiyojua, pueyaracaanu rishijiacaa pa quiniuria.

⁹ Cante numaaracani, nojuaja cuara tojiiria nio: ¹⁰ “Cante Pueyaso jiyatesano quiasocoriquianoni, nojuajaari seetanujanaa quiasano pueyano quiniutianiya. Naajuhua, cante nijiniaquetucua mueruuta

mosocoriquianoni, seetanujuanaa naa mosaanutaniyari”. Naaratej, Pueyaso pueya cuara puetunu casajanaa rejeretajaca quiriia, seetanujuanaa nojori tiushacari Pueyasoooca.

¹¹ Na nuhuaji, janiyari tamonu puereeta niquishano Casaa niquirii jiyajiniiji muetaanoni. Caapiqui nacajaraca quiriquiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari. ¹² Jiyanhua cumaacaraca quiriquiaari, juhua narta puereeta niquishano Casaa, teyano naca pishanotucuaja cushiriiriohuani. Nojuajaari na naca cushiriinohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojoquetanijoree juhua Pueyasooocara, nojori timitianura na naca pishano cushiriinohua puereeta niquishano Casaa. ¹³ Naajuhuj, nojuajaari na cumaacata miri jiyajeneta casaa pueya jiuujiatenura nocuaji. Jiyanhua cumaacaraca na quiniuucua, pueya niqiuara, nojuajaari mani tinirii jiyocuaaanuji jiyocua.

¹⁴ Naa na cumaacata na miiniuucua cuno na naca cushiriinohua puereeta niquishano Casaa tacojitij, puetunu mijiria quiniaa pueyajanaa sapojoreeri. Naacuajitij, nojuajaari pueya shipinitirii casaa. Juhua cuno siete nacacaraca puereeta niquishano Casaa quiriquiaa, teyanote na nacajinia mueruuta pishano na quishacari samiitiarohua saajacuajani. ¹⁵ Jiyacaritij, nojuajaari cumaaca niqutiosaaree pueya shipinishano Casaa na jiyatenura saminiora, pocuajara na quiniuria, nocuara jacamatuyashijiaa na puecootenurajuhuj. ¹⁶ Naajuhuj, cuno caapiqui nacajaraca puereeta niquishano Casaaari na pueya sequeree nojori naajiotanura puetunu pueyacuajanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasaareeri. Naacuajitij, puetunu mijiria quiniaa pueyacuajanaa naa naajiotasaareeri, tojiyaquishoo pueyacuajanaa, tojishano pueyacuajanaa, casamiriaca pueyacuajanaa, casamijiuniucua pueyacuajanaa, tama nojoriria poonijionuuacuajanaa pueyacuajuhuj, poonijiotasano pueyacuajanaa. ¹⁷ Jiyacaritij, canaputee cuno puereeta niquishano Casaa sesa naajiotasano jitiiaquiriquiaa na cuaqueyacuajanaa, nojoriri maja na naata na panishano masenu quiriquiaa na cumaneecata. Naajuhuj, majaari nojori naata na casami niqutiojonu quiriquiaa na cumaneecara. Pueya jaara cuno puereeta niquishano Casaa sesa jitiiaquiri naajiotasano na cuaqueyacuajanaa, na naata na sesa número jitianu nocua naajiotasano.

¹⁸ Nio niishishaanura maninia, jiyanhua niishitiajari panishiya cutara. Niishijiaa pueya cuara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis. ¡Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasaanura niaacuajuhuj!

14

Borrego Niquiojua cojiniaajiniji pohuatasano

¹ Na nuhuaji, janiyari Borrego Niquiojua niquiriini, Sión tuhananuucua nujuaaano. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijianaa, na Que Pueyaso sesajuhuj. ² Na nuhuaji, janiyari casaa tojirii juhua sararojua cojuatuneyano jiyocuaaanujini, juhua miacana majacuyano, juhua queraatia pueya arpa taquinionuyanojuhuj. ³ Cua tojishanoori quiarinoo jaaquequenosano quiriquiaa. Jaaquequenuaari Pueyaso cajiitu tacoji jaaquequenuuriquiaa, cuno cuatro saminio casaa tacojijuhuj, cuno veinticuatro niishijiaa jiyaniijianucua tacojinio. Majaari quenaaja

tamonu naata quiriquiaa cuno jaaquequejosano niishiniu nojori jaaquequejonurajuhua. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricuajaari mijiria quiniaa-jinjiniño saquiriojosaquiaari Pueyaso pueya nojori quiniuria. ⁴ Nojoriiri tojetaarucujanaa maañi numetuqueyashijiaa quiquiaari, saaja pocuaji Tacunaacua jiaatiajaca nojori quiniucua. Naaratej, tiqiyocua Borrego Niquiojua rucanejosacari, nojoriiri pueyaracaanu na cojiquiaa. Nojoriiri saquiriojosaquiaari mijiria quiniaa pueyajinjiniño, saaja Pueyasora nojori quiniuria, Borrego Niquiojua nojori quiniuriajuhuaj. Nojoriiri socua Pueyaso timitiasano pueya puetunu Pueyaso saquiriojosano pueyajinjiniño-juanaa, taa pa shuquiritiaa shushajanaa pa carojosano pa nataujinjicuaani. ⁵ Nojoriiri tojetaarucujanaa sapojonu niishiyashijiaa quiquiaari, tojetaarucujanaa sesa miyashijiaa nojori quiniucua.

Jiuujianaraca Pueyaso seya pohuatasano

⁶ Na nuhuaji, janiyari tamonu Pueyaso seru niquiri jiya cajiniocua jaanoni. Jaariquiaari mijiria quijiaca pueya niquiara na pohuatanura Pueyaso Rupaá, puetunu jiyacajinia quiniaa pueyarajanaa, puetunu tamaatiucua pueyapuerajanaa, puetunu tamaatia rupaaca pocuajaca pueyarajanaajuhua, puetunu tiqiyocua tiacajinia quijiaca pueyarajanaano. Na pohuatasanoori seetanu rupaajanaa pueyaracaanura.

⁷ Pueyaso seruuri mijiria quiniaa pueyacua nacariquiaa naatej:

—¡Pueyaso puerejaca nia quiriquia! ¡Nojuaja nia maniniuhuaqueetare! ¡Quiarjiaari na nequesoreesacari pueya! ¡Nocuara nia mojoquetacore nia shuquiritianura nojuaja! ¡Nojuacuajaari jiyocuaaanu shipinina, nio jiya, puereetuca shoniniacu caminiajuhuaj, puetunu samocua nacaca pacarta-cojuacajanaano!

⁸ Jiyacaritij, tamonu Pueyaso seruuri narta Pueyaso seru nuhuajimiaa-juhuaj. Naa miriqui sequeriquiaa Roma tiacajinjiri:

—¡Babilonia tiaca tari saniitioshiya! ¡Cuno puereetuca tiaca tari saniitioshiya! Babilonia tiacaari puetunu jiyacajinia pueyajanaa niishitioj-juua, sacuaraatia nojori miiniuria juhua nojuajuhua. Babilonia tiacani, nojuajaari puetunu sesa casaa na miijiosanotajanaa juhua mashaasequete-joquiaari puetunu mijiria quijacajanaa. Naacuajitij, puetunu pueyajanaari tama na cuaqueya miiniu panishanojuaja miijicara quiquiaari, jiyanojua nojori jiaatianuta sacuaraatia casaa na miiniuria, taa Babilonia tiacajinia quiniaa miijioquiaacuaani.

⁹ Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhua. Mijiria quiniaa pueyacua nacaree naari:

—¡Jiyanohua puereeta quiniutianiyari noo pojoriria, canapuate cuno puereeta niquishano na naca pishano cushiriiniohua Casaacuara mojoquetacojua juhua Pueyasocuarani! ¡Jiyanohua puereeta quiniutianiyari noo pojoririajuhuaj, canapuate juhua na naca cushiriiniohua niquishano shipinishano Casaacuara jacamatujucani! ¡Naajuhua, puereeta quiniutianiyari noo pojoriria, canapuate na cuaqueya tariniitajacani, cuno puereeta niquishano Casaa sesa naajiotasaanura nojori jinijini, nojori juaashiquiaacua soj!

¹⁰ ¡Pueyasoori puetunu cuno pueyajanaa saniitionutaniya jiyanohua na juaniutia! ¡Majaari quenaaja Pueyaso jiuujiaaniu quiniutianiya nojori! ¡Pueyaso seya niquiara, Borrego Niquiojua niquiarajuhua, nojoriiri pueyaracaanu naquiya miishaanutaniya manitia, azufretanio! ¹¹ ¡Naa Pueyaso miitiasacari nojoritij, najacaari pueyaracaanu nojonutaniya! ¡Majaari quenaaja nojori samaraatasaanu quiniutianiya juuca, niucuanio! ¡Naquiya miiniuuri naa nojori miitianutaniya pueyaracaanu! ¡Naa miishaanutaniyari cuno pojori,

canapuete na naca pishano cushiriiniohua puereeta niquishano Casaacuara jacamatujuaca juhua Pueyasooocarani, juhua nojuaja niquishano shipinishano Casaacuarajuhua! ¡Naa miishaanutaniyajaariuhua! noo pojori, canapuete cuno puereeta niquishano Casaa sesa naajiotaniniutianiya tama nocuajaajani!

¹² Cunora, Pueyaso saquiriojosano pueyani, canapuete na rootasano tojitiyacani, Jesuucua tiuuniu tarinitiaashijiacajuhua, nojori cuara juhua-janiya rejeretaara naquiya nojori miishacari.

¹³ Jiyacaritij, janiyari rupaa tojirii jiyocuacaanuji naa cua sequeyanoni:

—Nio quia naajiotare: “¡Quiarijiani, jiyanoehua shuquiriaatia quiijaca cutaraari cuno macunucua, canapuete tariucua Jiyaniijia Jesucristoocua tiuujica cusununutaniani!” Pueyaso Sohuanuuri naa sequeyajuhua: “¡Taaquiririnij! Nojoriiri samaateya, pueyaracaanu na Jiyaniijara na poonijonuunu nuhuaji. Maninia nojori miishanocujaari niyajetaaquishaanuniya. Cunora, nojoriiri maninia miishaanuniya”.

Pueyaso seya senosacari pueya juhua nataacuaca nio jiyajiniji

¹⁴ Na nuhuaji, janiyari cohuaja najaca niquiriini. Cuno cohuaja najaca caco cajiniaari juhua Pueyaso Niyanu niquishano quiriqiaaa. Jiyaniijara shipinishano nacaque cushitariquiaari, orojiniji shipinishano. Nataacuaca na senootajara shamaticuaja jacatunee mueruu mueturiquiaari.

¹⁵ Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajiyanoocua nacaree jiyanohuari. Naa na sequereeri:

—¡Quia mueruuta quia canuujure, nataacuaca quia senoonura! ¡Jiyajinia nataacuacacujaari tari noshuriujua! ¡Cuara quiarijia senoosaria!

¹⁶ Jiyacaritij, cohuaja najaca caco cajiyanoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueycuaja. Nojoriiri naa rijiosaanutaniya jiyocuacaanu.

¹⁷ Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamaticuaja jacatunee mueruu mueturiquiaajuhua. ¹⁸ Na nuhuaji, socua tamonu Pueyaso seruuri tohuatamaa Pueyasooocua catijijaja casaajiniji. Nojuajaari mani camaru. Nojuajaari narta Pueyaso seruucua nacaree, shamaticuaja mueruu muetuyanoocua. Na sequereeri:

—¡Quia shamaticuaja mueruuta uva quia carojotare, jiyajinia moritiacouni! ¡Tari noshuriujucua!

¹⁹ Jiyacaritij, Pueyaso seruuri uva carojotaree na mueruuta, puetunu nio jiyajinia cuhariquiaajinijianaa. Uva jaapuejoree saajiajinia quejasano puereetuca surocohuamaari. Pueyasoori tii na rapijiotenutaniya jiyanoehua na juaaniutia. Cuno uvani, nojoriiri Pueyaso ruuretajaca pueycuaja. ²⁰ Cuno uvaari rapijiosaaree tucuaaanu naata tiacajiniji. Uva rapijiosaquiji, nanacaari tojetaarucujanaa jaateriquiaa juhua mohuaca. Jiyanoehua nanaca quiniucua, cabollohua rupaacuma puecariquiaari. Pueyaso tojiyashijica pueya nanacaari jiyanoehua tucuaaanu jaateree juhua moo. Tresciento kilómetro jaatereeri.

15

Siete Pueyaso seya, siete naquiya miitaja na muetacosacari

¹ Na nuhuaji, janiyari jiya cajiniocua socua niquitishaareeni, cua niishiniria taa mijiria quiniaa saniifiosaanu tucuatasaanutaniyani. Cua niquishanoori jiyanoehua puereeta quiriqiaaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miitaja

mueetacoriqiaari. Pueyaso jaara cuno siete casaata naquiya miitiri pueya, nojuajaari cunota na juaani tucatanutaniya puetunujuanaa.

² Janyari casaa niqiriijiaanihuaj juhua puereetuuca caminia motiquojiniji shipinishano. Manitia cojitishanoori quiriquiaa. Pueyari cuno caminia shocua njuaturiquiaa. Nojoriiri noo pojori quiriquiaacuaa, canapuate na naca pishano cushiriiniohua Casaa shocotaquiaaricuaajani, juhua nojuaja niquishano shipinishano Casaajuhua. Naajuhua, nojoriiri maja na shanacunu quiquiaari cuno Casaa sesa naajiotasaanura nojoricua. Puetunu nojoriijianaari Pueyaso niqutiojosano arpa taquinionuuriquiaa. ³ Nojoriiri Pueyaso seru Moisés jaaquequejosano jaaquequenuuriquiaa, Borrego Niquiojua jaaquequejosanonio. Nojoriiri naa jaaquequenuuriquiaa:

—Jyaniijianaa, puetunu quia miishanojuanaari jyanohua maninia, nocuaji juujiatesano. ¡Quiaari seetanujuanaa puetunu cumaacaracajanaa! Casaa quia miishacari, quiaari maninia na miiquiaa. Majaari quenaaja quia jiyajenenu. Quiaacuajaari puetunu jiyacajinia quijiaca pueya Jyaniijajanaa. ⁴ ¡Quiaari pueresano, Jyaniijianaa! ¡Quiaari tojetaarucujanaa maniuhuacueetasano seetanujuanaa! ¡Saaja quiajaniya cutaraari tojetaarucujanaa maninia miijia pueyaracaanu! Naaratej, puetunu jiyacajinijinio pueyajaari quiocua nijionutaniya nojori shuquiritianura quiajaniya, maninia quia saniitiojonuucua quia paraajuhua.

⁵ Naa cua tojinii nuhuajitij, janyari jiyocuaanu Pueyaso Quishaquijianaa niqiriiri riateyanoni, tee cuniqui seetanu Pueyaso rupajanaa racatasano quiyacuajani. ⁶ Cua niquishacari, cuno siete Pueyaso seyari Pueyaso Quishaquijijianaa tohuareetariquiaa, canapuate cuno siete naquiya miitaja patotariquiaacuajani. Nojoriiri tojetaarucujanaa cohuaja linojiniji toqeyaraca quiriquiaa, shacantuqueya. Nojoriiri orojiniji shipinijosano casaa na jiriqiuacajinia camarucuteriquiaa. ⁷ Jiyacaritij, niqiriyatu cuno cuatro saminio casaajinijinoori miacojua niqutiojoree puetunu cuno siete Pueyaso seyajanaa. Cuno miacojuuari orojiniji shipinijosano quiriquiaa. Pueyaracaanu rishijia Pueyaso juaaquiaca mishinijosano quiriquiaari. ⁸ Jiyacaritij, Pueyaso Quishaquijianaari maatia najacata mishiquimaa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuara puecaarajaatijia naquiya nojori miitajaca pueya. Cuno najacaari Pueyaso shacantuuca cumaacajiniji quiriquiaa, naa na saniitiojosacari na paraa.

16

Saniitionujiniji pohuatasano

¹ Jiyacaritij, janyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequeereeri:

—¡Nia siete miacojuajiniji Pueyaso juaaquiaca nia taroosee jiyocua!

² Niqiriyatu Pueyaso seruuri juhuaacatecara coteeree. Quiaareeri. Na miacojuajiniji jaapuesee jiyocuaari. Jiyacaritij, jyanohua nootuuca sapueyari pueyacu supueree. Noo pueyacu supuereeri, canapuate nocua naajiotasano jiitariquiaa na naca pishano cushiriiniohua puereeta niquishano Casaa sesacuajani. Sapueyara pueyari cuno puereeta niquishano shipinishano Casaacuara jacamatujuaca quiriquiaajuhua. Jyanohua nootuuca sapueyari quiriquiaa.

³ Segundo Pueyaso seruuri na miacojuajiniji Pueyaso juaaquiaca jaapuesee puereetuuca shoniacu caminiajia. Mohuacaari puetunu nanacara quiquijianaa, juhua shusha mosano pueyano nanaca. Cunora, puetunu shoniacu caminiajia quijia casaajanaari cusonuuree.

⁴ Tercero Pueyaso seruuri miacojuajiniji Pueyaso juaaquiaca jaapuesee puetunu moocujiniajanaa, puetunu samocua nacaca pacartacojuacajiniajanaano. Jiyacaritij, nanacara jataquee puetunujuanaari. ⁵ Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhuanajaj. Majaari quia supueni quiquiaari. Quiaari tojetaarucujanaa maninia. Naa quia miitiasacari quia tojtiaashijicatej, quiaari seetanujuanaa maninia namirii nojori.

⁶ Nojoricuajaari quia saquiriojosano pueyajinijinio nanaca shootejoquiaari pueyaracaanu, quia sequesano caminiujuunaa nanacanio. Quiarijia saniniuujia, naa miijiaa nojori quiniuucuatej, quiaari nojori raatejoree nanaca. ¡Maniniacuaja Jiyaniijianaa!

⁷ Jiyacaritij, janiyari Pueyasooacara catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiriirini Jiyaniijianaa, puetunu cumaacaracajanaa Pueyasonaa. Quiaacuajaari maninia saniitioree quia tojiyashijiaa, taa quia sequequiaari tariucuaaanu nojoricuajani, quiaari quia tojiyashijiaa sanitionutaniya. Quiaari seetanujuanaa sequequiaari quia miishocoriquiano. Quiaari puetunu sesa nojori miishanojuanaa niishijia.

⁸ Na nuhuaji, cuarto Pueyaso seruuri miacojuajiniji Pueyaso juaaquiaca jaapuesee pananuucua. Naacuajitij, pananuuri socua jiyanoehua naseecara quiqui, pueya na catijianura juhua mani. ⁹ Naa pananu januucua jiyanoehua nasaatiatej, pueyari jiyanoehua cateree. Nojoriiri Pueyaso sesacaree saaja, cumaacaraca na quiniuucua, naa nojori na sanitionuucuatej. Majaari que-naaja nojori pishiniu quirii sesa nojori miiniujiniji, nojori tacatonuhuaa noojia Pueyasooacara, nojori jiyaniijiaara nojori jiyatenura Pueyaso. Pueyaso rerequeteturee saajaari.

¹⁰ Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriinohua puereeta niquishano Casaa cajishaqui na jaapueseeri, tee cuniqui juhua jiyaniijiajanaa na cajiriquiaacuajani. Jiyacaritij, puetunu na jiiatasano jiyacajanaari ninishiquiria quiqui! Cunora, na pueyari na niti saaquioriquiaa jiyanoehua nooeta naquiya na miijuosacari. ¹¹ Naa Pueyaso saniitiosacari nojoritij, naajaa, majaari nojori pishiniu quiriquiaa sesa nojori miiniujiniji. Nojori nootenuucua, nojoriiri jiyocuacaanu quijia Pueyaso sesacaree saaja, nootujuaca sapueyaraca nojori quiniuucujuhua.

¹² Cuno nuhuaji, sexto Pueyaso seruuri miacojuajiniji Pueyaso juaaquiaca jaapuesee cuno puereetua Eufrates moojinia. Moori joojequetaquee jiya pajamaji niriqiano jiyaniijianucua niuutijara.

¹³ Jiyacarijuhuaj, janiyari jiuujianaraca samaruhua niquiriini, juhua sacarohua niquishano. Cuno samaruhuari tohuareetariquiaa juhua cohuaniquia niquishano naatuhua Naaqueru rupaamaji. Tohuareetariquiaaaruuhua na naca pishano cushiriinohua puereeta niquishano Casaa rupaamaji, narta puereeta niquishano Casaa rupaamajinio. Cuno puereeta niquishano Casaari mijiria quiniaa pueya sapojoriquiaacuaja, nojori tojinuria na naca pishano cushiriinohua puereeta niquishano Casaa.

¹⁴ Cuno jiuujianaraca samaruhuari cumaacaraca quiriquiaa, na cumaacata nojori miinuria nocuaji jiuujiatesano casaa, pueya tiuuniuria nojori sequesanoocua. Nojoriiri naa miiriquiaatej, puetunu mijiria jiyaniijianucujanaa nojori rerejotenura. Jiyaniijianucuaari naa rerejotesaaree nojori miaquetoojonura puetunu cumaacaracajanaa quijia Pueyasota. Pueyasocujiaari tariucuaaanu niishiriojuiaari naa cuno juuca na miaquetoojonura nojoritia. Naa paniquiaaricuajaari na paraa na puecoonura.

¹⁵ Jiyacaritij, janiyari pa Jiyaniijiajanaa tojirii naa sequeyanoni:

—Cua tojitiare cua pueyanaa. Janiyari canashiyaquiji tiuquiniutianiuhuani nia niishiyaquishacari. Janiyari naa niaacua tiuquiniutianiuhuani taa nohuasejioja tiuquiquiaa casami nohuasenucuacuanaa, juhua-janiya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyaracaanu na secojosacari, na sashishacari janiya. Tojetaarucujanaa sesa miyaquijia nia quiri, niaa mariqui cua tiuquishacariuhua cararaatia juhua juhua sunucua quiri cua niquiaaraari.

¹⁶ Cua Jiyaniijia sequesano cua tojiniu nuhuaji, janiyari cuno samaruhua niquirii mijiria jiyaniijianucua rerejoteyanoni. Hebreo rupaa jinia, nojori rerejosaqui sesaari, “Armagedón”.

¹⁷ Séptimo Pueyaso seruuri miacojuajiniji Pueyaso juaaquiaa jaapuesee paratujinia. Jiyacaritij, jiyocuacaanu Pueyaso Quishaquijianaa Jiyaniijia cajitiujiniji, janiyari rupaa tojirii naa nacaanoni:

—¡Tari miishaaree puetunujuaa cuaja!

¹⁸ Jiyacaritij, miacanaari nunujuree. ¡Jiyano hua majacureeri! Cojuataari quiriquiaa puereeta. Rijiaari tojetaarucujanaa jiyano hua jiuuquiujiutia-ree. Pueyano shipinishaanujiniji, majaari naa rijia jiuuquiujiutianu quijia juhua nio rijia. ¹⁹ ¡Naa rijia jiuuquiujiutianuucua jiyano huatej, cuno puereetuua tiacaari neequeresetaquee! Jiuujianaracara raquitiijiquiri. Puetunu jiyacajinia tiacajanaari niyarequetaree. Jiyacaritij, Pueyasoori cuno puereetuua Babilonia tiaca saniifioree, taa tariucuacaanu na niishiriojiquiaari cuno juuca na saniitionuracujani. ¡Jiyano hua na juaaniutia na saniifioereeri! Niya sequeshiya Babilonia tiacatani, cunoori Roma tiacacuja. ²⁰ Jiyacarijijuhuj, puetunu shoniniacu caminia jinia jiya tucuaa-tiacajanaari shaajequee, puetunu tuhuananuhujanaano. ²¹ Naajuhuj, jiyocuacaanuji jiyano hua puereetujuaaca miacana jaa shiniitujiaacaari totere pueyacia. ¡Noojiaqueyari jiyano hua niiquia quiriquiaa; cuarenta kilo! Mijiria quinia pueyari Pueyaso sesacaree, naa nojoriicua na totinijianuucua shiniitujiaaca miacana jatej.

17

Miriqui pohuatasano Roma tiacajiniji, juhua paanatu

¹ Na nuhuaji, cucua nimiaari niquiriyatu cuno siete Pueyaso seyajinijinio, canapueete siete miacojua patootariquiaacuajani. Cua sequeseeeri:

—Miji quia nimia. Janiya quia niquitiniutianiyani taa Pueyaso sanitionutaninya cuno Paanatuni, puetunu jiyajinia mohuacuajanaa cajiiani. ² Mijiria jiyaniijianucuaari cuno Maaji numuetucujuuaca. Sacuaraatia cuno Paanatu niishitiojosanota, nojuajaari juhua mashaasequetejojua puetunu jiyacia quinia pueyajanaa. Naacuajitij, nojoriiri sacuaraatia miijiacara quiquiaari, juhua nojuajuhuj.

³ Pueyaso seru niquitiniuria janiya na niquitini panishano, nojuajaari cua sohanu jiyataare cariiquia jiyajinia. Janiyari tii niquishii Maajini, naatuhua puereeta niquishano Casaa nijinia cajiiano. Queraatia sesacari cuno naatuhua Casaa cuaqueyacia quiriquiaa, Pueyaso rerequeteja sesaca, juhua Pueyasora na jiyatesacari tama na cuaqueyajaaja. Siete nacacacaraari quiriquiaa, diez tuhujaa racanio. ⁴ Cuno Maajiiri shanohua toqueya cushiriquiaa, naatuque, shaaruquejuhuaj, juhua jiyaniijianucua cushishano. Queraatia shanohua maniniushitija casaa cushitiriquiaari: orojiniji shipinijosano casaa, shanohua saijiniji shipinijosano tujiuajuhuj, noturu shipinijosano saijiniji tujiuajunio. Orojiniji shipinishano miacojua muetariquiaari. Mishaja quiriquiaari puetunu sacuaraatia

na miijiosano casaatajanaa, numuetucujusaanu porocua na quiniuucua. ⁵ Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuca Babilonia tiacani. Janiyari paanatu-juri nucuani, puetunu mijiria sacuaraatia miishanojuanaa coretanijiojua nucuano”. ⁶ Maninia cua niquishacari, cuno Paanatuuri juhua mashaaseca quiriquiaa na puecootesano Pueyaso pueya nanacata. Nojuajaari jiyanojuaa timijia, Jesujiniji pohuatanaa puecoonu porocua na quiniuucua.

Naa cua niquishacari nojuajatej, janiyari jiyanojuaa jiuujiatereeni. ⁷ Pueyaso seruuri jiyacari cua sequeree:

—¿Casaara quia jiuujiateya nocuajini? Quiarijia quia pohuatereera quia niquishanojiniji. Cuno puereeta niquishano Casaa, siete nacacaracani, diez nacajaaracani, Maaji cajitiya na nijiniani, puetunu cunojuanaari miriqui.

⁸ Cuno puereeta Casaa quia niquishanoni, cunoori tariucuaaanujiniji quijia quiquiaari. Quiarijia saniniuujia, majaari tari na quiniu. Naajaa, quera tacanutaniuhua cuno puequeetuujua raamajiiri, seetanujuanaa puetunujuaanaa na shaajasaanuhua cutara. Pueyaso ruuretajaca pueyari jiyanojuaa shiriqitiuniutianiya nojori jaara cuno puereeta niquishano Casaa niquiri tacatehuano, teyanote tariucuaaanu quijia quiquiaaricujani, quiarijia saniniuujia majaari na quiniu. Jiya shipiniyaquishacarijia, cuno pueya sesacacuajaari Pueyaso saquiriojosano pueya sesaca naajiotasaqui naajio-tasoo quiquiaari.

⁹ Cante niishijiani, nojuaja cuara niishiiri cua pohuatasano. Cuno puereeta niquishano Casaa, na siete nacacani, cunoori siete jiyaca jiyani-ijianucua, mariyata siete tuhuananuhua, teyanoojua cuno Paanatu cajiyacuajani. ¹⁰ Cuno siete jiyaniijianucujinijinioni, cinco nojorijinijinioori tari shaajasaquiaari. Cuno caapiqui cureenoinijini, niquiriyatuuri jiyaniijia quia quiarijia. Tamonuuri supueyojua. Nojuaja jaara supuere, saaja rupaquijia rishiniutianiyaari jiyaniijia na quishacari. ¹¹ Cuno puereeta niquishano Casaa, teyanote tariucuaaanu quijia quiquiaaricujani, nojuajaari cuno cinco shaajasano jiyaniijianucujinijinio quiquiaaricujaja. Majaari quiarijia na quiniu. Na nuhuaji supenutaniuhuari octavo jiyaniijia na quiniuria rupaquijia. Na nuhuaji shaajasaanutaniya cutaraari.

¹² Cuno diez nacajaa quia niquishanojaniuhua, cunoori diez jiyaniijianucuaranocujaja. Nojoriiri cumaaca niqutiosaanutaniya saaja niquiriyatu hora jiyaniijianucua nojori quiniuria cuno puereeta niquishano Casaata. ¹³ Cuno diez jiyaniijianucuaari mariyata niishiriojonutaniya nojori cumaquiniuria cuno puereeta niquishano Casaa puetunu nojori cumaacatajanaa, jiyaniijiajanaa cuno puereeta niquishano Casaa quiniuria. ¹⁴ Nojoriiri Borrego Niquiojuata miaquetojonutaniya. Borrego Niquiojuuari nojori shocotanutaniya saaja, seetanujuanaa Jiyaniijiajanaa na quiniuucua. ¡Nojuajaari puetunu jiyaniijianucujanaa Jiyaniijia! Nata quiniaa pueyari Pueyaso saquiriojosano pueya, Neyanu tojtiajacatuhua.

¹⁵ Pueyaso seruuri socua cua sequeree:

—Quiaacuajaari cuno Paanatu niquirii puetunu mohuacaacuajanaa caji-yano. Cuno mohuacaacuajaari queraatia tiaca, tamaatiuucua pueyapue, tamaatia rupaaca pocuajacahuaj, tamaatia jiyacajinia quijiaca pueyano.

¹⁶ Cuno puereeta niquishano Casaa quia niquishanoni, na diez nacajaanio, nojoriiri cuno Paanatu niquiniu paniyaquiniutianiya tojetaarucujanaa. Na cartetunutaniyari. Tojetaarucujanaa juhuaasu na tiujiatunutaniyari. Nojoriiri cuno Paanatu miaquenutaniya. Na nuhuaji, na nucuha cati-jiatunutaniyari. ¹⁷ Pueyasojuanaacuajaari cuno Paanatu paraa niishi-tiniutianiya naa nojori miiniuria cuno Paanatutej, taa Pueyaso paniya na miishaanuracujani. Naajuhua, Pueyasoori cuno diez jiyaniijianucua

niishiriojotenutaniya jatiqúi. Naacuajitij, cuno jiyaniijianucuaari roojo-toonutaniya nojori cuara cumaquíria cuno puereeta niquishano Casaa puetunu nojori cumaacatajanaa. Naacuajitij, Pueyaso panishanoori tohuateesaanutaniya taa na sequequiaaricuaani. ¹⁸ Naajuhua, cuno Paanatu quia niquishanoni, nojuajaari cuno puereetuca Roma tiacacuaa, miriqui sequeshiya Babiloniatani. Nojuajaari puetunu mijiria jiyaniijianucujanaa tojitiquiaa nojuaja.

18

Babilonia tiaca catetanujiniji pohuatasano

¹ Naa Pueyaso seru niqúitiniú nuhuaji janiyatej, janiyari socua tamonu Pueyaso seru niqúiríi jiyocuaaanuji roseyanoni. Jiyano hua cumaacaracaari quiriquiaa. Na shacantuuca cumaacaari jiya cuhuatariquiaa. ² Jiyocuaaanuji na rupaa paaretaree jiyano huari. Seetanujuanaa miishocoriquiano na sequesano quiniuucua, nojuajaari juhua tariuua miishano na nacatariquiaa:

—¡Tari saniitiosaaree Babilonia tiaca! ¡Juhua niyarequetasaareeri cuno puereetuca tiaca! Samaruhua quiquíora jatanishaaree quiaríjia sanini-uuríjia. Naaquíya quiquíora quiniutianiyajaariuhua, puetunu pueya soosano pueresano jaacuatujuaca casaajanaa quiquíorano. ³ Puetunu jiyacajinijiniojuanaa pueyari sapojonuusaaquíari Babilonia tiacajinijinio niishitiojosanota, juhujaniya sacuaraatia miijíaca nojori quiniuriajuhua, juhua mashaaseca. Naajuhua, jiyaca jiyaniijianucuaari Babilonia tiacajinia sacuaraatia miijiosano miijioquiaajuhua, cuno paanatu shiniujíuni-uucua nojori. Babilonia tiacajinia quiniua pueyari puetunu na panishano casamijianaa masejoquíaa puetunu jiyacajinijianaa, saaja tama nojori cuaqueyajaaja nojori shuquíritiniuria. Naacuajitij, cumaneecara na casami niqúitiojonuujuaca pueyari jiyano hua cumaneecara pueya.

⁴ Na nuhuaji, janiyari tamonu rupaa tojiríi jiyocuaaanujini. Babilonia tiacajinia quiniua Pueyaso pueya sequereeri:

—¡Cua muerasunaa, cuno tiacajiniji nia quíojore, niaa maríqui sesa mi-ijíacara quirohuari, cuno sesa miijíaca nia cojiniuucua! Nojoríjiniji nia carajere, niaa maríqui puetunu nojoritíajanaa cojiritíasaare naquíya mi-íniuri. Nojoricuaajaari quera saniitioshiya. ⁵ Cuno tiacajinia sacuaraatia miishanoori puera jiyano hua caneyaree. Juhua tuhuananuuri maashiyaree jiyocuaaanura. Pueyasocuaajaari sacuaraatia nojori miijiosano niishiya. Majaari socua tari na naata rejeretanu. ⁶ Babilonia cuara namishaaria taa naquíya na miijioquíaa tamasacuaani. ¡Nojuaja cuara saniitíonu caminiujíushaaria saniniujíja, sesa na miíniuucua tamasaca! Babiloniaari juhua pueya raatejoquíari sacuaraatia na niishishano, sesa miijíaca nojori quiniuria juhua nojuajuhua. Cunora, nojuaja cuara puetunu Pueyaso juaaquíacajanaa raatesaaria, tama na suhuocojiníajaaja mishinishanoni.

⁷ Naatej, taa tama na cuaqueyajaaja na shuquíritíquiaa sacuaraatia na miishacarícuani, saniniujíja cuara naa jiyano hua miitíasaariajuhua. ¡Jiyano hua tama na cuaqueyajaaja tímítíaja na quiniuucua juhua, cuara saniitíosaaria! Nojuajaari tama sequequiaajaacujia: “Janiyari niya ca-jiya shuquíriaatani, cumaacaraca maaji, pueya tojishano jiyaniíjia. Jani-yari maja mashíquioni. Majaari quenaaja cua taraajenu quiniutianíya”.

⁸ Cunora, niqúiriyatu jucajiníaja, cuno Paanatuuri jiyano hua taraatia miitíasaanutaniya. Jiyacarítij, cusonuunuuri quiniutianíya, naquíya mi-íniú, miiaajenujuhua. Jiyacari catíjíasaanutaniyajaariuhua. Jiyano hua cumaacaraca Jiyaniíjia Pueyaso quiniuucua, nojuajaari naa saniitíonu-taniya cuno Paanatu.

⁹ Mijiria jiyaniijianucuaari sacuaraatia miiniuria cojiquiaa cuno Paanatu-cuaja, tama nojori cuaqueyajaaja nojori shuquiritiniuria. Cunora, nojoriiri jiyanoehua nujuquetunutaniya cuno Paanatu jaara saniitiosaare. Nojori niquishacari najaca tacaano jiya cajiniocua, Babilonia tiaca catesacari, nojoriiri nocua sapiyonuunutaniya. ¹⁰ Nojoriiri na puerenuta na shootianutaniya tucuaaanuji, nojori mariqui saniitiosaarejaariuhuj. Nojoriiri jiyacari naa sequenutaniya Babilonia tiaca:

—¡Juhuej! ¡Quiaa taraatia miishiya tiaca maniniunaa! ¡Quiaari jiyanoehua cumaacaraca quijia juucua Babiloniana! ¡Quiaari canashiyaquiji saniitiosaare!

¹¹ Puetunu jiyacajiniajanaa, cumaneecara na casami niqutiojonaa pueyari Babilonia tiacaacua nujuquetunutaniya. Nojoriiri jiyanoehua taraatia quiniutianiya nojori niishishacari, nojoriitucua tee na casami niqutiojore na cumaneecarani. ¹² Tucuaaanuji Babilonia tiacajiniara nojori nitiasano casami quijiaari nio: oro, plata, jiyanoehua panishano saijjuhuaj, noturu shipinijosano sainio. Nitiasaaquiaajaariuhua maniniuqui toqueya linojiniji, sedajiniji toqueya, shaarugue toqueyajuhaaj, juhua jiyaniijia cushishano, naatuque toqueyano. Nitiasaaquiaajaariuhua puetunu tamaatia shanohua jaanujua juhuana raquiquia, elefante quiaajiniji shipinijosano casamijjuhuaj, shanohua naanajiniji shipinijosano casaminio. Nitiasaaquiaajaariuhua broncejiniji shipinijosano casami, cumueeca casaajiniji shipinijosano casamijjuhuaj, shanohua mármol saajajiniji shipinijosano casaminio. ¹³ Naajuhuj, nio shanohua jaanujua casami: canela, muesu nunacuhua, catijasocoriquiano shanohua jaanujua casaa, mirrajuhuaj, cuaqueyacu shuquuijutiasano shanohua jaanutajanio. Nitiasaaquiaajaariuhua jereca uva caaca, shiyocua, maninia cashojuahuaj, trigo jajaunio. Nitiasaaquiaajaariuhua casami niyotesano seya, borregohua, caballohua, caballohua jayotasocoriquiano shipinijosano casaanio, cumaneecara niqutiojosocoriquiano pueyajuhaaj seya nojori quiniuria. ¹⁴ Jiyacaritij, Babilonia tiacaari naa sequesaanutaniya:

—¡Majaari socua quia mioonu quiniutianiya jiyanoehua quia maniniucuasano naana jajau, jiyanoehua quioojia jiaatiasano nocuani! ¡Puetunu quia timitiasano casaajanaari maja tari na quiniu quiniutianiya quiara, shanohua niquishano casami, jiyanoehua cumaneecata quia masesano casaminio!

¹⁵ Puetunu cuno casami niqutiojonaa pueyajanaari jiyanoehua casamiriaca quia Babilonia tiacajinia quiniaa masejonuucua nojori casami. Maja nojori saniitiosaanurajuhaaj, cuno nojoriiri tucuaaanuji na puerenuta nocua nujuquetunutaniya. Nojoriiri na sapuenuta naa na sohuarejotanuniya:

¹⁶ —¡Juhuej! ¡Babiloniaari tiaca maniniu quijia juucua! Jiyanoehua shanohua niquishano quijiaari, taa casamiriaca maajicuaani, na cushishacari na maniniushitiaja casaa. Naa shanohua niquishiyari juhua maaji linojiniji cohuajaque toqueya cushitishano, shaarugue toqueya, naatuque toqueyano juhua jiyaniijia cushishano, orojiniji shipinijosano casaata na maniniushishacarijuhuaj, noturu shipinijosano saitiajuhuaj, shanohua niquishano saitanio. ¹⁷ ¡Jiyanoehua queraatia puetunu na jiatiasano casamijanaari canashiyaquiji catijiasaaree juhua sohuanatuu!

Puetunu pueyajanaa, canapueete shoniniacu caminijinia poonijionaa na cumaneecaracajani, nojoriiri tucuaaanuji shootiariquiaa Babilonia tiaca catetasacari. Naa shootiaturiquiaajaariuhua casami jaqueroojuaca tamaquicua tiaca tacatajajiniaqueya, ruconaa pueya, buquejinia

poonijionaa pueyajuhua, nojori camarucuanio. Puetunu cuno pojorijianaari tucuacaanuji shootiariquiaa Babilonia tiaca catetasacari. ¹⁸Nojori niquishacari najaca nujuaano jiya cajiniocuara, nojoriiri naa sariyocuatree:

—¿Socua tamonu tiacateeri quiya juhua cuno Babilonia tiacajuhua? ¡Shaaqui!

¹⁹Jiyanohua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri naa sariyocuatree:

—¡Juhuej! ¡Babiloniaari tiaca maniniu quiija juucua! ¡Puetunu shoniniacu caminiajinia buque jiitianaajanaari jiyanohua casamiriaca quiya, jiyanohua casamiriaca Babilonia quiniuucua! ¡Quiarijia saniniuujia, canashiyaquiji puetunujuanaari shaajasaaree!

²⁰Jiyacaritij, Pueyaso seruuri naa nacaree:

—¡Nia shuquiriri, jiyocuaaanu quijiacanaa! ¡Babilonia saniitiosaanuucua nia timiquiore, Pueyaso saquiriojosano pueyanaa, Jiyanijia Jesu jiyaramiquishano pueyajuhua, Pueyaso sequesano caminiujiuniaanio! ¡Pueyasocujaari niaacua namirii Babilonia!

²¹Jiyacaritij, cumueeca Pueyaso seruuri jiyanohua puereetuca saajia paree, juhua trigo jajau jacanojotaja saajia. Shoniniacu caminiajinia na jatasacari, naa sequereeri:

—¡Taa cua jatasano saajia shaajemaa shoniniacu caminia queronijiniacuaani, quiaari naa shaajasaanutaniya canashiyaquijiuhua, Babilonia tiacanaa! ¡Majaari socua quia niquishaanu quiniutianiya! ²²¡Quia nuucuaari tojetaarucujanaa sanaaca quiniutianiya! ¡Majaari arpa taquiniojanu tojishaanu quiniutianiya socua, turequenaco jonenenuujuhua, trompeta jonenenuunio! ¡Puetunu tamaatia poonijosano niishijiaa juaashiquiaraca pueyajanaari shaajasaanutaniyajuhua! ¡Majaari que-naaja niquiriyatu cureenu quiniutianiya quia quishaqui! ¡Naajuhua, majaari socua riiquiniuniu tojishaanu quiniutianiya! ²³¡Majaari que-naaja niquiriyatu samaritiu niquishaanu quiniutianiya noshiyano quia quishaqui! ¡Naajuhua, majaari camishacari queranacunuunu cojuatunenu tojishaanu quiniutianiya socua! ¡Quiaari naa saniitiosaareequij, jiyanohua cumaacaraca quia casami niquitiojanaa pueya quiniuucua puetunu jiycajiniajanaa! ¡Naajuhua, quiaari puetunu jiyacajinia quijiaca pueyajanaa shimiojana, sapojosano nojori quiniuria puetunu sacuaraatia casaa quia miijosanotajanaa! ²⁴¡Quiarijia saniniuujia, quiocua tuutiashiyari pueyara Pueyaso sequesano caminiujiuniaa puecoosaanu, Pueyaso saquiriojosano pueya puecoosaanujuhua, puetunu jiyacajiniajanaa pueya puecoosaa-nunio!

19

¹Naa cua tojinu nuhuajitij, janiyari jiyocuaaanu tojirii queraatia rupacani. Naa sequeturiquiaa jiyanohuari:

—¡Jiyanohua maninia pa Pueyaso! ¡Nojuaja pa shuquiritiare! ¡Nojuacujaari pa Jiyanoojia! ¡Nojuajaari jiyanohua shacantuuca, tojetaarucujanaa maninia miijia na quiniuucua! ¡Puetunu cumaacaracajaariuhua! ²¡Maninia na niishiniuucua puetunu cuno Paanatu miishano sacuaraatiajanaa, nojuajaari maninia na saniitioree! ¡Cuno Paanatuuri jiyaca quijiaca pueya sesoquiaari tojetaarucujanaa, sacuaraatia na miijosano na niishitiojosana! ¡Pueyasoori cunora na saniitioree! ¡Naajuhua, Babilonia puecoonuucua Pueyaso tojtiajaca pueya, Pueyasoori na namiriijuhua!

³ Jiyocuacaanuji rupaaca cua tojishanoni, nojoriiri naa sequero-huacuhuaaj:

—¡Jiyanohua maninia pa Pueyaso! ¡Nojuaja pa timitiariquia pueyaracaanu!
¡Pueyaracaanu cuno Paanatu saniitiosacari, majaari na najaca turetano
quiniutianiya quenaaja!

⁴ Cuno veinticuatro niishijiaa jiyaniijianucua, cuno cuatro saminio casaajuhuaaj, nojoriiri jiyacari jiyocuara jacamaturee Pueyasooacara. Nojoriiri naa timitiaree Pueyaso, cante na shacantuca cumaacajinia cajiriquiaacuajani. Nojoriiri naa na sequeturiquiaa:

—¡Cuaara naa quiiriatej! ¡Pa Jiyaniijia cuaara timitiasaaria pueyaracaanu!

⁵ Jiyacaritij, tamonu rupaari tojishaaree Pueyaso cajishaquijijianaa. Naa sequeriquiaari:

—¡Pa Pueyaso nia timitiariquia, puetunu na tojtiajaca pueyanaa! ¡Nojuaja nia shuquiritiare, tojishano pueyanaa, niajanijuhuaaj, tojishoo pueyanaa!

Borrego Niquiojua camishocoriquiano maaji maniniushishacari

⁶ Jiyacaritij, janiyari queraatia pueya tojirii jiyanohua nacaanoni, juhua pueretuuca sararajua, juhua miacana majacunujuhuaaj. Puetunu nojori-jianaari naa sequeriquiaa:

—¡Jiyanohua maninia pa Jiyaniijia Pueyaso! ¡Nojuaja pa timitiariquia pueyaracaanu! ¡Nojuacuajaari Jiyaniijiajanaa! ¡Puetunu cumaacaracajanaajuhuaaj! ⁷ ¡Pa shuquiriri! ¡Pa timiri! ¡Quiarijiacuajaari Borrego Niquiojua caminiu juuca, pueyaracaanu na saquiriojosano pueya rupuenura nojuaja! ¡Cunora, nojuaja pa timitiare jiyanohua! Necoranoori tari maniniushirii na caminiuria. ⁸ Maniniuqui lino toque cushitishaareeri, cohuajaque shacantuque. Necoranoni, nojoricuajaari puetunu nocua tiuujia pueyajanaa. Naajuhuaaj, cuno cohuajaque na toqueni, cunocujaari puetunu maninia nojori miijosanojuanaa.

⁹ Pueyaso seruuri jiyacari cua sequeree:

—Quia naajiotare nio: “Shuquiriaatia quiijiaa cutaraari noo pojori, canapete Borrego Niquiojua camishacari queranacujuajiniara masuusanoni”.
Naa cua sequeree socuaari:

—Cua sequesanoni, cunoori seetanu Pueyaso rupaajanaa.

¹⁰ Jiyacaritij, janiyari Pueyaso seruucuaa mojoquetareeni, juhua Pueyasooacara, nojuaja cua timitianura juucua. Cua sequequee saajaari:

—¡Maja pueyanonaa! ¡Maja naa quia miiniu! Janiyari nareja Pueyaso seruni taa quiajanijacuuaani, juhua quia tapueyocuaajuhuaaj, noo pojori canapete pa Jiyaniijia Jesujiniji pahuatanu tarinitiaashijiacani. ¡Pueyasooacara quia mojoquetare cutara, quia timitianura nojuaja! Puetunu Jesujiniji pahuatasanojuanaani, cunoori Pueyaso Sohuanu niishitishano na pahuatanaa, janiya, niajanijuhuaaj.

Cohuajohuana caballo nijinia cajiniajiniji pahuatasano

¹¹ Na nuhuaji, janiyari jiyocuacaanu Pueyaso quiquio niquirii tariucua ritatananoni. Janiyari tii niquirii cohuajohuana caballoni. Na nijinia cajiniari caapiqui sesacaraca quiiriquiaa. Nioori na sesaca: “Na sequesano miijia”, “Seetanu sequejajanaa”. Naari na sesaca. Tojetaarucuaajanaa maninia miijia na quiniucua, puetunu niishijiajanaajuhuaaj, nojuajaari seetanujanaa maninia saniitiojua sesa miijiaa. Naajuhuaaj, majaari najuhuaa na miaquetojonu na paraata. ¹² Puetunu casaajanaa niquijia na quiniucua, na namijaari juhua mani rimianacuyano niqushaariquiaa. Jiyaniijianucuarano shipinijosano nacaqueya pasacoriquiaa na nacaacuuaari. Cunoori

seetanujuanaa Jiyaniijijanaa na quiniuucua. Tamonu na sesaari naajio-
 tasano quiriquiaajuhuj. Cuno sesaari tama na niishishanojuaja cutara.
 13 Na toqueeri nanacatuque quiriquiaa. Nojuajaari tariucuacaanu nio
 sesaraca quijiacuaja, “Pueyaso Rupaa”. 14 Jiyocuacaanu nata quiniaa na
 soldadohuari na nuhuaji sacuriquiaa. Puetunu nojorijianaari cohuajohua-
 naca caballohua nijinia cajituriquiaa. Naajuhuj, nojoriiri linojiniji cohua-
 jaquijasano toqueyaraca quiriquiaa, jyanohua cohuajaqueya tojetaaru-
 cuajanaa. 15 Nojori Jiyaniijijanaa rupaamaji, nijiniaquetucujaja mueruuri
 puereeta mueranacuriquiaa. Cunoori puetunu mijiria jiyacajiniajanaa na
 tojtiaashijiaa na puetujutajara. Nojuajaari jiyacari nojori Jiyaniijijanaa
 quiniutianiya, nojori na jitianura jyanohua na cumaacata. Puetunu
 cumaacaracajanaa Pueyaso juaaquiacaata nojori saniitionutaniyari, naatej,
 taa uva rapijoshiya na caaca shoonuracuaani. 16 Na tucuaque toqueecua,
 na ruhuajacuucujuhuj, naa naajiotasanoori quiriquiaa: “Jiyaniijianucua
 Jiyaniijijanaa”, “Camarucua Camarnujuanaa”.

17 Na nuhuaji, janiyari tamonu Pueyaso seru niquirii pananuucua nu-
 juaanoni. Nojuajaari puetunu jiya cajiniocua jaacuatujuaca casaajanaa
 jiiquionuuriquiaa jyanohua, teyano jaacuatujuacate shu miojonuujua-
 cacujani. Naa cuno jaacuatujuaca casa sequeriquiaari:

—iMiji, niya nia rerejosee! ¡Pueyasoori nia queranacutenutaniya!

18 ¡Nojuajaari queraatia shu nia mianuutenutaniya! ¡Cuno shuuri
 jiyaca jiyaniijianucua shu, soldadohua camarucua shu, jyanohua
 cumueeca puereyaquiijaca shu, caballohua shu, na nijinia cajituniaa
 pueya shujiuhuj! ¡Camarucuaaju pueya shuuri quiniutianiyajuhuj,
 poonijjotesano pueya shu, tojishoo pueya shujiuhuj, tojishano pueya
 shunio!

19 Jiyacaritij, janiyari cuno puereeta niquishano Casaa niquiriini, mijiria
 jiyaca jiyaniijianucuanio, puetunu nojori soldadohuatajanaa. Puetunu
 nojorijianaari tariucua rerejonu quiriquiaa na miaquetoojonura cohuajo-
 huana caballo nijinia cajianota, nata quiniaa na soldadohuatanio. 20 Cuno
 na naca pishano cushiriinohua puereeta niquishano Casaaari jiyacari
 quiasaaree, narta puereeta niquishano Casaanio. Nojuajaari cumaacaraca
 quiriquiaacuaja mijiria quiijaca pueya na sapojonura na cumaacata na mi-
 ishanota, nojori na tiutiniuria na naca pishano cushiriinohua Casaacua.
 Naa na sapojonuucua mijiria quiijaca pueyatej, nojoriiri nojori cuaqueya
 tarinitiaquiiaari na naca pishano cushiriinohua Casaa sesa naajiotasaa-
 nura nojoriicua. Naajuhuj, nojoriiri juhua cuno puereeta niquishano
 shipinishano Casaacuara mojqetacojua quiquiaari juhua Pueyasocuara.
 Jiyacaritij, cuno caapiqui puereeta niquishano Casaari azufreta noshiyano
 mani quiquiojinia quejoosaaree saminiucujaja. Nojoriiri tii pueyaracaanu
 naquiya miishaanutaniya. 21 Puetunu nojoritia quiniaajanaari saniniuujja
 puecoosaaree nijiniaquetucujaja mueruuta, teyanota cohuajohuana caballo
 nijinia cajiyano rupaamaji mueranacuriquiaacuajani. Puetunu jiya cajin-
 iocua jaacuatujuaca casaajanaari nojori shu tooquioree jyanohua.

20

Mil marijiaa Satanás morosaanujiniji pohuatasano

1 Na nuhuaji, janiyari tamonu Pueyaso seru niquirii jiyocuacaanuji
 roseyanoni. Puequeetuujja raa riatataja patariquiaari, puereetiuyocua
 cumayocua shipinishano casaanio, Pueyaso Paraca na morotajara.
 2 Pueyaso seruuri cuno naatuhuana Naaqueru juhua cohuaniquia
 niquishano quiasee. Na morojoreeri mil marijiaa. Nojuacuajaari cuno

tariucuacaanu Soconu, samaruhua jiyaniijajanaatuhuj. Na sesaari “Satanás”. ³ Maninia na morojonu nuhuaji, Pueyaso seruuri puequeetuuj raama na jartaree. Raa tiootiu mishiquiorohuari. Tiootiu rupanacureeri, maja na riatasaanura. Sesaacaari naa mishiquiosaareequij mijiria quijiaca pueya na sapojyaquiniucuaaji cuaara na shocojorejaatijia mil marijia. Cuno mil marijia jaara na shocojore, rupaquijiara cartesaanutaniuhuari na saniitiosaanuharajanaa cutara.

⁴ Janiyari jiyacari queraatia pueya niquirii jiyaniijia cajitiucujinia cajitiyanoni. Nojoriiri nequesoreenaara Pueyaso jiyatesano pueya quiriquiaa, mijiria quijiaca nojori jitianura. Janiyari noo pojori sohuanuhua niquiriijiaaniuhuj, canapete nacaresaaquiaaricujani nojori poojotanuucua pa Jiyaniijia Jesujiniji, Pueyaso rupaa tojtijajaca nojori quiniucujajuhua. Nojori cutaraari cuno na naca pishano cushiriinohua Casaacura jacamatiyuacquiaari tojetaarucujajanaa, juhua nojuaja niquishano shipinishano Casaacuarajuhua. Naajuhua, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. ¡Cua niquishacari, nojoriiri cua niquiara samiiticoquee, jiyaniijianucuaa nojori jiyatesaanura! Mil marijaari nojori shocojore, jiyaniijianucua nojori quishacari pa Jiyaniijia. ⁵ Saniniuuja, narta macunucuaari maja na samiitianijiosaanu quiriquiaa cuno mil marijia cuaara shocojorejaatijia. Nio macunucua samiitianijiosacari cua niquishanoni, cunoori coteenujuanaa Pueyaso samiitianijiosacari pueya. ⁶ Shuquiriatia quijiaca cutaraari noo pojori, canapue Pueyaso samiitianijionutaniya coteenujuanaacujani. Nojoriiri jiyacari tojetaarucujajanaa maninia quijiacara jatanishaanutaniya pueyaracaanu rishijia nojori quiniuria. Naacuajitij, Pueyaso ruuretajaca pueya jaara puetunu shaajasaarejanaa, jiyacari majaari Pueyaso pueya pacutenu quiniutianihua cusonu. Saniniuuja, nojoriiri pueyaracaanu shamaatia timitianutaniya Pueyaso, Cristonio. Naajuhua, nojoriiri jiyaniijianucua quiniutaniya Cristota, mijiria quijiaca nojori jittiasacari cuno mil marijia.

Sesaaca saniitiosacarijanaa cutara

⁷ Cuno mil marijia shocojonu nuhuaji, Satanásri tohuatesaanutaniuhua na nujuatesaquiji. ⁸ Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog pueya, Magog pueyano. Nojori na sapojonuta, nojuajaari puetunu jiyaca jiyaniijianucujajanaa rerejotenutaniya, puetunu nojori soldadohuatajanaa, nojori miaquetoojonura pa Jiyaniijia, puetunu na pueyatajanaano. Nojori soldadohuari jiyanohua queraatia pueya quiniutaniya, juhua shoniniacu caminia shuriquioco paajia jaaquia. Majaari na naata serojosaanu.

⁹ Cua niquishacari, tojetaarucujajanaa jiyanohua queraatia pueyari nijoriquiaa. Jiya pueturiquiaa puetunujuanaari, juhua tereya nojori quiniucua. Nojoriiri Pueyaso panishano tiaca cosejoree, cuno tiaca shocua quijiaca Pueyaso pueyano. Jiyacaritij, maniiri jiyocuaaanuji tinishaare nojoriicua. Puetunu cuno pueyajanaari catijiasaaree tojetaarucujajanaa. ¹⁰ Satanás, cante puetunu cuno pueyajanaa sapojoreecujani, nojuajaari caminiajinia jatasaree tee cuniqui mani noshiya azufretacujani. Tariucuacaanu tii jaqueroosaquiaaricujajani na naca pishano cushiriinohua Casaa, narta puereeta niquishano Casaanio. Cunocuaari mijiria quijiaca pueya sapojouquiaaricujaja, na naca cushiriinohua Casaacura jacamatujuaca nojori quiniuria. Nojoriiri tii miitiasaanutaniya tojetaarucujajanaa pueyaracaanura, juuca, niucuanio.

Macunucua nequesoreesacari cohuaja cajitiu tajoji

¹¹ Na nuhuaji, janiyari Jiyaniijajanaa cohuaja puereetuuca cajitiu niquiriini, tii cajinianio. Na niquiara, jiyari puetunu shaajequeejanaa, jiya cajiniocuanio. Majaari socua na niquishaanu quiriouhua. ¹² Jiyacaritij, janiyari puetunu macunucujanaa niquirii nujuatiuyano cuno cohuaja cajitiu tacojini; jiyaniijianucua, tojishoo quijiaca pueyanio. Jiyacaritij, na cohuaja cajitiujinia cajiniaari na nequesoreetuneecca riataqueree, socua tamonu nequesoreetuneeenio. Cuno nequesoreetuneejinia naajiotasano quiyacuaajaari Pueyaso saquirojosano pueya sesaca, pueyaracaanu rishijiaca nojori quiniuria. Puetunu cuno tariucuaaanu macunucujanaari nequesoreesaaree puetunu nojori miishanoinijijianaa, taa cuno nequesoreetuneecejinia na naajiotasaaquiaaricujani. ¹³ Cua niquiara, macunucua quiquiojinia racatasano puetunu cusonuuno sohanuahuajanaari na cuaqueya rupeetsaarahua, shoniniacu caminiajinia moquecono, jiyacua moquecononio. Puetunu nojorijianaari nequesoreesaaree taa miijiaa nojori quiquiaaricujani. ¹⁴ Na nuhuaji, Cusojuana, macunucua Quiquiojuhuaj, nojoriiri mani noshiyano caminiajinia jaqueroosaaree. Canapute cuno mani noshiyano caminiajinia quejoosocoriquiano pueyacuajani, nojoriiri cusonuunu pacuteriquianocuaaja. ¹⁵ Naacuajitij, canapute Pueyaso samiitianijosocoriquianohua nequesoreetuneejinia naajiotasoo quiriquiaani, nojoriiri mani noshiyano caminiajinia quejoosaaree pueyaracaanura.

21

Quiarinio jiya cajiniocujiniji pahuatasano, quiarinio jiyajinijinio

¹ Na nuhuaji, janiyari quiarinio jiya cajiniocua niquiriini, quiarinio jiyanio. Coteenujanaa jiya cajiniocuaari tari shaajasano quiriquiaa, jiyanio. Naajuhuaaj, majaari shoniniacu caminia quiniu quiriquiaa tari. ² Janiyari jiyacari quiarinio Jerusalén tiaca niquirii Pueyaso Quishaquiji roseyanoni. Tojetaarucujanaa shanohua maniniushitishano quiriquiaari, juhua neyacarano camishocoriquiano niyacoo. ³ Naajuhuaaj, janiyari Jiyaniijajanaa cajitiujiniji tojiriri jiyanohua nacanuni. Naa sequeriquiaari:

—¡Pueyaso Quiquioori pueya tajinia quiya tari! ¡Nojuajanaari nojoritia quiniutianiya! ¡Nojoriiri na pueya quiniutianiyajuhuaaj! ¡Nojuajaari nojori cojiniutianiya, nojori Jiyaniijajanaa na quiniuria, maninia na jiitianura nojori! ⁴ ¡Nojuajaari puetunu nojori namijiaacajanaa tuujunutaniya! ¡Jiyacaritij, majaari pueya niishiniu quiniutianiya shaajenu, sapuenu, taraajenu, nootunenunio! ¡Puetunu cuno taraatia miiniucuaajaari tari shaajasano quiriquiaa!

⁵ Na nuhuaji, Jiyaniijajanaa cajitiujinia cajiniaari na sequeree:

—¡Cua tojiri! ¡Janiyari quiariniora miijia puetunu casaajanaani!

Cua sequerejaariuhuaaj:

—Cua sequesano quia naajiotare. Seetanujanaari cua sequesano. Janiyacuajaari cua sequesano tohuateequiaa pueyaracaanuni.

⁶ Cua sequerohuariuhuaaj:

—Cua sequesano cua miishocoriquianoni, janiyari tari na tucuateree miiniuni. Janiyari quiijajuhuanani. Janiyari pueyaracaanu quiriquianojuhuaaj. Janiyari puetunu casaajanaa coretanijiani, na shaajajuhuaaj. Cante jiyamueyani, janiyari pueyaracaanu pacartaja samo nacajiniji na raatenu-taniyani, na naatanuhuaa. Cuno samiitianijia mohuacani, cunoori cua Sohanucuaaja. Janiyari nareja na niqutioquiaani. Majaari na sami cua masenu quiquiaa na ratuna. ⁷ Cante puetunu casaajanaa rejeretaja quijiani, cua tojjia na quiniucua, nojuajaari puetunu cua jiitiasanojuanaa

jiitiana quiniutianiya. Nera, janiyari na Pueyaso quiniutianiyani. Nojuajaari quiyanu quiniutianiyacujua. ⁸ Sesa pueya saniniuujia, nojoriiri puetunu quejoosaariquianojuanaa azufreta noshiyano mani caminiajinia. Naa quejoosaanutaniyari nio pojori: Pueyaso tojtiaashijiaca pueya, puere-
 jaca nojori quiniuucua, Pueyaso Rupaacua tiyashijiaca, soosano pueya tama sesa nojori miiniuucujaja seseno, pueya moojuaca, na camishoo maajipohua numuetucunuujua, shimiacuri, shipinijosano casaacuara jacamatujuaca juhua Pueyasooacara, puetunu cuaracashijionuujua pueya-janaanio. Puetunu cuno pojorijianaa jaara nequesoreesaare, nojoriiri puetunu taanuusaanutaniyajanaa Pueyaso shuriucujaji. Nojoriiri mani noshiyano caminiajinia quejoosaanutaniya, pueyaracaanu naquiya nojori miishaanura tii. Cunocujajaari sequeshiya, “pueya pacutesacariuhua cunu”.

Quiarinio Jerusalén tiacajiniji pahuatasano

⁹ Janiyacujajaari tari nia pahuataree cuno siete Pueyaso seyajinijini, canapueete siete miacojua patootanaa quiquiaaricujani, mishaja Pueyaso saniitotajata. Niquiriyatu nojorijinijinioori cucua nimiaa. Nojuajaari cua seqesee:

—Miji. Quia niquitiriiria Borrego Niquiojua niquiorano. Nojuacujajaari pa Jiyaniijia pueya, na quiquiojariuhuj.

¹⁰ Jiyacaritij, nojuajaari cua sohanu jiyataaree jiyanojua puereetucua jiyaconaja tuhananuucua. Tiji cua niquitiri cunu puereetucua quiarinio Jerusalén tiacaari, Pueyaso shuriucujaji roseyano. Tojetaarucujajanaa shanohua maniniushitishano quiquiaari. ¹¹ Nenecuariquiaari Pueyaso shacantucua cumaacata. Na nenecuanuuri juhua jiyanojua panishano saajia nenecuanu quiquiaa, juhua jasp saajia. Maatia niquishiyari na tamajiria, juhua cohujaji motiiojio. ¹² Cuno tiaca shocua matakaari jiyanojua puereetucua quiquiaa, jiyaconajajuhuj. Tiaca shocua matakaari doce tiotiuhuaraca quiquiaa. Niquiriyatu Pueyaso seruuri puetunu cuno tiotiujinijijianaa nujuaturiquiaa. Naajuhuj, supuetana Israel doce niquiohuacujajinio supueno doce pueyapue sesacaari puetunu cuno tiotiuhuaracujajanaa naajiotasano quiquiaa. ¹³ Jiuujianaraca tiotiuhuari pananu muetasamajiria quiquiaa, cuno tiaca matakaacua. Socua jiuujianaraca tiotiuhuari quiquiaa pananu muetasamaji miaquetajara. Naajuhuj, socua jiuujianaraca tiotiuhuari pananu muetasamaji muenecara quiquiaa. Socua jiuujianaraca tiotiuhuari quiquiaa pananu tiuquishocora. ¹⁴ Cuno tiaca matakaari doce puereetujuaaca saicua nujuaturiquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiquiaa.

¹⁵ Cuno Pueyaso seru cuata pocojoriquiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiotiuhua, tiaca shocua matakaanio. ¹⁶ Cuno tiacaari jiyanojua tucuhua quiquiaa. Na cajiniocuaari mariyata juhua na tucuhua quiquiaajuhuj. Maninia tiasano quiquiaari, maja rimiajata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiquiaari na tucuhua, na jiyaconaja, na cajiniocuanio. ¹⁷ Na nuhuaji, tiaca mataka shanacujureejaariuhuj. Setenta y cinco metro jiiitariquiaari. Pueyaso seru shanacujutaja tucaneeri mariyata juhua mijiria pueyano shanacujutaja quiquiaa. ¹⁸ Cuno tiaca matakaari puetunu jaspe saijinijijianaa shipinishano quiquiaa. Tiacari saniniuujia saaja orojiniji shipinishano quiquiaa, maja quenaaja

tamonu casaata cojitishano. Naacujatij, cuno oroori juhua cohujaja motiquio quiriquiaa. Maatia niqushiyari na tamajiria. ¹⁹ Cuno mataca nujuataja doce sairi queraatia tamaatiujiaaca shanohua niqushano saitia maniniushitishano quiriquiaa. Cuno mataca nujuataja doce saijiniinjioni, coteenu saajiaari jaspe saitia maniniushitishano quiriquiaa. Jaspe sairi neeruua cojitishano pocojuanaqueta. Segundo saajiaari zafiro saitia maniniushitishano quiriquiaa. Zafiro sairi nentujuaaca naata. Tercero saajiaari ágata saitia maniniushitishano quiriquiaa. Ágata sairi tejatujuaaca neeruua. Cuarto saajiaari neeruua esmeralda saitia maniniushitishano quiriquiaa. ²⁰ Quinto saajiaari ónice saitia maniniushitishano quiriquiaa. Ónice sairi pocojuanaque naatuua cojitishano. Sexto saajiaari naatuua cornalina saitia maniniushitishano quiriquiaa. Séptimo saajiaari crisólito saitia maniniushitishano quiriquiaa. Crisólito sairi tijaaca. Octavo saajiaari berilo saitia maniniushitishano quiriquiaa. Berilo sairi neerujuaaca juhua naashi. Noveno saajiaari topacio saitia maniniushitishano quiriquiaa. Topacio sairi jiyanhua pocojuanaque. Décimo saajiaari crisoprasa saitia maniniushitishano quiriquiaa. Crisoprasa sairi jiyanhua neerujuaaca. Undécimo saajiaari jacinto saitia maniniushitishano quiriquiaa. Jacinto sairi jariya naata naatuua. Duodécimo saajiaari jiyanhua nentuuca amatista saitia maniniushitishano quiriquiaa. Puetunu cuno saijianaari jiyanhua shanohua sai, shacantujuaaca. ²¹ Tiaca shocua mataca doce tootihuari noturu shipinijosano saijiniji shipinijosano quiriquiaa. Niquiriyatu tootiuuri niquiriyatu noturu saajianiniji shipinishano quiriquiaa. Naa shipinijosano quiriquiaari puetunu cuno doce tootihuajanaa. Tiaca nuucuacaari tojetaarucujanaa orojiniji shipinishano quiriquiaa. Jiyanhua maninia cuno oro quiniucua, Pueyaso shacantuuaari na tohuariquiriquiaa, juhua motiquio cohujajo na quiniucua.

²² Cuno tiacajinia, majaari cua niquniu quirii Pueyaso Quishaqui, ti pa rupenura nojuaja. Cuniqi, majaari socua Pueyaso Secojhua tia panishaanu. Puetunu cumaacarajanaa Pueyasojuanaari tii quiyacuaja, Borrego Niquiojuajuhua. Puetunu cuno tiacajanaari nojori quishaquicuaja, pueyaracaanu nojori rupuesano pa quiniuria. ²³ Cuno tiacaari maja na panini pananu na cuhuatariquiano, racajuhua. Pueyaso shacantuua cumaacacuajaari na cuhuatai. Borrego Niquiojuacuajaari na cuhuatana.

²⁴ Puetunu jiyacajinia quijiaca pueyajanaari cuno tiaca caaniuji quijiaca quiniutianiya. Puetunu jiyaca jiyaniijianucujanaari socua nojori panishano casami patootanutaniya nojori cuhuatana tiacajiniara, Jiyaniijajanaa nojori niquitiosocoriquiano. ²⁵ Cuno tiaca tootihuari pueyaracaanu ritaquesano quiniutianiya, juuca na quiniucua pueyaracaanu. Cuniqi, majaari quenaaja niucua niishishaanu quiniutianiya. ²⁶ Jiyajinia quijiaca pueyari socua na panishano casami patootanutaniya cuno tiacajiniara. Cuno tiacaari jiyanhua nojori timitiasano quiniutianiya. ²⁷ Saniniuuja, maja cutaraari sesa casaa tiuquinishaanu quiniutianiya cuno tiacajinia. Naajuhua, majaari sesa miijiaca tiuquiniu quiniutianiya tii, sapojonujuacanio. Saaja noo nojori cutaraari tii tiuquitianutaniya canapue sesacate pueyaracaanu rishijiacarano Borrego Niquiojua naajioneejinia naajiotasano quiyacujani.

22

¹ Na nuhuaji, Pueyaso seruuri cua niqutirii pueya samiitianijotaja moo, cohujajacu tojetaarucujanaa. Nenecuariquiari. Cuno mohua-

caari Jiyaniijia Pueyaso cajitiujiniji pacartariquiaa, tee Borrego Niquiojua cajiyaajaanihuaj. ² Samiitianijia naanaari tiaca nuu jiuujiaaco nujuaturiquiaa, cuno moo shuriuquiocojuhuaj, niiquijiria, na taquijirianio. Cuno naanaari puetunu racarajanaa muetujuaca. Naacuajitij, puetunu marijarajanaa, doce caminiujia muetunuuri. Na muecaari maninia, puetunu jiyacajinia quijiaca pueyajanaa naarajotajara. ³ Cuniqúi, majaari socua Pueyaso sesacasano casaa quiniu quiniutianiya. Naacuajitij, Pueyasojuaanaa, Borrego Niquiojuajuhuj, nojoricuajaari cuno tiacajinia quijiaca quiniutianiya, Jiyaniijiajanaa cajitii quiniucua tii. Nojori tojtiajacaari nojori timitianutianiya pueyaracaanu tii. ⁴ Nojoriiri Pueyaso jiquioco shootiajaca quiniutianiya. Na sesaari nojori jiniji naajiotasano quiniutianiya. ⁵ Cuniqúi, majaari niucua niishishaanu quiniutianiya. Tii quijiaca pueyari maja na paniniu quiniutianiya samaritu, pananunio. Jiyaniijia Pueyasojuaanaacuajaari nojori cuhuatanutianiya. Nojoriiri jiyaniijianucua quiniutianiyajuhuj, puetunu Pueyaso shipinishanojuanaa nojori jitianura pueyaracaanura.

Jesucristo quera tiuquihua

⁶ Na nuhuaji, Pueyaso seruuri cua sequeree:

—Cua niqúitishano quiajaniani, cua sequesanojuhuaj, puetunu cunojuaanaari seetanujuaanaa. Puetunujuaanaari tohuateeriquiano. Pueyasoori na Sohanuta niishitiquiaa na sequesano caminiujianiaa pueya, nojori pohuatanura pueya niqúiaa na niishitiniu panishano. Naajuhuj, nojuacuajaari quiaríjia na seru jiyaroree, na tojtiajaca na niishitiniuria taa quiari naataja nojuaja tucatanutianiya puetunu na sequesanojuanaani. ⁷ Pa Jiyaniijiacuajaari naa sequeya: “Janiya quera tiuquihua niaacuani”. Shuquíriaatia quijiaca cutaraari noo pojori, canapúete nio naajioneejinia Pueyasojiniji niishitishano tojijiacani.

⁸ Janiyajanaacuajaari nio cua naajiotasano niquiniani, na tojiniajuhuaj. Janiya Juanni. Naa cua niqúiniu nuhuajitij, cua tojinu nuhuajijuhuj, janiyari Pueyaso seru pajama mojoquetareeni. Janiyari naa mojoquetaree nojuaja cua timitianura juucuaní, juhua Pueyaso. ⁹ Nojuajaari cua sequeree saaja:

—¡Maja naa miiniu pueyanonaa! Janiyari Pueyaso serujuhuj, juhua quiajanijuhuj, juhua puetunu quiarta Pueyaso sequesano caminiujianiaa pueyajuhuj. Naajuhuj, nio naajioneejinia naajiotasano tojijiacapueyani, nojoriiri cuarta Pueyaso seyajuhuj. ¡Pueyasojuaanaa quia timitiare cutara!

¹⁰ Cua sequereejaariuhuj:

—Pueyaso niishitishano nio naajioneejinia quia naajiotasanoni, cunoori maja saa quiaraja. Puetunu pueyajanaa cuara na niishiirianoj. Puetunu niya naajiotasnocuajaari quera tohuateya. ¹¹ Naacuajitij, canapúete sesa na miiniu tarinitianu paniaquiyani, sacuraatia miijiojuacajuhuj, cuara na tarinitiaquiiriqui. Saniniujia, canapúete maninia miijiojuaca cutarani, saaja Pueyasora poonijionuujacajuhuj, nojori cuara tarinitiaquiiria maninia nojori miinijuhuj.

¹² Pa Jiyaniijiacuajaari naa pa sequeya:

—¡Taaquíriirinij! ¡Quera tiuquihuanijia! Janiyari cua tojtiajaca cua niqúitiosocoriquiano casaa tiuquitianutaniuhuaní. Janiyari puetunu nojorijanaa nareja niqúitiojonutaniyani, maninia nojori miiniucua quiria, nojori miishano jaara maninia quiri. ¹³ Pueyaso Rupaa cua quiniucua, janiyari puetunu Pueyaso sequenu panishanojuanaa caminiujianiani. Janiyari quijiajuhanani. Majaari cua supuenú quiquiaari. Janiyari puetunu casaajanaa coretanijiani, na shaajariquianojuhuaj.

¹⁴ 'Shuquiriaatia quijiaca cutaraari noo pojori, canapuete juhuacarijia nojori jiuujia jeequecanu Borrego Niquiojua nanacatani. Nojoriiri juhua cohuaajaque toqueyaraca quiniutianiya cua niquiara. Naacuajitij, nojoriiri tiuquitianishaanuniya Pueyaso quijia tiacajinia, nojori mioonura pueyaracaanu pueya rishitijia naanajiniji. ¹⁵ Saniniuujia, nio pojoriiri Pueyaso tiaca mataca tamajiria jateenutaniya: sacuaraatia casaa miijia, shimiacuri, na camishoo maajipohua numuetucunuujua, narta pueya puecoojuaca, shipinijiosano casaacuara jacamatujuaca juhua Pueyasoocua, cuaracashijionu porocua pueyanio.

¹⁶ Janiyacuajaari cua seru jiyarorucuaa quiocuan, na niishitiniuria quia-janiya puetunu niya quia naajiotasanojuanaa, saniniuujia Pueyaso pueya maapue niquiara na caminiujushaanura. Janiyacuajaari Jesuni, supuetana David niquiohuacuajinio caneno pueyajinijinio supueno, Jiyaniijiajanaa cua quiniuria David niti. Naajuhua, Pueyaso Niyanu cua quiniucua, janiyari noo rijiani, joojeatej, taa janiyajiniji naajiotasano quiya tariucuaaanu Pueyaso Rupaajiniacuajani.

¹⁷ Pueyaso Sohuanuuri Borrego Niquiojua niquioranota naa sequetiuya: "¡Miji Jiyaniijianaa!" Canapuete naa nio naajioneejinia naajiotasano tojiyani, nojori cuaara naa sequeerajuhua: "¡Miji!" Cante jiyamueyani, nojori cuaara niiria, Pueyaso samitianiijiotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

¹⁸ Cante nio naajioneejinia juhuacarijia Pueyaso niishitishano tojiriini, taa Pueyaso miiniutianiyani, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneejinia na pohuatasano naquiya na miitijia casaata. ¹⁹ Naajuhua, cante nio naajioneejinia pohuatasano cuaracashitijiani, Pueyasoori cuno pueyano taanuunutaniya, maja na quijia tiacajinia na tiuquiniuria. Naacuajitij, majaari nojori mioonu quiniutianiya cuno tiacajinia naana jajau, pueyaracaanu rishijia nojori quiniuria, taa nio naajioneejinia na pohuatashiyacuajani.

²⁰ Cante nio sequeyacuajani, nojuajaari naa sequeya: "Taaquiriirinij, quera tiuquihuanijia".

Jaa, Jiyaniijia Jesunaa. ¡Naacuaaquiniatejaj! ¡Ritia quia nimiohua canaacua!

²¹ Pa Jiyaniijia Jesu cuaara puetunu nijaniyajanaa cumaquiiria na Sohuanuta.